

بِسْمِ اللّٰهِ الرَّحْمٰنِ الرَّحِیْمِ

حیاتی حضورِ دی

کتاب سرائے

بیت الحکمت لاہور کا اشاعتی ادارہ

الحمد مارکیٹ، اردو بازار لاہور

بیاد
پروفیسر عبدالجبار شاہ
۱۹۴۷ء-۲۰۰۹ء

HAYATI HAZOOR DI

(Holy life of the Prophet Muhammad PBUH)

Written by Asghar Ali Javed

1st Edition: 2012

جملہ حقوق محفوظ
۱۳۳۳ھ-۲۰۱۲ء

| | |
|---------------|-----------------------|
| ناں کتاب: | حیاتی حضورؐ |
| لکھاری: | اصغر علی جاوید |
| مکھ پناں: | عبدالرؤف 0321-4210145 |
| مڈھلا ایڈیشن: | نومبر 2012ء |
| چھاپہ خانہ: | میٹروپریٹرز، لاہور |
| اہتمام: | بیت الحکمت، لاہور |

کتاب سرائے
فرسٹ فلور، الحمد مارکیٹ، غزنی سٹریٹ لاہور

اپنی ماں

فاطمہ بیگم دے ناں
جسہاں پنجابی دا پہلا اکھر بولنا سکھایا
تے

اپنے محسن

الیاں گھمن دے ناں
جسہاں پنجابی دا پہلا اکھر لکھنا سکھایا

ترتیب

باب نمبر ۱:..... مڈھلے اکھر

- ۱۳ لوڑکیہ اے پڑھن دی؟
- ۱۸ سیرت کو یں پڑھیے؟
- ۲۰ سیرت نگار دیاں ذمے واریاں
- ۲۳ سیرت رسول تے قرآن
- ۲۷ مغازی، سیرت، حدیث تے تواریخ دا ویروا
- ۲۸ سیرت کیہ اے؟
- ۲۹ حدیث تے سیرت دا فرق
- ۳۰ سیرت تے تاریخ دا فرق
- ۳۰ سیرت دے ماخذ
- ۳۲ سیرت دا مڈھلا دور

باب نمبر ۲:..... سیرت اتے مڈھلیاں کتاباں تے اوہناں دے لکھن والے

- ۳۵ ابان بن عثمان
- ۳۵ عروہ بن زبیر
- ۳۶ ثرجیل بن سعد
- ۳۶ وہب بن منبہ
- ۳۷ عبداللہ بن ابی بکر
- ۳۸ عاصم بن عمر
- ۳۸ ابن شہاب الزہری
- ۳۸ موسیٰ بن عقبہ
- ۳۹ معمر بن راشد
- ۳۹ محمد ابن اسحاق
- ۳۹ ابو معشر السندی
- ۴۰ الواقدی

- ۴۰ ----- ابن ہشام
- ۴۱ ----- محمد بن سعد
- ۴۱ ----- البلاذری
- ۴۱ ----- یعقوبی
- ۴۲ ----- طبری
- ۴۲ ----- ابن حزم
- ۴۲ ----- حافظ ابن عبد البر
- ۴۳ ----- متاخرین دیاں گجھ کتاباں
- ۴۳ ----- الروض الانف
- ۴۳ ----- تلخیص فہوم الاثر
- ۴۳ ----- عیون الاثر فی فنون المغازی والشمال والسير
- ۴۴ ----- زاد المعاد فی ہدی خیر العباد
- ۴۴ ----- سیرت ابن کثیر
- ۴۴ ----- المواہب الدنیہ
- ۴۵ ----- زرقانی علی المواہب
- ۴۵ ----- انجیس فی احوال الانفس نفیس
- ۴۵ ----- انسان العیون فی سیرۃ الامین المامون

باب نمبر ۳:..... پنجابی زبان دا سیرتی سرمایا

- ۵۰ ----- سیرت تے باقاعدہ اکم
- ۵۰ ----- خیر البشر عرف شان حضورؐ مکملی والا
- ۵۰ ----- توحید دا باغ
- ۵۰ ----- سیرت الحبيب
- ۵۰ ----- شفا القلوب
- ۵۰ ----- روح المیلاد فی ذکر المیلاد
- ۵۱ ----- شاہنامہ اسلام
- ۵۱ ----- حضرت محمدؐ صاحب جی دا پو تر جیون

- \oplus

- ۵۴ ----- خزینہ رسالت ❁
- ۵۴ ----- نبی پاک دے مجھے ----- ❁
- ۵۴ ----- سرکار دی سیرت ----- ❁
- ۵۴ ----- سوہنا محمد a ----- ❁
- ۵۴ ----- قرآن تے تصوف ----- ❁
- ۵۵ ----- سئیں سونڑھیں دی سیرت ----- ❁
- ۵۵ ----- سئیں سونڑھیں دا خلق ----- ❁
- ۵۵ ----- حضور دا ویریاں نال سلوک ----- ❁
- ۵۵ ----- پنجابی ادب وچ سیرت رسولؐ ----- ❁
- ۵۵ ----- سیرت تے قومی شاعری ----- ❁
- ۵۵ ----- سئیں سونڑھیں دا ذکر ----- ❁
- ۵۵ ----- سئیں سونڑھیں دا کمال ----- ❁
- ۵۵ ----- النبی الکریمؐ ----- ❁
- ۵۵ ----- نور نبیؐ دیاں کرناں ----- ❁
- ۵۶ ----- حراد اچان ----- ❁
- ۵۶ ----- سئیں سونڑھیں دا جمال ----- ❁
- ۵۶ ----- سیرت دا چان ----- ❁
- ۵۶ ----- عالم داسر کردہ ----- ❁
- ۵۶ ----- عیبوں خالی ----- ❁
- ۵۶ ----- آفاقی رسولؐ ----- ❁
- ۵۶ ----- رسول کریم دی سیانف ----- ❁

باب نمبر ۴:..... سیرت نگاری تے مستشرقین

باب نمبر ۵:..... جزیرہ نمائے عرب دی تواریخ تے جغرافیا

- ۶۵ ----- یمن دی سیاسی صورت حال ----- ❁
- ۶۶ ----- حیرہ دی بادشاہی ----- ❁
- ۶۷ ----- شام تے مصر دیاں حکومتاں ----- ❁

- ۶۸ ----- مجاز وچ اقتدار دی کھچا تانی ❁
- ۷۳ ----- یثرب ❁
- ۷۴ ----- کندا ❁
- ۷۴ ----- باقی آل دوالا ❁

باب نمبر ۶:..... عالم بشریت اسلام تون اگدی

- ۷۶ ----- وں سوئے رب ❁
- ۷۹ ----- تیرے ایہ صنم خانے ❁
- ۸۰ ----- عرباں دے اپنے بُت کدے ❁
- ۸۳ ----- اساف تے نائلہ ❁
- ۸۴ ----- مذہباں وچ وگاڑ ❁
- ۸۵ ----- ہندوستان دا مذہب تے ہندو ❁
- ۸۷ ----- ایران دی مذہبی حالت ❁
- ۸۹ ----- چین دا تاؤ ازم تے کنفیوشس ازم ❁
- ۹۲ ----- شنو ازم جاپان دا مذہب ❁
- ۹۳ ----- عرب دے مذہب ❁
- ۹۷ ----- رب نوں بھلی اُجڑ لوکا ئی ❁
- ۹۷ ----- جیون دی جانیں قبریں وچ ❁
- ۱۰۰ ----- سوانیاں یاں پشو ڈنگر ❁

باب نمبر ۷:..... حضور ۷ دے وڈکے

- ۱۰۷ ----- ابراہیم g خلیل اللہ ❁
- ۱۰۸ ----- نسب اُتے کھوج کاری ❁
- ۱۰۹ ----- قُصی بن کلاب ❁
- ۱۰۹ ----- کصصف ما کوں ❁
- ۱۱۲ ----- باراں پُتراں والا سردار ❁
- ۱۱۳ ----- انا ابن الذبیحین ❁
- ۱۱۴ ----- مکے دا یوسف عبداللہ ❁

حضرت آمنہ نال نکاح ----- ۱۱۵

باب نمبر ۸: چن چڑھیا گل عالم ڈٹھا

محمدؐ داناں ----- ۱۱۷

ایس ناں دیاں رسیاں کون کرے ----- ۱۱۹

مکے وچ تھڑھلی ----- ۱۲۰

ہوازن دیاں سوانیاں تے حلیمہ ----- ۱۲۱

مڈھلی حیاتی تے کیرن آرمسٹراگک دا بھولپن (معصومیت) ----- ۱۲۲

ماں میہڑ محمدؐ ----- ۱۲۵

ربا تیریاں توں جانیں ----- ۱۲۶

ننھے محمدؐ بابے ہوراں دی قبر تے ----- ۱۲۷

محسن نبوت جناب ابوطالب تے نوجوان محمدؐ ----- ۱۲۸

مینہ دی منگ ----- ۱۲۹

رحمت اللعالمین تے بحیرا ----- ۱۲۹

حرب فجار ----- ۱۳۰

حلف الفضول ----- ۱۳۱

شام دادو جاسفر ----- ۱۳۲

ایمن a تے طاہرہ اک ہوندے نیں ----- ۱۳۳

باب نمبر ۹: قبیل داری توں بعثت تک

حضرت خدیجہ b اُم المؤمنین دا اعزاز پاؤن والی پہلی نیک بخت بی بی ----- ۱۳۴

نکاح دے وقت حضرت خدیجہ تے نبی a دی عمر ----- ۱۳۵

کعبہ دی نویں تعمیر تے حجر اسود ----- ۱۳۷

امانت دار تے وعدیاں دا پکا ----- ۱۳۸

ایس دور دے سجن متر ----- ۱۳۹

بشارتاں، صداقتاں ----- ۱۳۹

بعثت توں کچھ اگدیں ----- ۱۴۱

توحید پرست بندے ----- ۱۴۲

- ۱۴۲ ----- a آلِ نبی ﷺ
- ۱۴۳ ----- b جنابِ قاسم ﷺ
- ۱۴۳ ----- c جنابِ زینب ﷺ
- ۱۴۵ ----- c حضرت رقیہ ﷺ
- ۱۴۵ ----- c سیدہ اُم کلثوم ﷺ
- ۱۴۶ ----- جنابِ عبداللہ ﷺ
- ۱۴۷ ----- لاڈلی ﷺ
- ۱۵۰ ----- حضرت ابراہیمؑ ﷺ

باب نمبر ۱۰:..... ربّ دا سنیھا

- ۱۵۲ ----- جبرائیل غارِ حرا وچ ﷺ
- ۱۵۳ ----- پہلی وحی تے اوس دی تاریخ ﷺ
- ۱۵۴ ----- ورقہ بن نوفل دا ایمان ﷺ
- ۱۵۶ ----- دعوت دی بسم اللہ ﷺ
- ۱۵۷ ----- جہناں سچ کچھاتا ﷺ
- ۱۵۷ ----- برادرانِ عبداللہ یاں برادرانِ یوسف ﷺ
- ۱۵۹ ----- اعلانیہ دعوت اسلام ﷺ
- ۱۶۰ ----- مثال موجب ﷺ
- ۱۶۱ ----- وچارے مسلمان ﷺ
- ۱۶۲ ----- آؤاک واری فیر تواریخ دے ورقے تھلئے ﷺ
- ۱۶۴ ----- پہلی شہید عورت ﷺ
- ۱۶۶ ----- مشرکاں دی چلاکی ﷺ
- ۱۶۷ ----- ابولہب تے ابو جہل دیاں التاں ﷺ
- ۱۶۷ ----- اُچے شملیاں والے ﷺ
- ۱۷۰ ----- مشرکاں دی فکر تے معجزیاں دی منگ ﷺ
- ۱۷۱ ----- مٹھیاں گلاں والی سرکار a ﷺ
- ۱۷۲ ----- کیہ بے درداں دے سنگ یاری ﷺ

- ۱۷۵ ----- حبشہ ول دو جی ہجرت
- ۱۷۵ ----- جعفر طیار نجاشی دے دربار وچ
- ۱۷۷ ----- حبشہ دے عیسائی جتھے دا مسلمان ہونا
- ۱۷۸ ----- پہلی غائبانہ نماز جنازہ
- ۱۷۸ ----- بنو عبد المناف نال گل بات
- ۱۷۹ ----- دار الارقم
- ۱۸۰ ----- ویلے دی مہار مڑ گئی
- ۱۸۰ ----- عمرو بن عبسہ السلمی b دا اسلام قبولنا
- ۱۸۰ ----- حضرت حمزہ دا قبول اسلام
- ۱۸۱ ----- عمر فاروق مسلمان ہوندے نیں
- ۱۸۳ ----- سوشل بائیکاٹ
- ۱۸۶ ----- شق القمر
- ۱۸۷ ----- واقعہ شق القمر دی ہندوستان وچ تصدیق
- ۱۸۸ ----- مشرک اک وار غیر جناب ابوطالب دی خدمت وچ
- ۱۹۰ ----- (عام الحزن) دکھاں دا ورھا
- ۱۹۱ ----- اُم المومنین حضرت سودہ نال شادی
- ۱۹۲ ----- حضرت عائشہ صدیقہ نال نکاح
- ۱۹۲ ----- رسول خدا طائف وچ
- ۱۹۵ ----- نبی رحمت تے پہاڑاں دا فرشتا
- ۱۹۶ ----- عرب دے قبیلیاں تیکر رب دا سنیہا
- ۱۹۷ ----- بابا جی دامنگھ
- ۱۹۷ ----- سوید b بن صامت یثرب دے پہلے مسلمان
- ۱۹۸ ----- ایاس بن معاذ اوس دا نو عمر منڈا
- ۱۹۸ ----- ابوذر غفاری b یثرب دا سچا عاشق رسول
- ۱۹۹ ----- طفیل b بن عمرو اک سو جھوان سردار
- ۲۰۰ ----- ضما دزدی b

باب نمبر ۱۱:..... بشر تے گردوں (واقعہ معراج)

✽ معراج تے قرآن وحدیث ----- ۲۰۸

باب نمبر ۱۲:..... اسلام یثرب وچ

✽ عقبہ دی بیعت پہلی تے دوجی ----- ۲۱۴

✽ تواریخ اسلام دا پہلا جمعہ ----- ۲۱۹

✽ عقبہ دی دوجی بیعت ----- ۲۱۹

✽ باران نقیب تے سعد بن عبادہ ----- ۲۲۱

✽ مشرک یثربی دارب تے مویا ہویا گتا ----- ۲۲۳

باب نمبر ۱۳:..... مکے والیاں دی ضد عقل دی تکرری آتے

✽ خدائی دے دُجے دعویدار ----- ۲۳۱

✽ یثرب جان دی اجازت تے ہجرت دیاں اوکڑاں ----- ۲۳۱

باب نمبر ۱۴:..... ہجرت دا فلسفا

✽ ابلیس دی پارلیمنٹ ----- ۲۳۸

✽ واللہ خیر المکرین ----- ۲۴۰

✽ غار ثور ----- ۲۴۲

✽ سازش ناکام ہو گئی ----- ۲۴۲

✽ ذات الطاقین اسماء بنت ابوبکر صدیق ----- ۲۴۵

✽ اُمّ معبد واقصاً ----- ۲۴۵

✽ بریدہ سلمی نال ٹاکرا ----- ۲۴۶

✽ رسول خدا قبا وچ ----- ۲۴۷

✽ یثرب مدینۃ النبی بن گیا ----- ۲۴۸

✽ قضوی یاں قصواء ----- ۲۵۰

باب نمبر ۱۵:..... ہجرت دا معجزا

✽ نبی a دی حیاتی وچ پہاڑ تے غاراں ----- ۲۶۰

باب نمبر ۱۶:.....رسالت محمدی ۷ عقل دی کسوٹی اُتے

- ۲۶۵ ----- النبی الامی ❁
- ۲۶۸ ----- استقامتِ نبی a ❁
- ۲۷۰ ----- صحابہ دی استقامت ❁
- ۲۷۲ ----- قیصر روم دا اعتراف ❁
- ۲۷۵ ----- شق صدر ❁
- ۲۷۵ ----- کیہ بھیدی؟ ❁
- ۲۷۶ ----- سوچ دا اختلاف ❁



مڈھلے اکھر

لوڑکیہ اے پڑھن دی؟

مکے دا اک وگڑیا سردار مدینے دے اک شاناں والے گھر وچ آؤندا ہے۔ گھر دی مالکن دے کمرے وچ پیر رکھدا ای اے تے مالکن کمرے وچ وچھی ہوئی چٹائی سمیٹ لیندی اے۔

”ایہ کیہ؟“ سردار پچھدا اے۔

”نساں ویکھ تے لیا اے،“ مالکن جواب دیندی اے۔

”پر اُم حبیبہ! میں تیرا باپ ہاں“ سردار آکھدا اے۔

”کدوں انکار کیتا اے میں پر گل ایہ ہے پئی جس چٹائی اُتے رب داجبب آرام کردا ہووے اوس تے کسے مشرک تے بُت پرست دے پیر نہیں لگنے چاہیدے، بھائیوں اوہ مشرک، نبی دی بیوی دا باپ ای کیوں نہ ہووے“ بی بی نے جواب دتا۔

”تینوں پتا اے پئی مکے وچ بنو بکر تے تہاڑے جماعتی قبیلے خزانہ وچکار لڑائی ہوئی اے۔ تیرے گھر والے نول شبہ اے پئی اساں مسلماناں دی مخالفت وچ بنو بکر دی مدد کیتی اے۔ توں محمدؐ نول سمجھا پئی ایہ گل ٹھیک نہیں تے نالے میری سفارش وی کر“ سردار نے آکھیا۔

”معافی چاہندی ہاں۔ میں کوئی سفارش نہیں کر سکدی۔ جناب محمدؐ a مسجد وچ موجود نہیں۔ جاؤ تے ایہ مسئلہ آپوں بیٹھو۔“ جناب اُم حبیبہ نے جواب دتا۔

حضرت اُم حبیبہ نے مشرک سردار تے نبی دے دشمن نول، نبی دی چٹائی اُتے تے دور دی گل، نبی دے گھر وچ بیٹھن داوی نہیں آکھیا۔ سچ تے ایہ ہے کہ اگر جناب اُم حبیبہ دے وس وچ ہونداتے اوہ چٹائی کیہ، اوہدے پیراں پٹھوں اوہ متبرک تے پاک زمین دی کھچ لیندے چھنوں نبی دے پیراں نول چمن دا شرف حاصل سی۔ منیا کہ آؤن والا پروہنا گھر دی مالکن دا باپ سی، پرسی تے نبی a دادشمن، پکاتے پیڈھا دشمن ابوسفیان۔

خونی رشتیاں نول پچھے سٹ کے اسلام دے مساوات، اخوت تے بھائی چارے دے رشتیاں دی نہ ٹھن والی لڑی وچ پروئے جان دی ایہ کوئی کلی مثال نہیں، سگوں اسلامی تواریخ اجیہاں ان گنت مثالاں نال بھری پئی اے۔ اودھر ساڈے آقا و مولا دی سوئی نظر پئی تے اودھر دلاں دیاں سیابیاں دور ہوئیاں۔ شرط ایہہ ہے پئی اوہ ختم اللہ علی قلوبہم دے خانے وچ نہ آؤندے ہون۔

کیہ اے سچ نہیں پئی نجد دے وحشی، تہامہ دے بدو تے یمن دے مسکین موڈھے نال موڈھالا کے کھلوتے نیں، تے

صرف کھلوتے ای نہیں سگوں اونہاں نوں ایس گل دا فخر وی اے پئی رنگ نسل، امیری غربی، اُپے نیویں، عربی عجی، شہری بدوی تے جہالت دیاں اجہیاں ڈھیر رسماں تُوں اونہاں اپنے پیراں تھلے مدھ کے رکھ دتا اے۔

کیہ ایہ سچ نہیں پئی عبداللہ بن سلام یہودیت، ورقہ بن نوفل عیسائیت تے عثمان بن طلحہ ابراہیمیت دیاں گدیاں چھڈ کے اپنے ناں اسلام دے خادماں وچ لکھان لئی بے تاب ہو گئے۔ یہودیاں دا زرخیز غلام سلمان پارسی اہل بیت دا درجا پاؤندا اے۔ اک کالا سیاہ مُنڈا جہڑا مشرکاں دا مُل خرید یا غلام سی، اوس تُوں اوہ عمر وی ناں لے کے آواز نہیں دیندے جس دی ہیئت نال قیصر و کسریٰ کنب جان دے سن۔ اوہ بلال، بلال دی بجائے سیدی سیدی (آقا آقا) آکھدے پھر دے نیں۔ حسب نسب دی شرافت تُوں زبان تے لیانا کمینگی دی نشانی بن گیا تے اک دے اک دین نے سبھناں نوں اک بنا دتا۔

کیہ ایہ سچ نہیں پئی اوہ عمرو بن عاص جہڑا مشرکاں دا سفیر بن کے جعفر بن ابوطالب تے اونہاں دے مہاجر ساتھیاں دی شامت لیاؤن لئی نجاشی کول گیا سی، کجھ ورھیاں بعد اوہ ہی اسلام دا سفیر بن کے عمان دے بادشاہ کول جاندا اے تے فیر ہزاراں بندیاں دے مسلمان ہو جان دی خوشخبری وی حضور a دی خدمت وچ سناؤندا اے۔ اک سیانا، لڑاکا تے جوان کافر جرنیل جیہڑا جنگ احد وچ مشرکاں دے رسالے دی کمانڈ کردا اے تے مسلماناں تُوں تہس نہس کر دینا اپنی حیاتی دا ٹیچا مُتھدا اے، کجھ چراں بعد حضور a دی خدمت وچ حاضر ہوندا اے۔ لات تے عزّی دے مندراں تُوں اپنے ہتھیاں نال توڑ دا اے تے اسلامی فتوحات وچ اوہ گرم جوشی وکھاؤندا اے پئی اج وی اسلام دے نامور جرنیلاں دی فہرست خالد بن ولید دے سوہنے ناں توں بغیر ادھوری رہندی اے۔ اوہ عروہ بن مسعود جہڑا حدیبیہ دے مقام تے حضور تُوں ملے وچ داخل ہون توں ڈکن لئی قریشیاں دا چودھری بن کے آؤندا اے، آپوں مدینے حاضر ہوندا اے تے اپنی قوم نوں اسلام دی دعوت دین دی اجازت حاصل کر کے پچھانہہ پر تدا اے تے فیر ایسے خدمت وچ اپنی جان قربان کر دیندا اے۔ اوہ سہیل بن عمرو جہڑا حدیبیہ دا صلح ناما لکھدیاں ویلے مشرکاں ولوں کمشنر مقرر ہو یا سی تے فیر اوس نے معاہدے وچ اسم پاک مُحمد دے نال رسول اللہ دے اکھر لکھن توں نہ صرف انکار کیتا سگوں ایہ اکھر کٹاوی دتے، اوہ ہی سہیل کدی بیت اللہ وچ کھلو کے اسلام دی صداقت تے رب دے دین دی تائید وچ اجمعی تقریر کردا اے پئی لوکاں دے دل ایمان تے توحید دے جذبیاں نال بھرے جان دے نیں۔ اوہ عمر جہڑا حضور a دا سر مبارک قلم کرن دے ارادے نال گھروں نکلد اے، آپ a دے وصال دے دیہائے ننگی تلوار لے کے مدینے دیاں گلیاں وچ غم نال تڑندا شیدا ئیاں وانگ واجاں لا رہیا اے ”لوکو! سُن لو، جس کسے آکھیا پئی میرا آقا تے اللہ دا نبی مر گیا اے اوس دی دھون ہووے گی تے عمر دی تلوار۔“ اوہ وحشی جس نے امیر حمزہ تُوں شہید کیتا، کججا کڈھیا، جُسے دے ٹوٹے کیتے تے شہید دی میت دی بے حرمتی کیتی، کجھ دناں پچھوں آغوش نبوت وچ آؤندا اے تے رحمت للعالمین دی زبان مبارک توں ایہ اکھر نہیں نکلدے پئی، دفعہ ہو جا، اے کل تے توں میرے چاچے تُوں قتل کیتا اے۔ قاتل شرم تے خجالت نال موئے لکائی پھر دا اے تے رب دا محبوب a آؤن والے نوں جی آیاں نوں آکھدا اے۔ اخیر امیر حمزہ دے اوسے قاتل ہتھوں بد بخت مسلمہ کذاب قتل ہوندا اے۔

چاچے حارث داپڑر ابوسفیان جہڑا آپ دی شان وچ گستاخیاں کرن لئی سارا دین شعر گھڑدا تے لوکاں تُوں سناؤندا

رہنداسی، اک دن نبی آخری الزماں a دی خدمت وچ حاضر ہوندا اے تے اخیر جنین دے معرکے وچ نبی دی سواری دی رکاب بھڑ کے کلا کھلوتا نظر آؤندا اے۔ اوہ ابوسفیان بن حرب جہڑا ست ورھے حضور a دے مقابلے وچ فوجاں لیاندارہیا تے مسلماناں دے خلاف ہر پاسے فساد دی آگ بھڑکاندارہیا، اخیر اسلام دے دائرے وچ آؤندا اے تے نجران دے عیسائی علاقے دا حاکم بن کے اسلام دے جھنڈے گڈدا اے۔ اوہ طفیل دوسی جہڑا سکے دیاں لگیاں وچ پھر دالیں پاروں روں دے پھاہے اپنے کناں وچ رکھ لیندا اسی پئی کد رے محمد a دی واج اوہدے کناں وچ نہ پے جاوے، اخیر اپنے وطن وچ گلی گلی تے گھر گھر پھر دارہیا تے محمد a دی واج لوکاں دے کناں تیکر اپڑاؤندا رہیا۔ طائف دے لفنگیاں دا سرغنہ پتھر مار مار کے جہڑے پیراں ئوں رتا کردارہیا اخیر اوہناں پیراں ئوں چمن لئی مدینے حاضری دیندارہیا۔ اوبی بریدہ بن حصیب اسلمی جہڑا اک سولال اٹھناں دے لالچ وچ حضور a دی ہجرت دے وقت گرفتاری لئی ستر سواراں دا دستا لے کے مگر گیا سی، چند ای گھنٹیاں بعد نبی تے اوس دے دین دا علم بردار بن گیا۔

اخیر کوئی تے گل سی پئی جہڑا ایس مقناطیس دے ساہمنے آ گیا اوہ فیر کھچیا ای ٹر یا آیا۔ ایہ سبھ کچھ ایویں تے نہیں سی۔ ایہ اوس پاک تعلیم تے اوس سؤنی تربیت دے کرشمے سن جہڑی اوس معلم اعظم دا خاصا سی۔

پچھلے چودھواں سو ورھیاں توں، جدوں رسالت دا ایہہ سورج چمکیا، اج تیکر کسے ورھے دا کوئی مہینا، کسے مہینے دا کوئی دن، کوئی گھنٹیاں منٹ تے فیر اوس دا کوئی سیکنڈ سگوں مانیکر ویکینڈا جہیا نہیں گزریا جدوں آسمان تے زمین اُتے اوس دا ذکر نہ ہو رہیا ہووے۔ آسمان والیاں دا تے خیر سائل سا تھوں اڈتے وکھراے اسیں خاکی وی رب دے ناں نال، رب دے کرم نال محمد a دے ناں دی مالا ضرور چدے ہاں۔

یورپ دا نمائندہ مستشرق تے رومانیہ دا وزیر اُخارجا کونسٹن ورجیل جو جیو آکھدا اے پئی اسیں تیراں سو ورھے بھلے رہے ہاں۔ اصل گل ایہ ہے پئی محمد a اچھے پیغمبر نیں جنہاں ئوں مڈھوں (از سرنو) پچھانن دی لوڑ اے۔ ایہدا مطلب اے پئی محمد a اوس ئوں رومانیہ وچ نظریں پئے نیں جتھے لوکاں نوں رب وی نہیں دس دا (رب اوس دی بینائی ئوں ہو رتیز کرے)۔ اچھے تھوڑا چراگدیں مانیکل ہارٹ نے جدوں انسانی تاریخ دے سوعظیم بندیاں دی فہرست ترتیب دتی تے اپنی کتاب دے دیباچے وچ لکھیا:

”میں ایہ گل زرو دے کے آکھ چکیا ہاں کہ ایس کتاب وچ بندیاں دی شمولیت دی کسوٹی اوہناں اثر پذیریں اے..... جے تسیں وی سوچو کھے اثر رکھن والے انساناں دی فہرست بناؤ تے مینوں یقین اے پئی جس انداز نال ایس نے مینوں تاریخ نوں خاص زاویے توں دیکھن دے قابل بنایا اے، تہاڈا تجربا وی وکھرا نہیں ہون لگا۔“

مانیکل ہارٹ اثر پذیریں دے حوالے نال اپنی لکھی ہوئی کتاب وچ انسانیت دی پوری تواریخ وچوں جس ہستی ئوں پہلے نمبر تے لکھدا اے اوہ ہے محمد a دی ذات بابرکات۔

محمد رسول اللہ a دی حیاتی وچوں نکلیاں، روشنی دیاں شعاواں ئوں اکٹھیاں کرن لئی اپریل ۵۷۰ء توں لے کے ۲۱ ویں صدی تیکر بے شمار کوششاں ہوئیاں نیں پر اچھے تیکر چار چھیرے کھلری ایس روشنی ئوں سانھیا تے

سمیٹا نہیں جاسکتا تے نہ ای مسلم یا غیر مسلم اہل قلم نے ایہ گل آکھی اے کہ بس بھئی! ہُن سیرت تے لکھن دی لوڑ نہیں رہ گئی۔ امریکا ور گے ملک وچ 20 ویں صدی دے اخیر دی دہا کے وچ وی سیرت پاک تے کئی کتاباں چھپیاں۔ جویں کہ Muhammad and the Origins of Islam F.E.Peters تے karen Armstrong دی Muhammad---- A Biography of the Prophet محمدؐ کے چر پہلوں امریکی ویب سائٹ ایم ایس این جی سی، دے اک سروے وچ دُنیا دیاں ۷۱ عظیم ہستیاں دے ناں دتے گئے تے اک لکھ تیراں ہزار چار سو اُنتی افراد نے عظمت تُوں معیار بناندیاں اپنے ووٹ پائے۔ ایس بین الاقوامی سروے وچ لوکاں نے ۸۰ فیصد ووٹ نبی اکرم a تُوں پائے تے ۱۱ فیصد ووٹ حضرت عیسیٰ تُوں۔ باقی ۱۵ ہستیاں نوں صرف ۹ فیصد۔ ایس توں اندازہ ہندا ہے کہ آج دی دنیا وی سرکار a نوں سب توں عظیم ہستی دی حیثیت نال ویکھدی اے تے یقیناً کجھ ہور وی حقیقتاں ہون گئیاں جہناں تک ایس فقیر دی رسائی نہیں ہو سکی۔

کے دے آکڑ خاں سرداراں دی دُشمنی توں لے کے مدینے دی پہلی اسلامی ریاست دے قیام تیکر اوہ کہڑیاں اوکڑاں سن جہناں نال پیغمبر خدا تُوں واسطہ نہیں سی پیا۔ فیروی جس شتابی نال دین محمدی دی روشنی چار سو کھلری ایہ کوئی معمولی گل نہیں۔ یقیناً ایہدی وجہ اوہ اُچا تے سچا اخلاق تے کردار سی جس توں جانی دشمن وی اثر قبولے بغیر نہ رہ سکے۔ سو ایہ گل آج وی اتنی ہی ضروری جا پدی اے جی گئے دناں وچ سی، پئی اسیں اوس ہستی دی حیاتی دے اک اک لمحے سگوں اک اک سانس کولوں زندگی گزارن دے ڈھنگ تے طریقے سکھ کے دنیا تے کامرانی تے آخرت دی سرخروئی حاصل کرینے۔ سبھ توں ودھ کے ایہ گل بھاری جا پدی اے پئی رب تعالیٰ خود فرماندے نیں:

﴿لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ﴾ (الاحزاب: ۲۱)

”تھاؤ لے لئی اللہ دے رسول دی ذات وچ اک بہترین نمونہ موجود اے۔“

سوجدوں اسیں ایہ جانن دی کوشش کراں گے پئی اوہ کہڑا سچا نمونہ اے جہد اذکر قرآن کر دے تے لازمًا ساڈا دھیان سیرت پاک a ول ہی جائے گا۔ جے کوئی مسلمان ایہ یقین رکھدا اے، جسدا کہ سوال ای پیدا نہیں ہوندا، پئی اوس تُوں حیاتی گزارن دے سارے سچ تے طریقے آؤندے نیں تے نالے آخرت دے فکراں تے دکھاں توں وی اوہ آزاد اے تے فیر سچ مچ اوس نوں ایس اُسوہ حسنہ توں مدد لین دی لوڑ کوئی نہیں تے جے اوہ سمجھدا اے پئی نہ اتھتے گزارا اے تے نہ اگلے جہان وچ کوئی چارا اے تے فیر سیرت توں رہنمائی ضروری اے۔

”لوڑ کیہ اے پڑھن دی“ دے سرنا ویں تھلے گل اگے ودھائیے تے اک پاسیوں ایہ سوال وی کنیں پیندا اے پئی اک اجہی ہستی جس تُوں چوداں سو سال دی لمی مدت گزر گئی اے، آج دے دور لئی کیہ اہمیت رکھدی اے تے اوس دی حیاتی دا مطالعہ آج کیہ فیدا دیوے گا؟ ایس سوال دے جواب لئی اوس دیہاڑے تے جھات پانا ضروری اے جس دیہاڑے عمر فاروق b ننگی تلوار لے کے مدینے دیاں گلیاں وچ منادی کردے پھر رہے سن کہ خبردار جے کسے آکھیا پئی پیغمبر خدا فوت ہو گئے نیں۔ ایس فقیر دا ایمان وی اوس عاشق صادق توں وکھرا نہیں پئی اللہ دے نبی a تے میرے آقا و مولا

زندہ نہیں تے اپنی اُمت دی راہبری تے راہنمائی دا فریضہ نبھائی آؤندے نیں۔ دوجی گل ایہ ہے کہ اوہ ہستی جس نے سانوں راہواں بھلیاں توں صراطِ مستقیم دکھایا، جس نے سانوں کفر تے شرک دے انھیریاں وچوں کڈھ کے توحید دی روشنی دکھائی تے جس نے ساڈے سراں تے مٹھیاں توں ہزار معبوداں اگے خاک آلود ہون دی رسوائی توں بچایا، اسیں اپنے اوس محسن دی حیاتی توں جانو ہون دی کیوں کوشش نہ کریے؟ اوہ ہستی کتھے پیدا ہوئی؟ کدوں پیدا ہوئی؟ اوہ کیہ سنیہا لے کے آئی؟ اوہ سنیہا لوکا کی تیکر اپڑان لئی کنیاں تے کہڑیاں اوکڑاں پیش آئیاں؟ پاک جسے تے کئے زخم لگے تے طائف وچ رُکنا لہو کہڑی کہڑی تھانوں رنگ گیا۔ اوس دے سنبے دا لوکا کی توں کیہ فیدا ہو یا تے اوہ دیاں گلاں نوں بکھیرا مجھن والیاں توں تواریخ نے کویں ہتھ پایا۔ ایہناں ساریاں سوالاں دا جواب سیرت دے مطالعہ نال لہجہ سکدا اے۔ تیجی گل ایہ ہے پئی قرآن دا ہر حکم ساڈے لئی واجب العمل اے، جہڑا آکھدا اے:

﴿مَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا﴾ (الحشر: ۵۹)

”جو کچھ رسول خدا تہانوں دے دین اوہ لے لوؤ تے جس توں ڈکن اُس توں رُک جاؤ۔“

فیر آکھدا اے:

﴿وَمَا يَنْطِقُ عَنِ الْهَوَىٰ ۖ إِنْ هُوَ إِلَّا وَحْيٌ يُوحَىٰ﴾ (النجم: ۴، ۳)

”اوہ اپنے دلوں کوئی گل نہیں کر دے سگوں جو کچھ فرماندے نیں اوہ اللہ دا ارشاد ای ہوند اے۔“

ایہ وی آکھدا اے:

﴿مَنْ يُطِيعِ الرَّسُولَ فَقَدْ أَطَاعَ اللَّهَ﴾ (النساء: ۸۰)

”جس نے رسول دی اطاعت کیتی بس اوہنے اللہ دی اطاعت کیتی۔“

تے کھلے ڈلھے لفظاں وچ ایہ اعلان وی کردا اے۔ پئی:

﴿لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ﴾ (الاحزاب: ۲۱)

”رسول اللہ دی ذات وچ تہاڈے لئی عمل دا بہترین نمونہ اے۔“

ایس توں صاف پتا پیا لگدا اے کہ نہ صرف پڑھن دی لوڑ اے سگوں مسلمان ہون دے ناتے اسیں پڑھن دے پابند ہاں تے جے کرا ایس کتاب دا کوئی پڑھنہا مسلمان نہیں وی تے فیر اوہ ایس گل توں پھڑکے اگے تڑپوے کہ قرآن آکھدا اے:

﴿وَمَا أَرْسَلْنَاكَ إِلَّا رَحْمَةً لِّلْعَالَمِينَ﴾ (الانبیاء: ۱۰۷)

تے فیر اوہ رسول دی ذات تے کھوج کاری کر کے ویکھ لوے پئی گل کتھوں تیکر ٹھیک اے جہڑی کہ سو فیصد ٹھیک اے۔

صرف ایس لئی نہیں پئی قرآن آکھدا اے سگوں ایس لئی پئی حضور a نے ثابت کر کے دکھایا اے۔

اگلی گل ایہ ہے پئی اسلام وچ خدا دی ذات توں معبود تے کلا معبودن توں بعد سبھ توں پہلی گل حضور a دی نبوت تے ایمان لیاؤنا اے۔ جہڑی ذات ساڈے لئی ایڈی معتبر اے کیہ اوس دے حالات توں بے علم رہنا گناہ تے جرم دی گل نہیں؟ سچ ایہ وے پئی اوس پاک حیاتی دے اک اک لمحے تے اکھاں پوری طرحاں کھول کے جھاتی پان دی لوڑ اے تے

اس توں بنا چارا کوئی نہیں۔

سیرت کیوں پڑھے؟ دے جواب وچ ایہ گل دینی وی ضروری جا پدی اے کہ انسانی تواریخ دے وڈھے بندیاں وچوں تئیں جس دا وی نام لو، اوس نے حیاتی دے کسے اک کھیتز وچ ای کامیابی حاصل کر کے اپنا نام امر کیتا اے۔ جے کسے پورا تے بھرواں ضابطہ حیات دتا اے تے اوہ صاحب قرآن ہی اے۔ ایہ قرآن اوہ اے جھیرا فصاحت وچ ہو مر تے ڈیماس تھینس (Demosthenes) دے، قانون سازی وچ جسٹی نین (Justinian) دے، فی الدنیا ~~حسنت~~ وچ اوہ کا وٹیلیا دے فی ~~الآخرة~~ ~~حسنت~~ گوتم بدھ دے تے ادب و احترام وچ کنفیوشس دے چیلنج دا جواب سی تے اوس دا اپنا چیلنج ایہ ہے کہ ”آچے خواباں ہمہ دارند تُو تنہا داری“ فیر اک اچھا بندہ جس نے حیاتی دے ہر میدان وچ کامیابی دے جھنڈے گڈے ہون اس دی حیاتی دا مطالعہ انسانی نسل لئی یقیناً سودمند ای تے ہووے گا۔ مائیکل ہارٹ اپنی مشہور کتاب The 100 (سو عظیم آدمی) وچ لکھدا اے:

"He (Muhammad) was the only man in history who was supremely successful on both the religious and Secular levels

اوہ (محمدؐ) تواریخ دے واحد انسان نیں، جھیرے دینی تے دنیاوی لحاظ نال انتہادی کامیابی حاصل کر گئے۔

فیر یقیناً ایہ سوال پیدا ہوندا اے کہ اخیر اوہ کھیریاں خوبیاں سن، جہاں نے جناب محمد a نوں ہر اپنے بیگانے دی نظر وچ معتبر بنایا۔ بس ایسے سوال دا جواب لھن لئی ایہہ کتاب مددگار ثابت ہووے گی۔ انشاء اللہ۔

سیرت کوں پڑھیے؟

شراب دے حرام ہون دانتز یا حکم آچکیا سی پر مدینے دے اک مسلمان نے شراب پی لئی۔ معاملہ جناب رسول اللہ a کول آیا تے شرابی نوں سزا دتی گئی۔ تھوڑے چر پچھوں او سے مسلمان نوں او سے جرم وچ فیر پیش کیتا گیا تے حضور a نے فیر اوس نوں سزا دتی۔ دوجی سزا دے ویلے اک صحابی مجمعے وچوں اٹھے تے آکھن لگے ”لعت اے اللہ دی اس تے، اکو جرم وار وار“۔ رسول اللہ نے ایہ گل سنی تے فرمان لگے پئی ایہدے اُتے لعنت نہ کرو، واللہ مینوں ایس گل دا پتا اے پئی ایہ اللہ تے اُس دے رسول نال محبت رکھدا اے۔ (بخاری شریف)

اس روایت توں ایہ گل سامنے آؤندی اے کہ قرآن پاک دی کھلی ہدایت دے باوجود تے خود جناب رسول اللہ a کولوں اک واری سزا پاؤن دے باوجود بندہ فیر اوہی جرم کر دا اے تے بھاویں طے ہوئے اصولاں تے ضابطیاں پاروں اوس نوں سزا دتی جاندی اے پر اوہدے من اندر رب دی پاک ذات دل جھڑی رغبت اے تے اوس دی نبی نال جھڑی محبت اے اوہ نہ صرف آقاؤں نظر آؤندی اے سگوں اوس محبت دے بدلے اوس گناہگار نال محبت دا اظہار وی کردے نیں۔ ایس توں ایہ پتا وی لگدا اے پئی جے من دی کھیتی وچ نبی دی محبت دا بوٹا لگا ہووے تے بھلائی ول ودھن دا امکان موجود رہندا

حمید اللہ، ڈاکٹر، رسول اکرم دی سیاسی زندگی، صفحہ: ۱۴

اے۔ سیرت پڑھن لئی وی جس گل دی چوکی لوڑا اے اوہ مسلمان لئی تے من وچ نبی a دی محبت دا بوٹا لانا اے تے غیر مسلمان لئی تعصب توں پاک ہونا اے۔

دوجی ضروری گل جھڑی سیرت دے مطالعے ویلے ساڈے سامنے زنی چاہیدی اے اوہ قرآن دا ایہ فیصلہ اے کہ رسول اللہ دی ذات حیاتی دا چنگا سوہنا نمونا اے، تے تیجی گل ایہ ہے کہ اس احساس دا دامن اک لمحے واسطے وی نہ چھڈیا جائے پئی اسیں ایس دھرتی تے آؤن والے بندیاں وچوں سمجھ توں وڈے، اُچے تے اُچے بندے دی حیاتی دا مطالعہ کر رہے ہاں۔ چوتھی گل وی اپنی اہمیت دے لحاظ نال گھٹ نہیں پئی جدوں نبی اکرم a دی زندگی دے واقعات پڑھدے ہوئے تے اپنے آپ نوں اوس دور وچ لے جان دی پوری کوشش کریئے۔ مثلاً سجدے دی حالت وچ آپ دے جسم پاک اُتے او جڑی رکھ دتی گئی تے اسیں ایہ واقعہ پڑھدے ہوئے اک لمحے لئی رُک جائیئے تے تصور وچ اوس واقعے دی ویڈیو دیکھ لوئیئے تے آڈیو سُن لوئیئے۔



سیرت نگار دیاں ذمے واریاں

جے ایہ گل آکھی جاوے پئی سیرت نگاری اک سائنس اے تے ہوسکدا اے کجھ لوگ اہے ہورتھوڑے چراں تیکر ایہ گل من لئی تیار نہ ہون پر پچھلی صدی وچ جو س ساڈے عظیم بزرگاں تے کجھ مستشرقین نے کم کیتا اے تے جو س ہن ہور ہیا اے، ایہ سیرت دے فن نوں سائنس دا درجا دین بنا ممکن نہیں۔ تحقیق دے جدید طریقے، وسیع لائبریریاں، کمپیوٹر تے انٹرنیٹ دی سہولت، پرکھ پڑچول وچ نویکلا پن تے ہتھ وچ سنیا ریاں والی ٹکڑی نے جتھے ایس کم نوں کھلے ڈلھے پڑ دتے نیں او تھے اس نوں سائنس بنا دین دا وی کم کیتا اے۔ سواج دے سیرت نگار دی پہلی ذمے واری ایہ ہے پئی جدید تحقیق لئی ورتے جان والے سارے رچھاں توں بھرواں کم لوے تے سچائی تیکر اپڑن لئی اوس نوں جھیریاں اوکڑاں پیش آؤندیاں نیں اوہناں پاروں دل چھوٹا نہ کرے۔

”جدید تحقیق“ دے اکھراں تے پڑھنہاراں نوں حیرت ایس واسطے نہیں ہونی چاہیدی کہ کل تیکر معراج النبی نوں کسے ہور زاویے توں ویکھیا جاندا سی تے ہن اس نوں آئن سٹائن دی Theory of Relativity تے ٹائم اینڈ سپیس دی سائنسی بحث توں کھنکھ نہیں کیتا جاسکدا۔ کل تیکر ساڈے معتبر وڈکیاں نے حضرت عائشہ c دی رخصتی ویلے دی عمر ۹ سال دی تے اج ”تحقیق عمر عائشہ“ دے عنوان ہٹھ ہزاراں صفحے لکھے جاکے نیں، جہدے وچ ۹ سال دی عمر من توں انکار کیتا گیا اے۔ صرف حکیم نیاز احمد صاحب دے مبارک قلم توں ۵۹۶ صفحاں دی ضخیم کتاب چھپ چکی اے۔ کل تیکر حضور a دی تاریخ ولادت ۱۲ ربیع الاول من تے کوئی اعتراض نہیں سی پر اج مصر دا محمود پاشا ایہ گل ثابت کر چکیا اے پئی ۱۲ نوں تے سوموار دین ای نہیں بن داتے انج اوس نے ۹ ربیع الاول نوں درست تاریخ پیدائش ثابت کیتا اے۔ ایویں اج دے سیرت نگار تے ایہ بھاری ذمے داری آ پیندی اے پئی دُنیا تے تھاں تھاں جہڑا تحقیقی کم ہو رہیا ہے اوہ اوس نوں سامنے رکھے تے مکمل ذمے داری نال اپنے پڑھنہاراں تیکر اپڑائے۔

یورپ وچ سیرت پاک اے تے تاریخ اسلام دا مطالعہ کرن دا رواج انج کل زوراں تے ہے۔ اوہ ایس گل دی پوری پڑچول کر رہے نیں پئی آخر گل کیہ اے پئی مسلمان لکھاں اوکڑاں دے باوجود جہاد توں دست بردار ہون لئی تیار نہیں۔ جوں جوں تحقیق دا دائرہ کھلا ہوندا جا رہیا اے نوں نوں مسئلے تے نویکے خیال ساڈے سامنے آرہے نیں۔ کجھ دستاویزاں جہناں بابت ایہ آکھیا جاندا سی پئی اوہناں نوں ویلا کھا گیا اے اج اوہ لہر ہیاں نیں۔ مثلاً نبی اکرم a دا وہ خط جہڑا اسکندریہ دے سلطان مقوقس دے نال لکھیا گیا سی اوہ لہجہ گیا اے۔ ایس خط دی جہڑی عبارت حدیث دیاں کتاباں وچ ملدی اے، اوہ ایس خط نال رلدی اے۔ مہر وچ اکھرتے اوہناں دی ترتیب وی اوہی اے جہڑی حدیث دے ذخیرے وچ لہجہ دی اے۔ ایویں ای صحیفہ ہمام بن منبہ جہڑا اوہناں نے صحیفہ ابو ہریرہ توں اخذ کیتا سی تے جہدا ذکر چوکھے محدثین نے کیتا اے اس دا

اک حصا لہ گیا اے۔ ایہناں گلاں نال اک تے حدیث دی صحت تے درستی ظاہر ہوندی اے، دو جے پاسے سیرت تے ہور رلدے موضوعاں اُتے تحقیق دا گھیر کھلا ہوندا جاندا اے۔ مَن جے اج دا سیرت نگار ایہناں گلاں توں اپنیاں اکھاں بند کر لوے گا تے فیراوس دی دیانتداری اُنوں ضرور شک دی نگاہ نال دیکھیا جاوے گا۔

سیرت نگار دے سامنے، بنائشہ ہر ویلے سیرت دیاں امہات کتب یا Mother Sources موجود ہندے نیں۔ اسیں بڑی لا پرواہی تے بے دردی نال ایہناں توں ملن والی ہر گل اُنوں معتبر تے مستند سمجھدے ہوئے اپنے موضوع دے اعتبار نال پڑھنہاراں تیکر اپڑا دیندے ہاں تے فیرا لیں اُنوں چوکھا چکا طرز تصنیف من لین دی بھروسے توقع رکھدے ہاں۔ مثلاً بخاری شریف تے طبقات ابن سعد ساڈے اورینٹل ماخذ شمار ہوندے نیں، پر بخاری شریف وچ لہدی حضرت عائشہ دی نکاح ویلے عمر والی روایت اُتے کھوج پڑچول دی لوڑ اے تے محبت نبیؐ نال سرشار کجھ بزرگاں نے ایہ کھوج پڑچول ڈاڈھی پھیل کر کے کیتی وی ہے۔ انج ای حضرت زینب والا واقعہ، جدوں روایت موجب نبی اکرم a جناب زینب ول تشریف لے گئے 'طبقات' وچ موجود اے پر کوئی وی ذی شعور تے ذی عقل بندالیں گل اُنوں من لئی تیار نہیں (ایس دی تفصیل امہات المؤمنین دے باب وچ دیکھو) ضروری گل اے پئی سیرت نگار جدوں 'طبقات' توں کجھ اخذ کردا اے تے اوہ 'طبقات' دی ایس تواریخ اُنوں وی اکھاں دے اگے رکھے پئی محمد ابن سعد مؤلف طبقات ابن سعد، واقدی دے شاگرد سن۔ اُتے بیان کیتی روایت محمد بن عمر توں اُدی نظر آؤندی اے تے ایہ محمد بن عمر ہی تاریخ وچ واقدی دے ناں نال مشہور نیں۔ واقدی دے شاگرد جناب محمد ابن سعد نے 'الطبقات الکبریٰ' تصنیف کیتی۔ ایہ کتاب جرمنی وچ سی۔ شہنشاہ جرمنی نے ایس دی اشاعت دا ارادہ کیتا۔ ڈھیر سارے لوکاں دی تصحیح و ترتیب پچھوں باراں جلدوں وچ ہالینڈ توں شائع ہوئی۔ خیال ایہہ دے پئی ایس موقع تے عیسائی اسلام دے خلاف اپنی پرانی عداوت اُنوں لکا نہیں سکے۔

ایس مختصر تواریخ توں دو گلاں سامنے آؤندیاں نیں۔ اک ایہ پئی کتاب مذکورہ دے مصنف محمد بن عمر دے شاگرد نیں، جس دی بابت کجھ بزرگاں دی رائے کوئی چنگی نہیں تے امام شافعی تے ایتھوں تیکر فرماندے نیں پئی مدینے وچ سست اچھے بندے سن جہڑے راویاں دے سلسلے وچ دروغ گوئی توں کم لیندے ہندے سن، اوہناں وچوں اک واقدی سی۔ دوجی گل ایہ ہے پئی ایہ کتاب عیسائیاں دے ہتھاں وچ چھپی۔

دین اسلام نے آپوں تحقیق دے کجھ ضابطے تے طریقے دے نیں۔ جویں کہ قرآن کہند اے 'اے ایمان والیو! جے کوئی فاسق تھاڈے کول کوئی خبر لیاے تے چنگی طرحاں پڑچول کر لیا کرو' (الحجرات: ۱) جناب رسول اللہ دے احکام وی اس موضوع تے بڑے نترے ہوئے نیں پئی کسے بندے دے جھوٹے ہون لئی ایہ گل بھیتری اے پئی اوہ ہر سنی سنائی گل بغیر پرکھ پڑچول توں اگانہ سناندا پھرے۔ رب تے اوس دے رسول a دے بنائے معیار اُتے جویں زبانی کیتیاں گلاں اُنوں پرکھنا ضروری اے ایویں ای لکھیاں داستاناں اُنوں وی لگے اسباب موجب پرکھ لینا چاہیدا اے تے عقل سمجھ دی کسوٹی نوں وی ورتنا چاہیدا اے۔ جویں کہ حضرت ابو ہریرہ نے جدوں حضرت عبداللہ بن عباس دے سامنے نبی اکرم a دے حوالے نال ایہ گل کیتی پئی اگ اُتے کچی چیز کھان نال وضوٹ جاندا اے تے ابن عباس فرمان لگے پئی جے کرایہ گل ٹھیک

ہووے تے ایہدا مطلب ایہہ نکلدا اے پئی اُس پانی دے پین نال وی وضوٹ جائے گا جیہڑا اگ اُتے گرم کیتا گیا ہووے۔ جناب ابن عباس حضرت ابو ہریرہ ؓوں ضعیف الروایت کدی نہیں سن سجدے پر اتھھے گل گجھ ہووے جا پدی سی۔ ایس لئی آپ نے ایگل نہ مئی تے ایہ خیال کیتا پئی مجھن وچ کدھرے غلطی لگ گئی ہووے گی۔

علامہ ابن جوزی تے ایہتوں تیکر فرماندے نیں پئی جیہڑی حدیث عقل یاں مئے ہوئے اصولاں توں ہٹ کے ہے، سمجھ لو پئی اوہ مصنوعی اے۔ اوہدے اُتے اس بحث دی لوڑ نہیں پئی اوس دے راوی معتبر نیں یا غیر معتبر۔ سو پرکھ پڑچول دے اس پیڑھے پکے معیار ول کنڈ کر کے کوئی سیرت نگار ایہ دعویٰ نہیں کر سکدا پئی اس نے اپنی ذمہ داری پوری دیا ننداری نال نبھائی اے۔

مصنف یاں سیرت نگار دے سامنے عام طور تے تن گلاں موجود ہوندیاں نیں۔ حسن انتخاب، حسن ترتیب تے حسن بیان۔ فیر عقل تے جذبات دی جلو اگری وی پورے ڈھنگ نال ہووے تے گل کمال تیکر اپڑدی ہے۔ ایہ نہیں پئی عالمانا بحث مباحثے، بھارے بھارے اکھر تے علیمت دی جادوگری دا شوق محبت دے جذبے ؓوں فنا کر دیوے، کیوں جے سیرت وچ رسول خدا دی محبت دا جذبا موجود نہیں تے فیر اوس ؓوں سیرت نہیں کوئی دو جاناں دتا جاوے۔ دو جے پاسے ایہ گل وی ضروری اے پئی محبت دے جذبے ہتھوں مغلوب ہو کے سیرت نگار حقائق توں دور ای نہ رہ جاوے تے نہ ای خالق تے مخلوق تے عابد و معبود دا فرق مٹا دیوے۔

سیرت نگار اس ماحول تے اس عہد ؓوں وی نظر انداز کرن تے بھلا دین دا حق نہیں رکھدا جس وچ نبوت محمدی دا آفتاب پہلی وار چمکیا سی۔ اوس دور دی جاہلیت تے چار پھیرے کھلے اُتھیرے دی پوری تصویر کھینچنا وی ڈھیر ضروری اے۔ اوس تصویر وچ ایہ دکھانا وی ضروری اے پئی اوس دور وچ انسانیت ذلت دی کہڑی ڈونگھائی تیکر اپڑی ہوئی سی، اخلاقی وگاڑ کس حد تیکر سی تے اولاد آدم دی بے چینی تے اضطراب کس درجے داسی۔ فساد کاری تے معاشرتی ناہمواریاں دے کیہ رنگ سن، کوئیں دیاں ظالم حکومتاں قائم سن، مسخ ہوئے مذہب، انتہا پسندانا فلسفے تے تباہ کن تحریکاں تے دعوتناں بنی نوع انسان ؓوں کتھوں تیکر اپڑا چکیاں سن۔ ایہ ساریاں گلاں سیرت نگار ؓوں سامنے رکھنیاں چاہیدیاں نیں تے اپنے پڑھنہاراں ؓوں دسنا وی ضروری اے۔



سیرت رسول تے قرآن

محمدؐ تے قرآن، اللہ دے ایہ دوویں سوہنے ختے اک دوجے توں دکھ نہیں ویکھے جاسکدے فیروی جے محمدؐ نہ ہوندے تے قرآن نہ ہوندا، تے قرآن نہ ہونداتے محمدؐ فیروی ہوندے کہ کائنات دی تخلیق دی وجہ قرآن نہیں محمدؐ نہیں، لولا کہ لما خلقت الافلاک۔ (تسین نہ ہوندے تے کائنات پیدا نہ کیتی جاندی)۔

جس نے قرآن نوں بھل کے محمدؐ دی ذات دا مطالعہ کیتا اوہ تر جائے گا، مینوں ایس تے ذرا وی شک نہیں۔ پر جے کسے محمدؐ ول کنڈ کر کے قرآن وچوں کنڈھے لان والے بیڑے لھن دی کوشش کیتی تے اوہ دے دُب جان وچ کوئی شبہ نہیں رہنا چاہیدا۔ محمدؐ ایس لئی ہے پئی اوہ قرآن نوں کھول کھول کے بیان کرن تے قرآن ایس لئی ہے پئی ایہہ بقول جامی محمدؐ دی شان بیان کرے۔ قرآن دی ہر آیت تے ہر اکھ میرے حضور دی حقانیت دا تصدیق نامہ اے۔ ایسے گل توں ایس ایویں وی آکھ سکدے ہاں پئی اک تھیں قرآن کتاب دی شکل وچ ہے تے دوجی تھیں تے آدمیت دی شان و دھان لئی بشر دے لیڑے پائی کھلوتا اے۔ کتابی شکل والے قرآن دے نیڑے لگن لئی طہارت دی لوڑ اے پر بشر دے روپ وچ قرآن گندے مندیاں نوں وی سینے لائی آؤندا اے۔

دو عالم روز و شب در گفتگویش

ہمہ قرآن در شان محمد a

(جامی)

آؤ ذرا ویکھیے پئی قرآن اپنے لیاؤن والے نوں کوں ویکھدا اے۔ آکھدا اے پئی آپ a خاتم النبیین نیں۔ آپ a رہندی دُنیا تک دے لوکاں لئی کافہہ للناس نیں۔ آپ رحمت اللعالمین نیں۔ آپ دین نوں مکمل کرن والے نیں۔ صرف آپ تے نازل ہون والی کتاب نوں بے مثل قرار دے کے ایہ چیلنج دتا گیا پئی اوہ دے ورگی کوئی سورۃ بنا کے دکھا دیو۔ آپ ہی دے قرآن نوں ہتھ لان والے مطہر کیتے گئے۔ آپ ہی دی کتاب نوں ہر طرحاں محفوظ کیتا گیا تے لکھاں سینیاں، کروڑاں کتاباں، ویڈیو کیسٹاں، کمپیوٹر دیاں ہارڈ ڈسکاں، سی ڈیز تے فلاپیاں وچ ایویں موجود اے پئی اسلام دا بدترین دشمن وی کسے تحریف دا شبہ تک نہیں کر سکدا۔ اک لکھ چوبی ہزار پیغمبراں وچوں صرف آپ نوں بیشگی دا اعزاز نصیب ہو یا ورنہ تے صورت حال ایہ ہے پئی سبھ دے صحیفے منسوخ، سبھ دی تعلیم مفقود تے سبھ دے حالات سگوں ناؤں تک سوائے اوہناں ۲۹ ناواں توں جہڑے قرآن وچ آئے نیں لوح دُنیا توں کسے غلط لکھے گئے اکھر وانگ مٹ گئے نیں، پر قربان جائیے ایس ہستی توں پئی ایس دا قرآن محفوظ، ایس دے قول محفوظ ایس دے حالات محفوظ تے صرف ایس دے نہیں ایس دے وڈے چھوٹیاں دے حال احوال محفوظ، ایس دے کول بہین والیاں دیاں زندگیاں توارخ وچ محفوظ، ایس دے

خادماں دے خادماں دیاں گلاں، صرف گلاں ای نہیں سگوں رنگ، نسب قد کاٹھ، طریقے، کم کار تے مرن جیون دی ہر گل محفوظ اے۔ حد تے ایہ ہے پئی اوہ حال حالات وی محفوظ کردتے جہڑے خالص پرائیویٹ زندگی دا حصا ہوندے نیں کیوں جے اوہ اجے بے داغ نیں پئی ایہ حکم دین وچ دی کوئی ہرج نہیں سمجھیا پئی ’جہڑی گل خلوت وچ ویکھو اوہ جلوت وچ بیان کر دیوتے جہڑی کجھ لوکاں وچ ویکھو اوہ پوری دنیا تیکر اپڑا دیو۔‘ پوری کائنات وچ بھلا کوئی ہو روئی ہے جہڑا ایویں آکھ سکے؟

قرآن گواہی دیندا اے پئی پوری کائنات وچوں صرف آپ ئوں معراج تے بلایا گیا۔ (ورنہ موسیٰ تے کوہ طور یاد کر کے دیکھ لو) تے سد یاد وی ایناں نیڑے پئی **فَكَانَ قَوْمٌ شَاكِرُونَ** آپ ئوں اللہ نے اپنے پاک ناماں وچوں کئی نام دتے (رؤف، رحیم، نور، متین وغیرا) صرف آپ a دے ذکر ئوں ایویں بلند کیتا گیا پئی جتھے کدھرے اللہ دا نام آیا اوہدے محبوب دا نام وی نال ای نختی نظر آیا۔ وضو، اذان، خطبہ، نماز، تے درود وچ، ہر تھاں تے پوری دنیا وچ جہناں آپ ئوں یاد رکھیا جاندا اے کسے ہور نوں نہیں۔ حد تے ایہ ہے پئی آپ ئوں اوہ وی یاد کردے نیں جہڑے اللہ نوں یاد نہیں کر دے۔ (غیر مسلمان وچ تے ایہ گل ڈھیر سچی اے پر فقیر ذاتی طور تے اک اجے مسلمان ئوں وی جاندا اے جہڑا نماز دا تے پابند نہیں پر درود بنا اُسدا کوئی دن نہیں لگھدا) بعض مسلمان تے روز ہزاراں واری درود پڑھدے نیں۔ صرف آپ ئوں کوثر عطا کیتا گیا۔ صرف آپ ای خلق عظیم نیں۔ صرف آپ ئوں آپ دا نام لے کے قرآن نے مخاطب نہیں کیتا ورنہ سبھناں نوں یا آدم، یا نوح، یا ابرہیم تے یا موسیٰ آکھیا۔ ایس ہستی دی واری منزل تے مدثر دے پیار بھرے نام اپنائے۔ اللہ نے بندیاں نوں اپنا محبوب بنائ لئی صرف آپ دی غلامی نوں شرط اوّل قرار دتا۔ صرف آپ دا اُسوہ حسنہ کل عالم لئی اے۔ پہلوں آپ ئوں عمل سکھایا گیا تے فیر آپ دے عمل اُتے عمل کرن دانان عمل صالح رکھیا۔ صرف آپ a دے غلاماں نوں ایہ فضیلت حاصل اے پئی اوہناں وچوں جس کسے دی پیروی کرو گے ہدایت پاؤ گے۔ قرآن ایہ فیصلہ وی دیندا اے پئی جتنی برائی کرو گے اتنی ای سزا دتی جاوے گی پر نیکی ئوں دس نال ضرب دے لو۔ ایہ فیصلہ صرف رحمت اللعالمین دے صدقے تے صرف اوہناں دی امت تیکر محدود تے مخصوص اے۔ صرف آپ دے غلاماں لئی شب قدر (دی عبادت) اک ہزار مہینیاں توں افضل اے تے صرف آپ دی وجہ توں کائنات دی تخلیق ہوئی اے۔

قرآن پورے دا پورا شان محمدی بیان کرن وچ اپنا کوئی جوڑ نہیں رکھدا۔ ایہ آپ دے خصائص، فضائل تے فرائض ایویں پیش کردا اے پئی پڑھن والا جے غور کرے تے حیران ہو کے رہ جاندا اے۔ تے جے پڑھنا رتے تے دور ہووے تے انصاف دادا من نہ چھڈے تے اوہ ایہ اعتراف کرن تے مجبور ہو جاندا اے پئی ایہ پاکیزہ، سخی، مثالی تے متری ہوئی حیاتی بنا شبہ ایس قابل سی پئی ایس نوں ”اسوہ حسنہ“ تے ”خلق عظیم“ دے ناں دتے گئے۔

﴿لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ وَالْيَوْمَ الْآخِرَ وَ ذَكَرَ

اللَّهُ كَثِيرًا﴾ (الاحزاب : ۲۱)

”تہاڈے لئی اللہ دے رسول دی ذات وچ چوکھا سوہنا نمونہ اے پر اس بندے لئی جیہدا اللہ تے یوم آخرت ول دھیان ہووے تے کثرت نال اللہ ئوں یاد کردا ہوئے۔“

﴿وَأَنَّكَ لَـٰعَلِي خُلِقَ عَظِيمٌ﴾ (القلم: ۴)

”تے بنا شک تئیں اخلاق دے وڈے مرتبے اتے جے۔“

قرآن دا اک اک اکھر ڈھول و جا و جا کے شان محمدؐ جو بیان کردا اے اُسدا جواب ای نہیں پر جے ڈھول دی ایہ ساری آواز کسے بولے دے کناں وچ نہ پوے تے اوس دے کن کول جا کے ایہ اک گل ای اوس تُوں سنا دینا تھیری جاپدی اے پی قرآن آکھدا اے:

﴿وَمَا أَرْسَلْنَاكَ إِلَّا رَحْمَةً لِّلْعَالَمِينَ﴾ (الانبیاء: ۱۰۷)

ترجمہ: اساں تہانوں گھلایا ای جہاناں دی رحمت بنا کے ہے۔

قرآن آکھدا اے پی اللہ دا رسول لوکا ئی تُوں سنوار دا اے تے قرآن و حکمت دی تعلیم دیندا اے یعنی ظاہری تے باطنی اصلاح، نبی a دافرض قرار دتا گیا۔

﴿لَقَدْ مَنَّ اللَّهُ عَلَى الْمُؤْمِنِينَ إِذْ بَعَثَ فِيهِمْ رَسُولًا مِّنْ أَنفُسِهِمْ يَتْلُوا عَلَيْهِمْ آيَاتِهِ

وَيُزَكِّيهِمْ وَيُعَلِّمُهُمُ الْكِتَابَ وَالْحِكْمَةَ وَإِنْ كَانُوا مِن قَبْلُ لَفِي ضَلَالٍ مُّبِينٍ﴾ (آل عمران: ۱۶۴)

”اللہ نے ایمان والیاں اُتے احسان کیتا اے جدوں اوہناں وچ، اوہناں دے وچوں ہی اک رسول بھیجا جھڑا

اوہناں نوں اللہ دیاں آیتاں پڑھ کے سناؤندا اے۔ اوہناں تُوں سنوار دا اے تے اوہناں تُوں کتاب و

حکمت دی تعلیم دیندا اے تے ایس توں پہلوں تے اوہ صریح گمراہی وچ پئے ہوئے سن۔“

مقام نبوت دا تعین کر دیاں ہوئیاں قرآن اک عجیب فیصلہ کر دا اے پی نبی دی اطاعت اُمت اُتے واجب ہی

نہیں سگوں آپ دی اطاعت تُوں اطاعت الہی دے سانویاں رکھیا اے۔

﴿مَنْ يُطِيعِ الرَّسُولَ فَقَدْ أَطَاعَ اللَّهَ﴾ (النساء: ۸۰)

”جسے اللہ دے رسول دی اطاعت کیتی اوس نے بلکل اللہ دی ہی اطاعت کیتی۔“

﴿وَاطِيعُوا اللَّهَ وَرَسُولَهُ إِنْ كُنْتُمْ مُؤْمِنِينَ﴾ (الانفال: ۱)

”تے اللہ دی اطاعت کرو تے اوس دے رسول دی، جے تئیں ایمان والے جے۔“

نبی a دا ادب و احترام مسلماناں تے لازمی قرار دتا تے اوس دا ضابطہ ایوں بنایا:

﴿النَّبِيُّ أَوْلَىٰ بِالْمُؤْمِنِينَ مِنْ أَنفُسِهِمْ وَأَزْوَاجُهُ أُمَّهَاتُهُمْ﴾ (الاحزاب: ۶)

”نبی تے ایمان والیاں نال اپنی ذات توں وی چوکھا پیار کرن والے نیں تے نبی دیاں بیویاں اوہناں دیاں

مانواں نیں۔“

﴿يَا أَيُّهَا الَّذِينَ آمَنُوا لَا تَرْفَعُوا أَصْوَاتَكُمْ فَوْقَ صَوْتِ النَّبِيِّ وَلَا تَجْهَرُوا لَهُ بِالْقَوْلِ كَجَهْرِ

بَعْضِكُمْ لِبَعْضٍ أَن تَحْبَطَ أَعْمَالُكُمْ وَأَنْتُمْ لَا تَشْعُرُونَ﴾ (الحجرات: ۲)

”اے لوکو! جھڑے ایمان لیائے اوہ اپنی آواز نوں نبی دی آواز توں اُچا نہ کرو تے نہ ای نبی دے نال اُچی آواز

نال گل کرو جویں آپس وچ اک دوجے نال کر دے اوکدھرے ایویں نہ ہووے پئی تہاڈا سارا کیتا کتريا غارت ہو جاوے تے تہانوں پتاوی نہ لگے۔“

﴿إِنَّ الَّذِينَ يَنَادُونَكَ مِنَ الْحُجُرَاتِ أَكْثَرُهُمْ لَا يَعْقِلُونَ﴾ (الحجرات: ۴)
 ”جہڑے لوکی تہانوں حجریاں دے باہر کھلوکے واجاں دیندے نیں اوہناں وچ چوکھے بے عقلے نیں۔
 قرآن آپوں گواہی دے وتی ہے پئی آپ اخیری نبی نیں۔“

﴿مَا كَانَ مُحَمَّدٌ أَبَا أَحَدٍ مِّن رِّجَالِكُمْ وَلَكِن رَّسُولَ اللَّهِ وَخَاتَمَ النَّبِيِّينَ وَكَانَ اللَّهُ بِكُلِّ شَيْءٍ عَلِيمًا﴾ (الاحزاب: ۴۰)

”(لوکو) محمد a تہاڈے مرداں وچوں کسے دے باپ نہیں سگوں اوہ تے اللہ دے رسول تے اخیری نبی نیں۔ تے اللہ ہر چیز دا علم رکھن والا اے۔“
 قرآن نے اپنے لیان والے تے درود سلام داوی حکم دتا اے۔

﴿إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا﴾
 (الاحزاب: ۵۶)
 ”اللہ تے اُس دے فرشتے نبی تے درود بھیج دے نیں۔ اے ایمان والیو! تسلیں وی اوہناں تے درود و سلام بھیجو۔“



مغازی، سیرت، حدیث تے توارخ دا ویروا

نبی اکرم a دی ولادت پاک، تے اوس توں پہلے دے دور وچ عرب وچ لکھن پڑھن دا کوئی ایڈارواج نہیں سی۔ ہاں خاندان تے قبیلیاں وچکار ہون ویلے روایتی لڑائی جھگڑیاں دے واقعات قلم بند کر لین دارواج موجود سی۔ کس لڑائی وچ کس قبیلے دے کئے بندے مارے گئے تے کئے پھٹے ہوئے۔ کس قبیلے نے کبھی مدد کیٹی، کوئیں صلح صفائی ہوئی یاں لڑائی دا انجام کیہ ہویا، اجیہاں تفصیلاں اوس دور وچ لکھیاں ہوئیاں لہجہ یاں سن۔ جدوں نبی اکرم a دی حیاتی تے قلم پھرن دا شوق دلاں وچ جا گیا تے عرب دی روایت پاروں آپ دی زندگی وچ پیش آؤن والیاں لڑائیاں ای پہلا موضوع بنیاں۔ نبی اکرم a دے غزویاں دی تفصیل اکٹھی کرن تے فیرواں نوں لکھ کے محفوظ کرن دے فن نوں مغازی دا نام دتا گیا۔ مغازی دیاں کتاباں وچ آپ a دی پاک حیاتی دے دوجے پاسیاں نوں اصلوں ہی چھڈ نہیں سی دتا جاندا سگوں ڈھیراں دے ڈھیر واقعات ایہناں کتاباں دی زینت بن دے رہے نیں۔ ایسے پاروں ابن اسحاق دی کتاب نوں مغازی وی آکھدے نیں تے سیرت وی۔ حافظ ابن حجر فتح الباری وچ ایہہ دوویں نام اکو کتاب واسطے ورتدے نیں۔

تینویں صدی تیکر ایس فن دیاں جہڑیاں کتاباں مشہور سن اوہناں وچ چوکھے غزوات دے ای حالات لہجہ دے نیں، جوئیں کہ سیرت ابن ہشام، سیرت ابن عائد تے سیرت اموی وغیرہ۔ البتہ ایس توں بعد دے زمانے وچ مغازی توں ہٹ کے وی بہت ساریاں چیزاں شامل کر لیاں گئیاں۔ مثلاً مواہب الدنیہ وچ غزوات توں علاوہ سبھ کجھ لہجہ اے۔ سو مغازی دے فن دا گھیر جدوں کھلا ہویا تے ایہوای فن سیرت نگاری بن گیا۔

محدثین دے نیڑے مغازی تے سیرت عام فن حدیث توں وکھری اک چیز اے۔ ایہتوں تیکر پئی بعض موقعیاں اُتے ارباب سیرت اتے محدثین دو مقابلے دے ٹولے سمجھے جاندے رہے۔ بعض ویلے ایوں دی صورت وی بن دی لہجہ دی اے پئی سارے سیرت نگار اک پاسے تے امام بخاری تے مسلم اک پاسے۔ اس ویلے بعض لوکی امام بخاری دی روایت نوں ایس پاروں نہیں من دے پئی سارے سیرت نگاراں دے خلاف اے پر محققین آکھدے نیں پئی حدیث صحیح، سارے ارباب سیرت دی متفقہ روایت دے مقابلے وچ وی بھاری ہے۔ مثلاً غزوہ ذات الرقاع ولوں چوکھے سیرت نگاراں دا اتفاق اے پئی جنگ خیبر توں پہلوں دا واقعہ اے پر امام بخاری آکھدے نیں پئی خیبر توں پچھوں ہویا۔ ایسے پاروں حافظ ابن حجر نے سیرت نگاراں دی رائے نال اتفاق نہیں کیا۔

ایس توں پتا لگدا اے پئی بھاویں سیرت نگاری فن مغازی دی بہتر تے سہنی شکل اے پر سیرت اک ہو فن اے تے حدیث اک دوجی گل۔ سیرت نگاری وچ روایتاں وچ اس درجے دی احتیاط نہیں کیٹی جاندی جہڑی صحاح ستہ نال مخصوص اے۔ ایہدی مثال ایہہ ہے پئی فقہ دافن وی قرآن و حدیث توں ای ماخوذ اے پر ایس نوں اسیں قرآن یاں حدیث نہیں

آکھ سکدے۔ مغازی یاں سیرت دے فن وچ، سگوں سیرت دی سائنس وچ جس قسم دیاں تفصیلاں دی لوڑ پیندی اے اوہ حدیث دے اصلی اُچے معیار دے موافق نہیں ہوسکدیاں۔ ایسے لئی ارباب سیر دے کھوج کاری دے معیار نوں ایوں نہیں سمجھیا جاند جویں فن حدیث دے معیار نوں۔ مثال دے طور تے جویں امام بخاری تے مسلم نے ایہ پکا پکا طریقہ رکھیا پئی کسے ضعیف حدیث نوں اپنی کتاب وچ تھان نہیں دتی، اس طرحاں دا معیار سیرت نگاراں نوں ضروری نہیں جاپیا۔ اج مختلف زمانیاں دیاں، ڈھیر اجیہاں کتاباں موجود نیں جہناں توں پتا لگدا اے پئی سیرت لکھدیاں تدوین حدیث ورگی کھوج کاری یاں پرکھ پڑچول کرن دی ضرورت محسوس نہیں کیتی گئی۔

مغازی تے سیرت توں ہٹ کے حدیث دی گل نوں اگے تھریے تے پتا لگدا اے پئی حضور a دے زمانے وچ ای بعض صحابہ حضور دی اجازت نال آپ دے ارشاد لکھ کے محفوظ کر لیندے ہوندے سن۔ بخاری شریف وچ حضرت ابو ہریرہ دا ایہ قول ملدا اے پئی صحابہ کرام وچوں کسے کول دی میتھوں دودھ حدیث دا ذخیرہ نہیں ہونا پر عبد اللہ بن عمر نوں چھڈ کے، کیوں جے اوہ حدیثاں لکھ لیندے سن پر میں لکھدا نہیں ساں۔ اک ہور روایت اے پئی حضرت عبد اللہ بن عمر b دی عادت سی پئی حضور a توں جھڑی گل سننی اوہ لکھ لینی۔ قریش نے اوہناں نوں ڈکیا پئی آپ a کدے غصے وچ ہوندے نیں تے کدے راضی خشی پر توں ایں پئی ہر گل لکھن ڈیہا ہونا نیں۔ ایوں ابن عمر نے لکھنا تے چھڈ دتا پر موقع لگن تے حضور نال ایہہ گل کر لئی۔ جناب عبد اللہ دی ایہ گل سُن کے سرکار دو عالم a نے اپنے مکھڑے ول اشارہ فرمایا تے آکھیا۔ ”عبد اللہ توں لکھ لیا کر، ایہ توں جو نکلا اے حق ای نکلا اے۔“ خطیب بغدادی نے اپنے رسالے وچ روایت کیتی اے پئی اوہ بیاض جہدے وچ عبد اللہ حضور a دیاں حدیثاں قلم بند کردے سن اوہاناں ”صادقہ“ سی۔

مغازی تے سیرت نوں ایس درجے دیاں احتیاطاں تے پڑچول نہ لہ سکے پر خلیفہ حضرت عمر بن عبد العزیز دے دور وچ ایس فن نوں گجھ توجہ ملی تے خلیفہ نے حکم دتا پئی مغازی دا خاص حلقہ درس قائم کیتا جاوے۔ عاصم بن عمر بن قتادہ انصاری اس فن وچ خاص مہارت رکھدے سن۔ اوہناں دے ذمے ایہ کم لگا پئی جامع مسجد دمشق وچ لوکاں نوں درس دتا جاوے۔ اوسے زمانے وچ امام زہری نے مغازی تے اک پکی کتاب لکھی۔ امام سیبکی فرماندے نیں پئی ایہ مغازی دے فن دی پہلی تصنیف سی۔

سیرت کیہ اے۔ حدیث تے سیرت وچ کیہ فرق اے تے سیرت تے تاریخ کوں وکھو وکھ نیں، ایس نوں مزید جھن لئی جناب ندیم الواجدی دے مضمون ”سیرت نگاری کے بعض اہم پہلو“ دے کچھ حصیاں دا مطالعہ کر دے ہاں۔

سیرت کیہ اے؟

لغت وچ سیرت دے معنی نیں طریقہ تے رستا۔ بعد وچ ایہ لفظ عام لوکاں دے حالات لئی ورتیا جان لگ پیا۔ فیہ آخضرت a دے حالات، اوہناں دیاں گلاں باتاں تے ہدایتاں اُتے اُس لفظ دا اطلاق ہویا۔ حضرت شاہ عبد العزیز

مقدمہ سیرت النبی از شبلی نعمانی توں ماخوذ

نقوش، رسول نمبر، جلد اول، صفحہ ۵۲

دہلوی (م-۱۲۳۹ھ) نے سیرت دی تعریف بیان کر دیاں لکھیا اے:

”آئینہ متعلق بوجود پیغمبر a و صحابہ کرام و آں عظام است و از ابتدائے تولد آنجناب تا غایت وفات آں را

سیرت گویند۔“

”جو کچھ ساڈے پیغمبر a، صحابہ کرام تے آں عظام دے مبارک وجود دی بابت ہووے تے آنجناب دی

پیدائش تے وفات تک دے واقعات ئوں سیرت آکھدے نیں۔“

فقہاء تے محدثین نے لفظ سیرت، مغازی تے جہاد دے معنیاں وچ وی ورتیا اے۔ ایسے لئی امام مسلم (م ۶۱ھ) دی جامع وچ ’کتاب السیر والجهاد‘ تے حافظ ابن حجر (م ۸۵۲ھ) دی ’فتح الباری‘ وچ کتاب المغازی و السیر، دے سرناویں لہجہ دے نیں۔ فقہ دیاں کتاباں وچ وی ایہ لفظ ورتیا گیا اے۔ ابن اٹحق (م ۱۵۰ھ) تے واقدی (م ۳۰۷ھ) دیاں مغازی دیاں کتاباں ئوں سیرت وی آکھیا جاندا اے تے خورے ایسے پاروں کچھ مدھلے سیرت نگاراں نے سیرت تے جھڑیاں کتاباں لکھیاں نیں اوہناں وچ چوکھا غزویاں دا ای ذکر ملدا اے پر بعد وچ ایہ فن غزویاں تیکر ای نہ رہیا سگوں آنحضرت a دی حیاتی دے دو بے پہلوں دی وی دس پاؤن لگ پیا۔

مثال دے طور تے ابن سعد (م ۲۳۰ھ) دی کتاب ’الطبقات الکبریٰ‘ وچ آنحضرت a دی پاک حیاتی دے حال

احوال وی لکھے گئے نیں۔

حدیث تے سیرت دا فرق:

محدثین اپنے فن وچ تن گلاں نال بحث کر دے نیں۔ رسول اللہ نے کیہ فرمایا، کیہ کیتا تے آپ a دے ساہمنے کیہ کیتا گیا؟ ایسے چیز ئوں قول، فعل تے تقدیر دے اصطلاحی اکھراں نال یاد رکھیا جاندا اے۔ ارباب سیروی اپنیاں کتاباں وچ ایہوتن چیزاں پیش کر دے نیں۔ موضوع دے لحاظ نال ایہ دوویں فن اکوای نیں پر بے ویروا کرینے تے اک دو بے توں وکھرے ہو جانداں نیں۔ پہلی گل ایہ ہے پئی محدثین دا مقصد حکماں تے مسئلیاں دا علم تے اوہناں نوں بیان کرنا ہوندا اے۔ رسول اللہ دی ذات پاک تے ڈونگھی جھاتی موضوع نہیں ہوندا۔ جدوں کہ سیرت نگار، رسول اللہ دی ذات گرامی تے بحث کر دے نیں تے آپ دے حکماں دی بحث اوہناں لئی دو بے نمبر تے ہوندا اے۔ سیرت دیاں کتاباں وچ واقعات دی تفصیل ہوندا اے تے اک اک پہلو اتے روشنی پائی جاندی اے۔ حدیث وچ واقعات دی تفصیل نہیں لہجہ دی تے نہ ای کسے خاص پہلو دیاں وضاحتاں لئی کوئی ایڈی ہچکل کیتی جاندی اے۔

حدیث تے سیرت وچ ایہ فرق وی اے پئی سیرت وچ صحت دے لحاظ نال ماٹھیاں روایتاں وی اپنا بھار رکھ دیاں نیں پر حدیث وچ ایہدی کوئی گنجائش نہیں ہوندا، پر ایہ ضابطہ اوہناں حدیثاں لئی ہے جہناں دا تعلق احکام تے مسائل نال ہوندا اے۔ حضرت علامہ شبیر احمد عثمانی نے لکھیا اے پئی علماء دا اک چنگا وڈا ٹولہ ایس گل دا قائل ہے پئی حدیث ضعیف توں فضائل، اعمال تے قصص وغیرہ وچ استدلال کیتا جاسکدا اے۔ ایہناں بزرگاں وچ امام احمد، ابو داؤد، ابو حنیفہ، شافعی تے نووی ورگے اصحاب الرائے وی شامل نیں۔ امام ابو حنیفہ حدیث ضعیف نوں احکام وچ وی معتبر سمجھدے نیں پر اوس ئوں

حدیث صحیح سے ترجیح نہیں دیندے، سگوں حدیث صحیح دی تائید واسطے پیش کر دے نیں یا اجہیاں مسئلیاں لئی ضعیف روایتاں وچوں استدلال کر دے نیں جہناں لئی اُچے درجے دے دلائل نہیں لہجہ دے پر امام احمدؒ تے کجھ چوکھے اگے نکل دے نظر آوندے نیں۔

سیرت تے تاریخ دا فرق

سیرت، تاریخ دی اک قسم ہون دے باوجود فن تاریخ توں وکھری تے نویکلی صنف وی اے۔ تواریخ دیاں گجھ تعریفیاں ایویں نیں پئی تواریخ دے اک مشہور سیانے کا فیجی (م ۸۷۹ھ) نے اپنی کتاب ”المختصر فی علم التاريخ“ وچ ایہ تعریف کیتی اے پئی تواریخ زمانے دے حالات، تے حالات دے متعلقات دی پکی کھوج کاری دا نام اے۔ سخاوی (۹۰۲ھ) نے اپنی مشہور تصنیف ”الاعلان بالتواریخ لمن ذم التاريخ“ وچ آکھیا اے پئی زمانے دے واقعات دی کھوج پڑچول دا نام تواریخ اے۔ وسطی دور دے مغربی سوجھوان آکھ دے نیں پئی تواریخ جیوندے مطالعہ دا نام اے۔ ایس فرق توں ہٹ کے وی ایہ گل نہ بھلن والی اے پئی سیرت دے ماخذ جنے مستند تے اعتبار والے نیں، تواریخ توں اُسدا دسواں حصا وی حاصل نہیں۔ تواریخ صحت مند ماخذ دی بجائے قیاس ول چوکھاڑ دی اے پر سیرت وچ قیاس دا کوئی دخل نہیں سگوں روایتاں جو یں پڑیاں، اوہناں توں اصلی تے سچی حالت وچ لکھ دینا ای سیرت نگار دا پہلا فرض اے۔ ایہناں روایتاں دی جو یں چھان پھنگ کیتی جاندی اے تے سچ تیکر اپڑن لئی جیہڑا ٹل لایا جاندا اے، اوہ اک دوجی گل اے۔

(گجھ) لوکی جو یں حدیث اُتے اعتراض کر دے نیں ایویں ای ایہ اعتراض سیرت تے وی اے پئی ایہہ اچوکھا دارو مدار زبانی روایتاں یا سنیاں سنائیاں گلاں تے ہے۔ ایس سلسلے وچ پہلی گل تے ایہ ہے پئی محدثین نے روایتاں دے من لین یار دکر دین دے ڈاڈھے پیڈھے اصول بنائے نیں تے نری حدیث دی صحت یاں عدم صحت دا پتہ لان لئی کئی علم وجود وچ آئے نیں۔ ہزاراں بزرگاں نے عمراں دیاں عمراں صرف ایسے کوکم وچ گزار چھڑیاں پئی روایتاں بیان کرن والیاں کولوں کچھ پر تیت کر لئی جاوے۔ ایس صورت وچ حدیث تے سیرت دے ذخیرے توں بے بنیاد تے بے اصل کہہ دینا کوئی جاندار الزام نہیں ہوسکدا۔

سیرت دے ماخذ:

نبی اکرمؐ دی مبارک حیاتی توں جے ویلے دی عنیک نال ویکھئے تے تن زمانیاں وچ ونڈیا جاسکدا اے۔ اعلان نبوت توں پہلاں دادور، اعلان نبوت توں ہجرت تک دا زمانہ یعنی مکی دور تے تیجا مدینے تشریف آوری توں وصال تک دا زمانہ یعنی مدنی دور۔ پہلے دور یعنی میلاد النبی توں اعلان نبوت تک دے زمانے توں تواریخی لحاظ نال ایس کوئی ایڈا اگھڑیا ہو یا نہیں ویکھدے۔ ایس عہد دیاں جہڑیاں روایتاں پوری طاقت نال قابل اعتبار سمجھیاں جاندیاں نیں فقیر نیڑے تے اوہ وی ایس قابل نیں پئی اوہناں توں بغیر ای ایس اپنے آقاؐ دی شان وچ لکھیاں جان والیاں کتاباں توں نویں سرے ترتیب دوئیے۔ ایس اس حقیقت توں اکھاں نہیں میٹ سکدے پئی صحابہ وچ کوئی اجہیا بندہ نہیں سی جہدی عمر سرور کائناتؐ دی ولادت دے ویلے روایت دے قابل ہووے۔ سبھ توں وڈے حضرت ابو بکرؓ تے اوہ وی جناب سرور دو عالم a توں

دو درہے نئے سن۔ فیرولا دت پاک a نال جڑیاں روایتاں کوں تاریخ سیر دا حصہ بن گئیاں، گجھ نہیں آکھیا جاسکدا۔ اک روایت ویکھو پئی ابو نعیم نے حضرت آمنہ دے حوالے نال دسیا اے پئی جدوں آنحضرت a پیدا ہوئے اوہدوں ڈھیر سارے پیچھی مکان وچ آوڑے جہناں دی چچھ زمرد دی سی تے پر یا قوت دے سن۔ فیرواک چٹا بدل آیا تے حضور a نوں چک کے لے گیا تے ندا آئی پئی ایس بال نوں لہندے چڑھدے تے سارے دریاواں دی سیر کراؤتاں جے سارے لوکی ایس نوں پہچان لین۔ سمجھ نہیں آؤندی پئی ایہ روایت گھڑن والے دی کیہ منشا سی، جناب ابو نعیم تیکر کوں اپڑی تے فیرومولف ’مواہب الدنیہ‘ نے ایس نوں کہڑی کسوٹی تے پرکھ کے کتاب دا حصہ بنایا اے۔ اک روایت اے پئی جدوں محسن انسانیت عالم وجود وچ تشریف لیائے تے کسریٰ دے محل دے چوداں کنگرے ڈگ پئے تے آتش فارس جُجھ گئی۔ رب سونے نے ایڈی وڈی ہستی دی دُنیا تے آمد اعلان خورے ایس توں کئی وڈے وڈے کم کر کے کہتا ہووے پر سمجھ نہیں آؤندی پئی جے کرایہ گلاں ٹھیک نیں تے فیرفن حدیث دے امام تے آقا a نال بھرویں محبت تے عقیدت رکھن والے امام بخاری تے مسلم ایہناں ولوں کیوں اکھاں میٹ گئے۔ چیتے رہوے پئی ایہ روایت بیہقی، ابو نعیم، خاٹمی، ابن عساکر تے ابن جریر نے لکھی اے پر صحیح بخاری تے مسلم شریف سگوں صحابہ ستہ دی کسے کتاب وچ ایہدا ناں نشان وی نہیں۔ سواہی گل آکھنا غلط نہیں جا پدا پئی حیات مبارکہ دے مڈھلے دور دیاں تفصیلاں جنیاں غیر ضروری نیں اونیاں ای غیر معتبر وی نیں۔ ہاں اوہ بہت ساریاں گلاں جہناں دی گواہی قرآن دیندا اے یاں بعد دے حالات جہناں گلاں دی تصدیق کر دے نیں اوہ بہر حال تواریخ دا حصہ بن جانے چاہیدے نیں تے بنے وی نیں۔ مثلاً آپ a دی یتیمی دادور، نزول وحی توں تھوڑا چر اگدیں دا زمانا، معراج دا واقعہ، ہجرت دے واقعات، فتح مبین (صلح حدیبیہ) فتح مکہ تے کئی غزویاں دا ذکر اوہ واقعات نیں جہناں دا ماخذ خود قرآن اے۔ ایوں ای نبی اکرم a دی رضاعت بابت گلاں باتاں، مکے توں باہر دے سفر، والدہ محترمہ نال مدینے جانا تے رستے وچ اوہناں نال پئے جان والی ہمیش دی جدائی، حضرت عبدالمطلب تے حضرت ابوطالب دی سرپرستی دے حالات بھاریں زندگی دے مڈھلے دور دیاں گلاں نیں پر بعد دے واقعات تے حالات ایہناں گلاں دا تسلسل جا پدے نیں تے ایوں کسے شک شبے دی گنجائش باقی نہیں رہندی۔ تے ایہ ہی گلاں سیرت دا مڈھلا تے معتبر ماخذ قرار پاندیاں نیں۔

سیرت دادو جا ماخذ حدیث نبوی اے۔ صحابہ کرام نوں حضور پاک دی ذات نال ڈاڈھی محبت سی۔ آپ دی ہر ادا، ہر گل تے ہر کیفیت صحابیاں دے دلاں تے نقش ہو جاندی سی۔ فیروایہ دلاں توں نکل کے زباناں تے زباناں توں کتاباں تیکر اپڑ جاندی۔ سیرت نبوی بابت ایہ آکھنا پئی ایس دادو مدار زبانی روایتاں تے ہے غلط ثابت ہو چکیا اے۔ زبانی روایتاں دے وجود توں انکار ممکن نہیں پر پرکھ پڑچول دے جھڑے پکے پیڑھے اصول بنائے گئے نیں جے اوہناں نوں سامنے رکھے تے فیروماخذ دی صحت تے کسے شبے دی گنجائش باقی نہیں رہندی۔ ہاں ایہ دوجی گل اے پئی جتھے وی متھے اصولاں نوں چھڈیا گیا او تھے ای کمزور روایتاں آوڑیاں۔ جویں کہ اُتے ذکر کیتا گیا اے پئی مؤلفین صحابہ ستہ نے ایوان کسریٰ دے کنگرے ڈگن والی تے آتش فارس دے بجھ جان ولی روایت نوں رد کیتا اے۔ دوجی گل ایہ پئی لکھ لین دارواج وی اپنی تھان موجود سی

جویں کہ جناب عبداللہ بن عمر دے بیاض صادقہ دا پچھلے صفحیاں تے ذکر ہو چکیا اے۔
سیرت دالمڈھلا دور:

بھانویں نبی اکرم دی حیاتی وچ کجھ لکھیا ہو یا پرکھلر یا پلریا مواد موجود سی پر تصنیف و تالیف دا باقاعدہ رواج نہیں سی۔ ایس لئی چوکھے چراں تیکر ایہ سرمایہ قلم دی چچھ وچ نہ آسکیا۔ بعد وچ حکمراناں دی توجہ تے مہربانی نال ایہ شوق پیدا ہو یا تے ایس کھیتز دا علم رکھن والے سیانے لکھن دے کم وچ رُجھ گئے۔ سبھ توں اگدیں حضرت معاویہ نے عبید ابن شریح نوں یمن توں سد کے پہلے لوکاں دے حالات لکھائے تے ایس کتاب داناں اخبار الماضیین رکھیا۔ ایس توں بعد عبدالملک بن مروان نے حضرت سعید بن جبیر توں قرآن دی تفسیر لکھان دا آہر کیتا۔ اوس دور دے سیانیاں تے عالماں نوں لکھن دے کم لئی کئے زور نال آکھیا گیا ایس دا اندازا مشہور محدث ابن شہاب زہری دے ایس قول توں کیتا جاسکدا اے پئی ایسیں علوم دی کتابت مکروہ خیال کر دے ہوندے ساں پر حاکماں نے سانوں لکھن تے مجبور کر دتا۔

علوم اسلامیہ دی لکھائی دا اصل سہرا حضرت عمر بن عبدالعزیز دے سرتے نظریں پئیدا اے۔ مشہور مورخ ابو نعیم آکھدے نیں پئی حضرت عمر بن عبدالعزیز نے حدیث دی تدوین دا باقاعدہ حکم دتا سی۔ ابن سعد لکھدے نیں پئی سبھ توں پہلوں آپ نے ہی مدینے دے قاضی تے مشہور عالم حدیث ابن شہاب زہری دے استاد ابوبکر بن محمد دا حدیث دی تدوین تے ترتیب ول دھیان کرایا۔ ابن سعد دی ایس گل دی تائید امام بخاری نے وی کیتی اے۔ عبدالبر نے سعد بن ابراہیم توں نقل کیتا اے پئی حضرت عمر بن عبدالعزیز نے سانوں حکم دتا پئی حضور دیاں سنتاں (سنن) اکٹھیاں کرئیے۔ ایہناں ساریاں روایتاں توں ایہ پتا لگدا اے پئی حضرت عمر بن عبدالعزیز ای اصل وچ اوہ پہلے بندے نیں جہناں نے ایس نیک کم لئی باقاعدہ کوشش کیتی۔

حضرت عمر بن عبدالعزیز نے مغازی ول وی توجہ کیتی تے عاصم بن عمر ابن قتادہ انصاری نوں حکم دتا پئی اوہ حلقہ درس قائم کرن تے اوہ تھے مغازی (سیرت) پڑھان۔ جناب عمر دی دلچسپی اتے جناب عاصم بن عمر دی کوشش دا ایہ نتیجا نکلیا پئی عالماں وچ مغازی دے مطالعے دا رجحان پیدا ہو گیا البتہ کھوج کاراں وچکار ایس گل تے چوکھا اختلاف اے پئی مغازی یاں سیرت دی پہلی کتاب کنے لکھی۔ حاجی خلیفہ ”کشف الظنون“ وچ لکھدے نیں پئی مغازی دی پہلی کتاب محمد بن اسحاق دی اے۔ ڈاکٹر مصطفیٰ الاعظمی دی پڑچول موجب سبھ توں اگدیں سیرت دے موضوع تے جناب ابان بن عثمان نے قلم چکیا۔ اوس توں بعد اوہ عروہ بن زبیر تے شرجیل بن سعد داناں لہندے نیں۔ جرمنی دے مشہور مستشرق جوزف ہور ووز دی تحقیق موجب وی سیرت نبوی نوں سبھ توں اگدیں لکھن داکم ابان بن عثمان نے کیتا۔ فیر اوہ عروہ بن زبیر، شرجیل بن سعد تے وہب بن منبہ دے نام لہندے نیں۔ جناب جوزف نے جرمن زبان وچ لکھے اپنے مضمون وچ ایہہ ویرواوی کردتا اے کہ جس ابان بن عثمان دا اوہ ناں لہندے نیں اوہ خلیفہ راشد حضرت عثمان دے پتر نیں جد کہ اک دوجے ابان بن عثمان نوں وی سیرت دی توارخ جان دی اے پر اوہ ابان بن عثمان الجبلی اکھوائے۔ جناب جوزف تابعین توں بعد دی نسل وچوں

وی کئی بزرگاں دے ناں لیندے نیں جیہناں مغازی ول توجہ کیتی جویں کہ عبد اللہ بن ابی بکر، عاصم بن عمر بن قتادہ تے محمد بن مسلم الزہری دے ناں۔ ایناں تنّاں دا تعلق مدینہ دے مکتب نال سی تے ایناں نوں محمد بن اسحاق دے شیوخ سمجھیا جاند اے۔ فقیر ایہ سمجھدا اے پئی جناب جوزف نے جنے محترم بزرگاں دے مبارک نام لے نیں ایناں وچ صرف محمد بن مسلم زہری اوہ مصنف نیں جنہاں دے کم تُوں اصطلاح وچ کتاب آکھیا جاسکدا اے۔ دو جیاں لکھتاں کجھ ہور سرناویاں (Titles) دیاں ہناشہ حقدار نیں پر کتاب نہیں اکھواسکدیاں۔ ایوں امام سہیلی دا ایہ فیصلہ بھار رکھدا اے پئی سیرت دی پہلی کتاب امام زہری دے ہتھوں لکھی گئی۔ آکھدے نیں:

”ہی اول سیرہ فی الاسلام“

ایہ پہلی سیرت (دی کتاب) اے جہڑی اسلام وچ لکھی گئی۔

مولانا شبلی نعمانی نے وی زہری تُوں ای پہلا سیرت نگار منیا اے جد کہ کجھ لوکاں نے سیرت ابن ہشام نوں سیرت دی پہلی کتاب آکھیا اے۔ دو جے پاسے ایس گل داوی کوئی معقول جواب نہیں لہج سکیا کہ اوس کتاب تُوں کہدی تھاں تے رکھیا جاوے جہڑی مغازی رسول اللہ دے عنوان نال ادارہ ثقافت اسلامیہ لاہور نے چھاپی اے تے اوس تُوں جناب عروہ بن زبیر دی لکھت ہی آکھیا گیا اے۔ ایس لحاظ نال ابان بن عثمان یاں عروہ بن زبیر نوں ای پہلا سیرت نگار مننا پسند اے۔

موسیٰ بن عقبہ تے محمد بن اسحاق امام زہری دے منے پر منے شاگرد نیں۔ اوہناں دوواں بزرگاں نے نہ صرف کتاباں لکھیاں سگوں ایس کم تُوں اک فن دی تھاں دتی۔ بھاویں موسیٰ بن عقبہ دی مغازی الرسول ویلے دے ظالم ہتھیاں توں نہیں بچ سکی فیروی سیرت دیاں معتبر کتاباں وچ ایس دے حوالے ملدے نیں۔ ابن اسحاق نے ایس فن وچ بھرویں عزت کمائی اے ایتھوں تیکر پئی امام بخاری نے اپنی کتاب الغزوات، ابن اسحاق دی روایت نال ای شروع کیتی اے۔ ابن اسحاق توں بعد سیرت نگاراں وچ جس دا نام آؤندا اے اوہ محمد بن عمر ابن واقد اے جس تُوں تواریخ واقدی دے نام نال یاد رکھدی اے۔ واقدی ۷۴۷ وچ مدینے وچ پیدا ہو یا تے ۸۲۳ء وچ عراق دے شہر بغداد وچ مر گیا۔ واقدی بھاویں احکام تے مسئلیاں وچ متروک الحدیث اے پر سیرت وچ اس دیاں روایتاں قبول کر لئیاں جاندیاں نیں۔ اس بابت ابن کثیر دی رائے ایہ ہے پئی واقدی کول ودھیا تفصیلاں تے لکھے ہوئے واقعات موجود سن تے اوہ ایس فن دے وڈے امام سن۔ مولانا شبلی نعمانی اوہناں توں ناراض جابدے نیں، بھاویں اوہناں نے اپنی سیرت وچ طبقات ابن سعد دیاں روایتاں نقل کیتیاں نیں۔ طبقات اصل وچ واقدی دی مغازی الرسول وچوں ماخوذ اے۔

سیرت نگاری وچ ابن اسحاق تے واقدی ماخوذ دی حیثیت رکھدے نیں۔ اوہناں توں پہلاں جنہاں لوکاں ایس موضوع تے طبع آزمائی کیتی اج اوہناں دیاں کتاباں نہیں لہج دیاں۔ اوہناں دوواں دی خوش بختی اے پئی ابن اسحاق نوں ابن ہشام ورگاتے واقدی تُوں ابن سعد ورگابند لہج گیا جنہاں نے اوہناں دیاں اصل تصنیفاں تُوں ہمیشگی دے دتی۔

سیرت اُتے مڈھلیاں کتاباں تے اوہناں دے لکھن والے

پچھے سیرت دے مڈھلے دور دا ذکر کر دیاں گجھ مڈھلیاں کتاباں داوی ذکر ہو یا اے پراسیں ایس گل دا فیصلہ نہیں کر سکے کہ سیرت دی مڈھلی کتاب کھڑی سی۔ فقیر نے بھاویں کوئی رائے دتی وی اے پر اوہ سند نہیں۔ ایس لئی اسیں تواریخ وچ لہجہ دے اک مشہور مقالے دا سہارا لیندے ہاں۔ ایہ مقالہ مشہور جرمن مستشرق جوزف ہورووز (Goseph Horovitz) ہوراں جرمن زبان وچ لکھیا۔ ۱۹۲۶ وچ محمد ماراڈیوک پکتھال مرحوم نے ایس نوں انگریزی داروپ دتا تے ایہ ’اسلامک کلچر‘ دی پہلی جلد (۱۹۲۷) تے دوجی جلد (۱۹۲۸) وچ قسطل نال چھپیا۔ عربی زبان وچ اس دا ترجمہ حسین نصار ہوراں کیتا جو مصر وچ ۱۹۶۹ء وچ چھپیا۔ ڈاکٹر نثار احمد فاروقی ہوراں انگریزی تے عربی ترجمیاں نوں ساہنے رکھ کے ایس دا اردو ترجمہ کیتا تے آپوں وی جتھے ضروری سمجھیا کجھ اشارے شامل کر دتے۔ ایس مشہور مضمون نوں سیرت دیاں مڈھلیاں کتاباں تے سندن دیاں ہونیاں فقیر نے ایس دا پنجابی ترجمہ کرن دی جسارت کیتی اے۔ پراتھے ایہ ویر و ضروری جا پدا اے کہ ایہ ایس مضمون دی کئی توں کئی شکل اے نہ کہ پورا ترجمہ۔ میں محمد بن سعد توں بعد گل اگے ٹوری اے۔ آؤ پڑھدے ہاں:

عربی ادب دے تن کھیتز نیں جہناں نوں رسول اللہ a دے کماں تے گلاں دا مڈھ آکھنا چاہیدا اے۔ یعنی حدیث، سیرت تے تفسیر۔ شخصی روایت، ایہناں تنان وچ سانجھی اے۔ ایس دا مطلب ایہ ہے کہ حدیث دے متن نوں سنداں دی پوری لڑی نال پیش کیتا جاندا اے۔ پرتناں کھیتزاں دیاں کتاباں جہناں وچ ایہ روایتاں ای شامل نیں اوہناں نوں وکھو وکھ ڈھنگ نال پیش کر دیاں نیں۔ حدیث دے مجموعے موضوع دی تقسیم نال ترتیب دتے گئے نیں یاں اوہناں صحابیاں دے ناواں نال جہناں تیکر روایتاں دی لڑی جُجیدی اے جو یں کہ مسند احمد بن حنبل۔ سیرت دیاں کتاباں وچ ایہ روایتاں تواریخی ترتیب نال آؤندیاں نیں تے تفسیر وچ ایہناں نوں اوہناں قرآنی آیتاں دے نال لکھیا جاندا اے جہناں نال اوہناں روایتاں دا تعلق بن دا اے۔

سچ ایہ ہے کہ اُتے لکھے گئے تنان کھیتزاں وچ کوئی وی مواد دے لحاظ نال اکو جیاں کتاباں پیش نہیں کر داسگوں اوہناں وچ فرق یاں اختلاف لہجہ اے۔ ایہ اختلاف کدرے تے لکھاری دے اپنے نظریے پاروں ہوندا اے تے کدے روایتاں نوں پرکھن دے معیار دے فرق موجب، پرتناں کھیتزاں دیاں اوہ کتاباں جہناں نوں ممکن حد تک جامع آکھیا جاسکے جو یں کہ واقدی دی کتاب المغازی تے امام احمد بن حنبل دی مسند، اصل وچ اکو ای مواد رکھ دیاں نیں۔ سانوں واقدی دی المغازی وچ اوکڑاں نال ای کوئی اجہی حدیث لہجے گی جھڑی مسند احمد بن حنبل وچ درج نہ ہووے۔

اصحاب رسول a توں بعد تابعین دی نسل نے رسول اللہ a دے کماں کاراں تے گلاں باتاں دیاں اوہ

روایتیں اکٹھیاں کرنیاں چھوہ دیتیاں سن جہڑیاں اوہناں دے زمانے وچ رائج سن۔ تے ایس وچ ہُن کوئی شک نہیں کہ تابعین دے زمانے وچ نبی دیاں اوہ حدیثاں صحیفے یاں کتاب دی شکل وچ لکھدیاں سن جہناں داماواد اصحاب رسول توں حاصل کیتا گیا سی۔ تابعین وچ اچھے بندے وی لکھدے سن جہڑے مغازی دی سیانے سمجھے جاندے سن۔ مغازی دا مطلب اے ”جنگاں“۔ لفظی معنیاں دے لحاظ نال تے ایس شے تُوں رسول خدا دے غزویاں تے آپ دے جہناں متراں تیکر محدود رہنا چاہیدا سی پر ایس توں مطلب ایہ لیا جان لگ پیا کہ ایہ رسول اللہ دی پوری پاک حیاتی دیاں گلاں نیں۔ ایس اتھے تابعین وچ ہون والے مغازی دے سیانیاں، تے اوہناں دیاں لکھتاں دا ذکر کردے ہاں۔

(۱) ابان بن عثمان:

تابعین وچ مغازی دے عالم دی حیثیت نال سمجھ توں اگے کھلوتے بندے ابان بن عثمان دسدے نیں۔ اوہناں دی پیدائش کسے وی طرحاں ۲۰ھ توں بعد دی نہیں ہو سسکدی، ایس لئی کہ ۳۶ھ وچ اوہ ایڈے دڈے ہو چکے سن کہ اوہناں حضرت عائشہ، حضرت طلحہ تے حضرت زبیر دے نال اوس مہم وچ رلت کیتی سی جیہڑی اوہناں حضرت عثمان دی شہادت دے سلسلے وچ قصاص طلب کرن لئی شروع کیتی سی۔

ابان دا نام محدثین وچ چوکھے احترام نال لیا جاند اے۔ آکھیا جاند اے کہ اوہناں دے بیٹے عبدالرحمن توں دکھ ابوالتر نادتے زہری نے اوہناں کولوں حدیثاں سنیاں سن۔ حدیث دیاں کتاباں وچ آپ دا نام چنگا و جدا اے پر سیرت دیاں کتاباں وچ نہیں لکھدا۔ سانوں آپ دا ذکر ابن اسحاق یاں ابن سعد دیاں کتاباں دے اوس حصے وچ جہڑا سیرت نال تعلق رکھدا اے، بالکل نہیں لکھدا۔ ایگل ٹھیک اے کہ ابن سعد نے جنگ بدر ویلے عباس تے دوجے ہاشمیاں دی گرفتاری دا حال ابان بن عثمان دی روایت نال لکھیا اے پر سند اوس توں پتا لگدا اے کہ ابن سعد نے جس ابان دا ذکر کیتا اے اوہ حضرت عثمان (تیجے خلیفہ) دے پتر نہیں سگولں اک دو جا ابان بن عثمان اے تے اوس دا پورا نام ابان بن عثمان الجبلی اے۔ مغیرہ بن عبدالرحمان دا ذکر کر دیاں ابن سعد لکھدے نیں کہ اوہ اعتماد والے بندے سن تے اوہناں نے بہت گھٹ حدیثاں دی روایت کیتی اے پر جگہ مغازی جہڑے اوہناں تیکر ابان بن عثمان کولوں تیجے سن، اوہ اکثر پڑھدے ہوندے سن تے سانوں اوہناں دی تعلیم دی اجازت دے دیندے سن۔

آپ دی وفات ولوں کوئی کچی پیڑھی گل نہیں کیتی جاسکدی۔ مرن توں اک ورھا اگدیں اوہناں تے فالج دا حملہ ہویا سی۔ بخاری نے اپنی توارخ وچ لکھیا اے کہ اوہ ولیدی دور وچ (۹۶-۸۶ھ) وچ مرے پر ابن سعد دا خیال اے کہ اوہناں دی وفات یزید ثانی (۱۰۵-۱۰۱ھ) دے عہد وچ ہوئی۔

(۲) عروہ بن زبیر:

ابان دی ولادت دے گجھ ای چر پچھوں عروہ بن زبیر پیدا ہوئے۔ ایہ وی مغازی دے ایوں دے ای عالم سن۔ اوہناں کولوں چنگا چوکھا ذخیرا ساڈے تیکر چُجد اے۔ (ادارہ ثقافت اسلامیہ لاہور نے ایس ذخیرے تُوں مغازی رسول اللہ دے نام نال چھاپیا اے۔ اوہدے وچ ڈاکٹر محمد مصطفیٰ الاعظمیٰ دا تحقیقی مقالہ وی شامل اے۔ ایہ اردو ترجمہ سعید الرحمن علوی

ہو راں کہتا اے۔ ۲۸۵ صفحیاں دی ایہ کتاب پاکستان وچ عام لہدی اے) (جاوید)

جناب عروہ داحجاج بن یوسف نال اک مکالمہ بڑا مشہور اے۔ ہو یا ایہ کہ اوہناں نے عبدالملک نال گلاں کردیاں اپنے بھرا عبداللہ داکراوس دی کنیت ابوبکر نال کہتا۔ حجاج نے جناب عروہ تے ملامت کردیاں آکھیا:

”تیری ماں مرے توں اک منافق دا ذکر امیر المومنین دے سامنے کنیت نال کرنا ایں۔“

”حجاج! ایہ گل توں مینوں کہ رہیا ایں؟“ عروہ نے جواب دتا ”جہڑا جنت دیاں سردار عورتاں دا پتر ہاں۔ میری ماں اسماء بنت ابوبکر اے، نانی صفیہ بنت عبدالمطلب اے۔ عائشہ میری ماسی اے تے خدیجہ بنت خویلد میری پھپھی۔ (چیتے رہوے کہ عروہ حضرت ابوبکر صدیق دے دوہترے سن) (جاوید)

اک واری عبدالملک بن مروان، عبداللہ بن زبیر تے اوہناں دے دوویں بھرا عروہ تے مصعب، معاویہ بن ابوسفیان دے عہد حکومت وچ مسجد حرام وچ اکٹھے بیٹھے سن۔ کسے آکھیا آؤ بھئی آپو اپنے دل دی گل کریئے۔ عبداللہ آکھیا ”میری خاتہش اے کہ دوواں مقدس شہراں (مکہ تے مدینہ) تے حکومت کراں تے خلیفہ بن جاواں۔“ مصعب بولے ”دل کردا اے عراق دے دوواں پاسیاں تے قبضہ کر لوں تے قریش دیاں سبھ توں چوکھیاں سونیاں دوسوانیاں سیکہ بنت حسین تے عائشہ بنت طلحہ میرے نکاح وچ ہوں۔“ عبدالملک بن مروان نے آکھیا کہ ”مجھ ایہ ہے کہ ساری دنیا تے حکومت کراں تے معاویہ دا جانشین بن جاواں۔“ اخیر تے عروہ بولے تے آکھن لگے۔ ”مینوں ایہناں وچوں کوئی تمنا نہیں۔ میں تے ایہ چاہندا ہاں کہ دنیا وچ پرہیزگاری دی حیاتی گزاراں، آخرت نوں سرخرو ہوواں تے اوہناں لوکاں وچ گنیا جاواں جہناں کولوں علم دی روایت کیتی جاندی اے۔“ زمانہ بدلایا تے اوہناں وچوں ہر اک اپنی اپنی مراد پا گیا۔ ایسے پاروں عبدالملک آکھدا ہوندا سی کہ جہڑا کوئی دنیا وچ جنتی بندے نوں ویکھنا چاہوے اوہ عروہ بن زبیر نوں ویکھ لوے۔ عروہ مدینہ دے ست وڈے فقہاء وچوں اک سن۔ عروہ دے سن وفات داوی پکا پتا نہیں۔ خیال اے کہ اوہ ۹۴ھ وچ چلانا کر گئے سن۔

۳۔ شرجیل بن سعد:

ابان تے عروہ دے برخلاف، جہڑے تگڑے خاندانی بندے سن، شرجیل بن سعد اک غلام سن تے ایہ مغازی لٹریچر دا تیجا وڈا نام اے۔ اوس دے دور دا اندازا ایس گل توں لایا جاسکدا اے کہ گجھ لوکی آکھدے نیں کہ اوس نے حضرت علیؓ نوں ویکھیا سی۔

ابن حبان نے شرجیل نوں معتبر محدث منیا اے۔ اسحاق تے واقدی نے شرجیل توں روایت نہیں لئی پر ابن سعد نے رسول اللہ دی قباء توں مدینہ ول ہجرت دی خبر آپ توں ای لئی اے۔ ایس خبر وچ آپ نے سنداں دی لٹری نہیں دتی پر ایس توں ایہ نتیجا نہیں نکلا کہ دو جیاں روایتاں وچ وی اوہ ایوں ہی کردے ہوں گے۔ شرجیل نے اپنے آپ نوں مغازی تیکر ای محدث نہیں رکھیا۔ آپ دا انتقال ۱۲۳ھ وچ ہو یا۔

۴۔ وہب بن منبہ:

مغازی دے اوہ تن عالم جہناں دا اُتے ذکر ہو یا اے یعنی ابان، عروہ تے شرجیل مدینہ دے رہن والے سن تے

اوتھے ای حیاتی کئی پراوہناں توں ہٹ کے چوتھی ہستی وہب بن منبہ جہڑے تابعین دی نسل وچوں ہی سن جنوبی عرب دے باشندے سن تے ایرانی النسل سن۔ آپ اک اچھے فارسی خنوادے وچ جے جہنے اسلام توں پہلاں نوشیرواں کسریٰ دے عہد وچ ایران توں مہاجر ہو کے جنوبی عرب وچ آوسوں کیتی۔ ایس وچ شک کرن دی کوئی معقول وجہ نہیں لکھدی کہ وہب ۳۴ھ وچ پیدا ہوئے۔

وہب نوں ثقہ راوی منیا جاندا اے۔ آکھیا جاندا اے کہ اوہناں نے ابن عباس، جابر تے ابو ہریرہ وغیرہ توں روایت کیتی اے پر دو جیاں دے مقابلے تے اوہناں کولوں بہت گھٹ اخذ کیتا گیا اے۔ امام بخاری نے اوہناں کولوں اک حدیث روایت کیتی اے جہدا سلسلا وہب نے اپنے بھراہام دے واسطے نال ابو ہریرہ تیکر اپڑایا اے۔ وہب نے جہڑا مواد اکٹھا کیتا سی اوس توں اوہناں دے پوترے عبدالمنعم نے محفوظ کیتا سی تے آؤن والیاں نسلاں تیکر اپڑایا۔ وہب دی ”کتاب المبتدا“ الفہرست وچ نظر آؤندی اے۔ حاجی خلیفہ نے وہب توں اک ہور ”کتاب الاسرائیلیات“ دی منسوب کیتی اے۔ ساڈا خیال ایہ ہے کہ ایہ اصل وچ کتاب المبتدا ای ہے۔ وہب نے اپنی خاص تالیف ”کتاب الملوک“ وچ اپنے وطن (مین) دی پرانی تواریخ لکھی اے۔ وہب دیاں ایہناں کتاباں دا مغازی نال کوئی تعلق نہیں بن دا جہڑا ساڈا اصل موضوع اے پر جے اسیں مغازی دے مفہوم تے معنیاں دا گھیر ذرا کھلا کر دویے تے فیروہب دیاں کتاباں ساڈی بحث دے دائرے اندر آجاندیاں نیں۔ حاجی خلیفہ زور دے کے آکھیا اے کہ وہب نے مغازی اکٹھے کیتے سن تے اوہناں دا بیان درست وی جا پدا اے۔ سی ایچ بیکر نے شوٹ رینارڈ دے ذخیرہ اوراق بردی (Papyri) وچ جہڑا ہن ہائڈل برگ وچ محفوظ اے، اک مجموعہ دریافت کیتا اے جہڑا وہب دی کتاب المغازی دا احصا معلوم ہندا اے۔

۵۔ عبد اللہ بن ابی بکر:

تابعین توں بعد آؤن والی نسل وچ بہت سارے علمائے حدیث نظر آؤندے نیں پر اوہناں وچ تن نام اچھے نیں جہناں دا اچھے طور تے ذکر ہونا چاہیدا اے۔ کیوں جے اوہناں نے مغازی ول چوکی توجہ دتی سی۔ اوہ تن بندے عبد اللہ بن ابی بکر، عاصم ابن عمر بن قتادہ تے محمد بن مسلم الزہری نیں۔ اوہ تے مدینہ سکول دے پیرو تے ابن اسحاق دے وڈے شیوخ نیں۔

عبد اللہ اک مدنی خاندان وچ پیدا ہوئے۔ عہد نبوی وچ اوہناں دے وڈکیاں نے اسلام دی چوکی سیوا کیتی سی۔ ایس پاروں عبد اللہ دے جد اعلیٰ توں رسول اللہ نے مین ول بھجیا تاہجے اوتھے لوکاں وچ اسلام دا پرچار کرن۔ اوہ نجران وچ رسول اللہ دے گورنر دی حیثیت نال وی رہے۔ عبد اللہ دے باپ ابو بکر فقہ اسلامی دے ماہر سمجھے جاندے سن۔ ایس علم وچ آپ ابان بن عثمان دے شاگرد سن۔ خلیفہ سلمان نے ۹۶ھ وچ آپ نوں مدینے دے چیف جسٹس دے نال نال گورنری مقرر کر دتا۔ آپ نے جدوں اپنے بیٹے عبد اللہ دی حدیث وچ دلچسپی دیکھی تے نصیحت کیتی کہ ہر حدیث دے مواد دا چنگی طرحاں مطالعہ کرے۔ اوہناں توں عمر ثانی ولوں ایہ حکم ملیا سی کہ ”رسول اللہ دی جہڑی حدیث یاں کوئی قدیم روایت یاں عمرہ بنت عبد الرحمن دی بیان کیتی کوئی حدیث تھ آئے تے اوس نوں فوراً لکھ لوؤ۔ ایس لئی کہ مینوں علم دے ضائع ہو جان

یاں عالماں دے چلانا کر جاوَن دا خوف پیدا ہو گیا اے۔“

ابن اسحاق، واقدی، ابن سعد تے طبری دے وکھو وکھ کماں وچ اسیں حدیث دی روایت وچ عبد اللہ دیاں سرگرمیاں دا اندازا کر سکدے ہاں، خاص طور تے جو کچھ اوہناں مغازی دے کھیت وچ کتیا اے۔ ’الفہرست‘ توں سانوں پتا لگدا اے کہ عبد اللہ بن ابی بکر دے بھتیجے عبد الملک بن محمد القاضی نے، جیہڑے آپو وی قاضی سن تے ۱۷۶ھ وچ فوت ہوئے، اک کتاب ’المغازی‘ لکھی سی۔ ایس کتاب دلوں خیال کیتا جاندا اے کہ ایہ اوہناں نے اپنے چاچے کولوں اخذ کیتیاں روایتاں دی بنیاد تے ای لکھی ہوئے گی۔

۶۔ عاصم بن عمر:

عاصم بن عمر بن قتادہ اک مدنی گھرانے وچ پیدا ہوئے۔ آپ سیرۃ تے مغازی دے مشہور عالم سن تے ثقہ راویاں وچ گنے جان دے سن۔ آپ مدینے وچ تقریباً ۲۰ ورھے علم دے پیاسیاں دی پیاس بجھاندے رہے۔ آپ ابن اسحق تے واقدی دے معتبر راویاں وچوں سن۔ اوہناں نے اُچھے طور تے مغازی دیاں روایتاں عاصم توں لیتیاں نیں۔ عاصم نے رسول اللہ دے جوانی دے زمانے دیاں گلاں تے آپ دی کئی زندگی دی تفصیل جمع کرن تے وی توجہ دتی اے، جویں کہ ابن سعد دے حوالیاں توں پتا لگدا اے۔ عاصم عام طور تے اپیناں سندناں بیان کردے نیں پر کدے کدے نہیں وی کردے۔ ایس اعتبار نال آپ داروِیا اوہی اے جہڑا عبد اللہ بن ابی بکر دا اے۔

۱۱۹ھ یاں ایس توں گچھ چر بعد عاصم چلانا کر گئے۔

۷۔ ابن شہاب الزہری:

کتاب ’المغازی‘، امام زہری دی تصنیف اے۔ آپ دا پورا نام محمد بن مسلم بن شہاب الزہری اے۔ آپ ۵۰ھ وچ مکہ وچ پیدا ہوئے۔ آپ قریش دے مشہور خانوادے نبوزہرہ وچوں سن۔ آپ تابعی سن تے بہت سارے صحابیائوں بذات خود ویکھیا سی۔ آپ مدینے دے اک اک گھر وچ جان دے رہے تے رسول کریم دے حالات تے حکماں بارے کھوج کاری کردے رہے۔ خیال اے کہ امام زہری نے مغازی دی تصنیف داکم خلیفہ عمر بن عبد العزیز دے آکھن تے شروع کیتا۔ ساڈے تیکر اوہناں دی کوئی تصنیف نہیں اپڑی پر اوہناں دی سند نال بہت ساریاں روایتاں لکھ دیاں نیں۔ امام صاحب ۱۲۴ھ وچ وفات پا گئے تے حجاز وچ شغب دے تھان تے دفن ہوئے۔

۸۔ موسیٰ بن عقبہ:

موسیٰ حضرت زبیر بن عوام دے غلام سن تے امام زہری دے شاگرد۔ آپ نے عہد رسالت دیاں روایتاں اکٹھیاں کرن تے بوہت ساری محنت کیتی۔ اوہناں دی ایس سچل دا اعتراف کردیاں ہوئیاں ویلے نے اوہناں نوں صاحب المغازی دا لقب دتا۔ آپ روایتاں دی چون وچ چوکی احتیاط توں کم لیندے سن۔ پکی عمر تے پکے فہم دے لوکاں توں ای روایت قبول کر دے سن۔ آپ دے سن پیدائش دا پتا نہیں لگ سکیا پر سن وفات ۱۴۱ھ اے۔ آپ دی کتاب اک مدت تیکر شائع ہوندی رہی۔ واقدی، ابن سعد تے طبری دیاں کتاباں وچ عقبہ دی کتاب دے حوالے لکھدے نیں۔ ایس کتاب نوں

وی ویلے دے بے رحم ہتھان نے ساتھوں کھوہ لیا اے۔

۹۔ معمر بن راشد:

معمر بن راشد بصرہ وچ وسدے قبیلے اُزدی لڑی بنو حدان دے غلام سن۔ آپ ۹۶ھ دے نیڑے تریڑے بصرہ وچ ای پیدا ہوئے۔ معمر نے اپنی جوانی دے زمانے وچ بصرہ دے مشہور محدث قتادہ بن دعامہ توں حدیث دا علم حاصل کیتا۔ فیر علم دی طلب تے کھوج وچ تھان تھان پھر دے رہے۔ ایوں جا پیدا اے پئی ایہہ شہر گردی اوہناں نے خولجہ حسن بصری دی وفات پچھوں شروع کیتی، کیوں جے معمر خولجہ صاحب دے جنازے وچ شریک سن۔ اوہناں نے یمن توں اپنا پکا ٹھکانا بنا لیا تے او تھے ای ویاہ وی کر لیا۔ بصرے کدے کداری جان دے سن۔ یمن وچ ای ۵۸ ورھیاں دی عمر وچ ۱۵۴ھ وچ وفات پائی۔

معمر بڑے اچھے اخلاق تے کردار دے بندے سن۔ ابن جریج دا قول اے پئی معمر دے پچھے ٹر و کیوں جے ایہدے ویلے وچ ایس توں ودھ علم رکھن والا کوئی نہیں ۱۱ الفہرست توں پتا لگدا اے پئی ایہناں نے اک کتاب المغازی لکھی سی، پر ساڈے تیکر کجھ گلاں ای اپڑیاں نیں۔ اوہناں دیاں روایتاں چوکیاں تے واقدی تے ابن سعد دیاں کتاباں وچ لہجیاں نیں تے کجھ بلاذری تے طبری کول۔ کجھ روایتاں زہری تیکر وی اپڑیاں نیں۔

۱۰۔ محمد ابن اسحاق:

پورا نام محمد بن اسحاق مطلبی اے۔ ابن اسحاق نے سیرت دے فن وچ اینا ناں کمایا اے پئی ایہ فن سیرت دے امام سمجھے جاندے نیں۔ موسیٰ بن عقبہ وانگ آپ وی امام زہری دے شاگرد سن۔ حضرت انس توں آپ دی حیاتی وچ ویکھیا اے۔ ایویں ابن اسحاق توں تابعی ہون دا وی شرف حاصل اے۔ علامہ بلاذری دا خیال اے پئی ابن اسحاق نے ایہہ کتاب خلیفہ منصور عباسی دے آکھن تے لکھی سی۔ کجھ ہور لوک آکھدے نیں پئی تصنیف داکم تے اپنی مرضی نال کیتا البتہ بغداد وچ ایہ کتاب خلیفہ توں پیش ضرور کیتی۔ ایہ اُس دور دی گل اے جدوں امام مالک بن انس نے حدیث دی مشہور کتاب ”موطا“ تالیف کیتی۔ ابن اسحاق مدینے دے رہن والے سن پر اپنی حیاتی دے اخیر دی بغداد وچ گزارے۔ سن ۱۵۰ھ وچ فوت ہوئے تے او تھے بغداد وچ ای دفن ہوئے۔

ابن اسحاق دی سیرت اپنی جامعیت تے معتبری دے حوالے نال دنیا دی کسے کتاب توں پچھے نہیں تے اوس توں تواریخ دیاں کتاباں دی ماں سمجھیا جاند اے۔ امام طبری تے ابن خلدون ورگے وڈے مورخاں نے ابن اسحاق توں کثرت نال روایت کیتی اے۔

۱۱۔ ابو معشر السندی:

ابن اسحاق نال ویلے داسا نچھ کار (معاصر) اک منہذا ابو معشر وی سی۔ جس داکم واقدی تے ابن سعد وغیرہ نے سانجھ لیا اے۔ ابو معشر تواریخ وچ السندی دے نام نال جانیا جاند اے۔ ایس توں پتا لگدا اے پئی ایہ آپ یاں اسدا کوئی وڈکا سندھ توں ہجرت کر کے عرب اپڑیا سی۔ ابو نعیم نے اپنا ماخذ دسیاں بنا ایہ گل آکھی اے پئی ”ابو معشر سندھ دار بن والا سی تے

اوہدی زبان وچ ہکلاہٹ سی۔“ ابو معشر ۷۰ھ وچ بغداد وچ فوت ہوئے تے خود ہارون الرشید نے اوہناں دی نماز جنازہ پڑھائی۔ امام احمد بن حنبل نے ابو معشر نوں بصیر فی المغازی یعنی مغازی وچ بصیرت رکھن والا آکھیا اے۔

الفہرست توں پتا لگدا اے پئی اُس نے کتاب المغازی، لکھی سی۔ ایس کتاب دے کئے سارے حوالے الواقدی دی کتاب المغازی وچ لہجہ دے نیں۔

۱۲۔ الواقدی:

محمد بن عمر الواقدی ۱۳۰ھ وچ مدینہ شریف وچ پیدا ہوئے تے اپنے وڈکے واقدی نسبت نال الواقدی اکھوائے۔ اوہناں اسلامی روایاں اکٹھیاں کرن وچ بڑا نام پیدا کیتا۔ واقدی نے دین اسلام اُتے ڈھیر ساریاں کتاباں لکھیاں۔ ابن الندیم بغدادی نے کتاب الفہرست وچوں ۲۰ کتاباں دے نام لکھے نیں جہناں وچ چوکھیاں غزوات نبی تے اسلامی فتوحات بارے نیں۔ کتاب المغازی اصل تے پوری ساڈے تیکر مچی اے۔ الواقدی نے ابن اسحاق نالوں چوکھیاں تفصیلاں دتیاں نیں۔ امام طبری تے کجھ دوجے مورخاں نے الواقدی نوں مغازی وچ سند بنیا اے۔ مستشرقین نے جہڑی کھوج کاری کیتی اے اُس دے موجب واقعات دے سن تے تریخاں وچ الواقدی نے کمال دکھایا اے۔ کتاب المغازی دا اک مکمل صحیح تے خوشخط نسخہ برٹش میوزیم وچ محفوظ اے۔ جرمن مستشرق ولہاؤزن (well hausen) نے المغازی دا جہڑا ترجمہ جرمن زبان وچ کیتا سی اوہ ایسے نسخے توں لیا گیا اے۔ ایہ ترجمہ ۱۸۸۲ء وچ برلن توں شائع ہو یا سی۔ جونز (Jones) نامی اک مستشرق نے ایس نسخے توں بڑی محنت نال سنواریا تے آکسفورڈ یونیورسٹی پریس نے ۱۹۶۴ء وچ ایس نوں تن جلدوں وچ چھاپ دی دتا اے۔ اک غیر مسلم دے ہتھوں تاریخ اسلام دی ایہ خدمت چوکھی سلاہن جوگ ہے۔

الواقدی دی علمی دیانت تے کجھ بزرگاں نے چوکھے شبے دا اظہار کیتا اے۔ امام شافعی واقدی نوں دروغ گو آکھدے نیں تے الواقدی دیاں کتاباں نوں جھوٹھ دا پلندا۔ امام بخاری، امام احمد بن حنبل، ابن مبارک، ابو حاتم تے ابن خلکان وی کوئی چنگی رائے نہیں رکھدے۔ علامہ شبلی نعمانی نے وی کذاب دانام دتا اے۔

الواقدی ۲۰۷ھ وچ فوت ہوئے۔

۱۳۔ ابن ہشام:

ابن ہشام دا پورا نام عبد الملک بن ہشام نحوی اے۔ اوہ اک نامور محدث تے مورخ سی تے قبیلہ حمیر نال تعلق رکھدا سی۔ سیرت ابن ہشام اصل وچ ابن اسحاق دی سیرت دا ای ودھیاروپ اے۔ اوس ابن اسحاق دی سیرت دے اوکھے تے نویکے اکھراں دے معنی لکھ کے اوس نوں سوکھی بنا دتا۔ کجھ شعراں دی صحت یاں عدم صحت بابت اپنی رائے دتی، کجھ واقعات دا اپنے ولوں وادھا وی کیتا تے کجھ مڈھلے حصے ایس پاروں چھڈ دتے پئی اوہناں دا تعلق سیرت نال نہیں سی۔ ابن اسحاق دی جہڑی کتاب سنانوں لہجہ دی اے اوہ اصل وچ ابن ہشام والی کتاب ہی اے۔ چوکھی سدھی گل تے ایہ ہے پئی ہن سیرت ابن اسحاق تے سیرت ابن ہشام اک کتاب دے ہی دو نام نیں۔ ایس کتاب دا کئی زباناں وچ ترجمہ ہو چکیا اے۔ اردو وچ تن بزرگاں مولوی محمد انشاء اللہ، سید سلیمان علی حسنی نظامی دہلوی تے مولوی قطب الدین احمد محمودی نے ترجمہ

کہتا ہے۔ پاکستان وچ عام طور تے جہڑا ترجمہ لکھدا اے اوہ سید سلیمان علی حسنی والا ہے۔ ابن ہشام دی پیدائش دا زمانہ معلوم نہیں۔ اوس دی وفات سن ۲۱۳ھ توں سن ۲۱۸ھ دے وچکار کسے ویلے ہوئی اے۔

۱۴۔ محمد بن سعد:

محمد بن سعد مؤلف الطبقات الکبیر، واقدی دے شاگرد سن تے اوس دی تالیفات دی کتابت وی کردے ہوندے سن۔ ایس لئی کاتب الواقدی دے نام نال مشہور ہوئے۔ اوہ ۱۶۸ھ وچ بصرہ وچ پیدا ہوئے پر بعد وچ بغداد توں ای پکا ٹھکانا بنا لیا۔ کتاب الطبقات الکبیر وچ رسول کریم دی حیاتی، صحابہ، صحابیات تے تابعین دے حال حالات چوکی تفصیل نال لکھدے نیں۔ مڈھلے حصے یعنی ”اخبار النبی“ وچ ابن سعد نے اپنے استاد دیاں کتاباں توں ڈھیر فید اچکيا اے۔ اسلام دے پہلے دو صدیاں دے حالات تے ایہ اک ودھیا کتاب اے تے سیرت النبی دے پرانے تے قیمتی مصادر وچ گنی جاندی اے۔ کتاب دیاں ۸ جلدیاں نیں۔ مڈھلیاں دو جلدیاں سیرت النبی لئی وقف نیں تے اٹھویں جلد وچ صحابیات دے حالات ملدے نیں۔ ایہ کتاب وی غیر مسلم ہتھان نے محفوظ کیتی جہدے وچ چوکھا کردار جرمنی دے پروفیسر Sachau دا ہے۔ (اللہ اس مستشرق توں اجر دیوے) کتاب دا اردو ترجمہ وی ہو چکيا اے تے پاکستان وچ عام لکھدا اے (گجھ بزرگاں ایس کتاب توں وی شک دی نگاہ نال دیکھیا اے کیوں جے ابن سعد واقدی دے شاگرد سن۔)

ابن سعد نے ۲۳۰ھ وچ وفات پائی تے اپنے استاد واقدی کولوں لکھن والا علمی ورثا اپنے شاگرد بلاذری لئی چھڈ گئے، جہڑے مشہور مورخ نیں۔

۱۵۔ البلاذری:

جویں کہ کتاب انساب الاشراف دے نام توں پتا لگدا اے ایہ عرب دے نامور خانوادیاں دی تواریخ اے۔ انساب الاشراف دے مصنف علامہ احمد بن یحییٰ البلاذری تبیجی صدی ہجری دے مشہور مورخ نیں۔ اپنی کتاب وچ سبھ توں پہلاں بنو ہاشم دا ذکر کردے نیں جہڑا نبی کریم دا خاندان اے۔ ایوں آپ دی سیرت ایس کتاب وچ آ گئی اے۔ کتاب وچ چوکھیاں روایتاں تے اوہی نیں جہڑیاں دو جے مورخاں نے سندیاں نال بیان کیتیاں نیں پر گجھ روایتاں اجیاں وی نیں جہڑیاں ہور کدھرے نہیں لکھدیاں۔ ڈاکٹر حمید اللہ صاحب نے سیرت دے حصے توں ۱۹۵۹ء وچ قاہرہ توں شائع کرا دتا۔

علامہ بلاذری ۲۷۹ھ وچ فوت ہوئے۔

۱۶۔ یعقوبی:

تبیجی صدی ہجری دی اک اہم پر متنازع کتاب ’تاریخ یعقوبی‘ اے۔ مصنف دا پورا نام احمد بن ابی یعقوب اسحاق بن جعفر بن وہب سی پر اُسدی پچھان اس دی نسبت یعقوبی ہی بنی۔ یعقوبی دی تواریخ وچ سیرت دا چوکھا مواد ملدا اے پر اوہ مورخیاں سیرت نگار دے ایس وڈے وصف توں محروم نظر آؤندا اے جی اوس توں غیر جانبدار ہونا چاہیدا اے۔ یعقوبی نے اسلامی تواریخ توں اک خاص عینک نال دیکھیا تے اوہدے دور توں تھوڑا چر اگدیں تیکر اسلام وچ گروہی سیاست دی جہڑی بھیر نظر آؤندی اے، یعقوبی اوس توں اپنا دامن نہیں بچا سکيا۔

یعقوبی ۲۸۴ھ/۸۹۷ء وچ فوت ہوئے۔

۱۷۔ طبری:

’تاریخ الرسل والملوک‘ امام طبری دی تالیف اے۔ امام محمد بن جریر طبری، طبرستان وچ پیدا ہوئے۔ سن پیدائش معلوم نہیں۔ جوانی وچ ای علم حاصل کرن دے شوق وچ بغداد چلے گئے تے فیراوتھے ای ساری عمر تعلیم تے تالیف وچ گزار چھڈی۔ تواریخی روایتاں دی کھوج تے تدوین وچ اپنے توں پہلوں گزر گئے بزرگاں نالوں اگے نکل گئے۔ ایہ کتاب تاریخ اسلام دیاں پہلی تن صدیاں دا اک زبردست خزانا اے۔ ویلے نے ایس کتاب دے ٹکڑے کھلا دتے سن تے چوکھے عالم ایس دے مکمل تے اصلی نسخے ولوں نا اُمید ہو گئے سن۔ پر لائینڈن یونیورسٹی دے پروفیسر De Goeje تے اوہناں دے ساتھیاں ۲۰ ورھیاں دی مسلسل محنت توں بعد کئی لائبریریاں وچوں ایدے کھلے ٹوٹے اکٹھے کیتے تے بارہاں جلدوں وچ ایہدا اک شاندار ایڈیشن چھاپ دتا۔ مصر وچ تاریخ طبری دے جہڑے نسخے چھپے نیں اوہ ایسے مغربی ایڈیشن دی نقل نیں۔ تاریخ طبری وچ ملن والا سیرت النبی دا حصہ سیرت دے پرانے تے معتبر مصاویہ وچ شمار کیتا جاسکدا اے۔ امام طبری دی ایس تواریخ توں وی اللہ نے غیر مسلمان دے ہتھوں محفوظ کرایا۔ ایس دے مؤلف ۳۱۰ھ وچ فوت ہوئے۔

۱۸۔ ابن حزم:

’جوامع السیرة‘ تاریخ اسلام دی نابغہ روزگار شخصیت علامہ ابن حزم دی تصنیف اے۔ ابن حزم دا پورا نام نسب ابو محمد علی بن احمد بن سعید بن حزم اندلسی اے۔ اُس دے والد احمد بن سعید، صاحب علم تے لکھاری بندے ہون دے نال نال بنو اُمیہ دے وزیر وی سن۔ ابن حزم نے رمضان ۳۸۴ھ بمطابق ۷ نومبر ۹۹۴ء قرطبہ وچ اکھ کھولی۔ والد دی وفات توں بعد خود وی وزارت دے منصب تے فائز رہیا۔

ابن حزم دے نیڑے سیرت رسول آپ a دی نبوت دی حقانیت دا اک روشن تے ناقابل تردید ثبوت اے۔ ابن حزم لکھدا اے کہ ”جہڑا وی بندہ محمد رسول اللہ دی سیرت دا دھیان نال مطالعہ کرے گا اوہ لامحالہ آپ دی نبوت دی تائید کرن تے مجبور ہووے گا۔ آپ دی اُچی تے اعلیٰ سیرت گواہی دیوے گی کہ آپ سچ مچ اللہ دے رسول نیں۔ اگر اوہدے سامنے سیرت توں ہٹ کے کوئی معجزانہ وی ہووے تے ایہو ای اُس لئی پتھیرا اے۔“ ابن حزم نے کوئی چار سو کتاباں لکھیاں۔

ابن حزم ۲۸ شعبان ۴۵۶ھ بمطابق ۱۵ اگست ۱۰۶۴ء توں اس دار فانی توں کوچ کر گیا۔

۱۹۔ حافظ ابن عبد البر:

الدرر فی اختصار المغازی آپ دی تصنیف اے۔ حافظ ابن عبد البر ۲۴ ربیع الاول ۳۶۸ھ بروز جمعہ قرطبہ وچ پیدا ہوئے۔ پورا نام امام ابو عمر یوسف بن عبد اللہ بن محمد بن عبد البر سی۔ الدّرر دیاں چوکیاں روایتاں ابن اُتھق توں ماخوذ نیں۔ روایتاں وچ احتیاط دا عنصر لہجہ اے۔

مصنف ۹۵ سال دی عمر وچ ۴۶۳ھ وچ چلانا کر گئے۔

متاخرین دیاں کجھ کتاباں:

۶ ویں صدی تے ایس توں بعد وچ وی سیرت دیاں کجھ معتبر کتاباں ساہمنے آئیاں پر اوہناں توں مصادر یاں Source Books نہیں آکھیا جاسکدا۔ تفصیل ایوں ہے:

۱۔ کتاب الشفاء بتعريف حقوق المصطفىٰ۔

اس مشہور تے منی پر منی کتاب دے لکھاری قاضی ابو الفضل عیاض بن موسیٰ بن عیاض نہیں جیہڑے تواریخ وچ قاضی عیاض دے نکلے ناں نال مشہور نہیں۔ آپ ۴۷۶ھ وچ مراکش دے شہر سبتہ وچ پیدا ہوئے۔ مڈھلی تعلیم او تھے ای حاصل کیتی۔ فیر قریطہ پڑ گئے تے او تھے الولید ابن رشد تے چوکھے دو جے بزرگاں توں فیض حاصل کیتا۔ علم حدیث دے سیانے سن تے سبتہ دے قاضی بن کے بڑا نام پیدا کیتا۔ قاضی عیاض نے کوئی ۲۰ کتاباں لکھیاں تے سبھ توں مشہور کتاب الشفاء ای ہوئی۔ ایس کتاب وچوں رسول پاک a نال قاضی صاحب دی محبت ڈلھ ڈلھ پیندی اے۔ ایس دا اردو ترجمہ عبدالحکیم اختر شاہ جہان پوری نے کیتا، جہڑا پاکستان وچ چھپ چکیا اے۔

قاضی صاحب ۹ جمادی الآخر ۵۴۴ھ بروز جمعہ فوت ہوئے۔

۲۔ الروض الالنف:

سہیل نال تعلق رکھن والے امام عبدالرحمن سہیلی تواریخ دا اک وڈا نام نہیں۔ سیرت ابن اسحاق دی شرح لکھکے اوس توں ’الروض الالنف‘ دا نام دتا۔

امام سہیلی ۵۸۱ھ وچ فوت ہوئے۔ سن پیدائش معلوم نہیں۔

۳۔ تلخیص فہوم الاثر:

ایس کتاب دے مصنف ابن الجوزی نہیں۔ پورا نام ابو الفرج عبدالرحمان جمال الدین بن علی بن محمد القرشی البکری الحسنبلی اے۔ ابن الجوزی ۵۱۰ھ وچ بغداد وچ پیدا ہوئے۔ بغداد دی آبادی جوزہ وچ رہن پاروں جوزی اکھوائے۔ بھروسہ محنت تے مطالعے دی وجہ توں اپنے دور دے فاضل سنگیاں توں بازی لے گئے۔ ابن الجوزی اک سرکڈ ویں کھوج کار تے اُچی پدھر دے مصنف نہیں۔ تلخیص بھاویں کوئی بڑی بھاری کتاب نہیں پر ایہدے وچ سیرت نبوی دے سارے پہلوواں دا احاطہ کیتا گیا اے۔ مولانا محمد یوسف بریلوی نے ۱۸۶۹ء وچ ایہدا اردو ترجمہ کیتا، جہڑا دہلی توں چھپیا۔ ۳۸۴ صفحیاں دی ایس کتاب وچ گھٹو گھٹ اک ہزار عنوان لائے گئے نہیں۔

ابن الجوزی ۵۹۷ھ/۱۲۰۰ء وچ فوت ہوئے۔

۴۔ عیون الاثر فی فنون المغازی والشمائل والسیر:

ایس کتاب دے مؤلف مصر دے مشہور عالم حافظ ابوالفتح ابن سید الناس نہیں۔ حافظ صاحب ۶۷۱ھ وچ پیدا ہوئے۔ آپ اندلس دے مشہور عالم سن۔ حدیث نبوی دے علم وچ بڑا نام پیدا کیتا۔ سیرت تے ’عیون الاثر‘ بڑی سلاہی جان والی

کتاب اے۔ روایتیں معتبر تے مستند نیں۔ دو جلدیں دی ایہہ کتاب ۱۳۵۷ھ وچ قاہرہ وچ چھپی۔
ایس کتاب دے مؤلف ۳۴ھ وچ چلانا کر گئے تے قاہرہ وچ دفن ہوئے۔

۵۔ زاد المعاد فی ہدی خیر العباد:

ایس کتاب دے مصنف علامہ حافظ شمس الدین ابی عبداللہ محمد ابن قیم الجوزیہ نیں۔ آپ توارخ وچ اپنے نکلے ناں ابن قیم نال جانے جاندے نیں۔ ایوں ای کتاب نوں وی انج کل نرا زاد المعاد ای آکھیا جاند اے۔ حافظ ابن قیم ۶۹۱ھ وچ پیدا ہوئے۔ ہوش سنبھالی تے شیخ تقی الدین ابن تیمیہ دی شاگردی کیتی۔ ایہ کتاب ایس پاروں اک نویکلی کتاب سمجھی جاندی اے پئی ایس وچ نرے رسول پاک دے حالات ای نہیں دسے گئے سگوں تھیں تھیں ایہ ویرواوی کتیا گیا ہے پئی جناب رسول مقبول دے کہڑے حکم یاں کہڑے فعل دا کیہ مطلب اے۔ مصر وچ شیخ محمد زید نے 'ہدی الرسول' دے نام نال اس دا اختصار کتیا سی۔ ایس اختصار دا اردو ترجمہ مولوی عبدالرزاق ملیح آبادی نے کتیا، جیہڑا ۱۹۲۴ء وچ لاہور توں چھپ وی گیا۔ اصل کتاب جہڑی چار جلدیں وچ اے اُس دا اردو ترجمہ رئیس احمد جعفری نے کتیا ایس نوں ۱۹۶۲ء وچ نفیس اکیڈمی کراچی نے چھاپیا تے پاکستان وچ عام لہجہ جاند اے۔ زاد المعاد دیاں پہلیاں ۲ جلدیں دا تعلق خالص سیرت دے موضوع نال اے۔
حافظ ابن قیم ۱۳ رجب ۷۵۱ھ نوں کوچ کر گئے تے باب صغیر دے مقبرے وچ دفن ہوئے۔

۶۔ سیرت ابن کثیر:

حافظ ابن کثیر اٹھویں صدی ہجری دے اک وڈے شامی عالم سن۔ اسماعیل نام، ابو الفد اکنیت، عماد الدین لقب تے ابن کثیر عرف اے۔ سلسلہ نسب اسماعیل بن عمر بن کثیر بن ضوء بن ذرع القیس البصر وی اے۔ ابن کثیر دا تعلق پڑھ لکھ خانوادے نال سی۔ ۷۰۱ھ وچ بصری دے نیڑے مجدل وچ پیدا ہوئے۔ حافظ صاحب نے تفسیر قرآن تے سیرت النبی لکھ کے بڑی شہرت کھٹی اے۔ سیرت وچ اوہناں نے کدھرے تے غیر مستند روایتاں توں اجتناب کیتا تے کدھرے کتاب دا حصہ بن گیناں نیں۔ کتاب وچ سیرت تے ڈھیر سارا مواد ملدا اے۔ ایس کتاب دا اردو ترجمہ مولانا ہدایت اللہ ندوی کر چکے نیں، جیہڑا اکتوبر ۱۹۹۶ء وچ تن جلدیں وچ مکتبہ قدسیہ اردو بازار لاہور نے چھاپ دتا اے۔ کتاب وچوں مترجم تے پبلشر دی ڈوئگی وچپسی دی مہک آسانی نال محسوس کیتی جاسکدی اے۔

ابن کثیر دی ایہ سیرت نبوی اپنے گھلے گھیر، معلومات دے وڈے ذخیرے تے سیرت دے ڈھیر سارے مصادر پاروں بڑے اچے تھیں دی کتاب بن دی اے۔

حافظ صاحب اخیر عمر وچ بینائی توں محروم ہو گئے سن۔ شعبان ۷۷۴ھ دی ۲۶ تاریخ بروز جمعرات اپنے اصل مالک کول جا پڑے تے مقبرہ صوفیہ وچ اپنے محبوب استاد امام ابن تیمیہ دے نال دفن ہوئے۔

آپ دیاں ۱۹ کتاباں توارخ نوں یاد نیں۔

۷۔ المواہب الدنیہ:

ایس کتاب دے مصنف ابو العباس احمد بن محمد شہاب الدین قسطلانی مصر دے اک اُپے مرتبے دے محدث تے فہمیہ سن۔ آپ ۸۵۱ھ وچ قاہرہ وچ پیدا ہوئے۔ ’المواہب الدنیہ‘ فن سیرت دی اک معتبر تے مقبول کتاب اے۔ ایہ دو بھاریاں جلدیں وچ ۱۲۸۱ھ وچ قاہرہ توں چھپی۔ ’المواہب الدنیہ‘ دی اک تفصیلی شرح محمد بن عبدالباقی زرقانی (م ۱۱۲۲ھ) نے لکھی۔ ایہ شرح سیرت دا اک پورا انسائیکلو پیڈیا اے۔ جناب زرقانی دے قلم توں لکھی گئی ایہ شرح سبھ توں اگدیں مصر دے سرکاری پریس توں ۱۸۷۲ء وچ اٹھ بھاریاں جلدیں وچ چھپی۔

محمد شہاب الدین قسطلانی ۷۲ ورھیاں دی عمر گزرن توں بعد ۹۲۳ھ وچ فوت ہو گئے۔

۸۔ زرقانی علی المواہب:

ایہ شہاب الدین قسطلانی دی کتاب مواہب الدنیہ دی شرح اے جہڑی امام زرقانی دے ہتھوں لکھی گئی۔ ’الروض الانف‘ توں بعد ایہی کتاب اے جہڑی اپنے اندر ایڈی تفصیل رکھدی اے۔ ایس دیاں ۸ بھاریاں جلدیں توں ایہ مصر توں چھپ چکی اے۔

۹۔ انجیس فی احوال النفس نفیس:

حضرت شیخ حسین بن محمد دیار بکری دی ایہ کتاب ۵ حصیاں وچ ونڈی ہوئی اے۔ ایس لئی ایس نوں چوکھا تارنخ انجیس، آکھیا جاندا اے۔ توارنخ دی ایس کتاب دا چوکھا حصا سیرت النبی لئی وقف اے۔ ایس وچ چوکھی جامعیت اے تے عالم فاضل لوکاں نے ایس نوں بڑی قدر دی نگاہ نال ویکھیا اے۔ خیال اے کہ ایہ ۹۴۶ھ وچ مکمل ہوئی۔ کوئی تن صدیاں پچھوں مصر دے ہی مصطفیٰ بن محمد نے کجھ تحقیق و تصحیح کر کے ۱۲۸۳ھ وچ دو جلدیں وچ قاہرہ توں چھاپن دا آہر کیتا۔ دیار بکری داسن پیدائش تے معلوم نہیں ہو سکيا پر آپ ۹۶۶ھ وچ فوت ہوئے۔

۱۰۔ انسان العیون فی سیرۃ الامین المامون:

سیرت دی ایہ کتاب دو دو جیاں کتاباں ’عیون الاثر‘ تے ’سیرت الشافی‘ توں ماخوذ اے تے اپنے مؤلف علامہ علی بن برہان الدین حلبی دی نسبت نال ’سیرت حلبیہ‘ دے ناں نال مشہور اے۔ ایس دے ماخوذ ’عیون الاثر‘ دا شمار تے سیرت دے معتبر مصادر وچ ہوندا اے پر ’سیرت الشافی‘ نوں توارنخ نے کوئی تھان نہیں دتی۔ ایسے پاروں انسان العیون (سیرت حلبیہ) نوں وی رلی ملی نظر نال ویکھیا گیا اے۔ ایہدے وچ ’سیرت و مغازی‘ توں ہٹ کے عقائد و عبادات تے وی بحث کیتی گئی اے۔ ایہ ۱۳۲۰ھ وچ تن جلدیں وچ قاہرہ توں شائع ہوئی۔ مولانا محمد اسلم قاسمی ہوراں ایس دا اردو ترجمہ کر دتا اے جنہوں چھاپن دا آہر دار الاشاعت کراچی نے کیتا اے۔ علامہ حلبی ۱۰۴۴ھ وچ فوت ہوئے۔



پنجابی زبان دا سیرتی سرمایا

ایہہ چوکھے منکھ دی گل اے کہ پنجابی زبان وچ ۱۵ ویں صدی عیسوی تیکر جناب رسول خدا a دا ذکر مبارک کدھرے نہیں لہدا۔ پندرھویں صدی عیسوی وچ سکھ مذہب دے بانی بابا گر وناک جی نال منسوب پنجابی شعراں وچ انسانیت دے محسن دا ذکر ایوں ملدا اے:

م محمد من توں من کتاباں چار
من خدا دی بندگی سچا اے دربار
اک دوجی تھاں تے فرماؤندے نیں:

ص صلا حت محمدی لکھ تھیں آکھو مت
خاصہ بندہ سچا سر متراں ہو مت

ایوں اسیں آکھ سکدے ہاں کہ پنجابی زبان وچ سبھ توں پہلاں مدح رسول کرن دا اعزاز بابا جی نوں حاصل ہويا۔ ۱۶ ویں صدی عیسوی وچ شاہ حسین (م: ۱۰۰۸ھ) نے وی نعت لکھی۔ وگی ویکھو:

عشق نبی سرور دے مینوں ڈاڈھا چٹک لایا جے
زلفاں کھول بیراگن ہوئیاں گھر گھر اکھ جگایا جے
زلف والیل تے مکھ والشمس مینوں سوہنا نظریں آیا جے
وانگ زلیخا دے میں اڑپو رو رو حال ونجایا جے

بابا جی گورو ناک صاحب تے شاہ حسین نوں اسیں پنجابی دے مڈھلے سیرت نگار نہیں من دے کیوں جے نعت گوئی تے سیرت نگاری دو وکھریاں وکھریاں گلاں نیں۔

سیرت نوں جدوں اسیں نعت توں دکھ ویکھدے ہاں تے فیراہیہ سول وی پیدا ہوندا اے کہ پنجابی زبان دا پہلا سیرت نگار کون سی؟ ایس سوال دے جواب لئی ساڈے ذہن وچ جہڑا ناؤں ابھر دا اے اوہ مولوی عبداللہ لاہوری دا اے۔ شاہ حسین توں گچھ چراں پچھوں اوہناں دے ای شہر وچ مولوی عبداللہ لاہوری ہوراں ۱۰۲۵ھ وچ ”بارہ انواع“ تے فیروز ۱۰۳۲ھ وچ رسالہ ”نص فرائض“ لکھیا۔ ایس رسالے وچ حضور دی ولادت تے معراج شریف دا ذکر اے۔ ایویں آکھیا جاسکدا اے کہ مولوی عبداللہ لاہوری پنجابی زبان دے پہلے سیرت نگار نیں۔ ایس توں بعد ۱۷ ویں صدی دے کدھرے وچکار لے ورھیاں وچ نوشہ گنج بخش ہوراں ”معراج نامہ“ لکھیا۔ ایسے دور وچ اک ہور نام نظریں پیندا اے جہڑا گچھ محققاں دے خیال موجب

دو جایا تیجا نہیں سگوں پہلا نام اے تے اوہ نام حافظ برخوردار رانجھا دا اے۔ رانجھے ہوریں مسلمانیاں والا تخت ہزارا ضلع سرگودھا دے رہن والے سن۔ فیر کسے گلوں لاہور تے فیر سیالکوٹ ٹر گئے۔ ۷۱ ویں صدی دے کدرے اخیر وچ حافظ ہوراں منظوم کتاب و حکایت پاک رسول دی لکھی۔

حافظ برخوردار ہوراں توں بعد پنجابی شاعری وچ سیرت دے حوالے نال کئی نئے موئے کم ہوئے۔ جویں کہ قصیدہ بردہ شریف دا ترجمہ حافظ ہوراں وی کیتا تے سید وارث شاہ، شہیدی، حافظ خان محمد، ڈاکٹر مہر عبدالحق، عزیز الدین قریشی، نیک عالم میرپوری، احمد حسین قلعداری تے مطیع اللہ ہوراں نے وی کیتا۔ فیر فارسی نعتیہ نظم ”تحفہ رسولیہ“ دا ترجمہ مولوی غلام رسول ساکن عادل گڑھ گوجرانوالا نے ’شارق الانوار‘ دے عنوان نال کیتا۔ ایسے نظم دا ترجمہ مولوی محمد اشرف ساکن گلیانہ ضلع گجرات تے فیر کچھ حصیاں دا ترجمہ مولوی محمد عالم قلعداری (ضلع گجرات) نے وی کیتا۔ تحفہ رسولیہ ناں دی اک نظم میاں محمد بخش (سیف الملوک والے) ہوراں وی لکھی۔

سید وارث شاہ (ہیر وارث شاہ والے) نے معراج نامہ وی لکھیا تے جویں کچھ لکھیا گیا اے، قصیدہ بردہ شریف دا ترجمہ وی کیتا۔ وارث شاہ ہوراں دے ترجمے دی اک جھلک دیکھو:

جان چت آون میرے تائیں ساتھی ذی سلم دے
نین میرے رت بنجو روون مارے درد الم دے
جاں او ٹھندی وا جھلٹی سی محبوباں دی داؤ
یا ایہ بجلی چمکی آہی رات ادھی اس جاؤں
اکھیں نؤں میں منع کراں نہ روؤ ڈھائیں ڈھائیں
ڈھائیں دل نؤں صبر قرار دیواں میں دوویں مجھن ناہیں
ایہ جے تسی گمان کر و جو عاشق عشق چھپاوے
اکھیں گریاں تے دل بریاں دوویں شاہد آہے

ایس توں بعد حامد شاہ عباسی گورداسپوری، سید عالم شاہ تحصیل اجنالا ضلع امرتسر، مولوی محبوب عالم، مولوی احمد یار مرالا ضلع گجرات، امام بخش قریشی پسیاں والا ضلع سیالکوٹ نے وی نئے موئے منظوم کم کیتے۔ صدیق لالی ناؤں دے اک شاعر نے وی ایسے دور وچ ’چہل حدیث‘ نظم لکھی۔ ایس دے نام توں پتا لگدا اے کہ ایہ بنیادی طور تے حدیث دی اک کتاب اے پر لالی ہوراں دے دو بچے ’صدق نامہ‘ وچ رسول اللہ دے خاندان، ولادت، بڑھلے حالات، ازواج، بال بچے تے کچھ مغازی دا ذکر ملدا اے۔ ’صدق نامہ‘ وی اک منظوم کتابچہ ہے۔ فیر ۱۲۶۰ھ وچ فضل شاہ نواں کوٹی نے تحفہ فضل لکھیا۔ ایس منظوم کتابچے وچ شاہ ہوراں معراج دا واقعہ بیان کیتا اے۔ ۱۲۶۰ھ وچ ای شیخوپورہ دے نال لگدے اک پنڈ کھاریاں والا دے وسنیک مولوی عبدالستار ہوراں حضور دے چھتی (۳۶) معجزیاں دا منظوم بیان کیتا اے۔

۱۳۱۰ھ وچ مولوی عمر دین صاحب نے ’تواریخ اسلام‘ لکھی۔ ایس کتاب دے ۶۱ صفحاں وچ رسول خدا دی پاک

حیاتی دا ذکر لکھدا اے۔ ایسے دور وچ مولوی احمد دین بھکوی نے 'معجزات حبیب اللہ' تے منشی غلام حسین ہوراں، 'معراج ناما' تے 'وفات ناما' لکھے۔ ۱۳۱۹ھ وچ مولوی دلپذیر صاحب نے 'گلزار محمدی'، 'اکرام محمدی' تے 'معراج ناما' لکھے۔ ۱۳۲۶ھ وچ غلام فرید عارف ہوراں حلیہ مبارک سرور کائنات a نام دا کتابچہ لکھیا۔

۱۹۰۶ء وچ لکھی گئی اک کتاب 'نجات المؤمنین' وچ عبدالکریم جھنگوی ہوراں شان مصطفیٰ بیان کیتی اے۔ ایس دے نیڑے ترپڑے ای محمد بوٹا گجراتی ہوراں 'وفات نامہ سرور کائنات' لکھیا۔

'خاتم النبیین' نام دی اک کتاب مولوی محمد مخدوم لنگر مخدوم دی لکھی ہوئی لکھی اے۔ خیال کیتا جاندا اے کہ پنجابی نثر وچ ایہ کتاب ۱۹۱۰ء دے نیڑے تیڑے چھپی سی۔ ایسے پاروں ایہ گل آکھی جاندی اے کہ ایہ پنجابی دے سیرتی ذخیرے وچ پہلی نثری کتاب اے۔

۱۲۹۵ء وچ شیخ امام الدین ہری پوری نے 'معجزہ محمدی' لکھیا۔ تقریباً ایہی ورھے ہون گے جدوں مولانا غلام احمد وسیر نے 'وضع اطوار محمدی' وچ نبی اکرم a دا حلیہ شریف بیان کیتا۔

مولوی غلام نبی کلانوری، کلانور ضلع گرداسپور دے وسنیک سن۔ اوہ ۱۸۳۴ء وچ پیدا ہوئے تے ۱۹۲۹ء وچ امرتسر وچ رہندیاں چلانا کر گئے۔ اوہناں معین الدین کاشفی دی فارسی کتاب 'معارج النبوت' دا منظوم ترجمہ کیتا جہدا ناؤں 'گلزار احمدی' رکھیا۔ ایہ کتاب چار جلدیں وچ ہے۔

مولوی محمد حسین احمد آبادی بھیرہ ضلع سرگودھا دے وسنیک سن۔ آپ ۱۸۴۴ء وچ احمد آباد وچ پیدا ہوئے تے ۱۹۱۶ء وچ بھیرہ وچ فوت ہوئے۔ اوہناں نے گلزار حسین، معجزات محمدی تے گلزار آدم ناواں دیاں سونہیاں کتاباں تخلیق کیتیاں۔ مولوی روشن دین لھمن خورد ضلع گرداسپور وچ ۱۸۳۶ء وچ پیدا ہوئے تے ۱۹۲۲ء وچ شیخوپورہ دے پنڈ سٹھیلی وچ چلانا کر گئے شیخ محمدی، سراج محمدی، فضائل محمدی، ہجرت محمدی، شان محمدی تے نقارہ محمدی ورگے ناواں نال کئی قصے لکھے۔

۱۹۳۳ء وچ جالندھرتوں، لدھیانے دے وسنیک مولوی محمد مسلم ہوراں دی منظوم کتاب 'گلزار محمدی' چھپی۔ ایہ کتاب سیرت دی اک مکمل کتاب متھی جاندی اے۔ نمونہ دیکھو:

| | | | | | | | |
|---------|-------|--------|------|------|-------|-------|------|
| جاں | ہجرت | دی | نبی | نوں | ہویا | ستواں | سال |
| خیبر | اندر | ہویا | آہا | جنگ | جدال | | |
| خیبر | اک | دکان | سی | الیس | وچ | قلعہ | شدید |
| اوہ | مدینے | شہر | تھیں | منزل | اٹھ | بعید | |
| وچ | مدینے | نبی | نے | کیتا | ایہ | فرمان | |
| اصحاباں | نوں | آپنے | جلدی | کرو | سامان | | |
| ہو | سوار | مدینوں | حضرت | ہوئے | روان | | |
| چوداں | سو | ہور | نبی | دے | ہویا | ساتھ | جوان |

اٹھویں دن جا اڑے خیبر وچ حضور
اُترے گردے قلعہ دے غازی ہو مسرور

محمد بخش قرشی امرتسری ۱۸۹۲ء وچ پیدا ہوئے تے ۱۹۳۶ء وچ وفات پائی۔ اوہناں سیرت دی اک منظوم کتاب ’سوانح عمری رسول مقبول دی‘ لکھی اے۔

حافظ مولوی حاجی محمد اسماعیل چک ۵۵ چار چودھری کوٹ رادھا کشن، ضلع قصور دے وسنیک تے خطیب سن۔ اوہناں دی اک کتاب ’نور اسلام‘ دانداز ایہ ہے کہ جدوں نثر لکھی گئی اے تے اردو وچ ہے تے جدوں اوہ گلے تھلے منظوم کیتا اے تے فیر پنجابی وچ کیتا اے۔ ایوں اسیں اس معتبر کتاب تھلے وی پنجابی نثر دی سیرت نگاری نہیں آکھ سکدے۔ مولوی کرم دین عرف مولوی ازہر بھیرہ وچ ۱۸۷۲ء وچ پیدا ہوئے۔ اوہناں دی کتاب ’گلزار محمدی‘ سیرت دی چنگی کتاب منی جاندی اے۔

مولوی ولی محمد نام دے اک بزرگ نے واقدی دی مشہور کتاب ’المغازی‘ دا ترجمہ ’غزوات اسلامیہ‘ دے نام نال کیتا اے۔ مولوی ہوراں کئی تھاواں تے اضافے کیتے نیں۔ ایہدے وچ غزوات نبی توں لے کے میدان کربلا تک دے حالات لکھدے نیں۔

۱۹۴۱ء وچ حاجی نبی بخش شوق کر بلائی دی کتاب ’سیرت رسول‘ سامنے آئی پرانج ایہ کتاب وی کئی دو جیاں کتاباں وانگوں ویلے دی دھوڑ تھلے دبی گئی اے۔ ایسے لئی ایس گل دا پتا نہیں لگ سکیا کہ ایہ سیرت نظم وچ لکھی گئی یاں نثر وچ۔ ایس گل دا پک اے کہ ایہ سرائیکی لہجے وچ لکھی گئی سی۔ ایسے دور وچ مولوی غلام یار دی کتاب ’معجزات رسول‘ دی وی دس پیندی اے۔ ایہ کتاب نثر تے نظم دوواں صورتاں وچ اے۔

ایسے دور وچ دائم اقبال دائم دی کتاب ’کمل پوش‘ سامنے آئی۔ ۲۰۸ صفحیاں دی ایہ کتاب وی منظوم اے تے حضور دی حیاتی پاک دا چنگی طرحاں احاطہ نہیں کردی۔ دائم اقبال دائم منڈی بہاؤ الدین دے نیڑے پنڈ دا سودے رہن والے سن۔ کتاب اتے حمید بک ڈپوار دو بازار لاہور دا نام پبلشر دی حیثیت نال لکھدا اے۔

کلام دانمونہ ویکھو:

مل پوش صفا پہاڑ اُتے کیتا کٹھیاں کل پروار تائیں
آل غالب دیاں نکلیاں وڈیاں سنو کن دھر کے سنو پکار تائیں
تسانوچہ لنگھائے میں سال چالی سبھ جان دے میری رفتار تائیں
مینوں سمجھدے ہو جھوٹا اکے سچا دسو سوچ کے سچ وچار تائیں
توں امین امین سچا سمھناں کہیا رسول مختار تائیں
سُنا ڈٹھا نہ عیب اج تیک تیرا ، صفتاں تیریاں دور درار تائیں



سیرت تے باقاعدہ کم

پنجاب یونیورسٹی نے اپنے سیرت دے مقالیاں دے تیجے ایڈیشن وچ وی جہڑا ۲۰۰۳ء وچ چھاپیا اے، ایہہ ظاہر کیتا اے نئی پنجابی زبان دا دامن سیرت توں اصلوں ہی سکھنا اے۔ اوہناں بالترتیب عربی، فارسی، ترکی، اردو، بنگالی، سندھی، پشتو، چینی، انگریزی تے فرانسیسی زبانوں وچ لکھیاں گئیاں کتاباں دا ذکر کیتا اے پر پنجابی دا کوئی ناں تھوہ نہیں۔ (ایہ گل وکھ اے کہ اوہناں جھڑیاں زبانوں دیاں کتاباں دا ذکر کیتا اے اوہنوں وی سو دھن دی لوڑ اے۔) اردو تے انگریزی وچ لکھیاں گئیاں درجنوں معتبر کتاباں دا اوہدے وچ کوئی ذکر نہیں۔ پٹھ دے گئے ناواں توں پتا لگدا اے پئی سیرت تے باقاعدہ کم ہویا اے بھائی اُس دا حجم دو جیاں زبانوں دے مقابلے تے بہت ای گھٹ اے۔ پٹھ اُس کم دا ذکر کیتا جاندا اے۔

خیر البشر عرف شان حضورؐ ملکی والا:

ایہ حکیم عبداللطیف عارف ہوراں دی منظوم کتاب اے۔ ایس کتاب دا اک ای کمزور پہلو اے تے اوہ ایہ ہے پئی ایہ شاعری اے۔ صاف سدھی تے مسلمہ گل اے پئی شاعری دے ضابطے واقعات نوں اوہناں دے اصل رنگ وچ پیش کرن وچ رکاوٹ بن دے نیں، جس دا ثبوت ایناں ای کافی اے بئی حکیم صاحب نوں آپوں کتاب وچ نثر دا سہارا لینا پیا اے۔ حکیم صاحب ۱۸۹۵ء وچ سیالکوٹ دے پنڈ گھڑتل وچ پیدا ہوئے تے پہلی اکتوبر ۱۹۷۱ء نوں چلانا کر گئے۔

توحید دا باغ:

سیرت دی ایہ کتاب وی منظوم اے تے نالے عام جے انداز وچ لکھی گئی اے۔ ایس دے خالق منشی محمد دین سوختہ امر تری دے شاگرد ولایت امر تری نیں۔

سیرت الحبیب:

ایہ منظوم سیرت اک تعلیم یافتہ سیرت نگار چوہدری فضل حق نصیر سابق رجسٹرار ہائی کورٹ نے ۱۹۳۲ء وچ لکھی۔ کتاب میاں محمد بخش ہوراں والی بحر وچ اے۔

شفا القلوب:

ایہ کتاب وی منظوم اے۔ ایس دے خالق مولوی محمد نبی بخش حلوائی نیں۔ اوہ اکبری منڈی لاہور وچ ۱۸۶۰ء وچ پیدا ہوئے تے ۱۹۴۴ء وچ چلانا کر گئے۔ ایس کتاب وچ نبی اکرمؐ دے کارنامیاں دا ذکر اے۔ آپ دا حلیہ مبارک تے درود پاک دے فضائل بڑی محبت نال بیان کیتے گئے نیں۔

روح المیلادنی ذکر المیلاد:

ایہ منظوم کتاب محمد عبدالکریم قریشی ہوراں دے ہتھوں لکھی گئی اے۔ آپ ضلع گجرات وچ ۱۷ فروری ۱۸۷۷ء نوں

پیدا ہوئے تے ۱۹ ستمبر ۱۹۵۷ء نوں وفات پائی۔ ذکر نبی دے حوالے نال آپ دیاں دوہور کتاباں صلح نامہ حدیبیہ، تے تاریخ فتح مکہ وی نیں۔

ختم المرسل کمل پوش: دائم اقبال دی ایہ کتاب کچھ کمزوریاں دے باوجود مقبول ہوئی اے۔ دائم ہوریں پنڈ واسو، منڈی بہاؤ الدین دے وسنیک سن۔ اوہ ۱۹۰۹ء وچ پیدا ہوئے تے پنجابی زبان دی روایتی شاعری وچ اوہناں نے بڑا نام پیدا کیتا اے۔
شاہناما اسلام:

شاہناما اسلام، پنجابی نظم وچ لکھی گئی حیات مبارکہ اے۔ ایس دے خالق ملک غلام سرور کنجاہی نیں تے ایہ حفیظ جالندھری دے شاہناما دے اسلوب تے لکھی گئی اے۔ ایہ کتاب دو جلدیں وچ ہے تے چوکھی مقبول اے۔
حضرت محمدؐ صاحب جی دا پوتر جیون:

حیرانی دی گل ایہ ہے کہ پنجابی نظم وچ شان محمدیؐ سبھ توں پہلاں بیان کرن دا اعزاز بابا گرو نانک جی نوں حاصل ہويا تے نثر وچ وی اک سکھ بزرگ ای بازی لے گئے۔ ۱۹۲۷ء وچ سٹیٹ پریس امرتسرتوں چھپن والی ۳۶۶ صفحیاں دی پنجابی نثر وچ سیرت دی ایس مڈھلی کتاب دا نام ہے حضرت محمدؐ صاحب جی دا پوتر جیون۔ ایہ کتاب گرکھی لپی وچ ہے تے برٹش انڈیا لائبریری لندن وچ موجود اے۔ کتاب دے مصنف بھائی سیوا سنگھ امرتسری ہوراں دی حیاتی بابت کھوجکاری دی لوڑ اے۔
نہیاں داسر دار:

ایہ کتاب ۱۹۴۲ء وچ لاہور دے اک وسنیک ایم حبیب اللہ فاروقی نے آنرز ان پنجابی دے امتحان دین والے پڑھیا رکال لئی لکھی سی۔ خیال کیتا جاندا اے کہ ایہ سیوا سنگھ جی توں بعد پنجابی نثر وچ دو جی کتاب ہے۔ ۲۵۲ صفحیاں دی ایس کتاب دے دواڈیشن چھپ چکے نیں۔ اج کل ایہ کتاب نہیں لہر رہی۔ ایس کتاب وچ بہت ساریاں گلاں غیر ضروری نیں پر فارسی لپی وچ نثری سیرت دی پہلی کتاب ہون موجب ایس دی اہمیت نوں نظر انداز نہیں کیتا جاسکدا۔
پنچ ہادی:

پنچ ہادی حضور اکرم a تے اوہناں دے چاریاراں (خلفائے راشدین) تے اک سوئنی لکھت اے۔ ایس دے خالق فقیر محمد فقیر نیں، جہڑے ۵ جون ۱۹۰۰ء نوں گوجرانوالا وچ پیدا ہوئے تے ۱۱ ستمبر ۱۹۷۷ء نوں گوجرانوالے ای چلانا کر گئے۔ فقیر محمد فقیر چوکھے سیانے تے سو جھوان بندے سن تے اوہناں دی کتاب ایس گل دا پکا پیڈ ہاشبوت اے۔
جڈاں رسول کریمؐ بال ہن:

ایہ کتاب ولشاد کلاںجی ہوراں خاص طور تے سرانیکی پڑھن والے بالاں لئی لکھی۔ ایہ ۱۹۷۵ء وچ چھپی۔

جڈاں رسول کریمؐ ینگر ہن:

ایہ کتاب وی او سے قلم توں تے او سے انداز وچ لکھی گئی اے۔ ایہ ۱۹۷۶ء وچ چھپی۔

جڈاں رسول کریمؐ کوں نبوت ملی:

اُتلے سلسلے دی کڑی اے تے ۱۹۷۹ء وچ چھپی۔

حضور a دی حیاتی:

سمیع اللہ قریشی ہوراں نے ایہہ کتاب ایچے طور تے بالال لئی لکھی تے ایہ ۱۹۸۰ء وچ چھپی۔

حضور a پُر نور:

ڈاکٹر سید اختر حسین اختر جی دی ایہ کتاب وی بالال لئی ہے تے ایہ ۱۹۸۱ء وچ چھپی۔

اُمت دا والی:

حمید اللہ ہاشمی دی ایہ کتاب ۱۹۸۱ء وچ چھپی۔

چن عربوں چڑھیا:

سلیم خاں گمی ہوراں دی ایہ کتاب پنجابی دے سیرتی ادب وچ چڑگا چوکھا اضافہ اے۔ کتاب تحقیقی انداز نال لکھی گئی اے۔ سیرت نگار دے ڈونگھے مطالعہ تے کھوجکاری موجب محبوب خدا دی حیاتی دی اک سؤنی جھلک ایس کتاب وچ ملدی اے۔ ۲۰۷ صفیاں دی ایہ کتاب ۱۹۸۲ء تے فیر ۱۹۹۳ء وچ لاہور توں چھپی۔ پنجابی زبان دا سیرتی سرمایہ دے عنوان پٹھ ایس لکھت توں توڑ چارھن لئی ”چن عربوں چڑھیا“ چوکی مفید ثابت ہوئی اے۔

النبی الخاتم:

اردو وچ لکھی جان والی مولانا مناظر احسن گیلانی دی ایہ کتاب سیرت دے فن دا اک نویکلا شاہکار اے۔ ایہ عامان دی نہیں سگوں خاصاں دی کتاب اے۔ ایس نکی جہی پر عجیب کتاب دا پنجابی ترجمہ ڈاکٹر فقیر محمد فقیر ہوراں کیتا اے تے سنگ میل پبلی کیشنز لاہور نے چھاپیا اے۔

آمنہ دالال:

محترمہ عالیہ فروغ احمد دی ایہ کتاب ۱۹۸۲ء وچ چھپی۔

کونین دا والی:

سرائیکی لہجے وچ ڈاکٹر مہر عبدالحق دی ایہ کتاب وی ۱۹۸۲ء وچ چھپی۔

سوہنے دا خلق:

فدائے اطہر ہوراں دی ایہ کتاب وی ۱۹۸۲ء وچ چھپی۔

معجزات رسول:

مولانا احمد سعید دہلوی دی ایس کتاب دا سرائیکی ترجمہ دانشا دکلانچوی ہوراں کیتا اے تے ایہ ۱۹۸۳ء وچ چھپیا اے۔

سیرت النبى a:

وقار عنایت اللہ ہوراں دی سرائیکی لہجے دی ایہ کتاب وی ۱۹۸۳ء وچ چھپی۔

الہادی:

ہندکو لہجے دی ایہ غیر منقوط کتاب ڈاکٹر عبدالرشید ہوراں دی لکھی اے تے ایہ ۱۹۸۳ء وچ چھپی۔

رب داحیب a:

حاجی چراغ دین جونیکے والا نے ایہ کتاب منظوم لکھی اے پر بہت ساریاں تھاواں تے نشر داسہارا دی لیا اے۔ ۲۲۸ صفحیاں دی ایہ کتاب نئے لوگ پبلی کیشنز لاہور نے ۱۹۸۴ء وچ چھاپی۔ حاجی صاحب پنڈ جونیکے وچ ۱۹۰۱ء وچ پیدا ہوئے۔ اوہناں نے چراغ محمدی، چراغ ہدایت، مدینے دے موتی تے مکے دامیلا نام دیاں کتاباں وی لکھیاں نیں پر اوہناں تیکر رسائی نہیں ہو سکی۔ رب داحیب البتہ ایس فقیر دی ذاتی لائبریری وچ موجود اے۔ نمونہ کلام ویکھو:

(نظم):

حضرت جابر اصحاب روایت کر دا اک دن دلوں خیال اٹھایا سی میں
مسجد وچ میں پہنچ کے نبی دے کول ادب نال سوال سنایا سی میں
پہلوں رب کس چیز نوں خلقیا سی مسئلہ ایہ تصدیق کرایا سی میں
سوہنے نبی رسول مقبول کولوں جا کے ایہ سوال پچھایا سی میں

(نثر):

تے فرمایا نبی پاک a نے کہ اے جابر بے شک تمام مخلوق توں پہلے رب نے تیرے نبی a دے نور توں
سازیا اے۔ پیدا کیتا اے۔

کی مدنی ماہی:

ایہ قدر آفاقی ہوراں دی ایوارڈ یافتہ کتاب اے۔ مصنف دا پورا نام بشیر احمد قدر آفاقی اے۔ اوہ ۳ نومبر ۱۹۳۸ء نوں
شیخوپورہ دے نیٹے کڑیال کلاں وچ پیدا ہوئے۔ اوہ پنجابی زبان نال ڈاڈھی عقیدت رکھدے نیں۔ پنجابی نثر وچ سیرت
دی ۹۲۰ صفحیاں دی ایہ ضخیم ترین کتاب پہلی وار اکتوبر ۱۹۸۵ء وچ چھپی تے ایس دا آہر اردو پنجابی علمی مرکز اردو نگر لاہور نے
کیتا۔ کی مدنی ماہی، ہن تیکر دی جامع ترین کتاب اے۔ بھاری ایس دیاں گجھ گلاں نال اختلاف اے پر فیروزی ایس نوں
اک مکمل تے بھرویوں کتاب آکھیا جاسکدا اے۔

سچی سرکار:

مرحوم عبدالکریم شمر ڈوگھی نظر تے وسیع مطالعے والے بندے سن۔ پنجابی دے سیرتی ادب وچ اوہناں دے ہتھوں
اک سوہنا اضافہ سچی سرکار، دے ناں پٹھ ہوئیا۔ عبدالکریم شمر ۱۹۰۴ء تے ۱۹۰۸ء دے وچکارا چہرہ لاہور وچ پیدا ہوئے تے ۱۸
فروری ۱۹۸۹ء نوں چلانا کر گئے۔ سچی سرکار ۲۰۰ صفحیاں دی کئی جہی کتاب اے پر ایہدے وچ جامعیت موجود اے۔ نبی
اکرم a دی محبت ایس کتاب دے اکھراں وچوں ڈلھ ڈلھ پیندی اے۔

سیرت حضور دی:

محمد اقبال نجمی ہوراں دی ایہ کتاب ۱۹۸۵ء وچ چھپی۔

حیاتی سونہری نبی a دی:

ڈاکٹر عبدالرشید ہوراں دے ہتھوں توڑ چڑھن والی ایہ کتاب ہندکو لہجے وچ ہے تے ایہ ۱۹۸۵ء وچ چھپی۔
مدنی مٹھامن ٹھار:

سرائیکی لہجے دی ایہ کتاب سجاد حیدر پرویز ہوراں لکھی (س، ن)
فرمان نبوی a تے اصلاح معاشرہ:

ہندکو لہجے دی ایس کتاب دے مصنف ڈاکٹر عبدالرشید ہوریں نیں۔
سبھتوں وڈے انسان:

حکیم محمد سعید مرحوم نے ایہ کتاب بالاں لئی لکھی تے ایہ ۱۹۹۱ء وچ چھپی سی۔
نبی پاک دے خطبے:

شریف کنجاہی دی ایہ کتاب ۱۹۹۳ء وچ چھپی۔
خزینہ رسالت:

۶۴ صفحات دی ایہ کی جی کتاب اقبال بک کارنر، مین مارکیٹ گلبرگ لاہور نے ۱۹۹۴ء وچ بڑے شوق نال چھاپی۔
خزینہ رسالت لکھن دی توفیق اللہ نے اک بی بی جبین گل ریاض ہوراں نوں بخشی۔ محترمہ جبین گل ریاض توں پہلاں اک بی بی
عالیہ فروغ احمد داناؤں تے پڑھن نوں لبھدا اے پراوہناں دی کتاب نہیں لہجہ سکی۔ ایس کتاب دے جے کرتمہیدی صفحے کڈھ
دوئے تے پاک حیاتی دے بیان لئی نرے ۴۰ صفحے باقی بچدے نیں، جہڑے مواد دے لحاظ نال کتابی سائز دے ۳۰ صفحات
توں چوکھے نہیں بن دے۔ بس ایہی اس کتاب دا اک کمزور پہلو اے۔

نبی پاک دے معجزے:

ڈاکٹر سید جعفری دی ایہ کتاب ۱۹۹۵ء وچ چھپی۔

سرکار دی سیرت:

اظہر محمود ہوراں دی ایہ کتاب وی ۱۹۹۵ء وچ چھپی۔ ایہ کتاب صدارتی ایوارڈ یافتہ اے تے اظہر محمود ہوراں نے زمانی
ترتیب نال حیات نبی تے بھرویں تے کامیاب جھات پائی اے۔

سوہنا محمد a:

عابد حسن ہوراں ہتھوں لکھی گئی ۹۱ صفحات دی ایہ کی جیہی کتاب فانوس پبلی کیشنز راولپنڈی نے ۱۹۹۵ء وچ چھاپی۔ ایہ
اک چنگی کوشش اے پر اپنے چوکھے ای نکلے جم دی وجہ توں قاری دارجہ نہیں بناؤندی۔
قرآن تے تصوف:

میاں ظفر مقبول ہوراں ایم اے پنجابی دے نصاب نوں ساہمنے رکھدیاں ایہ کتاب تصنیف کیستی سی۔ ایہدے وچ

حیات پاکؐ ذاکر وی لہجہ اے۔ ایہ کتاب وی ۱۹۹۵ء وچ چھپی۔
سنیں سونڑھیں دی سیرت:

ڈاکٹر محمد صدیق شاکر ہوراں دی سرائیکی لہجے دی ایہ کتاب اک جامع تے مستند کتاب اے۔ ایہدے ۴۸۰ صفحے نیں
تے ایہ ۱۹۹۵ء وچ سرائیکی سُدھ سراں ملتان نے چھاپی۔
سنیں سونڑھیں دا خلق:

ایہ کتاب وی ڈاکٹر محمد صدیق شاکر ہوراں دی سرائیکی لہجے دی کتاب اے۔ ایہدے ۵۴۴ صفحے نیں تے ایہ وی
سرائیکی سُدھ سراں ملتان نے چھاپی اے۔ سن اشاعت ۱۹۹۶ء۔
حضور دا ویریاں نال سلوک:

جویں ایس کتاب دے نام توں پتا لگدا اے ایہ حضور دی رحمت اللعالمینی دے اک کچھ تے لکھی گئی اے۔ ایہ کتاب
وی ۱۹۹۶ء وچ چھپی۔ ایس دے لکھاری اظہر محمود ہوریں اک محنتی تے ڈونگے مطالعہ والے بندے جاپدے نیں۔
پنجابی ادب وچ سیرت رسول:

ایہ پروفیسر سعیدہ رشم داپی ایچ ڈی دا مقالا اے جیہڑا ۱۹۹۷ء وچ توڑ چڑھیا۔ ایہ کتابی شکل وچ چھپ کے مارکیٹ
وچ آیا ہے کہ نہیں اس دا پتا نہیں لگ سکيا۔
سیرت تے قومی شاعری:

کئی مدنی ماہی دے معروف مصنف قدر آفاقی نے ایہ کتاب ایم اے پنجابی دے پڑھیاں دی ضرورت توں ساہمنے
رکھ کے لکھی۔ ایہ کتاب ۱۹۹۷ء وچ چھپی۔
سنیں سونڑھیں دا ذکر:

ڈاکٹر محمد صدیق شاکر ہوراں دے ہتھوں سیرت دی ایہ تہجی کتاب وی سرائیکی لہجے وچ ہے۔ ایس دے ۵۸۰ صفحے
نیں تے ایہ وی سرائیکی سُدھ سراں ملتان نے ۱۹۹۷ء وچ چھاپی۔
سنیں سونڑھیں دا کمال:

ایہ کتاب وی ڈاکٹر محمد صدیق شاکر دی سنیں سونڑھیں سیریز دا حصہ اے۔ ۴۸۰ صفحیاں دی ایہ کتاب ۱۹۹۸ء وچ چھپی۔
النبی الکریم:

میاں ظفر مقبول ہوراں دی ایہ کوشش آج دے طریقہ تصنیف دے نیڑے ہے۔ ایس کتاب توں حکومت پنجاب ولوں
سیرت ایوارڈ وی دتا گیا۔ ایہ کتاب ۱۹۹۹ء وچ سائیں مولا شاہ ویلفیر سوسائٹی نے چھاپی۔
نور نبی دیاں کرناں:

جویں کہ کچھ ذکر کیتا گیا اے اظہر محمود ہوریں اک محنتی لکھاری نیں۔ ایہ کتاب وی اوہناں دے ہتھوں توڑ چڑھی۔

ایہ صوبائی تے صدراتی سیرت ایوارڈ حاصل کر چکی اے۔ نور نبی a دیاں کرناں، ۲۰۰۰ء وچ چھپی۔
حرادا چائن:

محمد شریف انجم ہوراں دی ایہ منظوم کتاب ۲۰۰۰ء وچ چھپی۔ ایہ مکتبہ قدسیہ لاہور نے چھاپی تے ایس نوں کھدر پوش
 ٹرسٹ ایوارڈ وی مل چکیا اے۔
سنیں سونڑھیں دا جمال:

ڈاکٹر محمد صدیق شاہر ہوراں دی ۵۹۲ صفحات دی ایہ کتاب ۲۰۰۰ء وچ سرانیکی سندھ سراں ملتان نے چھاپی تے ایہ
 کھدر پوش ٹرسٹ ایوارڈ یافتہ اے۔
 ۲۶۷۶ صفحات تے کھلے ڈاکٹر صاحب دے ایس سیرت پراگے وچ حیات نبی دے کسے کچھ نوں وی کند نہیں کیتی
 گئی۔ ایہ بنا شاہ اک بہت وڈا کم اے تے سلاہن جوگ اے۔ ایس طرحاں داکم اس توں پہلوں ہو یا اے تے نہ ای پچھوں۔
 ڈاکٹر محمد صدیق شاہر ہوراں نوں بنا شاہ سرانیکی داسلی نعمانی تے کرم شاہ ازہری آکھیا جاسکدا اے۔
سیرت دا چائن:

۲۸ صفحات دی ایہ کتاب اخلاق عارف ہوراں دے سیرت مقالیاں دا اک خوبصورت مجموعہ اے۔ ایہ کتاب ۲۰۰۳ء وچ
 ادارہ پنجابی زبان و ثقافت لاہور نے چھاپی۔ اخلاق عارف ہوراں سیرت دی لوہ وچ حیاتی دیاں اوکڑاں داخل لہن دی اک
 سلاہن جوگ کوشش کیتی اے۔ اوہناں دی لکھت وچ اعتماد جھلکدا اے تے اوہناں حضور پاک نوں اک وڈا، سگوس سہرتوں وڈا
 راہنما ثابت کرن وچ کوئی کسر نہیں چھڈی۔ ایسے قلم توں جے کدی زمانی ترتیب نال ٹر دیاں ہو یاں تے حیات پاک دے
 سارے ای پکھاں دا احاطہ کر دیاں ہو یاں کتاب لکھی جانندی تے ہور چنگا ہوندا۔ ایس کتاب نوں ایوارڈ مل چکیا اے۔
عالم داسر کردہ:

محمد انور میر ہوراں دے ہتھوں لکھی گئی منظوم سیرت پاک دی ایہ کتاب اکتوبر ۲۰۰۳ء وچ ایوان ادب، چوک اردو بازار
 لاہور نے چھاپی۔ ۳۵۲ صفحات دی ایس کتاب نوں حضرت حفیظ تائب نے قدر دی نگاہ نال ویکھیا اے۔
عیبوں خالی:

سرانیکی زبان وچ ۸۱۰ صفحات دی ایہ کتاب ڈیرہ غازی خاں دے سوجھوان محبوب تالیش دی تصنیف اے تے ایس نوں
 برائٹ بکس، غزنی سٹریٹ اردو بازار لاہور نے نومبر ۲۰۰۶ء وچ چھاپیا اے۔ محبوب تالیش ہوراں محنت تے محبت نال کم کیتا
 اے پر ایہدے وچ اے بہتری دی چوکی گنجائش موجود اے۔
آفاقی رسول:

ازہاء الحق عارف بحوالہ پاکستانی اہل قلم دی ڈاریکٹری (س، ن)
 رسول کریم دی سیانف:
 از علی اختر بحوالہ پاکستانی اہل قلم دی ڈاریکٹری (س، ن)

سیرت نگاری تے مستشرقین

کوئی نوں سو درھے اگدیں یورپ وچ جس پہلے بندے نے نبی اکرم a دی پاک حیاتی تے قلم چکيا، اوہ ہلدی برٹ سی۔ اوس دے دور توں لے کے ہن تیکر سوواں مستشرقان نے بنی آخروا عظم دے اُسوہ حسنہ وچ اپنی ڈونگھی دلچسپی دا مظاہر کیتا اے تے ایہ دلچسپی پیروں پیرودھ رہی اے۔ آکسفورڈ دا مشہور مستشرق مارگولتھ اپنی کتاب 'محمد اینڈ دی رازز آف اسلام، داڈھ ایہناں اکھراں توں بھدا اے:

"The Biographers of the prophet Muhammad from a long series which it is Impossible to end but in which it would be honourable to find a place."

ترجمہ: محمد دی حیاتی تے لکھن والیاں دی اک لمی لڑی اے جس دا مکنا نظر نہیں آؤندا۔ پرائس لڑی وچ تھاں بنانا بڑی وڈیائی دی گل اے۔

مستشرقین کوں کجھ غلطیاں ہوئیاں نیں، تے کجھ ایہناں نے آپوں کیتیاں نیں جہیز یاں غلطیاں ایہناں کوں ہونیاں نیں اوہدی پہلی وجہ تے اسلام دی حقیقت تے ایس دے بانی دی ذات توں واقفیت نہ ہونا اے تے دوجی وجہ مغرب دا اپنا اک مزاج اے، جہڑا اسلام دی اوتھوں تیکر پہنچ نہ ہو سکے پاروں بدلایا نہیں جاسکيا۔ ایس دی مثال ایہ ہے پئی اسلام آکھدا اے پئی Nothing exists but God (اصل حقیقت اللہ ای ہے) پر مغرب آکھدا اے Nothing exists but sex and hung (جنس تے روٹی توں سوا ہور کوئی حقیقت نہیں) قرآن آکھدا اے "لقد خلق الانسان في احسن تقويم" (انسان نوں بہترین اصل توں پیدا کیتا گیا اے) تے اس دے مقابلے تے مغرب انسان نوں ایویں "وڈھیا ندا" اے پئی Man is nothing but a beast (بندا اک درندا ہی تے ہے)

جے گل تھوڑی ویروے نال کریئے تے ایویں بن دی اے پئی نبی دی ذات تے اسلام نال مستشرقین دی عدم واقفیت کوئی اچنبھے دی گل نہیں۔ جدوں وی کوئی بندا اپنے اصل دین، اصل فن، اصل زبان، اصل مضمون یاں اصل کھیتز توں ہٹ کے کوئی کارکردگی دکھانا چاہندا اے تے اوس نوں نا صرف اوکڑاں پیش آندیاں نیں سگوں کسے اچی تے نو بھلی کارکردگی توں دوری اک قدرتی تے ضروری امر جا پدا اے۔ مثال موجب جرمنی وچ جمن والی بی بی پاکستان دا ۲۰ وار دورا کرن توں بعد حضرت اقبال دی ذات نوں سمجھ تے لوے گی پر کیہ ایس گل توں انکار کیتا جاسکدا اے پئی اوہ اقبالیات تے ڈاکٹر جاوید اقبال، ڈاکٹر رفیع الدین ہاشمی یاں پروفیسر مرزا محمد منور نہیں بن سکدی تے ایگل منن بناوی چار کوئی نہیں پئی خشخال

ماہر اقبالیات محترمہ امین میری شمل ول اشارہ اے۔

خان خلک پنجاب وچ تے وارث شاہ سرحد وچ پیدا نہیں ہوندے۔ ایویں مستشرقین جنی وی علیست وکھان، ولیم میور، واشنگٹن ارونک تے مارگولتھ دی سوچاں دی اڈار جڈی وی اُچی ہو جائے اوہ محمد حسین ہیکل، شبلی نعمانی، قاضی سلمان منصور پوری یاں جسٹس کرم شاہ ازہری نہیں بن سکدے۔

مغرب دی کم علمی دی حالت تے ایسی پی اک مستشرق آپوں لکھدا اے:

”عیسائیت گچھ مڈھلیاں صدیاں تیکر اسلام تے نہ کوئی نکتہ چینی کر سکی تے نہ ای ایس نوں سمجھ سکی۔ اوہ نرا کنبدی تے حکم بجا لیاؤندی سی پر جدوں قلب فرانس وچ عرباں نوں پہلی واری ڈکيا گیا تے اوہناں قوماں نے، جہڑیاں ایہناں دے اگے لگ کے بھج رہیاں سن، کچھ مونہ کر کے دیکھیا جو یں ڈنگراں دا کوئی اجڑ دیکھدا اے جدوں اوس نوں بچان والا لٹا دُریدا نکل جاندا اے۔“

یورپ دی مسلماناں بابت کم علمی نوں اک فرانسیسی مستشرق ہنری دی کاستروایوں بیان کردا اے:

”اوہ سارے قصے تے گیت جہڑے اسلام بابت یورپ وچ قرون وسطی وچ سنندے سن، اسیں نہیں سمجھدے پئی مسلمان اوہناں نوں سن کے (ساڈی بابت) کیہ آکھن گے۔ ایہ ساریاں کہانیاں مسلماناں دے مذہب توں ناواقفی دی وجہ توں بغض تے عداوت نال بھریاں ہونیاں نیں۔ جہڑیاں غلطیاں تے بدگمانیاں اسلام بابت اج تیکر موجود نیں اوہ ایس پاروں نیں پئی سارے پرانے عیسائی شاعر مسلماناں نوں مشرک تے بت پرست سمجھدے سن تے درجات دی ترتیب نال اوہناں دے تن خدا مئے جان دے سن۔ ماہوم یاں ماہون یاں ماہومیڈ، دُجا پلین تے تیجا ٹرگا مان..... تے محمد لوکا کئی نوں اپنے طلائے بت دی پوجا دی دعوت دیندے سن..... پسین وچ جدوں عیسائی مسلماناں تے اپنا پلڑا بھارا کر گئے تے شہنشاہ چارلس سر قوسطہ وچ داخل ہو یا تے نال دیاں نوں حکم دتا پئی شہر دا چکر لاؤ۔ اوہ مسیتاں وچ وڑ گئے تے لوہے دے تھوڑیاں نال ماہومیڈ دے سارے بتاں نوں توڑ سٹیا۔“

لا الہ الا اللہ تے قل هو اللہ احد درس دین والے، تے حیاتی دے آخری ساہواں تیکر مشرک توں بچن دی ہدایت کرن والے بندے بابت اوہناں ”سیانیاں“ نے جہڑے مفروضے گھڑے نیں، ایہ اوہناں دی کم علمی پاروں ہی نیں۔ اوہناں وچاریاں نوں جے کدھرے قرآن پاک پڑھنا آؤندا تے اوہ ایوں دی حماقت نہ کردے۔

اے تھوڑا چراگدیں امریکہ وچ چھپن والی F. E. Peters دی کتاب Muhammad and the Origin of Islam دے صفحہ نمبر ۲۶۷ دا اک پیرا پڑھو:

"The Quran says (10:48) that there is to no people to whom a prophet was not sent and Muslim traditions generously set the number at 240,000."

باسور تھ سمٹھ، محمد اینڈ محمد زم، صفحہ ۶۳۔
شبلی نعمانی، سیرت النبی، جلد اول، صفحہ ۶۳، ۶۴۔

آؤ ہن ایس نام نہاد مستشرق عالم دی علیست تے ماتم کریئے۔ قرآن دی آیت (10:48) ایہ ہے:

﴿وَيَقُولُونَ مَتَىٰ هَٰذَا الْوَعْدُ إِن كُنتُمْ صَادِقِينَ﴾

ایس وچ اللہ تعالیٰ نے مشرکاں دی نبی اکرم a نال اس حماقت دا ذکر کیتا اے جہدے وچ اوہ آکھدے سن پئی اے محمد! جہڑے عذاب توں سانوں ڈراندرا ہنا ایس اوہ آ کیوں نہیں جاندا تے جیہڑی گل دا فاضل مستشرق ذکر کرنا چاہندا اے، اوہ ہے:

﴿وَإِنْ مِنْ أُمَّةٍ إِلَّا خَلَا فِيهَا نَذِيرٌ﴾ (الفاطر: ۲۴)

”تے کوئی قوم اجہی نہیں گزری جہدے وچ کوئی ڈراؤن والا نہ آیا ہووے۔“

ایس توں پتا چلدا اے پئی اوہ بھلا مانس قرآن دی ابجدتوں وی واقف نہیں۔ ایوں ای اُتے دتے ہوئے پیرے دے اگلے حصے تے غور فرماؤ جس وچ اوہ آکھدا اے پئی مسلم روایت موجب دو لکھ چالیس ہزار پیغمبر آئے۔ خورے ایہ روایت اوس نے کتھے پڑھ لئی اے۔ ساڈا ایمان تے ایہ ہے پئی نیڑے تریڑے اک لکھ چوی ہزار رسل وانبیاء اولاد آدم توں صراط مستقیم دکھان لئی دنیا تے گھلے گئے۔ اک ہور مثال ویکھو۔ مارگولتھ لکھدا اے:

we have already seen reason for believing that Muhammad at some time had...

(ساڈے کول ایہ من دی وجہ پہلوں ای موجوداے پئی محمد a توں بعض ویلے.....)

آ کسفر ڈا ایہ سیانا جہڑے ”Some Time“ دا ذکر کدا اے ایہ دورا نہیں یقیناً نزول وحی دا ویلا ہوندا سی۔ ہن جے کر مارگولتھ قرآن توں سمجھدا تے اوس نوں پتا ہوندا پئی اوس ویلے محبوب خدا اوس ذمہ داری نوں قبول کر رہے ہوندے سن جہڑی پہاڑاں توں وی بھاری لگی تے اوس توں ایہ وی پتا ہوندا پئی اوس ویلے خالق اپنی مخلوق نال تے رب اپنے بندے نال اوہ گلاں کر رہیاں ہوندا سی کہ سمندراں دے پانی توں سیاہی بنا دتا جاوے تے اوہ وی مک جاوے پرگلاں نہ کن۔ (مریم: ۱۰۹)

ایس طرحاں دیاں بہت ساریاں غلطیاں یورپین سیرت نگاراں کولوں ہوئیاں نیں۔ جے کراوہ قرآن، تے اوس توں بعد احادیث دے معتبر ذخیرے توں کم لیندے تے ایوں دی صورت حال پیدا نہ ہوندی۔

دوجی طرز دیاں غلطیاں اوہ نیں جہڑیاں ایہناں جان بجھ کے کیتیاں نیں ایہناں دا قلب تے ضمیر ایہ گل من دا اے پئی اوہ خواہ مخواہ علتیاں کر رہے نیں پر مذہبی تعصب، غیر معتبر گواہی دی قبولیت تے اپنے آپ نوں ایشیائی قوماں، تے خاص طور تے مسلماناں توں ودھ مہذب تے متمددن ثابت کرن دیاں جہداں نے ایہناں نوں ایہ شعوری غلطیاں کرن تے مجبور کیتا۔

جدوں تواریخ نے اوہ موڑ کٹیا جہدے نتیجے تے صلیبی جنگاں دا مڈھ بجھاتے عیسائیاں نے شان نبوت وچ ٹک کے گستاخیاں کرنا اپنا فرض سمجھ لیا۔ ایس سلسلے وچ امیل درمگھم لکھدا اے پئی ”مسلماناں تے عیسائیاں وچکار جنگ شروع

مارگولتھ، محمد اینڈ دی رائز آف اسلام، ری پرنٹ ۱۹۲۷، صفحہ ۸۵۔

ہوندیاں ای ویرتے بدگمانی دے بھانڑی مچ کھلوتے۔ ایہہ اگ روز دیہاڑ ودھدی گئی تے مغرب والیاں اپنے دامن توں ہوا دے کے ایس اگ توں رجھ کے چایا۔ ایہو تیکر پئی مغربی لکھاری بغیر پرکھ پڑچول توں اسلام تے الزام تراشی وچ حدوں ودھ گئے۔ مسیحی شاعران نے وی اندلس دے مسلماناں نال کوئی چنگا سلوک نہ کیتا تے (حضرت) محمدؐ توں..... تے جادوگر آکھن توں وی باز نہ آئے۔ کجھ لکھاریاں نے محمدؐ a توں ایجے راہب نال ملا دتا جہڑا پوپ دی تھاں نہ ملن پاروں لوکاں اتے بچھر کھلوتا سی۔“

(بد بخت) چیر نو چن لکھدا اے پئی ”محمدؐ نے..... دی مستی وچ جان دتی“.....

ایویں دیاں ہور بے شمار گلاں دے حوالے مصر دے جناب محمد حسین بیگل نے اپنی کتاب ”حیات محمدؐ“ وچ دتے نیں پرہن کجھ چراں توں صورت حال بدلی ہوئی لکدی اے۔ جناب مارٹن لنگز (ابوبکر سراج الدین) رومانیا دے سابق وزیر خارجہ وٹسٹن جور جیو، امریکی مستشرق میکسم روڈنس تے امریکا وچ کچھلی صدی دے اخیر دی دہا کے وچ چھپی کتاب Muhammad -A Biography of the Proph محسوس کیتا اے پئی مغرب نے ارادۂ اسلام تے جناب محمد رسول اللہؐ a توں نیواں دکھان دی جہڑی کوشش کیتی اے اوہدے نال اوہناں دا اپنا ای قد کاٹھ نکا ہوندا چایا اے۔ مثال موجب ایف۔ ای۔ پیٹرز نے حدیث دی تدوین تے اعتراض کر دیاں جدوں تینچیکم دے ہنری لیمنز (Henri Lammens) دیاں دلیلاں دھرائیاں تے ایہ جھلا لکھیا:

"However Objection able his own motives and style, Lammens' critical attack in particular has been decried but never refuted"

ترجما: اوس دے اعتراض جوگ مقصد تے ڈھنگ نوں جوئیں وی ویکھیا جاوے۔ (حدیث اُتے) اُسدے تنقیدی حملے دی مذمت تے عیب جوئی تے کیتی گئی اے پر اوس توں غلط نہیں ثابت کیتا گیا۔

ایس تے روڈنس لکھدا اے پئی Lammens دی ایس کدورت دی وجہ "Filled with a holy contempt for Islam" اے۔ ایس دی وجہ مسلماناں دی اوہ عظمت اے جہڑی اوس نوں "Delusive glory" نظر آؤندی اے۔ اوس نوں سچ لکیا نظر آؤندا اے تے اوہ ایس نوں dissembling دا نام دیندا اے۔ تے نالے اوس توں مسلماناں دا نبی "Lascivious Prophet" دس دا اے۔

ایویں میکسم روڈنس نے ہیزی لیمنز تے ایف ای پیٹرز دی تسلی کردتی اے۔ ایسے طرحاں کیرن آرمسٹرانگ اپنی کتاب دے تعارف وچ لکھدی اے:

”جدوں ستویں صدی عیسوی وچ اسلامی سلطنت قائم ہوئی تے یورپ اک پسماندہ خطہ سی۔ اسلام مشرق وسطیٰ دی عیسائی دنیا تے تیزی نال قابض ہو چکیا سی تے انج دی صورت حال شمالی افریقا دے چرچ دی وی سی، جہڑا رومی چرچ لئی

ایف۔ ای۔ پیٹرز، مہمدا اینڈ دی اورجینز آف اسلام، ۱۹۹۴، صفحہ ۲۶۵۔

میکسم روڈنس، محمد، ۱۹۸۱، صفحہ ۲۶۔

چوکی ضروری تے فیصلہ کن حیثیت رکھداسی۔ جدوں یورپ (اپنے تئیں) اُنھیرے دور (Dark Age) وچوں باہر نکلیا تے اپنی عظیم تہذیب قائم کیتی تے تدوی اسلامی سلطنت دے ودھارے دا پُرانا ڈر خوف اوہناں دے دلاں وچ موجود رہیا۔ ایس ڈر نے مغربی عیسائیاں لئی ایہ گل ناممکن بنا دتی پئی اوہ اسلام بابت کوئی معقول تے بامقصد رویہ اپناندے۔ مغربی سکالراں نے اسلام نوں الحاد تے کفر دے موجب پیش کیتا تے ایس دے نبی محمد a نوں Mummers (پُرانی طرز دے خاموش کردار) دے ڈرامیاں وچ مغربی تہذیب دا دشمن بنا کے پیش کیتا جاندا چھنے ساڈے سورما سینٹ جارج نال جنگاں کیتیاں۔“

کیرن آرمسٹرانگ اگے جا کے لکھدی اے:

”ایہ فرض کر لینا اک غلطی ہووے گی پئی اسلام مڈھ توں ای اک تشدد تے متعصب مذہب اے، جو یں کہ بعض ویلے آکھیا جاندا اے۔ (پچ ایہ ہے پئی) ایہ اک عالمگیر مذہب اے تے ایس وچ مشرق پرستی یاں مغرب نال ویردی کوئی گل نہیں۔ (جھٹھوں تیکر بنیاد پرستی دا تعلق اے) انتہا پسند ہندو ذات پات دے نظام دا پورا دفاع تے ہندوستانی مسلماناں دی ملک کے مخالفت کر رہے نیں۔ یہودی بنیاد پرست (فلسطین وچ) مغربی کنارے تے غزہ دی پٹی تے غیر قانونی آبادیاں قائم کر رہے نیں تے ایہ عہد کیتی بیٹھے نیں پئی ایہناں اپنی مقدس سرزمین توں سارے عرباں نوں کڈھ کے رہنا اے..... فیرا یہ فرض کرنا غلط ہووے گا پئی مسلمان انتہا پسند اپنے ایمان وچ لوکاں توں اڈتے وکھرے نیں..... منکھ ایس گل دا اے پئی میڈیا تے عام پریس وی ساڈی ایوں مدد نہیں کر دے جو یں ہونی چاہیدی اے۔ مثال موجب جہناں مسلماناں نے برطانوی مصنف سلمان رشدی دے خلاف تے آیت اللہ خمینی دے فتوے دی حمایت وچ ہنگامے کیپتے اوہناں نوں اوس اکثریت نالوں ڈھیر چوکی کورتج دتی گئی جہناں نے ایس گل دی مخالفت کیتی۔ سعودی عرب دی مذہبی اتھارٹی تے مصر دی شاناں والی الازہر مسجد دے مشائخ نے ایس فتوے نوں ناپسند کر دیاں ہویاں غیر قانونی تے غیر اسلامی قرار دتا۔ اسلامی قانون تے صفائی دا موقع دتے بغیر کسے نوں سزائے موت سنان دی اجازت ای نہیں دیندا تے نہ ہی اسلامی سلطنت توں باہر اسدا دائرہ اختیار اے۔ مارچ ۱۹۸۹ء وچ ہون والی اسلامی کانفرنس وچ ۴۵ وچوں ۴۴ رکن اسلامی ملکاں نے جناب آیت اللہ خمینی دے فیصلے نوں مستحق طور تے رد کر دتا۔ پرائس حقیقت نوں برطانوی پریس وچ بڑی سرسری جہی تھاس ملی۔ بعض ویلے تے میڈیا ساڈے روایتی تعصب نوں ہوا دیندا جا پدا اے، جسدی اک جھلک ۱۹۷۳ء دے اپیک (OPEC) تیل بحران وچ ملدی اے۔“

ایس توں بعد کیرن آرمسٹرانگ جناب رسول اللہ دی حیاتی دا ذکر کردی اے تے آکھدی اے پئی ”اسیں محمد بارے کسے دی دوجے وڈے مذہب دے بانی دی نسبت چوکھا گجھ جان دے ہاں۔“ اپنی کتاب دے تعارف دے اخیر تے اہل مغرب نوں ایوں جھوندی اے:

"Thus, when we see Muhammad waging war against the city of Macca, we shall have to ask whether he really did found a religion of the

sword? How could a man of God be prepared to fight and kill

ترجمہ: تے فیر جدوں اسیں محمد نوں مکہ دے شہر دے خلاف جنگ کردے ویکھدے ہاں تے ایہ پچھنا پوے گا پئی کیہ اوہناں نے سچ مچ تلوار نال اک مذہب دی غیہ رکھی سی۔ رب دا اک بندائزن مرن لئی کوں تیار ہوسکد اسی؟ سو مغرب دے اوہ سیانے جہڑے اکھاں توں تعصب دی پٹی لاہ کے ویکھن دی کوشش کردے نیں اوہناں نوں حق سچ نظر آ جاند اے۔

تے آؤ ہن شعوری غلطیاں دی دوجی وجہ غیر معتبر گواہی دی قبولیت یا ناقص اصول شہادت، ول آئیے۔ مسلمان اکھوان والے، ایمان دے لحاظ نال دنیا دے کمزور ترین بندے نوں تسیں ایہ گل آکھو پئی عید دے دیہاڑے مدینے دی اک گلی وچ اک روندے ہوئے نیانے نوں نبی اکرمؐ نے ویکھیا تے اوس نوں ایس گلوں مندا چنگا آکھیا پئی عید دا دن کوئی رون دھون لئی نہیں ہوندا تے اوہ ماٹھا مسلمان وی ایہ گل کرن والے داسر کھول دیوے گایاں ایہ ضرور آکھے گا پئی خبردار میرے آقا و مولا دی توہین مت کرو۔ اس دا جذبا ایمانی کدے وی اُس نوں ایہ گل منن دی اجازت نہیں دیوے گا پر جے کراوس مسلمان نوں ایہ گل آکھی جاوے پئی رحمۃ اللعالمین نے اوس نوں سینے نال لایا، اوس نوں گھر لے گئے، نوں لیڑے پوائے، کھوایا پیا یا تے فیر اپنے نال عید گاہ ول لے گئے تے اوہ مسلمان آکھے گا ”ایہ ہوئی ناگل۔“

دو جے پاسے کسے مستشرق نوں جدوں ایوں دی روایت کسے ٹٹے نبجھ و سیلے نال لہجہ جاوے تے اوہ فوراً اُس نوں اپنے دفتر وچ سنبھال لوے گا۔ ایس دی وجہ ایہ ہے پئی اوس دے ہتھاں وچ اوہ ٹکڑی کوئی نہیں جہدے تے ایہ سودا تو لیا جاند اے۔ روایت دے جہڑے پیڑھے تے کرڑے اسلامی معیار موجود نیں اوہناں موجب اک تے روایت کرن والیاں زبردست احتیاط توں کم لیا تے دو جے سنن تے سنبھالن والیاں نے اوہ بے نظیر معیار اپنایا پئی دنیا دے کسے مذہب دی تواریخ اپنا پورا ٹل لا کے وی ایس معیار دا عشر عشر وی پیش نہیں کرسکدی۔ جے روایت کرن والی گل نوں اگانہ ٹوریے تے پتا لگدا اے پئی حضرت زبیر تے انس ورگے معتبر صحابی وی اوہ گل نہیں سن کردے جہدا اوہناں نوں پورا پک نہیں سی ہوندا تے آکھدے ہوندے سن پئی جے کہ حدیث بیان کردیاں بھلیکھا لگن داشبہ نہ ہوندا تے بیان کرای دیندے۔ اوہ اُچیاں شانان والے بزرگ صحابی جہناں کئی کئی ورھے نبیؐ دے قدماں وچ گزار دتے اوہ اپنی زبان تے ”قال الرسول“ دے اکھرا ایس وجہ توں نہیں سن آن دیندے پئی کدھرے کوئی غلطی نہ ہو جائے۔ امام شعی آکھدے نیں پئی ”میں اک ورہا پورا حضرت عبداللہ بن عمر کول بیٹھا رہیا پر اوہناں کوئی حدیث بیان نہیں کیتی“ حضرت سائب بن یزید فرماؤندے نیں پئی ”میں، حضرت طلحہ بن عبداللہ، حضرت سعد، حضرت مقداد تے حضرت عبدالرحمن بن عوف دی رفاقت کیتی پر اوہناں کولوں اک حدیث وی نہیں سنی۔“ بعض لوکی صحابہ کرام نوں روایت واسطے آکھدے سن پر اوہ انکار کر دیندے یا ٹال دیندے۔ اصل وچ ایہناں بزرگاں نوں حضور دی ایہ گل چیتے آ جاندی سی پئی جہڑا بندامیرے نال جھوٹھ جوڑے اوہ اپنا ٹھکانا جہنم وچ بنا لوے۔

روایت سن کے سانسھن والیاں دا ایہ حال سی پئی اوہ اک گل سن کے اوس نوں ستر اچھیاں تکیاں تے تولدے سن

جہناں تے سونا تو لیا جاندا اے۔ مثال موجب حضرت عائشہ صدیقہؓ دے سامنے جدوں حضرت عبداللہ بن عمر دی ایہ روایت بیان کیتی گئی پئی مرن والیاں لئی رونا نال اوہناں تے عذاب ہوندا اے تے حضرت عائشہؓ نے فرمایا پئی نہ تے تسلیں جھوٹے جے تے نہ تہاڈے راوی، پر کن غلطی کر جاندا اے۔ ایگل اوہناں ایس پاروں آکھی پئی قرآن صاف آکھدا اے پئی کوئی بھارچکن والا دو جے دا بھار نہیں چکے گا۔ احتیاط تے پرکھ دے اعلیٰ معیار دی اک ہور مثال دیکھو پئی اک واری ابو موسیٰ اشعری حضرت عمرؓ دی خدمت وچ گئے تے تن واری اجازت طلب کیتی۔ حضرت عمرؓ (خورے) کسے کم وچ رُجھے ہوئے سن ایس لئی کوئی جواب نہ دے سکے۔ حضرت ابو موسیٰ پچھانہ پرت گئے۔ جناب عمرؓ ویلھے ہوئے تاں اوہناں ئوں سدھلیا تے مڑ جان دی وجہ وی پچھی۔ حضرت اشعری آکھیا پئی میں رسول اللہ توں سنیا اے پئی تن واری اجازت منگن تے وی جواب نہ ملے تے پچھانہ پرت آؤ۔ ایہ سن کے حضرت عمرؓ فرمایا پئی ابو موسیٰ گواہ لیاؤ یاں سزائی تیار رہو۔ حضرت ابو موسیٰ نے گواہی لیاندی تے تاں جا کے حضرت عمرؓ نے ایس روایت ئوں ٹھیک نیا۔ حضرت ابو بکرؓ دے سامنے اک عورت نے جہڑی مرن والے دی دادی سی، میراث دا دعویٰ کیتا۔ حضرت ابو بکرؓ نے فرمایا پئی بی بی ”قرآن وچ اجہی کوئی گل نہیں تے نہ ای حضور دا کوئی حکم میرے علم وچ اے۔“ جناب مغیرہ بن شعبہ نے شہادت دتی پئی حضور دادی ئوں چھیواں (۱۶) حصا داندے سن، پر حضرت ابو بکر دی تسلی نہ ہوئی۔ فیراک دو جے صحابی محمد ابن مسلمہ نے گواہی دتی تے فیر حضرت ابو بکر نے اس بی بی نوں میراث دوائی۔

مستشرقین دے برعکس مسلمانان کول روایتاں نوں پرکھن دا جہڑا اچا معیار اے اس دی اک مثال ایہ ہے پئی سیرت تے بڑی ہی معتبر کتاب ’زاد المعاد‘ دے مصنف حضرت علامہ حافظ ابن قیمؒ ”تن طلاقاں اکو واری شریعت نال ٹھٹھے منول دی بد ترین مثال“ دے سرناویں پٹھ اٹھ صفحیاں دی اک لمی بحث کردے نیں۔ کئی روایتاں تے مسلکاں دا ذکر کردے نیں پر عقل توں کم لین دی ہدایت کردے ہوئے لکھدے نیں:

”قیاس دے نقطہ نظر نال وی تن طلاقاں دا اکو واری اکٹھا کرنا بدعت اے تے حرام اے تے ہر بدعت مردود

اے، کیوں جے ایہ رسول اللہ دے حکم دے مطابق نہیں۔ غرض تحریم طلاق ثلاثہ دے بیان وچ جو کجھ آکھیا گیا

اے اوہ ایس گل ئوں ٹھٹھ لئی خیر اے پئی اک وقت وچ دتیاں ہوئیاں تن طلاقاں واقع نہیں ہوندیاں۔“

ہُن دیکھو پئی روایتاں بیان کرن وچ احتیاط۔ روایتاں قبول کرن وچ احتیاط۔ معتبر تے صادق بندیاں دیاں روایتاں تے ایس پاروں گواہی پئی راوی دو ہو جان تے اوہ روایت احاد دے خانے وچوں نکل جائے۔ قرآن دے دسے اصولاں اُتے اوہناں نوں پرکھناں (جو یں کہ حضرت عائشہؓ نے کیتا) عقل فہم دی تکرری اُتے اوہناں نوں تولنا (جو یں کہ حافظ ابن قیمؒ نے کیتا) ایہ سبھ کجھ مستشرقین نے نہیں کیتا۔ سو پرکھ تے پڑچول دے ایس معیار توں اکھاں میٹ کے اوہناں نے اک دو جی وڈی غلطی کیتی۔ جے اوہ روایتاں، مسیعی شاعراں دی شاعری، قصے کہانیاں، مفروضیاں دی بنیہ تے اساریاں تواریخی کتاباں تے روایت کرن والے تے کتاباں لکھن والے لوکاں دی حیثیت تے غور کر لیندے تے فیر اوہناں دی ہچکل تے غیر جانبداری ئوں ضرور قدر دی نگاہ نال دیکھیا جاندا۔

محمد ابن قیمؒ، حافظ، زاد المعاد، حصہ چہارم، صفحہ ۸۰۷۔

جزیرہ نمائے عرب دی تواریخ تے جغرافیا

جغرافیے دے مضمون وچ انگریزی زبان دے دو وکھو دکھ نظر آؤن والے اکھر Peninsula تے Island چوکی اہمیت دے حامل نیں۔ اردو یاں پنجابی وچ ایہناں دا بدل تے لہجہ اے پراوہ دوواں دے فرق توں کوئی ایڈاکھول کے نہیں رکھدا۔ ایس فرق توں اسیں ایوں سمجھ سکدے آں پئی Island ٹاپو یاں جزیرا چارے پاسیوں پانی وچ گھریا خشکی دا ٹکڑا اے تے Peninsula یاں جزیرا نما تن پاسیوں سمندراں نے ولیا ہوندا اے، پر چوتھے پاسے خشکی دار ستا موجود رہندا اے۔ پیغمبراں دی دھرتی عرب توں وی ایسے پاروں جزیرا نما آکھدے ہاں کہ ایس توں تن پاسیوں پانیاں نے گھیریا ہویا اے۔ خیال ہے کہ کدی ایس علاقے وچ زبردست بارشاں تے روئیدگی ہوندی ہووے گی۔ سکے ہوئے ندی نالیاں دے نشان اس خیال توں پیڑھا کر دے نیں۔ فیر کوئی پنج ہزار سال پہلوں موئی تبدیلیاں ہوئیاں تے سبزار صحراواں وچ بدل گئے۔ جزیرا نمائے عرب اک اجہی مستطیل ورگا اے جہدے آہنے ساہمنے دے ضلعے غیر متوازی ہون۔ ایس دے شمال ول فلسطین تے صحرائے شام، جنوب ول بحر عرب جہز اصل وچ بحیرا ہند دا ای کھلار اے تے خلیج عدن، مشرق ول حیرہ، دریائے دجلہ، فرات تے خلیج فارس تے مغرب ول بحیرہ قلزم اے۔ جزیرا نمائے عرب اپنے کھلار دے لحاظ نال سبھ توں وڈا دنیا جاندا اے۔ بھاویں ایس دی باقاعدہ پیمائش کدے نہیں ہوئی فیروی ایس گل تے اتفاق اے کہ ایس دا رقبہ ۱۲ لکھ توں ۱۳ لکھ مربع میل دے درمیان اے۔ جغرافیائی تے سیاسی حوالیاں نال حجاز، نجد، یمن، حضار الموت تے عمان ایس دے اہم حصے نیں۔

جدوں نبوت دا سلسلا جاری سی (سکوں اوس توں چوکھا چر بعد تیکر وی) آسٹریلیا، امریکا تے انٹارکٹیکا ورگے براعظماں توں دنیا واقف نہیں سی۔ معلوم دنیا وچ ایشیا، افریقا تے یورپ ہی سن تے جزیرہ نمائے عرب اس وقت دی جانی پہچانی دنیا دا مرکز سی تے آج وی اوس دے نال جڑیا ہویا نظر آؤندا اے۔ ایس دی شمال مغربی نکر براعظم افریقا وچ داخلے دا دروازہ اے۔ شمال مشرقی نکر یورپ دی کنجی اے۔ مشرق ول ایران، وسطی ایشیا تے مشرق بعید دے بوہے کھلدے دسدے نیں جہڑے بر صغیر پاک و ہند تے چین دار ستاویں وکھاندے نیں۔ ایوں ہی اوس دور دے تنے براعظم سمندر دے رستے وی جزیرہ نمائے عرب نال جڑے ہوئے نیں تے اودھروں آؤن والے بیڑے عرب بندرگا ہواں تے لنگر انداز ہوندے نیں۔ حجاز عرب دا اہم خطا اے تے ایہ خطا ای جزیرہ نمائے عرب دی پوری دنیا تے پہچان بنیا، کیوں جے اسیں جس پاک ہستی دی حیاتی تے جھاتی پاون ٹرے ہاں اوس دا تعلق ایسے خطے نال سی۔ اوہ اتھتے ای جے تے اتھتے ای آرام فرما رہے نیں تے نالے مکہ تے مدینہ دے دوویں مقدس شہر ایسے حجاز دے شہر نیں۔ حجاز اک ناہموار خطا اے۔ ایہ اچھائی تے نیوانیائی سکے دے آل دوالے

چو کھے زوراں نال اپنا آپ منواندی اے۔ مکہ بحیرہ قلزم توں پنجاہ میل تے جبل قراغ دی ریتلی چٹاناں توں تقریباً ۳۰ میل دریڈا اے۔ گرمی زوراں دی ہوندی اے۔ سکیاں وادیاں وچ جے کدھرے بھورا ہریالی نظر آؤندی اے تے ڈھور ڈنگروی دسدے نیں۔ ایہ علاقہ سطح سمندر توں ۶۰۰۰ توں ۹۰۰۰ فٹ تیکر اچا اے۔ ایس خشک تے ویران علاقے دے چڑھدے پاسے اک تھان تے ہریالی جھممر پوئندی اے۔ استھہ سیب، انجیر، ناشپاتی، انار تے انگور رنج کھان نوں لہجدے نیں۔ ایہ طائف اے۔

یمن دی سیاسی صورت حال:

اسلام توں اک ہزار سال پہلے یمن طاقتور تے دولت مند حکومتاں دامرکز رہیا اے جہدی وڈی وجہ لوہان تے ایہدے نال رلدی اک دوجی اجہی گوند دی پیداوار اے جہدی خشو ساری دنیا تے مشہور سی تے اوہ عطریات بناؤن دے کم آؤندی سی۔ چوتھی صدی عیسوی دے شروع ہونداں ای یمن دے سبائی سرداراں دا زوال شروع ہو گیا۔ پہلوں بطنیاں نے شمالی حجاز تے اپنا اقتدار قائم کر کے قوم سہانوں اوس دی نوآبادیاں توں باہر وگایا۔ فیر رومیوں نے شمالی حجاز اُتے دوجی سٹ لائی تے نال ای مصر تے قبضہ کر کے لوہان ورگیاں چیزاں دی برآمد مندوش کردتی، کیوں جے سمندری راہواں تیکر رومیوں دیاں تلواراں دی چک اپڑ رہی سی۔ رومی چھیتی نال ہی ایہ گل دی سمجھ گئے کہ مون سون ہواواں نوں بحیرہ احمر تے جنوبی ایشیا دے وچکار تجارت لئی کوں ورتیا جاسکدا اے تے ایس گل دا اوہناں نے فیداوی چکیا۔ دو جے پاسے یمنی حکمران پیر و پیر لے پندے گئے تے سلطنت دے کماں کاراں تے اوہناں دی پکڑ کمزور ہوندی گئی۔ ایہتھوں تیکر کہ اوہ اس عہد دے عظیم الشان زرعی پروجیکٹ تے ڈیم معارب (Great Dam al Ma'rib) نوں وی نہ سنبھال سکے تے ۴۵۰ یاں ۴۵۱ء وچ بند ٹٹ گیا۔ ایس دے نتیجے وچ چوکھا وڈا ہڑ آیا۔ آبادیاں دے ناں مٹ گئے، وستیاں اجڑ گئیاں تے قبیلے تتر بتر ہو گئے۔

۶ ویں صدی عیسوی دے نتیجے دہاکے وچ بچے کچھے یمن تے حکمرانی کرن والا بادشاہ ذونواس عیسائیت چھڈ کے یہودی ہو گیا تے نجران دے عیسائیاں نوں وی عیسائیت ترک کرن تے مجبور کرن لگ پیا۔ اوس نے تقریباً ۲۰ ہزار سچے نصرانی شہید کر دتے۔ اک نجرانی عیسائی بچے کے قیصر روم تک جا پڑیا تے اوس نوں اپنی قوم تے ہوئے ظلم دی داستان سنائی۔ قیصر روم نے نیٹرے دی سلطنت حبشہ دے بادشاہ نجاشی نوں ایس دا بدلہ لین دا آکھیا۔ قیصر روم تے نجاشی دوویں نصرانی مذہب تے سن۔ ایس پاروں اوہناں نے توجہ تے نیک نیتی نال ذونواس نوں سواد چکھان دا آہر کیتا تے نجاشی نے اریاط تے ابویکسوم ابرہہ دی کمانڈ وچ لشکر کشی دا حکم دتا۔ ایہناں دو جرنیلاں نے یمن دی اٹ نال اٹ و جادتی۔ ذونواس بھج گیا تے اخیر اک دریا وچ ڈب کے مر گیا تے ایوں یمن تے شاہ حبشہ دا قبضہ ہو گیا۔ کجھ چراں بعد ایہ دوویں جرنیل آپس وچ لڑ پئے جہدے نتیجے وچ اریاط ماریا گیا تے ابرہہ اک مطلق العنان تے جابر بادشاہ وانگ حکومت کرن لگ پیا۔

نجاشی نوں جدوں سارے حال حالات دا پتا لگیا تے اوہ بڑا خفا ہو پیا پر ابرہہ جہڑا اک چالاک حبشی سی، یمن وچ اک چوکھا وڈا اگر جابنا کے نجاشی نوں خوش کرن وچ کامیاب ہو گیا۔

تفسیر ابن کثیر (سورہ فیل)

وگڑی شکل تے کچھو کچھ دے جیسے والا ایہ حبشی سردار طاقت دے نشے وچ ایوں مست سی پئی اوس نے خانہ کعبہ نوں ڈھان دے ارادے نال مکہ تے حملا کردتا اوس نال فیرکیہ ہوئی، ایہ سبھ مسلمان سورہ فیل وچ پڑھ چکے نیں۔ حبشیاں دی ایہ درگت بنی ویکھ کے اہل یمن نے حکومت فارس دی مدد نال اوہناں نوں اپنے وطن وچوں کڈھ ماریا تے ۵۷۵ء وچ معد یکرب نوں اپنا بادشاہ بنالیا۔ ایہ بادشاہ سیف ذی یزن حمیری داپترسی۔ یمن وچ جہڑے حبشی باقی رہ گئے سن اوہناں اک دن موقعالہجہ کے معد یکرب نوں قتل کردتا۔ اودھر کسریٰ نے ایوں دے حالات دافید اچکیا تے صنعائے اک فارسی النسل گورنر مقرر کر کے یمن نوں فارس دا اک صوبا بنالیا۔ ایس توں بعد ۶۲۸ء تیکر یمن تے کئی فارسی گورنر مقرر ہوئے پر ۶۲۸ء وچ جدوں گورنر بازان نے اسلام دی مضبوطی پھڑائی، یمن فارسی طاقت توں باہر آ گیا تے دور نیڑے، ہر پاسے تکبیر دے نعرے وجن لگ پئے۔

حیرہ دی بادشاہی:

اج دے عراق تے ایس دے آل دوالے چوکھے چراں توں اہل فارس دی حکمرانی ٹری آوندی سی پر ۳۲۶ ق م وچ سکندر مقدونی نے دارا اول نوں شکست دے کے فارسیاں دا گھمنڈ توڑ دتا۔ ایس ہارتوں بعد ایس ملک دے ٹوٹے ہونے شروع ہو گئے۔ ۲۲۶ء وچ جدوں اردشیر نے ساسانی حکومت دا مڈھ بھنیا تے فارسیاں دی طاقت اک واری فیر دنیا نوں دی۔ اردشیر نے اپنی فوج نوں نویں سرے بنایا سنواریا تے سرحدیں دے نیڑے دے عرباں نوں اپنے تھلے لالیا۔ ایسے پاروں قضاعہ نے شام ول کوچ کیتا پر حیرہ تے انبار دے عرباں نوں واجلدار بنالیا گیا۔

جدوں اردشیر فارس دابادشاہ سی اوہدوں حیرہ تے جزیئہ الوضاع دی حکمرانی سی۔ ایوں لگداسی کہ اردشیر نوں ایس گل دی سمجھ لگ گئی سی کہ عرباں تے حکومت کرناتے اوہناں نوں سرحدیں اُتے لٹ مارتوں باز رکھنا اوس دے وس وچ نہیں سی۔ ایس لئی اوس نے فیصلہ کیتا کہ کسے اچھے بندے نوں اوہ تھے حکمران بنادتا جاوے جیہڑا اوہناں دے وچوں ہووے تے اوس نوں اپنے قبیلے دی حمایت وی ملدی ہووے۔ ایس گل دا اک فیدا اوس نوں ایہ وی دسداسی کہ کسے لوڑ ویلے رومیوں دے خلاف اوہناں کولوں مدد مل سکے گی تے شام دے اوہ حکمران جہناں دا پلڑا روم ول جھکدا اے، اوہناں نوں اکھاں کڈھن لئی گوانڈھ لگدے حیرہ دے حکمراناں نوں ورتیا وی جاسکے گا۔ ایسے پاروں حیرہ وچ فارسی فوج دا اک دستا ہمیش موجود رہندا سی۔ جزیئہ الوضاع ۲۶۸ء وچ مر گیا تے اوس دے مرن نال حیرہ تے لکھیاں (Lakhmid) دی بادشاہت دامنڈھ بچھیا تے عمر بن عدی بن نصرلخمی نے سلطنت دی واگ پھڑی۔ اوس توں بعد اس داپتر امر القیس بادشاہ بنیا، جہڑا ۳۲۸ء وچ مریا۔ اوس نے اپنے لئی King of all the Bedouin (سبھ بدوواں دابادشاہ) دا لقب اختیار کیتا تے جزیئہ نمائے عرب دے شمال تک اپنی کامیابی دے جھنڈے گڈھے۔ ایہ حکمرانی لکھیاں دے ہتھوں وچ ای رہی پر شہنشاہ فارس قباذ بن فیروز دے دور وچ جدوں مزدک نے اپنے عقیدے ابا حیت دارولا پایا تے قباذ نے ناں نرا ایہ مذہب اختیار کر لیا سگوں حیرہ دے

عہ مبارک پوری، صفی الرحمان، الرحیق المختوم، صفحہ ۶۴۔

انسائیکلو پیڈیا آف بریٹانیکا، آرٹیکل حیرہ۔

حکمران منذر بن ماء السمانوں وی سنیہا گھلیا کہ اوہ وی ایس دین دے گھیرے وچ آ جاوے۔ منذر غیرت مند بنداسی، اوس نے بادشاہی لئی اپنا مذہب بدلن توں انکار کر دتا۔ نتیجاً ایہ نکلیا کہ قباز نے اوس نوں معزول کر کے مزدک دے اک منن والے حارث بن عمرو بن حجر کنڈی ٹوں حیرہ دا حکمران بنا دتا۔ فیر جدوں نوشیرواں، فارس دا بادشاہ بنیا تے اوس نے ناصر بن منذر ٹوں فیر توں حیرہ دا حکمران بنا دتا، سگوں مزدک تے اوس دے پیروکاراں دی ایک وڈھی تعداد نوں قتل وی کر دتا۔ اوس نے حیرہ دے پہلے حکمران حارث عمرو نوں اپنے کول وی سد گھلیا پر اوہ بنو کلب دے علاقے ول بھیج گیا تے حیاتی دے باقی دھاڑے او تھے ای بتا دتے۔

حیرہ وچ منذرتوں بعد چوکھا چراقتدار خیمیاں دے ہتھ وچ ای رہیا پر سن ۶۰۲ء وچ نعمان بن منذرتوں کسے گل تے خفا ہو کے کسریٰ نے اوس نوں قید کر دتا۔ اوہ وچارا قید وچ ای مریا۔ نعمان کسریٰ ول جان دیاں اپنا بال بچاتے مال دولت بنو شیبان دے سردار ہانی بن مسعود کول چھڈ گیا سی۔ جدوں کسریٰ نے ہانی ول ایہ سنیہا گھلیا کہ نعمان دے جی تے پیسا دھیل پر تا دیوے تے اوس نے غیرت تے جرات دا مظاہرہ کیتا تے اس دے حیرہ اُتے مقرر کیتے وائسرائے ایاس بن قبیصہ طائی دیاں اکھاں وچ اکھاں پاکے گل کیتی تے نالے اوس نوں لکاریا پئی اوہ شاہ فارس دے اشاریاں تے گوانڈھیاں نال جھیرا نہ پاوے۔ ایاس دے پچھے اک گھمنڈی بادشاہ تے سچے کعبے اک طاقتور لشکر سی۔ اوہ ہانی ول دھن لگ پیا تے اخیر ذی قار دے میدان وچ دوواں دی ہتھ جوڑی ہوئی۔ ایس میدان وچ فارسیاں نوں زبردست مار پئی تے ایوں پہلی وار عرباں ٹوں اپنی طاقت دا اندازا ہو یا تے نالے پہلی وار عرباں ٹوں عجم تے فتح حاصل ہوئی۔ ایہ واقعا ۵۷۰ء دا ہوسکدا اے۔

ایاس توں بعد کسریٰ نے حیرہ تے اک ہور فارسی حاکم مقرر کیتا۔ پر ۶۳۲ء وچ اقتدار اک وار فیر لئی سردار منذر بن معرور (المنذر سوم) دے ہتھے چڑھیا۔ ایس نوں بادشاہت سنبھالیاں اے اٹھ مہینے ای ہوئے سن تے اسلام دی دعوت رد کیتیاں اے تھوڑا چرای ہو یا سی کہ اسلامی فوجاں حیرہ ول چڑھ دوڑیاں۔ ایوں اسلام دے عظیم جرنیل حضرت خالد بن ولید نے حیرہ ٹوں اسلامی سلطنت دا حصا بنا دتا۔ ایہ حضرت ابو بکرؓ دی خلافت دا پہلا سال سی۔

شام تے مصر دیاں حکومتاں:

جس زمانے وچ عرب قبیلیاں دی ہجرت زوراں تے سی، قبیلہ قضاعہ دیاں کچھ شاخاں شام دیاں علاقیاں دے وچ آ کے آباد ہو گئیاں۔ اوہناں دا تعلق بنی سلیم بن حلوان نال سی۔ ایہناں مہاجراں وچ اک شاخ بنو ضحیم بن سلیم سی، جہڑی ضجبا عمہ دے ناں نال مشہور ہوئی۔ قبیلہ قضاعہ دی ایس لڑی ٹوں رومیاں نے صحرائے عرب دے بدوواں دی لٹ مار ڈکن لئی ورتیا۔ ایس لئی ایہناں دے اک بندے دے سرتے شاہی دا تاج رکھ دتا۔ رومیاں نوں ایہدے وچ ایہ مصلحت وی نظر آؤندی سی کہ کسے لوڑ ویلے ایہناں نوں شاہ فارس دے خلاف وی ورتیا جاسکدا اے۔ مصلحتاں پٹھ بنی ایہ شاہی چوکھا چر قائم دائم رہی۔ اندازاً اے کہ پوری دوجی صدی عیسوی وچ ایس علاقے تے بنو ضحیم دی حکومت ای رہی اے۔ ایہناں دے اک مشہور بادشاہ زیاد بن ہیولہ داناں تواریخ نوں اے یاد اے۔ فیر جدوں ایس علاقے وچ آل غسان آوڑے تے اوہناں نے بنو ضحیم نوں لکاریا تے اخیر اوہناں دے علاقیاں تے قابض ہو گئے۔ رومیاں نوں ہارے ہوئے بادشاہ تے اوس دے

قبیلے نال کوئی دلچسپی نہیں سی۔ ایس لئی اوہناں آل غسان نوں ای شام دے علاقیاں دے عرب باشندیاں دا حکمران من لیا۔ ایہناں نے اپنا دار الحکومت دومتہ الجندل تُوں بنایا تے رومیاں نال مصلحت دی گنڈھ تُوں پیچدے تے پیڈھا کر دے رہے۔ ایہتوں تیکر کہ حضرت عمر فاروقؓ دے عہد وچ جنگ یرموک دے نتیجے وچ آل غسان دا حکمران جبلہ بن اسہم اسلامی لشکر دی ہیبت دا ساہمنہ کرن تُوں عاجز آ گیا تے ہار من لئی۔

شام اُتے رومیاں دی ست سوسالاں دی شاہی نے دُکھ درد تے قتل و غارت گری دی اک بھیانک داستان نوں جنم دتا۔ رومیاں تُوں اگدیس ۳۶۹ ورھیاں تیکر شام اُتے یونانی قابض رے۔ اوہناں دی حکومت دی شامیاں لئی اک خوفناک آفت سی۔ رعایا کولوں مال اکٹھا کرن لئی جہڑے غیر انسانی روئے تے طریقے ورتے گئے اوہ یونانیاں دے نہ مکن والے لالچ نوں کھل کے ساہمنے لیاؤندے نیں۔

مصر تے وی اوس ویلے رومیاں دی خوشنودی تے رضا نال بنی حکومت قائم سی۔ رومیاں دا دین ایمان صرف مصلحت تے مطلب براری سی۔ ایسے پاروں اوہناں دی اشیر باد نال بنیاں حکومتاں وچ عوام الناس ڈھور ڈنگراں تُوں ودھ کوئی حیثیت نہیں رکھدے سن۔ ڈاکٹر الفریڈ بٹلر اسلام تُوں پہلوں دے مصر دا نقشہ کھچدے ہوئے لکھدے نیں:

”مصر وچ حکومت دی پوری مشینری نوں ایہ ہدایت سی کہ اوہناں دا صرف اکوای کم اے کہ اوہ رعایا کولوں حکمراناں دے فیدے لئی مال دولت اینٹھ لیں۔ عوام الناس دی بھلیائی لئی حکمرانی دا کوئی تصوری نہیں سی تے نہ ای ایہ کہ سماج وچ عوام دی تھان، یاں ریاست دے مادی وسائل نوں بہتر کیتا جاوے یاں اخلاقی حالت تُوں سنواریا جاوے۔ ایہ اک اجہی غیر ملکی عملداری سی جہڑی ڈنڈے نال قائم ہوئی سی تے جہوں رعایا نال رتی بھوراوی ہمدردی نہیں سی۔“

دراصل رومیاں دے زیر نگین حکومتاں دی کوئی قانونی حیثیت نہیں سی تے نہ ای اپنی ریاست وچ نظم و ضبط دے معاملے وچ اوہ آزاد سن۔ اوہ تے اوس اوٹھنی ورگیاں سن جہڑی دُدد دیندی اے تے بھاروی ڈھونڈی اے پر ایہدے بدلے وچ اس نوں صرف اسنہے کو پٹھے لہدے نیں جنے کو اوہدی کنڈ نوں بھار چکن لئی طاقت دتی رکھن تے اوس دے تھناں نوں دُدد نال بھری رکھن۔

حجاز وچ اقتدار دی کھچا تانی:

ایہ گل ہمیش ای منی گئی اے کہ مکے وچ انسانی وسوں حضرت اسماعیل علیہ السلام تُوں شروع ہوئی۔ آپ ساری حیاتی مکے دے سربراہ تے بیت اللہ دے متولی رہے۔ ۱۳۷ ورھیاں دی عمر وچ جدو جہد فوج ہوئے تے آپ دے دو پتر نابت تے قیدار اگر کچھڑ مکے دے والی بنے۔ ایس گل دا البتہ پتا نہیں لگ سکیا کہ پہلوں نابت نے اقتدار سنبھالیا یاں قیدار نے۔ فرانسیسی مورخ ڈاکٹر لی بان بس ایہ گل لکھدا اے کہ اسماعیل دی اولاد فلسطین دیاں سرحدیں تُوں لے کے حجاز تیکر آباد ہوئی تے اوہ ہی

ع مبارک پوری، صفی الرحمن، الرحیق المختوم، صفحہ ۴۸۔

کرد، علی محمد، خطاط الشام، جلد اول، صفحہ ۱۰۱، بحوالہ ندوی، ابوالحسن علی، ۱۹۸۲ء، صفحہ ۲۶۔

کے دے پہلے حاکم بنے۔ بہر حال اوہناں توں بعد اوہناں دے نانے یعنی حضرت اسماعیل علیہ السلام دے سوہرے مضاض بن عمرو جُرمی نے مکے دی تولیت سنبھالی تے ایوں مکے دی سربراہی بنو جُرمی ول ٹر گئی۔ حضرت اسماعیل چونکہ بیت اللہ دے معمار تے اوس دے بانی، تے معمار دے پتر وی سن ایس لئی اوہناں دی اولاد دی عزت تے وقار وچ کوئی گھٹا تے نہ آیا پر جے سیاسی حوالیاں نال ویکھیا جاوے تے اوہناں دا حکومتی اختیار وچ کوئی حصا وی نہیں سی۔ ایوں حضرت اسماعیل دی اولاد وچوں دس (۱۰) پتر تے چھیتی نال ای، تے دو جہناں نے حکومت کیتی کجھ چراں بعد گم نامی دی نذر ہو گئے۔

دُجے پاسے بنو جُرمی دی طاقت دا وی جنازہ نکلتا شروع ہو گیا تے مکے دے سیاسی آسمان تے بنو عدنان دا تارا جگمگان لگ پیا۔ فیر ۵۸۷ قبل مسیح وچ جدوں بخت نصر نے مکے تے دو جا حملا کیتا تے بنو عدنان بچج کے یمن ٹر گئے تے جاندے ہوئے عدنان دے پتر معد بن عدنان نوں وی اپنے نال لے گئے۔ کچھ جدوں بخت نصر دا زور ٹپا تاں معد بن عدنان مکے پرت آیا۔ اوہدوں تیکر مکے وچ بنو جُرمی دا صرف اک بندہ ای باقی سی جہداناں جرہم یا جرہم بن جہمہ سی۔ معد نے اوس دی دھی معانہ نال ویاہ کر لیا جہدے وچوں اوہناں دا پتر نزار جمیا۔ ایس توں کجھ چر بعد مکے وچ بنو جُرمی دی حالت خراب ہوندی گئی۔ بھکھ ننگ توں تنگ پئے تے اوہناں نے بیت اللہ دے زائرین تے زیادتیاں شروع کر دتیاں تے خانہ کعبہ دا مال کھان توں وی دریغ نہ کیتا۔ بنو عدنان اندر رکھاتے اوہناں دیاں علتناں تے کڑھدے رہندے سن۔ ایہو جے حالات توں کسے تیجے گھر دا فیدا چکنا کوئی چوکھی وڈی گل نہیں ہوندی۔ استھے وی ایوں ای ہویا۔ جدوں بنو خزاعہ نے مرالظہر ان وچ ڈیرے لائے تے ویکھیا کہ بنو عدنان، بنو جُرمی توں گڑ دے نیں تے اک طرحاں دی خانہ جنگی والی صورت حال بنی ہوئی اے تے اوہناں (بنو خزاعہ) نے اک عدنانی قبیلے بنو بکر بن عبد مناف بن کنانہ نوں نال گنڈھیا تے بنو جُرمی نال سدھے ہو پئے تے اوہناں نوں مکے وچوں کڈھ کے ای ساہ لیا۔ ایوں ایہ مکے دے حاکم بن گئے تے ایس حکمرانی وچ اوہناں نے بنو بکر نوں کوئی حصا نہ دتا۔ ایہ گل دو جی صدی عیسوی دے وچکار دی اے۔

بنو خزاعہ ہر آؤندے دِن اپنی طاقت نوں ودھاندے گئے تے حکمرانی دے گر سکھدے رہے۔ اوہ مکے دے بلا شرکت غیرے حکمران سن پرتن ٹکاویں منصب اچھے سن جہڑے مضری قبیلیاں دے حصے وچ آئے۔ جہڑے ایہ سن:

۱۔ حاجیاں نوں عرفات توں مزدلفہ لے جانا تے یوم النفر یعنی ۱۳ ذی الحج نوں جہڑا حج دے سلسلے دا آخری دیہاڑا ہوندا اے منی توں روانگی دا پروانا دینا۔ ایہ وڈھیا ئی دی گل الیاس بن مضر دے خنوادے بنو غوث بن مرہ دے حصے آئی جہڑے صوفہ اکھواندے سن۔ اوہناں دے ایس اختیار پاروں کوئی حاجی ۱۳ ذوالحج نوں کنکری نہیں سی مار سکدا جدوں تیکر صوفہ دا کوئی بندہ کنکری نہیں سی مار لیندا تے فیر جدوں حاجی پچھانہ مژن دا ارادہ کردے تاں صوفہ دے لوکی منی دے ککے راہ تے گھیرا پا کے کھلو رہندے تے جد تیکر اوہناں دے سارے جی لگھ نہ جاندے، کسی نوں اوس راہ تے پیر نہ پٹن دیندے۔ جدوں صوفہ مُک گئے تے ایہ اعزاز بنو تمیم دی اک لڑی بنو سعد بن زید مناة ول ٹر گیا۔

منصور پوری، سلمان، قاضی محمد سلیمان، رحمت اللعالمین، جلد دوم، صفحہ ۵۳۔

مبارک پوری، صفی الرحمن، الرقیق المختوم، صفحہ ۴۹۔

۲۔ اذی الج نوس وڈے ویلے حاجیاں نوس مزدلفہ توں منی ول ٹورن داکم بنوعدوان کول سی۔

۳۔ حرام مہینیاں نوس اگے کچھ کرن دا اعزاز بنوکنانہ دی اک لڑی بنوتمیم بن عدی نوس حاصل سی

مکہ تے بنو خزاعہ دا اقتدار کوئی تن سوورھے رہیا۔ ایس زمانے وچ عدنانی قبیلے مکے سگوس پورے حجاز وچوں نکل کے نجد، حیرہ تے بحرین دے علاقیاں وچ کھلر پلر گئے تے مکے دے آل دوالے صرف قریش دیاں چند لڑیاں باقی رہ گئیاں جہڑے خانہ بدوشی دی حیاتی گزار دے سن۔ اوہناں دیاں وکھو وکھو لولیاں ہوندیاں سن۔ اوہتھے بنوکنانہ دے وی کچھ گھرانے سن پر مکے دی حکومت یاں بیت اللہ دے کماں کاراں وچ اوہناں دا کوئی دخل نہیں سی۔

جہناں دنوں وچ مکے دا والی حلیل بن حبشہ خزاعی سی، مکے وچ اک بال جمیا چھنے حجاز دی سیاسی تواریخ نوس اک نواس موڑ دتا۔ ایہ بال اچے ماں دے کھڑا می سی تے اوس دا پوچلانا کر گیا۔ اوس دی ماں نے بنوعذرہ دے اک بندے ربیعہ بن حرام نال ویاہ کر لیا۔ ایہ قبیلہ شام دے چار چغیرے وسوں کیتی بیٹھاسی، ایس لئی اوس نویں جے بال دی ماں نوس وی اوسے علاقے ول جانا پے گیا۔ ایہ گل دس دی لوڑ نہیں کہ اوس بال نے وی ماں دے نال ای رہناسی تے نال ای رہیا۔ ایہ جدوں جوان ہو یا تاں اپنے وطن مکے واپس پرتن دا سوچن لگ پیا۔ ماں دی ہدایت پاروں اوہ پہلی وار مکے جج دے دنوں وچ اپنے قبیلے قضاہ دے حاجیاں نال آیا۔ مکے وچ وسدے اوس دے قبیلے دے لوکاں نے اوس دے شرف تے اوس دی تھان نوس پچھتا تے اوس نوس اپنا وڈامن کے اپنا سردار بنالیا۔ جدوں اوس نے اپنا کلا گڈھ لیا تے والی مکہ نوس اوس دی دھی حمی نال نکاح داسنیہا گھلیا۔ حلیل نوس اوہ چنگا لگاتے اوس نے حمی دا ویاہ کر کے اوس جوان نوس اپنا جوائی بنالیا۔ ۱۱۔ اوہ جوان زیدی جہڑا تواریخ وچ قصی بن کلاب دے ناں نال مشہور ہو یا۔ حلیل دے مرن تے مکہ تے بیت اللہ دی تولیت لئی بنو خزاعہ تے بنو قریش دے وچکار جنگ چھڑ گئی۔ جنگ وچ قریش دا پلڑا بھارا رہیا تے ایوں حجاز دے ایس وڈے سیاسی تے مذہبی مرکز تے قصی بن کلاب دا قبضہ ہو گیا۔ ایہ گل ۴۴۰ء دی ہے۔

قصی بن کلاب نے مکے دی سیاسی تے انتظامی شکل ایہ بنائی کہ قریش نوس مکے دے چار چغیر یوں اکٹھا کیتا تے پورا شہر اوہناں وچ ونڈ دتا۔ ہر خنوادے دے رہن بہن دا ٹھکانا مقرر کیتا تے ایوں اوہناں نوس حکومتی معاملیاں وچ رلت دا احساس دوا یا۔ قصی نے آل صفوان، بنوعدوان تے بنومرہ بن عوف نوس اوہناں دے منصبان تے قائم رکھیا کیوں جے اوہ سمجھداسی کہ ایہ دین دا اک اوہ حصا ہے جہنوں چھیڑنا چنگی گل نہیں۔

قصی دا اک کارناما ایہ وی ہے کہ اوس نے حرم کعبہ دے شمال ول دارالندوہ تعمیر کیتا جہڑا اصل وچ قریشیاں دی پارلیمنٹ سی تے سارے وڈھے تے ضروری فیصلے اوہتھے ای ہوندے سن۔ قریش اُتے دارالندوہ دے بڑے احسان نیں کیوں جے ایہ اوہناں دے اک مٹھ ہون دی علامت تے اوہناں دیاں اوکڑاں نوس سوکڑاں وچ بدلن دا گڑھ سی۔

۱۱۔ ابن ہشام، سیرت النبیؐ، جلد اول، صفحہ ۴۴۔

۱۲۔ ابن ہشام، سیرت النبیؐ، جلد اول، صفحہ ۱۱، ۱۱۸۔

قصی داوڈا پتر تے عبدالدار سی پر عز و شرف دے حوالیاں نال ویکھیا جاوے تے دو جا پتر عبدالمناف ای وڈا سی۔ قصی لپے گیا تے اوس نے سوچیا کہ وڈے پتر عبدالدار دے ہتھ کسے شے دانہ ہونا ماڑی گل اے۔ اوہ اوس ماڑے پتر نوں عبد المناف دے ساویں کرن دا آہر کر دیاں ہر شے ای اپنی حیات وچ عبدالدار نوں دیندا گیا جہدے وچ کعبہ دی کلید برداری، سقایت تے رفادت وگے وڈے کم وی شامل سن۔ رفادت یاں رفادہ اک اجیا کم سی جس وچ سارے قریش کولوں اک سالانا ٹیکس لیا جاندا سی جہد اقصی کول اکٹھا ہوندا سی تے اوس نال حاجیاں دے روٹی ٹکر داسر بندھ کیتا جاندا سی تے راہ دا خرچا پانی وی دتا جاندا سی۔ ایس بھلے کم دا مڈھ قصی نے اوس ویلے بنھیا سی جدوں اوس نے بنو خزاعہ نوں مکے توں باہر کڈھ دتا سی۔ رفادہ دا مڈھ بنھ دیاں اوس نے قریش نوں اکٹھا کر کے اپنے خطاب لئی تیار کیتا تے آکھیا:

”قریش دے بھائیو! تسبی اللہ دے گوانڈھ رہن پاروں اوس دے اہل بیت جے تے اوس دے دھرم تھان دے وسنیک جے۔ اتھے آؤن والے حاجی اللہ دے پروہنے نیں تے اوس دے گھر دی زیارت لئی آؤندے نیں۔ اوہناں دی مہمان داری راضی خشی تے آرام نال کرنی چاہیدی اے۔ ایس پاروں اوہناں دے اتھے رہن تیکر اوہناں دے کھان پین دا بندوبست کرنا ساڈے سبھناں لئی ضروری اے۔“

ایوں ایس محکمے دا مڈھ بچھیا تے فیر ایس دا چارج کجھ روایتاں موجب قصی دی وصیت پاروں تے کجھ موجب اوس دی اپنی حیاتی وچ ای عبدالدار نوں مل گیا۔ قصی دے کسے کم دی مخالفت دا او دوں کوئی سوال ای پیدا نہیں سی ہوندا، ایس لئی سبھ نوں چپ لگ گئی پر جدوں قصی توں بعد اوس دا سیانا پتر عبدالمناف وی مر گیا تے قصی دے پوترے آپس وچ لڑپے تے عبد مناف دے پترانے تائے، تے تائے دے پترانے (عبدالدار دی اولاد) کولوں اقتدار وچ اپنا حق منگیا تے چارے بھر اوں ہاشم، عبد شمس، مطلب تے نوفل نے تائے عبدالدار کولوں بیت اللہ دیاں چابیاں لین دا اٹھا تھ لیا۔ ایوں مکے دے قریش دو ٹولیاں وچ ونڈے گئے جہدے آپا اپنی تھان ٹکڑے تے جوڑ دے سن۔

بنو عبدالدار تے بنو عبدالمناف نے پورا ٹل لا کے لڑائی دیاں تیاریاں چھوہ دتیاں۔ بنو عبدالمناف نے بنی زہرہ، بنی اسد، بنی تمیم تے بنی حرث دے قبیلے وی اپنے نال گنڈھ لئے تے رل کے لڑن مرن دا حلف وی چکیا۔ دو جے بے ایوں دے حلیف بنو عبدالدار نوں وی لہجے گئے جہدے بنی خزوم، بنی سہم، بنی نج تے بنی عدی ابن کعب سن۔ نیڑے سی پی چنگا تواریخی جوڑ پیندا پر رب نوں ایس کرماں والے شہر دی بھلیائی منظور سی تے ایوں دوواں دھراں دے دلاں وچ صلح تے آرام چین نال مسئلے عبیرن دی گل پادتی۔ رب نے کیتا تے مصعباں دی ونڈ تے صلح ہو گئی تے ایوں سقایت تے رفادت بنی عبدالمناف دے حصے تے دار الندوہ دی سربراہی، لواء تے حجاب بنو عبدالدار دے حصے آئی۔

جدوں عبدالمناف نے اپنے حصے دے مصعباں دا قرعہ کڈھیا تے اوہ ہاشم بن عبدالمناف دے ناں دانگلیا۔ ایس پاروں ہاشم نے ای ساری حیاتی سقاویہ تے افادہ دا انتظام کیتا پر جدوں ہاشم ہو ریں چلانا کر گئے تے ایہ کم مطلب دے حصے

آگئے۔ تے فیر اوہناں توں بعد ایہ منصب اوہناں دے بھتیجے (ہاشم دے پتر) عبدالمطلب نوں نصیب ہوئے۔ ایہ ادہ عبدالمطلب نیں جھپڑے ساڈے آقا و مولا تے روز محشر میرے جے مجرماں دی شفاعت دا حق پان والے نبی آخری الزماں حضرت محمد a دے داداسن۔ حکومتی معاملیاں وچ قریش نے باقی قبیلیاں نوں وی پوری رلت دا احساس دوا یا سی۔ اوہناں دے انتظامی ڈھانچے دی شکل اج دے پارلیمانی جمہوری نظام ورگی نظر آؤندی اے۔ ضروری محکمیاں دیاں وزارتیں دی ونڈ کجھ ایوں سی:

۱۔ ایسار: قسمت دا حال جان لئی بتاں کول جھڑے تیر رکھے ہوندے سن اوہناں دا حساب کتاب تے ورت ورتا رہنوج کول سی۔

۲۔ محکمہ مالیات تے عدلیہ: بتاں دی رضا تے قرب حاصل کرن لئی جھڑے نذرانے تے چڑھاوے چڑھائے جاندے سن اوہناں دا انتظام تے جھگڑیاں یاں دیوانی مقدمات دا فیصلہ کرن دا حق بنو سہم کول سی۔

۳۔ شوری: ایہ منصب بنواسد کول سی۔

۴۔ اشناق: یعنی دیت یاں جرمانے وغیرہ، ایس منصب تے بنو تیم فائز سن۔

۵۔ عقاب: یعنی قومی پرچم دی علمبرداری، ایہ اُمیہ دا حصہ سی۔

۶۔ قبہ: یعنی فوجی کمپ دا انتظام تے سپہ سالاری، ایہ بنو مخزوم دا حصہ سی۔

۷۔ سفارت: سفارتی امور دے انچارج بنو عدی سن



یثرب

مدینہ منورہ جہڑا بن رحمت اللعالمین دا شہر ہون پاروں مشہور اے، پہلوں وی حجاز دے دو بے مشہور شہراں مکہ تے طائف و انگ مشہور سی پر اوہدوں ایہ یثرب دے ناں نال جانیا جاندا اسی۔ ایہ مکہ معظمہ توں شمال ول شام دے رستے وچ کوئی ڈھائی سو میل دے پندھ تے ہے۔ سمندر توں ۸۵ میل دافا صلہ اے تے سطح سمندر توں تقریباً ۲۰۵۰ فٹ (۶۲۵ میٹر) دی اچائی تے ہے۔ ایس شہر نوں تن پاسیوں حجاز دے پہاڑی سلسلے نے گھیریا ہویا اے پر مشرق ول پدھرے راہواں توں شہر ول ودھن دے کئی سارے رستے لہجہ دے نیں۔ پہاڑی سلسلے وچ سبھ توں اچی پہاڑی احدا اے جیہڑی ۲۰۰۰ فٹ اچی اے۔

محمد عربی a دے دیوانیاں نوں کمال کر دین والی ایس سوئی دھرتی اُتے سب توں اگدیں کئے و سوں کیتی، یقین نال کجھ نہیں آکھیا جاسکدا۔ تحقیق وچ اج دا اک معتبر ذریعہ (Source) انسائیکلو پیڈیا آف بریٹانیکا آکھدا اے کہ ’’اتھہ اک نگا جہا نخلستان سی تے خورے ۱۳۵ عیسوی وچ فلسطین وچوں کڈھے ہوئے یہودیوں نے ایس نوں آباد کیتا۔‘‘ پر ایہ گل ٹھیک نہیں تے ایوں جا پدا اے کہ ایہ شہر ۲۲۰۰ قبل مسیح وچ آباد ہوئی، کیوں جے ۲۱۸۹ ق م وچ، جد حضرت اسماعیل اے اپنی والدہ دے لُچھڑا سی، مکہ گئے تے قبیلہ بنو جرہم او تھے داوسنیک سی تے قبیلہ یاں قوم عمالقه داناں وی کدھرے کدھرے سنیا جاندا سی۔ بھاویں عمالقه دا اصل وطن یمن سی پر انہاں دے ای اک بندے یثرب نے سبھ توں پہلے اتھہ ڈیرا لایا۔ اوس دے پیو دا ناں عمیل یاں قانیہ سی۔

مدینہ اپنیاں ہریاں بھریاں وادیاں پاروں کئی قوماں دی ٹھاہر بنیا رہیا اے۔ ہرنویں آؤن والے نے جے اوہ زور اور سی تے پہلے پیٹھیاں نوں کٹ کڈھیا۔ پر جہناں لوکاں نے او تھے پیر پیڈھے کر کے کڈھے اوہ دوویں بھرا اوس تے خورج سن جیہناں دی اولاد اسلام دا سورج چمکن تیکر موجود رہی۔

کدے ایوں وی جا پدا اے کہ یثرب توں اگدیں وی او تھے کوئی نگر و سدا سی۔ کیوں جے تواریخ وچ اک ناں سلح وی لہجدا اے۔ قیاس کیتی جاندی اے پئی ایہ سلح اصل وچ یثرب والی تھاں تے ای کوئی آبادی سی۔ توریت وچ کئی تھاواں تے مدینہ دا ذکر ایسے ناں نال کیتا گیا اے۔ سلح مدینہ دے اک پہاڑ داناں وی اے جہڑا جوف مدینہ دے وچکار اے۔ ایس دے دامن وچ پرانے ویلیاں دے کھنڈر تے ٹوئے بے عہد رسالت تیکر نظریں پیندے سن۔ مسجد نبوی جس تھاں تے بنائی گئی سی او تھے وی اچھیاں نشانیاں موجود سن۔ سلح یاں صلح جہنوں سلاخ یا صلاخ وی لکھیا پڑھیا جاندا اے، داخرج اکوای ہے۔ ایہ عبرانی بولی دا اکھر ہے۔ عربی وچ اوس دا وانا ندرا (مترادف) رقیم ہے جیہنوں یونانی پیٹرا آکھدے سن۔ حجروی اوسے نوں آکھدے نیں۔ سلح، صلاخ، رقیم، جھریاں پیٹرا دا مطلب پتھر اے پر حجاز وچ ایس توں قریہ، لہتی، وستی، آبادی،

ڈیریاں وسوں دی کوئی وی دوجی تھاں مرادئی جاندی اے ۛ
کندا:

قبائلی تے بدوی ایہ شاہی اسلام توں پہلے دے دور وچ یمن جیہاں منظم سلطنتاں توں وکھری دس دی سی۔ ایس دے بادشاہ اپنے نال جڑ دے قبیلیاں نوں اپنے ذاتی ٹور پٹے نال مطیع کیتی رکھ دے سن۔ تیجی صدی عیسوی دے اک کندا بادشاہ دی قبر بخران توں عرب دے مشرقی ساحل دے تجارتی رستے وچ ملی اے تے اوس توں پتا لگدا اے کہ او تھے ایس بادشاہ دا گڑھ یاں دارالحکومت ہووے گا۔ جے کرسبائی حکمراناں تے ڈونگھی جھاتی پائیے تے پتا لگدا اے کہ اوہناں دا کندا بادشاہت نال کسے نہ کسے طرحاں تعلق رہیا اے، کدے دشمنان والا تے کدھرے بھناں والا۔ ورت ورتاء دا ایہ دور ۶ ویں صدی عیسوی دے مڈھلے ورھیاں تیکر دسدا اے۔ فیر کندا رعایا دی تے شاہی خانہ جنگی پاروں تے کجھ مکے دے قریشیاں دی ودھدی طاقت پاروں مک شک گئے۔ عرب د امشہور شاعر امراء القیس کندا بادشاہت دی اخیر نشانی سی۔ ۛ

باقی آل دوالا:

عربستان دی سیاسی تواریخ اوتھوں دیاں دو وڈیاں نسلاں قحطانی تے عدنانی دے ذکر بناں ادھوری رہ جاندی اے۔ پورا ملک عرب ایہناں دونسلاں وچ وٹیا دسدا اے۔ جہڑے قبیلے حیرہ دے آل دوالے دس دے سن اوہناں نوں حکومت حیرہ دی ماتحتی وچ منیا گیا تے جہڑے بادیہ العشام دے وسنیک سن اوہناں نوں غسانی حکمراناں دے تابع سمجھ لیا گیا، پر ایہ ماتحتی یاں رعیت نری ناں دی سی، تے اصل گل کجھ ہور ای دس دی سی۔ جویں اُتے ذکر کیتا گیا اے ایہناں دو تھاواں نوں چھڈ کے عرب دے ہر پاسے وسوں کیتی بیٹھے قبیلے اپنے کماں کاراں تے سیاسی حوالیاں نال آزاد تے خود مختار ای سن۔ سرداری نظام بہر حال اپنی پوری طاقت نال اپنا آپ منواندا دسدا اے۔ قبیلے اپنا سردار آپوں مقرر کر دے سن۔ ایہناں سرداراں لئی اوہناں دا قبیلہ اک نکی جہی حکومت دا درجا رکھدا سی تے ایہ اج دی جدید پولیٹیکل سائنس دی اصطلاح وچ وی اک مکمل ریاست (State) ہوندی سی۔ اپنی سیاسی اکائی نوں قائم دائم رکھنا تے ایس دی حفاظت کرنا قبیلے دیاں ساریاں لڑیاں (Branches) دی سانجھی ذمے داری ہوندی سی۔

قبائلی سرداراں دا درجا اپنی قوم وچ بادشاہواں وانگ سی۔ قبیلہ صلح یاں جنگ دے مسئلے تے اپنے سردار دے فیصلیاں دا پابند ہوندا سی تے کسے وی طرحاں دے حالات وچ اوس توں اڈتے وکھرا نہیں سی رہ سکدا۔ سردار دے اختیار دی جے کرگل کریئے تے اوہ کسے وی مطلق العنان بادشاہ نالوں گھٹ نہیں سن ہوندے، سگوں اج دی ڈکٹیٹر شپ وی اوس توں کچھ دس دی اے۔ ایہتھوں تیکر کہ جے کراوہ وگڑ جاندا تے ہزاراں تلواراں ایہ گل پچھیاں بنا بے نیام ہو جاندیاں کہ سردار دی ناراضی یاں غصے دی وجہ کیہ اے۔ دو جے پاسے سردار لئی ایہ گل وی ضروری ہوندی کہ اوہ سخی، دلیر تے غیرت مند ہووے،

عہ نقوش، رسول نمبر، جلد دوم، صفحہ ۴۲۴۔ مضمون ”مدینہ کی قدیم تاریخ“ توں ماخوذ

کیوں جے لوکائی دیاں نظراں وچ اچی تھاں بنان لئی ایہ صفتاں، ڈھیر ضروری سن۔ فیراوس زمانے دے شاعر جیہڑے قبیلے دی زبان یا بلار ہوندے سن اوہ وی اپنے سردارنوں دجیاں توں اُچا تے سرکڈ ہواں ویکھنا چاہندے سن تے نالے ایس گلنوں پسند کردے سن کہ جھڑی صفت اوہ اپنے کلام وچ دسن اوہ سچ مچ اوہناں دے سردار وچ اُگھڑ دی نظر آؤنی چاہیدی اے۔

جزیرۃ العرب دے سرحدی علاقیاں دی وی سیاسی حالت کوئی ایڈی چنگی نہیں سی۔ اوہ تھے ڈاہڈا وگاڑ، انتشار تے بے چینی لہدی سی۔ لوکائی صرف دو حصیاں وچ ونڈی ہوئی سی، اک مالک تے دو جا غلام۔ آزادی، حریت یاں جمہوریت دا کوئی چت چیتا وی نہیں سی۔ وسائل اتے زور اوراں تے تلواراں والیاں دا حق سی۔ تے ایس توں وکھ جہڑا طبقا نظر آؤندا اے اوس نوں غلام توں ہٹ کے کوئی دو جاناں نہیں دتا جاسکدا۔ رعیت یاں لوکائی اک اجہی پئیلی سی جہدے وچوں جو وی اگدا سی اوہ صرف طاقت ور حاکماں یاں سرداراں لئی سی۔ حکومت دے محاصل تے آمدنی وڈکیاں دی عیش پرستی، سواداں یاں شہوت رانی لئی ہوندے سن تے لسیاں تے ماڑیاں دا اوس تے کوئی حق نہیں سی ہوندا۔ اوہ صرف ظلم دی چکی وچ پسدے سن تے چوکھا مہین (باریک) پسدے سن پر جیہڑے شکوے دے کوئی اکھ لیاں دا مطلب ایہ ہوندا سی پئی جیہڑے ہمیش لئی چپ دے جنڈرے لوالوے۔



عالم بشریت اسلام توں اگدیں

وَلَنُؤْتِيَنَّ رَبِّ:

ایس کائنات دے خالق و مالک نے، کائنات دی تخلیق داسبب بن والی ہستی نوں دنیا تے ظاہر فرمان دا جہڑا ویلا مقرر کیتا ہو یا سی اوس ویلے دی حالت دا رب نوں ڈاڈھا سوہنا پتاسی۔ اوہ بنا شبا چنگی طرحاں جان داسی بھی عیسیٰ توں صرف پنج چھ صدیاں بعد ای شریعت عیسوی دا جنازا نکل جائے گا تے رب سوہنے دی واحدانیت دا تصور اصلوں ہی باطل ہو جاوے گا۔ اوس نوں پتاسی کہ لو کائی شرک دے انھے کھوہ وچ ڈگ پوے گی تے دنیا تے آساں امیدیں دا مرکز تے محور، تے نالے آخرت دیاں اوکڑاں توں جند چھڈان دی کنجی اک تے کئے رب دی ذات نہیں سگولں بت خانیاں وچ دسدی ”بھل“ بن جاوے گی۔ ایسے پاروں اوس نے اپنے محبوب دا دنیا اُتے ظہور اودوں فرمایا جدوں ایہ بکھیڑے اپنی انت تے اپڑ گئے سن۔ توحید دا اوہ درس جہڑا پورے سلسلہ پیغمبری دا مدعا تے مقصد سی اوس توں اکھاں بند کر لیاں گئیاں سن تے شرک دا اوہ گناہ جہوں سبھ توں چوکھانا پسند کیتا گیا تے جس دیاں جڑاں پٹن لئی اک لکھ تے چوی ہزار پیغمبر گھلے گئے، اوہ شرک اک وار غیر پوری طاقت تے پوری کراہت نال اپنی کوڑھی شکل وچ موجود سی۔ بُت پرستی ایڈی عام تے فخر دے لائق سمجھی جاندی سی کہ ہر قبیلہ اپنے صنم تے اپنے معبود وکھرے رکھن تے دکھری پوجا کرن وچ ای وڈیائی سمجھدا سی۔ بتاں توں وکھ پہاڑ، درخت، اگ، پانی، ہوا، اعضائے جنسی تے حیواناں دی وی پوجا کیتی جاندی سی۔ ٹوٹم پرستی تے اکابر پرستی دی شرک دیاں اہجیاں قسماں سن جہناں نے انسانیت نوں مدھول کے رکھ دتاسی۔

تعب اے کہ پہاڑاں دی پوجا محض ایس لئی کیتی جاندی سی کہ پہاڑاں دی وجہ توں مینہ پیندا سی۔ اوہناں وچوں دریا نکلدے سن تے اوہ زمین نوں زرخیز بناندے سن۔ ہندوواں لئی کیلاش پرست، یہودیاں لئی کوہ صیوں تے عیسائیاں لئی کوہ طور بڑے ای مقدس سن۔ بابل دے لوکی بہشتی درخت دی نقل بنا کے اوس دی پوجا کردے سن۔ عیسائیاں وچ ایس رسم دی شکل کرسمس ٹری تے اج وی موجود ہے۔

عناصر اربعہ وچوں سبھ توں چوکی پوجا اگ دی ہوئی اے۔ اگ نوں زمین اُتے سورج دا نمائندہ سمجھیا جانداسی۔ قدیم ہند دے آریہ لوکی اگنی نوں سبھ توں وڈا دیوتا من دے سن۔ پارسی زمانہ قدیم توں ای آتش پرست رہے۔ یونان دے ہر شہر وچ اک وڈا آتش کدہ ہونداسی۔ جتھے دن رات اگ روشن رہندی سی۔ اٹلی وچ وی ایہہ رواج سی جتھے اگ دی دیوی دانان ویٹاسی۔ اگ توں بعد پانی وی معبودی مان دار ہیا۔ اہل مصر نیل ندی نوں دیوتا من دے سن جسدا ناں ”ہانی“ سی۔ عراق وچ پانی دے دیوتا دی پوجا ہوندی سی۔ ہندو وچ وی گنگا جل نوں مقدس سمجھدے نیں تے دریائے سرسوتی دی دیوی نوں علم

تے فن دی مربی دے ناں نال یاد کر دے نیں۔ ایہناں معبوداں نوں راضی کرن لئی کئی ویلے ایجے وی آئے کہ زندا انساناں نوں دریاواں دیاں لہراں دی نذر کر دتا۔ ہوا دی پوجا بھاری گھٹ ہوئی اے پر بعض قوماں وچ ہوا دے دیوتا دا ذکر وی ملدا اے۔

جاہلیت دے انھیریاں وچ لوکائی کچھ ایویں وی ٹکراں مار دی دس دی اے کہ جنسی اعضاء دی وی پوجا کیتی گئی کیوں جے ایہ حصول لذت تے نسل دی بڑھوتری دا ذریعہ نیں۔ ایسے پاروں ایہناں نوں ڈاڈھی اہمیت دتی گئی تے مصر، عراق، ہندوستان، یونان تے روم ورگیاں تہذیبیاں وچ ایہ جنسی اعضاء پوجا پاٹ دا مرکز بنے رہے۔

حیوان پرستی وی دور جاہلیت دا حصہ اے۔ ایہ عقیدہ موجود رہیا اے کہ مردیاں دیاں روحاں حیوانی قالب وچ چکر لاندیاں نیں تے ایویں انسان تے حیوان دے مرکب دیوتا پیدا ہو گئے۔ مصر تے ہندوستان ایسے معبود دے پجاریاں دے مرکز رہے۔ مصری ہاتھی تے شیر دی عام پوجا کر دے سن۔ مصر وچ اک چوکھا شرمناک پہلوا ایہ رہیا کہ عورتاں اپنے آپ نوں مقدس جانوراں لئی پیش کر دیندیاں سن۔

Totemism یاں ٹوٹم پرستی وی ڈنگراں دی پوجا دی ای اک قسم اے۔ شمالی امریکہ دی اوجیوا (Ojibwa) قوم اپنے مقدس جانوراں نوں ٹوٹم آکھدی سی۔ ایسے دارواج شمالی امریکہ توں وکھ افریقہ، آسٹریلیا تے ہندوستان وچ وی رہیا۔ ڈھور ڈنگرتوں وکھ رکھ، پودے یا کچھ دوجیاں چیزیں وی ٹوٹم دا درجا حاصل کر لیندیاں سن۔ فیرجدوں انسانی نسل نے ترقی دیاں کچھ منزلاں طے کیتیاں تے معاشرہ، ریاست یاں اقتدار اعلیٰ جے اداریاں دا وجود عمل وچ آیا تے دنیا دے تقریباً ہر خطے وچ طاقت دی پوجا دے تصور نے اک نواں رخ اختیار کیتا تے بادشاہواں، طاقتور حکمراناں تے بے رحم سپہ سالاراں دی ایجے ڈھنگ وچ پوجا شروع ہو گئی جیہوں پوجا نہیں آکھیا جاسکدا۔ پوجا دا ایہ تصور راج وی موجود اے۔ عرب وچ بت پرستی دا مڈھ خانہ کعبہ نال عقیدت دے پاک جذبات توں ایہ ای بجایا۔ ایسے عقیدت دی شکل ایویں وکھڑی کہ جدوں کوئی بندہ عارضی طور تے یاں اکامکا خانہ کعبہ توں دُریڈا ہوندا تے اوہ حرم دے مقدس پتھراں وچوں اک ادھا پتھر عقیدت پاروں تے برکت لئی اپنے نال لے جاندے۔ اپنے نویں ٹھکانے اُتے اپڑ کے اوہ اوس نوں کسے خاص تھاں تے نصب کر لیندا تے فیراوس دے آل دوالے اوویں ای طواف کر داجویں اوہ مکے وچ رہندا خانہ کعبہ دا طواف کر داسی تے اس پتھر نال خانہ کعبہ ورگی عقیدت محبت تے وابستگی دا اظہار کر دے۔

سبھ توں پہلوں جس بندے نے عرب وچ دین ابراہیمی دی شکل وگاڑ کے توحید دے منارے نوں توڑ سٹیا اوہ قبیلہ خزاعہ دا سردار عمرو بن ربیعہ لکھی سی۔ کعبہ دی تولیت پہلے حارث دے ذمے سی، پر جدوں عمرو بن ربیعہ لکھی مکے وچ آوے تے اوس نے ون سونیاں بولیاں بولدے قبیلیاں نوں نال لے کے حارث تے اوس دے خاندان نوں ایسے شان والے منصب توں محروم کر کے اپنا کلا گڈھ لیا۔ چھیتی ای اوہ بیمار پے گیا تے ویکھدیاں ای ویکھدیاں بیماری نے چوکھا زور پھڑ لیا۔ کسے سیانے نے مت دتی کہ ملک شام وچ البقا دی تھاں تے تنے پانی دا اک چشمہ اے، جے کراوہ اوس پانی نال نہالوے تے بیماری توں چھٹکارا مل سکدا اے۔ عمرو نے ایگل پلے نہ لئی تے البقا کوں کوچ کر گیا۔ رب نوں اوس دی بھلیائی منظور سی، اوہ

سچ مچ اوس چشمے دے پانی نال نہان توں بعد صحت مند ہو گیا۔ بیماری توں جان چھٹن توں پچھوں وی اوہ کجھ چراوس تھاں تے رہیا تاں جے جُستے دی طاقت پوری طرحاں اپنی اصل تھاں تے آ جاوے تے واپسی دے سفر دیاں اوکڑاں نال چنگی طرحاں نبڑ لوے۔

البقا وچ قیام دے دناں وچ اوس نے ویکھیا کہ اوس تھاں دے وسنیک بتاں نوں سجدے کر دے نیں تے اوہناں اگے اپنیاں مراداں لئی منتاں ترلے وی کر دے نیں۔ ایس طرحاں دیاں حرکتاں توں اوہ ایس توں پہلوں بلکل جانو نہیں سی۔ اوس دے دل وچ ایہ خواہش پیدا ہوئی کہ اوہ اوہناں دے وسنیک پجاریاں نوں ایس عبادت بارے پچھے تے کھوج لائے کہ اوہ بت کیوں اوہناں دے دلاں دیاں مراداں پوریاں کر دے نیں۔ اوس نوں دسیا گیا کہ اوہ معبود مینہ وساؤندے نیں تے نالے دشمن اُتے فتح حاصل کرن لئی اپنے پجاریاں دی مدد کر دے نیں۔ عمر و ایس گل توں بڑا متاثر ہوئی تے اوہناں کولوں پتھر دے کجھ معبود منگ وی لے۔ اوہناں نے عمر و دی ڈنگھی دلچسپی ویکھی تے کجھ مورتیاں اوس نوں نذرانے موجب دے دتیاں۔ اوہ پتھر دیاں مورتیاں نوں لے کے اکے آ گیا تے اوہناں نوں خانہ کعبہ دے آل دوالے رکھ دتا۔ ایہناں مورتیاں وچوں جس دانان توارخ نوں یاد رہیا اوہ ”ہبل“ اے۔ ہبل اک قیمتی پتھر عقیق نوں تراش کے انسانی شکل دا بنایا گیا بت سی۔ ایس دی ڈھیر عزت کیتی جاندی سی۔ اک واری ایس دا ہتھ ٹٹ گیا تے مکے دے قریش نے اوس نوں سونے دیاں تاراں نال گنڈیا۔ ایس دی زیارت لئی تے ایس توں مراداں منگن لئی دور نیڑے توں ہزاراں لوکی خانہ کعبہ آؤندے تے ایہ تسلی لے کے جاندے کہ ہبل اگے متھا ٹیکن توں بعد اوہناں دے دل دی مراد پوری ہوا ی جاوے گی۔

ایوں اوہ پہلا بندہ جنے خانہ کعبہ دی مقدس عمارت نوں شرک دی پلیدی نال آلودہ کیتا اوہ عمر و بن ربیعہ جی ای جانیا جاند اے۔ کجھ لوکاں دا ایہ وی خیال اے کہ اولاد اسماعیل وچ پہلا شخص جنے بت پرستی دی مکروہ رسم دارواج پایا تے لوکاں نوں اپنی اولاد دے ناں بتاں دے ناواں تے رکھن دی ہدایت کیتی تے رب دے دین وچ وگاڑ پیدا کرن دا مڈھ بنھیا، اوہ ہذیل بن مدرکہ سی۔ پورے عربستان وچ بت پرستیاں نے جویں اپنے اپنے رب تے معبود گھڑے ہوئے سن ایوں بعض علاقیاں تے قبیلیاں وچ مختلف مراداں حاصل کرن لئی مختلف معبود سن۔ مثلاً مینہ دی منگ لئی کوئی ہووے رب سی تے جنگ وچ دشمن تے حاوی ہون لئی کسے دو جے رب اگے نک رگڑیا جاند اسی۔ ایس توں وی ودھ دلچسپ گل ایہ ہے کہ ایہناں معبوداں دی بناوٹ وی ون سونت سی جہڑی کجھ ایوں سی:

- ۱۔ صنم: ایہ انسانی شکل وچ ہوندے سن تے لکڑیاں دھات دے بنے ہوندے سن۔
- ۲۔ وثن: ایہ وی بندے دی شکل دے سن پر پتھر تراش کے بنائے جاندے سن۔
- ۳۔ نصب: ایہناں دی کوئی خاص شکل صورت نہیں سی ہوندی۔ بس پتھر دے ٹکڑیاں نوں اگے رکھ کے اوہناں توں مراداں منگیاں جاندیاں سن۔ پتھر وچ جنی چوکی طبعی ندرت ہوندی، اوہناں ای عقیدہ وی پیڑھاتے پکا ہوند۔

لکڑ، دھات تے پتھر توں دکھ کچھ چھوٹے چھوٹے صنم آٹے دے وی بنائے جاندے سن، جہڑے لوکاں نے اپنے گھراں وچ عبادت لئی رکھے ہوندے سن۔
تیرے ایہ صنم خانے:

اج دے مغرب دے جدید جاہلاں نے حوادی بیٹی نوں بنکیاں کر کے جویں ایس دی پوجا شروع کیتی اے ایس دی مثال قدیم جاہل تہذیبیاں وچ وی نہیں لہدی۔ یورپ تے امریکا وچ Prostitution (طوائف) داطقتور ادارہ، میوزک شو، Peeping show تے حسن دے مقابلے اصل وچ اصنام دی پوجا دی ہی جدید شکل اے۔ فرق ایہ وے بھی قدیم جہلائے عرب اپنے صنم اپنے ہتھاں نال تراش دے سن پر جدید جہلائے غرب نے رب دی بنائی بڑی سوہنی تے قابل احترام مخلوق، عورت نوں صنم کدے وچ سجا لیا اے۔ اوہناں دے معبود دکھ دکھ ہوندے سن پر اج دے سارے جاہلاں دا معبود اکوای اے تے اوہ رب نہیں، عورت اے۔ عرب دے جاہل وی سونے دیاں تاراں نال اپنے معبوداں دی شان ودھاندے سن تے غرب دے جاہل وی سونے تے جواہرات نال اپنے صنم دی قدر ودھاندے دسدے نیں۔ عرب دے جاہل اپنے اصنام نوں راضی کرن لئی کچھ وی کرن لئی تیار رہندے سن، تے غرب دے جاہل وی اپنے صنم دے اک اشارے تے شاہی چھڈن دیاں مثالاں قائم کر چکے نیں۔ مغرب وچ (سگوں ہن تے مشرق وچ وی) ایہ صنم خانے تھاں تھاں دسدے نیں تے ایہناں دے پجاری دور نیڑے توں سفر کر کے بعض ویلے ہوائی سفر دا چوکھا خرچ برداشت کر کے ایہناں اصنام دی پوجا نوں اپڑ جاندے نیں تے ایہناں دی تفصیل اج دے کسے وی پڑھ لکھے بندے توں ڈھکی چھپی نہیں۔ آؤ اسیں عرب دے پرانے صنم خانیاں تے جھاتی پائیے۔

قبیلہ ہذیل، سواع نامی بت دا پرستاری۔ ایس بت نوں ہذیل قبیلے دے لوکاں نے مدینے دے نیڑے برہاط دے تھاں تے نصب کیتا ہو یا سی۔ ایس صنم خانے دی تولیت ایس قبیلے دی شاخ بنو لعیان دے سپرد سی۔
قبیلہ کلب دے صنم وڈسی تے اوہ اوہدے کولوں ای دل دیاں مراداں پوریاں کر دے سن۔ عرب دے مشہور قبیلیاں، مدجج تے اہل جریش دا بت یغوث سی تے ایہ دوویں اُسدے اگے ای متھارگر دے سن۔ وڈ، نال اوہناں لوکاں دی عقیدت دا اظہار ایس شعرتوں ہندا اے:

حیاک ودا فانالاً یحل لنا لھو النساء وان الدین قد عذ منا۔

ہمیش چونداریوں اوہ ود۔ تے بناشبہ ساڈے لئی ایہ گل حلال (تے جائز) نہیں کہ اسیں سوانیاں نال دل پر چاندے رہیے تے ساڈا دین تے بڑا پکا پیڈھا اے۔

قبیلہ ضیوان دے لوکی یعوق نوں اپنا نجات دہندا مندے سن۔ پراویں جا پدا اے کہ اوس دی ”خدائی“ ہولے ہولے بے اثر ہوندی گئی سی۔ ابن کلبی آکھدے نیں کہ اوہناں نوں کسے اچھے قبیلے دا ذکر نہیں ملدا جہناں نے اپنے ناں ایس صنم دے ناں تے رکھے ہون۔ ایس دی وجہ ابن کلبی ایہ دسدے نیں کہ ضیوان، ہمدان تے ایوں دے کچھ دو جے قبیلے صنعا دے نیڑے آباد سن تے اوہناں نے حمیر نال رل مل جان پاروں یاں تے یہودیت نوں قبول لیا سی یاں اوس توں چوکھا متاثر سن۔

ایس لئی اوہناں دی دلچسپی اپنے ایس صنم نال کجھ گھٹ گئی۔ ایویں دی کجھ صورت حال قبیلہ حمیر دی اپنے بت ’نسر‘ بابت وی سی۔ ایہ قبیلہ ہولے ہولے بت پرستی ترک کر کے دین موسوی وچ داخل ہو گیا سی۔ ایس توں پہلوں قبیلہ حمیر نے صناعا دے مقام تے اک صنم کدہ تعمیر کیتا ہو یا سی جہڑا ریام دے ناں نال پورے عرب وچ مشہور سی۔ لوکی اوس دی چوکھی تعظیم کردے سن۔ اوہتھے ڈھیر نذرانے چڑھائے جاندے تے لوک بتاں دی خوشنودی حاصل کرن لئی جانوراں دیاں قربانیاں دیندے۔ ایہ صنم کدہ مکر فریب دا اک وڈا گڑھ سی جتھے سادہ لوح لوکاں نوں اوہناں دے کمزور عقیدے پاروں مختلف ہتھکنڈیاں نال دھوکے دتے جاندے۔ اک روایت موجب جدوں تیج عراق دی مہم توں کامیاب ہو کے پچھانہ پریتا تے اوس نے دوند ہی راہنماواں دی مدد نال ایہ صنم کدہ ڈھوا دتا۔ ایسے پاروں قدیم عرب شاعری وچ ریام تے نسر دا کوئی ناں نشان نہیں لہدا۔

ایہ تیج بُت یعنی وڈ، سواع، یغوث، یعوق تے نسر، قوم نوح لئی چوکھے عزت دی تھان سن۔ اوہ ایہناں نال ڈھیر پریت لائی بیٹھے سن۔ ایہناں اگے اپنے عاجز تے ناچیز ہون دا اظہار کردے سن تے اپنے عبودیت دے جذبے دی تسکین لئی اوہناں ول ہی رجوع کردے سن۔ قرآن مجید وچ ایہناں بتاں دی پوجا دا ذکر ایوں کیتا گیا اے:

”نوح نے آکھیا اے میرے پالٹھار بنا شبہ لوکاں میری نافرمانی کیتی تے اوہناں دی پیروی کیتی جہناں دے مال تے اولاد نے اوہناں نوں گھائے توں دکھ کوئی شے نہیں دتی تے اوہناں نے بڑا وڈا مکر کیتا۔ تے اوہناں نے آکھیا تسیں اپنے معبوداں نوں نہ چھڈنا تے نالے نہ چھڈنا و دندوں تے نہ سواع نوں تے نہ یغوث نوں تے نہ یعوق نوں تے نہ نسر نوں۔ تے بے شک اوہناں نے چوکھیاں نوں گمراہ کیتا۔“ (نوح: ۲۱-۲۴)

ایہ پنچے بُت جہناں دا سورہ نوح وچ ذکر کیتا گیا اے عمرو بن ربیع لُحی دے وسیلے نال عرباں وچ مقبول ہوئے۔ ایس حوالے نال اگر ویکھیا جاوے تے پتا لگدا اے کہ ایہ صنم عرب وچ پوجا دی غرض لئی باہروں لیان دے گئے سن۔ عرباں دے اپنے بُت کدے:

عرباں دے اپنے بتاں وچ منات دی چوکھی مشہوری اے۔ عرب نہ نری پورے جذبے نال ایس دی پوجا کردے سگوں اوس نال چوکھی عقیدت تے احترام پاروں اپنے بالاں نوں اچھے نانواں نال سد دے سن جہناں وچوں ہر لحاظ نال منات نال ڈاڈھی عقیدت ٹپکدی دسدی سی۔ عربی ادب وچ سانوں اچھے ڈھیر سارے ناں دسدے نیں جہناں توں ایس گل دا ڈاڈھا پکا ثبوت ملدا اے، جو یں کہ عبد المنات یا زید منات وغیرہ۔ ایہ بت سکے تے مدینے دے وچکار مثلث دے نیڑے قدید دے تھان تے رکھیا ہو یا سی۔ ایس بت دی نیڑے تریڑے ہر پاسے، سارے عرب وچ ای پوجا ہوندی سی۔ اوس دی خوشنودی لئی پوراٹل مار یا جاندا سی تے اوس دی ناراضی توں بچن لئی عرب جانوراں دیاں قربانیاں دیندے ہوندے سن۔ پر جہڑے قبیلے منات دے چوکھے نیڑے سمجھے جاندے سن اوہ اوس تے ’خزرج‘ سن۔ عمار بن یاسر اوس، تے خزرج دے حالات توں چوکھی طرحاں جانوسن تے اوہناں دی گل معتبر تے مستند سمجھی جاندی سی۔ ابن کلبی نے اوہناں دے حوالے نال اک قول نقل کیتا اے جہدے توں اوس تے خزرج دی منات نال غیر معمولی وابستگی تے ڈھیر عقیدت دا پتا لگدا اے۔ اکھے:

”ایہ لوکی جدوں حج دی غرض نال دو بجے حاجیاں نال سفر توں نکلدے تے اوہناں ساریاں تھواواں تے

کھلونڈے جتھے عرب رواج پاروں کھلونڈے تے قیام کر دے سن تے فیر اوہ ساریاں رساں ادا کر دے
 جھڑیاں اوس وقت رائج سن پر اوہ اپنے سراں نوں نہیں سن مناؤندے۔ واپسی تے جدوں اوس تھاں تے
 اپڑ دے جتھے منات دابت نصب سی تے اوتھے کجھ چراں لئی قیام وی کر دے تے سر مناؤندے کیوں جے
 اوہناں نیڑے منات دی زیارت کرن بناج توڑ نہیں سی چڑھدا، ایس لئی ایہ کم حج دے اک رکن موجب کیتا
 جانداسی۔“

ایس بت نال عرباں دی غیر معمولی عقیدت تے لگاء دا قرآن ایوں ذکر کر دا اے:-

﴿ أَفَرَأَيْتُمْ لِّلَّهِ وَالْعِزَّىٰ ۝ وَمَنَاةَ الثَّالِثَةَ الْأُخْرَىٰ ۝ أَلَكُمُ الذَّكَرُ وَلَهُ الْأُنثَىٰ ۝ ﴾

(النجم: ۱۹-۲۱)

”فیر کیہ تساں لات تے عزی تے ایس توں پچھے تیجے منات دے معاملے تے غور نہیں کیتا۔ (واہ) تہاڈے لئی
 تے پتر تے اوس (خدا) لئی دھیاں! ایہ تے چوکی بے ڈھنگی تقسیم ہوئی نا“

عرب دے لوکی چوکھے چراں تیکر منات دی تعظیم تے تکریم کر دے رہے۔ فیر ۸ھ وچ نبی اکرمؐ نے حضرت علی کرم
 اللہ وجہہؓ نوں حکم دتا کہ اوہ اوس داناں نشان مٹا دین تے اوہناں نے مہم جوئی کر کے تواریخ دا رخ بدل دتا۔

منات توں بعد عرباں وچ جس دو جے بُت دا چوکھا اثر سی اوہ لات سی جینے طائف دی سوہنی دھرتی نوں کفر دی پلیتی
 تے شرک دے انھیریاں نال سیاہ کیتا ہو یا سی۔ ایس صنم کدے دے وارث بنو ثقیف سن جہناں وچ غناب بن مالک دا خنوادا
 اگل ہتھ سی۔ منات وانگوں ایس بت دی وی چوکی مشہوری سی تے عرب دے سارے قبیلیاں وچ اوہ عزت تے تکریم دی نگاہ
 نال دیکھیا جانداسی۔ لوکی خیر تے برکت حاصل کرن لئی تے غیبی آفتاں توں بچن لئی اوس دی رضا حاصل کرنا چاہندے تے
 ایس لئی اپنے نیانیاں دے ناں اوس دے ناں تے رکھدے۔ اسلام توں پہلے دی تواریخ تے جھاتی پائی جاوے تے پتا لگدا
 اے کہ زید اللات تے تیم اللات تھاں تھاں دیکھے تے سنے جاندے سن۔ طائف دے میدان وچ اج کل جھڑی مسجد نظر
 آؤندی اے اوس دے کجھ منارے دے نال ای ایہہ بت کدے نصب ہنداسی۔ جہالت دے دناں دی عربی شاعری وچ
 لات دا ذکر چوکی عقیدت تے محبت نال لیا گیا لہجہ اے۔ عمرو بن الجصاص نے اک شعر وچ لات دا ذکر ایوں کر دا اے:

((فاندى وتر كى وصل كاس لكالدى تحبرا من لات وكان بدینھا))

میرا شراب دا چھڈ دینا بناشبہ اوس بندے وانگ اے جھڑالات توں بیزاری دا اظہار کرے، جد کہ اوہ اوس نوں اپنا دین
 ایمان سمجھدا ہووے۔

لات دابت چوکھے چراں تیکر عرباں لئی، تے اچھے طور تے طائف دے لوکاں لئی محبت تے عقیدت دا گڑھ بنیا رہیا۔
 فیر جدوں ۹ھ وچ ہمیش چمکن والے سورج دیاں کرناں بنو ثقیف اُتے پئیاں تے اوہ اسلام دے دائرے وچ آؤدے تے
 نبی اکرمؐ نے حضرت مغیرہ بن شعبہؓ نوں ایس صنم کدے نوں ملیا میٹ کرن لئی گھلایا، جہناں اوس نوں بنا کسے رکاوٹ
 دے ملیا میٹ کر دتا۔ جس ویلے حضرت مغیرہؓ دی کاروائی جاری سی تے شرک دے ایس وڈے گڑھ داناں نشان مٹایا جا رہیا

سی، اوس ویلے شداد بن عارض نے بنو ثقیف نوں اپنی ساری پکار دیاں آکھیا:

”او بنو ثقیف! لات دی مدد نہ کرنا کیوں ہے اوس نوں برباد کرن والا خود اللہ تعالیٰ اے۔ لات دی قسمت وچ کامیابی تے نہیں تے فیر تہاڈی مدد نال کیہ ہووے گا؟ جیہڑی شے اگ وچ سڑ کے سواہ ہوگئی تے اپنا آپ نہ بچا سکی اوہ یقیناً کسے کم دی نہیں۔ جد رسول کریم a تہاڈی دھرتی تے اپنے مبارک قدم رکھن گے تے فیر جدوں واپس تشریف لے جان گے تے کوئی بند اوی لات دا حامی نہیں لھے گا۔“

عرباں دی تیجی مشہور دیوی داناں عُزّی سی۔ اوس دی پوجا منات تے لات توں بعد شروع ہوئی۔ جاہلی عرب دی تواریخ توں ایس گل دا صاف صاف پتا لگدا اے کہ ایس دیوی دے ناں تے عرباں نے اپنی اولاد دے ناں ڈھیر بعد وچ رکھنے شروع کیتے۔ عبدالعزّی جیہڑا پہلے دور وچ کدھرے نظر نہیں آؤندا۔ ایس ناں دا ذکر اوہناں شاعراں دے کلام وچ ملدا اے جہڑے نبی اکرم a دی بعثت توں کجھ چرای پہلاں پیدا ہوئے۔

عُزّی دی پوجا دا اٹھ ظالم بن اسعد نے نبھیا۔ مکے توں عراق ول جانندیاں بستان توں نوں (۹) میل دے پندھ تے سڑک دے سجے پاسے ایس دیوی دا بت نخلۃ الشامیہ دی تھاں تے نصب سی جہوں حراض بھی آکھدے نیں۔ ایس دیوی دے آل دوالے اک وڈی ساری عمارت اُساری گئی سی جہوں بُس آکھدے سن۔ ایس تھاں تے دیوی دے حضور چڑھاوے چڑھائے جانندے سن، اوس دی پوجا کیتی جاندی سی تے ایوں دیاں نوٹیکلیاں واجاں کڈھیاں جانندیاں سن جہڑیاں غیبی جا پدیاں سن۔

عُزّی دا وقار تے احترام پیر پیر ودھ رہیا سی۔ لوکانی نے دو جے ناں چھڈ کے ہولے ہولے اپنے بالاں دے ناں ایس دیوی دے ناں تے رکھنے شروع کر دتے تے فیر اک ویلا اجیہڑی آیا جدوں سبھ توں مقدس تے معتبر ناں عبدالعزّی ای سمجھیا جان لگ پیا۔ عرب دا کوئی قبیلہ اجیہڑا نہیں جہنے ایس دیوی دی پوجا تے فخر نہ کیتا ہووے پر عُزّی دی خاطر جہڑی جاں نثاری تے تعظیم قریش نے دکھائی، اوس دی دوجی کوئی مثال نہیں لے سدی۔ عرب دے ایس دھڑلے والے تے بااثر قبیلے دے لوکی کعبہ دا طوف کر دیاں ایس دیوی دیاں شاناں بیان کر دے ہوئے آکھدے ہوندے سن کہ، ”قسم اے لات تے عُزّی دی تے نالے تیجے منات دی ایہ حسین و جمیل تے اچیاں شاناں والیاں لڑکیاں نیں۔“

ایہناں بتاں بتاں نوں عرب دی لوکانی رب دیاں دھیاں من دی سی، تے ایس گل تے پکا پیڈھا ایمان رکھدے سن کہ اوہناں دی سفارش بناں اوہ دنیا تے یاں آخرت تے کسے وی طرحاں کامیاب نہیں ہو سکتے، ایس توں تیکر کہ قریش نے خُریض دے نیڑے اک پوری وادی عُزّی لئی وقف کر رکھی سی جہوں سقام آکھدے سن۔ اوس وادی نوں لوکی چوکھی عزت تے توقیر نال دیکھدے سن تے اوس نوں خانہ کعبہ دا ہی اک حصہ سمجھدے سن۔ ایس صنم کدے وچ اک قربان گاہ دی سی جہوں غنغب آکھیا جانداسی تے جتھے عُزّی دی زیارت کرن والے اپنے جانور ذبح کر دے ہوندے سن۔

عُزّی دا صنم کدہ عرباں وچ کڈا مشہور تے مقبول سی تے اوس دی کئی تکریم تے تعظیم سی، ایس دا کجھ اندازا ایس شعر

توں لایا جاسکدا اے:

((تَلْبِیْنَا بَیْتَ اللّٰهِ اَوَّلَ حَلْفَةٍ - وَاللّٰہُ مَا نَصَبَ یَسُوفَ بِنُكَلْبِ))

”اسیں سبھ توں پہلے اللہ دے گھر دی قسم کھاندے آں پر جے اثر نہ ہووے تے فیر اوہناں مقدس پتھراں دی جھڑے غجب دی تھاں تے نصب نیں۔“

بھائی ایس گل دا فیصلہ کرنا اک اوکھا کم جا پدا اے کہ لات منات تے عزلی وچوں عرباں دے نیڑے کیہڑی دیوی سبھ توں چوکی قابل تکریم سی پر اک گل وثوق نال آکھی جاسکدی اے کہ قریش توں عزلی نال اک خاص لگائی تے اوہ اوس دی عزت تے تکریم نوں اپنے ایمان دا اک ضروری جز جان دے سن ﴿﴾ ایہناں بتاں بابت اک مغربی مصنف لکھدا اے:

”مکے دے نیڑے تن صنم کدے ساڈی کہانی وچ چوکی اہمیت رکھدے نیں، جہناں نوں اللہ دیاں تن دھیاں (بنات اللہ) آکھیا جانداسی۔ طائف وچ لات داصنم کدہ سی جس دے ناں داسا دا مطلب دیوی اے تے جہدی تولیت بنو ثقیف کول سی۔ اوہ اوس نوں رب کار مختار آکھنا وی پسند کردے سن۔ نخلہ دے تھاں تے عزلی داصنم کداسی جہڑا تنان وچوں چوکی مقبول سی تے جہدے ناں دا مطلب سی ”سبھ توں گھڑا“ تے قدید دے تھاں تے منات داصنم کدہ سی، جہڑی قسمت دی دیوی سی۔ ایہ دیویاں اوہناں دیویاں ورگیاں نہیں سن جہناں دا تصور یونو رومی تہذیب وچ لکھدا اے جویں کہ جنگ یا محبت دی دیوی۔ لوکی اپنے گھراں وچ اوہناں دی پوجا نہیں سن کردے، جویں کہ یونانی یاں رومی اپنے دیوتا یاں اپنی دیویاں دی اپنے گھراں وچ پوجا کر دے سن۔“ ﴿﴾

اساف تے نائلہ:

چاہ زمزم دے نیڑے اساف تے نائلہ دو بت نصب سن۔ عرب دے لوکی اوہتے منات مندے تے جنوراں دیاں قربانیاں دیندے ہوندے سن۔ روایتاں توں ایس گل دا پتا لگدا اے کہ بنو جرہم دے اک بندے اساف دا نائلہ نال عشق چلدا سی۔ اک وار اوہ کعبہ وچ کٹھے ہو گئے تے سبب نال اودوں اوہتے ہو کر کوئی بندہ نہیں سی۔ اوہناں کعبہ وچ ای بدکاری کیتی تے اللہ نے اوہناں نوں مسخ کر دتا۔ عبرت لئی رکھے ایہناں ڈھانچیاں توں عبرت حاصل کرن دی بجائے عرباں نے اوہناں نوں اپنا معبود بنا لیا۔ اک روایت موجب اللہ نے اوہناں نوں بدکاری دی مہلت ای نہیں سی دتی تے ایس توں پہلوں ای اوہ نشان عبرت بنا دتے گئے۔ عمرو بن لُحی نے اوہناں نوں زمزم دے نیڑے جا گڈھیا۔ اساف تے نائلہ والی گل حضرت عائشہؓ توں ایوں ای مروی ہے تے جناب ابوطالب دے قصیدہ لامیہ وچ وی ایسے طرحاں ذکر ملدا اے۔

ایہناں توں وکھ عربستان وچ قلنس، ذوالخلصہ، رم تے رضاء ناواں دے بت خانے وی شرک تے کفر دے وڈے گڑھ بنے ہوئے سن۔

ایس عنوان دا چوکیا مواد عبد الحمید صدیقی دے مضمون ”عہد جاہلیت میں عربوں کے مذہبی معتقدات“ توں لیا گیا اے جہڑا ابن کلبی دی شہرہ آفاق تصنیف ”کتاب الاصنام“ دی مدد نال تیار کیتا گیا تے نقوش وچ چھپیا۔

مذہبیاں وچ وگاڑ:

اللہ تعالیٰ نے بڑے ہی مترے ہوئے اکھراں وچ ایہ اعلان فرمایا اے:

﴿وَإِنْ مِنْ أُمَّةٍ إِلَّا خَلَا فِيهَا نَذِيرٌ﴾ (الفاطر: ۲۴)

”تے کوئی قوم اجہی نہیں جہدے دل کوئی ڈراؤن والا نہ آیا ہووے۔“

اک دو جی تھان تے ارشاد ربانی اے:

﴿وَلِكُلِّ أُمَّةٍ رَسُولٌ﴾ (یونس: ۷۴)

”تے ہر قوم لئی اک رسول اے۔“

ایہناں دوواں قرآنی آیتاں توں پتا لگدا اے کہ اولاد آدم وچ کوئی قوم، گروہ، جتھیاں کسے علاقے دے و سنیک اجے نہیں گزرے جہناں نوں سدھی راہ وکھان لئی اللہ تبارک تعالیٰ نے رہنمائی تے رہبری دافریشا ادا کرن والے اپنے بندیاں تے رسولاں نوں نہ گھلیا ہووے۔ کیوں جے رب نوں ایہ گل چوکی پسند اے کہ اوہدے بندے اصل معنیاں وچ اوس دے بندے بن کے رہن تے اصل منزلاں تے اپڑن لئی صراط مستقیم دا پلانہ چھڈن۔ کون نہیں جان دا بھئی اک تھان توں دو جی تھان تے اپڑن لئی سبھ توں گھٹ پنڈا اوسے نوں کرنا پنڈا اے جہڑا سدھے راہ تے مومنہ دھیانے کُرا اے۔ سدھے راہ توں جہاں ہمدے جاواں گے منزل اوڈی ای ڈریڈی ہوندی جاوے گی تے پنڈھ اونا ای ودھدا جاوے گا۔ ایسے پاروں سانوں مسلماناں نوں ایہ ہدایت کیتی گئی اے کہ ہر نماز دا مڈھ اس سورت توں بنھو جہدے وچ ”اهدنا الصراط المستقیم“ دی دعا موجود اے۔ تے جے ڈراؤن والے (نذیر) تے رسول ہر قوم ول آئے نیں تے فیر بنا شا سدھے رستے تے چلن دی ہدایت وی سبھناں قوماں نوں ملی سی پر اولاد آدم دی بدقسمتی کہ نکلے مکے مفاداں لئی تے دنیا دی حیاتی دے نہ رہن والے جھوٹے سہاریاں نوں لہن لئی اسیں رب دے دے سدھے راہ توں جان بچھ دے ہاں تے گڑ دی پیسی وچ سکھیا لکا کے کھان توں وی گریز نہیں کردے، حالاں سانوں پتا ہوندا اے کہ وچ سکھیا اے، سگوں اسیں اپنے ہتھیں رکھیا ہوندا اے۔ خیر الوریٰ دی دنیا تے تشریف آوری ویلے وی دنیا دی حالت کجھ اجہی ہی سی۔ ہندوستانی بدھ تے جین دے سبقاں دی تحریف کر چکے سن تے کسے نوں کجھ نہیں سی پتا، تے نہ اج وی کہ ہندومت، جین مت یاں بدھ مت دے بانیان نے جہڑا اصل رستہ دسیا سی، اوہ کدھر جاندا سی تے جہڑے راہ تے ہندوستانی کُراے جاندے نیں اوہ کہنے تے کدوں دسیا سی۔ ایران دے لوکی زرتشت تے مانی دی تعلیم توں موہنہ موڑی کھلو تے سن تے اوہناں نے زرتشت تے مانوی مذہب نوں اپنی پسند تے مرضی نال ڈھال لیا ہو یا سی۔ جاپان دا شنٹوازم، چین دے تاؤوازم تے کنفیوشس ازم، تے عربستان دی یہودیت تے عیسائیت دے اپنے ای رنگ سن۔ حد تے ایہہ سی کہ شریعت عیسوی دے جانو تے پکے توحید پرست بندے ۶ ویں صدی عیسوی وچ وی جیوندے جاگدے موجود سن جو یں کہ عبداللہ بن جش تے ورقہ بن نوفل ورگے بزرگ پر اوہناں دی حالت اوس چڑی توں بھوراوی وکھ نہیں سی جیہڑی مینہ دے پھانڈے وچ بھگی ہوندی اے تے فیر اوہ کسے رکھ تھلے لکی ہوئی دو جیاں چڑیاں نوں مردیاں تے ویکھ سکدی اے پر اوہناں لئی کرکھ نہیں سکدی۔

ہندوستان دامنِ مذہب تے ہندو:

آؤ ہن پچھے دے گئے مذہباں تے دکھو دکھ جھاتی پائیے تے حساب لائیے کہ رحمت اللعالمین دے دنیا تے تشریف لیاؤن ویلے جھڑیاں مذہبی ڈھانیاں دسدیاں سن اوہناں دے مذہب نوں کوں تے کیوں مذہب آکھیا جاسکد اسی۔ تے سبھ توں پہلوں ہندومت۔

دنیا تے زندا رہن والے مذہبی نظاماں وچوں نری ہندو قوم ای اجہی قوم اے جہدی کوئی توارنخ نہیں۔ کوئی نہیں جان دا کہ ایہ کوں، کتھے تے کدوں جی، ایس دے وڈے کون سن، اوہناں دی جمن بھوں کہڑی سی، اوہناں نے کیہ نظام دتا، کہڑی گل توں ڈکیا تے کہڑا کم کرن دیاں تاکیداں کیتیاں، کسے نوں کچھ نہیں پتا۔ ایس مذہب تے ہندوستان دی توارنخ تے ۱۲۰۰ء توں پہلے دے حال حالات تے کوئی اجہی کتاب نہیں لکھدی جہڑی اس ملک دے وسنیکاں یعنی ہندوواں نے لکھی ہووے۔ صوبہ بمبئی دا اک سابق انگریز گورنر انفنٹن اپنی کتاب ”تارنخ ہند“ وچ لکھدا اے:

”جدوں ایہ خیال کیتا جاندا اے کہ قوم کڈی وی جاہل تے اکھڑیوں نہ ہووے اوہ اکثر اپنے وڈکیاں دے حال حالات بارے کوئی نہ کوئی کتاب رکھدی اے تے ایس گل تے ڈھیر تعجب ہندا اے کہ ہندوواں کول توارنخ نال رلدی ملدی وی کوئی کتاب نہیں لکھدی حالاں اوہناں دی قوم سچ و سب دے اک درجے تے اپڑ گئی سی۔ ہندوواں دے حالات بابت جہڑیاں گلاں لکھیاں لکھدیاں نیں اوہ جھوٹیاں کہانیاں تے گھڑیاں ہونیاں توارنخی گلاں باتاں نال ایوں غلط ملط ہو گئیاں نیں کہ اوہناں وچ سچ لکھن دی کوئی آس امید ای نہیں۔“

فرانس دا مشہور مورخ لی بان لکھدا اے:

”اوہناں ہزاراں جلدواں وچوں جہڑیاں ہندوواں نے اپنے تن ہزار سال دے تمدن تے تصنیف کیتیاں نیں اوہناں وچ کوئی اک توارنخی واقعی وی صحت نال درج نہیں ہويا۔ اوہناں دیاں لکھتاں وچ اک عجیب خاصیت ایہ ہے کہ اوہ ہر چیز نوں غلط تے غیر فطری صورت وچ ویکھدے ہوئے لکھدے نیں تے ایہ خاصیت بندے نوں اس خیال تے مجبور کر دی اے کہ اوہناں دا دماغ ای ٹیڑھا اے تے نالے قدیم ہندوواں دی کوئی توارنخ ای نہیں۔“

ہندوستان دے سابق وزیراعظم پنڈت جواہر لال نہرو اپنی کتاب ”ہندوستان دی دریافت“ (The Discovery of India) وچ لکھدے نیں:

”اہل چین یونان تے عرباں دے اُلٹ قدیم ہندوستان دے لوکی مورخ نہیں سن۔ ایہ ساڈی بد قسمتی اے تے ایس گل نے ایہ چوکی مشکل دی پیدا کر چھڈی اے کہ ایس گئے دناں دے واقعات دا زمانا یاں تارنخ دا کوئی تعین نہیں کر سکدے۔ ساڈے کول صرف اکوای کتاب اجہی اے (کلہان کی راج ترنگی) جنہوں ایس

تورانیجی کتاب آکھ سکدے ہاں۔ ایہ کتاب (وی) کشمیر دی تواریخ اے تے بارھویں صدی عیسوی وچ لکھی گئی سی۔ باقی واقعاں لئی سانوں تصورات دی دنیا وچ جانا پیندا اے یاں فیر باہر لے مورخاں یعنی یونانی تے چینی مورخاں تے عرباں دی شہادت تے۔ مثال موجب بکرمی سن (جہڑا ہندوواں وچ مسلماناں دے بھری سن جہی حیثیت رکھدا اے) تے جیہڑا ۵۷۱ قبل مسیح توں شروع ہوندا اے، دا کجھ پتا نہیں۔ اوس زمانے دے نیڑے تریڑے سانوں کسے بکرماجیت دا پتا نہیں لگدا۔ اک بکرماجیت چوتھی صدی عیسوی وچ گزریا اے پر ایہ چوتھی عیسوی دا بکرماجیت اوس سن دا ٹھ بھنن والا کوں ہوسکدا اے جہڑا ۵۷۱ قبل مسیح توں شروع ہوندا اے۔“

ہن سوچن دی گل ایہ ہے کہ جہڑی قوم نوں آپ نوں اپنا اُگھ سنگھ یاں اتا پتا نہیں، تے جس قوم دے اپنے لیڈر ایہ گل منی کھلوتے نیں کہ اوہ اپنی تواریخ توں واقف نہیں، اوہ کوں ایہ گل آکھ سکدی اے کہ اوہناں دے وڈیاں دے ایہ ایہ درس سن۔ البتا البیرونی دی تحقیق توں پتا لگدا اے کہ مذہلے زمانے وچ آریا قوم توحید تے قائم سی تے اک خدا دی عبادت کردی سی۔ خدا دے متعلق ہندوواں دا عقیدہ اسی کہ اوہ واحد اے، غیر فانی اے، اوس دا کوئی آغاز اے نہ اخیر۔ اوہ مختار مطلق، قادر مطلق تے حکیم مطلق اے۔ اوہ ہمیش جیوندار ہن والا تے اُگھ الحاکمین رب اے۔ اوس دی بادشاہی دا کوئی جوڑ نہیں۔ نہ اوہ کسے نال رلدا اے تے نہ کوئی اوہ دے نال رل سکدا اے۔ تاریخ ہندو مصنف تے بمبئی دا سابق انگریز گورنر وی ایس گل دی تائید کردا اے کہ ویداں وچوں بتاں دارواج تے پوجا پاٹھ دیاں چیزاں دے ظاہری نشان تے علامتاں قائم کرن داروجان ثابت نہیں ہوندا۔ پر ہویا ایہہ ہے کہ جدوں ہندو قوم برصغیر وچ آوڑی نے اوہناں نوں اک بت پرست قوم دی ثقافت نال واہ پیا تے ایوں ہندوواں وچ دی بت پرستی تے مظاہر پرستی دارواج پے گیا۔ ہندوواں وچ جہڑا تریمورتی دا تصور اے یعنی برہما، شوتے وشنو، ایہناں وچ بعد والے دو بھادویں ولسی دیوتا سن پر ہولے ہولے ہندو دھرم وچ بڑی طاقت پھڑدے گئے تے ایوں ہندو اپنے نا معلوم وڈیاں دے دے توحید دے رستے توں چوکھے دور ٹر گئے۔

ویداں دی جہڑی تعلیم، اصل ویداں دا احلیا وگاڑ کے، ہندوواں نے حیاتی دا حصا بنا لئی سی تے اے تیکر بنی اے، اوہ چوکھی مکروہ تے فساد سی۔ اک خدا نوں چھڈ کے تریمورتی، تے فیر تریمورتی توں اگے ڈھیر سارے نام نہاد رہاں اگے متھا ٹیکن توں وکھ دنیا تے جہڑے فساد جلی تے تحریف شدہ ویداں نے پیا کیتے، کوئی کہن دی گل نہیں۔ ایس ویدک دھرم نے عورت نال جہڑا سلوک کیتا اوہ اج دے پڑھنہار ہندوستان وچ وکھ رہے نیں تے اگلے صفحیاں وچ وی ایس دی جھلک دیکھن گے۔ مخالفان بارے تحریف شدہ ویداں دی جہڑی تعلیم سی، سگوں اج وی ہے اوہ کجھ ایوں سی:

- ۱۔ دھرم دے مخالف نوں جیون دی جانیں اگ وچ ساڑ دیو۔
- ۲۔ دشمنان دیاں پیلیاں نوں اجاڑ دیو۔ گاں سنڈھا، بکری تے لوکاں نوں بھکھیاں مار کے مکا دیو۔
- ۳۔ اپنے مخالفان نوں درندیاں کولوں پڑوا دیو تے اوہناں نوں سمندراں وچ غرق کر دیو۔
- ۴۔ جو یں بلی چوہے نوں ترفا کے ماردی اے، ایوں اپنے دشمنان نوں ترفا کے مارو۔
- ۵۔ اوہناں دیاں دھوناں وڈھ دیو تے ہر جائز ناجائز طریقے نال اوہناں نوں تھان مار سٹو۔

۶۔ مخالفان دا جوڑ جوڑ تے بند بند وڈھ دیو۔

۷۔ اوہناں نوں پیراں تھلے مدھ دیوتے اوہناں تے رحم نہ کرو۔

ایہ تے خیر دشمنان بارے ایس ہندو دھرم دی رائے سی، اوہ اپنے ہم مذہب تے ہم قوم لوکاں نال وی کوئی چنگا سلوک اگے کر داسی تے نہ اج۔ ایہ دھرم ذات پات دی ونڈ دے حوالے نال ایڈی کراہت رکھدا اے کہ ہر اوہ ہندا، جہڑا عقل دا انھا نہیں، ایس مذہب دے نیڑے ہون دی جرأت نہیں کر سکدا۔ ایس دھرم نے اپنے ہی پجاریاں نوں برہمن، چھتری (یاں کھتری یاں کشتری) ویش تے شور دے کھو وکھ ٹولیاں وچ ایوں ونڈ دتا اے کہ قیامت تیکر ذات پات دے ایس نظام وچوں نکلن دی کوشش کامیاب ہوندی نہیں دسدی۔ ایس انسانیت سوز تعلیم موجب برہمن پر ماتما دے موہنہ توں، کھتری باہواں توں، ویش راناں توں تے شور پیراں توں جے نیں۔ اولاد آدم نوں کوں اک دوجے توں دور کرن دی کوشش کیتی گئی، ایس دی جھلک اک وید دے ایس قانون توں وی ملدی اے کہ جہڑا برہمن، شور سوانی نال ہم بستر ہووے گا اوہ مرن توں بعد دوزخ وچ سڑے گا تے جے اوس وچوں کوئی اولاد جم پئی تے برہمن اپنی ذات وچوں وی خارج ہو جائے گا۔

ایران دی مذہبی حالت:

ایران دی مذہبی حالت دا ذکر ایس تواریخی پس منظر توں بغیر ادھورار ہووے گا کہ جدوں مغربی آریا اک قوم دی شکل وچ اکٹھے ہو کے تے روحانی نشوونما دیاں منزلاں نیڑ کے اپنے اصلی تے پرانے وطن دیاں حداں توں باہر نکلے تے اوہناں علاقیاں ول وی گئے جیہڑے اج کل ایران یاں افغانستان اکھواندے نیں۔ ایوں جا پیدا اے کہ اوہ تھے حامی تے گُوشی (Kushite) نسلاں دے جہڑے باشندے رہندے سن اوہناں نے آریائی مہاجراں نوں تھلے لایا یاں مکا دتا۔ ایس توں کچھ چر بعد اوہناں نے نکلڑے تے جفاکش تو رانیاں نال جوڑ پایا، پر ایس توں اگدیں کہ اوہ تورانیاں نوں اپنا محکوم بناندے اوہ آپوں اک ویدی حملہ آور دے تھلے لگ گئے۔ جدوں اوہناں توں جان چھٹی اودوں ایرانیاں تے تورانیاں دی اوہ صدیاں تے کھلری جنگ شروع ہوئی جیہڑے وچ آخر ایرانیاں دا پلا بھارا رہیا۔ افراسیاب تے کیکاؤس دے منن والیاں دا اک دوجے نال جہڑا ورتار اسی اوس نے ایرانیاں دے مذہب تے چوکھا چنگا اثر چھڈیا۔ ایرانی بھائیوں غالب رہے پر تورانیاں دے پوجا پاتھ دے طریقے اوہناں دے مذہب وچ ضرور جاوڑے۔ ایس پاروں ایران وچ تے نری ہرمزد دی پوجا کیتی جاندی سی تے اہرمن نوں ملعون سمجھیا جاندا سی پر ماد وچ خیر تے شر دے دوواں نمائندیاں دی پوجا کیتی جاندی سی۔ تورانی و سنیکاں دا ایرانیاں دے خدا دی نسبت اپنے قومی دیوتا دی پوجا ول چوکھا دھیان کرنا اک قدرتی امر سی۔ ایس لئی اوہ اہرمن یاں افراسیاب نوں ہرمزد تے ترجیح دیندے سن۔ مادیان (اہل ماد) تے بابلاں (اہل بابل) وچکار اک معاہدے پاروں جہڑا تواریخ وچ اپنی قسم دا پہلا معروف معاہدا اے، اشوری سلطنت دا تختہ الٹ گیا پر اشوری مذہب جہڑا چوکھا چراں توں اپنا رنگ وکھاندا پیا سی اوہ اک نویں مذہب تے وی اپنے ڈونگھے اثر وکھان بنانہ رہیا۔ ایہ نوواں مذہب زرتشتی سی ☞

زرتشت دی حیاتی دے اصل حالات تے ویلا کھا گیا اے پر فیروہ ایس گل دا پتا لگدا اے کہ اوہ ۶۶۰ ق م وچ پیدا ہوئے تے ۵۸۳ ق م وچ چلانا کر گئے۔ اوہناں دی جنم بھوں ایران داشہر رے سی۔ اوہ پکے موحسن تے اوہناں دے خدا داناں ہر مزدیاں اوہور مزدی۔ اوہور دے معنی مالک تے مزد دے معنی سیانا دے نیں۔ یعنی ’سیانا مالک‘۔ زرتشت اللہ تعالیٰ دے متعلق فرماؤندے نیں ”تو ای خدا ایس، میں جان داہاں۔ اے قادر مطلق! تو ای سبھ توں اگدیسیں جدوں حیاتی نے جنم لیا۔“ زرتشت ملائکہ دے وجود دے وی قائل سن تے جنت و دوزخ دے وی۔ اوہناں دا عقیدہ اسی کہ جدوں نیک آدمی جسم نوں چھڈ دیندا اے تے اوہ ہیشتاں وچ اپڑ جاندا اے۔ نجات پان والے تے جنت وچ ہمیش رہن گے پر گناہگاراں نوں دوزخ وچ اوہناں دیاں برائیاں اگ دی شکل وچ اوہناں نوں ساڑن گئیاں۔ ٹھار دین والی برف، سپ ٹھونہیں تے دو بے موذی تے زہریلے جانور اوہناں نوں سزائیاں دین گے۔ زرتشت نے سوچ وچاردی پاکیزگی تے چوکھا زور دتا تے سچ نوں حیاتی دا مقصد جانیا۔ اوہناں دے مذہب وچ نیانیاں نوں نکے ہونداں دوگلاں ضرور سکھا دتیاں جانیاں سن۔ اک سچ بولنا تے دو بے تیر اندازی۔ جھوٹ سب توں وڈا گناہ سمجھیا جاندا اسی جہڑا مقروض ہون توں وی بھیڑا جانیا جاندا اسی۔ اوہناں نے صفائی تے پاکیزگی دے نال نال صدقا خیرات تے وی چوکھا زور دتا۔

ایران دا دو جا مشہور مذہب مانوی سی۔ ایس مذہب دامنڈھ رکھن والا مانی عراق دے شہر طینون وچ، جتھے اہج بغداد وسدا اے ۲۱۵ء وچ پیدا ہویا۔ اوس دا پیو یہودی سی۔ مانی نے لوکائی نوں دسیا کہ جُسے داپاک رہناروح دی پاکیزگی لئی ڈھیر ضروری اے۔ اوس دے تن وڈے اصول ایہ سن کہ مادی دنیا جہڑی بدی ای بدی اے، دے مقابلے تے اک اعلیٰ دنیا اے جتھے انسانی روحاں نے اکٹھے ہونا اے۔ دو جا ایہ کہ روح دا اصل وطن اوہی اعلیٰ دنیا اے تے تیجا اصول ایہی کہ روح دی آزادی صرف رب دے وس داکم اے، کیوں جے مادے وچ قید ہون پاروں اوس دی فطری قوت بے کار ہو چکی اے۔ تواریخ دسدی ہے کہ ایرانی بادشاہ شاپور دا بھرا پرویز، مانی دامرہی سی پر ایرانی کاہناں تے زرتشتی مذہب دے پیروکاراں دے لچھناں پاروں مانی نوں ڈھیر اوکڑاں دا ساہمنا کرنا پیا۔ مانی نوں ملک دی چھڈنا پیا۔ پردیس وچ اوس نے ”ارٹنگ“ یاں ”ارٹنگ“ ناں دی اک کتاب وی تیار کر لئی تے جدوں اوس کتاب نوں لے کے ایران وچ پریتا تے اوس نوں چوکھی کامیابی نصیب ہوئی۔ ۲۷۷ء وچ شاپور دے مرن توں بعد اُس دا پتر ہرمز داؤل تخت تے بیٹھا۔ اوہ اپنے پیو وانگ مانی نال چنگای ورتیا پر رب دی قدرت کہ اک ورھے پچھوں ای اوہ وی چلانا کر گیا۔ اوس توں بعد جدوں بہرام اوّل بادشاہ بنیا تے اوس نے مانی تے اوس دے پیروکاراں تے سختیاں شروع کر دتیاں۔ ۲۷۷ء وچ مانی نوں پھڑ کے بہرام بادشاہ کول پیش کیتا گیا، جہنے اوس دی کھل کچ کے بھس بھروا دتا تے اوس نوں ایک لمی مدت تک دارالحکومت دے وڈے دروازے اگے لوکائی دی عبرت لئی رکھیا۔ ایہہ ظلم و کیکھ کے مانی دے پیروکار مشرق ول ٹھہ گئے۔ وسط ایشیا، چین، مغربی ایشیا، شمالی افریقا، جنوبی یورپ، فرانس تے سپین وچ ظہور اسلام دے ویلے تک ایہ مذہب پوری طرحاں ویکھیا جاسکدا اسی، پر فیروہ ایس دا اثر کم لگ پیا۔

مانی وی زرتشت وانگ توحید و اناکس سی تے آکھدا سی: ”میں سجدہ کر دیا ہاں تے تہجد کر دیا ہاں رب ذوالجلال دی، اوس عظیم ہستی دی جہڑی نور ہی نور اے“ اوس دادرسی کہ بت پرستی، جھوٹھ، لالچ، قتل، خون، زنا، چوری تے جادویاں منتر جنتز دے نیڑے وی نہ جاؤ۔ مذہب بابت دل وچ وسوسے تے شبے و اشکار نہ ہوؤ۔ کاروبار وچ سستی تے بے پروائی مندی گل اے۔ مانی دا اک چوکھایا دگار سبق یا ہدایت ایہی سی کہ دن وچ چاریاں ست داری اپنے رب اگے جھکوتے نماز پڑھو۔

بدقسمتی دی گل اے کہ ایران دے لوکی ایہناں دوواں بزرگاں دے دسے سیتاں توں ایوں موہنہ موڑ گئے کہ جو یں زرتشت یاں مانی کدے ایران وچ جے ای نہیں سن۔ خدا دی تھان شہنشاہ نے لے لئی تے خدا پرستی دی تھان اکابر پرستی جے شرک نے سنبھال لئی۔ زرتشتی مذہب نے اوہ ساریاں خرابیاں گٹ گٹ کے اپنے اندر بھر لئیاں جہناں دا اوہناں نے اپنے مذہب دے مڈھلے دناں وچ مقابلہ کیتا سی۔ جہڑے لوکی بت پرستیاں لئی عذاب دے فرشتے سن تے جہناں دا بت شکنی دا جوش تے جذبا ایس غضب داسی کہ اوہناں نے مصریاں دے متبرک سنڈھے ایپس (Apis) نوں وی کوہ دتا، اوہناں نے بڑی مچھیتی ہر مزد دی پوجا وچ اپنے محکوم مکاں دے سامی خداواں نوں داخل کر لیا۔ پرانی مجوسی عناصر پرستی مڈھوں شڈھوں زندا ہو گئی تے اردشیر میمون نے زرتشتیاں وچ محنت دیوتا متھرا دی پوجا دا وی رواج پادتا۔

نبی اکرم a دی دُنیا تے تشریف آوری دے ویلے ایرانی بادشاہ تے اپنے مال دولت تے خشالی پاروں رب نوں بھلے ای بیٹھے سن، لوکاں دی دابقلہ وی سدھا کوئی نہیں سی۔ رنگ رنگ دے رب موجود سن۔ سوانیاں دا حال وک جان والی جنس توں بھوراوی چنگا نہیں سی۔ جنسی تعلقات دے معاملیاں وچ اپنی مرضی توں وکھ اوہ کسے قانون دے تابع نہیں سن۔

چین دا تاؤ ازم تے کنفیوشس ازم:

ساڈے کول ایس گل دا یقین کر لین دیاں کافی دلیلاں موجود نیں کہ قدیم چینی توحید پرست سن۔ اوہ اک اللہ، اک معبود یاں حاکم مطلق دے ناں نال باری تعالیٰ نوں یاد کر دے سن۔ اوہناں دا ایمان سی کہ اوہ سہ کلی ذات نے کائنات پیدا کیتی اے تے اوہ نیکی یاں بدی دی جزاء یاں سزا دے وی قائل سن۔ چین وچ توحید دی لوء جہناں بزرگاں دے طفیل کھلری اوہ بزرگ تاؤ ازم تے کنفیوشس ازم دے بانی نیں۔

تاؤ ازم دا بانی لاؤ زے ۶۰۴ ق م وچ پیدا ہویا۔ اسدا اصلی ناں لی پے یا نگ سی پر اوہ لاؤ زے دے ناں نال پچھا تا گیا، کیوں جے اوہ جدوں پیدا ہویا تے اُس دے سرتے چٹے وال سن۔ لاؤ زے دے معنی ”بڈھا فلسفی“ دے نیں تے ایہ ناں اوس نوں سر دے چٹے ہماندروں والاں دی وجہ توں ملیا۔ اوس دی پیدائش بابت رنگ برنگیاں کہانیاں پڑھن سنن توں ملدیاں نیں جہناں وچوں اک ایہ وی ہے کہ اوہ اکاسی ورھیاں تنیکر ماں دے پیٹ وچ ای رہیا تے جدوں اوہ پیدا ہو گیا اوس داسر چٹا تے اوہ عقل دا پیڈھاسی۔ ایہ گل وی آکھی جاندی اے کہ اوس نوں اک کواری کڑی نے جنم دتا جہڑی چوکی غریبی جہی سی۔

تاؤ نے اپنی حیاتی وچ ای اپنے فلسفیانہ خیال لکھوادتے تے اوس کتاب داناں ”تاؤ تی چنگ“ (Tao- Te- Ching) رکھیا۔ چنگ دا لفظ کتاب لئی، تی دارستے لئی تے تاؤ دا مطلب خیریاں بھلائی والا فلسفا اے۔ ایوں اسیں اس نوں ”کتاب

صراط مستقیم، داناں دے سکدے ہاں۔

ایس فلسفے یاں مذہب وچ تاؤ دا تصور خدائے واحد والا ہی اے۔ ایس دادرسی ایہی کہ تاؤ ہر تھاں تے موجود اے۔ اس دی ذات نال ہی ساری کائنات دی عظمت تے وڈھیا ئی قائم دائم اے۔ چن تے سورج تاؤ دی وجہ توں ای گھمدے نیں۔ نکلے کئے کیڑیاں نوں حیاتی بخشن والا اوہ ہی ہے۔ اس دا کوئی جسم نہیں پر سارے جسم اوہدے ہی ہتھوں پیدا ہوئے نیں۔ اس دی اپنی کوئی آواز نہیں پر اوہ ہر آواز وچ بولد اے۔ اوہ سمجھناں دا خالق تے رازق اے تے اس دی ذات یاں اسدے اختیارات دی کوئی ونڈ نہیں کیتی جاسکدی (ناقابل تقسیم اے)۔

تاؤ فلسفے نوں اک چینی سیانے ہوائی مان زو (Huai Man Zu) نے ایوں بیان کیتا اے:

”تاؤ ای آسمان نوں سہارا دین والا تے زمین نوں وچھان والا اے، جس دی کوئی ابتدا اے تے ناں انتہا۔ جس دی اچھائی ناپی نہیں جاسکدی تے نہ اوہدی ڈونگھیا ئی دا اندازا کیتا جاسکدا اے۔ ساری کائنات اس دے قبضے وچ اے۔ اوہ اصلوں ای مہین تے ناں دسن والا اے پر اوہ ہر شے وچ ایوں ہوند اے جویں دلدل دے وچ پانی۔ پہاڑاں دی اچھائی تے غاراں دی پستی تاؤ دے ہی دم نال اے۔ جنوراں دا ٹرنا، پنکھ پکھیرواں دا اڈنا، چن تے سورج دیاں لاٹاں، سبھ اس دے فیض دے کرشمے نیں۔ بہار دیاں کولیاں تے ٹھنڈیاں ہواواں اوہ ہی دگاندا اے تے سون بھادروں دے من موہنے مینہ اوہی ورساؤندا اے۔ پرندیاں دے آئڈے تے فیر اوہناں آئڈیاں وچوں بوٹ اوہی کڈھدا اے۔ جدوں رُکھاں نوں کرونبلاں لگدیاں نیں، آئڈیاں وچوں بچے نکلدے نیں تے ماواں بال جمدیاں نیں تے ایوں جا پیدا اے جویں سبھ کم آپوں ای ہوندے جارہے نیں کیوں جے کم کرن والے دا ہتھ جو سانوں نہیں دسدا (پر ایہ سارے کم تاؤ ہی تے کردا اے) تاؤ اک پر چھاویں وانگ اے، اسدا جسم تے نہیں پر اسدے وسیلے تے اسباب حدوں باہر نیں۔ اوہ نہ ہون توں، ہون دے پندہ نیڑدا اے۔ اس توں کدے کوئی بے کار تے گنجما کم نہیں ہو یا۔“

تے آؤ ہن حضرت کنفیوشس تے جھاتی پائیے۔

عظیم چینی فلسفی کنفیوشس دی گنتی دنیا دے چوکھے وڈے اخلاقی معلم وچ ہوندی اے۔ اوہ پہلا بنداسی چنے چین دے لوکا ئی دے کھلے پلے عقیدیاں نوں اک لڑی وچ پرویا تے فیر اک اچھا نظام دسیا جہدے سحر وچوں ان ڈھائی ہزار ورھیاں بعد وی چینی باہر نہیں نکل سکے۔

کنفیوشس، لیو دی کی جہی ریاست وچ ۵۵۱ ق م وچ پیدا ہو یا۔ بچپن وچ ای اس دا پیو چلانا کر گیا۔ اس نے وڈے ہو کے سرکار دی نوکری کیتی پر کجھ ای ورھیاں پچھوں استعفی دے دتا۔ اگلے ۱۶ ورھے اس نے لوکا ئی نوں سدھاراہ دکھان وچ گزار دتے۔ ۴۹۷ ق م وچ اس نوں رب ولوں وراج پے گئی۔ بھاویں اس نوں کسے مذہب دا بانی نہیں سمجھیا جاسکدا پر اس دے فلسفیانہ نظریے دنیا تے ہمیش جیوندے رہن والے نظریے گنے جاندے نیں۔ خورے پوری توارن وچ کوئی دوجا اچھا فلسفی نہیں جمیا ہونا جہڑا کنفیوشس توں ودھ کے اپنے لوکاں دے بنیادی عقیدیاں نال جڑیا ہووے۔

کنفیوشس دے اپنے قول موجب اوس نے ۵۰ ورھیاں دی عمروج اللہ دا عرفان حاصل کیتا۔ اوس نے نور تے ہدایت اللہ کولوں ای لکھے تے اللہ تے یقین رکھن پاروں کوئی اوس نوں نقصان نہیں اپڑا سکدا۔ اوس نے تقریریاں وچ ٹی این (T-ien) دا اکھر اکثر ورتیا جہڑا خدا دی پروردگاری تے اوس دے حدود باہر اختیار دی دلالت کردا اے۔ اوس دی تعلیم دے مطابق خدا صرف ایجے قانون نافذ کردا اے جہدے نال کائنات دا وجود قائم رہوے۔ اوس نے اک ایجے زمانے وچ خدائے واحد دے ناں دا بول بالا کیتا جدوں چین وچ فطرتی مظاہر تے ارواحِ حبیثہ دی پوجا دا رواج زوراں تے سی۔ اوہدے نیڑے تقویٰ تے راضی برضا رہنا ای صراطِ مستقیم اے۔

کنفیوشس دی تعلیم وچوں جہڑی گل چوکی نتر کے سامنے آؤندی اے اوہ ”وڈا بندہ“ بنن دا درس اے۔ اوس نے وڈا بن دے گروی دتے نیں تے اس دی پچھان وی۔ اوہ آکھدا اے کہ:

- & تیز طرار بول چال تے گلاں باتاں نال دو جیاں نوں متاثر کرن دی کوشش نال کوئی بندہ، وڈا نہیں بن جاندہ۔
- & تئیں اوس بندے نوں کیہ ناں دیو گے جہڑا غریب اے پر خوشامد نہیں کردا تے اوس بندے نوں کیہ آکھو گے جہڑا امیر ہے پر مغرور یا نہیں..... اک تیجا بندہ وی ہے جہڑا غریب اے پر رب دی رضا تے راضی تے خش اے تے جے امیر اے تے اپنی انسانی تے اخلاقی روایتاں ول کئ نہیں کردا۔
- & وڈے بندے دی تعریف ایہ ہے کہ! اوہ پہلوں دو جیاں لئی مثال بن دا اے تے فیروہناں نوں تقلید دی دعوت دیندا اے۔

- & وڈا بندہ آفاقی نقطہ نگاہ رکھن پاروں غیر جانبدار ہوندا اے تے چھوٹا بندہ جانبدار۔
- & آؤتھانوں دساں کہ علم کیہ ہوندا اے۔ علم ایہ دو گلاں جانن دانان ہے کہ تئیں کیہ جان دے او تے کیہ نہیں۔
- & بزدلی ایہ ہے کہ تئیں حق لئی آواز نہ چک سکو۔
- & وڈا آدمی کسے شے نوں ترجیح نہیں دیندا پر انصاف لئی اوہ متعصب تے سخت گیر بن جاندہ اے۔
- & چھوٹے بندے نوں مراعات تے مفادات نال غرض ہوندی اے تے وڈھے نوں اصولاں نال۔
- & وڈا بندہ گفتگو وچ دھیمے عمل وچ تیز ہوندا اے۔
- & وڈا بندہ پریشان ہوندا اے نہ خوفزدہ۔
- & مطالعہ ایہہ سمجھ کے کرو کہ تئیں علم تے کدی حاوی نہیں ہو سکو گے تے ہمیشہ ایہ ڈراپے اندر رکھو کہ تئیں جو پڑھیا اے کدھرے ضائع نہ ہو جائے۔
- & ساڈیاں عاداتاں سانوں اک دوجے توں دور لے جاندیاں نیں۔ اوہ جہناں وچ کدے کوئی تبدیلی نہیں آؤندی، ولی ہوندے نیں یاں احمق۔

& جھوں اکھراں دی قدر نہیں اوہ بندیاں دی قدر کیہ کرے گا؟

ستار طاہر، دنیا کی سو عظیم کتابیں، اقوالِ کنفیوشس۔

ایہ سن چین دے دووڑے تے محترم بندگان خدا دے اصول، درس تے نظریے، پر ۶ ویں صدی عیسوی تک چین دے لوکی ایہ سب کچھ بھل چکے سن تے اوہناں نے بڑے عجیب و غریب نظریے گھڑ لے سن۔ طاقت تے شہنشاہیت ای پوجا پاٹھ دے لائق سی تے کنفیوشس یاں تاؤ ازم والے معبود تصور تقریباً ختم ای ہو گیا سی۔ مثال موجب چین دے لوکی اپنے شہنشاہ نوں بہشتاں دا پتر (Son of the Heaven) دے ناں نال یاد کر دے سن کیوں جے اوہناں دا عقیدہ اسی کہ کائنات وچ جو کچھ وی نظر آؤندا اے اوہ اوس ویاہ دے نتیجے تے جمن والی اولاد اے جہڑا نر آسمان دا مادہ زمین نال ہو یا سی تے شہنشاہ کھتہ اول اوہناں دا پلٹھٹی دا پتر سی۔ ایس حساب نال اوہناں دا شہنشاہ اپنی رعیت دا کلا ای باپ سمجھیا جاندا سی تے ایوں اس نوں حق اپڑدا سی کہ اوہ جویں چاہوے اوہناں تے حکومت کرے ۱۱ ایس توں اوہناں دی مذہبی تے اخلاقی حالت دا پتا لگدا اے۔

شنٹو ازم..... جاپان دا مذہب:

جاپان دے لوکی اک ای مذہب توں جانونیں تے اوہ مذہب شنٹو ازم (Shintoism) اے۔ ہندومت وانگ ایس دی وی کوئی توارخ نہیں۔ کوئی نہیں جان دا کہ اس دا بانی کون سی؟ اوہ کتھے تے کدوں جمیا مریا؟ اوس نے کیہہ درس دتے تے کس نے اوہدے درس دا حلیا وگاڑیا؟ پرایہ گل طے ہے کہ جہڑا آج جاپان وچ دکھالی دیندا اے، ایوں دے مذہب دے نیہہ پتھر اللہ دے کسے بندے نے نہیں رکھے، سگوں ایہ تحریف دا ای نتیجا ہو سکدے نیں۔

”شنٹو“ دا کھر، چینی زبان دے دو اکھراں ”شن“ تے ”ٹو“ دا مرکب اے، جہدا مطلب اے دیوتاواں دے ڈھنگ یاں طور اطوار۔ توارخ توں پہلے دے زمانے وچ جاپان تے جہڑا قبیلایاں لوکی حکمرانی کردے سن، ایوں جاپدا اے کہ اوہ سورج نوں دیوی من دے سن تے اوس دی پوجا کردے سن۔ ایس توں اڈوی اوہ ہزاراں نہیں، کروڑاں دیویاں تے دیوتاواں دے قائل سن۔ ایوں دے عقیدیاں دی بنیاد اُتے اک نویں مذہب نے شکل دکھائی جہڑا آج تک جاپان وچ موجود اے۔

کائنات دی تخلیق بابت اوہناں دا نظریہ ایہ ہے کہ کدے آسماناں دے تردے پل اتے اک جوڑا رہندا سی۔ نر دا ناؤں ازونگی (Izong) تے مادہ دا ناؤں ازونمی (Izonami) سی۔ اوہ جوڑا زمین دے اک سکتے ٹوٹے تے لتھاتے او تھے وسوں شروع کردتی۔ اوہ اپنے گھر دے اک وڈے تھم دوا لے گھمدے رہندے۔ اک دیہاڑے جدوں ٹاکرا ہوئی تے مادہ پہلوں بول پئی۔ ایس گل تے نر توں غصا آ گیا تے اوس نے مادانوں فیر گئے کدھن دا آکھیا۔ فیر جے ٹاکرا ہوئی تے مادا چپ رہی تے نر بولیا تے اوس نے مادا دی خوبصورتی دی تعریف کیتی۔ ایویں دوواں وچ میاں بیوی دا تعلق بن گیا۔ ایس دے نتیجے تے جاپان دے جزیرے تے دیوی دیوتا پیدا ہوئے۔ اک دی دیوی نوں جمدیاں ازونمی مرگئی۔ ازونگی ایس گل تے بڑا ترنگ ہوئی تے اوس نے نویں جمی اک دی دیوی دے ٹوٹے کر چھڈے، جس توں ڈھیر سارے دیوی دیوتا بن گئے۔ ازونگی اپنی گھر والی دے کچھ یومی (Yomi) ناؤں دی تھاں ول ٹرپیا۔ سفر وچ اوس نے اک سمندر وچ ٹبی لائی۔

ایوں اوہدیاں پلکاں توں پانی تے جہڑے تیکے ڈگے اوہناں وچوں سورج جیہا تے نک توں جہڑا پانی ڈگیا اوہناں وچوں چن تے دو جیاں شیواں بنیاں۔

ایہ کہانیاں جہڑیاں صدیاں توں جاپان وچ سینا سینا تر دیاں آؤندیاں سن، اٹھویں صدی عیسوی دے شروع تے یاسومارو (Yasumaro) نے اک تھان تے کردتیاں۔ اوس دیاں دو کتاباں وچوں اک داناں ”کو جی کی“ (Kojiki) یعنی پرانے حالاں دی کہانی تے دو جی داناں ”نی ہوں گی“ (Nihongi) اے جس دا مطلب اے جاپان دی تواریخ۔ ایہ کتاباں جاپانیاں لئی تے چوکھیاں متبرک ہون گیناں پر ایہ عقل توں دور دے قصے کہانیاں توں ودھ کچھ نہیں۔

مذہب، جہڑا اوہوں بندے نوں سہارا دیندا اے جدوں سارے سہارے ساتھ چھڈ جاندا ہے نیں، جے حوصلہ، ہمت تے سہارا نہ دیوے تے فیروہ مذہب کاہدا اے۔ جاپان دے کچھ سیانے کدے کدراں ایہ گل محسوس دے رہے نیں تے ایہو جاپانی مذہب دی کثرت پرستی دے پچھے اک کلی طاقت دے وجود تے وی زور دیندے رہے نیں۔ اوہناں دا اک سیانا ازوانا گھڈی (Izawanaa Ghed) لکھدا اے کہ ذات باری تعالیٰ اٹھ سو کروڑ دیوتا ہون دے باوجود وی واحد ہی اے۔ اوہ واحد ہی سبھ کچھ اے تے کائنات دیاں ساریاں چیزاں اوس اک ذات دا ہی حصا نیں۔ اک دو جا مصنف شیرائی سو ان (Shirai Soin) لکھدا اے۔ ”باری تعالیٰ ای قادر مطلق اے۔ اوس دی ذات نوں اکھراں وچ بیان ای نہیں کیتا جا سکدا۔ اوہ فہم توں اچا ہون دے باوجود ہر شے وچ دکھالی دیندا اے۔“ شنتو اخلاقیات وچ خلوص، قربانی، روح تے بدن دی پاکیزگی متری ہوئی دکھالی دیندی اے۔

ازوانا گھڈی تے شرائی سوان جے مفکراں نے جاپانی لوکاں نوں سدھارا راہ دکھان دی جہڑی کوشش کیتی اے اوہ کچھ چر تے ضرور کامیاب ہوئی پر اوہ صدیاں سگوں ہزاراں ورہیاں پرانے شرک دے کوڑھ توں جاپانیاں دے جسیاں تے روحاں نوں پاک تے صاف نہیں کر سکی۔

عرب دے مذہب:

عربستان دے لوکی اڑی دے پکے تے اپنے آپ نوں ہمیش سچے تے سدھے راہواں دے راہی ای سمجھدے سن۔ جہالت نے اوہناں وچ بت پرستی دا رواج پایا تے بتاں دی ایس پوجا نے اوہناں نوں توہم پرست وی بنادتا سی۔ اوہ فطرت دی ہر شے یعنی پتھر، درخت، چن، سورج، ہوا، پہاڑ، تے دریاؤں اپنا معبود من دے سن۔ دکھو دکھو تھواواں تے دکھو دکھ حکومتاں تے اقتدار ہوون پاروں مذہباں دے وی کئی رنگ سن۔ یہودیت تے عیسائیت اچھے مذہب نیں جہناں دے نام سن کے ناواقف بندادھو کھا کھا جاندا اے کہ اوہناں لوکاں وچ ایہناں مذہباں دی چنگیائی دے نمونے ضرور لہدے ہون گے پر سچ ایہ ہے کہ ایہناں مذہباں تے ترن دے دعوے کرن والیاں مذہب نال اپنے آپ نوں سنوارن دی بجائے مذہب نوں سگوں اپنیاں علتیاں نال خراب کر چھڈیا اے۔ جے کر اوہوں موسیٰ و عیسیٰ تے شعیب و صالح h پیغمبراں نوں اوہناں لوکاں نوں ویکھن دا موقع ملدا تے اوہ اصلوں نہ پچھان دے کہ اوہ اوہناں دے اصولاں تے چلن والے لوک نیں۔

سائے آقا و مولا حضرت محمد a دی دنیا تے تشریف آوری ویلے کئی عقیدیاں دے لوکی عربستان وچ وسوں

کردے سن۔ کچھ تے اچھے لوکی سن جہڑے خالق نوں من دے ہی نہیں سن تے نہ قیامت نوں کچھ سمجھدے سن سگوں آکھدے سن کہ طبیعت ای خالق اے تے دہر (زمانا) فنا کرن والا اے۔ کچھ خالق نوں تے من دے سن پر روز محشر دے منکر سن۔ چوکھی تعداد بت پرستاں دی سی۔ اک فرقہ ستارا پرست وی سی پر اوہ نرے ستاریاں دے بت پوجدے سن تے اوہناں دی نظر مادا توں اچی نہیں سی جاندی۔ مجوسی فرقہ وی موجود سی پر اصل وچ اوہ بت پرستاں توں کھنہیں سی۔ یہودی تے عیسائی آکھن نوں اللہ دے بنائے مذہباں تے ٹرن والے سن پر اصل وچ اوہ وی بت پرست سن تے اک خدا تصور مبہم ہو کے رہ گیا سی۔ وسط عرب دے وسنیک بھاریں عام طور تے خالق دے تصور توں خالی سن پر بت پرستی یاں مظاہر پرستی تے وی اعتقاد نہیں سن رکھدے۔ اصل گل ایہ ہے کہ عرب عام طور تے مذہب توں نا آشنا ای سن تے بتاں دی وی اوہناں دے دل وچ کوئی خاص عزت نہیں سی۔

عرب وچ صابیاں دی کوکب پرستی (تاریاں دی پوجا) تے یہود و نصاریٰ دے عقیدے وی آئے۔ مجوسیت دا اثر وی اپڑیا پر ایہ نظر یے اوہناں وچ کوئی وی فلسفیانہ فکر پیدا نہ کر سکے۔ ایس گل دا انداز اوہناں دے سماجی رویے تے رہن سہن توں ہوندا اے۔ اوہ بھاریں حج تے عمرہ کردے سن، بتاں تاریاں دی وی پوجا کردے سن پر اوہناں دی طبیعت اوہناں نوں اپنے آبائی دین ول وی کھچ لے جاندی سی۔ ایس پاروں اوہ یہود و نصاریٰ دے خداواں دیاں صفتاں اپنے وڈکیاں دیاں دسیاں ہوئیاں صفتاں نال رلا کے بیان کردے سن۔ اوہ کدے تے یہود نصاریٰ دے خداواں دی پوجا کردے تے کدے اوہناں دا مذاق اڈاندے، ایس لئی کہ اوہ لوکی دہری مزاج سن۔ مرن توں بعد فیر زندہ ہونا اوہناں نیڑے خرافات تے بے ہودا گل سی۔ جو یں کہ عبد اللہ ابن الزبیری نے آکھیا سی:

((حیات ثم موت ثم نعتن۔ حدیث خرافہ یا ام عسر۔))

”حیاتی، فیر موت، فیر زندہ ہونا، اے ام عمر ایہ سمجھ گلاں خرافات نیں۔“

ایس دہری مزاج، بت پرستی تے زباں دی اک ون سونتا دے ہوندیاں ہوئیاں وی اوہناں دے دلاں وچ جھاتی پایاں پتا لگدا سی کہ اوہ نہ نرے ایس گل توں جانوں نیں سگوں کسے حد تک ایہ اعتقاد وی رکھدے سن کہ اوہ کھلی، وڈی تے اصل طاقت جہنہ زمین تے آسمان نوں پیدا کیتا اے، جہنہ زمین تے سورج نوں تابعدار بنایا ہو یا اے تے جہڑا بیڑیاں نوں بنے لاؤندا اے اوہ کوئی ہو اے تے اوہ ”اللہ“ اے۔

﴿وَلَئِنْ سَأَلْتَهُمْ مَنْ خَلَقَ السَّمَوَاتِ وَالْأَرْضَ وَ سَخَّرَ الشَّمْسَ وَالْقَمَرَ لَيَقُولُنَّ اللَّهُ فَأَنَّى يُؤْفَكُونَ﴾ (العنکبوت: ۶۱)

”تے جے اوہناں لوکاں نوں پچھیا جاوے کہ اسماناں تے زمین نوں کسے بنایا اے تے سورج تے چن دی تسخیر کس نے کیتی اے تے آکھن گے، اللہ نے۔ فیر کدھر بھلیں پے ہوئے نیں۔“

انسائیکلو پیڈیا آف اسلام، جلد اول، صفحہ ۹۹۹۔

نقوش، جلد سوم، صفحہ ۴۵۔

﴿فَإِذَا رَكِبُوا فِي الْفُلِكِ دَعَوْا اللَّهَ مُخْلِصِينَ لَهُ الدِّينَ فَلَمَّا نَجَّاهُمْ إِلَى الْبَرِّ إِذَا هُمْ يُشْرِكُونَ ٥﴾

(العنکبوت: ۶۵)

”فیرجدوں اوہ بیڑی تے چڑھدے نیں تے اللہ نوں پورے خلوص نال پکار دے نیں۔ فیرجدوں اوہناں دی

پانی توں جان چھڑی اے تے سکی تھان تے اپڑ جان دے نیں تے اوہ فیرشرک کرن والے بن جان دے نیں۔“

﴿وَلَيْئَ سَأَلْتَهُمْ مَنْ نَزَّلَ مِنَ السَّمَاءِ مَاءً فَأَحْيَا بِهِ الْأَرْضَ مِنْ بَعْدِ مَوْتِهَا لِيَقُولُوا لِلَّهِ﴾

(العنکبوت: ۶۳)

”تے جے تسیں اوہناں نوں پچھو کہ اسماناں توں مینہ کنے وسایا تے مری سکی بھوئیں نوں (کنے) نویں سرے

چیوندا جاگدا کردتا، تے آکھن گے اوہ اللہ ای تے ہے۔“

عیسائیت دعویدار اے کہ ظہور اسلام توں پہلوں عربستان وچ جہڑا مذہب چوکھا اثر رکھدا سی، اوہ عیسائیت ای سی۔ ایس

مذہب دی وی کیہ حالت سی۔ آؤ دیکھیے:

”عیسائیت کول کدے وی کوئی اجیہا جامع تے واضح ضابطہ حیات نہیں رہیا، جہڑا کسے تہذیب یاں سیاسی نظام دیاں

بنیاداں لئی فریم ورک داکم دے سکدا۔ عیسیٰ دی دتی تعلیم پاروں ایہ واحدنیت دا عقیدہ تے ظاہر کر سکی پر اوس توں دکھ کچھ

نہیں۔ تے واحدنیت والی گل وی سینٹ پال دے مہلک تے خطرناک اثر تھلے جان تیکر ای رہی۔ اوس توں پچھوں خدائی

سچ والا بجھد ابلدا دیوا اکا ای بجھ کے رہ گیا۔ سینٹ پال بت پرستی دیاں ساریاں پرانیاں رسماں اپنے نال لے کے آیا تے

اوہناں نوں عیسائیت وچ گھسیڑ دتا۔ فیرقسنستین دی حکومت ویلے تے عیسائی عقیدے دیاں جڑاں تیکر، وڈھ کپ دتیاں

گئیاں۔ ایوں چوتھی صدی عیسوی تیکر عیسائیت، یونانی دیو مالائی قصے، رومی بت پرستی تے مصری رہبانیت دا اک انوکھا تے

چرچ مکچر بن گئی جہڑے وچ حضرت عیسیٰ دی ساداتے خالص تعلیم کسے سمندر وچ مٹھے پانی دے اک تیکے وانگ کھڑیج کے

رہ گئی۔ تیجی صدی عیسوی دے گھیلے (وسطی) ورھیاں وچ عیسائیت وچ اک نواں فرقہ سامنے آیا جہڑا سابلایاں دا فرقہ (The

Sabellian) اکھوایا۔ ایہ عیسوی دین وچ اک نویں تحریک دا مڈھ رکھو فرقہ سی۔ ایہ لوکی حضرت عیسیٰ نوں اک انسان تے

من دے سن پر ایہ عقیدہ وی رکھدے سن کہ وڈے تے زور اور اسمانی باپ توں اک خاص قوت صادر ہو کے یسوع ناں دے

بشر وچ وڑ گئی اے تے ایوں اوہ خدا دا بیٹا بن گیا اے۔ ایہ چوکھا اچرچ نظریا جہوں گلبن (Gibbon) عیسوی موحدیت نال

رلدا بجھدا اے، کلیسا وچ چوکھے رولیاں دا سبب بنیا تے ایس دا توڑ کرن لئی اوریجن (Origen) نے چوتھی صدی دے

مڈھلے سالاں وچ خدا دیاں تن وکھو وکھ ہستیاں دا عقیدہ کڈھیا۔ ایہ غیر اہل کتاب دا اک پرانا عقیدہ اسی جہوں عیسائیاں دے

مزانج مطابق نویں سچے وچ ڈھالیا گیا تے فیر ہو لے ہو لے تن خداواں دی ایہ سوچ عقیدہ تشکیل بن گئی۔“

عیسوی کلیسا دی حالت خورے کدے چنگی وی رہی ہووے پر ظہور اسلام توں کچھ چراگدیں تے عیسائی انج وانگ تن

رباں دے ای پجاری سن۔ اوہناں دی تواریخ فساد، مارگٹ، خانہ جنگی، ہولناک جبر تے تعدی، زہر بھری نفرت تے بندیاں

دے دلاں وچوں عقل تے انصاف ناؤں دیاں شیواں کڈھن دیاں کوششاں دی اک دکھاں بھری رُوداد اے۔ کلیسا دے

منصب داراں دے کالے کرتوت حدوں ودھ گئے سن تے کلیسادے وڈکیاں دیاں عیساں، تکبر تے شہوت رانی دے افسانے عام سنے جان دے سن۔ مُڈھلے دور دے ترک دنیا دے عقیدے دی تھان رہبانیت نے لے لئی سی تے راہباں دی روپاشی ضرب المثل بن گئی سی۔ اوہناں دیاں بدعنوانیاں پاروں قسطنطینا تے اسکندریا دے کوچا بازار وچ ہر آن والے دیہاڑے خون دیاں ندیاں وگدیاں سن۔ اوس دور وچ ایہ عقید اپوری طرحاں اپنے نیچے گڈھ چکیا سی کہ مسیح کامل بشروی اے تے کامل خداوی۔ ایس توں ایہ اندازا کیتا جاسکدا اے کہ حضرت موسیٰ دی تعلیم دا حلیہ ایس توں چوکھا وگاڑ دتا گیا سی، کیوں جے اوہناں دی دتی تعلیم اُتے حضرت عیسیٰ دی نسبت ویلے دی دھوڑا چوکھا موٹالے چڑھیا سی۔ آؤ جھاتی پائیے:

بائبل موجب یہودیاں دا خدا محدود تے اک قومی خدا سی۔ ہر تھان تے اللہ نوں خدا وند اسرائیل دانان دتا گیا، جس توں ایہ سوچ پیدا ہوندی سی کہ ایس توں وکھ وی کوئی خدا یاں معبود ہے جہڑا یہودیاں توں علاوہ دو جیاں قوماں دا خدا ہووے گا۔ ایوں واحدیت داسبق اپنی اصل شکل گنوا بیٹھا سی۔ فیراوہ خدا جہنوں یہودی اپنا خدا آکھدے سن اوہ تحریف شدہ تے وگاڑے ہووے عہد ناما عتیق موجب، غضب ناک خدا سی۔ اوہ سمجھدے سن کہ اوہناں دارب اک اجہی ہستی اے جہڑا بندیاں دی سرکشی تے بغاوت پاروں آپے توں باہر ہو جاندا اے تے فیرغے وچ آکے اک پوری قوم سگوں اسدے نال چرند پرند تے مال ڈنگرنوں وی ہمیش لئی مار مکاںدا اے۔ فرشتیاں بابت تے دنیا دی تخلیق بابت اوہناں نے وکھرے تے اچرج عقیدے گھڑ لے ہوئے سن۔ اللہ دی پاک ذات تے فرشتیاں نال رنگ برنگیاں گلاں منسوب سن تے فرشتیاں نوں اللہ دیاں دھیاں من دے سن۔ سوانیاں دی حالت لونڈیاں توں چنگی نہیں سی تے لونڈیاں دی ایہی سی کہ آپوں گھڑی بائبل موجب کوئی غلام یاں لونڈی نوں ڈنڈے مارے تے فیراوہ مار کھانڈیاں مر جائے تے مارن والے نوں صرف ایس صورت وچ سزا دتی جاوے جے غلام یا لونڈی اوسے ویلے تھان مر جائے۔ تے جے کراوہ اک دود دیہاڑے جیوند اہوے تے فیرسز کوئی نہیں۔ ایہ ظلم نرا ایس حد تک ای نہیں سی سگوں جنگاں کردیاں زیر ہو جان والیاں بابت جہڑی پالیسی یہودیت نے اپنائی اوس توں ودھ کے بدتہذیبی دی ہور کوئی مثال نہیں سی۔ مثال موجب ایہ درس کہ ”جدوں خداوند تیرا خدا دشمنان توں تیرے قبضے وچ کردیوے تے اوہناں دے ہر مردنوں تلوار دی دھار نال قتل کردیوے..... اوہناں قوماں دے شہراں دی، جہناں نوں خداوند تیرا خدا تیری میراث کردیندا اے، کسے شے نوں جہڑی ساہ لیندی اے جیوندانہ چھڈنا (استثناء: ۲۰-۱۳-۱۶) تے نالے اوہ جہڑے اے جے منڈے نیں سبھ نوں قتل کرو۔ ہر اوہ زنانی جہڑی مرد دی صحبت توں واقف ہو چکی ہووے، جانوں مار دیوے۔ پر اوہ کڑیاں جہڑیاں اے کواریاں نیں، اپنے لئی جیوندیاں رہن دیوے (گنتی ۳۱: ۹-۱۶-۱۷) حد تے ایہی سی کہ اوس دور دی یہودیت دیاں واہیاتیاں توں خدا دے برگزیدہ بندے وی نہ بچ سکے۔

حضرت نوح دی بابت ایہ لکھدیاں تے آکھدیاں اوہناں نوں بھوراوی شرم نہیں سی آؤندی کہ نوح نے کاشتکاری کیتی۔ اوس نے انگوراں دا باغ لایا تے فیراوہناں انگوراں دی شراب پیتی۔ اوس دے نشے وچ اوہ اپنے ڈیرے تے ننگے ہو گئے۔ پیدائش باب ۱۹ آیت ۳۱-۳۸ وچ ایہ بکواس نظر آؤندی اے کہ لوط پہاڑاں تے جاوسیا۔ اوس دیاں دوویں دھیاں اوس دے نال سن۔ اوہناں صلاح کیتی کہ زمین تے کوئی مرد نہیں رہیا جہڑا دنیا دے دستور موجب اوہناں ول ودھے، کیوں

نہ باپ نوں نشاپیا کے اوس توں کم لیا جاوے تے اپنی نسل باقی رکھن دا سر بندھ کیتا جاوے۔ فیر ایوں ای ہوئی۔ لوط دیاں دوویں دھیاں اپنے باپ توں ای حاملہ ہوئیاں۔ حضرت داؤد بابت جہڑی گٹھیا داستان اوہناں نے گھڑی سی اوس موجب محل دی چھت توں اک سوہنی زنانی اوہناں نوں نہاندی دی۔ داؤد بادشاہ نے اوس نوں سد گھلیا۔ اوس نے اوہدے نال جہڑا ویلا گزرا یا اوس دے نتیجے تے اوہ حاملہ ہوئی۔ ایویں دیاں بہت ساریاں خرافات عربستان دے مذہباں دا حصا بن چکیاں سن تے حضرت داؤد، موسیٰ تے عیسیٰ دے واحد نیت دے مذہب داناں نشان مٹ چکیا سی۔

رب نوں بھلی اُجد لوکائی:

مکدی گل ایہ ہے کہ نبی اکرم a دی دنیا تے تشریف آوری ویلے پوری دنیا تے کوئی اک قوم دی اجہی نہیں سی جہڑی اپنے مزاج وچ صحت مند اکھواسکدی ہووے۔ کوئی اک معاشرہ اجہی نہیں سی جہدیاں عینہاں انصاف، کھرے پن یاں معدلت دے اصول اُتے رکھیاں گئیاں ہون تے کوئی قیادت اجہی نہیں سی جہدے پلے عقل تے سیانف ناں دی کوئی شے ہوندی۔ کوئی مذہب اجہی نہیں سی جہڑا اللہ دے پیغمبراں دی خالص تعلیم دا نمائندہ ہوندا۔ ایوں پوری دنیا تے صحت وند قیادت مکی کھلوتی نظر آؤندی سی۔ اللہ والفظ تے ایوں سی جویں مٹ ای گیا ہووے۔ کجھ گرجے تے خانقا ہواں جہڑے اے جے تیکر ظلمت تے انھیریاں وچ کجھ بندیاں والے کم کردے دسدے سن اوہناں نوں چوکھے توں چوکھا جگنودی اوہ نکڑی جہی لاٹ آکھیا جاسکدا اے جہڑی اوس راتیں دسدی اے جس رات چوکھا انھیرا ہوندا اے تے مینہ وی زور اور ہو یا ہوندا اے۔ ایوں دے حال حالات وچ سوہنے مالک تے خالق نوں اپنے بندیاں دی حالت تے بے بسی تے ترس آیا تے فیر.... فیر اوہ آیا.... جہڑا بس آیا تے دو جیاں وانگ جان لئی نہیں آیا۔

دُنیا جہاں دی لوکائی دے اجد تے جاہل ہو جان تے قرآن آکھدا اے:

﴿ظَهَرَ الْفَسَادُ فِي الْبَرِّ وَ الْبَحْرِ بِمَا كَسَبَتْ أَيْدِي النَّاسِ لِيُذِيقَهُمْ بَعْضَ الَّذِي عَمِلُوا لَعَلَّهُمْ

يَرْجَعُونَ﴾ (الروم: ۴۱)

”دیکھے تے، تے نالے سمندراں وچ لوکائی دے کرتوتاں پاروں فساد پے گیا اے (تاں جے) اللہ اوہناں

نوں سواد چکھا دیوے۔ ایس لئی کہ (اپنیاں علتیں توں) باز آجاوے۔“

جیوندی جانیں قبریں وچ:

رحمت اللعالمین دی دنیا تے تشریف آوری ویلے عورتاں نال کیہ سلوک کیتا جاندا سی اوس دی تفصیل تے اگے آوے گی، ایس عنوان پیٹھ اسیں نکلیاں معصومیاں، نویاں جمیاں دھیاں نال عرب دی جہالت دے رویے دا ذکر کردے ہاں۔

رب سوہنے دا فرمان اے:

﴿وَ إِذَا بُشِّرَ أَحَدُهُم بِالْأُنْثَىٰ ظَلَّ وَجْهُهُ مُسْوَدًّا وَ هُوَ كَظْلِمٍ ۖ يَتَوَارَىٰ مِنَ الْقَوْمِ مِنْ سُوءِ

مَا بُشِّرَ بِهِ أَيْمُسِكَةً عَلَىٰ هُونٍ أَمْ يَدُسُّهُ فِي التُّرَابِ أَلَا سَاءَ مَا يَحْكُمُونَ﴾ (النحل: ۵۸-۵۹)

”تے جدوں اوس نوں دھی جمن دی خبر پڑدی اے تے اسدی شکل ای وگڑی دسدی اے تے اوہدے کلیجے نوں رگھ بھریا جاندا اے، تے ایس گل توں لوکاں توں لکدا پھر دا اے تے سوچدا اے پئی اوس نوں ذلت نال سانجھے یاں جیوندی نوں مٹی وچ گڈھ دیوے۔ سن لوؤ کہ ایہ بڑی مندی گل اے۔“

جاہل عرب جدوں اپنی اولاد نوں قتل کر دے سن یاں اوہناں نوں جیوندی جانیں قبریں وچ وگا دیندے سن تے اوہناں دے سامنے کئی اک سبب ہوندے سن۔ مثال موجب اوہ دھیاں نوں ایس لئی قتل کر چھڈ دے سن کہ کوئی اوہناں دا جوائی نہ بنے یاں لڑائیاں وچ اوہ دشمنان دے ہتھ نہ چڑھ جاوے یاں کسے وی دوجی وجہ پاروں اوہناں لئی کوئی مہنا (طعنا) نہ بن جاوے۔ کدے اوہ روٹی ٹکڑے وسیلیاں دی کمی پاروں اولاد نوں قتل کر دیندے سن تے کدے اپنے کسے معبود دی خوشنودی لئی اولاد نوں اوہناں دی بھینٹ چڑھا دیندے سن۔ اکثر ایہ خیال کیتا جاندا اے کہ ایہ مکروہ رسم عرباں تیکر ای محدود سی پرستج ایہ ہے کہ عربستان توں باہر دے معاشریاں وچ وی ایہ برائی دیکھن نوں لہدی سی۔ نوزائیدہ بچیاں نوں مار سٹن دی رسم ہندوواں وچ ایوں ای عام سی جویں عرباں وچ ۱۱

اسیں جناں وی غور کر لوینے تے جویں وی سر جوڑ کے بہ جائیے سانوں ایس گل دا کوئی جواب نہیں ملدا کہ عربستان دے جاہلاں نے اپنیاں دھیاں نوں جیوندی جانیں مناں مٹی تھلے دین دی بجائے اوس سبب نوں مکان دی کیوں کوئی چتا نہیں کیتی جہڑا اوہناں نوں ایس سنگدلی تے مجبور کر کے جہنم دا بالن بنا دیندا سی۔ اوہناں نوں وڈا ڈرتے ایس گل دا ہوندا سی کہ لڑائیاں وچ جدوں اوہناں دیاں دھیاں بھیناں نوں کوئی دشمن کھوہ کے لے جاوے گا تے اس نوں لونڈی بنا کے رکھے گا۔ فیر جویں داسلوک اس دا دل کرے گا، اوہ کرے گا، اوہ کوئی پچھن ڈکن والا نہیں ہونا۔ ایٹھوں تیکر کہ عرب سرداری اپنیاں لونڈیاں توں پیشا کراندے ہوندے سن۔ ہن جے عربستان دی جاہلیت اجیہاں بھیڑیاں رساں نوں جنم دے سکدی سی تے کیہ وجہ سی کہ اوہ ایویں دا ماحول نہ پیدا کر سکے کہ جنگاں وچ کسے دی دھی بھین دے نیڑے جانا مہنے (طعنے) دی گل سمجھی جاندی..... پر نہیں، ایہ گل اوہناں نوں ایس لئی وارا نہیں سی کھاندی کہ اوہناں نوں آپوں مال غنیمت وچ جھڑی شے چوکی چنگی لگدی سی اوہ خوبصورت عورتاں ای سن۔

عرب وچ کڑیاں نوں جیوندیاں ای دفن کر دین دا ایہ بے رحمانا طریقہ پرانے زمانیاں توں کئی سبباں پاروں رائج ہو گیا سی۔ معاشی نھتا حالی اپنی تھاں پر اصل گل اوہ ہی سی جہڑی اُتے دس دتی گئی اے۔ پتراں نوں تے ایس آس تے پال پوس لیا جاندا سی کہ وڈے ہو کے نال رلن گے پر دھیاں نوں ویاہن دا سیپا تے جنگاں وچ اوہناں دی حفاظت دی فکر، اوہناں دی پرورش وچ رکاوٹ کھڑی کر دی سی۔ اک سبب ایہ وی سی کہ جدوں دشمن قبیلے اک دوجے تے حملا کر دے سن تے جہڑیاں کڑیاں اوہناں دے ہتھے چڑھدیاں سن اوہ اوہناں نوں نال لے جاندے۔ فیریاں تے اوہناں نوں لونڈیاں بنا کے رکھدے تے یاں وچ چھڈ دے سن۔ ایس پاروں ایہ طریقے چل پئے سن کہ یاں تے زچگی دے ویلے ای عورت دے اگے ٹوپا پٹ لیا جاندا سی کہ جے کڑی جیمے گی تے اوس ویلے ای اوس ٹوئے وچ سٹ کے اتوں مٹی پادیواں گے تے جے کرماں

یاں اس دے پیکے ٹبر دے کوئی جی کوئی رولا پاندے تے مجبوراً پو کجھ چراں تیکر اوس دھی نوں پال لینداتے فیر کسے ویلے
صحرا وچ لے جا کے جیوندی نوں دب آؤندا۔ پتھر دل دے لوکی ایہ کم کویں کر دے سن، اوس دا اک قصا اک بندے نے آپوں
ای ”دھیاں دے وارث“ نوں ایوں سنایا۔ اکھے:

میری اک دھی سی جہڑی میرے نال بڑا ہی پیار کر دی سی تے میتھوں بنا اودر جاندی سی۔ میں اوس نوں واج دینداتے
اوہ جی جی میرے کول آؤندی۔ اک دیہاڑی میں اوس نوں اپنے کول سدن لئی واج ماری۔
دھیہ..... نی دھیہ۔

”جی ابا“ اوہج کے آئی۔

”چل پڑ جری باہر پھر آئیے..... چل میری دھی..... چلیں گی نا؟“

”کیوں نہیں ابا جی؟“ ”نہیں آکھو گے تے بھلا تہاڈے نال نہ ٹراں گی۔“

”چل فیر..... چل میری دھی۔“ اوس آکھیا۔

یا رسول اللہ! فیر اوہ میرے نال ٹر پئی۔ راہ وچ اک پرانا کھوہ آیا۔ میں اوس دا ہتھ پھڑیا تے اوس نوں کھوہ دے
نیڑے لیا کے اوہ دے وچ دھکا دے دتا۔ اوہدی اخیری واج جہڑی میرے کناں تیکر اپڑی اوہ سی ”ہائے ابا۔ ہائے ابا“ پر میں
مونہ دھیانے گھر ٹر آیا۔

جہڑا دنیا تے جہالت دے انھیریاں نوں مکان لئی آ یاسی تے جہڑا گھلیا ای ایس لئی گیا سی کہ اوہ ہر پاسے رحمتاں دا مینہ پا
دیوے، تے بے سہارا تے لاچار لوکاں دے اتھر پونجھے، اوس دیاں اپنیاں اکھاں وچ اتھر آ گئے۔
”ایہ توں کیہہ کیتا؟ حضور نوں روادتا ای“ حاضر لوکاں وچوں اک نے غصے نال آکھیا۔
”نہیں ایس نوں نہ ڈکو جہڑی گل اوس دے دل وچ کھنکدی اے اوس بابت اوہنوں سوال کرن دیو۔“
آپ a نے فرمایا تے نالے اوس بندے نوں دوہری وار گل سنان دا آکھیا۔

اوس بندے نے فیر اویں ای گل سنائی۔ آپ اوس دی دھی دا ایہ واقعہ سن کہ ایساں روئے کہ آپ دی داڑھی مبارک
اتھرواں نال چڑ گئی۔ فیر رحمت اللعالمین نے فرمایا کہ بندیا! جاہلیت وچ جو کجھ ہو گیا سو ہو گیا، اوس نوں اللہ نے معاف کر
دتا۔ بن نویں سرے اپنی حیاتی دامنڈھ بنھ۔

مولانا مودودی لکھدے نیں کہ ایہ آکھنا درست نہیں کہ عرب دے لوکاں نوں ایس انتہائی غیر انسانی فعل دی قباحت دا
سرے توں کوئی احساس ای نہیں سی۔ ظاہری گل اے کہ کوئی معاشرہ بھادیں اوہ کناں ای وگڑ چکیا ہووے، اوہ ایوں دے ظالمانا
کماں دی برائی دے احساس توں اصلوں ای سکھناتے نہیں ہو جاندے۔ ایسے پاروں قرآن پاک وچ ایس فعل دی قباحت تے
کوئی لمی چوڑی تقریر نہیں کیتی گئی سکوں روئکے کھڑے کر دین والے اکھراں وچ نرا ایہہ آکھ کے چھڈ دتا گیا اے کہ اک ویلا
آئے گا جدوں جیوندی جانیں بھونیں وچ گڈھ دتی گئی کڑی نوں پچھیا جاوے گا کہ توں کس قصور وچ ماری گئی سیں۔

﴿وَإِذَا الْمَوْءِدَةُ سُئِلَتْ ۖ بِأَيِّ ذَنْبٍ قُتِلَتْ ۖ﴾ (التکویر: ۸-۹)

”تے جدوں جیوندی گڈھی گئی کڑی نوں پچھیا جاوے گا کہ کھڑے گناہ پاروں قتل کیتی گئی۔“

﴿عَلِمْتُ نَفْسٌ مَّا أَحْضَرْتُ﴾ (التکویر: ۱۴)

”ہر کسے نوں پتا لگ جاوے گا جو اوہ لے کے آیا ہووے گا۔“

ایس دی تفسیر وچ حافظ ابن کثیر لکھدے نیں کہ اہل جاہلیت دھیاں نوں پسند نہیں سن کردے تے اوہناں نوں زندا در گور کر دیندے سن۔ اوہناں دھیاں نوں قیامت والے دن پچھیا جاوے گا کہ اوہ کیوں ماریاں گئیاں تاں جے اوہناں دے مارن والیاں نوں چوکی ڈانٹ ڈپٹ تے شرمندگی ہووے۔ تے ایہ گل دی چیتے رہوے کہ جدوں مظلوم نوں سوال ہونا اے تے فیر ظالم دا کہنا ای کیہ اے تے ایہہ وی آکھیا گیا وے کہ اوہ آپوں پچھن گئیاں کہ اوہناں نوں کھڑی وجہ توں زندا در گور کیتا گیا۔

میرے عزیز پڑھنہارو! جے علامہ حافظ عماد الدین ابن کثیر دی گل نوں کجھ اگانہ ٹورینے تے بندھا ڈنگھیاں سوچاں وچ ڈب کر رہ جاندا اے کہ اک عجیب بے بسی دی صورت ہووے گی۔ انسان پراگندہ پروانیاں وانگ ہون گے تے پہاڑ پنچی ہوئی رائی اُن وانگ۔ ننگے پنڈے تے ننگے پیریں اپنے ہی مڑھکے وچ کوئی مونہہ تیکر ڈبیا ہووے گا تے کوئی کناں تیکر۔ ایہو جے وچ اک ویلا حساب دا آوے گا تے بیجے ہوئے نوں وڈھن دیاں دعوتاں ملن گئیاں۔

فیر جدوں مظلوم کوں ظالم نوں ساہمنے کھلا ر کے سوال کیتا جاوے گا تے اوس دا مطلب کیہ ہووے گا؟ تھوڑی بہت سمجھ رکھن والا بندہ ایہ گل جان دا اے کہ ایہہ مطلب ہے انصاف دا طلب گا اپنے مونہہ توں انصاف کرن والے اگے التجاواں کرے گا تے نالے آکھے گا کہ ربا! توں ای بہتر جان داہیں کہ میرے نال ظلم کیوں ہوئی یاں ظلم کرنا والا کہ اوس نے کیوں کیتا۔ تے فیر خورے رب ای ظالم نوں آکھے گا کہ بول بھئی دس، آپوں دس۔ تے فیر زباناں گنگ ہو جان گئیاں تے تکرپاں بول پین گئیاں۔ اودوں پتے لگ جان گے کہ رب نے ایوں ای زمانے دیاں قسماں کھا کھانئیں سی آکھیا کہ بندہ تے ہے ای گھالے وچ۔ آؤ دیکھیے کہ ساڈے وچ ہر کوئی کوں گھالے وچ اے تے جے کر پتا نہ لگے تے فیر کسے سوجھوان جی دا پلا پھڑینے تے پتالان دا جتن کرینے۔

سوانیاں یاں پشو ڈنگر:

ایس حقیقت توں بالکل انکار نہیں کیتا جاسکدا تے جے کوئی اپنی کم علمی پاروں اج کرے گا وی تے کل اوس نوں ویلا ایہ گل منوالے گا کہ عورت ذات تے جنے احسان نبی آخری الزمان حضرت محمد a دے نیں اینے کسے ہور مذہب، ادارے یاں بندے دے نہیں ہین، سگوں ہوائی نہیں سکدے۔ جے کرایہ آکھیا جاوے کہ ایس دی حالت جنوراں توں بدتر سی تے ایہ گل اوس دور دی صحیح عکاسی کرن لئی کافی تے صحیح نہیں کیوں جے اوس دور دے جنور تے مالکاں کوں چنگی چوکی سیوا کرا لیندے سن تے جے کر مالک کدھرے گھروں دریڈا جاندا سی تے پچھے رہ جان والی اٹھیاں بکریاں دے پٹھے دتھے تے پانی دا پورا بندوبست کر کے جاندا سی۔ دو جے پاسے جاہلیت دی عورت اپنی عفت و عصمت دی آپ مالکاں نہیں سی ہوندی تے

جدوں اوس دامالک گھروں باہر جاندا سی تے اوہ ہمیش ای اک تکلیف دہ تے صبر آ زماؤن والی بے اعتباری دا شکار ہوندی سی۔ مالک یا خاوند ایس ڈرتوں کہ زنانی کچھ کوئی بھیڑ نہ کردی پھرے اوس نوں ایوں سیل کر جاندا سی تے اوس نوں ایوں دا اک غلاف چڑھا جاندا جنوں غلاف عصمت آکھیا جاسکدا اے۔ اوہ غلاف زنانی دے لک توں لے کے دوواں پیراں نوں کسے رکھدا سی۔ خاوندیاں مالک سفر توں پچھاں پر تدا تے اوہ اپنے تھیں ایس ”حفاظتی بند“ نوں کھولدا۔

عرباں نے اپنیاں بیوا عورتاں نال جہڑا سلوک کیتا اوہ ہندوواں دی رسم، ستی، توں بعد خورے سبھ توں چوکھا ظالمانا سلوک ہووے گا۔ ظلم دی ایہ اک بڑی عجیب تے کراہت بھری شکل اے جہدی سوچ نال ای بندے دیاں اکھاں اگے اک مکروہ تے جاہل تہذیب دی شکل گھم جاندی اے تے اوہ ایہ ہے کہ عربی اپنی بیوا زنانی نوں پاٹے پرانے لیڑے پوا کے اک نکلی جہی کوٹھڑی وچ بند کر دیندے، جتھے اوہ وچاری اک پورا اورھا ایوں ای قید رہندی سی۔

سہاگناں نوں عصمت دے غلاف پوانا تے رنڈیاں نوں ڈنگراں دے جنسی تلذذ دا سامان بنانا، ایہ سی میرے آقا a دے تشریف لیان توں پہلوں عرباں دی حالت۔ نری ایہ گل اوس دور دی صحیح تصویر نہیں۔ اصل گل ایہ ہے کہ عورت ہوندی ای اک مال منقولہ لاسی۔ اوس دی اپنی ذات بابت اوس دی رائے کوئی معنی نہیں سی رکھدی۔ ایہ توں تیکر کہ شادی ویاہ دے معاملے وچ وی اوس نوں فریق نہیں سی سمجھیا جاندا۔ بس مرداں نے جہدے حوالے کردتا اوسے دی ہوگئی۔ اوس دور دی عورت نوں عیاشی لئی طلب کیتا جاندا تے مرد دی اکتاہٹ دے نال ای اوس دی حالت سون بھادروں وچ نظر آؤن والی غیر اہم مخلوق توں دکھ نہ رہندی۔ اوہ دے محترم تے باوقار ہون دے معیار تے کسوٹیاں مرد دے دل دی کیفیت تے بوجھے دی حالت دے نال نال بدلے رہندے۔ کوئی زنانی جنس دی جنی وی تسکین کر سکے اوہ اوڈی ہی جتنی تے سیانی اے۔ سوئی، جوان تے جنسی جبلت دے تقاضیاں دے مطابق اے تے اوہ عورت ہے، نہیں تے تاش دا اوہ پتا جہڑا کچھ وی جت نہ سکے۔ اوہ جاندا دی مالک نہیں سی بن سکدی تے قانون وراثت وچ اوس دا خانا خالی سی۔ جنگاں وچ جتن والے، ہارن والے قبیلیاں دیاں عورتاں نوں غنیمت سمجھدے تے اوہناں نوں بھڈاں تے بکریاں وانگ آپس وچ ونڈ لیندے۔

مال غنیمت وچ ہتھ آؤن والیاں زنانیاں، مرداں لئی جنسی کھڈونے تے ہونڈیاں ای سن، اوہناں نوں اگے وچ وی دتا جاندا سی۔ کسے مالک نوں عورت دی قیمت دے کے خرید لینا کوئی وڈی گل نہیں سی۔ ایوں دی فروخت مکہ، بازنیپیا تے ایران وچ عام ہوندی سی۔ خریداراں نوں دھیان دوان لئی ایہناں تھاواں تے گیت گائے جاندے تے بعض ویلے شہوت پرست گاہکاں دی کشش لئی کھلی بولی وچ اوہناں نوں ننگا کر کے دکھایا جاندا۔ تے فیر اوہ گاہگ سودے نوں ایوں ٹوہ ٹوہ کے ویکھدا جویں اج کل وڈی عید تے جانور ویکھے جاندے نیں۔

عرب دے لوکاں نے عورت دی تذلیل دا کوئی طریقہ باقی نہیں سی چھڈیا۔ اوہ ماں تے اوس دی دھی نال اکو ویلے

حیات محمد، صفحہ ۳۳۴۔ عبدالحکیم، خلیفہ، ڈاکٹر۔ دی پرافٹ اینڈ ہز میسج۔ ۱۹۸۷ء۔ صفحہ ۲۸۱۔

فدا حسین، واٹو آف دی پرافٹ، صفحہ ۲۵۔

ویاہ رچا لیندے تے ایویں ماں دھی نوں سوکناں بنا دیندے۔ جے کوئی بندا ڈھیر ساریاں بیویاں یاں لونڈیاں چھڈ کے مرجانداتے اوہ منقولا جائیداد وانگ اوس دے پتر کول ٹر جاندیاں تے فیر اوہ پتر اوہناں سبھ نوں (سوائے اپنی اصل ماں توں) اوویں ای جان دا، جوئیں اس دامرنا والا پیو۔ زنا کاری دے نویں طریقے تے وکھرے رنگ سن۔ لوکی اپنی سربراہی وچ رہن والیاں عورتاں نوں رہن وی رکھ دیندے سن۔ ایویں ای اک وار کعب بن اشرف نے غلے دے بدلے زنانیاں نوں رہن رکھن دا مطالبہ کیتا سی ۷ گھر والیاں وٹالین داوی رواج سی۔ اک واری ایویں وی ہوئیا کہ عیینہ بن حصن نبی اکرمؐ کول آئے تے اپنی جاہلیت دے زمانے دی عادت پاروں بغیر اجازت لین توں اندر آ گئے۔ اس ویلے حضور کول حضرت عائشہ تشریف رکھدیاں سن۔ اوہ اٹھ کے پردے وچ ٹر گئیاں تے چکھن لگا کہ ایہ کون سی؟ حضور a نے فرمایا کہ (ام المؤمنین حضرت) عائشہ سی، میری گھر والی۔ آکھن لگا میری سوانی ڈھیر سوئی اے تے اوس ورگی کوئی وی نہیں، میں ایس (جناب عائشہ) دے بدلے تہا نوں اوہ دے دیناواں تے تسیں ایہناں توں دستبردار ہو جاؤ۔ حضور نے فرمایا کہ اوہ ویلے گئے جدوں ایویں وی ہوندا سی۔ ہن بیوی اوسے دی ہے، جسدی ہے۔ ہن اللہ نے ایویں کرنا حرام کر دتا اے۔ ۱۱ اندازا کرو کہ کوئیں کوئیں عورت دی تذلیل کیتی جاندی رہی اے۔

وڈے وڈے رئیس تے اچے شملیاں والے وی بدکاری دی کمائی کھان توں گریز نہیں سن کر دے۔ عبداللہ بن ابی مدینے دا چودھری سی تے ایویں دا بندہ سی کہ ہجرت مدینہ توں پہلوں لوکاں نے اوس نوں مدینے دا بادشاہ بنان لئی تاج دی بنوالیاسی۔ اوس دیاں لونڈیاں سیلتے تے امیمہ اوس دے ہتھوں پیشا کرن تے مجبور ہوندیاں سن۔ تاں ہی تے رب نے ایہ حکم جاری کیتا:

﴿وَلَا تُكْرِهُوا فَتِيَاتِكُمْ عَلَى الْبِغَاءِ﴾ (النور: ۳۳)

”تے آپنیاں لونڈیاں نوں زنا تے مجبور نہ کرو۔“

عورتاں آپوں وی بناؤ سنگھار وچ حدوں لنگھ جاندیاں سن۔ زیب زینت، تے اج دی زبان وچ اپنا فکر (Figure) وکھان لئی پورا ٹل لاندیاں۔ مردوزن اک دو جے دے آہنے ساہنے آؤندیاں ہیجان پیدا کرن والیاں حرکتاں تے جنس نوں ابھارن والے جملے بولدے، جوئیں کہ ابوسفیان دی سوانی ہند نے جنگ اُحد وچ کیتا۔ اس دے نال اوہدیاں سہیلیاں دا پورا جتھاسی۔ اوہ اوہے مرداں دا دل پرچاؤندیاں رہیاں تے ایویں دے شعر پڑھدیاں رہیاں:

ان تفتل و نسايق و تفرنن النصارق او تدبر و انفارق فراق غير و امق۔

جے تسیں اج دل کھول کے لڑے تے کل تسیں ساڈی جھولی وچ ہوو گے تے جے کنڈ وکھا کے بھیج گئے تے اسیں ہمیش لئی تہا تھوں وکھ ہو جاواں گئیاں۔

ایہو ہند جہڑی سکے دی چودھرائی وی بنی پھر دی سی، کھلے عام دو جے مرداں نال عشق کر دی پھر دی سی تے ایس گل تے

سیرت ابن ہشام، جلد دوم، صفحہ ۳۴۔

تفسیر ابن کثیر، سورہ احزاب۔

ابوسفیان یاں قبیلے دے دو بے لوکی مونہہ وچ گھنگلیاں پائی کھلوتے سن۔ کتے تک وچ ایہ دستوری کہ اک اک حسینا نازنین دے دس دس خصم ہوندے تے جدوں اوہ کوئی بال جمدی تے مہاندرا ویکھ کے آکھ دیندی کہ ایہ فلانے دا اے۔ مجال سی کہ اوہ بندا آکھے کہ نہیں، ایہ تے میرا نہیں۔ بندے تے زنانی دا جدوں معاشقا ہونداتے اک دو بے دے ہر عیب تے برائی نوں لکائی رکھدے تے محبوبہ نوں تقدیس دی دیوی ثابت کر کے رہندے، پر جدوں کوئی ناراضگی یاں وگاڑ ہونداتے اوہ دیوی دی بے حیائی دے دفتر کھل جاندا کہ جویں اوس وچ برائی توں ہٹ کے کوئی ہور گل ہے ای نہیں۔ اوس دی صاف شفاف گردن دا نقشہ تے اوس دے ابھرے ہوئے سینے دا خاکا ایوں دے اکھراں وچ کھچیا جاندا کہ شرم اپنا مونہہ نوچ لوے۔

ایوں ای اُس دے لک تے پشت دی بھیڑ کڈھی جاندی کہ سوچیا نہیں جاسکدا۔

پرانیاں تہذیبیاں وچ روم تے یونان دیاں تہذیبیاں نوں ہمیش ای اپنے آپ تے فخر رہیا اے۔ اوتھے وی حال ایہی سی کہ عورت اک ادنا درجے دی مخلوق سی۔ معاشرت دے ہر پہلو وچ اس دا مرتبہ ڈگیا ہو یا سی۔ جدوں تمدنی ارتقاء وچ یونانیاں تے نفس پرستی تے شہوانیت دا غلبہ شروع ہو یا تے اوس دور وچ طوائف نوں اوہ عروج نصیب ہو یا جس دی نظیر پوری انسانی تواریخ وچ نہیں لہدی۔ رنڈی دا کوٹھا یونانی معاشرے دی شان سی۔ فلاسفر، شاعر، مورخ، اہل ادب تے ماہرین فنون کون سی جہڑا اوس توں دور رہیا؟ یونانیاں دے ذوق جمال تے حسن پرستی نے شہوانیت دی اک نوں رنج کے مچایا۔ ایٹھوں تیکر کہ اوہناں دے ذہناں وچوں ایہ تصویر ای جاندا رہیا کہ شہوت پرستی وی کوئی عیب اے۔ مذہب تے دی شہوت دا رنگ چڑھ گیا تے کام دیوی (Aphrodite) دی پوجا سارے یونان وچ ہون لگ پئی جہدی کہانی ایہ گھڑی گئی کہ اک دیوتا دی بیوی ہوندیاں ہو یاں وی اوس نے تن ہور دیوتاواں نال آشنائی رکھی سی تے نالے اک فانی انسان نال وی۔ اوہ دے وچوں محبت دا دیوتا کیو پڈ پیدا ہو یا جہڑا اوس دے اپنے خاوندانہ نہیں سی۔ ایہی اوس قوم دی معبودا۔ اندازا کرو کہ عبودیت دے فرائض ادا کرن لئی اوہناں نوں اک فاحشا ای لہی۔

ایس تہذیب وچ قبا خانہ عبادت گاہ، فاحشا تے طوائف دیو داسیاں، تے زنا کاری عبادت بن گئی۔ لیکن ایس یونانی عورت دی ذلت دا ذکر ایوں کر دا اے:

”مجموعی حیثیت وچ باعصمت یونانی زنانی دا مرتبہ حد درجہ پست سی۔ اس دی حیاتی ہمیش دی غلامی وچ ای لنگھ جاندی۔ نکلے ہوندیاں اپنے مایاں دی، جوانی وچ اپنے خاوند تے بیوگی وچ اپنے پتراں دی۔“

روم وچ وی عورت دا حال کوئی چنگا نہیں سی۔ مردنوں بیوی تے پورے مالکانہ حقوق حاصل سن۔ بعض حالاں وچ تے اوہ بیوی نوں قتل کر دین دا وی مجاز سی۔ نکاح صرف اک قانونی معاہدہ سی۔ طلاق کوئی قابل شرم چیز نہیں سی تے عورتاں اپنی عمر دا اندازا اپنے خاوندانہ دی تعداد توں لاندیاں سن۔ اخلاق تے معاشرت دے بند جدوں ڈھلے پئے گئے تے روم وچ شہوانیت،

حیات محمد دے باب نمبر ۱۹ توں ماخوذ۔

مولانا مودودی دی ”پردہ“ توں ماخوذ۔

لیکن، تاریخ اخلاق یورپ، جلد دوم، صفحہ ۱۸۲ بحوالہ چوہدری غلام رسول، اسلام کے کارہائے نمایاں۔ صفحہ ۲۴۔

عریانی تے فحاشی دا ہڑ آ گیا۔ تھیڑاں وچ بے حیائی تے عریانی دے مظاہرے ہون لگ پئے۔ نیکیاں تے فحش تصویراں گھراں دی زینت لئی ضروری ہو گئیاں۔ فلوراناؤں دا اک کھیڑا رومیاں وچ بڑا مقبول ہو یا کیوں جے اوہدے وچ برہنا عورتاں دی دوڑ لگدی سی۔ پوتر خنداں وچ وی بیوی دی حیثیت اک داشتاورگی دی نہیں سی۔

ظہور اسلام توں کجھ چراگدیں تیکر عرب دے گوانڈھی ملک فارس تے اج دے ایران دی حالت ایہی سی کہ پیو دا دھی نوں تے بھرا دا بھین نوں حق زوجیت وچ لے لینا کوئی معیوب گل نہیں سی۔ گریز دگردثانی نے جہڑا پنجویں صدی عیسوی دے وسط وچ فارس دا بادشاہ سی، اپنی سکی دھی نال ویاہ کیتا تے فیرواں نوں قتل وی کردتا۔ بعثت نبویؐ توں چند ورھے اگدیں مزدک دی تعلیم نے ایران وچ جنگی تنہا پھیری۔ اوس نے آکھیا کہ دولت تے عورت کسے دی میراث نہیں سگوں ساری قوم دا کٹھا تے سانجھا ورثا اے۔ ایس لئی جویں دولت سبھ دی سانجھی اے ایوں ای عورت وی سبھ دی سانجھے دارا اے۔ ایس دا متریا تے صاف مطلب ایہی سی کہ کوئی بندہ کسے دی سوانی نال ہم بستر ہو سکدا اے۔

مصر وچ وی سوانیاں دا حال ایوں دا ای سی۔ فحہ گری دا پیشا عام سی۔ مصری فراعنا دے حرم وچ ان گنت عورتاں ہوندیاں سن۔ اوہ سکیاں بھیناں تے کدے دھیاں نوں وی حق زوجیت وچ لے لیندے۔ محرمات وچ نری سکی ماں سی، ہور کوئی نہیں۔

مغربی دنیا دیاں اخلاقی گراوٹاں دا علاج کرن لئی عیسائیت اپڑی۔ مڈھلے دور وچ تے اوہناں نے چنگا کم کیتا تے فیر اوہناں دے نظریے ایوں دی شکل وچ سامنے آئے کہ اوہ فطرت دے اصولاں دے خلاف، سگوں اوہناں دے خلاف اعلان جنگ سن۔ اوہناں دا پہلا تے مڈھلا نظریہ ایہی سی کہ عورت گناہ دی ماں تے بدی دی جڑ اے۔ مرد لئی گناہ دی تحریک تے جہنم دا بواہا اے۔ سارے انسانی دکھاں دا مڈھ عورت توں بچا۔ اوہ شیطان دا سبھ توں وڈا ہتھیار اے۔ اوہ دنیا، تے دنیا والیاں تے لعنت تے مصیبت لیاؤندی اے۔ اسدے شرمندیاں ہون لئی ایہہ گل ای ہتھیری اے کہ اوہ عورت اے۔

ترتولیاں جہڑا مڈھلے دور دا اک عیسائی سیاناسی، عورت بابت مسیحی تصور دی ترجمانی ایوں کر دا اے کہ ”اوہ شیطان دے آؤن دا دروازہ تے شجر ممنوعہ ول لے جان والی، رب دے قانون نوں توڑن والی تے خدا دی تصویر مردنوں غارت کرن والی اے۔ کرائی سو سم جہڑا مسیحیت دے اولیائے کبار وچ گنیا جاندا اے عورت تے ایوں تبصرا کر دا اے:

”اک ناگزیر برائی، اک جماندرو ووسوسا، رعب وچ آئی اک آفت، گھر لئی اک خطر، غارت کرن والی دلربائی تے بچی

بنی ہوئی اک مصیبت۔“

تے آؤہن ویکھئے کہ ساڈی اپنی دھرتی ہندوستان وچ اسلام دی شمع منور ہون توں اگدیں، تے محمد بن قاسم دے گھوڑیاں دے پیراں دی چاپ سنن توں پہلوں عورت نال ہندو تہذیب دی چھتری تھلے کیہ سلوک کیتا جاندا سی۔ صورت حال استھے وی کوئی دکھری نہیں سی، تے ہووی کویں سکدی سی؟ جہڑی قوم اپنے سارے مرداں نوں اک صف وچ کھلوٹی

مودودی، مولانا، پردہ، صفحہ ۲۱۔

مولانا مودودی دی ”پردہ“ توں ماخوذ۔

نہیں دیکھ سکدی اودہ عورت نوں کوں ایہ اجازت دیوے گی کہ اودہ اوس دے ساہمنے کھلون دی جرأت کرے، ہتی ہوندیاں جرم پکھے تے ہمیش دی غلامی دی وجہ پکھے۔ کیوں جے ایوں پچھناتے اوہناں نیڑے اک نہ معاف ہون والا جرم اے۔ آگینا تے ایہ محمدؐ لئی اے ہندوواں لئی تے نہیں نا۔

عورت بابت ہندوواں دا روایا کجھ ایوں دا پر اسرار تے نفرت بھریا رہیا اے کہ مغربی محقق اچ وی اوہناں نوں جانن تے مجھن لئی، تے اوہناں دی تواریخ کھنگالن لئی ہندوستان دا رخ کر دے نیں۔ ایہناں دا قانون آکھدا اے کہ ”تقدیر“ طوفان، موت، جہنم، زہ، زہریلے سپ، ایہناں وچ کوئی وی ایذا خراب نہیں جڈی عورت۔“ کسے عورت دا بچا نہ جن سکنا یاں دھی تے جنی پر پتر نہ ہو یا، ایہ ہندو معاشرے نوں گوارا نہیں سی۔ عرب دے لوکی تے اک ورھے لئی کسے بیوہ نوں سوگ بالجبر تے مجبور کر دے سن، ہندو ساری حیاتی لئی کر دے سن۔ اودہ وی اودوں جدوں کوئی چنگے بختاں والی ستی ہون توں بچ رہوے، نہیں تے اصل سزاتے ایہ ہے کہ اودہ وی اوسے پتا وچ سڑ مرے۔

ہندو قانون آکھدا سی کہ کسے اچی ذات دے مرد دانیویں ذات دی عورت نال زنا کرنا کوئی جرم نہیں۔ یعنی عورت وچاری نوں اچی ذات دے مرداں لئی شاہراہ عام تے برہنا کر دیو تے اچی ذات دے مرداں نوں اپنے قانونی حق موجب ایہ اختیار دے دیو کہ اودہ جویں چاہن اس دی تذلیل کرن۔ تے ہے وی ایسے طرحاں۔ ایہ ہندوستان وچ ہمیش ای تماشا بنی رہی۔ ایہ جوئے وچ ہاری جاندی، اک ویلے وچ کئی کئی مردالیں نوں اپنے تصرف وچ لیاؤندے، میلے ٹھیلیاں وچ شراب وچ بدمست ہوندے تے ماں بھین تے دھی تیکر دی تمیز مک جاندی۔ جنوراں وانگ سر عام الیں دی خرید و فروخت ہوندی۔ بیو، دھی نوں وچ دیندا، نو جوان کڑیاں دا دیوتاواں دے حضور چڑھاوا چڑھایا جاندا تے مندریں وچ سوامیاں تے پجاریاں نوں کڑیاں پیش کر دینا ثواب دا کم سمجھیا جاندا سی۔

اصل وچ مذہب وچ جنس دے اختلاط دی جھڑی مثال ہندوستان وچ ساہمنے آؤندی اے اودہ ہور کدھرے نہیں۔ انتاں دے واہیات تے شرم حیاتوں خالی دیوی دیوتا دے جنسی قصے مذہبی کتاباں وچ لکھدے نیں۔ جنس دے دیوتا لنگم دی پوجا عام سی۔ گویا ہندوستان وچ زنا کاری تے عورت دا جا بجا استعمال اوہناں نیڑے بہت سارے دکھاں دا مداوا سی۔ کجھ مورخین ایہ وی لکھدے نیں کہ ہندو مذہب وچ اک فرقا اجیا وی سی جھڑانگی عورتاں دی پوجا کرداسی۔ مندریں وچ پجاری تے محلاں وچ بادشاہزادے اخلاق دیاں دھجیاں اڈاؤندے دسدے سن۔

مندراں وچ بد اخلاقی دا وطرہ ابے تیکر باقی اے۔ ۲۰ ویں صدی دا اک وڈا ہندو راہنما مہاتما گاندھی اپنی خود نوشت ”ملاش حق“ وچ لکھدا اے:

”میں ویشنو ماں باپ دے گھر پیدا ہو گیا۔ ایس لئی مینوں اکثر ”حویلی“ جانا پیندا سی پر ایہہ مندر میرے دل نوں نہیں لگدا سی۔ اوس دی شان و شوکت تے چمک دمک مینوں پسند نہیں سی۔ میں ایہ افواہاں وی سنیاں کہ او تھے بدکاری ہوندى

چھتے رہوے کہ اک حدیث وچ رسول خداؐ نے عورتاں نوں آگینے آکھیا اے۔

اے۔ ایس لئی مینوں اس مندر نال کوئی دلچسپی نہ رہی۔

منتراں وچ اتھے تیکر پڑھن نوں لہدا اے کہ عورتاں دے دل بھگیاڑاں دے بھٹ نیں تے ایہ عقل توں خالی نیں۔۔ برہمن گرنہ تے شاستر آکھدے نیں کہ عورت تے شور دوویں نزدھن (مال توں محروم) نیں۔ عورت باپ دی جائیداد دی وارث نہیں، دو جائز کاح نہیں کیتا جاسکدا، خلع دی ممانعت اے بھادیں خاوند جو یں داوی ہووے، عورت دا وجود نرا بچے جنن لئی اے تے ایس نوں جوئے وچ ہاریاں وینچیا جاسکدا اے۔

الغرض تہذیب تے تمدن دے اوہ سارے دور جہناں دا تعلق رحمت اللعالمین a توں پہلے دے زمانے نال اے، اوہ عورت دی بے بسی، لاچاری تے انتاں دی محتاجی تے بے اختیاری دیاں داستاناں رو رو بیان کردے سنندے نیں۔ عورت تے کیہ بیتی، تے اوہ کہہ اظلم اے جہڑا اوس تے نہیں کیتا گیا، اسیں ویکھ لیا۔ قربان جائیے اوس سوئی، ہستی توں چہنے عورت نوں ایہناں اُنھیریاں وچوں باہر کڈھیا۔



حضور a دے وڈ کے

ابراہیم g حلیل اللہ:

سوائے کچھ متعصب مستشرقین دے، جہناں وچ ولیم میور داناں چوکھا جانا پچھانیا جاندا اے، ہر کسے ایس گل نوں منیا اے کہ آنحضور a جناب خلیل الرحمان تے ابوالانبیاء حضرت ابراہیم دی اولاد وچوں نیں۔ یورپین تے یہودی مورخاں دی اک وڈی تعداد تے ایس گل نوں وی من دی اے کہ سارے شمالی عرب تے حجاز دے وسنیک اصل وچ حضرت ابراہیم g دی اولاد نیں۔ ایس لئی جدوں جناب رسول اکرم a دے وڈکیاں دی گل ہوئے گی، تے اوس دامدھ حضرت ابراہیم خلیل اللہ تو ہی بجے گا۔

عہد ابراہیمی وچ خورے پورے کرہ ارض اُتے اک چپا تھاں وی اجہی نہیں سی رہ گئی جتھے صنفی دین دی کوئی گل ہوندی ، تے نیلی چھتری تھلے وسدا کوئی اک بندا وی اجہیا نہیں سی جہڑا رب ابراہیم دا نام لیوا ہوندا۔ ایہو جے حالاں وچ جدوں جناب ابراہیم g نے کلدان وچ توحید دے نعرے مارنا شروع کیتے تے رب دی دھرتی اُتے رب بن کے بیٹھے چودھریاں نوں ایگل کوئی چنگی نہ لگی۔ کون نہیں جان دا کہ جدوں وی کوئی اللہ دا بندا خلق خدا نوں ”اک اللہ والا راہ“ دکھان دا جتن کردا اے تے اوہناں گرگاں نوں تکلیف ہو کے رہندی اے جہڑے مونہہ توں بھائیں رب ہون دے دعویدار نہیں ہوندے پر اپنے کرتوتاں نال اوہ ثابت کردے نیں کہ اصل وچ اوہناں دے اثر والے علاقیاں وچ وسدی رب دی مخلوق دے رب اوہ نیں، اللہ نہیں۔ حضرت ابراہیم g نال وی ایہو ای چالا ہويا، سواوہناں نے حضرت ہاجرہ تے نکے جیہے اسماعیل نوں نال لیا تے حجاز وچ آسوں کیتی۔ اتھے جناب اسماعیل g دے جوان ہونداں ای اللہ دے حکم نال خانہ کعبہ دی بے نشان عمارت نوں نویں سرے اُساریا۔ دوواں پیو پتراں دے ہتھوں کعبہ دی تعمیر نو کوئی نکا جیہا کم نہیں سی پر اوہناں رب سوہنے دے خاص کرم نال ۲۷ فٹ اچی ۹۶ فٹ لمی تے ۶۶ فٹ چوڑی عمارت اُسار دتی۔

رب دا گھر بن گیا تے ایس گل دی لوڑ پئی کہ کوئی اللہ دا بندا ہر کم توں وکھ تے آزاد ہو کے اپنی حیاتی ایس دی نذر کر دیوے۔ ایوں حضرت ابراہیم g نوں خاب دکھایا گیا کہ اوہ اپنے پترنوں اپنے ہتھیں ذبح کر رہے نیں۔ اے ہوراں ایہ گل لاڈلے پتر تے تعمیر کعبہ دے سگی نال کیتی تے اوس نے آکھیا ”بابا جی ڈیر کس گل دی اے، اللہ داناں لوؤ۔“ پیو نے، نہ پتر نے، کسے وی اک دوجے نوں بجھارتاں وچ نہیں پایا۔ ذبح کرن والا تے ذبح ہون والا، دوویں ایوں تیار ہوئے جویں کوئی پھوڑا ذبح کرنا ہووے۔ سوچن دی گل اے کہ اک اچھے بندے نوں اپنا پتر ذبح کرن دا آکھیا گیا جہنوں اچھے کل بلدے بھانڈاں نال واہ پیاسی تے ہن اوس دے دل نوں کچھ تسکین سی کہ جوان پتر موڈھے نال موڈھالان جوگا ہو گیا اے تے اوس نال رل کے کعبہ دی عمارت اُسار کے اپنی فرمانبرداری تے تابعداری دا چوکھا چنگا ثبوت وی دتا اے۔ تے ایوں اوہ پتر دے

روپ وچ ابے ہوراں دا اک بجن یاروی بن چکیا سی۔ پرایہ گل میں تے تسیں سوچ رہے ہاں، ذبح اللہ دے ابے ہوراں دی زبان یاں دل وچ ایہ گل ہرگز نہیں آئی کہ آج آساں تے امیدیں دا دیو ابجھ چلیا اے تے ایوں پترنے وی ”آداب فرزند“ والی حد کر چھڈی۔ آکھن لگا ”ابا جی! تہا نوں جو حکم ملیا اے اوہ کر سٹو۔ اللہ نے چاہیا تے میں صبر کرن والا رہواں گا۔“

لوہن ذرا خیالاں دیاں اکھاں نوں کھولتے ویکھو کہ مکے وچ کیہ تماشا ہون لگا اے۔ ۹۰ ورہیاں دا اک بڈھا بابا اپنے پندراں ورہیاں دے نوجوان پترنوں ذبح کرن لئی چھری رگڑ رگڑ کے تیز کر رہیا اے..... ہُن چھری پھڑ کے اوہ اپنے لاڈلے، محبوب تے فرماں بردار پترول ودھ گیا اے..... لو آستیناں چڑھ چکیاں نیں..... نوجوان پتر ابے ہوراں نوں اکھاں تے پٹی بنھ لین دا مشورہ دیندا ہویا ساہنے لیٹ گیا اے تے آکھ رہیا اے ”ابا جی! جو حکم ہویا جے کر گزرو۔“ پتر ابے ہوراں نوں رب دے حکم دی چھیتی تعیل دا مشورہ دے رہیا اے تے فرشتے، بڈھا اسمان، دھرتی دافرش، سگوس ساری کائنات ایہ تماشا ویکھدیاں ایس سوچ وچ ڈبی ہوئی اے کہ ایس توں اگدیں تے کدے ایوں نہیں سی ہویا۔ ہیں! ایہ کہ ہونیا؟ پیو، اپنے پندراں ورہیاں دے نوجوان پترنوں حلال کرن لگا اے۔ ایہ کیہ؟ کائنات ابے دندان تھلے اُگل دبی محو حیرت اے..... سنوہن اک آواز آرہی اے..... غور کرو..... آواز اے:

﴿يَا اِبْرٰهِيْمُ ۝ قَدْ صَدَّقْتَ الرُّؤْيَا اِنَّا كَذٰلِكَ نَجْزِي الْمُحْسِنِيْنَ ۝﴾ (الصّٰفّٰت: ۱۰۴-۱۰۵)

”اے ابراہیم! توں خاب سچا کر کھایا اے۔ ایس نیک بندیاں نوں ایوں چنگا بدلا دیندے ہاں۔“

خلیل اللہ، تے نبیاں دے باپ ابراہیم g دے پترنے جس ثابت قدمی، ہمت حوصلے تے تابعداری دا مظاہر اکیتا، ربّ ولوں اوس دا اجراءے کہ آج توارنخ دیاں ان گنت صدیاں گئے دنوں دا حصا بن دے باوجود اسماعیل g دا ناں جیوندا اے تے ربّ نے قیامت تیکر آؤن والی لوکاں لئی ایس رسم قربانی نوں اسماعیل دی یادگار بنا دتا اے۔
نسب اُتے کھوج کاری:

نبی اکرم a توں لے کے ذبح اللہ اسماعیل g تیکر دے سلسلہ نسب وچ اک بڑا پچھتا ہونیا ناؤں عدنان دا آؤندا اے۔ ایس لڑی وچ عدنان دی اہمیت ایہ ہے کہ اوہ دے تیکر جناب محمد رسول اللہ دے وڈکیاں دی لڑی تے کسے نوں کوئی اختلاف نہیں پر عدنان توں بعد دے سلسلے تے وکھو وکھ گلاں پڑھن نوں لہدیاں نیں۔ عدنان تیکر سلسلہ ایوں ہے:

محمد بن عبد اللہ (۵۴۵ء) بن شیبہ المعروف عبد المطلب (۴۹۷ء) بن عمرو المعروف ہاشم (۴۶۴ء) بن مغیرہ المعروف عبد المناف (۴۳۰ء) بن قصی (۴۰۰ء) بن کلاب بن مرہ بن کعب بن لوئی بن غالب بن فہر بن مالک بن نصر بن کنانہ بن خزیمہ بن مدرکہ (اصل ناؤں عامر اے) بن الیاس بن مضر بن نزار بن معد بن عدنان۔ صحابہ کرام، تابعین تے عالم اسلام دے وڈے وڈے محققان دی ایہو ہی تحقیق اے تے عدنان توں اگے گل ٹورنی اوہناں مناسب نہیں جانی۔

ابن ہشام نے عدنان دے وڈکیاں دا ذکر ایوں کیتا اے:

عدنان بن اود بن مقوم بن ناحور بن تیرح بن یعر ب بن یثجب بن نابت بن اسماعیل بن ابراہیم خلیل اللہ علیہ السلام۔

حضرت ام سلمہ c توں مذکور اے کہ نبی اکرم a نے فرمایا ”معد بن عدنان بن اود بن زند بن الیری بن اعراق العری“ (جناب اسماعیل g) پر سچ ایہ ہے کہ ایہ دوویں روایتیں ضعیف نیں تے عدنان توں حضرت اسماعیل تک جہڑی گل تے کوئی اختلاف نہیں اوہ ایہ ہے کہ عدنان جناب ذبیح اللہ دی اولاد وچوں نیں۔ ورنہ وکھو وکھو مورخین تے محققین نے عدنان توں حضرت اسماعیل تیکر ست توں لے کے چالھی پیڑھیاں دا فاصلہ دسیا اے۔

اک چوکی اہم گل ایہ ہے کہ کسے وی بندے دے وڈکیاں (آباء) وچ کسے اچھے بندے دا ناں لینا جہڑا اصل وچ اسدا باپ دادا نہیں، کدے وی سیانی گل نہیں جانی جاندی۔ فیر نبی، سگوں نبیاں دے سردار بابت کوئی غیر ذمے دارانا گل تے اصولوں ای چنگی نہیں۔ ایسے پاروں امام مالک، عدنان توں اگے نسب بیان کرنا مکروہ سمجھدے نیں۔ امام معطلی نے وی ایہو خیال ظاہر کیتا اے۔ حضرت عروہ بن زبیر جیہڑے ایس کم دے سیانے سن اوہناں دا آکھنا اے کہ سانوں تے کوئی اچھا نسب دان نہیں لبھا جہڑا عدنان توں اسماعیل تیکر نسب جان دا ہووے۔ اک معتبر ناں ابن عباس دا ہے جہڑے آکھدے نیں کہ وچ ۳۰ پیڑھیاں دا پندھ اے تے اوہ پیڑھیاں کوئی نہیں جان دا۔ حضرت عمر فاروق c نے وی لوکاں نوں عدنان توں اگے سلسلہ نسب بیان کرن توں ڈک دتاسی۔ سو گل اتھے مکدی اے کہ عدنان توں اگے حضرت اسماعیل تیکر پیڑھیاں دی تعداد، تے وڈکیاں دے ناواں تے کوئی اتفاق نہیں۔ جتھوں تیکر نانکے گھر دا تعلق اے، سیدہ آمنہ دا نسب صرف چوتھی پیڑھی تے حضور a دے نال رل جاندا اے۔

قصی بن کلاب

زہرہ

عبدمناف

وہب

سیدہ آمنہ

قصی بن کلاب

عبدمناف

ہاشم

عبدالمطلب

سیدنا عبداللہ

كَعَصِفٍ مَّا كُولُ:

اسلامی تواریخ دا اک بڑا ای معتبر ناؤں، چھیویں صدی عیسوی دے اک سیانے، مکے دے قریشیاں دے سردار، کعبہ دے متولی تے محسن محبوب خدا جناب عبدالمطلب بن ہاشم بن عبدمناف دا اے، جہڑے نبی آخری الزماں حضرت محمد a دے دادا وی سن، تے ایوں اوہ آپ دے وڈکیاں وچ سب توں چوکی اہمیت رکھدے نیں۔ جناب رسول خدا دی حیاتی وچ جناب عبدالمطلب دا کیر کردار رہیا تے اوہ اپنے شانناں والے پوترے نوں کوں اپنے موڈھیاں تے جُکّی پھر دے رہے، ایہذا ذکر تے اگے آوے گا اتھے اسیں دادے ہوراں دی اپنی حیاتی دا اک چوکھا وڈا واقعیا قلم بند کردے ہاں جہڑا مکے دی تواریخ سگوں اسلامی تواریخ وچ ایڈی اہمیت رکھدا اے کہ رب تعالیٰ نے ایس واقعے نوں قرآن پاک دا حصا بنا دتا۔

ہو یا ایہ کہ قبیلہ حمیر دے اخیر بادشاہ ذونواس نے جدوں اپنے ویلے دے سچے نصرانیاں دا قتلّام کیتا، اوہدوں قیصر روم دے آکھن تے حبشہ دے بادشاہ نجاشی نے یمن تے چڑھائی، تے ذونواس نوں اوہدے ظلم دا سواد پکھان داٹچا متھیا۔ اوس

نے ارباط تے ابرہہ دی سپہ سالاری وچ یمن ول فوجاں ٹور دیتیاں۔ یمن تے قبضہ کرن توں بعد ایہ دوویں آپس وچ لڑ پئے جہدے نتیجے وچ ارباط ماریا گیا تے ابرہہ یمن دا بادشاہ بن کھلوتا۔ نجاشی نوں جدوں ایس گل دا پتا لگا تے اوہ بڑا تپیا تے ابرہہ نوں لکھیا کہ ہن اوہ من مرضی کرن دی سزائی تیار رہوے۔ خط وچ اوس نے ایہ وی لکھیا کہ اوہ ابرہہ دے شہراں نوں پامال کرے گا تے اوس دے سردے وال تیکر کھچ لیاوے گا۔ ابرہہ نوں جدوں ایہ چٹھی ملی تے اوس نے نجاشی نوں چوکی عاجزی نال ایہ گل لکھی کہ ہونی تے ہوگئی اے تے جے بادشاہ سلامت! تہاڈا غصہ میرے شہراں دی مٹی رول کے تے میرے وال پٹ کے ٹھنڈا ہوندا اے تے لوئیں مٹی وی گھل رہیاں آں تے اپنے سردے وال وی۔ ابرہہ دا قصد جدوں یمن دی مٹی تے ابرہہ دے سردے وال لے کے نجاشی کول اپڑیا تے عاجزی، انکساری تے بے بسی دے ایس ڈرامے نال اوس شریف بندے دا غصہ سچ مچ کا فور ہو گیا تے اوس مفتوحہ علاقے دی گورنری اخیر ابرہہ نوں ای دے چھڈی۔

ابرہہ ہشیار تے من دا کھوٹا بندہ اسی تے نجاشی اپنی طبیعت پاروں اعتدال پسند تے شریف النفس انسان سی۔ اپنی مرکزی حکومت دے سربراہ نوں راضی رکھن لئی کچھو کے دی شکل تے جسے والے ایس گورنر ورگے بادشاہ، تے بادشاہ ورگے گورنر نے اک ہور چال چلی تے نجاشی نوں لکھیا کہ ”میں یمن وچ تہاڈے لئی اک اجبیا گرجا بنوا رہیا ہاں کہ ایوں دا گرجا دنیا تے کدے کسے نہیں بنوایا ہونا۔“ تے سچ مچ اوس نے بنواوی دتا۔ لکھن والے لکھدے نیں کہ جے کراوس گرجے دے دُھراتے ول جھاتی پائی جاندی تے جھاتی پان والے دی ٹوپی ڈگ پیندی۔ ایسے پاروں عرب دے لوکی اوس گرجے نوں قلیس وی آکھدے سن یعنی ٹوپی ڈیگ دین والا۔ اوس واہیات حبشی نوں اگلی چال ایہ سمجھی کہ سارے ملک وچ منادی کرداتی کہ اگوں توں لوکی کعبہ اللہ دی بجائے قلیس گرجے دا جج کرن۔ عدنانی تے قحطانی عرباں نوں ایہ گل بڑی بھیڑی لگی۔ اوہر جدوں ایہ خبر حجاز تیکر اپڑی تے کعبہ اللہ دے متولی قریش نوں بھلا کوں اک نہ لگدی۔ ہو یا ایہ کہ کوئی منڈا اٹھیا تے رات دے انھیرے وچ کدھرے داء لا کے کعبہ اللہ دے وقار نوں گھٹان لئی اسارے اوس گرجے وچ پاخانہ کرا آئے ایس گل تے ابرہہ نے اوس گھرنوں ڈھان دا فیصلہ کر لیا جہدی بابت اوہ سمجھدا سی کہ ایہ کلا گھرا ہی ہے جہڑا اوس دے گرجے دے جوڑ دا ہے، تاں جے سیا پای ملک جاوے۔

ابرہہ نے چنگا گنگڑا لشکر تیار کیتا۔ اٹھ (یا بارہاں) ہاتھی نال لئے۔ محمود ناؤں دا اک چوکھا پلہا ہو یا مست ہاتھی اوہناں توں وکھسی۔ اوس نوں وی نال لیا تے بیت اللہ دا ناں نشان مٹان لئی ٹرپیا۔ ایس وحشی تے تھوڑے عقلے بادشاہ نوں ڈکن دی جس جوان مرد نے سبھ توں اگدیں جرأت کیتی اوہ اک خاندانی یمنی سردار ذونفرسی۔ ذونفر دی کوشش کامیاب نہ ہوئی تے اخیر اوہ جنگی قیدی بنالیا گیا۔ ابرہہ دی فوج جدوں خشم قبیلے دے علاقے وچ اپڑی تے او تھے نفیل بن حبیب خعمی دے بندیاں نال اسدا جوڑ پیا پر اوہ وچاراوی حبشی دی سٹ نہ جھل سکیا تے اخیر قید ہو یا۔ اوس خبیثہ و لشکر جدوں طائف اپڑیا تے قبیلہ ثقیف دے آگوسعد بن معتب نے اوس نال ٹکر لین دا فیصلہ کیتا پر قبیلے دے لوکاں نے حساب لایا کہ اوہ ابرہہ دے جوڑ دے اک روایت ایہہ وی اے کہ کچھ من چلے قریشی منڈیاں نے اوس نوں اگت لادتی۔ چوکی تیز ہوا پاروں سارا گرجا سٹر گیا تے منہ پر نے آ پیا۔ (تفسیر ابن کثیر، سورہ فیل)

نہیں۔ ایوں اوہناں نے ابرہہ دی اطاعت قبول لئی۔ ایس فیصلے وچ ایہ خوف تے مصلحت وی رلی ہوئی سی کہ ابرہہ کدھرے اوہناں دے عبادت خانے نوں، جتھے لات نامی بُت سی، اپنے گرجے دے جوڑ دا سمجھدیاں ہوئیاں، ڈھاہ ای نہ دیوے۔ صلح دیاں شرطیں موجب طائف دے لوکاں نے اپنا اک بندہ ابورغال مکے داراہ دسن لئی تے خانہ کعبہ دی نشان دہی لئی ابرہہ دے نال ٹور دتا۔ رب سہنا ایوں دیاں مصلحتاں نوں کدوں چنگا جان دااے۔ ہو یا ایہ کہ جدوں حبشی لشکر مکے دے نیڑے مغمس دی تھاں تے اپڑیا تے ابورغال مر گیا۔ مجبوراً ابرہہ نے اپنا اک بندہ اسود بن مفعود گھوڑے تے بہا کے مکے ول ٹور دتا۔ اوہ خبیث حبشی مکے دے آل دوالے چلے چلے چلے چلے پشودنگر ویڑھ کے نال لے آیا۔ اوہناں اجڑاں وچ جناب عبدالمطلب دے دوسواٹھ وی سن۔

مکے دے لوکی ایس آفت دا مقابلہ کرن لئی اچے سر جوڑی بیٹھے سن کہ ابرہہ نے اپنا اک ہور بندہ حناطہ حمیری مکے گھلایا تے مکے دے لوکاں نوں اکھوایا کہ اوہ لڑن لئی نہیں آیا سگوں اوہدا ارادا تے نرا کعبہ ڈھان دااے۔ تے جے کرشمیں مینوں ڈکن دے کوئی آہر کیتے تے میں گھروں لڑن داسر بندھ کر کے ٹریساں۔ اس حناطہ نوں ایہ وی آکھیا کہ مکے یاں بیت اللہ دا اگل جتھہ بندہ انداکرات لئی نال لیندا آوے..... تے فیر مکے توں تھوڑے پنڈھ تے نیلے آسمان نے ویکھیا تے سُنیا:

”سردار! تیرا قد کاٹھ، تیری شکل صورت، تیرا گورا چٹارنگ تے تیرے اندر دسدے ٹوہر پٹے نوں دیکھ کے اک وار میں تر یہ گیا سناں تے تاہیوں ای نال لیندے تخت توں اتر کے تیرے نال آ بیٹھا سناں کہ خورے توں کئی کو وقعت تے رعب والا بندہ ایس۔ پر سردار! توں تے اصولوں ای گل گواچھڈی اے۔ میں تیرے مذہبی گھر دی گل پیا کردا ہاں، تینوں تیرے اوٹھاں دی پئی اے۔ ایہ کیہ گل ہوئی؟“ ابرہہ نے اپنی بک بک مکائی تے جناب عبدالمطلب بولے:

”آہو! میں اوٹھاں دی گل ای کرنی اے، میرے جو ہوئے۔“

”پر تینوں تیرے دین تے اپنے لوکاں دے عبادت خانے دی پروا نہیں؟..... لے بی ایہ تے بڑی اچرج گل اے“ ابرہہ نے آکھیا۔

”اچرج ای سہی۔ میرے اوٹھ میرا حق نہیں تے مینوں پرنا دیوے۔“ جناب عبدالمطلب نے جواب دتا۔
”حد مک گئی اے بھئی..... اسردار! میں تہاڈا عبادت خانہ توڑن آیا ہاں“ ابرہہ کچھ حیران سی تے گچھ اپنی حیرانی اوہنے آپوں ودھالئی۔

”سُن بادشاہ! دوسواٹھ میرے میں اوہ واپس لین آیا ہاں۔ کعبہ میرا گھر نہیں، اللہ دا اے۔ اوہ آپوں اس نوں بچالوے گا“ آپ نے کچھ غصے وچ آکھیا۔

”لے فیر سن لے۔ تیرا اللہ وی اج اس نوں میرے ہتھوں نہیں بچا سکدا۔ ٹل لا کے ویکھ لے سردار“

”چل ٹھیک اے بھئی۔ توں ڈھان والا جان تے اوہ بچان والا جانے..... میرے اوٹھ کتھے جے؟“

ایوں ابرہہ نوں اوٹھ دینے پئے گئے۔ جناب عبدالمطلب اوٹھ لے کے مکے اپڑے تے لوکاں نوں آکھیا کہ نکل جاؤ پہاڑاں ول تے اپنا سر بندھ کر لوؤ۔ آپوں قریش دے کچھ سرکڑھویں بندیاں نوں نال لیا تے بیت اللہ دے بوہے دا کنڈا

پھڑکے نیا نیاں وانگ ڈھاپیں مار مار کے روندے رہے تے آکھدے رہے ربا سو بنیا! توں ای لجاں رکھن والا ایں۔ ربا! ایس عزتاں والے گھر دا توں ہی راکھائیں۔ ربا! میں کسے گل جوگا نہیں، توں شرماں رکھ لے۔ فیر بیت اللہ دا کنڈا چھڈیا، اک ڈوگھی نظر نال اوس گھرنوں ویکھیا تے مکے توں باہر نکل گئے۔

اگلی پلکے ابرہہ نے مکے وچ وڑن لئی تیاریاں چھوہ دتیاں۔ وڈے تے گکڑے مست ہاتھی محمودنوں اگے لانا سی پر ہر جتن دے باوجود اوس نے مکے ول ودھن توں انکار کردتا۔ باقی لشکر تیار کھلوتا سی تے ویکھدے کیہ نیں کہ نکلے نکلے پکھیر وواں دا اک جھر مٹ سمندر ولوں بدل وانگ اوہناں ول ودھیا آ رہیا اے۔ اوہناں دیاں چٹجھاں تے پنجیاں وچ مسراں دے دانے دانے جڈیاں کنکریاں نیں تے فیر۔

﴿تَزِمْنَهُمْ بِحِجَارَةٍ مِّن سِجِّيلٍ ۖ فَجَعَلَهُمْ كَعَصِفٍ مَّا كُولٍ ۝﴾ (الفیل: ۴-۵)

”جیہڑے اوہناں تے پتھر دیاں کنکریاں سٹ دے سن۔ فیر اوہناں نوں کھا کھا کے چھڈے ہوئے گتاوے وانگ کردتا۔“

باراں پُتراں والا سردار:

زمزم دے کھوہ دیاں گلاں باتاں مکے وچ سنن شان نوں تے ہتھیریاں سن پر پچی گل اے کہ کسے قبیلے یاں بندے نوں ایس گل دا پتا نہیں سی رہ گیا کہ اوہ کہڑی تھاں اے جتھے اسماعیل نے اڈیاں رگڑیاں سن تے جتھے ہاجرہ نے وٹ ماری سی۔ حاجیاں نوں پانی پیان والے جناب عبدالمطلب نوں جہڑی اوکھیا ئی ہنڈانی پیندی سی اوس پاروں اوہناں نے چاہ زمزم دی تھاں لہنی شروع کیستی سی۔ جناب عبدالمطلب اپنے پتر حارث نوں نال لے کے کئے ای دیہاڑے ٹکراں مار دے رہے۔ مٹی پٹ پٹ کے سبے کھبے ڈھیر لاندے رہے پر کدھرے پانی دا تبکا وی نہ دیا۔ قریش وچوں کسے بندے نے نیکی دے ایس کم وچ کوئی حصا پان دا آہر نہ کیتا سگوں جھپٹاں کر دے رہے۔

اک دیہاڑے جناب عبدالمطلب نوں خاب وچ اشارا دتا گیا کہ زمزم کہڑی تھاں تے ہے۔ اوہ وڈے ویلے اٹھے، حارث نوں نال لیا تے رب سوہنے ولوں دی تھاں تے کدال چلانے شروع کردتے۔ ایہ تھاں عرب دے دو مشہور بتاں اساف تے نائلہ دے وچکاری، جہناں دا ذکر کچھ گزر چکیا اے۔ قریشیاں نے جدوں ویکھیا کہ عبدالمطلب تے حارث اوس تھاں نوں پٹ رہے نیں جتھے اوہ اپنیاں قربانیاں کر دے سن تے اوہناں رولا پادتا پر رب دی نصرت جدوں نال ہووے تے رولے بند ہو جاندے نیں، تلواراں نیاماں وچ ٹر جان دیاں نیں تے دشمن نیو جان دے نیں۔ او تھے وی ایوں ای ہو یا تے رب دی کرنی نال قریش پچھانہ پرت گئے تے کھدائی دا کم ہوندا رہیا۔ کجھ دناں دی ہچکل توں کچھ پانی تے نکل آیا پر ایس نیک کم وچ قریشیاں دی پائی رکاوٹ نوں عبدالمطلب نے چوکھا محسوسیا تے من وچ اک طرحاں دا اکلا پے دادکھ پال لیا۔ ایس پریشانی وچ اوہناں نے اک اچرج جہی منت من لئی کہ جے رب اوہناں نوں دس پتر دیوے جہڑے جوان ہو کے اوہناں دے موڈھے نال موڈھے لان تے اوہ اک نوں کعبہ دے نیڑے خدا دے ناں تے قربان کر دین گے۔

ویا لنگھدا گیا..... عبدالمطلب نوں اپنی منت خورے چیتے وی نہ رہی پر اللہ نے اوہناں نوں دس دی تھاں باراں پتر

دے کے عبدالمطلب دا اکلا پے دا روگ وی مٹا دتا تے عدی بن نوفل ورگے بندیاں دے مونہ وی بند کر دتے جنے کسے زمانے وچ آپ نوں لا ولد ہون دا طعنہ دتا سی ﴿

جناب عبدالمطلب دے پتریں یعنی حضور a دے چاچیاں دی تعداد تے توارخ وچ وکھو وکھ حوالے لکھ دے نیں۔ ایس فقیر نے جہڑی کھوجکاری کیتی اے اوس موجب حضرت عبد اللہ (والد گرامی جناب محمد رسول اللہ) جناب عبدالمطلب دے دسویں پتریں تے ایسے پاروں اللہ تعالیٰ نے حضرت عبدالمطلب نوں اپنی منت پوری کرن دی یاد وی کرائی سی۔ ایس یاد دہانی تے واقعیاً ذبح توں بعد ای (جہدا ویرا اگے ہووے گا۔) جناب عبدالمطلب نے حالہ نامی بی بی نال نکاح کیتا جہدے وچوں حضرت حمزہ ہوئے۔ حضرت عباس حضرت حمزہ c توں وی نکے سن۔ وکھو وکھ روایتاں توں ایس گل دا وی پتا لگدا اے کہ حضرت عبد اللہ دے دواہی نکے بھرا سن جہدے حضرت حمزہ c تے حضرت عباس سن۔ تے جے نکے دواہی سن تے حضرت عبد اللہ وی دسویں نمبر تے سن تے فیر تیرھویں پتر والی گل آپوں غلط ثابت ہو جاندی اے۔ حضرت عبدالمطلب دے جہڑے پتریں نوں توارخ نے پوری طرحاں یاد رکھیا اے اوہ حارث، زبیر، جمل، ضرار، مقوم، ابولہب، عباس، حمزہ، ابوطالب تے عبد اللہ نیں۔ باقی دو پتر غیبا تے قلم نیں۔

أَنَا ابْنُ الذِّبْحَيْنِ:

زمزم دا مٹھا پانی پیندیاں کوئی تریہ (۳۰) ورھے لنگھ گئے سن۔ عبدالمطلب دے دس پتر ہو گئے سن کہ اک راتیں خاب وچ کسے آکھیا کہ عبدالمطلب اپنی نذر پوری کرو۔ ۳۰ ورھے پرانی گل کتھے چیتے رہندی اے۔ ایس لئی کوئی گل پلے نہ پئی۔ پر فیروہ اوہناں نے اللہ دے راہ تے اک دُنا دتا۔ دوجی راتیں فیر سنبھا ملیا کہ کوئی چنگی چیز قربان کرو۔ آپ نے اک ڈھگا قربان کر دتا۔ تہی رات نوں سوندے نیں تے کسے آکھیا کہ ایس توں وی چنگی شے دی قربانی دیو تے فیر عبدالمطلب نے اک اوٹھ ذبح کر کے ونڈ دتا۔ اگلی راتیں آپ نوں اوٹھ توں وی چنگی شے دی قربانی دی ہدایت کیتی گئی تے آپ نے حیران ہو کے پچھیا کہ ایس توں ودھ کے کہڑی قربانی ہوندی اے؟ تے جواب ملیا:

((قرب احد اولاً ذک الذی نذرت ذبحہ))

”اپنے اک پتر نوں قربان کرو جنہوں ذبح کرن دی تسلیں منت منی سی۔“

جدوں اللہ نے جناب عبدالمطلب نوں منت دی یاد دہانی کرا دتی تے ایہہ سوال پیدا ہویا کہ کس پتر نوں راہ خدا وچ قربان کیتا جاوے۔ ایس لئی اوہناں نے اپنے دساں پتریں نوں اکٹھا کیتا تے رب دی منشا اوہناں دے اگے رکھی۔ عبد اللہ نے سب توں اگدیں رب دی رضا اگے سر جھکایا تے باقی پتریں وی ایہو ہی گل آکھی کہ ”ابا جی جویں مالک دا حکم اے کر گزرو۔ سارے پتریں نے جدوں اپنی رضا مندی دے دتی تے ایہہ سوال فیر سامنے آیا کہ کیہڑا پتر رب دی نذر کیتا جاوے۔ ایس مسئلے دے حل لئی عبدالمطلب نے اپنے سارے پتریں دے ناں تیراں اتے لکھ کے مکے دے رواج موجب بیت اللہ دے دربان نوں دتے تاں جے اوہ قرعہ کڈھے۔ قرعہ عبد اللہ دے ناں نکلیا، جیہڑے اودوں تیکر عبدالمطلب دے سبھ توں چیتے رہوے کہ عرب وچ اک پتر دا ہونا نہ ہون دے برابر ہوندا سی۔

گلے پُتر سن تے سبھ توں سوہنے وی۔ عبدالمطلب نے اک ہتھ وچ پُھری پُھری تے دوجے ہتھ وچ عبداللہ دا ہتھ تے رواج موجب اساف تے ناملہ بتاں کول اپڑ گئے۔ فیر اوہناں نے عبداللہ نوں بھجے لٹایا تے پُھری چلان لئی اوہناں دی دھون تے پیر رکھ لیا۔ باقی پُتر جہڑے عبداللہ دی قربانی دا تماشا دیکھن لئی نال کھلوتے سن، بھاویں رب دی رضا تے راضی رہن دی ہامی بھر بیٹھے سن فیروی اوہناں کولوں کدوں صبر ہونا سی کہ اوہ اپنے سبھ توں سوہنے ویرنوں چھری پٹھ ترفدا دیکھدے۔ بھرا اگے ودھے تے اوہناں نے جناب عبدالمطلب دے پیر پٹھوں حضرت عبداللہ نوں کھچ لیا۔ ایس کھچا تانی وچ سوہنے عبداللہ دے مکھڑے تے کجھ جھریٹاں وی آگئیاں جہڑیاں ساری حیاتی دسدیاں رہیاں۔

جدوں بھراواں نے عبداللہ نوں وڈھیرے عبدالمطلب کولوں کھوہ لیا تے جناب عبداللہ دے نالکیاں نوں ہلاشیری ملی۔ بنی مخزوم اگے ودھے تے حضرت عبدالمطلب نوں آکھن لگے کہ ”سردار! کیوں ساڈی دھی (عبداللہ دی ماں) نوں جیوندی جائیں مارنا ہے؟“

”تے فیر کیہ کراں میں؟ رب دا حکم نہ مناں؟“ عبدالمطلب نے بنی مخزوم وچ اپنے سوہرے بُرنوں آکھیا۔
 ”دُشیں پُتر دی جان دافندیا دے کے اپنے رب نوں راضی کرلوؤ۔“ بنی مخزوم نے آکھیا۔

ایس رو لے وچ قریش دے باقی سردار وی آ رلے تے اوہناں نے وی جناب عبدالمطلب نوں ایوں کرن توں ڈکدیاں ہونیاں ایہ صلاح دتی پئی خیبر دے نیڑے وسوں کر دی قطبہ ناں دی کاہنہ نال صلاح کر کے دیکھ لوؤ اوہ کوئی راہ دے گی۔ عبدالمطلب نے ایوں ای کیتا۔ اوہناں نے بنی مخزوم تے کجھ ہور جیاں نوں نال لیا تے خیبر اپڑ گئے۔ کاہنہ نے صلاح دتی کہ دس اوٹھاں تے عبداللہ تے قرعہ کڈھو۔ دس اوٹھ دھاکے قرعہ فیر کڈھنا۔ تے ایوں ہر واری دس دس اوٹھ دھاندے جانا ایتھوں تیکر کہ قرعہ اوٹھاں دانکل آئے۔

مکے پرت کے جناب عبدالمطلب نے ایوں ای کیتا۔ جدوں اوٹھاں دی تعداد ۱۰۰ ہو گئی تے قرعہ عبداللہ دی بجائے اوٹھاں دانکل آیا پر جناب عبدالمطلب دی فیروی تسلی نہ ہوئی۔ آکھن لگے ”فیر قرعہ کڈھو۔“ دوجی واری وی قرعہ اوٹھاں دے ناں دانکلیا تے تیجی واری فیر قرعہ کڈھن دا آکھیا۔ جدوں تیجی واری وی قرعہ اوٹھاں دے ناں دانکلیا تے فیر عبدالمطلب دی تسلی ہوئی تے اوہناں نے سواوٹھ ذبح کر دتے۔ تواریخ آکھدی اے کہ مکے وچ گوشت وادھوں ہو گیا۔ جہدا جتاں دل کیتا لے گیا، ایتھوں تیکر کہ گوشت خور پرندیاں تے درندیاں وی رج کے کھادا۔ ایوں سواوٹھاں دی قربانی دافندیا دے کے پُتر دی قربانی دی منت پوری کیتی گئی تے جناب عبداللہ ذبح ثانی اکھوئے۔

اسلامی تواریخ وچ حضرت اسماعیل توں بعد جیس ہستی نوں ذبح اللہ دے ناں نال چھیتے رکھیا جاندا اے اوہ ساڈے آقا حضرت محمد a دے والد گرامی حضرت عبداللہ نیں۔ ایسے پاروں آپ a فرمایا کردے سن۔ انا ابن الذبیح

(میں دو ذبیحاں دا پُتر ہاں)

مکے دا یوسف.....عبداللہ:

تواریخ دسدی اے کہ انبیاء وچ جو یں حضرت یوسف دا حسن تے جوانی ڈلھ ڈلھ پیندے سن ایوں ای مکے دے

قریشیاں وچ عبداللہ بن عبدالمطلب دا چرچا سی۔ عبداللہ گورے چٹے تے رجب کے سوہنے بگھرو جوان سن۔ مکے دے لوکی آپنوں ویکھدے سن تے فیرویکھدے ای رہ جاندا سن۔ واقعہ ذبیحہ پاروں آپ دی شہرت اُنج وی پورے مکے وچ سی پر جدوں ذرا گتڑے ہو کے قد کاٹھ کڈھ لیا تے رنگ ای ہور دے ہو رہو گئے۔ سچ اے کہ مکے دی کوئی گڑی اجہی نہیں ہونی جہنے عبداللہ نوں اک نظر ویکھیا ہووے تے فیرواں نے عبداللہ دے نکاح وچ آؤن دی سدھر دا روگ دل نوں نہ لایا ہووے۔ روایت اے کہ:

”اوہ مکے دے سبھ توں سوہنے انسان سن۔ قریش دیاں عورتاں اوہناں دی محبت وچ پاگل تے دیوانیاں

ہوندیاں جا رہیاں سن۔“

حضرت عباس فرماندے نیں کہ جدوں عبداللہ دی شادی آمنہ نال ہوئی تے بنی مخزوم تے بنی عبدالمناف دیاں کئی کڑیاں نے عبداللہ نوں نہ پاسکے دے غم وچ مردے دم تیکر شادی نہیں کیتی۔ □
انسانی تواریخ وچ جناب عبداللہ توں اگدیں یاں آپ توں کچھ کوئی مائی دالال اجہیا نہیں جمیا جسدی جدائی دے غم وچ دوسو کڑیاں نے کنواریاں ای حیاتی بتا دتی ہووے۔ سچ ایہ وے کہ کوئی منڈا جنا وی سوہنا ہووے ایتھوں تیکر گل نہیں اپڑ سکدی۔ کوئی تے راز ہووے گا ایس مہوت کر دین والے حسن دا! ہاں ہے سی۔ تے اوہ راز ایہہ سی کہ ساڈے سوہنے محمد a دا نور جناب عبداللہ دی پیشانی تے چمک رہیا ہوندا سی۔

حضرت آمنہ نال نکاح:

ابرہہ نے کعبہ ڈھان لئی مکے تے جدوں حملا کیتا جہدا ذکر سورہ فیل وچ آؤندا اے، اوس توں تھوڑے ای چر اگدیں دی گل اے کہ جناب عبدالمطلب نے عبداللہ دا نکاح آمنہ بنت وہب نال کر دتا۔ وہب، بنی زہرہ داسر داری تے چوکھے ٹوہر ٹپے والا بنداسی۔ اک روایت موجب اس رشتے دی پہل وہب نے آپوں کیتی سی تے اپنی گھر والی نوں جناب عبدالمطلب دے گھر گھلیا سی تاں جے آمنہ دا ویاہ عبداللہ نال ہو جائے۔ وہب دی اس خاہش تے کوشش دی وجہ بنو ہاشم دا وقار، عبداللہ دا ڈُلھ ڈُلھ پیندا اُسن تے کجھ ہو رگلاں وی سن جہناں وچ اک ایہ وی سی کہ لوکاں ایہ قیافے لاندی سی کہ جس نبی دے آؤن دا زمانا نیڑے آچکیا اے، اوہ بنو ہاشم وچ ہونا اے تے اوس دا باپ بنو ہاشم وچ عبداللہ ورگا سوہنا بگھرو ای ہو سکدا اے۔
نکاح دے ویلے حضرت عبداللہ دی عمر چوڑی ورھے سی تے حضرت آمنہ دی اٹھاراں اُنی ورھے۔



چن چڑھیا کل عالم ڈٹھا

”سردار! مبارک ہووے، مبارک ہووے۔ مالکن ول چن ورگا پتر ہو یا اے..... سچ سردار! چن ورگا۔ ڈٹھا ای سوہنا ہے۔“

بہشتی نو جوان عبداللہ دی کنیر برکہ (اُم ایمن) داساہ پھلایا ہو یا سی تے اوہ شدیناں وانگوں سکے دیاں گلیاں وچ دوڑی آؤندی، کعبۃ اللہ دا طواف کردے بڈھے سردار تک پہنچی۔ اوہ اکو ساہ وچ سارا کجھ دس دینا چاہندی سی۔ چاواں رجدی برکہ دے پیر زمین تے نہیں سن لگ رہے تے اوس نوں واپس پرتن دی وی چھیتی سی۔ اوہ بولدی گئی ”آہا“ کیڈا سوہنا بچا اے، نرا ای چن، تے نالے سردار! اوہ دے وچوں خشبو دیاں لپٹاں پٹیاں آؤندیاں نیں۔ مالکن داسا را کمرہ مہکد اپیا اے۔ سردار! چھیتی آؤتھانوں مالکن نے سدیا اے۔ اوہ سردار نوں خش خبری سنا کے نندی نندی پچھانہ پرت گئی۔ ایوں جا پدا سی جویں اوہ دے جُسنے وچ بجلی بھری گئی اے۔

جناب عبدالمطلب لئی خشی ماریاں ساہ لینا اوکھا ہو گیا سی۔ اکھاں وچ خشی دے اتھر ولے کے اوہ بے اختیار اگے ودھ جاندے نیں تے کعبہ دا غلاف پھر کے اُچی آواز نال آکھدے نیں ”یا اللہ! تیرا شکر کہڑی زبان تے کہڑے اکھراں نال ادا کراں۔ توں میرے مرے پتر دے گھر دیوا بالیا اے۔ آمنہ نوں پتر دتا ای تے مینوں وڈیری عمر دا آسرا۔ یا اللہ! توں ایہدی حفاظت کردار ہویں“ اوہ تھوڑا چر دعا منگد ارہے تے فیر تیز تیز پیر پندے سیدہ آمنہ دے گھر ول ٹر پئے۔ اوہ گھر جھڑا تھوڑا چر اگدیں اوہناں نے اپنے باراں پتراں وچوں سبھ توں سوہنے پتر عبداللہ نوں دتا سی۔ رستے وچ جناب عبداللہ ڈاڈھے یاد آئے۔ اوہ عبداللہ جھڑے ۲۴ ورھیاں دی عمر تیکر اپنی سیانف، اپنے حسن تے جوانی پاروں سارے مکہ وچ یوسف ثانی دے ناں نال مشہور ہو گئے سن تے تاں ای بنو زہرہ دے سردار وہب بن عبدالمناف نے اپنی صورت تے سیرت وچ سوہنی تے سیانی دھی آمنہ دار شتا خشی خشی اوہناں نوں دتا سی۔ اگلے ای ورھے سکے دایوسف، آمنہ دے سردا سائیں، عبدالمطلب دا پتر تے ایس کائنات وچ آون والیاں ہستیاں وچوں سبھ توں وڈی، سچی تے اچی ہستی دا والد صرف ۲۵ ورھیاں دی عمر وچ شام توں مدینے جاندیاں اپنے مالک تے خالق کول جا بچیا۔ ایہ خبر جناب عبدالمطلب کول اچے تھوڑا چر ای اگدیں اپڑی سی۔ فیر اوہناں دی نشانی نوں ویکھ کے عبداللہ کوں نہ یاد آؤندے؟

عبدالمطلب سیدہ آمنہ دے گھر اپڑدے نیں تے سارا گھر خشبو نال مہک رہیا سی۔ اک اجہی خشبوسی جھڑی پہلوں کدے سنکھی سی نہ سنی سی۔ اوہ زچہ خانے دے باہر ای کھلو جاندے نیں، سیدہ آمنہ نوں سردار دے آون دی خبر ہوندی اے تے برکہ دے راہیں مبارک داسنیہا گھلدیاں نیں تے نال ای اندر آون دا وی آکھدیاں نیں۔ سردار کمرے دے اندر پیر

رکھ دے میں تے دکھرے ای رنگ ویکھدے نیں۔ نوہ رانی ہشاش بشاش، جیوں بچہ جمن دی کسے تکلیف نال کوئی واہ ای نہ پیا ہووے۔ نویں جے دامن موہنا چہرہ، سرگمیں اکھاں، چمکدار متھاتے مہکدا جُسا ویکھ کے خوشی نال اُچھل کھلوندے نیں۔ بچے دامتھاپُمدے نیں تے اوس نوں سینے نال لا کے بیت اللہ واپس آؤندے نیں۔ تھوڑا چر دعامنگدے نیں تے غیر امانت، امانت دار دے ہتھ وچ جادیندے نیں۔

عرب دے یہودی تے عیسائی سوجھوان، قیافاشناس، فلکیات دے سیانے تے مذہبی کتاباں دے عالم اوس دیہاڑے ہل کے رہ گئے سن۔ اوہناں سمجھناں نوں، تے اولاد آدم نوں لکھاں سالاں توں جہدی اڈیک سی اوہ تاراچک پیاسی۔ اوہ عام الفیل (ہاتھیاں والے واقعے دا سال) سی۔ ربیع الاول دے مہینے دی ۹ تاریخ تے عیسوی حساب نال ۲۲ اپریل ۵۷۱ء۔ سوموار دن تے چاشت دا ویلا سی۔ اک اجہیا نور چمکیا جہدے نال لہندے چڑھدے وچکار ہر شے روشن ہو گئی۔ کعبہ نے مقام ابراہیم ول سجدہ کیتا تے تکبیر آکھی۔ اوہنے شکر ادا کیتا پئی اوس نوں بتاں توں پاک کرن والا آ گیا سی۔

اوس دیہاڑے غریباں دا دردی تے یتیمیاں دے سرتے تھہرکھن والا آ گیا سی۔ دنیاؤں شرک دے کوڑھ وچوں کڈھ کے اک اللہ والے راہ تے پاؤن والا آ گیا سی۔ شرک دے گند نال بڑے ہتھیاں وچ لا الہ الا اللہ دا جھنڈا پھڑان والا آ گیا سی۔ وحدت دی تسبیح دے کھلے دانیوں نوں اک تھاں تے پروں والا آ گیا سی۔ لات، منات تے عزیٰ دی معبودیت تے کعبہ وچ پئے بتاں دی اصلیت وکھان والا آ گیا سی۔ جھوٹی انا، غرور تے آکر بازی نوں مکا کے اک مک ہو جان دا سبق دین والا آ گیا سی۔ اوہ آ گیا سی جہڑا دوہاں جہاناں لئی رحمت ای رحمت سی تے انج فاران دیاں چوٹیاں تے اوہ نور چمک پیا سی جہدے نال صدیاں دے کھلے جہالت دے انھیرے مک گئے سن۔

کچھ مؤرخین دے حساب موجب جدوں ایہ نور چمکیا اودوں طوفان نوح نوں ۳۹۱۳ ورہیاں توں تواریخ نے اپنا حصا بنایا ہو یا سی۔ حضرت ابراہیم دی پیدائش ایس توں ۲۸۳۲ سال، حضرت موسیٰ دی ۲۲۸۷ سال تے حضرت عیسیٰ دی ۵۷۰ سال اگدیں ہوئی سی۔

محمدؐ دانال:

ایس گل تے اختلاف اے کہ عرب وچ محسن انسانیت نبی آخری الزمان a توں پہلوں کسے بندے دانال محمدؐ ہے سی یاں نہیں پر ایہ ضرور اے کہ کچھ عرب محمدؐ دے اکھرتوں جانوسن۔ کون نہیں جان دا پئی کائنات دے وجود وچ آؤن توں لے کے اج تیکر زمین اسمان تے کسے مخلوق دی اتنی تعریف نہیں کیتی گئی جتنی محمدؐ عربی دی کیتی گئی ہے۔ ”محمدؐ“ دالفظ محمدؐ توں مشتق اے جہدا معنی ای تعریف اے۔ محمدؐ اوہ عبد کامل تے انسانیت دا اوہ وڈا محسن اے جہدی تعریف اج تیکر ہوندی آئی ہے تے ہمیش ہوندی رہوے گی، کیوں جے ایہدا فیصلہ آپوں ربؐ نے کیتا اے کہ اوس نے اپنے ایس سبھ توں وڈے بندے تے رسول دا ذکر بلند کیتا اے تے کر دے رہنا اے۔

ایوں جا پدا اے بی جدوں اُم ایمن نے جناب عبدالمطلبؐ نوں پوترے دے جمن دی خوشخبری سنائی سی تے ربؐ

عہ ماجد علی خان، ڈاکٹر۔ محمد دی فائنل میسجر۔ ۱۹۸۳۔ صفحہ ۵۱۔

سوہنے ولوں بابا جی نوں القا کیتا گیا سی بئی اس چن نوں محمد داناں دینا..... ایس فقیر دا خیال ایہ ہے کہ ایہ اچرچ تے نویکلا ناں اس پاروں وی ضروری سی بئی قیامت تیکر ایس دا ذکر اُچے توں اُچا ہوندا جانا سی۔ کدے ایہ آمنہ دے حجرے تیکر سی۔ ستویں دن قریش دے لوکاں تیکر اپڑیا۔ فیر کے دیاں گلیاں وچ سنیا گیا۔ غار حرا وچ گونجیا، تے فیر کوہ صفا دی چوٹی تے سنیا گیا۔ غار ثور نے اپنے بھاگاں تے لڈیاں پائیاں، مدینے ول جاندی چٹی اوٹھنی نے پٹھیاں چھالاں ماریاں، مدینے ول جاون والے راہواں نے اپنے لیکھاں تے ناز کیتے، بنو نجار دیاں معصوم کڑیاں نے دف دجاو جا کے ایس ناں دیاں پکاراں پائیاں، انصار دیاں سوانیاں نے مدینے دیاں گلیاں وچ ”طلع البدر علینا“ دے گیت گا گا کے اپنے لیکھ سنوارے، بدر تے حنین وچ ایس دے جھنڈے بلند ہوئے تے لمی گل کیہ کراں بس ویکھدیاں ای ویکھدیاں ایس دا ناؤں دنیا دے تن براعظماں وچ عزت، وقار، وڈیائی تے شاناں دی علامت بن کے رہ گیا۔ ویلے نوں پر لگے رہے، حیاتی اپنے پینڈے نیڑ دی رہی تے فیر بڈھے اسمان نے ویکھیا پی ۲۰۰۹ء تیکر دنیا دا کوئی اک گھر تے اک کونا اچھیا نہیں سی رہ گیا جتھے محمد داناں مبارک نہیں سی لیا جا رہیا۔ کیہ تور ابورا تے کیہ پیٹھا گون۔ کیہ جرمنی دا شہر بون تے کیہ افریقا دا دور افتاد اصومالیا۔ ہر پاسے محمد ای محمد ہو گئی۔ ہن کوئی مائی دالال ایہ تے نہیں آکھ سکدا کہ جس محمد دا ذکر ایناں بلند ہو رہیا اے، اوہ اللہ دا محبوب نہیں سگوں میرا کوئی وڈکا اے۔

محمد a داناں، ایس دا نویکلا پن، ایس دی یکتائی تے ایس دی تقدیس دے کیہ کہنے۔ ۲۴ گھنٹیاں دا کوئی اک سکینڈ اچھیا نہیں ہوندا جدوں کدھرے نہ کدھرے ایہ ناں اذان، تکبیر، نمازیاں درود وچ نہ لیا جا رہیا ہووے۔ فیر ایہ مٹھا مقدس تے مترنم ناں سن کے بندے دے قلب تے جھڑی واردات ہوندی اے اوہدا کیہ آکھنا۔ کوئی بھیچل کرن دی لوڑ نہیں، تسیں محمد a داناں لوؤ دوویں ہونٹھ آپوں ای اک دوجے نوں چم لین گے۔ ذرا سوچو تے ایہ کس گل دی دلیل اے۔ کیہ ایہہ ناں آپوں ہی ایہ گل نہیں آکھ رہیا کہ میں دنیا دے اوس عظیم ترین بندے داناں ہاں جس دی نعت تے تعریف ارض و سما تے واجب قرار دے دتی گئی اے۔

لغات قاموس وچ لفظ حمد دے اک معنی ”قضا الحق“ دے وی دسے گئے نیں۔ ایوں لفظ محمد دا اک معنی ایہ وی اے بئی اوہ جہدا حق پورا کر دتا گیا ہووے۔ یعنی قدرت ولوں بندے نوں تے خالق ولوں مخلوق نوں سوہنے تے کامل ہون دا جہدا چوکھے توں چوکھا حق پہونچدا سی، اوہ محمد a تے پورا کر دتا گیا۔ ایوں اوس ہستی نوں جے اک پاسے مدیۃ العلم بنایا تے دوجے پاسے اُسوہ حسنہ دی اخیر وی اتھے ای کر چھڈی تے فیر اوس نوں دشمن وی خلق عظیم آکھن تے مجبور ہو گئے۔ عربی محاورات دے مطالعے توں پتا لگدا اے بئی حمد دے معنی ایہ وی نیں کہ کسے کم نوں اپنی قدرت یاں بساط دے مطابق چنگی شکل وچ توڑ چاڑھ دینا۔ مثال موجب ایہ آکھنا بئی حسد بلائہ (میں نکاواں وار کیتا) بہت مشہور اے۔ جے ایس معنی نوں ساہنے رکھیے تے پتا لگدا اے کہ لفظ محمد a دے معنی مخلوق کامل دے وی نیں۔ تے ویلے ثابت کر دتا اے کہ محمد سچ مچ مخلوق کامل وی نیں تے ایس توں اگے کوئی نقطہ ای نہیں۔ تے فیر جدوں کمال دی انتہا ہو گئی تے معارف دی اخیر ہو گئی تے فیر نہ کسے نبی دی حاجت رہ گئی تے نہ ای کسے ہور نبی دی آمد امکان۔

جنگی تدبیر تے جنگی ڈھنگ وسب دے موقع تے وی حمد والفظ ورتیا جاندا اے۔ ایوں لفظ محمد دے ایہ معنی دی نکلدے
 نیں بئی اوہ بندہ جہدے نال تدبیراں بن دیاں گئیاں۔ لوکائی ویکھیا پئی آپ دی تعلیم، آپ دا دین، آپ دے ضابطے تے
 آپ دیاں گلاں رب دی خاص مرضی نال تے سوئی تدبیر نال دنیا وچ کھل گئیاں تے اج ہر پاسے دین محمدی a دے
 اچے چرے نیں کہ غیر مسلم قوماں تے یونیورسٹیاں اک وار فیر سر جوڑ کے بہن تے مجبور نیں تے اوہناں دے سوجھوان ایس
 گل تے گوہ کر دے پئے نیں کہ اخیر اوہ کہڑی گل اے بئی مسلماناں دی خاص جدوجہد توں بنا ایہ دین دنیا تے ایوں پھیل
 رہیا اے بئی اپنے تے بیگانے دنداں تھلے انگلی دبی کھلوتے نیں۔
 ایس ناں دیاں رسیاں کون کرے:

”محمد.....“ ایہ کیہ ناں ہو یا بھلا؟ اپنے خنوادے دے ناواں توں نوکھلاتے وکھرا..... عبدالمطلب! توں اپنے پوترے
 دا ایہ کہیو جہیا ناں رکھیا اے؟ قریشی لوکاں حیران ہو کے پچھیا۔
 ”آہو۔ محمد ای ایہداناں بن دا اے۔ میں چاہندا ہاں پئی اسمان اُتے رب ایہدی وڈیائی کرے تے زمین اُتے
 خلقت“ جناب عبدالمطلب نے جواب دتا۔

ایہ ستویں دیہاڑے دی گل اے۔ سردار عبدالمطلب نے اپنی قریش قبیل داری نوں پوترے دی خشی مناوون لئی سدا گل
 کے اکٹھا کیتا سی تے روٹی ٹکرتوں ویلھے ہو کے سارے جی گل بات کر رہے سن۔ سردار ہوراں گلاں گلاں وچ ایہدی ویسیا
 پئی منڈے دی ماں نے ایہداناں احمد رکھیا اے، کیوں جے نوہہ رانی نوں سفنے وچ انج دا ای اشارا ملیا سی۔ اتھے ایہ گل وی
 ضروری جا پدی اے پئی سوہنے نبی دا اپنا فرمان اے پئی ”زمین اُتے میراناں محمد اُتے اسمان اُتے احمد اے۔“ جد کہ توریت
 وچ ناں مبارک محمد اُتے انجیل وچ احمد اے۔ سیدہ آمنہ نوں ناں رکھن دی بشارت فرشتے راہیں اوویں ای ملی سی جویں بی بی
 حاجرہ نوں اسماعیل دے ناں دی تے مریم نوں یسوع ناں رکھن دی۔ ٹردے ٹردے ایہہ گل وی دس دیاں پئی محمد دے معنے
 نیں جہدی بہت تعریف کیتی جاوے تے احمد دا مطلب اے چوکھیاں تعریفاں کرن والا۔

سردار ہوراں دی گل وچ ڈاڈھا زور سی۔ اوہناں نوں پک سی پئی ایہ بال وڈا ہو کے عرب تے عجم دیاں کاکھاناں نوں
 ایوں دھوٹے گا پئی دنیا نوں ایہدیاں تعریفاں کرنیاں ای پین گئیاں۔ اوہناں نوں اشارا مل گیا سی پئی ایہ بال اصل وچ
 کائنات دی ”اصل“ اے، علم تے دانائی دا چشمہ اے، زاہداں تے صوفیاں دا کعبہ اے تے کعبہ داماں اے۔ عرش تے فرش
 دی روح اے، صبر تے شکر کرن والیاں لئی نمونا اے، دوہاں جہاناں دی رحمت اے، رب دا محبوب اے، وچاریاں لئی چارہ
 تے رب دیاں عظمتاں دا نشان اے۔ سردار ہوراں نوں ایس گل داوی پورا پک سی پئی ایہ بال سکے دے باقی بالاں توں وکھ
 ای رہنا اے تے کسے کولوں ایس دی کوئی ریس وی نہیں ہو سکنی۔

| | | | | |
|------|-------|------|-------|-----|
| کیڈا | سوہنا | ناں | محمد | دا |
| ایس | ناں | دیاں | ریساں | کون |
| | | | | کرے |

مکے وچ تھرھلی:

سردار عبدالمطلب تے بی بی آمنہ نوں تے خیر رب ولوں اشارے ملے سن، عرب دے باقی سیانیاں نوں وی سمجھ لگ گئی سی پئی اپڑن والا اپڑ گیا اے۔ بلال تے ثویبہ دے گلاں وچوں غلامی دا طوق لاہ کے بلال نوں یار تے ثویبہ نوں ماں بنان والے اکھ کھول لئی اے۔ ایس گل دا پتا ایوں لگدا اے پئی سکے وچ اک یہودی تاجر بڑا سیانسی۔ جس راتیں سوہنا تشریف لیاندا اے اوہ قریشیاں دی اک بیٹھک وچ آیتے آکھن لگا ”لے بی دسو! اج قریش وچوں کھدے ول بال ہو یا اے؟“

”سانوں تے نہیں پتا“ بیٹھک دے معتبراں نے آکھیا۔

”اللہ اکبر! تہانوں وی نہیں پتا تے لوفیر دھیان نال سنیا جے تے نالے چیتے وی رکھیا جے پئی اج راتیں امت

دا اخیر نبی جم پیا اے۔ اوہدے موڈھیاں دے وچکار اک نشانی وی اے۔“

یہودی ایہ گل دس کے پچھانہ پریتا تے قریش سبکی اپنے اپنے گھراں ول ٹر پئے۔ جدوں گل کھل گئی تے فیراوسے یہودی ول ٹر پئے تے اوس ئوں جا کے دسیا پئی عبد اللہ بن عبدالمطلب ول بڑا ای سوہنا بال ہو یا اے۔ اوس نے بال ویکھنا چاہیا۔ جدوں اوس نوں بی بی آمنہ دے گھر لیاندا تے وڈے بھاگاں والی ماں دی اجازت نال بال یہودی نوں دکھایا گیا۔ اوہنے بال دی کند توں کپڑا چلیا تے غش کھا کے اوتھے ای ڈگ پیا۔ ہوش وچ آیتے لوکاں نے پچھیا ”اوبھلیا! تینوں کیہ بنیاں؟“

”واللہ! اسرائیل دی پیڑھی وچوں نبوت مک گئی۔ قریشیو! خش ہو جاؤ“ یہودی نے جواب دتا۔

ابن اسحاق آکھدے نیں پئی مینوں سند نال حسان بن ثابت توں روایت اپڑی اے پئی اک یہودی مدینے دے اک بٹے اتے چڑھیا رولا پاؤندا پیا سی ”او یہودیو! آؤ میری گل سنو“ جدوں یہودی اوس دے نیڑے اپڑے تے آکھن لگے۔ ”کیوں رولا پایا ہو یا ای۔ تیرا لکھ نہ رہوئے کیہ کھپ پائی آ؟“

”اج راتیں اسمان اُتے اوہ تارا دس پیا جے جیہدے ممکن دے نال ای احمد! اخیر نبی نے جم پینا سی۔“ یہودی نے

اپنے سبھناں متراں نوں گل سمجھا دتی۔

انج دیاں ہو رچو کھیاں ساریاں گلاں تواریخ نے اپنے پلے بٹھیاں ہوئیاں نیں، جہناں توں پتا لگدا اے پئی ساڈے سوہنے تے من موہنے نبی دی ولادت پاک رب ولوں کوئی گجھا کم نہیں سی سگوں اوس ذات گل نے موڈھے پھڑ پھڑ کے تے جھون جھون کے کفر تے شرک دے موہریاں نوں تاڑنا کیتی، لے بی تیار ہو جاؤ۔ غریباں تے ظلم بند کردیو، یتیمیاں ئوں اوہناں دے حق موڑ دیو، دھیاں نوں جیوندی جانیں قبریں وچ دبا چھڈ دیو، غلاماں نوں گھوڑیاں بنا کے اوہناں دے ڈھڈاں وچ اڈیاں مارن توں باز آ جاؤ تے نالے بی! اج توں بعد ماڑیاں تے عکیاں نوں ہتھ پاؤندے ذرا ویکھ لیا جے پئی تسلیں ہتھ پاؤنا اے تے اوہنے ہتھ پھڑنا اے۔ ٹساں ظلم کرنا اے تے اوہنے تہانوں ڈکنا اے۔ لے بی دھیان رکھیا جے تساں یتیمیاں دی دھون نوں ہتھ پاؤندے اوتے ایس جماندرو یتیم نے یتیمیاں دے سر اُتے ہتھ رکھنا جے۔ میاں محمد ہوراں کیہا سوہنا آکھیا اے:

اوہ محبوب حبیب ربانا حامی روز حشر دا
آپ یتیم، یتیمیاں تائیں ہتھ سرے تے دھر دا

ہوازن دیاں سوانیاں تے حلیمہ:

بی بی آمنہ نے دوتن دیہاڑے رسول اللہؐ نوں ددھ پیا یا تے فیرا یہ ذمے واری حضور دے چا چا ابولہب دی لونڈی ثویبہ دے نصیبیاں وچ آئی۔ عرب وچ اوہناں دناں وچ رواج سی پئی نوں جے بال نوں شہراں توں دور دریڈے پنڈاں وچ ٹور دتا جاندا سی، تاں جے اوہ بال صحرا دی حیاتی توں چنگی طرحاں جانو ہو جان تے نالے عرب دی کچی پیڈھی تے ٹھیک بولی وی چنگی طرح سکھ لین۔ ایس دستور موجب سال وچ دو واری بدوی سوانیاں ککے آؤندیاں سن تے شہر دے لوکی اپنے نیانے اوہناں دے حوالے کر دیندے سن۔ ایس واری قبیلہ ہوازن دیاں کچھ زنانیاں ککے آئیاں تے بال لھن لگ پئیاں۔
لو، اگلی گل ایہناں زنانیاں وچوں اک بھاگاں والی کولوں ای سنو، آکھدی اے:

”میں اپنے گھر والے دے نال رل کے ددھ پین والے بالاں دی بھال وچ ٹر پئی (چیتے رہوے پئی بنی سعد قبیلہ ہوازن دی اک لڑی سی) ایہ قحط دے دیہاڑے سن تے قحط نے ککھ کنڈا نہیں سی چھڈیا۔ میں اپنی چٹی اُوٹھنی تے سوار ساں۔ ددھ لئی اسیں اپنے نال اک ہور اُوٹھنی وی لے کے گئے ساں، پر سونہر رب دی اوہ ددھ اک تبرکا نہیں سی دیندی۔ اوہ میرا بال بھکھ نال ولکدار ہندا سی تے ساری رات اکھ نہیں سی لان دیندا۔ نہ تے میرے سینے وچ بال لئی کوئی شے سی تے نہ ای اُوٹھنی دے تھناں وچ۔ بس مینہ تے چنگے دناں دی اڈیک وچ ای دن گزر رہے سن۔ میری چٹی اُوٹھنی وی ایڈی لسی سی پئی ٹرنوں عاجز آئی ہوئی سی، ایس پاروں راہ وچ پورا قافلا سا تھوں سوڑا پیندار ہیا۔ خیر اسیں کسے نہ کسے طرحاں ککے اپڑ گئے۔ ساڈے وچ کوئی زنانی اجہی نہیں سی جہدا ایہ ترلانہ ماریا گیا ہووے پئی تئیں محمدؐ نوں لچھڑ لے لو پر جدوں اوہنوں پتا لگدا سی پئی ایہ نیانا تے یتیم اے تے اوہ لین توں صاف انکار کر دیندی۔ اسیں آکھدیاں ساں پئی ایہ نیانا تے یتیم اے بھلا ایس دی بیوہ ماں تے بڈھے دادے نے سانوں کیہ دینا اے؟ بس ایہو گل سی پئی اسیں ایہدے توں لانجھ ای کر دیاں رہیاں۔ دو جے پاسے گل ایوں بنی پئی جہڑیاں سوانیاں میرے نال آئیاں سن اوہناں سبھناں نوں تے کوئی نہ کوئی نیانا لہ گیا، نری میں ای رہ گئی۔ جدوں سارے بچھانہ پرتن لگے نا، تے میں اپنے گھر والے نوں آکھیا پئی کڈی گھاٹ دی گل اے پئی اسیں سکھنے ہتھیں ٹر چلے آں، جے توں آکھیں تے میں اوہ بال ای نہ لے آواں۔ اوس نے آکھیا چل ٹھیک اے، لے آخورے رب اوہدے وچ ای برکت پادیوے۔ فیر میں گئی تے اوہ بال صرف ایس لئی لے آندا پئی مینوں ہور کوئی نہیں سی لہا۔“

حلیمہ گل اگے ٹور دیاں آکھدیاں نیں ”میں بال نوں لے کے ککے توں باہر بنائے اپنے ڈیرے تے پجی۔ جدوں اوس نوں ددھ پیا تے سینے دوڈھ نال بھر گئے۔ بال نے جنادل کیتا ددھ پیتا۔ میرے پتر نے وی ڈھڈھ بھر کے پیتا۔ فیر دوویں رضائی بھرا سوں گئے جد کہ ایس توں اگدیں اسیں راتیں اکا ای سوں نہیں ساں سکدے۔ میرے گھر والا اُوٹھنی چون لئی گیا

تے دیکھیا پئی اوہدے تھن وی ددھ نال بھرے پئے نیں۔ مڑاوس نے اینا ددھ دتا پئی اسیں دوویں جی وی رج گئے تے بڑے آرام نال رات کدھی۔ سویر ہوئی تے میرے گھر والے نے آکھیا ”حلیمہ! رب دی سوہنہ بڑیاں برکتاں والا روح لے آندا ای۔“ میں آکھیا ”دل تے میرا وی ایہی آکھدا اے۔“

آؤ واپس ککے پرتدے ہاں۔ تے تصور وچ اپنے آپ نوں اوس دن تے اوس تھاں تے لے جاندے ہاں۔ دیکھو: ہُن بنی سعد دیاں زنانیاں دا ٹولا اپنے پنڈول ٹر پیا اے۔ حلیمہ اپنی اوسے چٹی اُوٹھنی تے سوار نیں پرہن اوہ کسے نگڑے گدھے یاں اُوٹھ نوں وی نال نہیں پئی رن دیندی۔ نال دیاں زنانیاں آکھیاں نیں ”او حلیمہ! نی ابو ذویب دی دھیئے! ایہ کیہ؟ ایہ اوہوای اُوٹھنی نہیں جہدے تے چڑکے ککے آئی سیں؟“

”قسے اوہوای اے۔“ حلیمہ نے جواب دتا۔

”فیرہن تے کوئی اچرج گل اے ایہدے نال۔“ اک سوانی نے آکھیا۔

”آہو، مینوں وی ایوں ای جاپیا اے۔“ حلیمہ نے جواب دتا۔

ڈھڈوں جے نیانے نوں رجھواں ددھ نہ پیاسکن جوگی، ککے ول آن دیاں اپنی مریڑی تے لسی اُوٹھنی دی سواری کرن پاروں زنانیاں دیاں جھاڑاں سنن والی، اپنی اُوٹھنی دے تھلیوں سکھنے بھانڈے چکن والی تے بکریاں لئی پٹھے دتھے نہ لھ سکن والی بنی سعد دی وچاری جہی زنانی عرش دے شہسوار نوں اپنی چٹی اُوٹھنی اُتے لئی صحرا دل ٹری جاندی سی۔ اوس نوں پہلے دیہاڑے ای سمجھ لگ گئی سی پئی جس نوں اوہ یتیمی پاروں پہلوں کچھولین لئی وی تیار نہیں سی ہوئی اوہ اوہدے اُتے بھار بن نہیں سی آیا، سگواں اوہدا بھار وٹن آ یا سی۔ بھلا اوہ کوئی حلیمہ دارزق کھاون آ یا سی؟ نہیں نہیں اوہ تے حلیمہ دے رزق دا ای نہیں سگواں قیامت تک آون والے ہر ماڑے دُپڑے، نتانے تے یتیم لئی تے حلیمہ ورگیاں ارباں کھر باں زنانیاں لئی رحمت بن کے آ یا سی۔ بس رحمت ای رحمت..... رحمۃ اللعالمین محمد a۔

مڈھلی حیاتی تے کیرن آرمسٹرانگ دا بھولپن (معصومیت):

”سانوں محمد دی مڈھلی حیاتی دا بس تھوڑا بہت ای پتا اے۔“ اج دے دور دی امریکی مستشرق کیرن آرمسٹرانگ ”محمد اے باؤگرانی آف دی پرافٹ“ دے چوتھے باب دا مڈھ ایہناں اکھراں توں جنھ دی اے۔ فیر آپ ای اگے جا کے سورۃ الضحیٰ دی آیت ۶ توں ۸ دا حوالا دیندی اے۔ شکر رب دا پئی مستشرقین قرآن نوں تے حق سچی کتاب من دے نیں، جھڑا آکھدا اے ”کیہ تیرے رب نے تینوں یتیم ویکھ کے تھان نہیں دتی تے تینوں بھلیں پئے نوں ویکھ کے ہدایت نہیں دتی تے تینوں تنگی وچ ویکھ کے غنی نہیں بنا دتا۔“ آرمسٹرانگ دسنا ایہ چاہندی اے کہ محمد رسول اللہ a دے یتیم ہون تے اوس نوں کوئی شبہ نہیں تے نالے اُوکھے دناں دی حیاتی نوں وی اوہ دوجے غیر مسلم سیرت نگاراں طرحاں من اُتے مجبور اے پر خورے کیہ گل اے پئی بی بی آمنہ تے حلیمہ سعدیہ نوں نظر آون والیاں گلاں ایہناں نوں کیوں نہیں دسدیاں، یاں جے اوہناں ول مستشرقین دادھیاں کراہیئے وی تے ایہ اکھاں کیوں میٹ لیندے نیں؟

کیرن جی! تہانوں مڈھلی زندگی دا کجھ وی پتا نہ ہووے تے افسوس کوئی نہیں پر ساقھوں ایس روشن مینارے دی اک نکر

وی لگی رہ گئی تے ساڈی تھاں کوئی نہیں۔ سانوں تے ایہ وی پتا اے پئی جدوں مائی حلیمہ ایس دُریتیم نوں لے کے بنی سعد چکی سی تے خشک سالی پاروں او تھے گھاہ دا اک تیلہ وی نہیں سی پر فیروی حلیمہ سعدیہ دیاں بکریاں رج کے آوندیاں سن تے چنگا چوکھا ددھ دیندیاں سن پر لوکاں دیاں بکریاں بھکھیاں پر تڈیاں سن تے ددھ وی تبکا نہیں سن دیندیاں۔ حلیمہ دی قوم دے لوکی اپنے آجڑیاں نوں آکھدے سن ”پئی تسیں بکریاں او تھے کیوں نہیں چھڈ دے، جتھے ابو ذویب دی دھی دیاں ہوندیاں نیں؟“

”او تھے ای چھڈ دے ہاں“ آجڑی جواب دیندے پر اوہ بکریاں بھکھیاں ای رہندیاں تے حلیمہ دیاں رجھ کے آوندیاں۔ ایہدے توں دکھ وی بنی سعد دے لوکاں نے کئی اچرج تے وکھرے کم ہوندے دیکھے۔ دو سال پورے ہو گئے تے ایس قریشی بال دے دُدھ وچ وادھا کیتا گیا۔ جُسے دے حساب وچ کوئی دو جا بال آمنہ دے لال دا مقابلہ نہیں سی کر سکد اجہڑا دو ورہیاں دی عمر وچ ای واہوا ہشیا رج اپن لگ پیاسی۔

حلیمہ سعدیہ دے برکتاں والے گھر وچ جہڑے اوہناں دے اپنے تے ڈھڈوں جے بال موجود سن، اوہ عبد اللہ بن حارث، انیسہ بنت حارث تے حذافہ بنت حارث سن۔ حذافہ نوں اپنے رضاعی بھرا محمد a نال بڑا پیاری سی تے اوہ آپ نوں کھواندی پیاہندی رہندی سی۔ ایہہ اوہی حذافہ بنت حارث اے جہوں اگے جا کے تواریخ شیماء دے نکلے ناں نال یاد رکھدی اے۔ اک واری انج وی ہو یا پئی رضائی بھین ویرنوں لے کے ذرا دُریدی نکل گئی۔ حلیمہ سعدیہ نے دور توں دیکھیا پئی بکریاں دُھپ وچ نیں (تے اوہناں دا مندا حال اے، بال دا کیہ حال ہووے گا؟) حلیمہ کڑی نال بڑا ناراض ہوئیاں تے آکھن لگیاں ”ایہی گرمی وچ منڈے نوں باہر کیوں لئی پھرنی ایں؟“

”ماں! مرے ویرنوں دُھپ تے نہیں لگدی، بدل ایہدے اُتے چھاں کیتی رکھدے نیں۔ جدوں اسیں کھلو جانے آں تے بدل وی نال ای کھلو جاندا اے تے جدوں ٹرنے آں تے بدل وی نال ٹر پیندا اے۔“ کڑی نے جواب دتا۔

دُدھ پین دی عمر دے مڈھلے دو سال تپدیاں ریتاں تے صحرا دیاں جُسے ساڑ دیاں ہواواں، میرے آقائے مولادا پنکھوڑا بنیاں رہیاں۔ ایہ دو ورھے پورے ہوئے تے حلیمہ سعدیہ اوہناں نوں لے کے کپڑا گتیاں پر جان دیاں ای تر لا مار دیاں نیں ”تہاڈی امانت تہاڈے ہتھاں وچ دے دتی اے، پر جے ایس سوہنے نوں تھوڑا چرہور میرے کول رہن دیو تے کیہ حرج اے؟“ اُم نبی a نے حلیمہ دا دل نہ ٹٹن دتا تے آکھیا ”چل حلیمہ، ایوں ای سہی جویں توں آکھدی ایں۔“ انج وی اوہناں دناں وچ مکے وچ وباء پھیلی ہوئی سی جہڑی انسانی جاناں دا کھہڑا نہیں سی چھڈ دی۔ انج ایس دُریتیم نے اگلے دو ڈھائی ورھے وی اوہی حلیمہ دے گھر وچ ای گزارے، جس نے سچھے دل نال ایس یتیم نوں کچھ لیا سی پر ہُن لہو روندے دل نال وی اوہنوں کچھڑوں لاہن لئی تیار نہیں سی۔ جہڑی پہلوں سوچدی سی پئی ایہدے لئی ددھ کتھوں لیاواں گی، ہُن سوچدی سی ایہدے باجھوں ددھ کتھوں لیٹھاں گی؟ ہُن اوس حلیمہ نوں صحراں دیاں سڑ دیاں بلدیاں ریتاں اُتے کھیڈاں کھیڈ دے بدل غائب ہوندے پئے دسدے سن۔ اپنیاں بکریاں تے اوٹھنیاں دے دُدھ نال ٹھاٹاں مار دے تھن سکدے نظر پئے آوندے سن تے ایہناں سارے مادی فائیدیاں توں وی کدرے ددھ کے اوہ روحانی سرور جہڑا ایس بھاگاں والے

بال دے اوہدے گھر آؤن مگروں مائی حلیمہ محسوس کردی رہی سی، اوہ سبھ کچھ ہن اوہنوں اپنے ہتھوں جاندا چاپ رہیاسی۔ حلیمہ سعدیہ نوں اپنے لیکھاں تے فیر شک گزرن لگ پیاسی پرائج ہوندا نہیں۔ جہدے نال حلیمہ نوں واہ پیاسی ایہ بانہ پھڑ کے چھڈن والیاں وچوں کدوں سی۔ مثال وجوں عمرو بن شعیب توں روایت اے پئی ”اسیں حنین وچ رسول اللہ a دے نال ساں۔ جدوں آپ دشمن دے مال ڈنگرتے مال عیال تے قابض ہو گئے تے اوہناں دا اک جتھا دائرا اسلام وچ داخل ہو کے حضور کول آیا تے آکھیا پئی اوہ اک عزت وقار والے گھر دے جی نیں تے تنبواں وچ حضور دیاں ماسیاں، ددھ بیان والیاں تے چھڑ چک کے کھڈان والیاں وی موجود نیں۔“ اوہناں دے نمائندے تے خطیب زہیر بن صرد نے گل اگے ودھائی تے آکھیا ”جے کراسیں حارث بن ابی شمر غسانی (شاہ غسان) یاں نعمان بن منذر (شاہ یمن) نوں ددھ پیاندے تے فیر اوہناں دے سامنے اسیں کسے مصیبت وچ پئے ہوندے جو یں ہُن پئے ہاں، تے اسیں امید کردے پئی اوہ ساڈے نال چنگا ورتدے۔ تسیں تے اوہناں سبھاں توں وی چنگے جے۔ آس اے پئی تسیں ددھ پیائی دالجاظ کرو گے۔“

سرپارحمت دی رحمت جوش وچ آئی تے حکم ہويا ”غنیمت وچ جو میرا تے عبدالمطلب دی اولاد داحصا اے اوہ رب دی راہ تے تہاڈا ہويا۔“ ایہ سن کے انصار آکھن لگے ”ساڈا حصا وی اللہ تے اوہدے رسول دے تابع ہے۔“ ایوں چھ ہزار بال تے سوانیاں آزاد کردتے تے بے شمار مال ڈنگر اوہناں نوں دے چھڈے۔

ایہناں قیدیاں وچوں ای اک بی بی نے آپ دے بچپن دیاں کچھ یاداں سچیاں کیتیاں تے اوہنوں پہچان دے ہوئے حضور a ولوں ارشاد ہويا ”توں شیماء ایس، حلیمہ دی دھی تے میری رضائی بھین۔“ اینا آکھ کے کالی کملی والے نے موڈھے توں چادر لائی تے اوہدے لئی بھنجے وچھادتی تے فرمایا ”میری بھین! جے توں میرے کول ای رہویں تے چنگا اے پر جے کراپنی قوم نال واپس پرتتا چاہویں تے فیر وی آزاد ایں۔“ شیماء نے اپنے جیاں نال واپس پرتتا چاہیا تے آپ a نے عزت اکرام نال اوہنوں رب راکھا آکھیا۔

بال پنہ دے ایناں احساناں دا بدلہ صرف انسانیت دے محسن ولوں ای نہیں سی سگوں کائنات دے خالق تے مالک ولوں وی سی۔ غروہ آکھدے نیں پئی جدوں ابولہب مر گیا تے اوس نوں خاب وچ بُرے حال وچ ویکھیا گیا تے نالے ابو لہب نے آکھیا پئی تہاڈے توں وچھڑن توں بعد مندا حال اے پر محمد a دے ایس دُنیا اُتے تشریف لیاون دی خوشخبری سن کے، جس اُنکلی نال اشارا کر کے میں اپنی لونڈی ثویبہ نوں آزاد کیتا سی اوہدے وچوں کچھ پین لئی لہجہ جاندا اے۔ امام سہیل فرمادے نیں پئی ایہ سفتا اوہدے بھراتے حضور دے چاچا حضرت عباس c نے ویکھیا سی۔ اوہناں ایہہ وی دسیا پئی سوموار دے دیہاڑے ابولہب دے عذاب نوں گھٹا دتا جاندا اے۔ چیتے رہوے پئی ابولہب دی ایسے آزاد ہون والی لونڈی ثویبہ نے وی کچھ چرلئی حضور نوں ددھ پیایا سی۔

ایسے تعلق دی اک مثال ایہ وی اے پئی اک واری بنی سعد وچ چوکھا ڈاڈھا قحط پیا۔ کوئی شے کھان پین لئی نہ رہ گئی۔ حضرت حلیمہ سعدیہ حضور کول تشریف لیاںیاں تے اپنے ڈکھڑے سنائے۔ حضور نے اوہناں دی بھرویوں سیوا کیتی تے چنگا چوکھا مال دے کے ودعیا کیتا۔ اوس مال وچ اک اونٹ تے چالھی بکریاں دا اجڑ وی شامل سی۔

جے ہُن اسیں صحرا وچ بنی سعد دے قبیلے ول واپس پریتے تے گل ایوں ٹردی اے پئی دکھو دکھ روایتاں دے مطابق حضور پاک a چار توں چھ سال تیکر ایس تھان تے رہے۔ مار گولتھ تے محمد حسین ہیکل دا خیال ایہ دے پئی پنج سال تیکر مائی حلیمہ دے ہتھان وچ رہے، شیماء نال بھین بھرا والا پیار رہیا تے حضور a اپنے رضاعی بھرا عبداللہ نال رل کے بکریاں دے آجڑی بنے رہے۔ فیر ایہ پئی جدوں حلیمہ سعدیہ حضور نوں لے کے آئیاں تے اوہناں کے دے اُتلے پاسے آپ a نوں کدھرے گم کر دتا۔ جدوں لھن وچ کامیابی نہ ہوئی تے حضرت عبدالمطلب کول اپڑیاں تے جا کے ساری گل سنائی۔ دادا حضور کعبے کول کھلو کے دُعا ممکن لگ پئے تے حضور نوں ورقہ بن نوفل تے اک قریشی بندے نے بھ لیا ندا۔ دادے ہوراں اپنے چن نوں موڈھیاں تے بٹھایا تے لگ پئے کعبہ دا طواف کرن۔ فیر حضور a واسطے دعا کیتی تے اوہناں نوں حضور دی والدہ دے حوالے کر دتا۔

ابن اسحاق آکھدے نیں کہ کئی سیانیاں نے ایہ گل دسی اے پئی ابے وی حلیمہ دادل نہیں سی کردا بال نوں اوہدی ماں نوں موڑن تے، پر ہویا ایہہ پئی حبشہ دے کجھ عیسائیاں دا ٹولا بنی سعد دے علاقے وچوں لنگھیا تے حلیمہ نوں آکھن لگا پئی ایس نیانے نوں اسیں اپنے نال شہر نہ لے جائیے۔ سانوں پتا اے پئی ایہ بڑا صاحب کرامت تے صاحب ظہور اے۔ ایس ڈرتوں پئی انج دے لوکی بال نوں کدھرے نقصان نہ اپڑان، حلیمہ سعدیہ حضور a نوں لے کے مکے واپس آگئیاں تے ایوں ایس دور دی اخیر ہوئی پر حلیمہ دا گھر برکتاں تے رحمتاں دے نہ مکن والے سلسلے دا اک حصا بن گیا۔

ماں میہٹر محمد:

ماں میہٹر محمد: ایہ مکہ اے۔ عربستان دا سیاسی تے مذہبی گڑھ..... سایمنے خانہ کعبہ وکھالی پیدا دیندا اے۔ کندھ نال جوڑ کے ایہدی چھان پٹھ اک مسند وچھائی گئی اے۔ مسند تے کلا بیٹھا بزرگ کعبہ دا متولی تے مکے دے قریشیاں دا سردار اے۔ سردار دے وقار تے ادب دا ایہ تقاضا اے پئی کوئی عام عربی عجمی تے دور دی گل اے سردار دا اپنا کوئی پتر وی نال جڑ کے بیٹھ جان دی جرات نہیں کر سکدا۔ سایمنے پنجاں کو روہیاں دا اک بال ٹریا آ دندا اے۔ سوہنی تے وکھری جہی دکھ دین والا ایہ بال نکلے نکلے پیر پٹد اسدھا سردار دے نال مسند تے جا چڑھیا اے۔ ”رُکو ٹھہرو! مسند تے بابے ہوراں دے نال؟ اوہو ہو..... ایہ کیہ؟..... نہیں بچو دے نہیں..... ایہ ٹھیک گل نہیں۔“ سردار دے پتر اعتراض کر رہے نیں۔

”نہ نہ نہ، پلنگل نہیں..... نہیں عباس نہیں، حارث نہیں، مقوم نہیں، تسین کجھ نہیں جان دے۔ تہانوں نہیں پتا میرے پوترے دی شان دا۔ ایس نوں ٹوکیا نہ کرو“

سردار اپنے پتراں تے بال دے چاچیاں نوں سمجھا رہے نیں تے نالے بال دی کنڈ اُتے ہتھ پھیر رہے نیں۔ سردار ہوراں دا پورا دھیان بال ول اے تے چہرے اُتے خشی دے جذبے صاف وکھالی پئے دیندے نیں۔

بنی سعد توں واپسی تے بی بی آمنہ تے برکہ دے پیار دے نال نال ایس کرماں والے سردار دی شفقت وی رب دے محبوب نوں چنگی چوکی مل رہی سی پر اک گل جہڑی سرکار دے کلیجے نوں رگھ پاؤندی سی اوہ ایہی پئی دوجے بالاں دا تے اپنی حیاتی وچ اک اجہی ہستی نال دی واہ پیندا اے جہوں اوہ ابا اکھدے نیں پر آپ پیدا نشی طور تے ای باپ دی شفقت توں

محروم سن۔ مکے دے بال تے ضرور اپنے اپنے ابے دے موڈھیاں تے چڑھ کے آلے دوالے لگدے میلے ویکھن جاندے ہون گے تے بازار وچ ٹر دیاں چیزاں دی فرمائش پوری نہ ہون تے تڑنگ وی ہوندے ہون گے۔ ایوں یتیمیاں دے تھاں داسبق دین والی ایس سوئی سرکار تے دُریتیم نوں ضرورتی داساس ہو یا ہووے گا۔ فیر جدوں اک ورھے بعد ای سیدہ آمنہ سوہنے نوں لے کے یثرب آئیاں تے اوس گھر وچ وی لے گئیاں جہدے وچ مکے دے یوسف، عبداللہ نے دم دتے سن تے نالے پترنوں اوس دے والد دی قبر دی زیارت وی کروائی، تے فیر اوہدوں معصوم دل ضرور تڑفیا ہووے گا۔

جس دے ذمے قدرت نے آدمیت دی تربیت کرنا لایا سی، قدرت اوس دی تربیت دائائم ٹیبل ایوں بنائی بیٹھی سی پئی عقل تے شعور، مجھن توں قاصر رہ جاندے نیں۔ سیدہ آمنہ اپنے مرحوم شوہر نال رہی کی جہی رفاقت دیاں گلاں تے موت دے سانجے دی حقیقت پترنوں سناوندیاں رہیاں۔ اوہ گھٹو گھٹ اک مہینا اپنے نانکے تے سر سائیں دی مرن بھوں تے رہیاں تے فیر پچھانہ مکے پرتن دی آہر کیتی۔ اجے یثرب توں کوئی ۴۳ میل داپنڈا نبڑیا سی تے سیدہ آمنہ بیمار ہو گئیاں۔ آپ نے ابواء دے قصبے وچ ڈیرا لایا۔ اوہ تھیں طبیعت وگڑ دی گئی۔ اورک گل ایٹھوں تیک جا پڑی پئی مالک نے واج مار لئی۔ والد دی شکل تے اگے ای نہیں سی ویکھی، والدہ نوں پردیس وچ جدوں اپنیاں اکھاں نال قبر وچ لہندیاں ویکھیا تے ساری دنیا وچ انھیر ائی انھیرا ہو گیا۔ کل تک جہدی زبان توں والد دیاں گلاں سن سن کے دکھ تے سکھ دار لیا ملیا سرور ملدا سی، اوہ وی چھڈ کے ٹر گئی سی۔ رب نے دس دتا پئی سوہنیا! ایہ لذت ای یتیمی دی۔ اگے تے توں یتیمی دی لذت چکھی سی تے ہن ماں میہڑ ہون دامتزاوی مان لے۔ ایس وڈے دکھ داسوادوی چکھ کے ویکھ لے، ایہہ کیہ شے ہے، تاں جے تینوں پتا لگ جاوے پئی یتیم تے ماں میہڑ کیہو جے ہوندے نیں۔

یثرب توں ابواء تک والدہ نال مٹھیاں مٹھیاں گلاں کرن والے سیانے نیانے نے ابواء توں نکلدیاں اخیریاں واری والدہ دی قبر نوں ویکھیا۔ تھوڑے پنڈے تے پچھانے رہ جان ولی قبر وی اک وار فیر اکھاں اگے گھم گئی۔ والد داسوہنا مکھڑا کدے نہ ویکھ سکے دا دکھ اک وار فیر سچرا ہو گیا۔ چھ ورھیاں دا غریب الدیار تے گھروں دور ٹھہڑے کھاندا بال کلا رہ گیا۔ لہو دے اتھر وروندادل لے کے نا تجربا کار جہی محسن برکہ (ام ایمن) نال نکھامد a مکے دل ٹریا۔ برکہ وچاری آپ وی اجے بالڑی سی پر فیرو اوس نے مالکن دی سوئی نشانی نوں تتی ہوانہ لگن وتی تے ٹٹے دل نال مکے اپڑ گئی۔ ایس سفر دا ذکر نبی اکرم a اپنی حیاتی دے مدنی دور وچ کردے رہے تے دسدے رہے پئی کوں اوہناں خزر رچی عزیزاں دے تالاب وچ ترہا سکھیا سی تے کوں یثرب وچ اپنے ہانیاں نال اوہ کھید اں کھید دے رہے سن۔

ربا تیریاں توں جانیں:

آپ a دنیا تے تشریف لیائے تے رواج موجب صحرا ول ٹور دتے گئے۔ مکے تشریف لیائے تے صرف اک ورھا اپنی پیاری امی نال گزار سکے۔ امی ہوراں وی اپنے سوہنے سرتاج نال خوشی دے دوچار مہینے ای گزارے سن۔ ایس حال وچ ماں پتر دی ذہنی حالت کیہ ہووے گی، ایس نوں اوہ ہی جان دا اے جہدے تے یتیمی ہووے۔ جوانی دی بیوگی تے بچپن دی یتیمی بڑے وڈے دکھ ہوندے نیں پرایہ دوویں رب دے محبوب دے گھر دس رہے سن۔ عرب وچ نوجوان عورت دے

بیوہ رہن دار وراج ای نہیں سی۔ عقد ثانی دا دستور سی پر جویں بیغمبر خدا دی بیوی اُم المومنین ہوندی اے تے اوس دادوہری وار نکاح نہیں ہوسکدا، ایوں قدرت نوں ایہ وی منظور نہیں سی کہ نبی آخری الزمان a دی پیاری امی کسے دوسرے دے نکاح وچ جاندی۔ دوجے پاسے رب تعالیٰ نوں اوہناں دی جوانی دی بربادی وی خورے نہ دیکھی گئی تے نہ ای ایہی اہ اوہ اک لمحے عمر دکھاں تے غماں وچ گزارن۔ ایوں جا پدا اے بی بی آ منہ نوں واج مار لین دی اک وجہ ایہ وی ہونی اے، پر خورے ایس توں وڈی وجہ اوہ ای ہووے جہدا کچھ ذکر کیتا گیا اے کہ یاردی تربیت کرنی سی۔ رب ای جانے کیہ راز سی! ننھے محمدؐ بابے ہوراں دی قبر تے:

یتیمیاں دا والی یتیم، تے بے وارثاں دا وارث، بے وارث سی۔ اوہ ہُن ککے وچ ککے دی باوقار تے اُچیاں شانناں والی ہستی، قریشی سردار جناب عبدالمطلب دا سنگی ساتھی بنیا۔ جناب عبدالمطلب دے گھر وچ ایس دُر یتیم توں دو ورھے وڈے چاچے حمزہ نوں متری دادی ہالہ بنت وہب دا چوکھا پیارل رہیاسی۔ ایسے گھر وچ تن ورھے وڈے چاچا عباس سن چہناں دی دولت مند ماں نیلہ بڑے چاء نال اپنے شہزادے نوں چکی پھر دی سی تے اوہناں لئی اپنے خاوند عبدالمطلب نال فرمائشاں کر دی رہندی سی۔ جناب عبدالمطلب جہاں دیدہ تے سیانے ہون دے نال نال بڑے کولے من والے وی سی۔ عبداللہ دی نشانی اوہناں نوں عبداللہ نالوں وی ودھ عزیز سی۔ اوہ یتیم پوترے دا بڑا دھیان رکھدے تے ایس گل نوں وی ساہمنے رکھدے پئی ہن ایہدی ماں وی نہیں رہی، کدھرے کوئی چاچا یاں متری دادی اوہدے نال اُچانہ بولے۔

حضرت عبدالمطلب ولوں بھروسے توجہ لھین اُتے بھوراوی شک نہیں پر دنیا دی کوئی محبت دی ماں دی نگھی محبت تے والد دے پیار دے ٹل تے نہیں ناہوسکدی۔ ایہناں دناں وچ برکہ وی ایس سوہنے دی سچی مولس غنوار تے رمز شناس بنی رہی۔ نو عمر محمدؐ واسطے دادے دادم وی غنیمت سی۔ دا دا حضور ہر ویلے نال لئی پھر دے۔ ساریاں لوٹاں دا دھیان رکھدے تے پوریاں کر دے تے سردار دی حیثیت نال مسند وچھا کے بیٹھدے تاں حمزہ تے عباس جے کئی عمر دے پتران نوں وی ایہ اجازت نہیں سی پئی اوہ نال جڑ کے بیٹھدے پر ایس یتیم تے ماں میہڑ پوترے نوں کوئی روک ٹوک نہیں سی۔ جے کوئی ٹوکدا تے حضرت عبدالمطلب سختی نال روک دیندے۔ پر قدرت دی نرالی تے نویلکی تربیت گاہ دے تقاضے کجھ ہو رسن۔ تربیت پوری نہیں سی ہوئی تے گل اچے توڑ نہیں سی چڑھی۔ ہو یا ایہ پئی جس دیہاڑے پوترے دی حیاتی دے اٹھ ورھے، دو مہینے تے دس دن پورے ہوئے، مہربان دادے نوں وی تقدیر نے ایہ احسان کرن توں ڈک دتا تے ایوں پوترے نوں اکلا پے دے ڈراؤ نے تھلاں وچ لیا کھلا ریا۔

آپ a نے جویں اپنی والدہ ماجدہ نوں اپنیاں اکھاں دے ساہمنے ساہ پورے کر دیاں دیکھیا سی، ایوں ای دادا حضور دی روح وی چھوٹے تے پیارے پیارے جے ہمتھاں نوں لانجھے کر کے دیکھدیاں ای غائب ہو گئی۔ اچے ماں دی جدائی دے صدمے نال بھیجاں اکھاں سکیاں نہیں سن کہ دادے ہو ریں وی چلانا کر کے پوترے تے غم دا پہاڑ توڑ گئے۔ رون آنا تاں قدرتی گل سی پر ہن اوس بال دیاں اتھراں پونجھن والا وی کوئی نہیں سی رہیا تے نہ ای کوئی سینے نال لان والاسی۔

نہے محمد a اتھروواں نال بھریاں اکھاں لے کے بابے دی میت دے نال نال ٹر رہے نیں۔ دل غم نال پھٹیا جارہیا اے..... جنازہ اپنی تھاں تے اپڑ گیا اے..... ہن بنو ہاشم دی پچھان تے وقار دا جنازہ قبر دے نیڑے وے..... میت لحد وچ اُتارن لئی کجھ لوکی اگے ودھے نیں..... ہن میت لحد وچ اتار دتی گئی اے..... نہے حضورؐ کئی بھ کے بیاسی ورہیاں دے مہربان دادا دی میت نوں ویکھی جارہے نیں۔ جد بزرگوار! اللہ حافظ، تہاڈاوی..... میراوی۔

میرا آقا، میرا مولا، غریباں دا والی، پتہماں دا ملجی، ضعیفاں دا ماویٰ تے بے وارثاں دا وارث فیرکلا، اک واری فیر۔ ربا سوہنیا! ایہ کیہ؟ ایوں وی ہوندا اے؟ کیوں کھوہ رہیا ایں وقفے وقفے نال وارث ایس دے؟ کیہ مقصود اے ایس توں؟ ایس دی تربیت کد پوری ہوئی؟ بھلا کوئی انج وی کر دا اے؟ کوئی چاہن والا اپنے محبوب نوں ایوں وی ویکھنا چاہندا اے؟ ایسے سارے دکھ ایڈی کئی جہی عمرے! ربا سوہنیا ایہ کیہ؟

جناب عبدالمطلب جدوں حیاتی دے انخیری ساہ لے رہے سن تے اپنے پتر ابو طالب نوں سوہنے دی پرورش تے تربیت دی ذمے واری وی دے گئے سن۔ جناب ابو طالب اخیر تک ایہ ذمے واری چوکھے سوہنے طریقے نال نبھاندے رہے۔ چھتے رہوے پئی حضور a دے ایہ محسن (ابو طالب) تے مرحوم عبداللہ ماں جائے سن تے حضرت عبدالمطلب دی اولاد وچوں، حضرت عبداللہ دی والدہ دے لطن وچوں صرف دوای پتر سن۔ اتھے ایہ گل دس دینی وی ضروری جاپدی اے پئی جناب عبدالمطلب دا جنازہ بنو ہاشم دے اقتدار تے وقار دا وی جنازہ ثابت ہو یا تے ایوں اوہ پہلا دن سی پئی بنو امیہ دا خاندان بنی ہاشم تے غالب آ گیا۔ جناب عبدالمطلب دی مسند ریاست اُتے حرب قابض ہو یا جہڑا بنو امیہ دا نامور سپوت سی۔ ریاستی کماں وچ صرف سقایہ یعنی حاجیاں نوں پانی پینا ای حضرت عباس دے ہتھاں وچ رہیا، جہڑے عبدالمطلب دے پتر سن۔ ایہ ذمے واری اے تیکر حضرت عباس دی اولاد کول ای ہے۔

حضرت ابو طالب جناب عبدالمطلب دی اولاد وچوں سبھ توں گھٹ آمدن تے چوکھے خرچے کرن والے سن۔ مہربان چاچا نے اپنی اولاد توں ودھ بھتیجے دا خیال رکھیا۔ اوہ بھتیجے توں کوئی اکھا کم لین دے حق وچ نہیں سن۔ پر صدقے جائے اٹھ ورہیاں دے ایس بال دی ہمت دے پئی اوہ غریب چاچے تے بھار نہ بنے تے ضد کر کے چاچے ہوراں نوں ایس گل تے راضی کر لیا تے ایوں اوہ قریش دے وڈکیاں دیاں بکریاں اجرت تے چران لگ پئے تے چوکھا چر آ جڑی بنے رہے۔ بکری دی چرائی اوہناں نوں اک قیراط چاندی ملدی سی پر ایس گل دا ویرا نہیں ہو سکیا پئی ایہ مزدوری مہینے واری یاں ورہے وار۔ ایوں اٹھ ورہیاں دی عمر وچ ای مہربان چاچے دے مالی بھار نوں وٹن لئی بھجکل کر دے رہے۔

محسن نبوت جناب ابو طالب تے نوجوان محمدؐ:

ابا جی نوں تے محسن اعظم حیاتی وچ ویکھ ای نہ سکے، امی جان نوں رب نے آواز مار لئی، دادا حضور وی چلانا کر گئے تے بے وارثاں دا وارث، بے وارث جہیا جاپن لگ پیا۔ ایس حال وچ جناب ابو طالب ایس محسن اعظم a دے محسن بن کے ساہنے آئے تے فیر اوہناں نے وارث ہون دا حق ادا کر چھڈیا۔ کیہ مجال سی کسے ویری دی کہ جناب ابو طالب نال گل کیسے بغیر اسدے بھتیجے نوں اچی واج دی ماردا۔ جناب ابو طالب دی بھتیجے نال محبت تے احتیاط دا ایہہ حال سی کہ اک واری ایوں

ہو یا پئی بنی لہب و چوں اک بندا کئے بجیا۔ اوہ بندا قیافے دا سیانسی۔ قریش دے لوکی اپنے اپنے نیانیاں نوں لے کے اوہدے کول آئے تاں جے اوہناں دی آون والی حیاتی دیاں کجھ گلاں توں جانوں ہوسکن۔ ابوطالب وی اپنے لاڈلے بھتیجے نوں لے کے اوس کول اپڑے۔ اوہنے اک نظر آپ نوں ویکھیا تے فیر کسے کسے لگ گیا۔ جدوں ویلھا ہو یا تے آکھن لگا اوہ بال کتھے وے ای جھوں میں جھٹ پہلوں ویکھیا سی۔ اوس نوں چھیتی نال سدو، اوہدے وچ تے کوئی وکھری جہی گل اے تے ضرور اوہدی شان وی ظاہر ہونی اے۔ جناب ابوطالب نے جدوں اوس سیانے دی بے تابی ویکھی تاں حضور نوں کدھرے اولھے بٹھا دتا تے فیر تھوڑے چر بعد اوہناں نوں لے کے گھر آ گئے۔

مینہ دی منگ:

انج وی ہو یا پئی اک وار کے وچ قحط پے گیا۔ کجھ لوکی حضرت ابوطالب کول آئے تے آکھن لگے ”ابوطالب جی! بال بچے کال دا شکار نیں آؤ مینہ کنی لئی دعا منگیے“۔ ابوطالب ٹر پئے۔ ننھے حضور وی نال سن۔ آل دوالے ہور وی بال سن۔ چا چا حضور نے آپ دا ہتھ پھڑیا تے کنڈ کعبے دی کندھ نال لادتی۔ آپ نے چا چا حضور دی انگل پھڑی ہوئی سی۔ اودوں آسماناں اُتے بدل ناں دی کوئی شے نہیں سی۔ ویکھیاں ویکھیاں ای ایدھروں اودھروں بدل آؤن لگ پئے تے انج دا مینہ پیا پئی ہر پاسے جل تھل ہو گئی تے وادی وچ ہڑوالی حالت جا پن لگ پئی۔ بعد وچ ایسے واقعے ول اشارا کردے ہو یاں حضرت ابوطالب نے بھتیجے دی شان ایوں بیان کیتی:

((وَابْيَضَ بَيَاضًا أَلَمَامًا بِوَجْهِهِ وَمَالٍ أَلِيًّا سَيَّ عَصْمَةً لِّأَرْسَلُ))

”ایدے مکھڑے دے فیض نال بدل مینہ پاؤندا اے۔ ایہ یتیمیاں داماد لئی (فریاد سنن والا) تے بیوا زانیاں دا رکھا اے۔“

رحمت اللعالمین تے بحیرا:

کجھ روایتاں انج دیاں وی ملدیاں نیں پئی جدوں نبی اکرم a دی عمر مبارک باراں ورھے ہوئی۔ (ابن جوزی دی ”تلیق الفہوم“ دے موجب باراں ورھے، دو مہینے تے دس دن) تے ابوطالب حضور نوں نال لے کے تجارت لئی شام دے سفر تے نکلے تے بصری اپڑ گئے۔ اودوں تیکر بصری جزیرۃ العرب دے رومی مقبوضات دا دار الحکومت سی۔ اوس شہر وچ جرحیس نامی اک راہب سی تے لوکی اوس نوں بحیرا دے ناں نال جان دے سن۔ جدوں حضرت ابوطالب والا قافلا او تھے اپڑیا تے راہب اپنے گرجے وچوں نکل کے قافلے ول آیا۔ اوہنے سارے قافلے دی بھرویں ٹہل سیوا کیتی، حالانکہ اودوں پہلاں او تھے کئی جتھے جان دے رہ پر اوہ گھٹ ای باہر نکلد اسی۔ بحیرا نے رسول اللہ نوں اوہناں دے وصفناں پاروں پہچان لیا تے آپ دا ہتھ پھڑ کے آکھن لگا:

”ایہ سید اللعالمین نیں۔ اللہ نے ایہناں نوں رحمتہ اللعالمین بنا کے گھلایا اے۔“

”راہب جی! تہا نوں کوں پتا لگا اے؟“ جناب ابوطالب نے پچھیا۔

”تسیں لوکی جدوں گھاٹی دے دو جے پاسے دے سی اودوں کوئی وی رکھیاں پتھر اہیا نہیں سی جہڑا سجدے لئی نیوں نہ

گیا ہووے۔ ایہ شیواں نبی توں دکھ کسے دو جے بندے اگے جھک نہیں سکدیاں۔ فیر میں تے مہر نبوت وی دیکھ لئی اے، جہڑی موڈھیاں دے تھلے سیووانگ دس دی پئی اے۔ ساڈیاں کتاباں ایہو کجھ دسدیاں نیں، راہب نے جواب دتا۔

”اچھا؟“ ابوطالب نے آکھیا۔

”ہن شیں ایہناں نوں پچھانے پرتا دیو۔ ملک شام نہ لے کے جانا تاں جے یہودی ایہناں نوں کوئی نقصان نہ اپڑان۔“ راہب نے آکھیا۔

ایسے پاروں جناب ابوطالب نے بعض غلاماں دے سنگ حضور نوں واپس مکے ٹور دتا۔ شام دا صوبہ مکے توں چوکھا دُریدا سی۔ ایس لمیرے تے مہینیاں دے سفر وچ نوجوان محمد نے تھلاں تے جنگلاں نوں وی بھرویں نظر نال ویکھیا تے مدین ورگے شہر وی ویکھے، جہڑا صالح علیہ السلام دی نسبت نال مدائن صالح اکھواندا اے۔ وادی القرئی دے نیڑیوں دی لنگھے تے قوم شمودیاں اجڑیاں وستیاں دے عبرت ناک تے دل ہلان والے کھنڈروں ویکھے۔ تھان تھان تے ڈیرے لائی بیٹھے قبیلیاں دیاں ون سونیاں تے سوادلیاں بولیاں وچ، اوہناں دی اپنی زبان توں، اوہناں دے کل تے اج دیاں داستان وی کنیں پٹیاں۔ شام دی دھرتی دے سنگھنے تے میوادار باغاں نے طائف دے بچیاں دی قدروی دل وچوں گھٹا دتی۔ فیروی شام دے چمنستان دے مقابلے تے مکے دیاں سکیاں سڑیاں پہاڑیاں تے تراہ کڈھدے تھلن جوانی چڑھدے محمد نوں سوہنے لگدے رہے تے پورے سفر وچ کدھرے وی جن بھوں نوں بھل نہ سکے۔

شام اپڑویاں سارای حضور نوں بحیرا نال واہ پیاسی۔ اوس ویلے کجھ ہور عیسائی سیانے وی او تھلے مکرے سن۔ آپ a نے اوہناں عیسائی سو جھواناں نال اگت دے پجاری زرتشت عالماں دے مکالمے وی سنے۔ باراں ورھیاں دی عمر وچ ایس طرحاں داروحانی ملکہ، ایڈی سو جھوانی، ایڈی ڈوگھی نظر، ایڈا بھرواں دھیان تے ایڈا چیتا (یادداشت) رسالت تے نبوت دے منصب بنا کسے اک منڈے وچ کٹھا نہیں ہو سکدا۔

حضور a دی مکے واپسی توں کجھ چر پچھوں جناب ابوطالب وی پچھانے پرت آئے پر ایس واری اوہناں نوں کوئی چوکھا نفع نہ ہو یا تے نہ ای فیر کدی اوہناں نے تجارتی سفر دا بچا متھیا۔ آپ مکے وچ رہ کے ای کنبے دی کفالت فرماؤندے رہے تے لونی مٹی کھا کے گزارا کر دے رہے۔ حضور وی ایسے حال وچ اپنے مہربان چاچا دے نال نال قناعت دی زندگی گزار دے رہے۔ جہڑا کم آپ دے کرن والا ہوندا کر دے تے کدے وی چاچے دا تھہ و نڈان توں دامن نہ چھڈایا۔

حرب فجار:

عرب دی دھرتی اُتے اسلام دا مذہب بچن تیکر لڑائیاں دا جہڑا سلسلا لڑیا آؤندا سی اوہناں وچ فجار دی جنگ چوکھی مشہور تے خطرناک سی۔ ایہ قریش تے قیس قبیلیاں وچ کار لڑی گئی۔ قریش دے سارے خانداناں نے وکھو وکھ فوج تیار کیتی سی۔ ہاشمیاں دے آگوزیر بن عبدالمطلب سن تے باقی ہاشمی جیاں وچ رب دے اخیر نبی دی رلت وی ثابت ہوندی اے۔ بڑے زوراں دا معرکا ہویا۔ پہلوں تے قیس جتدے سن پر فیر قریشی پلڑا بھارا ہو گیا تے اخیر صلح ہو گئی۔ ایس لڑائی وچ قیس دا اگل تھہ تے سپہ سالار حرب بن امیہ سی جہڑا ابوسفیان دا والد تے امیر معاویہ دا دادا سی۔ قریش ایس جنگ وچ حق اُتے سن تے

نالے خاندان دے ناں داسوال سی۔ ایسے لئی رسول خدا نے وی ایہدے وچ رست کیتی پر قیس دے کسے بندے اُتے ہتھ نہیں چکیا۔ ایس لڑائی نوں فجار ایس لئی آکھدے نیں پئی ایہ لڑائی اوہناں مہینیاں وچ شروع ہوئی جہناں نوں لڑائی لئی حرام سمجھیا جاندا سی۔

فجاردی جنگ گھٹو گھٹ چار ورھے لڑی جاندی رہی۔ ورھے وچ کجھ چرایہہ اگ بلدی تے باقی دیہاڑے مکے دے لوکی اوویں ای سودی کماں تے تجارتاں وچ جے رہندے۔ عیش و عشرت دیاں محفلاں اوویں ای گرم ہوندیاں، شراباں پیتیاں جاندیاں تے باندیاں نال رنگ رلیاں وی اوسے طرحاں ای منائیاں جاندیاں پر قربان جائیے ایس نو جوان دے جہدے وچ رب نے سبھ نالوں ودھ کے شرم تے حیا رکھی سی۔ مجال اے اپنے آپ نوں کسے بھیڑے کم دے نیڑے وی لگن دتا ہووے۔ آپ نے تاں کسے ہور پاسے ای لوء لائی ہوئی سی۔ ایہہ دور میرے مولادی حیاتی دا اوہ دور اے جہدے وچ اوہناں دا بھیڑے توں بھیڑا تے اؤکھے توں اؤکھا دشمن دی آپ اُتے انگل نہیں چک سکیا۔ سگوں جے ایویں آکھیں تے چوکھا سچ اے پئی اوس گئے گزرے دور دے جہلائے عرب توں لے کے اج دے گئے گزرے جہلائے غرب تیکر سارے دشمن رل کے وی کسے اک ایجے واقعہ دا ذکر نہیں کر سکدے جہدے توں حضور پاک دی شان وچ کسے گھاٹے دا کوئی بھورا وی شبہ ہوندا ہووے (تے ایس توں بعد دی دشمنی دی گل تے صاف سمجھ آوندی اے)

حضرت محمد a دی ذات عظمت، شرافت، شرم و حیا، سچائی، دیانتداری تے نفس دی پاکیزگی دا اوہ اعلیٰ نمونہ اے جہدی مثال زمیں تے اسمان رل کے قیامت توڑیں لبھدے رہن تے نہیں لبھ سکدے۔ شرم حیاء دی حالت ایہ سی پئی اصلوں ای نکی عمرے جدوں بال لک دے لیڑیاں دا کوئی ایڈا دھیان نہیں رکھدے اودوں وی پتھر چکدیاں دوجے بالاں واگ تہ بند دا انو نہیں بنا سکے تے دیانتداری ایویں دی پئی مکے دے لوکی محمد تے احمد دے اصل ناواں نوں بھل کے امین امین کوکدے رہندے۔

حلف الفضول:

ذرا اکھاں میٹ لوؤ تے دل دی اکھ نال ویکھو:

ایہ چھیویں صدی عیسوی دا نوواں دہاکا ہے۔ مکے دے بازاراں وچ لوکی معمول دے کماں کاراں وچ رجھے ہوئے نیں۔ نال جڑدی پہاڑی جبل ابوقیس اُتے اک زبیدی اچی واج نال شعر پڑن ڈیہا اے۔ شعر کیہ نیں بس ہاڑے نیں نرے۔ زبیر بن عبدالمطلب لوکاں نوں پچھ رہے نیں پئی ایہ بند ایڈا استیا ہو یا کیوں اے؟ کجھ بندے اک تھاں تے اکٹھے ہو گئے نیں تے گلاں پئے کر دے نیں پئی عاص نے ماڑا کم کیتا اے، انج ہونی نہیں چاہیدی۔ ابن وائل نوں پچھنا پوے گا پئی اوس نے ایہ زیادتی کیوں کیتی؟

مکے دے لوکاں نوں اوس زبیدی نے ایڈی غیرت دوائی پئی اوہ سوچن اُتے مجبور ہو گئے۔ بھاریں جبل ابوقیس اُتے چڑھ کے شعر پڑھن توں پہلاں اوہ بند عبدالدار، مخزوم اتے عدی ورگے حلیف قبیلیاں دا ترلا مار چکیا سی پر کسے نے وی عاص بن وائل لوں کیتی بے ویہاری تے زبیدی دے موڈھے نال موڈھا نہ لایا۔ ہن جدوں چوکھی کھپ پے گئی تے حضور

دے چا چا زبیر بن عبدالمطلب تے کجھ ہور جیاں نے بھج دوڑ کر کے عاص کولوں اوس دا حق دوا یا تے نالے ایہ پچا وی مٹھیا پئی مکے وچ کوئی ظالم نہیں رہن دتا جاوے گا۔ انج وی فاردی جنگ وچ کئی گھر برباد ہو گئے سن۔ قتل تے سفاکی پیر و پیر ودھی ٹری جان دے سن تے کجھ سیانیاں نے امن چھین دا کوئی سر بندھ کرن دی تیاری چھوہ دتی سی۔ زبیر خاندان دے سر کڈھویں جی سن۔ اوہناں صلاح دتی تے فیر بنو ہاشم، بنو زہرہ، بنو تیم، بنی مطلب تے بنی اسد دیاں لڑیاں دے کجھ جی عبداللہ بن جدعان دے گھر اکھٹے ہوئے تے معاہدہ ہو یا پئی اج توں بعد ہر کوئی مظلوم دی حمایت کرے گا اتے ظالم دا کھٹا پانی بند کر دتا جاوے گا۔

دو بے پاسے اجیاد تے بکریاں چران والا اک خوبصورت نو جوان بکریاں چر اوندار ہیاتے مکے دے بالاں، جواناں تے وڈیریاں دے دلاں وچ اک غیر متنازعہ، سچل تے سچے جوان دی حیثیت نال تھان بنا وندا گیا۔ اوس جماندرویتیم نوں مکے ہوندیاں دی ماں میہڑی، دادے دی بے وقتی موت، شام دے سفر، فاردی لڑائی تے اجیاد اُتے بکریاں دی سانجھ ورگے تجربے حاصل ہوئے سن تے آون والیاں دناں وچ اوہدے مبارک ہتھان توں اوہ کجھ ہون والاسی جہدے توں کل عالم نے ہمیش لئی نیکی تے ہدایت دی لوء لبندے رہناسی۔ اوس ویلے تھلاں وچ پھر دا بکریاں دا ایہ آجڑی سوچدا ہوندا سی پئی بکریاں دا ایہ اجڑتے بڑے دھیان دا متھاج اے پئی کدھرے کسے بکری نوں کوئی درندا نہ چک لے جاوے یاں کدھرے کوئی کھڑیج ای نہ جاوے، فیر ایہ جہڑا ایڈا وڈا عالم اے ایہدا وی تے کوئی نہ کوئی آجڑی ہووے گا نا۔ کوئی تے طاقت ہے جہڑی سورج نوں چن نال وچن نہیں پئی دیندی اتے رات نوں دن اُتے زور اور نہیں پئی ہون دیندی۔ اودھروں ایہ آجڑی سوچاں وچ ڈبیا ہوندا سی تے اودھروں خالق تے مالک بڑی سوتنی ٹائینگ نال اپنے کم نیڑی آ وندا سی۔ ہو یا ایہ پئی جدوں سوہنے محمد a نوں انج دی اک بیٹھک دی خبر ہوئی پئی او تھے مظلوم ول دی گل کیتی جاوے گی تے ظالم نوں تارڑیا جاوے گا، او تھے لے نوں نکلے دیاں اکھاں وچ اکھاں پاؤن دا حوصلہ دتا جاوے گا تے آپ وی ابن جدعان دے ڈیرے تے اپڑ گئے تے بنو ہاشم ولوں بھرویں نمائندگی کیتی۔ آپ a عہد دعوت وچ فرمایا کردے سن ”میں ابن جدعان دے گھر جس معاہدے وچ سانجھ پائی سی جے کوئی مینوں اوہدے بدلے لال اوٹھاں دا اجڑوی دیندا تے میں نہ لبند۔“ انج وی جے اوس طرحاں دے کسے معاہدے دی مینوں سد آئے تے میں ضرور اپڑاں گا۔“

ایس معاہدے نوں حلف الفضول آکھدے نیں اتے ایس لئی آکھدے نیں پئی ایس توں اگدیں چھناں لوکاں ایس طرحاں دایک آہر کیتا سی اوہناں دے ناواں وچ لفظ ”فضل“ دی سانجھ سی۔ یعنی فضل بن فضالہ، فضل بن وداعہ تے فضل بن حارث۔ ایہ لوک جرہم تے قسطورا دے قبیلیاں نال تعلق رکھدے سن۔ بھادویں ایہ معاہدہ بیکا رگیا سی تے ایہہ گل چوکھے لوکاں دے چت چیتے وی نہیں سی تے قریش نے نویں سرے مڈھ بھیا سی پر پہلی وار مڈھ بھنن والیاں نوں اوہناں دی نیک نیتی دا ایہ پھل ضرور ملیا اے پئی انج ڈیڈھ ہزار ورھیاں پچھوں وی ایہناں اکھراں وچ اوہناں دے ناں شامل نیں۔

شام دا دو جاسفر:

وقت اپنی ٹور نال ٹر دا رہیا تے مکے وچ امین دے ناں نال مشہور ہو یا نو جوان محنت دی عظمت نوں ثابت کردے

ہوئے بنی سعد تے مکے دے دو بے لوکاں دیاں بکریاں چراوندا رہیا۔ جدوں کچھ وڈے ہوئے تے چاچے (جناب ابو طالب) دے نال تجارتی کماں کارں وچ پے گئے تے ایس کم وچ ایفائے عہد تے اتمام وعدہ دے بے مثال نمونے پیش کیئے۔ ایوں حیاتی دیاں پنچی بہاراں لنگھ گئیاں۔ نو جواناں وچ جو یں امین دے سوہنے ناں دا چرچا سی، ایوں مکے دیاں تربیتاں وچ اک کرماں والی بی بی اپنی متانت، بردباری تے پاکبازی پاروں طاہرہ دے ناں نال پچھاتی جاندی سی۔ طاہرہ، سچے سچے طاہرہ سی پراوس دی شہرت دی اک وجاوس دامال دولت وی سی۔ ایہہ بھلی مانس بی بی تجارت پیشا سی تے طریقہ ایہی سی پئی مال اسباب دے کے سفر تے جان والے بندیاں دا منافع متھ لیا جانداسی۔ (اج دے حساب موجب Percentage طے کر لئی جاندی سی) طاہرہ تاجرہ نے جدوں امین a دیاں گلاں سنیاں تے اک سنیہا گھل کے ایہہ آکھیاں پئی ”جے تسیں پسند کرو تاں میرا مال شام ول لے جاؤ۔ میرا غلام میسرہ تہاڈے نال جاوے گا۔ میں جتنی اُجرت دو بے لوکاں نوں دیندی ہاں تہاں توں اوس توں ودھ دیواں گی“ امین a راضی ہو گئے تے مال لے کے بصری دے سفر تے ٹر پئے۔

امین a تے طاہرہ اک ہوندے نیں:

مکے دے اک گھر وچ دو سہیلیاں آپس وچ صلاحیں پیاں سن تے مکے دی سبھ توں مالدار تاجرہ تے پاکباز عورت ’رُوئے زمین تے جنم لین والے سبھ تے سچے، سچے، سیانے تے سوہنے نو جوان نال ویاہ کرن دا کوئی سر بندھ پئی کردی سی۔ کاتب تقدیر، نفیسہ بنت منبہ دی سہیلی خدیجہ بنت خویلد دی قسمت وچ دوہاں جہاناں دے سردار دی قربت لکھی بیٹھاسی۔ دھرتی دا ذرہ ذرہ تے آسمان تے چمکن والا ہر تارا، ملائکاں دے جتھے تے جنت دیاں حوراں دیاں ٹولیاں نے خدیجہ نوں ودھائیاں دین دیاں تیاریاں چھوہ دتیاں سن۔ دوہاں جہاناں دا لاڑا خدیجہ دا لاڑا ابن ابی اسحاق، اوس خدیجہ دا جہدی قسمت وچ جنت وچ جان والیاں عورتاں دی سردار دی ماں تے جنت دے جواناں دے سردار دی نانی ہونا لکھیا گیا سی۔

جس خدیجہ نے ام المؤمنین تے زوجہ محترمہ خاتم الانبیاء دار بتا پاواناسی، اوس دی سہیلی نفیسہ، امین a ول سنیہا لے کے ٹر پئی تے فیر اوس ہستی نے جہدی ذات وچوں سیانف دے تاقیامت روشنی بخشن والے چشمے پھٹدے رہن گے، عاقل بالغ تے خود کفیل ہون دے باوجود اپنے چاچیاں نال صلاح کیتی۔ حضرت حمزہ اگے لگے، اوہناں حضرت خدیجہ دے چاچے نال گل بات کیتی تے فیر طاہرہ تے امین اک ہو گئے۔ جناب ابو طالب نے خطبہ نکاح پڑھیا تے پنج سوطلائی درہم حق مہر تھیا۔



قبیل داری توں بعثت تک

حضرت خدیجہ b اُم المؤمنین دا اعزاز پاؤن والی پہلی نیک بخت بی بی:

”میں خدیجہ b نوں ویکھیا تے نہیں پر جویں اوہناں تے رشک آ وندا اے کسے ہورتے نیں آ وندا۔ ایس گلوں پئی سوہنے حضور a ہمیش ای اوہناں دیاں گلاں کر دے رہے۔ اک واری میں حضور a نوں جناب خدیجہ ولوں کچھ ناراض چا کیتا تے آکھن لگے، خدا نے مینوں اوس دی محبت دتی اے (فیر میں کوں اوس نوں بھل جاواں)“ ایہ گل حضرت عائشہ صدیقہ b نے اک واری آپوں کہیتی سی۔

آؤ ذرا سوہنے حضور دی حیاتی دے ایس سوہنے ورق تے جھاتی پائیے:

حضرت خدیجہ b بڑی ڈوگھی نظر والی بی بی سن۔ اوہناں نوں مکے دے لوکاں، اپنے غلام میسرہ تے چاچے نوفل دے پتر ورقہ کولوں نبی اکرمؐ دیاں گلاں سن سن کے ایہ پک ہو گیا سی پئی نکاح لئی ایس توں سچا تے سوہنا بندالہجہ ای نہیں سکدا۔ گل وی ٹھیک سی۔ اوہناں دے اوس ویلے دے دیس نوں مادر پدر آزاد معاشرہ آکھیا جاسکدا سی، جتھے فاحشا زانائیاں بوہیاں اگے جھنڈی گڈ کے ایہ آکھ دیاں سن پئی آ جاؤ، کوئی روک نہیں، ایس تہاڑے لئی ہاں۔ تے جتھے مرد تے عورت دے تعلق تے کوئی قدغن نہیں سی۔ پیغمبر a دی ذات پاک سوہنی تے من کچھویں وی سی پر اوہناں دی پنجی ورہیاں دی حیاتی، جدوں بشری خاہشاں زور اور ہونڈیاں نیں، اک پارسا، پاک دامن تے بے داغ حیاتی دا اچھا نمونہ پیش کردی ہے جس دی دوجی کوئی مثال نہیں ملدی۔ لہندے یاں چڑھدے دا کوئی معترض وی ایس پاک حیاتی دے ایس حصے وچ اوہناں تے انگل چکن دی جرات نہیں کر سکيا۔

حیاتی دے ایس دور بابت بلیئم میور اپنے چوکھے معاندانہ رویے دے باوجود ایہ تسلیم کر دا اے پئی ”سارے دے سارے لوکی ایس گل نوں من دے نیں کہ محمد a دی جوانی وچ طور طریقیاں دی پارسائی تے رہن سہن دی پاک بازی، اچھیاں چیزاں سن جہڑیاں مکے دے لوکاں وچ گھٹ ای لہدیاں سن۔“ لیکي جاسن لکھدا اے کہ ”اپنے لوکاں وچ اوہ (نبی اکرم a) اُچے کردار دے مالک سن تے اوہناں تے کوئی انگل نہیں چکی جاسکدی۔“ امیل درمگھم آکھدا اے کہ ”محمدؐ دی جوانی پاک تے صاف سی“

جدوں حضرت خدیجہ نال نکاح کیتا تے فیر اوس دور دے ”سیکنڈے نیوین“ معاشرے دے باوجود دوجے نکاح دا خیال وی دل وچ نہیں لیاندا تے اکو بیوی دے شوہر بنے رہے۔ ایہ دور پنجاہ ورہیاں دی عمر تک لے گیا جدوں بندا بڑھاپے دی بروئے اتے پیر جا رکھدا اے۔ تے معترضین، سارے، سبھے دے سبھے، ساراٹل لا کے وی ایس سچائی نوں رد نہیں کر سکے پئی رب دے

محبوب تے ساڈے آقا پنجاہ ورھیاں دی عمر تک اکو بیوی تے قانع رہے سگوں راضی خشی زندگی گزار دے رہے۔ تے ایہ بیوی کون سی؟ عرب دے کسے جنگجو قبیلے دے سردار دی دھی؟ مصر دی کوئی حسینہ؟ کوئی سونی کنواری کڑی؟ بلکل وی نہیں۔ سگوں ڈھلدی جونی والی چالھی ورھیاں دی اک بیوا زانی جہدی ایس توں اگدیر تن یاں گھٹو گھٹ دو خاندان دی بیوی رہ چکی سی۔

اندازا کرو پئی پنچی ورھیاں دی عمر تک اک آزاد معاشرے وچ جنم لین والا نو جوان عورت دی خاہش تک نہیں کرداتے جدوں اک عورت نکاح دی پیش کش کردی اے تے اوہ ایس امر نوں کدے وی سائمنے نہیں آون دیندا پئی اوہ اک ڈھلی عمر والی عورت اے تے دوتن خاندان نال اوہدا واسطا رہیا اے۔ فیر ایس گل دی تجھ نہیں آؤندی پئی پنجاہ ورھیاں دی عمر تک اک بیوی نال حیاتی دے دن گزارن والے اللہ دے بندے، رسول تے محبوب نوں کسے مصلحت پاروں جدوں اک توں چوکیاں بیویاں رکھن دی اجازت یاں حکم دتا گیا اے تے معترضان دے ڈھڈ وچ پیڑ کیوں اٹھ کھلندی اے۔

ابن سعد لکھدے نیں پئی نکاح توں پہلاں خدیجہ الکبریٰ داناں ورقہ بن نوفل نال لیا گیا پر آپ دا ورقہ نال نکاح نہیں ہویا۔ سبھ توں پہلاں نکاح ابو ہالہ نال ہویا، فیر صفی بن امیہ جہڑا آپ دے چاچے دا پتر سی، نال نکاح ہویا۔ ایسے نکاح دے ثبوت وچ حضرت خدیجہ دے پتر محمد دا ذکر کیتا جاندا اے۔ شبلی نعمانی لکھدے نیں:

”خدیجہ دی پہلی شادی ابو ہالہ بن زراہ تمیمی نال ہوئی۔ اوہناں وچوں دو پتر ہوئے۔ اک داناں ہند تے دو بے دا حارث سی۔ ابو ہالہ دے اکھاں میٹن توں بعد عتیق بن عازز دے عقد وچ آئیاں۔ ایس نکاح وچوں اک دھی اے جہدا ناں وی ہندی۔ عتیق وی چلانا کر گئے تے حضرت خدیجہ رسول اللہ دے عقد وچ آئیاں۔“

جناب شبلی نے حضرت خدیجہ دے دوہاں خاندان وچوں آپ دے پتر محمد دا ذکر نہیں کیتا، جہدے توں پتا لگ دا اے پئی کوئی تيجا خاوند وی سی۔ تے جے کرا ایس روایت دی صحت اتے شبہ وی کیتا جاوے فیروی اس گل توں انکار تے ممکن نہیں پئی گئے دناں وچ اوہناں دی دو وار شادی ہوئی سی۔ پر صدقے جائیے ایس سوہنے دے پئی جوانی وچ وی ایس گل نوں راہ داروڑا نہیں بن دتاتے چاچیاں دی اجازت ملدیاں سارای حضرت خدیجہ نوں ”قبول اے“ داسنہیا گھل دتا۔

ایس نکاح با Leon Nemexy لکھدا اے:

”ایہ نکاح خلوص وفاتے آپ دے احترام دی مثالی دوستی موجب پروان چڑھیا۔ محمد a نے حضرت خدیجہ دی حیاتی وچ کسے دوجی زانی نال ویاہ نہیں کیتا تے آپ نے اوہنوں ہمیش چنگی، نگی ساتھی دے طور تے یاد رکھیا۔“

امیل لکھدا اے:

خدا دا ایہ پیغمبر اک ربیع صدی تک اپنے توں اک وڈیری (تے کلی) بیوی نال وفادار رہیا۔“

نکاح دے وقت حضرت خدیجہ تے نبی a دی عمر:

جدوں رسول عربی a اپنی حیاتی دیاں ۲۲ یاں ۲۳ بہاراں ویکھ چکے سن، اوہوں آپ نے چاچے ابو طالب توں اوہناں دی دھی اُم ہانی ہندو رشتا منگیا۔ اوہدے نال ای جناب اُم ہانی دا دو چار رشتا ہسیرہ بن ابی وہب مخزومی دا آیا، جہڑا ابو جہل دے خنوادے وچوں سی۔ چاچے ابو طالب نے دو بے گھروں دی رشتا کر دتا۔ حضور a نے جدوں چاچا جی

نال ایس گل داشکوہ کیتا کہ اوہناں نے سکے بھیتے نوں چھڈ کے بنو مخروم دے اک منڈے نوں جوئی بنانا پسند کیتا اے تے اوہناں نے جواب دتا کہ شملے والے لوکاں نال شملے والے ہی پھدے نیں ۱۱۷ مطلب ایہ کہ حضور دی قیمتی تے غربی ایس رشتے وچ رکاوٹ بن گئی تے جناب ابوطالب نے زور اور تے تگڑے خنوادے وچ ام ہانی دارشتا کردتا۔ اوس دے گھر والا ہمبرہ ساری حیاتی رسول اللہ دا ویری بنیا رہیا تے کدے وی اسلام قبول نہ کیتا۔ فتح مکہ توں بعد اوس نے اپنے گھروں فرار ہونا پسند کیتا تے سمندر ول کدھرے ٹر گیا پر مسلمان نہیں ہويا۔ ۱۱۸

اُمّ ہانی دے رشتے توں انکار توں کچھ چراں بعد آپ a دی دیانت تے شرافت دی خبر جناب خدیجہ تیکر اپڑی سی۔ جہدے نتیجے تے حضرت خدیجہ، رسول خدا دے نکاح وچ آئیاں۔

حضرت خدیجہ نال نکاح دے ویلے حضور دی عمر ۲۵ ورھے سی، ایس گل تے کوئی اختلاف نہیں پر حضرت خدیجہ دی ۴۰ ورھیاں دی عمر نوں کچھ سیانے ٹھیک نہیں من دے۔ ابن کثیر نے نکاح ویلے آپ دی عمر ۳۵ سال تے کچھ ہور بزرگاں نے ۲۵ سال وی دسی اے۔ حضرت خدیجہ دی وفات دے وقت ایہناں بزرگاں نے آپ دی عمر ۵۰ ورھے دسی اے تے آکھدے نیں کہ ایہو گل ٹھیک جا پدی اے۔ ایس حساب نال نکاح دے ویلے حضرت خدیجہ دی عمر ۲۵ ورھے ای نکدی اے۔ اپنی گل دے حق وچ ابن کثیر نے بیہتی دیاں روایتاں دا حوالا دتا اے۔ ڈاکٹر حمید اللہ نے نکاح ویلے ۲۸ ورھیاں دی عمر دی اے۔ ۱۱۹ اوہناں دا خیال اے کہ ۴۰ ورھیاں دی عمر والی روایت دے مقابلے تے ۲۵ یا ۲۸ ورھیاں والی گل ایس لئی چوکی معتبر جا پدی اے کہ عرب وچ کڑیاں دا ویاہ بالغ ہون توں بعد چھیتی نال ای کر دتا جاندا سی جویں کہ رسول خدا a دی اپنی اولاد دا معاملہ اے۔ عرب وچ ایہ گل مناسب نہیں سی سمجھی جاندی کہ کسے شریف گھرانے دی سوانی، بیوہ ہون توں بعد چالھی (۴۰) ورھیاں دی حیاتی تیکر بے نکاحی بیٹھی رہوے۔ کثرت ازدواج دے اوس معاشرے وچ کڑیاں یاں سوانیاں دے رشتے بڑی چھیتی لہجہ جاندے سن تے ایس گل نال وی کوئی خاص فرق نہیں سی پیندا کہ کوئی سوانی بیوہ یاں طلاق یافتہ اے۔

اوہناں دا ایہ وی خیال اے کہ ایہ گل وی چوکی گوہ گوچری اے کہ حضور a دی حضرت خدیجہ وچوں اولاد دو پتر تے چار دھیاں نیں۔ ۶ بالاں دی پیدائش دا لحاظ رکھیا جاوے تے ۲۵ یا ۲۸ ورھیاں دی عمر ہی ٹھیک جا پدی اے۔ قاضی سلمان منصور پوری دی تحقیق موجب حضور دے نکلے پتر عبد اللہ دی ولادت بعثت توں بعد ہوئی سی۔ بے نکاح ویلے حضرت خدیجہ دی عمر ۴۰ ورھے منی جاوے تے ایس دا مطلب ایہ ہووے گا کہ سیدنا عبد اللہ دی ولادت حضرت خدیجہ دی حیاتی دے ۵۶ ویں ورھے وچ ہوئی۔ طبع لحاظ نال ایہ گل ناممکن تے نہیں پراپوں گھٹ ای ہوندا اے۔

ایس فقیر نے ایس مسئلے تے اپنی کوئی رائے نہیں بنائی پر بزرگاں دے خیال اپنے پڑھنا راں تیکر اپڑانا فرض سمجھیا

۱۱۷ ابن سعد۔ الطبقات الکبریٰ۔ جلد ۶۔ صفحہ ۱۱۲۔

۱۱۸ خالد مسعود، علامہ۔ حیات رسول اُمّی۔ صفحہ ۸۶۔

۱۱۹ حمید اللہ، ڈاکٹر۔ رسول اکرمؐ کی سیاسی زندگی، صفحہ ۶۵۔

اے۔ ہاں ایہ ضرور اے کہ دو یاں تن خاوندان توں بیوہ ہوئی سوانی جے کسے وجہ توں اپنی حیاتی دے ۴۰ ویں ورھے وچ خاوند توں بنا بیٹھی سی تے کوئی اچرچ گل نہیں۔ ہوسکدا اے آپ دے خاوندنوں فوت ہوئیاں ای اے تھوڑا چرہ ہویا ہووے۔ دو جی دلیل کہ جناب خدیجہ دی ۵۶ ورھیاں دی حیاتی وچ جناب عبداللہ دی ولادت قرین قیاس نہیں، ایہ وی کوئی ایڈی جاندار گل نہیں۔ ساڈے علاقے وچ وی ۵۶ ورھیاں دی کسے سوانی دا بال نوں جنم دینا ایڈا اچرچ تے نو بیکلام نہیں سمجھیا جاندا۔ کعبہ دی نویں تعمیر تے حجر اسود:

”هَذَا الْمِیْنِ رَضِیْنَا ۝ هَذَا مَحْصَدُ“

آ کھدے ہوئے لوکی خوشی نال اچھل کھلوندے نیں تے ایس گل اُتے ڈاڈھے راضی ہوندے نیں پئی پنچایت دا آگو، امین ورگا غیر متنازع بند اے۔ اوہناں نوں ایس گل دا پک سی پئی ہن لڑائی جھگڑے والی ہر گل آپوں ہی نیڑ جاوے گی تے نیاماں وچوں نکلیاں پمکدیاں تلواراں، نیاماں ول پرت جان گیاں۔

گل ایوں ہے پئی کعبہ اللہ دی عمارت کئی وار ڈھے کے بن چکی اے۔ پہلی وار تے ایس نوں پہلے بندے تے پہلے نبی حضرت آدم علیہ السلام دے تھہ لگے تے جدوں اسار کے ویلھے ہوئے تے رب ولوں ایہدے طواف دا حکم دی ملایا۔ فیر جدوں حضرت نوح g دے زمانے وچ طوفان آیا تے بیت اللہ ڈھے گیا۔ جبرائیل علیہ السلام نے حضرت ابراہیم g نوں بنیاداں دے نشان دے تے تاں اوہناں حضرت ذبیح اللہ دے نال رل کے فیر کندھاں کھلیاں کیتیاں۔ اک وار فیر بعثت نبوی توں بچ ورھے اگدیں اودوں کعبے دی اُسریہ ہوئی جدوں آپ دی عمر مبارک یتیتی (۳۵) ورھے سی۔ عبداللہ بن زبیر b نے اپنے زمانا خلافت وچ بیت اللہ نوں شہید کر کے نویں سرے اساریا تے فیر حجاج بن یوسف نے وی ایہدی تعمیر کیتی۔

اُتے دسیاں گئیاں پنجاں واریاں وچوں جدوں تیجی واری خانہ کعبہ ڈھا کے بناوٹ پیا تے وجہ ایہ سی پئی لنگھدے دیلیاں نے ایس مقدس عمارت وچ چوکھے پاڑ پاد تے سن۔ نیویں تھان تے ہون پاروں مینہ داسار اپانی اندر جاوڑا سی تے نالے کندھاں دی اچپائی وی نری نوں (۹) گوتھہ سی۔ جدوں قریش دے سارے رئیس ایس گل اُتے راضی ہو گئے پئی بیت اللہ نوں ڈھا کے نویں سرے اُسار یا جاوے تاں ابو وہب بن عمرو مخزومی، جہڑے حضرت عبداللہ دے مامے سن، کھلو گئے تے آکھن لگے پئی جہڑا اٹ وٹا اتھھے لانا جے اوہ حلال دی کمائی دا ہونا چاہیدا اے۔ سارے بندے ایس گل اُتے راضی ہو گئے پئی ایس وچ رنڈیاں دی کمائی، سودی دولت تے ناحق قبھا کیتیاں کھوہیا ہو یا مال نہیں ورتن دتا جاوے گا۔

کعبہ دی تعمیر کسے دے قریشیاں لئی چوکھی وڈی ساری گل سی۔ اوہ اک پاسے تاں ایس دی نویں اسار نوں بڑی وڈیائی دی گل سمجھدے سن تے دُجے پاسے ایس نوں ڈھان توں تریندے وی سن پئی کدھرے رب دا عذاب ای نہ لہہ پوے۔ عمارت دی حالت پاروں ایس نوں ڈھا کے بناون بناں چار اووی کوئی نہیں سی۔ روڑے وٹے داوی بندوبست ہے سی۔ لکڑ روم دے اک بحری جہاز توں لہہ گئی سی، جہڑا طوفان وچ جدے دے نیڑے سمندر دے کنڈھے نال آوجیا تے ٹٹ بھج گیا سی۔ قریش مکہ نے ایہ لکڑ خرید لئی تاں جے بیت اللہ دی تعمیر وچ ورتی جاسکے۔ آکھیا جاندا اے پئی ایس جہاز وچ باقوم ناں دا اک مصری معمار وی سی جیہڑا کسے دے لوکاں دے آکھن تے یاں اوہناں دا چنگا سلوک ویکھ کے اوتھے ای رہن لگ

پیاسی تے فیراوس نے کعبہ اللہ دی تعمیر وچ مشورے وی دتے۔

گل ایہ پئی ہوندی سی کہ قریش نے پرانی عمارت ڈھا کے نوں بناون دا پکا بیڈھا ارادہ کر لیا۔ چوکھے لوکی تاں ڈردے رہے پر ولید بن مغیرہ نے جرات کیتی تے عمارت ڈھان لگ پیا۔ جدوں باقی بندیاں نے دیکھیا پئی ایس نوں تے کجھ نہیں ہویا، رب دا کوئی عذاب ایہدے تے نہیں لٹھاتے دوجے لوکاں نوں وی ہلا شیریں ملی تے دیکھدیاں ای ویکھدیاں کعبہ اللہ دی پرانی عمارت زمین نال پدھری ہو گئی۔ فیراوس سرے اسارنی شروع کیتی تے دوجے لوکاں دے نال نال قریشی تے ہاشمی جوان محمد a نے وی مزدوراں وانگ کم کیتا۔ جدوں کندھاں چکیاں گیناں تے حجر اسود اوس دی تھاں تے رکھن دا ویلا آ گیا۔ ہر قبیلے دی ایہ تمنا سی پئی ایہ وڈا سارا توارینچی کم اوہناں دے ہتھوں ہووے۔ ایس گل تے رولا پے گیا، جتھے بننا شروع ہو گئے تے قریب سی پئی قتل و غارت دا بازار گرم ہوندا پر اک سیانے سردار ابوامیہ بن مغیرہ نے مشورہ دتا پئی سویرے جہڑا بند اسبھ توں پہلاں حرم دا دروازہ لنگھے اوس نوں ثالث من لیا جاوے۔ سارے قبیلیاں نے ایہ گل پسند کیتی۔ فیر جدوں ”قبیلیاں نوں شیر و شکر تے مفاسدنوں زیروز بر کرن والے“ داسو ہنا کھ وکھالی دتا تے ساریاں نے پکار پادتی ”ہذا لامین رضینا هذا محمد“ ایہ تے امین اے۔ ایس رضی آں ایس دی ثالثی تے، ایہ تے محمد اے۔

جس ہستی نوں رب تعالیٰ نے دوہاں جہانناں لئی رحمت بنا کے بھجیا دے، جہڑا رب دی دھرتی توں کشت و خون نوں مٹا کے اک مک ہو جان دا درس دین لئی آیا ہووے، جہدے ذمے محبتاں دے بی بیجنا لکھا ہووے، جہدی عالی ظرفی، صلح جوئی تے عدل انصاف دیاں مثالاں پوری کائنات روز محشر تیکر دیندی رہوے، اوس دے ہوندیاں اوس مقدس پتھر نوں کندھ تائیں اپڑان تے قتل و غارت ہو جاندی، ایہہ ہونہیں سی سکدا۔ فیر اسمان نے دیکھیا تے زمین اج تیکر سن دی پئی اے کہ حجر اسود دمسلا ایوں نیڑیا پئی نہ کدھرے لہو ڈلھیا تے نہ ای پھٹ پئے..... آپ نے پتھر اک چادر اُتے رکھیا تے سرداراں نوں آکھیا پئی ایس لیڑے دیاں کنیاں پھڑ کے بیت اللہ دی کندھ تیکر اپڑا دیو۔ اوہ کندھ تیکر اپڑے تاں آپ a نے پتھر چک کے اوہدے تھاں اتے ٹکا دتا۔ معاملہ فہمی، قوت فیصلہ، عدل انصاف تے صلح جوئی دی اجہی دوجی مثال اوس دور دے عربستان دی تاریخ پیش کرن توں قاصر اے۔ سبحان اللہ ثم سبحان اللہ۔

امانت دار تے وعدیاں دا پکا:

تواریخ دا ہر قاری بھانویں اوہ مسلمان نہ وی ہووے ایہ گل جان دا اے پئی محمد a بعثت توں اگدیں وی اپنے اندر اک اچھے انسان والیاں ساریاں ای خوبیاں رکھدے سن۔ لوکی اپنیاں امانتاں بے فکری نال آپ کول رکھ دیندے تے کاروباری معاملیاں وچ آپ a تے پورا بھروسہ کر دے۔ قیس بن سائب مخزومی اک صحابی نے آپ a نال رل کے کاروبار کیتا تے اوہ ساری حیاتی آپ a دی کاروباری دیانت دی گواہی دیندے رہے۔

نبی اکرم a جے کر کے نال کوئی کارا (وعدہ) کر لیندے تے اوس دی بڑی فکر کردے۔ ایہ خوبی ہمیش توں ای آپ a دے اندر موجود رہی۔ اک واری عبداللہ بن الحساء نال آپ a دا کوئی لین دین دا معاملہ سی۔ عبداللہ آپوں گل سنائی پئی میں حضور نوں آکھیا ذرا ”استھہ کھلوؤ۔“ میں جا کے وعدا بھل گیا، تیجے دن جدوں مینوں چیتا آیا تے میں اوس

تھاں تے اڀڑ گیا، ویکھیا پئی حضور a اوتھے کھلوتے نیں، ایس وعدا خلائی تے حضور دے متھے تے کوئی وٹ نہ آیا۔ نرا ایہ آکھیا پئی عبداللہ! توں مینوں بڑی پھیل دتی اے۔“
ایس دور دے سخن متر:

نبوت دے اعلان توں پہلاں وی جہناں لوکاں نال آپ a دی چنگی دعا سلام سی، اوہ بندے آپوں وی چنگے سن۔ چنگی سبھا چنگے اخلاق تے خانداناں دی لُج شرم رکھن والے بندے ای آپ دے یار بیلی سن تے کسے کینے بندے نال تعلق نہیں سی جوڑیا۔ جہناں لوکاں نال چوکھا پیار پریت سی اوہناں وچ سبھ توں پہلا نام حضرت ابوبکر صدیق b دا ای ہے جہناں نال پرانا یار اناسی۔ حکیم بن حزام جہڑے قریش دے رئیس منے جاندے سن تے دارالندوہ دے وی مالک سن اوہناں نال وی چنگا تعلق سی۔ ایہ حضرت خدیجہ c دے چاچے دے پتر سن۔ بھادویں جناب حکیم بن حزام ۸ھ تیکر مسلمان نہیں سن ہوئے پر فیروہی اوہ اپنے یار نال چوکھی محبت رکھدے سن۔ اوہناں اک واری مکے وچوں اک ودھیاحلہ خریدیا تے حضور a نوں تحفا دین لئی مدینے آئے۔ آپ a نے ایہ آکھ کے لین توں انکار کر دتا پئی میں مشرکاں کولوں تحفے نہیں لیندا، ہاں جے توں مل ویتچنا اے تے میں رکھ لوں گا۔ جناب حکیم ہر حال وچ اوہ تحفا حضور a نوں دینا چاہندے سن ایس لئی عرض کیتی پئی ٹھیک اے تسیں مینوں رقم دے دیو پر ایہ تحفا ضرور رکھ لوؤ۔ ایوں آپ a نے اوہ حلہ رکھ لیا۔ ضما دثعلبہ ازدی جاہلیت دے زمانے وچ حکمت کردے سن، اوہناں نال وی حضور a دا چنگا تعلق سی۔ اعلان نبوت توں بعد اک واری قبیلہ ازد دے علاقے وچوں مکے آئے تاں آپ a نوں ایس حالت وچ ویکھیا پئی آپ دے کچھے منڈیاں داٹولا اے تے اوہ مجنوں مجنوں دیاں واجاں پے لاندے سن۔ ضما نے سمجھیا پئی خورے سچی مچی اوہدے یار نوں کوئی اوہر ہوگئی اے۔ اوہ آپ a دے نیڑے آئے تے آکھن لگے۔ ”محمد! تہانوں پتا اے پئی میں طیب ہاں۔ میں جنون دا علاج کر سکدا ہاں“ آپ a نے اپنے دوست دی ایہ گل سن کے رب تعالیٰ دی حمد و ثناء بیان کیتی تے ساری حقیقت کھول کے بیان کیتی۔ ضما دنوں اپنے یار تے ایڈا بھروسا سی پئی اوسے ویلے مسلمان ہو گئے۔ اک ہور دوست قیس b بن سائب مخزومی سن۔ اوہناں نال وی چنگا پیاری تے رل کے کاروبار دی کردے رہے۔ جناب قیس b بن سائب دے اک غلام مجاہد بن جبیر مشہور مفسر ہو گزرے نیں۔

بشارتاں، صداقتاں:

رب نوں جدوں اپنے بندیاں دی بھلائی منظور ہوندی اے، اوہ اگ وچ سڑدے تے شوہ وچ رڑھدے بندیاں نوں کڈھ لیا وندا اے۔ جدوں فرعونیت خداں نوں پٹن لگدی اے تے تخلیق مویٰ دا آہر کردا اے تے جدوں ظلمتاں، انھیرے، شرک تے دھیاں نوں جیوندی جانیں دین توں ڈکنا مقصود ہوندا اے، اودوں اوس ہستی نوں دنیا تے کھلن دا سر بندھ کر دا اے جس نے دنیا تے ناپاکیاں تے گناہواں توں بچن دا درس دینا ہوندا اے تے روز محشر غلطیاں، کوتاہیاں کرن والیاں دی سفارش وی کرنی ہوندی اے۔

اج توں ساڈھے چوداں سووڑھے پہلاں رب نوں اپنے بندیاں دی حالت تے ترس آیا تے اوس نے اپنے محبوب

تے ایس کائنات دی تخلیق دی وجہ بن والی ہستی نوں ایہ ذمے واری دتی پئی اوہ بھلیں پئے بندیاں نوں اوس لیک اُتے ٹورے جھڑی اوہناں نوں ہمیش دے عذاباں توں بچا سکے۔ جس ہستی دا میں ذکر کر رہیا ہاں جے غور کریئے تے اوس دی دنیا تے آمد تے فیر بخت دا ایس توں چنگا تے موزوں ویلا ہوو کوئی ہونہیں سکدا سی۔ ہزاراں سالاں توں مالک تے خالق اپنے نیک بندیاں تے پیغمبراں راہیں لوکائی نوں ایس کجی ہستی دی آمد دیاں بشارتاں دے رہیا سی۔ آؤ ویکھئے آں پئی کس طرحاں؟

ساڈے آقا تے مولا دی صداقت دیاں گلاں جے کر قرآن تے حدیث یاں مسلمان لکھاریاں دیاں لکھتاں تیکر محدود ہوندیاں تے آکھیا جاسکدا سی پئی عقیدت منداں نے ایہ اچیاں تے عظیم الشان گلاں اپنے نبی a دی صداقت ثابت کرن لئی لکھیاں ہون گئیاں پر قربان جائیے ایس ہستی دے کہ ایس دے محبت نے ایس دی صداقت منوان لئی ایہو جے سوہنے ڈھنگ نال سامان کیتا اے پئی کوئی اکھاں والا تے ایس توں انکار کیہ کرے گا جے کوئی عقل دا انھا ایس سورج دی روشنی نہیں دی ویکھ سکیتا تے ایس دی تمازت نے اوس نوں ایوں منوالیا اے پئی اج ڈیڈھ ہزار ورھیاں بعد دی رومانیا دا اک وزیر خراجا ایس ہستی دی پاک حیاتی اُتے قلم چکدا اے تے اوس دا موضوع ہوندا اے:

”محمد a..... اک اجے نبی جہناں نوں پچھان دانویں سرے آہر کیتا جاوے۔“

گوتم بدھ ساڈے خطے دی اوہ عظیم ہستی سی جھڑی برہمنی سامراج دے شکنجے وچ دم توڑ دی انسانیت نوں آزادی دوان لئی ظاہر ہوئی۔ بھاریں ہندوواں نے پوراٹل لا کے اوہدی دکھائی راہ اُتے تھان تھان کنڈے تے روڑے وچھا کے ایہ گل ثابت کرنا چاہی اے پئی ایہ کوئی چنگا رستا نہیں پر فیروہی اوہدیاں متاں تے اوہدے دے سبق ایہ ثابت کرن لئی کافی نیں پئی اوہ رب دا اک نیک تے فرمانبردار بندہ اسی تے دو جے بندیاں نوں وی رب دا مطیع تے فرمانبردار بناون لئی آ یا سی۔ جد گوتم بدھ رب داسنیہا بندیاں تیکر اپڑا کے تے اپنا مقدس مشن پورا کر کے اکھاں میٹن لگے تے کول بیٹھے شاگردنڈاں کھجے اُتے ہتھ رکھ کے پچھیا ”آقا! تہا تھوں بعد دنیا نوں نیک متاں کون دیوے گا۔“

گوتم بدھ نے جھڑا جواب دتا اوہ سرہانے پواندی پیٹھیاں سینکڑاں شاگرداں راہیں توارنخ نے سنبھال لیا۔ اوس سیانے تے بہت وڈے مفکر نے جواب دتا:

”نندا! میں کوئی پہلا بدھ تے نہیں نا جہداز میں تے آیا ہاں تے نہ ای اخیر۔ اپنے ویلے تے اک ہوو بدھ آوے گا۔“

”آقا! اسیں اوس نوں کوں پچھاناں گے؟“ عظیم بدھ دے شاگرد نے بڑے ادب نال پچھیا۔

”اوہ میتر یا دے ناں نال پچھاتا جاوے گا۔“ رب دے نیک بندے نے جواب دتا۔

چیتے رہوے پئی بدھ عالماں نے میتر یا دا ترجمہ: ”رحمت“ کیتا اے۔ بھلا غور تے کرو رب نے اوہ کھڑی ہستی دنیا تے گھلی سی جس دانان ”رحمت“ سی۔ ”رحمت“ ای نہیں سگوں ”رحمت اللعالمین“۔ ہن دسو کے جواب دی لوڑ باقی رہ گئی اے؟

”وما ارسلنک الا رحمت اللعالمین“ دے اکھراں دے نزول توں ہزار ورھے اگدیں گلاں کھول دتیاں نیں۔

حضرت ابراہیم نے رحمت لقب پاؤں والی الیس عظیم ہستی توں گھٹو گھٹ تن ہزار ورھے پہلاں آدم دی اولاد نوں ایہ بشارت دتی سی پئی ”اوہ عربی ہووے گا۔ اوہدا ہتھ سبھ دے خلاف تے سبھناں دا ہتھ اوس دے خلاف ہووے گا پر اوہ اپنے بھراواں دے وچ ای ودھدا جاوے گا۔“

ذرا غور کرو عراق وچ پیدا ہون والے الیس جلیل القدر نبی حضرت ابراہیم g نے کویں اشارے دتے نیں پئی عرب دی دھرتی اُتے جنم لوے گا (اوس دی تعلیم پاروں) اپنے پرانے اوہدے خلاف ہو جان گے پر اوہ فیروہی ایہناں اپنیاں دشمنان وچکار اپنا مشن مکمل کرے گا۔ ابوالانبیاء توں بعد حضرت کلیم اللہ نے وی اپنی قوم نوں صداقتاں دیاں پئی میرے بعد اک نبی آوے گا تے اوس دی بعثت عرب وچ ہووے گی۔ ناصر ف عرب سگوں اوس پہاڑ داوی ذکر کردتا جس تے چڑھ کے پہلی وار حضور نے اپنی قوم نوں مخاطب کیتا سی۔
اکھرنیں:

”خدا سینا توں نکلیا، سعیر تے چمکیا اتے فاران دے پہاڑ اُتے جلو اگر ہو یا۔ دس ہزار قدسیاں دے نال۔“
اتھھے ایہ گل کھول دینا ضروری جا پدی اے پئی جدوں میرے آقا و مولا فاتح مکہ دی حیثیت نال مکے وچ داخل ہوئے سن تے دس ہزار صحابہ کرام سبے کھبے تے اگے کچھ موجود سن۔ ایوں حضرت موسیٰ نے اوہناں دس ہزار نیک بندیاں دی صداقت دی وی خبر دتی جہڑے تواریخ وچ اپنی تقدیس پاروں قدوسی دے ناں نال پکارے جاندے نیں۔ ذرا اگے ٹریئے تے نظر پیندی اے پئی حضرت داؤد g ورگے عالی مرتبت نبی فرماوندے نیں، ”مبارک لوگ نیں اوہ جہڑے تیرے گھر وچ وس دے نیں۔ اوہ ہمیش تیری حمد کرن گے تے مکے توں گزر دے ہوئے تے اک کھوہ بناندے ہوئے۔“
اک معمولی توں معمولی سمجھ عقل والا بند اوہی جان سکدا اے پئی مکہ دی کیہ اہمیت اے؟ جنہوں حضرت داؤد نے رب دا گھر آکھیا اے تے نالے بشارت دتی پئی الیس دھرتی اُتے جہڑا رب دا گھر اے اتھھے ہر ویلے عبادت ہووے گی تے رب دی حمد بیان کیتی جاوے گی۔ ہن ویکھ لو پئی دنیا تے ایہے کتنے گھر نیں جتھے چوی گھنٹے رب دی حمد کیتی جاندی اے۔
حضرت سلیمان فرماندے نیں۔

”خلو محمدیم زہ رودی زہ رعی۔“

”اوہ ٹھیک محمد a نیں، اوہ میرے محبوب نیں میری جان“ آخر اوہ کون سی، جس نے سینکڑیاں ورھے پہلاں نہ صرف حضور a دی بعثت دی بشارت دتی سگوں ناں تیکر دس دتا۔ مننا پوے گا پئی جس ذات باری نے سوہنے نوں مبعوث فرمایا اوس نے بشارتاں دے اسباب پیدا کر کے میرے آقا و مولا دی صداقت تے ہمیش ہمیش والی پکی تے پیڈی مہر لا دتی۔

بعثت توں کجھ اگدیں:

ایہ گل ہر طرحاں دے شے توں پاک ہے کہ جناب محمد a اپنے بچپن تے جوانی وچ وی اک سنجیدہ تے وقار والی ہستی دسدے رہے۔ پر بعثت توں کجھ چر اگدیں تے آپ جناب کجھ کلمے کلمے جے رہن لگ پئے۔ اوہناں دناں وچ آپ

نوں اک روشنی تے چمک جہی نظر آؤندی ہوندی سی جہوں وکھ کے آپ a خش ہوندے پراوس روشنی وچوں کسے اوازیں صورت دانہ دنا آپ a نوں سوچن اُتے مجبور کرداسی۔ جوں جوں بعثت دا ویلا نیڑے آؤندا گیا آپ a دی عادت پیڑھی ہوندی گئی تے آپ a رب تعالیٰ دے وجود تے کائنات دے بھیداں اتے چوکھے توں چوکھا غور فکر کرن لگ پئے۔ آپ a اکثر شہرتوں باہر کوہ حراتے تشریف لے جاندے۔ غارِ اوج جتا چیکر پانی یا ستو مک نہ جاندے او تھے ای اللہ اللہ کردے رہندے۔

کوہِ حرا نوں اج کل جبل نور آکھیا جاند اے تے اوہ غار جتھے آپ خلوت فرماندے سن، توارخ وچ غار حرا دے نال چیتے رکھی جاندی اے۔ ایہ غار پہاڑی دیاں سلاں ڈگن نال وجود وچ آئی ہوئی اے۔ ایس دے تن پاسے (Sides) تے چھت ایہناں پتھراں دے اک خاص توازن نال کھلوتے رہن دی دلیل اے۔ غار دی لمائی چار گز تے چوڑائی پونے دو گز اے۔ اُچائی اپنی کوہے کہ بندا آرام نال وچ کھلو سکد اے۔ غار دافرش صاف تے سواہرا اے۔ او تھے آرام نال لے پیا جاسکد اے۔ اوس دامونہ ایس پاسے ہے پئی خانہ کعبہ غار وچوں دکھالی دینداسی۔ ایہ نبی رحمت a دی اوس دور دی عبادت گاہ سی جدوں دنیا شرک دے انھیرواں وچ نکراں پئی کھاندی سی۔

توحید پرست بندے:

بعثت توں پہلاں ای عرب وچ اللہ دے فیض دیاں جھلکیاں دن لگ پیاں سن۔ ایوں قس بن ساعدہ، ورقہ بن نوفل، عبداللہ بن جحش، عثمان بن الحویرث تے زید بن عمرو بن نفیل ورگے بندے بت پرستی توں تاب ہو کے خدائے واحد نوں اپنا پالہارتے معبود ٹھہن لگ پئے سن۔ قس بن ساعدہ نے عکاظ وچ جہڑا خطبہ دتا سی اوہ توارخ نوں اج وی چیتے ہے تے اوس وچوں توحید دی مہک آؤندی اے۔ ورقہ بن نوفل ”اک اللہ“ دے وجود دے من والے سن تے سمجھدے سن پئی اللہ دے اخیر نبی a دے آون دا ویلا آجیا اے۔ ایسے لئی اوہناں نے پہلی وحی توں فوراً بعد ای جناب محمد نوں اللہ دا نبی من وچ دینہیں لائی۔ آل دوالے دی حالت وی بدل دی دسری سی۔ نجاشی تے قیسر دیاں کوششاں نال عیسائیت عرب وچ آچکی سی۔ ایوں بعثت دے نیڑے عرب وچ اچھے لوکی لہدے سن جہڑے یہود و نصاریٰ دے عالماں کولوں پچھ گچھ کر کے ایہ اڈیک لائی بیٹھے سن کہ چھیتی ہی اخیر نبی a دا ظہور ہون والا ہے۔ زید بن عمرو ورگے بندے جہڑے خلیفہ راشد جناب عمر فاروق b دے سکے چا چاسن، اوہ نیک بزرگ سن جہناں دور دریڈے دے کئی پینڈے ایس سدھر وچ کر چھڈے پئی کہہ رہے اخیر نبی دی بھنک کن وچ پوے۔ اخیر جدوں اوہناں نوں پتا لگا بنی اوہ کسے وچ ای پیدا ہون گے تے سکھ داساہ لیا۔ پر اللہ نوں منظور نہیں سی تے اوہ ایسے اڈیک وچ ای مالک کول جاتجے۔

آل نبی a:

ایس حوالے نال ڈھیر ساریاں روایتاں ساڈے تیکر اپڑ دیاں نیں۔ ایہناں روایتاں موجب بنات نبیؐ تے سبھ دا اتفاق اے پئی اوہ چار نیں پر پتراں دی تعداد تے کجھ اختلاف اے جہڑا چوکھے توں چوکھا اک پترا دا ہے۔ جناب قاسم تے جناب ابراہیم تے سبھ دا ایکا ہے پر جناب عبداللہ تے سارے سیرت نگاراں دا اتفاق نہیں تے اوہ آکھدے نیں کہ آپ a

دے دوہی پترن۔ اوہناں دا خیال اے کہ جس فرزند القب طیب تے طاہری اوہ عبداللہ نہیں سگوں جناب قاسم سن۔

جناب قاسم b:

آپ دے پہلوٹھے پتر حضرت قاسم سن جہڑے حضرت خدیجہ نال ویاہ توں چار ورھے بعد دنیا تے تشریف لیائے تے اپنے بچینے وچ ای مالک ول پرت گئے۔ مورخ مجاہد آکھدے نیں بئی آپ صرف ۷ دیہاڑے جیوندے رہے۔ ابن سعد دی روایت موجب دو ورھیاں دی حیاتی پائی، ابن فارس دے حساب نال جان پچھان کرن لگ پئے سن تے قاضی سلمان منصور پوری نے جہڑی ونڈ لائی اے اوس موجب ٹرنا سکھ گئے سن۔ نبی اکرم a دی کنیت ابوالقاسم ایسے پتر پاروں ہی سی۔ آپ اس کنیت نوں چوکھا پسند کر دے سن۔ آپ دے اصحاب جدوں آپ a نال کدھرے ذاتی محفلاں وچ ہوندے تے آپ a نال پیار دا اظہار کر دے تے ابوالقاسم ای آکھدے۔ اک واری ایس طرحاں ہوئی پئی آپ بازار وچ تردے جاندے سن تے پچھوں کسے واج دتی ”یا ابوالقاسم، یا ابوالقاسم“۔ آپ نے مڑ کے دیکھیا تے اوہ آکھن لگا ”یا رسول اللہ! میں تے فلاں نوں اواز دتی سی، اوس دی کنیت وی ابوالقاسم اے“ ایس توں پچھوں آپ a نے سنگی ساتھیاں نوں ابوالقاسم نہ اکھوان دا مشورا دتا۔

جناب زینب c:

حضرت زینب c وی باقی تئیں بھیناں وانگ جناب خدیجہ الکبریٰ دے پاک بطن مبارک وچوں پیدا ہوئیاں۔ جناب زینب بھیناں وچوں سبھ توں وڈھیاں سن پر جناب قاسم b توں نکلیاں سن۔ آپ دی پیدائش مبارک جناب قاسم b توں سوایاں ڈیڈھ ورھے بعد اودوں ہوئی جدوں نبی اکرم دی مبارک حیاتی ۳۰ ورھے توں کچھ اُتے سی۔ بخت دے ویلے جناب زینب c دس ورھیاں دے نیڑے تیڑے سن۔ آکھیا جاسکدا اے پئی حضرت علی بالااں (منڈیاں) وچ پہلے مسلمان سن تے حضرت زینب c نوں بالڑیاں وچ پہلی مسلمان ہون دا اعزاز حاصل اے۔ آپ دی شادی مکہ وچ ای اپنی ماسی دے پتر ابوالعاص بن ربیع نال ہوئی۔ آپ دی سس حضرت خدیجہ دی بھین سی تے ابوالعاص وی بھلا مانس منڈا سی، ایس لئی نبھاہ چنگا ہوندا رہیا پر بھیڑے لیکھئی جدوں نبوت دا ڈھندورا وجیا تے ابوالعاص نے قریشیاں دا ساتھ دتا۔ ایوں مسلمان ہون وچ دیر کر چھڈی۔

سن ۲ھ وچ بدر دے مقام تے ہون والے، اسلام تے کفر دے پہلے زور دار معرکے وچ ابوالعاص جنگی قیدی بنے تے گرفتار ہو کے مدینے اپڑے۔ ابوالعاص نوں بدر دے مجاہد جناب غازی عبداللہ بن نعمان انصاری نے قید کیتا سی۔ جدوں ایس قیدی دا بنت رسول تے زوجہ محترمہ ابوالعاص، جناب سیدہ زینب نوں مکے وچ پتا لگا تے اوہناں نے ماپیاں ولوں واج وچ ملن والا ہار فدیے دے طور گھل کے ابوالعاص دی رہائی دی درخواست کیتی۔ ایس حالت وچ لوکاں نے نبی دی دھی دی اپنے خاوند نال محبت، تے رحمت اللعالمین دی اپنی دھی نال محبت دی یاد رہ جان والی جھلک دیکھی۔ عجیب صورت حال سی۔ بڑی ہی پیاری، مہربان تے اوکھے ویلیاں دی دوست خدیجہ نے اک ہار اپنی وڈی دھی نوں دتا سی تے ہن اوس محبوب بیوی نوں وچھڑیاں کوئی چار ورھے ہو گئے سن۔ ہار ویکھ کے خدیجہ وی یاد آئیاں تے غم وی سجرا ہو گیا بئی لاڈلی دھی رب دے راہ

اتے ٹردیاں تے ابوالعاص دے مسلمان نہ ہون پاروں سہاگن ہو کے وی خاوندی محبت نوں ترس رہی اے۔ ایوں ہار ویکھ کے آپ a بڑا ای روئے تے صحابہ نوں آکھن لگے بئی سجنو! ایہ ہار اک دھی کول اک موئی ماں دی نشانی اے، جے دل من دا جے تے ہار پرتاء دیو۔ سپہ سالار اعظم دی ایہ حالت ویکھ کے سبھ نے اپنیاں دھوناں نیویاں کر لینیاں تے ہار جناب زینب نوں واپس موڑ دتا۔

ابوالعاص رہا ہو کے مکے واپس پرتے تے وعدے موجب اپنے بھرا کنانہ نال جناب سیدہ زینب c نوں مدینے ول ٹور دتا۔ جدوں مکے توں کجھ دریڈے ذی طویٰ دے مقام تے اپڑے تے مکے دے کافر وی پچھا کر دے کر دے او تھے جاجے۔ ہبار بن اسودناں دے اک بندے نے سیدہ زینب c نوں اُٹھ توں تھلے ڈیگ دتا جہدے نال آپ نوں چوکھیاں سٹاں لگیاں۔ آپ اوس ویلے حاملہ وی سن، ایس پاروں تکلیف ودھ گئی تے اخیر حمل وی ساقط ہو گیا۔

ایس ادھوری ہجرت ویلے ہبار بن اسود دے ایس ظلم پاروں خورے قریش آپس وچ ای لڑ پیندے پر ابوسفیان او تھے اپڑ گیا تے کنانہ دا غصا ایوں ٹھنڈا کیتا پئی جے ایوں لڑ بھڑ کے توں محمد دی دھی نوں دن دیویں لے گیا تے ساڈی بڑی نکاتی ہووے گی، توں ایویں کر بئی رولا گھولا جری گھٹ لین دے، فیر کدھرے چپ چپے نکل جایا جے۔ کنانہ جہڑا بھر جائی نوں سٹ لگن توں ڈاڈھاتپیا ہو یا سی اوس نے ایس گل وچ ای بھلیائی سمجھی تے اپنے کڈھے ہوئے تیر ترش وچ واپس پائے۔ کنانہ کجھ دنوں پچھوں سیدہ زینب c نوں نال لے کے مدینے ول ٹر گئے تے جناب رسول اللہ دی متھی تھاں تے اوہناں نوں زید بن حارث دے حوالے کر گئے جہڑے سیدہ نوں مدینے لے گئے۔

ابوالعاص دوجی وار فیر اک معر کے وچ جنگی قیدی بنے۔ جناب سیدہ زینب نے مدینے وچ اوہناں نوں پناہ دتی، پر ایس وار اوہناں نے مسلمان ہون دا ٹپا متھ لیا۔ آپ کجھ چراں لئی مکے پچھانے پرتے تے کفار دامال جہڑا مسلماناں دے ہتھے لگا سی تے ہن اوہناں (ابوالعاص) دی وجہ توں واپس ملیا سی، اوہ مکے دے کے واپس مدینے آئے تے مسلمان ہو گئے۔ مسلمان ہون توں بعد سیدہ زینب تے ابوالعاص نے فیر چنگے پیار کرن والے میاں بیوی وانگ حیاتی دے دن کٹے پر بد قسمتی بئی حالت حمل وچ لگی سٹ نے سیدہ دی جان نہ چھڈی تے اخیر سن ۸ھ وچ جوار رحمت وچ تھاں لہج گئی۔ آپ نوں اُم المؤمنین حضرت سودہ، اُم ایمن تے سیدہ اُم سلمہ نے غسل دتا تے شفیق باپ محمد a تے خاوند ابوالعاص نے آپ نوں قبر وچ اتار یا۔

حضرت زینب دے دو بچے سن۔ پتر علی تے دھی امامہ۔ جناب علی بابت توارخ گوئی دس دی اے پر ابن عساکر آکھدے نیں بئی حضور دے ایس نواسے نے جنگ یرموک وچ شہادت پائی سی۔ جناب امامہ، حضرت فاطمہ توں بعد حضرت علی بن ابوطالب دے نکاح وچ آئیاں۔ حضرت علی نوں جد شہادت والی سٹ لگی تے آپ نے حارث (نبی اکرم دے چا) دے پوترے مغیرہ بن نوفل نوں آکھیا بئی میں چلانا کر گیا تے امامہ نال نکاح کر لوں۔ فیر ایوں ای ہو یا تے مغیرہ نے نکاح کر لیا۔ جدوں سیدہ امامہ فوت ہوئیاں اوہدوں آپ مغیرہ دی زوجیت وچ ہی سن۔ جناب امامہ دی کوئی اولاد نہیں سی پر کجھ بزرگاں دا خیال اے پئی اک پتر بیٹی بن مغیرہ ہو یا پر بیٹی توں اگے گل ٹردی نظر نہیں آؤندی۔

حضرت رقیہؓ:

حضرت زینب دی پیدائش توں کوئی تن ورھے پچھوں جدوں سرور کائنات a دی پاک حیاتی ۳۳ ورھیاں تے جا بچی سی، جناب خدیجہ دے گھر سیدہ رقیہ نے جنم لیا۔ کئی عروج ای ابولہب دے پتر عقبہ نال نکاح ہو گیا۔ خاندان ہاشم دے بایکاٹ ویلے جدوں اک اللہ دا نام لین دے جرم وچ محمد a اتے انتاں دیاں مصیبتاں ٹٹیاں، اودوں ایہ جان کڈھ لین والا صدام وی جرنا پیا نئی عقبہ نے اپنے پیو دے آکھن اُتے سیدہ رقیہ نوں طلاق دے دتی۔ ایس توں بعد آپ دا نکاح حضرت عثمان b نال ہويا۔ ایس ویاہ دی کئی عرصہ بڑی شہرت ہوئی تے اوہناں میاں بیوی نوں اک سوہنے بچے جوڑے دی حیثیت نال یاد کیتا جاندا رہیا۔ لوکاں دے مونہوں ایہ گل وی سنی جاندی سی:

((احسبن زوجین اھما انسان رقیة وزوجھا عثمان))

سبھ توں چنگا جوڑا جھڑا دیکھیا گیا اوہ رقیہ تے عثمان b نیں۔

کئی توں ہجرت کر کے حبش ول جان والیاں وچ ایہ مبارک جوڑا وی شامل سی۔ حال حالات کجھ ایوں دے سن بئی لے چراں تیکر اوہناں دی کوئی سُوہ نہ لگی۔ اک واری اک زنانی نے آکے دسیا بئی اوس نے اوہناں دوواں نوں جیوندے جاگدیاں دیکھیا اے۔ رحمت اللعالمین نے اوہناں دی خیر تے سلامتی دی دعا کیتی تے فرمایا کہ رب اوہناں نوں راضی رکھے، اوہ حضرت لوط g تے حضرت ابراہیم g توں بعد پہلا جوڑا نیں جہناں نے راہ خدا وچ اکٹھیاں ہجرت کیتی۔

حبش دے پردیس وچ اللہ نے سیدہ رقیہ c نوں اک پتر وی دتا، جس دا ناں عبد اللہ سی۔ جدوں مدینے وچ مسلماناں دے پیر پیڑھے ہو گئے تے نبی a دی ایہ پیاری دھی اپنے گھر والے نال مدینے جا بچی۔ سن ۲ھ وچ سیدہ تے چچک داحملہ ہويا۔ دیکھدیاں ای دیکھدیاں بیماری نے پوری طرحاں جناب رقیہ نوں گھیر لیا۔ اوہناں دناں وچ ای جدوں بدر داحملہ روئنا ہويا، نبی اکرم a نے جناب عثمان غنی b تے حضرت اسماء b بن زید نوں آپ دی سوجھی (تیمار داری) لئی مدینے چھڈیا ہويا سی۔ جس ویلے زید بن حارث بدر دی فتح دی خبر لے کے مدینے اپڑے اوس ویلے سیدہ رقیہ c نوں دفنایا جا رہیا سی۔ آپ جوان عروج ای اللہ نوں پیاریاں ہوئیاں۔ قاضی سلمان منصور پوری دے حساب موجب آپ نے صرف ۲۱ ورھیاں دی عمر پائی۔

سیدہ دے فرزند تے سبط رسول سیدنا عبد اللہ اپنی امی توں بعد زریں دو کوورھے ای جیوندے رہے۔ ہويا ایہہ بئی اوہناں نوں اکھ دے اتے اک ککڑ نے ٹھونگا ماریا۔ ایہ زخم خراب ہوندا گیا تے اخیر ایہو ای زخم جناب عبد اللہ دے دنیا توں ٹورے دا سبب بن گیا۔

سیدہ اُم کلثوم c:

جناب سیدہ اُم کلثوم c حضرت خدیجہ دے لطن مبارک وچوں نبی اکرم a دی چوتھی اولاد نیں۔ آپ داسن پیدائش توارخ دی دھوڑ تھلے کدھرے دیا گیا اے، پر خیال اے بئی آپ بعثت توں تن چار ورھے اگدیں پیدا ہوئیاں ہون گئیاں۔ سیدہ رقیہ وانگ سیدہ ام کلثوم وی ابولہب دی نونہ بنیاں تے اس دے پترعتیبہ نال آپ دا نکاح ہويا۔ آپ نوں

وی آپ رقیہ دے نال ای طلاق ہوئی۔ جدوں سیدہ رقیہ c نے چلانا کر لیا تے کچھ چراں پچھوں جناب سید المرسلین نے حضرت عثمان نوں سد گھلیا تے آکھن لگے بھئی عثمان! حضرت جبرائیل رب داسنہیا لے کے آئے نیں تے آکھدے نیں بئی میں اپنی دوجی دھی دا تیرے نال ویاہ کردواں۔ اوہناں دنوں وچ ای حضرت عمر فاروق b دی دھی حفصہ دے گھر والا وی چلانا کر گیا سی تے حضرت عمر ایس گل تے چوکھے پریشان سن۔ اوہناں نے حضرت عثمان نوں ایہ گل آکھی ہوئی سی۔ ”وکیح عثمان! تیری گھر والی سیدہ رقیہ اللہ نوں پیاری ہوگئی تے میری دھی دا خاوند وی چلانا کر گیا اے۔ کیوں نہ تہاڈا دوواں دا نکاح کردتا جاوے۔“ حضرت عثمان اے سوچ وچار وچ سن تے حضرت عمر b نے اپنی ایس اوکڑ دا اوس رحمت لقب پاؤن والے یار اگے ذکر چا کیتا۔ عجب صورت حال بن گئی۔ اک پاسے اک مہربان ”رفیق عزیز“ عمر بن خطاب سی تے دوجے پاسے ”رفیق اعلیٰ“ داعلم سی۔ اخیر فرماؤن لگے بئی ”عمر! دل سوڑا نہ کر۔ حفصہ نوں عثمان توں چنگا گھر والا ملے گا تے عثمان نوں حفصہ توں چنگی گھر والی۔“ کئی گل اے بئی جناب عمر فاروق دے قلب نوں ایہ سن دیاں ای پوری تسکین مل گئی ہوئی اے پر فیروی سوچیا تے ضرور ہونا اے بئی مدینے وچ عثمان b توں ودھ کے کہڑا کرماں والا بندہ ہووے گا۔ فیروں ایس فیصلے نال حضرت حفصہ نوں محمد a ورگا شوہر ملیا، اوہناں نوں ام المومنین بن دا اشرف حاصل ہو یا تے حضرت عثمان نوں ذوالنورین اکھوان دی عزت نصیب ہوئی تے ساری گل جناب عمر فاروق دی سمجھ وچ آ گئی۔

سیدہ اُم کلثوم ۶ ورھے سیدنا عثمان دی زوجیت وچ رہیاں پر آپ دے کوئی اولاد نہیں ہوئی۔ شعبان ۹ھ وچ آپ دا انتقال ہو گیا۔ نبی اکرم a نے آپوں نماز جنازہ پڑھائی۔ حضرت علی، حضرت اسامہ بن زید تے حضرت فضل بن عباس نے آپ نوں قبر وچ اتاریا۔ جناب رسول اللہ سیدہ دی قبر تے بیٹھے رہے تے آپ دیاں اکھاں وچ اتھر و نظر آؤندے رہے۔ جناب عبداللہ:

نبی اکرم a دے پتراں دی تعداد اُتے مورخاں تے سیرت نگاراں وچ چوکھا اختلاف اے۔ شبلی نعمانی تے سید سلمان ندوی آکھدے نیں ”متفق علیہ روایت ہے کہ آپ کے چھ اولادیں تھیں۔ قاسم b ابراہیم b، زینب c رقیہ اُم کلثوم c اور فاطمہ c“ ابن اسحاق آکھدے نیں بئی دو صاحبزادے طاہر تے طیب وی سن تے ایوں پتراں دی تعداد چار بن دی اے پر جناب عبداللہ دا کدھرے ذکر نہیں۔ قاضی سلمان منصور پوری نے جناب عبداللہ نوں حضور دا دوجا پتر دسیا اے تے لکھدے نیں بئی اوہناں دا ہی لقب طیب و طاہر سی۔ ایوں اوہناں نے طیب یاں طاہرناں دے کسے ہو پتر نوں نہیں منیا۔ مصر دے محمد حسین ہیکل دا خیال اے۔ ”اُن (حضرت خدیجہ) کے بطن سے دو فرزند اور چار صاحبزادیاں پیدا ہوئیں۔ صاحبزادوں میں ایک کا نام قاسم اور دوسرے کا عبداللہ اور دونوں کے القاب طاہر اور طیب تھے۔“

اس دا مطلب ایہہ ہو یا پئی طیب یاں طاہر ناؤں دے پتراں دی پیدائش تے اوہناں نوں اتفاق نہیں پر جناب عبداللہ نوں اوہ حضرت خدیجہ دے بطن مبارک وچوں حضرت محمد a دا دوجا پتر من دے نیں۔ جناب عبداللہ، حضرت فاطمہ توں

کوئی دوڑھائی ورھے اگدیں تے بعثت نبوت دے نیڑے تیرے پیدا ہوئے۔ آپ نے وی وڈے بھرا طرحاں تھوڑی ہی حیاتی پائی تے اللہ نوں پیارے ہو گئے۔ ایس دو بے پتر دے مرن ویلے تک آپ توحید داسنیہا علانی طور تے لوکاں تیکر اپڑا رہے سن تے ایوں سکے دے مشرک آپ a دے ویری بنے کھلو تے سن۔ عبداللہ چلانا کر گئے تے کافر آکھن لگے لو بھئی! ہن محمد a داناؤں نشان دنیا توں مک گیا ہے۔

اوس ویلے دے حالات نوں جے کر ڈو گئی نظر نال ویکھیا جاوے تے گل ایوں ای سی ہی کسے عربی دا کوئی پتر نہ ہونا یاں کلا پتر ہونا چو کھی وڈی گھاٹے دی گل جانی جاندی سی پر اوہ کسلے بھلتی بیٹھے سن پئی رب سوہنے نے اوس سوہنے دا ناؤں اُپے توں اچا کرن دا وعدہ کیتا ہو یا سی۔ فیر جدوں رب نے سورہ کوثر دا نزول فرمایا تے ایہ گل آکھی ہی سوہنیا! تیرا ویری ہی اوتر اکھتر اے تے اک پاسے رب دے محبوب دی دل جوئی ہوئی تے دو بے پاسے ویریاں دے مومتہ وی بند ہو گئے۔

لاڈلی:

میزبان نبی a جناب ابویوب انصاری b دے گھر دے نیڑے حارث بن نعمان انصاری b دے اک گھر وچ دو اجھے جی و سوں کیتی بیٹھے نیں جہڑے رب دے محبوب دے محبوب نیں تے مدینے وچ اوہناں توں چو کھی ہو ر کوئی شے وی اللہ دے نبی a نوں پیاری نہیں۔ کوارٹراں ورگے ایس نکلے جھے گھر وچ ہن توں کجھ چیرا گدیں پندراں سولھاں ورھیاں دی اک کڑھی کچے ویڑھے وچ جھاڑو دیندی پئی سی۔ اوہدے لیڑے اوویں وی کجھ میلے جھے سن پر بوکھر بھاری دے اڈ دے گٹھے مٹی نے تے چوکھا ای مند ا حال چا کیتا اے۔ تے ہن اوہ چلھے ول ہو گئی اے۔ بلدی بچدی اگ نوں پھوکاں ماردی ایہ کڑی کدے دھوئیں پاروں اکھاں پئی ملدی اے تے کدی اگ دے سیک پاروں آؤن والا مٹرھکا پئی پونجھدی اے۔

بھاریں ایہ کڑی ایس ویلے اپنے گھر والے دے گھر وچ اے پر اوس نوں ویکھ کے جیون والا اوس دا بابل ایہ سارا کجھ جان دا اے۔ اباجی ایس نال والے گھر وچ ہی تے رہندے نیں۔ اوہ ایہ وی آکھدے نیں ہی ایہ کڑی میرے جگر دا ٹکرا اے، ایہ اپنے زمانے دیاں جنتی عورتاں دی سردار اے۔ ایہ انسانی تواریخ دیاں اوہناں چار اچیاں شانناں والیاں پیہیاں وچوں اک اے جہناں وچ جناب مریم، جناب خدیجہ تے آسیہ (فرعون دی گھر والی) شامل نیں۔ انسانیت دے محسن تے نبیاں دے سردار a جدوں کسے سفر توں پرتدے نیں تے سبھناں توں پہلاں ایسے ہستی نوں ملدے نیں۔ جے ایہ آپ ملن آؤندی اے تے پیغمبر اعظم a بھج کے اگانہ دودھ دے نیں، اس دا متھا چمدے نیں، اوس نوں پیار کردے نیں، اوس دا دکھ و نڈاندے نیں تے اوس نوں ویکھ ویکھ کے خوش ہوندے رہندے نیں۔

ایہ سبھ کجھ ایویں نہیں، ایہ وی اس ہستی نال چوکھا ای پیار کردی اے جیس نال شیں وی پیار کردے او، جس نال میں وی پیار کردا ہاں، جس نال رب وی پیار کردا اے تے جہڑا آپوں وی سبھناں نال پیار کردا اے۔ نرا اپنیاں نال ای نہیں، بیگانیاں نال وی کردا اے۔ نرا سبھناں نال ای نہیں ویریاں نال وی کردا اے۔ ایہ پیار کردا اے ہی ہبار، عکرمہ، تے ہند جئے

لوکاں نوں وی معاف کردیندا اے۔

اک واری ایوں ہو یا بنی انسانیت دے محسن کعبہ وچ نماز پڑھ رہے سن۔ او تھے بہت سارے قریش وی موجود سن۔ جدوں آپ a سجدے وچ گئے تے اوہناں وچوں اک بد بخت عقبہ بن معیط نے اک اُٹھ دی او جھڑی آپ a دے اُتے لیا سٹی۔ اوہناں بد معاشاں نال ٹکر لینا کوئی سوکھا کم نہیں سی۔ ایس لئی جے کسے حضور نوں او جھڑی تھلے دیاں ویکھیا وی تے آپ دی کوئی مدد نہ کیتی۔ جنے چوکھی نیکی کیتی اوس نے وی ایہ کیتی بنی جا کے حضرت خدیجہ c دے گھر جادیا۔ ایہ کرماں والی دھی رانی اودوں چوکھی ای کئی سی۔ بھیجی بھیجی آئی تے کسے غنڈے توں ترٹھیاں بنا ہمت کر کے او جھڑی آپ a دے جسے توں تھلے لاہی۔

اُچیاں شانناں والی ایہ باڑی احد دی مجاہدہ وی اے۔ مدینے وچ جدوں ایہ منحوس خبر مشہور ہو گئی بنی رحمت دو جہاں محمد a اللہ دے رسول شہید ہو گئے نیں تے ایہ ہستی اوسے ویلے میدان جنگ وچ اپنے سونے بابل کول اپڑی۔ زخم دھوئے، تے خون بند کرن دے پورے جتن کیتے۔ اخیر اپنے ہتھیاں نال کھجوردی اک صف ساڑ کے اوس دی سواہ زغماں وچ بھر کے خون بند کیتا۔ بھلا بھجھو ایہ کڑی کون اے؟..... ایہ فاطمہ c اے..... ہاں..... ایہ پیغمبر اعظم a دی سبھ توں چوکھی لاڈلی دھی اے۔ ایہ باب مدینۃ العلم علی دی گھر والی تے حسن و حسین b دی امی وی اے تے ایسے ہستی نوں ایہ شرف حاصل اے کہ اوس دے وجود نال محمد رسول اللہ دی نسل اگے چلی۔

حضرت فاطمہ دی پیدائش مبارک دے ورھے دا چوکھے جتن دے باوجود کوئی پکا پیڈھا ثبوت نہیں لہا۔ خیال اے بنی آپ بعثت توں کچھ چراں پچھوں پیدا ہوئیاں۔ بچپن توں ای طبیعت بڑی فقیر جی سی۔ کھیڈاں ول اصولوں ای دھیان نہیں سی۔ بس ایوں جانو بنی تارک الدنیا جے بندیاں وانگ دی سبھا سی۔ ایسے لئی آپ نوں بتول دی آکھیا گیا۔ صورت ویکھو تاں محمد a، سیرت ویکھو تاں محمد a۔ عورتاں وچ اسوہ حسنہ دی پیروی کردیاں اسوہ حسنہ دی ایس توں ودھ کے ہور کوئی مثال نہیں لہدی، تے ناں ای لہسن دے جتن کرنے چاہیدے نیں کیوں جے کوئی ہور مثال ہوندی تے فیہ محسن انسانیت اوس بارے وی آکھدے بنی ”تیری خشتی نال رب خش ہوندا اے تے تیری ناراضگی نال اوہ ناراض۔“

آپ دی عمر جدوں پندرہاں ورھے تے ساڈے پنج مہینیاں دی ہوئی تے آپ دا نکاح حضرت علی نال کردتا گیا۔ حضرت علی اودوں ۲۱ ورھیاں توں کچھ اُتے سن۔ ایہ گل کڈی وی اچرج لگے پر ہے سچ بنی رب نے اپنے جس بندے نوں دوواں جہانناں دے اُن مک خزیناں نال نوازیاسی اوس نے اوہدے وچوں اپنے یاں اپنی اولاد لئی کچھ وی نہ رکھیا تے اپنی ایس دھی نوں جہر ادا دتا اوہ اک پلنگ تے اک بستر سی۔ تے جے ایس توں وکھ توارخ دے ور قیاں وچوں کچھ لہدا اے تے اوہ چوکھے توں چوکھا پانی ڈھون لئی اک میٹک تے آٹا پین لئی دوچکیاں نیں۔ میں وی واری جاواں تے میرے ماں پیو

ہ ہمارا وہ بندہ اے جس نے ہجرت دے ویلے سیدہ زینب نوں سواری توں ڈیگ کے زخمی کیتا سی۔ عکرمہ ابو جہل دا پتر سی تے ہند، ابوسفیان دی سوانی سی جس نے حضرت حمزہ دا کلیجا چھیا۔ فتح مکہ دے ویلے ایہناں سب ظالماں نوں معافی مل گئی۔

اسد الغابۃ، صفحہ ۲۵۳ بحوالہ علامہ نیاز فتح پوری، طبع ہفتم، صفحہ ۱۴۱۔

وی واری جان ایہناں اچیاں ہستیاں توں بئی ایس توں بعد وی جدوں آپ دے قدماں وچ دنیا جہاں دیاں نعمتاں دے ڈھیر لگ گئے سن، تے جدوں بیت المال نکونک بھریا گیا سی، اودوں وی نہ تے دھی نے کوئی طمع کیتا تے نہ ایس اے ہوراں اپنی دھی نوں دو جیاں دیاں دھیاں توں ودھ جان کے اوس دے گھر کوئی درہم، خادمہ یاں سونے دیاں ٹومباں بنا بنگھلیاں۔ کمال دی گل نہیں بئی جس والد دی اک واج تے دنیا دے تن برا عظمیاں وچوں لیک سیدی لیک دیاں واجاں آؤن، اوس دی اپنی دھی دے ہتھاں تے چکی پیہ پیہ کے پڑ بن گئے؟ جہدے دنیا تے آؤن توں پہلاں ای چراں توں بند ہوئے آب زم زم دے چشمے نوں فیر کھول دتا گیا اوس دی اپنی لاڈلی دھی دی، پانی لئی مشکاں چک چک کے، دھون چھلی گئی تے جس دے حکم تے لوکاں اپنیاں پلکاں نال پوری دھرتی نوں صاف کرن لئی تیاری اوس دے کیلجے دا کلڑا گھر وچ جھاڑو دے دے کے مٹیوٹی تے مڑھکیوں مڑھکی ہو یا رہندا سی۔ تے جے گھر والے دے آکھن تے بنت رسول کوئی خادم یاں خادما منگن جاندی وی اے تے فیر اوویں ای بچھانے پرت آؤندی اے بئی چلو گزرا ہوندا ای پیا اے نا!

جدوں جناب فاطمہ c خادم دی گل کیتے بنا گھر مڑ آئیاں تے اگلے دیہاڑے نبی آپوں اوہناں ول گئے تے آکھدے نیں ”پڑی! کیہ گل سی؟“ تے دھی رانی چپ رہندی اے۔ جناب علی المرتضیٰ آکھدے نیں ”یا رسول اللہ! فاطمہ دے ہتھاں تے چکی پھیدیاں تے دھون تے مشک چک چک کے نشان پئے گئے نیں، میں فاطمہ نوں آکھیا سی بئی حضور a کول کجھ خادم آئے نیں، اک تسلیں منگ لیاؤ، تاں جے سکھ داسا آوے۔“

لاڈلی دھی نوں جواب ملدا اے:

”فاطمہ! تقویٰ ای چنگا اے۔ رب دے دے فرض ادا کرو۔ اپنے گھر دے جیاں دا خیال رکھو تے رات نوں جدوں سون لگو تے ۳۳ واری سبحان اللہ ۳۳ واری الحمد للہ تے ۳۴ واری اللہ اکبر پڑھیا کرو، ایہ پورا سو ہو گیا۔ ایہ کم تیرے لئی خادمہ توں چنگا اے۔“

”رَضِيتَ عَنْ اللَّهِ وَعَنِ الرَّسُولِ صَلَّيْكُمْ

”(ٹھیک اے ابو) میں (ایوں ای) اللہ تے اوس دے رسول a تے خش ہاں۔“ دھی نے جواب دتا۔“

حضرت فاطمہ دے بطن مبارک وچوں تن (۳) صاحبزادے تے دو صاحبزادیاں پیدا ہوئیاں۔ جناب حسن b جناب حسین b جناب محسن b اُم کلثوم c تے سیدہ زینب c۔ محسن بچنے وچ ای چلانا کر گئے تے باقی تاریخ وچ مشہور نیں۔

سیدہ النساء العالمین نے رمضان ۱۱ھ وچ وفات پائی تے ایوں عین جوانی وچ ای اپنے عظیم الشان والد دے وصال توں نرے چھ مہینے پچھوں اوہناں کول جا بجیاں تے ایہ ۶ مہینے وی آپ نے حضور دی جدائی وچ دکھ نال ای گزارے۔ آپ دی عمر مبارک ٹھیک ٹھیک نہیں دسی جاسکدی کیوں جے سانوں سن ولادت دا ٹھیک پتا نہیں۔ ایس فقیر دا خیال اے بئی ۲۵ کوورھے ہوئی اے۔

زیر بن بکار توں روایت اے بئی ہشام بن عبد الملک کول حضرت عبد اللہ بن حسن بن امام حسن آئے۔ او تھے کلبی وی

بیٹھا ہونیا سی۔ ہشام نے پچھیا بنی عبداللہ ایہ دسو حضرت فاطمہ دی عمر کن سی؟ جناب عبداللہ نے جواب دتا ”۳۰ ورھے“۔ کلبی آکھن لگا ”۳۵ ورھے“۔ ہشام بولیا ”بنی عبداللہ! سن رہے اونا تو ارتخ داسیا نا کیہ گل آکھ رہیا اے۔“ ایس گل دے جواب وچ جناب عبداللہ نے آکھیا بنی ”میری ماں دا حال میرے کولوں پچھو تے کلبی دی ماں دا کلبی کولوں“ ایس روایت توں بھاریں میرا ۲۵ ورھیاں دی عمر والا حساب غلط جا پدا اے پر ایس توں ہٹ کے دی کجھ من دی وجہ نہیں لہج سکی۔

حضرت عائشہ آکھدیاں نیں بنی سید المرسلین نے اپنے مرض الموت وچ حضرت فاطمہ نوں سدیا تے اوہناں دے کن وچ کوئی گل کیتی تے اوہ روپیاں۔ فیئر نیڑے سدیا تے کن وچ کجھ آکھیا تے فاطمہ حسن لگ پیناں۔ میں فاطمہ c توں پچھیا بنی کیہ گلاں ہوئیاں نیں بیوہی وچ؟ تے اوہناں مینوں کجھ نہ دسیا۔ فیئر جدوں آپ a وصال فرما گئے تے جناب فاطمہ c نے مینوں دسیا بنی ”پہلوں مینوں ابا جی نے دسیا سی بنی اوہ ایسے بیماری نال اللہ نوں پیارے ہو جان گے، ایس لئی میں روپئی ساں۔ فیئر دوجی وار آکھیا کہ میں (فاطمہ) دو جیاں توں اگدیں آپ a نوں جاملاں گی تے ایس گل تے میں خش ہو گئی“ ایویں دے راز نیاز نبی اکرم a نے ہور کسے نال نہیں کیتے۔

اک روایت موجب اس موقع تے حضور a نے سیدہ فاطمہ c نوں ”یا حبی یا قیوم برحمتک مستغنیہ“ دے ورد دی وصیت کیتی۔

حضرت ابراہیمؑ:

جویں کہ پچھے دسیا گیا اے، نبی اکرم a دی ساری اولاد، سوائے سیدنا ابراہیم توں، حضرت خدیجہؓ دے لطن پاک وچوں پیدا ہوئی۔ جناب ابراہیم دی والدہ جناب ماریہ قبطیہ سن۔ آپ نبی اکرم a دی اخیری اولاد سن تے جمادی الاولیٰ ۹ھ وچ پیدا ہوئے۔ دودھ پیاں دا شرف اک انصاری بی بی اُم بردہ خولہ نوں حاصل ہويا۔ آپ دے رضاعت دے دن وی اچے پورے نہیں سن ہوئے تے تقدیر نے واج مار لئی۔ ایویں ۲۹ شوال ۱۰ھ نوں میرے آقا تے مولاناں اک وار فیئر دکھی کر کے، جناب ابراہیم باقی دا دودھ جنت دیاں حوراں کولوں پین ٹر گئے۔

رسول اللہ a نوں جدوں جناب ابراہیم دی بیماری دا پتا لگاتے آپ a عبدالرحمن بن عوف دے نال اُم بردہ دے گھر تشریف لے گئے۔ ابراہیم اودوں اخیری ساہ لے رہے سن۔ آپ a نے اوہناں نوں کچھ چک لیا، اککھاں وچ اتھروواں دی جھڑی لگ گئی تے زبان مبارک توں ایہ اکھر نکلے:-

((یا ابراہیم لا تنصی عنک من اللہ تنیعا))

”اے ابراہیم! رب دے حکم اگے اسیں تیرے بھوراوی کم نہیں آسکدے۔“

فیئر فرمایا:

”سانوں پتا اے بنی موت ربی حکم تے پکا وعدا اے۔ سانوں ایہ وی پتا اے بنی پچھے رہ جان والے وی اگے جان والیاں دے نال رل جان گے۔ جے کراویں نہ ہوندا تے فیئر اے ابراہیم! سانوں ہور چوکھا غم تے دکھ

ہوندا۔ بھادیس اکھاں بھج گئیاں نیں تے دل وچ غم ای غم اے۔ فیروی اسیں کوئی اجہی گل نہیں کراں گے
 جہڑی رب نوں پسند نہ ہووے۔“ نبی a دے لخت جگر نوں ایک چھوٹی جہی منجی تے پا کے جناز گاہ لیاؤندا
 گیا۔ آپؐ نے خود نماز جنازہ پڑھائی۔ حضرت اسامہ تے حضرت فضل بن عباس نے قبر وچ اتاریا۔ آپؐ قبر
 دے کول کھلو تے کیجہ پھاڑ دین والا ایہہ منظر پچڑیاں اکھاں نال دیکھ دے رہے۔ آپؐ نے دل ای دل وچ
 ایہہ کلمہ کئی وار دہرایا ہونا اے ”ہاں ابراہیم! رب دے حکم اگے میں کیہہ کر سکدا ہاں؟“

رب دا کرنا ایہہ ہو یا نبیؐ جس دیہاڑے ابراہیم اپنے اصلی مالک کول پہنچے اوس دیہاڑے سورج نوں گرہن لگ گیا۔
 عرباں دا ایہہ عقیدہ اسی پئی جدوں کوئی وڈا تے اُچی شان والا بندہ مر دا اے اوہدوں چن یا سورج نوں گرہن لگدا اے۔ ہن
 ایہہ خیال ہو رہا ہو گیا تے وچوں کجھ مسلمان وی آکھن لگ پئے نبیؐ ابراہیم دی موت دے منکھ وچ سورج وی گرہنیا گیا
 اے۔ نبی اکرمؐ نے ایہہ سنیا تے مسلماناں نوں سمجھایا نبیؐ سورج یا چن نوں کسے وی انسان دی موت نال گرہن نہیں لگدا۔ ایہہ
 تے رب دیاں نشانیاں وچوں دو نشانیاں نیں۔ بس جدوں گرہن لگا دیکھو تے نماز پڑھیا کرو۔

حضرت انس بن مالک تے جناب ابن ابی اوفی سیدنا ابراہیم نال حضور دی محبت نوں چیتے کر کے آکھدے رے نبیؐ
 جے ابراہیم جیوندے رہندے تے نبیؐ ہوندے۔ اوہ ایس واسطے ای چلانا کر گئے نیں کہ نبیؐ تے ہوا ی نہیں سکدا کیوں جے
 ساڈے پیارے نبیؐ حضرت محمدؐ تے اخیر نبیؐ نیں۔



رب داسنیہا

جبرائیل غار حرا وچ:

”نہیں ابوالقاسم نہیں۔ کچھ نہیں ہوندا۔ کچھ وی نہیں ہوندا۔ اللہ تھاڑے نال اے۔“ جناب خدیجہ نے آکھیا
”پر مینوں تے اپنی جان داوی ڈراے۔“ رسول رحمت نے جواب دتا۔

”نہیں سرتاج! ڈر کس گل دا۔ رب دی سونہ اوہ تہانوں کدے وی رسوا نہیں کرے گا۔ تئیں صلہ رحمی کر دے او، ہمیش
سچ بولدے او، لوکاں دا بھار وٹا ندے او، اوہناں دیاں امانتاں سنبھال دے او تے آئے گئے پروہنیاں لئی اچھ کر دے او،
مالک کدے وی تہانوں پریشان نہیں کرے گا۔“

((زملوئی خدیجہ زملوئی))

”خدیجہ! میرے اُتے کپڑا دے دیو۔“

تے وفادار بیوی نے دثار (چادر) لیٹے ہوئے سردے سائیں اُتے دے دتی۔

ہُن کچھ وقت بیت گیا اے۔ خدیجہ الکبریٰ نوں یقین اے اپنی حضور دی طبیعت کافی سنبھل گئی اے۔ اوہ اوڑھنی
لیندیاں نیں تے شرک توں اگے ہوئے تے عیسائیت نال جڑے ہوئے ورقہ ول ٹر پیندیاں نیں، جھڑا اوہناں دے چاچے
نوفل دا پتر سی تے ہن بڈھی عمر پاروں گھروں گھٹ ودھ ای باہر نکلد اسی۔ ورقہ بن نوفل ہن بصارت توں تے محروم سی پر
بصیرت دی دولت نال مالا مال سی۔ اوہ توریت تے انجیل دا وڈا عالم سی تے سریانی زبان توں عربی وچ انجیل دا ترجمہ وی
کر لیند اسی۔

”کون اے؟“ انھے ورقہ نے اچی ساری آواز دے کے پچھیا۔

”میں آں خدیجہ، ابن عم!“ حضرت خدیجہ نے جواب دتا۔

”پر بنت خویلد! تیرا ساہ کیوں پھلایا ہویا اے؟ خیر تے ہے خدیجہ؟ دس ناچھیتی نال۔“ بڈھے ورقہ نے چوکھے تجسس
نال کئے سارے سوال کردتے۔

حضرت خدیجہ نے اوہ حالت تے کیفیت بیان کر دتی جہڑی آدم دی اولاد تے اوس کلام دے نزول نال ہوئی سی جس
دا بھار چکن توں سمندراں تے پہاڑاں نے وی انکار کر دتا سی۔

((لئن كنت صدقتن انه لياتيه ناموس عيسى))

”(جے توں سچ آکھنی ایں تے فیر کپی گل اے اپنی ایہ اوہ فرشتہ اے جہڑا عیسیٰ (g) ول آوندا سی)، بڈھے ورقہ

نے جواب دتا۔“

پہلی وحی تے اوس دی تاریخ:

جے کھوج کاری وچ نہ پویئے تے ایہ اوس دیہاڑے دی گل اے جدوں رب دے سوہنے محبوب دی حیاتی دے چاھیں ورھے پورے ہو گئے سن تے کجھ بریکی ول ٹریے تے گل ایوں بن دی اے پئی اوہ رمضان المبارک دی ۲۱ تاریخ تے سوموار دی رات سی۔ اگست دی ۱۰ تاریخ تے سن ۶۱۰ عیسوی سی۔ چن دے حساب موجب عمر مبارک ۴۰ سال ۶ مہینے تے ۱۲ دن تے شمسی حساب مطابق ۳۹ سال ۳ مہینے ۲۲ دن ۰ سی روح نے آکھیا ”محمد a! بشارت قبول فرماؤ۔ ٹیس اللہ دے رسول جے تے میں جبرائیل آں۔“

آؤ ہن ایس واقعے دی تفصیل حضرت عائشہ صدیقہ c دی زبانی سینے۔ ارشاد اے پئی ”حضور تے وحی دی بسم اللہ چنگے تے سوہنے خاں توں ہوئی۔ آپ a جہڑاوی خاب ویکھدے سن اوہ دن دی روشنی وانگ سچ نکلداسی۔ فیرا کلا پے نال پیار ہو گیا۔ ایس لئی غار حرا ول ٹر جان دے تے کئی کئی راتاں گھر تشریف لیائے بغیر او تھے ای عبادت وچ گزار دیندے۔ ستو تے پانی وغیرہ نال لے جان دے۔ مک جان دے تے چھانہ حضرت خدیجہ ول پرت آؤندے تے گھٹو گھٹ اونے کودناں داراشن پانی فیر لے جان دے۔ فیراک راتیں ایوں ہو یا پئی حضرت جبرائیل تشریف لیائے تے آکھن لگے ”اقراء“ (پڑھ)۔

”ماننا بقاری۔ ماننا بقاری“ (مینوں پڑھنا نہیں آؤندا) حضور نے جواب دتا۔

فیر جبرائیل g نے حضور نوں پکڑ کے ایس زور نال دبایا پئی نڈھال کر چھڈیا۔ فیر چھڈ کے آکھیا ”پڑھو“۔ حضور نے تنجی واری ماننا بقاری دا جواب دتا تے روح الامین نے فیر دبوچ کے چھڈیا تے آکھیا:

﴿اقْرَأْ بِاسْمِ رَبِّكَ الَّذِي خَلَقَ ۝ خَلَقَ الْإِنْسَانَ مِنْ عَلَقٍ ۝ اقْرَأْ وَرَبُّكَ الْأَكْرَمُ ۝ الَّذِي عَلَّمَ بِالْقَلَمِ ۝ عَلَّمَ الْإِنْسَانَ مَا لَمْ يَعْلَمْ ۝﴾ (العلق: ۱-۵)

”پڑھ اپنے رب دے ناں نال جیہڑا سب دا خالق اے جہنے پیدا کیتا انسان نوں لو تھڑے توں۔ پڑھ دے جاؤ تہا ڈارب چوکھے کرم والا اے جہنے قلم نال تعلیم دتی تے انسان نوں اوہ کجھ سکھایا جہدا اوس نوں پتا نہیں سی۔“

حضرت عائشہ گل اگے ٹور دیاں نیں پئی جدوں حضور a حضرت خدیجہ تک پہنچے تے دل دھک دھک کر رہیا سی تے حضرت خدیجہ نوں آکھدے نیں ”میرے اُتے کوئی چادر دے دے“ خدیجہ الکبریٰ نے چادر دے دتی۔ فیر ہولے ہولے ڈراہے گیا۔

حضرت خدیجہ ورقہ بن نوفل کول جان دیاں نیں تے سوہنے محمد a نوں وی نال لے جان دیاں نیں تے آکھدیاں نیں ”بھائی ورقہ! ذرا ساری گل اپنے کنناں نال وی سنو۔“

”جی سناؤ“ سیانے ورقہ نے حضور نوں مخاطب ہو کے آکھیا۔ حضور نے ساری گل دہرائی تے سو جھوان ورقہ نے آکھیا ”میں گواہی دیندا ہاں پئی ٹیس ہی اوہ نبی جے جہناں دی مسیح ابن مریم نے بشارت دتی سی۔ تہا نوں چھیتی ہی رب ولوں جہاد دا حکم دی دتا جاوے گا۔ بھتے محمد a! کاش میں تگڑا تے جوان ہوندا یاں اوس ویلے تک زندا ای رہندا جدوں

تھاڑی قوم تہانوں جمن بھوں چھڈن تے مجبور کر دیوے گی۔“

”چا چا جی! کیہ اوہ مینوں کے توں کڈھ دین گے؟“

”ہاں بھتیجے! اک تیرے نال ای ایگل نہیں سگوں جھڑاوی استھے رب داسنیہا لے کے آیا لوکا ئی اوس دی دشمن ہوگئی۔ میں اودوں تیکر جیوندار ہیاتے تیرے نال اپنے والا لال لاواں گا۔“ ورقہ جے سیانے بندے کولوں ایہ گل سن کے میاں بیوی نوں اطمینان ہويا۔ دوویں کچھ چراوتھے بیٹھے رہے۔ فیرورقہ نے حضور دامونہ سرچھیا تے ایہہ واپس پرت آئے۔ رب دا کرنا یہ ہو یا پئی اے کوئی چو کھے دیہاڑے نہیں لنگھسے سن تے اوہ سو جھوان تے مہربان بابا اللہ نوں پیارا ہو گیا۔“

ورقہ بن نوفل دا ایمان:

نبی اکرم a گھرا پڑے تے دین دی تبلیغ شروع کردتی۔ حضرت خدیجہ تے واقعہ سن دیاں سارا ی ایمان لے آئیاں سن۔ بن سوال ایہہ سی پئی ایس روشن آفتاب دیاں کرناں نال سبھ توں پہلاں جھڑے بت پگھلدے نیں اوہ کہڑے دلاں دے اندر ٹھکانا کیتی بیٹھے نیں۔ ایہ گل اک قدرتی امر اے پئی جھڑا بندادو جے بندے توں جٹا نیڑے ہوندا اے، اونا ای اوس بندے دے اندر تے باہر توں جانوں ہوندا اے۔ انج تے مکے دا بچا بچا سوہنے مصطفیٰ دے اخلاق تے کردار توں واقف سی، سگوں جے ایوں آکھے تے زیادہ صحیح اے پئی کائنات دا ذرا ذرا، رکھاں دا اک اک پتا، سمندراں دا اک اک قطرا، سمندراں دیاں ڈوگھیا نیاں وچ وسبیا کرن والیاں آبی مخلوقاں، سپیاں دے موہاں وچوں نکلن والے موتی، پہاڑاں دیاں کھڈاں چ ریگن والے کیڑے تے گلشیر دیاں ٹیسیاں نال نکراون والی ہوا دی خنکی سبھ دے سبھ اوہناں عظمتاں تے شانناں دی بلندی دیاں گواہیاں دین لئی بے تاب نیں جہدی گواہی سبھ توں اگدیں حضرت خدیجہ تے فیرورقہ نے دتی سی۔ پر مکے دے ضدی مشرکاں نوں ایہ ڈرسی پئی قریشی جوان محمد a دی ہاں نال ہاں ملان دا مطلب ایہ وے پئی اپنے موہاں وچ ڈوری دے کے لگام اوہدے ہتھ وچ پھڑا دتی جاوے۔ ایس لئی اوہ انکار تے انکار کردے رہے تے ون سونے بہانے بھال دے رہے۔ آکھنا ایہ وے پئی جھڑے لوکی چو کھے نیڑے سن اوہناں دا ایمان وی یار دی سچائی اُتے اونا ای پیڑا سی۔ حضرت خدیجہ زوجہ محترمہ سن۔ حضرت علی جہناں دی عمر اٹھ ورھے سی آغوش نبوت وچ پلے سن۔ زید بن حارث آپ دے آزاد کردہ غلام سن تے ابوبکر جھڑے کہ دوست سن پہلے ای دیہاڑے مسلمان ہو گئے سن۔ راقم ایہ گل مجھن توں قاصر اے کہ مورخین تے سیرت نگاراں نے ایہناں عظیم، قابل احترام تے نیک ہستیاں، تے اولین مسلماناں وچ ورقہ بن نوفل دا ناں کیوں شامل نہیں کیتا۔ کیہ ورقہ بن نوفل اوہ پہلا مسلمان نہیں سی جس نے بغیر کسے ذاتی تعلق توں، تے بغیر حیات مبارکہ اُتے نیڑے دی تے ڈوگھی نظرتوں آپ دی نبوت دا برملا اعتراف کیتا سی؟

ایس توں اڈا اک ایہ گل وی چو کھی ضروری جا پدی اے پئی عورتاں، بچیاں، غلاماں تے آزاد مرداں توں وکھ وی اک ”پہلے مسلمان“ دا ناں لکھنا چاہیدا اے۔ یعنی پہلے جماندرو مسلمان کون سن؟ تے پڑھنہاراں لئی ایہ جواب بھرویں دلچسپی دا سبب بنے گا پئی حضرت عائشہ اوہ پہلی ہستی نیں جہناں نے اک مسلمان دی حیثیت نال دنیا تے پہلا ساہ لیا، کیوں جے ابوبکر صدیق

اودوں مسلمان ہو چکے سن

ایہناں توں اڈ بلال، عمرو بن عتبہ، خالد بن سعد، عثمان غنی، زبیر، عبدالرحمن بن عوف، طلحہ، سعد بن ابی وقاص، ابو عبیدہ، عامر بن عبداللہ، عبدالاسد بن بلال، عثمان بن فطعون، عامر بن فہیرہ، ابو حذیفہ، سائب بن عثمان تے ارقم جیسے بندے نبوت دے مڈھلے دناں وچ مسلمان ہو گئے۔ عورتاں وچ چاچے عباس دے گھر والی ام الفضل، اسماء بنت عمیس، اسماء بنت ابوبکر تے فاطمہ بنت خطاب، (عمر فاروق دی بھین) نے اسلام قبول کیتا۔
اللہ ایہناں روحاں نوں ہمیش دی سلامتی نصیب کرے۔



کچھ سیرت نگاراں دا خیال اے کہ جناب عائشہ بعثت نبوی توں پہلے پیدا ہو چکیاں سن تے اوہناں دی عمر اودوں ۵/۶ سال سی۔

دعوت دی بسم اللہ

پہلی وحی اترن توں بعد آپ چوکھا ویلا کے توں باہر غاراں وچ گزار دے سن۔ اوتھے اللہ اللہ کر دے، رب دی ربوبیت اُتے سوچ وچا کر دے تے اپنے خالق تے مالک دے حضور سجدہ ریز رہندے۔ حضرت علی بن ابی طالب اودوں اٹھ نوورھیاں دے بال سن تے حضور دی آغوش تربیت وچ سن۔ اوہ وی آپ دے نال نال رہندے سن۔ اک واری جناب ابوطالب نے اپنے پتر تے بھیتے نوں اک غار وچ لک کے نماز پڑھدیاں ویکھیا تے پچھیا ”بچو! ایہ کیہ دین اے، کجھ مینوں وی دسو“ جواب ملیا ”ایہ ساڈے وڈے ابراہیم g دادین اے۔ اسیں دوں سنت ابراہیمی دے موجب اللہ دی عبادت کرنے آں۔“ جناب ابوطالب حضرت علی نوں آکھن لگے ”علی! توں ابن عم دی روش اتے ویں۔ مینوں یقین اے تائے دا پتر تینوں چنگی مت ای دیوے گا۔“

ایس توں بعد ہولی ہولی لوکاں نوں پتا لگدا گیا پئی محمد بن عبد اللہ وی، جہوں انج تیکر کسے بت یاں دیوتا دی پوجا کر دیاں نہیں سی ویکھیا گیا، غاراں وچ لک لک کے ان ڈٹھے خدا نوں پوجدا اے۔ جدوں تیکر لوکی آپ نوں صرف صابی (دین توں بنا) باور کر دے سن کسے وڈے نے آپ نوں کسے لات منات یاں عزی دی پوجا دی دعوت نہ دتی پر جدوں ایس گل دا پتا لگ گیا پئی محمد جبرہ اپنے اچے اخلاق، نکھی طبیعت تے امانت داری پاروں اگے ای سارے کسے وچ مشہور سی، اوہ کسے معبود دا وی پرستار اے تے لوکی اوہناں نوں اپنے دیوتاواں ول سدن لگ پئے۔ پر ایہ ہستی دنیا تے ایس لئی تے نہیں سی گھلی گئی سگوں ایہ تے اوہناں پتھراں نوں کلمہ پڑھان لئی آیا سی جہناں نوں کٹ چھل کے مکے دے نام نہاد عابداں نے نام نہاد خدا گھرے ہوئے سن۔ ہو یا ایہ پئی اللہ دے نبی a نے آپوں کسے دے مشرکاں نوں دعوت دینا شروع کر دتی تے اوہناں کملیاں نوں لک چھپ کے ایہ گل سمجھاو دی کوشش کیتی پئی ایہ سدھاراہ نہیں جے۔ ایہ گل سب دی کھڈ وچ ہتھ پاؤں توں گھٹ نہیں سی۔ قرآن پاک دیاں سورتاں (اعلیٰ تے غاشیہ) توں ایس گل دے اشارے ملدے نیں پئی چوکھے چراں تک حضور دی جدوجہد دا بظاہر کوئی سٹا سامنے نہ آیا۔ آپ نوں ایس گل دا چوکھا منکھ سی۔ اللہ تعالیٰ حضور دا حوصلا ودھاندے رہے تے اک موقع تے فرمایا:

﴿فَذَكِّرْ إِنْ نَفَعَتِ الذِّكْرَىٰ ۝ سَيَذَكِّرُ مَنْ يَخْشَىٰ ۝﴾ (الاعلیٰ: ۹-۱۰)

”(سو بنیا!) توں سمجھاندا رہو، سمجھاؤن نال ضرور فائدہ اہو وے گا۔ جہڑا رب توں ڈرن والا اے تے اوہ تے ضرور سمجھے گا۔“

ایس آیت دے نزول توں بعد جیس پہلے بندے نے پیغمبر دے دین تے مسلک نوں اعلانیہ قبول کیتا اوہ ابو بکر سن۔ دلوں تے ہو وی رب دے کئی بندے اسلام قبول کر چکے سن پر ترٹھے ہوئے سن۔ ایس صورت حال نوں قرآن پاک انج

پیش کر دالے:

”تہاڑے نال جہوی مت دی گل اے جے کراسیں اوہ من لویئے تے سانوں ساڈی زمین (آبادی) توں
کٹ مار کے باہر وگا دتا جاوے گا۔“ (القصص: ۵۷)

جہناں سچ پچھاتا:

حضرت ابو بکر دی نیک نیتی تے دعا دے نتیجے وچ اوہناں دے والدین تے اولاد وی مسلمان ہو گئی۔ ایس توں بعد
حضرت زبیر بن العوام، حضرت عثمان، عبدالرحمن بن عوف، حضرت سعد بن ابی وقاص تے حضرت طلحہ وی جناب ابو بکر دے
حلقہ اثر پاروں مسلمان ہوئے۔ ایہناں توں وکھ حضرت عثمان بن فطعون، حضرت ابو عبیدہ، ابوسلمہ بن عبدالاسد تے ارقم
بن ابی ارقم وی مسلمان ہو چکے سن۔ فیر لگدے ہتھ ای حضرت بلال، حضرت خباب، حضرت صہیب، حضرت عمار، اوہناں دی
والدہ سمعیہ تے والد یاسر مسلمان ہو گئے پر ابو جہل تے ابولہب ورگے جنگلی درندیاں دیاں اکھاں وچ اکھاں پاؤن دی
جرات تے اسلام دی قبولیت دا باقاعدہ اعلان حضرت ابو بکر توں بعد سبھ توں پہلاں حضرت بلال تے تن چار ہور مجاہداں نے
کیتا۔ مکے دے کافراں نے جدوں بھالیاپی ایس نوں دین دا علمبردار کلا قریشی جوان محمد بن عبداللہ ای نہیں سگوں ایہ اک
انقلابی تحریک بن کے اگے ودھن دا آہر پیا کر دالے تے اوہناں نوں ہول پینے شروع ہو گئے۔ پہلوں تاں چپڈھاں تے
ٹکراں کر دے رہے پر جدوں ویکھیا پئی گل ہتھوں نکلی کھلوتی اے تے فیر مومنوں نوں تکلیفاں تے اذیتاں دین دا اک نہ مکن
والا سلسلہ شروع کر دتا۔

﴿إِنَّ الَّذِينَ فَتَنُوا الْمُؤْمِنِينَ وَالْمُؤْمِنَاتِ﴾ (البروج: ۱۰)

”فیر اوہ مومن مرداں تے مومن عورتاں نوں ستان لگ پئے۔“

برادران عبداللہ یاں برادران یوسف:

اک گل جیس دا ذکر اتھے ضروری جا پدا اے اوہ ایہ وے پئی جدوں قرآن پاک دی سورت الشعراء دی آیت ﴿وَإِذْ

عَشِيرَتُكَ الْأَقْرَبِينَ﴾

(آپ (سبھ توں پہلاں) اپنے نیڑے دے خاندان نوں ڈراؤ) نازل ہوئی تے آپ نے حضرت عبدالمطلب دی
ساری اولاد نوں روٹی داسدا کھلن دا فیصلہ کیتا تاں جے اوہناں نوں حکم ربی موجب اسلام دی دعوت دتی جائے۔ اوہناں
دناں دے حالات موجب کوئی ایڈی چنگی امید نہیں سی، ایس کر کے آپ سوچن لگ پئے بھائیں ابوطالب اک بھلے مانس،
شریف تے نیک بندے نیں پر اوہ اپنی بڑھی عمر تے پرانی روایتیاں اُتے سختی نال کار بند ہون پاورں اپنے وڈکیاں دا دین
چھڈن تے کدے وی نہیں من لگے۔ جناب ابوطالب توں بعد قبیلے دا آکر خان بندہ ابولہب سی جہڑا حضرت ابوطالب
دا بھراتے پیغمبر اسلام دا چاچا وی سی۔ اوہ مکے دا اک مالدار تاجر سی۔ اوس نوں مذہبی و تکریاں نال کوئی ایڈی غرض نہیں سی
سوائے ایس توں پئی وچوں کوئی فائدے دی گل نکل سکے۔ قریشیاں دے دو جے تاجروں کوئی ایس توں وکھ نہیں سن تے اوہ
مذہب دے بس ایسے کوئیڑے سن جنے کو اج دے اوہ جوان نیں جہڑے سوانیاں نال لڑدے ہوئے آکھدے نیں پئی

”اسلام وچ چار زانیاں رکھن دا حکم اے۔“ اوہناں تاجراں نوں مذہب دابس ایہہ ای فائدہ سی پئی چار مہینیاں لئی جنگ و جدل تے لٹ مار بند ہو جاندی سی۔ لوکاں کی موت دھیانے اپنے کاروبار وچ لگ جاندی سی تے عکاظ دا میلہ لگ جاندی سی۔ حضرت محمد a نوں جو ایہ امید نہیں سی پئی چا چاہو طالب مسلمان (اعلانیہ) ہو جان گے ایوں ایہ وی نہیں سی پئی ابی لہب رب دے دین نوں قبول کر لوے گا۔

ابولہب دی سوانی جیلہ اک پڑھی لکھی تے مالدار زانانی سی۔ جیلہ اک ہور گٹرے بندے ابوسفیان دی بھین سی تے ایس گلوں اوہدا خراوی چوکھا ڈاڈھا سی۔ حضرت محمد a تے ابولہب وچکار چاچے بھتیجے توں دکھ دی اک رشتا سی تے اوہ کڑ مچاری داسی۔ ایوں ابولہب تے جیلہ دے دو منڈیاں نوں پیغمبر اسلام نے اپنی آغوشِ محبت (دامادی) وچ لے رکھی سی۔ کڑ منی جیلہ شاعری نوں وی ہتھ ماری سی تے چیدھاں کرن وچ تے اوہدا کوئی جوڑ نہیں سی۔ جدوں پیغمبر اسلام اللہ دا حکم سانندے تے نوں دین ول آؤن دی دعوت دیندے تے اوہ طنز اں بھرے شعراں دے تیر چھڈ دی تے لوکاں نوں بھڑ کاندی۔ عبدالمطلب دے تیجے پتر اک نامی گرامی پہلوان سن۔ کھیڈن ملن دے شوقین سن تے حمزہ دے ناں نال پچھانے جاندے سن۔ حمزہ قول دے پکے تے دل دے سچے سن پرائیاں بریکیاں وچ نہیں سن پیندے۔ حضرت عباس ساہو کار بندے سن تے بس ایہو ای اوہناں دی دنیا سی۔

پیغمبر انقلاب نوں ایس گل دا یقین سی پئی ایہناں وچ کوئی وی بندہ کلامِ خدا نوں سنن لئی راضی نہیں ہونا پر رب دے نترے حکم پاروں دین اسلام دی دعوت دینا ضروری سی۔ آپ سوچدے رہے تے پریشان ہوندے رہے۔ غم اندیشا اپنا ودھ گیا پئی بیمار پے گئے تے بستر تے لے پینا پے گیا۔

اخیر رب دے حکم موجب خنوادے دے ۴۰ جیاں نوں، جہدے وچ دادا عبدالمطلب دے چار پتر وی شامل سن، سد گھلیا۔ روٹی نکر وچ اگل ہتھ آپ دایار، بھرا، پتر تے دل دا جانی علی b سی۔ نوجوان علی نے رڈا پکیا پروہنیاں دے اگے رکھیا۔ ایس میزبان توں وارے جائے۔ آکھن لگے ”لو بزرگو! رب داناں لوو تے روٹی شروع کرو۔“ کنے بختاں والے سن بابے عبدالمطلب دے خنوادے دے جی کہ اوہ ہستی کہ جسدا میزبان رب ہوندا اے، اج اوہ بنو ہاشم دا میزبان سی۔ جہڑا سدرۃ المنتہی تے پروہنا بن دا اے، اج اوہدے پروہنے ابولہب ورگے لوکی سن تے کڈا بد نصیب ہووے گا اوہ بندہ جہدے خلق وچوں اوہ نوالا نگھیا جہوں پیغمبر عالی مقام تے علی المرتضیٰ دے ہتھ لگے سن پر اوس دے اندر دی میل صاف نہ ہو سکی۔

محبوب اللہ دے ایہناں ۴۰ پروہنیاں رج کے روٹی کھادی پرتھوڑی جہی دسن والی روٹی چوکھی ساری ہو کے تے بچ دی رہی۔ فیر آپ نے حضرت علی نوں پانی لیان دا آکھیا۔ جناب علی پانی دا پیالا لیائے تے اوہدے وچ اپنا کوپانی سی پئی اک پروہنا پی لیندا پر ہو یا ایہ پئی تریہ بکھدی گئی تے سارے پروہناں دے پانی پین دے باوجود پیالے وچوں پانی تبکا وی نہ گھٹیا۔ ایہ کجھ ویکھدیاں سارای ابولہب نے کپ پادتی پئی ”(حضرت) محمد نے ساڈے اُتے جادو کر چھڈیا اے“ اوس توں بعد دو جے پروہنے وی اُٹھ کے ٹرپے تے ایوں اوہ ساڈے آقا تے مولا، پیغمبر اسلام و انقلاب دے سوہنے موتہ وچوں نکلے سوہنے اکھراں نال اپنے دلاں دیاں کاکھیاں نوں صاف کرن دا موقع گوا بیٹھے پر فیروہی ایس روٹی دا اپنا اثر ہو یا پئی آؤن

والے دناں وچ ایہناں ۴۰ جیاں وچوں ۳۷ دے قلب تے روحاں اسلام دی روشنی نال منور ہو کے رہے..... تے باقی تنہاں دے اپنے بھاگ۔

اعلانیا دعوت اسلام:

کے دے قریشی اپنے وڈکیاں سنے کوہ صفا دے نال کھلوتے نیں تے ایہناں دے وچوں ایہناں دا اک قرابت دار پہاڑی دی ٹیسی اتے چڑھیا پکار رہیا اے:

”کیہ ٹسیں مینوں سچا جان دے اوکھ جھوٹا؟“

”کدے کوئی جھوٹ تیرے موئے توں سنیا تے نہیں..... آہو پئی اسیں اقرار کرنے آں پئی توں صادق تے امین ایں۔“ سارے لوکاں رل کے آکھیا۔

”ویکھو پئی میں پہاڑی دی ٹیسی اُتے کھلوتا ہاں تے تسیں ایہدے تھلے۔ میں پہاڑ دے دوہاں پاسے ویکھ سکدا ہاں تے تسیں نرا کو پاسے۔ اچھا جے کر میں ایہہ گل آکھاں پئی اک جتھا ہتھیار چک کے تہاڑے ول ٹریا آ وندا اے جہنے کے تے حملا کر دینا اے تے کیہ تسیں من لوو گے؟“

”ساڈے کول نہ من دی وجہ تے کوئی نہیں“ لوکاں آکھیا۔

پہاڑی تے چڑھیا بندانیک وی اے، بھلا مانس وی اے، دیانت دار تے سچا وی اے، امین تے وعدیاں دا پکا وی اے، جھوٹا اوہدے نیڑے وی نہیں لنگھیا تے پہاڑی دے تھلے کھلوتے بندیاں اچے ہنے ہنے ایس گل دی تصدیق وی کردتی ای پر جدوں اوہ آکھدا اے پئی ”فیر من لوو کہ میری نظر ایس جہان تے دی اے تے اگلے جہان تے وی اے۔ اوہ (رب) کلا ای سی تے کلا ای ہے..... اک دن اوہدے حضور اسان سبھناں نے پیش ہونا اے تے اپنے عملاں دا حساب دینا اے۔“ تے اوہ اپنے اوہدے بھراتے پترنوں آکھدے نیں ”لے! ایس گل لئی سانوں سدیا سی؟ وڈی گل کیتی سو..... اسان ہن تیرے آکھن تے اپنے وڈکیاں دی ہر گل نوں پرانہ تے نہیں وگاہ چھڈنا۔“

سوچن تے پرکھن دی گل اے پئی اخیر اللہ دے ایس نیک بندے نے اوہناں نوں کھڑی اجہی گل آکھ دتی سی پئی اوہ اوس نوں من (بالقلب) دے باوجود من (بالسان) لئی تیار نہیں سن..... گل ایہ وے پئی مکے دے لوکی ایڈے سدھے تے بھلے مانس نہیں سن کہ اوہ بڑے آرام نال صدیاں دی بنی چودھراہٹ توں دست بردار ہو جاندا۔ اوہ جان دے سن تے ڈاڈھی چوکی طرحاں جان دے سن پئی محمد a دی ایہہ گل من لین داسدھا سدھا مطلب ایہ وے پئی اپنے منہ وچ لگام دے کے ڈور محمد a دے ہتھ وچ دے دتی جاوے تے ایہ کجھ اوہناں نے ایڈے سوکھے ہتھیں کدوں کرنا سی۔

انسانی تواریخ دے قدیم دور توں محمد a تیکر جے دی نبی آئے اوہناں دا اک ای مشن سی پئی اوہ اک خدا دی خدائی منوان تے اوس دی ہی عبادت کرن دا درس دیندے رہے۔ ہن سوال ایہ وے پئی اپنی جہی گل دی بندیاں نوں کیہ تکلیف سی۔ اخیر گل کیہ اے پئی جتھے کسے اللہ دے بندے نے مالکم من الہ غیورہ دا اعلان کیتا، ساریاں طاغوتی طاقتاں اوہدے پچھے پے گئیاں۔ جے گل اپنی کوای ہے جنی اسیں آج سمجھدے ہاں کہ مسیت وچ بہ کے رب رب کرلوو تے باہر حاکم

وقت نوں ”سبھ اچھا“ دیاں اوازاں دیندے جاؤ تے کہدا سر پھر یا سی پئی اوہ پھڈے وڈھدا جاندا؟ اصل وچ اصل جھگڑا کجھ ہور سی۔

قرآن وچ اک تھاں تے نہیں کئی تھاواں تے ایہ گل آکھی گئی اے پئی کفار تے مشرکین جہناں نال انبیاء دی لڑائی رہی اے، اللہ دی ہستی دے منکر نہیں سن۔ اوہناں نوں پتا سی پئی اللہ ہے وے۔ اوہ زمین آسمان داما لک اے تے خود اوہناں داوی مالک تے خالق اے۔ کائنات دا سارا نظام اوس دے اشارے نال چل رہیا اے۔ اوہ مینہ پانداتے اوہی ہواواں نوں گردش دیندا اے۔ اوہ دے ہتھاں وچ ای سورج، چن تے زمین سبھ کجھ نیں۔

مثال موجب:

”تسین (جواب وچ) آکھ دیو کہ (چنگا ایہ دسو کہ) ایہ زمین، تے جہڑے ایہدے اُتے رہندے نیں، ایہ کس دے نیں، جے تہا نوں کجھ خبر ہے اتے اوہ ضرور ایہی کہن گے کہ اللہ دے نیں (تسین) اوہناں نوں آکھو کہ فیر کاہنوں غور نہیں کردے (تے) تسین ایہ وی آکھو کہ (چنگا ایہ دسو کہ) ایہناں ستاں اسماناں داما لک تے عالیشان عرش داما لک کون اے؟ تے (اوہناں داوی) اوہ ضرور ایہی جواب دین گے کہ ایہ وی (سبھ) اللہ دا اے (اوس ویلے) تسین آکھو کہ فیر تسین (اوہدے کولوں) کیوں نہیں ڈردے؟ تسین (اوہناں نوں ایہ وی آکھو کہ چنگا) اوہ کون اے، جہدے ہتھ وچ ساریاں شیواں دا اختیار اے تے اوہ پناہ دیندا اے تے اوہدے مقابلے وچ کوئی کسے نوں پناہ نہیں دے سکدا۔ جے تہا نوں کجھ خبر ہے تے (تدوی جواب وچ) اوہ ضرور ایہی کہن گے کہ ایہہ سبھ صفتاں وی اللہ دیاں ای نیں۔ تسین (اوس ویلے) آکھو کہ فیر تہا نوں کہڑا خطہ ہور ہیا اے۔“ (المومنون: ۸۴-۸۹)

اک دو جی تھاں تے ارشاد ہے:

﴿وَلَئِنْ سَأَلْتَهُمْ مَنْ خَلَقَهُمْ لَيَقُولُنَّ اللَّهُ فَأَنَّى يُؤْفَكُونَ﴾ (الزحرف: ۸۷)

”جے تسین اوہناں کولوں پچھو کہ اوہناں نوں کس نے پیدا کیتا؟ تے اوہ لوک ایہی آکھن گے کہ اللہ نے فیر اوہ

کہڑے پٹھے پاسے جا رہے نیں۔“

ایہناں قرآنی آیتاں توں پتہ لگدا اے پئی اللہ دے ہون تے فیر خالق تے مالک ہون تے کسے نوں کوئی اختلاف نہیں سی۔ لوکاں وی تے وڈکے وی ایس گل نوں ہمیش ای من دے رہے نیں۔ سوال ایہ وے پئی فیر انبیاء دی لوڑ کیہ سی تے جھگڑا کس گل داسی؟ جواب فیر اوہو ای ہے پئی نبی آکھدے سن جہڑا تہاڈا تے زمین آسمان دا خالق تے مالک اے اوہ تہاڈا رب تے الہ (معبود) وی اے تے اوس کلمے نوں ای رب تے الہ منو۔ اوس توں اڈ کوئی نمرود تے فرعون، کوئی لات تے منات کوئی جہل تے لہب تہاڈا رب تے الہ انہیں تے نہ ای ہوسکدا اے..... بس مکے دے لوکاں سگوں اپے شملیاں والے سرداراں نوں ایہو ای تکلیف سی کہ بس چودھر گئی سو گئی..... اوہ دیکھدے سن پے کہ بلال موڈھے نال موڈھالا کے اوسے صف وچ کھلو جائے گا، جتھے اوس داما لک۔ اوہناں حساب لالیا پئی جہو جہیا مڈھ کجھدا پیا اے کل نوں اوہناں دے کنناں وچ ایہ اواز وی پئی اے:

((لیس لا حد فضل علی احد الا بدین و تقوی ، الناس کلهم بنو آدم من تراب فضل لصربی علی عجمی و لا المصمی علی عربی و لا لا بیض علی الاسود و سود علی ابیض الا بالتقوی)) (المخطبة الوداع)

”کسے نوں کسے اُتے فضیلت نہیں تے جیکرے تے دین تے پرہیزگاری پاروں، سارے لوکی آدم دی اولاد نیں تے آدم مٹی توں بنے سن۔ نہ کسے عربی نوں عجمی تے فضیلت اے تے نہ عجمی نوں عربی اُتے۔ نہ گورے نوں کالے اُتے تے نہ کالے نوں گورے اُتے تے جیکرے تے صرف پرہیزگاری موجب۔“ (المخطبة الوداع)

ہن آپوں سوچو پئی اک اجہی سوسائٹی جہدے وچ حسب نسب، کالے گورے تے عربی عجمی دے فرق مٹا دتے جاون او تھے چودھریاں دی پیڑ جائز معلوم نہیں ہوندی؟..... ہوندی اے..... ضرور ہوندی اے..... ایہ بندیاں اُتے بندیاں دی خدائی دا چکاکا ایڈا بھیڑا اے پئی ایس نوں بچان لئی نام نہاد خدا مرن مران توں گریز نہیں کردے۔ عبداللہ بن ابی نوں حضور قدر دی نظر نال ویکھدے رہے تے اوہدے اُتے احسان اوہدے مران توں بعد وی کیتا پئی اوس دا جنازہ پڑھیا۔ اوس نے ساری عمر جہڑیاں سازشاں کیتیاں، اس دی اک ای وجہ سی تے اوہ وجہ ایہ سی پئی محمد a دے مدینے اپڑن دے دنوں وچ مدینے دے لوکی اوس نوں اپنا بادشاہ من لئی تاج بنائی کھلوتے سن تے بس اوس دی تاجپوشی کرن ای والے سن۔ ہجرت مدینہ اوس دی بادشاہی (بندیاں تے بندیاں دی خدائی) دے رستے وچ روڑا بن گئی۔ بس ایہ ای وجہ سی پئی سکے دے سرداراں نے اپنا پورا ٹل لا کے ساڈے آقا و مولاناں ستایا۔

وچارے مسلمان:

ایہ کہہ اے..... آؤ ساہنے دن والی پہاڑی تے چلے..... دیکھو کچھ منڈے رولا پاندے تے واہی تباہی بکدے پہاڑی اُتے بچے پھر دے نیں۔ ایہناں دے ہتھ وچ اک رسی اے جیڑی اک نوجوان دے گل وچ بچی ہوئی اے۔ منڈے ایس گل توں بے نیاز ایس رسی نوں کھچ کے دوڑے پھر دے نیں کہ رسی اس نوجوان دے گل نوں وڈی آوندی اے تے دھون دے آ لے دوا لیوں خون و گنا شروع ہو گیا اے..... ہن اوس نوجوان نوں کھچ کے اوہ اک پاسے لے گئے نیں۔ اتھے ریت ای ریت اے۔ منڈے اوس نوں اوس ریت اُتے لے پے جان دا حکم دیندے نیں جہدے اُتے پیروی نگار کھوتے اوہ ساڑ سٹے..... جویں دی سڑدی بلدی ریت جسے دے تھلے ہے اوویں دا تپدا پتھر دوترے جنے رل کے چک لیاوندے نیں تے نوجوان دے ننگے سینے دے اُتے رکھ کے تماشا ویکھدے پئے نیں۔ منڈے چچھدے نیں ”دس! باز آئیں گایاں نہیں؟“ جواب ملدا اے ”أحد أحد“ کچھیا جاندا اے ”توں بندے دا پتر بنیں گایاں نہیں؟“ تے حبشی نوجوان جواب دیندا اے۔

أحد أحد

ایہ بد بخت منڈے سکے دے اک سردار امیہ بن خلف دے گماشتے نیں تے مالک جہیدی تربیت دا سامان کر رہیا اے، اوہ میرے رب دے محبوب دا محبوب تے کعبہ دی چھت اُتے چڑھ کے ”اللہ اکبر“ دیاں گواہیاں دین والا اسلام دا نامور مؤذن سیدنا بلال اے۔ اوہ بلال جیہڑا بانگ نہیں دیندا تے دن نہیں چڑھدا تے بے اُمیہ بن خلف دے ظلم پاروں اوہدے

مومنہ توں محمد الرسول اللہ ٹھیک طرحاں نہیں نکلداتے رہندی دنیا تیکر دے موزناں نوں پابند کیتا جاندا اے پئی تسیں وی اوویں ای بولنا جو یں سیدنا بلال بولداسی۔

ایہ اپنے ورگا کوئی کلا تے نو لیکھا مسک نہیں سی سگوس اسلام دی مڈھلی تواریخ ایہو جے بے شمار واقعات نال بچی ہوئی اے۔ جو یں کہ حضرت عمار، اوہناں دے والد یاسر تے والدہ سمیعہ مسلمان ہو گئے تے ابو جہل نے اوہناں نوں بے شمار دکھ دتے۔ اک دن نبی a نے اوہناں نوں ایہ اذیت تے عذاب ہوندیاں ویکھیا تے فرمایا اصبروا یا ال یاسر فان موعدکم الجنة (یاسر دے گھر والیو! صبر کرو۔ تہاڈا مقام جنت اے۔) ابو قلیبہ جہناں دا اصل ناں افسح سی اوہناں دے پیراں نوں رسی بن کے پتھر لی زمین اتے گھسیٹیا جاندا تے اوہ لہولہان ہو جاندا۔ حباب بن ارت دے سردے وال کچھے جاندا، گردن مروڑی جاندی تے گرم پتھراں تے انگاریاں تے لٹایا جاندا۔ یعیہ، زبیرہ، نہدیہ تے ام عیسیٰ چاریاں لونڈیاں سن۔ مسلمان ہو جان تے اوہناں دے مالکاں نے اوہناں نال دل ہلا دین والا سلوک کیتا۔ عثمان بن عفان نے اسلام قبول کیتا تے اوہناں دے چاچے نے ایہہ کمینگی دکھائی پئی اوہناں نوں کھجور دی صف وچ لپیٹ کے اچی تھاں تے بندھ دتا تے تھلے دھواں دینا شروع کردتا۔ حضرت مصعب بن عمیر نوں اوہناں دی ماں نے گھروں ای کڈھ دتا۔

گل بیتھے ای نہیں مکدی سگوس ویلے دی چرخی نوں کچھ ہور پٹھا چلائیے تے پتا لگدا اے کہ مکے دے اپے شملیاں وائے متکبر تے آکڑھاں سرداراں دی جھوٹی انا تے جاہلیت توں اوہ سوہنی ہستی دی نہ بچ سکے جس دی جتی دی دھوڑ وی میں زمر دتے الماس نال تول کے لے لوں۔ ہر پرکھ تے پچھان نوں پچھانہ سٹ کے عرش دے پروہنے دی میزبانی ایہناں تھوڑ متاں نے ایوں کمیتی پئی اج چوداں سوورھیاں بعد وی بے کدھرے اوہ لوکی مینوں ٹکر جان تے میں اوہناں جیوندیاں دے کیلجے کڈ کے جین توں باز نہ آواں، بھادویں رب مینوں ایس جرم وچ دوزخاں دی ڈونگھیاں دے وس پادوے۔

بالو ریت تتی تتی پیٹھ کنڈاں ، گرم گرم پتھر اپر چھاتیاں دے
اوہدے عشق وچ عاشقاں صادقان نے ساڑ لے جُتے کخواب ورگے

آؤ اک واری فیر تواریخ دے ور قے تھلئے:

نبی آخری الزماں a خانہ کعبہ وچ نماز پڑھ رہے نیں۔ ایہ جیہڑا العنتی جے بوتھے والا بندہ تھ وچ چادر پھڑکے آپ a ول ودھ رہیا اے، ایہ عقبہ بن ابی معیط اے۔ ہن ایہ تھ وچ پھٹری چادر نوں وٹ پیا دیندا اے۔ ایسے چروچ آپ a سجدے وچ ٹر گئے نیں۔ ایہ جہنمی وٹ دتی چادر نوں حضور a دی گردن مبارک وچ پادیندا اے۔ ہن دوہاں ہتھاں نال کالھی کالھی وٹ دے رہیا اے تے لوہن آپ دی گردن مبارک پوری طرحاں گھٹی گئی اے پر صدقے جاییے ایس عابد دے پئی اوہ اپنے معبوداگے پورے اطمینان نال سرسٹی بیٹھا اے۔ مخلوق دا خالق اگے تے نیاز مند دا بے نیاز اگے اچھا سجدہ اسماناں نے ایس توں پہلوں ویکھیا تے نہ ایس توں پچھے۔ جے ابو بکر صدیق او تھے نہ اپڑ دے تاں خورے عقبہ کنا چروٹ دتی رکھدا۔

اک واری انج وی ہو یا پئی نبی a خانہ کعبہ وچ نماز پڑھ رہے سن تے قریش وی کعبہ دے ویڑھے وچ جا بیٹھے۔ ابو جہل آکھن لگا پئی اج شہر دے اوس تھاں تے اوٹھ ذبح ہو یا اے۔ او جھڑی او تھے ای پئی اے، کوئی جاوے تے چک لیاوے تے لیا کے ایس (نبی a) اُتے سٹ دیوے۔ شقی عقبہ اٹھیا تے گند دی بھری او جھڑی چک لیا یا۔ جدوں آپ a سجدے وچ پے گئے تے او جھڑی پشت مبارک تے رکھ دتی۔ اک بندا جدوں اپنے آقا دے حضور پیش ہوندا اے، بندے نے سر آقا دے پیراں وچ سٹیا ہوندا اے یاں جد ہوں محبوب تے محبت کٹھے ہوندے نیں اودوں او جھڑی دے بھاردی کیہ خبر ہندی اے؟ پر او ہناں جاہلاں نوں ایڈی گل وی سمجھ نہ آئی تے ہس ہس کے دہرے ہوندے جان پئی لوا ایس نوں ایناں وی پتا نہیں لگا۔ ابن مسعود وی اوس ویلے کعبے وچ موجود سن پر او ہناں نوں ٹکریلین دا حوصلہ نہ پیا۔ ایسے چرو وچ او تھے معصوم فاطمہ آگئیاں۔ اوناں او جھڑی پرانے وگائی تے نالے او ہناں بے غیرتاں نال دوگلاں وی چنگیاں کیتیاں۔

قریش ولوں ایہ ظلم و جبر تے دل ساڑن والیاں گلاں دی انھیری ہر نوں سورج چڑھن نال تیرا ہی ہوندی گئی پر مسلماناں نوں اپنے دین توں برگشتہ کرن دا کوئی وی حربا کامیاب نہ ہو سکیا سکوں دین دی راہ وچ ایہ سزاواں پیراں نوں پیڑھا کرن دا ای سبب بنیاں۔

رسالت دا ایہ دور کی تواریخ دا بڑا ای حیرت بھریا دور اے پئی جناب محمد a تے او ہناں دے سنگی ساتھی دنیا دی ہر نعمت، مال منصب، خوبصورت سوانیاں حتیٰ کہ بادشاہت وی پیراں دی ٹھوکر نال پچھانے ہٹا دیندے نیں۔ او ہناں دیاں نظراں وچ کوئی شے نہیں سی چدی، سوائے ایمان توں۔ بڑی نویلکی گل ایہ ہے پئی سکے دے جھڑے لوکی ایہ جبر تے زیادتیاں کر دے سن، ایمان تے وفا دے پتلے او ہناں دی عاقبت لئی وی پریشان رہندے سن تے او ہناں نوں جہنم دی آگ توں بچان دے جتن کر دے رہندے سن۔ سوہنے نبی a دی اپنی حالت ایسی پئی نماز پڑھدیاں گل وچ کپڑا پایا جاوے، پشت مبارک تے گندگی سٹی جاوے، گھرا تے سنگ باری کیتی جاوے، چاچی ام جمیل (ابولہب دی بیوی) گھرا گے نجاست تے کنڈے سٹ دیوے، راہ ٹردیاں محمد a دی تھاں تے مذم (نعوذ باللہ) دیاں واجاں لائیاں جاوے یاں اذیت دین دا کوئی ہور ڈھنگ طریقہ اپنایا جاوے، ایس سوہنے دی زبان توں بس ایہ دعا ای نکلی اے کہ یا اللہ! ایہناں نوں ہدایت دے..... انج کیوں نہ ہوندا؟ رب آکھدا اے پئی سوہنیا! تینوں تے رحمت اللعالمین بنا کے بھیجیلے، توں اپنا کم کردا رہو۔ ایہناں نوں جہنم دے عذاب توں بچان دے جتن کردار ہو..... پر ایہ گل وی کوئی راز نہیں کہ مالک دا اپنا رویہ محبوب نوں دکھ دین والے لوکاں نال کجھ ہور اے۔ جدوں ابولہب کوہ صفا والی دعوت توں بعد پتھر پتھر وچ پھڑکے آکھدا اے

تَبَا لَكَ سَائِرُ يَوْمِئِذٍ هَذَا جَوْشَنُ كَبَرُ توں سدا بر باد رہو ایس کم لئی توں سانوں اتھے اکٹھا کیتا سی (تے نبی a تے صرف دکھی تے حیران ہوندے نیں پر رب لمنا ادھار نہیں کردا تے آکھدا اے ”ابولہب! تیرے ہتھ ٹٹ گئے تے ٹٹ گیا توں آپ وی“ (سورہ لہب) ایویں اوہنوں بربادی دی خبر دین وچ دیر نہیں لائی۔

گل اتھے ای نہیں سی مک گئی پئی اسلامی تواریخ دے مڈھلے دور دے مسلماناں نوں رنگ رنگ دیاں اذیتاں دیتاں گئیاں سگوں پیغمبر خدا دی اپنی حیاتی وی کنڈیاں دی تیج بن کے رہ گئی۔ اک دھاڑے انج وی ہو یا پئی آپ a حضرت

خدیجہ دے نال گھر وچ بیٹھے گل بات کر رہے سن تے آپ دیاں دوویں دھیاں ہتھیاں وچ تھوڑا بہت سامان پھڑکے آپ دے گھرا پڑ گئیاں۔ پاک تے معصوم دھیاں نوں آپ نے پچھیا پئی کیہ گل ہوئی؟ تے دھیاں نے جواب دتا پئی ”بابلا! سانوں طلاق ہوگئی۔“

”پر کیوں؟“ حضرت خدیجہ نے پچھیا۔

دھیاں نے دسیا پئی اوہناں دے خاوندان نے پیو ابولہب تے ماں جمیلہ دے آکھن تے اوہناں نوں طلاق دے چھڈی اے۔ اوہ لوکی آکھدے نیں پئی ابولہب دے پترال لئی ایگل واجب نہیں پئی اوہناں دیاں سوانیاں محمد جے بندے دیاں دھیاں ہون، کیوں جے محمد تے (نعوذ باللہ) لوکائی دی نفرت تے مذمت دا شکار اے تے اچھے بندے نال تعلق رکھنا مکے وچ چوکی گھاٹ دی گل اے۔

حضرت خدیجہ ایڈے وڈے حادثے پاروں بہت دکھی تے پریشان ہوئیاں پر اللہ دا محبوب پیاریاں دھیاں تے گھر والی نوں کمال حوصلے نال، تسلی تے صبر دا درس دیندا رہیا۔

پیغمبر خدا وی اک باپ سی۔ دو بے مایاں واگوں، دو دھیاں دا گھرا جڑیا ویکھ کے کلیجے نوں رگھ تے ضرر پیا ہو یا سی پر قیامت تک جمن والیاں دھیاں نوں امن، سلامتی تے سکھ چین دے بھڑولے بھر کے دین لئی اپنیاں دھیاں دے اجڑیاں گھراں اُتے چپ دے جند رے لالینا ضروری جاپیا۔

مکے دے مشرکاں ولوں توہین آمیز بولیاں، راہواں وچ کنڈے، عبادت کردیاں جسم پاک اتے گندیاں او جھڑیاں دا سٹننا، گل وچ چادر پا کے تے اوہدا کوکلا بنا کے ساہ گھٹ دینا، یاراں، بھناں متراں دی روز دی بے عزتی تے تکلیف، دھیاں نوں طلاق تے برادری ولوں کلیاں چھڈ دین جہیاں زیادتیاں وی میرے آقا و مولا دے پیراں نوں ڈمگانہ سکیاں۔ ایس صورت حال اُتے رومانیہ دا سابق وزیر خارجہ کونٹنن جو ریو لکھدا اے:

”حضرت محمد اک با استنقامت تے چوکھے کپے پیڑھے ارادے دے مالک سن۔ جدوں اوہناں نوں ایہ یقین

ہو گیا سی پئی اوہناں سچ لکھ لیا اے تے فیر کوئی دو جا اوہناں نوں ڈرا دھمکا کے حتیٰ کہ قتل لئی وار کر کے وی

اوہناں دے ایمان نوں متزلزل نہیں سی کر سکدا۔“

جوں جوں رب دے دشمنان نوں ایس گل دا پک ہوندا جاندا سی پئی کوئی خوف طمع لاچ اتے ڈرا و محمد a تے اثر

نہیں کر رہیا، اوہناں دی دشمنی تے انتقام وچ وادھا ہوندا جاندا سی۔ ابو جہل تے ابولہب، ولید بن مغیرہ، اُمیہ بن خلف، عاص بن وائل، عقبہ بن ابی معیط تے عاص بن ہاشم ورگے بندے بد بخت دشمنان دے اگل ہتھ سن۔ ابو جہل تے دشمنی وچ سبھے حد اں ای پار کر گیا۔

پہلی شہید عورت:

ابو جہل دی اک کنیز دانا سمعیہ سی۔ جویں پچھے ذکر ہو یا اے سمعیہ مسلمان ہو گئی تے ابو جہل نے سد کے حکم دتا پئی

فوری طور تے نویں دین نوں چھڈ دے۔

”میں تے ایوں نہیں کرسکدی۔“ سمعیہ جواب دتا۔

ابوجہل نے کوڑے مارنے شروع کر دتے۔ حضرت ابوبکر نوں ایس گل داپتا لگاتے اوہناں ہمیش وانگ ابوجہل کولوں کنیز خریدن دی پیش کش کیتی۔ جناب ابوبکر نے مل ڈھیر ودھایا پر ابوجہل کنیز نوں وچکن تے تیار نہ ہویا تے سمعیہ بی بی اتے تشدد کردار ہیا۔ جدوں کوئی وس نہ چلیا تے اوہناں نوں خانہ کعبہ دے سامنے کھلا ر دتا۔ جدوں سکے دے لوکی کٹھے ہو گئے تے بی بی نوں پچھیا پئی دس محمد (a) دے دین نوں چھڈنا ای کہ نہیں؟

”نہیں، نہیں“ سمعیہ نے جواب دتا۔

ابوجہل نے اہل مکہ دیاں اکھاں دے سامنے اپنا نیزہ ایڈی قوت نال سمیہ دے سینے وچ کھوپیا پئی نیزے داسرا اس وچاری دی کنڈ توں باہر نکل آیا۔ ایوں حضرت سمیہ اسلام دی راہ وچ شہید ہون والی پہلی عورت دا اعزاز حاصل کر گئیاں۔

سمیہ بی بی! تینوں لکھ لکھ سلام۔ خدیجہ تے عائشہ نے تے اچے نبی دیاں بیویاں ہون دے ’جرم‘ دی سزا بھگتنی اے پر رب دے محبوب اتے قربان ہون دے صلے وچ تیرے ول جنت دیاں باریاں اوہناں توں اگدیں کھل گئیاں..... نبی تے قربان ہون والی سمیہ اسیں تیرے لیکھاں تے قربان۔ تیری قسمت توں واری، اے راہ خدا دی پہلی شہید! تیری عظمت نوں سلام، اے سمیہ بی بی۔

مسلماناں نوں دکھ تے اذیت دین دا پری پلانڈ تے شیڈ ولڈ کم پورے زوراں تے سی۔ حضرات علی، زید بن حارث، ابو بکر، عمر بن خطاب، عبداللہ بن مسعود، مسعود بن انصاری، سلیط، خنیس، خالد بن سعید، حاطب ابو حذیفہ، واقد، چارے سکے بھرا خالد، عامر، عاقل تے عباس، عمار بن یاسر تے فیر صہیب بن سنان ورگے کرماں والے لوکی ایمان لیا چکے سن تے اعلانیہ دعوت دا کم چھوہ دتا گیا سی۔ جدوں قریش نے ایہ ویکھیا پئی محمد a اوہناں دے نام نہاد خداواں دی تکذیب توں باز نہیں آوندے تے ایہناں دے کچھ اوکھے تے متکبر سردار جویں کہ عتبہ، شیبہ، ابوسفیان بن حرب، عاص بن ہاشم، ابوجہل، ولید بن مغیرہ تے عاص بن وائل جناب ابوطالب کول پیجے تے آکھن لگے ”سردار! یاں تے اپنے بھتیجے نوں ڈک لے پئی اوہ ساڈے بتاں نوں مندا چنگا نہ بولے تے نالے ساڈے وڈکیاں نوں جاہل تے گمراہ نہ آکھے یاں سانوں کھل دے دے پئی اسیں آپوں بیڑ لیجے تے فیر تسیں وچ نہیں آؤنا۔“

جناب ابوطالب نے کمال دانشمندی نال اوہناں دی تسلی کیتی تے ایہ چودھرا ٹھہ کے پرت آئی۔ رب دے نبی نے اپنا کم ہور شتابی نال شروع کیتا تے قریش دی دشمنی دی اگ وی ایسے حساب نال پیرو پیرو دھدی گئی۔ ایہتوں تیکر پئی سکے دی ایہ چودھر تے سردار اک واری فیر جناب ابوطالب کول پیجے۔ اکھے: ”توں اک شریف تے بزرگ بندا ایں تے تینوں عزت دار وی جان دے ہاں۔ اسان تینوں آکھیا سی پئی توں اپنے بھتیجے نوں آکھ پئی بندا بنے۔ نہ توں ڈکیا تے نہ ای اوہ آپو ولچا۔ واللہ ساتھوں جرنہیں ہونا پئی اوہ ساڈے بتاں نوں گونگے بولے تے ساڈے وڈکیاں نوں جاہل تے گنوار آکھے۔ یاں تے ایہدا کوئی اُپاء کر لوؤ نہیں تے اسیں دس دوپے پئی دوہاں دھراں وچوں اک مرے ای مرے۔“ (یعنی یاں اسیں ہے نہیں یاں اوہ ہے نہیں) جناب ابوطالب نوں قوم دی ایہ دشمنی تے وکھیرا چوکھا بھیڑا لگا۔ ایسے پاروں نہ تے اوہ حضور تے

اعلانیہ ایمان لیا سکے تے نہ ای آپ a دی مدد توں ہتھ چکیا۔ جناب ابوطالب نے ایہ وگڑ دی صورت حال دیکھی تے حضور نوں آکھیا پئی تیری قوم نے تیرے خلاف شکایتاں دے ڈھیر لادتے نیں۔ جویں جاننا ایں مینوں کسے اچھے سیاپے تے دکھاں وچ نہ پاویں جہدی میرے وچ سکت نہیں۔ راوی آکھدا اے پئی حضور نے خیال کیتا پئی ہن چاچے ہوری مدد توں ہتھ کھچ رہے نیں۔ آپ a آکھن لگے:

”چاچا جی! رب دی سونہ جے کراہیہ لوکی میرے بچے ہتھ اتے سورج تے کھبے ہتھ اتے چن وی لیا رکھن تے فیروی میں اس کم توں باز نہیں آؤنا۔ ایہ توں تیکر پئی اللہ ایس نوں توڑ چاڑھ دیوے یاں مینوں کسے پاسے لا دیوے۔“

ایہ گل کر دیاں حضور دیاں اکھاں وچ اتھرو آ گئے۔ شفیق تے ہمدرد چاچے کولوں ایہ نہ جریا گیا۔ بھتیجے نوں آکھیا ”میرے نیڑے ہو..... بد جا..... ویکھ پتر! میں تے سمھناں دی بھلیائی دی گل کہتی سی۔ جے توں پریشان ایں تے جا جودل کردا ای کردار ہو۔ میں تیرے نال ہاں تے ایہناں نال وی نہڑ لوں گا۔“

مشترکاں دی چلاکی:

وگڑے سرداراں نوں جدوں ایس گل داپتا لگیا تے اوہ ولید بن مغیرہ دے پتر عمارہ نوں نال لے کے اک وار فیر جناب ابوطالب کول اپڑے تے آکھن لگے ”وکیہ سردارا! ایہ کڈا سوہناتے جوان گھرواے۔ انج کرتوں ایس نوں اپنا پتر بنا لے تے محمد (a) نوں ایہدے بدلے وچ ساڈے حوالے کردے۔“

”سیانے تے بڑے جے تئیں۔“ جناب ابوطالب نے آکھیا۔

”کیہ مطلب؟ اسیں تیرا گھر پورا نہیں کردے؟“

”یہو پار تے چنگا اے بئی۔ میں اپنا پتر تہا نوں دے دیواں پئی تئیں اوس نوں قتل کر کے بدلے لے لوؤ تے ایہدے بدلے میں تہاڈے منڈے دی سانجھ تے پرورش کردار ہواں۔ واہ بھئی سیانیو! واہ“

مطعم بن عدی بولیا ”ابوطالب! اسیں تے انصاف ای کیتا سی پرگدا اے پئی توں قوم دی کوئی گل دی منن اتے راضی نہیں۔“ حضرت ابوطالب نے جواب دتا ”عدی بن نوفل دیا فرزند! جے انصاف ایسے دا ای ناں اے تے فیر توں اپنا ٹل لالے تے جو ہوندا اے کری آ۔“

بس ایوں دیاں عداوتاں تے دشمنیاں دے وچکار ای رب دا محبوب، رب دے دین دے کھلا رٹی دن راتیں جٹیا رہیا تے اخیر ایسے سورج دی روشنی نال لہندا تے چڑھدارو شن تے مٹور ہو کے رہے۔

اللہ سانوں اپنے محبوب دے دے کھائے راہواں تے ٹرن دی توفیق دیوے (آمین)



ابولہب تے ابو جہل دیاں التاں

نبوت دا چوتھا سال سی جدوں مکے دے مشرکاں نے ایہ پروگرام بنانے شروع کیتے پئی محمد دا ٹکا کے پچھا کیتا جاوے۔ ہر طرحاں دے دکھ، اذیت تے پریشانی نوں اجہیاں انتاں تیکر اپڑایا جاوے پئی نویں مسلماناں دے حوصلے ٹٹ جان تے ایوں ایہ نوں دین اپنی موت آپ مر جاوے۔ ویکھدیاں ای ویکھدیاں اوہناں اوہ ات چکی پئی خدائے واحداناں لین والا مکے دا کوئی جی وی اوہناں تھوڑ متاں تے اجڈاں دے ظلم و ستم توں نہ بچ سکیا۔ امیہ، ابو جہل، ابولہب، عتبہ، شیبہ، ولید بن عتبہ اک دو جا عتبہ (جہڑ ابی معیط دا پترسی)، ورگے غنڈے تے بد معاش مسلماناں دا حوصلا توڑن لئی اپنا ٹل لائی آوندے سن تے اوہناں نے ایس کم نوں Full time job دے طور تے لیا سی۔

بچا ایہ متھیا گیا سی پئی جہڑے محمد a دے دین نوں سچا من کھلوتے نیں اوہ اپنے اصل دین ول مڑ آون تے محمد a نوں ایوں تہا جھڈ دین پئی ابوطالب تے ابوبکر ورگے بندے وی ساڈے نال کوئی سودے بازی کرن تے مجبور ہو جان۔ مکے دے ایہ اجڈ سردار غصے تے نفرت دے جذبے پاروں پاگل ہوئے کھلوتے سن تے ایس پاگل پنے وچ ایہ اوہ اوہ حرکتاں کر جانداں سن جہڑیاں الٹ اوہناں نوں ای نقصان اپڑاندیاں سن۔ جویں کہ حج تے مکے دے مشہور میلیاں ٹھیلیاں تے جدوں پیغمبر اعظم تبلیغ کردے تے پچھے پچھے ابولہب تے ابو جہل ورگے بندے آکھدے پھر دے سن پئی ”لوکو! ایہ نہ تے نبی جے تے نہ ای ایہدا دین کوئی سچا دین جے۔“ اوہناں دی ایس کھپ نال چوکھے لوکی متوجہ ہوندے تے فیر جدوں اوہ اپنے وطن، دیہاں نوں واپس جاندے تے او تھے مکے وچ اک نبی دے پیدا ہو جان دا ذکر کردے۔ اوہناں تھواواں تے بحث مباحثے شروع ہوندے تے فیر اوہناں علاقیاں دے سیانے بندے حساب لا کے دسدے پئی زمانا تے حالات تے اخیر نبی والے بے کھلوتے نیں۔

اُچے شملیاں والے:

ہن خیر نال چاچے ہوراں (ابولہب) دی سربراہی وچ مکے دے ۲۵ اُچے شملیاں والیاں دی اک کمیٹی بنی تے صلاح مشورے شروع ہو گئے تے آکھن لگے پئی دو جے تھواواں توں آون والی لوکاں نوں آکھاں گے پئی کسے چکر وچ نہ آیا جے۔ اک سردار آکھن لگا کہ لوکاں نوں دسو پئی ”محمد (a) کاہن اے“ ولید بن مغیرہ (جہڑ اوہناں بد معاشاں وچوں سبھ توں خراٹ بڈھاسی) بولیا:

”میں ہتھیرے کاہن ویکھے نیں۔ کتھے اوہناں دیاں تگ بندیاں تے کتھے محمد دا کلام۔ نہ نہ سانوں اجہی کوئی گل نہیں آکھنی چاہیدی جہدے توں لوکی آکھن پئی ایہ جھوٹھ وی بولدے نیں۔“

”اسیں آکھاں گے ایہ پاگل (نعوذ باللہ) اے“ اک بولیا۔ ولید آکھن لگا ”ویارو! اوں نوں پاگل پنے نال کیہ نسبت؟“

”اچھا اسیں آ کھاں گے ایہہ شاعر اے۔“ دو جے صلاح دتی۔

ولید آ کھیا ”سانوں وی، تے لوکائی نوں وی ڈاڈھی خبر اے پئی شعر کیہ ہوندا اے۔ کہڑی ونڈا اے جہڑی سانوں نہیں آوندی۔ محمد (a) دے کلام دا شعر نال کوئی جوڑ بن دا اے بھلا؟“

”اچھا فیر اسیں آ کھاں گے پئی ایہہ جادوگر (نعوذ باللہ) اے۔“ تیجا بولیا۔

ولید آ کھیا ”جہڑی طہارت، نفاست تے سیانف نال محمد (a) رہندا اے اوہ جادوگراں وچ کتھے لہدی اے۔ جادوگراں دیاں منحوس شکلاں تے نجس عادتیاں تے وکھریاں ای دسدیاں نیں۔“

ہن سارے رل کے بڈھے ولید بن مغیرہ نوں آ کھن لگے پئی چا چا! توں ای فیر کوئی مت دے۔ ولید آ کھن لگا پئی سجنو! سچ تے ایہ ہے پئی ایہدے کلام وچ وکھری مٹھاس اے۔ تے ایہدیاں گلاں دل دی ڈونگھیاں تیکر اپڑ دیاں نیں۔ ہن آ کھن نوں تے ایہو ای رہ گیا اے ”پئی لوکو! بچو۔ ایس دیاں گلاں سن کے پتر بیونوں، غلام آقا نوں، بھرا بھرا نوں تے خاندن بیویاں نوں چھڈی آوندے نیں۔“

اخیر کے دی اوس اعلیٰ اختیار اتی کمیٹی نے ولید بن مغیرہ دی مشاورت تے ابولہب دی سربراہی وچ ایہ قرار داد پاس کیتی:

”محمد (a) نوں ہر طرحاں اذیت دتی جاوے۔ گل گل تے اوہ مذاق اڈایا جاوے، جھيڈاں بکھیریاں نال

اوس نوں رسوا کیتا جاوے تے اوس دے منن والیاں نوں انتاں دے دکھاں تے مصیبتاں وچ پادتا جاوے۔“

مکے دے سرداراں دا ایہ ظلم جبراک اچھے بندے اُتے سی جہدا اپنا نہ تے کوئی مقصد تے پروگرام سی، تے نہ ای اپنے کوئی فائدے۔ اوہ تے بس اک اجہی ذمے واری نبھار ہیاسی جہدے توں پہاڑاں وی پلا بچایا سی۔ جہدا سنیہا اوہ لوکائی تیکر اپڑاں لئی ہر دکھ تے تکلیف ہس کے سہ رہیاسی، نہ تے اوہ لستاتے ماڑا سی تے نہ ہی اوس نوں ابولہب تے ابو جہل ورگے بندیان نوں سدھ کرن لئی کوئی ڈانگاں دی لوڑ سی۔ اوہ چاہندا تے ”کن“ دے اک اکھرنال لہندے چڑھدے نوں توحید دے نور نال روشن تے منور کر دیندا پر اوہ ابن آدم نوں سوچ تے پرکھ توں کم لین، تے مرضی دے آپشن دا ہر موقع دینا چاہندا سی۔

دو جے پاسے عالم دا پروردگار اپنے محبوب دی ہر ویلے حفاظت تے نگہبانی لئی تیار رہندا سی۔ اوہ چاہندا تے اپنے محبوب، تے اپنے محبوب دیاں محبوباں نال زیادتی کرن والیاں دے ہتھ توڑ دیندا، اوہناں دے جساماں وچ کیڑے پے جانڈے، اوہناں دیاں جیہاں سک جانڈیاں تے اوہناں دے پیر اوہناں دے جیساں توں ایویں وکھرے ہو جانڈے پئی جنور اوہناں نوں لتاڑ دے پھر دے۔ پر رب سوہنے نے اوہ طریقہ اپنایا پئی جادو ٹوٹے کیہ، معجزیاں دے دا بے توں وی کم نہیں لیا۔ ہاں جدوں گل حدوں ودھن لگدی سی تے رب وکھالی دیندا سی۔ اک واری انج وی ہو یا پئی جناب ابوطالب کول پرھے اکٹھی ہوئی۔ گل بات توں ویلے ہوئے تے انبیاء دا سردار اٹھ کے ٹرن لگا تے ابو جہل بن ہشام آ کھن لگا پئی قریشیو! محمد (a) ساڈی ہر گل منن توں انکاری اے تے ایس نے ایہ وطیر اپنا لیا اے پئی ساڈے بتاں تے مکتا چینی کرے،

ساڑے وڈکیاں نوں مندا چنگا آکھے، سانوں تھوڑے سمجھے تے ساڑے معبوداں نوں آکھے پئی ایہ کے گل جو گئے نہیں۔ لو میں ہن کل سجدے وچ ای پتھر مار کے ایہدے والا کم کر چھڈ نا اے۔

اگلے دیہاڑے جدوں نبی اکرم a نماز لئی تشریف لے گئے تے عادت پاروں حجر اسود تے رکن یمانی دے وچکار کھلو گئے تاں جے بیت اللہ تے بیت المقدس دوہاں ول رخ ہووے۔ جدوں آپ سجدے وچ تشریف لے گئے تے ابو جہل، نال کھلوتاں جوٹھاں اگے سچا ہون لئی پتھر لے کے آپ a ول ودھیا۔ جدوں آپ دے نیڑے اپڑیا تے پچھانہ نوں دوڑ کھلوتا۔ بوتھے دارنگ فق سی تے چوکھا ترٹھا ہو یا سی۔ نال دیاں پچھیا ”ابو الحکم کیہ ہو یا“ تے آکھن لگا پئی اوہدے نال اک موٹے سر، دھون تے تیز دندان والا اک اجپیا اوٹھ سی پئی جے میں تھوڑا ہور اگانہ ودھدا تے اوہ مینوں کھا ای جاندا۔ ابن اسحاق آکھدے نیں پئی مینوں کسے دسیا اے پئی رسول اللہ نے فرمایا اوہ جبرائیل سن۔ جے ابو جہل نیڑے ہوندا تے اوہ اوس نوں پھڑ لیندے۔

ابو جہل نال اک واری ایوں وی ہوئی پئی ارش دی تھاں توں اک بندہ اپنے اوٹھ کے لیا یا۔ ابو جہل نے اوہ اوٹھ خرید لے پرل دین لگا ٹال مٹول کردار ہیا۔ اوہ ارشی خانہ کعبہ وچ قریشیاں دی محفل وچ آیا تے آکھن لگا پئی قریش دے رئیسو! ایہ دسویں مینوں میرا حق کون دوائے گا؟ میں پردیسی تے مسافر آں پر تہاڈا اک سنگی، ہشام داپتر میری رقم، اوٹھاں داخل دین لئی تیار نہیں۔

اوتھے بیٹے متکبر سرداراں نے بڑی آکڑ وکھائی تے نبی اکرم a ول طنز بھریا اشارا کر کے آکھن لگے ”لے بھئی تیرا حق اوہ بندہ دواسکدا اے“۔ اوہناں نے طنز تے مذاق کیتا پر اوہ ارشی اٹھ کے آپ کول آ بیٹھا تے آکھن لگا پئی بندے ایہ گل آکھدے نیں۔ آپ فرمان لگے پئی ارش دیا وسنیکا! ایوں تے ایوں ای سہی۔ چل ابو جہل ول اپنا حق لین چلیے۔ پڑھنہاراں نوں ایہ گل چیتے رہوے پئی اوس دور وچ ایہ جوڑ بظاہر باز تے مو لے داسی پر نبی اکرم a نے آراشی نوں نال لیا تے ابو جہل دے گھر دی کنڈی جا کھڑکائی۔

”کون؟“ آواز آئی۔

”میں آں محمد (a)۔ ذرا باہر تشریف لیاؤ۔“

”ابن ہشام! تسیں اس شخص نوں جان دے دے او؟“ ابو جہل دے باہر آؤن تے آپ نے پچھیا۔

”ہاں جان داہاں۔ ایہ ارشی اے تے میں ایہدے توں اوٹھل نے سن۔“ ابو جہل نے آکھیا۔

”تے فیرتساں مل تار دتا اے۔؟“ حضور نے سوال کیتا۔

”نہیں اے تے نہیں۔“ اوس جواب دتا۔

”ایہ پردیسی اے تے کئے توں واپس مڑنا چاہندا اے۔ ایس دا حق اس نوں ہنے ای دے دیو۔“ آپ a

نے فرمایا۔

ابو جہل بغیر کسے بحث مباحثے توں گھر دے اندر گیا تے رقم آراشی نوں لیا دتی۔ آراشی نے ایہ گل اوسے مجلس وچ

جاسنائی تے فیر آراش نوں پرت گیا۔ تھوڑے چر بعد جدوں ابو جہل اوتھے اڑیا تے لوکاں پچھیا ”بئی ابن ہشام! کیہ بنی؟“ تے ابو جہل جواب دتا پئی اوہ کجھ تر یہ (خوفزدادہ) گیا سی۔

ابو جہل نال کیہ بنی، ایس گل دی ابو جہل نوں سمجھ لگی تے نہ ای اوہدے حواریاں نوں پر محمد دے عاشقاں لئی ایہ گل سمجھنا اوس دن اوکھی سی تے نہ اج۔

مشترکاں دی فکر تے معجزیاں دی منگ:

کے دے مشترکاں نے جدوں ایہ دیکھیا پئی محمد a ہر طرحاں دے لالچ، دباء تے ڈرتوں بے نیاز ہو کے اللہ دے نعرے بلند کرن توں باز نہیں آرہے تے اوہناں ابو جہل، ابولہب تے ابوسفیان جے اگل ہتھ بندیاں نوں آکھیا بئی بزرگو! کجھ فکر کرو۔ لوکی تے سانوں چھڈ چھڈ کے محمد a ول ٹرے جان دے نیں۔ جے کراہی حال رہیا تے ایس نویں دین ول اکٹھے ہو جان والے بندے سانوں لے دے جان گے۔ ایس مسئلے داخل اوہناں نام نہاد سوجھواناں نے ایہ لہیا پئی کے دیاں چوکی رونق والیاں تھاواں تے شعر پڑھن والے بندے کھلا ردتے جہڑے اپنی چرب زبانی تے شاعری نال کے دے لوکاں نوں نبی اکرم a تے نویں دین توں متنفر کر دے تے لوکاں نوں اوہناں توں دور رکھن دے جتن کر دے۔ نبوت دی تکذیب کرن والے اوہناں بندیاں وچ ابوسفیان بن حارث، عمرو بن العاص تے عبد اللہ بن زبیری ورگے سرکڈھویاں شاعراں نے اسلام دشمنی وچ چوکھا بھرواں کردار ادا کیتا۔ جدوں فیروی ایہ دیکھیا پئی رب داکوئی نہ کوئی جی روز دیہاڑی اسلام قبولی آؤندا اے تے وچوں کجھ بندے اپنے ولوں سیانف دا مظاہرہ کر دے ہوئے پیغمبر آخر کول حاضر ہوئے تے آکھن لگے:

”بئی گل ایہ ہے، ایس عیسیٰ تے موسیٰ دے معجزیاں دیاں ڈھیر گلاں سنیاں ہوئیاں نیں۔ جے تسیں وی اوہناں وانگ نبی جے تے تسیں وی سانوں معجزے دکھاؤ تاں جے ایس پک کر لوئیے تے تہاڈے نال آ رلئے۔ اوہ آکھن لگے:

- ۱۔ صفاتے مروہ دیاں دوویں پہاڑیاں سونے دیاں کر دیو۔
- ۲۔ آسمان توں لکھی لکھائی وچی ساڈے ساہمنے نازل ہووے۔
- ۳۔ جبرائیل نام دے جس فرشتے نال گل بات کرن داتسیں دعوا کر دے او، اوہ سانوں وی دکھا دیو تے گلاں ساڈے ساہمنے کرو۔

- ۴۔ ساڈے کسے مر گئے بندے نوں جیوندا کر کے دکھا دیو۔
- ۵۔ ایہ پہاڑ جہڑے مکے نوں چونہ پاسیوں گھیر کے بیٹھے نیں ایہناں نوں کدھرے دور دگا دیوتاں جے مکے دے لوکی کھلی ہوا وچ ساہ لے سکے۔

- ۶۔ آب زم زم توں ودھ کے مٹھے تے وافر پانی دے چشمے مکے دے چار پھیرے کڈھ دکھاؤ۔
- ۷۔ اپنے رب کولوں سانوں منڈیاں دا بھاء پتا پچھ دیا کرو تاں جے تجارت وچ فیدا ہووے۔

احمد مجتبیٰ نوں اپنے رب دے سمج تے بصیر ہون دا پورا یقین سی۔ رب نے جدوں اپنے محبوب اگے مشرکاں دی ایہ ضد دیکھی تے فرمایا:

﴿قُلْ لَا أَمْلِكُ لِنَفْسِي نَفْعًا وَلَا ضَرًّا إِلَّا مَا شَاءَ اللَّهُ وَلَوْ كُنْتُ أَعْلَمُ الْغَيْبِ لَا سْتَكْثَرْتُ مِنَ الْخَيْرِ وَمَا مَسَّنِيَ السُّوءُ إِنْ أَنَا إِلَّا نَذِيرٌ وَبَشِيرٌ لِّقَوْمٍ يُؤْمِنُونَ ۝﴾ (الاعراف: ۱۸۸)
ترجمہ: ”(اے پیغمبر) ایہناں نوں آکھو کہ جدتیکر اللہ نہ چاہوے میں اپنے وی کسے نفع نقصان تے قادر نہیں۔ جے مینوں غائب تے ایذا ای اختیار ہونداتے میں اپنے لئی چنگیائی دے ڈھیر لالیداتے کوئی دکھ تکلیف اپنے نیڑے نہ آؤن دیندا (پرایہ کجھ میں نہیں کرسکدا) میں ایمان والیاں نوں گھالے توں ڈراؤن والا تے چنگی گل دی خبر دین والا ہاں۔“

مٹھیاں گلاں والی سرکار a:

مشرک شاعراں ولوں جھڑی واہی تواہی بکی جاندی سی اس دا کجھ جواب مومن زبان دان بندیاں ولوں دے دتا جاندا سی پر کوئی پروگرام بنا کے یاں کسے پالیسی دے تحت نہیں، کیوں جے نبی اکرم a نوں ذاتی طور تے ایس گل نال ایڈی دلچسپی کوئی نہیں سی۔ قریش ولوں معجزیاں دی منگ دا جواب رب نے آپوں دے دتا تے کافراں نوں ایہ احساس وی دواپائی جے کرمعجزیاں نوں ای دیکھ کے مسلمان ہونا جے تے فیروکھ لوؤ بی ایس وچ محمد a دا کوئی نفع نقصان نہیں جے۔
جتنے تیکر اکھراں دی جادوگری دا تعلق سی، ایہ گل ساری دنیا مٹی کھلوتی اے بی ایس فن دا سبھ توں وڈا شاہکار خود قرآن اے۔ جھڑی تاثیر، جھڑا ڈھنگ تے جیہڑی مٹھاس رب دے کلام وچ اے، ویلا اوس نوں کسے ہوردیاں گلاں وچ اج تیکر نہیں لہسکلیا۔ نجاشی جے سیانے بادشاہ تے عمر بن خطاب جے آکڑ خاں بندیاں وی جدوں قرآن سنیا تے بس اوسے دے ای ہو کے رے گئے۔ اللہ نے قرآن دے حامل اپنے بندے a نوں وی پاکیزا، مٹھی تے من وچ کھب جان والی گفتار دتی سی۔ کردار دی پاکیزگی دے نال نال ایس گفتار نے وی اوہ اثر دکھائے نئی صدیاں توں لڑلڑ مر دے قبیلے، عربی تے عجمی، کالے تے چٹے، چھوٹے تے وڈے دی تمیز توں بنا اک مک ہو گئے۔ ایس گل تے سبھ سو جھواناں دا (بھاریں اوہ دنیا دے جھڑے وی خطے یاں جھڑے وی مذہب نال تعلق رکھدے نیں) اتفاق اے بی اخیر نبی نوں اچھا سوکھاتے عام فہم اسلوب عطا کیتا گیا سی جھڑا کسے دوسرے نوں نہیں ملیا۔ عربی زبان آپ a دے گھر دی لوٹدی سی۔ آپ دی زبان مبارک توں نکلیا ہر ہر اکھر معنیاں دا خزانہ، ہر ہر کلمہ حقیقت بھریا، ہر ہر قول حکمت تے دانائی دا سرچشما تے ہر ہر گل گڑوا نگ مٹھی ہوندی سی۔ بناوٹ تے رولے (وضاحت طلب گل) توں پاک گفتگو والیوں دا اسلوب (ڈھنگ) دنیا دے کسے ہور معلم یاں راہنما دے حصے وچ نہیں آیا۔ اک دن اک صحابی نے عرض کیتی یا رسول اللہ! تہاڈے توں ودھ کے زبان تے عبور رکھن والا کوئی جی نہیں دیکھیا تے آپ نے فرمایا: ”ایس وچ شک دی کیہ اے؟“ قرآن تے میری اپنی زبان وچ اتاریا گیا اے۔ آپ a خود فرماندے ہوندے سن بی میں قریش وچ پیدا ہوئیا تے بنو سعد وچ وڈھا ہوئیا۔ فیرمینوں چنگی گل

بات کرنی تے آپے آؤنی سی۔ آپ a دی زبان وچ عرب دے ہر قبیلے یاں گروہ نوں اس دے لہجے وچ مخاطب کرن دی صلاحیت موجود سی۔ بند اخطان دا ہوندا یاں عدنان دا، جنوبی جزیرے دا یاں شمالی حجاز دا، تہامہ دا ہوندا یاں نجد دا، آپ a اچھے دل موہ لین والے طریقے نال گل بات کر دے بنی اوہ آپ نوں اپنا ای سمجھن لگ پیندا تے ایس گل دا اعتراف کر کے اٹھدا بنی آپ a ایس فن دے امام نیں۔

حضرت عائشہ توں روایت اے بنی آپ کدے دی کالھی کالھی (تیز) گفتگو نہیں سن کر دے۔ آپ رُک رُک کے صاف تے نتری ہوئی گل بات کر دے سن۔ ایٹھوں تیکر بنی جے کوئی بند اکھراں دی گنتی کرنا چاہوے تے بنا شک کر لوے۔ حضرت ابو بکر صدیق b حسب نسب دے لحاظ نال قریش وچ چوکھے اچھے بندے گئے جاندے سن، اوہ دی حضور a دی زبان دانی تے حیران رہ جاندے سن۔ اک دن عرض کیتی۔ ”یا رسول اللہ! میں عرب دیاں گلیاں بازاراں وچ پھریا ہاں، وڈے وڈے زبان دان لوکاں دیاں گلاں سن چکیاں ہاں پر جویں دی گفتگو تیں کر دے اوایوں دی کدھرے نہیں سنی۔ ایہ ادبی شان کویں تے کئے پیدا کیتی؟ ایہ معجز بیانی تہانوں کئے سکھائی اے؟ تے حضور a نے جواب دتا ”میرے پروردگار نے مینوں سوئی گل بات کرن دا ڈھنگ سکھایا اے۔“

جاہظ جہرا عربی زبان وچ چوکھا ای اُچار درجا رکھدا اے، حضور a دے من موہنے کلام دا نقشایوں کھچدا اے: ”خدا نے آپ a دے کلام وچ پیار محبت دی چاشنی بھری ہوئی سی تے اوس نوں قبولیت دا شرف عطا کیتا سی۔ آپ دے کلام وچ مٹھاس، دل موہ لین والا ڈھنگ تے ستھرائی (مشغلی) اکٹھے ہوندے لہجہ دے سن۔ کوئی گل جنی وی واری کر دے بھادیں گل سنن والا سمجھ گیا ہوندا، اس نوں اوہ باوقار تے پی تلی ای لگدی۔ کسے کلمے وچ کدی لغزش نہیں سی ہوندی۔ آپ a دی فصاحت دانہ تے کوئی دشمن مقابلہ کر سکیتا تے نہ ای کسے وعظ کرن والے نوں آپ دی برابری دی جرأت ہوئی۔ آپ لے لے لے نھلیاں نوں بڑے ای موزوں تے جئے جے کلام وچ بیان کر دیندے سن۔ آپ نے کسے گل وچ سچائی تے اصلیت نوں کدے ہتھوں نہ جان دتا۔ آپ a دے کلام وچ جویں دی راست بازی، انصاف پسندی، نفع رسانی، وزن تے وقار دا پہلو غالب ہوندا سی اوہ کسے ہور دے کلام وچ نہیں سی لہجدا اے۔“

کیہ بے درداں دے سنگ یاری:

قریش دیاں زیادتیاں جدوں اپنی اخیری حدوی ٹپ گئیاں تے اللہ نے اپنے محبوب راہیں مسلماناں نوں مکہ چھڈ کے کدھرے ہور تھاں ٹر جاوے دے اشارے دینے شروع کر دتے۔ جویں کد ارشاد ہویا:

﴿يَعْبَادِيَ الَّذِينَ آمَنُوا إِنَّ أَرْضِيَّ وَأَسْعَىٰ فَيَأْتِيَنَّكَ فَاغْبُذْ وَلَا تُلْهِمْهُمُ الَّذِينَ كَفَرُوا كَيْدَهُمْ فَزَحْمُوكُمْ عَنْ طَرِيقِهِمْ ذَاتَ أَيْمَانِكُمْ فَكُلُّوا مِمَّا رَزَقَكُمْ اللَّهُ وَلَكِنَّ أَكْثَرَهُمْ لَا يَعْلَمُونَ ۝ وَالَّذِينَ آمَنُوا وَعَمِلُوا الصَّالِحَاتِ لَنُؤْتِيَنَّهُمْ مِنَ الْجَنَّةِ غُرَفًا تَجْرِي مِنْ تَحْتِهَا الْأَنْهَارُ خَالِدِينَ فِيهَا نِعَمَ أَجْرُ الْعَمِلِينَ ۝ الَّذِينَ صَبَرُوا وَعَلَىٰ رَبِّهِمْ يَتَوَكَّلُونَ ۝ وَ

نقوش دی چوٹی جلد وچ چھپے مضمون ”تاجدار دو عالم کی فصاحت و بلاغت“ توں ماخوذ۔

كَآيِنٍ مِّنْ دَاۓِمَةٍ لَّا تَحْمِلُ رِزْقَهَا ۗ اللَّهُ يَرْزُقُهَا وَإِيَّاكُمْ وَهُوَ السَّمِيعُ الْعَلِيمُ ﴿٥﴾

(العنکبوت: ۵۶-۶۰)

”اے میرے بندو! جہڑے ایمان لیائے او میری زمین چوکی وڈی اے۔ بس تسیں میری بندگی کرنا۔ ہر جیوندے نے موت دا ڈانٹا چکھنا اے۔ فیر تسیں ساریاں ساڈے ول ای پرت کے آؤنا اے، تے جہڑے ایمان لیائے تے اوہناں نے نیک عمل کیے اسیں اوہناں نوں جنت دے اچے درجیاں وچ رکھاں گے۔ تھلے نہراں وگدیاں ہون گیاں تے اوہ (نیک بندے) ہمیش اوہتے (جنت وچ) رہن گے۔ نیک عملاں والیاں دا بدلا کیا ای سوہنا اے (اوہناں لئی) جہناں صبر کیتا تے ہر حال وچ اپنے رب تے بھروسا کیتا۔ تے کئے ای جنور نیں جہڑے اپنا رزق نہیں پکی پھر دے۔ اللہ ای اوہناں نوں رزق دیندا اے تے تہاں وی۔ تے اوہ سُن دا وی اے تے جان دا وی اے۔“

صاف پتا لگ رہیا اے نئی رب چاہندا اے جے مکے وچ اوس دی بندگی پاروں اوکڑاں دا ساہمنا اے تے فیر کسے دوجے پاسے نکل جاؤ، اس دی زمین کوئی تنگ تے نہیں۔ جتھے تسیں رب دے تے اٹو سپے رب دے بندے بن کے رہ سکدے او اوس پاسے چلے جاؤ پر چیتے رہوے نئی بندگی اس دی ہی کرنی جے۔ ہدایت ایہ کیتی گئی اے نئی اصل شے قوم، قبیلے، ڈیرے، دیسیاں سرحدیں نہیں سگوں اللہ دی بندگی اے۔ جدوں کسے ویلے قوم قبیلے یا وطن دے تقاضیاں دا اللہ دی بندگی دے تقاضیاں نال جوڑ پے جائے تے فیر اپنیاں اوکڑاں نوں نہ ویکھو تے آزمائش تے پورے اتر کے رب دے نام دی سر بلندی تے اک اللہ دیاں بانگاں دین لئی اوہدی زمین تے کھل جاؤ تے جتھے تیکر اس داسنیہا پڑا سکدے او دل میلا کیتے بنا پڑا کے چھڈو۔

اک دوجی تھان تے وی مالک دا ایہی جہا سنہیا ملیا۔ رب آکھیا:

﴿ قُلْ يٰۤاَعْبَادِ الدِّیْنِ اٰمَنُوْا اَتَقُوْا رَبَّکُمْ لِلَّذِیْنَ اَحْسَنُوْا فِیْ هٰذِهِ الدُّنْیَا حَسَنَةً وَّاَرْضُ اللّٰهِ وَاَسِعَةٌ اِنَّمَا یُوَفّی الصّٰبِرُوْنَ اَجْرَهُمْ بِغَیْرِ حِسَابٍ ۝۱۰﴾ (الزمر: ۱۰)

ترجما: (اے نبی آکھوئی اے بندو! جہڑے ایمان لیائے او، اپنے رب توں ڈرو۔ جہڑے لوکاں ایس دنیا تے چنگا طور طریقا رکھیاں اوہناں لئی بھلیائی اے تے رب دی دھرتی دا بڑا کھلا راءے۔ تے صبر کرن والیاں نوں تے بے حساب (وافر) اجر دتا جاوے گا۔“

پچھے سورہ عنکبوت وچ ایہ گل آکھی گئی اے نئی چیتے رہوے اخیر مرنا اے تے مر کے رب ول جانا اے، اتھتھے سورہ الزمر وچ ایہ بشارت دتی گئی اے نئی نیکی دا بدلہ بھلیائی توں ہٹ کے تے کچھ نہیں تے نالے صبر کرن والے گھاٹے وچ نہیں رہن گے۔ اوہناں نوں نرا اوہناں کو نہیں دتا جاوے گا کہ بس اوہناں دا گھر پورا ہو جاوے سگوں حسابوں بنا، رجھواں تے وادھوں دتا جاوے گا پر رب دے بندو! ایہ گل چیتے رکھنی پوے گی نئی مالک دی بنائی ایہ دھرتی نری مکے تیکر نہیں سگوں ایس توں باہروی ہے۔ طائف جشہ تے یثرب وی ایسے دھرتی اُتے لہدے نیں، نجد تے جدہ وی رب دی زمین اُتے کھلو تے

نیں، مصر، شام، عراق تے ایران وی تہاڈے اڈیکن ہارنیں تے تہاڈے گھوڑیاں دیاں ٹاپاں دی واج سندھ، سگوں سارا ہندوستان وی سنن دا خاہش ونداے۔

رب دلوں ایہناں اشاریاں توں بعد محبوب خداؑ نے اپنے ساتھیاں نوں ایہ ہدایت کیتی، نئی حبشہ ول نکل جاؤ، اوتھے دا بادشاہ کسے تے ظلم نہیں کردا۔ ایوں کچھ مسلماناں لک لکا کے تیاری کیتی تے اک راتیں، جدوں نبوت دا پنجواں سال سی، ۱۱ مرداں تے ۵ عورتاں دا اک جتھا اپنا گھر بار سجن متر تے سنگی ساتھی چھڈ کے زری رب دی رضائی جدے ول ٹر پیا۔ توارق خدس دی اے نئی ایہ اپریل ۶۱۵ء دی گل اے جدوں جدے توں سمندری بیڑے تے بہ کے ایہ جتھا حبشہ ول روانا ہویا۔

اللہ دی راہ تے اوکڑاں نوں ہس ہس کے قبولن والے ایس جتھے وچ جہڑے نیک بخت مسلماناں رلت پائی اوہ ایہ سن:

۱۔ حضرت عثمان ذوالنورین b تے آپ دی گھر والی سیدہ رقیہ c بنت رسول اللہ a۔

۳۔ حضرت عبدالرحمن b بن عوف۔

۴۔ حضرت مصعب b بن عمیر۔

۵۔ حضرت ابو حذیفہ بن عتبہ تے آپ دی گھر والی حضرت سہلا c بنت سہیل۔

۷۔ نبی اکرم a دی چھپی دے پتر حضرت زبیر b بن عوام۔

۸۔ حضرت عثمان بن فطعون ججی۔

۹۔ حضرت ابوسلمہ b بن عبداللہ مخزومی تے آپ دے گھر والی ام سلمہ c بنت ابی اُمیہ (جہناں نوں بعد وچ ام المومنین دا اعزاز حاصل ہویا)۔

۱۱۔ حضرت عامر بن ربیعہ تے آپ دی زوجہ حضرت لیلیٰ c بنت ابی حشمہ۔

۱۳۔ حضرت سہیل b بن بیغاء۔

۱۴۔ حضرت ابوسبرہ b بن ابی رہم تے آپ دی زوجہ ام کلثوم c

تے سولہویں حضرت ابو حاطب b بن عمرو یاں عبداللہ بن مسعود سن۔

ایہناں عظیم الشان بزرگاں دے نام پڑھن توں بعد ایہ گل پورے دھڑلے نال آکھی جاسکدی اے کہ کچھ لوکاں دا ایہ خیال کرنا پئی ہجرت نرے ماڑے لوکاں نے کیتی، غلط اے۔ سگوں اوہ تے ہر درجے دے لوک سن۔ حضرت عثمان بنو امیہ وچوں سن جہڑا سب توں تگڑا تے اقتدار والا خانوادا سی۔ اوہ نبی آخری الزمان حضرت محمدؐ دے داماد وی سن۔ حضور a دی اپنی صاحبزادی توں ہٹ کے زبیر بن عوام تے مصعب بن عمیر آپ a دے اپنے خاندان دے لوک سن۔ عبدالرحمن بن عوف وی کوئی معمولی بندے نہیں سن۔ سچ تے ایہ ہے کہ پردیس دیاں اوکڑاں آئیاں ہی حیثیت والے لوکاں دے حصے وچ نیں۔ جہڑے ماڑے تے لے سن اوہ تے آکھدے سن، ظالمو! تسبیح ظلم کروا سیں سہواں گے۔ تسبیح چڑی لاہنا چاہو اسیں لہوا دیاں گے، تسبیح سینے تے تپدے ہوئے پتھر رکھو اسیں اف وی نہیں کراں گے۔ رب دے محبوب دے ماڑے لے یار تکلیفاں جرن دے عادی ہو گئے سن۔ سیدنا بلال، حضرت عمار تے جناب یاسر نوں پچھ کے دیکھو رب دی راہ تے سٹاں جھلن دا سواد

چوکھائی نو بکلا ہوندا اے۔

حبشہ ول دو جی ہجرت:

مکے دے کافر کجھ مسلماناں دے حبشہ چلے جان تے سڑ دے بلدے، تے کوئی سر بندھ کرن دی تیاری کردے رہے۔ اخیر ایہ افواہ حبشہ اپڑائی گئی بنی قریش بندے دے پتر بن گئے نیں تے ہن اوہ مسلماناں نال رل مل کے امن چین نال حیاتی دے دن گزار رہے نیں۔ ایہہ سن کے ہجرت کرن والے مسلمان پچھانہ مکے پرت آئے، پر ہو یا ایہہ بنی کافراں نے پہلے توں ودھ کے التاں کیتیاں تے مومنناں نوں دکھ تکلیف اپڑان دا کوئی حربا وی باقی نہ چھڈیا۔ ایہو جے حالاں وچ مسلماناں دا مکے رہنا ڈاڈھا اوکھا کم جا پدا سی، ایس لئی ایک وار فیر مکہ چھڈن دا فیصلہ کر لیا گیا۔ حبشہ ول پہلی ہجرت دا تجربا ایہہ گل ثابت کر چکیا سی بنی مسلمان حبشہ وچ امن چین نال رہ سکدے نیں تے اوس تھاں تے عدل انصاف دے والے وجے دے نیں، ایس لئی دو جی واری حبشہ ول ای مہاراں کیتیاں۔ ایوں اسی (۸۰) اصحاب تے اٹھارہ (۱۸) صحابیات یاں بالاں دا اک قافلہ فیر حبشہ اپڑ گیا۔ ہن قریش نوں اک پاسے تے ایس گل دی پیڑاٹھی بنی مسلمان سکھ چین نال دن گزار رہے نیں تے دو جے پاسے اوہ ایس چتنا نال مرن لگ پئے بنی جے کدھرے نجاشی مسلماناں دیاں گلاں وچ آ گیا تے اوہناں دے دین نوں سچا من کھلوتا تے مسلمان اک وڈھی طاقت بن کے صحرائے عرب وچ اپنا آپ منوان وچ کامیاب ہو جان گے۔ ایس لئی اوہناں نے فیصلہ کیتا بنی نجاشی نوں جا کے ایہ گل آکھی جاوے کہ مکے توں بھج کے آؤن والے لوکی کوئی ایڈے چنگے بندے نہیں۔ اوہ مکے دی دھرتی دا تے اپنے وڈکیاں دا صدیاں پرانا دین وی چھڈ آئے نیں تے تہاڈا تے حبشہ دی ساری دھرتی دا دین وی اوہناں نے نہیں قبولنا۔ قریش نوں ایس گل دا پک سی بنی عیسائیت نوں چھڈ کے کسے دو جے دین دے نام لیوا لوک عیسائی بادشاہ نجاشی دی بادشاہت وچ بلکل وی نہیں رہ سکے۔ ایوں اوہناں نے اپنے دوسیاں بندے عبداللہ بن ربیع الخزومی تے عمرو بن العاص (جیتے رہوے بنی کافراں دا ایہہ سفیر کجھ چراں پچھوں مسلمان ہو گیا تے اسلام دا عظیم الشان سپہ سالار بن کے مصر نوں فتح کر کے فاتح مصر اکھوایا) نوں ڈھیر سارے تحفے تحائف دے کے حبشہ ول ورتا تاں جے نجاشی دے کن بھرے جان۔

عبداللہ تے عمرو بن العاص نے حبشہ اپڑ کے نجاشی دے مشیراں وزیراں نال رابطہ کیتا تے مکے دے لوکاں ولوں اوہناں نوں کجھ تحفے وی دتے۔ فیر اوہناں نوں آکھیا بنی کجھ منڈے کھنڈے اک ہاشمی دے آکھے لگ کے اپنا دین چھڈا کے حبشہ دی ولایت وچ آجے نیں، بادشاہ سلامت نوں ایس گل تے راضی کرنا اے بنی اوہناں نوں وطن تے مذہب نوں چھڈ کے دوڑن والے بھگوڑیاں دی تھاں متھیا جاوے تے نالے اوہناں نوں حبشہ چھڈن دا حکم دتا جاوے۔

جعفر طیار نجاشی دے دربار وچ:

ایہ دور کئی وفد جدوں بادشاہ دی خدمت وچ حاضر ہو یا تے آکھن لگے بنی ایہہ بھگوڑے جے کدھرے تہاڈا مذہب

ای قبول کر لیدے تے چلو فیروی کوئی گل سی پرایہ تے کوئی نواں دین کڈھی بیٹھے نیں جہڑا ساڈی سمجھ توں وی باہر اے تے امید اے بنی بادشاہ سلامت وی اوس نوں مجھن توں عاجز رہن گے۔ بھاویں درباری قریشی وفد ول دی گل کردے رہے پر بادشاہ نے ایوں اک طرفا فیصلہ دین توں انکار کردتا تے بنداکھل کے پردیسیاں نوں سد لیا۔

”تہاڈا کیہ مذہب اے بنی؟“ نجاشی پچھیا۔

”اسلام“ مہاجراں نے آکھیا۔

نجاشی عربی زبان توں پوری طرحاں واقف نہیں سی تے اسلام دا اکھر وی اودوں تیکر اپنے معنیوں نوں اج وانگ نہیں سی کھاردا۔ قریشی وفد نے وی کجھ کن بھرے ہوئے سن، ایس لئی جناب نجاشی نے پچھیا:

”اچھا ایہ دسویں عیسیٰ بن مریم بابت تہاڈا کیہ عقیدہ اے؟“

”عیسیٰ خدا دے بندے، اوس دے پیغمبر تے اوس دی روح نیں“ جناب جعفر بن ابوطالب نے جواب دتا۔

”رب دی سونہ اوہ ایہو ای کجھ سن تے ایس توں دکھ کجھ وی نہیں سن“ نجاشی نے آکھیا۔

نجاشی نے جدوں محمد رسول اللہ a دے دین دی وضاحت منگی تے حضرت جعفر بن ابوطالب نے دلیاں بھری تے من موہ لین والی جہڑی تقریر کیتی اوہ دربار نجاشی وچوں نکل کے دنیا دی سفارتی توارخ دا اک کدے نہ مٹن والا باب بن کے توارخ دے ورقیاں تے محفوظ ہو گئی۔ آکھن لگے:

”بادشاہ سلامت! اسیں جاہلیت دے دناں دیاں اوہ نشانیاں ہاں جہناں دا مذہب بتاں دی پوجا تے جہناں دی خوراک مردار جنوراں دا گوشت سی۔ اسیں برائی تے پکے ہو کھلون دے ساں، رشتے نا طے توڑ دیندے ساں، گوانڈھیاں نوں تنگ کردے ساں تے ساڈے وچوں ہرزور اور، ماڑیاں دا حق کھوہ کھانا اپنا و طیرا بنائی کھلوتا سی۔ صدیاں ایوں ای لنگھ گئیاں۔ اخیر اللہ نے ساڈے ای وچوں اک اچھے بندے نوں رحمت بنا کے گھلایا جس دی ذاتی تے خاندانی حیاتی تے کسے نوں بھورا وی شبانہیں۔ اوس نے سانوں اک اچھے معبود دی عبادت دا آکھیا جہڑا کلا اے تے جس دا کوئی شریک نہیں۔ ایوں اسیں اپنے وڈکیاں دی صدیاں دی بت پرستی چھڈ کے واحد پروردگار دی پوجا نوں اپنا و طیرہ بنالیا۔“

”بادشاہ سلامت! نالے ایس رسول نے سانوں سچ بولن دا آکھیا تے اسیں جھوٹھ چھڈ دتا۔ اوس نے سانوں دو جیاں دیاں امانتاں پوریاں موڑن دا آکھیا تے اسیں موڑن لگ پئے۔ اوس نے آکھیا بنی اک دو جے نوں گھٹیا جاننا تے دو جیاں نوں قتل کرنا چنگی گل نہیں تے اسیں ایہناں کماں توں باز آگئے۔ اوس نے آکھیا بنی گند بکنا تے جھوٹھ بولنا بڑے بھیڑے کم نیں تے اسیں توبا کر لئی۔ اوس نے سانوں پاک دامن پیہیاں تے بہتان لاوون توں ڈک دتا تے اسیں اپنیاں چبھیاں تے جندرے لالے۔ اوس نے یتیم دمال کھان توں منع کیتا تے اسیں منع ہو گئے۔ اوس نے سانوں اک خدا دی عبادت، نماز پڑھن، زکوٰۃ دین تے روزے رکھن دا آکھیا تے اسیں آکھیا ”ساڈے سرمتھے“ بادشاہ سلامت! اسیں اوس رسول a دی تصدیق کردے ہاں۔ اوس تے ایمان لیاے ہاں تے اسیں اوس گل نوں من لیدے ہاں جہڑی خدا تعالیٰ ولوں اوہ سانوں دس دا اے۔ ہن اے بادشاہ! ساڈے وطن دے ایہناں بندیاں نوں پچھو بنی ایہناں ساڈے نال کیہ کیتی۔ ساڈے

تے ظلم دے پہاڑ توڑے تے سانوں رنگ رنگ دے دکھ دتے تاں جے اسیں بت پرستی تے بدکاری ول پرت جائے۔ پر نہ تے اسیں اپنے رسول دی تعلیم چھڈی تے نہ ہی ایہہ لوک ظلم کرن توں باز آئے۔ فیر اسیں ہر پاسے جھاتی پائی پر تہاڑے توں ودھ انصاف پسند حکمران ہو رکھ رہے نہیں دسیا۔ بادشاہ سلامت! اسیں امید رکھدے ہاں بئی تہاڑی سلطنت وچ ساڈے تے ظلم نہیں کیتا جاوے گا۔“

حضرت جعفر بن ابوطالب دی تقریر سنن توں بعد نجاشی نے آکھیا بئی تہاڑا رسول a اپنے رب ولوں تہاڑے تیکر جہڑا فرمان اپڑا ندا لے، جے ہو سکے تے اوس وچوں کجھ مینوں وی سناؤ۔ ایہ گل سن کے جناب جعفر نے سورہ مریم دیاں مڈھلیاں آیتاں دی تلاوت چھوہ دتی۔

تلاوت ختم ہوندا یاں ای بادشاہ نے عمرو بن العاص نوں آکھیا پئی ”تسیں ایتھوں پچھانہ پرت جاؤ۔ میں اچھے بندے تہاڑے حوالے نہیں کر سکدا۔“

عبداللہ تے عمرو فیروی باز نہ آئے تے اگلے دیہاڑے عمرو فیرو نجاشی دے دربار وچ پیش ہو کے آکھیا بئی ایہہ مہاجر جناب عیسیٰ بابت کوئی چنگی رائے نہیں رکھدے۔ نجاشی نے حضرت جعفر بن ابوطالب نوں سد کے عمرو دے سامنے گل دا نکھیرا کرن دا آکھیا۔ حضرت جعفر b نے جدوں حضرت عیسیٰ بابت اپنے ایمان دی وضاحت کیتی تے نجاشی نے خش ہوندا یاں اپنے عصا نال زمین تے لکیر کجھی تے آکھن لگے۔ ”اے جعفر b! میرے تے تہاڑے دین وچ اس لکیر توں چوکھا فرق نہیں۔“ بس فیرو عمرو بن العاص مایوس ہو کے مکے پرت گئے تے مسلمان امن چین نال حبشہ وچ زندگی گزارن لگ پئے۔

حبشہ دے عیسائی جتھے دا مسلمان ہونا:

مسلماناں دی حبشہ آمد نے حضرت عیسیٰ دے فرماناں اُتے تصدیق دی مہر لادتی۔ حبشہ دے عیسائیاں نے مسلماناں کولوں حضور دی بعثت تے تعلیم بارے کئی سوال کیتے۔ اوہناں نے مہاجر مسلماناں دے کردار دا چنگا چوکھا مشاہدہ کیتا تے نالے اوہناں دی زبانی مکے دے لئے ماڑے مسلماناں اُتے قریش دے ظلم تے جبر دیاں دل ہلا دین والیاں کہانیاں وی سنیاں۔ سچی نصرانیت تے قائم اوہناں عیسائیاں دے دلاں وچ اوس نبی a نوں دیکھن تے ملن دی خواہش پیدا ہوئی جہذا ذکر حضرت عیسیٰ نے کیتا سی تے ہن اوہ اوہناں دی اڈیک لائی بیٹھن۔ ہونیا ایہی اوہناں ۲۰۱ بندیاں دا اک جتھا نبی آخری الزمان a نوں ملن لئی تے سارے حال حالات اپنیاں اکھاں نال دیکھن لئی مکے ول ٹر پیا۔ مکے اپڑ کے اوہناں سبھناں نے رسول خدا a نوں مل کے تے فیرو اوہناں نال ڈھیر سارے سوال جواب کر کے ایہ تسلی کر لئی کہ خدا دے ایہ رسول پوری طرحاں اوہناں نشانیاں اُتے پورے اثر دے نیں جس دی تعلیم ہن تیکر اوہناں نوں دتی جاندی رہی اے۔ سوالاں دے جواباں توں بعد رسول a موقع محل دے مطابق اوہناں دے سامنے قرآنی آیتاں دی تلاوت وی کردے۔ رب تعالیٰ دے کلام نے تے محمد رسول اللہ دی زبان دی مٹھاس نے اوہناں دے رہے سہے شک شبہاں وی ازالا کردتا۔ اوہناں نیک بندیاں دیاں اکھاں وچ اتھر و آگئے تے فیرو اوہناں نے حق نوں قبولن وچ ذرا وی دیر نہ لائی۔

اوہناں آپ a دی تصدیق کیتی تے ایمان لے آئے۔ فیراوہ لوکی حبشہ پچھانہ پرت گئے تے ایمان دی دولت اپنے نال لے گئے۔

استھے ایگل مجھن وچ کوئی مشکل پیش نہیں آؤندی کہ حبشہ دے ایس عیسائی جتھے دا مسلمان ہو جانار ب ولوں مسلماناں دی حبشہ ول ہجرت دا انعام سی تے اجیا انعام سی جہدا تصور دی مکے دے مشرکاں نے نہیں کیتا ہونا۔ خیال کیتا جاندا اے کہ ایس توں بعد جدوں نبی اکرم a دا خط نجاشی نوں ملیا تے اوہ مسلمان ہو گیا سی۔ حضور a ہمیش ای ایس نیک دل تے عادل حکمران دے حق وچ دعا فرماندے رہے۔

کفار مکہ حبشہ دے عیسائی گروہ دے مسلمان ہو جان نال سر پھڑ کے بہ گئے۔ ابو جہل ورگے لوکاں نے تے اوہناں حق پرست بندیاں نوں بے وقوف تے بے عقل وی آکھیا، اوہ آئے تے سن حقیقت جان لئی تے عقل دا گھانا دیکھو کہ اپنا ایمان گنوا کے پچھانہ پرت رہے نیں۔ پہلی غائبانہ نماز جنازہ:

نجاشی دا اصل ناں اصحمہ سی۔ جدوں رجب ۹ھ وچ اوہ مریتے عین مرن والے دیہاڑے خدا نے اپنے محبوب نوں، تے محبوب خدا نے مدینے دے مسلماناں نوں ایہ خبر دے دتی۔ آپ a نے میدان وچ نکل کے اپنے صحابہ دے نال اس دی غائبانہ نماز جنازہ پڑھی۔ اسلامی تواریخ دی پہلی غائبانہ نماز جنازہ ایہی سی ﷺ ایس نماز جنازہ وچ جہڑے لوکی شریک ہوئے اوہناں وچوں کجھ دے ناں ایہ نیں:

حضرت ابو ہریرہ b حضرت بریدہ b حضرت زید b بن ثابت، حضرت عامر b بن ربیعہ، حضرت ابو قتادہ b حضرت سہیل b بن حنیف تے حضرت عبادہ b بن صامت۔ اک روایت ایہ وی مل دی اے کہ جدوں آپ a نے نجاشی دے فوت ہو جان دی خبر دتی تے بہتیاں نوں ایہ محسوس ہو یا کہ اللہ نے پردے چک دتے نیں۔ اوس ویلے سن ۵ نبوت دا منظر ۱۸ ورھیاں پچھوں اک وار فیرتازہ جاپن لگ پیا۔

بنو عبد المناف نال گل بات:

قریش دا وفد جدوں حبشہ توں ناکام پر تیا تے قریش دا قہر اسلام تے مسلماناں دے خلاف ہو رہی تھی۔ آکھن لگے کہ ایہ چنگا غضب ہو یا کہ نجاشی ورگا بادشاہ وی محمد دا مرید ہو گیا اے۔ ہن اسلام توں خلاصی دا اوہناں نوں بس ایہی رستہ سداسی کہ نعوذ باللہ بنیغیر خدا a نوں ہی قتل کردتا جاوے پر بنو عبد المناف ولوں ایہ ڈرسی کہ اوہ خون دا بدلا لے کے رہن گے۔ بنو عبد المناف دے چار خنوا دے سن:

۱۔ بنو ہاشم۔

۲۔ بنو مطلب۔

۳۔ بنوامیہ۔

۴۔ بنونفل۔

قریش نے چوانہ نال گل بات کہتی تے آکھیا بنی یاں تے محمد a ساڈے حوالے کر دیوتے یاں فیئرٹن لئی تیار ہو جاؤ۔ بنوامیہ تے بنونفل نے تے عام قریشی قبیلیاں دے نال موڈھا لایا پر بنو ہاشم تے بنو مطلب وچوں اک ابوہب توں وکھ ہر بندے نے اعلان کردتا کہ ایہہ فیصلا ہن تلواراں ای کرن گیاں کہ محمد a نوں قتل کیتا جانا اے کہ نہیں۔ ایس صورت حال وچ جاہل سرداراں نے ایہ فیصلا کیتا کہ کسے اک بندے دے ذمے قتل داکم لادتا جاوے۔ عقبہ بن ابی معیط ورگے بد بخت بندے نے ایہ ذمے داری چک لئی تے اک دیہاڑے دا مار کے اپنی چادر رسول خدا a دے گل وچ پاکے وٹ دین لگ پیا۔ اتفاق نال حضرت ابو بکر b او تھے پڑ گئے تے آپ a نوں ارقم بن ابی ارقم دے گھر لے گئے۔ جدوں مسلماناں دا دھیان نبی اکرم a ول ہو گیا تے جناب ابو بکر b توں توجہ ہٹ گئی تے عقبہ دے حمایتی کافراں نے حضرت ابو بکر b نوں مارنا شروع کردتا۔ ایٹھوں تیکر کہ آپ بے ہوش ہو کے ڈگ پئے۔ آپدے خاندان بنو قینم نوں خبر ہوئی تے آپ نوں چک کے آپ دے گھر اپڑایا۔ آپ دی حالت اجہی سی کہ سبھ نوں ایہہ یقین ہو گیا سی کہ ہن آپ دا بچنا ممکن نہیں، پر اللہ نے یار غار، صدیق اکبر b نوں اک نویں حیاتی دتی۔ ہوش آؤندیاں ای آپ نے رسول خدا a دی خیریت کچھی تے فیئر آپ دی ارقم دے گھر اپڑ گئے تے ایس ٹھکانے نوں کافراں توں خفیہ ای رکھیا۔ دارالارقم:

تواریخ دسدی اے کہ اسلام دی فطرت وچ کجھ اجہی لچک اے کہ ایس نوں جنادیا گیا ایہ اوہناں ای ابھر کے ساہمنے آیا اے۔ ایس واقعے توں بعد وی اسلام دی طاقت وچ پیر و پیر وادھا ای ہوئی۔ جہڑے لوکی اسلام دے وڈے ویری سن، اوہناں دے دلاں وچ وی رب نے ایہ شوق پایا کہ اوہ اسلام نوں ٹھن دی چنتا کرن۔ جدوں آپ دارالارقم وچ گئے سن تے اٹھ نوں (۹/۸) بندے ای آپ a دے نال سن۔ دارالارقم وچ جہڑے ۳۰ دن گزرے اوہناں وچ کوئی ۳۰ بندے ہوو مسلمان ہو کے آپ a نال آر لے۔ ایوں دارالارقم دے مسلماناں دی تعداد ۳۸ ہو گئی۔ اک ویلا سی کہ جناب رسول خدا a تے جناب ابو بکر b کسے اچھے نیک بندے دی تاڑ وچ رہندے سن جہدے تے اوہناں دیاں گلاں کوئی اثر کر سکن تے ہن ویلے نے کجھ اجہیا پلٹا کھا دا کہ کلمہ گو صالح مرد اک اک کر کے آپوں ای اک طرحاں دی جیل وچ اپڑن لگ پے جہڑی اصل وچ جیل یاں لک چھپ کے رہن دی تھاں نہیں سی سگوں دنیا، تے آخرت دے بکھیڑیاں تے دکھاں توں آزادی دی گارنٹی سی۔

مردان خدا چپ چپتے دارالارقم اپڑدے رہے تے مسلماناں دی تعداد تے حوصلیاں وچ وادھا کر دے رہے۔ ایہ ۳۰ دن مسلماناں لئی چوکھے مبارک ثابت ہوئے۔ نویں مسلمان ہر ویلے رسول خدا a دے نال رہے تے ایوں دین نوں ٹھن دا موقع مل دارہیا۔ دل ڈرتے خوف توں خالی ہو گئے، دین تے رسول خدا a نال محبت ودھ گئی تے جرات دی ایہ حالت سی کہ اوہ آپ a کولوں باہر جا کے کھلم کھلا دعوت داکم کرن دی اجازت منکن لگ پئے تے اخیر اک دن کوہ صفا

اتے اکٹھے ہو گئے۔

ویلی دی مہار مڑ گئی:

قریش نے وچارے مسلمانان نوں دکھ تے اذیت دین وچ کوئی کسر باقی نہیں سی چھڈی۔ حبشہ وچ اپنی سفارتی ناکامی توں بعد تے چوکھے ای سڑن بلن لگ پئے۔ اوہناں نوں سمجھ نہیں سی پئی آؤندی بئی ہن اوہ کیہ کرن۔ قریش ولوں انھیرے ودھان دا ہر جتن کیتا گیا پر دو جے پاسے دیوے توں دیوا بلدا گیا تے دنیا توں جہالت دے انھیرے گھٹن لگ پئے۔

عمر و بن عبسہ السلمی b دا اسلام قبولنا:

اوہناں دناں وچ اوہ لوکی انگلیاں تے گنے جاسکدے سن جہڑے اک اللہ دی عبادت دے قائل سن تے جہیڑے سمجھدے سن کہ بتاں دی پوجا گمراہی توں سوا کجھ وی نہیں۔ اوہناں بندیاں وچ اک ناں جناب عمرو بن عبسہ السلمی b دا وی اے۔ اوہناں دے علاقے وچ جدوں ایہ خبر پئی کہ مکے وچ کوئی بند اک نواں دین پیش کر رہیا اے تے اوہ ایہ وی آکھدا اے کہ میں اللہ دا رسول ہاں تے اللہ توں وکھ کوئی وی عبادت دے لائق نہیں، تے اوہ آپ a دی زیارت دی خواہش لے کے مکے اپڑ گئے۔ عمرو نوں مکے آکے پتا لگا کہ آپ دی قوم آپ نال کسے پروہنے یاں پردیسی نوں نہیں ملن دیندی فیروی اوہ کسے نہ کسے طرحاں جناب رسول اللہ دی جناب وچ حاضر ہون وچ کامیاب ہو گئے۔ عمرو جناب نبی آخری الزمان تے ایمان لیاے پر آپ a نے اوہناں نوں مکے ٹھہرن دا نہیں آکھیا سگوں ہدایت کیتی کہ اوہ اپنے علاقے ول پرت جان تے چنگے دناں دی اڈیک وچ رہن۔ عمرو آکھدے نیں کہ میں پچھانہ پرت آیا۔ میں ٹوہ وچ رہندا ساں کہ کوئی چنگی خبر ملے، ایسٹھوں تیکر کہ یثرب دے کجھ بندے ساڈے قبیلے ول آئے جہناں نے دسیا کہ آپ مدینے تشریف لے گئے نیں تے لوکی آپ a اتے ایمان لیاؤن لئی بھجوبھی اپڑ رہے نیں۔ میں وی مدینے ٹر پیا تے حضور کول جا بجیا۔ آپ a نے مینوں فوراً پہچان لیا۔ میں ایس موقع تے حضور کولوں نماز تے وضو دے کجھ مسئلے کچھ سن۔

حضرت حمزہ دا قبول اسلام:

ایہ نبوت دے ۶ ویں ورھے دی گل اے بئی اک دن نبی اکرم a صفا دی پہاڑی تے بیٹھے اللہ اللہ کر رہے سن تے ابو جہل وی اوتھے اپڑ گیا۔ اوس نوں پتا سی بئی محمد a کسے وی زیادتی دا جواب نہیں دیندے، ایس لئی اس نے جاندیاں ای پہلوں تے گالھاں بکیاں تے جدوں دیکھیا بئی آپ a نے کسے طرحاں دا کوئی رد عمل ظاہر نہیں کیتا تے اوس نے اک پتھر حضور a دے سر مبارک تے دے ماریا جہدے نال آپ a نوں چوکی تکلیف ہوئی تے لہو وی وگن لگ پیا۔ پر آپ نے اپنی ”عدم تشدد“ تے ”صبر کرو“ دی پالیسی موجب ابو جہل تے ہتھ نہیں چکیا۔ ہو یا ایہ بئی ایس زیادتی دی خبر کسے طرحاں آپ دے چاچے حمزہ b تاں وی اپڑ گئی۔ حمزہ b آپ دے سکے چاچا تے ہے ای سن اوہناں نال اک دو چارشتا بھرا داسی، کیوں جے اوہناں وی آپ a دی رضائی ماں ثویبہ داؤدھ پیتا سی۔ اُنج وی حمزہ نوں نبی اکرم نال بڑا پیار سی۔

حمزہ پہلوانی وی کردے سن تے مکے دے زور اور بندیاں وچ گئے جانے سن۔ اوہناں نے سوچیا ہووے گا بنی ایہ طاقت ہمت تے حوصلہ کس کم دا؟ ابو جہل میرے بھرا، بھتیجے تے یار نال زیادتیاں کری آؤندا اے تے میں چپ کر کے دیکھی آؤنا۔ ایوں اوہ غصے دے بھرے ہوئے ابو جہل نوں لہدے لہدے، کعبہ وچ اپڑ گئے۔ جناب حمزہ نے ابو جہل نوں ویکھدیاں ای اوہدے سروچ ایڈی زور دی کمان ماری بنی اوس نوں پھڑ کر دتا تے نالے آکھن لگے ”لے میں مسلمان ہو گیا اوں، ہمت ہے ای تے ڈک لے مینوں۔“ ابو جہل مونہ ویکھدارہ گیا بنی ایہ اج حمزہ نوں کیہ ہو گیا اے۔

حضرت حمزہ، ابو جہل نوں پھڑ کر کے سدھے جناب رسول اللہ دے کول حاضر ہوئے تے آکھیا ”لے بھتیجیا! میں ابو جہل توں تیرا بدلا لے لیا اے۔“ ایہ سن کے نبی اکرم a نے فرمایا ”چاچا! میں اجہی کسے گل نال خش نہیں ہوندا، ہاں جے تسیں مسلمان ہو جاؤ تے بڑی خوشی ہووے گی“ جناب حمزہ b دے دل وچ رب نے پہلوں ای نرمی پیدا کردتی سی۔ آپ دے ایہ آکھن تے بنی ”بدلے لین نال یاں نہ لین نال مینوں کوئی فرق نہیں پیندا۔ میں تے تاں مناں جے مسلمان ہو کے میرے نال رلو۔ چاچے ہوراں دادل ہو رزم ہو یا تے اوہناں پیراں تے ہی مسلمان ہو گئے۔ ایوں اسلام دی وچاری جہی جماعت وچ اک ٹکڑے بندے دے رلت پاؤن نال آپ بڑے راضی ہوئے۔

عمر فاروق مسلمان ہوندا نہیں:

جناب امیر حمزہ نوں مسلمان ہوئیاں اے تن دن ای ہوئے سن تے اللہ نے اپنے پیارے محبوب دی ایہ دعا قبول کر لئی ”اللهم اعز الاسلام باحد الصديقين“ اللہ دو واں عمراں وچوں اک نال اسلام دی شان ودھا (عمر بن ہشام دی قسمت وچ ایہ دولت نہیں سی پر عمر بن خطاب دے نصیب سوہر گئے۔

عمر بن خطاب دی عمر بن ہشام وانگ قریش دا اک ٹکڑا تھم سن۔ ایمان لیان والیاں نوں تکلیفاں دینا اوہناں دا پکا پیڑھا کم سی۔ سچے کعبے و سوں کیتی بیٹھے قبیلایں ول سفیر بن کے وی جاندا سن۔ قبیلایں وچ کدھرے کوئی رولا پیندا تے اوہناں نوں پرھے پنچاوت وچ چنگی تھاں دتی جاندی۔ چنگے اُچے لے، بہادر تے گھرو جوان سن۔ ایہو جے بندے دا اپنا دھڑا چھڈ کے دو جے پاسے لگ جانا کوئی کی جہی گل نہیں سی۔

اصل وچ گل ایہ ہے بنی ہر دور ہر معاشرے تے ہر علاقے دے اگل ہتھ بندے اپنے آل دوالے دے حال حالات توں جانور ہندے نیں تے ایس گل دی کیڑ رکھدے نیں بنی کدھرے کوئی شے اوہناں دے مفاد دی ویری تے نہیں بن چلی۔ جناب عمر بن خطاب دی وی کجھ اجہی حالت سی۔ تحریک اسلام وچ بھانویں اوہناں دی دلچسپی چنگے ارادے نال نہیں سی فیروں ایہو ای گل اوہناں نوں اسلام دے نیڑے لیاؤن دا سبب بن گئی۔ کدے تے محمد رسول اللہ a نوں تنگ کرن دی غرض نال حرم وچ بیٹھیاں قرآن دی واج سُن لئی تے کدے حبشہ ول ہجرت کرن والی نیڑے دی رشتہ دار حضرت لیلیٰ بنت ابی حشمہ دی ہمت تے حوصلے توں متاثر ہوئے بغیر نہ رہ سکے۔ آپ دے اندر دی ٹٹ بھج تے دو پاسی جہی حالت کجھ چراں توں دس لگ پئی سی۔

اک دیہاڑے ایہ ہو یا بنی من وچ دلیل آئی بنی جس شے نے مینوں پریشان کیتا ہو یا اے کیوں نہ اوہدا مڈھ ای پٹ

دتا جاوے۔ بس فیر تلواری پھڑی تے محمد رسول اللہ a دے قتل دے ارادے نال ٹر پئے۔ ۳۵ ورہیاں دا جوان، بہادر، کوڑی طبیعت تے دھڑلے والا بندہ اکے دیاں گلیاں وچ لوکاں دے تراہ کڈھدا اک اچھے بندے نوں مارن لئی لہندا پھر داسی جھڑا اُس نوں تھاس مرن توں بچاؤن لئی دعاواں منگدا اسی۔ فیر ایوں ہو یا بئی راہ وچ اپنے ای قبیلے دا اک بندہ نعیم بن عبد اللہ مل پیا۔ اکھے:

”عمر! کدھری؟ خیر اے ناں؟“

”محمد نوں قتل کرن جارہیا ہاں۔ کچھ ہٹ جا جتوں۔“ جناب عمر نے آکھیا۔

”تے فیر بنو عبد المناف والے تینوں جیوندا چھڈ دین گے؟ نالے پہلوں اپنے منجے تھلے تے ڈنگوری پھیر لے۔“ جناب نعیم بن عبد اللہ نے جواب دتا۔

”کیوں بئی مینوں کیا اے؟ مینوں کاہدی گھاٹ اے؟“ حضرت عمر نے غصے نال وضاحت منگی۔

”اوہ بھائی! تیری بھین (فاطمہ) تے بھنوجا (سعید) دوویں مسلمان ہو چکے نیں۔“

بس ایہ طعنہ جناب عمر والا ”کم کر گیا“ تے اسلام داکم بن گیا۔ غصے دے بھرے جناب عمر اوسے پیریں حضرت فاطمہ بنت خطاب دے گھروں ٹر پئے۔ اوس ویلے بی بی دے گھر حضرت خباب بن الارت قرآن پاک دادرس دے رہے سن۔ گھر والیاں تیکر اپڑ دے اپڑ دے کناں وچ کلام الہی دی واج پے چکی سی۔ ایس واج نے ہمیش وانگ ہن وی دل تے ڈاڈھا اثر کیتا پر اپنی ضد تے آکڑ پاروں ایس نوں ظاہر نہ ہون دتا۔ جدوں گھر والیاں نوں پتا لگا بئی آؤن والا تے عمر اے تے اوہناں دا ڈردے ماریاں بڑا مندا حال ہویا۔ حضرت خباب لک گئے۔ بھین ہوراں قرآن پاک دے ورق کالے تے جناب سعید سہم کے اک پاسے جا کھلوتے۔ حضرت عمر لال پیلے ہوئے کالھی کالھی پیر پٹدے جناب سعید ول ودھے تے کچھیا بئی ایہ واج کاہدی سی؟ حضرت سعید چپ کر کے کھلوتے رہے، تے ایوں حضرت عمر نوں یقین ہو گیا بئی نعیم نے گل سچی ای کیتی سی۔ عمر بھکھے شیر وانگ جناب سعید نوں پئے گئے تے مار مار کے لہولہان کر چھڈیا۔ حضرت فاطمہ جدوں اپنے خاوند نوں بچان لئی آگے ودھیاں تے حضرت عمر نے اوہناں نوں وی پھڑ کر دتا تے آکھیا کہ مینوں پتا لگ چکیا اے بئی تسیں دوویں مسلمان ہو گئے او۔ بے ایہ عمر سن تے اوہ وی عمر دی بھین سی۔ آکھن لگے ”ٹھیک اے عمر! بے تینوں پتا لگ ای گیا اے تے چل فیر ایوں ای سہی۔ آہو ایس مسلمان ہو گئے ہاں۔ جا، جو ہوندا ای کر لے۔“

رب دے کلام دا اثر، مظلوم سعید دا وگدا لہو تے سکی بھین دا پھڑ ہونیا جتا جناب عمر دے دل تے کوئی اجہی سٹ مار گئے بئی پتھراں توں پیڑھا دل تتی موم وانگ دن لگ پیا۔ دو بے پاسے رحمت اللعالمین دی ایہ دعا وی سی بئی اے اللہ! اک عمر

ایہہ عمر محمد حسین بیگل نے دتی اے۔ کچھ سیرت نگاراں نے اسلام قبولن ویلے دی عمر ۲۵ ورہے لکھی اے۔ جویں کہ Maxime

Rodinson نے اپنی کتاب ’محمد a‘ وچ لکھیا اے: "Umar ibn al Khattab was about 25 years old and a member of a minor Qurayshite clan. He was a man of naturally violent temper -----

مینوں دے دے۔ آکھن لگے ”اچھا ایہ گل اے تے مینوں اوہ کلام دکھاؤ جہڑا ہن تھوڑا چراگدیں تسیں پڑھ رہے سی۔“
بھین آکھیا پئی رب دے کلام لئی تے جسے داپاک ہونا ضروری اے۔ جاؤ نہادھو کے آؤ۔ فیروکھنا۔ نہا کے کلام پڑھنا شروع
کیتا تے جسم کنبن لگ پیا۔ ہر ہر آیت دل دی ڈونگھیا پئی وچ لہندی گئی تے روح دیاں ساریاں غلاظتاں دھپدیاں گئیاں۔

حضرت عمر نے حضرت خباب نوں نال لیا تے سرور کائنات محمد a ول ٹر پئے۔ حضرت خباب نوں پتا سی بئی رسول
اللہ a ایس ویلے بیت الارقم وچ موجود نیں، ایس لئی اوہ سدھے اوتھے اڑ گئے۔ بیت الارقم وچ محفل بھی ہوئی سی۔
دیدار مصطفیٰ نال اکھاں نوں ٹھنڈیاں کرن والے آلے دوالے بیٹھے روح دی تسکین داساماں کر رہے سن تے جناب عمر b
نے جا کے بوہا کھڑکایا۔ اندروں کسے نے جھاتی پائی تے جناب رسول اللہ نوں دسیا بئی باہر عمر اے۔ ایہ سندیاں سارای محفل
تے فکر مندی طاری ہو گئی۔ نبی اکرم a نے حکم دتا ”بوہا کھول دیو۔“ تے ایہ آکھدے ہوئے آگے ودھ گئے۔ ہن عمر اندر
آچکے سن۔ نبی اکرم a نے پچھیا ”ابن الخطاب! کویں آئے او؟“ حضرت عمر نے جہڑا جواب دتا اوں نوں سندیاں ای
جناب رسول اللہ دی زبان پاک توں اچن چیت نعرہ تکبیر بلند ہويا۔ محفل وچوں اللہ اکبر دی گونج اٹھی تے پتا لگا بئی لک نال
تلوار بنھ کے اچے تھوڑا چراگدیں انسانیت دے محسن نوں قتل کرن دے ارادے نال نکلن والا عمر اسلام دشمنی وچ آگے ودھ
ودھ آؤن والے عمر نوں قتل کر کے اک نویں عمر دے روپ وچ آکھلوتا اے۔ اوں عمر دے روپ وچ چھنے آزادی نال اک
اللہ دی عبادت کرن دا مڈھ پنھنسا تے اوں عمر دے روپ وچ چھنے آؤن والے دناں وچ دنیا دے مظلوم تے دکھی انساناں
نوں ویلے دے فرعونان، هاماناں تے قاروناں دی غلامی تے محکومی توں آزادی دوانی سی۔

مسلمان ہون توں بعد حضرت عمر b آپوں ای کے دیاں گئیاں وچ ایہ اعلان کردے رہے بئی لوکو ”عمر مسلمان ہو گیا،
لوکو! عمر مسلمان ہو گیا۔“ اگلے دیہاڑے ابو جہل دے گھر وی گئے تے اوں نوں جا کے دسیا بئی میں مسلمان ہو گیا ہاں۔
ابو جہل نے ایہ خبر سن کے اوہی گل آکھی جیہیں دی اوں کوڑھ متے توں امید کیتی جاسکدی سی۔ آپ نے نبی اکرم a نوں
ایس گل تے راضی کر لیا بئی مسلماناں نوں اک اللہ دی عبادت کرن لئی لکن چھپن دی لوڑ کوئی نہیں۔ ایوں مسلماناں نے کعبہ
وچ باجماعت نماز پڑھنا شروع کر دتی۔

حضرت حمزہ توں بعد حضرت عمر بن خطاب دے مسلمان ہو جان نال اسلام اک نویں دور وچ داخل ہو یا تے مسلمان
جہڑے پہلوں ڈرے سہمے رہندے سن ہن اپنے آپ نوں قریش دے جوڑ دا ٹھہن لگ پئے۔ سکے دے چودھری وی ایہ گل
سمجھ گئے سن بئی ہن اوہناں دا مقابلہ اک لے تے ماڑے جھے ٹولے نال نہیں سگوں جوڑ دے تے ساویں لوکاں نال اے
جہناں وچ روز دیہاڑی واڈھا ہو رہیا اے۔

سوتل بائیکاٹ:

لوکاں کولوں محمد رسول اللہ a دی دشمنی وچ جو کجھ وی ہوسکیا، اوہناں کھل کے کیتا سی۔ اپنے نام نہاد معبوداں دی
عزت تے تکریم دا معیار ایہی سی بئی اک اللہ دے وجود توں پوری قوت نال انکار کیتا جاوے تے جدوں وی محمد a کولوں
لا الہ الا اللہ دی واج سنو، اوں واج نوں دبان لئی پورا ٹل لا دیو۔ اوہناں دا آپ a نوں دھمکیاں دینا، آپ a دے

گھر بار تے خاندان نوں تھلے لان دے جتن کرنا، اسلام نوں نفرت دیاں نظراں نال ویکھنا، آپ a دی تعلیم تے ہسناتے ٹھٹھا کرنا، آپ a دے منن والیاں نوں خوار کرنا، شاعراں نوں طنز کرن تے لاچھڑ ناتے آپ a دے سجن متراں نوں گلاں کرنا سبھ ایسے سلسلے دیاں کڑیاں سن۔ پر جدوں ویکھیا بئی کوئی واروی ٹھکانے تے نہیں لگداتے ایہ رشوت دین دی کوشش کیتی بئی آکھو تے تہانوں بادشاہ من لویئے تے جے آکھو تے عرب دی سوہنی توں سوہنی سوانی تہاڈی خدمت لئی پیش کریئے۔ اوہ کملے خورے ایہ گل مجھن لئی کیوں تیار نہیں سن ہوندے بئی جھڑی اوہناں نوں مت دتی جارہی اے ایہ اوہناں دی اپنی بھلیائی لئی اے۔

جدوں بد بخت قریش دی کوئی چال وی توڑ نہ چڑھی تے سماجی بائیکاٹ کر کے جناب رسول اللہ نوں پریشان کرن دا منصوبہ بنایا تاں جے اوہناں دے ساتھی ہتھ جوڑ کے کھلو جان تے آکھن لگ پین بئی اسیں اس دین توں باز آئے۔ ایس لئی قبیلیاں نے اک معاہدا کیتا بئی جے بنو ہاشم محمد نوں ساڈے حوالے نہیں کردے تے اوہناں نال ہر طرحاں داتعلق مکا دیو۔ ایہ معاہدہ منصور ابن عکرمہ نے لکھیا تے مکے دے قبیلیاں دے رئیسوں نے اوہدے تے دستخط کیتے تے کعبہ دے بوہے نال لکھا دتا۔ ایس معاہدے وچ بنو ہاشم دا اک ہی بندہ شریک ہو یا تے اوہ ابولہب سی۔ معاہدے دیاں وڈیاں وڈیاں شقاق ایہ سن:

- ۱۔ جدوں تیکر بنو ہاشم محمد a نوں ساڈے حوالے نہیں کردے اوہناں نال کوئی تعلق نہ رکھیا جاوے۔
- ۲۔ اوہناں نال رشتے ناطے تے ویاہ شادی بالکل نہ کیتی جاوے۔
- ۳۔ اوہناں نال خرید و فروخت تے لین دین بند کر دتا جاوے۔
- ۴۔ اوہناں تیکر کھان پین دی کوئی شے نہ اپڑن دتی جاوے۔
- ۵۔ اوہناں نوں مکے دیاں گلیاں بازاراں وچ پھرن ٹرن توں ڈک دتا جاوے۔

ایوں محرم ۷ نبوی چ سرکار دو عالم تے آپ a دا قبیلہ اپنا گھر بار چھڈ کے پہاڑ دی گھاٹی وچ، جہوں شعب ابو طالب کہندے سن، قید ہو گئے۔ پروگرام موجب قریش نے کھان پین دی کوئی شے اوہناں تیکر نہ اپڑن دتی۔ اخیر حال ایہ ہو گیا پچی بچے بھکھ نال ایوں روندے رہے بئی اوہناں دے رون دی آواز گھاٹی توں باہر وی سنی جاندی سی۔ تن ورھے دکھاں دے ایسے سمندر وچ غوطے کھاندیاں لگھ گئے۔ حج دے دنوں وچ جدوں مکے دے کافر دشمن نال لڑنا حرام سمجھدے سن، نبی اکرم a گھاٹی توں باہر آ جاندے تے لوکاں نوں اللہ تے ایمان لیاؤن دا آکھدے تے دسدے بئی اللہ اک ہے۔ اوہدے توں وکھ ہوو کوئی معبود نہیں تے اسیں ساریاں اک دن اوہدے ساہمنے پیش ہو کے ماڑے چنگے دا حساب دینا اے۔ بھیڑے بختاں والا ابولہب، جھڑا بنو ہاشم وچوں کلا ای آزاد بنداسی، سارا سارا دن آپ a دے پچھے پچھے پھر دا رہندے لوکاں نوں آکھدا بئی دھیان کریا جے ایہ دیوانہ جے، ایس دے آکھ نہ لگ بیٹھنا، نہیں تے کسے پاسے جو گے نہ رہو وگے۔

نبی اکرم a تے آپ دا خاندان پوری ہمت جرات تے حوصلے نال اوہناں اوکڑاں دا مقابلہ کردے رہے۔

آپ a شہر وچ تے وڑ نہیں سن سکدے ایس لئی دور دریڈے وسوں کیتی بیٹھے قبیلیاں ول نکل جانداں تے اوہناں نوں اک اللہ تے اک معبود دے تصور توں آشنا تے واقف کرن دی کوشش کردے۔ ایس گل دا قریش نوں وی پتا لگ جاندا سی تے اوہ سڑ دے بلدے رہندے سن پر شہروں باہر صحرا وچ اوہناں دی کوئی پیش نہیں سی چل سکدی۔

سماجی بائیکاٹ دے ایس دکھاں بھرے دور وچ جناب ابو بکر b دے خاندان تے بنو ہاشم دے اک نیڑے دے رشتے دار ہشام عامری ولوں چوری چھپے بنو ہاشم دی مدد ہوندی رہی۔ ہشام نے ای ایہ کوشش کیتی بنی کعبہ دے دروازے نال لمکھیا بائیکاٹ دا معاہدہ پھاڑ دتا جاوے۔ اوس نے جناب عبدالمطلب دے اک دوہترے زہیر، مطعم بنی عدی، ابوالجہتری، ابن ہشام تے زمعہ بن الاسود نوں وی نال رلا لیا تے آکھیا بنی ایہ تے چوکھے ظلم دی گل اے بنی جیوندے جاگدے بندیاں نال ملناور تنا بند کر دتا جاوے تے اوہناں تیکر کھان پین دی وی کوئی شے نہ اپڑن دتی جاوے۔ ایوں اک دیہاڑی ایہ اکٹھے ہوئے تے مطعم بن عدی نے اگے ودھ کے معاہدے دی دستاویز پھاڑ دتی ۛ فیروہناں نے ہتھیار نال لے تے جرات کر کے، تے قریش نال جوڑ پین دا خطر امل لیندیاں ہونیاں بنو ہاشم نوں گھائی توں کڈھ کے شہر واپس لے آندا۔

شعب ابوطالب وچ ہمت نال دکھاں تکلیفاں دا مقابلہ کرن نال تے فیر کے وچ عزت تے وقار نال واپس آؤن نال مسلماناں دا حوصلہ بڑا ودھ گیا۔ جناب رسول اللہ نے سکے وچ فیر توں وعظ تے تبلیغ دا کم چھوہ دتا تے قریش دیاں التاں وی اوویں ای شروع ہو گئیاں سن۔ اک دن نبی اکرم a کعبہ وچ وڑے تاں اوہ کجھ مشرک سردار وی بیٹھے ہوئے سن۔ ابو جہل نے جدوں آپ a نوں ویکھیا تے تمسخر نال آکھن لگا ”عبدالمناف والیو! ویکھو تہاڈا نبی آ گیا ہے“ ایہ سن کے عقبہ بن ربیعہ بولیا ”سانوں کیہ اعتراض اے جی کوئی نبی بن بن بوے یاں کوئی فرشتا اکھوائے۔“

آپ a ایہ گلاں سن کے پہلوں عقبہ کول آئے تے فرمایا ”عقبہ! توں اللہ تے رسول ول دی گل کدے وی نہیں کیتی تے ہمیش اپنی گل تے ای اڑیا رہیاں ایں۔“ تے فیر ابو جہل نوں مسخریاں کردیاں ویکھ کے اوس کول اپڑے تے فرمایا ”ابن ہشام! ہن تیرے لئی اوہ ویلا چوکھا ای نیڑے وے جدوں توں تھوڑا ہسین گاتے چوکھا روویں گا۔“ فیروہناں ساریاں نوں آکھیا بنی اوہ گھڑی نیڑے آ رہی اے جدوں تیں ساریاں اوسے دین وچ داخل ہونا اے جیں دا ارج تیں انکار کردے او۔ فیروہناں ویکھیا بنی زبان نبوت توں نکلیاں ایہ گلاں چوکھی تیزی نال پوریاں ہوندیاں گئیاں۔



کجھ بزرگاں دا خیال اے کہ اوس معاہدے نوں دیکھ کھا گئی سی تے جدوں معاہدہ ای نہ رہیا تے کجھ بندے بنو ہاشم نوں گھائی توں واپس لے آئے۔

شق القمر

قرآن پاک دامنزل آپ ای رسول خدا اک تکرار معجزہ سی۔ ایس توں بعد کافراں وٹوں کسے معجزے دی منگ اک فضول تے گھٹیا حرکت سی، فیروہی اوہ ایوں دے مطالبے کردے رہندے سن۔ ایس دی اک مثال ایہ ہے کہ اک واری ابو جہل نے محبوب خدا توں ایہ منگ کیتی کہ میرے گھر وچ اک پتھر اے، جے تسیں ایہدے دچوں اک مور پیدا کر دیو تے میں تہاڈے اُتے ایمان لے آواں گا۔ آنحضرتؐ نے اپنے رب اگے دُعا کیتی تے پتھر پھٹ کے دو ٹکڑے ہو گیا تے پتھر وچوں مور باہر آ گیا۔ ابو جہل نے اپنیاں اکھاں نال مور وکھ لیا پر ایمان نہیں لیا ندا۔ بھانویں علامہ سیوطی نے ایس روایت نوں باطل قرار دتا اے ۱؎ پر کئی بزرگاں نے ایس نوں ٹھیک منیا اے۔

ایسے طرح دے اک مطالبے دا ذکر حضرت ابن عباس نے کیتا اے۔ فرماندے نیں کہ اک راتیں مشرکین منی دی تھاں تے اکٹھے ہوئے، جہاں وچ ولید بن مغیرہ، ابو جہل، عاص بن ہشام، اسود بن عبد یغوث، اسود بن مطلب، زمعہ بن اسود تے نصر بن حارث ورگے وڈے سردار شامل سن۔ اکٹھے ہو کے ایہ لوکی رسول خداؐ کوں آئے تے آکھن لگے:

”اے محمد (a) ! جسے تئیں سچے او تے ایس چمکدے چن دے دو ٹکڑے کر کے دکھاؤ، ایوں کہ اک ٹوٹا کوہ ابونقیس تے نظر آئے تے دُجا کوہ قعقعان تے۔ (یعنی واضح فاصلے تے نظر آون)

”جے میں ایوں کر دکھاواں تے کیمہ فیرتیں میرے تے ایمان لے آؤ گے؟“ حضورؐ نے پچھیا۔

”آہو، فیر من لواں گے۔“ مشرکاں آکھیا۔

محبوب خدا نے اپنے رب واحد اگے ہتھ کھلا رتے، چن دے دو ٹکڑے کر دین دی دُعا کیتی تے فیر ویکھدیاں ای ویکھدیاں چودھویں رات دا اوہ چن دو ٹوٹے ہو گیا تے کافر سرداراں دی منگ موجب دوویں ٹوٹے اک دُجے توں چوٹھے دور ہو گئے۔ کافر بکے بکے، چن نوں ویکھدے رہے تے رسول رحمت فرماندے رہے کہ:

”ہن گواہی دیو۔ ہن گواہی“ (کہ اللہ اک اے تے میں اوہدا رسول ہاں)

ضدی کافراں اپنی تھاں تے پکے رے تے آکھن لگے کہ ”محمد! تُوں ساڈے اُتے جادو کر دتا اے۔ اسیں مکے دے باہروں وی لوکائی نوں پچھاں گے کہ کیہ چن دے دو ٹکڑے ہوئے سن کہ نہیں؟“ فیر اوہناں ایسے طرحاں کیتا۔ مکے ول آون والے مسافراں نوں تے دور نیڑے دے قبیلیاں نوں پچھیا تے اوہناں نے ایس گل دی تصدیق کردتی کہ اوہناں چن نوں ٹٹیاں ویکھیا اے۔ ایس تصدیق توں بعد وی کافراں ایس معجزے نوں جادوای آکھدے رہے پر قرآن نے آکھیا:

﴿اَقْتَرَبَتِ السَّاعَةُ وَانْشَقَّ الْقَمَرُ ۚ وَإِنْ يَرَوْا آيَةً يُعْرِضُوا وَيَقُولُوا سِحْرٌ مُّسْتَمِرٌّ﴾

(القمر: ۲۰۱)

(قیامت نیڑے آگئی تے چن شق ہو گیا۔ تے ایہ لوکی جے کوئی معجزہ دیکھدے نیں تے ٹال دیندے نیں تے

آکھدے نیں کہ ایہ تے جادو اے جہیز البس ہنے ای ختم ہو جانا اے)

واقعہ شق القمر دی ہندوستان وچ تصدیق:

اصابہ دی اک روایت موجب راوی آکھدا اے:

”جدوں میں نو (۹) سال داساں تے اپنے والد تے چاچے نال خراسان توں تجارت دے سلسلے وچ ہندوستان گیا۔ اوتھے ساڈا تجارتی قافلہ اک باغ کولوں گزر رہیا سی تے کچھ دیر آرام دے ارادے نال اوتھے رُک گیا۔ اوس باغ وچ اک درخت نال اک پنگھوڑا لٹک رہیا سی۔ پگھن تے پتالگا کہ اوہدے وچ لیٹے ہوئے بزرگ شیخ زین الدین معمر نیں تے اویہ ایس باغ دے مالک وی نیں۔ ایہ وی پتالگا کہ اوہناں رسول اللہ a دی زیارت وی کیتی ہوئی اے۔ زیارت دے ویلے آنحضرت نے شیخ معمر نوں چھ واری لمی عمر دی دُعا دتی سی۔ ایہ سارا کجھ جان توں بعد اسیں باغ وچ بیٹھے لوکاں اگے گزارش کیتی کہ اوہ اسانوں شیخ معمر دی زیارت کران تے نالے اوہناں کولوں گل بات سُنن دا موقعہ وی دین۔ ساڈی درخواست تے اوہناں نے پنگھوڑا تھلے لاہیا تے شیخ زین الدین معمر نے گل چھوہ دتی“

اکھے:

”میں اوس ویلے منڈا امی ساں جدوں اپنے والد نال تجارت دے سلسلے وچ حجاز دا سفر کیتا۔ جدوں اسیں کے اپڑے تے دیکھیا کہ تیز بارش پاروں وادیاں وچ پانی بھریا ہو یا اے۔ اوتھے اسیں ایک سوہنا جہیا منڈا دیکھیا جہیزا اونٹھ چرارہیا سی۔ اوس منڈے تے اونٹھاں وچکار ہڑدا پانی اکٹھا ہو گیا سی تے منڈا پانی وچ وڑ دا ڈر رہیا سی بنی کدھرے ہڑچوکھا زور اور نہ ہو جائے۔ میں اوس بال دی پریشانی نوں تاڑ گیا تے اوس نوں موہدے تے چُک کے پانی توں پار اوس دے اونٹھاں کول اپڑا دتا۔ اوہ سوہنا جہیا نیا نیا مینوں دُعاواں دیندا رہیا۔“

”اسیں ہندوستان واپس پرت کے حیاتی دے دن گزار رہے ساں۔ ویلا ایسے باغ وچ گزرا سی۔ اک راتیں چودھویں دا چن اپنے جو بن تے سی تے اسیں باغ وچ بیٹھے نظارہ مان رے ساں۔ اچن چیت چن دو ٹکڑے ہو کے اک حصہ مشرق ول تے دُجا مغرب ول جا پڑیا۔ کجھ دیر لئی چاننی رات ہنیری ہو گئی تے فیر چن دے دوویں ٹوٹے اکٹھے ہو کے پہلے وانگ چمکن لگ پے۔“

”اسیں دندان تھلے انگلیاں دبی بیٹھے ساں بنی ایہہ کیہ ہو نیا پر کسے نوں کجھ پتا نہیں سی۔ کجھ چراں پچھوں عرب ولوں کجھ قافلے آئے جہناں نے دسیا کہ مکے وچ اک ہاشمی بندہ دعویٰ کر رہیا اے کہ اوس نوں سارے عالم واسطے، اللہ ولوں، رسول بنا کے گھلایا گیا اے۔ مکے دے لوکاں نے اوس توں ایہہ منگ کیتی کہ اوہ کوئی معجزہ دکھائے، تے نالے آکھیا کہ جے ایہ چن دو ٹوٹے ہو جائے تے فیر جو کے اک وی ہو جائے تے اوہ ہاشمی نوں اللہ دار رسول من لین گے۔ ایوں اوس نبی نے کئی

سرداراں دی فرمائش پوری کر کے دکھا دتی سی۔ ایہ سن کے مینوں اوس ہاشمی نبی دی زیارت داشوق ہوئیا۔ اخیر میں اک وار فیر مکے اپڑ گیا تے اہل مکہ کولوں پچھدیاں پچھدیاں رسول اللہ دے گھر جا پڑیا۔ میں اندر آؤن دی اجازت منگی۔ اجازت ملدیاں ہی اندر جا کے سلام کیتا۔ آپ a مسکرائے تے آکھیا کہ ”میرے نیڑے آ جاؤ“

”اوس ویلے آپ دے سامنے اک تھال وچ کھجوراں پیان سن۔ میں آپ دے نیڑے ہو کے حضور دیاں عنایت کیتیاں کھجوراں کھان لگ پیا۔ آپ نے مینوں چھ (۶) کھجوراں کھوائیاں۔ فیر میرے چہرے ول ویکھ کے مسکرائے تے فرمایا: کیہ مینوں پچھتا جے؟“

”نہیں، اللہ دے رسول“ میں جواب دتا۔

”کیہ فلاں سال تسین مینوں مکے وچ آئے ہڑ دے ویلے پانی پار نہیں سی کرایا۔؟؟ چلو خیر اپنا ہتھ اگے کرؤ“ آپ نے فرمایا۔

میں ہتھ اگے ودھایا تے آپ نے میرا ہتھ پھڑ لیا تے فرمایا:

آکھو: ((اِنَّهٗدَانِ لَآلَہٗ اِلَآلَہٗ وَاِنَّهٗدَانِ مُحَمَّدًا رَّسُوْلَ اللّٰہِ))

”میں ایہ کلمہ پڑھیا تے آپ بہت خوش ہوئے۔ فیر جدوں میں رخصت ہون لگاتے آپ نے فرمایا:

”اللہ تہاڈی عمروچ برکت عطا فرمائے۔“

آپ نے ایہ جملہ چھ وار فرمایا۔

”بس اوسے دُعا داکمال اے کہ آج میری عمر دی چھیویں صدی پوری ہون والی اے۔“

ایس روایت توں پتا لگدا اے کہ شق القمر دامجہرہ دنیا دے دکھو دکھ مکاں وچ، دور نیڑے ہر تھاں تے ویکھیا گیا۔

مشرک اک وار فیر جناب ابوطالب دی خدمت وچ:

بنو ہاشم، شعب ابی طالب توں نکل کے شہر وچ تے آگئے سن پرچہڑے دکھ او تھے جھلسن اوہناں دا اثر ایڈی چھیتی مکن والا نہیں سی۔ کئی تے بڈھی عمر دے جیاں نے تے تن ورھیاں دی ایس آزمائش نوں چوکھا محسوسیا۔ جناب ابوطالب جیہڑے ۸۰ ورھیاں توں ٹپ گئے سن، اوہناں دی صحت چوکھی بری طرحاں متاثر ہوئی۔ آپ دے بڈ پیر جواب دے گئے تے لک دوہرا ہو گیا۔ تھوڑے ای چر بعد آپ بیمار پئے گئے تے منجے جو گے ای ہو کے رہ گئے۔ قریش نے ایہ گل سوچی ہی محمد a نال اسیں جدوں وی کوئی معاملہ کرنا ہوندا سی ابوطالب نوں وچ پالیندے ساں۔ ہن جے ابوطالب نہ رہے تے کوئی سفارقی کوشش توڑ نہیں چڑھنی۔ نالے اوہناں توں بعد اوہناں دے بھتیجے نال کوئی زیادتی کیتی تے لوکاں دا ایہ طعنہ بنے گا ہی ابو طالب دے جیوندیاں تے کجھ نہ کر سکے تے ہن اوس دے اکھاں میڈیاں امی وڈے سورمے بن بیٹھے نیں۔ ایس لئی ہووے نہ تے اسیں اک وار فیر ٹل لایئے تے ابوطالب نوں وچ پا کے گل کسے پاسے لان دا جتن کریئے۔

اک دیہاڑے قریش دے ڈھیر اچے شملیاں والے بندے عتبہ بن ربیعہ، شیبہ بن ربیعہ، عمر بن ہشام (ابو جہل) امیہ بن خلف تے ابوسفیان بن حرب ۲۵ بندیاں دا اک وفد لے کے جناب ابوطالب کول اپڑ گئے۔ آکھن لگے:

”ابو طالب جی! ساڈے وچ جہڑا مرتبہ تے مقام تہاڈا اے اوس نوں تسیں چنگی طرحاں جان دے او۔ تسیں جہڑی حالت وچوں گزر رہے او، اوہ وی لکی چھپی نہیں۔ سانوں ڈراے بنی ایہ کدھرے تہاڈے اخیر دیہاڑے نہ ہون۔ اودھر ساڈے، تے تہاڈے بھتیجے وچکار جہڑا معاملہ چل رہیا اے اوس توں وی تسیں جانوں جے۔ اسیں چاہندے ہاں بنی تسیں اوہناں نوں سدو تے ساڈے کولوں کجھ وعدے کارے لوؤ تے نالے اوہناں کولوں ساڈے لئی کجھ وعدے کراؤ۔ ساڈا مطلب ایہ ہے بنی اوہ سانوں کجھ نہ آکھن تے اسیں اوہناں نوں کجھ نہ آکھیں۔ اوہ سانوں ساڈے دین تے چھڈ دین تے اسیں اوہناں نوں اوہناں دے دین تے۔“

ایہ سن کے جناب ابوطالب نے سرور کائنات a نوں اپنے کول سدیا تے آکھن لگے۔ ”بھتیجے! تہاں پتا ای اے بنی ایہ ساڈی قوم دے عزتاں والے جی نہیں۔ ایہ تہاڈے ای واسطے اکٹھے ہوئے نیں۔ ایہ چاہندے نیں بنی اک دوجے نال کجھ کارے کر لے جان تاں جے میرے توں بعد تسیں دوویں دھڑے امن چین نال رہ سکوں۔“

ایہ سن کے رسول اللہ a نے وفد نوں مخاطب کر کے آکھیا: ”تسیں ایہ دسو بنی جے میں کوئی اجہی گل کراں جیسن دے من لین نال تسیں عرب دے بادشاہ بن جاؤ تے عجم وی تہاڈے تھلے لگ جائے تے تہاڈی کیہ رائے ہووے گی؟“ جناب رسول a دی زبان مبارک توں ایڈی وڈی پیش کش سن کے قریشی وفد نے دندان تھلے انگلیاں دب لیاں بنی اوہ کہہ دی گل اے جہدے نال عرب دی شاہی، تے عجم توں جزیئے ملنا شروع ہو جان گے۔ اخیر ابو جہل بولیا ”اچھا دسو جی اوہ گل کہہ دی اے۔ تہاڈے باپ دی قسم اے ایہو جیہی اک نہیں اسیں دس گلاں مناں گے“ آپ a نے فرمایا ”تے بنی فیر آکھو لا الہ الا اللہ تے نالے اللہ توں دکھ جھنوں وی پوچدے او اوس نوں چھڈ دیو“۔ ایہ سندیاں سارای قریشی وفد ٹپ کھلواتے بندے آکھن لگے ”محمد (a) تسیں ایہ چاہندے او بنی سارے خدا واں دی تھاں تے بس اک ای خدا بنا لیا جاوے۔ واقعی تسیں لوکاں توں دکھ ای گل کردے او۔“

قریش نے جناب رسول اللہ a کولوں اک وار فیر اپنی سوچ توں دکھ جواب سنیا تے اک دوجے نوں آکھن لگے ”خدا دی قسم اے ایہہ بندہ تہاڈی کوئی گل من لئی تیار نہیں۔ ایس لئی اٹھو تے اپنے وڈکیاں دے دین تے ڈٹ جاؤ۔ اودوں تیکر جدوں اللہ ساڈے تے ایس دے وچکار فیصلہ کر دیوے“ قریشی وفد آپ اپنا گھراں نوں ٹر گیا تے گل آئی گئی ہو گئی۔ قریش ولوں نبی اکرم a نوں خدائے واحد دی عبادت توں ڈکن لئی ایہ اخیر سفارتی کوشش سی۔ ایس واقعے توں بعد قرآن مجید دیاں آیات نازل ہوئیاں:

﴿ص وَالْقُرْآنِ ذِي الذِّكْرِ ۝ بَلِ الَّذِينَ كَفَرُوا فِي عِزَّةٍ وَشِقَاقٍ ۝ كَمْ أَهْلَكْنَا مِنْ قَبْلِهِمْ مِنْ قَدَرٍ فَنَذَرُوا وَلاَت حَيْنَ مَنَاصٍ ۝ وَعَجَبُوا أَنْ جَاءَهُمْ مُنْذِرٌ مِنْهُمْ وَقَالَ الْكُفُورُونَ هَذَا

سَاحِرٌ كَذَّابٌ ۝ اَجْعَلِ الْاِلَهَةَ لَهَا وَاحِدًا ۚ اِنَّ هَذَا لَشَيْءٌ عَجَابٌ ۝ وَاَنْطَلَقَ الْمَلَا مِنْهُمْ اَنْ
اَمْشُوا وَاَصْبِرُوا عَلٰی اٰلِهَتِكُمْ ۚ اِنَّ هَذَا لَشَيْءٌ يُرَادُّ ۝ مَا سَمِعْنَا بِهٰذَا فِي الْمِلَّةِ الْاٰخِرَةِ ۚ اِنَّ هٰذَا
اِلَّا اَخْتِلَافٌ ۝ ﴿ص: ۱-۷﴾

”قسم اے نصیحت بھرے قرآن دی۔ سگوں جہناں نے کفر کیا، ویرتے ضد و بچ نیں۔ اسیں ایہناں توں
پہلیاں نوں ہلاک کردتا، اوہ چیکے تے روئے پر فیرتے بچن دا ویلا نہیں سی۔ اوہناں نوں ایہ گل اچرج گدی
اے بئی اوہناں کول اوہناں دے وچوں ای اک ڈراؤن والا آ گیا اے۔ کافر آ کھدے نیں بئی ایہ جادوگر
اے تے جھوٹا اے۔ کیہ اس نے سارے معبوداں دی تھاں تے اکوای معبود بنالیا اے۔ ایہ تے چوکی اچرج
گل اے۔ تے اوہناں دے اگل ہتھ بندے ایہ آ کھدے ہوئے ٹرپے بئی چلو تے اپنے معبوداں تے ڈٹے
رہوؤ، ایہ اک پکارا داکیتی بیٹھا اے۔ کسے ہور قوم وچ تے ایوں دی گل نہیں سی سنی۔ ایہ تے آپوں ای گھڑی
ہوئی گل اے۔“

(عام الحزن) دکھاں دا ورھا:

ایہہ ہجرت مدینہ توں تن ورھے پہلوں ۱۰ نبوی دی گل اے بئی محسن نبی، دکھاں مصیبتاں تے بڈھی عمر دے ہتھوں
بازی ہار گیا۔ جناب ابوطالب نے اپنے شانناں والے بھتیجے لئی جہڑیاں قربانیاں دتیاں نیں اوہ توارخ دے کسے پڑھیا توں
اوتھے وچ نہیں رہیاں۔ آپ نے پتراں تیکر دی جان دی پرواہ نہیں کیتی۔ سارے عرب نوں اپنا ویری بنالیا تے تن سال
شہروں باہر گھائی وچ بھکھ پیاس وی جری پر محمد a نوں کلا نہیں چھڈیا۔

جناب ابوطالب نوں اللہ دے محبوب نال چوکھا پیاری تے جناب محمد a وی چاچے ہوراں نوں پیو دی تھاں جان
دے سن۔ اک واری ایہ ہونیا بئی چاچے ہوریں چوکھے بیمار پئے گئے۔ آپ a جدوں حال چال پچھن گئے تے جناب
ابوطالب نے آکھیا بئی ”جس خدا نے تہاں پیغمبر بنا کے گھلایا اے تسیں میرے لئی اوس کول دعا نہیں منگدے بئی اوہ مینوں
صحت وند کر دیوے۔“ آپ a نے دعا کیتی تے حضرت ابوطالب بھلے چنگے ہو گئے تے حضور نوں آکھن لگے ”ٹھیک
اے بئی تیرا رب تیری گل من دا اے۔“ آپ a نے فرمایا ”تسیں وی بے رب دا آکھا منو تے اوہ تہاڈی وی گل منے
گا۔“ ایس توں کجھ چراں بعد چاچے ہوری چلانا کر گئے۔

جناب ابوطالب دی موت نے سرور کائنات حضرت محمد a کولوں سیاسی حوالیاں نال اک چوکھا تگڑا پلٹ فارم
کھوہ لیا۔ ہن کفر و شرک تے آپ دے وچکار کوئی Shock Absorber نہیں سی رہیا۔ ایس گل نوں آپ a نے بڑا
محسوسیا۔ آپ a تقدیر دلوں پئی ایس سٹ توں اے سنبھلے وی نہیں سن تے تھوڑے ای چرپچھوں حضرت خدیجہ وی چلانا
کر گئیاں۔ اوکھے ویلے سہارا تے حوصلہ دین والی ایس دوجی وڈی ہستی دی جدائی نے وی آپ a نوں دکھی کیا۔ اک
نیک دل وفادار تے بھروسے اعتماد والا کوئی سگی ساتھی جدوں کسے بندے توں ہمیش لئی دور ہو جاندا اے تے اوس دے دل تے
کیہ واردات ہوندی اے، ایہ اوہوای جان دا اے جہنوں لگی ہوندی اے۔ حضرت خدیجہ تے آپ a دی مشیر وی سن۔

گھر دے اندر اوہناں توں حوصلہ ملد اسی تے باہروں جناب ابوطالب توں۔ ہن اوہ دوویں ای نہیں سن رہے۔
 جناب خدیجہ ۲۵ ورہیاں دے لے ساتھ پچھوں ۶۱۹ء وچ فوت ہوئیاں تے چون دے تھان تے دفن ہوئیاں۔
 آپ a نے آپوں ای جناب خدیجہ نوں قبر وچ اتاریا۔

جناب ابوطالب تے ام المومنین حضرت خدیجہ دے اٹھ جان توں بعد ہن کہہ اسی جس دا قریش نوں لحاظ ہوندا۔ ہن اوہ چوکھی بے رحمی تے بے شرمی نال آپ نوں ستان لگ پئے۔ اک دن آپ گلی وچ ٹرے جاندے سن تے اک بد بخت منڈے نے آپ دے سر مبارک تے چکڑ سٹ دتا۔ جناب رسول اللہ نے ایس دا اصولوں ای کوئی جواب نہ دتا تے صبر سکون نال گھر ٹر گئے۔ حضرت فاطمہ نے ویکھیا تے رونا شروع کر دتا۔ فاطمہ نالے روئی جان تے نالے پیارے ابو داسر دھوئی جان۔ دھی دی اکھ وچ اتھر و ویکھ کے باپ دے کلیجے نوں کوں رگھ پیندا اے ایہ گل اوہو ای سمجھ سکدا اے جس دی کوئی دھی اے تے فیر اوس نے کسے اجہی گل توں اوس نوں روندیاں ویکھیا ہووے جہڑی اس دے وسوں باہر ہووے۔ اسیں تے اپنے پتراں دار و نا نہیں ویکھ سکدے تے دھی دی تے گل ای ہور ہوندی اے۔ دھی دی اکھ وچوں ڈگیا اک اتھر و ایڈا قیمتی ہوندا اے نئی باپ دنیا دی ہر شے وچ وٹ کے وی جے اوہ اتھر پونجھ سکدا ہووے تے اوس نوں پونجھن دے جتن ضرور کردا اے۔ ایتھے اک اجہی ہستی دھی نوں غم نال سسکیاں بھر دیاں ویکھ رہی سی جھوں دھیاں نال پتراں توں ودھ پیار سی۔ فیر دھی دی اوہ دھی جہدے ورگی دنیا تے کوئی پہلوں ہوئی تے نہ بعد۔

جناب سیدہ فاطمہ دیاں اکھاں تے اے ماں دی جدائی دے غم نال ای بھجیاں ہوئیاں سن، ہن جدوں پیارے ابو نے لاڈلی دھی دیاں اکھاں وچ فیر اتھر وواں دی جھڑی لگی ویکھی ہوئی اے تے دل وچ خیال تے آیا ہونا اے نئی ماں! میریا سوہنیا رہا! اے کئے کو امتحان باقی نیں؟ پر جنے وی نیں میرے پیراں نوں پیڈھا تے میرے حوصلے نوں اچا رکھیں۔ سیدہ نوں آکھیا ”میری دھی! نہ رو۔ اللہ تیرے ابو دی حفاظت دا ذمے وار اے“ فاطمہ روندیاں رہیاں تے ابو ایہی گل آکھدے رہے۔ اخیر فرمایا ”میرے نال ایہ حادثا میرے سوہنے تے مہربان چاچے دے دنیا توں ٹر جان توں بعد ہو یا، اوہناں دی حیاتی وچ کھدے وچ ایڈی جراثیم سی؟“

بس اوس توں بعد تے مشرکاں ولوں تکلیفاں ہر آؤن والے دیہاڑے ودھ تو ودھ ای ملیاں۔ ایس ورھے نوں آپ a نے ساری حیاتی ”عام الحزن“ یعنی دکھ دے ورھے دے نام نال یاد کیتا۔
 اُم المومنین حضرت سودہ نال شادی:

عام الحزن وچ سرور کائنات نے اپنی خانگی زندگی تے بس اپنی کوتوجہ دتی نئی گھر دی مرکزیت نوں قائم رکھن لئی حضرت سودہ نال شادی دا فیصلہ کر لیا۔ مڈھلے دور دے مسلماناں وچ سکران b بن عمرو تے اوہناں دی گھر والی سودہ بنت زمعہ وی سن۔ حبشہ دی دوجی ہجرت ویلے ایہ مسلمان جوڑا مکہ چھڈ گیا سی پر فیر کسے ویلے واپس کئے پر ت آیا۔ کئے آکے جناب سکران چلانا کر گئے تے آزمائشاں تے دکھاں دے دور دی اک مومنہ کئی رہ گئی۔ جدوں حضرت سودہ دی عدت مک گئی تے نبی اکرم a نے اوہناں نوں شادی دا سنبھیا گھلیا تے ایوں جناب سودہ ام المومنین دا اعزاز پاؤن والی دوجی بھاگاں والی

سوانی بن گئیاں۔ حضرت سودہ دی عمر اودوں ۵۰ ورھے سی۔

حضرت عائشہ صدیقہ نال نکاح:

حضرت سودہ نال نکاح توں اک مہینا بعد جناب محمد رسول اللہ a نے اپنے سچے مخلص یار جناب ابو بکر صدیق نال اپنے یارانے نوں ہور پیڈھا کرن لئی اوہناں دی صاحبزادی جناب عائشہ صدیقہ نال نکاح فرمایا۔
(ایہناں رشتیاں دی تفصیل اگے امہات المؤمنین دے باب وچ آوے گی۔)

رسول خدا طائف وچ:

اک پاسے تے جناب ابوطالب تے حضرت خدیجہ دے چلانا کرن نال رسول خدا ایہناں خیال رکھن والیاں ہستیاں توں محروم ہو گئے تے دو جے پاسے مکے دے مشرکاں نے ستان والی اخیر کر چھڈی۔ جدوں آپ نے ویکھیا نئی مکے دے گھر گھر وچ رب داسہنیا اپڑ گیا اے پر حالت وچ کوئی بہتری نہیں آئی تے آپ a نے مکے توں باہر دور دریدے علاقیاں وچ تبلیغ داکم چھوہ دتا۔ چیتے رہوے نئی نیڑے تیرے دے قبائل تیکر شعب ابی طالب دے دور وچ اللہ دا پیغام اپڑ گیا سی۔ ہن آپ a نے طائف دے لوکاں تک اک اللہ دی عبادت دی دعوت اپڑانا چاہی تے ایوں حضرت زید بن حارث نوں نال لیا تے پیدل ای طائف ول ٹر پئے۔ اتھے ایہ گل چیتے رکھن والی اے نئی بنو عبدالمطلب تے بنو ہاشم دے کجھ کھاندے پیندے بندے گرمیاں گزارن طائف ٹر جان دے ہوندے سن۔ خیال کیتا جاندا اے نئی مارچ دے مہینے وچ اوہ طائف اپڑ گئے ہون گے تے جناب محمد رسول اللہ a ایسے ٹھاہرتے طائف گئے ہون گے بنو ہاشم دے اپنے ای خنوادے دے اوہ جی ہاشمی نبی داسہارا کیوں نہ بن سکے، ایہدے تے توارق خاموش اے۔

طائف دا خوبصورت شہر مکے توں کوئی ۸۰ کلومیٹر دور اے۔ ایہ پندھ کردیاں راہ وچ جھڑے قبیلیاں نال وی ٹاکرا ہویا اوہناں نوں ایہ گل سمجھاندے گئے نئی اللہ اک اے۔ اوس توں وکھ دو جا کوئی وی عبادت دے لائق نہیں تے نالے میں اللہ دا رسول ہاں۔ اخیر طائف اپڑ گئے۔ طائف دے ہرے بھرے باغاں تے ٹھنڈے موسم نے اہل طائف نوں چوکھا مغرور بنا دتا ہویا سی۔ جاگیر دارانہ نظام ہون پاروں اوہ تھے وڈے وڈے زمیندار تے رئیس بڑے ٹوہرے دی حیاتی بتا رہے سن۔ جھڑا خنوادا چوکھا سرکلڈھدا اسی اوہ عمرو بن عوف داسی۔ آپ a اوہدے تن سردار پتراں کول تشریف لے گئے جہناں دے نام عبدالمطلب، مسعود تے حبیب سن۔ آپ a نے اوہناں نوں آکھیا ”نئی دوستو! میں اللہ دا رسول ہاں تے اوہدے حکم موجب اسدا ایہ سنیہا تھاڈے تیکر اپڑاں آیاں نئی اوہ کھلا اے، اس دا کوئی سانجھے دار نہیں، اس توں وکھ کسے دی عبادت وی جائز نہیں، اسیں ساریاں اک دن اوس معبود واحد دے حضور پیش ہو کے اپنے عملاں دا حساب دینا اے تے اوس یوم حساب نوں کوئی بندہ تے کوئی شے وی، سوائے نیک عملاں توں، ساڈے کم نہیں آوئی۔

بنو ثقیف دیاں سرداراں نے جدوں ایہ گل سنی تے اوہناں وچ اک بولیا ”میں کعبے دے ساہمنے داڑھی منادیاں گا، جے تینوں اللہ نے رسول بنایا ہووے تے۔“ دو جا آکھن لگا ”رب نوں رسول بنان لئی توں ای لبھاسی جہدے کول سفر لئی اپنی

سواری وی کوئی نہیں“ تیجے نے آکھیا ”نہیں ہی میں تے تیرے نال کوئی گل نہیں کردا۔ ایس لئی ہی جے توں سچا ایس تے تیرے نال اچی بولنا ادب دے خلاف اے تے جے توں جھوٹھا ایس تے تیرے نال گل بات کرنا ای میری شان دے خلاف اے“
ایسن کے نبی اکرم a نے فرمایا ”ہن میں تہاڈے کولوں صرف ایہ چاہندا ہاں ہی اپنیاں ایہ گلاں اپنے تیکر ای رکھنا، کدھرے ایہ نہ ہووے ہی دو جے لوکی ٹھوکرال کھاندے پھرن“

بنو ثقیف دے بد بخت تے مغرور سرداراں زیادتی والی اخیر کر چھڈی۔ اوہناں نے اپنے غلاماں، نوکراں چاکراں تے شہر دے آوارا منڈیاں نوں آپ a دے پچھے لا دتا۔ اوہ آپ نوں گالھاں کڈھدے، تاڑیاں وجاندے، رولا پاندے، ٹھٹھا کردے تے آپ دے جسم اطہر تے پتھر مار دے۔ اوہناں آپ نوں اپنے وٹے مارے ہی سوہنا تے پاک جُسا لہونا نچڑ گیا۔ جدوں آپ تکلیف نال تھلے بہ جاندے تے بھیڑے نصیبیاں والے اوہ منڈے آپ دیاں باہواں نوں پھڑکے کھچدے تے فیر اٹھا دیندے۔ فیر جدوں جناب سرور کائنات ٹرن لگدے تے پیراں تے لتاں تے فیر پتھر مارنے شروع کر دیندے۔ حالت ایہ ہو گئی ہی اوہ نعلین پاک جہناں نال لگی مٹی مل جائے تاں میں سرما سمجھ کے اکھاں وچ پالواں، لہودے نال بھر گئے تے قدم مبارک جتیاں وچ لہودے نال ایوں جڑ گئے ہی جتی لہنی اوکھی ہو گئی۔

تن میلاں تیکر ایہ اذیت سہار دے طائف توں باہراک باغ تیکر اپڑے تے او تھے انگور دیاں ولاں دی چھادیں بہ گئے۔ آپ a سخت تکلیف وچ سن۔ جناب زید b بن حارث وی اپنے تے میرے آقاتے پتھراں دا مینہ روکدے روکدے سر پڑوا بیٹھے سن تے رون ہاکے ہوئے ہوئے سن۔ آقاتے غلام دوویں ایس حد تیکر دکھی تے پریشان سن ہی کلیجے پھٹے جارہے سن۔ ایڈے سفر، ایڈی ہسچل تے ایڈے دکھاں توں بعد وی کوئی اک بندا وی لا الہ الا اللہ پڑھن لئی تیار نہیں سی ہو یا۔ ایس تشویشناک حالت وچ بندے نے مالک نال تے محبوب نے محبت نال کچھ ایوں دا گلہ کہیا:

”الہی! میں تیرے ای اگے اپنی کمزوری، بے بسی تے لوکائی اگے اپنی بے قدری دا شکوا کر دا ہاں۔ یا ارحم الراحمین! توں ماڑیاں لسیاں دارب ایس تے توں ای میرا دی رب ایس۔ ربا! توں مینوں کس دے وس پار ہیا ایس؟ کیہ کسے غیر دے وس جھیرا مینوں دکھی کرے تے مندا بولے یاں کسے ویری دے جنہوں تسیں میرے اُتے بھارا کر دتا اے (فیروی) جے تسیں میرے نال ناراض نہیں تے مینوں کوئی پرواہ نہیں۔ پر جے کریا اللہ! تیری عافیت میرے بھاگاں وچ لکھی جاوے تے فیر سستے خیراں نیں۔ میں تیرے چہرے دے اس نور دی پناہ چاہندا ہاں جس نال تسیں انھیرے مکاندے او تے دنیا تے آخرت دے معاملے سدھ کر دے او۔ تسیں میرے اُتے اپنے غضب نازل فرماؤ یا میرے تے عتاب وارد ہووے، اللہ! میں تہاڈی مرضی تے راضی ہاں، ایہتوں تیکر ہی تسیں خوش ہو جاؤ تے تہا تھوں ودھ کوئی زور اور طاقت نہیں۔“

طائف دے سفر تے سروہلم میوہ اپنے خیال نوں ایوں ظاہر کر دے نیں ہی ”ایہ محمد a دا زور اعتقاد تے اپنی ذات تے بھرواں اعتماد سی ہی ساریاں ناکامیاں (تے اوکڑاں) دے باوجود اوہ کھلے اک مخالف شہر وچ آ گئے تے اسلام دی تبلیغ دا فرض ادا کہیا۔“

اصل وچ گل ایہ ہے کہ کوئی وی بندہ بھادوی اوہ کڈا دی لالچی یاں خود غرض ہووے یاں بھادویں اوس نوں ساہنے واشگٹن ڈی سی وچ پئی خالی کرسی نظر آؤندی ہووے، اوہ اپنی جان دا خطر امل نہیں لیندا۔ جدوں رب دا کوئی بندہ اپنے آپ نوں لہو لہان کرواندا اے، اپنے دند شہید کرواندا اے، اپنے یاراں دے سر پھڑواندا اے، اپنی دھی نوں پردیس کٹن لئی شہر چھڈ دین دا آکھدا اے، سپاں دیاں رڈاں دے اتے پیٹھدا اے تے فیر یار نوں سپ دا ڈنگ مرواندا اے، چلھی پنجاہ میلاں دا پندھ پیدل نیڑ کے اپڑدا اے تے اگے اوہناں لوکاں کولوں کوئی عقل دی گل نہیں سن دا چہناں لئی سفر دیاں لھجلاں سہارا اے تے فیروی رب نوں آکھدا اے ربا! کوئی گل نہیں بس توں میرے تے راضی رہو، اوہ بندہ اک عام بندہ نہیں ہوسکدا تے اسدا مشن اک عام بندے دامن نہیں ہوسکدا۔ سرولیم میورنوں حیران ہون دی لوڑ کوئی نہیں۔ ایہ سبھ کچھ تے اک پیغمبر دی ذات کر رہی سی۔ ہن ویکھ لو پئی ایس ہستی نوں اپنے آقا من لین والے کشمیر تے فلسطین وچ کیہ کر رہے نیں۔ گھرو منڈے اپنے سوہنے جیاں دے نال بارود بنھ کے اوتھوں تیکر اپڑ جاندا تے نیں جتھے کسے دشمن دی ہوا وی نہیں اپڑ سکدی تے ایوں ساری کافر دنیا فدائی حملیاں توں تھر تھر کنب رہی اے۔ ہے کوئی ماں دالال جہڑا دعویٰ کرے بنی محمد رسول اللہ a دے غلاماں توں دکھ وی کوئی بندہ اپنے دین، اپنے وطن یاں اپنی قوم لئی قربانی دین لئی اپنے ہی جُستے تے بم بنھے گایاں کرنل شیر نشان حیدر وانگ ویریاں دے کمپاں دے وچ جاوڑے گا؟

اسیں اصل گل ول واپس پرتدے ہاں۔ جدوں جناب محمد a باغ وچ بیٹھے ہوئے سن تے باغ دے مالکاں عتبہ بن ربیعہ تے شیبہ بن ربیعہ نے آپ a نوں ویکھ کے پچھان لیا۔ بھادویں ایہ دوویں بھرا مسلمان نہیں سن پر اوہناں نال علاقے دا کچھ تعلق سی۔ اوہناں نے ترس کھانندیاں ہوئیاں اپنے اک عیسائی غلام عداس نوں آکھیا بنی اوتھوں انگوراں دا گچھا توڑ، تے اوس بندے نوں کھان لئی دے دے۔ عداس نے انگورا گے رکھے تے آپ نے آکھیا ”بسم اللہ“ تے انگور کھانے شروع کردتے۔

”ایہ جملہ (بسم اللہ) تے ایس علاقے دے لوکی نہیں بولدے۔“ عداس نے حیرت نال آکھیا۔

”تسیں کتھے دے رہن والے او تے تہاڈا دین کیہ اے۔“ آپ a نے پچھیا

”میں نبیوی دارہن والا عیسائی ہاں“ عداس نے جواب دتا۔

”اچھا اچھا! تسیں تے مرد صالح یونس بن متی دے شہر دے رہن والے ہوئے نا۔“ رسول خدا نے آکھیا۔

”تے یونس بن متی نوں تسیں کوں جان دے او؟“

”اوہ میرے بھرا نیں، اوہ وی نبی نیں تے میں وی نبی ہاں“ آپ a نے جواب دتا۔

ایہ گل سندیاں ای عداس آپ a دے سامنے جھک گیا تے آپ a داسرہتھ تے پیر چن لگ پیا۔ باغ دے مالک دور بیٹھے ایہ سارا کچھ ویکھ رہے سن۔ اوہ اک دو جے نوں آکھن لگے ”لے بنی عداس تے ہتھوں گیا۔“ جدوں عداس اوہناں کول پرتیا تے اوہناں پچھیا بنی توں اوس بندے دے ہتھ پیر کیوں چن لگ پیا سیں؟ عداس نے جواب دتا ”میرے آقا! آج رب دی دھرتی اتے اوس توں چنگا ہو کوئی بندہ نہیں۔ اوس نے مینوں اجہی گل دسی اے جہڑی کوئی نبی ای دس سکدا

اے۔“ عتبہ تے شبہ آکھن لگے ”وکیہ نہیں عدا س! کدھرے ایہ بندائیتوں تیرے دین توں پھیر نہ دوے۔ کیوں جے تیرا دین ایس دے دین توں بہتر اے۔“
نبی رحمت تے پہاڑاں دافرشتا:

تھوڑا چر آرام کرن توں بعد رسول رحمت ککے ول ٹر پئے۔ غم دی شدت نال طبیعت نڈھال تے دل ٹکڑے ٹکڑے ہو یا جا پداسی۔ بس ایسے پریشانی دے عالم وچ آپ a قرن الثعالب (یاں قرن المنازل) دے تھان تے اپڑ گئے۔ ایس تھان تے حضرت جبرائیل تے پہاڑاں دافرشتا حاضر ہوئے تے آکھن لگے بئی ایہ تکلیف تہاڈے تے ککے دے لوکاں دی وجہ توں آئی اے، جے آکھو تے ککے نوں دو پہاڑاں دے وچکار پیہہ (پیس) دوئیے۔ نبی رحمت نے جواب دتا ”نہیں“ میں امید رکھدا ہاں بئی اللہ ایہناں دیاں پشتاں وچوں اچھے لوک پیدا کرے گا، جہڑے اللہ وحدہ لا شریک دی عبادت کرن گے۔“ ایس واقعے دی تفصیل صحیح بخاری وچ حضرت عائشہ دی روایت نال لکھ دی اے۔ جناب عائشہ نے اک دن نبی رحمت a نوں پچھیا بئی آپ دی پاک حیاتی وچ احد دے دن توں ودھ وی کوئی سخت دن آیا اے؟ آپ a نے فرمایا: ”ہاں طائف دادن، جدوں مینوں غم دی شدت نال کجھ پتا نہیں سی پیا لگدا بئی کدھر جاواں۔ اخیر قرن الثعالب اپڑ گیا۔ اوتھے جبرائیل بدلاں وچوں ظاہر ہوئے۔ اوہناں دے نال پہاڑاں دافرشتا وی سی۔ اوہناں مینوں ککے نوں پیہہ دین دی پیش کش کیتی پر میں انکار کردتا۔“ نبی رحمت a دے ایس جواب توں پتا لگدا اے بئی اللہ نے اپنے محبوب بندے نوں کڈا حوصلا تے کڈا وڈا دل دتا سی۔ آپ نے ککے نوں تے تباہی توں بچالیا پرست اسماناں دے اپرتوں آؤن والی غیبی امداد پاروں آپ a نوں چوکھا حوصلا ملیا۔ دل داملاں گھٹیا تے اگے ودھن دی ہمت پیدا ہوئی۔ قرن الثعالب توں اگلی منزل ول ٹر پئے تے اخیر وادی نخلہ جا پڑے۔ وادی نخلہ وچوں چلے تے اگلی منزل کوہ حراسی۔ اوتھے اپڑے تے بنی خزاعہ دے اک بندے راہیں اخنس بن شریق نوں ایہ سنہیا گھلیا کہ ککے دے حالات پاروں اوہ آپ a نوں پناہ دے دیوے پر اوس نے ایہ آکھ کے معذرت کر لئی کہ میں حلیف ہاں تے حلیف نوں پناہ دین دا اختیار نہیں ہوندا۔ فیر آپ a نے سہیل بن عمرو نوں آکھیا پر اس نے وی ایہ آکھیا بئی بنو عامر دی دتی ہوئی پناہ بنو کعب تے لاگو نہیں ہوندی۔ اخیر آپ a نے مطعم بن عدی ول سنہیا گھلیا۔ مطعم نے آکھیا بئی ٹھیک اے، میں پناہ دیندا ہاں۔ فیر ہتھار نبھے۔ پتراں نوں تے قبیلے دے لوکاں نوں سدیا تے آکھیا ”بئی ہتھیار لے کے کعبے دے آل دوالے کھلو جاؤ کیوں جے میں محمد a نوں پناہ دتی اے۔“ فیر مطعم نے، تیاری مکمل کر دیاں ای، آپ a نوں سد گھلیا۔ آپ a حضرت زید b دے نال ککے دے اندر تشریف لے آئے تے مسجد حرام وچ داخل ہو گئے۔ مطعم بن عدی نے اپنی سواری تے کھلو کے اعلان کیتا بئی ”قریش دے لوکو! میں محمد a نوں پناہ دتی جے۔ ہن کوئی اوس ول نہ ودھے۔“

رسول خدا ہن حجر اسود کول اپڑے، اوس نوں چمیا، دور رکعت نماز پڑھی تے اپنے گھر ٹر گئے۔ ابو جہل نوں پتا لگاتے اوہ جناب مطعم کول گیا تے پچھیا بئی نری پناہ دتی جے یاں مسلمان وی ہو گئے او؟ مطعم نے آکھیا بس پناہ ای دتی اے۔ ایہ سن کے ابو جہل نے جواب دتا بئی ”چل فیر جنہوں تساں پناہ دتی اے اوس نوں اسیں وی پناہ دتی۔“

جناب محمد a رسول اللہ نے اوکڑاں دے ایہناں دناں دا، مطعم دا احسان ساری حیاتی یاد رکھیا۔ اودوں وی یاد رکھیا جدوں آپ مدینے وچ پہلی اسلامی ریاست دی بنیاد رکھ کے پوری خود مختاری حاصل کر چکے سن۔ بدر دی جنگ وچ جدوں کافراں دی اک وڈی تعداد قید ہو گئی تے کجھ قیدیاں دی رہائی لئی مطعم دے پتر حضرت جبیر بن مطعم نے سفارش کیتی۔ آپ نے فرمایا کہ جے اہج کدھرے مطعم بن عدی جیوندے ہوندے تے اوہ مینوں ایہناں دلوں آکھدے تے میں سارے دے سارے ای چھڈ دیندا۔ ایس گل توں اک پاسے تے نبی رحمت دے رحم و کرم دی اک جھلک ملدی اے تے دوجے پاسے ایہ پتہ لگدا ہے نبی ایس ہستی تے جدوں وی کسے نیکی کیتی آپ نے اوس نوں ہمیش یاد رکھیا بھائیں نیکی کرن والا کافر یا مشرک ای ہووے۔

عرب دے قبیلیاں تیکر رب داسنیہا:

پیغمبر اعظم a نے ایہہ طریقہ بنایا ہویا سی نبی جدوں آل دوالے دے میلے لگدے، جہناں وچ عکاظ تے ذوالحجاز دے میلے خاص طور تے مشہور نیں، تے آپ a اوہناں میلیاں وچ تشریف لے جاندے تے دور نیڑے توں آؤن والے لوکاں نوں اللہ دے دین ول آؤن دی دعوت دیندے۔ حج دے دناں وچ خاص ایچج کر دے تے ایس اکٹھ نوں غنیمت جان دے ہوئے ہر پاسے دے حاجیاں تائیں رب داسنیہا پڑاندے۔ قبائل عرب وچوں جہناں نوں خاص طور تے دین اسلام ول آؤن دی دعوت دتی گئی اوہ بنو عامر، محارب، فزارہ، غسان، مرہ، حنیفہ، سلیم، علس، بنو نضیر، کندہ، کلب، حارث بن کعب، عذرہ تے حضارمہ نیں پر اوہناں وچوں کسے وی دعوت اسلام نوں نہیں قبولیا۔

ابن اسحاق لکھدے نیں نبی ربیعہ بن عباد توں روایت اے: آکھدے نیں میں اہجے منڈا ای ساں تے اپنے اہجے ہوراں نال حج وچ شریک ساں۔ میں ویکھیا نبی منی دے مقام تے نبی اکرم a تشریف لیائے تے قبائل دے کول کھلو کے آپ a نے فرمایا کہ اے بنی فلاں تے فلاں! میں اللہ دا رسول ہاں تے تہاں نوں ایہ مت دیندا ہاں نبی اللہ توں وکھ کے نوں اپنا معبود نہ بناؤ۔ بتاں دی پوجا چھڈ دیو تے رب دے حکم اگے اپڑاں لئی میرا ساتھ دیو۔ جدوں حضور اپنی گل پوری کر چکے تے اک بنداجہڑ اک اکھ توں بھید گئی تے اوس نے عدن داخلہ پہنیا ہویا سی، آکھن لگا کہ ”ایہ بندا تہاں نوں آکھدا اے نبی لات تے عزی دے بت اپنیاں گردناں توں لاہ کے سٹ دیو تے اوہناں دی پوجا وی چھڈ دیو۔ دھیان کریا جے کدھرے گراہ نہ ہو جانا تے نہ ایس دی کوئی گل سنیا جے۔“ ربیعہ گل اگے ٹور دے ہوئے آکھدے نیں نبی میں والد صاحب نوں پچھیا نبی ایہ کون ہے؟ تے اوہناں آکھیا نبی ایہ آپ دا چاچا ابو لہب بن عبدالمطلب اے ﴿﴾

ایس توں پتا لگدا اے نبی چاچے ابو لہب نے کدھرے وی گھٹ نہیں کیتی، پر جناب رسول اللہ پوری ہمت تے حوصلے نال اولاد آدم نوں دوزخ دی آگ توں بچان دے جتن کر دے رہے۔

ابن اسحاق آکھدے نیں نبی جدوں رسول خدا قبیلہ کندہ کول اوہناں دی تھاں تے اپڑے تے اوہناں دے سردار نوں وی اسلام دی دعوت دتی پر گل اوہناں دی سمجھ وچ نہ آئی۔ آپ a جہناں دو جیاں قبیلیاں کول گئے اوہناں وچ بنو

کلب دی اک شاخ بنو عبداللہ وی سی۔ اوہناں نوں دسیا بئی اللہ نے تہاڈے وڈکے دا نام ای اللہ دا بندہ رکھیا اے تے اللہ دے بندے بن جاؤ پر اوہناں وی ایہ دعوت قبول نہیں کیتی۔ بنو حنیفہ نے دعوت اسلامی دے جواب وچ جو کجھ آکھیا اس دی تفصیل تے نہیں لکھ سکی پر ابن اسحاق آکھدے نیں بئی اوہناں بد بختاں نے جو کجھ آکھیا تے کیتا اوہ ہور کسے قبیلے ولوں نہیں سی ہویا۔

نبی اکرم a نے جدوں بنو عامر بن صعصعہ نوں اللہ دے دین ول اوہناں دے اک چالاک بندے نوں آپ دی ہستی دا کجھ نہ کجھ اندازا ہو گیا۔ اوہ بندہ بحیرہ بن فراس سی۔ آکھن لگا ”رب دی سونہ جے میں ایس جوان نوں قریش توں لے لوں تے میں سارے عرب نوں کھا جاواں۔“ فیر بولیا ”بئی ایہہ دسو جے اسیں تہاڈی بیعت کر لوئیے تے فیر تہانوں اللہ دشمنیاں تے غالب وی کر دیوے تے فیر تہاڈے پچھوں اسیں تہاڈے خلیفہ تے جانشین ہوواں گے؟“ اللہ دے نبی نے کسے وقتی فیدے لئی کوئی اچھا کارا نہیں کیتا جہڑا کل نوں ممکن نہ ہوندا تے فرمایا کل تے اللہ دے ہتھ وچ اے، اوہ جو چاہوے گا وہی ہووے گا۔ بحیرہ آکھن لگا تے فیر ایہ گل تے وارا نہیں کھاندی۔ ہن تے اسیں تہاڈا ساتھ دے کے عرباں دے نشانے اپنے سینے تے لوائیے پر جدوں اللہ تہانوں طاقت دے دیوے تے دو جے لوکی اقتدار سنبھالیاں خلیفہ بن جان۔ نہیں بئی ایہ گل تے قبول نہیں۔

بابا جی دامنگھ :

بنو عامر جدوں حج توں اپنے علاقے نوں پر تے تے اک وڈیرے بزرگ نے حج دے دنوں دیاں گلاں باتاں، ہمیش واگ سنیاں۔ حاجیاں دسیا بئی ایس وار تے اک نویں گل سنی اے بئی قریش وچوں بنو عبدالمطلب دے اک جوان نے سانوں آکھیا بئی میں اللہ دار رسول ہاں تے تیں اک اللہ دی پوجا کرو تے نالے میرا ساتھ دیو۔ بابا جی نے ایہ گل سن دیاں ای سر پھڑ لیا تے آکھن لگے: ”اوہ بنی عامر دے حاجیو! ایہ نقصان کوں پورا کرو گے؟ اوس نبی نوں تیں اوہدا ساتھ دتیاں بنا ای چھڈ آئے۔ قسم اے اوس ذات دی جہدے قبضے وچ میری جان اے اوس توں ودھ کے کوئی وی نہیں۔ اوہ نبی اے تے حق سچ آکھدا اے۔ اوہ بنو عامر! تہاڈی عقل نوں کیہ ہو گیا سی؟“ پر بابا جی نرا منکھ ای کر سکہدے سن، اپنی وڈیری عمر پاروں ککے جا کے اوس ہستی دے پیر نہیں سی چم سکہدے۔

سوید b بن صامت یثرب دے پہلے مسلمان :

سوید بن صامت بنی عمرو بن عوف دا اک شریف تے سیانا بندہ سی۔ اوہدے قبیلے دے لوکی اوس دیاں ایہناں خوبیاں تے نالے شاعری تے بہادری پاروں اوس نوں ”کامل“ دے نام نال یاد کردے سن۔ انبوی وچ اوہ حج یاں عمرے لئی مکے آیا تے رسول خدا نے اوس نوں اسلام دی دعوت دتی۔ سوید آکھن لگا کہ ایوں جا پدا اے جویں تہاڈے کول وی اوہی کجھ اے جو میرے کول اے۔ آپ نے فرمایا کہ اچھا دسو تہاڈے کول کیہ اے؟ سوید نے عرض کیتی کہ میرے کول لقمان دی حکمت تے نصیحت اے۔

”اچھا کجھ دکھاؤ یاں سناؤ۔“ حضور a نے فرمایا۔

سویڈ نے اوہ کلام پیش کیا تے جناب رسول اللہ نے اوس دی بڑی تعریف کیتی تے اوس کلام نوں چنگا ودھیا کلام آکھیا۔ نالے فرمان لگے بئی سویڈ جہڑا کلام میرے کول اے اوہ ایس توں وی چنگا اے، کیوں جے اوہ تے بندے دا کلام ہے ای نہیں سگوں قرآن اے تے رب دا کلام اے۔ اوس نے ای میرے اُتے نازل فرمایا اے۔ اوہ نری ہدایت تے نرا نور اے۔ فیروز رسول اللہ نے سویڈ نوں کجھ کلام پڑھ کے سنایا۔ اوس نے آکھیا ہاں واقعی ایہ کلام تے بڑا ہی اچا اے تے نال ای اسلام دی دعوت قبول کر لئی۔ سویڈ اے یثرب پلٹ کے آئے ای سن تے جنگ باعث چھڑ گئی تے اوہ ایس جنگ وچ قتل ہو گئے۔

ایاس بن معاذ..... اوس دا نو عمر منڈا:

یثرب دے دو انصاری قبائل اوس تے خزرج جنگ دیاں تیاریاں کر رہے سن۔ اوس دا اک وفد خزرج دے خلاف سفارتی مہم تے مکے آیا۔ اوہناں وچ اک ہولی عمر دا منڈا ایاس وی سی۔ رسول اللہ نوں اوہناں دے آؤن دا پتا لگا تے آپ a اوہناں کول تشریف لے گئے تے اوہناں نوں آکھیا ”بئی تئیں جس مقصد واسطے تشریف لیائے اوکیہ اوس توں چنگی کسے شے دی وی حاجت رکھدے او؟“ اوہناں پچھیا ”اوہ کہہ دی شے اے؟“ آپ a نے فرمایا ”اوہ شے ایہ ہے بئی تئیں مینوں خدا دار رسول متو، صرف اک اللہ دی عبادت کرو تے اوہدے نال کوئی دوجا سا تجھے دار نہ بناؤ۔ اللہ نے میرے اُتے جہڑی کتاب نازل فرمائی اے، اوس نوں متو۔“ فیروز آپ a نے قرآن پاک دی تلاوت فرمائی۔ اوس جتھے وچوں ایاس بن معاذ بولے ”ساتھیو! خدا دی قسم ایہ اوس توں چنگی گل اے جہدے واسطے اسیں ایتھے آئے ہاں۔“ پر اوہناں وچوں اک ابو الحسیر انس بن رافع نے مٹی دی مٹھ بھر کے ایاس دے مونہہ تے دے ماری تے آکھیا: ”دور ہو جاسا تھوں، اسیں ایس کم لئی ایتھے نہیں آئے۔“ فیروز رسول خدا اوہناں کولوں اٹھ کے ٹر گئے۔

مدینے پرتن توں تھوڑا ای چر پچھوں ایاس اللہ نوں پیارے ہو گئے۔ اوہ اپنی بیماری وچ تے وفات دے ویلے اللہ دی تسبیح کر دے رہے۔ لوکاں دا یقین اے کہ اوہ حالت ایمان وچ اپنے خالق تے مالک کول تہجے۔

b..... یثرب دا سچا عاشق رسول:

سویڈ بن صامت تے ایاس بن معاذ راہیں یثرب تے آل دوالے اوس نبی دی بعثت دی خبر اپڑ چکی سی جس دی لوکاں نوں اڈیک لگی ہوئی سی۔ یثرب دے نیڑے وسوں کیتی بیٹھے نیک بخت بندے جناب ابوذر دے کناں وچ وی ایہ گل پے گئی۔ فیرکیہ ہو یا۔ ایہ کہانی اوہناں دی اپنی زبانی سنو۔ اکھے:

”میں قبیلہ غفار دا بندہ اسساں۔ مینوں پتا لگا بئی مکے وچ اک اجیا آدمی ساہنے آیا اے جہڑا اپنے آپ نوں نبی آکھدا اے۔ میں اپنے بھرانوں آکھیا بئی تئیں اوس بندے کول جاؤ، اوہدے نال گل بات کرو تے کوئی ٹھیک گل پلے پاؤ۔ میرا بھرا مکے گیا، تے ملاقات وی ہو گئی۔ اوہدی والیسی تے جدوں میں پچھیا بئی دسوکیہ خبر لیائے او تے آکھن لگا بئی خدا دی قسم میں اک اجیا بندہ دیکھیا اے، جہڑا بھلیائی دی نصیحت کردا اے تے برائی توں ڈکدا اے۔ میں آکھیا تئیں میری کوئی تسلی نہیں کیتی۔ آخر میں توشہ دان تے کھنڈی پھڑی تے مکے ول ٹر پیا۔ اخیر مکے اپڑ گیا تے مسجد حرام وچ ڈیرا لالیا۔ آب زمزم پی چھڈنا ساں تے لمپے رہنا ساں، کیوں جے میں

جناب رسول اللہؐ نوں پچھاندا نہیں ساں تے کسے نوں پچھن تے وی جی نہیں سی کردا۔ فیر اک دن اک نوجوان متھے لگا جنے اپنا نام علی دسیا۔ اوہ آکھن لگا بئی پردیسی جا پدے او۔ میں آکھیا ”آہو ایوں ای گل اے۔“ اوس نے آکھیا ”تے آؤ فیر میرے ول ٹر چلو۔“ میں اوس نال ٹرتے پیا پر نہ اوس نے کجھ پچھیا نہ میں آپوں دسیا۔“

”سور ہوئی تے میں فیر ایس ارادے نال مسجد حرام گیا بئی آپ a نال کدھرے ملاقات ہو جاوے گی پر کوئی نہیں سی جہڑا کجھ دسدایاں میں اوس کولوں پچھدا۔ اخیر فیر حضرت علی ای آئے تے آکھن لگے، لگدا اے اے جے تہانوں اپنا ٹھکانا نہیں لبھا۔ میں آکھیا ”آہو گل تے ایوں ای اے۔“ اوہناں آکھیا ”اچھا میرے نال چلو تے نالے دسو بئی تہاڈا مسئلہ کیہ اے تے مکے کس مقصد لئی آئے او؟“ میں اوہناں کولوں رازداری دا وعدہ لیا تے گل سنا دتی۔ حضرت علی المرتضیٰ نے فرمایا بئی ٹھیک اے تسیں ٹھیک جگہ تے اپڑ گئے او۔ ویکھو میں اودھرائی جا رہیا ساں۔ جتھے میں جاوڑاں گاتسیں وی اوتھے ای آ جانا۔ فیر علی ٹر پئے تے میں وی پچھے پچھے ٹریا۔ ایتھوں تیکر بئی اوہ اک گھر وچ وڑ گئے تے نال ای میں وی۔ میں جناب رسول خدا a اگے مدعا بیان کیتا تے اوتھے ای مسلمان ہو گیا۔ فیر رسول a نے فرمایا۔ اے ابو ذر! ایہ گل اے سر عام نہ کرنا۔ اپنے علاقے ول پرت جاو تے جدوں ساڈی خبر ملی ساڈے نال آرلنا۔“ میں آکھیا ”یا رسول اللہ! اس ذات دی قسم جس نے آپ نوں مبعوث فرمایا اے میں تے لوکاں نوں اعلانیہ دساں گا۔“ فیر میں مسجد حرام آیا۔ اوتھے قریش وی موجود سن۔ میں آکھیا: قریش دے لوکو!

((اٰتٰتٰہٰدٰاٰنِ لَا اِلٰہَ اِلَّا اللّٰہُ وَاٰتٰتٰہٰدٰاٰنِ مُحَمَّدٍ وَرَسُوْلُہٗ.))

”لوکاں نے آکھیا اُٹھو بئی ایس بے دین دی خبر لوؤ۔ اوہناں مینوں ایناں ماریا بئی ایوں جا پدا اسی میں مرای جاواں گا پر حضرت عباس b اپڑ گئے۔ اوہناں نے قریش نوں آکھیا تسیں غفار دے اک بندے نوں تھاس مار دین لگے او حالاں تہاڈی ساری تجارت دارستا غفار دے علاقے وچوں لنگھدا اے۔ ایہ سن کے لوکی پچھانہ ہٹ گئے۔ اگلے دن فیر اوہ وی کجھ ہوئیہ جو پہلے دن ہوئیہ سی۔“

ایوں جناب ابوذر غفاری b پردیس وچ آ کے مکے دے قریش نوں ایہ گل سمجھا گئے بئی حق سچ دی گل کوں کیتی جاندی اے تے نال ای اپنے بخت وی سنوار گئے۔

طفیل b بن عمرو..... اک سو جھوان سردار:

اسلام دا مڈھلا دور اوکڑاں دا اک کدے نہ بھلن والا دور سی۔ اوس دور وچ لا الہ الا اللہ و انعرہ مارن دا مطلب سدھا سدھا ایہی سی بئی اوس بندے نے شیر دی کچھاڑ وچ سر دے دتا اے۔ فیر وی اللہ دی دتی عقل تے ہمت کولوں کم لیندیاں ہوئیاں ان گنت بندے محمد a نوں اپنا رہنما من کے توحیدی جتھے وچ رلت پاندے رہے۔ اوہناں بھاگاں والیاں بندیاں وچ اک بندہ طفیل بن عمرو دوسی وی سی۔

جناب طفیل اک بھلے مانس بندے مشہور سن۔ چنگی چوکی سو جھ بوجھ دے مالک سیانے شاعر تے اپنے قبیلے دوس دے

سردار سن۔ یمن دے آل دوالے قبیلہ دوس دا چنگا ٹوہر ٹپاسی تے لوکا ئی اوہناں دی سرداری نوں من دی سی۔ اوہ شاعر تے سو جھوان ہون دے نال نال بادشاہی وجاہت وی رکھدے سن۔ مکے وچ جدوں ایہ خبر ملی ئی اوہ تشریف لیا رہے نیں تے مکے دے لوکاں نے اوہناں نوں جند جان نال جی آیاں نوں آکھیا۔ قریش دے لوکاں نے اوہناں دی چنگی ٹہل سیوا کیتی تے نالے پورا ٹل لاکے ایہ گل سمجھائی بی طفیل جی! شیں محمد a ناں دے بندے دی کوئی نہ کوئی گل ضرور سنی ہوئی اے، بس اوس توں بچ کے رہنا۔ اصل وچ اوہ ساڈے دین وچوں نکل گیا اے تے جادوگر بن گیا اے۔ اوہ اپنے جادو نال پیو پتر، خاوند سوانی تے بھرا بھرا وچ جدائیاں پائی آدندا اے۔ اوہنے بندے نال بند انہیں رہن دتا تے مکے دے سارے کماں کاراں داستیا ناس کر دتا اے۔ اسیں نہیں چاہندے بی قبیلہ دوس تے وی کوئی وبال پوے۔ ایس لئی اس دے نیڑے نہ لگنا تے نہ ای اس دی کوئی گل سنیا جے۔

حضرت طفیل آپوں گل سناندے ہوئے آکھدے نیں بی کجھ دیہاڑے تے میں قریش دی نصیحت تے عمل کیتا ایہتھوں تیکر بی مسجد حرام جاندے ویلے میں کناں وچ روں دے پھائے رکھ لید اسان تاں جے کوئی گل میرے کناں وچ نہ پے جاوے، پر اللہ نوں منظور ایہ سی بی اوس رحمت دو جہاں دیاں سوہنیاں گلاں میرے نصیبیاں وچ لکھیاں گئیاں سن۔ ایوں دلیل آئی بی میں اک سو جھوان تے شاعر بند اہاں، چنگے ماڑے دی پچھان کر سکد اہاں، میں محمد a دی کوئی گل سناں تے سہی۔ جے کوئی وچ دی گل ہوئی تے ٹھیک اے سنن وچ کیہ ہرج اے تے جے کر بھیڑا سبق ملیا تے فیہر مینوں دھکے نال تے کسے کم تے نہیں لالینا۔ اخیر اک دن میں اللہ دے رسول دیاں گلاں سن لئیاں جہناں میرے دل تے ڈاڈھا اثر کیتا۔ آپ جدوں مسجد حرام توں نکل کے گھر تشریف لے گئے تے میں وی پچھے پچھے اپڑ گیا۔ میں آپ a نوں ساری گل سنائی تے نالے اسلام قبول کر لیا۔ اوس توں بعد جناب رسول اللہ a نوں عرض کیتی بی میری قوم وچ میری گل منی جاندی اے۔ میں اوہناں ول پرت کے جاواں گاتے اوہناں نوں وی اسلام دی دعوت دیواں گا، اللہ اگے دعا کرو بی اوہ مینوں کوئی نشانی (کرامت) دے دیوے۔

نبی اکرم a نے جناب طفیل لئی دعا کیتی۔ آپ جدوں قبیلہ دوس کول اپڑے تے اللہ نے اوہناں دے چہرے تے اک روشنی پیدا کردتی۔ فیہر جناب طفیل دی اپنی دعا نال ایہ روشنی چہرے توں اوہناں دی کھنڈی وچ آگئی۔ آپ دی دعوت نال آپ دے والد صاحب تے سوانی مسلمان ہو گئے۔ دوس دے باقی لوکی وی ہولی ہولی مسلمان ہوندے گئے، ایہتھوں تیکر بی جدوں صلح حدیبیہ توں بعد اوہناں نے ہجرت کیتی تے اوہناں دی قوم دے ۷۰ یاں ۸۰ خنوا دے اوہناں دے نال سن۔ حضرت طفیل دا کردار اسلامی توارخ وچ ہمیش یاد رکھیا جاوے گا کیوں جے اوہناں نے دین واسطے وڈے وڈے کارنامے انجام دتے۔ اخیر جنگ یمامہ وچ شہادت دا جام نوش فرما کے ہمیش دی حیاتی پا گئے۔

ضماد اُزدی b:

حضرت ضما د اُزدی یمن دے رہن والے سن تے قبیلہ ازد دشنوء دے فرد سن۔ آپ دی پچھان اک اچھے بندے دی سی جہڑے دم دارو تے جھاڑ پھونک کردے نیں۔ اک واری مکے آئے تے اوہ تھے دے بد بخت جاہلاں توں ایہ گل سنی بی ایہ

محمد (a) جھڑا آکھدا اے بنی میں اللہ دانی ہاں، ایس نوں کوئی کسراے۔ دماغ وچ گل آئی بنی چلو جے ایہ گل اے تے کوئی وس کٹ ویکھدا ہاں خورے اللہ میرے ای ہتھوں اوس وچارے نوں آرام دے دیوے۔ جناب ضما د b ایسے ارادے نال جناب حکیم اعظم a کول جاتجے تے اخیر اپنے تن تے من دیاں ساریاں بیماریاں اوتھے ای سٹ آئے تے اک نویں دنیا، تے اپنے اندراک نوں ضما دے کے واپس پر تے۔

ہو یا ایہ بنی آپ نے جناب رسول اللہ a نوں جا کے آکھیا بنی میں جھاڑ پھونک کرنی جان دا ہاں۔ کیہ تہا نوں وی لوڑ ہے؟ آپ نے فرمایا:

”بناشبا ساری تعریف اللہ لئی اے۔ اسیں اوہدی ای تعریف کر دے ہاں تے اوسے کولوں مدد چاہندے ہاں۔ جیس نوں اللہ ہدایت دیوے اوس نوں کوئی گمراہ نہیں کر سکدا۔ جیس نوں اللہ بھٹکا دیوے اوس نوں کوئی ہدایت نہیں دے سکدا تے میں گواہی دیندا ہاں بنی اللہ دے سوا کوئی معبود نہیں۔ اوہ کلا اے، اوس دا کوئی شریک نہیں تے میں گواہی دیندا ہاں بنی محمد (a) اس دے بندے تے رسول میں۔“

حضرت ضما د نے آکھیا ذرا ایہ کلمے فیر سنا دیو۔ آپ نے اوہناں دے آکھن تے تن وارا یہو کجھ پڑھیا۔ ضما د آکھن لگے میں کاہناں جادوگراں تے شاعران دیاں گلاں بڑیاں سنیاں میں پر ایہو جیہی گل میں کدھرے نہیں سنی۔ ایہ تے سمندر دی ڈونگھیاں ورگا کلام اے۔ لیا ویا رسول اللہ! اپنا ہتھ ودھاؤ میں بیعت کراں تے ایوں جناب ضما د از دی مسلمان ہو گئے۔



بشر تے گردوں

(واقعہ معراج)

نبی a نوں اک اللہ دے نعرے لاندیاں کوئی باراں ورھے ہو چلے سن۔ آپ a دے ویری آپ دے راہ ڈکن دے سارے جتن کر چکے سن۔ پرفیروی آپ دی آواز عرب دے ہر پاسے اپڑ رہی سی۔ اوکڑاں تے سوکڑاں دی ایس کھچا تانی وچ رب نے اپنے محبوب نوں مسجد حرام توں مسجد اقصیٰ تیکر تے بیت المقدس توں سدرۃ المنتہیٰ تیکر سیر کر کے اس دے مان ودھائے تے نالے اپنیاں نشائیاں دکھائیاں۔

گردوں کسے بشر دی زد وچ کدوں آیا تے اک آدمی نے آدم دیاں شانوں نوں کہڑے چن ودھایا، ایہدا پکا پیڈھاپتا کسے نوں نہیں پر امام زہریؒ فرماندے نیں بئی ایہ ہجرت مدینہ توں اک سال پہلوں دی گل اے۔ ابن عبدالبرؒ دا خیال اے بئی معراج تے ہجرت دے وچکار اک سال تے دو مہینیاں دا وقفہ سی۔ امام طبری دا قول اے بئی جس ورھے آپ a نوں نبوت عطا کیتی گئی او سہ سال معراج وی ہوئی۔ امام نووی تے امام قرطبی نے نبوت دے ۵ ویں سال دا واقعہ لکھیا اے۔ کچھ بزرگاں دا ایہ خیال وی اے بئی اسراء تے معراج وکھو دکھ ویلے دی گل اے پر معراج ہجرت توں سولہاں (۱۶) مہینے پہلوں نبوت دے بارھویں ورھے ماہ رمضان وچ ہوئی۔ حضرت علامہ سلمان منصور پوری نے نبوت دے ۱۰ ویں ورھے دی تاریخ ۲۷ رجب نوں ٹھیک منیا اے پر الر حیق المختوم دے مصنف مولانا صفی الرحمان مبارک پوری نے علامہ منصور پوری نال اتفاق نہیں کیتا تے دلیل ایہ دتی اے بئی حضرت خدیجہ دی وفات نبوت دے ۱۰ ویں ورھے رمضان دے مہینے وچ ہوئی سی۔ اودوں تیکر معراج نوں ایس لئی نہیں منیا جاسکدا بئی اوہناں دی وفات دے ویلے نماز پنجگانہ فرض نہیں سی۔ جے کر معراج دا واقعہ پہلوں ہوئی ہوندا تے نماز وی فرض ہوئی ہوندی۔ مصر دے جناب محمد حسین بیگل نے سیرت اُتے اپنی مشہور کتاب حیات محمد a وچ ۶۲۱ھ لکھیا اے، تے مستشرقین نے سنیاں ورھے نوں کوئی ایڈی اہمیت نہیں دتی۔ معراج دے زمانے اُتے چوکھے مسلمان بھرا گل بات کر دے دکھالی دیندے نیں۔ ایس لئی میں وی ایس دا اپنا کوویرا کیتا اے ورنہ ایس گل نال واقعے دی اصل اہمیت تے کوئی فرق نہیں آؤندا۔

واقعہ ایوں ہے بئی اک راتیں نبی اکرم a خانہ کعبہ دے نال حطیم وچ آرام فرما رہے سن۔ جبرائیل امین حاضر خدمت ہوئے۔ آپ نوں جگایا تے رب دے حکم دی خبر دتی۔ فیر آپ a نوں پہلوں مسجد اقصیٰ تیکر تے فیر مسجد اقصیٰ توں سدرۃ المنتہیٰ دی سیر کرائی جہڑی انوار ربانی دی تجلّی گاہ سی۔ جناب جبرائیل دیاں ہتھوں تے اک تھاں تے جواب

دے گئیاں پر محبوب ربانی اگے دھن دا حکم پاؤندے رہے تے قربت محبت دے مزے چکھدے رہے۔ کئے گو نیڑے ہو گئے ایس دا ذکر میزبان نبی تے اپنے محبوب پر و ہنے دا مالک و خالق آپوں ایناں اکھراں نال کردا اے:

﴿ثُمَّ دَنَا فَتَدَلَّى فَكَانَ قَابَ قَوْسَيْنِ أَوْ أَدْنَىٰ﴾ (النجم: ۸، ۹)

”فیرا وہ نیڑے ہو یا تے ہور نیڑے ہو یا ایٹھوں تیکر کہ نرا دو کماناں دے برابر سگوں ایس توں وی گھٹ فرق رہ گیا۔“
فیر جدوں بنداتے مالک، محبوب تے محبت، مخلوق تے خالق، عابد تے معبود، پر و ہناتے گھر والا اک دو جے دے ایسے نیڑے ہو گئے تے فیرا تھے کیہ گلاں ہوئیاں ہوں گئیاں، ایہ تے دوواں نے ای دسنا پسند نہیں کیتا۔ سدن والا آپوں آکھدا اے:

﴿فَأَوْحَىٰ إِلَىٰ عَبْدِهِ مَا أَوْحَىٰ﴾ (النجم: ۱۰)

”فیر وحی کیتی اللہ نے اپنے محبوب بندے ول جہڑی وحی کیتی۔“

بس گل مک گئی۔ چنتا بیکار اے، رو لے فضول نیں۔ جہڑیاں گلاں ہوئیاں، بس ہوئیاں نیں۔ گلاں کرن والے آکھدے نیں ”بس ہوئیاں، جو ہوئیاں“ فیر تہا نوں کیہ؟ مینوں کیہ؟
ایس سفر دی گل سویرے سبھ توں پہلاں آپ نے اپنی چاچا زاد بھین اُم ہانی نال کیتی۔ اوہناں آکھیا:
”پر ویر جی! ایہ گل کسے نال نہ کریا جے نہیں تے لوکی تہا نوں جھوٹا آکھ کے تہا نوں تنگ کرن گے۔“
”میں تے ضرور کراں گا، رب دی سونہ“ آپ نے جواب دتا۔

تے فیر پچ جچ آپ a نے مکے دے لوکاں اگے ایس واقعے دا ذکر کیتا۔ ایہہ وکھری گل اے بئی کوئی منکر بنیا تے کوئی ”صدیق۔“
آؤ گل اگے ٹور دے ہاں:

ادھی رات دے ویلے جدوں کائنات نوں چپ لگی سی، تاریاں دی لاٹ جدوں نویلکی جہی سی، آسمان دی جھات دس دی سی بئی عرش سجایا گیا اے۔ بس ہر پاسے اک وکھری جہی تے چپ کیتی جہی دکھ سی۔ پنکھ پکھیر واپنے آکھیاں وچ جھان موئیاں وچ پائی بیٹھے سن۔ ڈنگر جنور وی دھرتی تے نیندراں مان رہے سن۔ ہوا دی سرسراہٹ تے وگدے پانیاں دیاں چھلاں وی سوچیں پیاں سن، اوس ویلے جناب محمد a دی کنیں اک ندا پئی: ”اٹھو، سوہنیو اٹھو۔“ جناب محمد a اٹھدے نیں۔ جبرائیل دست بستہ کھلوتے نیں۔ نورانی شکل جو یں برف دا گالا۔ گھنگھریا لے وال، بدن تے زربفتی پوشاک، پوشاک تے موتی تے جواہرات، دوواں باہواں وچ قوس قزح دے رنگاں والے پر، ہتھ وچ اک نویلکی جہی سواری دی لگام..... براق..... آہو براق..... اوہ اپنی پشت نوں سکیڑ رہیا اے..... ایہ اشارہ اے بئی آؤ..... جناب محمد a تشریف لیاؤ..... میرے بھاگ سنوارو۔

براق ہواواں دے سینے چیر داتے کائنات دے کھلا رسمیت دا اڈ دا جاندا اے، بس اڈ دا ای جاندا اے..... جبرائیل وی نال نیں۔ ایوں جاپیا اے جو یں اکھ تھپکدیاں ای براق کوہ سینا دے اوس مقام تے جاکھلوتا اے جتھے رب نے حضرت

موسیٰؑ نوں ہم کلامی دا شرف بخشیا سی۔ براق دی دوجی لانگھ بیت اللحم دے اوس مقدس تھاں تے سی جتھے حضرت عیسیٰؑ دی ولادت ہوئی سی۔ براق نے اک ہور لمی لانگھ بھری۔ رسول خدا نوں ڈکن لئی ہوئی واپس دتیاں گئیاں پر عرش دے ایس پروہنے نوں مان سی بی سدن والے نے جتھے کھلارنا ہووے گا آپوں کھلھارے گا..... میزبان رب سی، سواری اوس دی سی، خادم اوس داسی، ٹورنا تے کھلارنا اوسے داسی، فکر کس گل دی سی؟

مسجد حرام توں بیت المقدس دا سفر پورا ہو گیا۔ آپ a نے بیت المقدس وچ انبیاء دی امامت فرماندیاں نماز پڑھائی تے فیرا گلی منزل ول ٹر پئے۔ اوس منزل ول جس نے آدمیت نوں جیون دے نوں ڈھنگ سکھائے۔

انجائیاں راہواں دے مسافر آسمان تے اپڑ گئے تے جبرائیل g نے بواکھلویا۔ آپ a نے حضرت آدم نوں ویکھیا۔ اوہناں نوں سلام کیتا۔ اوہناں آپ a نوں جی آیاں نوں آکھیا تے آپ دی نبوت دا اقرار فرمایا۔ رب نے آپ نوں اوہناں دے سچے پاسے چنگے تے کھے پاسے بھٹے بھاگاں والیاں دیاں روحاں دکھائیاں۔ فیر آپ نوں دوجے آسمان تے لے جایا گیا۔ اوتھے حضرت یحییٰؑ تے حضرت عیسیٰؑ نال ملاقات ہوئی۔ آپ a نے سلام کیتا۔ دوواں نے جواب دتا۔ مبارک دتی تے نالے آپ a دی نبوت دا اقرار فرمایا۔ فیر تیجے آسمان تے حضرت یوسفؑ، چوتھے تے حضرت ادریسؑ، پنجویں تے حضرت ہارونؑ، چھویں تے حضرت موسیٰؑ تے ستویں تے حضرت ابراہیمؑ g نال ملاقات ہوئی۔ سبھ انبیاء نے آپ نوں مرحبا آکھیا تے آپ دی نبوت دا اقرار کیتا۔ ایس توں بعد آپ نوں سدرۃ المنتہیٰ تیکر لے جایا گیا تے فیر بیت معمر وی ظاہر کیتا گیا۔

ایس سفر دی اخیر ایہ سی کہ اک عابد اپنے معبود دے، اک بندہ خدائے جبار دے تے اک محبوب a اپنے محبت دے اینا نیڑے اپڑ گیا بی دوواں دے وچکار دو کماناں یاں ایس توں وی گھٹ دا فاصلہ رہ گیا۔ اوتھے کجھ گلاں ہونیاں جہناں نوں جانن دے جتن کرنا بے کاراے۔ اوہ دودوستاں دیاں گلاں سن۔ سیانے بندے یاراں دیاں آپس دیاں گلاں دی کھوج پڑچول نہیں کردے۔ پر آہو اک گل اوس نویکلی محفل دی ایہ ہے بی ۵۰ نمازاں فرض ہونیاں۔ جدوں آپ a پچھاں پرت رہے سن تے حضرت موسیٰؑ نال ملاقات ہوئی جہناں نے نمازاں گھٹ کران دا مشورہ دتا۔ نبی رحمت a خدائے ذوالجلال کول کئی واری تشریف لے گئے تے اخیر پنج نمازاں دا تحفہ لے کے پرتے۔ معراج دے سفر وچ آپ a دی مہمان داری کر دیاں آپ a نوں ددھ تے شراب دی پیش کیتی گئی۔ آپ نے ددھ پسند فرمایا۔ ایس تے جبرائیل g نے آکھیا بی یا رسول اللہ! تسبیح فطرت دا رستا لیا اے ورنہ جے تسبیح شراب لئی ہوندی تے تہاڈی امت گمراہ ہو جاندی۔ آپ a نے جنت تے جہنم دے منظری ویکھے تے اوہناں لوکاں نوں وی ویکھیا جہڑے یتیمناں دا مال کھا جان دے نیں۔ اوہناں دے ہونٹھ اونٹھ دے ہونٹھاں وانگ سن۔ اوہ اپنے مونہاں وچ پتھر دے ٹکڑیاں ورگے انگارے بھر رہے سن جہڑے اوویں ای اوہناں دے جساماں وچوں نکل رہے سن۔ آپ نے اک اجہی ٹولی وی ویکھی جہناں دے پیٹ فرعونیاں وانگ ڈھول جڈے سن۔ اوہناں نوں لوکی پیراں تھلے مدھ رہے سن۔ آپ a نوں دسیا گیا بی ایہ سودخور سن۔ آپ نے اک اجہی منڈلی وی ویکھی جہناں دے اگے دو طرحاں دا گوشت پیاسی، چنگا تے تازہ وی تے گلیا سڑی وی۔

پراوہ تازہ چھڈ کے مسیاتے سڑیا ہو یا گوشت کھا رہے سن۔ آپ نوں دسیا گیا بی ایہ اوہ لوکی نیں جہڑے منکوحہ نوں چھڈ کے آوارگی کر دے سن۔ ایوں عورتاں دی وی اک اجہی ٹولی دیکھی جہڑیاں اپنیاں چھاتیاں نال لٹک رہیاں سن۔ ایہ اوہ عورتاں سن جیہڑیاں حرام اولاد پیدا کر دیاں نیں تے فیراوس نوں اپنے خاوندان دی بی دسدیاں نیں۔

میرے عزیز پڑھنہار سجنو! ایہ انسانی توارخ دے اک نویکلے سفر دیاں اوہ گلاں نیں جہڑیاں تسیں ہن توں اگدیں وی پڑھیاں یاں سنیاں ہون گئیاں۔ معراج دے حوالے نال گل بات کر دیاں یاں لکھدیاں جہڑی اصل گل میں ہمیش اپنے بچاں نال کیتی اے اوہ ایہ ہے بی مسجد حرام توں بیت المقدس تیکر تے فیربیت المقدس توں سدرۃ المنتہی تیکر دی ایہ نویکلی سیریاں نویکلا سفر بھلا نزاروح پاک داسی یاں جسد مبارک دا؟ تے جے کرنبی اکرم اپنے جسم پاک دے نال سفر فرمایا سی تے ایہ کیوں ممکن ہو یا؟ آکھیا جاندا اے کہ فطرت کدے وی اپنے قانون نہیں بدلدی۔ توارخ تے دینیات دے پڑھنہاراں، ماہراں تے ویلے دے سوجھواناں نوں فطرت دے دوجے لکھاں رازاں توں پردا چکن وانگ ایہ راز وی کھولنا ہو دے گا۔ جے میں ایہ ثابت کراں بی ایہ سفر جسم مبارک نال یعنی Physical Journey سی تے فیر ماہرین طبعیات نوں نیوٹن تے آئن سٹائن دے وچکار داتن صدیاں دا پنڈھ، جہڑا اوہناں کچھو کچھ نہیں جوں وانگ کہتا، اوہدی رفتار ہن ودھانی پوے گی۔ ایس بحث نوں اگے ٹور دیاں میں ایہ گزارش کرنا ضروری سمجھدا ہاں کہ جدوں میں معراج جسمانی تے زور دیندا ہاں تے میں اُمّ المؤمنین جناب عائشہ صدیقہ توں ٹردی ایس روایت نوں بھل نہیں گیا ہوندا کہ ”شب معراج وچ رسول اللہ جسد مبارک غائب نہیں سی ہو یا سگوں اللہ نے نری آپ a دی روح مبارک نوں ہی سیر کرائی سی۔“ میرا ایس گل تے وی پوری طرحاں ایمان اے تے ایہدے وچ اک رتی وی شبہ نہیں بی جے کر نزاروحانی معراج وی سی تے میرے آقا دی عظمت وچ بھورا وی فرق نہیں آؤندا سگوں جناب محمد حسین ہیکل تے آکھدے نیں کہ ایس طرحاں آپ a دی شان ہو وودھ جاندی اے۔ اوہناں دا خیال اے:

”اسراء تے معراج وچ آنحضرت a دی روح مادیات وچوں آزاد ہو کے پہلوں تے وحدت کلی وچ جذب ہو گئی تے فیرساری کائنات دے اُتے ایوں چھا گئی بی حواس دے اگے آؤن والیاں ساریاں رکاوٹاں مک شک گئیاں تے کائنات دی ہر شے روح محمدی a دے شیشے وچ اُتر گئی۔ اُس شیشے وچ آپ a نے ویکھ لیا بی نیکی تے حسن و حقیقت کمال ول لے جان دے نیں تے شر، رذالت تے باطل اتے اخیر حق دا غلبہ ہو کے رہندا اے۔“

ہن ایہہ سوچ دی پرانی تے Outdated ہوندی جاندی اے۔ انسائیکلو پیڈیا بریٹانیکا دا مقالہ نگار اپنے آرٹیکل (معجزہ) تے بحث کر دیاں لکھدا اے:

It is an unwarranted idealism and optimism which finds the course of nature so wise so good that any change in it must be regarded as incredible.

ایہہ نظریہ اک غیر معقول تصور تے خوش فہمی اے کہ فطرت داسر بندھ ایڈا عقل وندانہ تے ایڈا چنگا ہوندا اے کہ ایہدے وچ کسے وی قسم دی تبدیلی نوں جائز نہیں سمجھیا جاسکدا۔

ہن اسیں واپس حضرت عائشہ والی روایت ول جاندهے ہاں تے ویکھدے ہاں بئی راویاں دی لڑی وچ جہڑے لوکاں دے نام نظر آؤندے نیں کیہ اوہناں دے حافظے یاں نیت تے کسے نوں کوئی شبہ تے نہیں۔ فیردو جی گل ایہ ہے بئی دنیا دے کسے محقق تے مؤرخ نوں وی اس گل تے اختلاف نہیں کہ معراج سکے وچ ہو یا یعنی ایہہ مکئی زندگی دا واقعہ اے، جدوں کہ ام المومنین حضرت عائشہ صدیقہ نال زوجیت دا تعلق مدنی زندگی وچ بنیا۔ فیر سوال ایہ پیدا ہوندا اے کہ جناب عائشہ نال نبی اکرم a نے ایہ گل کدوں تے کہڑے حالات وچ کیتی بئی میں اپنے جسد پاک نال آسماناں تے نہیں ساں گیا؟ ایس سوال دا کوئی جواب نہیں لہدا۔

معراج دے سلسلے وچ اک ہور ضروری نقطہ نظر جناب کونسن ورجیل جو ریودا ہے۔ رومانیا دے ایہ فاضل مستشرق اپنے ملک دے وزیر خارجہ وی رہے نیں تے نبی آخری الزمان a دی پاک حیاتی دا اوہناں چوکھا ڈنگھا مطالعہ کیتا اے۔ اوہ اپنی کتاب ”محمد a“ وچ لکھدے نیں:

”سائنسی اصطلاح) قوت جاذبہ دا اثر جہوں نیوٹن نے کشف کیتا سارے جہان تے جھٹ پٹ ہوندا اے تے ایوں ای اس دار عمل وی ہوندا اے۔ اسلامی مصنفان موجب پیغمبر اسلام دے براق دی رفتار ایڈی تیزی بئی اوس نوں نور دی رفتار توں وی تیز سمجھیا جاندا اے۔ جے اسیں ایہہ آکھیں کہ جناب محمد جاگدے ہوئے اپنی روح دے ذریعے آسماناں تے گئے تے علم فزکس دی بحث پیش نہیں آؤندی پر جے ایہ آکھیا جائے بئی اوہناں نے اپنے پاک جسے نال آسماناں دا سفر کیتا تے فیر ایہ سوال پیدا ہوندا اے بئی کیہ اک جسم تن لکھ کلومیٹر فی سیکنڈ دی رفتار برداشت وی کر سکدا اے کہ نہیں؟“

(چیتے رہوے پئی آئن سٹائن دے مفروضے موجب ایس جہان دا کھلار ایڈا اے بئی اس دا قطر تن ہزار ملین یعنی تن ارب شمسی سال دے برابر اے۔)

جناب کونسن اگے لکھدے نیں بئی ”کچھ علمائے اسلام ایہ آکھدے نیں کہ حضرت محمد a اپنے پاک جسے دے نال نور دی رفتار توں وی تیزی نال گئے تے ایوں ای واپس پر تے۔ بھاسی علم فزکس توں ایہ گل ثابت نہیں کیتی جاسکدی فیروی میں (کونسن ورجیل) اس نظریے نوں مذہبی طور تے تسلیم کردا ہاں کیوں جے میں مسلماناں دے مذہبی عقائد نوں احترام نال ویکھدا ہاں تے نالے اسیں مسیحی لوگ وی کچھ ایہہ مذہبی مسئلایاں دے سامنے کھلو تے نظر آؤندے ہاں جہناں نوں علم فزکس دی روح نال ثابت نہیں کیتا جاسکدا۔ پر جویں اسیں اپنے مذہبی عقیدیاں تے یقین رکھدے ہاں، دو جیاں دے عقیدے نوں وی بے چون چرامن لینا چاہیدا اے۔“

ایتھے میں ایس کتاب دے پڑھنہاراں اگے گزارش کراں گا کہ اوہ رومانوی وزیر خارجہ دے نیوٹن تے آئن سٹائن دے ذکر نوں ضرور چیتے رکھن کیوں جے اگے ایہناں حوالیاں نال چوکھی بحث ہونی اے۔

ایس سائنسی بحث توں پہلاں دور حاضر دے اک دوہور مستشرقین دا موقف وی پڑھ لینا چاہیدا اے کیوں جے ہن اوہ لوکی اسلام نوں پورے نمبر دی عینک نال ویکھن لگ پئے نیں۔ گئی صدی دے اخیر دی دہاکے وچ چھپی کتاب ”محمد a اینڈ دی اور بیجنز آف اسلام“ دے مصنف ایف ای پیٹرز نے ایس سلسلے وچ ابن اسحاق نال اتفاق کر دیاں لکھیا اے:

"I have heard that the Apostle used to say:

My eyes asleep while heart is awake. Only God knows how revelation came and he saw that he saw. But whether he was asleep or awake, it was all true and actually happend."

”میں سنیا اے بنی رسول مقبول آکھدے ہوندے سن کہ میریاں اکھاں سوندیاں نیں پر میرا دل جاگدا رہندا اے۔ صرف اللہ ای جان دا اے بنی معراج کوں ہوئی تے جو کجھ آپ a نے دیکھیا کوں دیکھیا۔ پر اوہ بھاویں جاگدے سن یاں ستے ہوئے، ایہ سبھ کجھ سچ اے تے ایوں ای ہوئیا اے (جویں آپ a نے دسیا)“

امریکہ وچ چھپی کتاب ”محمد a..... اے بائیوگرافی آف دی پرافٹ“ دی مصنفہ کیرن آرمسٹرانگ دا خیال اے بنی محمد a حضرت عیسیٰ وانگ معجزے نہیں سن وکھاندے۔ بی بی کیرن لکھدی اے بنی جناب محمد a تے آپوں آکھدے سن بنی اوہ دو جیاں بندیاں وانگ ای اک بندے ہن۔ لکھدی اے:

"Muhammad on the other hand did not work miracles. He always claimed that the revelation of the Quran was a miracle in itself and a sufficient sign of its divine origin. He insisted that he was simply a man like other men and the Quran confirmed this"

”دو جے پاسے محمد a نے معجزات نہیں وکھائے۔ اوہ ہمیش آکھدے سن بنی قرآن دا نزول آپوں اک معجزہ اے تے ایہہ آپ ای اپنے الہامی ہون دی کافی دلیل اے۔ اوہناں زور دے کے آکھیا بنی اوہ دو جیاں بندیاں وانگ ای اک بندے نیں تے قرآن ایس گل دی تصدیق وی کیتی۔“

ایسے پاروں کیرن آرمسٹرانگ نے کوئی اجہی بحث نہیں کیتی جس دا تعلق کسے معجزے نال ہووے۔

الہامی سنپے نوں ٹھیک من دیاں ہوئیاں میکسم روڈنس اپنی کتاب ”محمد a“ دے صفحے ۷۷ تے لکھدے نیں:

"This is now sufficiently well Known and accepted to need on detailed explanation here, not even of the distincitions and qualifications introduced by psychologists. One has only to dip into psychology text books, to find a hundred perfectly bonafide cases of People in a state of hallucination hearing things and seeing visions which they claim quite genuinely never to have seen or heard before."

”ہن ایہ گل کوئی لکی چھپی نہیں تے ایہدے لئی کوئی چوکھے دیروے دی وی لوڑ نہیں، ایتھوں تیکر بنی نفسیات دے ماہراں ولوں دے گئے معیار مرتبے یاں تعلیم دی وی لوڑ نہیں۔ کسے بندے نوں بس نفسیات دیاں

ٹیکسٹ بکس دیکھیں پین گئیاں تے اوس نوں اک سواچے سدھے تے نترے ہوئے کیس لہجہ جان گے جہناں
 وچ اوہ لوکاں نوں معمول توں ہٹ کے اچھیاں گلاں سندیاں یاں اچھیاں چیزاں دیکھدیاں دیکھن گے جہناں
 دی بابت اوہ حقیقی آکھدے نیں نئی پہلوں کدے دیکھیاں سن تے نہ سنیاں سن۔“

معراج تے قرآن وحدیث:

حضرت عائشہ والی روایت، جناب محمد حسین ہیکل دا اک نوٹیکلا خیال تے چار مستشرقین دا موقف پڑھن توں بعد ہن
 اسیں اس واقعے نوں قرآن وحدیث دے حوالے نال دیکھدے ہاں۔ قرآن آپ اس واقعے دا ذکر ایہناں اکھراں توں
 شروع کردا اے۔ ”سبحن الذی اسری“ نئی پاک اے اوہ ذات جہڑی اپنے بندے نوں رات ای رات وچ مسجد حرام
 توں مسجد اقصیٰ تیکر لے گئی۔ سوچن دی گل اے نئی سبحان اللہ دے اکھر کدوں تے کیوں بولے جاندے نیں۔ کیہ کسے عام
 جہی گل تے یاں کسے خاص یاں نویکے خاب سنن تے تسنیں کدے سبحان اللہ آکھیا اے؟ نہیں، بالکل نہیں۔ ایوں نہیں ہوندا
 سگوں ہندا ایہ ہے نئی جدوں کوئی بندہ چوکھا اچرج یاں وڈا سارا کم کردا اے یاں چوکھی وڈی ساری خوش خبری ملدی اے یاں
 کوئی چوکھی چنگی شے لہدی اے تے اسیں ”سبحان اللہ“ آکھدے ہاں۔ بس ایسے عادت یاں معمول دی روشنی وچ رب
 تعالیٰ دے کلام نوں پڑھئے تے گل سائمنے آجاندی اے نئی اسراء یاں معراج کوئی خواب نہیں سی۔

جسٹس پیر محمد کرم شاہ الازہری لکھدے نیں کہ سبحان دے کلمہ توں ایہ دعویٰ کیتا گیا اے کہ اللہ ہر عیب، نقص، کمزوری
 یاں بے وی توں پاک اے۔ ایس گل لئی کسے دلیل دی وی لوڑ سی کیوں جے کوئی دعویٰ دلیل توں بغیر قابل قبول نہیں ہوندا۔
 ایسے لئی رب نے دلیل موجب ارشاد فرمایا ”الذی اسری بعبدہ“ کیوں جے اللہ تعالیٰ اوہ اے جس نے اپنے محبوب
 بندے نوں رات دے تھوڑے جے جھے وچ ایڈالما سفر کرا دتا تے نالے اپنی قدرت دیاں وڈیاں وڈیاں نشانیاں وی دکھا
 دتیاں۔ جہڑی ذات ایڈالما پندھ ایڈے تھوڑے وقت وچ کراسکدی اے، واقعی اس دی قدرت دی اخیراے، اوسدی
 وڈھیاں دی کوئی حد نہیں تے اوس دی کبریائی دے دامن تے کسے کمزوری یاں بے وسے پن دا کوئی داغ نہیں۔ تے غیر
 جہڑے واقعے نوں اللہ تعالیٰ نے اپنی سبحانیت دی دلیل موجب دسیا اے اوہ کوئی معمولی واقعہ نہیں ہوسکد اسگوں کوئی چوکھا
 وڈا ضروری، اُچی شان والا تے عقل نوں عاجز کرن والا ای ہوسکد اے۔ ایس لئی معراج دا انکار کرنا گویا اللہ تعالیٰ دی
 قدرت تے بے عیب ہستی دی اک قرآنی دلیل نوں رد کرن والی گل اے ﴿

جدوں حضور بارگاہِ صمدیت وچ مقام ”قاب قوسین اودانی“ تے فائز ہوئے تے اللہ تعالیٰ نے پچھیا ”بِمِ اشرفک
 یا محمد“ اے سراپا حمد! اج میں تہانوں کس لقب نال سرفراز کراں۔ بندہ خاص نے عرض کیتی: بنسبتی الیک
 بالعبودیتہ (اے میرے معبود) مینوں اپنا بندہ کہہ کے ہی عزت بخشو۔ اللہ تعالیٰ نے معراج دا ذکر فرمادیاں اپنے محبوب دی
 اوسے صفت دا ذکر کیتا جہڑی اوس نے آپوں پسند فرمائی سی۔ نالے عہدہ دے اکھرتوں ایہ وی ثابت ہوندا اے کہ ایہ سفر
 حالت خواب وچ نہیں ہویا، یاں نرا روح نے بازیابی دا شرف حاصل نہیں کیتا سگوں روح تے جسم پاک نے جاگدیاں

ہوئیاں ایہ پندھ غیٹھ یا اے کیوں جے عہداللفظ نرا روح لئی نہیں ورتیا جاسکد اسگوں روح تے جسم (دوواں) دے اکھ نوں ای عبد آکھیا جاسکد اے۔ خواباں وچ تے ہر ایرا وغیرا لے پندھ نیڑ دا اے۔ راتوں رات تاج محل بناندا اے۔ اپنیاں کئی حسرتاں پوریاں کر دا اے، اپنے ادھورے بت نوں پورا ہوندا ویکھدا اے، اپنی کرچی کرچی روح نوں اکھیا کر دا اے تے سویرے فیراوس نوں حیاتی دے پتھر لے راہواں تے کھلر یا ویکھدا اے۔ پر ایہ خواب سن کے نہ تے انکار کیتا جاندا اے تے نہ ای کوئی حیرانی ہوندی اے، سگوں نفسیات دے سیانے تے ایہ گل زور دے کے آکھدے نیں کہ خواب ہوندا ای حسرتاں پوریاں کرن لئی اے۔ اوہناں دا خیال اے کہ کوئی بنداجھڑی خاش اپنی عملی زندگی وچ پوری نہیں کر سکد اوہ خاش اپنے خواباں وچ پوری کر لیندا اے۔ دو جے پاسے ویکھو کہ حضور a نے جدوں ایہ واقعہ کھدے دے لوکاں نوں سنایا تے او تھے تھرتھلی مچ گئی۔ کافر تے فیر کافر سن کئی مسلمان وی مرتد ہو گئے۔ کیہ ایہ سارا اودھم خواب سن کے مچ گیا سی؟ کیہہ بڑے اک خواب نوں اللہ تعالیٰ نے لوکاں دی آزمائش دا ذریعہ بنا دتا سی؟ جویں کہ قرآن نے فتنۃ الناس دے اکھورتے نیں؟ ذرا سوچو تے سہی۔

معراج نوں خواب آکھن والیاں دا خیال اے بئی اللہ نے لفظ ”رویا“ ورت کے خاب ول ای اشارا کیتا اے۔ آؤ ذرا غور کریئے۔ آیت اے:

﴿وَمَا جَعَلْنَا الرُّيَا الَّتِي ارَيْنَاكَ الْاَفْتِنَةَ لِلنَّاسِ﴾

(تے جہڑا ”رویا“ اسیں تہانوں دکھایا اے ایس نوں اسیں لوکاں لئی آزمائش بنا کے رکھ دتا)

ہن ویکھو بئی جے اسیں اتھے ”رویا“ دا مطلب خواب لویئے تے فیر کدے خواب وی آزمائش دا سبب بنیا اے؟ خواباں اُتے تے کوئی پابندی نہیں چلدی۔ ایہ کسے ضابطے یا قانون دے پابند نہیں ہوندے۔ جے بندہ کسے نوں ایہ آکھ دیوے بئی میں اج رات خواب وچ کوئی بند قتل چا کیتا اے تے اوس تے تعزیرات پاکستان دی دفعہ ۳۰۲ نہیں لگدی یا اوہ ایہ گل آکھ بئی فلانی سوانی خواب وچ مینوں اپنی گھر والی جاپی اے تے کیہ اس تے حد لاگو ہو جاوے گی؟ معراج دے واقعے نوں جے کرنبی اکرم a نے نرا خواب طرحاں سنایا ہوندا تے فیر نہ کوئی مسلمان فتنے وچ پے کے مرتد ہوندا، نہ کوئی کافر ٹیک چالیاں کر داتے نہ کسے نوں ایہ آکھن دی لوڑ پیندی بئی ”ابوبکر! محمد (a) نوں آکھ اپنے سفر دیاں دلیلاں دیوے۔“ ایہ گل آزمائش تے نری ایسے صورت وچ بن سکدی سی جدوں آپ a آکھن بئی لوکو! سن لوؤ میں اپنے جسم پاک نال بیت المقدس تے نالے آسماناں تے گیا ہاں۔

جے کچھ پڑھی گئی حدیث ول دھیان کریئے تے ابن اسحاق نے ایس نوں ایوں نقل کیتا اے کہ ”مینوں آل ابی بکر دے بعض لوکاں (یاں کسے بندے نے) دسیا بئی حضرت عائشہ ایہ گل آکھ دیاں ہوندیاں سن۔“ ایس توں ودھ کے کوئی سند ہو رکزور کیہ ہووے گی؟ دوجی گل جھڑی میں کچھ عرض کر چکیا ہاں بئی ام المومنین جناب حضرت عائشہ صدیقہ نال تے اودوں کوئی قربت ای نہیں سی۔ فیر ایس کمزور روایت دے مقابلے تے صحیح سند داں دیاں اوہناں معتبر روایتاں نوں پشیاں وگاہ دین دی کوئی وجہ نظر نہیں آؤندی جھڑیاں حضرت انس b حضرت مالک b بن صعصعہ، حضرت ابوہریرہ b حضرت

ابوسعید خدری، حضرت ابوذر غفاری b تے حضرت شداد بن اوس راہیں ساڈے تیکر اپڑیاں۔ تے جہاں توں پتا لگدا اے کہ معراج جسدِ مبارک نال ہوئیا۔

آؤ ہن اک لانگھ اگے ٹپے۔ جدوں نبی اکرم a مسجد حرام وچ ایہ واقعہ بیان فرما رہے سن تے کجھ لوکی حضرت ابوبکر b نوں سدّ لیائے، نبی آکے دیکھ تیرا یار کیہ آکھدا اے۔ جناب ابوبکر b نے پچھیا نبی کیہ تئیں ایس گل نوں جھوٹ سمجھدے او؟

”تے ہور کیہ؟“ اوہناں نے آکھیا۔

ایس تے حضرت ابوبکر b بولے:

”نہیں بھولیو! جے محمد a آکھدے نیں تے فیرا یوں ای ہونا اے۔ ایہدے وچ بھوراوی شبائیں ہونا چاہیدا۔“

فیہر حضرت ابوبکر b جناب رسول خدا a دی خدمت وچ حاضر ہو گئے۔ اوس ویلے آپ بیت المقدس دیاں کجھ تھاواں دا تذکرہ فرما رہے سن۔ آپ a نے جس دم مسجد اقصیٰ دی جغرافیائی حیثیت بیان کیتی تے جناب ابوبکر b نے گل پورے کن لا کے سنی، کیوں جے ابوبکر بیت المقدس دی سیر کر چکے سن۔ ایس لئی اوہناں نے سندیاں ای صدقتیا رسول اللہ دناں ماریا۔ ایسے تصدیق پاروں جناب ابوبکر تواریخ وچ صدیق دے نام نال مشہور ہو گئے۔

ایہ واقعہ سنن توں بعد قریش تے قریش، کجھ مسلماناں نے وی آپؐ توں سفر دیاں نشانیاں پچھیاں۔ آپؐ نے اک اچھے قافلے دا دسیا جہناں دا اک اونٹ گم ہو گیا سی تے آپ a نے اوہناں نوں اوس اونٹ دا دسیا کہ فلاں تھان تے سی۔ اک ہور جتھے دا ذکر فرمایا جہناں دے کسے بھانڈے وچوں نبی رحمت a نے اپنے ہتھیں پانی پا (انڈیل) کے پیتا سی۔ ایہ گلاں سنن توں بعد قریش نے چوکی اچھ کر کے اوہناں قافلہ دیاں دی پڑچول کیتی۔ اوہناں توں ایہ دوویں گلاں پچھیاں جہناں دی تصدیق ہو گئی۔

معراج نبی جسم پاک دے نال ای ہوئیا سی، اس تے مڈھلے مسلماناں توں اج تیکر دے نیڑے تریڑے سارے مسلماناں دا اتفاق اے۔ علامہ ابن حجرؒ بخاری شریف دی شرح وچ لکھدے نیں:

”اسراء تے معراج اک ای رات وچ، جاگدیاں ہوئیاں، رسول خدا دے جسم تے روح پاک، دوواں نال پیش آئے۔ چو کھ محدث، فقہاء نے متکلمین ایسے گل دے قائل نیں۔ صحیح روایاں دے ظاہری مطلب توں وی ایسے گل دا پتہ لگدا اے۔ ایس توں کھ کوئی گل مناسب نہیں جا پدی، کیوں جے عقلی طور تے ایوں ہونا (اللہ دے نبی لئی) اکھا نہیں لگدا نبی تاویل دی لوڑ پوے۔“

امام نووی لکھدے نیں:

”ٹھیک گل تے ایہی اے جہدے چو کھ علماء سلف، عام متاخرین فقہاء، محدثین، متکلمین تے چوکی لوکاں قائل اے نبی واقعہ اسراء آں حضرت دے جسم اطہر نال ای پیش آیا۔ سارے آثار ایسے گل دی ای دلالت کردے نیں۔ تے ظاہری مفہوم

نوں اوہدوں تیکر ترک نہیں کیتا جاسکد اجدوں تیکر کوئی دلیل نہ ہوئے۔

آؤ ہن گل سائنس دے حوالے نال کریئے۔ مڈھلی گل تے ایہ ہے کہ سائنس دا کوئی قانون وی اخیر تے حتمی نہیں ہوندا۔ گیلیلیو توں پہلوں ایہ خیال کیتا جاندا سی کہ کوئی وی بے جان شے آپوں حرکت نہیں کرسکدی۔ حرکت وچ اے تے ہولی ہولی کھلو جاوے گی، صرف جاندار بغیر کسے باہری مدد دے حرکت کرسکدے نیں۔ فیر گلیلیو تے نیوٹن نے ثابت کیتا کہ سارے سیاریاں دی اپنے مدار تے حرکت، تے زمین اتے بے جان چیزاں دی حرکت فزکس دے قدرتی قانوناں دے تابع ہے تے جے اک واری حرکت شروع ہو جائے تے فیراوہ کسے روک دی غیر موجودگی وچ جاری ای رہندی اے۔ ایس حرکت لئی کسے روح یا غیبی طاقت دی لوڑ نہیں۔ فیرونی نیوٹن دا خیال سی بی ایس کار جہاں نوں شروع کرن لئی اک خالق دی لوڑ سی۔ جدوں خالق مڈھ بنھ دیندا اے تے فیراوہ فزکس دے قانوناں پٹھ کم کرن لئی آزاد چھڈ دیندا اے۔

نیوٹن دے ذہن وچ ایک نادیدہ خالق دا تصور موجود سی جہڑا کھلوتیاں یعنی ساکن چیزاں نوں ٹور دیندا اے، یعنی متحرک کر دیندا اے پر ایس توں اگے اوہدی عقل جواب دے جاندی سی۔

سائنس کنی بے وسی اے ایس دا پتا ایس گل توں لگدا اے بی سوجھوان ایہ گل من دے نیں بی اوس نادیدہ طاقت دی ذات دا احاطہ کرنا تے دور دی گل اے اے بند اپنے آپ نوں وی پوری طرحاں نہیں سمجھ سکیا۔ فیر جسمانی معراج دی گل سائنس دی سمجھ وچ کیہ آؤنی اے۔ نوبل انعام یافتہ مصنف ڈاکٹر الیکس کیرل مان اپنی کتاب ”The Man Unknown“ وچ لکھدے نیں:

”بھائیں ساڈے کول ساری دنیا دے سائنس، فلسفے، تصوف تے دوجے عالماں دے اکٹھے کیتے علماں تے مشاہداں دا چوکھا وڈا ڈھیر لگ گیا اے پر انسان اپنی ذات یاں اپنی حقیقت دے کجھ رُخ ای اپنی گرفت وچ لیا سکیا اے۔ اے پوری طرحاں ایس نے اپنے آپ نوں نہیں سمجھیا۔ بس کجھ کھلے پلے تے دکھو دکھ جزاں دا اک اکٹھ جہا اے تے ایہ جزوی آپوں بنائے ہوئے سُو۔“

سائنس کنی کو قابل اعتبار شے ہے ایس دا پتا ایس گل توں وی لگدا اے بی کل تیکر ایٹم نا قابل تقسیم سی۔ فیر ایس دے کردار الیکٹرون تے پروٹون سامنے آئے۔ ایس توں ۲۰ ورھے بعد اک نویں شے لکھی جہوں نیوٹران دا نام دتا گیا۔ فیر دو ورھیاں بعد اک ہور قسم دے ذرات دا پتا لگا جہناں نوں پازیٹران آکھیا گیا۔ کون آکھ سکدا اے کہ گل استھ مک گئی اے۔ سائنس دان ایہ گل من رہے نیں بی سائنس اے ادھوری اے۔ اے لکھاں راز مٹی نے اپنے سینے وچ دبے ہوئے نیں۔ اے تے بند اپنے آپ نوں نہیں سمجھیا۔ تے فیر جدوں بندے دیاں طاقتاں دا پتا نہیں، تے فزکس دے راز اے کھلے نہیں تے کوں آکھیا جاسکدا اے بی معراج جسمانی نوں عقل نہیں من دی؟۔

سائنس آکھدی اے بی اک رات وچ کائنات دے کھلار وچ گھسن پھرن لئی جھڑی رفتار دی لوڑ اے اوہ کوئی مادی جسم برداشت ای نہیں کرسکدا۔ قطع نظر ایس دے بی سائنس دی ایہ گل وی اخیر تے حتمی نہیں، ایس ویکھدے ہاں بی مادہ کیہ چیز اے۔

عہ امام نووی، شرح نووی بر صحیح مسلم، جلد دوم، صفحہ ۳۹۰

۱۹ ویں صدی دی فزکس دا پرانا تے بے جان مادہ ہن مک شک گیا اے۔ سگوں ہن توں چوکھا چہ پہلوں ای مادہ ریڈیم دی طرحاں پورا پورا افعال ہو گیا سی تے ذرے جہناں نوں کٹیا نہیں سی جاسکدا، اک نہ مکن والی حد تک تقسیم ہوندے نظر آئے۔ ہر ذرہ برقی لہراں دا اک نظام بن گیا جہڑا اک دو جی برقی لہر دے دوالے گھمد اسی۔ ہن ماہرین طبعیات آکھدے نیں بئی ذرے دے عناصر جدوں وکھو وکھ ہو جاندے نیں تے اوہ برباد ہو جاندے نیں۔ کوئی شے فیر اوہناں نوں مادہ دی حالت وچ نہیں لیا سکدی۔ حدت بجلی تے روشنی وغیرہ مادے دے اوہ آخری مرحلے نیں جیہیں توں بعد اوہ ”اشیر“ وچ غائب ہو جاند اے جیہیں توں اوہ پیدا ہو یا سی۔ ایہ اشیر کیہ اے؟ کوئی نہیں جان دا۔

لارڈ سلسبری آکھدا اے کہ اشیر لہراں دے اتار چڑھا دا نام اے۔ ایہ اوہ افسانہ ہے جس دے پردے وچ جدید سائنس دی جہالت ولک جاندی اے۔ ایہ ایوں ای ناقابل فہم اے جو یں بھوت یاں روح۔ آئن سٹائن نے اشیر دے خیال توں انکار کیتا پر ایہ فیر بحال ہو گیا۔ اصل وچ جدوں کسے ماہر طبعیات کول کسے گل دا کوئی جواب نہیں ہونداتے او دوں جواب ہوند اے۔ ”اشیر“ فیر مادہ کیہ اے؟ سانوں ایہ من لینا چاہیدا اے بئی اے سانوں پتا نہیں۔ اے مادے دے رازاں توں ہر روز اک پرت لے رہیا اے۔ ایس لئی اسیں ایہ گل نہیں کہہ سکدے کہ کوئی مادی جسم ارباں میل فی سیکنڈ دی مسافت برداشت کر سکدا اے یاں نہیں۔

آؤ ہن آئن سٹائن دی Theory of relativity تے گل کریں۔ انسائیکلو پیڈیا آف بریٹانیکا نے Relativity دا تعارف کراندیاں لکھیا اے:

Relativity is concerned with measurements made by different observers moving relative to one another. In classical Physics it was assumed that all observers any where in the universe, whether moving or not obtained identical measurements of space and time intervals. According to relativity theory this is not so, but their results depend on their relative motions.

ترجمہ: نظریہ اضافیت دا تعلق اوہناں اندازیاں نال اے جہڑا مشاہدہ کرن والے حالت حرکت وچ وکھو وکھ کردے نیں۔ کلاسیکل طبعیات وچ ایہ گل آکھی جاندی سی بئی مشاہدہ کرن والے سارے دے سارے، بھائیوں اوہ کائنات وچ کدھرے وی ہوں، ساکن ہوں یاں متحرک، وقت تے فاصلے دے اکوچھے وقفیاں دا اندازا کردے نیں۔ نظریہ اضافیت دی رونال ایہ گل غلط اے، سگوں اوہناں دے نتیجیاں انحصار اوہناں دی حرکت دی اضافیت تے ہے۔

Relativity یاں نظریہ اضافیت دا مطلب اے کہ فاصلاتے وقت اضافی نیں۔ ایس لئی ایس نظریے نوں اضافیت دا نام دتا گیا "Space Time"، نظریہ اضافیت یاں Theory of Relativity اُس باب دے مڈھلے اکھریں جیہیں دے آخری اکھریہ ہونے نیں کہ ”ہاں انسان کائنات دیاں وسعتاں نوں گھم پھر کے وکھ سکدا اے تے ایوں دا پہلا سفر ۱۹ ویں صدی عیسوی وچ محمد a نے کیتا سی۔“

اسلام یثرب وچ

جدوں کے وچ اسلام نوں پیش آؤندیاں اوکڑاں دی اخیر ہوئی پئی سی، اوہناں دناں وچ یثرب دی سیاست وچ وی کئی رولے سنے جانے سن۔ اک پاسے یہودی یثرب دے پرانے وسینک ہون پاروں تڑدے سن تے نالے اک الہامی مذہب تے ٹرن پاروں اپنے آپ نوں اللہ دے نیڑے سمجھدے سن تے دوجے پاسے اوس تے خزرج جھڑے ہن توں پہلاں اپنے اکھ پاروں اپنے آپ نوں یہودیاں دے جوڑ دا سمجھدے سن، آپس وچ اک ٹکڑی جنگ (جنگ بعاث) لڑ کے چوکھے لستے تے ماڑے ہو گئے سن، کیوں جے دوواں قبیلیاں دے وڈے وڈے سردار مارے گئے سن تے ایہناں دی آپس دی ایسے لڑائی تے کمزوری پاروں یہودیاں نے ناصرف اوہناں دے روٹی ٹکڑے وسیلیاں تے قبھا جمالیاسی سگوں اوہناں نوں ایہ تڑھی وی لاندے ہوندے سن ہی ”کھلو جاؤ ذرا، آؤن والے اخیر نبی دا ویلا آ گیا ہے۔ تہاڑے توں پہلاں اسیں اوس دے پیروکار بن کے، اوس دی پناہ وچ اسیں تہاڑے نال اوہ کرنی اے جہڑی عادتے ارم نال ہوئی سی۔“

یہودیاں دی انصاریاں ایہی تڑھی انصار (اوس تے خزرج) دے بھاگ سنوار گئی۔ ہو یا ایہی ۱۰ بعد بعثت (۶۱۹ء) دی اک راتیں نبی اکرم a اپنی حکمت عملی موجب حضرت ابو بکر b تے حضرت علی b نال سکے دے آل دوالے دے قبیلیاں نوں دین دی دعوت دین لئی باہر نکلے۔ بنو ذبل تے بنو شیبان بن ثعلبہ دے ڈیریاں توں ہو کے پرت رہے سن تے منی دی گھاٹی تے کچھ لوکاں نوں آپس وچ کوئی گلاں باتاں کر دیاں سن لیا۔ آپ a اوہناں کول اپڑے تے اوہناں نوں پچھیا ہی جو انو! تسیں کون جے؟

”اسیں یثرب توں آئے ہاں تے قبیلہ خزرج نال ساڈا تعلق اے۔“ اوہناں آکھیا۔

”فیر یہودیاں دے گواندھی ہوئے نا؟“ آپ a نے فرمایا۔

”ہاں“ اوہ بولے۔

”تے دوستو! بیٹھو فیر کوئی دوگلاں ای کر لوئے“ نبی رحمت نے فرمایا۔

اہل یثرب بیٹھ گئے تے آپ a نے اوہناں اگے اسلام دی حقیقت بیان کیتی تے اوہناں نوں دسیا ہی جیہیں کعبہ دی زیارت لئی تسیں پینڈا کر کے استھ پڑے او، ایس دے تقاضے تے ایہ نیں ہی تسیں اک اللہ نوں اپنا معبود مٹو۔ کعبے وچ پئے تے دو جیاں تھواواں تے رکھے ہوئے بت بندیاں نوں کچھ نہیں دے سکدے۔ سگوں اک اللہ دی عبادت نال ای دوواں جہاناں دی بھلیائی لہھنی اے۔ آپ a نے اوہناں دے سامنے قرآن پاک دی تلاوت وی فرمائی۔ ایہ سارا کچھ سن کے اوہناں نوں یقین ہو گیا ہی گل بن گئی اے تے اک دوجے نوں سیتراں مار مار کے آکھن لگ پئے ”واللہ ! اے“

النَّبِيُّ الَّذِي تَوَاعَدَهُمْ بِهِ الْيَهُودُ فَلَا يَسْبِقُكُمْ إِلَيْهِ۔“

”رب دی سونہ! ایہ تے اوہی نبی اے جیس دی خبر یہودی سناؤندے نیں۔ چھیتی کرو کدھرے یہودی اگے لنگھدے جے۔“

بس فیروہناں نے اوسے ویلے آپ a دی دعوت قبولی تے مسلمان ہو گئے۔ اللہ دے ایہناں چھ (۶) بندیاں دے نام تواریخ نوں اج وی چیتے نیں، جہڑے ایہ نیں:

۱۔ عوف بن حارث: حضور a دے ایس صحابی داتعلق بنی نجار نال سی۔ آپ دی والدہ دانام عفراء وی تواریخ نوں چیتے ہے۔

۲۔ ابو امامہ اسعد بن زراہ: آپ داتعلق بنی مالک بن النجار نال سی۔ زمانا جاہلیت وچ وی بت پرستی نوں چنگا نہیں سن سمجھدے تے ایہ یقین رکھدے سن بنی اللہ اک ای اے۔

۳۔ رافع بن مالک: آپ قبیلہ بنو زریق وچوں سن۔ شعر تے میدان، دوواں دے منے پر مئے بندے سن۔ اپنیاں ذاتی خوبیاں پاروں یثرب وچ ”کامل“ اکھواندے سن۔

۴۔ قطبہ بن عامر بن حدیدہ داتعلق قبیلہ بنی سلمہ نال سی۔

۵۔ عقبہ بن عامر بن نابی قبیلہ بنی حرام بن کعب دے فرد سن۔

۶۔ جابر (یاں حارث) بن عبد اللہ بن ربیع قبیلہ بنی عبید وچوں سن۔

ایہ چھ دے چھ بندے یثرب دے سیانیاں وچ گئے جانے سن۔ جنگ بعاث نے اوہناں نوں ایہ سوچن تے مجبور کر چھڈیا سی بنی اوس تے خزر جہڑے اکوڑ کے دی اولاد نیں، اخیر کیوں اک دوجے نوں ذبح کر دے رہے تے ایوں اپنے نیانیاں نوں یتیمی ہنڈاؤن تے مجبور کر دتا اے۔ جنگ نے جے اوہناں دے ہڈ پیر نہ پئے ہوندے تے یہودیاں وٹوں تڑھیاں نہ لگیاں ہوندیاں تے خورے اے یثرب وچ اسلام دے دیوے نہ بلدے۔ پر ایہناں سیانیاں، نیک تے نیک بخت بندیاں نے اہل یثرب دے نصیب سنواران دا مڈھ پنھ دتا۔ ایوں جدوں ایہ لوکی یثرب پر تے تے ویکھدیاں ای ویکھدیاں یثرب دے گھر گھر وچ ایہ گلاں ہون لگ پئیاں بنی اوہ نبی جس دی اڈیک سی، اوہ آپجا اے تے خزر ج دے چھ بندے مکے وچ نہ زری زیارت کر آئے نیں سگوں ایہ اڈیکاں دی لائی بیٹھے نیں بنی اوہ یثرب وچ آپوں وی آؤن گے۔

عقبہ دی بیعت..... پہلی تے دوجی:

اگلے ورھے یعنی سن ۱۱ نبوی وچ حج دے موقع تے یثرب دے باراں بندیاں نال حضرت محمد a دا ٹاکرا ہویا۔ اوہناں وچ پنج بندے تے اوہ سن جہناں نال گئے ورھے گل بات ہوئی سی تے باقی ستاں وچوں پنج قبیلہ خزر ج دے تے دو قبیلہ اوس وچوں سن۔ اوہناں دے نام ایہ نیں۔

۱۔ معاذ بن الحارث بن رفاعہ: آپ داتعلق قبیلہ خزر ج دے بنی النجار نال سی تے پچھلے ورھے آؤن والے جناب عوف

بن حارث دے سکے بھرا سن۔

۲۔ ذکوان بن عبد قیس: آپ قبیلہ خزرج دی لڑی بنی زریق وچوں سن۔ ابن سعد تے ابن ہشام آکھدے نیں بئی آپ نبی رحمت a نوں ملن توں بعد یثرب نہیں پر تے آپ دے ای ہو کے رہ گئے۔ ایتھوں تیکر بئی آپ نے یثرب ول ہجرت فرمائی۔

۳۔ عبادہ بن صامت: آپ خزرج دی لڑی بنی عوف وچوں سن۔

۴۔ یزید بن ثعلبہ: آپ داتعلق وی بنی عوف نال سی۔

۵۔ عباس بن عبادہ بن نضلہ: آپ دا بنی سالم نال تعلق سی۔

۶۔ ابوالہشیم مالک بن التیمیان: آپ قبیلہ اوس دی لڑی بنی عبدالاشہل دے اک بھلے مانس جے بندے سن تے جاہلیت دے دور وچ دی توحید دے قائل تے بت پرستی دے سخت خلاف سن۔

۷۔ عویم بن ساعدہ: آپ قبیلہ اوس دی لڑی بنی عمرو بن عوف وچوں سن۔

حضور a نے ایہناں بارہاں بزرگاں توں جہڑی بیعت لئی اوس نوں تواریخ وچ بیعت عقبہ اولیٰ دے نام نال یاد کیتا جاندا اے۔ بھادیں کجھ لوکاں دا خیال اے بئی پچھلے ورھے جھے سعادت مند یثربیاں نے حضور a نال جہڑے کارے کیتے سن، اوس نوں ای مڈھلی بیعت آکھنا چاہیدا اے پر مینوں ایہ گل ایس لئی ٹھیک نہیں لگی بئی اوہ کوئی باقاعدہ بیعت نہیں سی بس ایوں ای نا کرا ہو گیا تے اوہناں لوکاں دی سمجھ وچ گل وی آگئی۔

ایس بیعت نوں بیعت نساء وی آکھیا جاندا اے، کیوں جے ایس بیعت دے اکھر اوس بیعت نال چوکھے رلدے ملدے نیں جہذا ذکر قرآن مجید دی سورت ممتحنہ دی آیت ۱۲ وچ لکھدا اے جتھے مسلمان بیٹیاں کولوں بیعت لین دی صلاح دتی گئی اے ﴿ابن اسحاق، حضرت عبادہ بن صامت دی روایت موجب آکھدے نیں بئی نبی اکرم a نے ایس گل اُتے بیعت لئی بئی اوہ اللہ دے نال کسے نوں شریک نہیں کرن گے، چوری نہیں کرن گے، زنا نہیں کرن گے، اپنی اولاد نوں قتل نہیں کرن گے، کسے لئی بہتان نہیں گھڑن گے، کسے امر معروف وچ رسول اللہ دی نافرمانی نہیں کرن گے، آپ a دی گل سنن گے تے اوہ دے تے عمل کرن گے، بھادیں جویں دے وی حالات ہون گے۔

یثرب پر تن لکیاں ایہناں بھاگاں والیاں بندیاں جناب رسول اللہ a اگے ایہ سدھروی رکھی بئی اوہناں دے نال کوئی اہبیا بند اٹور یا جاوے جہڑا اوہناں نوں قرآن تے دین دیاں گلاں سکھاندا رہوے۔ ایوں آپ a حضرت مصعب b بن عمیر نوں اوہناں دے نال یثرب ول اٹور دتا جہڑے اوہناں نوں قرآن مجید پڑھاندے، ارکان اسلامی سمجھاندے تے دین دی حقیقت اوہناں دے دلاں وچ بٹھاندے۔

جناب مصعب اک اچھی نویکلی یونیورسٹی دے معلم سن جس دا کوئی کمپس (Campus) نہیں سی تے جس دے کوئی وسائل نہیں سن پر تواریخ اسلامی دے ایس استاد، ماہر نفسیات، مبلغ، مفسر قرآن تے انقلابی لیڈر نے اوہ جو ہر دکھائے

محمد مودودی، مولانا۔ سیرت سرور عالم۔ جلد دوم، صفحہ ۶۹۶۔

نئی دنیا دنیاں وچ انگلیاں دبدی نظر آؤن لگ پئی۔ مصعب نبوت دے مڈھلے دور دے مسلمان سن تے حبشہ ول ہجرت کر کے اپنی تربیت وی پوری کر آئے سن۔ اوہ اجے تھوڑا چراگدیں حبشہ توں واپس پر تے سن تے یثرب ول دوجی ہجرت دا حکم مل گیا۔ آپ اک چنگے کھاندے پیندے خنوادے دے فرد سن۔ ہاشمی ماہی نال پیار پاؤن توں پہلاں بادشاہزادیاں وانگ ٹھاٹھ باٹھ دے دیہاڑے گزار رہے سن۔ قیمتی پوشاکاں پا کے جدوں کسے گھوڑے یاں ناقہ تے بہ کے نکلدے سن تے نوکر چاکر تے خادم غلام اگے کچھے ہتھ جوڑی کھلوتے دسدے سن۔ جدوں سوہنے دے نیڑے آئے تے اصلوں ای سادا جہی زندگی گزارن لگ پئے۔ دنیا دیاں ظاہر داریاں تے ٹوہرے پھیرے لگن لگ پئے۔ طبیعت تے فقیری دارنگ چڑھ گیا تے دنیا دار تے چودھری ٹاپ بند اک سچا پکا انقلابی مسلمان بن گیا۔ پردیس کٹ کے تے حبشہ دے سفر دیاں اوکڑاں جر کے جناب مصعب b حلیم، صابر تے مردم شناس وی بن گئے سن۔ کوئی گل کتھے کوں تے کس ڈھنگ نال کرنی چاہیدی اے، ایس دا آرٹ جناب مصعب b توں ودھ کوئی نہیں سی جان دا۔ آپ دے ایہناں وصفان پاروں ای یثرب واسطے محمد a دی نظر آپ تے پئی۔

حضرت مصعب b بن عمیر دی شخصیت دا جادو کجھ ایوں شتابی نال یثرب وچ چلیا نئی ویکھدیاں ای ویکھدیاں پاسے پلٹ گئے۔ ابن سعد نے واقدی دے حوالے نال لکھیا اے نئی بنی عبدالاشہل وچوں عباد بن بشر تے اوہناں دے حلیفاں وچوں محمد بن مسلمہ جے بندیاں نے حضرت مصعب دے ہتھ تے اسلام قبولیا سی۔ ابن اسحاق توں ابن ہشام تے طبری نے حضرت سعد بن معاذ تے اسید بن حضیر دے دین اسلام قبولن دا واقعہ جویں بیان کیتا اے اوس توں جناب مصعب دی صلاحیت دا پورا پورا اندازا ہو جاندا اے۔ اکھے:

”اک دیہاڑے یثرب وچ حضرت مصعب دے میزبان جناب اسعد بن زرارہ اوہناں نوں نال لے کے قبیلہ اوس دی اک لڑی بنوظفر دے باغاں ول گئے۔ اوہ یثرب دے نویں مسلمان وی جا چکے۔ ایس گل دا جدوں سعد بن معاذ تے اسید بن حضیر نوں پتا لگاتے سعد نے اسید نوں آکھیا نئی اسید گل ایہ ہے کہ اسعد بن زرارہ جے کرمیری ماسی دا پتر نہ ہونداتے میں آپوں نیڑ دا پراوس دا لحاظ ماردا اے۔ ہن توں اوہناں (اسعد تے مصعب) ول جاتے اوہناں نوں ذرا آکڑ کے آکھ نئی ساڈے علاقے ول آکے ایوں نہ کرن تے گل چنگی اے، کیوں جے اوہ ساڈے مریڑے مریڑے بندیاں نوں بے وقوف بنا رہے نیں (یعنی مسلمان کیتی جا رہے نیں) ایہ گل سن کے اسید نے اپنا حر با پھڑیا تے باغاں وچ اپڑ گئے۔ اسید نوں جدوں جناب اسعد نے آؤندیاں ویکھیا تے حضرت مصعب نوں آکھن لگے نئی ”ایہ اپنی قوم دا سردار آرہیا اے۔ اج رب دی گل ایہدے تیکر اپڑان دا حق ادا کر چھڈو۔“

آہو جے ایہ میرے کول بیٹھ گیا تے ایوں ای ہووے گا۔“ جناب مصعب نے جواب دتا۔

اسید جدوں رب دے اوہناں دوستاں تے یثرب دے محسناں تیکر اپڑے تے چوکی آکڑ تے مغروری نال گل کیتی۔ آکھیا:

”کہڑی شے تہانوں استھ لیا ئی اے نئی؟ تسیں ساڈے لے ساڈے لوکاں نوں پاگل بناندے او۔ جے جان

لوڑی دی جے تے اگوں توں استھہ نہیں جے وڑنا۔“

”اسید جی! تشریف رکھو، بیٹھ کے گل نہ کر لوئے؟ جے کوئی گل چنگی لگے تے قبول کر لینا جے پسند نہ آوے تے جو تسیں فرماؤ گے اوویں ای ہووے گا۔ اسیں کوئی دھکا تے نہیں نہ کرنا؟“ حضرت مصعب نے آکھیا۔

”ہاں بئی، ایہ گل تے انصاف دی اے“ اسید نے جواب دتا۔

ایہ آکھن توں بعد اسید نے اپنا نیزہ زمین وچ گڈھیا تے اوہناں دے کول بیٹھ گئے۔ حضرت مصعب نے اسید نوں دین اسلام دیاں کجھ گلاں سنائیاں۔ ایہ دسیا بئی لوکاں کوں بھلیکھے وچ پئی اے تے حقیقت کیہ اے، تے نالے قرآن مجید دیاں کجھ آیتیاں دی تلاوت وی فرمائی۔ حضرت اسعد بن زرارہ تے حضرت مصعب دوواں دا بیان اے بئی جدوں اسیں اسید نوں گلاں سمجھارہے ساں تے اوں دا کوئی فیصلہ سنن توں پہلوں امی، اُس دے چہرے دی حالت توں، سانوں اندازا ہو گیا سی بئی رب نے خیر کر چھڈی اے، اس ذات باری دا کلام کم کر گیا اے تے اسلام اسید دے اندر لیہ گیا اے۔ جدوں گل پوری ہو گئی تے اسید آکھن لگے ”واہ بھئی، کیڈا سوہناتے چنگا کلام اے۔ اچھا ایہ دسو بئی جدوں تسیں لوکی ایس دین وچ داخل ہوندے او تے کیہ کردے او؟“ دوواں نے دسیا بئی نہا کے اپنے جسے نوں پاک کر لوو، اپنے لیڈے وی پاک کر لوو تے فیر حق سچ دی گواہی دیو تے نماز پڑھو۔ اسید او سے ویلے اٹھے، پاک صاف ہو کے آگئے، کلمہ شہادت پڑھیا تے فیر دو رکعت نماز وی پڑھی۔ فیر آکھن لگے:

”میرے پچھے اک اچھا بندہ اے کہ جے او تہاڈی من لوے تے فیر اوں دی قوم وچوں کوئی اک آدمی وی اوہدے خلاف نہیں چلے گا۔ میں جا کے اوں نوں تہاڈے کول گھٹاں۔“

ایہ آکھ کے حضرت اسید نے اپنا حربا پھڑیا تے سعد بن معاذ ول ٹر پئے جہدے کول اوں دے قبیلے دے کئی لوکی بیٹھے ہوئے سن۔ سعد دی نظر جدوں حضرت اسید تے پئی تے مونہ توں بے وی ایہ گل نکلی بئی ”رب دی سونہ ایہ اوہ اسید نہیں جھڑا کجھ چرا گدیں اسعد تے مصعب نال دوہتھ کرن گیا سی۔“

سعد نے پچھیا تے حضرت اسید آکھیا ”پئی میں اوہناں دوواں بندیاں نوں ملیا ہاں۔ مینوں تے اوہناں وچ کوئی ماڑی گل نہیں لیسھی۔ فیروی میں اوہناں نوں ڈکیا سی تے اوہناں آکھیا سی بئی اوویں ہووے گا جویں آکھو گے تے نالے میں ایہ گل سنی اے بئی بنی حارث، تہاڈے مسیر (ماسی دے پتر) اسعد بن زرارہ نوں قتل کرن لئی ٹر پئے نیں۔ اوہناں نوں ابن زرارہ نال تہاڈے تعلق دا پتا وی اے۔ اوہ تہاں نوں نیواں کرنا چاہندے نیں“ ایہ سندیاں ساراں سعد غصے وچ اٹھے تے اپنا حربا لے کے اسعد ول ٹر پئے، تاں جے بنی حارث دا ہتھ پین توں پہلاں ای اپنے بھرا کول جا بکجن۔ اوہ جانندے ہوئے حضرت اسید نوں ایہ وی آکھ گئے بئی رب دی سونہ تینوں او تھے کھلن دا کوئی فائدہ نہیں ہويا۔ دو جے پاسے سعد نوں آؤندیاں ویکھ کے حضرت اسعد نے جناب مصعب نوں دس دتا پئی ایہ اوہی بندہ اے جہدی بابت ہن اسید دس کے گئے سن۔ اوہناں نے ایہ گل وی چیتے کر ادتی بئی ایہ قبیلے دا سردار اے تے سارے جی ایس دے نال نیں۔

سعد جدوں حضرت اسعد تے مصعب تیکر اپڑے تے او تھے اوہناں نوں اوویں دی کوئی شے نہ دسی جہدی اسید نے دسی

سی۔ ایوں سعدنوں پتا لگ گیا بئی اسید دا مقصد میرا ایناں نال ٹاکرا کرانا سی، ہور کچھ نہیں۔ سعد نے متھے تے تر وڑیاں پاکے چوکھے تکبر نال اسعد بن زرارہ نوں آکھیا ”ابو امامہ! رب دی سونہ جے تیرے تے میرے وچکار قرابت نہ ہوندی تے ایہہ بندا (جناب مصعب b) میرے ہتھوں بچ نہیں سی سکدا۔ کیہ توں ساڈے گھرتے دھکو دھکی اوہ چیز مسلط کرنا چاہندا ایں جہڑی سانوں پسند نہیں“ حضرت مصعب b نے بڑے تھل نال آکھیا ”کیہ تسیں بیٹھ کے سانوں گل کرن دا موقع نہیں دیوگے؟ جے کوئی گل چنگی لگے تے ٹھیک اے، نہ چنگی لگے تے ساڈا کیہ زور اے؟ اسیں اوہ گل کیوں کرنی اے جہڑی تہانوں پسند نہیں۔“

”ہاں ٹھیک اے، ایہ تے انصاف دی گل ہوئی نا“ سعد نے جواب دتا۔

سعد نے اپنا حربا زمین وچ گڈھیا تے اوہناں دی گل سنن لئی بہ گئے۔ حضرت مصعب نے اوہناں دے سامنے اسلام دی حقانیت بیان کیتی تے نالے قرآن مجید پڑھ کے سنایا۔ جدوں حضرت مصعب دی گل پوری ہو گئی تے اوہناں نے وی جناب اسید والا ای سوال کیتا بئی ایس دین وچ داخل ہون لئی کیہ کرنا پیندا اے۔ آپ نوں اوہی جواب ملیا، ایوں آپ پاک صاف ہو کے آئے، کلمہ شہادت پڑھیا، دو رکعت نماز پڑھی، اپنا حربا پھڑیا تے قبیلے دی مجلس ول پرت گئے۔ حضرت سعد جدوں اپنے لوکاں ول پرتے تے سعد دی بابت لوکاں اوہی گل قیاس کیتی جہڑی حضرت سعد نے حضرت اسید بابت کیتی سی بئی ”ایہ اوہ تے نہیں جہڑا گیا سی۔“

میرے عزیز پڑھنہارو! گل سعد b دی وی ٹھیک سی تے گل اوہناں لوکاں دی وی غلط نہیں سی جہناں آکھیا بئی ”رب دی سونہ! ایہ اوہ چہر انہیں جہڑا کچھ کرن گیا سی۔“ اصل وچ اوس نبی a دیاں محفلاں وچ ایوں ای ہوندا اے، جہڑا بہ گیا، بہ گیا۔ اوتھوں سکھنی جھولی لے کے کدوں کدی کوئی پرتیا اے۔ اوتھوں ایوں ای بن منگیاں ملدا اے، جو یں سعد تے اسیدنوں ملیا۔

سجنو! ایہ گل وی چیتے رہوے بئی مصعب b دی محفل تہاڈے آقا دے نمائندے دی محفل سی۔ ذرا سوچو، محمد a دی اپنی محفل دا کیہ عالم ہووے گا جتھے ابو بکر b عمر b عثمان غنی b تے علی b وی موجود ہوندے سن۔ حضرت سعد بن معاذ اسلام دے جوش نال بھریا سینا لے کے جدوں اپنے قبیلے کول پرتے، تے اوہناں نوں پچھیا ”اے بنی عبدالاشہل! ایہ دسو تہاڈے نیڑے میرا کیہ مرتبا اے؟“

”تسیں ساڈے سردار اوتے ساڈے ساریاں وچوں سیانے تے عالی نسب او“ اوہناں آکھیا۔

”تے فیہر گل ایہ جے پئی میرے لئی تہاڈے نال گل بات کرنا او دوں تیکر حرام اے جدوں تیکر تسیں اللہ تے اوس دے رسول تے ایمان نہیں لیاؤ گے“ حضرت سعد نے آکھیا۔

ایوں اوس دیہاڑے بنی عبدالاشہل دے سارے دے سارے لوک مسلمان ہو گئے۔

ایوں یثرب دیاں ہواواں وچ توحیدی خوشبو رچ گئی تے اس خوشبو نال یثرب توں قباء تیکر نیڑے تریڑے ہر گھرایاں مکہ اُٹھیا سوائے وائل، واقف تے اک دو ہور گھرانیاں دے جہناں نوں ابوقیس صفی بن اسلت نے ڈکی رکھیا کیوں جے اوہ

اک چنگا شاعر سی تے اوہدے نیڑے دے لوکی اوس نوں اپنا سیانا سمجھدے سن۔ غزوہ خندق دے موقعے تے ایہ لوکی وی مسلمان ہو گئے۔

تواریخ اسلام دا پہلا جمعہ:

حضرت مصعب b دے موڈھے نال موڈھالان والے ابوامامہ اسعد بن زرارہ نوں ایہ اعزاز وی حاصل اے نئی اوہناں اسلامی تواریخ دی پہلی نماز جمعہ پڑھائی۔ حضرت کعب بن مالک دی روایت اے کہ نماز جمعہ دا حکم آؤن توں پہلاں مدینے دے انصار نے آپس وچ ایہہ گل طے کر لئی ہوئی سی نئی ہفتے وچ اک دن اکٹھے نماز پڑھاں گے تے ایس غرض لئی اوہناں نے یہودیوں تے عیسائیوں توں ہٹ کے جمعہ دے دیہاڑے دا ٹیچا مٹھیا سی جنہوں جابلیت دے دناں وچ یوم عروبہ آکھیا جانداسی۔ بنی بیاضہ دے محلے وچ پہلی نماز جمعہ جناب اسعد بن زرارہ نے پڑھائی جہدے وچ ۴۰ نمازی شریک سن۔ دارقطنی نے حضرت عبداللہ بن عباس دی روایت موجب لکھیا اے نئی جدوں نماز جمعہ دا حکم آیا تے نبی اکرم a نے یثرب ول حضرت مصعب بن عمیر نوں لکھ گھلیا نئی زوال توں بعد لوکاں نوں دو رکعت نماز پڑھایا کرو۔ مدینے ول جمعہ دی اقامت دا حکم گھلن دی وجہ ایہ جا پدی اے نئی مکے وچ تے او دوں تیکر کسے اجتماعی نماز دی ادائیگی داسو چیا وی نہیں سی جاسکدا۔ عقبہ دی دوجی بیعت:

جویں کہ کچھ ذکر ہو یا اے یثرب دے مبلغ اعظم جناب مصعب بن عمیر دے جتن کرن نال اوہناں دے گھر گھر وچ علم تے توحید دے دیوے بلدے دین لگ پئے سن۔ زیارت کعبہ لئی پچھلے ورھے باراں (۱۲) بندے آئے سن تے ایتکاں بہتر (۷۲) مسلمان، جہناں وچ دو پیہیاں وی سن۔ ایہناں نال راجطے توں پہلاں ای ہادی برحق حضرت محمد a نے پالیسی بدلن داسو چنا شروع کر دتا سی تے ہن ذہن وچ ایہ گل وی آؤندی سی نئی کچھ ہمت کر کے ظلم دا مقابلہ کیتا جاوے۔ دوجے پاسے جدوں یثرب دے حاجیاں نال ملاقات ہوئی تے آپ a نے اوہناں دے جوش تے ولولے دا چوکھا اثر لیا تے فیصلہ کیتا نئی یثرب وچ گل اگے ودھان لئی جج توں بعد ایام تشریق وچ اک بھرواں صلاح مشورہ کیتا جاوے تے ایس کم لئی عقبہ دی تھاں تے ہی میٹنگ دا فیصلہ ہو یا۔ مسلمان مٹھی گئی رات دے کچھ پہر چپ چپیتے عقبہ دی تھاں تے اکٹھے ہو گئے۔ اوہناں لوکاں دے خلوص تے جذبے دی ایہ حالت سی نئی جتھے وچ شامل دو پیہیاں وی کچھ نہ رہیاں۔

اوس راتیں اہل یثرب نال گل بات کرن لئی آپ a داساتھ آپ دے چاچے حضرت عباس b بن عبدالمطلب نے دتا۔ بھاویں سیدنا عباس او دوں تیکر اہل اسلام دے دائرے اندر نہیں سن آئے پر فیروں بھرا دے یتیم پتر نال عقیدت رکھدے سن۔ جناب عباس دے دل وچ ایہہ گل کھٹکدی سی نئی کدھرے اہل یثرب دی وجہ توں قریش، ہاشمیاں نال لڑن لگ پئے تے ایہ نہ ہووے نئی یثربی ساتھ ای نہ دین تے اوکڑاں دے ویلے دھڑا چھڈ کے کسے دوجے پاسے موڈھالا دین۔ ایس لئی اوہناں نے اپنی موجودگی ضروری جانی۔ جناب عباس نے آپوں ای گل چھوہ دتی۔ آکھن لگے:

”خزرجی بیلو! تہا نوں پتا اے نئی ہاشمی قبیلہ حضرت محمد a دی کویں تعظیم کردا اے۔ بھاویں اپنے عقیدے موجب اسیں قریش دے نال ہاں پر حمایت یاں مدد وچ اسیں نہ تے کل محمد a نوں کلیاں چھڈ یا سی تے نہ

اج۔ ایہ اپنے قبیلے وچ عزت دی نگاہ نال ویکھے جاندے نیں پر ایہناں دادل و جدا اے بئی حیاتی دے آؤن والے دیہاڑے تہاڑے نال تے تہاڑے وچ گزارن۔ جے تسیں ایہناں دی راکھی کرسکدے او، تے اوکھے ویلے ایہناں نوں ویریاں توں بچاسکدے او تے فیر سانوں عذر کوئی نہیں، تے جے یثرب لے جا کے ایہناں نوں دشمنان دے ہتھے چاڑھ دینا جے تے فیر چیتے رکھو بئی سانوں ایہناں دی تکلیف گوارا نہیں، تے فیر تسیں ایہناں نوں مکے وچ ای رہن دیو۔“

ایہ گلاں سن کے اہل یثرب آکھن لگے:

”اے عباس! تسیں جو آکھیا اے اسیں سن تے سمجھ گئے ہاں۔“

فیر رسول خدا a اگے عرض کیتی ”یا رسول اللہ! تہانوں اختیاراے ساڈے کولوں جہڑے وعدے کارے اپنے لئی یاں اوس ذات باری لئی لینے جے لے لوؤ۔ اسیں حاضر آں۔“

رسول اللہ نے قرآن مجید دی تلاوت فرمائی، کجھ گلاں ہدایت دیاں دسیاں تے فرمایا میں تہاڑے کولوں ایس شرط تے بیعت لیند ہاں بئی تسیں میرا ساتھ اوویں دیو گے جو یں اپنے بال بچیاں دی حفاظت کردے او۔ حضرت کعب b آکھدے نیں بئی ایہ سندیاں ای جناب براء بن معرور نے آپ a دا دست مبارک پھڑ لیا تے عرض کیتی۔ ”قسم اے اوس دی جیس نے تہانوں حق دے نال گھلایا اے اسیں تہاڑی اوویں ای حمائت تے حفاظت کراں گے جو یں اپنے اہل و عیال دی کر دے ہاں“ جناب براہ نے ایہ وی آکھیا:

((بَايِعْنَا يَا رَسُولَ اللَّهِ نَحْنُ وَاللَّهُ ابْنَاءَ الصُّرُوبِ وَأَهْلُ الْحَلِيقَةِ وَرَثَةُ مَا آكَأَ بَرَاءُ
اَكَابِرُ))

”یا رسول اللہ! تسیں جو یں آکھدے او اسیں اوہدے تے ہی تہاڑی بیعت کردے ہاں۔ اسیں جنگاں دی گود وچ اکھاں کھولیاں نیں۔ ہتھیاں ساڈے کھڈونے نیں جہڑے سانوں اپنے وڈکیاں کولوں ورثے وچ لیکھے نیں۔“

جناب براہ دی گل اے توڑ وی نہیں سی چڑھی تے ابو الہیثم بن تیہان نے عرض کیتی: ”یا رسول اللہ! یہودیاں نال جہڑا ساڈا معاہدہ اے اسیں اوس نوں اگے تے نہیں ٹور دے (تجدید نہیں کردے) پر ایہ تے نہ ہووے گا بئی اک پاسے تے اسیں یہودیاں توں وکھ ہو جائیے تے دو جے پاسے (حالات ٹھیک ہون تے) تسیں سانوں کلیاں چھڈ کے تے بے یار و مدگار کر کے اپنے بھراواں (اہل مکہ) نال آرو۔“ ایہ سن کے رسول رحمت مسکرائے تے فرمایا:

((بَلِّغِ الدِّمَ وَالْعَدَمَ اَنْتُمْ اَنْتُمْ مَعِيَ وَاَنَا مِنْكُمْ اَحَارِبُ مِنْ حَارِبَتُمْ وَاَسَاءُ اَسَاءُ النَّعَمِ))

”جتنے تہاڑا خون ڈگے گا او تھے میرا وی اہو وگے گا۔ جہڑا قتل تسیں معاف کر دیو گے اوہ میں وی کر دیاں گا۔ میں تہاڑے وچوں ہاں تے تسیں میرے ہم قوم۔ تسیں جہدے نال جنگ کرو گے میں تہاڑے نال رلاں گا، تے جہدے نال تہاڑی صلح ہووے گی میں وی اس دا حلیف ہوواں گا۔“

نبی اکرم a دایہ جواب سن کے اوہ بیعت لئی اگے ودھے پر اوہناں دے ای اک بندے جناب عباس بن عبادہ آکھن لگے بئی فیروچ لوؤ اپنی گل تے پکے رہنا ہے۔ اوہناں آکھیا:

”اے برادران خزرج! سن لوو، تسیں جس گل تے بیعت کر رہے اوہ اوس نوں چیتے دی رکھنا ہے۔ تہانوں کالے گورے (یعنی کئی طرحاں دے لوکاں) نال مقابلہ کرنا پوے گا۔ بے لڑائی وچ اپنی جائیداد دی تباہی یاں اپنے بندیاں نوں قتل ہونداں دیکھ کے محمد رسول اللہ a نوں دشمنان اگے ڈاہ دینا ہے تے ایس بیعت توں اوویں ای چنگے او، کیوں بے اس طرحاں دین تے دنیا، دوواں تھادواں تے رسوائی ای لھے گی۔ تے بے تہانوں ایہ منظور اے بئی رب دے پیغمبر دی حمایت وچ مال، جان تے اولاد قربان کرن وچ کوئی عذر نہیں کرو گے تے فیروچ نال بیعت کرو۔ خدای قسے ایوں سانوں دین تے دنیا دی اوہ بھلیائی لھے گی جھڑی کسے نوں نہیں لھے۔“

ایہ سن کے خزرجی آکھن لگے:

”ہاں ایوں ای ہووے گا۔ اے رسول خدا! اج توں بعد ساڈا سبھ کچھ تہاڈا اے۔ اپنا مال جان ہر شے تہاڈے تے قربان اے۔ پر یا رسول اللہ! ساڈا احصا کیا اے؟“ جواب وچ رسول خدا نے کچھ خاموشی اختیار کیتی تے فیروچ نال فرمایا ”جنت۔“

ایوں آپ a نے پہلے ہی دیہاڑے ایہ گل واضح کر دتی بئی کسے دنیاوی لالچ یاں محل میناریاں دی خواہش نال بیعت کرن والیاں نوں کچھ ہٹ جانا چاہیدا اے۔ دیکھن وچ تے اوہدوں تیکر ہر پاسے اوکڑاں ای اوکڑاں سن، پر شمع نبوت دے پروانیاں نوں ایہ گل وارا کھا گئی۔ اوہناں اگے ودھ ودھ کے ہتھ اوس پیارے دے ہتھوں وچ دینے شروع کر دتے جہنوں کدے رحمت اللعالمین آکھیا گیا تے کدے شفیع المہذبین۔ اوس راتیں جس عاشق رسول نے سب توں اگدیں اوس سوہنے دے ہتھوں وچ ہتھ دتا اوہ جناب براہ بن معرور سن۔ چیتے رہوے بئی دوواں پیہیاں دی بیعت زبانی ہوئی سی۔ علامہ حافظ ابن قیم نے زاد المعاد وچ دوواں پیہیاں دے نام ام عمارہ نسیم بنت کعب تے اسماء بنت عمرو بن عدی دسے نیں۔

باراں نقیب تے سعد بن عبادہ:

بیعت دی کاروائی پوری ہوئی تے آپ a نے نویں مسلماناں نوں ہدایت فرمائی بئی اپنے وچوں باراں اچھے بندے منتخب کر لوؤ جہناں نوں میں تہاڈا سردار بنادیاں تاں بے اوہناں تے دین دی اشاعت دی ذمہ داری پائی جاسکے۔ ایہ سن کے اہل یثرب نے ۹ بندے خزرج وچوں تے ۳ اوس وچوں چک کے رسول اللہ دے سامنے پیش کر دتے۔ آپ a نے فرمایا بئی جو یسعی بن مریم نے اپنے لئی باراں بندیاں دا انتخاب کیتا سی ایوں میں تہاڈے وچوں باراں نقیب لے نیں۔ ہن یثرب وچ دین دے کماں دا بھارا بہناں دے موڈھیاں اُتے ہے تے کسے وچ ایہ کم میں آپوں کراں گا۔ نبی رحمت دے اوہ باراں نقیب ایہ سن:

قبیلہ خزرج وچوں:

۱۔ ابوامامہ جہناں دا نام اسعد بن زرارہ سی (آپ چیف نقیب یاں نقیب القباۃ مقرر ہوئے)

۲۔ سعد بن ربیع۔

۳۔ عبداللہ بن رواحہ۔

۴۔ رافع بن مالک۔

۵۔ براہ بن معرور۔

۶۔ عبداللہ بن عمرو بن حرام۔

۷۔ عبادہ بن صامت۔

۸۔ سعد بن عبادہ۔

۹۔ منذر بن عمرو۔

قبیلہ اوس وچوں منتخب کیتے گئے تن نقیب ایہ سن:

۱۰۔ اسید بن خنیر۔

۱۱۔ سعد بن خثیمہ۔

۱۲۔ رفاعہ بن عبدالمندر۔

کعب بن مالک آکھدے نیں بئی جدوں ایہ ساری کاروائی توڑ چڑھ گئی تے لوکی اپنے ڈیریاں تے پرتن لگے سن تے اسیں پہاڑی دی ٹیسی توں اک چوکی زوردار اواز سنی۔ ایڈی اُچی اواز میں تے پہلوں کدے نہیں سی سنی۔ کوئی بندا آکھ رہیا سی ”لوکو! محمد (a) نال نہڑ لو۔ ایس ویلے بے دین اکٹھے ہوئی بیٹھے نیں تے تہاڈے نال جنگ کرن دیاں تیریاں کر رہے نیں۔“ رسول اللہ a نے ایہ اواز سنی تے فرمایا ”ایہ اس گھائی دا شیطان اے۔ اوئے اللہ دیا دشمن! ہن میں تیرے نال دوہتھ کرن لئی چھیتی ای ویلھا ہو جاواں گا۔“ ابن ہشام لکھدے نیں بئی نبی نے ایہ وی فرمایا ”ایہ ایٹھوں دا شیطان اے تے ایس دا نام ابن ازیب اے۔“

ایہ سن کے جناب عباس بن عبادہ نے عرض کیتی ”یا رسول اللہ! قسم اے اس ذات دی جہنے تہانوں حق دے نال مبعوث فرمایا اے جے تسیں حکم دیو تے اسیں سویر ہوندیاں ای اہل منی تے تلواراں نال ٹٹ پویئے“ حضرت ابن عبادہ دی ایہ پیش کش سن کے نبی رحمت نے ارشاد فرمایا: ”مینوں اے ایس کم دا حکم نہیں دتا گیا۔ تسیں اپنے ڈیریاں تے ٹر جاؤ۔“

شیطان دی اواز نال یاں کسے ہور راہیں قریش دے کناں وچ ایس بیعت دی بھنک پے گئی۔ دن چڑھیا تے قریش دے اچیاں کلغیاں والے بندے اہل یثرب دے ڈیریاں تے آتجے تے آکے آکھن لگے بئی سانوں ایہ گل بھوراوی چنگی نہیں لگدی بئی اسیں تہاڈے نال جنگ کریئے۔ تسیں ایہ دسوئی تساں محمد نال، ساڈے خلاف جنگ کرن دا معاہدہ کیوں کیتا اے؟ بیعت کرن والے مسلماناں توں وکھ وی کجھ یثربی مکے آئے ہوئے سن جہناں نوں شیع رسالت دے پروانیاں دی پلانگ دا سچ مچ کجھ پتا نہیں سی۔ اوہناں یثربیاں نے قسماں کھا کھا کے قریشی سرداراں نوں یقین دوا یا بئی اوہناں نوں کسے

صحہ زاد المعاد، عنوان ”اسلام مدینہ میں“۔

گل دا کچھ پتا نہیں تے نہ ای ایوں دا کوئی معاہدہ محمد a نال ہونیا اے۔ او تھے قریش ایس گل دا ویروانہ کر سکے ہی قسماں کھان والے تے کچھ ای بندے نیں کچھ چپ کیلتے وی تے بیٹھے نیں۔ اوہناں نوں سمجھ نہیں سی آرہی کہ اوہ کیہ کرن۔ ایسے گو مگو وچ اوہ یثربی چودھری عبداللہ بن ابی کول جاتے تے اوہدے نال گلے شکوے شروع کردتے۔ عبداللہ بن ابی اس بھلیکھے وچ سی ہی یثرب دے بندے ایڈا وڈا کم اوہدی مرضی بنا کر ای نہیں سکدے، سواوس نے ایہی جواب مشرک سرداراں نوں دتا، پر فیروی اوہناں دی تسلی نہ ہوئی۔

قریش اپنے تئیں پڑچول کردے رہے، ایتھوں تیکر ہی اوہناں نوں ایس خبر دی تصدیق ہوگئی پر اوہوں تیکر راہ خدا وچ اپنیاں جاناں نثار کرن دا عہد کرن والے مجاہد مرد و پٹناں نوں سدھا رکھے سن۔ فیروی اہل مکہ اوہناں دا پچھا کرن توں باز نہ آئے تے مکے توں تھوڑا ای دریڈے اذخر دی تھاں تے اوہناں دو بندیاں تیکر جاتے جہڑے اپنی سست رفتار پاروں کچھ پچھے رہ گئے سن۔ ایہ دوویں حضرت سعد بن عبادہ تے منذر بن عمرو سن۔ جناب منذر نوں جدوں خطرے دی بو آئی تے اوہناں نے اپنی سواری دی دوڑ لو ادتی پر دو جے لقیب حضرت سعد بن عبادہ پچھا کرن والیاں دے ڈھائے چڑھ گئے۔ قریش دے لوکاں نے اوہناں دے ہتھ پچھے کس کے ہتھ دتے۔ فیروہناں نوں مار دے کھدے ہوئے، تے اوہناں دے لئے لٹے والاں توں پھڑکے کچھ دے ہوئے مکے لے گئے۔ مکے دے پردیس وچ محمد عربی دے ایس عاشق نال جہڑی ہوئی اوہ وفا، محبت تے مستقل مزاجی دی اک اجہی روشن مثال اے جہدے توں قیامت تیکر دے لوک سبق حاصل کر دے رہن گے۔

قریش نے جناب سعد b نوں مار مار کے لہو لہان کر دتا۔ ہر آؤن والا بندہ مارن کٹن دی ریتھ لانداتے آ کھدا ہی محمد نال یاری لان دا سواد چکھ لے پر مجال اے ہی آپ نے کسے پچھتاوے دا اظہار کیتا ہووے۔ قریشی ایسے حال وچ جناب سعد b نوں دروہ کے لے جارہے سن تے او تھے ابوالجہتری بن ہشام نام دے اک بندے نے آپ نوں پچھیا ہی مکے وچ تیرا کوئی تے جانویاں واقف ہونا اے۔ آپ نے فرمایا ہی ہاں جیسر بن مطعم تے حارث بن حرب نال میرا تعلق اے، کیوں جے میں اوہناں دے تجارتی قافلایں نوں پناہ دیندا رہیاں تے اوہناں نوں لوکاں دے ظلم توں بچاندا رہیاں۔ ابن ہشام آکھن لگا ”تے فیروہناں دے ناں دی دہائی پا“ نے نال ای ایہ خبر اوہناں دو بندیاں تیکر وی اڑا دتی۔ اوہناں آکھیا، ”آہو گل تے ٹھیک اے، یثرب دا سعد بن عبادہ ساڈے کم آؤندا رہیا اے۔“ ایوں اوہناں نے آکے جناب سعد نوں قریش دے ظلم توں بچایا تے آپ یثرب ول کوچ کر گئے۔

مشرک یثربی دارب تے مویا ہو یا گئتا:

عقبہ دے مسلمان جدوں یثرب اپڑے تے او تھے اک نویں دور دا مڈھ بجھ گیا۔ تھاں تھاں تو حید دے نعرے وچن لگ پئے تے لوکاں دیں اکھاں محمد a دی زیارت نوں ترسن لگ پئیاں۔ نال ای یثرب دے ڈیریاں تے گھراں وچوں بتاں دا صفایا ہونا شروع ہو گیا۔ ابو عیس بن جبر تے ابو بردہ بن نیار، بنی حارث دے بت تے عمارہ بن حزم، اسعد بن زرارہ، عوف بن عفرا، سلیط بن قیس تے ابو حرمہ بنی نجار دے بت توڑ دے پھر دے سن۔ بنی بیاضہ دے بتاں دا کم زیادہ بن لبید تے فروہ بن عمرو نے کیتا۔ بنی ساعدہ نوں سعد بن عبادہ، منذر بن عمرو تے ابو دجانہ نے بتاں توں پاک کیتا تے معاذ بن جبل،

ثعلبہ بن غنم سے عبداللہ بن انیس دے حصے بنی سلمہ دے بتاؤں مدھے مونہ سٹن دی نیکی لکھی گئی۔ ایوں جا پدا اے جویں مسلمان یثرب دے بت پرستاں تے پوری طرحاں چھا گئے سن تاں ای تے اوہناں نوں ایہ تک نہ پئی بنی اوہ مسلماناں نوں ڈک سکدے۔

ابن ہشام لکھدے نیں بنی جدوں ایہ لوکی مدینے آئے تے ایہناں نے دین اسلام دی چوکھی سیوا کیتی۔ پرانے تے بزرگ لوک جھڑے شرک تے قائم سن اوہناں نوں گل سمجھائی تے مسلمان کیتا۔ اک بزرگ بنی سلمہ دے سردار عمرو بن جموح وی سن جہناں دا پتر معاذ بن عمرو عقبہ وچ جناب رسول خدا دے تھہ مبارک تے بیعت کرا یا سی۔ دو بے مشرک سرداراں طرحاں اوہناں نے وی لکڑی دا اک بت اپنی حویلی وچ رکھیا ہو یا سی تے اوس دی ہی پوجا کر دے سن۔ اوس بت دا ناں منات سی۔ جدوں سردار عمرو سوک جاندے سن تے اوہناں دے قبیلے دے کجھ منڈے جہناں وچ اوہناں دا پتر معاذ تے اک دوجا معاذ بن جبل وی شامل سن، نوں چک کے لے جاندے تے اک گندے جے مدے وچ دگا دیندے۔ سویر نوں عمرو اٹھ دے، منات نوں او تھوں چک کے دھوندے، خشبو لاندے تے اپنے صنم کدے وچ فیر سجالدیندے۔ جدوں کئی راتاں تیکر ایہ کار ہوندی رہی تے بزرگ عمرو بن جموح تنگ پے گئے تے منات نوں آکھن لگے بنی مینوں تے نہیں پتا تیرے نال ایہ حرکت کون کردا اے۔ فیر اوہدے گل وچ تلوار لکا کے آکھیا بنی جے نہٹھر سکد ایں تے آپوں نہڑ لے۔ رات نوں ستے تے مسلمان منڈے فیر آجیجے۔ اوہناں تلوار تے پھڑ کے اک پاسے رکھ دتی تے اک مردہ کتا رسی نال منات دے گل وچ لکا دتا تے فیر اوہناں نوں بنی سلمہ دے اک پرانے سکے ہوئے کھوہ وچ جاو گایا، جہدے وچ لوکی نجاستاں سٹ دے سن۔ سویر نوں جدوں بزرگ اٹھے تے بت فیر غیب سی۔ لہدے لہدے اوس کھوہ تے اڑے تے اصل نظارہ دس پیا۔ منات دی ایہ ذلت دیکھ کے بزرگاں نے سوچیا بنی ایہ کیہو جہیا رب اے۔ نو جواناں نے وی گل سمجھائی بنی ہن پرانیاں گلاں چھڈ کے عقل دی گل کرو۔ ایوں جناب عمرو بن جموح نے اسلام قبول کر لیا تے فیر اپنی باقی حیاتی اپنے مالک حقیقی داشکر ادا کر دے رہے بنی اوس نے ساہواں دی ڈورٹن توں پہلاں ہدایت دی راہ تے ٹرن دی توفیق دے دتی۔



مکے والیاں دی ضد عقل دی تکرری اُتے

محبوب خدا حضرت محمدؐ دی مکی زندگی دا ذکر نیڑے تیرے پورا ہو گیا اے۔ تے اسیں ہن اوس تھاں تے کھلوتے ہاں جتھے نبی آخری الزماں ایہ فیصلا کر لیا سی، نئی مکہ چھڈ کے یثرب ٹر جانا چاہیدا اے۔ سوچن دی گل ایہہ ہے نبی آخری ایہ نوبت کیوں آئی؟ آپ a نے محمد بن عبد اللہ ہاشمی دی حیثیت نال اپنی چالھی ورھیاں دی حیاتی دا اک اک دن مکے والیاں دے سامنے گزاریا سی۔ اوہ چنگی طرحاں ایس حقیقت توں واقف سن نبی محمد بن عبد اللہ اک بھلا مانس، نیک، دیانتدار، ”صادق تے امین“ انسان اے۔ اوس دی دیانت نوں ویکھ کے ای مکے دی سبھ توں مالدار سوانی نے ویاہ داسنہیا گھلیا۔ بنو ہاشم دے ایس چشم و چراغ نے ہمیش نکلیاں نال پیار کیتا تے وڈیاں دی عزت کیتی۔ چودھرتے سرداریاں دے بکھیڑیاں وچ وی کوئی لت ڈاہ کے کدے کسے لالچ یاں طعنے دا مظاہرہ نہیں کیتا۔ اوہناں نوں ایہ وی پتا سی تے ڈاڈھی چنگی طرحاں پتا سی نبی محمد بن عبد اللہ کسے لات، منات یاں عزی اگے متھار گڑر گڑر کے یاں جناب موسیٰ یاں عیسیٰ نال چوکھے رشتے گنڈھ کے بڑا وڈا پجاری اکھوان دا وی کدے خاش وند نہیں ہويا۔

بعثت توں بعد دی حیاتی دی گل کریئے تے اتھے وی سانوں ہر تھاں تے ایہ نتارا دس دا اے نبی نہ کدے کسے کولوں کوئی مال منگیا، نہ اپنا ڈیرا بنا کے اتھے چودھر منوان دا لالچ کیتا، نہ قبیلے دی سرداری منگی تے نہ ای ایہ آکھیا نبی عبد اللہ بن عبد المطلب یاں آمنہ بنت وہب دے مزاراں تے میلے لایا کرو۔ فیہر جناب محمد a دی اطاعت وچ کیہ امر مانع سی؟ اخیر اوہناں ایڈی ضد کیوں کیتی؟ ایس سوال دے جواب لئی سانوں انبیاء g دے اصل مشن تے غور کرنا پوے گا۔

ذرا ڈونگھی نگاہ نال ویکھو نبی اک خدای خدائی منوان دا مقصد کیہ ہوسکدا اے، تے نری اللہ دی عبادت دا مطلب کیہ اے؟ اخیر اوہ کہہ دی گل اے نبی جدوں کسے اللہ دے بندے نے مالکم من الہ غیرہ دا اعلان کتیا، ساریاں طاغوتی طاقتاں جھاڑ دا کنڈا بن کے اوس نوں چنہر گنیاں۔ تے جے گل نری ایہی کوسی جنی اج وی سمجھی جاندی اے نبی مسیت وچ خدائے واحد نوں سجدہ کر لوؤ تے باہر نکل کے جابر حکمراناں دی ہر گل تے واہ واہ کر دے جاؤ تے فیہر اپنے وکھت کرن دی لوڑ کیہ سی؟ اصل وچ جھگڑا ایہ نہیں سی، کجھ ہور سی۔ تے اوہ جھگڑا ایہی سی نبی جدوں اللہ نوں اک من لیا تے چودھراں نے مک شگ جانا اے، ڈیرے اجڑ جانے نیں تے ”چودھری جی سلام اے“ دیاں واجاں سنن نوں نہیں لبھنیاں۔

قرآن وچ اک تے نہیں کئی تھاواں تے ایہ گل کھول کے دس دتی گئی اے نبی کفار تے مشرکین جہناں نال انبیاء دی لڑائی رہی اے، اللہ دی ہستی دے منکر نہیں سن۔ اوہ سبھ ایہ گل جان دے تے من دے سن کہ اللہ اک ہے، اوہی زمین آسمان دا مالک اے تے اوہناں دا اپنا خالق وی اوہی اک اللہ اے۔ کائنات دا سارا نظام اوہدے ای اشارے نال چل رہیا اے۔

اونہی مینہ ورھاندا اے۔ اونہی ہواواں نوں گردش دیندا اے تے اوہ دے ہتھ وچ سورج چن تے زمین، سبھ کچھ اے۔

﴿قُلْ لِّمَنِ الْأَرْضُ وَمَنْ فِيهَا إِنْ كُنْتُمْ تَعْلَمُونَ ۝ سَيَقُولُونَ لِلَّهِ ۝ قُلْ أَفَلَا تَذَكَّرُونَ ۝ قُلْ مَنْ رَبُّ السَّمَوَاتِ السَّبْعِ وَرَبُّ الْعَرْشِ الْعَظِيمِ ۝ سَيَقُولُونَ لِلَّهِ ۝ قُلْ أَفَلَا تَتَّقُونَ ۝ قُلْ مَنْ بِيَدِهِ مَلَكُوتُ كُلِّ شَيْءٍ وَهُوَ يُجِيرُ وَلَا يُجَارُ عَلَيْهِ إِنْ كُنْتُمْ تَعْلَمُونَ ۝ سَيَقُولُونَ لِلَّهِ ۝ قُلْ فَأَنَّا تُسْحَرُونَ﴾ (المومنون: ۸۴-۸۹)

ترجمہ: اوہناں نوں پچھو کہ زمین، تے جو کچھ زمین دے وچ ہے اے اوہ کس دا اے، دسو جے تہاں نوں پتا اے۔ اوہ آکھن گے اللہ دا اے۔ تسیں آکھو کہ فیرتسیں دھیان کیوں نہیں کردے۔ اوہناں توں پچھو کہ ستاں اسماناں دارب تے عرش عظیم دارب کون اے؟ اوہ آکھن گے۔ اللہ۔ تسیں فرماؤ کہ فیرتسیں اوس توں ڈر دے نہیں؟ اوہناں نوں پچھو کہ اوہ کون اے جہدے ہتھ وچ ہر شے دا اختیار اے تے جہڑا سبھناں نوں پناہ دیندا اے تے جہدے مقابلے تے کوئی کسے نوں پناہ نہیں دے سکدا۔ دسو جے تہاں نوں پتا اے تے اوہ آکھن گے: اللہ۔ تسیں فرما دیو تے فیرتسیں کہڑے دھوکے وچ پئے ہوئے او۔

﴿وَلَيْئِنْ سَأَلْتَهُمْ مَنْ خَلَقَ السَّمَوَاتِ وَالْأَرْضَ وَ سَخَّرَ الشَّمْسَ وَالْقَمَرَ لَيَقُولُنَّ اللَّهُ فَأَنَّى يُؤْفَكُونَ ۝ اللَّهُ يَبْسُطُ الرِّزْقَ لِمَنْ يَشَاءُ مِنْ عِبَادِهِ وَيَقْدِرُ لَهُ إِنَّ اللَّهَ بِكُلِّ شَيْءٍ عَلِيمٌ ۝ وَلَئِنْ سَأَلْتَهُمْ مَنْ نَزَّلَ مِنَ السَّمَاءِ مَاءً فَأَحْيَا بِهِ الْأَرْضَ مِنْ بَعْدِ مَوْتِهَا لَيَقُولُنَّ اللَّهُ قُلِ الْحَمْدُ لِلَّهِ ۝ بَلْ أَكْثَرُهُمْ لَا يَعْقِلُونَ﴾ (عنكبوت: ۶۱-۶۳)

”جے تسیں اوہناں نوں پچھو کہ اسماناں تے زمین نوں کس نے پیدا کیتا اے، تے کس نے سورج تے چن نوں تابعدار بنایا ہویا اے، اوہ ضرور آکھن گے کہ اللہ نے۔ فیرایہ اخیر کدھر بھٹکائے جارہے نیں..... تے تسیں اوہناں نوں پچھو کہ کس نے اسمان توں پانی لاہیا اے تے کس نے مری ہوئی زمین نوں نویں حیات دتی اے تے اوہ ضرور آکھن گے کہ اللہ نے۔ تے (تسیں) آکھو کہ سب تعریفاں اللہ لئی نیں پر چوکھے لوک نہیں سمجھ دے۔“

رب دے ایس کلام توں پتا لگدا اے کہ اللہ دے ہون، تے زمین اسمان دا مالک خالق ہون تے کسے نوں اختلاف نہیں سی۔ لوکاں ایہناں گلاں نوں آپوں ای من دی سی۔ ظاہر اے فیرایس گل لئی تے انبیاء دی لوڑ نہیں سی۔ فیرایہ سوال تے پیدا ہوندا اے عی انبیاء دی آمد کس گل لئی سی تے جھگڑا کس گل داسی۔

قرآن ایس سوال دا جواب دیندا اے کہ سارا جھگڑا ایس گل تے رہیا اے کہ انبیاء آکھدے سن کہ جہڑا تہاڈا تے زمین اسمان دا خالق اے اوہ تہاڈا رب تے الہ دی اے۔ جو ای کہ حضرت نوح g نے اپنی قوم نوں آکھیا یا قوم اعبدا للہ ما لکم من الہ غیرہ (اے میری قوم اللہ دی عبادت کرو۔ اوہدے بنا تہاڈا کوئی معبود نہیں) پر دنیا ایہ گل سنن تے من لئی تیار نہیں سی۔ اس دی وجہ ایہی سی کہ جدوں اسیں کسے نوں اپنا معبود من لیندے ہاں تے فیرا سیں اپنے آپ ای عابد توں عبد بن جانندے ہاں۔ عبد، بندایاں غلام اپنے معبود لئی پوری اطاعت تے فرمانبرداری نال جو کچھ کردا اے، اوس دا نام عبادت اے۔

خدمت واسطے کھلونا، احترام و بچہ پنہنا، معبوداگے سر جھکانا، وفاداری دے جذبے نال بھریاں رہنا، فرمانبرداری و بچہ نس بچ کرنا، جس کم دا اشارا ہووے اوس نوں پوری ایمانداری نال کرنا، جو کجھ آقا طلب کرے اوس نوں پیش کرنا، اوس دی طاقت تے حیثیت اگے ذلت تے عاجزی اختیار کرنا، جہڑا قانون اوہ بنائے اوس تے عمل کرنا، جہدے خلاف حکم دیوے اوس تے چڑھ دوڑنا تے جتھے اوس دا فرمان ہووے سر تک کٹوا دینا ای عبادت دا اصل مطلب اے۔

معبودیت دی ایہ ٹھانھ بندیاں دے مونہاں وچ وی پانی لے آؤندی اے۔ انساناں دی ودھی ہوئی حرص تے اقتدار دی سوادلی خاہش اوہناں نوں ایس گل تے ابھاردی اے بئی دوجے انساناں دے خدا بنن، اوہناں توں اپنی بندگی کران، اوہناں دے سراپنے اگے جھکان، اوہناں تے اپنا حکم چلان تے اوہناں نوں اپنیاں ناجائز خواہشاں دے حصول دا ہتھیار بنان۔ ایہ خدا بنن دی لذت کجھ اجہی اے بئی ایس توں ودھ کوئی سوادلی شے بندا بچے تیکر لھامی نہیں سکيا۔

خدائی دی ایہ ہوس رکھن والے بندے دو طرحاں دے ہوندے نیں تے اوہ دو وکھو وکھ راہواں اختیار کر دے نیں۔ طاقتور تے جابر اپنی شاہی تے لشکراں دے مان تے بندیاں نوں اوہ گل آکھدے نیں جہڑی فرعون نے مصر دے لوکاں نوں آکھی سی کہ **اَنَا بِكُمْ اِلٰہٌ عَلٰی ہٰذَا** تہاڈا سبھ توں اچا رب ہاں) تے ما علمت لکم من الہ غیرى (میں نہیں جان دا بئی میرے سوا تہاڈا ہور وی کوئی معبود ہے) یاں جہڑی نردو نے ابراہیم g نوں آکھی سی:

﴿الَمْ تَرَ اِلٰی الَّذِیْ حَآجَّ اِبْرٰہِمَ فِیْ رَبِّہٖ اَنْ اِنَّہٗ اللّٰہُ الْمَلٰکَ ۚ اِذْ قَالَ اِبْرٰہِمُ رَبِّیْ الَّذِیْ یُحٰی وَ یُمِیْتُ قَالَ اَنَا اُحٰی وَ اُمِیْتُ ۖ قَالَ اِبْرٰہِمُ فَاِنَّ اللّٰہَ یَاْتِیْ بِالشَّمْسِ مِنَ الْمَشْرِقِ فَآتٍ بِہَا مِنَ الْمَغْرِبِ فَبُہِتَ الَّذِیْ کَفَرَ ۖ وَاللّٰہُ لَا یَهْدِی الْقَوْمَ الظّٰلِمِیْنَ﴾ (البقرہ: ۲۵۸)

”تسیں ویکھیا نہیں اوہ شخص جہنے ابراہیم نال حجت کیتی، ایس پاروں بئی ابراہیم دارب کون اے۔ ایس لئی بئی اللہ نے اوس نوں حکومت دتی ہوئی سی۔ جدوں ابراہیم نے آکھیا کہ میرا رب اوہ اے جہدے ہتھ وچ زندگی تے موت اے تے اوس نے جواب دتا کہ زندگی تے موت میرے ہتھ وچ اے۔ ابراہیم نے آکھیا کہ اللہ تے سورج نوں مشرق ولوں لیاؤندا اے توں ذرا مغرب ولوں کڈھ لیا تے کافر ہکا بکا رہ گیا۔ تے اللہ ظالماں نوں سدھاراہ نہیں وکھاندا۔“

جویں دا خطر انمردوں ابراہیم کولوں تے فرعون نوں موسیٰ کولوں سی، کجھ ایوں دا ای خطر ابولہب، ابو جہل، امیہ تے ولید بن مغیرہ ورگے لوکاں نوں محمد a کولوں سی۔ اوہناں نوں یقین سی بئی اللہ نوں ”اک اللہ“ تے ”واحد معبود“ من لیا تے فیراوس اک دے اگے مکے دے سارے لوکی اکو صف وچ کھلون لگ پئے تے فیر ساڈے برابر تے ساڈی صف وچ زید تے بلال وی کھلون لگ پین گے۔ ایوں چودھرنوں زوال آجائے گاتے ساڈا لکھ نہیں رہ جانا۔ اوہ ایگل محسوس کر رہے سن بئی جویں دا نظام محمد بن عبد اللہ a لیاؤنا چاہندا اے ایس وچ حسب نسب، گورے کالے تے شہری بدوی دے حوالیاں نال کوئی عزت یاں ذلت نہیں۔ ایہدے وچ وڈیائی دا اک ای معیار اے تے اوہ تقویٰ اے۔ عزت دا معیار نرا تقویٰ اے، ایس گل نوں مجھن سمجھان لئی میں اوہ مشہور واقعہ یاد کرانا چاہندا ہاں بئی ولید بن مغیرہ نبی اکرم a نال اسلام

دی بابت کچھ گل بات کر رہی تھی تے اوتھے ابن ام مکتوم وی اپڑ گئے تے قرآن مجید دی کسے آیت دلوں کوئی گل بچھی۔ ابن ام مکتوم نابینا سن۔ ہوسکدا اے ایس پاروں اوہ معاملے دی نزاکت نوں ٹھیک طرحاں محسوس نہ کر سکے ہون۔ بہر حال جناب محمدؐ نوں اوہناں دی ایہ مداخلت کوئی چنگی نہ لگی تے آپ a اوہناں نال کچھ خفا وی ہو گئے۔ ایسے غصے وچ ابن ام مکتوم نوں اوتھے ای پھڈیا تے آپوں دولت خانے تے تشریف لے گئے۔ تھوڑے چر بعد ای ککے پیٹھیاں پیٹھیاں ایہ دلیل آئی بنی ایہ میں کیہ کہتا، تے نال ای حکم ربی وی نازل ہویا:

﴿عَبَسَ وَتَوَلَّى ۖ اِنْ جَاءَهُ الْاَعْمٰی ۚ وَمَا يُدْرِیْكَ لَعَلَّہٗ یَرْکٰی ۚ اَوْ یَذَّکَّرُ فَتَنْفَعَہُ الذِّکْرٰی ۚ اَمَّا

مَنْ اَسْتَغْنٰی ۚ فَانْکَ لَہٗ تَصَدٰی ۚ وَمَا عَلَیْکَ الْاٰیٰتِی ۚ وَاَمَّا مَنْ جَآءَکَ یَسْعٰی ۚ وَہُوَ

یَخْشٰی ۚ فَانْکَ عَنْہُ تَلْہٰی ۚ کَلَّا اِنَّہَا تَذِکْرَۃٌ ۚ فَمَنْ شَآءَ ذَکَّرَہٗ ۝﴾ (عبس: ۱ تا ۱۶)

”ایس گل تے تیوڑی چڑھائی بنی اک نابینا اوہناں کول آیا۔ اے پیغمبر! تہا نوں اندازا نہیں خورے اوہ تہاڑی دتی مت نال پوری طرحاں سنور جاندا یاں نصیحت دی گل سندا تے اوہ نصیحت اوس نوں فائدہ دیندی۔ تے جہیزا بندادین ولوں بے پروائی ورتدا اے اوہدے ول تے تسلیں خوب دھیان کردے او حالان اوہدے نہ سورن تے تہاڑے تے کوئی الزام نہیں تے جہیزا رب توں ڈر کے تہاڑے ول دوڑ دوڑ آوے تسلیں اوس ول دھیان نہ کرو۔ (نہیں ایہہ نہیں ہونا) قرآن اک نصیحت دی چیز اے جس دا دل منے ایس نوں قبول کر لوے۔“

ابوسفیان یاں اوہناں دے یاران طریقت دا اپنے وڈکیاں دے دین تے ڈٹے رہن دا مطلب ایہہ بالکل نہیں سی کہ اوہ ایس تے دلوں یقین رکھدے سن، سگوں اصل گل تے ایہی بنی اوہناں نے ہر اوس طاقت یاں ہستی نال ٹکر لینی سی جہدی وجہ توں اوہناں نوں اپنی چودھراہٹ توں محروم ہو جان دا شبہ وی ہوندا۔ اوہناں ایسے گلوں حضرت محمدؐ دی تابعداری کرن دی بجائے اوہناں نال ہر رنگ دے حسد، بغض تے کینے توں کم لیا۔ مثال موجب امیہ بن الصلت حضرت محمدؐ a دی بعثت توں پہلاں آؤن والے اخیر نبی نوں جی آیاں نوں آکھن لئی تیار بیٹھاسی۔ اوہ ایہ امید وی لائی بیٹھاسی بنی خورے نبوت اوسے نوں ای مل جاوے۔ جدوں اوس نوں پتا لگا بنی ایہ سودا اوس نوں مل گیا اے جہیزا ایس دا اصل حقداری تے حسد نال اوس دا کلیجا چھانی ہو گیا۔ ایوں دی ہی ذہینت ولید بن مغیرہ دی سی۔ اوہ کپی پیڑھی طرحاں ایہ گل جان داسی بنی اخیر نبی دے آؤن دا ویلا آ گیا اے پر جدوں محمدؐ بن عبداللہ نوں ایس مرتبے اُتے ویکھیا تے دل پھڑکے بہ گیا۔ آکھن لگا کہ ایہ کیہ گل ہوئی بنی نبوت محمدؐ نوں مل جاوے تے قریش دا میرے ورگا سرغنا ایس توں محروم رہ جاوے تے چلو بے میں نہیں تے فیر ابو مسعود عمر تے ابن عمیر ثقفی تے طائف دے چنگے وڈے چودھری میں، اوہناں نوں وی ایس اہل نہیں سمجھیا گیا۔ مکہ تے طائف، دوواں تھواواں تے ساڈے توں ودھ بھلا ہو رکھدا اے!

قرآن نے ایسے واقعے ول اشارہ کیا اے:

﴿لَوْلَا نُرُّلَ ہٰذَا الْقُرْآنِ عَلٰی رَجُلٍ مِّنَ الْقَرِیْنَتَیْنِ عَظِیْمٍ ۚ اَہُمْ یَقْسِمُوْنَ رَحْمَۃَ رَبِّکَ نَحْنُ

قَسَمْنَا بَیْنَهُمْ مَّعِیْشَتَهُمْ فِی الْحَیَآۃِ الدُّنْیَا﴾ (الزخرف: ۳۱ تا ۳۲)

”تے آکھن لگے ایہ قرآن جے کر رب دا کلام اے تے فیراہیہناں دوواں دستیاں وچوں کسے وڈے بندے اُتے کیوں نازل نہیں کیتا گیا۔ کیہ اوہ تہاڈے رب دی رحمت (نبوت) وچ کوئی ونڈیاں پاؤنا چاہندے نیں۔ اوہناں وچ اوہناں دی حیاتی دیاں لوڑاں اسیں ہی تے ونڈیاں نیں۔“

ابوسفیان، ابو جہل تے اخنس لوکاکی توں لگ لگ کے، تے اک دوجے توں دی لک لک کے راتاں نوں سوہنے محمد a دی زبان توں رب سوہنے دا سوہنا کلام سندے ہوندے سن۔ جدوں ایہ بھید اک دوجے تے کھل گیا تے اک دیہاڑے اخنس، ابو جہل دے گھر آکے آکھدا اے: ”لے بھئی ابو الحکم! ایہ دس بنی اسیں محمد a دی زبان توں جہڑا کلام سندے رہے ہاں، اوس تے تیرا کیہ خیال اے؟“ ابو جہل نے جہڑا جواب دتا اوس توں اوہدی بے بسی حالت دا چنگی طرحاں پتا لگدا اے تے ایہ وی پتا لگدا اے بنی جھگڑا محمد a دے رب نوں معبودنن دا نہیں سی سگوں منکھ ایس گل داسی بنی چودھر جاندی اے۔ لو جواب سنو۔ اکھے:

”اخنس جی! کیہ دساں بنی قرآن تے میری کیہ رائے ہے؟ بنو عبد المناف نال چودھر دا جھگڑا کوئی اج توں اے؟ اوہناں نے اپنا منصب قائم رکھن لئی اپنا دسترخوان کھلاریا تے اسیں وی اپنے ڈیرے تے پروہیاں دی ٹکاٹکا کے سیوا کیتی، جے اوہناں میدان وچ بہادری دے جوہر دکھائے تے اسیں اپنی شجاعت لوکاکی نوں دکھان وچ کوئی کسر نہ چھڈی، جے اوہناں سخاوت دے دریا وگائے تے اسیں وی اپنیاں ہمیاناں دے مونہ کھول دتے۔ بس ایہ سمجھ لوؤ بنی اسیں اوہناں نال سانویں ٹردے آئے ہاں، بلکل ایوں جو یں دو گھوڑے پیراں نال پیر لائی اکوچھے بھجے نیں۔ پر جدوں بنی عبد المناف نے ایہ آکھیا کہ ساڈے وچ اک نبی دا ظہور ہو یا اے تے اوہدے اُتے اسماناں توں وحی دی لہندی اے، تے ایہدے وچ اسیں اوہناں نال جوڑ نہیں پاسکے، کیوں جے محمد بن عبد اللہ تے اپنی تھاں تے پکا اے پر اسیں اپنے قبیلے وچ نبی پیدا نہیں کر سکے۔ اخنس! ویکھنا! ہن نہ اسیں اپنے قبیلے وچ نبی پیدا کر سکے تے نہ ہی اوہناں دے نبی اُتے ایمان لیا کے اس دی تصدیق وچ زبان کھول سکدے ہاں۔“

ہن جے ککے تے طائف دے آکڑ خاں تے اوکھے سردار بھورا عقل توں کم لیدے تے فیراوہ ایس گل نوں اپنے سائبے رکھدے بنی جے بند اپنے سائبے دے بندے، سگوں دشمن دی زبان توں وی حقیقت دی داستان سنے تے بیان کرن والے نوں اپنا جتن تے خیر خواہ جانے۔ ایتھوں تیکر بنی قارون دی دولت، سکندر دے ٹوہر پٹے تے قیصر دی بادشاہی وی حقیقت دے مقابلے وچ تیلے دے ساویں وی اوہدیاں نظراں وچ نہ سما سکے۔ پر ایس تھاں تیکر نرا اوہی بند اپڑ سکدا اے جیس دے قلب اندر اللہ دی طرفوں حق نوں قبولن دا ولولاموجود ہووے۔ اوہ لوکی نہیں اپڑ سکدے جہڑے مال دولت تے دنیا دیاں نعمتاں اُتے جان چھڑکدے نیں تے عکلیاں مصلحتاں تے ککے ککے فائدیاں لئی حق سچ توں اکھاں میٹن توں گریز نہیں کردے۔ نری اینی گل ای نہیں سگوں قتل و غارت گری توں وی دریغ نہیں کردے۔

ککے دے کافر جہڑے اپنے آپ نوں کسے ضابطے، اصول یاں قانون دے پابند ٹھہرن دے عادی نہیں سن، اوہ حشر، یوم حساب تے عذاب دوزخ جہیاں گلاں توں وی چودے سن۔ اوہ رنگ رلیاں منان دے عادی سن۔ لٹ مار، سود در سود، بد

گوئی تے بدکاری نوں بھورا وی عیب نہیں سن جان دے۔ دو بے پاسے جناب محمد a اوہناں نوں قرآن دیاں دیاں اوہ آیتیاں سناندے جہناں وچ برائی اُتے اللہ دی پکڑ دا ذکر ہونداتے اوہ سوچن لگ پیندے کہ ایہ کویں دا دین اے جہڑا تھاں تھاں تے ”دھیان کرو، رب علیم وی جے تے خیر وی ہے“ دیاں واجاں لاند اے۔ ذرا دیکھو پتا پانی ہوند اے کہ نہیں؟

﴿إِنَّ رَبَّكَ لَبَلِمْصَادٍ﴾ (الفجر: ۱۴)

”بے شک تہاڈا رب مجرماں دی تاڑ وچ اے۔“

﴿وَقَالُوا ۖ إِذَا كُنَّا عِظَامًا وَرُفَاتًا ۖ إِنَّا لَمَبْعُوثُونَ خَلْقًا جَدِيدًا ۖ قُلْ كُونُوا حِجَارَةً أَوْ حَدِيدًا ۖ أَوْ خَلْقًا مِّمَّا يَكْبُرُ فِي صُدُورِكُمْ فَسَيَقُولُونَ مَنْ يُعِيدُنَا قُلِ الَّذِي فَطَرَكُمْ أَوَّلَ

مَرَّةٍ﴾ (بنی اسرائیل: ۹ تا ۵۱)

”ایہ لوک آکھدے نیں بنی جدوں ساڈیاں ہڈیاں ای رہ جان گئیاں تے اسیں گل سڑ جاواں گے تے فیر کیہ اسیں سچی مچی نویں سرے پیدا ہوداں گے۔ تسیں آکھو بنی بھادیں پتھر ہو جاویاں لوہیاں یاں کوئی ہور شے بن کے دیکھ لوو جھوں تسیں چوکھا گنڈا جان دے او (ایہ تے ہونا اے) فیر اوہ آکھن گے اوہ کون اے جہڑا سانوں فیر زندا کرے گا۔ تسیں فرماؤ اوہی چہنے تہاںوں پہلی وار پیدا کیتا سی۔“

﴿فَإِذَا جَاءَتْ الصَّاعَةُ ۖ يَوْمَ يَفِرُّ الْمَرْءُ مِنْ أَخِيهِ ۖ وَأُمُّهُ وَأَبِيهِ ۖ وَصَاحِبَتِهِ وَبَنِيهِ ۖ لِكُلِّ أَمْرٍ مِنْهُمْ يَوْمَئِذٍ شَأْنٌ يُغْنِيهِ ۖ وَجُوزُهُ يَوْمَئِذٍ مُّسَفَرَةٌ ۖ ضَاحِكَةٌ مُّسْتَبْشِرَةٌ ۖ وَوُجُوهُ يَوْمَئِذٍ عَلَيْهَا غَبَرَةٌ تَرْهَقُهَا قَتَرَةٌ ۖ أُولَٰئِكَ هُمُ الْكَافِرَةُ الْفَجَرَةُ ۖ﴾ (عبس: ۳۳-۴۲)

”فیر جدوں اوے گی آوہ کن پاڑن والی چنگھاڑ۔ اوس دیہاڑے بندائے گا اپنے بھراتوں، اپنی ماں توں، اپنے پیوتوں، اپنی جوڑوتوں تے اپنے پتر ایں توں۔ اس دن او تھے ہر کسے نوں اپنی ای فکر ہونی اے بس، ہور کسے دی نہیں۔ کئے مونہ اوس دن ہسدے تے خوشیاں مناندے دن گے تے کئے مونہاں تے اوس دن پچھتاوے دی مٹی ہونی اے (عملاں پاروں مونہ) کالکھ دے تھلے ڈھکے ہوئے (ہون گے) ایہ لوک اوہو نیں، کافر، بدکار۔“

رب دے کلام دیاں ایہ کجھ گلاں نیں جہناں نوں اسیں دہرایا اے ورنہ محمد a نے خورے کویں کوں مکے دے کافراں نوں کفر تے شرک توں ڈرایا تے توحید تے نیک عملاں دے چنگے بدلے دیاں بشارتاں دتیاں سن۔ اگے ویکھو:

﴿يَوْمَ نَقُولُ لِجَهَنَّمَ هَلِ امْتَلَأَتْ وَتَقُولُ هَلْ مِنْ مَزِيدٍ﴾ (ق: ۳۰)

”جیسن دن اسیں دوزخ نوں پچھاں گے، توں بھر گئی ایں تے اوہ آکھے گی کجھ ہور وی ہے۔“

﴿إِنَّ الَّذِينَ كَفَرُوا بِآيَاتِنَا سَوْفَ نُصْلِيهِمْ نَارًا ۖ كُلَّمَا نَضِجَتْ جُلُودُهُمْ بَدَّلْنَاهُمْ

جُلُودًا غَيْرَهَا لِيَذُوقُوا الْعَذَابَ ۖ إِنَّ اللَّهَ كَانَ عَزِيزًا حَكِيمًا﴾ (النساء: ۵۶)

”بنا شبا جھڑے لوکی ساڈیاں آیتاں دے منکر ہوندے نیں اسیں اوہناں نوں چھیتی ای اگ وچ سٹ دیواں

گے۔ فیر جدوں اک واری اوہناں دی کھل گل سڑ جاوے گی تے اسیں اوہدی تھاں تے دو جی کھل چاڑھ

دیواں گے تاں جے عذاب ای چکھدے رہن۔ بنا شا اللہ تعالیٰ زبردست نیں تے حکمت والے نیں۔“

ذرا گوہ کریئے تے پتا لگدا اے بئی ایہ کچھ پڑھ کے اسیں اندروں ہل کے رہ گئے ہاں۔ حالاں ساڈے کول ایمان دی دولت وی اے، آخرت لئی کچھ اکٹھا کرن دا آہروی کردے ہاں تے سانوں ایس گل دی وی تسلی اے بئی جیس نوں کوثر عطا کیتی گئی اے اوہ ساڈا سفارشی وی اے۔ ہن ویکھو بئی جس بندے کول ایہ سہارے نہیں ہن اوہدا قیامت دے تیور تے جہنم دا دبدبا ویکھ کے کیہ حال ہوئے گا۔ ملے دے مشرکاں دے کنناں تائیں جدوں رب دے ایہ فیصلے اپڑے ہون گے تے اوہناں کوں خوف کھا دا ہونا اے یا اوہناں دے وڈکیاں دا کیہ عالم ہووے گا۔ اوہ تے قرآن نازل ہون توں پہلاں اپنے آپ نوں، بتاں دی حفاظت وچ ہون پاروں، ہر طرحاں دے حساب تے عذاب توں بری سمجھدے سن۔

سو محمد a دے لیاندے دین توں کفار مکہ دی دوری دی اک وڈی وجہ آخرت دا تصور وی سی۔ بھاویں اوہناں نوں ایہ گل وی دسی جاندی سی کہ چنگے عملاں دا بدلا جنت اے، جس دی وسعت دا کوئی حساب ای نہیں تے جہدے وچ کوئی مندی گل سنن ویکھن لئی نہیں ہونی، پر اوہ آکھدے سن کہ ایوں دی گل دسو جہدے وچ یوم حساب دا کوئی ذکر نہ آوے۔ گھالے وچ پئے تے بھلیں پئے مشرک بڑے عجلت پسند سن۔ اوہ ایہ گل کدے وی پسند نہیں سن کردے کہ اوہ اپنے آپ نوں یوم جزادی اڈیک دا گناہگار بنان۔

خدائی دے دُجے دعویدار:

خدائی دی خواہش رکھن والے لوکاں دی دُجی قسم اوہ اے جنہاں کول خدائی دے اعلانیہ دعویاں دی ہمت تے طاقت نہیں ہوندی پر اوہ چالاکی تے فریبی نال لوکاں نوں کچھ اجہی متے لالیندے نیں بئی لوکاں رب تیکر اپڑن لئی اوہناں دا وسیلا ضروری مجھن لگ پیندی اے۔ ایس قسم دے بندے لوکاں نوں رب اگے جھکن دا مشورہ دین دی بجائے ایہہ پسند کر دے نیں کہ بندے اوہناں دے پیر چمن تے سوانیاں اوہناں دے موڈے کھٹن۔ اوہناں دی بنائی ڈھیری دے اُتے چڑھاوے چڑھائے جان، لوکاں او تھے متھاٹیکے تے سوانیاں سراں توں چادران لاہ کے ہتھاں وچ پھڑلین تے ٹل لا کے واجاں لان بئی ”پیر! تیھوں ای لینا اے۔“

ایوں دی خدائی دے دعویدار بندے پوری پلاننگ نال لوکاں نوں احساس دیواندے نیں بئی ایہی بابا جی تہانوں کنڈھے لاسکدے نیں۔ ایہی تہاڈے مددگار نیں۔ ایسے نے وگڑی سواری اے۔ ایس نوں راضی نہ کیتا تے قحطیاں بیماری پے جانی اے۔ تے نالے سُن لوو بئی ایہناں بزرگاں تیکر گل اپڑاں دا طریقہ سانوں آؤندا اے، صرف سانوں۔ ایوں پروہت، پجاری تے مجور بندیاں اُتے بندیاں دی خدائی دے سوا دلیندے رہندے نیں۔

یشرب جان دی اجازت تے ہجرت دیاں اوکڑاں:

مکے وچ محمد a دی مخالفت دا مڈھ تے اوہ دن ای بجھ گیا سی جیس دن آپ نے توحید دا پہلا نعرہ ماریا سی تے مکے دے مشرکاں دے معبوداں دی تذلیل ہونی شروع ہو گئی سی۔ پر جدوں اعلانیہ تبلیغ شروع ہوئی تے کافراں ولوں

مسلمانانوں انتاں دے دکھ دتے گئے۔ اوہناں تے اوہ سختیاں کیتیاں گئیاں بئی سن کے کچھ مونہ نوں آؤنداے۔ ایوں کجھ مسلمان حکم رسالت موجب حبشہ ول ٹر گئے، کجھ شعب ابوطالب وچ محصور کیتے گئے تے کجھ تھان تھان مصیبتاں جھلدے رہے۔ جناب ابوطالب دی وفات توں بعد تے رسول خدا تے ڈاڈھا اوکھا ویلا آ گیا تے حالت ایہ ہو گئی سی بئی یاں تے آپ a (نعوذ باللہ) اپنے دعویٰ نبوت توں پچھے ہٹ جان یاں قریش نال سدھی طرحاں دوہتھ کرن۔ بھادیں صحابہ کرام آپ تے جان نچھاور کر دے سن پرکے دے کافراں دے ٹڈی دل اگے مٹھی بھر بندیاں دی کیہ واہ چلنی سی۔ فیر بیعت عقبی ثانیہ تے کافراں دے پلٹ جتے اُتے لگا اوہ پھٹ سی جھڑا اوہناں نوں اک پل وی چین نال نہیں بہین دیندا سی۔ اوہ سڑدے بلدے رہندے سن تے ہر ویلے ایس چکر وچ ہوندے سن بئی کسے ویلے کوئی اجیہا داے لگے بئی اوہ توحید دے نویں اُگے خوشبودار بوٹے نوں مڈھوں ای پٹ کے سٹ دین۔ ایہو جتے ویلے رب سوہنے نے اپنے بندیاں نوں ایوں دے اشارے دینے شروع کردتے:

﴿يَعْبَادِيَ الَّذِينَ آمَنُوا إِنَّ أَرْضِي وَاسِعَةً فَإِيَّايَ فَاعْبُدُونِ ۝ كُلُّ نَفْسٍ ذَائِقَةُ الْمَوْتِ ثُمَّ إِلَيْنَا تُرْجَعُونَ ۝ وَالَّذِينَ آمَنُوا وَعَمِلُوا الصَّالِحَاتِ لَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ أَجْرَهُم بِأَفْضَلِ الَّذِي كَانُوا يَعْمَلُونَ ۝ وَالَّذِينَ آمَنُوا وَعَمِلُوا الصَّالِحَاتِ لَنُدْخِلَنَّهُمُ الْجَنَّاتِ غُرَفًا يُتَجَرَّوْنَ مِنْ تَحْتِهَا الْأَنْهَارُ وَلَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ أَجْرَهُم بِأَفْضَلِ الَّذِي كَانُوا يَعْمَلُونَ ۝ وَالَّذِينَ آمَنُوا وَعَمِلُوا الصَّالِحَاتِ لَنُدْخِلَنَّهُمُ الْجَنَّاتِ غُرَفًا يُتَجَرَّوْنَ مِنْ تَحْتِهَا الْأَنْهَارُ وَلَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ أَجْرَهُم بِأَفْضَلِ الَّذِي كَانُوا يَعْمَلُونَ ۝ وَالَّذِينَ آمَنُوا وَعَمِلُوا الصَّالِحَاتِ لَنُدْخِلَنَّهُمُ الْجَنَّاتِ غُرَفًا يُتَجَرَّوْنَ مِنْ تَحْتِهَا الْأَنْهَارُ وَلَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ أَجْرَهُم بِأَفْضَلِ الَّذِي كَانُوا يَعْمَلُونَ ۝﴾

(العنکبوت: ۵۶-۶۰)

”اے میرے بندو! جھڑے ایمان لیائے او میری زمین چوکی کھلی ڈھلی اے۔ ایس لئی میری بندگی کرو۔ ہر جیوندے نے موت دا سواد چکھنا اے۔ فیر تیں مٹر کے وی ساڈے ول آؤنا اے۔ جہناں لوکاں ایمان لیاندا اے تے نیک عمل کیتے نیں اوہناں نوں اسیں جنت دے اُچے گھراں وچ رکھاں گے۔ جہناں دے تھلے نہراں وگدیاں ہون گئیاں۔ اوہ تھے اوہ ہمیشہ رہن گے۔ نیک کم کرن والیاں لئی کڈا سوہنا اجراے۔ (ایہ اوہنا لئی اے) جہناں صبر کیتا تے اپنے رب تے بھروسا کر دے نیں۔ تے کتے ای جنور اچھے نیں جھڑے اپنا رزق نال نہیں چکی پھر دے۔ اللہ ای اوہناں نوں رزق دیندا اے تے تہاں وی۔ اوہ سمجھ کجھ سُن داتے جان دا اے۔“

ایہناں آنتاں توں صاف پتا لگ رہیا اے بئی رب ایہ چاہندا اے بئی جے کر کے وچ اوس دی بندگی اوکھی ہو رہی اے تے رب دی زمین دا کھلا کوئی گھٹ تے نہیں۔ تیں مکہ چھڈ کے کسے اجہی تھان تے جاسکدے او جتھے اوس دی بندگی وچ کوئی رکاوٹ نہ ہووے۔ تہاں قوم، قبیلہ، شہر تے ہر اوہ شے چھڈ دینی چاہیدی اے جھڑی تہاں رب توں دُریدی لے جاوے، ایہتوں تیکر کہ دھی پتر تے ماپے وی۔ (جوں کہ بعد دے حالات، خاص کر کے جناب ابوسلمہ b دی داستان توں پتا لگدا اے۔)

جدوں بند گھربار تے ڈیرا ڈنڈا چھڈ کے کدھرے دریڈا نکل جاندا اے، اودوں اوس نوں اپنے بال بچے توں بعد جس شے دی چوکی چتا ہوندی اے اوہ روٹی دے وسیلے نیں۔ ایس لئی اللہ نے ایہدے ول چوکی سوہنے اکھراں نال اشارا

کردیاں آکھیا اے:

﴿وَكَايْنٌ مِّنْ ذَا بَئَةٍ لَا تَحْمِلُ رِزْقَهَا اللَّهُ يَرْزُقُهَا وَإِيَّاكُمْ﴾ (العنکبوت: ۶۰)

”تے کئے ای جنورنیں جیہڑے اپنی روزی نال نہیں چکی پھر دے۔ اللہ ای روزی دیندا اے، اوہناں نوں وی تے تہانوں وی۔“

مطلب ایہ ہے کہ زمین تے رزق دے طلبگارزے تسیں نہیں سگوں لکھاں مخلوقاں ہو روئی نہیں جہناں نوں زندا رہن لئی رزق دی لوڑ ہوندی اے۔ تے جے میں اوہناں نوں رزق دیندا ہاں جہڑے اپنی کنڈ تے کوئی بھار نہیں چکدے یاں اپنی روٹی لئی کوئی آہر نہیں کردے تے فیر چیتے رکھو کہ تسیں تے اشرف المخلوقات جے، تہانوں رزق کوں نہ لھے گا۔

ایوں رازق نے اپنے بندیاں نوں ایہ یقین دوا دتا پئی مکہ چھڈ دین دی صورت وچ تسیں بھکھے نہیں مردے سگوں تہاڈی روٹی میرے ہی ذمے ہے۔ فیر جدوں جناب رسول اللہ a نے رب دلوں لے اشارے اپنے سنگی ساتھیاں نوں دسنے شروع کیتے تے مسلماناں نے مدینے ول ہجرت دا سوچنا شروع کردتا۔ ابن جریر تے ابن ہشام دا بیان اے کہ ابے مدینے ول عام ہجرت دی نوبت نہیں سی آئی کہ رسول اللہ a دے رضاعی بھراتے آپ دی پھپھی برہ بنت عبدالمطلب دے صاحبزادے حضرت ابوسلمہ نے یثرب جان دا فیصلہ کر لیا، کیوں جے حبشہ توں پرتن توں بعد اوہ مکے دے کافراں، تے خود اپنے قبیلے بنی مخزوم دے ظلماں توں تنگ پے گئے سن۔ مکے دے ظالم کافراں نے اوہناں نوں بڑی اذیت دتی سی۔ اُم سلمہ آکھدیاں نیں کہ:

”جدوں میرے خاوند ابوسلمہ یثرب جان لگے تے میں وی اپنے بچے سلمہ نوں لچھڑ لے کے نال نکل پئی۔ میرے خاوند مینوں تے سلمہ نوں اوٹھ تے بٹھا کے اُسدی نکیل پھڑکے ٹرپے۔ میرے پیکے دے لوکاں (بنی مغیرہ نے) ساناں جاندیاں ویکھیا تے راہ ڈک کے کھلو گئے تے آکھن لگے: ”ابوسلمہ! توں آپ تے ساتھوں وادھوں ہو گیا ایں، جتھے تیرا دل من دا اے جا، پر اپنی دھی نوں تے اسیں تیرے نال در بدر نہیں ہون دیواں گے۔“ ایہ آکھ کے اوہناں اوٹھ دی نکیل ابوسلمہ دے ہتھوں پھڑلئی تے مینوں اوٹھ توں لا کے پچھاں لے ٹرے۔ دو جے پاسے میرے سوہریاں دا قبیلہ (بنی عبدالاسد) وی اپڑ گئے تے میرے پیکیاں نوں آکھن لگے کہ جے تسیں ساڈے منڈے نال اپنی کڑی نہیں جان دینی تے فیر اسیں اپنا پتر سلمہ وی تہاڈی دھی نال نہیں جان دینا۔ ایہ آکھ کے اوہناں بدو بدی میرے پتر نوں میرے کولوں کھوہ لیا تے ایسے کھوہ موہ وچ وچارے سلمہ دا گٹ وی لہ گیا۔ ہن حال ایہ سی بنی مینوں بنی مغیرہ والے لے گئے تے بچے نوں بنی عبدالاسد والے تے ابوسلمہ وچارے تن تہا یثرب ٹر گئے۔ گھنوکھٹ اک ورھے تیکر میں ایہ کردی رہی بنی روز ابطح (جھگڑے والی تھاں) تے جاندی تے اوٹھ بے کے روندی رہندی۔ اک دن میرے پیکیاں وچوں اک اجھے بندے نے مینوں ویکھ لیا جہوں میری حالت تے ترس آ گیا۔ اوس نے بنی مغیرہ دے دو جے بندیاں نوں جا آکھیا، بنی ایس وچاری نوں تسیں کیوں اوہدے پتر تے گھر والے توں نکھیڑیا ہو یا اے۔ اوس نے زور دے کے آکھیا بنی ایس نوں جان دیو۔ اخیر اوہناں مینوں آکھیا بنی جے توں اپنے گھر والے کول جانا چاہندی اے تے ٹر جا۔ میں اپنے اوٹھ تے کلی ہی یثرب ول ٹر پئی پر جدوں تنعیم دی تھاں تے

اڑی تے بنی عبدالدار دے اک نیک بندے عثمان بن طلحہ نال ٹاکرا ہو گیا۔ اوہنے پچھیا: بنی ابوامیہ دی دھیہ کدھر جاری ایس۔ میں آکھیا بنی اپنے گھر والے کول یثرب ٹری جاندی ہاں۔ اوہنے آکھیا کہ تیرے نال تے کوئی جی نہیں۔ میں دسیا بنی ہاں! خدا، تے ایس بچے توں وکھ تے میرے نال کوئی نہیں۔ عثمان آکھیا بنی اللہ دی سونہ میں تینوں کلیاں تے نہیں جان دینا۔ فیراوہ میرے اونٹھ دی ٹکیل پھڑ کے ٹر پئے۔ واللہ! میں اوہناں توں ودھ شریف آدمی نہیں ویکھیا۔ جدوں اسیں کسے منزل تے اڑدے تے اوہ میرے اونٹھ نوں بٹھا کے پراں ٹر جاندے۔ میں سلمہ نوں لے کے جدوں اتر جاندی تے اوہ اونٹھ کسے رکھ نال۔ بھہ دیندے تے آپوں کدھرے دور کسے رکھ تھلے جالے پیندے۔ فیہر جدوں ٹرن دا ویلا آؤندا تے اوہ اونٹھ نوں آکے بٹھاندے۔ مینوں آکھدے کہ سوار ہو جاتے آپوں دُرڈے جا کے کھلو جاندے۔ فیراوہ آکے اونٹھ دی ٹکیل پھڑ لیندے تے اگلی منزل ول ٹر پیندے۔ یثرب تائیں سارا پندھ اوہناں ایوں ای غیٹریا۔ فیہر جدوں قبا وچ بنی عوف دی وتی دسی تے آکھن لگے کہ تیرا گھر والا اوس تھاں تے ای۔ اوہدے کول اڑ جا۔ اللہ تینوں برکت دیوے۔ فیراوہ جویں ٹردے آئے سن ایوں مکے پرت گئے۔“

حضرت ام سلمہ c دی ایہ داستان دسویں اے بنی دین وچ استقامت نال رب دنیا تے اپنے بندیاں دی چنگی چوکی مدد کردا اے، تے آخرت تے ہے ای ایمان والیاں دی۔ ام سلمہ c نے اپنے آپ نوں ہوادے رخ تے اڈے جان لئی نہیں چھڈ دتا سگوں ثابت قدمی وکھائی تے اپنے خاوند، پترتے سبھ توں ودھ کے رب دی رضا حاصل کرن لئی جتن کردے رہے۔ ہجرت دے اذن عام توں بعد سبھ توں پہلاں حضرت عامر b بن ربیعۃ الغزری اپنی سوانی لیلیٰ دے نال مکے توں نکلے۔ فیہر حضرت عمار b بن یاسر، جناب سیدنا بلال حبشی b تے حضرت سعد b بن ابی وقاص نے ہجرت کیتی۔ اوہناں توں بعد حضرت عثمان بن عفان اپنی اہلیہ محترمہ حضرت سیدہ رقیہ c بنت رسول اللہ دے نال یثرب ول کوچ کیتا۔ فیہر تے جتھیاں دے جتھے مکہ چھڈ کے اپنے رب ولوں دتے گئے دارالہجرت نوں نکلدے رے۔ ابن اسحاق آکھدے نیں کہ بنی فطعون، بنی البکیر تے بنی جیش بن رباب دا کوئی اک جی دی مکہ نہ رہ گیا تے اوہناں دے خالی گھراں دے بوہے ہوانال کھڑ کدے ویکھ کے ہول پینداسی۔ ابن عبدالبر لکھیا اے بنی بنی اسد بن خزیمہ وی سبھ بال بچہ لے کے مکہ چھڈ گئے سن۔

ہجرت توں بعد اک دن عتبہ بن ربیعہ، عباس بن عبدالمطلب تے ابو جہل کدھرے ٹردے پھر دے بنی جیش دے گھراں ول اڑ گئے۔ گھراں دی ویرانی ویکھ کے عتبہ ٹھنڈا ساہ لے کے بڑے دکھ نال آکھن لگا ”اج بنی جیش دے اجڑے گھر ویکھے نہیں جاندے۔“ ایہ سن کے ابو جہل نے عباس بن عبدالمطلب ول اشارہ کر کے آکھیا ”اوئے عتبہ رونا کیوں ایس۔ ایہ سارے کم ساڈے ایس بھرا دے بھتیجے دے نیں۔ اوس نے سانوں ونڈ کے رکھ دتا اے۔“ ابوسفیان نے بنی جیش دے گھراں تے قبضا کر کے گھروتیج دتے۔ بہانہ ایہ بنایا کہ اوہدی دھی فرعہ (یاں فارعہ) ابواحمد بن جیش دی بیوی سی۔ ایوں جوئی دے سارے خنوادے دی جائیداد تے جوئی دے جیوندیاں جاگدیاں ای قبضا کر لیا۔ ابوسفیان دی ایس زیادتی دی شکایت جدوں حضرت عبداللہ بن جیش نے نبی اکرمؐ اگے کیتی تے آپ نے جناب عبداللہ نوں مکے دے ایس گھر دے بدلے جنت وچ اک گھر دی بشارت دی۔ نبی رحمت a دی عظمت دی اک جھلک ویکھو بنی مکے دی فتح توں بعد دی آپ a نے

غیر قانونی قابضان توں مکان واپس نہیں منگیا۔ ایتھوں تیکر ہی حضور a نے اپنا مکان دی واپس نہیں لیا جہدے تے عقیل بن ابی طالب نے قبھا کر لیا سی۔

ہجرت دیاں اوکڑاں کوئی اک دو عاشقان نبی تیکر محدود نہیں سن سگوں چوکھے مسلماناں نے صبر، حوصلے تے ہمت نال راہ خدا وچ اپنے وطن نوں قربان کر دتا۔ ایہناں عظیم ہستیاں وچوں اک ہستی جناب صہیب رومی دی وی اے۔ آپ رومی دے لقب نال مشہور ضرور ہوئے پر اصل وچ آپ رومی نہیں سن۔ آپ دے والد سنان، کسری ولوں ابلہ دے حاکم سن تے اوہناں دا خاندان موصل وچ آباد سی۔ اک واری رومیاں نے موصل تے حملہ کیتا تے جہناں لوکاں نوں قید کر کے لے گئے اوہناں وچ صہیب وی شامل سن۔ روم وچ پلن پاروں عربی ٹھیک طرحاں نہیں سن بول سکدے۔ اک عربی آپ نوں خرید کے مکے لے آیا۔ اتھے عبداللہ بن جدعان نے اوہناں نوں خرید کے آزاد کر دتا۔

حضرت صہیب جدوں ہجرت لئی نکلے تے قریش دے لوکاں آکھیا ”اوصہیب! جدوں توں مکے آیا سیں تے چٹا بھکھا سیں۔ اتھے رہ کے توں مال کمایا۔ دولت اکٹھی کیتی تے ہن ہر شے لے کے ایتھوں نکل چلیا ایں۔ ایہ نہیوں ہونا۔“ ”اچھا جے میں اپنا مال تہا نوں دے دیواں تے فیر میرے سکھنے ہتھیں جان تے تہا نوں اعتراض تے نہیں؟“ حضرت صہیب نے پچھیا۔

”آہو، خالی ہتھیں جانا ایں تے سودا رجا۔“ قریش نے جواب دتا۔

ایوں حضرت صہیب نے ہر شے اوہناں دے حوالے کیتی تے آپوں ہتھ جھاڑ کے یثرب ول ٹر پئے۔ نبی اکرم a تائیں ایہ خبر اڑی تے فرمایا ”صہیب نے نفع کمایا، صہیب نے نفع داسودا کیتا۔“

ابن عبدالبر لکھدے نیں کہ جدوں صہیب مکے توں ٹرے تے قریش نے اوہناں دا پچھا کیتا تاں جے اوہناں نوں قتل کر کے اوہناں دا مال کھو لین۔ جناب صہیب دی نظر پی تے اوہناں آکھیا کہ ”تہا نوں پتا اے کہ میں تہاڈے ساریاں نالوں چنگا تیر انداز ہاں۔ خدا دی قسم تہاڈے وچوں کوئی میرے تیکر نہیں اپڑ سکدا۔ جدوں تیکر جس دی موت آئی اے مرنہ جاوے۔“ پچھا کرن والیاں نے آکھیا کہ اپنا مال چھڈ جاتے آپوں ٹر جا۔ حضرت صہیب نے آکھیا کہ میں تے ہر شے پہلوں ای چھڈ آیا ہاں۔ فلاں تھان تے جاؤ تے اوتھوں لے لوؤ۔ ایوں اوہ پرت گئے تے جا کے مال تے قبھا کر لیا۔

بیہتی تے طہرائی نے ایہدے نال رلداملد ایمان ای نقل کیتا اے پر اوہدے وچ ایہ وادھا کیتا اے ہی ”جدوں میں (صہیب رومی) قبا اڑیا تے حضور نے فرمایا کہ ”صہیب! ایس سودے وچ توں چوکھا نفع کھٹیا اے۔“ میں عرض کیتی ”یا رسول اللہ! ایس گل دا تے کسے نوں پتا ای نہیں سی۔ آپ a نوں جبرائیل توں سوا ایہ گل ہو رکون دس سکدا اے۔“ ایہ روایت مولانا مودودی نے ”سیرت سرور عالم“ دے باب ہجرت الی المدینہ وچ بیان کیتی اے۔

کے دا شیر عمر b بن خطاب ہجرت دی توارخ وچ ایس پاروں وکھری دکھ دیندا اے کہ اوہ کلا مرد مجاہد سی جہنے اعلان کر کے آکھیا ”مکے دے لوکو! میں یثرب جا رہیاں“ پر جناب عمر نے اپنے جتھے وچ رلن والے کجھ لوکاں نوں چوری چھپے ای نکلن دی تائید کیتی۔ آپ فرماندے نیں کہ ”میں عیاش بن ابی ربیعہ تے ہشام بن عاص نال ایہ گل متھی کہ اوہ دوویں مکے توں دس

میل دے پندھ تے تناضب دی تھاں تے ساڈے نال آرلن تے تے جہڑا متھے گئے ویلے تے نہ اپڑیا سمجھو پئی اوہ پھڑیا گیا اے تے باقی لوکی اوس نوں نہیں اڈیکن گے۔ ایوں ہشام تے مکے وچ ای دھر لے گئے پر عیاش ساڈے نال مدینے اپڑ گئے۔ پچھے پچھے ابو جہل بن ہشام تے حارث بن ہشام وی مدینے آتے تے پوری مکاری نال عیاش نوں ایہ آکھ کے رام کر لیا کہ ماں جی نے قسم کھادی اے کہ جدوں تیکر میں عیاش نوں نہ دیکھ لوں گی، نہ تے سروچ کنگھی کراں گی تے نہ ای چھاویں بہواں گی۔ میں عیاش نوں تھیرا سمجھایا کہ توں کسے چکروچ آچلیا ایں تے ایہناں دی گل تے اعتبار نہ کر۔ ماں ہوراں دے سروچ کوئی جوں پئی تے آپوں کنگھی کرن گیاں تے مکے دی ساڑ دین والی دھپ نے جدوں جتا لوہ دتا تے آپوں چھاویں جا پٹھن گیاں پر ایوں جا پدا سی کہ عیاش اُتے ماں دی محبت غالب آ گئی تے اوہ آکھن لگا کہ میں ماں دی قسم پوری کر کے پچھاں پرت آواں گا تے نالے اوٹھوں اپنا سامان وی لے آواں گا۔ میں اس نوں آکھیا کہ جے سامان دی گل اے تے میں اپنا ادھامال تینوں دین لئی تیار ہاں، پر اوہ نہ منیا۔ فیر میں بڑی بے بسی نال اوس نوں آکھیا کہ جے توں جانا ای اے تے میری اٹھ لے جا۔ ایہ چوکی چنگی اٹھ اے تے تیرے کم آوے گی۔ جے کدھرے تیرے بھراواں دی نیت وچ کوئی فتور آ گیا تے ایس اٹھ تے دوڑ جاویں۔ ایہ گل اوس نے من لئی۔ راہ وچ اک تھاں تے ابو جہل نے اوس نوں آکھیا ”بھراجی! میرا اونٹ کچھ ٹھیک نہیں جا پدا، تسیں اپنی اونٹنی تے مینوں وی نہیں بٹھالیدے؟“ فیر دوویں تھلے لے گئے تاں جے ابو جہل وی عیاش والی اُٹھ اُتے بہ سکے۔ حارث وی اپنا اونٹ بٹھا کے تھلے اتر گیا تے دوواں نے رل کے عیاش نوں نہ لیا۔“ ابن اسحاق آکھدے نیں کہ عیاش بن ابی ربیعہ دے خنوادے والیاں مینوں دسیا کہ ابو جہل تے حارث، عیاش نوں لے کے کچھ اچھے حال وچ مکے اپڑے کہ عیاش رسیاں وچ بجھے ہوئے سن تے دوویں بھرا ایہ اعلان کر دے جاندے سن کہ اے اہل مکہ! اپنے نالائق لوٹیاں نوں ایوں سدھیاں کرو جویں اسیں عیاش نوں کہتا اے۔

رسول خدا عیاش تے ہشام بن عاص لئی پریشان سن۔ آپ a نے اپنے بھناں نوں پچھیا کہ کہڑا اے جہڑا اوہناں دوواں نوں مکے وچوں کڈھ لیاوے گا۔ ایہ ذمے داری اک اچھے مرد مجاہد (ولید بن مغیرہ) نے لئی جہڑا کل تیکر اسلام داناں نشان مٹان لئی بے تاب سی تے آکھدا ہوندا سی کہ نبوت محمد a دے حصے وچ ای کیوں آئی؟ جناب ولید بن مغیرہ نے اپنی سیانف تے تدبیر نال، تے رب دے کرم نال چنگی طرحاں ایہ ذمے واری نبھائی تے دوواں دیاں بیڑیاں کٹ کے تے اپنے اونٹ تے بٹھا کے مدینے لے آئے۔

حضرت عبداللہ بن سہیل جس امتحان وچ پائے گئے اوہ وی گھٹ نہیں سی۔ اوہ حبشہ دے مسلماناں وچ شامل سن۔ مدینے ول ہجرت دی خبر سن کے مکے آ گئے پر اوٹھے اوہناں دے والد سہیل بن عمرو نے اوہناں نوں قید کر لیا۔ ظلم دی گل ایہہ ہے کہ آپ a نوں جنگ بدر وچ مسلماناں دے مقابلے تے لڑن لئی وی لے گئے۔ پر جدوں فوجاں دا ٹاکرا ہو یا تے عبداللہ مسلماناں نال رل گئے۔ فیر جدوں فتح مکہ دے موقع تے سہیل بن عمرو مسلمان ہوئے تے آکھدے ہوندے سن کہ اللہ نے میرے پتر عبداللہ دے ایمان وچ میرے لئی بڑی خیر رکھ دتی سی۔



ہجرت و فلسفہ

اللہ دے نمایاں نوں روز اڈل توں ہی ہجرت نال واسطہ پیندا رہیا اے۔ اللہ دی زمین اُتے اللہ دی خدائی، سگوں اک اللہ دی خدائی دافرا کدے وی سوکھا نہیں رہیا۔ فیرا لیس اوکھیاں دے مقابلے تے اللہ اپنے بندیاں لئی، اوہناں دی تربیت پوری کر کے، کسے اجہی تھاں دابندوست کردیندا رہیا اے جتھے اوہ کھل کے اپنی گل کردے رہے۔ بندانج دی زمین اُتے اپڑن توں لیکے اج تیکر ہجرت وچ ہی اے۔ بھاویں ایہ ہجرت تھاں دی ہووے یاں ویلے دی، ہجرت دا عمل جاری رہندا اے۔ جے کر بندانجرت کرن لئی تیار نہ ہوندا تے سوچن دی گل اے، ایہ نسل انسانی دھرتی دی نکر نکر تیکر کوں اپڑدی؟ فیر تے دنیا اُتے اج موجود نسل آدم لئی نری برا عظم ایشیا دی تھاں ای جھیری ہوندی جتھے حضرت آدم سبھ توں پہلاں تشریف لیاے۔ توحید دا درس دین والیاں پاک ہستیاں ہمیش ہجرت کردیاں رہیاں۔ جناب ابراہیم خلیل اللہ اپنے بت تراش پیونوں سمجھان، تے فیر ناکام ہون توں بعد خورے کتھے کتھے دے سفر دیاں اوکڑاں جردے رہے۔ کدے فلسطین وچ ڈیرے تے کدے اہل و عیال داصفا تے مروہ دیاں پہاڑیاں تے ٹھکانا! حضرت یوسف g دا کنعان دی جنم بھوں چھڈ کے مصر دے بازار وچ اٹی دے مل تے وکنا، حضرت موسیٰ کلیم اللہ دی مصر توں جبل طور، تے فیر جبل طور توں ارض مقدس تیکر ہجرت، حضرت لوط دا وادی سدوم وچوں ٹر جانا، حضرت یونس دی اپنے دعوت دے علاقے وچوں ہجرت، حضرت عزیر دی بابل توں فلسطین ول ہجرت، حضرت یعقوب دی فلسطین توں مصر ول ہجرت، حضرت حاجرہ دی مصر توں مکے نوں ہجرت تے اخیر تے نبی a دا اوس تھاں نوں چھڈ کے مدینے ٹر جانا جنوں چھڈن تے دل نہیں سی کردا، درس توحید دے اکوای سلسلے دیاں کڑیاں نیں۔

اصل وچ دارالہجرت وچ اپنے ورگے لوکاں دا کٹھ ہو جاندا اے تے توحید پرست تسبیح دے داناں وانگ اک لڑی وچ پرو دتے جاندے نیں تے مخالفان دے سامنے اک نویں طاقت دا منڈھ بچھ جاندا اے جنہوں اگے ودھن دا سامان اپنے ای ویریاں کولوں اذیتاں تے اوکڑاں دی شکل وچ ملدا اے۔ روٹی ٹکر دے وسیلیاں اُتے لوکاں دے قبضے تے صبر تے تحمل، تنی ریت تے لٹا کے سینے اُتے پتھر رکھن دے ظلم نال برداشت تے بردباری، تے گالھ مندے دی زیادتی برداشت کرن نال حوصلہ ملدا اے۔ ایہ سبھ کچھ برداشت کرن نال کسے تحریک دے اندر جھیر دی مثبت طاقت پیدا ہوندی اے اوہی حق دا اصلی تے پکا پیڈھا ہتھیار ہوندی اے۔ ایہ ہتھیار باطل طاقتاں کول تے ہوا ی نہیں سکدا پر ایہی ہتھیار حق نوں، ویکھن وچ کمزور تے تھوڑا ہون دے باوجود، میداناں دی فتح لئی خالق کائنات دی غیبی امداد دا وسیلا بنا دیندا اے۔

بے وطنی تے بے سروسامانی اللہ دی امداد لئی ہمیش ای چوکی کارگر ثابت ہوئی اے۔ جدوں اللہ دا کوئی بند اپنے ہتھیں

بنائے اپنے سوہنے گھر، اپنی وتی تے اپنے دیس نوں نری اللہ دی رضا لئی چھڈ کے مہاجر تے پردیسی بن جاندا اے تے خالص مالک دا ہی پروہنا بن جاندا اے، تے اوسے تے ہی ڈوری سٹ دیندا اے، اوہدے ای دردا درویش تے اوہدے ای رستے دا قلندر ہو جاندا اے، جدوں اوہ سارے وسیلیاں تے سارے وارثاں نوں چھڈ کے اوس تے تکیہ کر لیندا اے جھڑا وسیلیاں دا محتاج نہیں فیر اوس ولوں ایوں امداد آؤندی اے کہ بندا آپوں سوچدا رہ جاندا اے نئی ایوں وی ہو سکدا اسی۔ فیر ۳۱۳، اک ہزار اُتے بھارے ہو جاندا اے تے اپنے شملیاں والے متکبر سردار نیا نیاں دے ہتھوں ایوں کپے جاندا اے تے جویں اوہ قلمباں کپدے نیں۔

ابلیس دی پارلیمنٹ:

ابن اسحاق دی روایت موجب حبشہ توں جہڑے مہاجر ایس ارادے نال کے پرت آئے سن کہ یثرب ول ہجرت کراں گے، اوہناں وچوں ست بندیاں نوں قریش نے قید کر لیا تے اوہ ہجرت نہ کر سکے۔ اوہناں توں دکھ دی کھ وچ کچھ مسلمان موجود سن پر اوہ اچھے لوکی سن جہڑے یاں تے ہجرت کر دیاں ڈک لے گئے یاں ایہ اوہ وچارے سن جہڑے دل وچ ایمان تے رکھدے سن پر لٹے ماڑے ہون پاروں یثرب ول نہیں جاسکدے سن۔ ایس توں سواہن صرف جناب محمد a حضرت ابو بکر b تے حضرت علی کرم اللہ وجہہ باقی رہ گئے۔ ایس صورت حال نال قریش مکہ داسٹر سٹر کے اوہ حال ہو گیا سی کہ اوہ شیدائیاں وانگ اپنے جسے نوں ای چک وڈھی آؤندے سن تے اوہناں نوں سمجھ نہیں سی آرہی کہ اوہ کیہ کرن؟ قریش نوں ایہ گل وی نہیں بھل رہی سی کہ یثرب دے دو ٹکڑے قبیلے اوس تے خزر جہڑے کل تیکر خانا جنگی نال اپنی طاقت تے ہمت داسٹیا ناس کردے رہے تے جہناں جنگ بعاث وچ دوواں پاسیاں دے کئی ٹکڑے سردار ماردتے یاں مروالے، اج اوہ اک پلیٹ فارم تے ایوں اک مٹھ ہوئے دس دے سن جویں اکو ماں دے جے ہون۔ اوہ ایہ گل چنگی طرحاں جاندا اے کہ جس ہستی دے آکھن تے اوس تے خزر آپس دے ویر بھل گئے نیں، اوسے ہستی دے آکھن تے اوہناں ساڈے نال ٹکر لین توں وی باز نہیں آؤنا۔ قریش نوں ایس گل داوی احساس سی کہ یمن توں شام تیکر بحر احمر دے ساحل تے اوہناں دی جہڑی تجارتی گزرگاہ اے، مسلماناں دے مدینے ٹر جان نال اوہ غیر محفوظ ہو جانی اے جد کہ ککے تے طائف دے لوکی لکھاں دینار دی تجارت اوسے رستے توں کردے سن۔

اپنے وڈکیاں دے دین نوں توحید دیاں سٹاں توں بچان لئی، اپنے تجارتی رستے نوں پر امن رکھن لئی تے مدینے وچ طاقت پھڑ دی اک نویں ولایت دی طاقت نوں توڑن لئی ککے دے مشرکاں نے آپس وچ صلاح مشورے شروع کیے ہوئے سن پر اوہ کسے نتیجے تے نہیں اپڑ رہے۔ دو بے پاسے ہر چڑھدے سورج نال رسول خدا a دا وجود اوہناں لئی نویں توں نواں چیلنج لے کے آ رہیا سی۔ ایس لئی اوہناں فیصلا کیتا کہ کسے دن سرجوڑ کے بیٹھا جاوے تاں بے مسئلے داکوئی حل لہج سکے۔ ایوں ۲۶ صفر ۱۴ نبوت، عیسوی حساب موجب ۱۲ ستمبر ۶۲۲ء بروز جمعرات توارنخ دا سبھ توں خوفناک اکٹھ ہويا۔ ککے دی پارلیمنٹ دارالندوہ وچ قریش دے سارے قبیلیاں دے نمائندا سردار اکٹھے ہو گئے۔ دارالندوہ دے بوہے اگے ابلیس وی اپڑ گیا۔ اوس نے اک نجدی شیخ داروہ بنایا ہو یا سی۔ آکھن لگا، نجد توں حاضر ہو یاں۔ تہاڈے اج دے اجلاس دا

پتا لگاسی۔ سوچیا کہ تہانوں کوئی چنگا مشورای دے آواں۔ لوکاں آکھیا کہ ”ایہ تے واہوا چنگی گل اے، اندر تشریف لے آؤ۔“ ایوں ابلیس دی پارلیمنٹ وچ صلاح مشورے شروع ہو گئے۔ ابلیس دے نال جہڑے ہور لوکی دارالندوہ وچ موجود سن، اوہناں وچ مشہور سردار ایہ سن:

- ۱۔ قبیلہ بنو مخزوم وچوں ابو جہل۔
- ۲۔ قبیلہ بنو نوفل وچوں جبیر بن مطعم، حارث بن عامر تے طیعہ بن عدی۔
- ۳۔ قبیلہ بنو عبدالمطلب وچوں شیبہ، عتبہ تے ابوسفیان۔
- ۴۔ قبیلہ بنو عبدالدراہ وچوں نصر بن حارث۔
- ۵۔ قبیلہ بنو اسد وچوں حکیم بن حزام، زمعہ بن اسود تے ابوالہبتیری۔
- ۶۔ قبیلہ بنو سہم وچوں نبیہ بن حجاج تے منبہ بن حجاج۔
- ۷۔ قبیلہ بن جمع وچوں اُمیہ بن خلف۔

اجلاس دی کاروائی شروع ہوئی تے سبھ توں پہلاں زمعہ بن اسود نے صلاح دتی کہ اسیں محمد a نوں کسے وگڑے ہوئے اٹھ تے بٹھا کے مکے توں کڈھ دینے ہاں فیر سانوں کیہ کہ اوہ کتھے جاندا اے تے کتھے رہندا اے، بس ساڈا کم سدھا ہو جاوے گا تے اسیں پہلے وانگ حیاتی دے دن کٹن لگ پواں گے۔ شیخ نجدی (ابلیس) آکھیا کہ خدا دی قسم ایہ صلاح کوئی ایڑی چنگی نہیں۔ ویکھدے نہیں کہ اوس (محمد a) دی گل کڈی سوتی تے بول کڈے بیٹھے ہوندے نیں تے اوہ کویں لوکاں دے دل موہ لیندا اے۔ ایوں مکے وچوں کڈھن نال اوہ کسے اجے قبیلے نال جار لے گا جہڑا اوس نوں اپنا پیشوا بنا لوے گا تے فیر اوہ مگڑے ہو کے کسے دن تہاڑے اُتے آچڑھن گے۔ ایس لئی کوئی ہور گل سوچو۔

ابوالہبتیری نے مشورہ دتا کہ محمد نوں لوہے دیاں بیڑیاں پوا کے قید کر دیو تے باہروں بوہا پکا پکا بند کر دیو تے فیر اوس دی اخیر نوں اڈیکو۔ (نعوذ باللہ) ایہ وی ہن توں اگدیں جمن والے اپنے ورگے شاعراں زہیر تے نابغہ وانگ بنے لگ جاوے گا۔ ”ایہ رائے وی مینوں چنگی نہیں لگی“ ابلیس نے آکھیا۔

”جناب شیخ صاحب! کیوں؟ ایہدے وچ کیہ ہرج اے؟“ سرداراں نے پچھیا۔

”واللہ! جے تسیں اوس نوں قید کردتا تے ایہ خبر اوہدے سبناں تیکر اپڑے ای اپڑے۔ فیر کوئی وڈی گل نہیں کہ اوہ تہاڑے تے چڑھائی کر دین تے محمد a نوں تہاڑے قبضے وچوں کڈھ کے لے جان۔ ایس لئی کجھ ہور سوچو۔“ ابلیس نے آکھیا۔

ابلیس دی صدارت تے سیانف وچ ہون والے اجلاس نے ایہہ دوویں صلاحواں رد کر دتیاں تے فیر جہالت دے چیف ابو جہل دی واری آئی۔ اکھے:

”اک صلاح میری وی اے جتھے تیکر تسیں اے جے نہیں پچے۔“

”تے فرماؤ نا ابو الحکم! سیانے بندے او، دسو کجھ“ لوکاں آکھیا۔

اکھے:

”ہر ہر قبیلے وچوں اک اک ٹکڑے تے بانٹے نو جوان دا انتخاب کیتا جاوے۔ فیر اوہناں سبھناں نوں اک اک تیز تلوار دتی جاوے۔ ایہ جوان محمد a دے گھرنوں گھیر لیں۔ جدوں اوہ فجر دی نماز لئی فجرے باہر نکلے تے سارے سورے اپنی اپنی تلوار نال اکو ویلے وار کرن۔ ایس طرحاں دے قتل دا فائدہ ایہ ہووے گا کہ محمد a دا قتل سارے قبیلیاں وچ وٹنڈیا جاوے گا تے فیر بنو عبد المناف کھدے کھدے کولوں بدلہ لین گے۔ آپوں ماری دے دیت (خون بہا) تے راضی ہو جان گے تے اوہ اسیں رل کے دے دیواں گے۔“

”ہش، شواش، واہ بھی سردار واہ، گل کیتی جے نا!“ بڈھا نجدی (ابلیس) بولیا۔

ایوں ابلیس دی پارلمینٹ نے ایہ قرار دا منظور کر لئی تے ایس تے عمل کرن لئی یاراں (۱۱) کڑیل جواناں دا اک جتھا تیار کیتا گیا۔ جہڑے ایہ سن:

ابوجہل، حکم بن عاص، عقبہ بن ابی معیط، نضر بن حارث، امیہ بن خلف، زمعہ بن الاسود، طیمہ بن عدی، ابولہب، اُبی بن خلف، نبیہ بن الحجاج تے اوس دا بھرامنبہ بن الحجاج۔

واللہ خیر المکرین:

اک پاسے شیع رسالت نوں ہمیش لئی گل کرن دیاں سازشاں ہو رہیاں سن تے دوجے پاسے رب تعالیٰ ایسے شیع نال لبیدھے چڑھدے نوں روشن کرن دیاں تدبیراں فرما رہے سن۔

﴿وَإِذْ يَمْكُرُ بِكَ الَّذِينَ كَفَرُوا لِيُثْبِتُوكَ أَوْ يَقْتُلُوكَ أَوْ يُخْرِجُوكَ وَيَمْكُرُونَ وَيَمْكُرُ اللَّهُ ط وَاللَّهُ خَيْرُ الْمَكِرِينَ﴾ (الانفال: ۳۰)

”اے محبوب اوہ ویلا وی یاد کرو (جدوں کافر تہاڑے خلاف سازشاں کر رہے سن کہ تہانوں قید کر لیں یاں قتل کر دیں یاں دیس نکالا دے دیں، اوہ اپنیاں چالاں چل رہے سن تے اللہ اپنی چال چل رہی سی۔ تے اللہ (ہی) سبھتوں ودھیا تدبیراں کرن والا اے۔“

تے فیر خیر الماکرین دی چال ہی کامیاب ہوئی تے سکے دے چال باز اں نال جہڑی ہوئی اوہ کجھ چر بچھوں میدان بدر نے وی دیکھی، آسماناں نے وی دیکھی تے تواریخ نے وی۔ ہو یا ایہ کہ پیغمبر اسلام نوں دارالندوہ دے اجلاس دی کاروائی دا پتا لگ گیا۔ آپ a نوں رب تعالیٰ ولوں مکہ چھڈ دین دی اجازت وی مل چکی سی۔ ایس لئی آپ a نے جناب علی المرتضیٰ نوں ہدایت کیتی کہ اوہ رات نوں آپ a دی ہری حضرموتی چادر لے کے آپ a دے بستر تے لیٹ جان تے حالات موافق ہو جان تے لوکاں دیاں امانتاں اوہناں دے حوالے کر کے مدینے ٹر آں۔ ایہ ہدایت کر کے رسول خداؐ آپوں حضرت ابوبکر b دے گھر وں ٹر پئے۔ حضرت عائشہ دا بیان اے کہ ”دپہر ویلے اسیں اپنے گھر بیٹھے ساں تے کسے نے ابا جی نوں دسیا کہ باہر رسول اللہ تشریف لیا رہے نیں۔ ایس ویلے جناب رسول اللہ نہیں آیا کردے سن، ابا جی باہر گئے تے عرض کیتی، یا رسول اللہ! میرے ماں باپ تہاڑے تے قربان ہو جان، ایس دوپہر ویلے تے جناب کدے تشریف نہیں سی لیاندے، خیر تے ہے؟ فیر ابا جی (حضرت ابوبکر) آپ نوں اندر لے آئے تے حضور نے فرمایا کہ ابوبکر! میں کلّیاں گل کرنی

اے۔ حضرت ابوبکر b نے آکھیا کہ اے اللہ دے رسول! تجھے تہاڈی اہل خانہ تے میری دھی اے، ہورتے کوئی نہیں۔“

”اچھاتے فیرمینوں مدینے جان دی اجازت مل گئی اے“ آپ a نے فرمایا۔

”میں قربان ہو جاواں، کیہ میں وی تہاڈے نال ہوواں گا؟“ جناب ابوبکر b نے پچھیا۔

”ہاں“ آپ a نے فرمایا۔

ایس توں بعد حضرت اسماء تے جناب عائشہ صدیقہ دوواں بھیناں نے والد دے سفر دیاں تیاریاں چھوہ دیتیاں تے جناب رسول خدات دی اڈیک وچ گھروں لڑ پئے۔

ابن اسحاق دا بیان اے کہ جدوں رات ذرا انھیری ہو گئی تے ڈیوٹی والے یاراں (۱۱) بندے تھرا مل کے بیٹھ گئے۔ اوہناں نوں پورا یقین سی کہ اج اوہ اپنے مقصد وچ کامیاب ہو کے رہن گے۔ ابو جہل تے اوس دن چوکھای مغرور یا ہو یا سی۔ بڑے تکبر نال اپنے نال دیاں نوں آکھن لگا کہ لے بھئی ایہ اوہ محمد (a) جے جہڑا آکھدا سی کہ جے تسیں اوس دے نوں دین وچ داخل ہو کے اوس دی پیروی کرو گے تے عرب تے عجم دے بادشاہ بن جاؤ گے۔ فیر مرن توں بعد اٹھو گے تے تہاڈے لئی اردن دے باغاں ور گیاں، سگوں اوس توں وی ودھ جتناں ہون گیاں۔ تے جے تسیں ایوں نہ کیتا تے فیر گھانا ای گھانا جے۔ فیر جدوں مرن توں بعد دوہری واری زندا ہوو گے تے تہاڈے لئی اک ای اک ہووے گی جس وچ سڑ دے رہو گے۔ لوو کیکھو اج ایہدے آپ نال کیہ ہوندى اے۔

ایس پلٹ سازش نوں توڑھ چاڑھن لئی ادھی رات توں بعد داویلا مٹھیا گیا سی۔ ایس لئی قاتلاں دا جتھا جاگ کے رات گزار رہیا سی۔ اوہ سپاں وانگ اکھ چمکن توں بغیر تنکیاں تلواراں ہتھیاں وچ پھڑکے آشیانہ نبوت دے باہریوں ہشیار کھلو تے سن جو یں ہنے ای کوئی خونخوار درندے اوہناں تے حملا کرن والے ہون۔ ایوں جے ویلے وچ اللہ اپنے محمد a نوں ایوں کڈھ لے گیا کہ محمد a نوں تتی ہواوی نہ لگی۔

ہن اندر بستر تے بے رحم درندیاں نوں چکر دین لئی اک اچھیا بندہ موجود سی جہڑا بھراوی سی، پیروی سی، جوانی وی سی تے یاروی سی۔ سبحان اللہ! اوہ ذات باری اپنے محبوب بندے نوں کوں دے امتحان وچ پاندی رہی۔ جناب علی نال محبت دی انتہا تے اج اوہو علی یاراں (۱۱) تنکیاں تلواراں دے خطرے وچ! تے قربان جانیے اوس علی دے چہنے اُف نہیں کیتی۔ سگوں یار اُتے تے یار دے یار نے اُتے اچھیا بھروسہ کہ جناب علی آپوں آکھدے نیں کہ جتی مٹھی نیندر مینوں اوس راتیں آئی اوڈی مٹھی نیندر مینوں ساری حیاتی وچ فیر کدے نہیں آئی ﷺ ایہ اپنے آقا، اپنے نبی a تے اپنے رہبر اُتے اعتماد تے ایمان دی اچھی معراج سی جہدی مثال لھنی اوکھی جا پدی اے۔ اوہ بستر جہدے اُتے سارے قریش دے منتخب جواناں دیاں تنکیاں تلواراں نے وسنا سی، جہدے اُتے موت دا سایا منڈلا رہیا سی، جہدے اُتے قتل ہونا سی تے جہدے اُتے خونخوار سرداراں دیاں نظراں لگیاں سن، اوس تے مٹھی نیندر سوں جانا جناب علی دا ای کم سی۔ ایہ دل گردا کسے ہو وچ کتھے لہجدا اے۔

بہر حال رسول خدا a قرآن دی تلاوت کر دے باہر تشریف لیائے ﷺ اک مٹھ مٹی دی بھر کے مشرکاں ول وگائی۔ اللہ نے اوہناں توں دیکھن دی طاقت کھوہ لئی تے آپ امن و امان نال حضرت ابوبکر b دے گھر تشریف لے گئے۔ فیر دوویں دوست چپ چپتے یمن والے رستے تے پے گئے تے کجھ پندھ تے کوہ ثوردی اک غار وچ پناہ لئی جیہڑی تواریخ وچ غار ثوردے نال یاد دیتی جاندی اے۔
غار ثور:

کے توں چار کلومیٹر دے پندھ تے جنوب ول جبل ثور علاقے دامشہور پہاڑ اے۔ ایسے پہاڑ دے اتے اوہ غار اے جس نوں رب دے محبوب دی میزبانی دا شرف حاصل ہوئی تے ہجرت مدینہ دے ویلے آپ a نے جناب صدیق اکبر دے نال اوہ تھن راتاں گزاریاں۔ غار داوڈا دھانہ تقریباً اک میٹر چوڑا اے تے چھوٹا دھانہ ادھا میٹر کھلا اے۔ ایس دی لمبائی ۱۸ ہتھ تے چوڑائی ۱۱ ہتھ دسی گئی اے۔

جبل ثوردی اچائی ۵۹ میٹر اے ۱۰ ایس دی چوٹی دارقہ تقریباً ۳۰ مرلح میٹر اے۔ جے غار وچ سدھے کھلوتا جاوے تے سرچھت دے نال لگ جاند اے۔
سازش ناکام ہو گئی:

کے وچ قریشی سردار جناب رسول خدا a دی اڈیک وچ گھر دے باہر تاڑ لائی کھلوتے سن۔ امام سہیلی نے بعض علمائے سیر دے حوالے نال لکھیا اے کہ اوہناں لوکاں کندھ ٹپ کے اندر جان دی کوشش وی کیتی پر اندروں کسے عورت دے چیکن دی آواز آئی جنوں سن کے اوہ کچھ ہٹ گئے تے آپس وچ آکھن لگ پئے کہ واللہ، ایہ تے سارے عرب وچ ساڈے لئی چوکی بدنامی دی گل ہووے گی کہ اسیں اپنے ای اک رشتہ دار دے گھر دیاں کندھاں ٹپ کے اندر جاوڑے تے اپنے قبیلے دیاں دھیاں دی عزت آبرو داوی لحاظ نہ کیتا۔ ایہی گل سی جہدی وجہ توں ایہ لوکی ساری رات باہر بیٹھے رہے۔
سویر ہوئی تے خونخوار قریش نے حضرت علی نوں دیکھیا تے نال ای سڑج گئے۔ بڑے تکبر تے غرور نال پچھیا۔ ”دس محمد (a) کتھے اے؟“

”مینوں کیہ پتا۔ کیہ میرا پہر اسی اوہناں تے؟ تسیں اوہناں نوں نکل جان دتا تے اوہ نکل گئے۔“ جناب علی نے جواب دتا۔

”قریش غصے تے ملامت نال جناب علی نوں ٹپ پئے۔ آپ نوں زد و کوب کیتا تے پھڑکے خانہ کعبہ لے آئے۔ جدوں کوئی وس نہ چلیا تے آپ نوں چھڈ دتا۔ فیر اوہ جناب ابوبکر b دے گھر آئے۔ دروازہ کھڑکایا تے اسماء باہر نکلی۔ ابو جہل نے پچھیا ”کڑیئے! تیرا باپ کتھے ہے؟“
”مینوں کیہ پتا۔“ اسماء نے جواب دتا۔

عہ اس ویلے آپ سورہ یسین دی آیت نمبر ۹ دی تلاوت فرما رہے سن۔ (بحوالہ الریح المختوم صفحہ ۲۲۸)
سیرت سرور عالم، جلد دوم، صفحہ ۲۳۔ رحمت اللعالمین، جلد اول، صفحہ ۸۵۔

بدتمیز فرعون صفت ابو جہل نے اسماء دے معصوم چہرے تے اہیا طمانچا ماریا کہ اسماء دی کن دی والی دور جاؤ گی۔
 فیر قریش نے رسول رحمت a دی تلاش شروع کر دتی۔ مکے وچ اعلان کردتا گیا کہ محمد a نوں پھڑ لیاؤن
 والے نوں سوسرخ اونٹھاں دا انعام دتا جاوے گا۔ ایوں کئی بندے انعام دے لالچ وچ کھوج کڈھن ٹر پئے۔

غار ثور وچ آپ تن دن رہے۔ حضرت ابو بکر b دا آزاد کیتا ہو یا غلام عامر بن فہیرہ بکریاں چراند اچراند غار دے
 نیڑے لے جاندا تے غار دے دوویں یار بکریاں داددھ پی لیندے۔ حضرت اسماء سحری روٹی لے جانداں تے صدیق اکبر
 دے صاحبزادے عبداللہ جہڑے مکے دے سیاسی حال حالات دی کیڑ رکھدے سن، رات نوں آکے ساری گل بات سنا
 جاندے۔ حضرت ابو بکر b نے حالات نوں تاڑ دیاں ہو یاں پہلے توں ہی عبداللہ بن اریقظؓ نوں ملازم رکھ لیا ہو یا سی۔
 عبداللہ مسلمان تے نہیں سی پراوہ بھروسے دا بند اسی تے نالے مدینے ول جان والے رستیاں داوی جانوسی۔ آپ نے سفر لئی
 اونٹھنیاں پہلوں ای اوہدے حوالے کردتیاں ہوئیاں سن۔ اوس نے وی آپ نال رابطہ رکھیا۔

قریش رسول اللہ a دی تلاش وچ مکے دی نکر نکر چھانی آؤندے سن۔ بلا ذری نے لکھیا اے کہ فیر اوہ دو سیانے
 کھوجیاں نوں لیائے تاں جے پیراں دے نشاناں توں کھوج کڈھن۔ اوہ کھوجی سراغ لاندے لاندے غار ثور تیکر اپڑ گئے پر
 اوہ تھے اوہناں ویکھیا کہ غار دے مونہ اگے مکڑی دا جالا لگا ہو یا اے۔ اک کھوجی کرز بن علقمہ خزاعی نے آکھیا کہ ایس توں
 اگے کوئی شے نہیں لھدی۔ قریش دے جہڑے بندے کھوجی دے نال آئے سن، اوہناں وچوں اک بندے نے آکھیا کہ چلو
 فیروی غار دے اندر جھاتی مار لو پیرامیہ بن خلف نے آکھیا ”ایتھوں کیہ لھنا جے؟ ایہ مکڑی دا جالا تے محمد (a) دی
 پیدائش توں وی اگدیں دا جیدا اے۔“ ایس توں بعد سبھ بچچانہ پرت گئے۔ ایہ غار ثور وچ قیام داسبھ توں نازک لمحہ
 جدوں دشمنان نوں غار دے مونہ اگے کھلو تیاں ویکھ کے حضرت ابو بکر b آکھیا ”یا رسول اللہ جے ایہناں وچوں کوئی وی
 ذرا اڑ کے ویکھے تے اوہ سانوں ضرور ویکھ لوے گا“ حضور نے جناب ابو بکر b دی پریشانی ویکھی تے فرمایا: لا تحزن ان
 اللہ معنا۔ (غم نہ کرو اللہ ساڈے نال اے)

ایس گل دا ذکر اللہ تعالیٰ نے قرآن وچ ایوں کیتا اے:

﴿إِلَّا تَنْصُرُوهُ فَقَدْ نَصَرَهُ اللَّهُ إِذْ أَخْرَجَهُ الَّذِينَ كَفَرُوا ثَانِيَ اثْنَيْنِ إِذْ هُمَا فِي الْغَارِ إِذْ يَقُولُ
 لِصَاحِبِهِ لَا تَحْزَنْ إِنَّ اللَّهَ مَعَنَا﴾ (التوبة: ۴۰)

”جے تسیں (مسلمان) آپ (جناب رسول اللہ a) دی مدد نہ وی کرو گے تے تہانوں پتا ہونا چاہیدا
 اے کہ اللہ آپ a دی مدد اس ویلے کر چکیا اے جدوں کافراں نے اوہناں نوں کڈھ دتا سی۔ جدوں اوہ
 دوواں وچوں اک سن، جدوں اوہ دوویں غار وچ سن، جدوں آپ اپنے نال دے نوں فرما رہے سن غم نہ کر،
 اللہ ساڈے نال اے۔“

مشہور مستشرق ڈی۔ ایس۔ مارگولیتھ اپنی کتاب ’محمد اینڈ دی رازز آف اسلام‘ دے صفحہ ۲۰۹ اُتے عبداللہ دے والد داناں ارکات
 (Arkat) لکھیا اے، جیہڑا اوہی کم علمی دی دلیل اے۔

غار ثور وچ تن دن ہو گئے سن تے عبداللہ بن اریقظ متھے گئے ویلے موجب رات نوں اوٹھنیاں لے کے اپڑ گیا۔ عامر پہلاں امی او تھے موجود سی۔ اک اٹھ تے نبی اکرم a تے جناب ابوبکر، تے دوجی تے عامر بن فہیرہ تے عبداللہ بن اریقظ سوار ہوئے تے دوشنبہ دے روز ربیع الاول دی پہلی تاریخ نوں، سٹشی حساب موجب ۱۶ ستمبر ۶۲۲ء نوں اوہ قافلا اپنی منزل ول ٹریا ﷺ عبداللہ نے عامر رستے توں ہٹ کے اک دوجارستا اختیار کیتا تاں جے دشمنان توں بچ کے نکلیا جاسکے پرقریش دے لالچی تے ہشیار لوکی وی گھٹ نہیں سن۔ اوہناں کے توں باہروی انعام دالالچ دتا ہو یا سی تاں جے راہواں وچ وسوں کیتی بیٹھے قبیلے یاں لوکی وی ایس پلٹ مہم وچ شامل ہو سکن۔ سراقہ وی اوہناں وچوں اک بنداسی۔

سراقہ بن مالک بنی مدلج دارنکس سی تے اوہناں دا علاقہ قدید دے نیڑے سی۔ اوس دا بیان اے کہ ”ساڈے کول قریش دے لوکی ایہ سنہیا لے کے آئے کہ جہز ابنا محمد a تے ابوبکر b نوں قتل کر دیوے گایاں گرفتار کر لیاوے گا اوس نوں دوواں دی پوری پوری دیت (یعنی سو سوانٹھ) دتی جاوے گی۔ فیراک دن مینوں اک بندے نے دسیا کہ اوس نے سمندر دے کنڈھے کنڈھے کچھ بندے جانڈے ویکھے نیں۔ اوس دا خیال سی کہ اوہی محمد a تے اوس دے ساتھی نیں۔ میں (سراقہ) سمجھ گیا کہ گل ٹھیک اے تے اپنے گھوڑے تے سوار ہو کے ہتھیار بندھ کے چپ چپے مگر لگ گیا۔“

سراقہ اپنی گھوڑی اُتے بیٹھا، ہوانال گلاں کر دا جا رہیا سی تے اوہدی نظر حضور a تے پے گئی۔ اوس نے سمجھیا کہ گل بن گئی اے۔ اچن چیت گھوڑی گوڈیاں بھاڑگ پئی۔ سراقہ نے اپنے آپ نوں سنبھالیا۔ فیر گھوڑی نوں کھلا ریا پر اوس ویلے ایڈے زور دی انھیری وگی ہر پاسے انھیرا جہیا ہو گیا۔ سراقہ آکھدے نیں کہ مینوں کچھ ایوں سمجھ لگی بی میں جہڑے کم نوں نکلیا ہاں اوہ توڑ نہیں چڑھنا۔

رسول اکرم a مالک تے ڈوری سڈیاں تے قرآن دی تلاوت کر دیاں اگے ودھے جا رہے سن تے آپ a نوں دسیا گیا کہ دشمن سر تے آچڑھیا اے۔ آپ a دی زبان مبارک توں نکلیا ”ربا! ایہدے شرتوں بچائیں۔“ اودھر زبان مبارک توں ایہ لفظ نکلے تے اودھر گھوڑی دے پیر زمین وچ پھس گئے۔ سراقہ گھوڑی توں تھلے جا ڈگیا تے اوسے ویلے اوس نوں ایہ پک ہو گیا بی رب جہدی حفاظت پیا کر دا اے اوہنے کدے وی میری پکڑ وچ نہیں آؤنا۔ ایس یقین توں بعد اوس نے گھوڑی دے پیر بھونیں وچوں کڈھے تے اواز دتی:

”اے محمد! میں اک گل کرنی اے۔“

حضور نے جناب ابوبکر b نوں آکھیا کہ ایس نوں پچھو کیہ چاہندا اے۔ سراقہ نے جان دی امان منگی تے آکھیا کہ ہن جہڑا کوئی حملا آور کے ولوں ودھے گا، میں اوس نوں راہ وچ ای ڈکالا دیاں گا۔ پراج دے ایس ٹاکرے دی کوئی نشانی دیندے جاؤ۔ آنحضرت نے حضرت ابوبکر b نوں فرمایا کہ ”ابوبکر تسلیں لکھ دیو۔“ ابوبکر b نے کسے ہڈیاں ٹھیکری یاں کسے پرچے تے کوئی لکھت دے دتی۔ ﷺ الاستیعاب وچ اے کہ جدوں سراقہ پچھانہ مڑن لگاتے نبی رحمت a نے

رحمت للعالمین، جلد اول، صفحہ ۸۲

سیرت ابن ہشام، جلد اول، صفحہ ۳۲۸۔ قاضی سلمان منصور پوری لکھدے نیں کہ عامر بن فہیرہ نے سراقہ نوں امان داخلہ لکھ کے دتا سی۔

فرمایا کہ ”سراقہ! کیہ شان ہووے گی تیری اوس ویلے جدوں تیرے ہتھوں وچ کسریٰ دے شاہی نگن پوائے جان گے؟“ سراقہ نوں گل دی کوئی سمجھ نہ لگی تے پچھانہ پرت گیا۔ اصل وچ ایہ گل چوکی نوئیکلی جہی، سگوں مذاقیا جہی لگدی اے کہ اک بنداجہڑ اپنی جان بچاؤندا ہویا اپنا گھر بار چھڈ کے پردیسی تے مسافر بنیا ہووے اوہ قیصر و کسریٰ زیر کرن دیاں گلاں کرے۔ حضرت سلطان باہو دے آکھن موجب مسافرتوں تے لکھ وی بھارے ہوندے نیں۔ پر ہویا ایہ کہ جنگ احد توں کجھ چر پچھوں سراقہ مسلمان ہو گیا۔ ویلے دی چرنی چلدی گئی۔ نبی آخر a دنیا توں تشریف لے گئے۔ خلافت ابو بکری مک گئی تے حضرت عمر دا دور آ گیا۔ فیر جدوں مدائن فتح ہو یا تے کسریٰ دا تاج تے دوجے زیور جناب عمر فاروق دے سامنے پیش کیتے گئے۔ امیر المومنین عمر فاروق نے ایہ ٹومباں ویکھ کے حکم دتا کہ سراقہ نوں بلاؤ۔ سراقہ آیا تے اوس نوں اوہ گل یاد کرائی گئی تے فیر آپ نے کسریٰ دے نگن سراقہ دے ہتھ وچ پاد تے تے فرمایا ”اللہ اکبر! چوکی شان والا اے اوہ رب چھنے اک اعرابی دے ہتھ وچ اک شہنشاہ دے نگن پواد تے نیں۔“ سبحان اللہ! کیہ نظارا ہووے گا اوس ویلے جدوں زبان نبوت توں ورھیاں پہلوں نکلے اکھر، مالک نے سچ کر دکھائے، تے کیہ حالت ہووے گی اوہدوں اوہناں عاشقاں صادقوں دی جہناں نوں اوس گھڑی رسول خدا اک وار فیر اپنے درمیان نظر آئے ہون گے۔

ذات النطاقین اسماء بنت ابوبکر صدیق:

حضرت اسماء رسول خدا a دے یار غار حضرت ابوبکر صدیق دی صاحبزادی نیں۔ اوہناں دی والدہ داناں قنیلہ بنت عبد العزیٰ سی۔ عبد اللہ بن ابوبکر آپ a دے سکے بھراسن تے سیدہ عائشہ ماؤں متری بھین سن۔ اسماء ہجرت توں کوئی ۲۷ ورھے پہلوں کے وچ پیدا ہوئیاں۔ رسول اللہ دی پھوپھی دے پتر جناب زبیر بن عوام دے نال سیدہ اسماء دا نکاح ہوئیا۔ آپ دے لطن وچوں شیخ صاحبزادے تے تن صاحبزادیاں پیدا ہوئیاں۔ صاحبزادیاں وچوں جناب عبد اللہ بن زبیر تے عروہ بن زبیر نے چوکی شہرت پائی۔

جدوں سیدہ اسماء دے عظیم والد تے محبوب خدا ہجرت دے ویلے غار ثور وچ لکے ہوئے سن اوہدوں اسماء اوہناں نوں کھان پین دا سامان اپڑاندیاں رہیاں۔ جدوں غار ثور توں رسول اللہ مدینے ول روانہ ہون لگے تے روٹی پانی تے مشک دا منہ بن لئی کوئی رسی یا لیر نہ لہھی۔ سیدہ اسماء اوسے ویلے اپنی قمیض توں نطق کھولیا۔ اوہدے دو ٹکڑے کیتے تے اک نال کھان دا سامان تے دجے نال مشک دا منہ بند کردتا۔ آپ دی سیانف تے حاضر دماغی تے رسول رحمت نے محبت نال آپ نوں دور و مالاں والی ذات النطاقین آکھنا شروع کردتا۔ ایہ لقب پوری حیاتی سیدہ اسماء دے نال رہیا تے اوس توں بعد تواتر بخ نے وی ایس نوں ہمیش چیتے رکھیا اے۔

اُمّ معبد واقصا:

قدید دے علاقے وچوں لنگھدیاں محبوب خدا دا ایہ قافلا جدوں بنو خزاعہ دی اوس مشہور سوانی دے ڈیرے تے پجیا جہڑی ام معبد دی کنیت نال پچھاتی جاندی سی تے آپ نے اوکھے کجھ چر آ رام فرمایا۔ ام معبد پکی عمر دی اک چوکی باوقار تے باعفت عورت سی۔ اس راہ وچ ڈیرے لائی بیٹھی ایس بھلی مانس بی بی نے کدے وی آؤندے جاندے راہیاں دی ٹہل سیوا

وچ کوئی کسر نہیں سی چھڈی۔ جو کچھ رب سوہنا اوس نوں دینداسی اوہ مسافراں نوں کھوا پیا دیندی سی۔ ہن قحط دادوری تے پورا علاقہ بس سردے بن دے نال کم چلا رہیاسی۔ آپ a اپنے نال دیاں نال جدوں او تھے اڑے تے اُم معبد اپنے خیمے دے باہر ڈیر لائی بیٹھی سی۔ پچھیا گیا:

”دھ گوشت یاں کوئی کھجور دا دانا..... کوئی شے لیجے گی کھان پین نوں..... آکھو گے تے اسیں مل وی تار دیاں گے۔“

”واللہ، کوئی شے نہیں اج تے۔ کچھ ہوندا تے میں گھٹ نہ کردی۔“ اُم معبد نے جواب دتا۔
اچن چیت حضورؐ وی نظر خیمے دے اک پاسے اک لسی جہی بکری تے پے گئی۔ سرور کائنات نے پچھیا: ”کیہ ایہ بکری کچھ نہیں دیندی؟“

”ایہ تے ایڈی مریڑی تے وڈیری اے بی چرن وی نہیں جاسکی۔ ایس نے کیہ دینا اے“ سوانی نے جواب دتا۔
”پر معبدی ماں! جے تسیں اجازت دیو تے میں اس نوں چوہ لواں“ حضور نے پچھیا۔
”چوہ لوؤ جے ایہدے تھناں وچوں کچھ نکلد اے تے“ اُم معبد نے جواب دتا۔

فیر رب دے محبوب نے بکری دے تھناں تے (تے اک روائت موجب بکری دی کنڈ تے وی) ہتھ پھیریا تے نالے دعا کیٹی کہ رہا! ایس زنانی دیاں بکریاں وچ برکت پادے۔ فیر ددھ چونا چھوہ دتا۔ بکری نے اپنیاں لتاں کھلا ردتیاں تے جگالی کرن لگ گئی۔ ددھ دیاں دھاراں ساؤن بھادروں دے شرلاٹے والے مینہ وانگ تھناں وچوں نکلدیاں رہیاں۔ چنگا کھلا ڈلھا بھانڈا وی ٹونک بھریا گیا۔ آپ a نے اُم معبد نوں ددھ پین دی دعوت دتی۔ فیر واری واری اپنے نال دیاں نوں رجا کے پیایا۔ اخیر تے آپ پیتا تے نالے فرمایا۔ ”ساقی القوم اخرهم“ (دو جیاں نوں پیان والا آپ اخیر تے پیندا اے) فیر بھانڈا نوں سرے ددھ نال بھریا تے اُم معبد دے اگے رکھ دیاں ہوئیاں فرمان لگے ”معبدی ماں! ایہ ددھ معبد دے اے لئی رکھ لے۔“ ایوں ساری دنیا دی میزبانی کرن والی اُم معبد نے رسول خدا دی پروٹی بن کے رج کے ددھ پیتا۔
روڑیاں وانگ کھڑکدے، تے سکے ہوئے تھناں وچوں نکلدیاں ددھ دیاں دھاراں ایس گل دیاں گواہ نیں کہ جے مدینے توں ٹریا، مکہ فتح کرن والا لشکر وی کدھرے اُم معبد دی بکری دا ددھ پین لگ پیندا تے بکری ددھ دیندی جاندی تے مجاہد پیندے جاندے پرددھ نہ مکدا۔ شرط اوہی اے کہ چون تے پیان والے ہتھ محمد رسول اللہ a دے ہوندے۔
بریدہ اسلمی نال ٹاکرا:

بریدہ اسلمی اپنی قوم دا سردار سی تے اوہ وی سراقہ وانگ انعام دے لالچ وچ حضور a دی کھوج وچ نکلیا ہوئیا سی۔ فرق ایہ ہے کہ سراقہ نوں کسری دے کنگن لیجے تے بریدہ اسلمی دی کھوجکاری اوس دی تے اسدی قوم دے ستر بندیاں دی قسمت سنوار گئی۔ ہو یا ایہ کہ جدوں بریدہ دا آپ a نال ٹاکرا ہو یا تے اوس نوں حضور نال آہمنے سائمنے کچھ گلاں کرن

داموقع مل گیا۔ بس اوسے گل بات دانیجا اے کہ بریدہ اپنے ستر بندیاں سنے (سمیت) مسلمان ہو گیا۔ اوس نے اپنی چٹی پگڑی لاہ کے نیزے تے بنھ لئی تے ہوا وچ اوس نوں پھیرے دین لگ پیا۔ ایس دا مطلب ایہی سی کہ امن دا بادشاہ، صلح دا حامی تے دنیا تے انصاف دار و اوج پاؤن والا آرہیا اے۔ رب سببیں راہ وچ حضرت زبیر بن عوام وی ملے جہڑے شام توں کجھ تجارتی سامان لے کے آرہے سن۔ اوہناں نے نبی اکرم a تے حضرت ابوبکر b دی خدمت وچ کجھ کپڑے پیش کیے جہڑے سفرو وچ قافلہ بوتا دے بڑے کم آئے۔

رسول خدا قبا وچ:

رسول خدا a دی مکے توں رواں دی خبر یثرب اپڑ چکی سی۔ لوکائی اڈکیاں لائی بیٹھی سی۔ فرشتیاں جے معصوم نیانے، باعفت سوانیاں، جوان منڈے تے پکی عمر دے، سارے دے سارے، راہواں تک رہے سن۔ نور دے تڑکے گھراں وچوں نکلدے تے مکے ولوں آؤن والا رہل کے بہ جان دے۔ جیس ویلے دھپ جیسے ساڑن لگ پیندی تے پچھانہ پرت جان دے۔ جس دیہاڑے آپ a یثرب دے نیڑے قبا تیکر اپڑے، اوس دیہاڑے وی اڈیکن ہاراکھاں راہواں تک تک کے تھک گئیاں سن۔ یثرب دے چوکھے لوکی تے نہ سہی جان والی دھپ ہتھوں مجبور ہو کے گھراں نوں پرت گئے سن۔ ٹاواں ٹاواں بند اہجے باہر دس داسی۔ جس بندے قافلے نوں سبھ توں اگدیں یثرب ول آؤندیاں ویکھیا اوہ اک یہودی سی۔ اوس نے اپنی اچی واجاں لائیاں شروع کردتیاں ”لوکو! جس دی تہانوں اڈیک سی اوہ ہستی آگئی جے۔“ لوکی باہر نکل کے قافلے ول ودھے تے ویکھیا کہ یثرب توں کوئی تن میلاں دے پندھ اُتے قبا دے تھان تے دو بندے اک کھجوری چھاں پٹھ بیٹھے نیں۔ لوکی سلام دعا کر دے رہے تے او تھے اکٹھے ہوندے گئے۔ لوکائی نوں پتا نہیں سی لگ رہیا کہ رسول a کون نیں تے جناب ابوبکر b کہڑے نیں۔ اخیر جدوں چھاں او تھوں ہٹ گئی تے اک بندے نے دو جے تے چھاں کیتی تے اوہناں نوں سمجھ لگی کہ چھاں کرن والے جناب ابوبکر b نیں تے دو جے رسول خدا a۔ قاضی سلمان منصور پوری لکھدے نیں کہ اوس دیہاڑے ۸ ربیع الاول ۱۳ نبوت تے دوشنبہ دادن سی تے شمسی حساب موجب ۲۳ ستمبر ۶۲۲ء سی۔

رسول خدا جمعہ ۱۲ ربیع الاول تیکر او تھے ٹھہرے تے ایہناں چار دنوں وچ جہڑا کم او تھے کیتا اوہ ایہی سی کہ او تھے خدائے وحدہ لاشریک دی عبادت لئی اک مسیت اُساری۔ قبا دے مقام تے ای جناب علی المرتضیٰ شیر خدا وی آرلے سن۔ اوہناں وی مسیت اسارن وچ محنت کیتی۔ نبی اکرم a آپوں وی مزدوراں وانگ کم کر دے رہے۔ بھارے بھارے پتھر چکدیاں مبارک جتا دوہرا ہو جاندا۔ محبوب خدا a اُتے جان نثار کرن دے شوقین تے عقیدت وند آؤندے تے عرض کردے ”یا رسول اللہ! ساڈے ماں باپ تہاڈے تے فدا ہو جان تسیں چھڈ دیو، اسیں آپے پتھر چک لواں گے۔“ آپ a اوہ پتھر تے اوس عاشق نوں دے دیندے پر آپوں اوس توں وڈا ای اک دو جا پتھر چک لیندے۔ حضرت

ایس مدت تے سیرت لکھیاراں وچ اختلاف اے۔ کجھ دا خیال اے کہ یاراں (۱۱) دن رہے کجھ ایس توں وی ودھ دسدے نیں۔

عبداللہ بن رواحہ، جہڑے شاعری دا ذوق وی رکھدے سن، اوہ وی مزدوراں وانگ جٹے ہوئے سن تے نالے ایہ شعر پڑھدے جاندے سن:

اَفْلَحَ مَنْ يَصَاحِبِ الْمَسَاجِدَا اوہ بھلیائی کھٹ گیا جس نے مسیت اساری
وَيَقْرَأُ الْقُرْآنَ قَائِمًا وَاقْعَادًا تے اوہ وی جہڑا اٹھدا بہند اقرآن پڑھدا اے
وَلَا يَبِيتُ اللَّيْلَ عَنْهُ اقْدَا تے نالے اوہ جہڑا راتاں نوں سوند نہیں۔

رسول خدا a دی ہر قافیہ دے نال آواز رلائی جاندے سن ﴿﴾

حضرت ابوبکر تے سرور کائنات دے نال نال ای حیاتی دے دیہاڑے گزار رے سن۔ حضرت علی نال وی جویں دا تعلق سی، اوہناں محمد رسول اللہ دے موہڈے نال موہڈا لانا سی پر ایہہ دو بندے جیہڑے مٹی دے بورے موہڈیاں تے پکلی ٹرے آؤندے نیں، ویلے دی اکھھ نے ایہ گل چوکی اچرج دیکھی اے۔ ایہناں وچ اک تے چنگا ٹکڑا تے ٹوہر پٹے والا بندا صہیب رومی k ہے تے دُجا جیہڑا ست فٹ توں لمبا تے چوڑی ہک والا بندا لمیاں لمیاں لانگاں بھر دا مٹی چکی لیاؤندا اے، ایہہ اوہ بند اے کہ جے کجھ چیرا گدیں، مکے وچ رہندیاں، اوس نوں پورا عرب وی دے دتا جاندا سگوں عرب دے گوانڈ دیاں بادشاہیاں تے سرداریاں وی اس دے پیراں وچ رکھ دیتیاں جاندیاں تے ایس نوں آکھیا جاندا کہ اٹاں بناؤن لئی مٹی چک کے لیا دے یاں گارا سچیاں وچ بھر دے تے ایہہ بند کدے وی چتھیرے داکم نہ کردا۔ پر قربان جاییے ایس ہستی دے کہ ہن اوہ ایہ سب کجھ کری آؤندا اے۔ دوستو! کیہ ایہہ نویکی گل نہیں کہ جیہیں بندے توں ابلیس وی ترہندا ہووے اوہ عام چٹھہ مزدوراں وانگ مٹی تے پتھر چک چک کے اپنا جتا چھل لوے۔ تسیں جاندے تے ہے اوہ ایہہ کون اے پر فیروزی اپنے قلم نوں پاکیزہ کرن لئی عمر بن خطاب داناں لکھ رہیا ہاں۔

جمعہ دے دیہاڑے آپ a شہر ول تشریف لے گئے۔ ہر پاسے دی لوکاں شیدائیاں وانگ بھیجی ٹری آؤندی سی۔ آپ a داناں کا قبیلہ بنو نجار ہتھیار بنھ بنھ کے، چوکھے جوش نال اگے اگے ودھیا رہیا۔ قبا توں یثرب تیکر، راہ دے دوواں پاسے جان نثاراں دیاں صفاں بجیاں دس دیاں سن۔ شہر نیڑے آ گیا اتے عجیب منظر دیکھے گئے۔ پردادار سوانیاں وی گھراں دیاں چھتاں تے چڑھ گئیاں۔ محبوب خدا a نوں ”جی آیاں نوں“ آکھن والا ایہ شاندار جلوس اصلوں ای ہولی ہولی ٹریا جاندا سی۔ اے مسماں بنو سالم دے گھراں تیکر اڑے سن کہ جمعے دا ویلا ہو گیا۔ بنو سالم دے محلے وچ نماز جمعہ پڑھی۔ ایہ رسول خدا دا پہلا جمعہ تے سبھ توں پہلا خطبہ نمازی۔

یثرب مدینۃ النبی بن گیا:

نماز جمعہ توں فارغ ہو کے قافلا اگے ٹریا۔ آپ a یثرب دے جنوبی پاسیوں شہر وچ داخل ہوئے۔ اوہناں دے قدم مبارک یثرب دی مٹی نے چمے تے یثرب مدینۃ النبی اکھوان لگ پیا۔ چنگا ٹکڑا تے شاندار جلوس نال نال سی۔ گلیاں محلے تکبیر دے نعریاں نال گونج رے سن۔ کیہ سوانیاں کیہ مرد، کیہ وڈیرے کیہ جوان، کیہ کڑیاں تے کیہ منڈے، بس

﴿وفاء الوفاء بحوالہ سیرت النبی (شبلی نعمانی) جلد اول، صفحہ ۱۶۵﴾

ساری خلقت نور خدا دا جلو ویکھن لئی بے تاب ہو رہی سی۔ انصار دیاں معصوم کڑیاں دف و جا رہیاں سن تے پیارے لہجے تے پاک زبان نال ایہ شعر گارہیاں سن:

| | |
|-------------------------------------|-------------------|
| چودھویں دا چن چڑھ پیا اے | طلع البدر علینا |
| کوہ و داغ دیاں گھٹیاں وچوں | سن ثنیاات الوداع |
| ساڈے تے اللہ دا شکر واجب ہو گیا اے | وجب التذکر علینا |
| جد تیکر دعا ممکن والے دعا منگدے رہن | ما دعی اللہ داع |
| تسیں اوس رب ولوں بھیجے گئے او | ایہا المبصوٹ فینا |
| ایس لئی تہاڈے حکم دی اطاعت فرض اے | جئت بالامر المطاع |

اوہ انصار جہناں دیاں بچیاں نے دف تے ایہ گیت گائے سن، خیال اے کہ ایہ اوہ لوکی سن جہناں نے ۱۱-۱۲ یاں ۱۳ نبوت وچ مکہ معظمہ وچ رسول اللہ دے ہتھ تے بیعت کر لئی سی یاں اوہ ہون گے جہڑے مصعب بن عمیر یاں دو بے نقیبیاں دیاں کوششاں نال یثرب وچ ای مسلمان ہو گئے سن تے اسلام دی روشنی اوہناں دے دلاں نوں جگمگ کر رہی سی۔

نبی اکرم a دی اٹھ وی چوکی شان نال اگے ودھ رہی سی۔ ہر انصاری دا ایہ دل چاہندا سی کہ میزبانی دا شرف اوہے نوں حاصل ہووے۔ ایوں جا پدا سی کہ اہل یثرب وچوں ہر کوئی ہنے قصواء دے پیرای پھڑ لوے گاتے آکھے گا ”قصواء! تینوں اللہ دا واسطہ ای، قصواء! تینوں اوس ہستی دا واسطہ ای جہڑی تیری کنڈ تے سوار اے، اتھے میرے بوہے اگے کھلو جا۔“ پر آنحضرت a نالو نال ایہ فرماندے جارہے سن کہ اللہ دے بندیو! ایس نوں چھڈ دیو جتھے حکم ربی ہووے گا، اونٹنی آپوں رک جاوے گی۔ ایس عظیم الشان استقبالیا جلوس دے نال نال ٹردی قصواء بنی مالک بن نجار دے گھراں دے اگے اوس تھان تے جا بیٹھی جہڑی دو یتیم منڈیاں دی ملکیت سی۔ پر چھیتی ای اونٹنی اٹھ کے فیڑ پئی تے بلکل نیڑے ای خالد بن زید انصاری دے بوہے اگے بہ گئی تے دھون زمین تے وچھا دتی۔ لوکی سمجھ گئے کہ اوہناں دے آقا دی ایہو منزل اے۔ خالد بن زید ہی اوہ خوش قسمت بندہ اے جہوں تواریخ آج تیکر ابوایوب انصاری دے ناں نال یاد کردی اے۔

حضرت ابوایوب دے بوہے اگے قصواء اونٹنی دا بیٹھنا ہجرت دے معجزے دا اخیر شاہکار سی۔ ایس دے نال ای جناب ابوایوب b میزبان رسالت بن گئے۔ آپ دامکان دو منزلہ لاسی۔ حضور نوں اتلی منزل تے قیام دی درخواست کییتی گئی پر آپ a نے آون جان والیاں دی آسانی لئی پیٹھلی منزل تے رہنا پسند فرمایا۔ حضرت ابوایوب نے اپنے شان والے پروہنے دے آرام دا ہر طرحاں خیال رکھیا۔ آپ a دا چھڈیا ہو یا کھانا تبرکاً خشکی کھاندے تے اپنی سوانی نوں وی کھاندے۔ آپ دے آرام دا ایڈا دھیان رکھیا جاندا سی کہ اک دیہاڑے ایس عاشق رسول کولوں پانی دا اک بھانڈا ٹٹ گیا۔ اوس ویلے دل وچ خیال آیا کہ کدھرے ایہ نہ ہووے کہ پانی وگ کے تھلے والی منزل تیکر ٹر جاوے تے حضور دی بے آرامی دا سبب بن جاوے۔ شتابی نال اپنی رضائی پھیری تے پانی اُتے رکھ کے سارا پانی چوس لیا۔ چیتے رہوے کہ ایہ حضرت ابوایوب b دے گھر وچ اکوای رضائی سی جہڑی شیخ نبوت دے پروانے نے چکڑ مٹی مل کے قربان کردتی۔

آنحضرت نے ست مہینے ایتھے قیام فرمایا۔ نالو نال مسجد نبوی دی تعمیر جاری رکھی۔ جدوں حجرے اسارے گئے تے آپ a جناب ابوایوب انصاری b داشکریا ادا کردے ہوئے نقل مکانی فرما گئے۔ ہجرت دا عمل توڑ چڑھن توں بعد اوہ شہر جہڑا دار یثرب یا یثرب اکھوانداسی، ہن دارالرسول، دارالرحمت، دارالایمان، دارالہجرت، مدینۃ الرسول، مدینۃ منورہ، مدینۃ المقدسہ، مدینۃ المقر، صبح الرسول، الناصیہ، النحر، الہندراء، المختارہ، المدحل صدق، المسکینۃ، المسلمۃ المحرمۃ المحفوظہ، محفوظ تے ایوں دے ۹۹ ناواں نال یاد کیتا جان لگ پیا۔

قصوی یاں قصواء:

عرب دے وسنیکاں دا ایہہ خیال سی کہ جے کسے اکیل اٹھ دے کن تھوڑے وڈھ دتے جان تے اوہ ہور ٹل نال بچ دی اے تے دجیاں اونٹیاں نوں نال نہیں رلن دیندی۔ ایویں دی گوش بریدہ یعنی کن وڈھی اٹھ نوں عرب وچ قصوی آکھدے سن۔ حضرت ابوبکر نے وی اک اجہی اٹھ پالی ہوئی سی۔ خیال کیتا جاندا اے کہ ایہہ اچھے طور تے ہجرت واسطے ہی سانجھی گئی سی۔

پیغمبر اسلام ہجرت ویلے جناب ابوبکر دی ایسے کن وڈھی اٹھ تے سوار سن، ایس لئی اوہاناں تواریخ وچ محفوظ ہو گیا تے ایوں محفوظ ہو گیا کہ لوکاں دجیاں گوش بریدہ اونٹیاں نوں بھل ای گئی تے قصوی دے اکھروں ایویں چیتے رکھا گیا کہ جویں ایہہ اوس اٹھ داناں سی جہدے تے ہجرت ویلے رسول خدا سوار سن۔ ہن قصوی اسم عام (Common Noun) توں اسم خاص (Proper Noun) بن چکیا اے۔



ہجرت دامعجزا☆

ہجرت عربی زبان والفظ اے جس دامادہ مخر اے۔ ایس دے لغوی معنے ترک کرنا، چھڈ کے ٹر جانا، تعلق توڑ لینا، وکھرے ہو جانا، نیندر وچ بڑ بڑانا، خواہشاں دا ترک کرنا تے جذبات تے قابو پانا نیں پر ادب تے توارخ وچ عام طور تے ایہدا مطلب جدائی، خانہ بدوشی، وطن چھڈ دینا یاں اک علاقے وچوں نکل کے دوجے وچ جا کے وسوں کرنا لے جان دے نیں۔

ہجرت دامعلامہ نبی اکرم a لئی خاص نہیں سی تے نہ ای دنیا لئی ایہ کوئی نویکلی گل سی۔ آپ a توں اگدیں وی اللہ دے پیغمبراں، تے اس دے خاص بندیاں نے ہجرتاں کیتیاں سن۔ توارخ گواہ اے ہی حضرت نوح g، لوط g، داؤد g، یعقوب g، یوسف g، موسیٰ g، عیسیٰ g جے اچیاں شانناں والے پیغمبراں نے ظلم تے جبر توں بچن لئی تے انسانیت نوں اک پاک، صاف ستھرا تے عدل انصاف دیاں بنیاں تے اساریا نظام دین لئی ہجرتاں کیتیاں سن۔

سدا دے آقا حضرت محمد a دی اک خاص گل ایہ وے کہ آپ نے کوئی وی اجہی چیز پیش نہیں کیتی جہڑی انسانی حیاتی وچ اچر ج تے انہونی جا پے۔ جویں حضرت موسیٰ تے عیسیٰ g نے عقل نوں عاجز کرن والیاں چیزاں وکھا کے لوکاں نوں اپنے ول بلایا، ایوں نبی رحمت a نے نہیں کیتا تے جے کوئی معجزے ظاہر وی ہوئے نیں تے آپ a نے اوہناں نوں لوکاں دا دھیان اپنے ول کرن دا ہتھیار نہیں بنایا سگوں ایہ چتا کیتی کہ رسالت تے بشریت دا جہڑا تے جویں دا فرق لوکاں نوں نظر آؤندا اے اوہ اوہناں دے ذہناں وچوں نکل جائے۔ ایسے لئی آپ a فرمایا کردے سن:

”میں تہاڈی ای طرحاں ہاں تے اک اجہی قریشی عورت دے لطن وچوں پیدا ہو یا ہاں جہڑی گوشت دے سکے کلے دے کھا کھا کے گزارا کر دی سی۔“

آپ a نے ویاہ وی کیتا، آپ کھاندے پیندے وی سن، لڑائیاں وی کیتیاں، قرض وی لیا تے اتار یا وی۔ غرض ہر اوہ شے جہدے نال اک شریف بندے نوں واہ پیندا سی، اوہدے نال آپ نوں وی پیا۔ آپ a ہاسامخول وی کر لیندے سن۔ سوادی گل تے خش وی ہوندے سن۔ آپ a دوجے بندیاں وانگ چنگے کھانے تے خوشبوداں تے وی راضی ہوندے سن۔ بدن تے لیڈیاں دی صفائی ستھرائی دا وی چوکھا دھیان کردے سن۔ ویلا آپ نوں وی ہساندا تے رواندا سی۔ غرض شریف بندیاں دی حیاتی وچ جو کجھ ہوندا اے اوہ کجھ آپ a نے وی کیتا۔

انسانی زندگی دیاں ایہ گلاں ای سن جہناں پاروں لوکاں نوں آپ a دی ذات نوں مجھن وچ اوکڑاں پیش آئیاں۔ نبی رحمت a آپوں وی ایہی چاہندے سن کہ انسانی سمجھ توں باہر کوئی چیز نہ ای ہوئے تے چنگا اے۔ ایہی وجہ

☆ الاستاذ احمد عبدالغفور عطار دے مضمون ’ہجرت نبوی اور اُس کے نتائج‘ توں ماخوذ جہڑا سیارہ ڈائجسٹ دے رسول نمبر دی جلد اول وچ چھپیا۔

اے کہ جدوں مشرک لوکی آپ a توں کوئی معجزا طلب کردے تے آپ a ایہہ خیال کر کے چپ رہ جاندا کہ کدھرے اوہناں لوکاں نوں لینے دے دینے نہ پے جان۔ کیوں جے باقی نبیاں نے جدوں مشرکاں دے چیلنج قبول کر کے معجزے پیش کیے تے فیروہ اوہناں نے کفر تے شرک تے ضد لائی تے فیرب دا عذاب نازل ہو یا چھنے اوہناں دا صفایا کردتا۔ محمد رسول اللہ a تے خاتم الرسل سن تے آپ دی دعوت تے قیامت تیکر لئی سی۔ ایس لئی آپ a ایہہ نہیں سن چاہندے کہ آپ معجزے پیش کرن تے فیرا نکار دی صورت وچ آپ دی امت ہمیش لئی دنیا توں نیست و نابود کردتی جاوے۔

ایہ اوہ خاص گل سی جس نے آپ a نوں دو جے انبیاء توں دکھ کر دتا سی۔ پر ہجرت تے سچ مچ اک چنگا وڈا معجزا سی کیوں جے آپ دی ہجرت نال رحمتاں دے اچھے اچھے چشمے ابلے جہدا تصور وی نہیں کیتا جاسکدا سی۔ ایس دے نتیجے تے لوکاں دا، تے خاص طور تے اپنے بھناں متراں دا اپنے رسول تے ہور چوکھاتے پیڈھا ایمان ہو گیا۔ اک اچھا رسول جہدی ذات آپوں اک ٹردے پھر دے تے ہمیش دے معجزے دی حیثیت رکھدی سی۔

قرآن آپ a دا سبھ توں وڈا معجزا اے۔ اوہ شخص عقل، فہم، ادراک تے تمیز توں خالی اے جہڑا ایہ آکھے کہ قرآن اللہ دا نہیں محمد a دا کلام اے۔ نزول قرآن دے مڈھلے دور توں لے کے اخیر تیکر اچھے شاعر تے لکھاری پیدا ہوئے جہناں دی بڑی شہرت ہوئی پر اوہناں دے کلام وچ اک دی اچھا شاہکار نہیں جہڑا قرآن دے معجزا اسلوب دے نیڑے وی پھٹک سکے۔ حالانکہ منظر کشی، واقعی نگاری، ربط تے لفاظی وچ اوہناں نوں کمال حاصل سی۔ جاہلیت دے دور دے کئی شعر جہڑے اچھے تیکر پڑھن نوں لبھدے نیں، اوہناں وچ اکھر جلتھی پاؤندے دسدے نیں۔ پر چوداں صدیاں گزرن توں بعد وی قرآن دی اک سورت، سگوں اک آیت ورگی آیت وی آکھن تے لکھن توں دنیا دیاں زباناں گنگ تے قلم بے بس نیں، تے قرآن دا ایہ چیلنج اپنی تھاں تے دسد اے:

﴿وَإِنْ كُنْتُمْ فِي رَيْبٍ مِّمَّا نَزَّلْنَا عَلَىٰ عَبْدِنَا فَأْتُوا بِسُورَةٍ مِّثْلِهِ وَادْعُوا شُهَدَاءَكُمْ مِنْ

دُونِ اللَّهِ إِنْ كُنْتُمْ صَادِقِينَ﴾ (البقرہ: ۲۳)

”تے جے تہاںوں ایس گل وچ کوئی شبہ اے کہ ایہ کتاب جہڑی اسیں اپنے بندے تے نازل کیتی اے (کہ ایہ

ساڈی ہے یاں نہیں) تے فیرا ایہدے ورگی اک سورت تسیں وی بنا لیاؤ۔ اپنے ورگے ہور وی اکٹھے کر لوو تے

اللہ توں دکھ جہدی مدد چاہندے او، لے لوو تے فیر جے تسیں سچے او (تے ایہ کم کرو کھاؤ)۔“

ایہدے ورگی سورت یاں آیت پیش نہ کر سکنا ایس گل دی دلیل اے کہ ایہ بندے دا نہیں اللہ دا کلام اے۔ اچیاں شاناں تے اچے ناواں والے شاعران تے لکھاریاں دی چوداں سو ورہیاں دی خاموشی ایہ ثابت پئی کردی اے کہ بندے ایوں دی گل کراہی نہیں سکدے۔ قرآن توں دکھ نبی رحمت a دے چٹے وی دو جے معجزے نیں اوہ سارے انسانی فطرت دے مطابق نیں پر فیروہ آپ a نے بعض اچھے کماں تے معرکیاں نال انسانی توازن دارخ موڑ دتا جہدی نظیر پیش کرن توں انسان عاجز تے مجبور اے۔

انسانی فطرت دے مطابق جہڑے معجزے ظاہر ہوئے اوہناں وچ اک ہجرت دی اے، تے اسیں آکھ سکدے ہاں

کہ ہجرت اوہناں وچ سبھ توں وڈا معجزا اے۔ ہجرت توں اچھے عظیم الشان نتیجے سامنے آئے کہ صرف چند ورہیاں وچ عالم انسانیت دارخ مڑ گیا۔ جے ہجرت نال نرا میثرب وچ کوئی انقلاب آجاندا تے فیروہی ایس نوں اک وڈا معجزا من لیا جاندا پر ہویا تے ایہ کہ دنیا دے گوشے گوشے تے ہجرت دے نتیجے تے ظاہر ہون والے انقلاب دیکھے گئے۔ ایشیاء، افریقہ تے یورپ تیکر اسلام دی روشنی کھلر گئی۔ اک نویں تہذیب تے اک نواں کلچر دیکھن نوں ملیا۔ اسلامی فہم تے فکر نے دنیا نوں اگے ودھن دیاں کئی نوایاں راہواں دکھائیاں۔ کوئی شخص ایہ گل نہیں آکھ سکدا کہ ہجرت توں بعد نظر آؤن والا تمدن اسلامی تمدن توں دکھ کوئی دو جاسی، کیوں جے اوس ویلے دنیا تے تن کلچر سن۔ فارس، یونان تے روم دے کلچر۔ ایہ تن اپنی موت مر چکے سن۔ اسلام توں پہلے دا کوئی کلچر باقی نہیں سی رہیا۔ ہن اوہناں دی تھاں اسلام دے اک اچھے کلچر نے لے لئی سی جہدی پہلوں کوئی نظیر موجود نہیں سی۔

ہجرت نبی سچ سچ اک معجزا سی۔ ایس دی دلیل ایہ ہے کہ ایس توں اگدیس کئی سواں پیغمبراں، بادشاہواں، حاکماں تے لیڈراں نے بلکل ایوں ای اپنے اپنے وطن چھڈ کے پردیس کٹے تے ہجرتاں کیتیاں پر اوہناں دے اثر تے نتیجے کمزور، تھوڑے تے ایوں وقتی جے رہے پر نبی آخر دی ہجرت نے اپنے نتیجے، اثرات، منافعے تے فائدے ساری دنیا تے ہمیش لئی کھلار دتے۔ خیر و صلاح دا جہڑا چشمہ ربیع الاول اھ وچ پھٹیا، اوہ دے نال پوری دنیا دے سوکے مک شک گئے۔

محمد رسول اللہ a نے ہجرت کیتی تے آپ دے نال آپ دے یار ابو بکر صدیق b نے وی ہجرت کیتی۔ دوواں گھرباہر، مال دولت، اہل عیال تے خاندان قبیلہ سبھ کچھ چھڈ دتا۔ ایوں دو جے مہاجر بنناں نے وی قربانی پیش کیتی تے ایہو ایہو جہیاں اوکڑاں تے دکھ برداشت کیتے بئی کلیجہ مونہ نوں آجاندا اے، کیوں جے کوئی بندہ ایڈیاں تکلیفاں سہارا ہی نہیں سکدا۔ ابوسلمہ عبداللہ b ول ای دیکھو۔ اوہناں ہجرت دا ارادہ کیتا تے کافراں آکھیا کہ ابوسلمہ یاں تے ککے وچ ای رہو یاں گھر والی تے بچے نوں اتھتے چھڈ جاتے کلاڑ جا۔ ابوسلمہ b نے اللہ دی راہ وچ ہجرت کیتی تے بیوی بچے نوں اللہ دے حوالے کر دتا۔ صہیب رومی b ہجرت کرن لگے تے مشرکاں ڈک لیا تے آکھن لگے کہ ککے وچ کمایا مال دولت اتھتے چھڈ کے جانا ای تے سووار جا، نہیں تے چپ کر کے اتھتے بہ جا۔ صہیب نے خشخشی ساری کمائی او تھتے چھڈ دتی تے آپوں ہجرت داسودا کر لیا۔ رسول خدا a نے ایس سودے داسنیا تے فرمایا ”صہیب نے نفعے داسودا کیتا۔“

گل ایہ ہے بئی ابوسلمہ نوں اپنا پتر یاد تے ضرور آؤندا ہونا اے۔ بیوی دی یاد وی رواندی ہونی اے۔ دو جے بچن مترووی ابوسلمہ دیاں اکھاں پیوندے ہون گے۔ صہیب نے سفر دیاں تکلیفاں برداشت کر کے تے دن رات اک کر کے جہڑے دو ککے کمائے سن، اوہناں دے کھس جان دی تکلیف تے ضرور ہوئی ہونی اے پر اوہناں دوواں بزرگاں نوں اوہ آپشن (Option) چنگا لگا جھیرا دیکھن وچ تے گھائے داسودا لگدا سی پر اصل وچ رسول اللہ دے آکھن موجب فائدے دی گل سی۔

رسول اللہ تے آپ دے سنگیاں دی ایہ ہجرت ایس گل دا اعلان سی کہ سبھ توں پہلوں اللہ۔ دین ہر شے توں قیمتی اے، ایہتوں تیکر کہ بال بچے توں وی۔ عیش آرام دی سوادلی حیاتی توں اوہ موت کئی گنا چنگی اے جس دا کوئی مقصد ہووے فیر

جے اوہ مقصد ایمان ہووے تے فیر کھیری گل پچھے رہ جاندى اے۔ ہجرت نے ایہ گل کھل کے منواتی کہ ظلم و جبر، باطل تے ذلت دے خلاف ٹل لا کے بغاوت کرو تے بیکر گل بن دی نہ دسے تے فیر کسے دوجی اجہی تھاں تے بہ کے تیاری کرو جتھے تہانوں سکھ دا ساہ آ سکے تے فیر تسیں ظالم دی دھون وی بھن سکوں۔ رسول خدا نے جدوں رب دے حکم موجب ”اک اللہ“ دا نعرہ لایا سی تے مشرکاں دے کلیجے سڑن لگ پئے سن تے فیر اوہ ظلم دے پہاڑ توڑن لگ پئے۔ رسول اللہ نے جتاں ہوسکيا صبر کیتا پر جدوں ایہ محسوس ہويا کہ اس طرحاں مقصد حاصل نہیں ہوسکدا تے فیر آپ نے ہجرت دے مسئلے تے غور فکر کرنا چھوہ دتا سی۔ حبشہ ول حضرت جعفر بن ابوطالب دے نال صحابہ نے جہزی ہجرت کیتی سی اوہ اک چنگا تجربہ سی پر فیروی رسول اللہ نے حبشہ نوں دارالہجرت نہیں بنایا، حالاں کہ اوتھوں دے بادشاہ نجاشی نے مسلماناں نوں چنگے طریقے نال جی آیاں نوں آکھیا سی۔ فیر جدوں مکے دے مشرک نجاشی کول اپڑے سن تے اوس نے اوہناں دا داوا ہوا مونہ بھدیا سی۔ پر فیروی حبشہ نوں مدینہ الرسول ایس لئی نہ بنایا کہ ایہ جزیرۃ العرب توں چوکھا دریڈا سی تے ایس لے پینڈے پاروں سنہیہ پتر دا مسئلہ رہنا سی۔ ایوں ای دو جے شہروی مکے دے مرکز توں نیڑے نہیں سن۔ ایس لئی مدینے نوں ای دارالہجرت بنانا بہتر جا پیا تے فیرویلے نے ایہ گل ثابت وی کردتی کہ فیصلہ سو فیصد درست سی۔

یثرب ول ہجرت اک نویں دور دا ڈھ سی۔ ایس ہجرت نے اوہ کجھ کیتا جہزا کسے امت تے کسے حکومت کولوں اج تیکر نہیں سی ہوسکيا۔ ایس دے ایڈے وڈے نتیجے ظاہر ہوئے کہ ایہ اک غیر طبعی جہی چیز سمجھی جان لگ پئی۔ جہزا کم سارے جتن کرن نال تے سارے وسیلے آ زمان نال نہیں سی ہوسکدا اوہ ہجرت دے ایس معجزے نے کر دکھایا۔ ایس نوں وکھ کے دنیا دیاں اکھاں حیران ہو گئیاں۔ ہجرت توں بعد رسول اللہ a نے ایہ نہیں کیتا کہ لوکائی نوں اکٹھا کر کے مادی فائدے یاں دنیا دے جاہ جلال لئی اپنی طاقت نوں جھونک دتا ہووے جو یں کہ دنیا دا دستور اے، سکوں انساناں دی وکھو وکھ قلبی تے عملی اصلاح کیتی، انسانیت دے گر سکھائے تے فیر اک پاک تے صالح اجتماعیت دیاں جڑاں ایوں گڈھیاں کہ ہر کوئی نیکی تے بھلیائی دے کماں وچ اک دو جے توں اگے ودھن لئی جتن کرن لگ پیا۔ جدوں کوئی پریشان حال مسلمان مکے توں مدینے ول آؤندا تے ہر انصاری دی ایہ ہوکوش ہوندی سی کہ اوہ مہاجر اوسے دا ای پروہنا بن جائے تے اپنے رب نوں راضی کرن دا موقع مل جاوے۔

ذرا حال دی گھڑی تے جھاتی پاؤ۔ آکھیا جاندا اے کہ اج دی دنیا چوکھی مہذب تے متمدن دنیا اے، اج دا دور چوکھا تہذیب یافتہ اے تے نالے طاقت ور تے پکے پیڈھے معاہدیاں پاروں تے اقوام متحدہ دی موجودگی کر کے دنیا کجھ اصولاں تے ضابطیاں دی پابند اے۔ آکھن نوں تے ایس پابندی پاروں کوئی کسے دا حق نہیں کھوہ سکدا تے کوئی کسے ماڑے نال زیادتی نہیں کر سکدا پر عملی گل تے کجھ ہو رے۔ جو اسیں ویکھنے پئے ہاں اوہ اوس توں ڈھیر مختلف اے جو اسیں سن رہے ہاں پر اھہ دے مدینہ النبی ول ویکھو۔ کیا بھائی چاراسی، کیا محبتاں سن، کیا امن تے شانتی سی! کیہ اج دی نام نہاد مہذب تے متمدن دنیا وچ اوس دور دی کوئی اک وی جھلک نظر آؤندی اے؟ نہیں جی، اصلوں ای نہیں۔

آپ a نے ہجرت توں بعد دین نوں ریاست تے سیاست توں، تے روحانیت نوں مادیت توں وکھ نہیں کیتا

سگوں اوس حکومت وچ مسجد تے بازار اک دسدے نیں۔ لوکائی بازار وچ ایہ اوازاں سن دی سی کہ لوکو! نیک عمل اختیار کرو، رزق حلال عبادت اے تے عین عبادت اے تے مسیتاں وچ بازار تے تجارت دا ایوں ذکر آیا کہ عبادت وی تجارت اے۔ ایہ گھائے داسودا نہیں۔ ایہدا نفع نہ مکن والا اے۔ ایس توں ہمیش دا فائدہ ملنا اے۔ لوکائی نوں دسیا گیا کہ جدوں تسیں خدائے واحد دے کم لگ جان دے او تے اوہ تہاڈے کم لگ جاندا اے۔ اوہناں نوں دسیا گیا کہ دین تے پکے ہو جاؤ، تہا نوں دنیاوی استقلال وی مل جاوے گا۔ نیکاں نوں دنیاوی تسخیر دی بشارت دتی گئی تاں جے اوہ انسانیت دی خدمت کر سکن۔

ہجرت دے معجزے دا اک فائدہ ایہ ہویا کہ طبقاتی جنگ دا خاتمہ ہو گیا۔ لوکائی نوں پتا لگ گیا کہ اسلام طبقیہاں دا نہیں، طبقاتی کھچا تانی دا ویری اے۔ ایہو وجہ سی کہ خلیفہ، تے اُٹھ دی ٹیکل پھرن والا اک مک دس لگ پئے۔ بادشاہ تے آجڑی انصاف دی اکوٹڑی وچ ٹکن لگ پئے۔ اوہناں دے دلاں وچ اک دوجے لئی محبت سی۔ اوہ بغض، کینہ تے نفرتاں توں پاک دلاں والے بن گئے۔ اک نیک بندے دا بھراہڑ محتاج ہوندا سی، اپنے مالدار بھرانال کوئی کینہ نہیں سی رکھدا۔ دنیا دیاں اکھاں نوں ایہ دیکھن وچ کوئی ہسچل نہیں کرنی پئی کہ جہڑی کھچا تانی تے جہڑے رولے کسے کولوں نہ مک سکے، ہجرت توں بعد رسول اللہ نے ایوں مکا دتے کہ امن تے انصاف دا بول بالا ہو گیا۔

ہجرت دا اک فائدہ ایہ وی ہویا نئی مسلمان جہڑے لستے تے ماڑے سن اوہ تگڑے تے زور اور ہو گئے تے نالے انفرادیت دی تھاں تے اجتماعیت آ گئی۔ مشرکاں دے ڈرتوں جہڑے مسلمان لک لک کے اپنے دینی فرض ادا کر دے سن اوہ ہن کھل کے تے جماعت نال ادا کرن لگ پئے۔ دعوت دا کم وی کھل کھلا کے ہون لگ پیا کیوں جے مسلماناں وچ ایوں دے تگڑے بندے آر لے سن جہڑے حملا آوراں دا ڈٹ کے مقابلہ کر سکدے سن۔ مسلماناں وچ اک نوں تبدیلی ایہ آئی کہ اوہ اپنے دین نوں رحمت دے نال قوت، حریت، اخوت تے مساوات دا دین وی سمجھن لگ پئے۔ پہلوں جہڑے عاجز تے کمزور سن ہن اوہ اپنی جان، آبرو، عقیدت تے دین تے حملا کرن والیاں نال ٹکا کے بڑ دے سن جوں کہ اوہناں میدان بدر وچ کیتا۔ بھاریں پہلوں وی اوہناں دا اللہ تے اوس دے رسول اُتے پکا ایمان سی پر ہن ہور پکا ہو گیا۔ روز دھڑی جاندی قوت نے اک نواں حوصلہ دے دتا۔ ہن مسلماناں نے اکٹھے ہو کے ایہ گل آکھنی شروع کر دتی سی کہ عزت توحید پرستاں تے نبی a دے عاشقاں لئی اے نہ کہ مشرکاں لئی۔ دوجے پاسے مشرکاں نے وی ایہ سوچنا شروع کر دتا سی کہ محمد a نری جان بچان لئی مکے توں نہیں نکل گئے سگوں اوہناں نوں توحید دی فصل اگان لئی اک اچھی زرخیز زمین دی لوڑ سی جتھے ایہ پوری آب و تاب نال ہری بھری ہو جاندی۔

مشرکاں نوں ایس گل دی چوکی تکلیف سی کہ کھنڈی ہوئی لوکائی وچ اک اجتماعی زندگی دی روح بھری گئی اے تے ہن ایہ دین اگے توں اگے ودھ رہیا تے کھل رہیا اے۔ ایس لئی اوہ اپنے آپ نوں تے اپنے معبودان باطلہ نوں بچان دی چتا کرن لگ پئے تے پورا ٹل لا کے قوت جمع کرن لگ پئے تاں جے کسے دیہاڑے اچھا زور دارن پوے کہ مسلماناں دا صفایا ہو جاوے۔ مشرکاں دی حیرانی ایہ دیکھ کے ودھی جا رہی سی کہ جہڑے لوک لستے تے ماڑے سن اج اوہ ایڈے تگڑے ہو گئے نیں کہ سوائے خدا توں کسے کولوں وی نہیں ڈر دے۔ اوہ جدوں ایہ خیال کر دے سن کہ کل دے غلام اج دے سردار

ہوندے جا رہے ہیں تے اوہناں دے سرقریش دے اپنے شملیاں والے سرداراں توں وی اپنے دکھالی دین لگ پئے نیں تے اوہ تھان مرمرجاندے سن۔ اوہناں نوں ایہ فکر لگ گئی سی کہ جے ابھی حال رہیا تے اک دن محمد a دی تحریک ایناں زور پھڑ جاو گی کہ ساڈا وی خاتما ہو جاوے گا۔ ایوں دے اندیشے کا فراں نوں چوکھا پریشان کر رہے سن۔

ہجرت نے توحید پرستاں دے دلاں وچ کجھ اچھے خیال پیدا کردتے سن جہڑے پہلے کدی وی نہیں سن ہوئے۔ اوہ ہن محسوس کرن لگ پئے سن کہ جیوں دا حق نرا زور اور تے تگڑے دا ای نہیں سگوں ایہ حق تے سارے انساناں دا سا بنھا اے۔ اوہناں ایہ وی سوچیا تے محسوسیا کہ خدا دی زمین، خدا دے بندیاں دا حق اے نہ کہ اپنے ہتھان نال بنائے تے گھڑے ہوئے معبوداں دے بندیاں دا، تے نالے ہجرت کوئی فسادیاں بغاوت نہیں سگوں عین انصاف تے عین اصلاح اے۔ اوہناں نوں ایہ وی محسوس ہو یا کہ انسان آزاد پیدا کیتا گیا اے تے کسے وی مخلوق، فرشتے، نبی یاں بادشاہ دی بندگی آزادی دے اصولاں دے خلاف اے۔ اوہناں نوں بندیاں تے بندیاں دی خدائی والا کم چوکھا بھیڑا لگن لگ پیا۔ انسان لئی جہڑیاں شیواں فائدے دند نیں اوہناں وچوں انسان نوں حصا ملنا چاہیدا اے۔ اوہناں نوں حلال حرام دا پتا لگ گیا تے نالے ایہہ وی کہ دنیا توں کنارا کرن والا کم بندیاں نے آپوں گھڑیا ہو یا اے، تے حرام اے جویں کہ نبی برحق نے آپوں فرمادتا سی کہ ”لا رهبانۃ فی الاسلام“ تے اللہ نے ایہ وی فرمادتا کہ ”تسبی قیام کرو تے سویا کرو، روزے رکھو تے افطار کرو تے کھاؤ پیو، کیوں جے تہاڈے جسم دا تہاڈے اتے حق اے تے تہاڈے سبناں دا وی تہاڈے تے حق اے۔“

ہجرت نال اک تگڑے انقلاب دی عینہ رکھی گئی۔ انفرادی تے اجتماعی زندگی تے دین دے تصور وچ اک اچھا انقلاب آ گیا جیس نے انساناں نوں دسیا کہ دینی زندگی ایہ نہیں کہ دنیا تے دنیا دیاں لذتاں توں کنارا کر لیا جاوے یاں بندانیا دے کماں وچ اینا رُجھ جاوے کہ دین تے آخرت نوں ہی بھل جاوے۔ دین اسلام اچھاں گلاں توں پاک تے صاف اے۔ مسیحیت نے دنیا نوں چھڈن دی مت دتی تے یہودیت نے آخرت توں مونہ موڑ لیا۔ اسلام نے دین تے دنیا وچ اک اچھا توازن دتا کہ دنیا وی کاروبار تے بازار نوں مسجد تک دا ای نہیں سگوں جنت تیکر اپڑن دا بازار بنا دتا۔ جاہل بدواں نے انسانیت دا مفہوم ایوں سمجھیا کہ وڈے وڈے فلاسفر وی اوہ مفہوم نہ دس سکے۔ اوہناں سمجھ لیا کہ مسلمان بھرا جہڑی چیز اپنے لئی پسند کرے اوہی چیز دوجے واسطے وی پسند کرے۔ اوہناں نوں ایس گل دی وی سمجھ لگ گئی کہ رب دے نیڑے کالے گورے، تے عربی تے عجمی دا کوئی فرق نہیں تے فیر جناب عمر جے آکڑ خان بندے وی بلال جیسے حبشی غلام نوں ”سیدی! یا سیدی“ دیاں و اجاں دین لگ پئے۔ اوہناں نوں سمجھ لگ گئی کہ مسلمان اوہ ہے جہدے تھ تے زبان توں دو جا مسلمان محفوظ رہوے۔

عقل تے دین وچ جہڑی جنگ صدیاں توں چل رہی سی، اسلام نے اوس دے مڈھ پٹ کے رکھ دتے۔ رسول خدا a نے فرمایا لا دین لمن لا عقل له (جہدے کول عقل نہیں اوہدے کول دین وی نہیں) قرآن نے عقل نوں اُچی تھان دتی تے عقل نوں کئی تھواں تے سراہیا۔ اوس نے ایہ وی دسیا کہ دین لئی کوئی خاص گروہ مخصوص نہیں سگوں ہر مسلمان دا دین برحق اے۔ قرآن نے ایہہ گل وی سمجھائی کہ جویں ہوا تے پانی اُتے ہر کسے دا حق اے ایوں علم تے وی کسے خاص گروہ

دی اجارا داری نہیں۔ ایہ ساریاں گلاں ہجرت توں بعد تے ہجرت دے نتیجے تے سایہ نے آئیاں۔ ہجرت نے رنگ رنگ دے عقیدے دے لوکاں نوں اک کر کے اک اُمت دا تصور دتا۔ فیر ایہ اسلامی وحدت دا ای کمال سی کہ یہود و نصاریٰ وغیرہ نے اپنے دین اُتے رہندیاں ہوئیاں وی اپنے مال اسباب تے جان و آبرو نوں محفوظ ای پایا۔ مسلماناں نے اوہناں دے حق حقوق دی پاس داری کیتی تے رواداری دی اجہی فضا قائم کر دتی جہدی مثال اوس تے پہلوں تے اوس توں بعد کسے زمانے دی حکومت وچ نہیں لہدی۔ لوکائی نے پہلی واری ایہ گل سنی کہ ”الا نسان اخوالا نسان“ (سارے انسان آپس وچ بھائی بھائی نیں) تے ایس دے نال ای اک اچھے نظام دی بنیاد رکھ دتی گئی جہدے وچ عقیدے، رنگ نسل تے قبیلیاں دے فرق دے باوجود صلح تے آشتی دے رشتے قائم ہو گئے۔

اسلام نے صرف مسلماناں نوں ہی متحد نہیں کیتا تے نہ ای نرے مسلماناں لئی امن دی ضمانت دتی سگوں ہر بشر نوں اور بشر نوں ای نہیں، ہر ذی روح نوں اوس ویلے تیکر الفت، امن تے روشنیاں داسنہیا دتا جدوں تیکر اوہ آپوں کسے دی آزادی تے حقوق ول ہتھ نہ ودھا دیوے۔۔۔ جویں کہ توارخ گواہ اے کہ مدینہ یہود، نصاریٰ، منافقاں تے مشرکاں داوی وطن سی پر ایوں کدے نہیں ہو یا کہ اسلام نے اوہناں نوں اذیت دتی یاں اوہناں دے حق ادا نہ کیتے ہوں۔ ایہ سارے اوہ مثبت کم سن جہڑے ہجرت دے نتیجے دے طور تے خدا نے اپنے مقرب بندے تے پیغمبر لئی مخصوص فرمادے سن۔ مدینے آکے انتقام، بدلے، منفی سیاست یاں ہو چھ تھکنڈے آزمائش دی بجائے اللہ دے دین دی تبلیغ ول زور دتا گیا۔ تے نالے ایہ سبق پڑھایا گیا کہ جے لے ماڑے رہو گے تے دشمن تہانوں اپنا ترنوالا سمجھدار ہوے گا۔ ہمت کرو تے اپنے آپ نوں دینی، معاشی تے حربی لحاظ نال ٹکڑیاں کر لو تے فیر ایہ ہو یا کہ ہار دی بجائے جت تے رنج تے بے چینی دی بجائے اطمینان تے سکون نصیب ہونا شروع ہو گیا۔ ایوں رسول خدا a نوں اوہ حالات مل گئے کہ اوہناں انسانیت دی بھلیائی لئی ہوو چوکھا غور تے فکر شروع کردتا تے فیر ”اک اللہ“ تے ”اک آدمیت“ دے تصور والے اک عالیشان معاشرے دی عینہ دا پتھر ٹکا دتا۔ ہجرت توں اگدیس وی مسلمان بھادیں کھنڈے ہوئے سن پر اوہناں وچ ہر بند اپنے اندر اک جماعت دی طاقت محسوس کردا سی تے ہجرت توں بعد جماعتی زندگی پوری قوت، سیانف تے ٹوہر پٹے نال سایہ آئی۔ مکے وچ حضرت یاسر b نوں تے اوہناں دے خنوادے نوں اک اللہ دی راہ تے ٹرن دے جرم وچ جدوں کافراں نے اذیت دتی تے آپ a نے اوہناں دی بہت تکلیف محسوس کیتی پر خاندان یاسر b نوں ظالماں دے ظلم توں محفوظ نہ رکھ سکے، کیوں جے مسلماناں وچ اودوں ایہ طاقت ای نہیں سی کہ کافراں نال جوڑ پاندے۔ اک بد معاش تے گنڈے جتھے اگے آپ تن تہاسن۔ اوس ویلے آپ a نے حضرت یاسر دے دکھاں نوں وکھ کے بس ایہ فرمایا:

((اصبرو! یا آل یاسر! فان موعدکم الجنة))

”یاسر دے گھر والیو! صبر کرو بس تہاڈے نال جنت دا وعدا اے۔“

ہجرت توں پہلوں مسلمان ہون والے لوکی بنا شبہ، بہادر تے جرأت وند سن۔ ایوں نہ ہوندا تے اوہ ٹکڑے مشرک سرداراں دا ساتھ چھڈ کے اک ماڑے جے بندے نال کیوں رلدے۔ پر گل ایہ سی کہ اوہ جرات وند بندے اک جماعت

دی شکل نہ بن سکے۔ کیوں جے کافراں دی پلاننگ ای ایہی سی کہ اوہناں نوں اکٹھے نہ ہون دیو تے وکھ وکھ اوہناں نوں ستاؤندے رہو، تاں جے اوہ تنگ آکے اپنے نوں دین نوں چھڈ جان پر ہجرت نے سارا نقشا ای بدل دتا۔ ہن سارے مسلمان اک جماعت تے اک امت بن کے اک دوجی امت دے مقابلے تے ڈٹ گئے جہڑا اصل وچ اصنام، شرک، جاہلیت تے لالچ دے انھیاریاں وچ ڈبا ہویا اک گمراہ ٹولاسی۔ جدوں ایہناں دودھراں دا ٹاکرا ہویا تے مسلمان کافراں دی عددی برتری دے باوجود ڈٹ گئے کیوں جے اوہناں دے دلاں دے اندر ایہ احساس پیدا ہو گیا سی کہ اسیں ہن اک قوت ہاں۔ اسیں احساس نے اوہناں دی قوت وچ ہور اضافہ کر دتا تے ایوں مسلمان کافراں تے غالب آؤن لگ پئے۔ اسیں خود اعتمادی دا اک فائدہ ایہ وی ہویا کہ مسلماناں دے اندر زمانے دیاں تلخیاں نال ٹکریاں دا حوصلہ پیدا ہویا تے اپنی نوں حکومت دیاں نیہیاں کچھ ایوں رکھیاں کہ اوہ ہزاراں سالاں تیکر ڈول نہ سکے۔

رسول خداؐ نے مسلماناں نوں اگے ودھان لئی بڑی نو بیکھی حکمت توں کم لیا۔ افراد نوں جماعت بنایا، غیر جماعت توں امت دا کھلار ایوں کیتا کہ پوری انسانیت دا احاطہ کر لیا۔ مسلمان جدوں اک اجہی امت بن گئے جہدے وچ دشمن دیاں اکھاں وچ اکھاں پاکے گل کرن دا حوصلہ پیدا ہو گیا سی تے حیاتی دے دوجے کماں ول تے تنظیم ول دھیان دتا گیا۔ معیشت دے سلسلے وچ پہلا قدم ایہی سی کہ قریش نال تجارتی تے اقتصادی تعلق توڑ لیا۔ اسیں فیصلے نال ایہ ہویا کہ مسلماناں دی مالی حالت بہتر ہو گئی تے قریش دی معیشت تے اک ٹکڑی سٹ وئی۔ اوہناں دی درآمد برآمد دارستانیگ ہو گیا تے قبیلیاں وچ قریش دی شہرت تے سرداری، کمزور معیشت پاروں مشکوک جہی ہو گئی تے ایوں بندیاں تے بندیاں دی خدائی، انساناں دی غلامی، ظلم و جبر تے فساد دا خاتمہ ہونا شروع ہو گیا۔ بندہ جڈاوی سیانا تے کڑو ہووے جدوں اس دی مٹی وچوں دانے مکہ جانے نیں تے فیروں دے گر ٹکے ٹوکری ہو جانے نیں۔ قریش سرداراں نال وی ہولی ہولی ایوں ای ہون لگ پئی سی۔ ہجرت دے معجزے دی اک چوکھی چیتے رکھن والی گل ایہ ہے بئی اسیں نے دین دا ستون چوکھی ڈونگھیاں تیکر کڈھ کے فتح مکہ لئی راہواں سدھیاں کیتیاں تے فیر اک دن قبلے دی دھرتی نوں شرک تے بتاں توں پاک کر دتا۔ گویا ہجرت کفر دے زوال تے اسلام دے عروج دی داستان دا مڈھلا اکھر ثابت ہويا۔ ہجرت نے مسلماناں نوں اک اجہی امت بنا دتا جہنے انساناں نوں مقدس تے سچی حیاتی داسنہا دتا۔ اک اجہی تہذیب دتی جہڑی آلائشاں توں پاک سی۔ ایسے تہذیب نوں لے کے مسلمان دنیا وچ ہر پاسے کھلر گئے تے غیر دنیا نوں ذلت وچوں کڈھ کے عزت ول تے پستی وچوں کڈھ کے بلندی ول لے گئے۔ اصل وچ ہجرت اپنے نتیجے دے اعتبار نال اوہناں چر ادھوری رہندی جتا چر اسلام اک ٹکڑی حقیقت بن کے لوکاں دے سامنے نہ آجاندا۔

اوس ویلے دنیا تے دو وڈیاں طاقتاں برسر پیکار سن۔ اک مشرق دی قوت سی جہدی نمائندگی فارس کر رہیا سی تے دوجی مغرب سی جہدا نمائندہ روم سی۔ اسلام نے ایہناں دوواں دے وچکار دھڑک دے ماری، پر اسلام ایہناں دوواں تہذیبیاں تے راضی نہ ہویا، کیوں جے فارس والے لا دینیت ول ٹرے جارہے سن تے اہل روم مغربی استعماری نظام وچ ودھے جانے سن۔ ہاں جدوں دوواں دا موازنہ کیتا گیا تے روم دی تہذیب فارس توں کچھ چنگی لگی۔ پر فیر اسلام نے

جڑاں پھڑ دیاں ای اپنی دعوت روم تے فارس دوواں تیکر اڑائی۔ فارس نے تے خیر طاقت تے تکبر پاروں سرکشی کیتی پر روم نے دعوت نوں چنگا جان دیاں ہوئیاں وی ایس دی پیروی نہیں کیتی۔ اسلام نے جدوں ایہ دیکھیا کہ ایہ دوویں کمپ اللہ توں مونہ موڑ کے کفر تے فساد وچ رجھے ہوئے نیں تے فیروہناں دوواں تے تگڑی سٹ ماری۔ ایس فیصلے دا مقصد ریاست تے قبضا کرنا بلکل نہیں سی سکوں اللہ دی راہ دکھانا مقصود سی۔ مسلماناں دی کاری ضرب نال دوواں دا لک ٹٹ گیا تے فیروہناں ایہ دیکھدیاں ایہ توں اک اچھے جسے وانگ سن جھدے وچوں روح نکل گئی ہووے۔ ذرا غور کرو! مسلمان کسے توں لک کے بچے سن۔ ہن اگر اوہناں دے دلاں وچ ایمان دی رتی بھروی تھوڑ رہ جاندی تے فیروہناں دے نظام تے رسول a دی عظمت نوں شک دی نگاہ نال دیکھدے تے ایہ وی سوچدے کہ محمد a نے تے قیصر وکسری دیاں حکومتاں دوان دے خواب دکھائے سن پر اتھے بے وی دا ایہ حال اے کہ مشرکاں نال دوہو ہون دی وی ہمت نہیں پے رہی۔ حالت ایہی کہ رسول خدا آپوں وی لک چھپ کے یثرب ول دا سفر کردے نیں۔ جے مومنناں دا ایمان کامل نہ ہوندا تے ایہ گل اوہناں نوں شک وچ پادیندی پر حتی گل تے ایہ ہے کہ اوہ لوکی اپنے اللہ، اللہ دے رسول a تے اوس دے دین اُتے پکایقین رکھدے سن تے ایہ یقین پریشانی، ناامیدی تے ناکامی وچ وی پوری طرحاں قائم رہیا۔

ہجرت توں بعد جہڑا قرآن نازل ہوئیا اوس توں صاف پتا لگدا سی کہ اک نویں دور دا مڈھ بجھ رہیا اے۔ مسلماناں دے اک مک ہون نال سفارتی تعلقات وچ جہڑا کھلار آیا تے غیر مسلمناں، یہودیوں تے عیسائیوں نال جہڑے رشتے قائم ہوئے، اوہ وی اک نویں تے سوہنے دور دی نشان دہی کردے سن۔ حکومت سازی دی لوڑ تے نظام حکومت تے غور فکر، سپاہ گری تے سپہ سالاراں دا انتخاب تے اوہناں دی تربیت، جنگ دے راہنما اصول، سفارت کاری تے سفیراں دا چناؤ تے ایہو جہیاں ہور کئی گلاں تے سوچ وچاردی لوڑ ہجرت توں بعد ای پئی۔

اسلام دے مڈھلے دور دے آگے بندیاں نے، آپس دے صلاح مشورے نال، اسلامی توارخ دا مڈھ ہجرت توں نہیا تے ایہدے وچ راز ایہو ای سی کہ بھاریں ایس دین دی توارخ وچ بڑے بڑے توارخجی دن آئے نیں پر ہجرت دے دیہاڑے نوں ایس کم لئی ایس لئی متھیا گیا کہ ایہ اوہناں سارے دناں توں وکھراتے اہم دن اے۔ رسول خدا دی پیدائش دا دن، آپ دی بعثت دا دن، عقبہ دادن، بدر تے احد دے دیہاڑے، صلح حدیبیہ، میثاق مدینہ، فتح مکہ تے حجۃ الوداع دے دیہاڑے، سارے دے سارے، اک توں اک ودھ تے یادگار نیں لیکن اپنی اہمیت تے اپنے اثر دے لحاظ نال، انسانی عقل نوں حیران کر دین والی ہجرت دادن سمجھ توں وکھرا نظر آؤندا اے۔

ہجرت، دو وکھو وکھ نظر آؤن والے عہداں دے وچ اک لکیر اے۔ ویلے نے جدوں ایس لکیر نوں ٹپیا تے فیروہناں نے لوکاں نوں اک نویں تے نویکلے رنگ وچ دیکھیا۔ ہجرت انسانیت دی بھلیائی دا وسیلہ بنی تے صدیاں دی دکھی لوکاں نوں چین آ گیا۔ بے وسیلیاں نوں وسیل مل گئے، بے وارثاں نوں وارث تے بھٹکی ہوئی آدمیت نوں سدھے راہ لہ گئے۔ کیہ رنگ ہون اج اسلامی دنیا دے جے ہجرت دے دناں دا جذبہ تے ایمان اک وار فیروہناں پیدا ہو جاوے تے۔

نبی a دی حیاتی وچ پہاڑ تے غاراں:

جے تواریخ دا غور نال مطالعہ کریئے تے پتا لگدا اے کہ چونکہ نبیاں تے رسولاں نے سکون دی تلاش تے دلاں دے اطمینان لئی پہاڑاں تے پہاڑاں دیاں کھڈاں وچ پناہ لئی۔ نبی رسول تے اپنی تھاں، عام بندیاں دا وی پہلا ٹھکانا پہاڑ تے غار ای سن تے ایوں پہاڑاں نال انسان دا ہمیشہ ای کجھ نہ کجھ تعلق رہیا اے۔ پہاڑاں نوں گٹ چھل کے اپنیاں عبادت گاہواں تے رہن بہن دے ٹھکانے بنان وچ مصر دے فرعون ایچھے طور تے مشہور ہوئے۔ اے تیکر اوہناں دیاں اوہ وڈیاں یادگارں ویکھن نوں لبھدیاں نیں جہڑیاں دنیا دے عجوبیاں وچ گنیاں جاندیاں نیں۔ قرآن پاک نے وی ایہ گواہی دتی اے کہ ”اوہ لوکی پہاڑاں نوں تراش کے رہندے سن۔“ ایوں ہندوستان تے چین دے رشی، مُنی تے اوتار وی پہاڑاں وچ وسوں کر دے تے گیان دھیان وچ مصروف رہندے۔

حضرت آدم g دی جدوں توبہ قبول ہوئی تے اماں حوا نال اوہناں دی ملاقات جبل رحمت تے ای ہوئی تے ایسے دی یادگار اوہ تھاں اے جہڑی ”عرفہ“ یاں ”معرفت“ دے ناں نال مشہور ہوئی۔ حضرت نوح دی کشتی وی ”اراراط“ پہاڑ تے جا کے کھلوتی۔ سیدنا موسیٰ نوں وی طور پہاڑ تے ای رب نال کلام تے رب دی تجلی دا شرف عطا ہوئی۔ غرض پہاڑاں دا انسان دی روحانی عظمت تے بلندی دی داستان نال چوکھا ڈونگھا تے بھرواں تعلق اے۔ قرآن پاک وچ غار والے یاراں دا ذکر بندیاں تے غاراں وچکار تواریخی تعلق دا بڑا وڈا ثبوت اے:

﴿أَمْ حَسِبْتَ أَنَّ أَصْحَابَ الْكَهْفِ وَالرَّقِيمِ كَانُوا مِنْ آيَاتِنَا عَجَبًا ۝ إِذْ أَوَى الْفِتْيَةُ إِلَى الْكَهْفِ

فَقَالُوا رَبَّنَا آتِنَا مِنْ لَدُنْكَ رَحْمَةً وَهَيِّئْ لَنَا مِنْ أَمْرِنَا رَشَدًا﴾ (الکھف: ۹-۱۰)

”کیہ تئیں ایہ خیال کر دے او کہ غار والے تے پہاڑ والے ساڈیاں نشانیاں وچوں کوئی عجیب شے سن۔ اوہ ویلا بھلن والا نہیں جدوں اوہ جوان اوس غار وچ جا کے لکے تے فیر آکھیا، اے رب! سنانوں رحمت دا سامان عطا کرتے ایس کم وچوں ساڈے لئی کوئی بھلیائی کڈھ دے۔“

خدا تعالیٰ نے غار وچ اصحاب کہف نوں اجہی نیندر سوایا کہ اج تیکر اوہ ستے ہوئے نیں۔ اوس غار وچ نہ تے کوئی جاسکدا اے تے نہ ای باہروں اصحاب کہف نوں کوئی نقصان پڑا سکدا اے۔ خدا دے عظیم پیغمبر حضرت عیسیٰ g نے وی بیت المقدس وچ پہاڑ دی اک کھڈ وچ ڈیرے لائے سن تے تبلیغ دا کم جاری رکھیا سی۔ یہودیوں نے آپ نوں سولی تے چاڑھن لئی ایہ تھوڑی سی گرفتار کیتا سی۔ فیر جدوں ہادی برحق حضرت محمد a دی واری آئی تے اودوں وی پہلی وحی اک غار وچ ای اتری۔

عرب داروشن ضمیر آقا a غار حرا دیاں تاریکیاں وچ نور دی جھلک ویکھن لگ پیا۔ اوس دے خواب سچے تے الہام کھرے ثابت ہون لگ پئے۔ بیچ ورھیاں تیکر ایہی کجھ ہوندا رہیا۔ پر آپ a دی روح ایس توں زیادا بلندیاں دی طلب رکھدی سی تے اوہ جو ہر قابل ایہ صلاحیت وی رکھدا سی کہ رب کولوں ای علم سکھے۔ ایس لئی حضور a نے اپنی حیاتی دے اکتالویں (۳۱ ویں) سال ۱۲ فروری ۶۱۰ء نوں رب کولوں اوہ منصب حاصل کر لیا جس دا اہل اوہناں توں وکھ ہو کر کوئی

نہیں سی۔ اوس برکتاں والی رات خدا دے سنیے لیاؤن والا جبرائیل دنیا دے اخیر ی پیغمبر ول رب داسنیہا اوسے غار وچ ای لے کے آیا:

﴿اِقْرَأْ بِاسْمِ رَبِّكَ الَّذِي خَلَقَ ۝ خَلَقَ الْإِنْسَانَ مِنْ عَلَقٍ ۝ اقْرَأْ وَرَبُّكَ الْأَكْرَمُ ۝ الَّذِي عَلَّمَ بِالْقَلَمِ ۝ عَلَّمَ الْإِنْسَانَ مَا لَمْ يَعْلَمْ ۝﴾ (العلق: ۱-۵)

”پڑھ اوس رب دے ناں نال چہنے انسان نوں خون دے توہڑے توں پیدا کیتا اے۔ تیرا رب چوکھے کرم کرن والا اے۔ اوہ جنے قلم نال علم سکھایا۔ انسان نوں اوہ کجھ سکھایا جہدا اوس نوں علم نہیں سی۔“

اوس توں بعد جناب جبرائیل پہاڑ تے تشریف لیاے تے نبی اکرم دے ساہمنے وضو کیتا۔ اوسے طرحاں جناب رسول خدا نے وی وضو کیتا۔ حضرت جبرائیل نے نماز پڑھائی تے دوواں مل کے پڑھی۔ ایہ سارا کجھ اک غارتوں باہر پہاڑ تے ای ہویا۔

اسلام چونکہ امن تے سلامتی دا مذہب اے۔ ایس لئی شرتے فساد توں دور رہندا اے۔ فساد دے ایسے خطرے نوں ویکھدیاں ہویاں مڈھلے دور وچ توحید تے رسالت دی تبلیغ نوں عام نہ کیتا۔ تن ورہیاں تیکر جہڑی خاموش تبلیغ ہوندی رہی اوہدے نال کوئی چالھی کو بندے بڈھیاں مسلمان ہو گئے سن۔ فیر چوتھے ورھے ایہ حکم آیا کہ چلو ہن کھل کے باہر نکلو۔ جو ای ایہ حکم آیا آپ نے قریش نال کھل کے گل کرن لئی اوہناں نوں اک تھاں تے اکٹھا کیتا۔ اوہ تھاں وی اک پہاڑ ای سی تے اوس داناں کوہ صفا سی۔ آپ a نے آکھیا بئی لوکو! دسو جے میں تہانوں ایہ آکھاں کہ ایس پہاڑ پچھوں اک نگڑا لشکر تہاڈے تے حملا کرن والا اے تے کیہ تسیں میری گل دا یقین کر لوؤ گے۔ سبھ نے سنجھی اواز نال آکھیا کہ نہ یقین کرن والی وجہ تے کوئی نہیں۔ اسیں تہانوں ہمیش سچ بولدیاں ای ویکھیا اے۔ آپ نے آکھیا ”تے فیر گل ایہ ہے کہ اللہ اک اے، اوہدے توں وکھ کسے دی عبادت جائز نہیں۔ میں اوس دار رسول ہاں تے جے تسیں ایگل نہ مٹی تے تہاڈے تے سخت عذاب نازل ہووے گا۔“

تھوڑے مٹے لوکی مذاق اڈاندے رہے تے گستاخیاں کردے رہے پر اللہ دانہی a تے اوس دے عاشق اپنا کم کر دے رہے۔ ابو جہل، ابولہب تے عقبہ بن ابی معیط ورگے بندیاں نے ظلم والی اخیر کر چھڈی۔ ایقہوں تیکر بئی جے مسلمان آزادی نال اپنے اللہ دی عبادت کرن لئی حبشہ ول گئے تے کافر سرداراں نے اوہ تھے وی مگر بندے ٹور دتے، تاں جے مسلماناں نوں گرفتار کر کے پچھانہ لیاندا جائے تے اک وار فیر اوہناں تے ظلم دے پہاڑ توڑے جان۔

ہجرتاں دا ایہی سلسلا سی جہدے وچ اک وار فیر اک غار نال واسطیہ۔ ہویا ایس طرحاں کہ جدوں مکہ چھڈ کے یثرب ول ہجرت کرن دا حکم ربی آیا تے آپ a نے چوکھی چھیتی نال تیاری کیتی۔ حضرت علی کرم اللہ وجہہ نوں آکھیا کہ تسیں لوکاں دیاں امانتاں موڑن لئی پچھے رہ جاؤ تے نالے میرے بسترے تے لے پے رہنا۔ دشمنان نوں وی حضور a دی ہجرت کرن دے ارادے دی خبر ہو چکی سی۔ اوہناں آپ a دے گھرنوں چار پھیریوں گھیر لیا تے اک دو جے نوں آکھن لگے کہ جوانو! اج محمد (a) بچ کے نہ جائے۔ کوئی ادھی رات ویلے آپ a سورہ یسین پڑھدے ہوئے باہر

نکلے تے بنا کسے روک ٹوک دے کافراں دے وچوں نکل کے جناب ابوبکر b دے گھرا پڑ گئے۔ چھیتی چھیتی سفر داساماں تیار کیتا تے فیر دوویں یار ثور دی پہاڑی ول ٹر پئے۔ ثور مکے دے نیڑے اک اجہی پہاڑی اے جہدی اچیاں بہت زیادا اے تے راہ وی چوکھا پتھر یلا اے۔

نوکیلے پتھراں تے ای سفر کردے محبوب خدا a تے محبوب رسول واہوا اچیاں تیکر اپڑ گئے۔ پہاڑ اُتے اپنے لئی جہیڑی پناہ گاہ لکھی اوہ وی اک غار سی۔ حضرت ابوبکر b نے حضور a نوں غار دے باہر کھلاریا تے آپوں اندر چلے گئے۔ غار نوں صاف کیتا تے اپنے تن دے لیڑے پاڑ پاڑ کے کھڈاں نوں بند کیتا۔ کپڑا مک گیا پر اک کھڈ بند ہون توں رہ گئی۔ اوہدے وچ اپنے پیر دا انگوٹھا پھسا دتا تے فیر باہر اواز لائی کہ ”یا رسول اللہ! اندر تشریف لے آؤ۔“ حضور a نے جناب ابوبکر b دیاں لتاں تے سر رکھ کے کچھ چر آرام کیتا۔ ایسے آرام دے ویلے اک سب نے اوں کھڈ وچوں جناب ابوبکر b دے انگوٹھے تے ڈنگ ماریا جہدے وچ آپ نے انگوٹھا دتا ہو یا سی۔ سب دے زہر پاروں حضرت ابوبکر نے چوکی تکلیف محسوس کیتی تے آپ دی ایس بے چینی دی وجہ توں حضور نبی اکرم a دی جاگ گئے۔ حضور a نے ڈنگ والی تھان تے اپنا لعاب دہن لایا تے جناب ابوبکر دی تکلیف جاندی رہی۔ پر اوس زہر دا اثر ساری حیاتی جناب ابو بکر صدیق b دے نال رہیا۔ ورھے دے ورھے اوہدا اثر ظاہر ہوندا رہیا تے اک روایت موجب ایسے زہر تھوں ای آپ اللہ نوں پیارے ہوئے سن۔

دو بجے پاسے حضرت علی نوں مارن کٹن توں بعد ابو جہل تے اوس دا ٹولا جناب ابوبکر b دے گھر جا بچیا سی۔ او تھے جناب اسماء بنت ابوبکر دے چہرے مبارک تے بد بخت ابو جہل نے اجہی زور دی چپھڑ ماری کہ آپ دی کن دی والی دور جا ڈگی۔ فیر اوہ کھوج لاندے لاندے غار ثور دے مونہ تیکر جا بچے تے او تھے ایوں جا کھلو تے کہ جے اوہناں وچوں کوئی جھک کے ویکھداتے آسانی نال دوواں یاراں نوں اندر پیٹھیاں ویکھ لیندا۔ یار غار تے اندروں ہل گئے تے ہولی جہی حضور a نوں آکھیا کہ حضور دشمن سر تے آچڑھیا اے۔ جدوں صدیق b دی بے اطمینانی تے پریشانی چوکی ودھ گئی تے حضور a نے فرمایا کہ صدیق غم نہ کر، اللہ ساڈے نال اے۔ قرآن ایس واقعے دا ذکر ایوں کردا اے:

﴿إِلَّا تَنْصُرُوهُ فَقَدْ نَصَرَهُ اللَّهُ إِذْ أَخْرَجَهُ الَّذِينَ كَفَرُوا ثَانِيَ اثْنَيْنِ إِذْ هُمَا فِي الْغَارِ إِذْ يَقُولُ

لِصَاحِبِهِ لَا تَخْزَنْ إِنَّ اللَّهَ مَعَنَا﴾ (التوبة: ۴۰)

ایہو جے اوکھے ویلے ایوں دا اطمینان صرف نبیاں دا ای شیوا اے۔ جرأت تے بہادری کچھ ہو رگل اے تے قلب دا اطمینان اک دو جی گل۔ رسول خدا a تے صدیق اکبر نوں اللہ تے بھروسہ سی۔ ایسے بھروسے پاروں اوہ غار وچ چپ کر کے بیٹھے رہے۔ بچان والے دے ڈھنگ وی نیارے نیں۔ دشمن ایدھر او دھر ویکھ کے ٹر گئے، اوہناں نوں ایہہ عقل نہ آئی کہ ایس انھیر ی جہی تے تنگ جہی غار دے اندر وی دو بندے لک کے بہ سکہے نیں۔ دوویں عظیم ہستیاں تن دن ایس غار وچ رہیاں۔ رات دے انھیرے وچ اسماء گھروں روٹی دے جان دیاں۔ عبد اللہ بن ابوبکر انٹیلی جنس بیورو دا کم کردے رہے تے مکے دی پوری رپورٹ رات نوں دے جاندے۔ عامر بن فہیرہ جہڑے حضرت ابوبکر دے غلام سن تے بکریاں دے آجڑی

سن اوہ رات نوں بکریاں لے آؤندے تاں جے اپنی لوڑ جنا دودھ پی یاں رکھ لیا جاوے۔ ایس دا اک فائدہ ایہ وی ہوند اسی کہ بکریاں دے کھراں نال اسماء تے عبد اللہ دے پیراں دے نشان مٹ جاندا سن۔ چوتھے دیہاڑے دوویں یار غارتوں باہر نکلے۔ حضرت اسماء کھانا لے کے اپڑ گئیاں، حضرت ابو بکر b دے غلام اوٹھنیاں لے کے حاضر ہو گئے تے ایہ قافلا اپنے دودو جے ساتھیاں نال یثرب ول ٹر پیا۔

ثور پہاڑ دی اوس غار دے چنگے بھاگ کہ او تھے کجھ چرنی رحمت نے ڈیرے لائے تے ایوں اوس غار دا ناں ہمیش لئی توارخ دا حصا بن گیا۔



رسالت محمدی a عقل دی کسوٹی اُتے

برطانوی آئین دے استناد دی حیثیت نال لاء کالج وچ لیکچر دیندیاں مینوں ایہ گل کثرت نال دہرائی پیندی سی کہ King can do no wrong (بادشاہ توں غلطی نہیں ہوندی) جد کہ بادشاہ یاں ملکہ برطانیہ دی انسان نیں تے آدم دی اولاد نیں۔ اک دن میرے اک پڑھیار نے پچھیا: ”کیہ سچی مچی برطانیہ دے بادشاہ غلطی نہیں کر دے؟ ایہ شیوا تے صرف پیغمبراں دا اے۔ سر! اج کجھ ویرا کر کے دسو۔“ اج جدوں رسالت محمدی a نوں عقل دی کسوٹی اُتے پرکھن بیٹھا ہاں تے کئی ورھے پہلوں دا مینوں ایہ سوال فیر چیتے آ گیا اے۔ اصل وچ گل ایہ ہے کہ برطانوی قوم دا ایمان تے عقیدہ اوہناں دی اپنے بادشاہ نال بھروسہ و محبت دا نتیجہ اے۔ اوہ ایہ سمجھدے نیں کہ بادشاہت اوہناں دی قوم دی وحدت، اک نگرے مرکز تے اک ڈونگھے گڈھے ہوئے گلے دی علامت اے۔ ایس لئی جو بادشاہ آکھ دیوے گا۔ اوس نوں سچ تے ٹھیک من لین وچ ای بھلیائی اے بھائی ویں ویکھن نوں اوہ گل غلط ای ہووے۔ ایس نظرے نوں انگریز ایوں آکھدے نیں کہ King can do no wrong۔

ساڈا مسلماناں دا عقیدہ ایہ ہے کہ ”Prophet can do no wrong“ (نبی توں غلطی نہیں ہوندی) جہڑا کم نبی دے ہتھوں ہو گیا اے، اوہ غلط نہیں تے یاں جہدے کولوں ہو گیا اے اوہ نبی نہیں۔ ایس گل نوں اسیں انج دی آکھ سکدے ہاں کہ جہدے کولوں کدے کوئی غلطی نہیں ہوئی اوہ نبی اے۔ آؤ ایس تمہید دی روشنی وچ پیرا گے پیسے تے دیکھیے کہ کیہ محمد a رسول اللہ دے اعلان نبوت توں پہلاں دی چالھی ورہیاں دی حیاتی کوں غلطیاں توں پاک اے (اگلے ۲۳ ورہیاں دا ذکر میں ایس لئی نہیں کیتا کہ اوس دی ذمہ داری رب نے لئی اے) تے صاف آکھیا اے کہ:

﴿وَمَا يَنْطِقُ عَنِ الْهَوَىٰ ۖ إِنْ هُوَ إِلَّا وَحْيٌ يُوحَىٰ﴾ (النجم: ۳ تا ۴)

”(اوہ اپنی من مرضی نال کوئی گلاں نہیں بناندے۔ اوہناں دا بولنا تے نری وحی اے جہڑی اوہناں ول گھلی جاندی اے۔“)

ایہ یقین دوان توں بعد کہ نبی اپنے کولوں کجھ نہیں کہندے، سانوں ایہ ہدایت کیتی گئی اے کہ جے خیر چاہندے اوتے بس اوہ رسول خدا دی پیروی وچ ای جے۔ حکم دتا:

﴿وَاطِيعُوا الرَّسُولَ لَعَلَّكُمْ تُرْحَمُونَ﴾ (النور: ۵۶)

”(تے رسول a دی اطاعت کرو تاں جے تہاڈے تے مہربانیاں کیتیاں جان۔“)

گل ایہ ہو رہی سی کہ بعثت توں پہلاں دی حیاتی کوں غلطیاں توں پاک اے؟

۴۰ ورہیاں دی ایس حیاتی دا اک اک پل کے دے وسینکاں دے ساہمنے سی۔ آپ a اوہناں دے شہر وچ پیدا ہوئے، بچپنا اوہتے گزریا، جوان اوہتے ہوئے، ویاہ اوہتے کیتا، ادھیڑ عمر نوں اوہتے تیجے، ملن ورتن اوہتے رہیا، حجر اسود آپ a کولوں لوایا گیا، امانتاں آپ کول رکھیاں گئیاں، امین تے صدیق آپ نوں آکھیا گیا۔ غرض ہر طرحاں دا معاشرتی تعلق اوہناں لوکاں نال رہیا۔ آپ دی زندگی دا کوئی اک وی پہلو کے دی لوکاں کولوں نہیں لکھیا سی۔ فیر کوئی مائی دا لال اپنا پورا ٹل لا کے وی ایہ ثابت کر سکیا اے کہ محمد a کسے توں ادھار لے کے واپس نہ کیتا ہووے؟ اوہ مال تجارت لے کے گئے تے خدیجیاں کسے دوجے تاجریاں بیوپاری نوں کوئی شکایت ہوئی ہووے؟ اوہناں کول کوئی امانت رکھی گئی تے اوس امانت وچ خیانت ہوئی ہووے؟ اوہناں کوئی وعدا کیتا پر توڑ نہ چاڑھیا ہووے؟ اوہناں کدے کوئی جھوٹھ بولیا ہووے؟ اوہناں نوں کدے لہو و لعب وچ رچھے ہوئے ویکھیا ہووے؟ اوہناں نوں کدے ننگے پنڈے ویکھیا گیا ہووے؟ ایہناں ساریاں سوالاں دا کو جواب اے کہ نہیں، نہیں، نہیں۔ فیر ایہ گمان کرن دی گنجائش کیہ باقی رہ جاندی اے کہ ایہو جہیا عظیم انسان نبی تے نہ ہووے پر آنکھی جاوے کہ لوکو! میں نبی آں، میں اللہ دا رسول آں۔ عقل نہیں من دی کہ ایوں دا بند اس طرح دا دھوکا دیوے۔

اک ہور چوکھا ضروری سوال ساہمنے آؤندا اے کہ لوکاں نے پہلاں خدا نوں منیا سی کہ اوس دے رسول نوں؟ تے نالے جہڑا کلام محمد a نے لوکاں تیکر اپڑایا، جے کے وچ ابو جہل، ابولہب یاں مغیرہ، تے مدینے وچ عبداللہ بن ابی لوکاں نوں سناؤندے تے لوکاں ایوں ای من جاندی؟ تواریخ پوری طاقت نال ایہ شہادت دیندی اے کہ پہلوں سید عربی a دے اگے لوکاں دے دل جھکے تے فیر اوس توں بعد اوہناں دے سراں نوں خدائے واحد دے اگے جھکنا نصیب ہو یا۔ من والیاں نے پہلوں رسالت محمد a دا اقرار کیتا تے فیر توحید الہی دی شہادت دینا نصیب ہو یا۔ ہن ایہ گل من لین پوے گی کہ پہلوں پہلوں جہناں لوکاں رسالت دا اقرار کیتا، حق دی شناخت لئی سوائے عقل توں اوہناں کول کوئی دوجی کسوٹی نہیں سی۔ فیر جدوں عقل نے محمد a دی سچائی دا فیصلہ دے دتا تے فیر گل مک گئی۔ فیر جہڑا اکھر رسول خدا دی زبان مبارک توں نکلیا اوس نوں عقل دی تکرری تے نہیں تولیا۔ بس گج وچ کے آکھ دتا کہ سچ اے تے بلکل سچ اے۔ بھادیں ایہ نویکلی گل کیوں نہ آکھ دتی ہووے کہ ”میں راتیں اسماناں دی سیر کر کے آیا ہاں۔“ بس جے محمد a نے آکھیا تے فیر سچ اے۔

النبی الامی:

رسالت محمدی a عقل دی کسوٹی اُتے پرکھدیاں ایہ گل چوکھی بھاری دسدی اے کہ محمد a نہ لکھ سکدے سن تے نہ پڑھ سکدے سن۔ قرآن آکھدا اے:

﴿وَمَا كُنْتَ تَتْلُوا مِنْ قَبْلِهِ مِنْ كِتَابٍ وَلَا تَخُطُّهُ بِيَمِينِكَ إِذَا لَارْتَابَ الْمُبْطِلُونَ ۝ بَلْ هُوَ آيَاتٌ بَيِّنَاتٌ فِي صُدُورِ الَّذِينَ أُوتُوا الْعِلْمَ وَمَا يَجْحَدُ بِآيَاتِنَا إِلَّا الظَّالِمُونَ﴾

(العنکبوت: ۴۸، ۴۹)

”اے نبی! تسیں ایس توں پہلوں کوئی کتاب نہیں سی پڑھدے تے نہ اپنے ہتھ نال کجھ لکھدے سی۔ جے

ایوں ہونداتے باطل دے پجاری لوکی شک وچ پے سکدے سن۔ اصل وچ ایہ روشن نشانیاں نیں اوہناں لوکاں دے دلاں وچ جہناں نوں علم بخشیا گیا اے۔“

ایہ گل آکھ تے قرآن ای رہیا اے پر جے کوئی ایس نوں عقل دی تکڑی تے تولنا چاہوے تے سوواری تولے کہ آسمانی کتاباں دی تعلیم، پرانے نبیاں دے حالات، وکھو وکھ مذہباں دے عقیدے، پرانیاں قوماں دی تواریخ تے اوہناں دا کلچر کوئی ایہو جیہا بند نہیں دس سکد اجہڑا لکھنا پڑھنا نہ جان دا ہووے، جے دس سکد اے تے کوئی پیغمبر ای۔ اک امی دا قرآن جیہی کتاب پیش کرنا تے اچن چیت ایہی جے وکھرے تے نویکے کماں دا مظاہر کرنا جہناں دی تیاری کردیاں گئے دنوں وچ کسے نہ دیکھیا ہووے، عقل والیاں دی نگاہ وچ پیغمبری دی چوکی وڈی دلیل اے۔ دنیا دیاں وڈیاں وڈیاں ہستیاں وچ جیہیں کسے دی حیاتی تے وی جھاتی پائی جاوے، بند اوس دے ماحول توں اندازا کر لیند اے کہ اوس کولوں ایس عظیم بندے نوں کیہ کیا ملیا ہووے گا تے اوس دی شخصیت بناؤن وچ اوس ماحول نے کیہ کردار ادا کیتا ہووے گا۔ محمد رسول اللہ a دی پاک حیاتی وچ جیہڑے حیران کردین والے کم کار دس دے نیں، اوس دی کوئی چھوٹی توں چھوٹی جھلک وی آپ دے معاشرے یاں ماحول وچوں نہیں لہدی۔ ایہی حقیقت اے جہدی وجہ توں فرمایا گیا کہ محمد a دی ذات اک نشانی نہیں سگوں بہت ساریاں روشن نشانیاں دا اک سوہنا اکھ اے۔ جاہل بندیاں نوں کوئی نشانی نظر نہیں آؤندی تے نہ آوے پر جہڑے لوکی علم رکھن والے نیں اوہ اوہناں نشانیاں نوں دیکھ کے اپنے دلاں وچ قائل ہو گئے نیں کہ ایہ شان اک پیغمبر دی ہی ہو سکدی اے۔

﴿وَقَالُوا لَوْ لَا أُنْزِلَ عَلَيْهِ آيَاتٌ مِّن رَّبِّهِ قُلْ إِنَّمَا الْآيَاتُ عِندَ اللَّهِ وَإِنَّمَا أَنَا نَذِيرٌ مُّبِينٌ ۝ أَوَلَمْ يَكْفِهِمْ أَنَّا أَنْزَلْنَا عَلَيْكَ الْكِتَابَ يُتْلَىٰ عَلَيْهِمْ إِنَّ فِي ذَلِكَ لَرَحْمَةً وَذِكْرَىٰ لِقَوْمٍ يُؤْمِنُونَ﴾ (العنکبوت: ۵۰-۵۱)

” (ایہ لوک آکھدے نیں کہ اوہدے اتے اوہدے رب ولوں نشانیاں (معجزے) کیوں نہیں اتاریاں گئیاں۔ تسبیں فرما دیو کہ نشانیاں تے اللہ کول نیں تے میں تے خبردار کرن والا ہاں گلاں کھول کھول کے۔ تے کیہ اوہناں لوکاں لئی ایہ نشانی کافی نہیں کہ اسیں تہاڈے تے کتاب نازل کیتی جہڑی ایہناں نوں پڑھ کے سنائی جاندی اے۔ ایہدے وچ رحمت تے نصیحت اے اوہناں لوکاں لئی جہڑے ایمان لیائے نیں۔“

اللہ فرماندا اے کہ امی ہون دے باوجود تہاڈے تے قرآن جہی کتاب دا نازل ہونا کیہ آپوں اک وڈا معجزہ نہیں کہ تہاڈی رسالت تے یقین کر لیندے۔ کیہ ایس توں بعد کسے معجزے دی ضرورت باقی رہ جاندی اے؟ ایہ تے اوہ معجزہ اے جہڑا ہر ویلے تہاڈے ساہمنے رہندا اے تے نالے تہانوں پڑھ پڑھ کے سنایا جاندا اے۔

النبي الاسطى ایہ معجزہ یعنی قرآن اپنی زبان، اپنی تاثیر، اپنے مفہوم تے اپنی ہمگئی دے لحاظ نال اج تیکر بے مثال دس دا اے۔ اج رنگ رنگ دیاں لکھاں کتاباں نال یونیورسٹیاں تے لائبریریاں بھریاں پئیاں نیں۔ کئی امریکا دی کانگریس لائبریری پوری دنیا دے علماں دا احاطہ کرن لئی بھیری اے پرسید خورشید احمد گیلانی مرحوم دے آکھن موجب اصل مسئلہ

سائنسی جان کاریاں، وڈے وڈے موجدوں، کئی کئی منزلاں دیاں عمارتاں اسارن والے سیانیاں، خطیباں، ڈاکٹراں یاں انجینئراں دا نہیں سگوں چنگے انساناں دا اے جہڑے انسانیت دا بھرم رکھ سکے۔ ایوں دے انساناں دی کھپ کسے یونیورسٹی یاں کسے لائبریری وچوں نکلی نہیں دسدی۔ ایس دے مقابلے تے اک قرآن، اُمّی نبی اُتے نازل ہون والی رب دی کتاب، نے اوہ اوہ ہیرے تے جواہر دنیا نوں بخشے کہ اوہناں دے صدقے نال آدمیت دیاں صدیاں دیاں سیاہیاں دھل گئیاں تے دنیا دا مکھڑ اسوہنا جاپن لگ پیا، اک واری فیر۔

اج دیاں کتاباں، تے سارے جدید علم انساناں نوں صرف ایس پاروں انسانیت نہیں دے سکے کہ اج دیاں انساناں نے اپنیاں یونیورسٹیاں تے لائبریریاں وچوں قرآن نوں دلیں نکال دے دتا اے۔ تاں ہی تے ہن صداقت کسے ابوبکر b نوں ترسدی اے، عدالت کسے عمر فاروق b دیاں راہواں لوڑ دی اے، حیا کسے عثمان b نوں اڈیکدی اے تے حکمت و شجاعت کسے علی المرتضیٰ دے خواب ویکھدی اے۔ ایثار تے استقامت کسے حبشی b بلال دیاں سدھراں رکھدے نیں۔ فقر کسے ابوذر غفاری نوں اڈیاں چک چک تک رہیا اے، عفت و عصمت جھولی چک چک کے دعاواں دیندی اے فاطمہ الزہرہ c نوں تے صبر و وفا دی روح تڑپدی اے سیدہ زینب c واسطے، کہ خورے کدھرے سکھ تے شانتی لھے۔

ایہناں عظیم ہستیاں دی پاک حیاتی دا سرمایہ کیسی؟ بناشبہ اک کتاب تے اک صاحب کتاب، اک قرآن تے دو جا محمد رسول اللہ a۔ تعجب دی گل ایہ ہے کہ قرآن اوہی، اوہدے سپاریاں دی تعداد اوہی، رکوع، منزلاں، تے آیتیاں اوہی پراثر اوہ نہیں۔ ایس لئی کہ چہرے بشرے اوہ نہیں، بندے اوہ نہیں، نیت اوہ نہیں، جذبا اوہ نہیں تے ظاہرے فیہ قصور قرآن دا نہیں اوہدے پڑھن والیاں دا اے، جہناں نے ایس نوں کتاب ثواب تے سمجھیا اے پر ایس نوں انقلاب دے صحیفے موجب نہ تے ویکھیا اے تے نہ ای پرکھیا اے۔

ایس صاحب کتاب، نبی امیٰ دا معجزہ قرآن حکیم دنیا تے سبھ توں چوکی پڑھی جان والی کتاب اے۔ ایس گل دی گواہی، اج دے انسائیکلو پیڈیا تے جدید تحقیق وی دیندے نیں۔ دنیا تے ایس ویلے گھٹ گھٹ پنج ہزار دے نیڑے تیرے بولیاں بول چال تے لکھن پڑھن لئی ورتیاں جاندیاں نیں۔ ایہناں وچوں کسے وی بولی وچ کوئی وی کتاب پڑھن، حفظ یا حفاظت وچ ایس دا پاسکووی ثابت نہیں ہو سکی۔ ایہہ اعزاز صرف قرآن نوں حاصل اے کہ ایس نوں رہندی دنیا تیکر وار وار پڑھیا جاوے گا تے اتی وار پڑھیا جاوے گا کہ گنتی دی حد مک جاوے گی۔ علم الاعداد عاجز آ جاوے گا پر ایس دی تلاوت نال انساناں دا رجھ نہیں ہونا تے زباناں تے دلاں نے ایس نوں پڑھ پڑھ کے تھکنا اے نہ رکنا اے۔

نبی امیٰ دے ایس معجزے دی دوجی وڈی خوبی ایہ ہے کہ زمانے دیاں گردشیں دے باوجود ایس وچ کوئی تبدیلی نہیں آئی تے ایس وچ کسے کمی یاں اضافے دا شائبہ تک نہیں کیتا جاسکدا۔ رب نے ایس نوں لکھاں دلاں دے وچ ایوں محفوظ کر چھڈیا اے کہ ایس دی کسے زبرنوں زیر بنان دی جرأت کرنا تے دور دی گل، کوئی مائی دالال ایوں سوچ وی نہیں سکدا۔ کیوں جے ایس دی حفاظت دی ذمے واری آپوں رب نے لئی اے۔

قرآن ای دنیا دی واحد کتاب اے جہڑی نری حکماں، قانوناں، وعظاں تے نصیحتاں دا مجموعہ نہیں سگوں ایس دی بنیاد

اُتے اک پورا نظام اساریا لکھدا اے۔ کیہ سیاست، کیہ معیشت، کیہ تمدن تے کیہ معاشرت، پورے دا پورا نظام لکھدا اے۔ تے ایس نظام نے آدمیت تے اچھے اثرات چھڈے نیں جہڑے کسے دوجی کتاب وچ نہیں دسدے۔ عرب دے وگڑے ہوئے لوکی، جہڑے جوا، شراب، قتل، زنا تے چوری جے جرم ماں نوں جرم ای نہیں سن سمجھدے اچن چیت ایوں پارسا، پرہیزگار، خدا ترس تے نیکو کار بن گئے کہ عقل حیران رہ جاندی اے۔ شترباں جہان بان بن گئے تے صحرا تے کوہستان تہذیب تے تمدن تے علم و ادب دے گڑھ بن گئے۔ ایہناں گلاں توں نہ تے تواریخ نے کدھرے انکار کیتا اے تے نہ ای انکار کرن دی کوئی وجہ یاں گنجائش نظر آؤندی اے۔

ایڈی عظیم کتاب ہووے تے صاحب کتاب بظاہر اُٹمی ہووے، ایہ ہونہیں سکدا۔ تے جے ہو گیا اے تے صرف ایس پاروں ہو گیا اے کہ صاحب کتاب نبی اے سگوں نبیاں دا سردار a اے تے ایہ کلام اوس دا نہیں اوس دے خالق تے معبود، رب دو جہاں دا اے۔

بعثت توں پہلاں دی ۴۰ ورہیاں دی وحی آپ دے کسے سچن متر، کسے چاچے تائے، کسے رشتے داریاں کسے آٹھھی گوانڈھی نے آپ a دیاں گلاں باتاں، آپ دے کماں کاراں یاں آپ دے بہین اٹھن توں کوئی اجہی گل محسوس نہیں کیتی جس نوں اوس عظیم الشان دعوت دی تمہید آکھیا جاسکے جہڑی یکدم آپ a نے ۴۰ ورہیاں دی عمر وچ جا کے دینی شروع کیتی۔ ایہ ایس گل دا انگڑا ثبوت اے کہ قرآن آپ دے دماغ دی سوچ نہیں جو یں کہ قرآن آپوں آکھدا اے۔ ایہی وجہ اے کہ جدوں مکے دے چالاک لوکاں نے ایہ محسوس کیتا کہ ایس الزام نال گل نہیں بن دی تے اوہناں نے ایہ آکھنا شروع کر دتا کہ کوئی ہو رہا اے جہڑا محمد a نوں ایہ گلاں سکھاندا اے۔ پر ایہ دوجی گل پہلی نالوں وی چوکی بے وقوفی دی سی، کیوں جے مکہ تے اک پاسے پورے عرب وچ اودوں کوئی اک بندہ وی اجہیا نظر نہیں سی آؤندا جیس تے انگل رکھ کے آکھ دتا جاندا کہ ایہ بندہ اچھے کلام دا خالق ہو سکدا اے ۱۰۰ فیور کیہ اجہی سیانف تے قابلیت دا بندہ کسے سوسائٹی وچ لکھیا رہی سکدا اے۔؟

دراصل کافر نہ تے اوہناں معقول گلاں ول کوئی توجہ دیندے سن جہڑیاں قرآن وچ بیان کیتیاں جا رہیاں سن۔ نہ ای اوہ ایہ گل سوچدے سن کہ ایہ گلاں ساڈے تیکر اپڑان والا بندہ کس پائے دا اے۔ اوہ ایس گل دا وی دھیان نہیں سن کردے کہ جہڑی بکواس اوہ لوکی کر رہے نیں جدوں اوس نوں عقل دی ٹکڑی تے تولیا جاوے گا تے نتیجا کیہ نکلے گا؟ ظاہر ہے جے کوئی دو جا بندہ در پردہ پڑھان سکھان والا ہوندا تے اوہ حضرت خدیجہ c، حضرت ابوبکر b، حضرت علی b، جناب زید بن حارث b تے دوجے مڈھلے مسلماناں توں کوں لکھیا رہ سکدا اسی جہناں توں ودھ کے ہو رہی وی جناب رسول خدا دے نیڑے نہیں سی۔ حتیٰ گل تے ایہ ہے کہ ایہی لوک حضور دی مخالفت وچ سمجھ توں آگے اگے ہوندے۔ ۱۱

استقامتِ نبی a:

جناب محمد a دی ذات تے گل بات کر دیاں ایس چیز نوں سامنے رکھیا جاوے کہ جس ماحول تے جس معاشرت

وچ آپ نے اکھ کھولی تے جتھے آپ نے جوانی گزاری اوہ مادر پدر آزاد سی۔ کچھ پچھ پر تیت نہیں سی، جہدا جودل کر داسی اوہ کر چھڈ داسی تے فیراوس طرحاں دے معاشرے وچ تے نبوت محمدی a لئی کسے دوجی عقلی دلیل دی لوڑ ای نہیں رہندی۔ کیوں جے اوس معاشرے وچ یاں تے نبی، پاک حیاتی گزار سکد اسی یاں نبی دا کوئی تربیت یافتہ بندہ۔

جویں دے دکھ، مسئلے تے اوکڑاں جناب محمد a دے حصے آئے اوہناں وچ چوکھے تگڑے تے پکے پیڈھے بندے وی گھبرا جانداں نیں۔ ذرا غور کر ویئیتی جیہی کہ باپ دی شکل وی نہیں سی دیکھی۔ تھوڑے ای چراں پچھوں امی ہوری وی چلانا کر گئے۔ دادے نے یتیم پوترے دے سر تے ہتھ رکھیا پر کتنا کوچر! قدرت نے کئی وار الیں ہستی دے وارث تے سر پرست بدلے۔ فیر ہوش سنبھالی تے چاچے ابوطالب نوں پرھے پنچاوت دے دا بے، شعب ابوطالب دا محاصرہ، طائف دی سنگ باری، راہواں دے کنڈے، گندیاں او جھڑیاں دا پاک جسے اُتے بھار، گل وچ چادر پاکے اوس نوں وٹ دینا، سر مبارک اُتے کوڑا کرکٹ سٹنا، تے غرض ایوں دیاں کئی التاں تے شوہد پُنا محمد a دے صبر، حوصلے تے استقامت وچ کوئی گھانا نہیں کر سکے۔

غور کرو چاچے تائے کیہ کر دے رہے۔ جناب حمزہ نوں کوئی پرواہ نہیں سی، عبدالعزیٰ نے اخیر کر چھڈی تے ابولہب بن گیا۔ ایناں حدوں ٹپ گیا کہ سوہنے رب نے اوس دی حیاتی وچ ای اوس نوں اپنا غصا دکھایا تے سورہ لہب نازل فرمائی۔ جناب ابوطالب وڈے محسن تے سر پرست سن۔ بڑا آسرا سی اوہناں دا جناب محمد a نوں، پرواہناں ولوں وی آسرا الیں پاروں سی کہ اوہناں دے والد جناب عبدالمطلب اوہناں نوں محمد a دی کنڈ تے ہتھ رکھن دی وصیت کر گئے سن نہ کہ اوہ تعلق نبوت یاں کسے اصول پاروں سی۔ جدوں قریش نے بازیگاٹ کیئے، پرھے نے کھانا پانی بند کیتا، پنچاں نے دا بے لائے، اپنیاں کنڈ کر لئی، بیگنیاں اکھاں کڈھیاں تے جناب ابوطالب وی آکھن تے مجبور ہو گئے۔ ”بھتیجا! لا تحملنی ما لا اطیق“ (میرے تے ایناں بھار نہ لد جہڑا میں چک نہ سکاں)

قریشیاں نوں پتا لگاتے چوکھے راضی ہوئے۔ چائیں چائیں اک دوجے نوں دس دے رہے ”لے بھئی! ابوطالب وی محمد نوں چھڈ گیا جے۔ لے بھئی! اوس نوں پچھو، ہن اوہ کتھے جاوے گا“ بڑے راضی ہوئے تے، بڑے چاء چڑھے۔ کسے سیانے نے دیکھ کے آکھیا ”تہانوں آکھیا سی نا ایہ کم کرو گے تے بچو گے، دیکھ لو میری سیانف ای تہاڈے کم آئی اے“ دوجے آکھیا ”پر کوئی تھوہ پتا وی کیتا جے کہ محمد a اپنے ارادیاں تے کماں توں باز وی آیا اے کہ نہیں؟“

باہروں اک پکی پیڈھی عمر داسیانہا بند اٹریا آؤندا اے۔ تے آکھدا اے ”بھئی سجنو! تہانوں کسے پوری گل نہیں سنائی۔“

”تے فیرتیں سنا دیو چاچا جی“ کسے آکھیا۔

”کیہ تہانوں پتا لگا اے کہ محمد نے ابوطالب نوں کیہ جواب دتا اے؟“ چاچے ہوراں پچھیا۔

”سردار! بھارتاں نہ پا۔ چھیتی نال گل اگے ٹور“ اک دوجے بندے آکھیا۔

”تے فیرسن لوو کہ محمد (a) اپنی تھان توں وال جتا وی نہیں جے سر کیا۔ اوہ اک بھاری چٹان وانگ اپنی تھان

تے کھلوتا اے تے پیڑھے پیریں کھلوتا اے۔ اوس نے صاف صاف آکھ دتا اے کہ چاچا! رب دی سونہ جے ایہ لوکی میرے بچے ہتھ تے سورج تے کھجے ہتھ تے چن وی ایس لئی لیا رکھن کہ میں ایہ کم چھڈ دیاں تے ایہ نہیں جے ہونا۔“

”سردار! اگے بول اگے، چھیتی کر، توں تے ساری کیتی کترائی تے پانی پاچھڈ یا اے۔“

”اوس ایہ وی آکھیا کہ یاں تے اوہ مر جاوے گا یاں مار دتا جاوے پر کم ادھ وچ نہیں چھڈنا۔“

اوس مجلس وچ ہو روئی بھیریاں گلاں ہوئیاں ہون گئیاں جہناں نال سانوں غرض نہیں۔ سوال نرا ایہ وے کہ کیہ کوئی

عام آدمی اجہی استقامت والا ہوسکدا اے؟

جناب رسول خدا a دی استقامت توں گل یاد آؤندی اے کہ اک واری آپ a دی کنپٹی تے کجھ چٹے وال ویکھ کے حضرت ابوبکر b نے عرض کیتی ”یا رسول اللہ! بڈھے ہو گئے او“ رسول اللہ نے جواب وچ ارشاد فرمایا ”ابوبکر! ہاں سورت ہود نے بڈھیاں کر چھڈ یا اے۔“ چو کھے علماء دا ایہ خیال اے کہ سورہ ہود وچ بڈھے کر چھڈن ولی جہڑی گل ول آپ نے اشارہ فرمایا اے اوہ رب ولوں امر استقامت ای ہے۔

صحابہ دی استقامت:

نبی آخری الزماں a دے نال نال آپ a دے عظیم الشان صحابہ دی استقامت وی رسالت محمدی دی زبردست عقلی دلیل اے۔ استقامت دے جس اعلیٰ درجے تے اصحاب رسول نظر آؤندے نیں اوہ کپکے یقین تے اعتماد بنا ممکن نہیں۔

محمد رسول اللہ a دی نبوت تے خدا دی واحدانیت تے ایمان لیاؤن والے غریب مسلماناں نوں مکے دے لوکاں نے جہڑے دکھ دتے، اوس دی مثال توارنخ وچ گھٹ ای لہدی اے۔ فیروئی ایہ ظلم کسے اک مسلمان دی استقامت وچ وی کمی دا سبب نہیں بنیا۔ سگوں جوں جوں ظلم ودھدا رہیا، مسلمان اوہنے ای کپکے تے پیڑھے ہوندے رہے۔ اسلامی توارنخ دے ورقے ایس ظلم دیاں داستاناں نال بھرے ہوئے نیں۔

ابوجہل نے حضرت عمار بن یاسر b دی والدہ حضرت سمعیہ نوں نیزہ مار کے شہید کر دتا۔ ایس طرحاں دے ظلم دی کوئی دوجی مثال نظر نہیں آؤندی پر ایس نال آل یاسر دے پیراں وچ کوئی لغزش نہیں آئی۔ رسول اللہ a جدوں ایس ظلم و جبر نوں ویکھدے تے فرماندے ”اَصْبِرْ وَالْ يَاسِرُ فَإِنَّ لَكُمْ الْبَطِيْنُ“ دے گھر والیو! صبر کرو تہاڈے لئی ایس دا اجر جنت اے۔

ایہ تے ظلم برداشت کرن دی گل سی۔ طمعے تے لالچ وچ وی اصحاب نبی نے اجہی استقامت دا مظاہرہ کیتا جس دی ہو رکوئی مثال نہیں ملدی۔ رومیوں نے اک جنگ وچ حضرت عبداللہ b بن حذافہ نوں گرفتار کر لیا۔ آپ نوں شاہ روم دے ساہنے پیش کر کے دسیا گیا کہ جناب عبداللہ، رسول خدا a دے قریبی ساتھی نیں۔ شاہ روم نے آکھیا کہ ”جے توں نصرانی ہو جاویں تے تینوں اپنا ادھا ملک دین لئی تیار ہاں تے نال اپنی دھی نال تیرا نکاح وی کر دیندا ہاں۔“ جناب عبداللہ b نے انکار کیتا تے اوس نے آکھیا کہ ایس انکار دا نتیجہ ایہ وی ہوسکدا اے کہ تینوں تیل دے کڑاہ وچ سٹ کے

ساڑ دیواں۔ آپ اپنی گل تے پکے رہے تے شاہ روم نے سچ مچ کڑاہ گرم کرا دتا۔ جدوں جلا د آپ نوں ابلدے تیل ول لئی جاندا سی تے آپ روپے۔ بادشاہ نے سمجھیا کہ عبداللہ گھبرا گئے نیں تے آکھن لگا: ”میں اپنی شرط تے پکا ہاں، فیر سوچ لے۔“ جناب عبداللہ نے جواب دتا کہ ”تہانوں غلط فہمی ہوئی اے میں موت دے ڈرتوں نہیں رو رہیا۔ رونا ایس گل دا آیا اے کہ اللہ نے مینوں اک ای جان دتی اے۔ کاش! اوس نے مینوں اینیاں جاناں دتیاں ہوندیاں، جتے میرے بدن تے وال نیں تے میں اوہ ساریاں جاناں اک اک کر کے اپنے رب تے واردیندا“

بادشاہ حیران رہ گیا تے آکھن لگا ”عبداللہ! جے توں میرے سرنوں چم لوں تے فیروی میں تینوں آزاد کردیواں گا۔“
 ”نہیں، میں ایوں وی نہیں کرنا“ حضرت عبداللہ b نے جواب دتا۔

”اچھا میں تیرے نال نال اسی (۸۰) ہور مسلماناں نوں وی آزاد کردیواں گا“ بادشاہ نے آکھیا۔
 ”قال نسم۔“ (ہاں ایہ منظور اے۔)

جدوں عبداللہ شاہ روم دی قید توں آزاد ہو کے مدینے واپس اپڑے تے حضرت عمر فاروق b آپ دے احترام وچ کھڑے ہو گئے۔ آپ داسر چھیا تے نالے سارے حاضر مسلماناں نوں آپ داسر چمن داوی آکھیا۔
 استقامت صحابہ دی اک سونی مثال ایہ وی ہے کہ اک واری مکہ دے اک پرانے وسنیک حضرت مرشد بن مرشد الغنوی b فتح مکہ توں پہلاں کسے کم گوچراں مدینے توں مکے تشریف لیائے۔ او تھے اک پرانی جان والی عورت نال ٹاکرا ہو گیا جس دا نال عناق سی۔ عناق مکہ دی اک مشہور طوائف سی۔ بھادیں اودوں رات دا ویلا سی پر اوس نے حضرت مرشد نوں پہچان لیا تے آکھن لگی کہ مرشد جی! ایہ رات میرے دل ای گزارو۔ آپ نے جواب دتا کہ عناق! اوہ ویلا وی ہوریسی تے اوہ مرشد وی ہوریسی۔ ہن رات دا انھیر ای سہی پر اصل انھیر مک گیا اے۔ تے اوہ مرشد وی مر گیا اے جس نوں توں جان دی ایں۔ میں مسلمان آں تے مسلمان لئی ایہ فعل حرام قرار دے دتا گیا اے۔ ہن تے میں تیرے نیڑے وی نہیں پھٹک سکدا۔ عناق نے جدوں رولا پادتا تے آکھیا کہ ”نہیں اج تے توں میرے نال ای رہو یں گا“ تے جناب مرشد نے دوڑ لا دتی تے اخیر اک غار وچ جا کے لک گئے۔

دیکھو! رات دا انھیر ای سی، لوکاں نوں مرشد دے مکے آؤن داوی اے پتا نہیں سی، عناق نال پرانا تعلق وی سی تے اوہ راز نوں راز وی رکھ سکدی سی، پر ایمان تے استقامت۔ سبحان اللہ، جو حرام اے اوہ حرام اے۔ رات دا انھیر اہو وے یاں صحرا دی ویرانی۔ جاہلیت دے سارے طور طریقے چھڈ دتے تے فیر چھڈ دتے۔

اک دوجے بندے نوں دیکھو۔ ڈاکوواں دے اک مشہور قبیلے دا گٹرا ڈاکو، ابوذر غفاری (b) مکے آؤندا اے، محمد رسول اللہ a نوں ملدا اے، نائب ہوندا اے، مسلمان ہوندا اے تے نفرت، دہشت تے جبر دا پیکر اک ہوری طرحاں دا بندہ بن جاتا اے۔ تے فیر جدوں بندہ بن جاتا اے تے فیر اوہ بندہ ای رہندا اے۔ کوئی طمع یاں لالچ اوس نوں اوس راہ توں ہٹا نہیں سکيا جہڑا محمد رسول اللہ a نے دکھا دتا۔

جناب سمعیہ، جناب یاسر، جناب عبداللہ تے جناب ابوذر غفاری تے فیر مسلمان ہو چکے سن۔ آؤ اک غیر مسلم حکمران

دااعتراف دیکھئے:

قیصر روم دااعتراف:

قیصر، شاہ روم نے جس کسوٹی تے جناب رسول خدا نوں پرکھ کے آپ دی صداقت دا اعتراف کیتا سی اوہ وی آپ a دی نبوت دی نگڑی عقلی دلیل اے۔ ہو یا ایہ کہ آپ a نے مختلف ماکاں دے حکمراناں نوں قبول اسلام لئی خط لکھے سن۔ قیصر روم نوں وی آپ نے اک خط لکھیا۔ جدوں خط قیصر روم نوں پیش کیتا گیا تے اوس نے اپنے افسراں نوں حکم دتا کہ تلاش کرو کہ مکے توں تجارت لئی کوئی لوکی روم تے نہیں آئے۔ جے کوئی بھ جاوے تے پیش کرو۔ چنانچہ روم وچ موجود ابوسفیان اپنے کچھ قریبی ساتھیاں دے نال دربار قیصر وچ حاضر کیتے گئے۔ قیصر نے پچھیا کہ حسب نسب دے لحاظ نال تہاڑے وچوں کہڑا بندہ محمد a دے چوکھا قریب اے۔ ابوسفیان نے آکھیا کہ میں آں۔ قیصر نے ابوسفیان نوں آکھیا کہ تسیں نیڑے ہو جاؤ تے دو جے بندے ابوسفیان دے پچھے کھلا ر کے آکھیا کہ میں سوال تے ابوسفیان نوں ہی کراں گا پر جے ایہ کدھرے جھوٹے توں کم لوے تے تسیں ٹوک دینا۔ فیراہ سوال جواب ہوئے:

قیصر: مدعی نبوت دا خاندان کویں دا اے؟

ابوسفیان: نہایت شریف۔

قیصر: پیغمبر ہمیش اچھے خاندان وچوں ہوندے نیں تاں جے اوہناں دی اطاعت تے کسے نوں کوئی عار نہ ہووے، پراہیہ دسو کہ اوس دے خاندان وچ کسے ہور نے وی نبوت دا دعوا کیتا اے یاں اوہناں وچ کوئی بادشاہ ہو یا اے؟

ابوسفیان: کدے نہیں۔

قیصر: جے ایوں ہندا تے میں سمجھدا کہ ایہ خاندانی اثر اے۔ اوس نوں بادشاہت دی ہوس اے تے اوہ باپ دادا دی سلطنت حاصل کرنا چاہندا اے۔ ہن ایہ دسو کہ جہڑے لوکاں اوس دا مذہب قبولیا اے اوہ لستے ماڑے نیں کہ نگڑے؟

ابوسفیان: ماڑے لوک نیں۔

قیصر: پیغمبراں دے مڈھلے پیروکار ہمیش غریب لوک ای ہوندے نیں۔ اچھا ایہ دسو کہ اوس دے پیروکار ودھر رہے نیں یاں گھٹ رہے نیں؟

ابوسفیان: اوہناں دی تعداد روز دینہاڑی ودھر رہی اے۔

قیصر: ایمان دی کشش ایوں ای ہوندی اے۔ اوہناں وچ اضافہ ای ہونا اے، تے کیہ کجھ لوکی اوس دے نال رل کے فیراوس نوں چھڈ دی گئے نیں؟

ابوسفیان: نہیں، بلکل نہیں۔ اے تیکر تے ایہہ نہیں ہو یا۔

قیصر: ایمان دی خوبی ایہو ای ہوندی اے کہ اوہ جبر تے زور اوری نال نہیں سگوں اپنی سچائی نال دل وچ اثر دا اے۔ ایمان دی لذت دی ایہو تاثیر ہوندی اے کہ اوہ جدوں دل وچ بیٹھ جاندی اے تے روح تے اپنا اثر کر لینی

اے تے فیر اوہ وکھ نہیں ہوندی۔ ہن ایہ دسو کہ اوس دے نبوت دے دعوے توں اگدی تسیں اوس نوں سچا سمجھدے سی یاں کدے اوس نوں جھوٹھ بولدیاں وی سنیا ویکھیا جے؟
ابوسفیان: نہیں اوس نے کدے جھوٹ نہیں بولیا۔

قیصر: جہڑا بندہ لوکاں نال جھوٹھ نہیں بولد اوہ رب تے جھوٹھ کوں بول سکدا اے؟ پیغمبر نہ تے جھوٹھ بولدے نیں تے نہ ہی کسے نوں دھوکھا دیندے نیں۔ ایہ دسو کہ اوہ کدے وعدا کر کے پھروی جاندا اے؟
ابوسفیان: اے تیکر تے کدے ایوں نہیں ہویا، ہن جہڑا صلح و معاہدا ہو یا اے اوس دا پتا نہیں اوہ کیہ کردا اے۔
قیصر: پیغمبر عہد شکن نہیں ہوندے۔ ایہ دسو کہ کدے اوس نال تہاڈی جنگ وی ہوئی اے؟
ابوسفیان: جی ہاں، کئی واری ہوئی اے۔

قیصر: نتیجا کیہ رہیا؟
ابوسفیان: کدے اوہ غالب آئے تے کدے اسیں۔
قیصر: خدا دے پیغمبراں دا ایہو حال ہوندا اے پراخیر اوہی غالب آؤندے نیں۔ ایہ دسو کہ اوہ تعلیم کیہ دیندا اے؟
ابوسفیان: اوہ آکھدا اے کہ اک خدای عبادت کرو، کسے ہور نوں اوس دا شریک نہ بناؤ، پاک دامن ہو جاؤ، سچ بولو، لوکاں نال چنگا ورتو، وڈیاں دے مشرکانا طریقے چھڈ کے اک اللہ دی عبادت کرو تے نماز پڑھو۔
قیصر: آؤن والے نبی دیاں ایہو نشانیاں سانوں دسیاں گئیاں سن۔ مینوں یقین سی کہ اک نبی دا ظہور ہون والا اے پر میرا یہ خیال نہیں سی کہ اوہ عرب وچ ہووے گا۔ سن لوؤ! جے تسیں جھوٹھ نہیں بولیا تے فیر اک دیہاڑے اوہ ایس تھاں دا، جتھے میں بیٹھاں ہاں، ضرور مالک ہو جاوے گا۔ کاش میں اوہناں دی سیوا وچ اپڑ سکدا تے میں اوہناں دے پیرو ہوندا۔

ایس گل بات توں بعد شاہ روم نے حکم دتا کہ نامہ مبارک پڑھیا جاوے۔
لکھیا سی۔

”بسم اللہ الرحمن الرحیم۔“

محمد (a) ولوں جہڑا خدا دا بندہ تے رسول اے، ہر قل قیصر روم دے ناں۔
اوس تے سلامتی ہووے جہڑا سدھے راہ اُتے ٹریا۔ فیر میں تہانوں اسلام دی دعوت دیندا ہاں۔ بس جے سلامتی منظور اے تے اسلام قبول کر لوؤ۔ جے تسیں اسلام قبول کر لیا تے اللہ تعالیٰ دہرا اجر عطا فرمائے گا تے جے تسیں انکار کیتا تے فیر ساری قوم دی گمراہی دی ذمے داری وی تہاڈے اُتے ای آؤندی اے۔

اے اہل کتاب! آؤ اختلاف تے رولے دیاں ساریاں گلاں چھڈ کے اک اجہی گل تے ایکا کر لوئے جہڑی تہاڈی تے ساڈے وچ سانجھی اے کہ اسیں خدا توں سوا کسے ہور دی عبادت نہ کریئے تے نہ کسے نوں اوس دا شریک بنائیے۔ نہ ای اللہ توں سوا کسے ہور نوں اپنا رب مینیے۔ جے تہانوں ایس گل توں انکار اے تے فیر ایگل چیتے رہوے کہ اخیر اسیں خدای

یکتائی داعقیدارکھدے ہاں۔

محمد رسول اللہ

ابوسفیان نال قیصر نے جھڑی گل بات کہتی سی، درباری ایس تے چوکھے پکھے بیٹھے سن۔ فرمان رسالت پڑھے جان
توں بعد اوہ ہور وی لال پیلے ہوئے۔ قیصر ایہ دیکھ کے آکھن لگا کہ ”جے مینوں لوکائی توں جان دا ڈرنہ ہوندا تے میں ضرور
تھاڈے نبی دی تابعداری کر لیندا۔ اوہ بنا شا اوہی نبی نہیں جہناں دی سانوں اڈیک سی۔“
قیصر نے اسلام توں تے محمد رسول اللہ a توں دور رہ کے وی اوہناں نوں حق سچجی من لیا پر لوکائی دا ڈرتے شاہی دا
لاچ راہ دی کندھ بنیا رہیا۔



شق صدر

شق صدر یعنی نبی اکرم a دے سینہ مبارک نوں چیر کے اوس وچوں قلب اطہر نوں باہر کڈنا تے فیر اوس نوں صاف کر کے اوس دی تھاں تے رکھنا، اسلامی تواریخ دا اک اچھیا باب اے جہدے تے بزرگاں نے وکھو وکھ خیال دا اظہار کیتا اے۔ کجھ بزرگاں دا خیال اے بئ شق صدر ایک واری ہوئیا۔ کجھ دو وارتے کجھ چاریاں پنج وار دا ذکر کر دے نیں۔ ایوں ای کجھ سیرت نگار آکھدے نیں کہ شق صدر توں مراد سینے دی کشادگی تے دانائی تے حکمت نوں کمال دے درجے تیکر اپڑانا اے تے کجھ محققین ایس گل دے قائل نیں کہ رسول خدا دے سینے مبارک تے بقاعدہ عمل جراحی (Surgery) کیتا گیا تے ایس عمل جراحی دے ٹانکیاں دے نشان ساری حیاتی حضور دے سینے تے نظر آؤندے رے۔

سیرت ابن ہشام موجب حضرت حلیمہ سعدیہ کول رہندیاں اک دن اپنے رضاعی بھرانال ننھے محمد بکریاں چران گئے ہوئے سن۔ رضاعی بھرا دوڑ دا ہوئیا آیا تے آکے بی بی حلیمہ نوں آکھن لگا کہ ماں جی! دوسفید پوش آئے نیں تے اوہناں نے ساڈے قریشی بھرانوں زمین تے لٹا کے اوہناں دا شکم مبارک چاک کر دتا سی تے ہن اوس نوں سی وی رے نیں۔ ایہ واقعہ سندیاں ہی بی بی حلیمہ تے اوہناں دے گھر والے دے ہوش اُڈ گئے۔ دوڑ دے دوڑ دے ننھے محمد کول اپڑے تے ویکھیا کہ آپ دے چہرے دارنگ فق سی تے پریشان کھلوتے ہوئے سن۔ حلیمہ آپ نوں لے کے گھر پرت آئیاں۔

ایس واقعے دے ویلے آپ دی عمر مبارک کوئی چار ورھے سی۔ بزرگاں دا خیال اے کہ سینہ چاک کرن والے سفید پوش جناب جبرئیل تے میکائیل سن۔ اوہناں نے قلب مبارک وچوں جے ہوئے خون دے اک دو ٹکڑے کڈے تے آکھیا کہ ایہ شیطان دا حصہ سی۔ فیر پیٹ تے دل نوں برف دے پانی نال دھوتا تے قلب مبارک نوں سینے وچ رکھ کے ٹانکے لادے۔

جہیڑے سیرت نگار اک توں چوکی وار شق صدر دے قائل نیں اوہ لکھدے نیں کہ دجی وار شق صدر دس سال دی عمر وچ ہوئیا۔ ایہ روایت ابو ہریرہ توں ٹردی اے۔ ابن حبان تے دلائل ابی نعیم وغیرہ وچ ایہہ ذکر لکھدا اے۔ تیجی واری ایہہ واقعہ بعثت دے ویلے پیش آیا جو یوں کہ مسند ابی داؤد تے دلائل ابی نعیم وچ حضرت عائشہ توں روایت کیتی گئی اے۔

چوتھی وار دے، شق صدر دا ذکر حضرت ابو ذر نے کیتا اے۔ بخاری، مسلم تے ترمذی جہیاں معتبر کتاباں وچ ایہ روایت موجود اے۔ البتہ پنجویں وار دے شق صدر دے قائل لوکاں کول کوئی خاص دلیل نہیں لکھدی۔

کیہ بھیدی؟

شق صدر وچ کیہ بھیدی، اللہ ای بہتر جان دا اے۔ حدیث تے سیرت دے مطالعے توں بعد بس اسیں ایہ قیاس کر

سکدے ہاں کہ پہلی واری شق صدر وچ دل وچوں گناہ تے محصیت دامادہ کڈ کے برف نال ایس لئی دھوتا گیا کہ گناہ دامراج گرم ہوندا اے۔ دس سال دی عمر وچ جدوں جوانی دے آثار شروع ہون لگدے نیں، ایس لئی سینہ چاک کیتا گیا کہ قلب مبارک لہو و لعب توں پاک ہو جائے۔ بعثت دے ویلے شق صدر دامقصد ایہی کہ قلب مبارک وحی دے بھید نوں سمجھ جاوے تے علوم الیہ دامتحمل ہو سکے۔ چوتھی واری معراج دے وقت ایس لئی سینہ چاک کیتا گیا تاں جے قلب مبارک عالم ملکوت دی سیرتے تجلیات الہی دے قابل ہو جائے۔ واللہ اعلم۔

سوچ دا اختلاف

اوہناں بزرگاں دی تعداد تھوڑی نہیں جیڑے ایس نظریے دے قائل نیں کہ اللہ نوں عمل جراحی نال نبی رحمت دے سینے نوں کٹن تے قلب نوں صاف کرن دی ضرورت نہیں سی۔ اوہ ایس توں بغیر وی ایہ سارا کجھ کرن دی قدرت رکھد اے۔ دُجے خیال والے سیرت نگار ایس گل تے زور دیندے نیں کہ حضور دی حیات مبارکہ وچ سینے تے سلائی دے نشان نظر آؤندے رہے نیں تے ایس توں دکھ وی معتبر راویاں توں بے شمار روایتاں ساڈے تیکر اپڑیاں نیں جہناں توں پتا لگدا اے کہ حضور دا سینہ مبارک چاک کیتا گیا سی۔ اک رائے دیکھو:

((قَالَ السَّيُّوْطِيُّ وَ مَا وَقَعَ مِنْ بَصْطٍ جَهْلَةٍ الْمَصْرِفِ أَنْكَارِ ذَلِكَ وَحَلَلَهُ

الْأَمْرَ السَّيُّوْطِيُّ فَهُوَ جَهْلٌ صَرَاحٍ وَ خَطَاةٌ قَبِيْحَةٌ))

علامہ سیوطی فرماندے نیں کہ آج دے کجھ جاہلاں داشق صدر دامنکر ہونا تے بجائے حقیقت دے ایس نوں امر المعویٰ آکھنا صریح جہالت تے فاش غلطی اے۔

ایس خیال دے حامی بزرگاں دا کہنا اے نبی سورت الم منتظر طوہناں لئی وڈی دلیل دے طور تے موجود اے۔



ترتیب

باب نمبر ۱:..... مدینۃ الرسول

- ۱۵ ----- محل وقوع
- ۱۵ ----- مدینے دے آبادکار
- ۱۶ ----- مدینۃ الرسول تے بنی اسرائیل
- ۱۷ ----- مدینۃ الرسول تے اوس و خزرج
- ۱۸ ----- نہیں رسیاں میری سرکار دیاں
- ۱۹ ----- مسجد نبوی دی تعمیر
- ۲۱ ----- اصحاب صفہ
- ۲۲ ----- مسجد نبوی وچ سید الرسل دا پہلا خطبہ
- ۲۲ ----- اہل بیت مدینۃ الرسول وچ
- ۲۳ ----- مڈھلی بانگ
- ۲۴ ----- اذان توں پہلاں کچھ کلمے
- ۲۴ ----- بھائی چارہ (مواخات)
- ۲۸ ----- میثاق مدینہ..... پہلا تحریری دستور
- ۲۹ ----- میثاق مدینہ دی افادیت
- ۳۱ ----- یہودی عالم تے سردار حصین بن سلام مسلمان ہو گئے
- ۳۳ ----- اُم المؤمنین حضرت عائشہ صدیقہ دی رخصتی
- ۳۴ ----- جناب عائشہ صدیقہ دی عمر
- ۳۶ ----- ابوقیس صرمہ دا قبول اسلام
- ۳۷ ----- حضرت عبداللہ بن زبیر دی ولادت
- ۳۷ ----- حضرت کلثوم تے اسعد بن زرارہ چلانا کر گئے
- ۳۷ ----- زکوٰۃ دی فرضیت تے دُجے حکم
- ۳۸ ----- یہودیاں تے منافقاں دے نبی رحمتؐ نال مجادلے
- ۴۳ ----- اوس و خزرج دے منافق

❁ قبلہ دی تبدیلی ----- ۴۷

❁ یاد وطن دی ----- ۴۸

باب نمبر ۲:..... جہاد فی سبیل اللہ

❁ دین اسلام دے ضابطہ جہاد دا ہور نتارا ----- ۵۵

❁ جہاد دے آداب ----- ۵۵

❁ نام نہاد مہذب مغرب تے اوس دے دانش ور ----- ۵۷

❁ امریکی تہذیب تے عراق دی ابو غرایب جیل ----- ۵۷

❁ غزوات تے سرایا دا ویروا ----- ۶۴

❁ غزویاں دی تعداد ----- ۶۵

❁ پہلا سریہ ----- ۶۶

❁ سرایہ عبیدہ بن حارث تے سعد بن ابی وقاص ----- ۶۷

❁ اک غلط فہمی دا ازالہ ----- ۶۸

❁ مڈھلا غزوہ ----- ۷۰

❁ بدرتوں پہلے دیاں فوجی مہماں ----- ۷۱

❁ قریش تے مسلماناں دا پہلا حملہ ----- ۷۲

باب نمبر ۳:..... غزوہ بدر

❁ متکبر قریش جنگ لئی نکل پے۔ ----- ۷۷

❁ بدر دی وادی ----- ۷۸

❁ اسلامی لشکر دی روانگی ----- ۷۸

❁ سپہ سالار اعظم دی جنگی حکمت عملی ----- ۸۲

❁ اڑیل تے جاہل مشرک دا پہلا قتل ----- ۸۶

❁ مبارزت نال جنگ شروع ہوندی اے ----- ۸۷

❁ نزالی تے نویکی جنگ ----- ۹۳

❁ شہدائے بدر ----- ۹۴

❁ بدر دے قیدی ----- ۹۵

❁ داماد رسول ابوالعاص ----- ۹۷

باب نمبر ۴:..... بدرتوں اُحد تیکر

❁ سیدہ رقیہ دی وفات ----- ۹۹

- ۹۹ ----- ❁ سیدہ فاطمہ زہرا تے شیر خدا دا دایاہ
- ۹۹ ----- ❁ روزے تے زکوٰۃ دی فرضیت
- ۱۰۰ ----- ❁ گستاخانِ رسول دا قتل
- ۱۰۴ ----- ❁ رحمت اللعالمین دے قتل دی سازش
- ۱۰۶ ----- ❁ بدرتوں اُحد دے وچکار دی حربی صورت حال اک نظر وچ
- ۱۱۰ ----- ❁ غزوہ بنو سُلَیم
- ۱۱۰ ----- ❁ غزوہ سَوِیق
- ۱۱۱ ----- ❁ غزوہ ذی امریاں غزوہ غطفان
- ۱۱۱ ----- ❁ غزوہ بجران
- ۱۱۲ ----- ❁ سریہ زید بن حارث
- ۱۱۳ ----- ❁ اُم المومنین حضرت حفصہ نال نکاح

باب نمبر ۵:..... غزوہ اُحد

- ۱۱۴ ----- ❁ جبل اُحد
- ۱۱۵ ----- ❁ مکی لشکر دیاں جنگی تیاریاں
- ۱۱۶ ----- ❁ قریشی سوانیاں تے اُحد دا معرکہ
- ۱۱۷ ----- ❁ محبوب خدای پریشانی تے لشکر اسلام دیاں جنگی تیاریاں
- ۱۲۳ ----- ❁ شمشیر نبیؐ تے ابودجانہؓ
- ۱۲۴ ----- ❁ قریش دا خوفناک تے مغرور لشکر
- ۱۲۴ ----- ❁ ابو عامر فاسق
- ۱۲۴ ----- ❁ لہو دے چھٹے
- ۱۲۶ ----- ❁ بنی عبدالدار دا قبرستان
- ۱۲۷ ----- ❁ پاسا پلٹ گیا
- ۱۳۱ ----- ❁ ہند۔ زنانی یاں چڑیل
- ۱۳۲ ----- ❁ مسلمان سوانیاں تے اُحد دا معرکہ
- ۱۳۴ ----- ❁ خونی رشتے آمنے سامنے
- ۱۳۴ ----- ❁ خدادے محبوب ڈونگیاں سوچاں وچ
- ۱۳۵ ----- ❁ کافراں دا پچھا

✽ کس دی جت کس دی ہار ----- ۱۳۶

باب نمبر ۶:..... سن ۳ ہجری تے ۴ ہجری دے اہم واقعات

✽ سیدہ اُمّ کلثوم دا نکاح ----- ۱۳۸

✽ حضرت حسن دی ولادت ----- ۱۳۹

✽ حضرت حفصہ تے حضرت زینب بنت خزیمہ ----- ۱۳۹

✽ قانون وراثت ----- ۱۴۰

✽ مشرکہ نال نکاح ----- ۱۴۰

✽ ہر تیر مسلماناں ول ----- ۱۴۰

✽ بزمِ معونہ دا حادثہ ----- ۱۴۲

✽ رجیع دا المناک حادثہ ----- ۱۴۳

✽ ابوسفیان دی اک ہور چال ----- ۱۴۸

✽ بنو نضیر دے یہودیوں دی جلاوطنی ----- ۱۴۹

✽ سپہ سالار اعظم دی حکمت عملی ----- ۱۵۳

✽ مال فے ----- ۱۵۴

✽ سازشی عمرو د قتل ----- ۱۵۴

✽ بدر ثانی ----- ۱۵۴

✽ غزوہ ذات الرقاع ----- ۱۵۶

✽ ذات الرقاع دی وجہ تسمیہ ----- ۱۵۶

✽ میر اللہ کافی اے ----- ۱۵۷

✽ جناب جابر تے سرکارِ دی دلتوازی ----- ۱۵۸

✽ الرحمن الرحیم ----- ۱۵۹

✽ ۴ھ دے کجھ ضروری واقعات ----- ۱۶۰

✽ شراب حرام ہو گئی ----- ۱۶۱

✽ چیف سیکرٹری دی تبدیلی ----- ۱۶۱

باب نمبر ۷:..... ہجرت دا پنجواں سال

✽ دومتہ الجندل ----- ۱۶۲

✽ غزوہ مریسج یاں غزوہ بنی مصطلق ----- ۱۶۳

- ۱۶۴ ----- عبداللہ بن اُبی دافتنہ ❁
- ۱۶۵ ----- اِک وڈھے منافق دی موت ❁
- ۱۶۵ ----- رسول خدا دی ناقہ ❁
- ۱۶۶ ----- اُم المؤمنین حضرت جویریہ ❁
- ۱۶۶ ----- بنو مصطلق پکے پیڈے مسلمان ❁
- ۱۶۶ ----- سیدہ عائشہ صدیقہ تے بہتان ❁
- ۱۷۲ ----- اِک ویردا- ❁
- ۱۷۵ ----- واقعہ اِک ساڈے لئی سبق ❁
- ۱۷۶ ----- تیمم ❁
- ۱۷۷ ----- حضرت صفوان تے حضرت حسان دا جھگڑا ❁
- ۱۷۷ ----- حضرت زینب بنت جحش نال نکاح ❁
- ۱۷۸ ----- جنگ خندق (یاں احزاب) ❁
- ۱۸۰ ----- غزوہ خندق دی ترجیح ❁
- ۱۸۰ ----- خندق و یکھ کے کافراں دی پریشانی ❁
- ۱۸۱ ----- مبارزت ❁
- ۱۸۱ ----- ٹل دیاں اوکڑاں ❁
- ۱۸۲ ----- سازش تیار ہو گئی ❁
- ۱۸۴ ----- حارث غطفانی دی سودے بازی ❁
- ۱۸۴ ----- نعیم بن مسعود دی تدبیر ❁
- ۱۸۶ ----- خندق دے شہید ❁
- ۱۸۶ ----- یونائیٹڈ الائنس دا دھڑن تختہ ❁
- ۱۸۷ ----- برداشت دا گھانا ❁
- ۱۸۷ ----- غزوہ خندق دے فیدے ❁
- ۱۸۸ ----- نبی a دے معجزے ❁
- ۱۸۸ ----- بنو قریظہ دا محاصرہ ❁
- ۱۹۲ ----- بنو قریظہ نال سلوک دا جواز ❁
- ۱۹۳ ----- دُجا پاسا ❁

- ۱۹۴ ----- ابوالبابہ دی توبہ
- ۱۹۵ ----- سعد تیرے بختاں توں واری جاواں
- ۱۹۶ ----- ضحطہ قبر
- ۱۹۷ ----- حضرت ریحانہ
- ۱۹۷ ----- سریہ عبداللہ بن عتیک
- ۱۹۸ ----- پردے دا حکم
- ۱۹۹ ----- اُم المؤمنین حضرت اُم حبیبہ حرم نبوت وچ
- ۲۰۰ ----- اُم سعد دا کھوہ

باب نمبر ۸: ۶ ہجری

- ۲۰۱ ----- تواریخ پاسا پلٹدی اے
- ۲۰۱ ----- سریہ محمد بن مسلمہ الاسہلی (بنو بکر ول)
- ۲۰۲ ----- سریہ محمد بن مسلمہ (بنو ثعلبہ ول)
- ۲۰۲ ----- غزوہ بنو لحيان
- ۲۰۳ ----- سریہ غمر
- ۲۰۳ ----- سریہ جموم
- ۲۰۳ ----- عیص دی مہم
- ۲۰۳ ----- غزوہ ذی قرد
- ۲۰۴ ----- طرف دی مہم
- ۲۰۴ ----- سریہ فذک
- ۲۰۴ ----- سریہ دُومۃ الجندل
- ۲۰۵ ----- سریہ اُم قرفہ
- ۲۰۶ ----- سراپہ عربین
- ۲۰۶ ----- اک وڈھی تبدیلی
- ۲۰۶ ----- صلح حدیبیہ
- ۲۱۵ ----- بیعت رضوان
- ۲۲۳ ----- صلح حدیبیہ تے مسلمان سوانیاں
- ۲۲۴ ----- ۶ھ دے کچھ ہور واقعات

- ۲۲۴..... شراب حرام ہوگئی
- ۲۲۶..... ظہار و احکم
- ۲۲۷..... پہلی نماز استسقاء
- ۲۲۸..... حج دی فرضیت

باب نمبر ۹:..... صلح حدیبیہ توں بعد دیے حالات

- ۲۲۹..... غزوہ خیبر
- ۲۳۳..... گل بات دا ٹڈھ
- ۲۳۳..... یہودیوں دا اخیر حربہ
- ۲۳۴..... رسول خدا اک ہور احسان
- ۲۳۴..... اُم المؤمنین حضرت صفیہ
- ۲۳۶..... خیبر دی قانون سازی
- ۲۳۷..... شہداء خیبر
- ۲۳۸..... وادی القری، فدک تے تیاء

باب نمبر ۱۰:..... شہنشاہوں نوں دعوت اسلام

- ۲۴۰..... شاہ حبش نجاشی
- ۲۴۲..... شاہ مصر مقوقس
- ۲۴۲..... کسراے فارس خسرو پرویز
- ۲۴۳..... شہنشاہ روم ہرقل
- ۲۴۴..... حارث بن ابی شمر غسانی
- ۲۴۵..... حاکم بحرین منذر بن ساوی
- ۲۴۶..... شاہان عمان جیفر تے عبد
- ۲۴۶..... حاکم یمامہ ہوزہ بن علی
- ۲۴۷..... شرجیل بن عمرو غسانی حاکم اردن

باب نمبر ۱۱:..... ۷ ہتے ۸ ہدیے اہم واقعات

- ۲۴۸..... ۷ ہدیاں کچھ مہماں
- ۲۴۹..... عمرہ قضاء
- ۲۵۱..... حضرت میمونہ بنت حارث

- ۲۵۲ ----- ❁ مکی دے جگر دے ٹکڑے
- ۲۵۳ ----- ❁ جناب عمرو بن العاص
- ۲۵۴ ----- ❁ خالد بن ولید نال ٹاکرا
- ۲۵۴ ----- ❁ جنگ مؤتہ
- ۲۵۵ ----- ❁ امراً حمیش دی تگنوں
- ۲۵۵ ----- ❁ زید بن حارث
- ۲۵۵ ----- ❁ حضرت جعفر بن ابوطالب
- ۲۵۶ ----- ❁ حضرت عبداللہ بن رواحہ
- ۲۵۷ ----- ❁ جنگ دے اسباب
- ۲۶۰ ----- ❁ مؤتہ دے غازی مدینے وچ
- ۲۶۱ ----- ❁ شہدائے مؤتہ
- ۲۶۱ ----- ❁ جت یاں ہار
- ۲۶۲ ----- ❁ سریہ موتہ توں فتح مکہ تیکر
- ۲۶۳ ----- ❁ سریہ ذات سلاسل
- ۲۶۴ ----- ❁ سریہ سیف البحر
- ۲۶۴ ----- ❁ سریہ محارب

باب نمبر ۱۲:..... فتح مکہ... ماڑے زور آور ہو گئے

- ۲۷۳ ----- ❁ آرام گاہ رسول رحمت
- ۲۷۶ ----- ❁ خون رائیگاں
- ۲۷۷ ----- ❁ فتح مکہ دا دُجا خطبہ
- ۲۷۸ ----- ❁ نبی رحمتؐ تے مکی دے وحشی
- ۲۷۸ ----- ❁ وحشی بن حرب
- ۲۷۹ ----- ❁ سہیل بن عمرو
- ۲۷۹ ----- ❁ صفوان بن اُمیہ
- ۲۷۹ ----- ❁ فضالہ بن عمیر
- ۲۸۰ ----- ❁ ابولہب دے پتر
- ۲۸۰ ----- ❁ ابوقحافہ صدیق اکبر دے والد

۲۸۰..... ہندز وجہ ابوسفیان

۲۸۱..... آل دوال دے صنم خانے

۲۸۲..... جناب خالد بن ولید دے ہتھوں بنو جزیمہ دا قتل

باب نمبر ۱۳:..... حنین، اوٹاس تے طائف دا معرکہ

۲۹۰..... اوٹاس دا معرکہ

۲۹۰..... بڈھے ماہر حرب دا قتل

۲۹۱..... طائف دا محاصرہ

۲۹۲..... محاصرہ ختم ہوندا اے

۲۹۲..... حنین تے طائف دے شہید

۲۹۲..... مخت تے مسلمان سوانیاں

۲۹۳..... اموال غنیمت دی ونڈ

۲۹۴..... بنو ہوازن دے قیدی

۲۹۴..... سیدہ شیماء

باب نمبر ۱۴:..... ۵۸ دے کجھ ہور واقعات

۲۹۶..... ایلاء و خنجر

۲۹۸..... سیدنا ابراہیم دی پیدائش

۲۹۸..... شہد تے مغایر دی بو

۲۹۹..... جناب ماریہ قبطیہ اُم المؤمنین جناب حفصہ دے گھر

۲۹۹..... نان نفقے وچ وادھے دی منگ

۳۰۳..... جید مسلمان علماء دا غصہ تے مستشرقین

۳۰۸..... اہل طائف تے لات دابت

باب نمبر ۱۵:..... تبوک توں پہلاں دے کجھ جنگی معرکے

۳۱۰..... سریہ عقیقہ بن حصن فزاری

۳۱۰..... سریہ قطیفہ بن عامر

۳۱۰..... سریہ ضحاک بن سفیان کلابی

۳۱۰..... سریہ عبداللہ بن حذافہ

۳۱۰..... سریہ بنو طے

- ۳۱۴ ----- غزوہ تبوک ❁
- ۳۱۴ ----- تبوک ❁
- ۳۱۵ ----- جنگ دے اسباب ❁
- ۳۱۶ ----- بس جنگ ❁
- ۳۱۸ ----- انفاق فی سبیل اللہ ❁
- ۳۲۰ ----- خدا دار رسول بس ❁
- ۳۲۱ ----- لشکر داکوچ ❁
- ۳۲۲ ----- رسول خدا دی ناقہ قصواء کھڑی گئی ❁
- ۳۲۲ ----- حضرت عبدالرحمن بن عوف دی امامت ❁
- ۳۲۳ ----- رسول خدا تبوک وچ ❁
- ۳۲۴ ----- دو چادر اں والے عبداللہ ❁
- ۳۲۵ ----- مدینے ول واپسی ❁
- ۳۲۵ ----- مدینے دے نیڑے ❁
- ۳۲۶ ----- رسول خدا مدینے وچ ❁
- ۳۲۶ ----- پچھڑ گئے لوکی ❁
- ۳۲۸ ----- مسجد ضرار ❁
- ۳۲۹ ----- منافقان دے سردار، چوہدری عبداللہ بن اُبی دی موت ❁
- ۳۳۰ ----- عبداللہ بن اُبی دی نماز جنازہ ❁
- ۳۳۱ ----- لعان دا بیان ❁
- ۳۳۲ ----- زنا دی حد ❁
- ۳۳۲ ----- مدنی مسلماناں دا پہلا حج ❁
- ۳۳۲ ----- ۹ھ دے کچھ ہوو واقعات ❁
- ۳۳۳ ----- عام الوفود..... جتھیاں دا سال ❁
- ۳۳۴ ----- وفد اکھڑ ❁
- ۳۳۴ ----- وفد صداء ❁
- ۳۳۴ ----- وفد عبدالقیس ❁
- ۳۳۵ ----- وفد بنی حنیفہ تے مسیلہ کذاب ❁

- ۳۳۶ ----- بنوعامر بن صعصعہ داؤفد
- ۳۳۶ ----- وفد ہمدان
- ۳۳۷ ----- نجران داؤفد
- ۳۳۷ ----- بنوفزارہ داؤفد
- ۳۳۸ ----- نبوطے داؤفد
- ۳۳۸ ----- بنوکنده دا جتھا
- ۳۳۸ ----- یمن دے وسنیک تے اسود عسی کذاب
- ۳۳۸ ----- حضرت ابومویٰ اشعری تے معاذ بن جبل یمن ول
- ۳۳۹ ----- کذاب عسی دا ظہور تے قتل
- ۳۳۹ ----- جناب علی المرتضیٰ یمن ول
- ۳۴۰ ----- حدیث ابوذر
- ۳۴۱ ----- جبرائیل اجنبی دے روپ وچ

باب نمبر ۱۶:..... حجة الوداع

- ۳۴۲ ----- مکے توں روانگی دی ترتیخ
- ۳۴۳ ----- تیاریاں
- ۳۴۴ ----- مقام مرتضیٰ
- ۳۴۵ ----- حجۃ الوداع دے خطبے
- ۳۴۶ ----- خطبے دا متن
- ۳۴۶ ----- دفعات
- ۳۵۳ ----- اخیر فوجی کا روایتی

باب نمبر ۱۷:..... أَكْمَلْتُ لَكُمْ دِينَكُمْ

- ۳۵۶ ----- رفیق اعلیٰ ول سفر
- ۳۵۹ ----- جمعہ ۹ ربیع الاول ۱۱ھ
- ۳۶۰ ----- چلانا..... پر لو کائی وا نگ نہیں
- ۳۶۱ ----- مسلماناں دی حالت
- ۳۶۳ ----- سقیفہ بنی ساعدہ تے بنو اشہل دا محلہ
- ۳۶۴ ----- خلیفہ رسول دی مڈھلی تقریر

❁ آخری زیارت ----- ۳۶۴

باب نمبر ۱۸:..... اُمہات المومنین

❁ اِک توں وُدھ سوانیاں ----- ۳۶۶

❁ اسلام توں پہلاں دارواج ----- ۳۶۶

❁ کثرت ازواج تے اسلام ----- ۳۶۹

❁ کثرت ازواج تے غیر مسلم ----- ۳۷۰

❁ کثرت ازواج تے رسول رحمت a ----- ۳۷۱

❁ اُم المومنین جناب خدیجہ بنت خویلد ----- ۳۷۵

❁ اُم المومنین حضرت سودہ بنت زَمعہ ----- ۳۷۸

❁ اُم المومنین حضرت عائشہ صدیقہ ----- ۳۸۰

❁ اُم المومنین حضرت حفصہ بنت عمر ----- ۳۸۳

❁ اُم المومنین حضرت زینبؓ بنت خزیمہ ----- ۳۸۵

❁ اُم المومنین حضرت اُمّ سلمہ ----- ۳۸۶

❁ اُم المومنین حضرت جویریہ ----- ۳۸۸

❁ اُم المومنین حضرت زینب بنت جحش ----- ۳۸۹

❁ اِک ضروری ویروا ----- ۳۹۰

❁ اُم المومنین حضرت اُمّ حبیبہ رملہ بنت ابوسفیان ----- ۳۹۷

❁ اُم المومنین حضرت صفیہ بنت حیّ ----- ۳۹۹

❁ اُم المومنین حضرت میمونہ بنت حارث ----- ۴۰۱

❁ کچھ ہور سوانیاں ----- ۴۰۳

❁ حضرت ریحانہ بنت شمعون ----- ۴۰۳

❁ حضرت ماریہ قبطیہ ----- ۴۰۳

باب نمبر ۱

مدینۃ الرسول

محل وقوع:

مدینۃ الرسول جو نبی رحمت دے تشریف لیاؤن توں پہلاں یثرب دے نام نال جانا جاندا سی، اوس ویلے وی عرب دا اک مشہور شہری۔ رسول خدا دا ایہہ شہر مکئی توں شمال وُل کوئی ساڈھے چار سو کلومیٹر دے پندھ تے مکئی تے شام دے وچکار واقع اے۔ ایہہ سطح سمندر توں گھٹ ۶۰۰ میٹر دی اُچائی تے ہے تے ایہہ عرب دا اک صحت بخش شہر نیا جاندا اے۔ ساڈے پنجاب دیاں چوکیاں تھاواں وانگ ٹھنڈے گرمی دوویں ٹکاویں ہوندے نیں۔ گرمیاں وچ درجہ حرارت ۴۵ ڈگری سینٹی گریڈ تیکر جاندا اے جدوں کہ پالے دیاں راتاں وچ درجہ حرارت ۶ ڈگری سینٹی گریڈ تیکر ڈگ جاندا اے۔ عرب دے دُجی شہراں دے مقابلے وچ اتھتے بارش زیادہ ہندی اے۔ ایس دے شمال تے جنوب پاسے پہاڑ نیں۔ مشرق وُل پتھر یلا میدان تے مغرب وُل دو سو کلومیٹر دے پندھ تے سمندر اے۔

جدوں رسول خدا اتھتے تشریف لیائے اوہدوں مکئی توں مدینے تیکر یاراں (۱۱) دناں دا پندھ نیا جاندا سی۔

آب و ہوا دا اندازا ایس گل توں کیتا جاسکدا ہے کہ شہر دے اصل وسنیکاں نے ایس داناں طیبہ رکھیا ہوئی سی جیہدا مطلب ہے پاک تے من موہنا شہر۔ ایس دی وجہ ایہ جاپدی اے کہ جدوں کوئی بندہ عرب دے سڑ دے بلدے صحراواں وچوں نکل کے ایس شہر وچ پیر رکھدا سی تے اوس نوں ایوں جاپدا سی جو یں اوہ بہشت وچ آ ویا اے۔ ایس دے بلکل ای اُلٹ صحراواں وچ وِسوں کیئے لوکی ایس نوں یثرب آکھدے سن، کیوں جے اوہ جدوں ایس شہر وچ وڑ دے سن تے اوہ توں دی گلی تے سہلی ہوا اوہناں نوں راس نہیں سی آؤندی تے اوہ بیمار پے جاندا سن۔ خود رسول خدا، جناب ابو بکر صدیق تے مکئی توں ہجرت کر کے آؤن والے چوکھے جی وی بیمار ہوندے رے۔

کجھ مورخاں دا خیال اے کہ ایس کرماں والے شہر داناں یثرب ہون دی وجہ ایس دی آب و ہوا نہیں سی سگوں ایس دی وجہ ایہہ سی کہ ایس شہر نوں آباد کرن والے بندے داناں یثرب سی جیہڑا قبائل عمالقہ داسرداری تے اوہ حضرت نوح g دی اولاد وچوں سی۔ 1

مدینے دے آبادکار:

خیال کیتا جاندا اے کہ یثرب دا شہر ۲۲۰۰ قبل مسیح وچ آباد ہوئی کیوں جے ۲۱۸۹ قبل مسیح وچ جدوں حضرت اسماعیل اپنی والدہ دے نال مکئی جاندا سی تے فیر زم زم دا چشمہ بھٹا اے، اوہدوں بنو جرہم اتھتے موجود سن۔ اوہی

! مروج الذهب جلد دوم صفحہ ۱۲ بحوالہ تاریخ المدینۃ المنورہ از محمد عبدالمجید، صفحہ: ۲۵

یثرب نام دے بندے دا ہے جیہدی بابت آکھیا جاندا اے کہ اوس نے ایس شہر دی پہلی اٹ رکھی۔

مدینے دی آبادکار قوم عمالقه دا اصل وطن یمن سی جتھے بنو حام وی آباد سن۔ بنو حام بڑی زور اور قوم سی۔ اوس نے عمالقه نوں ستانا شروع کر دتا۔ عمالقه بھانویں عراق جئے ملک اُتے بادشاہی کر چکے سن، پر ہن اوہ لسی پئے گئے سن۔ ایوں اوہ اوتھوں بھج وگئے تے حجاز وچ آکے ڈیرے لائے۔ تہامہ دا علاقہ وٹوں کرن لئی اوہناں نوں چنگا جاپیا۔ بعض مورخاں دے خیال موجب یمن وچوں عمالقه دے نکلن دی وجہ کسی دُجی قوم دا ظلم یاں جبر نہیں سی سکوں ایس دی وجہ یمن دا قحطی۔ حجاز وچ آکے ایس قوم نے چوکی طاقت حاصل کر لئی تے اوس علاقے دے بادشاہ وی بن گئے۔ اوہ آل دوالے دے سارے ہرے بھرے علاقیاں تے قابض سن تے زراعت تے باغبانی کرن پاروں اوہ چنگی خوشحال حیاتی گزار رے سن۔

مدینۃ الرسول تے بنی اسرائیل:

عمالقه نرے حجاز وچ ای نہیں سکوں شام وچ وی آباد سن جہناں نے حضرت موسیٰ g نال ٹکرائی۔ حضرت موسیٰ نے جدوں مقامی عمالقیوں نوں زیر کر لیا تے فرعون تے وی فتح حاصل کر لئی تے فوج نوں حکم دتا کہ اوہ حجاز وچ لشکر کشی کرے تے اوس دھرتی نوں عمالقه جی قوم توں پوری طرحاں پاک کر دیوے۔ فیر ایوں ای ہونیا تے بنی اسرائیل نے ظالم عمالقه دا اک اک جی تہ تیغ کر دتا اوتھوں تیکر کہ اوہناں دے بادشاہ الارقم نوں وی قتل کر دتا۔ پر اک نویکی جی دکھ والے بادشاہ زادے نوں قتل کرن دی بجائے گرفتار کر لیا۔ جدوں فاتح لشکر شام واپس پریتا تے اوس منڈے بابت جناب موسیٰ دے فیصلے دی نوبت ہی نہ آئی کیوں جے آپ اوہدوں تیکر وفات پا چکے سن۔ قوم موسیٰ نے جدوں ویکھیا کہ لشکر نے حکم نبی دی خلاف ورزی کیتی اے تے اوس لشکر نوں دیس نکالا دے دتا۔ لشکری، جہڑے کہ حجاز دے علاقے توں پوری طرحاں جانوسن اوہ پچھاں پڑتے آئے تے یثرب، خیبر تے حجاز دے دُجے علاقیاں وچ وٹوں کر لئی۔ ایہہ لشکری ہی یثرب دے پہلے اسرائیلی وسنیک سن۔

ہن بنو اسرائیل حجاز دی کلی زور اور قوم سی۔ اوہ اک لمے چر ایس علاقے وچ موجاں کر دے رے۔ اوہناں حجاز وچ جاگیراں بنائیاں، واہی بیجی نوں رواج دتا، باغ باغیچے لائے تے دشمنان توں اپنی حفاظت لئی کئی ٹکڑے قلعے وی بنائے۔ دُجے پاسے شام دے وسنیک بنی اسرائیل، جہناں حجازی اسرائیلیاں نوں کدے ملک وچوں کڈیا سی، تنگ تے پریشان ہو گئے۔ ہونیا ایہ کہ شاہ روم نے شام تے چڑھائی کر دتی۔ اوس نے بنی اسرائیل نوں بے دردی نال قتل کیتا، اوہناں دے مال اسباب تے قبضا کر لیا تے اوہناں دیاں سوانیاں نوں لونڈیاں بنالیا۔ لُٹے پٹے بنی اسرائیل دے قبیلے بنو نضیر، بنو قریظہ تے بنو بہدل دھکے ٹھیدے کھاندے، حجاز وچ صدیاں پہلوں آباد ہوئی اپنی قوم نال آ رے۔

ایس گل توں پتا لگدا اے کہ یہودی دوکھو دکھو زمانیاں وچ یثرب تے حجاز دے دُجے علاقیاں وچ آباد ہوئے۔ پہلی وار حضرت موسیٰ دی وفات توں فوراً بعد ۱۴۰۰ قبل مسیح وچ تے دُجی وار اوہدوں جدوں شاہ روم بخت نصر نے اوہناں نوں شام وچوں گٹ کے کڈیا۔ ایہہ زمانہ ۵۸۶ قبل مسیح دا ہے۔

مدینۃ الرسول تے اوس و خزر ج:

عمالقہ وانگ اوس و خزر ج داوی اصل وطن یمن سی۔ یمن وچ تورانج داسب توں پہلا بند تعمیر کیتا گیا سی۔ سند مارب نام دے ایسے ڈیم دے پانی نال قوم سب دیاں پیلیاں تے باغ باغیچے و تروچ آؤندے سن۔ اک دیہاڑے اوس و خزر ج دے اک وڈے عمرو بن عامر نے ڈیم دی تگڑی کندھ وچ اک چوہے نوں موری کر دیاں ویکھیا۔ ایس توں اوہنے حساب لا یا کہ ہن نہ تے ایہہ ڈیم رہنا اے تے نہ ای یمن دی ہریالی۔ اوس نے اپنی آل اولاد نوں نال لیا تے یمن دی جمن بھوں ہمیش لئی چھڈ وتی۔ اوہناں کدے بخران وچ ڈیرے لائے، کدے کدے وچ تے اخیر یثرب وچ آؤسوں کیتی۔ خیال کیتا جاندا اے کہ ایہہ ۱۱۵ قبل مسیح دا زمانا سی۔

علامہ احمد بن ابویعقوب تے علامہ ابن کثیر لکھدے نیں کہ عمرو بن عامریاں اوس دے گھر والی نجومی سی تے ایوں اوس نے آون والے دن اوس وچ ڈیم دے ٹٹن دا حساب لالیا سی، جس پاروں اوہناں نے یمن چھڈ دتا۔ مڈھلے دن اوس وچ اوس و خزر ج یثرب دے باہر غربت تے بے وستی دی حیاتی گزار دے رے۔ اوہناں دے پلے نہ کوئی اٹھ رہ گئی سی تے نہ کوئی گھوڑا۔ نہ کوئی پہلی بتا سی تے نہ کوئی کسب۔ بس پگھ سی تے اوہ سن۔ جدوں کہ یثرب دے اندر بنو ثعلبہ، بنو قینقاع، بنو نضیر، بنو قریظہ، بنو بہدل تے بنو عاف ورگے تگڑے قبیلیاں توں وکھ وی کئی قبیلے موجاں مان رے سن۔ تجارت، زرگری، دایہ نبجی تے سودی کاروبار نال جوڑی ہوئی دولت تے عالیشان قلعیاں نے یہودیوں نوں درندہ صفت بنا چھڈیا سی۔ اوس و خزر ج جے ماڑے لوکی اوہناں لئی کھڈونے بنے ہوئے سن۔ اوہناں دیاں سوانیاں، یہودیاں لئی لونڈیاں توں وکھ کچھ نہیں سن۔ اوہناں دا رئیس فطیون وڈھا بدکار تے بدمعاش سی۔ اوس نے ایہ اعلان کیتا ہو یا سی کہ اوس و خزر ج دی کوئی نویں ووتھی اوہدے کول رات گزارن توں بغیر اپنے خاوند دے گھر نہیں جاسکدی۔ لاہڑیاں نے وی مجبوری پاروں ایس فیصلے نوں منیا ہو یا سی تے ووہٹیاں دے ماییاں نے وی۔ جدوں اوس و خزر ج دے سردار مالک بن عجلان دی بھین دے ویاہ دی واری آئی تے اوہ ویاہ والے دیہاڑے سارے لیڑے لاہ کے بھرا دے ساہمنیوں لگے۔ ایہ ویکھ کے مالک بن عجلان غصے تے شرم نال پاگل ہو گیا۔ اوس دی حالت ویکھی نہیں سی جاندی۔ جدوں بھین دی، بھرا دے ہتھوں شامت آؤن لگی تے بھین نے آکھیا کہ یہودی رئیس فطیون میرے نال جووی کرے تے مینوں جو یں وی ویکھے، تہانوں قبول اے؟ گل مالک دی سمجھ وچ آ گئی تے اوس نے یہودی بدمعاش دا بندوبست کرن دا فیصلہ کر لیا۔

رات نوں جدوں دستور موجب مالک دی بھین فطیون دے گھر گئی تے مالک وی زنانہ لیڑے پاکے سپہیلی دے روپ وچ اوتھے جا چجیا تے داء لگدیاں ای فطیون نوں قتل کر دتا۔ اوس دے قتل توں بعد مالک شاہ غسان کول اپڑ گیا تے اوس نوں سارے حالات توں جانو کیتا۔ مالک بن عجلان دی داستان سن کے شاہ غسان نے یہود جی ظالم قوم توں ماڑیاں نوں آزاد کران دا فیصلہ کیتا تے لشکر یثرب ول ٹور دتا۔ لشکر نے جبل اُحد دے نیڑے ذی حرض دی تھاں تے ڈیرے لائے۔ جدوں ایس گل دا یہودیوں نوں پتا لگا تے اوہناں نے قلعیاں وچ ڈیرے لائے۔ غسانی سپہ سالار نے ہشیاری توں کم لیا۔

اوس نے صلح تے گل بات کرن دے وعدے نال اوہناں نوں قلعیاں وچوں کڈیا تے اوہناں دے تن سو پنگاہ (۳۵۰) نامی گرامی سردار چُک چُک کے قتل کر دتے۔ بچے کچھے سرداراں نوں مالک بن عجلان تے مار دتا۔ کئی سارے یہودی یثرب چھڈ کے بھج گئے تے جھپڑے باقی رے گئے اوہناں نے اوس و خزر ج دے پیٹھ لگ کے یثرب وچ رہنا گوارہ کر لیا۔ ایوں یہودیاں دا لک ٹٹ گیا تے یثرب وچ اوس و خزر ج دے اقتدار داسورج چمک پیا۔ اوس و خزر ج نے وی یثرب وچ عالیشان قلعے تعمیر کیتے تے باغبانی وُل وی دھیان کیتا۔ جہد انتیجا ایہ ہویا کہ اوہناں نوں چنگے دِن ویکھنا نصیب ہو گئے۔ کدے کدرا ایوں وی ہوند اسی کہ یثرب وچ بچے کچھے یہودیاں نال چھوٹا چھوٹا لڑائی جھگڑا ہو جاندا سی۔ اوس ویلے یہودی ایہہ تڑی لاندے ہوندے سن کہ اوس و خزر ج دے لوکو! کوئی گل نہیں، اخیر نبی دے آؤن دا ویلا اصلوں ای سرتے ہے۔ ویکھنا اسیں اوہناں دے نال رَل کے تہاں نوں عادتے ارم طرحاں تہس نہس نہ کر دتے آکھیا ہے۔

حیاتی دے دیہاڑے چنگے سوہنے بیت رے سن۔ پر اک ویلا اجیا آیا کہ اوس تے خزر ج دے بندے آپس وچ ای لڑ پئے۔ گل ودھ گئی، تے آینی ودھ گئی کہ اوہناں دوواں قبیلیاں وچکار جنگاں دا اک لما سلسلا شروع ہو گیا۔ امام زین الدین مراغی لکھدے نیں کہ ایہ سلسلا گھٹو گھٹ ایک سووھی ۱۲۰ ورہیاں تیکر چلدا رہیا۔ اوہناں دی اخیر نبی تے تباہ کن لڑائی ”جنگ بعاث“ دے نام نال مشہور ہوئی جہدے وچ دوویں دھراں رَجھ کے اُجڑیاں تے برباد ہوئیاں۔ کئی نامور سردار تے سیانے جنگ دی نذر ہو گئے۔ ہزاراں سوانیاں بیوہ ہو گئیاں تے خورے کنے کو بال تیبی دی اگ وچ جھونک دتے گئے۔ اخیر اوہناں نوں عقل آئی تے ایس گل دی سمجھ گئی کہ مسلماناں دے حل دا جھپڑا طریقہ اوہناں نے پھڑیا اے ایہہ طریقہ دانائی تے سیانف توں اصلوں ای سکھنا اے۔ فیر اوہناں دے سیانے سرجوڑ کے بہہ گئے تے ایہہ فیصلہ کیتا کہ دوویں قبیلے اک وار فیر رَل جانے چاہیدے نیں۔ جدوں دوواں دے سانجھے چیف دانام لہسن لگے تے اک وار فیر تھوڑا جھپڑا رو لایا پیا پر اخیر خزر ج دے اک رئیس عبداللہ بن ابی بن سلول دے ناں تے سمجھناں نے ہاں کر دتی۔ اوس دے سردانا پ لیا گیا تے تاج بنا کے تاجپوشی دے جشن دیاں تیاریاں چھوہ دتیاں۔ چیتے رہوے نبی ایہہ اوہی عبداللہ بن ابی ہے جھپڑا تواریخ وچ رئیس المنافقین دے نام نال یاد کیتا جاندا اے۔

نہیں ریاں میری سرکار دیاں:

تاجپوشی دے جشن دیاں تیاریاں اے اڈھ وچ سن تے یثرب وچ میری سرکار جابجی، جہدے سرتے پہلوں ای تاج سی، یثرب دانہیں سگوں دوواں جہاناں دی شاہی داتاج۔ حجاز دانہیں سگوں جنت دی سرداری داتاج۔ عربستان دانہیں سگوں ختم نبوت داتاج سی۔ سوہنے پڑھنا رو! میری سرکار دیاں کیہہ ریاں نیں جس نے سونے دے تاج توں پنا ای ایوں دی شاہی کر دکھائی کہ ویکھدیاں ای ویکھدیاں دنیا دے تن برا عظماں وچ اوس دیاں دھماں پے گئیاں۔ آئینی قوانین (Constitutional Laws) دے استاد تے ماہرین ایس گل نوں مَن دے نیں کہ اُس دا دتا ہو یا دستور آئینی تواریخ دا پہلا تحریری دستور سی۔ میری سرکار دیاں کیہہ ریاں کہ اوس نے اولاد آدم نوں شاہی دے اوہ گر سکھا دتے کہ امن تے جنگ، قحط تے خوشحالی، وزارت تے سفارت تے غرض حیاتی دے ہر کھیت وچ قیامت تیکر آؤن والیاں حکومتاں

نوں سدھارستہ لپھ گیا، جے کوئی سدھے رستے تے ٹرنا پسند کرے تے۔
مسجد نبوی دی تعمیر:

جویں اسیں کچھ پڑھ چکے ہاں جدوں قصویٰ نے خالد بن زید ابویوب انصاری دے بوہے کول اپنی دھون زمین تے لمی پادتی سی اوہدوں ایہہ فیصلہ ہو گیا سی کہ جناب ابویوب دا گھرای مدینۃ الرسول وچ اسلام دا پہلا گڑھ بنے گا۔ جناب رسول خدا کدے حضرت اسعد بن زرارہ والی مکی جی مسیت وچ نمازاں پڑھ لیندے تے کدے کسے دُجی تھاتے۔ نال ای نال اوس تھاتے مسیت اُسارن دیاں تیاریاں چھوہ دیتیاں جتھے آپ دی ناقہ قصویٰ نے ڈیرہ لایا سی۔ اوہ تھاتے سہیل دوہیتیم بھراواں دی ملکیت سی۔ آپ نے اوہناں منڈیاں نوں سدیا تے آکھیا کہ بچو! ایہہ تھاتے جے کرساڈے اگے وچ دیو تے اتھتھے مسیت اساری جاسکدی اے۔

”یا رسول اللہ! قربان جائیے۔ اسیں تہاڈے کولوں مل لیندے چنگے لگدے ہاں۔“ بالاں نے آکھیا۔

”نہیں پترو! میں مفت لینداوی تے چنگا نہیں نا لگدا“ سرکار نے جواب دتا۔

”فیر جویں تہاڈی مرضی آقا۔ کبہہ مجال اے کہ حکم ٹالیے۔“

ایوں اوہ زمین آپ نے دس دینار وچ خرید لی تے جناب ابوبکر نوں حکم دتا کہ اوہ سہیل تے سہیل نوں مل تار دین۔ ۴ ربیع الثانی ۱۳ نبوت بمطابق ۱۶، اکتوبر ۶۲۲ء نوں سوموار دے دیہاڑے اوس شانناں والی مسجد دانینہ پتھر رکھ دتا گیا جیہدی مٹی نوں میری سرکار دی پیشانی چمن دا شرف حاصل ہوئی۔ ویکھدیاں ای ویکھدیاں دھرتی دی تہی متبرک تھاتے وگن ولی گئی تے فیر اوہ تھاتے عاشقاں دا قبلہ تے کعبہ بن گئی۔

خیال کیتا جاندا اے کہ مسجد نبوی دا سب توں پہلا پتھر نبی رحمت نے اپنے ہتھ نال رکھیا جہڑا جناب عمار بن یاسر نے چک کے لیاندا سی۔ اوس توں بعد سارے مہاجر تے انصار رل کے کم کردے رے۔ کوئی پتھر چک کے لیاؤ ندار ہیا، کوئی کچیاں اٹاں بناؤ ندار ہیا تے کوئی گارا۔ جناب رسول خدا نوں مسجد اسارن لئی مزدوراں وانگ کم کردیاں ویکھ کے اک صحابی نے ایہہ شعر پڑھیا:

لَعْنُ قَعْدُنَا وَالنَّبِيَّ يَعْمَلُ
لَذَاكَ مِنَّا الْعَمَلُ الْمُضَلَّلُ

تے جے اسیں بیٹھے رہو یے تے نبی کم کردے رہن تے فیر بنا شک ساڈا ایہہ کم گمراہی دا ہی اے۔

چو کھے صحابی ایہہ پڑھدے جاندے سن تے نال تعمیر کیتی جاندے سن:

لَا عَيْشَ إِلَّا عَيْشُ الْآخِرَةِ اللَّهُمَّ فَارْحَمِ الْأَنْصَارَ وَالْمُهَاجِرَةَ۔

حیاتی تے بس آخرت دی ہی حیاتی اے۔ اے اللہ انصار تے مہاجراں تے رحم فرما۔¹

حضرت ابو ہریرہؓ فرماندے نیں کہ صحابیاں دے نال نال سرکار دو عالم وی اٹاں چک کے لیا رے سن۔ میں ویکھیا کہ آپ نے اینیاں اٹاں چکیاں ہوئیاں سن کہ اوہناں دی ٹیسی آپ دے سینے مبارک تیکر اپٹری ہوئی سی۔ میں محسوسیا کہ

! سیرت ابن ہشام جلد اول صفحہ: ۳۳۲

بھار نال دوہرے ہو رہے ہیں۔ میں عرض کیتی اے اللہ دے حبیب! ایہ اٹاں مینوں دے دیو میں مسیت تیکر اپڑا دیندا ہاں۔ آپؐ نے جواب دتا کہ ”اٹاں تے ہو روی بہتیریاں نیں تسیں اوہ چک لیاؤ، ایہہ میرے لئی ہی رہن دیو۔“ اک موقع تے حضرت اُسید بن حنیر نے وی عرض کیتی کہ یا رسول اللہ! ایہ اٹاں مینوں چکا دیو۔ جواب وچ آپؐ نے فرمایا: اُسید! تسیں ہو رہے آؤ۔ اللہ ولوں نیکیاں کھٹن وچ تسیں میرے توں چوکھے محتاج نیں۔“ (یعنی مینوں وی نیکیاں دی اُتنی ہی لوڑ اے جتنی تھانوں۔)

کائنات دی سب توں عظیم الشان ہستی جس مسجد دی تعمیر لئی راجاں مزدوراں وانگ کم کر دی رَی اوس دارقبر اودھوں ۱۰۵ مربع فٹ سی۔ مسجد دے تن دروازے رکھے گئے۔ اک جنوب ول، دُجا مغرب ول جنہوں باب الرحمت آکھیا جاندا سی تے تینا مشرق ول جس دانام باب عثمان سی۔ آپؐ باب عثمان وچوں ہی مسجد ول تشریف لیاندے سن۔ ایس مسجد دی ایہہ پہلی تعمیر بغیر چھت توں سی۔ مسجد دے جنوب مشرقی کونے وچ سیدہ عائشہ تے سیدہ سودہ امہات المؤمنین دے حجرے تعمیر ہوئے تے شمال مشرقی کونے وچ اصحاب صفہ دا چبوترہ جیہڑا عالم اسلام دی پہلی یونیورسٹی ثابت ہوئیا۔

عالم انسانیت تے نہ مٹن والے نقش چھڈن والیاں ہستیاں کئی ورھیاں تیکر بغیر چھت توں ایس مسیت وچ نمازاں پڑھدیاں رہیاں تے جے کھجور دیاں ٹہنیاں نال چھت پای لئی تے ایوں دی کہ اوہ زری دُھپ ای ڈک سکی، مینہ کئی نہیں۔ مینہ پیندا تے چھت توں پانی چوندا رہندا تے تھلے کچی تھان چیکو بن جاندی۔ سبحان اللہ! کیا نیاز مندی سی، کیا ایمان سی، کیا محبتاں سن! ایوں دی عبودیت نیلی چھتری نے گئے دناں وچ کتھے ویکھی ہوئی اے کہ سرور کون و مکان تے اوس شمع دے پروانے، کائنات دے خالق و مالک دی واحدیت تے کبریائی دی گواہی دین لئی اپنے پاک چہرے اوسے چیکو وچ زمین تے ٹکائی آؤندے نیں۔ جدوں مالک اگے ڈگ کے ایہہ آکھنا ہوئے کہ جو کجھ وی اے بس توں ایں، میں تے کجھ وی نہیں، اودھوں ایہہ گل کتھے چیتے رہندی اے کہ تک تے متھے تے گارا لگ گیا اے، لیڑے لہڑ گئے نیں یاں ٹھنڈ دے مینہ وچ پیراں نوں سیت چڑھدی پئی اے۔

مسجد نبوی دے نال امہات المؤمنین لئی جیہڑے حجرے بنائے گئے اوہناں دی تعداد ہولی ہولی دو توں نو (۹) تیکر اپڑ گئی۔ ایہہ حجرے تقویٰ تے سادگی دا اوہ اعلیٰ نمونہ سن کہ جے کدرے آج اوویں دا کوئی حجرہ اسار کے لوکائی نوں دکھایا جاوے کہ اس دے وچ سرور کون و مکان تے اُم المؤمنین عائشہ صدیقہ نے حیاتی دے دن گزارے نیں تے لوکائی منن توں انکار کر دیوے۔

حضور پر نور دے محلاں دیاں کندھاں پتھراں نوں جوڑ جوڑ کے بنائیاں گئیاں سن۔ کدھرے زریاں کھجور دیاں ٹاہنیاں کھلیاں کیتیاں سن تے اوہناں نوں گارے نال لب دتاسی۔ بوہے دی تھان تے والاں دا بنیا بھارا جیا بھورا پردے دا کم دیندا سی۔ گھر دے اندر پائیاں پرانیاں چٹائیاں، گزارے موافق منجے پیڑے تے دو چار پانڈے میری سرکار دے محل

دی شان و دھاندے رہندے سن۔ کسے آئے گئے دے بیٹھن لئی کسے حجرے وچ کوئی شے ہوندى سی تے کسے وچ کوئی نہ۔ ازواج مطہرات وچوں چوکیاں اپنے خانداناں دے سرداراں دیاں دھیاں سن۔ اوہناں پاک پیاں دا بچپنا کھلیاں ڈلیاں حویلیاں وچ چوکیاں لاڈ پیار وچ گزریاں تے ہن نبی a دے گھر وچ، نبی دی گھر والی بن کے گزر دے دیہاڑے..... کیا کہنے۔ مصر دیاں سوانیاں نے تے یوسف دے حسن تے اپنیاں انگلاں قربان کیتیاں سن اتھے ساری حیاتی نذر کیتی جا رہی سی۔ کچے کوٹھیاں وچ، زمین دے فرش تے پیٹھ دے اٹھ دے رب دے ایس عظیم ”عبدہ و رسول“ دی زیارت تے قرب لئی بھلا کون بے چین نہیں ہوندا۔ امہات المؤمنین وی تے سوانیاں ہی سن..... اللہ دیاں نیک تے بھاگاں والیاں پیاں۔

چیتے رہوے کہ ایہہ متبرک حجرے اموی خلیفہ ولید بن عبد الملک دے حکم نال ڈھا دے گئے سن۔ جدوں ولید دا ایہ حکم مدینے اپڑیا اوہدوں مسجد نبوی وچ کئی جلیل القدر صحابیاں دے صاحبزادے موجود سن۔ جویں کہ حضرت عبدالرحمن بن عوف دے صاحبزادے ابوسلمہ تے حضرت سہل بن حنیف دے صاحبزادے ابوامامہ۔ ولید دے ایس حکم نامے داسن کے ایہہ حضرات تے شیع رسالت دے ان گنت پروانے دیوانیاں وانگ روندے رے۔ علامہ سہیلی لکھدے نیں کہ جدوں خلیفہ وقت دا حکم آیا کہ حجرے ڈھا دے جان تے مدینے دی ساری فضا لوکاں دی گریہ و زاری نال ایوں سوگوار ہو گئی جویں حضور علیہ الصلوٰۃ والسلام دے وصال دے دیہاڑے۔¹

اصحاب صفہ:

مدینے دے نو مسلم اپنی اپنی طبیعت تے حالات دے مطابق کوئی نہ کوئی آہر وڈی بیٹھے سن پر اک جتھہ اجہیا وی سی جیہڑا اپنا سب کچھ محمد رسول اللہ a دے پیراں وچ وار چکیا سی۔ آپ مسجد وچ تشریف لیاندے تے ایہ لوکی آل دوالے آکٹھے ہوندے تے اپنے آقا و مولا دیاں مٹھیاں مٹھیاں گلاں سن دے رہندے۔

جدوں رسالت دی شیع اکھاں توں اولہے ہوندى تے ایہہ اوس ویلے جنگل ول لکڑ بالن اکٹھا کرن ٹر پیندے، اوس نوں وچ وٹ کے جیہڑا کوئی ٹکا ملدا، اوس نال کچھ مسالونا خرید دے تے اپنا، تے صفہ دے دے بھر اوں دا ٹنڈ بھر دے۔ پر ایہہ آہر کوئی پکا پیڑا وسیلہ نہیں سی۔ ایوں دین سکھن دے شوقین ایہہ بندے وچارے کئی کئی دیہاڑے بھکے بھانے نمازاں پڑھ چھڈ دے تے اپنی اگلی حیاتی وچ بھلائی لئی سرکار دیاں گلاں سن دے رہندے۔

شاید ای کوئی ویلا ایوں دا آیا ہونا اے کہ اوہناں نوں سر ڈھکن لئی دولیڑے یاں دو چادر اں اکٹھیاں نصیب ہو یاں ہوں۔ نبی دے ایہہ عاشق بھک نال ایڑے لے ہو گئے ہوئے سن کہ نماز پڑھدیاں ڈگ ڈگ جاندے۔ صفہ تے ڈیرے لائی بیٹھے گھٹو گھٹ چار سوا صاحب نبی نے ایس بھک ننگ دے بدلے اللہ تے اُس دے محبوب واقرب حاصل کیتا۔ اوہناں وچ چوکیاں اولیاء اللہ تے چنگے سوہنے عالم بن گئے۔ حضرت ابو ہریرہ جے اُچی شان والے محدث وی اوہناں بندیاں وچ شامل سن۔

جناب رسول خدا نوں اصحاب صفہ نال کئی محبت سی ایس دا انداز ایس گل توں ہو جاندا اے کہ اک واری آپ دی

پیاری دھی سیدہ فاطمہ نے آپؐ توں کسے شے دا مطالبہ کیتا تے آپؐ نے فرمایا: ”دھی رانی! ایہہ میرے کولوں نہیں ہونا کہ تہانوں دے دیواں تے صُفہ والے بھکے رہن۔“

!الروض الانف جلد ۲ صفحہ: ۲۳۸

محمدؐ دے ایہناں عاشقاں تے علم دے شیدائیاں نے لوکا ئی نوں صراطِ مستقیم وکھان لئی چوکی کھینچل کیتی۔
مسجد نبوی وچ سید الرسل دا پہلا خطبہ:

ابن اسحق لکھدے نیں کہ عبدالرحمن راہیں میرے تیکر ایہہ روایت اپڑی اے، تے نالے اسیں خدا توں پناہ منکدے ہاں ایس گل توں کہ رسول اللہؐ نال کوئی اجہی گل جوڑ دوئے جہیز دی اوہناں نے نہیں کیتی۔ گل ایوں ہے کہ جناب رسول اللہؐ کھڑے ہوئے، رب دی حمد و ثنا اُس دی شان دے شایان بیان کیتی تے فیر فرمایا:

”لوکو! موت توں بعد دی حیاتی دی فکر کر لوؤ۔ اوس دا کوئی سر بند کر لوؤ۔ اللہ دی سوہنہ اک دیہاڑے تہاڑے تے موت دی بے ہوشی طاری ہونی اے۔ فیرتسیں اپنے اجڑ بنا کے آجڑی دے چھڈ کے ٹر جاؤ گے۔ فیر اللہ سوال کرے گا۔ اوہ اللہ جنوں نہ تے کسے ترجمان دی لوڑ اے تے نہ کسے دربان دی حاجت۔ اوہ کچھے گا، کیہہ تہاڑے کول میرا رسول نہیں سی آیا جس نے میرا سنبھیا تہانوں دتا تے کیہہ میں تہانوں مال دولت نہیں سی دتا؟ بس ہن دتو کہ تہاں اپنے فیدے لئی کیہہ کیتا اے۔؟ اس وقت انسان حیران پریشان ہوندا سچے کچھے ویکھے گا، پر اوس نوں کچھ وی سمجھ نہیں آؤنی۔ فیر اوہدی نظر سامنے جاوے گی تے اس نوں دوزخ دے شعلیاں توں دکھ کچھ نظر نہیں آؤنا۔ گل چنگی طرحاں سمجھ لوؤ کہ جہیز اگ توں بچنا چاہندا اے تے جے اوہ اک کجھور دا ٹکڑا اللہ دے راہ تے دین دی قدرت رکھدا اے تے اوہ کجھور دا ٹکڑا اوہدے راہ تے دے کے اپنے آپ نوں بچا لوے تے جہیز اگنیاں نہیں رکھدا تے اوہ لوکا ئی نال چنگی گل کر کے (یعنی نیکی دی ہدایت کر کے) اپنے آپ نوں بچا لوے کیوں جے اک نیکی دا بدلہ دس گنا توں لے کے سات سو گنا تیکر دتا جاویگا۔ تہاڑے تے، تے رسول اللہؐ تے سلام تے خدا دی رحمت و برکت نازل ہووے۔“

اہل بیت مدینۃ الرسول وچ:

جہناں دناں وچ ازواجِ مطہرات دے حجرے اسارے جارے سن آپؐ نے گھر دے جیاں نوں مکہ توں لیاؤن لئی حضرت زید بن حارث تے حضرت ابورافع نوں بھیجیا۔ نال ای حضرت ابوبکر صدیق نے ہجرت دے ویلے دے گائیڈ عبداللہ بن اریقظ نوں وی ٹور دتا تے اپنے صاحبزادے عبداللہ نوں سنبھیا گھلیا کہ اوہ امی تے بہناں نوں لے کے مدینے اپڑ جاوے۔ ایوں حضرت زید تے ابورافع، سیدہ فاطمہ الزہرا، سیدہ ام کلثوم، ام المومنین حضرت سودہ، ام ایمن (زوجہ حضرت زید) تے اوہناں دے پتر اسامہ نوں لے کے واپس خیر خیریت نال مدینے پرت آئے۔ نال ای حضرت عبداللہ بن ابی بکروی اباجی دے سنبھے موجب اپنی والدہ ام رومان، اپنی دادی تے دوواں بھیناں حضرت عائشہ تے حضرت اسماء نوں لے کے مدینے اپڑ گئے۔ سرور کائنات دی تیجی صاحبزادی سیدہ رقیہ اپنے گھر والے (حضرت عثمان) دے نال پہلوں

ای حبشہ ول ہجرت کر چکے سن۔ آپؐ دی چوتھی تے سب توں وڈی صاحبزادی سیدہ زینب دی شادی ابو العاص بن ربیع نال ہو چکی سی۔ ابو العاص نے حضرت زینب نوں مدینے جان دی اجازت نہ دتی۔ جدوں غزوہ بدر وچ ابو العاص کافراں ولوں لڑائی کردا گرفتار ہو گیا تے حضورؐ نے اوس نوں آزاد کردتا۔ ایس بھلیائی دے بدلے اوس کولوں بھلیائی دی اُمید رکھی گئی سی۔ ایوں اوس نے جا کے سیدہ زینب نوں مدینۃ الرسول ول جان دی اجازت دے دتی۔

اہل بیت تے جناب صدیق اکبر دا خاندان اکو ویلے مدینۃ الرسول وچ اپڑے۔ سارے جی حضرت ابو بکر ول ای ٹھہرے۔ جدوں حجرہ تعمیر ہو گیا تے حضرت سودہ اوہدڑ گئیاں۔
مڈھلی بانگ:

مدینۃ الرسول وچ ہر آؤن والے دیہاڑے نمازیاں دی تعداد ودھ رہی سی۔ ہر کسے نے اپنا اپنا حساب رکھیا ہو یا سی۔ ایوں کوئی نمازی ویلے نال اپڑ کے باجماعت پڑھ لئیدا تے کوئی کچھ رہ جاندا۔ ہن ایس گل دی لوڑ سی کہ نماز دے ویلے دی کوئی نشانی رکھی جاندی تاں جے سارے مسلمان اوس ویلے اکٹھے ہو کے جماعت نال نماز پڑھ لئیدے۔ معلم اعظمؑ نے صلاح مشورے لئی اپنے صحابیاں نوں اکٹھا کیتا تے اوہناں دے سامنے ایہ سوال رکھیا کہ اکو ویلے اکٹھے کر کے باجماعت نماز پڑھن لئی سجنان متراں نوں کوں سدیا جاوے۔ اک صحابی نے صلاح دتی کہ نماز دے ویلے اک جھنڈا چوکھا اُچا کر کے ہلایا جاوے تاں جے سارے نمازی اوس نوں ویکھ کے ویلے نال مسیخے اپڑ جان۔ دُجے نے مشورہ دتا کہ زور نال بگل جادیا کرو۔ آپؐ نے ایس نوں پسند نہیں فرمایا تے آکھیا کہ ایہہ تے یہودیاں دا طریقہ اے۔ اک ہور صحابی نے ناقوس پھوکن دی صلاح دتی۔ نبی اکرمؐ نے ایس نوں وی چنگ نہ جانی تے فرمایا کہ ایوں تے عیسائی کردے نیں۔ کسے صحابی نے آکھیا کہ کسے اُچی تھاں تے اگت بال دیواں کراں گے تاں جے لوکاں نوں نماز دے ویلے دا پتا لگ جائے۔ آپؐ نے فرمایا کہ ایہہ مجوسیاں دا شیوا اے، سانوں ایہہ گل نہیں پھیدی، اپنی وکھری پچھان والی کوئی گل لھو۔ حضرت عمرؓ ساریاں صلاحواں دھیان نال سُن دے رے۔ اخیر وچ عرض کیتی:

{أَوَلَا تَبْعُونَ رَجُلًا يُنَادِي بِالصَّلَاةِ}

”کیہہ ایہہ ٹھیک نہیں کہ نماز دے ویلے کوئی بندہ اُچی واج نال اعلان کردیوے۔

آپؐ نے ایس گل نال اتفاق کر لیا تے آکھن لگے ”اُٹھ بھئی بلال، لوکاں وچ نماز دے ویلے دا اعلان کردے۔“

ایس پارلیمنٹ دے اک ممبر جناب عبداللہ بن زید ایس مسئلے تے نبی رحمتؐ نوں پریشان ویکھ کے چوکھے ای بے چین ہو گئے۔ رات ہوئی تے نیندر نہ پوے۔ دل وچ تے ایہہ گل سی کہ صلاحواں دا کوئی سوا نہیں آیا۔ ہووے نہ ہووے کوئی ہور گل سامنے آوے۔ اخیر اکھ لگ گئی۔ خواب وچ کیہ ویکھدے نیں کہ اک بندے نے دوہریاں چادراں جُسے تے ولیاں ہو یاں نیں تے ہتھ وچ ناقوس پھریا ہو یا اے۔ خواب وچ عبداللہؓ کچھدے نیں اللہ دے بندیا! کیہہ ایہہ ناقوس وِچنا ای؟

”پرتوں ایہہ لے کے کیہ کریں گا۔“ اوس نے پچھیا

”ایہدے نال اسیں لوکاں نوں نماز دا سدا دیواں گے“ جناب عبداللہؓ نے جواب دتا۔

”تہانوں کوئی ایس توں چنگی گل نہ دسناں؟“

”تہاڈی بڑی مہربانی ہووے گی، ضرور دتسو“

”اچھا فیر رسول خدا دی سیوا وچ جا کے عرض گزار وکہ تسیں لوکا کی نوں نماز دی دعوت ایوں دیو یا کرو۔ (فیر خواب وچ اذان سکھان والے نے ساری اذان سکھا دتی) سویرا ہوئی اتے جناب عبداللہ نے اپنا خواب نبی اکرمؐ نوں سناتا۔ حضرت عبداللہ بن عمر روایت کر دے نیں کہ خواب دیکھن توں بعد جدوں جناب عبداللہ دی اکھ کھلی تے اوہ چوکھا چر ضبط نہ کر سکے تے اوہناں رات نوں ای اپنا خواب جناب رسول خدا نوں سناتا سی۔ خواب سن کے نبی برحقؐ نے فرمایا:

{إِنَّهَا لَوَيَاقِقٌ إِنَّ شَآءَ اللّٰهُ تَعَالٰی}

”رب نے چاہیا تے ایہہ خواب سچا ثابت ہووے گا۔“

حضرت عمر بن خطابؓ نے وی اوس راتیں ایہی خواب دیکھیا پر ادھی راتیں جناب رحمت اللعالمینؐ نوں بے آرام کرن دی جسارت نہ کر سکے۔ اوہ فجرے حضور انورؐ نے حضرت عبداللہ نوں حکم دتا کہ بلالؓ نوں نال لے جاؤ۔ تسیں اوہناں نوں بانگ دے اکھر دسدے جانا اوہ بانگ آکھدا جاوے گا۔ جناب سیدنا بلالؓ دی کنرا کے دار و اج والی بانگ حضرت عمرؓ نے وی سن لئی۔ بانگ سن کے اوہ ویلے حضور اکرمؐ دی خدمت وچ حاضر ہوئے تے عرض کیتی کہ ایہہ بانگ تے راتیں خواب وچ مینوں کسے سکھائی سی۔ میں جناب نوں دسن ای والا ساں تے بلالؓ دی آواز وچ میں ایہی کجھ سن لیا اے۔ ایہہ سن کے ہادی برحقؐ نے فرمایا عمر! میرے کول تہاڈے توں اگدیں وجی آگئی سی۔

اذان توں پہلاں کجھ کلمے:

موزن رسول سیدنا بلالؓ دی واج پچھے ویلے مدینے وچ گوئجن لگ پئی۔ ابن اسحاقؒ آکھدے نیں کہ اک روایت بنو نجاردی اک سوانی توں اوہناں تیکر اپڑی اے۔ آکھدی اے کہ میرے گھر دا ویہڑا واہوا وڈا تے کھلا ڈلہاسی تے مسجد نبویؐ دا گوانڈ وی سی۔ بلالؓ ہر راتیں پچھلے پہر کندھ تے آکے بیٹھ جاندے تے فجر دے ٹھیک ویلے دی اڈیک لالیندے۔ جدوں اوہناں دے حساب موجب ویلا ہو جانداتے بلالؓ آکھدے کہ اے اللہ! تیری حمد تے ثناء کر داہاں تے تیرے کولوں ای مدد منگدا ہاں، قریش لئی کہ اوہ وی تیرے دین تے قائم ہون۔ فیر اذان شروع کر دے۔ اوہ سوانی آکھدی اے کہ مینوں نہیں پتا کہ بلالؓ نے کیس دیہاڑے ایہہ دُعا چھڈی سی 1 (یعنی کدے وی ناغہ نہیں کیتا۔)

بھائی چارہ (مواخات):

مدینے وچ اپڑ کے مسیت اسارن دے نال نال جس دُجے کم ول چوکھے دھیان دی لوڑ سی اوہ مکے توں ہجرت کر کے آون والے مسلماناں دے روزگار دا بندوبست سی۔ مہاجر ایں باوقار تے قابل قبول طریقہ ایس توں وکھہور کوئی نہیں سی ہو سکدا کہ انصار تے مہاجرین دے معاشی تے معاشرتی پہلوواں نوں سامنے رکھدے ہوئے اوہناں نوں بھرا بھرا بنا دتا جانداتے اوہناں نوں آکھیا جانداتے کہ لو بھئی رُل مل کے کھاؤ کماؤ۔ رب دے رسول توں ودھ سیانف ہو رکس دے حصے آئی سی۔ آپؐ نے ایوں ای کیتا تے حکم دتا کہ خدا دے رستے موجب اک دُجے دے بھرا بھرا بن جاؤ۔ انصار نے ہسدیاں

ہوئیاں ایہ فیصلہ قبول کیتا تے ایوں سوواں بے روزگاراں دا مسئلہ اک پل وچ حل ہو گیا۔ ایس موقع تے انصار نے اپنے دینی بھراواں دا ایوں خیال رکھیا کہ سکھ بھراواں توں وی ودھ۔

! سیرت ابن ہشام جلد اول صفحہ: ۳۳۳، ادارہ اسلامیات لاہور۔

دُجے پاسے مہاجراں وی تن آسانی توں کم نہیں لیا سگوں چھیتی توں چھیتی اپنے پیراں تے کھلون دی چنتا کر دے رے۔ کسے تجارت شروع کر لئی جویں کہ حضرت عبدالرحمن بن عوف نے تے کسے انصار دی پیلی وچ واہی نیجی کیتی جویں کہ حضرت ابوبکر، عمر تے علی ابن ابوطالب نے۔

اک پاسے ایثار دے جذبے دی اخیر سی تے دُجے پاسے مہاجراں دی خودداری تے غیرت وی کمال دی سی۔ اک مثال حضرت عبدالرحمن بن عوف دی دیکھو۔ نبی رحمتؐ نے آپ نوں حضرت سعد بن الربیع انصاری دا بھرا بنایا۔ حضرت سعد جناب عبدالرحمن نوں اپنے گھر لے گئے تے آکھن لگے:

”عبدالرحمن! ایہہ ای میری جائیداد۔ آج توں اڈھی تیری ہوئی۔“

”اللہ تیرا بھلا کرے“ جناب عبدالرحمن نے جواب دتا۔

”تے ایہہ میریاں دو بیویاں نی۔ جیہڑی دل کردا ای مکمل مار لے، میں اوس نوں طلاق دے دیندا ہاں۔ توں عدت دے بعد نکاح کر لوں۔“ جناب عبدالرحمن نے آکھیا:

”اللہ تیرے مال تے عیال وچ برکت دیوے۔ مینوں بازار دا تھوہ پتا سمجھا دے۔ میں تیرے تے راضی ہوئیا۔“

ایوں حضرت عبدالرحمن نے بازار وچ پنیر تے مکھن دا خانچہ لانا شروع کر دتا۔ اللہ دی دین اے حضرت عبدالرحمن کچھ دناں وچ ایڈے مال دار ہو گئے کہ آپ دا مال مدینے توں باہر وی جان لگ پیا تے فیرا و ہناں اٹھاں تے کئی شیواں در آمد وی ہون لگ پیاں 1 کاروبار چمک پیا تے آپ نے مدینے وچ اک سوانی نال ویاہ وی کر لیا۔ ایوں آپ دی خودداری پاروں آپ دے انصاری بھرا دا مال وی اوہدے کول رہیا تے اوس دیاں سوانیاں وی۔

سیرت دیاں مڈھلیاں کتاباں موجب حضور a نے جیہڑے مہاجر مسلماناں نوں جیہڑے انصار دا بھرا بنایا اوہ کچھ ایوں نیں۔

| مہاجرین | انصار |
|-------------------------------|---------------|
| جعفر بن ابی طالب | معاذ بن جبل |
| ابوبکر صدیق | خارجہ بن زید |
| عمر بن خطاب | عتبان بن مالک |
| ابوعبیدہ بن عبدالرحمن بن جراح | سعد بن معاذ |
| عبدالرحمن بن عوف | سعد بن ربیع |
| زبیر بن عوام | سلمہ بن سلامہ |

اوس بن ثابت
کعب بن مالک

ابی بن کعب
ابو ایوب خالد بن زید
عَبَّاد بن بشر
حنیفہ بن یمان (یاں ثابت بن قیس)
منذر بن عمر
عُویم بن ساعدہ
ابوالدرداء
ابوزویحہ عبداللہ بن عبدالرحمن
محمد بن مسلمہ
سہل بن حنیف
عاصم بن ثابت
عمیر بن ہمام
سفیان بن نسر
عبداللہ بن جبیر
عباس بن عبادہ
معاذ بن معص
رافع بن معلی
عبداللہ بن رواحہ
یزید بن حارث
سعد بن خیشمہ
خبیب بن عدی
قُتیبہ
حنظلہ بن ابی عامر
طلحہ بن زید

عثمان بن عفان
طلحہ بن عبید اللہ

! حیات محمد از محمد حسین ہیکل، صفحہ: ۲۶۵۔

سعد بن زید
مصعب بن عمیر
ابو حذیفہ بن عتبہ
عمار بن یاسر
ابو ذر غفاری
حاطب بن ابی بلتعہ
سلمان فارسی
بلال حبشی
سعد بن ابی وقاص
عبداللہ بن مسعود
عبداللہ بن جحش
عبیدہ بن حارث
طفیل بن حارث
خُصین بن حارث
عثمان بن مظعون
عتبہ بن عدوان
صفوان بن وہب
مقداد بن عمرو
ذی الشمالین
ابوسلمہ بن عبدالاسد
عامر بن ابی وقاص
عبداللہ بن مظعون
شماش بن عثمان
ارقم بن ابی الارقم

| | |
|----------------------|---------------------|
| معن بن عدی | زید بن خطاب |
| سعد بن زید الاشجلی | عمر بن سراقہ |
| مبشر بن عبد المنذر | عاقل بن بکیر |
| فروہ بن عمرو البیاضی | عبداللہ بن خرمہ |
| منذر بن محمد | خنیس ابن حذافہ |
| عبادہ بن خثیص | ابی سبرہ بن ابی رہم |
| زین بن المزیّن | مسطح بن اثاثہ |
| عبادہ بن صامت | ابی مرشد الغنوی |
| الحجز بن زیاد | عکاشہ بن محسن |
| حارث بن صمّہ | عامر بن فہیرہ |
| سراقہ بن عمرو | مہج |

اسنہاں نانواں تے جے ڈنگھی جھاتی پائیے تے پتا لگدا اے کہ ایہہ رشتا جوڑ دیاں نبی رحمتؐ نے بندیاں دی طبیعت، مزاج، خاندان، معاشی حالت تے نفسیات دے اصولاں نوں پیش نظر رکھیا سی۔

حضرت سعید بن زید عشرہ مبشرہ وچوں نیں۔ آپ دے والد زید جناب رسول خدا دے اعلان نبوت توں پہلاں ای اک اللہ والے رستے تے ٹرے ہوئے سن۔ ایہ وجہ اے کہ حضرت سعید نے وی اسلام دا نام اُن دیاں ہی لبیک آکھیا۔ آپ دی والدہ وی مسلمان ہو گئیاں سن۔ حضرت عمرو ہناں دی ترغیب نال ای اسلام ول راغب ہوئے سن۔ جویں کہ کچھ دسیا گیا اے آپ دی اخوت حضرت ابی بن کعب نال کیتی گئی جہناں نے ایہہ مرتبہ حاصل کیتا کہ حضرت عمر جے بندے وی آپ نوں سید المسلمین آکھدے سن۔ آپ نوں فن قرأت دا امام بنیا جاندا اے۔

حضرت ابو حذیفہ، عتبہ دے پتر سن جیہڑا قریش دا وڈا سردار سی۔ ایسے پاروں آپ نوں حضرت عباد بن بشر دا بھرا بنایا گیا جیہڑے قبیلہ اشعل دے سردار سن۔ حضرت ابو عبیدہ جراح جہناں نوں رسول اللہ نے امین الامت دا خطاب دتا سی، اک پاسے شام ورگا ملک فتح کرن دا حوصلہ رکھدے سن تے دُجے پاسے اسلام دے مقابلے وچ پیو پتر دا رشتا وی آپ دے نیڑے کوئی حیثیت نیں سی رکھدا۔ جدوں غزوہ بدر وچ جناب ابو عبیدہ دا، کافراں ولوں لڑن والے اپنے پیو نال آ مناسما ہوئیا تے اسلام تے اپنے والد نوں قربان کر دتا۔ آپ جے بندے دی تربیت وچ حضرت سعد بن معاذ دے گئے جیہڑے قبیلہ اوس دے رئیس اعظم سن۔ اوہناں وچ قربانی دا جذبا صاف دکھالی دیندا اے۔ بنو قریظہ مدینے وچ اوس دے حلیف سن تے عرب وچ حلیف نال رشتا تے تعلق اوہڈا ای معتبر جانیاندا سی جڈا کہ بھرایا پیو دا رشتا۔ پر جدوں غزوہ بنو قریظہ وچ یہودیاں نال جوڑ پیا تے سعد آکھن لگے کہ بنو قریظہ دے لوکو! ہن سب توں وڈا رشتا دین اسلام دا رشتا اے، ہن اکوای بھائی چارہ اے تے او دین دا بھائی چارہ اے، ہن اخوت نری اوہی اے جنوں اخوت اسلامی دا نام دتا گیا اے۔

بھائی چارے دا ایہہ رشتہ ایڈا متبرک تے معتبری کہ وصیت تے وراثت ایسے بنیاد تے ہون لگ پئی۔ ایہہ سلسلہ اوہدوں تیکر چلدا رہیا جدوں تیکر قرآن نے ایس توں وکھ حکم جاری نہ کر دتا۔

میشاق مدینہ..... پہلا تحریری دستور:

نبی رحمت اک دور اندیش سیاست دان وی سن۔ جو یں دی سیاسی سوچھ بوجھ آپ توں عطا کیتی گئی سی اُس دا کوئی دُجا بندہ تصور وی نہیں سی کر سکدا۔ اوس ویلے مدینے دے اندر تے آل دوالے جیہڑے سیاسی حالات سن اوہناں نوں سامنے رکھدیاں آپ نے ضروری سمجھیا کہ مدینے دے اندر اک سیاسی اکائی دا وجود قائم کیتا جاوے تاں جے نظم و ضبط وچ آسانی رہوے۔ آپ نے مدینے دے سارے سیاسی دھڑیاں نال گل بات کیتی۔ جس ماحول تے جس علاقے دے وچ ہر گل تلوار دی زبان نال کیتی جاندی سی او تھے اپنے سیاسی بکھیڑے مھیرن لئی قلم دا سہارا لینا چوکی اچر ج گل سی پر آپ دی سیانف نال مدینے دے سارے دھرم دھڑے لکھ پڑھ کے گل کرن تے تیار ہو گئے۔ اوہناں دھڑیاں وچکار جیہڑا معاہدہ ہو یا اوس نوں توارن وچ میثاق مدینہ دے نام نال یاد کیتا جاندا اے۔ تے ایہہ دنیا دی سیاسی توارن دا پہلا تحریری دستور منیا جاندا اے۔

شروع وچ مدینے دے یہودیوں دے تن ٹکڑے خاندان بنو قریظہ، بنو نضیر تے بنو قینقاع ایس معاہدے وچ رلت پاؤن توں گریز کر دے رے پر کچھ چراں پچھوں اوہ وی ایس میثاق وچ شامل ہو گئے۔ 1 ہولی ہولی آل دوال دے قبیلے وی نال رلدے گئے تے معاہدے دا گھیر کھلا ہوندا گیا۔ آپ ممکن تے مدینے دے وچکار وسیا کیتی بیٹھے قبیلے بنی حمزہ بن بکر بن عبدالمنف تیکر وی گئے تے اوہناں نوں معاہدے وچ شریک کر لیا۔ ہجرت توں اگلے ہی ورھے کوہ بواط دے نیڑے ڈیرے

لائی بیٹھے لوکاں نوں وی آپ نے دعوت دتی تے اوہناں نوں وی معاہدے وچ رلن تے راضی کر لیا۔ ایسے ورھے جمادی الآخر دے مہینے وچ آپ ذی العشرہ تشریف لے گئے۔ ایہہ تھاں نبیوع تے مدینے دے وچکار اے۔ او تھے دے وسنیک بنو مدج نال وی معاہدہ ہو گیا۔ 2

ایس معاہدے توں بعد آپ مدینے دی ریاست نوں امن تے سکون دی تھاں سمجھن لگ پئے تے ایوں ہن ساری توجہ دین دے کم نوں اگے ودھان تے صرف کیتی۔ بھاویں کچھ دھڑے تھوڑے ای چراں بعد گڑ بڑ کرن لگ پئے سن پر اوہدوں تیکر آپ نے پیر پکے کر لے ہوئے سن۔ یہودیوں نے وی اک ویلے ہٹ دھرمی دکھان دی کوشش کیتی پر منہ دی کھادی۔ اتھے ایہہ گل وی ضروری جا پدی اے کہ یہودیوں دے کئی سیانے بندے اپنی گل تے پہرا وی دیندے رے جو یں اپنے معاہدے دا لحاظ رکھدے ہو یاں مخیر یق نے جنگ اُحد وچ نبی اکرم دا ساتھ دتا۔ مکی دے کئی مشرک اوس نے قتل کیتے تے اخیر آپوں وی اپنی گل ویاندا نبی دی ذات تے قربان ہو یا تے اُحد دے میدان وچ ای اہل مکہ دے ہتھوں مار یا گیا۔ 3

میشاق مدینہ دیاں شقاں نوں وکھو وکھ مورخاں تے سیرت لکھیا راں نے وکھوں وکھ نظر نال ویکھیا اے۔ ابن ہشام نے ایس دیاں ۳۷ شقاں گکیاں نیں۔ مصر دے محمد حسین ہیکل نے وی ایس دیاں ۳۷ دفعات دسیاں نیں۔ قاضی سلمان منصور پوری نے ایس نو ۱۲ حصیاں وچ ونڈیا اے تے علامہ شبلی نعمانی نے صرف ۷ حصیاں وچ۔ ڈاکٹر محمد حمید اللہ نے ایس دستاویز

! حیات محمد از محمد حسین ہیکل اردو ترجمہ ادارہ ثقافت اسلامیہ لاہور صفحہ: ۲۷۰

@ زاد المعاد از ابن قیم جلد اول صفحہ: ۳۳۴

سیرت ابن ہشام، ادارہ اسلامیات لاہور۔ جلد اول صفحہ: ۳۴۷

دیاں ۵۲ دفعات دا ذکر کیتا اے۔ ڈاکٹر امان اللہ خان لکھدے نیں کہ اسیں اپنے پڑھنہاراں نوں، جیہڑے یورپی مآخذ داوی مطالعہ کر دے نیں، کسے الجھن توں بچاؤن لئی دفعات دی تعداد ۴۷ ہی رکھی اے 1 بہر حال ایس معاہدے نوں سمجھن لئی ایہ دفعات پڑھ لینا ای کافی اے:

- ۱۔ خون بہاتے فدیہ دا جیہڑا طریقہ لگا آؤندا اے اوہ ہن وی قائم روے گا۔
- ۲۔ یہود نوں مذہبی آزادی حاصل ہووے گی تے اوہناں دے مذہبی معاملات وچ کوئی دخل نہیں ہووے گا۔
- ۳۔ یہود تے مسلمان آپس وچ دوستانہ ملن ورتن رکھن گے۔
- ۴۔ یہود تے مسلماناں نوں جے کدرے لڑنا پیتاے ایہہ اک دُجے دی مدد کرن گے۔
- ۵۔ کوئی فریق قریش نوں امان نہیں دیوے گا۔
- ۶۔ جے مدینے تے کوئی حملہ ہوینا تے دونوں فریق رُل کے لڑن گے۔
- ۷۔ کسے دشمن نال جے کوئی اک فریق صلح کرے گا تے دُجے دی وی صلح سمجھی جاوے گی پر ایہہ شق مذہبی لڑائی تے لاگو نہیں ہووے گی۔
- ۸۔ مظلوم دی مدد کیتی جاوے گی۔
- ۹۔ مدینہ دارالامن اے تے اس دے وچ خون خرابہ حرام سمجھیا جاوے گا۔
- ۱۰۔ کسے اختلاف دی شکل وچ اللہ تے اوہدے رسول ول رجوع کیتا جاوے گا۔

میشاق مدینہ دی افادیت:

جویں کہ کچھ ذکر ہوینا اے مدینے دی آئینی ریاست دا ایہہ دستور اسلام دی وڈھیا ئی تے برتری دا اک میل پتھر ثابت ہوینا۔ ایس دی افادیت نوں اسیں ایوں ویکھ سکدے ہاں:

- ۱۔ ایس معاہدے پاروں مدینے وچ اک آئینی ریاست (State) دا مڈھ بچھاتے اوس ریاست دا مقتدر اعلیٰ محمد رسول اللہؐ نوں تسلیم کر لیا گیا۔ (چیتے رہوے کہ علم سیاسیات دے سیانے مقتدر اعلیٰ توں بنا ریاست نوں مکمل نہیں مَن دے)
- ۲۔ ایس معاہدے پاروں آپؐ نے اک عظیم مدبر تے سیاست دان وانگ وکھو وکھ عقیدے تے نظریے رکھن والے

۳۰

کھلے پھرے لوکاں نوں کمال دانش مندی تے سیانف نال اکٹھا کر دتا تے ایوں پہلی وار سیاسیات دے جدید اصولاں دے مطابق اک سیاسی وحدت دا مڈھ بچ گیا۔

۳۔ ایس میثاق نال سرکار دو عالم دی ذات اختیارات دا گڑھ بن گئی۔

۴۔ لوکائی نوں پتا لگ گیا کہ اصل مقتدر اعلیٰ رب دی ذات اے تے بند اوس دا نائب اے۔

۵۔ ایس معاہدے توں پتا لگا کہ اسلام سیاسی رواداری، مذہبی آزادی تے شہری حقوق دا علمبردار اے تے نالے اوہناں گلاں دی نشان دہی ہو گئی جہناں تے غیر مسلماناں نال عملی تعاون کیتا جاسکدا اے۔

! سیرت خیر الانام، دائرہ معارف اسلامیہ جامعہ پنجاب لاہور، تجا ایڈیشن صفحہ: ۳۳

۶۔ اک اچھے سیاسی تے فوجی اتحاد دی بنیاد مل گئی جیہڑا آون والے دنوں وچ وڈیاں وڈیاں سیاسی طاقتاں تے حاوی ثابت ہو گیا۔

۷۔ مدینے نوں حرم قرار دتا گیا تے ایوں مسلماناں نوں سکھ چین نصیب ہو گیا۔

۸۔ قبائل دی آپس دی خانہ جنگی دے خاتمے دی راہ کھل گئی۔

۹۔ مشرکین مکہ دی سیاسی طاقت اگے نہ ودھ سکی کیوں جے ایس معاہدے وچ آل دوالے دے قبیلے وی شامل ہو گئے سن۔

۱۰۔ لوکائی دی ایوں تربیت ہو گئی کہ اوہ اپنے آپ نوں کچھ طے شدہ اصولاں تے ضابطیاں دا پابند سمجھن لگ پئے تے انسانی قدراں دے احترام دا جذبا پیدا ہو گیا۔

۱۱۔ اک مضبوط اسلامی ریاست دا مڈھ بچ گیا تے صالح معاشرہ قائم ہو گیا۔

۱۲۔ جناب رسول خدا دے فیصلیاں نوں حتمی سمجھ کے آپ نوں چیف جسٹس تسلیم کر لیا گیا۔ 1

ایوں میثاق مدینہ نہ صرف اک جدید ریاست دا سبب بنیا سگوں معاشرے نوں اک نویکی، امن بھری تے سوہنی حیاتی گزارن دے ول سکھا گیا۔

میثاق مدینہ نرا اسلامی توارخ دا ای نہیں سگوں سیاسیات دی توارخ دا وی اک اچھا باب اے جہنوں اسیں جدید ریاست دی توارخ دے مڈھلے اکھر آکھ سکدے ہاں پر پتہ نہیں ایس دی اہمیت نوں مسلمان سیرت لکھیاں نے اوویں ہائی لائٹ کیوں نہیں کیتا جو ایس آئینی دستاویز نوں کرنا چاہیدا اے۔ ایس پہلے تحریری دستور توں بعد دے حالات نوں نامور فرانسیسی مستشرق میکسم روڈنس نے ایوں ویکھیا اے:

“Madina was now a state” a state of a rather special kind, but indubitably a state. It was a theocratic state, that is to say the supreme Power belonged to Allah Himself.” 2

”ہن مدینہ اک ریاست سی، بھانویں اک نویکی طرز دی ریاست سی پرسی بنا شبہ اک ریاست۔ ایہہ اک ریاست الہیہ سی جہدے وچ مقتدر اعلیٰ اللہ آپوں سی (تے محمد اُسدا نبی تے نائب)۔“

علم سیاسیات دے طالب علم جان دے نیں کہ لفظ State (ریاست) دی تعریف، تے اوس دے اجزائے ترکیبی کسے اچھے علاقے، آبادیاں حکومت نوں ریاست مَن لین دے رستے وچ رکاوٹ نیں جہدے وچ کوئی مقتدر نہ ہووے۔ غور کرو کہ میگزیم روڈسن میثاق توں بعد دے مدینے نوں ریاست وی مَن دے نیں تے ایہہ گل دی آکھ رے نیں کہ اوس ریاست دی "Supreme Power" یعنی مقتدر اعلیٰ خدا تعالیٰ دی اپنی ذات سی۔ ہن بے اسیں سمجھن دی کوشش کریئے تے ایہہ گل کوئی اوکھی نہیں جا پدی کہ جس ریاست دا مقتدر اعلیٰ خدا خود ہووے اوس وچ انصاف دا گھانا کوں ہوسکدا اے، تے جھتے انصاف ہووے او تھے کسے گل دی تھوڑ نہیں ہوندی۔

!ڈاکٹر امان اللہ خاں دے مقالے، میثاق مدینہ، توں ماخوذ۔

@Muhammad by Maxime Rodinson, Page:220

عالمی شہرت دے اک دُجے مستشرق ڈی۔ ایس۔ مارگولیتھ ایس دستاویز دا ذکر کر دیاں لکھدے نیں:

"The Purpose of the document is to arrange for the relations of the different communities inhabiting Madinah." 1

”ایس دستاویز دا مقصد مدینے وچ رہن والے وکھو وکھ قبیلیاں دے وچکار چنگی تعلق داری دا بندوبست کرنا سی۔“
ول ہاؤزن لکھدا اے:

The first arabic community with Sovereign Power was established by Muhammad (peace be upon Him) in the city of Madina, not on the basis of blood which naturally tends to diversity, but upon that of religion binding on all." 2

”پورے حکومتی اختیار دے نال، عرب وچ پہلی حکومت حضرت محمدؐ دے ہتھوں مدینے وچ قائم ہوئی پر خونی رشتیاں دی بنیاد تے نہیں، جیہڑے لامحالہ (اوڑک) جھگڑیاں دا مڈھ بنھ دے نیں سگن دین دی بنیاد تے، جیہڑا سمجھناں نوں اک نظر نال ویکھدا اے۔“

ڈاکٹر حمید اللہ میثاق مدینہ تے تبصرہ کر دیاں لکھدے نیں کہ ”اک نکلی جی وستی نوں، جہدے ۲۰ کو محلے سن، اک شہری مملکت دی شکل وچ منظم کیتا گیا تے اوس دی تھوڑی جی آبادی نوں، جہدے کئی نظریے تے کئی رنگ سن، اک پچیلے تے قابل عمل دستور پیٹھ، اک مرکز تے اکٹھیاں کر دتا۔ فیرواں دے تعاون نال شہر مدینہ وچ اک اجمہا سیاسی نظام قائم کر کے چلایا گیا جیہڑا بعد وچ ایشیا، یورپ تے افریقہ دے تن براعظماں تے کھلری وسیع تے زبردست شہنشاہیت دا بنا کسی رکاوٹ دے صدر مقام بن گیا۔“

ایہناں بزرگاں دے خیالاں تے آراء توں میثاق مدینہ دی اہمیت دا آسانی نال اندازا کیتا جاسکدا اے۔ ایس توں ایہہ گل وی غلط ہوندی جا پدی اے کہ مدنی زندگی دے مڈھلے ورھیاں وچ جناب محمدؐ نوں مدینے وچ اقتدار اعلیٰ حاصل نہیں سی۔ جے اقتدار اعلیٰ حاصل نہ ہوندا تے مستشرقین مدینے نوں کدے وی ”State“ دا نام نہ دیندے کیوں جے، جو یں کچھ دسیا گیا اے State یاں ریاست مقتدر اعلیٰ توں بغیر مکمل ای نہیں ہوندی۔

یہودی عالم تے سردار حصین بن سلام مسلمان ہو گئے:

یہود دا اک جید عالم تے سردار جس دا نام حصین سی، حضرت یوسف علیہ الصلوٰۃ والسلام دی اولاد وچوں سی 3 اوہ مسلمان ہو گیا تے سرکار دو عالم نے اوس دا نام عبداللہ رکھ دتا۔ عبداللہ آکھدے نیں کہ میں جدوں نبی رحمتؐ بارے گلاں سنیاں تے مینوں چوکی خوشی ہوئی۔ مینوں سمجھ لگ گئی سی، سگوں پک ہو گیا سی کہ ایہہ اوہی ہستی اے جہدیاں راہواں ویکھدیاں ساڈیاں اکھاں تھک گئیاں سن۔ میں اے دل دی گل کسے بندے نال نہیں سی کیتی، ایہتوں تیکر کہ آپؐ مدینے

!Muhammad and the Rise of Islam by D.S Margoliouth, P.228

@The Historians History of the world , vol- VIII. Page:291

#خیاء النبی از پیر محمد کرم شاہ الانزہری جلد سوم صفحہ: ۲۱۱۔

تشریف لے آئے۔ عبداللہ گل اگے ٹور دیاں آکھدے نیں کہ کجھ دن پہلوں جدوں سرکارؐ قبا وچ اپڑے تے اک بندے نے سانوں دی ایہہ گل آسنائی۔ میں اوس ویلے اپنے باغ وچ کھجور دے اک رکھ تے چڑھیا ہو گیا ساں۔ گل سن کے مینوں ایڈا چاء چڑھیا بئی میں رکھ تے بیٹھے بیٹھے ای نعرہ ماریا۔ میری پھوپھی خالدہ بنت حارث، جیہڑی کھجور تھلے بیٹھی سی، آکھن لگی:

”حصین! جے تینوں کدھرے حضرت موسیٰ دے آون دی خبر ملدی تے توں فیروی ایڈا نعرہ نہیں سی مارنا۔“
 ”پر پھوپھی! ایہہ وی تے جناب موسیٰ دے بھرا نیں۔ رب دی سونہہ ایہہ موسیٰ دے دین تے نیں تے اوہی کجھ لے کے آئے نیں جو موسیٰ لیاے سن۔“ میں آکھیا۔

”اچھا۔ تے کیہہ ایہہ اوہی نبی نیں جنہاں ولوں آکھیا جاندا سی کہ اوہ قیامت دے نیڑے آون گے؟“ پھوپھی نے پچھیا۔ ”تے ہور کیہہ؟“ میں جواب دتا۔

ایہ تے فیرو بڑی سوہنی گل اے۔ پھوپھی خالدہ نے آکھیا۔
 میں کھجور توں تھلے لتھاتے سدھا حضور دی زیارت لئی قبا وچ لڑ پیا۔ میں جدوں اوس سوہنے مکھڑے دی زیارت کیتی تے میرے دل نے واج وئی کہ ایہہ مکھڑا کسے جھوٹے دا تے نہیں ہوسکدا۔ میں اے حضور دی زیارت دے نشے وچ ہی ساں تے میرے کنیں واج پئی۔ سرکارؐ فرما رہے سن:

{أَفْشُوا السَّلَامَ وَأَطِيعُوا الطَّعَامَ وَصَلُّوا أَلَا رَحَامَ وَصَلُّوا بِاللَّيْلِ وَالنَّاسُ نِيَامٌ تَدْخُلُوا الْجَنَّةَ
 بِالسَّلَامِ}

”لوکا ئی نوں کثرت نال سلام آکھو تے امن سلامتی نوں ودھاؤ۔ بھکیاں نوں ٹکر کھواؤ، ورت ورتا چنگار کھوتے اوہدوں نماز پڑھو جدوں لوکا ئی سستی ہووے، تسیں سلامتی نال جنت وچ داخل ہو جاؤ گے۔“

ایہہ ارشاد سن کے میں ہور پکا ہو گیا تے اخیر اسلام قبول لیا۔ تے فیروں میں اپنے گھر پڑت آیا۔ میرے گھر والیاں وی اسلام قبول کر لیا۔ پھوپھی خالدہ وی مسلمان ہو گئی پر گھروں باہر ایہہ گل میں کسے نوں نہ دسی۔ گھر والیاں نوں صراط مستقیم

و کھان توں بعد میں فیہ حضورؐ دی خدمت وچ حاضر ہوئی تے عرض کیتی، یا رسول اللہ! میں گواہی دیندا ہاں کہ تسیں اللہ دے سچے نبی اوتے جیہڑا دین تسیں لے کے آئے ہو اوہ حق تے سچ اے۔ یہودی ایہہ گل جان دے نیں کہ میں اوہناں دا عالم تے سردار ہاں تے اوہناں دے سردار دا پتر ہاں۔ حضور تسیں اوہناں نوں سَدّو تے اوہناں کولوں میرے ولوں کجھ پچھو۔ عبد اللہ دی خواہش تے سرکار نے عبد اللہ دے قبیلے (بنو قینقاع) دے بندیاں نوں سدیا تے عبد اللہ نوں اک وکھری تھان تے بٹھا دتا۔ بنو قینقاع آئے تے حضورؐ نے پچھیا کہ سجنو! عبد اللہ بن سلام ولوں تہاڈی کیہہ رائے ہے؟

”اوہ ساڈا سردار، ساڈے سردار دا پتر، ساڈا سب توں وڈا عالم تے ساڈے سب توں وڈے عالم دا پتر اے۔“

”اچھا جے او مسلمان ہو جاوے تے تسیں کیہہ کرو گے، آپؐ نے پچھیا۔

حَاشَا لِلّٰہِ اوہ کوں مسلمان ہو سکدا اے۔ اوہناں جواب دتا۔

”ابن سلام باہر آ جاؤ“ حضورؐ نے واج مار کے عبد اللہ نوں سدّ لیا۔

عبد اللہ باہر آئے تو اوہناں نے یہودیاں نوں آکھیا ”او یہودیو! اللہ توں ڈرو۔ تسیں جان دے او محمد اللہ دے رسول نیں تے دین حق لے کے آئے نیں۔ فیر تسیں کیوں بھٹلے پھر دے او؟“

”توں جھوٹ بول رہیا ایس۔ توں فسادی ایس نہ تیرا پیووی فسادی سی۔“ یہودیاں نے آکھیا:

جناب عبد اللہ نے عرض کیتی ”اے اللہ دے رسول! میرے ولوں سچی گل تے ایہناں نے پہلوں کر دتی سی۔ میرے مسلمان ہون دا اُن کے تے ایہناں ایہی کجھ کرنا سی۔“ پر حضورؐ توں تے عبد اللہ دی اصل شخصیت دا پتا لگ ای گیا سی۔

ڈی۔ ایس۔ مارگو لیتھ لکھدے نیں کہ عبد اللہ دے نال اُس دیہاڑے چھ (۶) ہور بندے دی مسلمان ہو گئے سن

جنہاں وچ اوہناں دے دو بھتیجے، اسعد بن کعب، اُسید بن کعب، ثعلبہ بن قیس تے یاسین بن یمن شامل سن۔ 1

اُم المؤمنین حضرت عائشہ صدیقہ دی رخصتی:

حضرت خدیجہ دی وفات توں بعد نبی اکرمؐ دا پریشان تے اداس رہنا اک قدر قیامت سی۔ حضرت خدیجہ جی با وفا تے محبوب بیوی دا ذکر نبی اکرمؐ ہمیش ہی کردے رہے تے ایوں کردے رہے کہ حضرت عائشہ فرماندیاں نیں کہ مینوں خدیجہ تے رشتہ آؤندا سی۔ نبی اکرمؐ دی خانگی زندگی وچ اک طرحاں دا گھانا جھیا ویکھ کے جناب خولہ بنت حکیم نے آپؐ نوں صلاح دتی کہ سرکار! ویاہ کر لوؤ۔ پچھیا ”کہدے نال؟“

”بیوہ نال کرنا چاہو تے سودہ نال، تے جے کسے کواری کڑی نال کرنا چاہو تے عائشہ بنت ابوبکر جو ہے۔“ خولہ نے

جواب دتا۔

”ٹھیک اے دوواں گھراں نال گل کر کے ویکھ لوؤ۔“ حضور راضی ہو گئے۔ ایوں جا پدا اے کہ نبی اکرمؐ تے جناب خولہ، دوواں نوں ایہہ احساس سی کہ جناب عائشہ صدیقہ دی جیہڑی بن مطعم نال گل توڑ نہیں چڑھنی کیوں جے جناب عائشہ تے ابوبکر صدیق جے پہلے مسلمان تے محمد رسول اللہ ﷺ دے مخلص تے سچے یار دی دھی سن جدوں کہ جیہڑی مکہ دے اوہناں منڈیاں دے جتھے نال رلیا ہوئی سی جہدے وچ خالد بن ولید، عکرمہ بن ابوجہل تے عمرو بن العاص ورگے منڈے اسلام

دشمنی وچ ہر حربہ ورت رے سن۔ ایس لئی خولہ بنت حکیم نے گل ٹور دتی۔ جیہڑا خنوادہ ہن ایہی چاہندا سی کہ ابو بکر صدیق جے بندے دی دھی اوہناں دی نوہ نہ بنے تے جناب صدیق وی کسے مشرک نوں اپنا جوائی نہیں سن بنانا چاہندے۔ ایوں حضرت عائشہ دی رخصتی توں پہلاں ای جیہڑی توں طلاق لے کے جناب عائشہ دا نکاح نبی اکرمؐ نال کر دتا گیا پر کئی اک گلاں رخصتی دے رستے وچ رکاوٹ بنیاں رہیاں جنہاں وچ پہلی گل تے ایہہ سی کہ مکئی دے حالات آپؐ طئی سازگار نہیں رے سن، دُجی گل ایہہ سی کہ آپؐ نوں کسے وی ویلے ہجرت دا حکم مل سکدا سی تے تہی گل مالی مسائل وی سن۔

مدینے وچ تشریف آوری توں کجھ چر بعد جدوں حالات کجھ نارمل ہوئے، مسجد نبوی اساری گئی تے میثاق مدینہ تے دستخط ہو چکے سن اوہدوں حضرت ابو بکرؓ نے آپؐ نوں گزارش کیتی کہ اپنی زوجہ نوں اپنے گھر لے جاؤ۔ آپؐ نے وی یقیناً ایہہ

! محمد ایڈ دی رائز آف اسلام، صفحہ: ۲۹۹

سمجھیا ہووے گا کہ جناب ابو بکرؓ جو ان دھی نوں بلا وجہ گھر بٹھائی رکھنا مناسب نہیں جد کہ اُس دا نکاح وی ہو چکیا ہووے تے خاوند لئی رخصتی کرن وچ کوئی رکاوٹ وی نہ ہووے۔ ایس لئی آپؐ ہجرت توں کوئی ست مہینے بعد جناب عائشہ نوں اپنے گھر لے آئے۔ اوہدوں جناب صدیقہ دی عمر کوئی ۱۹ سال سی۔

جناب عائشہ صدیقہ دی عمر:

میرے عزیز تے محترم پڑھنہاراں وچوں چو کہے ایہہ گل پہلی واری پڑھ رے ہوں گے کہ رخصتی دے وقت جناب عائشہ صدیقہ دی عمر ۱۹ سال سی۔ بخاری شریف جی حدیث دی کتاب تے سیرت دیاں ڈھیر ساریاں معتبر کتاباں پوری طاقت نال ایہہ گل آکھ رہیاں نیں کہ نکاح دے ویلے حضرت عائشہ دی عمر ۶ سال تے رخصتی ویلے ۹ سال سی۔ فیہ ۹ سال دی عمر دی رخصتی نوں جائز تے درست ثابت کرن لئی ساڈے بزرگاں نے جیہڑا ٹل لایا اے اوہ اپنی تھاں پر جے کر جائکاری کریے تے کھوج تے پرکھ پڑچول دے صحیح رستے تے ٹریے تے فیہ اپنے قابل احترام بزرگاں دی ۹ ورہیاں دی عمر والی گل نوں من دی کوئی وجہ نظر نہیں آؤندی۔ آؤ ویکھدے ہاں کہ کیوں؟

1۔ چھ (۶) تے نو (۹) ورہیاں والی روایت دا حضرت عائشہ دے نکاح توں ۱۸۵ اورھے بعد تیکر کوئی وجود نظر نہیں آؤندا۔ جیزے لوکی ۱۸۵ھ توں اگدیں دنیا توں چلانا کر گئے اوہ ایس روایت توں بلکل بے خبر گئے۔ امام بخاری تیکر ایہہ روایت تہیجی صدی ہجری دے دُجے عشرے وچ پچی کیوں جے اوہ پہلی واری ۲۱۲ھ وچ عراق گئے۔ دو سو دس (۲۱۰) ورہیاں توں زیادہ وقت گزر جان دے باوجود حضرت عائشہ دے کم سنی دے ویاہ دا کسے کوئی ذکر نہیں کیتا۔ تے پہلیاں دو صدیاں دیاں کتاباں اس بارے بلکل خاموش نیں۔ مثلاً مسانید امام اعظم، سیرت ابن اسحاق، جامع معمر، مؤطا امام مالک، مؤطا امام محمد، مسند ابو داؤد، مسند امام احمد تے طبقات ابن سعد ورگیاں کتاباں دے عظیم الشان لکھیاریس گل دا ذکر نہ کر سکے۔ تے فیہراچن چیت میڈا ان عراق کہانی نے جناب عائشہ صدیقہ نوں ۱۹ توں ۹ سال دا بنادتا۔

2۔ متقدمین دے نزدیک حضرت عائشہ سابق الایمان نیں۔ حضرت خدیجہ توں بعد بعثت دے مڈھلے دناں وچ

جیہڑیاں پیہیاں نے اسلام قبولیا اوہ حضرت سمیعہ، اُم ایمن، اسماء بنت ابوبکر، عائشہ بنت ابوبکر تے اُم الفضل نیں۔ جے رخصتی دے ویلے حضرت عائشہ دی عمر نو ورھے مئی جاوے تے اس دا مطلب ایہہ ہے کہ آپ ۵ نبوی وچ پیدا ہوئیاں تے جے آپ ۵ نبوی وچ پیدا ہوئیاں سن تے اوہ عائشہ بنت ابوبکر کیہڑی سی جے حضرت ابوبکر دے نال ای اسلام قبول کر لیا سی؟

3۔ مطعم بن عدی نام دا سردار مکی دے ٹکڑے تے زور اور بندیاں وچ گنیا جاندا سی۔ جناب عائشہ دا نکاح مطعم دے پتر جبر نال ہو چکیا سی۔ جبر چنگا گھبر و جوان تے زور اور منڈا سی تے اوس زمانے دے مکی دے متکبر غنڈیاں وچ اوس دا بیٹھن اٹھن سی۔ اخیر کیہہ وجہ سی، تے مطعم دی کیہڑی مجبوری سی کہ اوس نوں اپنے پتر لئی سارے مکی وچوں کوئی اٹھر ٹیار نہ لہھ سکی تے اوہ ۶/۵ ورھیاں دی اک بالڑی نال پتر دا نکاح کر کے ہن اوس دے جوان ہون دی اڈیک لائی بیٹھاسی؟ چیتے رہوے کہ ایہہ اوہی جبر اے جے جنگ اُحد وچ اپنے غلام نوں آکھیا سی کہ جے توں حمزہ نوں قتل کر دیویں تے توں آزاداں۔ تے فیرایوں ہی ہوئیا اوس غلام نے جناب حمزہ نوں شہید کر کے آزادی حاصل کر لئی۔

۴۔ جدوں خولہ بنت حکیم نے سرکار عالم نوں ویاہ دی صلاح دتی تے اوہ دوں جناب خولہ آپ دا حضرت سودہ تے حضرت عائشہ دوواں نال ویاہ نہیں کرنا چاہندے سن، سگوں خولہ نے تے ایہ گل آکھی سی کہ جے بیوہ نال کرنا چاہو تے سودہ بہتر اے تے جے کنواری نال کرنا چاہو تے عائشہ ورگی کوئی نہیں۔ ہن سوال ایہہ پیدا ہوندا اے کہ اک پاسے تے خولہ ایہہ محسوس کر ری اے کہ حضور دا گھر و سنا چاہیدا اے تے دُجے پاسے اک چھہ (۶) سالہ بچی نال نکاح دی ترغیب دے ری اے۔ کیہ عقل ایس گل نوں من سکدی اے؟ تے کیہ اک نو (۹) ورھیاں دی بالڑی نبوت دی ٹنگڑی ذمہ داری سنبھال وچ نبی آخر واطے کوئی مددگار ثابت ہو سکدی سی؟

۵۔ جدوں جناب خولہ نے حضرت ابوبکر اگے جناب عائشہ دے رشتے دا ذکر کیتا تے صدیق نے آکھیا کہ عائشہ تے حضور دی بھتیجی اے، ایہہ نکاح کوں ہو سکدا اے؟ کیہ ایہہ جواب چوکھا چنگا نہیں سی کہ عائشہ اے ۶ ورھیاں دی بالڑی اے، تے بھلا عرب وچ کدے ایس عمر دیاں بالڑیاں دے نکاح یاں ویاہ دا رواج لبھدا اے؟ پر گل ایہہ ہے کہ عائشہ چھہ ورھیاں دیاں ہندیاں تے تاں آکھدے نا۔

۶۔ ہجرت توں بعد مدینے دے حالات نارمل ہوئے تے جناب صدیق اکبر نے رسول خدا نوں آپوں پچھیا کہ تئیں اپنی گھر والی نوں اپنے گھر کیوں نہیں لیا رے تے آپ نے ایہہ جواب نہیں دتا کہ عائشہ تے اے بالڑی اے سگوں ایہہ آکھیا کہ یار جی! حق مہر دی تھوڑا اے، پلے کوئی شے ہووے گی تے تاں ای گل بنے گی نا! ایہہ سن کے جناب ابو بکر نے ۵۰۰ درہم قرض دے طور تے آپ ول گھل دتے۔ ایہی رقم آپ نے مہر دے دتی۔

۷۔ صحیح مسلم وچ جنگ بدر دے حوالے نال حضرت عائشہ توں اک روایت اے کہ کسے بندے نے نبی اکرم نوں مدد دی پیش کش کیتی تے آپ نے پچھیا کہ کیہ توں اللہ تے اُس دے رسول تے ایمان رکھدا ایں؟ اوس نے آکھیا کہ نہیں۔ تے

آپ نے فرمایا کہ مینوں کے مشرک توں حمایت دی لوڑ نہیں۔ اوہ تن واری آیا تے تبجی واری اوس نے آکھیا کہ ہاں، میں اللہ تے اُس دے رسول تے ایمان رکھدا ہاں۔ ایہہ سن کے آپ نے فرمایا کہ ہن توں ساڈے نال ٹرسکدا ایں۔ ایس روایت توں پتا لگدا اے کہ جناب عائشہ جنگ بدر وچ شریک سن۔ دُجی گل ایہ ہے کہ حضرت عمر نے اپنے دُور خلافت وچ جدوں صحابہ دے وظائف مقرر کیے سن تے جنگ بدر وچ حصّہ لکین والیاں دا وظیفہ دُجیاں توں چوکھا مقرر کیتا سی۔ ازواجِ مطہرات وچوں سب توں چوکھا وظیفہ حضرت عائشہ دے مقرر ہو یا جس دی وجہ آپ دا جنگ بدر وچ شریک ہونا سی۔

۸۔ امام بخاری جنہاں نے ۶ تے ۹ ورھیاں والی روایت نقل کیتی اے اوہناں دی اپنی تے اوہی کتاب ایس گل دی گواہی دیندی اے کہ حضرت عائشہ جنگ اُحد وچ وی شریک سن۔ لکھدے نیں کہ اُمّ سلیم تے عائشہ بنت ابی بکر نے مشکاں اپنی اپنی کنڈ تے چکیاں سن تے غازیاں دے مونہاں نال لائیاں سن یعنی غازیاں نوں پانی پلا رہیاں سن۔ ایس موقع تے پڑھنہاراں نوں ایہہ گل چیتے کرا دینا ضروری جا پدی اے کہ غزوہ اُحد وچ حضرت عمر دے پتر عبداللہ، سمرہ بن جندب تے زید بن ثابت نوں شرکت کرن دی صرف ایس لئی اجازت نہیں ملی سی کہ اوہناں دیاں عمر اے ۱۲، ۱۴ ورھے سن۔ سوچن دی گل ایہ ہے کہ ۱۴ سالوں دے نوجوان منڈے نوں تے میدان جنگ ول دھن دی اجازت نہیں ملی پر ۱۰ سالوں دی اک کڑی نوں نہ صرف اجازت مل گئی سگوں اوس نے عالم اسلام دی سب توں چوکھی خوفناک جنگ وچ جرأت تے دلیری دا مظاہرہ وی کیتا۔ کیہہ ایس گل نوں سچ جج عقل من دی اے کہ ایسا کم ۱۰ ورھیاں دی کوئی بالڑی کرسکدی اے؟

۹۔ تاریخ طبری دے مؤلف محمد بن جریر طبری حضرت ابو بکر صدیق دے حالات وچ لکھدے نیں کہ ابو بکر نے زمانہ جاہلیت وچ دو نکاح کیے، اک قتیلہ نال جہدے بطن وچوں عبداللہ تے اسماء پیدا ہوئے تے دُجا اُمّ رومان نال جہدے بطن وچوں عائشہ تے عبدالرحمن پیدا ہوئے۔ ایہہ ساری اولاد (چاروں بہن بھرا) زمانہ جاہلیت وچ پیدا ہوئی۔ ہن ایہہ دن دی لوڑ نہیں کہ زمانہ جاہلیت کس زمانے نوں آکھدے نیں۔ مسلماناں دا بچہ بچہ ایہہ گل جان دا اے کہ دور جاہلیت بعثت نبوی توں پہلاں دا دور اے۔ ایسے گل نوں اگے تورا دیاں ایس بخاری شریف ول فیر رجوع کر دے ہاں۔ سورہ قمر دی تفسیر دے باب وچ امام بخاری لکھدے نیں کہ ام المؤمنین عائشہ فرماندیاں نیں کہ مکئی وچ جدوں ایہہ آیت نازل ہوئی سی تے میں اوہدوں بالڑی ساں تے کھیڈاں کھیڈ دی ہوندی ساں:

{بَلِ السَّاعَةُ مَوْعِدُهُمْ وَالسَّاعَةُ أَذْهَىٰ وَأَمَرٌ} (القمر: ۴۶)

مفسرین دا بیان اے کہ سورہ القمر ۴ نبوی وچ نازل ہوئی۔ ایس سورت دے مضمون توں وی ایس گل دی تائید ہوندی اے کہ ایہہ گل اوسے دور دی ہوسکدی اے۔ ہن غور کرو کہ جے رخصتی دے ویلے جناب عائشہ دی عمر نو سال سی تے ایہہ مطلب اے کہ ہجرت دے ویلے ۸ سال سی۔ تے جے ہجرت دے ویلے ۸ سال سی تے ایس دا مطلب ایہہ ہے کہ اُمّ المؤمنین دا سن پیدائش ۵ نبوی اے۔ فیر، کیہہ ایہہ سوال پیدا نہیں ہوندا کہ سن ۴ نبوی وچ ایس آیت دے نزول دے

ویلے کھیڈ دی پھر دی بالڑی کیہڑی عائشہ سی؟

ایہ فقیر اُمید رکھدا اے کہ چھیتی ای ساڈے علماء تے مؤلفین ایس گل نوں سمجھ لین گے کہ تیجی صدی ہجری وچ کسے غلطی پاروں یا کسے خاص مقصد لئی عراق وچ جہڑی داستان گھڑی گئی سی اوہ جھوٹ دے پلندے توں سوا کجھ نہیں، کیوں جے جناب ہشام ۱۳۲ھ وچ اکہتر (۷۱) ورہیاں دی عمر وچ عراق گئے۔ جے ایہہ گل ٹھیک ہوندى تے اکہتر ورہیاں دی حیاتی تیکر کوئی تے اجہیا بندہ ہوندا جیہڑا مدینے وچ اوہناں توں ایہہ داستان نقل کردا۔ ایس اپنی اس بحث نوں جناب ہشام دے ای ایس قول نال توڑ چاھڑ دے ہاں کہ ”جدوں کوئی عراقی تھاڈے آگے اک ہزار حدیثاں بیان کرے تے نو سونوے (۹۹۰) زمین تے سٹ مارو تے باقی دساں وچ شک کردے رہو۔“

ابوقیس صرمہ دا قبول اسلام:

ابن اسحاق لکھدے نیں کہ جدوں رسول اکرم مدینے تشریف لیائے تے کجھ چراں پچھوں بنو نجار وچوں اک بندہ آپدی خدمت وچ حاضر ہوئی تے ایمان لے آیا۔ اوس نے دور جاہلیت وچ ای بت پرستی چھڈ دتی سی۔ جنابت دا غسل کرداسی تے حیض دے دنوں وچ عورت نوں مکروہ جان داسی۔ اک ککی جی مسیت بنا کے اوہدے وچ بیٹھ گیا سی جہدے وچ کوئی ناپاک حالت دا بندہ نہیں سی جاسکدا۔ اوہ آکھداسی کہ میں ابراہیم دے رب دی عبادت کردا ہاں۔ اوہ چنگا شاعری سی تے مسلمان ہو جان توں بعد اپنے شعراں وچ لوکاں نوں توحید تے نیک کماں ول رغبت دی دواندار ہیا۔ ابن ہشام آکھدے نیں کہ اوہ نیک بخت بندہ ابوقیس صرمہ بن ابی انس بن عدی بن نجاری۔

حضرت عبداللہ بن زبیر دی ولادت:

ہجرت مدینہ توں بعد کجھ چراں تیکر کسے مسلمان دے گھر وچ کوئی بچہ پیدا نہ ہوئی۔ ایہہ اک اتفاق توں وڈھ کوئی گل نہیں سی پر یہودیوں نے ایہ گل مشہور کر دتی کہ اوہناں نے جادو کر کے مسلماناں دیاں سوانیاں نوں بانجھ کر دتا اے تے ہن کسے ول دھی پتر دا سوال ای پیدا نہیں ہوندا۔ کجھ مسلمان جنہاں دا جادو ٹوٹنے تے چوکھا یقین سی اوہ چوکھے پریشان ہوئے۔ ایہو جے دنوں وچ حضرت زبیر نوں رب نے پتر دتا تے ایوں یہودیوں دے پروپیگنڈے دا جادو ٹٹ گیا۔ نویں جے بال دا نام عبداللہ رکھیا گیا۔ عبداللہ دی والدہ حضرت ابو بکر دی دھی تے حضرت عائشہ دی بہن اسماء سن۔ کجھ ہی چراں پچھوں انصاری مسلماناں وچ وی اک بچے نے جنم لیا۔ اوہ بچہ نعمان بن بشیر سی۔

حضرت کلثوم تے اسعد بن زرارہ چلانا کر گئے:

حضرت کلثوم بن ہدم قبیلہ بنی اوس دے فرد سن۔ ہجرت مدینہ توں پہلاں ای مسلمان ہو چکے سن۔ آپ قبا دی وتی دے وسنیک سن۔ قبا وچ حضور دی میزبانی دا شرف دی حاصل کر چکے سن۔ آپ پکی عمر دے بزرگ سن۔ ہجرت دے پہلے ہی ورھے بڑھاپے تے بیماری پاروں چلانا کر گئے۔ تھوڑے ای چیر بعد اک دُجے نامور صحابی ابو امامہ اسعد بن زرارہ وی فوت ہو گئے۔ اسعد اوہناں چھ خوش نصیب بندیاں وچوں سن جنہاں سب توں پہلوں مکہ جاکے حضور دے ہتھ تے بیعت کیتی سی۔ ایہہ اعزاز وی اوہناں نوں حاصل سی کہ اوہناں مدینے آکے سب توں پہلاں جمعہ دی نماز قائم کیتی۔

اسعد بن زرارہ بنونجار دے نقیب وی سن۔ آپ چلانا کر گئے تے بنونجار نے حضور دی خدمت وچ گزارش کیتی کہ ایس منصب تے کسے دُجے نوں فائز کیتا جاوے۔ بنونجار حضور دا نانا قبیلہ سی، آپ نے فرمایا کہ بنونجار دا نقیب میں خود ہاں۔ ایوں بنونجار تے خوش ہو گئے پر ایہناں دو بزرگاں دی وفات تے نبی اکرمؐ پریشان تے اُداس ہو گئے۔ ایس صورت حال وچ مدینے دے یہودیوں تے کجھ منافقاں نے ایہہ طعنہ دینا شروع کر دتا کہ جے محمدؐ، اللہ دے پیغمبر ہوندے تے اوہناں نوں ایویں دے صدمے کیوں پہنچدے۔ ایہہ گل آپؐ تیکر اپڑی تے آپؐ نے فرمایا کہ میں تے بلکل کوئی اختیار نہیں رکھدا۔ زندگی موت تے رب دے ہتھ وچ اے۔ پر ہویا ایہہ کہ اوہناں دناں وچ ای کافراں دے وی دو ٹکڑے بندے ولید بن مغیرہ تے عاص بن وائل وی چلانا کر گئے۔ اوہناں دی موت نال مشرکاں دیاں زباناں بند ہو گئیاں۔ چیتے رہوے کہ ایہہ دوویں کافر سردار بالترتیب حضرت خالد بن ولید تے عمرو بن عاص جے عظیم مسلمان سپہ سالاراں دے والد سن۔

زکوٰۃ دی فرضیت تے دُجے حکم:

مدینے دے پہلے ورھے وچ ای جدوں مسلماناں نوں کجھ سکھ دا ساہ نصیب ہوئیا تے زکوٰۃ، روزہ تے حدود و تعزیرات دا حکم وی مل گیا 1 ہن تیکر نمازاں وچ صرف دو رکعتاں سن تے سن اچھ وچ ظہر، عصر تے عشاء دیاں چار چار ہو گئیاں پر سفر وچ اوہی دو رکعتاں دا حکم قائم رہیا۔ 2

یہودیوں تے منافقاں دے نبی رحمتؐ نال مجادلے:

مدینے وچ بھانویں اوس و خزرج دے چوکھے لوکی مسلمان ہو چکے سن تے بھانویں یہودیوں تیکر وی نور اسلام دیاں کرناں اپنا اثر دکھارہیاں سن پر فیروسی اچے بوہت سارے اچھے ٹکڑے لوکی مدینے وچ موجود سن جنہاں دی نیت دی کھوٹ تے ہٹ دھرمی اسلام دے پھلدے بوٹے دیاں جڑاں وڈن دا سبب بن ری سی۔ یہودی سردار عبداللہ دادل تے اسلام دی روشنی نال منور ہو گیا پر کیرہہ کیتا جاندا کہ خزرجی عبداللہ سب کجھ جانن دے باوجود دین اسلام تے محمد رسول اللہ نال ایس پاروں اپنی کہڑ نہ چھڈ سکیا کہ اوس دی چوہدر ماری گئی سی تے اوس و خزرج نے اوس نوں اپنا سانجھا سردار بناؤن لئی جیہڑا سونے دا تاج اوس دے سر تے رکھنا سی اوہ اوس نوں کدے وی نصیب نہ ہوئیا۔ ایوں عبداللہ بن اُبی، اوس و خزرج دے دُجے منافق تے خاص طور تے یہود مدینہ کسے نہ کسے طرحاں اسلام تے تنقید کر دے رے تے سرکار دو عالم نال مجادلے نوں اپنا حق سمجھدے رے۔

بنی اسرائیل نوں اللہ تعالیٰ نے حضرت موسیٰؑ جیہا جلیل القدر رسول تے تورات جی کتاب عطا کیتی سی۔ ایس قوم نے جناب موسیٰؑ دی قدر نہ پچھانی تے نہ ای تورات توں کوئی فیدہ چکیا۔ حضرت موسیٰؑ توں بعد آؤن والے نبیاں دے نال وی اوہناں دے سلوک بندے دے پتراں والا نہیں سی سگوں اپنے راہبراں تے ظلم نوں اوہناں وطیرہ بنائی رکھیا۔ اخیر بخت نصر دی شکل وچ اوہناں تے عذاب الہی نازل ہوئیا۔ اوس نے نہ کوئی وڈیرا بندا ویکھیا تے نہ سوانی۔ بخت نصر دے تیراں تے تلواراں دے اگے جیہڑاوی آیا بس موت ای اُس دی تقدیر بنی۔ اوس نے بھیڑاں تے بکریاں وانگ یہودیوں نوں ذبح کیتا تے لکھاں نوں جنگی قیدی بنا کے اپنے نال بابل لے گیا۔ اوس توں بعد ایہہ دنیا دے مختلف علاقیاں وچ کھلر کے

ذلت تے وچارگی نال حیاتی دے دن کٹ دے رے۔ دکھاں تے مصیبتاں دے دناں وچ جناب موسیٰ دا ای اک فرمان اوہناں نوں اُمید دی کرن بن کے دس داسی تے اوس نوں یاد کر کر کے اوہ چنگے دناں تے حیاتی دی اُڈیک لائی بیٹھن۔ جناب موسیٰ نے اپنی قوم نوں اک وعظ وچ ایہہ گل دسی سی:

”تے خداوند نے مینوں آکھیا میں اوہناں واسطے، اوہناں دے بھراواں وچوں تیرے وانگ اک نبی پیدا کراں گا تے اپنا کلام اوس دے منہ وچ پاواں گا تے اوہ اوہناں نوں اوہی حکم دے گا جیہڑا میں آکھاں گا۔ تے جیہڑا کوئی میریاں اوہناں گلاں نوں، جیہڑیاں میرا نبی میرا نام لے کے کرے گا، نہ سُنے گا تے میں فیر اوہناں دا حساب اوس توں لوں گا۔“ (کتاب استثناء باب ۱۸ آیت ۱۷ تا ۱۹)

یہودیوں نوں ایس گل دا پکا یقین سی کہ جو جناب موسیٰ نے آکھیا اے اوہ ضرور پورا ہووے گا تے ایوں اوہناں دی گئے

! حیات محمد از محمد حسین بیگل صفحہ: ۲۷۱

@ سیرت النبی از شبلی نعمانی جلد اول صفحہ: ۱۷۷

دناں دی شان و شوکت فیر بحال ہو جاوے گی۔ اوہ ایہہ سمجھدے سن کہ بس اخیر نبی دے آون دی دیر اے، اوس دی غلامی دا طوق اپنے گل وچ پاواں گے تے فیر پوری دنیا ساڈی غلام ہو جاوے گی۔ اڈیکن ہار یہود جدوں دُجے قبیلیاں تے مشرکاں نال جنگاں لڑدے تے آون والے نبی دے واسطے نال رب تعالیٰ دی بارگاہ وچ فتح و نصرت دیاں دعاواں منگدے جہناں نوں رب قبول کر لیندا۔ یہودی، مدینے دے وستیک اوس تے خزر ج قبیلیاں نال جھگڑیاں ویلے ایہہ تڑیاں وی لاندے ہوندے سن کہ بس ویلا آگیا، ساڈے نبی دے ظہور دا، ویکھو فیر اوس دے جھنڈے تھلے اکٹھے ہو کے تہاڈے نال کیہہ کر دے ہاں۔ جدوں رحمت اللعالمین مدینے تشریف لیائے تے یہودیوں نوں بڑا چاء چڑھیا تے اوہناں نوں یقین ہو گیا کہ ہن سارے دلہ ردور ہو جان گے پر جدوں اوہناں نوں پتا لگا کہ ایہہ نبی عیسیٰؑ نوں سچا تے برحق نبی مَن دا اے تے اوہناں دی تعلیم تے اوہناں دیاں دسیاں گلاں نوں سولہ آنے سچ آکھدا اے، تے نالے، آکھدا اے کہ میرے تے ایمان لیاؤن والے جناب عیسیٰؑ نوں وی نبی برحق تسلیم کرن تے یہودیوں دے رنگ ای بدل گئے۔ اوہ آکھن لگے کہ سانوں تے ہن پتا لگا اے کہ موسیٰؑ توں بعد وی کسے تے وحی آئی اے۔ ایوں حضور اکرمؐ ولوں جیہڑا احترام تے جیہڑا نیک جذبا اوہناں وچ موجود سی اوہ جذبا حسد، عناد، کڑ تے انتقام وچ بدل گیا۔

جدوں اوہناں دے کجھ نیک نہاد تے عقل وند بندیاں نے سیانف توں کم لیندیاں اسلام قبول کر لیا تے اوہناں بدنصیاں نے اپنے ای بزرگاں، سیانیاں تے روشن ضمیر بندیاں نوں عقل دی گھاٹ دے تے شرارتی ہون دے طعنے دینے شروع کر دتے جویں کہ اوہناں جناب عبداللہ بن سلام، ثعلبہ بن سعید، اُسید بن سعید تے اسد بن عبید جے غیرت وند تے سیانے بندیاں نال کیتی۔ آکھن لگے:

{ مَا آمَنَ بِمُحَمَّدٍ وَلَا اتَّبَعَهُ إِلَّا شِرَارٌ نَّارٌ لَوْ كَانُوا مِنْ أَحْيَارٍ نَّارًا تَدُكُّو دِينَ آبَائِهِمْ وَذَهَبُوا إِلَى دِينِ

غَيْرِهِ {1}

”محمد (a) تے جیہڑے لوکی ایمان تے آئے نیں اوہ شریعت دے لوگ نیں تے جے شرفاء وچوں ہوندے تے اپنے وڈکیاں دے دین نوں نہ چھڈ دے تے کسے دُجے دے دین نوں قبول نہ کردے۔“

یہودیّاں دی ایس بد تمیزی تے کہ اوہ مسلمان ہون والے بزرگاں نوں شریعت غیر شرفاء آکھدے سن، رب نے آکھیا کہ اصل وچ اوہی لوگ تے حق تے قائم نیں۔

{لَيْسُوا سَوَاءً مِنْ أَهْلِ الْكِتَابِ أُمَّةٌ قَائِمَةٌ يَتَّبِعُونَ آيَاتَ اللَّهِ أَنَاخِ اللَّيْلِ وَهُمْ يَسْجُدُونَ وَيُؤْمِنُونَ بِاللَّهِ الْيَوْمِ الْآخِرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ وَيُسَارِعُونَ فِي الْخَيْرَاتِ وَأُولَئِكَ مِنَ الصَّالِحِينَ} (آل عمران: ۱۱۳، ۱۱۴)

”اہل کتاب وی سارے اکو جئے نہیں۔ اک ٹولہ حق تے قائم اے۔ اوہ رات نوں اللہ دیاں آیتاں پڑھدے

نیں تے سجدے کردے نیں۔ اوہ ایمان رکھدے نیں اللہ تے، تے نالے روز آخرت تے۔ اوہ نیکی دی گل

! سیرت ابن ہشام جلد دوم صفحہ: ۱۸۵

دسدے نیں تے برائی توں ڈکدے نیں۔ تے نیکیاں ول جلدی کردے نیں تے اوہی لوگ نیکو کار نیں۔“

اک دیہاڑے سلسلہ دعوت وچ جناب سیدنا ابوبکر یہودیّاں دے اک اچھے ڈیرے تے تشریف لے گئے جتھے اوہ اپنی قوم نوں مذہب دی تعلیم دیندے سن۔ اوہ تھے اوہناں دے دو عالم فخاص تے اشیع (AShya) موجود سن۔ حضرت صدیق نے چوکھے معتبر فخاص نوں مخاطب کر کے آکھیا ”فخاص جی! تہاڈا بھلا ہووے، اللہ توں ڈرو تے اسلام قبول کرلو۔“ رب دی سونہر تہانوں چنگا بھلا پتا اے کہ محمد (a) اللہ دے رسول نیں تے اللہ توں حق ای لے کے آئے نیں، اوہناں دے آون دیاں بشارتاں توریت وانجیل وچ وی موجود نیں۔“ فخاص ورگے بندے جے مسلمان ہو جاندا تے فیر اوہ جاندا تے سن کہ ایس دامطلب ایہہ ہے کہ ڈور محمد (a) دے ہتھ وچ ٹر گئی۔ ایہہ گل اوہناں نوں کوں گوارا سی۔ آکھن لگا:

”رب دی سونہر ابوبکر! ایس اللہ دے محتاج کوئی نہیں، سگوں اوہ ساڈا محتاج اے۔ ایس اوہدے سامنے اوویں عاجزی نہیں کردے جو یں اوہ ساڈے سامنے کردا اے۔ ایس اوہدے توں سوکھے (امیر) ہاں نہ کہ اوہ ساڈے توں۔ تے جے کراوہ ساڈے توں غنی ہوندا تے فیر اوہ ساڈا مال ساتھوں قرض نہ منگدا جو یں کہ

تہاڈا صاحب (نبی رحمت a) آکھدا اے۔“ 1

اللہ الصمد تے خیر الرازقین بارے ایہہ گھٹیا واہیاتیاں سن کے صدیق اکبر جئے بندہ خدا کولوں کتھوں صبر ہونا سی۔ آپ نے بد بخت فخاص دے مونہہ تے اک ٹکاویں چپڑ ماری تے نال ای آکھیا بد بخت! اوں ذات دی قسم جہدے دست قدرت وچ میری جان اے، جے تہاڈے تے ساڈے وچکار عہد (میثاق مدینہ) نہ ہوندا تے میں تیرا سرا لا دیندا۔ فخاص اوتھوں اٹھیا تے سدّ رسول اللہ a کول جا پہنچیا تے جا کے آکھیا کہ ویکھو جی! تہاڈے یار نے ساڈے نال کیہہ کہتی اے؟ پر پوری

گل کھول کے نہ سنائی۔ رحمت عالم a نے جدوں جناب صدیق اکبر توں وضاحت منگی تے صدیق نے دسپا کہ سرکارِ عالم! ایس نے بارگاہ رب العزت وچ بڑی گستاخی کیتی اے۔ ایس نے تے ایتھوں تیکر آکھ دتا اے کہ (إِنَّ اللَّهَ فَقِيرٌ إِلَيْهِمْ وَأَنْهُمْ عَنْهُ غَنِيَاءُ) ”اللہ اوہناں دا محتاج اے تے اوہناں نوں اس دی کوئی لوڑ نہیں۔“ اے اللہ دے رسول! جدوں فخاص نے ایہہ بکواس کیتی تے میں غصے نال بے قابو ہو گیا تے ایس دے منہ تے طمانچہ دے ماریا۔ فخاص نے ویکھیا کہ گواہ تے سارے یہودی سن، ابو بکر دے حق وچ گواہی کس نے دینی اے، ایس لئی اوہ صاف صاف مکر گیتے آکھن لگا کہ نہیں اجہی گل تے ہوئی کوئی نہیں۔ پر رب نے فخاص دے جھوٹ دا پردا چاک کر دتا، ایہہ آکھ کے کہ:

{لَقَدْ سَمِعَ اللَّهُ قَوْلَ الَّذِينَ قَالُوا إِنَّ اللَّهَ فَقِيرٌ وَنَحْنُ أَغْنِيَاءُ سَنَكْتُبُ مَا قَالُوا وَقَتْلَهُمُ الْأَنْبِيَاءَ بِغَيْرِ حَقٍّ وَنَقُولُ ذُوقُوا عَذَابَ الْحَرِيقِ} (آل عمران: ۱۸۱)

”بے شک اللہ نے اوہناں دی گل سن لی جہناں نے آکھیا کہ اللہ تے فقیر اے جد کہ اسیں سوکھے ہاں۔ اسیں لکھ رکھاں گے اوہناں دی ایس گل نوں، تے نالے جیہڑا اوہناں انبیاء نوں ناحق شہید کیتا۔ تے (فیر) اسیں آکھاں گے (لوہن) چکھو عذابِ بلدی اک دا۔“

! سہل الہدی جلد سوم صفحہ ۵۸۳۔ بحوالہ ضیاء البنی از جنس بیہ کرم شاہ جلد سوم صفحہ ۲۱۹۔

اک دن یہودیاں دا اک ٹولا مجادلے لئی حضور پر نور کول حاضر ہوئیا۔ آپؐ نے فرمایا کہ بخدا، تہاں نوں پتا اے کہ میں اللہ دی طرفوں تہاڑے ول رسول بن کے آیا ہاں۔ اوہ آکھن لگے سانوں تے ایس گل دا کوئی پتا نہیں کہ تسیں رب دے رسول اتے نہ ہی اسیں ایس گل دے گواہ ہاں۔ ایہہ سن کے مالک غفور الرحیم نے اپنے بندے دی دلجوئی ایوں کیتی:

{لَكِنَّ اللَّهَ يَشْهَدُ بِمَا أَنْزَلَ إِلَيْكَ أَنْزَلَهُ بِعِلْمِهِ وَالْمَلَكُ يَشْهَدُونَ وَكَفَى بِاللَّهِ شَهِيدًا}

(النساء: ۱۶۶)

”(ایہہ منن یاں نہ) پر اللہ تے ایس گل دا گواہ ہے جو تہاڑے تے نازل کیتا کہ ایہہ نازل کیتا اے اپنے علم نال، تے فرشتے وی گواہی دیندے نیں (حالانکہ) اللہ کلا ای گواہ کافی اے۔“

اک وار اک صحابی نے کسے غلط فہمی پاروں مدینے دے دو بندیاں نوں قتل کر دتا۔ اوہناں دے وارثاں دا دیت دا مطالبہ بالکل جائز تے درست سی۔ میثاق مدینہ دی روناں یہودی وی دیت وچ اپنا حصہ پاؤن دے پابندن۔ ایس لئی نبی اکرم a، یہودیاں دے قبیلے بنو نضیر کول گئے تے اوہناں توں معاہدے موجب دیت دا حصہ منگیا۔ یہود آکھن لگے کہ بیٹھ تے جاؤ، کچھ کھاپی لوؤ فیر گل کر دے ہاں۔ اوہناں نے آپؐ نوں کندھ دے نال ڈٹھے اک پلنگ تے بٹھا دتا تے پروگرام ایہہ بنایا کہ کندھ توں اک چنگا وڈا تے بھارا پتھر سر مبارک تے دے مار دے ہاں تے بہانہ ایہہ کراں گے کہ پتھر کندھ تے پیاسی، جیہڑا آپؐں تھلے آڈگا اے۔ اللہ نے اپنے محبوب نوں یہودیاں دی ایس ناپاک سازش توں خبردار کر دتا۔ آپؐ اوس تھان توں اٹھ گئے تے ایوں اللہ نے آپؐ نوں یہودیاں دے ہتھوں شہید ہون توں بچا لیا۔ رحمت اللعالمین دی حیاتی نوں سازشاں توں محفوظ رکھ کے اوس رحیم و کریم خدا نے اپنے بندیاں تے اک عظیم احسان فرمایا تے فیر محمد رسول اللہ دے

غلامانِ نول ایس دا احساس وی دوندار ہیا۔ 1 یہود مدینہ نے سازشاں تے ہیرا پھیریاں وچ اوویں دا ای کمال دکھایا جو یں دا وہ آج دکھا رے نیں۔ مسلمانانِ نول کمزور کرن لئی جو یں ایہہ آج اوہناں نول آپس وچ لڑا رے نیں ایوں ای ایہہ مدینہ وچ وی سازشاں کر دے سن۔ جو یں پچھے ذکر ہو یا اے مدینہ دے دو تعلق دار وڈے قبیلے اوس تے خزرج اک لئی مدت تیکر آپس وچ لڑ دے رے۔ اوہناں وچکار اخیر جی جنگ ”بعث“ ہوئی جنے دو واں قبیلیاں دی طاقت تے معیشت دا بیڑا غرق کر دتاسی۔ جنگ بعث دوواں دھراں دے بے شمار کڑیل جوان کھا گئی۔ ہزاراں بچے یتیم ہو گئے تے اُن گنت سوانیاں بیوہ ہو گئیاں۔ پر جدوں اوس و خزرج دے جیوندے بچ رے بندیاں دی عقل نے کم کیتا تے اوہ فیر اکٹھے ہو گئے۔ پہلوں اوہناں نے عبداللہ بن اُبی نول اپنا سردار منیا۔ پر ایہہ گل اے توڑ نہیں سی چڑھی تے اوہناں نے سرداراں دے سردارنوں اپنا سردار بنا لیا۔ حضور دی برکت نال اوہ ددھ شکر وانگ اک ہو گئے۔ نہ صرف اوہ آپوں دوویں قبیلے اک ہو گئے سگوں مہاجرانِ نول وی اپنے نال ایوں رَلا ملا لیا کہ اسلامی اخوت دے پکے تے سچے رشتیاں دی لڑی وچ اوہ اچھے پروئے گئے کہ ہن بس اک ہی رشتا سی تے اک ای ویرسی۔ رشتا تے دوستی محمد لئی تے ویر تے دشمنی وی اوہدے آکھن تے۔

اک واری ایوں ہو یا کہ اوس تے خزرج دے بندے اک تھاں تے بیٹھے پیا رحمت دیاں گلاں کر رے سن، دُکھ

! المائدة: ۱۱

سکھ پھول رے سن تے مدینہ دے حال حالات تے گل بات کر رے سن۔ اوہدروں شاش بن قیس دا لاناہنگا ہو یا۔ اوہ چوکھا ای خبیث تے بھیڑی فطرت دا بنداسی۔ مسلمانانِ نول ایوں محبت نال بیٹھدیاں ویکھ کے اوہدے تن بدن وچ آگ لگ گئی۔ شاش دے نال اک دُجا یہودی منڈا وی سی۔ اوس نول اوس منڈے نے مِت دتی کہ اوس ٹولے دے وچ جا بیٹھے تے تھوڑے چیر پچھوں گلاں گلاں وچ جنگ بعث دا ذکر کر دیوے۔ اوس نے ایوں ای کیتا تے جنگ بعث دا ذکر چھیڑ کے تے اوہ شعرو ی پڑھن لگ پیا جیہڑے جنگ دے دناں وچ دوواں فریقان نے اک دُجے دے بارے آکھے سن۔ ایہہ سازش پوری طرح کامیاب ری۔ جنگ دیاں سٹاں تے وچھڑے ہوئے سجن مَتر یا آؤن دی دیرسی، دوواں پاسے دے منڈے اُٹھے، بانہواں ٹنگیاں تے اک دُجے دے گل پین دیاں تیاریاں چھوہ دتیاں۔ اوس بن قبیلی جیہڑا قبیلہ اوس دا جوان سی تے جبار بن صخر جیہڑا خزرج وچوں سی اک دُجے نول مَرَن مارن تے تیار ہو گئے۔ رب نول اپنے بندیاں دی بھلیائی منظوری۔ ایہہ خبر کسے طرح نبی رحمت تائیں اپڑ گئی۔ آپ مہاجر مسلمانان دے سیانے بندے نال لے کے اوس تھاں اپڑ گئے جتھے جھگڑے دا مڈھ بھج رہیا سی۔ نبی رحمت نے آؤندیاں ای ارشاد فرمایا:

{ يَا مَعْشَرَ الْمُسْلِمِينَ اللَّهُ أَبَدَ عَوَى الْجَاهِلِيَّةِ وَأَنَا بَيْنَ أَظْهَرِكُمْ بَعْدَ أَنْ هَذَا كُمْ اللَّهُ لِلَّ سَلَامٍ
وَأَكْرَمَكُمْ بِهِ وَقَطَعَ بِهِ عَنْكُمْ أَمْرَ الْجَاهِلِيَّةِ وَاسْتَنْقَذَكُمْ بِهِ مِنَ الْكُفْرِ وَالْفِ بَيْنَ قُلُوبِكُمْ فَتَرَّ جَعُونَ
إِلَى كُنْتُمْ عَلَيْهِ كَفَّارًا؟ }

”اوہ مسلمانان دے جتھے! اللہ توں ڈرو، اللہ توں ڈور، کیہہ تسمیں جاہلیت دا نعرہ مارن لگے او۔ حالانکہ میں

تھاڑے وچ موجود ہاں۔ تے ایس توں بعد کہ اللہ نے تہانوں اسلام راہیں ہدایت دتی اے تے تہانوں عزت دتی اے تے جہالت دے بکھیڑیاں توں تھاڑی جان چھڈائی اے تے کفر توں تہانوں بچالیا اے تے تھاڑے دلاں نوں اُلفت دے رشتیاں وچ پرو دتا اے۔ کیہہ تسمیں ایس توں بعد فیر کفر وچ پرت جانا چاہندے او؟“

رحمت دو عالم دی زبان مبارک توں ایہہ سن دیاں ساراں اوس تے خزع دے جواناں دیاں اکھاں کھل گئیاں۔ اوہناں نوں احساس ہو گیا کہ اوہ شیطان دی پیروی وچ چوکھے دور نکل چلے سن۔ غم دی شدت تے ندامت نال اوہناں دیاں اکھاں وچ اتھرواں دا ہڑھ آ گیا۔ اوہ اک دُبے نال چھیاں پاؤن لگ پئے تے معافیاں منگن لگ پئے۔ تھوڑا ہی چر لگیا سی اوہی بندے اک واری فیر اکٹھے ہو کے اپنے آقا دے حضور غلاماں وانگ ہتھ بندھ کے کھلوتے سن۔ ایس موقع تے ایہہ آئیناں نازل ہوئیاں جہناں نال قیامت تیکر آون والے مسلماناں نوں راہنما اصول مل گئے کہ اوہ یہودی دیاں سازشاں توں محتاط رہن گے تے اوہناں دے کسے چکر وچ آ کے اپنی وحدت دا جنازہ نہیں کڈن گے:

{يَا أَيُّهَا الَّذِينَ آمَنُوا إِنِّي تُطِيعُوا فَرِيقًا مِّنَ الَّذِينَ أُوتُوا الْكِتَابَ يَزُدُّكُمْ بَغْدًا إِيْمَانَكُمْ كُفِّرِينَ} (آل

عمران: ۱۰۰)

”اے ایمان والیو! جے تسمیں آکھے لگو گے اہل کتاب وچوں کسے ٹولے دے تے فیر ایہ تہانوں مسلمان ہو جان توں بعد فیر کافراں ول موڑ کے چھڈن گے۔“

یہود دے منافق سرداراں وچوں اک دانا م زید بن اسلمت سی۔ اک واری حضور رحمت للعالمین دی اک اٹھ گم ہو گئی۔ اوس نے جھٹ بکواس شروع کر دتی کہ محمد ایوں تے دعویٰ کر دا اے کہ میرے کول آسمان توں خبراں آؤندیاں نیں تے اپنی اٹھ لہجہ نہیں سکدا۔ سرور عالم نے جدوں زید دی گل سنی تے فرمایا: واللہ، مینوں اوس گل دا ای پتا ہوندا اے جس دا میرا رب مینوں دس دیندا اے۔ اللہ نے مینوں میری اٹھ داوی دس دتا اے کہ اوہ فلانی گھاٹی وچ اے۔ اوس دی نکیل اک رُکھ دی ٹہنی نال اڑ گئی اے تے اوہ اوٹھے ای کھلوتی ہوئی اے۔ کجھ صحابی اوسے ویلے اوس گھاٹی وچ گئے تے اٹھ لے کے پرتے۔ 1

اک دن یہودی منافقاں وچوں کجھ بندے مسجد نبوی وچ بیٹھے آپس وچ کجھ گھسہ پھسہ کر رہے سن۔ رسول خدای نظر پئی تے فوراً اوہناں نوں مسجد وچوں باہر کڈن دا حکم دتا۔ ایہہ حکم سندیاں ای ابوایوب انصاری اٹھ کے کھلو گئے تے عمرو بن قیس نوں پیروں پھڑ کے گھسیٹ کے مسجد توں باہر لے گئے۔ فیر ابوایوب، رافع بن ربیعہ النجاری ول ہوئے تے اوس نوں چادر نال ولیٹ کے چنگے وٹ دتے، تے اک زور دی چیخ دی ماری۔ اینی دیر وچ حضرت عمارہ بن حزم اک ہور منافق زید بن عمرو ول ودھے۔ زید دی داڑھی واہوالمی سی۔ حضرت عمار نے اوس نوں داڑھی توں پھڑ لیا تے کچھ کے مسجد توں باہر وگا دتا تے نالے اک چنگا دو ہتھیر اوہدے سینے تے مار یا جہدے نال اوہ زمین تے جاپیا۔ آکھن لگا۔

عمار! توں آج مینوں چوھی بھیڑی سٹ لائی اے۔

”منافقا! جیہڑا عذاب تیرے لئی رب نے تیار کیتا ہونیا اے اوہ ایس توں چوکھا ڈاہڈا اے۔ خبردار آج توں بچھوں رسول اللہ دی مسجد دے نیڑے وی نہ آویں۔“ جناب عمار نے جواب دتا۔ 2
اوس و خزر ج دے منافق:

اوس و خزر ج نے مہاجرین مکہ لئی جویں دی اخوت تے جویں دے ایثار دا مظاہرہ کیتا سی، تاریخ عالم اُس دی دجی کوئی

مثال پیش نہیں کر سگدی جس دا ثبوت ایہہ ہے کہ اللہ تے اوس دے رسول نے اوہناں نوں انصار دے سوہنے نام نال یاد کیتا اے۔ پر اوہناں وچ وی کجھ ایجے ازلی بد بخت سن جہناں نے اپنے قبیلیاں دی ویکھا ویکھی بظاہر تے اسلام قبول کر لیا پر اصل وچ اوہناں دے دل اسلام دی روشنی توں سکھنے ای رے۔ کیوں جے اوہ کفر و شرک دی گندگی نال اپنے کو بھرے ہوئے سن کہ اوہناں وچ رب دے نام لئی کوئی تھاں نہیں سی۔ ایویں تے رب نہیں آکھدا کہ کجھ دلاں اُتے مہر لگ گئی اے۔ اوہناں وچوں کجھ بد نصیبیاں دے حال حالات تھلے دتے جا رہے نیں۔

جلاس بن سوید بن صامت قبیلہ اوس وچوں سی تے منافقاں دے ٹکڑے بندیاں وچ گنیا مٹھیا جانداسی۔ مسلمان ہو جان دے باوجود اوس نے جنگ تبوک وچ شرکت نہیں سی کیتی تے بغیر کسے وجہ توں گھر بیٹھا رہیا۔ جے کسے پچھیا تے آکھن لگا کہ جے ایہہ بندہ (سرور کائنات) سچا اے تے فیرا سیں تے کھوتیاں توں وی بھیڑے ہوئے نا!

! سیرت ابن ہشام جلد اول صفحہ: ۳۵۵

@ سیرت ابن ہشام جلد اول، صفحہ: ۳۵۶

{لَئِنْ كَانَ هَذَا الرَّجُلُ صَادِقًا لَّانْحُنُّ شَرَّ مِنَ الْخُمْرِ}

جلاس نے جس سوانی نال ویاہ کیتا ہونیا سی اُس دا اک پچھلگ پتر حمیر بن سعد سچا مسلمان سی۔ حمیر نے جدوں منترے پیو جلاس دی ایہ گل سنی تے اوس نوں آکھن لگا کہ جلاس جی! تہاڈا میرا چنگا تعلق اے۔ اسیں اک دُجے دے دُکھ سکھ دے وی بھائی وال آں پر گل ایہہ ہے کہ جے میں ایڈی وڈی گل سن کے چپ رہواں تے میں سمجھدا ہاں کہ میرا دین غارت ہوندا اے۔ ایویں حمیر نے ایہہ گل نبی اکرم نوں جا دسی۔ جدوں جلاس نوں پچھ پریت کیتی گئی تے اوہ قسم چک گیا تے آکھن لگا کہ میں تے اجہی کوئی گل کیتی ای نہیں۔ حمیر نے ایویں ای گل گھڑ لئی اے۔ رب نے حمیر دی سچائی تے جلاس دے جھوٹ نوں ایویں ظاہر کیتا:

{يَخْلِفُونَ بِاللَّهِ مَا قَالُوا وَلَقَدْ قَالُوا الْكَلِمَةَ الْكُفْرِ وَكَفَرُوا بَعْدَ إِسْلَامِهِمْ وَهُمْ يَعْلَمُونَ مَا نَقَمُوا إِلَّا أَنْ أَغْنَاهُمُ اللَّهُ وَرَسُولُهُ مِنْ فَضْلِهِ فَإِنْ يَتُوبُوا يَكْ خَيْرًا لَهُمْ وَإِنْ يَتَوَلَّوْا يُعَذِّبْهُمْ اللَّهُ عَذَابًا أَلِيمًا فِي الدُّنْيَا وَالْآخِرَةِ وَمَالُهُمْ فِي الْأَرْضِ مِنْ وَلِيٍّ وَلَا نَصِيرٍ} (توبہ: ۷۴)

” (منافق) قسماں کھاندے نیں اللہ دیاں کہ اوہناں نے ایہہ نیں آکھیا حالانکہ بناشیا اوہناں نے کفر دی گل کیتی سی۔ تے اوہ کافر ہو گئے مسلمان ہون توں بعد، تے اوہناں ارادہ وی کیتا اوس گل دا جتھے اوہ نہ چُج سکے۔

تے اوہ صرف ایس گل دا انتقام لے رے نیں کہ اللہ تے اوس دے رسول نے اوہناں نوں غنی کر دتا اپنے فضل نال تے جوہن (وی) توبہ کر لین تے اوہناں لئی چنگی گل اے۔ تے جے اوہ نہیں منن گے تے اللہ اوہناں نوں دردناک عذاب دیوے گا، دنیا تے وی تے آخرت تے وی۔ تے اوہناں نوں پوری زمین تے کوئی سجن تے مددگار وی نہیں لبھنا۔“

ایسے قبیلے دا اک ہور بندہ نبتل (Nabtal) بن حارث سی۔ اوس نے اک واری سرکار دو عالم دی بارگاہ وچ گستاخی کر دیاں آکھیا سی کہ ”محمد تے کنناں دا کچا ای۔ ہر کسے دی گل من لیندا اے۔“ رب محمد نوں ایہہ گل چنگی نہ لنگی تے اوس نے اوہدے تے اپنی ناراضگی دا اظہار ایوں کیتا کہ اللہ دے رسول نوں دکھ دین والیاں لئی دردناک عذاب تیار اے۔ 1 نبتل چنگے اُچے لے قد دا ڈشکرا جیہا بنداسی۔ اکھاں لال، رنگ کالا، وال کھیلرے ہوئے، عجیب واہیات جیہا دسداسی پہلی نظر وچ ای۔ نبی رحمت نے اک واری اوس تے ایوں کمنٹس (Comments) دتے سن کہ جے کوئی شیطان نوں ویکھنا چاہندا اے تے اوہ نبتل بن حارث نوں ویکھ لوے۔ 2 فاسق ابو عامر نے زمانہ جاہلیت وچ دنیا دے بکھیڑیاں توں دکھ ہو کے راہباں والا روپ دھار لیا سی۔ اوہ مکمل دے لیڈے پاؤنداسی تے دنیا توں وکھرا جیہا ای رہنداسی۔ جدوں نبی اکرم a مدینے تشریف لیائے تے اوس دے قبیلے نے اسلام قبول کر لیا پر اوس نے توحید دے سبق توں کوئی اثر نہ لیا۔ اک دن حضور دی خدمت وچ حاضر ہوئیا تے آکھن لگا کہ ایہہ کیہڑا دین اے جیہڑا تسیں لے کے آئے او؟ رحمت عالم نے فرمایا کہ میں ابراہیم والا دین لے کے آیا ہاں۔ اکھ:

! توبہ: ۶۱ @ سیرت ابن کثیر جلد اول صفحہ: ۵۱۹

”دین ابراہیمی تے چلن والا تے میں ہاں۔“

”نہیں توں تے ایس دین تے نہیں“ حضور نے جواب دتا۔

”یا محمد! تہاں تے ایس دین وچ اجہیاں چیزاں داخل کردتیاں نیں جہناں دا ایس دین نال دُور داوی واسطہ نہیں“ ابو عامر نے فیر گستاخی کیتی۔

”نہیں ایس طرحاں نہیں۔ میں کوئی غیر چیز ایس وچ داخل نہیں کیتی سگوں میں تے ساریاں آلائشاں توں پاک

صاف کر کے ایس نوں پیش کیتا اے“ رسول رحمت نے جواب دتا۔

الْكَافِرَاتُ وَالْمُنَافِقَاتُ وَالْمُشْرِكُونَ وَالْمُشْرِكَاتُ وَالْمُشْرِكُونَ وَالْمُشْرِكُونَ وَالْمُشْرِكُونَ

ابو عامر نے آکھیا:

”جھوٹے نوں اللہ اپنے اہل عیال توں دُور، غریب الوطنی وچ اکلا پے دی موت مارے۔“

”بے شک جیہڑا جھوٹ بولد اے، اللہ اوس نال ایوں ای کرے۔“ نبی اکرم a نے اتفاق فرمایا۔

فیر اللہ نے اوس نال ایوں ای کیتی۔ کجھ چراں پچھوں اوہ اپنے کچھ عقیدت ونداں نوں لے کے مدینے توں مکئی ٹر گیا۔

جدوں مکہ فتح ہوئیا تے اوہ طائف ٹر گیا۔ جدوں طائف والیاں نوں وی رب نے ہدایت دے دتی تے اوہ ہجج کے شام چلا

گیا۔ بس فیرایوں ای غریب الوطنی تے اکلا پے دی موت ماریا گیا۔ تے ایوں دنیا نوں سچے تے جھوٹے داوی پتا لگ گیا۔ مسجد ضرار دے بانی لوکاں وچ ابو حبیہ بن ازعر، ودیعہ بن ثابت، خذام بن خالد، عباد بن حنیف، جابرہ بن عامر تے مجمع ورگے بندے شامل سن۔ اوہناں وچوں خذام بن خالد نے مسجد لئی جگہ دتی سی تے مجمع اوس مسجد دا امام سی۔ اوہ تھوڑی عمر دا منڈا سی تے اوس نے بوہت سارا قرآن شریف زبانی یاد کیتا ہوئی سی۔ مسجد ضرار تے خیر اپنے انجام نوں پہنچ گئی سی۔ عہد فاروقی وچ اک واری بنو عمرو بن عوف دے کچھ بندیاں نے حضرت عمر اگلی بنی کیتی کہ مجمع نوں بوہت سارا قرآن حفظ اے ایس لئی اوس نوں ساڈی مسجد دا امام مقرر کر دتا جاوے۔ جناب عمر فاروق نے آکھیا کہ ہرگز نہیں۔ کیہہ اوہ مسجد ضرار وچ منافقان دا امام نہیں سی؟ ایہہ سن کے مجمع نے حضرت عمر اگے عرض گزاری کہ اے امیر المؤمنین! واللہ! مینوں اوہناں بندیاں دی منافقت دا ککھ پتا نہیں سی۔ میں تے اوس ویلے بال ساں۔ اوہناں نوں قرآن یاد نہیں سی پر مینوں یاد سی، ایس لئی اوہناں مینوں امام بنا لیا۔ لوکاں دا خیال اے کہ حضرت عمر نے ایہہ دلیل من لئی سی تے فیرا اوس نے اپنے قبیلے نوں نماز پڑھائی سی۔¹

مذبح بن قبیلہ اکھاں توں انھاسی۔ اک واری نبی اکرم اپنے کچھ اصحاب نال اوہدے باغ وچوں لنگ رے سن۔ اوس نوں پتا لگا تے آکھن لگا کہ اے محمد! جے توں نبی ایں تے تیرے لئی میرے باغ وچوں لنگنا جائز نہیں۔ اوس نے مٹی مٹھ وچ بھر کے آکھیا واللہ! جے مینوں پتا ہوندا کہ ایہہ مٹی تیرے اسی سرتے پوے گی تے میں ایہہ مٹی تیرے ول دگا دیندا۔ ایہہ سن کے اصحاب رسول اوس نوں قتل کرن لئی اوہدے ول ودھے پر رحمت اللعالمین نے فرمایا: نہیں بھئی سجنو! ایس نوں چھڈ دیو!

!سیرت ابن ہشام جلد اول صفحہ: ۳۵۱

ایہہ اکھاں توں وی انھا اے تے دل توں وی پراوہنے چروچ حضرت سعد بن زید اشہلی نے کمان دی سٹ مار کے اوس انھے منافق داسر کھول دتا۔

حاطب بن اُمیہ بن رافع اک موٹا جیہا بڈھاسی۔ اوس دا پتر یزید بن حاطب مخلص تے یکے مسلماناں وچوں سی۔ غزوہ اُحد وچ یزید چوکھا پھٹر ہو گیا۔ اوس نوں بنی ظفر دے محلے وچ لیاندا گیا۔ سارے مسلمان بندے تے سوانیاں اوس نوں تسلی دے رے سن تے کچھ شہادت دی موت پاروں جنت دی مبارک وی۔ یزید نوں حالت نزاع وچ ویکھ کے بڈھا حاطب آکھن لگا آہو اوس نوں حبل دے باغ دی مبارک دیو۔ رب دی سوہنہ ٹسیں وچارے نوں دھوکہ تے فریب دتا اے 1 اوس دی ایس گل توں پتا لگا کہ اوہ دلوں مسلمان نہیں سی ورنہ اوس نوں ایس گل دا بھوراوی شبانہ ہوندا کہ یزید دی تھاں جنت ہی اے۔

ابن کثیر تے ابن ہشام نے خزرج وچوں جیہڑے منافقان دے نام لکھے نیں اوہ رافع بن ودیعہ، زید بن عمرو، عمر و بن قیس، قیس بن عمرو تے جد بن قیس نیں۔ اوہناں توں وکھ عبد اللہ بن ابی جیہڑا رئیس المنافقین دے نام نال مشہور اے، اوس دا تعلق وی خزرج نال سی۔

عبد اللہ بن ابی جیہڑا اُچے قد کاٹھ دا، وجیہہ تے باوقار شخصیت دا مالک سی، چوکھا بدنصیب تے بد بخت بنداسی۔ جو یں کچھ ذکر ہو چکیا اے اوس تے خزرج وچ لڑی جان والی جنگ بعثت توں بعد جدوں دوواں قبیلیاں دی صلح ہوئی تے اوہناں

ایسے عبداللہ نون اپنا سانجھا سردار من لیا سی۔ اوہدی بادشاہی لئی تاج دی بن رہی سی پر مدینے وچ اسلام دی روشنی کھلن نال اوس نوں گھانا پے گیا۔ اوس نے اسلام قبول تے کر لیا سی، پر دل وچ حسد دی اک ہمیش بلدی ری۔ غزوہ بنی مصطلق دے موقع تے اوس نے کجھ زبان درازی کیتی سی تے فیر اوسے بد بخت دلوں قرآن نے آکھیا:

{يَقُولُونَ لَئِنْ رَجَعْنَا إِلَى الْمَدِينَةِ لَيُخْرِجَنَّ الْأَعَزُّ مِنْهَا الْأَذَلَّ} (المنافقون: ۸)

”اوہ آکھدے نیں کہ جے اسیں پرت گئے مدینے ول تے کڈ دین گے عزت والے اوتھوں ذلیلاں نوں۔“

اک واری سعد بن عبادہ بیمار ہو گئے۔ نبی رحمت اسامہ بن زید نال اوہناں دی سوجھی لئی جا رہے سن۔ عبداللہ بن اُبی

تے اوس دے قبیلے دے بندے راہ وچ بیٹھے ہوئے مل پے۔ حضور عبداللہ دے احترام وچ یاں دین دی کوئی گل کرن لئی سواری توں اتر گئے۔ اوہناں نوں سلام کیتا تے فیر اوہناں کول بیٹھ گئے۔ اوتھے سرکار عالم نے کجھ آئیاں وی تلاوت فرمایاں۔ اللہ دے ذکر دی تلقین کیتی، فیر نا فرمائی توں ڈرایا، بشارتاں دتیاں تے رب دے عذاب توں وی خبردار کیتا۔ عبداللہ چپ چاپ بیٹھا رہیا۔ جدوں آپ ارشادات توں فارغ ہوئے تے آکھن لگا کہ ”جناب تہاڈی گل حق ای ہووے گی پر تہاڈا طریقہ سانوں پسند نہیں آیا۔ تسیں اپنے گھر بیٹھو، جیہڑا کوئی تہاڈے کول آئے اوس نوں اپنی گل سناؤ تے جے کوئی نہ آوے تے اوہدے ول دھکے نال نہ جاؤڑو تے اوس دی بیٹھک وچ جا کے اوس نوں اجہی گل نہ سناؤ جیہڑی اوس نوں پسند نہ ہووے۔“ حضور اوتھوں اٹھ کے سعد بن عبادہ ول مزاج پرسی لئی ٹر گئے۔

!سیرت ابن کثیر جلد اول صفحہ: ۵۲۱

سرکار دو عالم بنجر کون و مکان جناب رسول خدا وی تے ساڈے وانگ اولاد آدم وچوں ہی سن۔ اوہناں نوں وی نیکی تے خوشی، تے بدی تے رنج پہنچدا سی۔ عبداللہ بن اُبی دی بدتمیزی نال آپ دے رخ انور تے جیہڑے ناگواری تے پریشانی دے آثار سن اوہ حضرت سعد بن عبادہ نے پڑھ لے۔ سعد نے عرض کیتی یا رسول اللہ! لگدا اے کوئی اجہی گل ہوگئی اے جیہڑی آپ نوں چنگی نہیں لگی۔ سرکار فرمان لگے کہ ہاں سعد! گل تے ایوں ای اے تے فیر عبداللہ بن اُبی والی ساری گل حضور نے سنا دتی۔ ایہہ سن کے حضرت سعد نے عرض کیتی یا رسول اللہ! تسیں اوہدی گل تے پریشان نہ ہوؤ۔ بخدا ساڈی بھلی قسمت کہ اللہ تعالیٰ تہاں ساڈے کول لے آیا۔ اسیں تے اوس دی تاجپوشی لئی تاج بنوا رہے ساں۔ عبداللہ سمجھدا اے کہ تسیں اوس دی بادشاہی گوا دتی اے، ایس لئی اوہ سڑدا بلدا رہندا اے۔

قبلہ دی تبدیلی:

ہر قوم، مذہب معاشرے یاں تہذیب دی اپنی اک پہچان ہوندی اے۔ بندا اپنے وصف توں ای پچھتا جاندا اے کہ اوس دا تعلق کدے نال اے۔ مذہب اسلام دا رکن اعظم نماز اے جیہڑی ہر دیہاڑے پنج واری مومن دی معراج دا سبب بن دی اے۔ جویں دین وچ نماز نوں مڈھلی حیثیت حاصل اے ایوں ای نماز وچ قبلہ دی حیثیت اے۔ جنانا چر ساڈی سرکار مکئی وچ رہے آپ رکن یمانی تے حجر اسود دے وچکار نماز پڑھدے رہے۔ ایوں کعبہ وی آپ دے سامنے

ہوند اسی تے بیت المقدس وی۔ پر جدوں مدینۃ الرسول نوں عزتیاں اوہدوں ایہہ گل اوکھی ہو گئی کہ دوواں پاسے منہ ہووے۔ ایس لئی آپ بیت المقدس ول منہ کر کے نماز پڑھن لگ پئے پر جویں قرآن توں پتا لگدا اے آپ پریشان رے کہ خدائے واحد ولوں قبلہ دا تعین کیوں نہیں ہو رہیا۔ فیر اک دن جدوں نبی رحمت حضرت براء بن معرردی مسجد وچ جمعہ دی نماز پڑھا رے سن تے رب سوہنے نے آکھیا:

{قَدْ نَزَّلِي تَقْلِبَ وَجْهَكَ فِي السَّمَاوَاتِ فَلَنْ أَلَيَنَّكَ قِبْلَةً تَرْضَاهَا فَوَلِّ وَجْهَكَ شَطْرَ الْمَسْجِدِ الْحَرَامِ وَحَيْثُ مَا كُنْتُمْ فَوَلُّوا وُجُوهَكُمْ شَطْرَهُ وَإِنَّ الَّذِينَ أُوتُوا الْكِتَابَ لَيَعْلَمُونَ أَنَّهُ الْحَقُّ مِنْ رَبِّهِمْ وَمَا اللَّهُ بِغَافِلٍ عَمَّا يَعْمَلُونَ} (البقرة: ۱۴۴)

”بناشیاں ویکھدے ہاں تہاڈے مکھڑے نوں (گھڑی مڑی) آسمان ول ویکھدیاں۔ سو ایں تہا نوں اچھے قبلہ ول پھیراں گے، جہڑا تہا نوں پسند اے۔ تے بس کر لوؤ اپنا چہرہ مبارک مسجد حرام ول۔ تسیں جتھے وی ہوؤ اپنا رخ اوہدے (مسجد حرام) ول ہی رکھنا۔ تے جہاں نوں کتاب ملی اے اوہ جان دے نیں کہ ایہی ٹھیک اے اینہاں دے رب ولوں۔ تے اللہ بے خبر نہیں جو اوہ کردے نیں۔“

تحویل قبلہ دا ایہہ حکم جنوری ۶۲۴ء (شعبان ۲ھ) وچ ملایا۔ ایس تبدیلی نال یہودیاں نوں چوکی ٹکڑی سٹ و جی تے اوہناں دا ایہہ خیال غلط ثابت ہو گیا کہ اخیر اسلام وی تے یہودیت دی ہی اک نویں شکل اے۔ اوہناں نے تحویل قبلہ نوں رب دا حکم من توں انکار کر دتا تے آکھن لگ پے کہ محمدؐ نے ہر گل وچ ساڈی مخالفت جو کرنی ہوئی ایس لئی اوس نے ساڈے والا قبلہ وی بدل دتا اے۔ پر رب محمدؐ نے اپنے محبوب نوں ایوں ای تے نہیں سی ناچھڈ دینا۔ اوس نے پہلوں ای راہنمائی فرمادی سی:

{سَيَقُولُ السُّفَهَاءُ مِنَ النَّاسِ مَا وَلَّهُمْ عَن قِبْلَتِهِمُ الَّتِي كَانُوا عَلَيْهَا قُلْ لِلَّهِ الْمَشْرِقُ وَالْمَغْرِبُ يَهْدِي مَنْ يَشَاءُ إِلَى صِرَاطٍ مُسْتَقِيمٍ} (البقرة: ۱۴۲)

”ہن بیوقوف لوگ آکھن گے کہ کہڑی چیز نے پھیر دتا اے مسلماناں نوں اوہناں دے قبلہ توں جس ول اوہ پہلوں سن۔ تسیں آکھ دیکو کہ لہندا، چڑھدا سب اللہ دے ہی نیں۔ اوہ جس نوں چاہندا اے سدھا راہ دکھا دیندا اے۔“

اللہ دی نہ تے سلطنت ای محدود اے تے نہ ای اوہ آپوں کسے جغرافیائی حد بندی (Geo Political Boundries) دا پابند اے۔ کچھم پورب تے ساریاں سمتاں اوسے ذات پاک دیاں نیں۔ بس اوس نوں ایہہ گل چنگی نہیں لگی کہ اوس دا محبوب بار بار سوالیہ نظراں نال آسمان ول ویکھے۔ ایس لئی اوس نے اک فیصلہ کر دتا اے۔ پر مسجد حرام ای کیوں؟ ایس دیاں وجہاں تے بوہت دسدیاں نیں پر اصلی گل ایہہ ہے کہ اوس دی مرضی۔ اوہ نہ تے کسے حال حالات دے ہتھوں مجبور ہوندا اے تے نہ ای اپنے فیصلے دیاں وضاحتاں کرن تے مجبور اے۔

ایس صورت حال نوں محترمہ کیرن آرمسٹرانگ نے بوہت سوہنے اکھراں وچ بیان کیتا اے۔ لکھدیاں نیں:

The change of the Qibla has been called Muhammad's most creative religious gesture. In turning towards Mecca, muslims were tacitly declaring that they belonged to none of the established communitites, but were turning only towards God himself. In prostrating themselves in the direction of the ka,aba, which was independent of the two older revelations responsible for splitting up the one religion of God into warring sects, they were reverting to the premordial fatih of the man who had built it. 1

”قبلہ دی تبدیلی نوں محمدؐ دی زندگی وچ اک وڈا مذہبی انقلاب سمجھیا جاندا اے۔ مکئی ول منہ کر دیاں مسلمان اصل وچ بڑی سیانف نال ایس گل دا اعلان کر رہے سن کہ اوہناں دا پہلے توں موجود مذہب ہاں نال کوئی تعلق نہیں تے اوہ سدھا خدا دی اپنی ذات نال ای تعلق رکھدے نیں۔ کعبے ول رخ کر کے سجدے کرن دا مطلب ایہہ سی کہ اوہ اوہناں دوواں پرانے مذہب ہاں توں وکھ نیں جیہڑے خدا دے اک دین نوں لٹن مرن لئی تیار فرقیاں وچ ونڈن دے ذمہ دار نیں تے ہن اوہ آدمیت دے مڈھلے تے اصل دین ول ودھ رہے سن۔“

یاد وطن دی:

مسلماناں نوں مکہ چھڈ کے مدینے آیاں کوئی ڈیڑھ ورہا ہو گیا سی۔ مکہ اوہ سوہنی تے پاک دھرتی اے جس توں دُور جاندیاں محسن انسانیت نے وی ایہہ گل آکھی سی کہ ”مکہ! تینوں چھڈن تے دل نہیں کر دا پر کیہہ کراں میری قوم مینوں اتھے رہن نہیں دتا۔“ ابراہیم تے اسماعیل دی دھرتی، زم زم دا پانی، مسجد حرام، عبدالمطلب، ابوطالب تے خدیجہ دیاں ڈھیریاں،

! Muhammad A biography of the Prophet by Kareem Armstrong, Page: 162

اوہناں وچ کبھڑی شے ہے جیہڑی محبوب خدا نوں بھُل جاندی۔ سو، نہ تے آپ ای جمن بھوں نوں بھل سکے تے نہ ای آپ دے اصحاب۔ ہر ویلے ایہہ سوچ دماغ وچ رہندی سی کہ ہوئے نہ ہوئے اپنے وطن دیاں اک واری فیروز یارتاں ہوں۔ ایس توں وکھ وی کئی گلاں سن جیہڑیاں مہاجر مسلماناں نوں خون دے اتھر رواندیاں سن مثلاً ایہہ کہ ساری لوکاں جج لئی مکہ جاسکدی سی پر محمد رسول اللہ تے اوس دے منن والیاں لئی ایہہ ممکن نہیں سی، جیہڑے اصل وچ اُس دے حقدار سن۔ فیراہیہ کہہ کئی مہاجر اں دے اہل عیال مکئی وچ سن جہناں دی یاد توں فاندی رہندی سی۔

مدینے دی آب و ہوا وی نویں وسنیکاں نوں چھیتی نال راس نہیں سی آؤندی۔ ایس لئی چوکھے اصحاب بیمار پے گئے سن۔ نبی رحمت دی اپنی طبیعت کئی دناں تیکر خراب ری۔ مدینے دے سیاسی حالات وی اچھے مساں گزارا ای سن ورنہ تے یہودی، اوس و خزرج دے منافقین تے آل دوال دے کئی ٹولے مسلماناں داک وچ دم کیتی رکھدے سن۔ ایہی وجہ سی کہ مسلمان اپنے اصل وطن تیکر رسائی دا سوچدے رہندے سن۔

ایہی سوچ تے ایہی خواہش اخیر اک دن مکئی دی فتح دی شکل وچ ظاہر ہوئی پر ایس فتح تیکر اپڑن لئی مسلماناں نے اپنے آقا دے اشارے تے کیہہ کیہہ قربانیاں دتیاں، کوئیں اپنیاں جاناں داریاں، کوئیں اپنے مال راہ خدا وچ نچھاور کیتے،

۵۰

کس طرحاں اپنا امن چین تے سکھ شانتی ربّ اگے ویچ دتے، ایہہ اک لمی داستان اے، جیہڑی اسیں اگلے صفحیاں ویچ پڑھاں گے۔

جہاد فی سبیل اللہ

مکی وچ تیرہ (۱۳) ورھیاں دی لمی مدت تیکر محبوب خدا اُتے اوہناں دے اصحاب تے جیہڑے ظلم کیجے گئے، توارتخ دے ورتے اوہناں نال بھرے ہوئے نیں۔ جوں جوں ظالماں دے ظلم وچ وادھا ہوندا گیا توں توں مظلوماں دے صبر وچ وادھا ہوئیا۔ آپ جدوں اپنے پیاریاں دے پاٹے ہوئے سر، ٹٹیاں ہڈیاں تے سڑے ہوئے جُتے دیکھدے تے اک ای گل آکھدے سن کہ سجنو! صبر کرو، تہاڈے لئی رب کول ایس دا بدلہ جنت دی شکل وچ موجود اے۔

اک واری حضرت عبدالرحمن بن عوف، مقداد بن اسود، قدامہ بن مظعون تے جناب سعد بن وقاص، e، جہناں نوں مکی دے کافر طرحاں طرحاں دیاں اذیتاں دیندے سن، رحمت اللعالمین دی بارگاہ وچ حاضر ہو کے عرض کیجی کہ یا رسول اللہ! اسیں جدوں مشرک ساں تے عزت آبرو نال حیاتی دے دن کٹ رے سن۔ پر جدوں دے ایمان لے آئے ہاں ایہناں لوکاں نے سانوں ذلیل تے رسوا کر کے رکھ دتا اے۔ سانوں ایہناں نال لڑن دی اجازت بخشو۔ حضور نے فرمایا کہ اپنے ہتھناں نوں ڈک کے رکھو، اے مینوں جنگ دی اجازت نہیں ملی۔ ایس توں بعد وی جدوں وی کوئی صحابی رسول قریش دے ظلم توں تنگ آ کے حضور کول حاضر ہو کے دیریاں دے گل پچن دی اجازت طلب کرداتے آپ ایہی فرماندے رے:

{اَصْبِرْ وَاَفِئْتِي لِمَ اُوْمَرُ بِالْقِتَالِ}

”صبر کرو اے مینوں جنگ کرن دا حکم نہیں ملیا۔“

فیر جدوں مدینے آگئے تے استھے وی سکھ چین بس نام دا ہی سی۔ خیال تے ایہ سی کہ مشرکین مکہ ہن جان چھڈ دین گے پر ایوں ہونہ سکیا۔ قریش رنگ برنگے طریقیاں نال پنگے لیندے رے تے مسلماناں نوں پریشان کرن دا کوئی موقعہ ہتھوں نہ چھڈیا۔ مڈھلے دور دی ہی گل اے قریش نے عبداللہ بن اُبی نوں اُتے اوس وخرج دے اوہناں قبیلیاں نوں جیہڑے اے تیکر بت پرست سن، خط لکھے کہ تُساں ساڈے بندے (جناب سرکار دو عالم) نوں اپنے کول پناہ دتی اے تسیں یاں تے اوہناں نال جنگ کرو تے یاں اوہناں نوں اپنے شہر وچوں کڈھ دیو، نہیں تے اسیں اللہ دی قسم کھا کے آکھدے ہاں کہ اسیں اک ٹکڑا لشکر لے کے تہاڈے ول ودھاں گے تے تہاڈے جنگجو جواناں نوں تلواراں دا سواد چکھا دیاں گے تے تہاڈیاں سوانیاں نوں اپنی لونڈیاں بنا لواں گے۔ ایس دھمکی نوں عبداللہ بن ابی نے اک موقعہ جانیا کیوں جے اوس نوں بادشاہی لہجہ دی سی۔ ایس لئی اوس نے تے دُجے مشرکاں نے جنگ دا فیصلہ کر لیا۔ ایہہ خبر جدوں ساڈی سرکار تک پچی تے آپ آپوں چل کے عبداللہ تے اوس دے حواریاں کول تشریف لے گئے تے اوہناں نوں ایہہ گل سمجھائی کہ جیسے تُسیں قریش دی دھمکی توں مرعوب ہو کے ساڈے نال جنگ کرو گے تے ایہہ دیکھ لوؤ کہ اپنے ہی بندیاں تے سجنناں

متران نوں قتل کرنا ہے، کیوں جے میرے اصحاب، اوس و خزرج دے بندے، تہاڈے ہی بندے نیں تے جے تسیں مکی والیاں نال لڑو گے تے اوہناں وچ تے کوئی تہاڈا رشتے دار نہیں۔ ہن آپ سوچ لوؤ کہ کیہڑا رستا چنگا اے۔

رحمت دو عالم داسجھان دا طریقہ کجھ اجہیا سی کہ گل اوسے ویلے اوہناں کافراں دی سمجھ وچ آ گئی تے ایوں جنگ ٹل گئی۔ ایہہ خبر جدوں مکی بجی تے اوہناں نوں ڈاڈی تکلیف ہوئی تے اوہناں دے فساد ی چوہدریاں نے اک ہور خطرناک چال چلی۔ اوہناں نوں پتا سی کہ یہودی چوکی تعداد وچ مدینے دے وسنیک نیں تے علمی تے معاشی لحاظ نال اوہ اپنا اثر رسوخ دی رکھدے نیں۔ اوہناں نوں ایس گل داوی چنگی طرح پتا سی کہ یہودی، مسلماناں نال کیڑ رکھدے نیں۔ ایس لئی مکی دے مشرکاں نے یہودی قبیلیاں نال رابطہ کیتا تے اوہناں نوں آکھیا کہ تسیں تے ٹور پٹے والے بندے او، ہتھیاراں دے ڈھیر تہاڈے کول نیں تے کئی قلعے تہاڈی ملکیت نیں، تہانوں کیس گل داڈراے؟ تہانوں چاہیدا اے کہ تسیں محمد نال جنگ کرو۔ تے جے ایہہ گل تہانوں منظور نہیں تے فیر ساڈے نال جنگ لئی تیار ہو جاؤ۔ تے یاد رکھو کہ فیر ساڈے تے تہاڈیاں سوانیاں دیاں جھانجراں وچکار کوئی شے رکاوٹ نہیں بن سکے گی۔ 1

ایہہ دھمکی والا خط جدوں یہودیاں دے قبیلے بنو نضیر تیکر چجیا تے اوہناں نے ایس گل دی پرواہ نہیں کیتی کہ اوہناں نے دوستی دا معاہدہ کیتا ہو یا اے۔ اوہناں نے حضور نوں سنبھیا گھلیا کہ تسیں اپنے تیس (۳۰) بندیاں نوں لے کے آؤ۔ اسیں وی اپنے ۳۰ سیانے سہنے ہاں تے فلاں تھان تے اکٹھے ہو جاندا ہاں۔ جے ساڈے عالماں تہاڈی گل دی تصدیق کردتی تے تہاڈے تے ایمان لے آئے تے فیر اسیں وی مسلمان ہو جاواں گے۔ دوستی دا ایہہ معاہدہ توڑن تے حضور نے بنو نضیر نال لکڑ لئی تے ایس لڑائی دے نتیجے تے بنو نضیر نے مدینے دی وٹوں چھڈ دی۔

برا ایہہ ہی نہیں کہ مکی دے کافر مدینے وچ سازشاں دا جال وچھا رے سن سگوں جے کوئی مسلمان مکی ٹر جاندا تے اوس نال وی اوہناں دا ورتاوا کوئی چنگا نہیں سی ہوندا۔ اک واری حضرت سعد بن معاذ عمرہ کرن لئی مکی گئے تے اپنے پرانے یا رامیہ بن خلف دے پروہنے بنے۔ حضرت سعد نوں طواف کر دیاں ابو جہل نے ویکھ لیا تے اُمیہ نوں پچھن لگا کہ ایہہ تیرے نال کون اے؟ اُمیہ نے آکھیا کہ ایہہ سعد بن معاذ اے۔ آپ دا نام سن دیاں ای ابو جہل سڑچ گیا تے آکھن لگا کہ سعد! خدا دی قسم کھا کے آکھدا ہاں کہ جے توں اُمیہ دا پروہنا نہ ہوندا تے فیر توں جیوندا اپنے گھر نہ مڑدا۔ سعد وی ایڈی چھیتی ڈرجان والے بندے نہیں سن۔ اوہناں آکھیا کہ فیر توں وی سن لے کہ جے توں کعبہ دے طواف توں ڈکیں گاتے اسیں مدینے وچوں تہاڈا راہ ڈکاں گے۔ ابو جہل نال اوکھا ہوندا یاں ویکھ کے اُمیہ نے وی اپنے پروہنے دا خیال نہ کیتا تے آکھیا کہ نہ بھئی سعد! ابوالحکم نال اُچی گل نہیں کرنی اوہ ایس ساری وادی دے وسنیکاں دا سردار اے۔

ایس طرحاں دے حالات وچ، جدوں کہ ریاست دے اندرونی تے بیرونی خطرے ہر نویں دیہاڑے ودھ رے سن، خالق کل نے اپنی پالیسی جاری فرمادی۔ ارشاد ربانی ہو یا:

{أَذِنَ لِلَّذِينَ يُقَتِّلُونَ بِأَنَّهُمْ ظَلَمُوا وَإِنَّ اللَّهَ عَلَىٰ نَصْرِهِمْ لَقَدِيرٌ} (الحج: ۳۹)

سنن ابی داؤد۔

”حکم ہو یا اوہناں لوکاں نوں (جہاد دا) جہاں نال کافر ٹڈ دے نیں، کیوں جے اوہناں تے ظلم ہو یا۔ تے اللہ اوہناں دی مدد کرن تے یقینا قادر اے۔“

ایہہ اوہ پہلی آیت سی جہدے ذریعے سپہ سالار اعظم نوں جنگ کرن دی اجازت دتی گئی۔ ایس آیت وچ اُذُن دا اکھر چوکی توجہ منگدا اے۔ ایس توں اشارہ ملدا اے کہ مسلمان کفار دے ظلم تو تک پے ہوئے سن پر جدوں وی اوہ سرکار دوعالم توں اذن جنگ طلب کردے تے آپ اپنے اصحاب نوں روک دیندے سن۔ ہن رب دے ایس واضح حکم توں بعد صورت حال بدل گئی۔ ایس آیت توں ایہہ وی پتا لگدا اے کہ ایس اذن ربی دی وجہ ایہہ ہے کہ کافراں نے مسلماناں تے ظلم کیتے نیں۔

ایس توں بعد فی رب تعالیٰ نے پورے دا پورا ضابطہ جنگ عطا فرمادتا۔
حکم ہو یا:

{وَقَاتِلُوا فِي سَبِيلِ اللَّهِ الَّذِينَ يُقَاتِلُونَكُمْ وَلَا تَعْتَدُوا إِنَّ اللَّهَ لَا يُحِبُّ الْمُعْتَدِينَ ۝ وَاقْتُلُواهُمْ حَيْثُ تَقْبَلُونَهُمْ وَأَخْرِجُوهُمْ مِنْ حَيْثُ أَخْرَجُوكُمْ وَالْفِتْنَةُ أَشَدُّ مِنَ الْقَتْلِ وَلَا تُقَاتِلُوهُمْ عِنْدَ الْمَسْجِدِ الْحَرَامِ حَتَّى يُفْتَلُوا فِيهِ فَإِنْ قَتَلُوكُمْ فَاقْتُلُوهُمْ كَذَلِكَ جَزَاءُ الْكَافِرِينَ ۝ فَإِنْ انْتَهَوْا فَإِنَّ اللَّهَ غَفُورٌ رَحِيمٌ ۝ وَقَاتِلُواهُمْ حَتَّى لَا تَكُونَ فِتْنَةٌ وَيَكُونَ الدِّينُ لِلَّهِ فَإِنْ انْتَهَوْا فَلَا عُدْوَانَ إِلَّا عَلَى الظَّالِمِينَ ۝ الشَّهْرُ الْحَرَامُ بِالشَّهْرِ الْحَرَامِ وَالْحُرُمَتُ قِصَاصٌ فَمَنِ اعْتَدَى عَلَيْكُمْ فَاعْتَدُوا عَلَيْهِ بِمِثْلِ مَا اعْتَدَى عَلَيْكُمْ وَاتَّقُوا اللَّهَ وَاعْلَمُوا أَنَّ اللَّهَ مَعَ الْمُتَّقِينَ ۝} (البقرة: ۱۹۰-۱۹۴)

”اللہ دے رستے وچ اوہناں لوکاں نال جنگ کرو، جیہڑے تہاڈے نال جنگ کرن، تے حدوں نہ ودھو۔ بے شک اللہ حد پ جان والیاں نوں پسند نہیں کردا۔ اوہناں نوں مارو جتھے وی اوہ لہجہ جان تے اوہناں نوں اوتھوں کڈو جتھوں اوہناں تہاں کڈیا سی۔ تے سن لوؤ کہ فتنہ توں چوکھا وڈھا جرم اے۔ تے تسیں اوہناں نال مسجد حرام دے نیڑے لڑائی نہ کرنا جناں چیر کہ اوہ آپوں لڑائی نہ چھوہ دین۔ فیر جے اوہ لڑائی چھیڑ دین تے تسیں وی اوہناں نوں مارو۔ کافراں دا بدلا ایہی اے۔ فیر جے ایہہ باز آجان تے اللہ بخشن والا تے مہربان اے۔ تے فیر اوہناں نال جنگ کرو ایتھوں تیکر کہ فتنے دا نام نشان مٹ جاوے تے اللہ دا دین غالب آجاوے۔ فیر جے ایہہ باز آجاو تے پکڑ تے زری ظالماں لئی ہے۔ حرمت والا مہینا حرمت والے مہینے دے بدلے ہے تے ایوں دُجیاں حرمت والیاں چیزاں دا وی بدلہ اے۔ تے فیر جیہڑا تہاڈے نال زیادتی کرے، تسیں اوہدے نال اتنی ای زیادتی کرو جتنی تہاڈے نال ہوئی اے۔ تے اللہ توں ڈر دے رہو تے یقین رکھو کہ اللہ پرہیزگاراں دے نال اے۔“

ہن سوال ایہہ رہ گیا کہ ایہہ قتال کیوں کیتا جاوے۔ مسلمان جیہڑے تھوڑے وی نیں، تے ماڑے وی نیں اوہ کیوں اپنے توں بگڑیاں نال ٹکر لے کے اپنیاں جاناں ضائع کرن گے؟ آوا ایس دا جواب لہجہ دے ہاں:

حضرت قتادہ توں روایت اے کہ اک واری صحابہ دے اک مجمعے وچ کھڑے ہو کے نبی رحمت نے ارشاد فرمایا: ((ان الجہاد فی سبیل اللہ والا یمان باللہ افضل الایمان مقام رجل فقال یا رسول اللہ أرأت ان قتلت فی سبیل اللہ یکفرو عنی خطا یا ی؟ فقال لہ رسول اللہ صلی اللہ علیہ وسلم نعم۔ ان قتلت فی سبیل اللہ وانت صابر محتسب مقبل غیر مدبر۔ ثم قال رسول اللہ صلی اللہ علیہ وسلم کیف قلت؟ فقال ارأیت ان قتلْتُ فی سبیل اللہ ایکفر عنی خطایا؟ فقال رسول اللہ صلی اللہ علیہ وسلم نعم وانت صابر محتسب مقبلٌ غیرٌ مُدبِّرٍ۔ الا الدین فانَّ جِبْرِیْلَ قَالَ لِي ذَلِکَ۔)) (رواہ مسلم)

”جہاد فی سبیل اللہ تے ایمان باللہ سب تو سو ہونا ایمان اے۔ ایہہ سُن کے اک بندا (صحابی) کھلو گیا تے آکھن لگا یا رسول اللہ! جے میں راہ خدا تے ماریا جاواں تے کیہہ میریاں ساریاں خطاواں معاف ہو جان گئیاں۔ آپ نے فرمایا ہاں پر شرط ایہہ ہے کہ تو ایس حال وچ شہید ہوویں کہ توں صبر کرن والا، ثواب آخرت نوں لبھن والا تے اگے ودھن والا ہوویں نہ کہ کچھ بٹن والا۔ فیر رسول اللہ نے فرمایا کہ (لے بھئی ذرا فیر دسیں) توں کیہہ آکھیا سی۔ صحابی نے آکھیا جے راہ خدا وچ مارتا جاواں تے کیہہ میریاں ساریاں خطاواں معاف ہو جان گئیاں۔ آپ نے فرمایا ہاں۔ بشرطیکہ توں ایس حال وچ شہید ہوویں کہ توں صبر کرن والا، ثواب دی جستجو کرن والا تے اگے ودھن والا ہوویں نہ کہ کچھ بٹن والا پر قرض معاف نہیں ہووے گا۔ ایہہ گل جبرائیل نے مینوں اے بن دسی اے۔“

ایس توں ودھ کے کسی نیکی دی کیہہ فضیلت ہو سکدی اے کہ اوس نیکی دے نتیجے تے بندے دے ساری حیاتی دے گناہ معاف ہو جان تے جناب رحمت اللعالمین دے ایس ارشاد نے تے رہی سہی کسروی پوری کردتی کہ خدا دی قسم اے جے ایہہ کم ہو سکدا ہندا تے بس ضرور ایہہ چاہندا کہ میں اللہ دی راہ تے شہید ہو جاواں، فیر زندہ ہوواں تے فیر شہید ہوواں، فیر زندہ ہوواں تے فیر شہید ہوواں تاں جے اوس دے رستے تے جان دین دا سواد چکھدا رہندا۔ 1

جہاد دی لوڑ کیوں پئی تے جہاد دی فضیلت کیہہ اے، آسیں ایہہ گل پڑھ لئی اے۔ ہن آسیں دیکھدے ہاں کہ رب دے نترے ہوئے حکم قتال دے باوجود تے رسول خدا دے جہاد دی فضیلت دے ارشادات دے باوجود جے کوئی مسلمان کسے دنیاوی طمع، کسے پکے ہوئے پھل دے لالچ، کسے بھک ننگ دے ڈریاں گرمی سردی دی اذیت توں بچن لئی راہ خدا وچ نکلن توں گریز کردا اے تے اوس دا نقصان کیہہ ہووے گا۔ اوس دا نقصان یقیناً ایہو ہووے گا کہ دشمن بغیر کسے روک ٹوک توں مسلمان آبادی تے دھاوا بولے گا تے فیر نہ اوہ پکے ہوئے پھل چھڈے گا، نہ کوئی کوٹھا پکلی چھڈے گا تے نہ مسلمان سوانیاں نوں اپنیاں لونڈیاں بنان توں باز آوے گا۔

رب سوہنے نوں تے اپنے محبوب دے نال ٹرن لئی اک اجہی ٹیم چاہیدی اے، جس نوں دنیا نالوں آخرت دی حیاتی

! بخاری شریف

چوکی چنگی لگدی ہووے۔ تے جہناں نوں دنیاوی حیاتی چنگی لگدی اے اوہناں نوں رب تعالیٰ ایہہ سوال کردا اے:

{أَرَضِيتُمْ بِالْحَيَاةِ الدُّنْيَا مِنَ الْآخِرَةِ}

”کیہ آخرت دی بجائے دنیاوی حیاتی تے ای راضی ہو گئے او؟“ تے فیر آپوں جواب دیندا اے:

{فَمَا مَتَاعُ الْحَيَاةِ الدُّنْيَا فِي الْآخِرَةِ إِلَّا قَلِيلٌ} (توبہ: ۳۸)

”فیر دنیاوی حیاتی دا فیدہ تے آخرت دے مقابلے تے کجھ وی نہیں بس تھوڑا بوہت ای ہے۔“

ایس حقیقت توں مسلماناں نوں خبردار کرن توں بعد وی رب نے کوئی اولہا نہیں چھڈیا تے لگدے ہتھ ای ایہہ گل وی

دس دتی اے کہ:

{الَّا تَنْفِرُوا يُعَذِّبْكُمْ عَذَابًا أَلِيمًا وَيَسْتَبْدِلْ قَوْمًا غَيْرَكُمْ وَلَا تَضُرُّوهُ شَيْئًا وَاللَّهُ عَلَى كُلِّ شَيْءٍ

قَدِيرٌ} (توبہ: ۳۹)

”تے جے تئیں (جہاد لئی) نہ نکلو گے تے اللہ تہاں نوں دردناک عذاب دیوے گا تے تہاڈی تھان تے کوئی دُجی

قوم لے آوے گا تے فیر تئیں اوس دا کجھ وی نہ وگاڑ سکے گا۔ تے اللہ ہر چیز تے قادر اے۔“

گل بڑی کھری تے سدی اے کہ دنیاوی حیاتی نوں رب اگے وپیچ کے اساں اک نفع بخش سودا کرنا اے کیوں جے

ایہدے بدلے سٹھ ستر یا اسی ورھیاں دی نہیں سگوں ہمیش دی حیاتی ملنی اے تے اجہی موجاں والی حیات ملنی اے کہ پوری

دنیا دیاں موجاں اک پاسے تے اوس حیاتی دے اک لمحے دا سرور فیر اوس توں ودھ اے۔ تے جے ایہہ گل ساناں وارا نہ

کھاوے تے رب نوں ایس دی کوئی پرواہ نہیں۔ اوہ آکھدا اے کہ میرے کول تہاڈا بدل موجود اے۔ اوہ ایہہ وی آکھدا

اے کہ کلمہ حق تہاڈا محتاج نہیں سگوں اپنی نجات لئی تئیں اوس دے محتاج او۔

جنہاں لوکاں جہاد وچ اپنے مال تے اپنیاں جاناں نال شرکت کیتی اوہناں تے رب تے اوس دا رسول کوں راضی

ہوئے اوس دا پتا ایس گل توں لگدا اے کہ جنہاں لوکاں جنگ بدروچ شرکت کیتی سی جے اوہناں کولوں کدرے کوئی بھل

چک ہو جاندی سی تے نبی رحمت اوہناں نوں سزا دین توں انکار کر دیندے سن۔ اک واری فرمایا کہ ”ایہہ تے اوہ جان نثار

نیں جنہاں نے جنگ بدروچ شرکت کیتی سی۔ عجب نہیں کہ ایس اک عمل دے بدلے وچ اللہ نے اوہناں دیاں سب انگلیاں

چکھلیاں خطاواں بخش دتیاں ہون تے آکھ دتا ہووے کہ جودل چاہندا جے کرو۔“

عمران بن حصین توں روایت اے کہ جدوں رومیاں دی جنگ دی تیاری دی خبر پچی اوہدوں مسلماناں دی حالت چوکی

ماڑی سی۔ نہ کوئی ہتھیار تے جنگی سامان سی تے نہ ای کوئی پیسہ دھیلا۔ حضرت عثمان نے جدوں ایہہ حال ویکھیا تے اپنا پورا

تجارتی قافلہ جیہڑا اشام جان لئی تیاری حضرت a دی خدمت وچ پیش کر دتا۔ اوہدے وچ دوسواونٹ مال لدے ہوئے سن

تے دوسواونٹ سونا سی۔ حضورؐ نے جناب ذوالنورین دی ایس پیش کش تے فرمایا:

{لَا يَضُرُّ عِثْمَانَ مَا عَمِلَ بَعْدَهَا}

”ہن توں بعد عثمان نوں کوئی عمل نقصان نہیں پہنچا سکدا۔“

ایس حدیث توں پتا لگدا اے کہ جہاد مالی اے یاں جانی، ایس توں بعد، رسول خدا دی نظر وچ کوئی برائی وی اوس مجاہد نوں نقصان نہیں پہنچا سکدی۔ کیہہ ہور وی کوئی اچھی نیکی یاں کوئی عمل ہے جیہڑا ایڈی فضیلت رکھدا ہووے۔
دین اسلام دے ضابطہ جہاد دا ہور متارا:

اللہ تے اوس دے رسول دی سر بلندی لئی جہاد فرض کفایہ اے پر جدوں غیر مسلم، مسلماناں تے حملہ کر دین تے فیر اوس شہر دے سارے باشندیاں لئی دفاع لئی اٹھ کھلونا فرض عین ہو جاوے گا۔ جے دشمن چوکھا طاقتور ہووے تے مقابلے لئی اوس وتی دے وسنیک کافی نہ ہون تے فیر نیڑے دے مسلماناں لئی وی فرض عین ہو جائے گا۔ تے جے فیر وی کافی نہیں یاں اوہناں نے سستی کیتی اے یاں کسے گلّوں صاف انکار کردتا ہووے تے فیر اوس توں اگلی مسلمان وتی یاں مسلمان قبیلے تے فرض عائد ہو جاوے گا کہ اوہ مظلوم مسلماناں دی مدد لئی جہاد کرن۔ حتیٰ کہ ساری دنیا دے مسلماناں تے ایہہ فرض عائد ہو جاوے گا کہ اوہ رب دے ایس فیصلے نوں سچ ثابت کر کھادن کہ ساری دنیا دے مسلماناں تے مسلمان سوانیاں اک دُجے دے مددگار تے دوست نیں تے ایوں مظلوم مسلماناں دے موڈے نال موڈا لاکے کھلو جان۔

ایہ دفاع دی عام صورت اے۔ کجھ صورتاں اچھیاں وی نیں جنہاں وچ سارے اسلامیاں عالم تے اکو ویلے، تے فوری طور تے دفاع فرض عین ہو جاندا اے۔ مثلاً خلیفہ وقت سارے مسلماناں کو لوں مدد دا طلب گار ہووے تاں جے عالم کفر دا مجموعی طور تے سامنا کیتا جاسکے۔ دُجی شکل ایہہ ہے کہ اسلام دے گڑھ تے مرکزی مقام یعنی جزیرہ عرب تے غیر مسلم حملہ کر دین کیوں جے اوس متبرک تے قابل احترام مقام نوں غیر مسلمان توں ہر ویلے محفوظ رکھنا سب مسلماناں دی سانجھی ذمہ داری اے۔، بھانویں اوہ ایس دھرتی دی کسے وی نکر وچ وسدا ہووے۔

آج دے عالم اسلام دے سامنے تواریخ اک وار فیر سوالیہ نشان بن کے کھلوتی اے تے ایہہ پچھڑی اے، جیہڑا کہ اوہ پچھن دا حق رکھدی اے، کہ کیہہ اوہناں نے فیر اے کسے یزید دی نامزدگی کرنی اے؟ کیہہ اوہناں فیر اک وار جنگ جمل لڑنی اے؟ کیہہ اے اوہناں اک وار فیر کوئی کربلا پیا کر کے اپنے مونہاں تے کالکھ ملنی اے، کیہہ اوہناں اے اک فیر جلد دے پانیاں نوں رتھا کرنا اے؟ کیہہ اے اوہناں بغداد دے کتب خانیاں نوں ہور سڑدا ویکھنا اے؟ کیہہ اے بیت المقدس دی رسوائی نال اوہناں دا چھوہ نہیں بھریا گیا؟ کیہہ اے اوہ سپین ورگی نسل کشی تے بوسنیا ورگی عصمت دری تے راضی نہیں ہوئے؟ کیہہ اے اوہ ہور پاکستان، بنگلہ دیش بن دے ویکھنا چاہندے نیں؟ کیہہ اے اوہ کشمیر، افغانستان تے عراق دی رسوائی تے راضی نہیں ہوئے تے کیہہ اے اوہناں عراق دی ابو غریب جیل وچ کجھ ہور دختران مسلم نوں یہودیاں دے بالوں دیاں مانواں بن دیاں ویکھنا اے؟ جے ایہناں وچوں کسے وی سوال دا جواب نہیں وچ اے تے فیر ایہہ اویں ویلا اے جس ویلے بابت آکھیا گیا اے کہ لہندے، چڑھدے دے سارے ای مسلماناں تے جہاد عین فرض اے۔

جہاد دے آداب:

اللہ تے اوس دے رسول نے اپنے منن والیاں نوں کجھ آداب سکھائے نیں جنہاں دی پابندی شیخ رسالت دے

۵۷

پردانیاں لئی ضروری اے، تے جے ایہہ پابندی نہیں کیلتی جانندی تے فیر اوہ جنگ، جہاد نیں سکوں کجھ ہور اے۔ آؤ اک نظر اوہناں نوں ویکھئے:

- ۱۔ ٹسیں ویریاں نال اوناں ای کرسکدے او جنہاں تہاڈے نال کیتا گیا اے۔
- ۲۔ صبر تے درگزر توں کم لوؤ گے تے تہاڈے لئی چنگا اے۔
- ۳۔ کسے قوم دا ویر تہانوں عدل توں دُور نہ لے جائے۔ عدل کرو کیوں جے ایہہ تقویٰ دے نیڑے ہے۔
- ۴۔ حدوں ودھن والیاں نوں اللہ پسند نہیں کردا۔
- ۵۔ اللہ دانام لے کے، اللہ دے رستے وچ، اللہ دے نافرماناں نال جہاد کرو۔
- ۶۔ بدعہدی تے خیانت نہ کرنا۔
- ۷۔ لاشاں دا مسئلہ نہ کرنا۔
- ۸۔ راہباں تے گوشہ نشیناں نوں نہ چھیڑنا۔
- ۹۔ کسے پھل دار رکھ نوں نہ وڈنا۔
- ۱۰۔ کسے گھرنوں برباد نہ کرنا۔
- ۱۱۔ سوانیاں، باللاں، بڈھیاں، بیماراں تے اوہناں نوں جیہڑے اوس قوم وچوں تہاڈے نال جنگ نہیں کرنا چاہندے، کجھ نہ آکھنا۔

ایہہ تے سن اللہ تے اوس دے رسول دے اوہ حکم جنہاں دی پابندی ہر ویلے ضروری اے۔ ذرا فتح مکہ دے ویلے تے جھاتی پاؤ:

- ۱۔ حرم وچ خونریزی بلکل نہ کرنا۔
 - ۲۔ وار اوسے اُتے کرنا جیہڑا تہاڈے اُتے کرے۔
 - ۳۔ جیہڑا بند اکعبہ وچ پناہ لوے اوس نوں پناہ اے۔
 - ۴۔ جیہڑا ابوسفیان دے گھر وچ پناہ لوے، اوہ محفوظ اے۔
 - ۵۔ جیہڑا اپنے گھر دا بوا بند کر لوے، اوس نوں کجھ نہ آکھنا۔
 - ۶۔ اگئی لگ کے بھج جان والے نوں پچھوں سٹ نہ مارنا۔
 - ۷۔ ہتھیار سٹ دین والے نوں معافی اے۔
 - ۸۔ جیہڑا زخمی ہو کے تہاڈے ہتھے چڑھ جاوے یاں قید ہو جاوے اوس نوں قتل نہ کرنا۔
- ایہہ نیں اوہ راہنما اصول جیہڑے اوہناں لوکاں نال جنگ وچ سامنے رکھے گئے جنہاں نے اپنی زور اوری دے زمانے وچ، اوس جنگ دے سپہ سالار، تے اوس دے ساتھیاں نال ظلم دی انیر کر چھڈی سی۔
- اوہناں نے آکھیا سی کہ محمدؐ وچ کے نہ جائے۔ آج محمدؐ آکھ رہیا اے کہ ویکھنا کوئی مرنہ جائے۔ اوہناں آکھیا سی کہ محمدؐ!

اسیں تیری دھی زینب نوں مکی وچوں نہیں نکلن دینا، آج محمدؐ کھ رہیا اے کہ زینب نوں اذیت دین والا ہمار معاف، اوہناں آکھیا سی محمدؐ دے چاچے حمزہ نوں قتل کرن والا غلام آزاد، آج محمدؐ آکھ رہیا اے حمزہ داکلجہ کڈن والی ہند (زوجہ ابوسفیان) وی معاف۔ سگوں اوس دے گھر چ پناہ لین والا دی معاف۔ عکرمہ جیہڑا اے کل تیکر آکھ رہیا سی کہ مکی وچ وڑو گے کس طرحاں؟ تے جس دے پیو نے محمد رسول اللہ دے قتل دی سازش کیتی سی آج محمد اوس نوں دی معافی دے رہیا اے۔ تے ایوں تواریخ اسلام دی سب توں وڈھی فتح وچ سوائے چند غنڈیاں دے کوئی بند قتل نہ ہو یا تے کوئی سوانی بے آبرو نہ ہوئی اتے محمدؐ دے شیدائیاں نے آج تیکر ایہہ گل پلے بھی ہوئی اے۔

اتھے اسلام نوں تلوار داندھب آکھن والیاں نوں ایہہ گل چیتے کرادینا وی ضروری جا پدا اے کہ ہجرت مدینہ توں لے کے رفیق اعلیٰ ول واپسی تیکر سپہ سالار اعظمؑ یاں اوس دے مجاہد ۸۲ واردین خدا دی سر بلندی لئی میدان وچ نکلے نیں، جہناں وچوں ۶۳ موقعیاں تے کسے مشرک دالہو نہیں وگیا تے ۱۰ ورہیاں دی اوس لمی مدت وچ جہدے وچ مشرکاں، منافقاں تے اہل کتاب نے رسول خدا تے اوہناں دے سبھاں داک وچ دم کیتا ہو یا سی، کل ۸۲ موقعیاں تے ۸۲۸ بندے مسلماناں دیاں شمشیراں نال جہنم پجے۔ ایس دا مطلب ایہہ ہو یا کہ ہر معرکے وچ تقریباً ۱۰ غیر مسلم مارے گئے تے ایس دوران ۳۰۰ توں زیادہ مجاہدین اسلام نے وی شہادت دے پیا لے پیتے۔ فیر سمجھ نہیں آوندی کہ آج دے دشمنان رسول کول کیہڑی دلیل اے جہدے توں اوہ اسلام نوں تلوار داندھب آکھدے نیں۔

آج مجاہدین اسلام دی کردار کشی لئی ہر حربہ آزمایا جا رہیا اے پر مغرب دی پروپیگنڈہ مشینری پورا ٹل لاکے وی ایہہ گل ثابت نہیں کر سکی کہ کسے اچھے بندے نے کدے کسے سوانی نوں بھیڑی نظر نال ویکھیا ہووے جنوں مغرب یاں مشرق دے اسلام دشمن ”دہشت گرد“ آکھدے نیں۔

نام نہاد مہذب مغرب تے اوس دے دانش ور:

دُجے پاسے اسیں ویکھدے ہاں کہ نام نہاد مہذب مغرب دیاں دانش ور قوماں نے اپنے قابو اتے زیر تسلط آجان والے لوگاں نال ہراوہ ظلم کیتا جیہڑا دور جہالت وچ اوہناں دے وڈے کردے ہوندے سن۔ اے کجھ ورھے پہلوں بوسنیا وچ ہزاراں فوجیاں دی سرکاری طور تے ایہہ ڈیوٹی لگائی گئی سی کہ اوہ ہر روز مسلمان قیدی عورتاں دی اجتماعی عصمت دری کرن۔ قتل و غارت گری، دہشت گردی، انھے واہ دی خونریزی، نہتے لوکاں تے ڈیزی کٹر بمباری تے فیر جنگی قیدیاں نال انسانیت سوز سلوک آج دے مغرب دی پچھان اے۔ حد تے ایہہ ہے کہ عراق دی ابو غریب جیل وچ مسلمان منڈیاں تے بزرگاں نوں نیگیاں کر کے اوہناں نال اپنیاں تصویراں بناؤن دی ذمہ داری ہن مغرب دیاں سوانیاں بھگتا رہیاں نیں۔ ۲۰۰۴ء تیکر ساہ لین والا دنیا داکیہڑا بنداسی جیس نے دختر امریکہ مس لنڈن تے بنات مغرب دیاں عراقی مرداں دے ستر اں ول اشارے کر کے، تے ہس ہس کے بنوایاں تصویراں نہیں ویکھیاں۔

امریکی تہذیب تے عراق دی ابو غریب جیل:

پاکستان طرحاں امریکی مقننہ وی دو ایوانی اے۔ فرق ایہہ ہے کہ پاکستان دا تھلڑا ایوان (ایوان زیریں) قومی اسمبلی

اکھواندا اے پر امریکی ایوان زیریں ایوان نمائندگان (House of Representatives) اکھواندا اے۔ دوواں ملاں دے اُتلے ایوان (ایوان بالا) سینٹ اکھواندا اے نیں۔ ایس حوالے نال اک دُجی گل جیہڑی چوکی ضروری جاپدی اے اوہ ایہہ ہے کہ پوری دنیا دے قانون ساز اداریاں وچ امریکی سینٹ واحد ایوان بالا اے جیہڑا ایوان زیریں توں چوکھا ٹکڑا تے زور اوراے۔ ایس لئی امریکہ وچ وی تے امریکہ توں باہر وی ایہہ سمجھیا جاندا اے کہ جیہڑا کم سینٹ دے ہتھوں ہوئی اے اوہ چوکھا معتبر تے کھرا ہووے گا۔

عراق دی ابو غراب جیل وچ بے غیرت تے ضمیر فروش مسلمان حکمراناں دے تعاون نال نام نہاد مہذب امریکیاں نے ۲۰۰۳ء وچ نہتے تے بے دستے عراقی مسلماناں نال جو کر چھڈی سی اوس نوں سنن تے پڑھن لئی بڑے دل گردے دی لوڑ اے۔ جو کجھ میں بیٹھ دن لگا ہاں ایہہ امریکی سینٹ دی اوس تحقیقاتی کمیٹی دی رپورٹ اے جیہڑی سینٹ آرمڈ سروسز کمیٹی اکھواندا اے۔ کمیٹی دی رپورٹ دے کجھ حصے مصر دے اخبار روزنامہ اسبوع دے چیف ایڈیٹر جناب مصطفیٰ بکری دے ہتھ لگ گئے تے اوہناں اپنی ۱۷ مئی ۲۰۰۳ء دی اشاعت وچ شائع کیے۔ ایسے رپورٹ دا اردو ترجمہ ہفت روزہ زندگی لہور نے اپنی ۴-۱۰ جولائی ۲۰۰۳ء دی اشاعت وچ چھاپیا۔

اسبوع دے مطابق امریکی فوج نے لوڑی دیاں معلومات حاصل کرن لئی ۴۰۰ سوانیاں تے کڑیاں، ۶۰۰ بالوں تے ۷۰۰ منڈیاں نوں گرفتار کیتا۔ امریکی صدر بش نے اوہناں تے تشدد تے ٹارچر دے سارے طریقے ورتن دا حکم دتا تے چوکھے توں چوکھا جسمانی تے نفسیاتی تشدد کرن لئی طریقہ نمبر ۱۲ ورتن دی وی اجازت دے دتی۔ پھرے جان والے عراقیاں وچوں کسے نے، تشدد توں تنگ آ کے، صدام حسین دی بعث پارٹی دی فوجی قیادت دے اوہناں تن بندیاں دے نام دس دتے جیہڑے مزاحمتی تحریک نوں منظم کر دے سن۔ امریکی فوجی اوہناں تن لیڈراں نوں تے نہ پھڑ سکے پر اوہناں دیاں بیویاں تے دھیاں نوں گرفتار کر لیا۔ فیر اوہناں نال چوکی تعداد وچ امریکی فوجیاں نے کھلے عام زیادتی کیتی۔ جنسی تشدد دی ایس انتہا توں بعد دو عورتاں نے خودکشی وی کر لئی۔ انسانیت نوں خون دے اتھر و روان والے تے ہلاکوخاں دی رُوح نوں شرم دوان والے ظلم دی تفصیل جان لئی سینٹ آرمڈ سروسز کمیٹی نے پیٹھا گون (امریکی محکمہ دفاع) دے انٹیلی جینس سربراہ جنرل رونالڈ یورگس تے بری فوج دے قانونی امور دے سربراہ ٹومس روگ نال کجھ براہ راست سوال کیے۔

آؤ پڑھیے:

کمیٹی: کیہہ تہاں ایس گل دی تصدیق کیتی سی کہ پھرے جان والے سارے بال تے منڈے دہشت گرداں دے رشتے دار نیں؟

ٹومس روگ: ساڈے کول ثبوت دے طور تے خفیہ رپورٹاں موجود نیں، نالے اسیں وزیر دفاع دے مشیر انٹیلی جینس جنرل اسٹیفن کسبن نوں وی حالات دی خبر دے دتی سی۔

کمیٹی: فیر جنرل کسبن نے کیہہ آکھیا؟

یورگس: سانوں جنرل کسبن وٹوں (پھرے گئے) ۸ امریکی فوجی افسراں دی رہائی لئی ٹارچر جاری رکھن دا حکم ملیا۔

کیٹی: ایس حکم دا پروا کر کے دسو۔

یورگس: بالاں تے اوس ویلے تیکر نارچر کیتا جاوے جدوں تیکر اوہناں دے دہشت گرد رشتے دار اپنے آپ نوں ساڈے حوالے نہیں کر دیندے۔ پر نارچر نال ۱۸ نیانے مر گئے نیں۔

کیٹی: کیہہ ایہ بال سخت نارچر پاروں ہلاک ہوئے نیں؟

یورگس: شاید!

کیٹی: جیہڑیاں سوانیاں ٹساں پھڑیاں سن اوہناں نال کیہہ سلوک کر دے سی؟

یورگس: عراقی سوانیاں پچھ گچھ وچ ساڈے نال بلکل تعاون نہیں سن کر دیاں۔ اوہ چوکھے سکون تے اطمینان دے نال نال پیڑے حوصلے تے ٹھنڈے جذبات والیاں سن۔ اسیں چاہندے ساں کہ اوہناں نوں ڈرایا جاوے تے نالے اشتعال دوا یا جاوے، تاں جے اوہ سانوں کجھ دسن۔ اساں جدوں مشورہ منگیا تے سانوں حکم ملیا کہ اوہناں نال اجتماعی زیادتی (Gang rape) کرو فیروہ سوانیاں آپوں سارا کجھ دسن گئیاں۔

کیٹی: ایہہ حکم کس نے دتا سی؟

یورگس: پیٹھاگون نوں ایس حکم دا پتا سی۔

کیٹی: کیہہ ایہہ حکم و ہائٹ ہاؤس (صدر بش دا دفتر) نے جاری کیتا سی؟

یورگس: مینوں نہیں پتہ۔

کیٹی: تہاڈے تیکر ایہہ حکم کس بندے نے اپڑایا؟

یورگس: (وزیر دفاع دے مشیر) جنرل کسبن نے۔ اوس نے ایہہ وی آکھیا سی کہ ایہہ حکم اوپر توں آیا اے تے

ایہدے

اُتے عمل کرنا بہت ضروری اے۔

کیٹی: زیادتی کوں کیتی جاندی سی؟

یورگس: ایہہ زیادتیاں گھٹو گھٹ دو افسراں تے کئی امریکی فوجیاں دی موجودگی وچ کیتیاں جاندیاں سن۔

کیٹی: بری فوج دے مشیر قانون جنرل ٹومس روگ توں سوال اے کہ کیہہ تسیں ایس عمل نوں جائز سمجھیا؟

روگ: اغوا ہون والے امریکی بندیاں دا تھاں ٹھکانہ لہسن لئی کجھ عراقی سوانیاں نال زیادتی کرنا میرے نزدیک کوئی جرم نہیں، سگوں ایہہ کم جنگی کارروائیاں وچ تے جائز ہندا اے۔

کیٹی: کیہہ ایس توں وکھ تہاڈے کول کوئی حل نہیں سی؟

روگ: ایس سوال دا جواب جنرل یورگس میرے توں چنگا دے سکدے نیں۔

کیٹی: ہاں جنرل یورگس! تسیں دسو!

یورگس: اسیں دُجے طریقے وی ورتے سن جنہاں وچ عورتاں نوں مارنا، پانی وچ لمیاں پا دینا، اوہناں نوں سون نہ دینا

تے ۲۴ گھنٹے کھڑے رکھنا شامل سی۔ اسیں کچھ سوانیاں دے وال وی کٹے سن پر اوہناں سانوں کچھ نہ دسیا۔ ایس لئی ضروری ہو گیا سی کہ اسیں زیادتی والا طریقہ ورتیے۔

کمیٹی: بالاں تے تشدد کرن والے حکم تے عمل کرن دی ذمہ داری کدے تے پائی گئی؟

رویگ: ایہہ حکم ابو غریب جیل دی انچارج بریگیڈز جنرل جینس کارپنسکی ول گھلیا گیا سی۔

کمیٹی: رپورٹاں وچ کیہہ دسیا گیا؟

یورگس: بالاں دے جسم دے حصیاں نوں وڈنا، تیز دھار والے آلات اوہناں دے سراں تے مارنا تے کدی کدی

اوہناں

دے جسم دے کچھ حصیاں نوں آگ نال ساڑن دا دسیا گیا۔

کمیٹی: ٹساں لوکاں ایہہ سب کیوں کیتا جڈ کہ اوہ بچے نیں تے اوہناں نوں پتہ وی کچھ نہیں؟

یورگس: میں اعتراف کر دا ہاں کہ بچے تے زے قربانی دے جانورن پر اسیں ایہہ سب کچھ اوہناں دیاں بہناں تے

مانواں دے سامنے کر دے ساں تاں جے اوہناں نوں مجبور کیتا جاوے کہ اوہ کچھ دسن۔

کمیٹی: کیہہ تساں عرن والیاں نوں اوہناں دے رشتے داراں دے حوالے کیتا؟

یورگس: نہیں، اساں آپوں اوہناں نوں صحرا وچ دفن کر دتا۔ اسیں چاہندے ساں کہ اوہناں دیاں مانواں تے بہناں

دفن

کرن ویلے نال نہ ہون پر اوہناں دی ضد توں اسیں اوہناں نوں نال لے گئے۔ اوہ مناظر بڑے ہولناک سن۔

کمیٹی: مسٹر رویگ توں سوال اے کہ حقائق دسدے نیں کہ ۳۷۲ بٹالین، ۳۲۰ بریگیڈ تے ۸۰۰ ڈویژن نے عراقی

نوجواناں دے خلاف نارچر دے نیکلے تے چوکھے خطرناک طریقے ورتے۔ ایس بارے تہاڈے کول کیہہ

تفصیلاں نیں؟

رویگ: میں بعض طریقیاں دے خلاف اپنا اعتراض درج کروایا سی۔

کمیٹی: اپنے اعتراض بارے کچھ دسو گے؟

رویگ: میرا اعتراض قیدیاں نال ہون والیاں غیر اخلاقی حرکتاں دے خلاف سی، خاص طور تے جدوں مینوں پتہ لگا کہ

امریکی فوج وچ موجود اکثر ہم جنس پرست فوجیاں نوں ایس لئی عراق سدا گیا اے کہ اوہ قیدی منڈیاں دے

نال بد فعلی کرن۔ اوہ تھے زیادتی دے خلاف بولن والے نوجوان نوں ہلاک کر دتا جاندا سی۔ میرا سب توں وڈا

اعتراض قیدیاں تے تربیت یافتہ کتیاں (Dogs) نوں ورتن تے سی۔

کمیٹی: کتنے قیدیاں نال کیہہ کر دے سن؟

رویگ: میرے کول ضروری رپورٹاں تے تصویراں موجود نیں جہیزیاں وزیر دفاع دے دفتر وچ وی اپڑیاں نیں۔

تصویراں تے رپورٹاں موجب کتیاں نوں مرداں دے نازک اعضا (شرمگاہ) نوں وڈھ لیاؤن دی خاص

تربیت دتی گئی۔ جنرل کارپنسکی نے جدوں مینوں دسیا تے ایس طریقے تے پورا اطمینان ظاہر کیتا پر میں اوس
نوں آکھیا کہ کسے امریکی نوں تے ایہہ زیب نہیں دیندا۔
کمیٹی: خیر (بی بی) کارپنسکی نے کیہہ آکھیا؟
رویگ: اوہ عراقی منڈیاں نوں بغیر کسے چادریاں لیڑیاں توں، مکمل نگارکھن تے ضد کردی سی۔ جیہڑا قیدی بولدا اوس
نوں

مار دتا جاندا سی۔ کندھ وچ لگیاں لوہے دیاں زنجیراں نال اوہناں دے پیر تے ہتھ بندھ کے زبردستی اوہناں
دیاں لتاں کھولیاں جاندیاں سن۔ فیر اچن چیت اوہناں تے کتیاں نوں چھڈیا جاندا سی تاں جے اوہ
قیدیاں دے نازک اعضاء تے جھپٹن تے اوہناں نوں وڈھ کے سٹ دین۔ جیہڑاں تصویراں مینوں ملیاں
نیں اوہ بہت بھیا تک تے لہوناں لت پت منظر نہیں۔
کمیٹی: ایس طریقے نال مرن والیاں دی تعداد کیہہ اے؟
رویگ: میری اطلاع موجب ۱۳۰۰ اے۔ نازک اعضاء کٹ جان توں بعد کجھ گھنٹے قیدی چوکی پیڑ نال کراہندے تے
جیوندے رہندے تے فیر اوہ مرنے جانداں سن۔ افسوس دی گل ایہہ ہے کہ ساڈے فوجی ایہو جئے منظر ایں توں
سوا دلیندے سن۔

کمیٹی: ساڈے کول اک امریکی خاتون فوجی توں ملن والی رپورٹ موجود اے جہدے وچ دسیا گیا اے کہ عورتاں
تے

وی کتیاں نال تشدد کیتا گیا اے جہدے نال کئی عورتاں مر گئیاں نیں۔

رویگ: میرے کول اجہی کوئی خبر نہیں۔
کمیٹی: مرداں دے نازک اعضاء تاراں نال بندھ کے ٹارچر کرن والے طریقے بارے تیں کیہہ آکھو گے؟
رویگ: ایہ طریقہ اورتن دا مقصد عراقی منڈیاں نوں بغیر ہلن جلن توں کھلو تے رہن تے مجبور کرنا اے۔
کمیٹی: کیہہ ٹارچر دے ایس طریقے تے ٹساں کوئی اعتراض نہ کیتا۔
رویگ: سچ تے ایہہ ہے کہ نہیں کیتا۔

کمیٹی: کیہہ اوہناں تاراں وچ بجلی وی سی جیہڑی کسے ویلے وی قیدیاں نوں مار سکدی سی؟

یورگس: میرے علم موجب..... ہاں۔ بجلی تن قیدیاں نوں اوہدوں لائی گئی جدوں اوہناں تاراں تے اعتراض کیتا سی۔
عزیز پڑھنا رو! ایہہ عراق دی ابو غریب جیل دی اصل صورت حال تے امریکیاں دی اصل تصویر نہیں۔ اوتھے اوس
توں وی چوکھا کجھ ہونیا اے جیہڑا تیں سوچ سکدے اوتے جیہڑا تہذیب توں پہلے دے دور دیاں جاہل تے گنوار قوماں
وی نہ کر سکیاں۔ ایہہ تے سینٹ دی اوس رپورٹ دا اوہ حصہ اے جہدی بابت اوہ سمجھدے نیں کہ ایہ جائز گلاں نیں۔ اندازا
کرو کہ اوہ ظلم تے بربریت کیہہ ہووے گی جیں نوں اوس بے ضمیر قوم دے ضمیر نے وی جائز نہیں سمجھیا تے اوس نوں

رپورٹ نالوں غائب کر دتا گیا اے۔

ایس ویلے دنیا تے کشمیر تے فلسطین دی آزادی دیاں تحریکاں زوراں تے نیں۔ کشمیر دی تحریک نوں دودھا کے تے فلسطینی تحریک نوں ادھی صدی گزر گئی اے۔ اوتھوں دے عظیم مجاہد، جنہاں نوں ”مہذب“ قوماں دہشت گرد آکھدیاں نیں، ایہہ سوال کر دے نیں کہ ساڈی پوری جدوجہد آزادی وچ جے ساڈے ہتھوں توادی اک سوانی وی بے آبرو ہوئی اے تے اوس نوں سامنے لیاؤ۔
سجھو! ایہہ ہے محمد رسول اللہ دی تعلیم۔

آؤ تھوڑا کچھ چلیے تے ایہناں ”مہذب قوماں“ دے کجھ ہور کروت ویکھئے۔ پہلی جنگ عظیم جیہڑی چار ورہیاں دی لئی مدت تیکر جاری رہی، وکھو وکھ مکاں وچ اوہناں دے مقتولاں دی تعداد ایہہ سی:

| | | | |
|---------|-----------------|---------|---------------|
| روس | ۱۷ لکھ | ترکی | ۳ لکھ ۵۰ ہزار |
| جرمنی | ۱۸ لکھ | بلیجیم | ۱ لکھ ۵۰ ہزار |
| فرانس | ۱۳ لکھ ست ہزار | بلغاریہ | ۱ لکھ |
| اطلی | ۶ لاکھ ستھ ہزار | رومانیہ | ۳ لکھ ۵۰ ہزار |
| آسٹریا | ۱۲ لکھ | امریکہ | ۱ لکھ |
| برطانیہ | ۲۱ لاکھ | | |

دُجی جنگ عظیم دے مقتولاں دی تعداد ایہہ سی:

| | | | |
|-------------|------------------|------------|----------------|
| روس | ۲ کروڑ ۱۰ لاکھ | امریکہ | ۱۰ لکھ ۷۰ ہزار |
| جرمنی | تقریباً ایک کروڑ | برطانیہ | ۱۴ لکھ ۳۰ ہزار |
| یولینڈ | ۹ لاکھ | فرانس | ۱۰ لکھ |
| چین | ۳۰ لکھ | اطلی | ۱۰ لکھ |
| جاپان | اندازاً ۵۰ لکھ | یوگوسلاویہ | ۱۶ لکھ ۸۵ ہزار |
| آسٹریا | ۷ لکھ | ہنگری | ۶ لکھ |
| رومانیہ | ۴ لکھ | ہالینڈ | ۲ لکھ ۷۵ ہزار |
| فن لینڈ | ۱ لکھ تراسی ہزار | بلیجیم | ۶۰ ہزار |
| چیکوسلواکیہ | ۶۰ ہزار | فلپائن | ۳۰ ہزار |

ایوں زمین دے نکی نکی ٹوٹیاں تے اپنی چوہدراہٹ قائم کرن لئی مغرب دے ایہناں ”دانش وراں“ پنج کروڑ توں چوکھے بندیاں نوں بن موت دے مار چھڈیا تے فیر ایہہ مذہب اسلام تے غارت گری دا الزام عائد کرن والے آج دے خود ساختہ منصف اعظم امریکہ نوں کوئی ایہہ وی یاد کراؤ وے کہ رب دی ایس دھرتی تے پہلا ایٹم بم وی اوہدے پلینت

ہتھاتوں ڈگاسی تے اخیر وی او سے نے سٹیا سی۔ کیہہ ایٹم دے استعمال توں ودھ کے دی کوئی دہشت گردی دنیا تے موجود اے؟

جیہڑی قوم اسلام نوں نرا اک جنگجو مذہب دی حیثیت نال ای دیکھدی اے ایس دی ہی اک غیر جانبدار بی بی آکھدی

اے:

"In the West we often imagine Muhammad as a warlord, brandishing his sword in order to impose Islam on a reluctant world by force of arms. The reality was quite different. Mohammad and the first Muslims were fighting for their lives and they had also undertaken a project in which violence was inevitable.¹

”مغرب وچ اسیں اکثر محمد نوں جنگجو تصور کر دے ہاں جیہڑے پچکپا ہٹ دی شکار دنیا تے تلوار لہرا دے ہوئے زور واری نال اسلام مسلط کر دے نظر آؤندے نیں۔ سچ تے بالکل الٹ اے۔ حضرت محمد تے مڈھلے مسلمان تے اپنی زندگی بچاؤ لئی لڑے سن تے اوہ (اپنی حیاتی لئی) اک اچھے منصوبے تے عمل کر رہے سن جہدے وچ جنگ نا گزیر سی۔“

اک دُجی تھاتوں تے بی بی کیرن آرمسٹرانگ مغرب دی کم عملی تے تعصب و انقشایوں کھچدی اے:

In particular we tend to find it scandalous and even wicked that Mohammad had to fight his way to peace, power and victory. Islam has been dubbed the religion of the sword, a faith which has abandoned true spirituality by sanctifying violence and intolerance. It is an image that has dogged Islam in the Christian West ever since the Middle Ages, even though Christians were fighting their own holy wars in the Middle East at this time. Today popular books and television programmes frequently sport titles like Rage of Islam, Sword of Islam, Sacred Rage of Holy Terror, But this is a distortion of the truth. Each religion has its own particular genius, a special insight that characterises its quest for an ultimate meaning and value. ²

”خاص طور تے اسیں (مغرب والے) حضرت محمد دے امن، قوت تے فتح لئی لڑن نوں معیوب سمجھدے ہاں۔ اسلام نوں تلوار دے دین دا لقب دتا گیا اے تے نالے ایس نوں اچھا عقیدہ قرار دتا گیا اے جس نے عدم برداشت تے زور واری ودھا کے اصل روحانیت نوں ختم کر دتا ہووے۔ اسلام دے بارے ایہہ اک ہمیش دا تاثر اے جیہڑا عیسائی مغرب وچ ازمنہ وسطی توں لہجدا اے، حالانکہ اوہدوں عیسائی آپوں مشرق وسطی وچ (صلیبی) جنگاں لڑے سن۔ آج کل مقبول عام کتاباں تے ٹیلی ویژن پروگراماں دے اکثر اچھے نام رکھے جاندے نیں جویں کہ ”اسلام دا غضب، اسلام دی تلوار، مقدس غضب، یاں مقدس دہشت پر ایہہ سچائی نوں

وگاڑ کے پیش کرن دے برابر اے۔ ہر مذہب دا اپنا اک مخصوص انداز تے بصیرت ہوندی اے جیہڑے اوس دیاں قدراں تے خوبیاں دی پہچان ہوندے نیں۔“

بی بی کیرن آکھدی اے کہ عیسائیاں دی وی تے اپنی اک پہچان اے کہ دُکھ تکلیف نوں برداشت کرو یا دنیا توں کنارہ کش ہو جاؤ۔ اوہناں وچ وی حضرت عیسیٰ لئی لڑنا تے تکلیف اٹھانا اعلیٰ ترین مذہبی مقصد اے۔ ایوں دُجے مذہب دے دھلے اصولاں تے خواخواہ دی تنقید جائز تے مناسب نہیں۔

کیرن آرمسٹرانگ دی ایس گل توں پتا لگدا اے کہ اسلام مخالف پروپیگنڈہ مغرب دی پالیسی دا حصہ اے ورنہ اصل گل تے ایہی ہے کہ اسلام دا جذبہ جہاد نہ تے دہشت گردی اے تے نہ ای دُجیاں دے کسے حق تے ڈاکہ۔ سگوں ایہہ تے دنیا

!Muhammad A Biography of the Prophet by karen Armstrong Page:168

تے عدل و انصاف قائم کرن دا اک وڈا ذریعہ اے۔ ایک سوال جیہڑا اتھے ضروری جا پدا اے اوہ ایہ ہے کہ مسیحی مغرب جدوں ایہ منادی کر دا ہے کہ دین مسیح جنگ توں مطلق طور تے منع کر دا اے تے کیہہ (فیرا وہ) ایس تے عمل کر کے وی دکھاندا اے؟ سچ تے ایہہ ہے کہ جدوی مسیحیت نوں ہوش آئی اوہناں رُب دی دھرتی نوں لہو نال رنگ دتا۔ ایہی مسیحیت سی جہدی ”برکت“ نال رُوم وچ انساناں دا لہو سستا ہو گیا۔ یورپ وچ ایہناں دی مہربانی نال ای خون دے دریا جوش مارن لگ پے۔ صلیبی جنگاں لڑن لئی یورپ توں ایہناں دے لشکر مقدس صلیب چک کے وسط ایشیا تیکر آئے تے فیر پیغمبراں دی مقدس سرزمین تے صدیاں تیکر انسانی خون دا سمندر ٹھاٹھاں ماردار رہیا تے پاپائے مقدس مسلماناں کولوں بیت المقدس کھوہ لین لئی چوکھے توں چوکھی خون ریزی کرن لئی فتوے وی دیندے رے تے ایس دی تلقین وی کر دے رے۔ کیہہ اوہدوں پاپا یاں مقدس نوں ایس گل دا علم نہیں سی کہ دین عیسیٰ خوزیزی توں منع کر دا اے؟ فیر قرون وسطیٰ تے اپنی تھاں، ۲۰ وی صدی وچ جدوں تہذیب و تمدن دیاں لاٹاں اکھاں نوں چندھیارہیاں سن، ایس وچ اتحادیاں دے سانجھے نمائندے لارڈ البینی نے ۱۹۱۸ء وچ بیت المقدس تے صلیب لہرا ندیاں ایہہ گل نہیں سی آکھی کہ ”آج صلیبی جنگاں توڑ چڑھ گئیاں نیں۔“ 1 تے جے ایہہ گل پرانی ہو گئی اے تے کیہہ ایہہ سچ نہیں کہ ہن افغانستان تے حملہ کرن ویلے امریکی صدر بوش نے صلیبی جنگاں فیر چھوہ دین دی خائش ظاہر کیتی سی؟

غزوات تے سراپا دا ویروا:

عہد نبوی دیاں لڑائیاں نوں دو ناواں نال یاد کیتا جاندا اے۔ اک نام غزوہ اے تے دُجا سر یہ۔ مولانا شبلی نعمانی لکھدے نیں کہ ”غزوہ تے سر یہ وچ لوکاں نیڑے ایہہ فرق اے کہ غزوہ وچ گھٹ تو گھٹ بندیاں دی اک خاص تعداد ضروری اے، سر یہ وچ کوئی قید نہیں۔ اک بندا وی جے کدے لڑائی دے حال حالات دیکھن لئی ٹور دتا جاوے تے ایہہ وی سر یہ اے۔ بعضاں دے نیڑے غزوہ لئی ایہہ شرط اے کہ آں حضرت نے آپوں (بہ نفس نفیس) اوہدے وچ شرکت کیتی

ہوے۔ حقیقت ایہہ ہے کہ جیہڑے واقعات نوں مورخ سریہ آکھدے نیں، اوہ دیاں چند قسماں ایہہ نیں:

- i محکمہ تفتیش یعنی دشمنان تے دھیان رکھنا (intelligence)
 - ii دشمن دے حملے دی خبر سن کے دفاع لئی اگے ودھنا (Defence)
 - iii قریش دی تجارت دی روک ٹوک تاں بے اوہ گل بات کرن تے راضی ہو جان تے مسلماناں نوں حج تے عمرے دی اجازت دے دین۔
 - iv امن امان قائم کرن لئی فوج گھلنا۔
 - v دین دی تبلیغ لئی بندے ٹورے تے اوہناں دی حفاظت لئی کجھ سپاہی وی نال ٹور دتے پرتا کید کردتی کہ دین دے وادھے لئی تلوار توں کم نہ لینا۔
- غزوہ دیاں صرف دو شکلاں نیں:

! حیات محمدؐ از محمد حسین ہیکل صفحہ: ۳۰۴

- ۱۔ دشمن نے دارالاسلام تے حملہ کیتا تے اوہناں دا مقابلہ کیتا گیا۔
- ۲۔ ایہہ معلوم ہو یا کہ دشمن مدینے تے حملے دی تیاری کر رہے نیں تے او تھے پیش قدمی کیتی گئی 1 پر حضرت شبلی نعمانی دی ایس تعریف نال کسے اتفاق نہیں کیتا۔ سیرت لکھیار تے سیرت دے پڑھیار ایہہ گل سمجھدے نیں کہ اوہ فوجی دستہ جہدے وچ سرکار دو عالمؐ نے آپوں شرکت فرمائی ہوئے اوہ غزوہ اے تے دُجی ہر طرحاں دی فوجی مہم نوں سریہ آکھدے نیں۔ ایس سلسلے وچ جسٹس پیر کرم شاہ الازہری نے امام محمد ابو زہرہ دی کتاب خاتم النبیین دے حوالے نال لکھیا اے کہ:

”اسلامی جہاد دے تذکرہ دے ضمن وچ دو اکھر چوکھے ورتے جاندے نیں۔ اوہناں دا ٹھیک ٹھیک مطلب ذہن وچ بٹھالینا چوکھا ضروری اے، تاں جے کسی رولے پاروں کوئی پلیکھانہ روے۔ اوہ دو اکھر غزوہ تے سریہ نیں۔ غزوہ اوس نکے یاں وڈھے لشکرنوں آکھدے نیں جہدے وچ سرکار دو عالمؐ آپوں شریک ہوئے ہون بھانویں اوہدے وچ جنگ تیکر نہوت آئی ہووے یا نہ۔ یاں بھانویں اوس لشکر دا جنگ توں ہٹ کے کوئی ہور مقصد ہووے۔“

”تے فوجی دستہ جہدے وچ سرکار دو عالمؐ نے آپوں شرکت نہ کیتی ہووے سگوں اپنے کسے صحابی نوں دستے دا امیر مقرر کر کے ٹور یا ہووے اوس نوں سریہ یا باعث آکھیا جاندا اے۔ سریہ واسطے ایہہ ضروری نہیں کہ دشمنان نال سچی مچی جنگ ہوئی ہووے۔ ایہہ وی ضروری نہیں کہ اوہ جنگ کرن دی نیت نال ٹرے ہون۔“ 2

غزویاں دی تعداد:

غزویاں دی تعداد کیمہ اے؟ ایس تے اختلاف اے تے مختلف سیرت لکھیاراں تے تواریخ لکھیاراں نے انہاں دی تعداد مختلف لکھی اے۔ ابن اسحاق، امام احمد، امام بخاری تے امام مسلم نے حضرت عبداللہ بن بریدہ توں روایت کیتی اے کہ غزویاں دی تعداد ۱۹ اے۔ ابن کثیر نے دی ۱۹ نال اتفاق کیتا اے۔ طبقات ابن سعد وچ ایہہ تعداد ۱۷ اے پر

عراق دے جناب محمود خطاب نے غزوات دی تعداد ۲۸ دس کے اوہناں دی تھاں تے تریخاں وی دس دتیاں نیں 3 اوہناں نے جیہڑے غزوات دے نام۔ گنوائے نیں، اوہ ایہ نیں:

غزوہ الالبواء (ایس نوں غزوہ ودان وی آکھدے نیں) غزوہ بواط، غزوہ عثیرہ، بدر اولیٰ، بدر گبرئی، غزوہ بنی قریظہ، غزوہ بنی سلیم، غزوہ سویق، غزوہ ذی امر، غزوہ بحران، غزوہ أحد، غزوہ حمراء الاسد، غزوہ بنو نضیر، غزوہ ذات الرقاع، بدر اُخریٰ، غزوہ دومتہ الجندل، غزوہ بنو مصطلق، غزوہ خندق، غزوہ بنو قریظہ، غزوہ بنی الحیان، غزوہ ذی قرد، غزوہ حدیبیہ، غزوہ خیبر، غزوہ عمرة القضاء، غزوہ فتح مکہ، غزوہ حنین، غزوہ طائف تے غزوہ تبوک۔

ایہناں وچوں غزوات بدر، أحد، خندق، قریظہ، مصطلق، خیبر، فتح مکہ، حنین تے طائف وچ بقاعدہ جنگ ہوئی۔

حضرت

! سیرت النبی جلد اول صفحہ: ۳۳۶

@ ضیاء النبی جلد سوم صفحہ: ۲۶۰

آں حضرت بحیثیت سپہ سالار (اردو ترجمہ انیس احمد جعفری) صفحہ: ۵۱۷

بریدہ دی اک روایت موجب ۸ غزویاں وچ جنگ ہوئی۔ خیال کیتا جاندا اے کہ اوہناں نے فتح مکہ والے غزوے نوں نہیں گنیا۔ غزویاں دی تعداد وچ ایہہ وادھا گھانا اصل وچ تواریخی سچائیاں نوں ڈوگی نظر نال نہ دیکھن دی وجہ توں محسوس ہوندا اے۔ بعض غزوات دیاں تھاواں اک دُجے توں بالکل نیڑے سن تے کجھ غزوات اک ای سفر دے دوران پیش آئے۔ ایس لئی کجھ سیرت لکھن والیاں نے اوہناں نوں اک ہی گن لیا۔ مثلاً ودان تے البواء، دو تھاواں تے جناب رسول خدا خود تشریف لے گئے، ایس لئی کجھ بزرگاں نے ودان تے البواء نوں وکھو وکھو شمار کر لیا۔ اس فقیر دے نیڑے تے ایہہ اک ای سمجھیا جانا چاہیدا اے۔ ایوں کجھ سچن ایہہ سمجھدے نیں کہ مکہ تے بغیر کسے لڑائی جھگڑے توں ای فتح ہو گیا سی ایس لئی ایس سفر دا نام وی غزویاں دی فہرست وچوں کڈ دینا چاہیدا اے۔ ایہہ فقیر ایس گل نوں وی ٹھیک نہیں سمجھدا کیوں جے غزوے دی تعریف وچ ایہہ گل کدرے وی نہیں لکھی گئی کہ اوس وچ قتال ہووے۔ بہر حال سرکارِ دو عالم دے سارے جنگی سفر ریکارڈ تے نیں تے ایہناں گلاں نال یعنی تعداد دی بحث نال حقیقت نہیں بدل جاندی۔

پہلا سریہ:

غزوات تے سرایا دی بحث توں بعد ہن اسیں تواریخی حقائق ول واپس آؤنے آں تے ایہہ دیکھدے ہاں کہ اسلامی تواریخ وچ سب توں پہلاں کدوں تے کس کم لئی ہتھیار بنھے گئے۔

جویں کہ پچھے ذکر ہوئیا اے مکئی والیاں نے مسلماناں نال ہر طرحاں دی زیادتی جائز تے درست سمجھی سی۔ فیر جدوں مسلمان مدینہ ول ہجرت کر گئے تے پچھوں اوہناں دیاں جائیداداں تے وی قبضا کر لیا۔ ایہناں حالات وچ، قانون فطرت دے تحت، مسلماناں نوں ایہہ حق حاصل سی کہ اوہ مکئی والیاں توں جانی تے مالی دوویں طرحاں انتقام لین۔ اچھے مسلماناں کول ایہڈی فوجی طاقت نہیں سی کہ دشمن نوں کوئی جانی نقصان پہنچان پر مسلماناں نے حضور اکرمؐ دے ایماء تے،

دشمن تے معاشی دَباؤ نا شروع کر دتا۔

مکئی دے قریش اپنی گزراوقات لئی تجارت توں وکھ ہور کوئی وسیلہ نہیں سن رکھدے۔ اہل مکہ دے اوہ تجارتی قافلے جیہڑے مکئی دے جنوب ول یمن وغیرہ ول جاندے سن، اوہناں نوں مسلماناں دے ہتھوں کسے طرحاں دے نقصان دا کوئی ڈر اندیشہ نہیں سی پر جدوں اوہ قافلے شمال ول عراق، شام یاں مصر توں درآمدیاں برآمد کر دے، اوہدوں اوہناں لئی مدینے دے نیڑیوں لنگنا ناگزیر ہونداسی، 1 جتھوں ایہہ قافلے لنگ کے جاندے سن اوں رستے دے آل دوالے قبیلہ جہینہ آبادی، جیہڑا مسلماناں نال دوستی دا معاہدہ کر چکیا سی۔ جدوں نبی اکرمؐ نے ایہہ سمجھیا کہ اسیں ہن یکے ہتھ پالے نیں تے آپ نے قریش نوں ایہہ گل اکھوائی کہ ہن تسیں ساڈے علاقے وچوں نہیں گزر سکدے۔ اوہناں نوں بھلا ایہہ گل کوں گوارا سی کہ اوہ اک نویں تے ماڑی جی قوم دے آکھن تے اپنا صدیاں پرانا رستا چھڈ دیندے۔ ایہہ رستا چھڈ دین دا مطلب تے سدھاسدھا ایہہ سی کہ اوہ عراق، شام تے مصر نال اپنی تجارت چھڈ کے اپنا معاشی قتل کر لین۔ جنوب ول تے زراہین سی، تے اوہ دردی تجارت وی آٹے وچ لون دے برابری، ایس لئی مکئی والیاں ایہہ گل من توں انکار کر دتا۔

! خطبات بہاولپور از ڈاکٹر حمید اللہ، صفحہ: ۲۲۴۔

جویں آج دی مہذب دنیا وچ ایہہ گل سمجھی جاندی اے کہ جس دی معیشت نہیں اُسدا کجھ وی نہیں، ایوں ہن توں چوداں سوسال پہلے نبی اکرمؐ وی ایہہ گل پوری طرح سمجھ دے سن کہ جے متکبر تے وگڑے ہوئے قریش دا دماغ ٹھیک کرنا اے تے سب توں پہلوں اوہناں دی معیشت تے سٹ ماری جائے۔ تے جویں آج دی متمدن دنیا بری، بحری تے فضائی حدود نوں قابل احترام سمجھدی اے تے ایس لئی علاقائی اختیارات (Territorial jurisdiction) تے جغرافیائی حد بندی (Geo political boundries) جہیاں اصطلاحات ایجاد کیتیاں نیں ایوں اولاد آدم وچوں مہذب ترین بنداتے معلم اعظمؐ اوس دور وچ وی لوکائی نوں ضابطیاں دا پابند کرنا چاہنداسی۔ ایس لئی مکئی والیاں دی ضد آگئی آپ دست بردار نہیں ہوئے تے آکھیا کہ اچھا، اسیں تے فیر تہانوں ڈکاں گے۔ ایوں مڈھلا عملی قدم ایہہ چکیا کہ رمضان اچھ وچ سرکار نے اک لشکر تیار کیتا، اپنے دست مبارک نال اک چٹا جھنڈا تیار کیتا، اوہ جھنڈا ابو مرشد کنانہ بن الحصین دے ہتھ وچ پھرایا تے ۳۰ مجاہداں دے اوس لشکر دا سالار چاچے حمزہ نوں مقرر کر کے مکئی والیاں دی تجارتی شاہراہ ول ٹور دتا۔

اوہناں دناں وچ قریش دا اک تجارتی قافلہ شام توں سامان درآمد کر دا ہونیا کئے واپس پرت رہیا سی۔ تجارتی قافلے دا امیر ابو جہل سی تے تن مسلح محافظ اوس قافلے دی حفاظت لئی اوس دے نال سن۔ جدوں اوہ قافلہ العیص ولوں ودھدا ہونیا ساحل سمندر دے نیڑے بجیا تے حضرت حمزہ دے جتھے نال اوس دا ٹاکرا ہو گیا۔ قریش دے تن سو بندے تے ڈھیر سارا مال تے اوہر مسلماناں دے دھکے ٹھیڈے کھاندے، مکئی توں کڈے ہوئے ۳۰ بندے، پر جناب حمزہ نے آکھیا کہ جاؤ گے کتھے؟ اسلامی لشکر وچ سارے دے سارے بندے مہاجر سن ایس لئی دوویں فریق اک دُجے نوں جان دے سن۔ غرے جان دے ای نہیں سن سگوں اک دُجے دے رشتے دار وی سن، تے جیہڑے رشتے دار نہیں سن اوہ اچے کل تیکر اک دُجے دے یار سن پر ہن صرف اک ای رشتا تے اک ای تعلق سی۔ اک پاسے خدائے واحد نوں من والے سن تے دُجے

پاسے بتاں دے پجاری جاہل تے جندی مشرک۔

اہل مکہ دے صدیاں دے لانگے پاروں قبیلہ جہینہ دا اوہناں نال وی تعلق سگوں یاری سی تے جویں پچھے ذکر ہوئیا اے ہن اوہ مسلماناں دا وی حلیف سی۔ ایس لئی قبیلے دے سردار مجدی بن عمرو نے لڑائی روکن لئی اپنا اثر و رسوخ استعمال کرنا شروع کیتا۔ دوواں فریقاں نال اوس دا دوستانہ اخیر کم آیا۔ ایوں اوس دے خلوص، نیک نیتی تے امن دی خواہش پاروں ایہہ جنگ ٹل گئی۔ ابو جہل اپنے بندے تے اپنا مال لے کے مکہ واپس گیا تے حضرت حمزہ اپنا قافلہ لے کے خیر خیریت نال مدینہ واپس پرت آئے۔ کچھ دناں بعد جہینہ قبیلے دے کچھ بندے کسے کم لئی مدینہ آئے تے سرکار نے اوہناں دی بڑی ٹہل سوا کیتی تے نالے اوہناں دے سردار دی تعریف کردیاں آکھیا کہ ”مجدی مبارک خصلتاں والا تے بابرکت بندہ اے۔“

حضرت حمزہ دی قیادت وچ نکلن والا ایہ قافلہ جہاد فی سبیل اللہ دے باب دا مڈھلا اکھراے۔ اسلامی توارخ ایس نوں سریہ حضرت حمزہؓ دے نام نال یاد کردی اے تے ایہہ اسلامی توارخ دا پہلا معرکہ تے پہلا سریہ اے۔
سرایہ عبیدہ بن حارث تے سعد بن ابی وقاص:

سریہ حضرت حمزہ دا مقصد اصل وچ مکہ والیاں نوں ایہہ احساس دلانا سی کہ مسلمان ہن لے تے ماڑے نہیں رے تے اپنے حق حقوق دا تحفظ کرن جو گے ہو گئے نہیں۔ ایہدے نال کافراں دے اندر اک خوف پیدا ہو گیا تے اوہ مسلماناں نوں ہن اپنے جوڑ دا سمجھن تے مجبور ہو گئے، ورنہ ایہو ابو جہل سی جیہڑا مکہ وچ ظلم کر دا نہیں سی تھکدا۔ ہن اوس نال ۳۰۰ بندے سن تے جناب حمزہ نال صرف ۳۰ پر اوس نے ہتھیں پچن دی جرأت نہیں کیتی۔ ایوں مسلماناں دے ایس مڈھلے سریہ دا مقصد سو فیصد حاصل ہو گیا۔ ایس توں بعد اک وار ایوں دی معرکہ آرائی مسلماناں نے حضرت عبیدہ بن حارث دی سرکردگی وچ اگلے ہی مہینے شوال اھ وچ فیر کیتی جہدے وچ ابوسفیان نال جوڑ پیا پر اوہدوں وی مسلمان لڑی بغیر واپس پرت آئے۔

ہجرت توں ۹ مہینے بعد ذی قعدہ وچ ۸ مہاجر ۱ سواراں دا اک دستہ انحرار واپس گھلایا گیا جہدے سالار سعد بن ابی وقاص سن۔ ایس وچ جناب مقداد بن عمرو کافراں دے دستے نوں چھڈ کے مسلماناں نال آ ر لے تے اسلام قبول کر لیا۔ جناب سعد نوں چونکہ رسول خدا ولوں تاکید سی کہ قریش دے تجارتی قافلے نوں ڈرانداں ہوںیاں انحرار توں اگی نہیں ودھنا ایس لئی اوہ اوہو ای واپس پرت آئے۔ کچھ بزرگاں دا خیال اے کہ قریش نوں خوف زدہ کرن والے ایس دستے وچ ۸ نہیں سگوں ۲۰ مسلمان شامل سن۔ 2
اک غلط فہمی دا ازالہ:

ایس فقیر دا موقف پڑھن توں پہلاں ڈی، ایس مارگو لیتھ دی کتاب ’محمد اینڈ دی رائز آف اسلام توں اک لکھت (اقتباس) پڑھو:

"We do not Know whether the Prophet when he fled to Medinah foresaw

that he would assume the character of robber chief,' but..... " (P.238)

مارگو لیتھ اوہناں ڈاکواں داسرغنہ (robber chief) ہے جیہڑے جناب حمزہ، عبیدہ بن حارث تے سعد بن ابی وقاص دے نمائشی گشتی دستیاں دا مقصد اہل مکہ دے تجارتی قافلیاں تے ڈاکہ مارنا دسدے نیں۔ کجھ مسلمان بھراوی ایہہ گل آکھدے نیں کہ جے اوہناں دا مقصد ڈاکہ مارنا وی سی تے فیروہی ایہدے وچ کیہہ ہرج اے؟ اوہناں دا موقف اے کہ مکہ والیاں نے وی تے مسلماناں نوں گھروں بے گھر کر کے تے اوہناں دے کاروباراں تے جائیداداں تے قبضہ کر کے کوئی گھٹ نقصان نہیں پہنچایا سی۔

میرا موقف ایس سلسلے وچ ایہہ ہے کہ نبی اکرمؐ دے سامنے صرف اک ای مقصد سی، تے اوہ ایہہ سی کہ قریش نوں ایس گل دا احساس دوا یا جائے کہ مسلمان ہن لے تے ماڑے نہیں رے تے ایوں اوہ مسلماناں نوں اک سیاسی اکائی سمجھ کے کسے معاہدے تے مجبور ہو جاوے، تاں جے مسلمان امن تے شانتی نال مکے وچ اپنے گھراں ول آؤنا جانا شروع کر دین تے نالے اوہ خانہ کعبہ دے طواف وچ کوئی رکاوٹ محسوس نہ کرن۔

میں جدوں مستشرقین دا موقف جان لئی اوہناں دیاں کتاباں دا مطالعہ شروع کیتا تے ایہہ حیران کن صورت حال

! آنحضرت بحیثیت سپہ سالار از محمود خطاب صفحہ: ۱۱۶

@ طبقات ابن سعد جلد اول صفحہ: ۲۲۶

سامنے آئی کہ سارے مستشرقین ای متعصب نہیں بلکہ اک چوکھی وڈی تعداد اوہناں لوگاں دی وی اے جنہاں تعصب دی پٹی اکھاں توں لاه وئی اے تے ہن اوہ حقائق نوں درست زاوے توں دیکھن لگ پے نیں۔

رومانیہ دے فاضل مستشرق کونسٹن ورچیل جارجیو، جیہڑے اپنے ملک دے وزیر خارجہ وی رے نیں اوہ سریہ حضرت حمزہ دے حوالے نال لکھدے نیں کہ ”نبی اکرمؐ نے اوہناں دے ذمے ایہہ کم لایا سی کہ اوہ مدینہ تے بحیرہ احمر دے وچکارے رستے دی نگرانی کرن جیہڑا اصل وچ مکہ دے تجارتی قافلیاں دے آؤن جاوے دا اصل رستہ سی۔“

ایف ای پیٹرز دی رائے ایہہ ہے:

Migrants were sent out by Muhammad, or even on occasion led by him to harass, and perhaps reconnoiter the acknowledged enemy. 1

”محمدؐ نے مہاجراں نوں (دُجیاں دی قیادت وچ گھلیا) تے بعض ویلے خود اپنی سپہ سالاری وچ ایس لئی گئے کہ اپنے جانے پچھانے دشمن نوں خوف زدہ کرن یاں شاید نری اوہناں دیاں حرکتاں دی نگرانی لئی۔“

مگزوم روڈنسن لکھدے نیں:

Muhammed gave his uncle Hamza a white flag, put him at the head of seven Emigrants and sent him off to intercept the caravans of Quraysh.

”محمدؐ نے اپنے چاچے حمزہ نوں اک سفید جھنڈا دتا، اوہناں نوں ست مہاجراں دا امیر بنایا تے اوہناں نوں قریش دے قافلیاں دا رستا ڈکن دا آکھیا۔“

محترمہ کیرن آرمسٹرانگ لکھدیاں نیں:

Muhammad despatched two raiding parties of Emigrants to attack the caryan.2

”محمدؐ نے مہاجرین دے دو حملہ آور دستے تھورے تاں جے اوہ قافلے تے حملہ کرن۔“

ہن ویکھو کہ رومانوی مستشرق نے ”نگرانی“ دا لفظ ورتیا اے، 3 ایف ای پیٹر نے Harras، میگزیم روڈسن نے Intercept تے کیرن آرمسٹرانگ نے attack دے اکھر ورتے نیں۔ ایہناں وچوں کسے وی مستشرق نے کوئی اجہیا اکھر نہیں ورتیا جس توں کجھ کھوہ لین، لٹ لین، غارت گری کرن یاں قتل کرن دے معنی نکدے ہوں۔ تے جے محمدؐ دے کجھ ویریاں نے ایہہ ارادہ کیتا ہونیا اے کہ اوہناں نے پیغمبر خدا دی اُچیاں شاناں والی ذات نوں degrade کرن لئی اپنا ٹیل لاندے رہنا اے تے ایس نال محمدؐ توں یاں اوس دے رب توں یاں اوس دے نام تے سرکٹان لئی تیار رہن والیاں نوں کوئی فرق نہیں پیندا۔ جے کوئی دُجا مار گولیتھ فیر حضرات حمزہ، عبیدہ یاں سعد دیاں گشتی دستیاں نوں ڈاکہ زنی قرار دیوے گاتے اسیں اوس مار گولیتھ نوں وی اوہناں دے ای بھراواں دیاں ہو رکئی لکھتاں وکھا دیاں گے جیہڑے آکھن گے کہ

!Muhammad and the Origins of Islam, Page: 211

@Muhammd A Biography of the Prophet, P:169

#ایہہ اقتباس میں اردو ترجمے وچوں لیا اے کیوں جے مینوں اصل کتاب نہیں مل سکی۔

اوہناں دا مقصد فوجی تے سیاسی سی نہ کہ ڈاکے مارنا۔

ڈاکٹر حمید اللہ لکھدے نیں کہ جنگ بدرتوں پہلاں کوئی ست واری مسلمان قافلے قریشی قافلیاں ول گئے نیں 1 میں ایہ آکھنا چاہندا ہاں کہ اوہناں ستاں مہماں وچ جیہڑا سامان مسلماناں نے لٹیا سی کوئی اوس دی فہرست وی وکھا دیوے۔ کوئی وی بندہ جہدے وچ بھوراوی عقل اے اوہ ایس گل نوں کدے نہیں منے گا کہ سامان ایس لئی نہیں لٹیا گیا کہ قافلے بچ کے نکل جان دے سن یعنی ہر واری مسلمان لیٹ اپڑدے سن۔ ہے کوئی عقل دی گل ایہہ؟
مُدھلا غزوہ:

ریاست مدینہ دا شعبہ جاسوسی کئی مہینیاں توں بڑے فعال طریقے نال اپنا کردار ادا کر رہیا سی۔ ہن نبی اکرمؐ نے ضرورت محسوس کیتی کہ اوہ آپوں حالات نوں پرکھن، تے فیر کوئی حکمت عملی تیار کرن۔ ایوں بارہ صفر ۲ھ نوں عالم انسانیت دا عظیم الشان سپہ سالار اپنے ۶۰ سٹھ مہاجر مسلماناں دے لشکر نال ودان ول نکلدے اے۔ ودان اک وڈی دقتی اے جیہڑی میری سرکار دی اُمی دے مران بھوں ابواء توں کوئی ۶۷ میل دریدی اے۔ سپہ سالار اعظم آل دوالے دا چکر لاندے اے۔ لوکائی دے طور طریقے ویکھدے اے۔ قبیلہ غفار، جیہڑا جناب ابوذر غفاری دے اسلام پاروں پہلوں ای مسلمان ہو چکیا سی، دا حال چال پچھدے اے۔ قبیلہ بنو ضمرہ دے سردار مخشی بن عمرو الضمری نال ملاقات ہوندی اے۔ مخشی نوں چنگے سچناں متراں

طرحاں رل مل کے رہن دامشورا دتا جاندا اے، اوہ وی دوستی دا ہتھ ودھاندا اے تے فیر دوویں فریق ایس معاہدے تے دستخط کر دے نیں:

”اللہ دے نام نال جیہڑا چوکھا رحم کرن والا تے ہمیش مہربانی فرمان والا اے۔ ایہ لکھت محمد رسول اللہ ولوں بنی ضمہ لئی لکھی گئی اے۔ یعنی اوہ امن نال رہن گے، اوہناں دی جان مال نوں امان حاصل ہووے گا تے جے کوئی اوہناں تے حملہ کرے گا تے حملہ آور دے مقابلے وچ بنو ضمہ دی مدد کیتی جاوے گی سوائے ایس توں کہ اوہ اللہ دے دین دے حق وچ لڑائی کرے۔ ایہہ معاہدہ باقی رہوے گا جہناں چر سمندراں دا پانی اُون نوں گلا کر دار ہوئے گا، تے نبی جدوں اوہناں نوں اپنی مدد لئی واج مارن گے تے اوہ وی لبیک آکھن گے۔ اللہ تے اوس دار رسول ایس معاہدے دے ذمہ دار نیں۔ تے اوہناں دی مدد کیتی جاوے گی حملہ آور دے خلاف بھاویں اوہ نیک تے پرہیز گار ای ہووے۔“

ایس سفر دا اوہ فیدہ تے ہونا ای سی جیہڑا ایس توں پہلے دے گشتی دستیاں نال ہوئی سی پر اک فیدہ بنو ضمہ نال معاہدے دی شکل وچ وی ہوئی۔ جناب رسول خدا لئی ایہہ سفر ایس لحاظ نال وی مبارک ثابت ہوئی کہ آپ نے امی جی دے مزار دی زیارت کر لئی۔ جدوں آپ ابواء دے علاقے ول گئے تے بی بی آمنہ دی قبر توں دور ای اونٹ توں اتر گئے تے پیدل ای قبر ول ٹر پے۔ دُجے مسلمان اوس تھاں تے کھلو گئے تے جناب رسول خدا توں سواری چھڈ دین دی وجہ پچھن دی جسارت وی نہیں کیتی۔ جناب عمر اپنے آقا داساتھ دے رے نیں تے آپ دے نال ای قبر ول ٹرے جارے نیں۔

!خطبات بہاولپور، صفحہ ۲۲۳۔

آپ نے قبر تے اپڑ کے زانو ٹیک دتے، پیشانی قبر تے رکھی تے بے ہوش جے ہو کے رون لگ پے۔ بھاویں رسول خدا نوں ماں جی توں جدا ہوئیاں ۵۰ ورھے ہو گئے سن پر آپ اوس بال وانگ جہدی ماں اچے بن ای چلانا کر گئی ہووے، زار و زار رو رہے سن۔ اوہناں نوں اوہ ویلا یاد آ رہیا سی جدوں بیوگی وچ بی بی آمنہ نے آپ دی پرورش کیتی سی۔

جناب محمد لحدِ مادر تے بیٹھے اوہناں یاداں وچ ڈب گئے جدوں امی زندہ سن۔ اوہدوں کوئی اوکڑ، اوکڑ نیں سی ہوندى، ماں دی محبت سی تے سکھ شانتی سی۔ ماں جی اپنے ہتھاں نال اپنے ننھے محمدؐ دا سوہنا مکھڑا دھوندے سن، اپنے ہتھاں نال روٹی کھواندے سن تے اپنے ہتھاں نال پانی والا پانڈا اپنے پتر دے منہ نال لاندے سن۔ پر جدوں امی جی دیاں اکھاں بند ہو گئیاں تے ننھے محمدؐ ہلکل کئے رہ گئے۔ اوہ بکریاں چراندے صحرا توں واپس آوندے سن تے کوئی منہ ہتھ دھوان والا نہیں سی ہوندا، کوئی نہیں سی ہوندا جیہڑا سر تے ماں وانگ ہتھ پھیردا، کوئی نہیں سی جیہڑا راہواں ویکھدا تے کوئی نہیں سی جیہڑا اڈیکن ہار اکھاں نال بوے وچ پیٹھدا۔ آپ سوچ دے رے کہ میں جدوں بکریاں دا آجڑی ساں اوہدوں کدی ماں جیوندی ہوندى تے اوہ ضرور آوندیاں سار روٹی پانی چچھدی تے آکھدی کہ پتر تھک کے آیا ایس، جھٹ لیٹ جا میرا پتر..... میں اوہناں چرتیرے لئی روٹی پکائی آں۔

رحمت اللعالمین ماں جی دی قبر تے بیٹھ کے ایناں روئے کہ حضرت عمر جے پیڈے دل دے بندے وی آپ دی

حالت دیکھ کے رون لگ پے تے آکھیا ”یا رسول اللہ! بس کرو تہاں تے آج مینوں وی روادتا اے۔“
بدرتوں پہلے دیاں فوجی مہماں:

ربیع الاول ۲ھ وچ اک وار فیہر سرکار عالم دوسو مہاجر مسلماناں نوں نال لے کے بواط ول نکل پے۔ ایس مہم وچ علم بردار سعد بن ابی وقاص سن تے آپ دی عدم موجودگی وچ ریاست مدینہ دے پریذیڈنٹ جناب سعد بن معاذ سن۔ ایس مہم دا مقصد وی قریش مکہ دے تجارتی قافلے نوں ڈرانا تے دھمکانا سی۔ ایس توں تھوڑا چر بعد ہجرت دے سولہویں مہینے جمادی الثانی ۲ھ وچ رسول خدا نوں ایہہ خبر ملی کہ مکہ والیاں دا اک تجارتی قافلہ شام جا رہیا اے تے اوس وچ سارے لوکاں رجھ کے سرمایا لایا اے۔ خیال کیتا جاندا اے کہ اوس قافلے دے تجارتی سامان دا مل پنجاہ ہزار سنہری اشرفیاں توں گھٹ نہیں سی۔ آپ نے ابوسلمیٰ بن عبدالاسد نوں مدینے وچ اپنا نائب مقرر کیتا، حضرت حمزہ دے مبارک ہتھوں وچ پرچم پھڑایا تے قافلے نوں ہراساں کرن لئی تجارتی شاہراہ ول ٹر پے۔ حضور نے عشیرہ دی تھیں تیکر قافلے دا پچھا کیتا تے فیہر پچھاں پرت آئے۔ ایہہ دوویں مہماں بالترتیب غزوہ بواط تے غزوہ عشیرہ اکھواندیاں نیں۔

جدوں نبی رحمت غزوہ عشیرہ توں واپس تشریف لیائے تے کجھ ای دنوں پچھوں آپ نوں اک ہور مہم پیش آئی جس نوں غزوہ صفوان (یاں سفوان) تے غزوہ بدر اولیٰ وی آکھدے نیں۔ تفصیل ایس دی ایہہ ہے کہ مدینے دے نیڑے اک سوہنی تے کھلی ڈلی ہری بھری تھیں سی جتھے مدینے دے ڈنگر جنور چرن لئی چھڈ دتے جاندا سن تے اک اڈھا چھیڑ واودھا راکھا ہوندا سی، بلکل ایوں ای جویں آج کل ساڈے پنڈاں وچ اک اڈھا چھیڑ و سیرے اڈھے پنڈ دیاں جھاں گائواں اگے لاکے لے جاندا اے۔ مکہ وچ جدوں کافراں نوں ایس گل دا پک ہو گیا سی کہ مسلمان اوہناں دے ہر تجارتی قافلے دا پچھا کر دے نیں تے اوہ بن تجھن لگ پے سن کہ مسلمان چوکھے ای ودھے جاندا نیں، تے جویں مسلمان اوہناں نوں تراہندے نیں ایوں مسلماناں نوں ڈرانا وی ضروری اے۔

مکہ والیاں اپنی طاقت ظاہر کرن لئی مڈھلا قدم ایہہ چکیا کہ اپنے اک سردار کرز بن جابر دی سرکردگی وچ لٹیریاں دا اک جتھا گھلیا جنہاں نے اوس چر اگاہ تے حملہ کر دتا، چھیڑونوں قتل کر دتے جتاں مال ڈنگر ہک کے لے جاسکدے سن، لے گئے۔ رحمت عالم نوں جدوں ایہہ خبر ملی تے آپ نے اوہناں دا پچھا کیتا۔ آپ دا قافلہ وادی صفوان تیکر اوہناں دے مگر گیا۔ جیہڑی کہ بدر دے نیڑے سی پرڈاکواں دا جتھا دریڈا نکل گیا سی ایس لئی آپ پچھاں پرت آئے۔

ایس مہم وچ اسلامی لشکر دے علم بردار سیدنا علی المرتضیٰ سن تے مدینے وچ آپ دے پچھوں زید بن حارث ریاست

دے سربراہ سن۔

ہجرت دے دُجے سال رجب وچ جناب رسول خدا نے ۸ مہاجراں دا اک جتھا جناب عبداللہ بن جحش دی کمان وچ نجدیہ ول ٹوریا۔ ٹرن ویلے نبی اکرم نے عبداللہ نوں اک بند خط دتا تے آکھیا کہ ایہہ خط دو دناں دی مسافت توں بعد کھول کے پڑھ لینا۔ فوجی دستے نے جدوں دو دناں دا سفر پورا کر لیا تے رسول خدا دے ارشاد موجب خط کھول کے پڑھیا۔ خط وچ لکھیا سی کہ ”اے عبداللہ! منخلہ ہجن دی کوشش تیز کر دیو۔ اوتھے اُپڑ کے قریش دی سُن گن رکھو تے مینوں اوہناں دیاں

خبراں اپڑاندے روؤ۔“

قریش تے مسلماناں دا پہلا حملہ:

حضور دے حکم دی تعمیل وچ جتھا نخلہ جا بھیجا۔ اوتھے قریش دا اک تجارتی قافلہ سامان لے کے عراق ولوں آرہیا سی۔ قافلے وچ عمرو بن الحضری، حکم بن کیسان مخزومی، نوفل بن عبد اللہ مخزومی تے عثمان بن عبد اللہ مخزومی شامل سن۔ قریشی جتھا مسلماناں نوں ویکھ کے سہم گیا۔ مدنی دستے وچوں اک بندے عکاشہ بن محسن نے ایہ ظاہر کرن لئی کہ اوہ عمرہ ادا کرن جا رے نیں، اپنا سر منوا دتا۔ ایہہ ویکھ کے قریش نوں تسلی ہوئی تے اوہناں سواری دے جانوراں نوں چرن لئی چھڈ دتا۔ جدوں مدنی جتھے نوں ایہہ تسلی ہو گئی کہ قریش ڈر کے دوڑنا نہیں پے چاہندے تے اوہ اپنی پلاننگ کرن لگ پے۔ اُس دیہاڑے رجب دی آخری تاریخ سی۔ رجب چونکہ حرام مہینا سی جہدے وچ لڑائی نہیں کیتی جاسکدی سی ایس لئی مسلمان قریشی جتھے تے حملہ نہیں کرنا چاہندے سن پر جدوں سوچدے سن کہ کل تیکر قریش حدود حرم وچ داخل ہو جان گے تے فیراوہ حملے دا ارادہ بنالیندے سن۔ نبی اکرمؐ دے ایس نترے ہوئے حکم دے باوجود کہ تساں صرف قریش دی جاسوسی کرنی اے، جناب عبد اللہ دے دستے نے حملے دا فیصلہ کر لیا۔ ایوں جناب عبد اللہ دے اک ساتھی واقد بن عبد اللہ نے تیر مار کے عمرو بن حضری نوں قتل کر دتا۔ ایہہ ویکھ کے نوفل بن عبد اللہ نے دوڑ لا دتی پر عثمان بن عبد اللہ تے حکم بن کیسان گرفتار ہو گئے۔ مال نال لدے ہوئے اٹھاں تے وی مسلماناں نے قبضہ کر لیا۔

جدوں عبد اللہ بن جحش دا جتھا اٹھاں تے لدیا مال تے دو قیدیاں نوں لے کے مدینے وچ جناب رسول خدا دی خدمت وچ حاضر ہوئے، عمرو بن حضری دے قتل دی خبر سنائی تے مال غنیمت وچوں خمس (۱/۵) رسول خدا دی خدمت وچ پیش کیتا تے آپؐ نے ناراضی دا اظہار کیتا تے فرمایا:

{ مَا أَمَرْتُكُمْ بِالْقِتَالِ فِي أَشْهُرِ الْحَرَامِ }

”میں تے تہاں حرمت والے مہینے وچ جنگ دی اجازت نہیں دتی سی۔“

ایہہ سن کے امیر دستہ عبد اللہ تے دونوں قیدی حیران رہ گئے۔ جناب عبد اللہ دے ساتھیوں نوں وی فکر پے گئی کہ ایہہ کیہہ بنی۔ سارے مسلمان وی اوہناں نال ناراض ہون لگ پے کہ اوہناں اوہ کم کیوں کیتا جس دی سرکار نے اجازت نہیں دتی سی۔

اصل وچ قریشی جتھے دے قتل ہون والے بندے دا تے پھڑے جان والے دوواں بندیاں دا تعلق مکئی دے چوکھے معزز خاندان نال سی۔ مران والا عمر و مکئی دے عبد اللہ حضری دا پتر سی جیہڑا حرب بن اُمیہ (امیر معاویہ دے دادے) دا حلیف سی۔ حرب قریش دا رئیس اعظم سی تے جناب عبد المطلب توں بعد اویسی مکئی دا چوہدری سی۔ تے جیہڑے دو بندے پھڑے گئے سن اوہ دوویں مغیرہ دے پوترے سن۔ مغیرہ وی چنگے ٹوہرے والا بندہ سی۔ اوہ ولید دا باپ تے حضرت خالد بن ولید دا دادا سی تے حرب توں بعد مکے وچ اوس دا نام و جداسی۔

مکئی دے تگڑے بندیاں دا قتل تے گرفتار ہونا اوہ وی حرام مہینے وچ، مکئی والیاں لئی کوئی معمولی گل نہیں سی۔ اوہناں

نوں نفرت پھیلان تے پروپیگنڈا کرن دا اک ٹکڑا بہانہ لہجہ گایا سی۔ اوہناں چار چغیرے دے قبیلیاں ول ڈھنڈورچی گھلے
تے اوہناں نوں دسیا کہ ویکھو محمدؐ نے کیہہ غضب کیتا اے؟ حرمت دے مہینے وچ خون ریزی تے اوہ وی بغیر کسے گل توں!
اوہناں نے چنگا نکاواں پروپیگنڈہ کیتا تے مکئی دے سارے قبیلیاں وچ انتقام دی آگ بھڑکا دتی۔
تواریخ دے سیانے آکھدے نیں کہ مسلماناں تے مکئی والیاں وچکار جنیاں خونی جنگاں ہوئیاں نیں اوہناں دے
پچھے حضرمی دالہو بولداسی۔

غزوہ بدر

مکی والیاں دی تجارتی شاہراہ غیر محفوظ ہو جان دی وجہ توں اوہناں وچ چوکی بے چینی پائی جاندی سی۔ سریہ عبداللہ بن جحش وچ عمرو بن حضرمی دے قتل نے بلدی تے تیل سٹن داکم کیتا تے ایوں مکی والیاں نے مسلماناں نال اک متاراکردین والی جنگ کرن دا فیصلہ کر لیا۔ ایس توں پہلا اوہناں دا اک سردار کرز بن جابر فہری مدینے دیاں چراگا ہواں تے غارت گری کردیاں اک مسلمان چھیڑونوں وی قتل کر گیا سی۔ اوہناں دا اک قافلہ جیہڑا ابوسفیان دی قیادت وچ شام توں مال درآ مدکر رہیا سی، اوہدے وچ ڈھیراں دے حساب نال جنگی سامان وی شامل سی تے ہن اوہ ریاست مدینہ دی علاقائی حد دے وچوں لنگن والا سی۔

ایوں دے حالات وچ مکی والیاں دا ایہہ سوچنا کہ مسلمان تجارتی قافلے تے حملہ کرسکدے نیں، کوئی عجیب گل نہیں سی۔ ابو جہل تے حضرمی خنوادے دے بندے لڑائی دی تیاری کر رہے سن کہ شام ولوں آؤن والا ابوسفیان دا تجارتی قافلہ مدینے دے نیڑے اپڑ گیا۔ قریش دیاں سرگرمیاں دی تاڑ رکھن لئی گھلے ہوئے دوویں مسلمان جاسوس طلحہ بن عبید اللہ تے سعید بن زید واپس مدینے اپڑ گئے تے حضور توں حال حالات دی خبر جادی۔

ابوسفیان بڑا سیانا بنداسی۔ اوہ ایس علاقے وچ ہر آؤن جان والے کولوں سوہنہ لبنداسی کہ مدینے والیاں دیاں آج کل کیہہ سرگرمیاں نیں۔ اک تھان تے اوس نوں پتا لگا کہ دوہور بندے وی ایس علاقے دے حال حالات جانن دی چنتا کر رہے سن۔ دسن والے نے اوس نوں ایہہ وی دسیا کہ فلاتی تھان تے اوہناں اپنے اُٹھ بٹھائے سن۔ ابوسفیان او تھے گیا تے اوس نوں اُٹھ دی لید نظر آئی جہدے وچ کھجوراں دیاں لنگاں سن۔ اوہ سمجھ گیا کہ جیہڑے بندیاں دی اوس نوں دس پئی اے، اوہ مدینے دے بندے ای ہوسکدے نیں کیوں جے صرف اوتھوں دے اُٹھ ای کھجوراں کھاندے نیں۔ اوس نے ایس گل داوی اندازا کر لیا کہ اوہ بندے جاسوس سن تے اوہناں دی جاسوسی پاروں اوس دے قافلے تے حملہ ہو سکدا اے۔ ایس پاروں اوس نے حجاز وچوں لنگن والا مکی دا جانی پچھانیا رستہ چھڈ کے قافلہ سبے پاسے ساحل سمندر ول موڑ لیا۔ اوس نے اک تدبیر ایہ وی کیتی کہ اوتھوں دے اک مقامی بندے مضمم بن عمرو غفاری نال پیسے ٹک کے اوس نوں اک تیز رفتار سواری اُتے مکی ول ٹور دتا۔ تاں جے اوہ مکی والیاں نوں دے کہ اوہناں دا مال سخت خطرے وچ اے تے مسلمان کسے وی ویلے ابوسفیان دے درآ مد شدہ مال تے قبضہ کرسکدے نیں۔

آؤ ہن مکی چلیے۔

ایہہ کہ اے۔ مدینے دے رستے والے پاسے اک تھان تے بندیاں دا مجمع لگا اے۔ کجھ بندے کاہلے کاہلے

پیرپنڈے ایس جتھے ول ٹردے آؤندے نیں۔ ایوں لگدا اے کہ اوہ چھیتی نال ساری گل سن لینا چاہندے نیں۔ کجھ لوکاں دے ہتھاں وچ ہتھیار نیں۔ اوہ غصے نال کدے مدینے ول جاندے رستے ول ویکھ رے نیں تے کدے اوس ناقہ ول جہدے کن تے نک سجرے دڈے جا پدے نیں۔ چوکھے بندے ایس ناقہ دے نال کھلوتے، رولا پاندے بندے ول ویکھ رے نیں۔ اوہ ایڈی اُچی واج نال کھپ پارہیا اے کہ اوہدے مونہوں نکلن والی گل دی ٹھیک طرحاں سمجھ ای نہیں لگ ری۔ غور کیتیاں پتا لگا اے کہ اوس دی اٹھ تے پالانا وی پٹھا اے تے کھپ پاؤن والے بندے دا چگ وی اگٹوں پچھوں پاٹا ہو یا اے۔ اوہ کھپ پائی جارہیا اے:

”اوہ قریش، اوہ قریش دے بندو! تہاڈا مال تہاڈے بندے۔ اوہ مکئی والیو! تہاڈا سیانا، تہاڈا دلاور ابوسفیان۔ دھیان کرو، قافلہ گیا جے، مال ہتھوں گیا جے۔ محمدؐ تے اوس دے بندے تہاڈے قافلے تے حملہ کر رے نیں۔ بھجو..... بچاؤ..... بچا لو جے لوڑ جے اپنے پتراں دی تے اپنے بھراواں دی۔“

کھپ پاؤن والا ایہہ بندہ اوہی مضمم اے جنوں ابوسفیان نے مکئی گھلیا سی۔ تے ایہہ جیہڑا سامنے سیدہ تان کے تے باہنواں کھلار کے داڑھی تے ہتھ پھیردا بندہ اک جتھے نال آیدرٹریا آؤندا اے ایہہ ابوالحکم عمرو بن ہشام (ابو جہل) اے۔

”بس بئی بس، قاصدا بس۔ کیہہ محمدؐ نے ہر کسے نوں عمرو بن الحضرمی سمجھ لیا اے؟ اسیں دس مت دیواں گے۔“ ابو جہل آکھ رہیا اے۔

ہن ہر پاسے پا جڑے گئی اے۔ فرات بن حیان العلجی نے بڑے جوش نال ابوسفیان ول سواری دوڑا دتی اے تاں جے اوس نوں دسے کہ گھبرائے نہ مکئی والے اپڑ رے نیں 1 سہیل بن عمرو اعلان کر رہیا اے کہ ”لوکو! کیہہ تسیں محمدؐ تے یثرب دے بے دیناں نوں ایس گل دی کھلی اجازت دے دتی اے کہ اوہ تہاڈا مال لٹ کے لے جان؟ جنوں دولت دی تھوڑا اے، میتھوں لوے تے جس نوں ہتھیاراں دی لوڑ اے اوہ میرے اسلحہ خانہ وچوں لوے تے ہر کوئی نکل پوے محمدؐ نال مکرلین لئی۔ 2 نوفل بن معاویہ وی شدائیاں وانگ مکئی دیاں گلیاں وچ پچا پھر دا اے تے واجاں لا رہیا اے ”نکو بئی لوکو، نکو۔ سواریاں تیار کرو۔ ہتھیار بنھ لو۔“

”نوفل جی! گل سنیا جے“ عبداللہ بن ابی رسیعہ نے واج ماری اے ”ایہہ لوو پنچ سواشریاں۔ جتھے تے جویں دل کردا جے ورتو۔“

”تے ایہہ تن سواشریاں میرے ولوں جے“ عویطب بن عبدالعزیٰ آکھ رہیا اے ”لے بھئی سجنو! ۲۰ اٹھ میرے ڈیرے توں کھول لو و تے نالے اعلان کر دیو کہ جیہڑا جیہڑا اووی جنگ وچ جائے گا، اوس دے بال بچے داروٹی پانی میرے ذمے۔“

ہن اسیں مسجد حرام دے سامنے کھلوتے آں۔

سامنے مسجد حرام دے وچ جیہڑا چنگا موٹا جہیا بڈھا نفحات (خوشبوواں) روشن کر رہیا اے، اوہ اُمیہ بن خلف اے

تے

! طبقات ابن سعد جلد اول صفحہ: ۲۳۱

@ ضیاء البی از جسٹس کرم شاہ از ہری جلد سوم صفحہ: ۳۰۰

جہیڑا بند ابن اندرجار ہیا اے ایہہ عقبہ بن ابی معیط اے۔

”اوہ ابوعلی! اوہ ابن خلف! بس خوشبوؤاں روشن کری جا۔ توں تے زنانیاں نالوں وی رہیا ایں، تیرا جنگ نال کیہہ

کم؟“ عقبہ نے پیر اندر رکھ دیاں ای آکھیا۔

”کیہہ بکواس کر رہیا ایں؟ تیرا ستیاناس ہووے۔“ 1

”نہیں تے تینوں کچھ نہیں پتا؟“

”نہیں، اصلوں ای نہیں“

”اومیاں! محمد نے ابوسفیان دے تجارتی جتھے اُتے حملہ کر دتا اے۔“

مسجد حرام وچ بیٹھے باقی بندیاں وی ایہہ گل سن لئی اے۔ عقبہ، اُمیہ تے باقی لوگ وی جنگ دی تیاری لئی دوڑ پے نیں۔

ابوجہل آپوں ہن بنو ہاشم دے گھراں وچ اپڑ گیا اے۔

”چلو بھئی تیاری پھڑو، اوس نے آکھیا اے۔

”ابوالحکم جی! ساڈا محمد نال جنگ کرنا بن دا تے نہیں“ جناب عباس جواب دے رے نیں۔

”وکیہ ابوالفضل! ایہہ کنڈے بنو ہاشم دے ای کھارے ہوئے نیں تے تساں ای چکے نیں۔“ ابوجہل آکڑ وکھار ہیا اے۔

”اپنی عزت تے اپنا مال بچان لئی تہانوں ساڈے نال جانا پوے گا۔ چلو شواش چلو، تیاریاں کرو۔ چل بئی نوفل،

چل بئی طالب، چل بئی عقیل۔ چلو حارث تے ابوطالب دے پترو! چلو، ہتھیار کسو، ابوجہل نے اوہناں نوں مجبور ای کر چھڈیا

اے۔

حضور دے مہربان چاچے ابوطالب دا پتر طالب، جہیڑا سیدنا علی دا بھرا وی اے اوہ وی ماری دا اُٹھ پیا اے۔ تے

دھیان کرو کچھ شعر پڑھ رہیا اے:

”طالب آج اک اجے جتھے نال نکل رہیا اے، جہدا مقصد لٹ مارا اے۔ اوہ اجہی جماعت وچ رل گیا اے جہیڑی

لڑن مرن تے جنگ کرن لگی اے۔ اک اجہی جماعت نال جنگ کرن لگی اے جہنوں پہلوں ای مجبور کر کے مکئی وچوں کڈیا

گیا اے۔ پر اوہ (طالب) کوئی خوشی نال تے نہیں نکلیا۔ ہن اوہ مغلوب ہو کے ای پر تے گا، غالب ہو کے تے نہیں۔“ 2

”تے ابولہب جی! تہاڈا کہیہ ارادا اے؟“ ابوجہل پچھ رہیا اے۔

”نہیں ابوالحکم، میں تے نہیں جاواں گا۔“

”تے ٹھیک اے، اپنی تھاں تے بندادے دے“

”مینوں منظور اے، میرے دلوں عاص بن ہشام نوں لے جاؤ“

”کیہہ مکاؤندے او اوہدے نال؟“

”ایہ میرا تے اوس دامعاملہ اے۔ عاص جانے تے میں“

! سیرت ابن ہشام، جلد اول صفحہ: ۴۲۵

@ مغازی رسول اللہ از حضرت عروہ بن زبیر، صفحہ: ۱۳۷

”اوئے ابن عبدالمطلب! ایوں گل نہیں بنی۔ گل مکاؤ سدھی طرحاں“

”ٹھیک اے ابوالحکم! عاص میرا چار ہزار درہم دامقروض اے، میں اوس نوں چھڈے، اوہ میری تھاں تے جنگ وچ

شامل ہو جاوے۔“

ایہہ سامنے والی بیٹھک وچ ابو جہل تے عامر حضرتی نال جیہڑے بندے بیٹھے نیں ایہہ مکئی دی پارلیمنٹ دے رکن نیں تے پارلیمنٹ دا ایہہ ہنگامی اجلاس ایس لئی بلایا گیا اے کہ غور کیتا جاوے کہ مدینے والیاں نال ٹکر لین لئی جدوں اسیں مکہ خالی کردا یوں گے تے پچھوں قریش دے پرانے دشمن بنو کنانہ کد رے اوہناں دیاں سوانیاں، بال بچے تے مال ڈنکر کھول کے نہ لے جان۔ ایس اجلاس دی خبر بنو کنانہ نوں وی مل گئی اے تے اوہناں ہنے ہنے ای ایہ فیصلہ کیتا اے کہ بنو کنانہ اوہناں نال پورا تعاون کرن گے۔ لو اوہ مالک دی اپڑ گیا اے۔ مالک بن جعثم المدلجی، اوہ بنو کنانہ داسردار تے چنگا ٹکڑا چوہدری اے۔

”اناجارکم من ان تاتیکم کنانتہ من خلفکم بشی تکرہونہ۔“ 1

اوس نے آؤندیاں ساراں بولنا شروع کر دتا اے۔

”لے بئی بندو! بے بنو کنانہ تھاڑے نال غداری کرن تے میں ذمے وار ہاں۔“

”شاواش بئی شیرا، تیرے شاواش“ ابو جہل آکھ رہیا اے۔

متکبر قریش جنگ لئی نکل پے۔

بنو کنانہ دی ایس ضمانت توں بعد قریش دا ایہہ متکبر لشکر لا الہ الا اللہ محمد رسول اللہ پڑھن والے لے نمانے تے نہتے بندیاں دیاں زبانان ہمیش لئی بند کرن لئی چوکھے کر ڈفر نال مکئی توں مدینے ول ٹر پیا۔ رب توں خار، اوس دے رسول توں خار، رسول دے عاشقاں توں خار، انتقام دا جوش تے طاقت دا گھمنڈ، ایہہ سن ایس لشکر دیاں خوبیاں۔

۱۳ (تیرہ سو) جنگجو بندیاں دا قہر تے غضب دا بھریا قریشی لشکر ابو جہل تے عقبہ بن ربیعہ دی سالاری وچ تیزی نال اگے ودھ رہیا سی۔ جدوں ایہہ لشکر وادی عسفان تے قدید توں لنگ کے جحفہ اپڑیا تے ابوسفیان دا اک سنبھیا ملیا کہ تسیں لوکی اپنے بندیاں تے اپنے مال نوں بچان لئی مکئی توں نکلے سی، میں مدینے والیاں توں بچ کے ہن چوکھا دریدر نکل آیا ہاں، ایس لئی تسیں وی پچھاں پرت جاؤ۔ 2

ایہہ سن کے مکئی لشکر نے واپس جان دا سوچیا پر قریش دا طاغوت اکبر ابو جہل آکھن لگا کہ نہ بھئی نہ، ایہہ نہیں ہونا۔ غرور تے تکبر دے مارے وگڑے ہوئے سردار نے ارادہ ظاہر کیتا کہ رب دی سونہہ، اسیں واپس نہیں جاواں گے، اسیں تے بدر تیکر جاواں گے، او تھے تن دیہاڑے رہواں گے، اونٹ ذبح کراں گے، دُجیاں نوں دی کھواواں گے تے آپوں دی

کھاواں گے، شراباں پیاں گے، لونڈیاں نچن گئیاں تے نالے گانے گان گئیاں۔ سارا عرب ساڈیاں گلاں سُنے گاتے ایوں ہمیش

! حیات محمد از محمد حسین ہیکل، صفحہ: ۳۱۱

@ الریتق المختوم از صفی الرحمن مبارک پوری، صفحہ: ۲۸۲

اوہناں تے ساڈی دھاک بیٹھ جاوے گی۔

ایس موقع تے اخنس بن شریق، بنوز ہرہ تے بنو ہاشم نے زور دتا کہ ہن اگے جان دا کوئی مقصد نہیں تے پچھاں پرت جانا ای سیانف دی گل اے۔ اخنس بنوز ہرہ دا حلیف سی تے ایس لشکر وچ اوہناں داسر داروی سی۔ ایس لئی اوہنے بنوز ہرہ دے تے اپنے بندے نال لے کے مکئی نوں موڑا پاتا پرتا پر بنو ہاشم نوں واپس پرتن دی ابو جہل نے اجازت نہ دتی۔ بنوز ہرہ دے پرتن نال کی لشکر دی تعداد ۹۵۰ رہ گئی۔ لشکر نے بدر وچ اپنا سفر جاری رکھیا تے اخیر بدر دے نیڑے اپٹر کے اک بٹے دے کچھے چھاؤنی پا دتی۔ ایس پڑاؤ دے ویلے مشرکاں کول ۲۰۰ گھوڑے، ۳۰۰ بکتر، کئی سوتلواراں تے لاتعداد اونٹ سن۔

بدر دی وادی:

بدر، مدینہ منورہ توں ۱۲۰ کلومیٹر دے پندھ تے مکئی وچ جان والے رستے تے اک وادی اے۔ بحیرہ احمر ایس توں صرف ۲۰ کلومیٹر درید اے۔ ایہہ بیضوی (آندے دی) شکل دا اک میدان اے جنوں چارے پاسیوں پہاڑاں نے گھیریا ہوئے اے۔ ایس میدان دا طول ۱۰ کلومیٹر تے عرض ۷ کلومیٹر اے۔ ایس دے شمال تے جنوب وچ دو چٹے جئے ٹیلے نیں جیڑے دُوروں ریت دے اُچے جئے بٹے لگدے نیں۔ رب دے ارشاد موجب شمال جئے دے ٹیلے دا نام العدوة الدنیا (نیڑے دانا کا) تے جنوب جئے دانا نام العدوة القصوی (دُور دانا کا) اے 1 بدر وچ کھوہ وی نیں تے چشمہ وی۔ جس تھاں تے لڑائی ہوئی سی او تھے ہن سبزہ امی سبزہ اے۔ جنگ دے دوران جس تھاں تے سپہ سالار اعظم جناب محمد رسول اللہ لئی جنگی ہیڈ کوارٹر بنایا گیا سی، اوس تھاں تے ہن اک مسیت اے جیس نوں آپ دے ہیڈ کوارٹر (عریش) دی نسبت نال مسجد العریش آکھدے نیں۔ ایس دا اک دُجانا نام مسجد غمامہ وی ہے۔

بدر اوہناں دناں وچ وی اک وڈا تجارتی گڑھ سی تے ہن وی ہے۔ اوہدوں او تھے اک چنگا تگڑا میلہ لگدا ہوندا سی تے ہن او تھوں دا جمعہ بازار چوکھا مشہور اے۔ بدر گھی، کمبل تے لیدر گارمنٹس (چمڑے دیاں بنیاں شیواں) دی چنگی منڈی اے۔ اسلامی لشکر دی روانگی:

جویں اسیں کچھے پڑھ آئے ہاں جناب رسول خدا مکئی والیاں دی معیشت تے سٹ لان لئی اوہناں دی تجارتی شاہراہ تے ہر حال وچ قبضا کرنا چاہندے سن۔ ایوں ۱۲ رمضان المبارک ۲ھ (۸ مارچ ۶۲۴ء) نوں اللہ دی وحدانیت دی گواہی دین والے ۳۱۵ بندیوں دا اک نویکلا جہیا جتھا سچے سچے مدینے توں باہر نکلا اے۔ اوہدے وچ ۶۱ بندے انصار دے قبیلے اوس وچوں نیں، ۷۰ قبیلہ خزرج وچوں تے باقی مہاجر نیں۔

اوہناں دے نال خورے دوسوانیاں وی نیں پر اک نکا جہیا منڈا تے ہر کسے نوں دسدا پیا اے۔ اوہ ویکھو نا سامنے جتھے دے امیر دے اگے ہتھ بندھ کے کھلوتا اے۔ اوہناں کول صرف ۲ گھوڑے، ۷۰ اونٹ تے تھوڑیاں جہیاں تلواراں نیں۔ گھوڑیاں وچوں اک حضرت زبیر بن عوام دا تے دُجا حضرت مقداد بن اسود دا اے۔ ۷۰ اونٹ ۳۱۵ بندیاں دی

سواری

! انفال: ۴۱

لئی کسے وی طرحاں کافی نہیں ہوسکدے۔ تن چار بندیاں دے حصے اک اونٹ آؤندا اے تے اوہناں تے مجاہدین اسلام واری واری سفر کر رہے نیں۔ جیہڑا اونٹ سپہ سالار اعظم جناب محمد رسول a دے حصے آیا اے اوہ دے تے سواری کرن والے دُجے دو بندے حضرت علی تے حضرت مرشد بن ابی مرشد غنوی نیں۔ اوہ دوویں ایہہ بیتی کر رہے نیں کہ اوہناں نوں پیدل ٹرن نال کوئی مسئلہ نہیں تے نالے آکھ رہے نیں کہ یا رسول اللہ! اسیں اُٹھ دے سفر دی اپنی واری وی تہاں نوں دتی پرواہ عا دل بے مثل ایہہ گل کدے وی نہیں منن گے۔

”میں وی نال جاواں گا۔“ سامنے اک منڈا ضد کیتی کھلوتا اے۔

”نہیں بھئی نہیں، ایہہ نہیں ہونا۔ توں پشاں شہر نوں پرت جا“ بندے اوس نوں سمجھارے نیں۔

”ہاں عمیر“ بزرگ ٹھیک ای تے آکھدے نیں۔“ اوسدے بھرا سعد بن ابی وقاص نے وی سمجھا یا اے۔ عمیر نے رونا شروع کر دتا اے۔ امیر لشکر ایہ سب کچھ ویکھ رہے نیں۔ ہن اوہ ہولے جہے اگے ودھے نیں۔ اوہ محسوس کر رہے نیں کہ ایس دے وڈکے آکھ تے ٹھیک ای رہے نیں۔ خورے سفر وچ اگے کوں دے حالات بن دے نیں۔ ابوسفیان دے تجارتی قافلے نال کدرے لڑائی وی تے ہوسکدی اے۔ پر کیمہ کیتا جاوے کہ عمیر دارونا تے ویکھیا نہیں جانا۔ امیر لشکر نے اخیر عمیر نوں نال جان دی اجازت دے دتی اے۔ جناب سعد بن ابی وقاص نے ننھے مجاہد تے نکلے ویر عمیر بن ابی وقاص دے گل وچ تلوار لکا دتی اے۔ 1

ایس نوں یکے لشکر دار سردار وی بڑا نوںیکلا، سوہنا تے سلکھنا اے۔ اوہ کسے بال نوں روندیاں نہیں ویکھ سکدا، کسے نوں دُکھی ویکھ کے آپ وی دُکھی ہو جانا اے تے کسے دے اتھرواں دے نال آپوں وی اتھر وکیرن لگ پیندا اے۔ پر کدّی اچرج گل اے کہ اپنی اولاد رب دی واحدانیت منوان لئی قربان کری آؤندا اے۔ آپ a دی بیٹی (سیدہ رقیہ) چوکھی بیمار نیں پر اوہ دے سرہانے پٹھن دی بجائے امیر لشکر قیامت تیکر جنم لین والیاں کروڑاں دھیاں دے بھاگ جگان دی چننا کر رہیا اے۔

لشکر دار سردار جیہڑا آدمیت دا وی سردار اے، راہ خدا دے مسافراں نوں نال لے کے عقیق وَل ٹر پیا اے۔ عقیق توں ذوالحلیفہ، اُولات الجیش، تر بان، مُکَل، عمیس الحمام، صیخرات الیمامہ تے سیالہ توں ہوندا ہونیانُف الروحا پتر دا اے۔ اچن چیت خیال آؤندا اے کہ میں تے دنیا دی پہلی جدید ریاست دا بانی وی ہاں تے میں دنیا دے پہلے تحریری دستور دا خالق وی ہاں۔ ایہہ تصور تے ہن پرانا ہو گیا اے کہ سربراہ مملکت (Head of state) توں بغیر وی ریاست زندہ رہ لینی اے۔ ایس لئی جناب ابولبابہ بن عبدالمندرنوں قائم مقام سربراہ دے اختیارات دتے تے جناب عاصم بن عدی نوں

اوہناں دا نائب مقرر کر دیاں ہونیاں مدینے دی اتلی آبادی (عالیہ) دا حاکم وی بنایا تے نالے حکم دتا کہ شتابی نال مدینے اپڑ جاؤ۔ ایس موقعے تے دو بندے حال حالات دی خبر لین لئی آگے وی ٹور دتے نیں۔

ہن لشکر اسلامی داسپہ سالار اعظم خدادے دے رستے تے ٹردا ہونیا، اوہدے رستے تے ٹرن والے ۳۱۱ بندیاں نوں نال لیندا الغازیہ، وادی رحقان تے صفراء وچوں لنگدا وادی ذفران اپڑ دا اے ۱۲ تھئے محکمہ جاسوسی ولوں ایہہ خبر ملدی اے

! کنز الایمان بحوالہ سیرت النبی از شبلی نعمانی جلد اول صفحہ: ۱۸۸ @ رسول رحمت از ابوالکلام آزاد، صفحہ: ۲۷۱

کہ ابوسفیان دا تجارتی قافلہ تے رستہ بدل کے چوکھا آگے نکل گیا اے پر ایک بھیڑی خبر ایہہ ہے کہ قریشیاں دا اک چنگا ٹکڑا لشکر بڑی شتابی نال بدروول ودھر رہیا اے۔

صورت حال دی ایس اچانک تبدیلی نے سالار اعظم نوں چوکی ڈوگی سوچ وچارتے مجبور کر دتا تے آپ نے اوسے ویلے اک فوجی مجلس شوریٰ طلب کیتی جہدے وچ ماہر کمانڈراں تے حربی سیانیاں نال صلاح مشورے کیتے۔ ایس موقعے تے حضرت ابویوب انصاری ۱ تے کجھ دُجے اصحاب نے عرض کیتی کہ یا رسول اللہ! جویں دی گل اسیں سن رے ہاں، اسیں کوں اوہناں نال لڑاں گے، تے نالے اسیں کدوں جنگ دے ارادے نال گھروں نکلے ساں۔ ایس جھاکے تے خوف دا ذکر قرآن نے ایوں کیتا اے۔

{كَمَا أَخْرَجَكَ رَبُّكَ مِنْ بَيْتِكَ بِالْحَقِّ وَإِنَّ فَرِيقًا مِنَ الْمُؤْمِنِينَ لَكَرِهُونَ يُجَادِلُونَكَ فِي الْحَقِّ
بَعْدَ مَا تَبَيَّنَ كَأَنَّمَا يُسَاقُونَ إِلَى الْمَوْتِ وَهُمْ يَنْظُرُونَ} (انفال: ۵، ۶)

”جویں تیرے رب نے تہانوں حق دے نال گھروں ٹوریا تے مومنناں وچوں اک ٹولہ راضی نہیں سی۔ اوہ تہاڈے نال جھگڑ دے سن حق دی گل وچ، اوس دے ظاہر ہو جان توں بعد۔ یعنی سب کجھ جان دیاں ہونیاں وی اوہناں نوں موت ول ہکلیا جا رہیا ہے۔“

ایس دے باوجود مشاورت جاری ری کیوں جے ایہہ تے زرا تھوڑے جے بندیاں دا خیال سی۔ اوس مجلس وچ حضرت ابوبکر تے حضرت عمر نے جدوں اپنا اپنا مشورہ دتا تے اوہ ایہہ سی کہ جویں اللہ تے اوس دا رسول آکھن گے، اسیں اوہی کراں گے۔ فیر حضرت مقداد بن عمرو اُٹھے تے اوہناں بڑے جوشیلے انداز وچ آکھیا ”یا رسول اللہ، رب نے جیہڑا رستہ تہانوں دکھایا اے اوس تے ٹردے رہو اسیں تہاڈے نال آں۔ خدادی قسم اے اسیں تہانوں اوہ گل نہیں آکھاں گے جیہڑی بنی اسرائیل نے موسیٰ نوں آکھی سی کہ:

{فَاذْهَبْ أَنْتَ وَرَبُّكَ مَقَاتِلًا إِنَّهُمَا مُنَاقِدُونَ}

”تسیں نے تہاڈا رب جاؤ تے لڑو، اسیں استھ بیٹھے آں۔“

اوس ذات دی قسم جس نے تہانوں حق دے نال نبی بنا کے گھلایا اے جے تسیں سانوں برک الغماد ۲ تیکر وی لے جاؤ گے تے اسیں تہاڈے نال رہواں گے تے راہ وچ ملدے لوکاں نال لڑنا وی پیا تے لڑاں گے۔

رسول خدا نے اوہناں تہاں بزرگاں دے حق اندر دُعا کیتی پر مشاورت فیروں جاری رکھی، کیوں جے اوہ تنے تے

مہاجراں وچوں سن۔ مشاورت جاری رکھن دیاں ایہہ تن وجوہات سن:

۱۔ حضرت ابویوب انصاری دی رائے توں ایہہ اندازا ہوندا سی کہ ہور انصاری وی ایوں دا خیال رکھ سکدے نیں۔

! معارف القرآن تفسیر سورۃ انفال

@ برک الغمادی بن وچ اے۔ عرب وچ، اوس دے چوکھے لے پندھ پاروں ایس علاقے دا نام ایوں ای ورتیا جاندا اے جویں اسیں کسے نوں آکھدے ہاں کہ ”چل بھانویں کالے پانی لے چل۔“

۲۔ میثاق مدینہ دے تحت اوس و خزرج مدینے توں باہر جنگ کرن دے پابند نہیں سن۔

۳۔ لشکر اسلام وچ زیادہ تعداد انصاری سی تے مہاجر تھوڑے سن۔

ہن جدوں رسول خدا نے ایہہ واج لائی کہ ”لوکو! مینوں مشورہ دیو“ تے انصاری کمانڈر تے علمبردار حضرت سعد بن معاذ گل سمجھ گئے کہ حضور ساڈے کولوں صلاح منگدے نیں۔ اوہ اٹھ کے کھلو گئے تے عرض کیتی کہ یا رسول اللہ! مینوں ایوں جا پدا اے کہ تسیں ساڈے (انصار دے) ارادے جاننا چاہندے او۔

”ہاں۔“ رسول خدا نے جواب دتا۔

حضرت سعد کہن لگے ”اسیں تے تہاڈے تے ایمان لیائے آں، تہاڈی گل نوں سچ نیا اے تے ایہہ گواہی دتی اے کہ تسیں جو کجھ لیائے او، اوہ سب حق اے۔ اسیں تہاڈی فرماں برداری تے اطاعت دے پکے وعدے کر چکے آں، جناب جس پاسے دا ارادہ کرو گے، اسیں تہاڈے نال ہاں۔ اوس ذات دی قسم جس نے تہانوں حق نال مبعوث کیتا اے جے تسیں سمندر وچ وی چھال مارن دا آکھو گے تے اسیں ماردیواں گے۔ ساڈا اک بندا وی کچھ نہیں ہٹے گا۔ سانوں ایس گل دا کوئی ڈر نہیں کہ کل کلاں تسیں کسے دشمن نال ٹکرو گے۔ اسیں جنگاں وچ جوناں وانگ لڑن بھڑن والے بندے ہاں۔ امید اے کہ رب تہانوں ساڈے ولوں اچھے کارنامے دکھائے گا جہدے نال تہاڈیاں اکھاں ٹھنڈیاں ہون گئیاں۔ بس تسیں یا رسول اللہ! سانوں نال لے کے ٹرو، اللہ برکت دیوے۔“

حضرت سعد دی ایہہ تقریر سن کے جناب رسول خدا دے مکھڑے تے خوشی دی لہر دوڑ گئی تے آپ نے فرمایا ”چلو تے خوشی خوشی چلو، اللہ نے اینہاں دو جتھیاں (لشکر کفار تے تجارتی قافلہ) وچوں اک دا میرے نال وعدہ کر لیا اے۔ واللہ، ایس ویلے میں اوہ تھادواں ویکھ رہیا ہاں جتھے قریش نے قتل ہونا اے۔

ایس مشاورت توں بعد لشکر اسلامی نے فیر کوچ کیتا تے اوہناں گھاٹیاں وچوں لنگے جنہاں نوں الا صافر آکھدے نیں۔ فیر الدبہ نام دی وتی وچ قیام فرمایا۔ فیر حنان نامی بے نوں سچے پاسے چھڈیا تے بدر دے نیڑے جا ڈیرے لائے۔ ایس موقعے تے حضرت حباب بن منذر سرکار دو عالم کول حاضر ہوئے تے عرض کیتی کہ یا رسول اللہ! جناب نے جس تھاں دا انتخاب کیتا اے ایہہ وحی دی روناں اے یاں تسیں اپنے طور تے ایس وچ کوئی بہتری ویکھی اے؟ رسول خدا نے ارشاد فرمایا کہ ”حاب! نہیں، وحی تے نہیں بس میری ذاتی رائے ہے۔“

”تے اے اللہ دے رسول! فیر ایہہ تھاں بہتر نہیں۔“

ایوں جناب حباب نے آپ نوں قائل کر لیا تے لشکر اسلامی نے کجھ اگے جا کے چشمے دے نیڑے چھاؤنی پادتی۔
اوس دن ۱۶ واں روزہ سی تے مارچ دی ۱۲ تاریخ سی۔

سالار اعظم نے پہلے مقام توں کوچ کرن توں پہلوں ای حضرت علی، حضرت زبیر تے حضرت سعد بن ابی وقاص نوں بدر دے چشمے ول جاسوسی کرن ٹور دتا۔ ایہہ جاسوسی دستہ سدھا بدر دے چشمے تے ججیا۔ او تھے دوکی غلام اپنے لشکر لئی پانی بھر رے سن۔ مسلمان دستے نے اوہناں نوں گرفتار کر لیا تے رسول خدا دی خدمت وچ حاضر کیتا۔ اوس ویلے جناب رسول خدا نماز پڑھ رے سن۔ ایس لئی باقی صحابہ نے نوجوان جنگی قیدیاں نال پچھ گچھ شروع کر دتی۔

”اسیں قریش دے لشکر نال آئے ہاں تے ہن اوہناں سانوں پانی لین لئی گھلیا سی۔“ اوہناں جواب دتا۔
”تسیں جھوٹ بولدے او، تسیں تے ابوسفیان دے تجارتی قافلے دے بندے او،“ صحابہ نے اپنا خیال ظاہر کیتا تے نالے اوہناں منڈیاں نوں مارنا شروع کر دتا۔ مارتوں ڈردیاں اوہناں نے آکھ دتا کہ آہو اسیں ابوسفیان دے بندے آں۔ ایہہ سن کے مارکٹ کرن والے صحابیاں نے ہتھ روک لیا۔ رسول خدا جدوں نمازتوں فارغ ہوئے تے کجھ ناراضی نال آکھیا کہ جدوں اینہاں نے تہانوں ٹھیک گل دسی تے تسیں اوہناں نوں کٹن لگ پے تے جدوں اینہاں جھوٹ بولیا تے تسیں اینہاں نوں چھڈ دتا۔ خدا دی قسم اے اینہاں ٹھیک آکھیا سی کہ ایہہ قریش دے بندے نیں۔

ہن سپہ سالار اعظم آپوں تفتیش کر دے نیں:

”دسوئی قریش دی کوئی گل دسو، ایس ویلے اوہ کتھے نیں؟

”ایہہ بجا جیہڑا وادی دے اخیر دی دھانے تے نظر آ رہیا ہے، قریش ایس دے پچھے نیں“ منڈیاں نے دسیا۔

”کنے کو بندے نیں؟“

”اسیں گئے تے نیں“

”اچھا ایہہ دسو کہ روز کنے اونٹ کو ہندے نیں؟“

”اک دن نو (۹) تے اک دن دس (۱۰)“

”ایہہ مطلب ایہ ہو گیا کہ اوہناں دی تعداد ۹۰۰ توں ۱۰۰۰ تیکر اے۔ اچھا ایہہ دسو کہ قریش دے سرداراں

وچوں کبھڑا کبھڑا سردار نال آیا اے؟

”ربیعہ دے دوویں پتر عتبہ تے شیبہ، ابو البختری بن ہشام، حکیم بن حزام، نوفل بن خویلد، حارث بن عامر، طعیمہ بن عدی، نصر بن حارث، زمعہ بن اسود، عمرو بن ہشام (ابو جہل) امیہ بن خلف، عقیل بن ابوطالب، تہاڈا چاچا عباس تے ہور کئی سارے۔“

ایس چوکی ضروری خبر توں بعد جناب رسول خدا نے صحابہ نوں آکھیا کہ ”دوستو! کئے نے اپنے جگر دے ٹکڑے تہاڈے کول لیا سٹے نیں۔“

فیر رسول خدا میدان ول تشریف لے گئے۔ کجھ صحابہ آپ دے نال گئے۔ او تھے آپ اپنے دست مبارک دے

اشارے نال فرماندے جا رہے سن کہ ایہہ کل ابو جہل دی قتل گاہ اے، ایہہ عتبہ دی، ایہہ شیبہ دی تے ایہہ فلاں کافر دی قتل گاہ اے۔“^۱

سپہ سالار اعظم دی جنگی حکمت عملی:

پڑھنہاراں نوں یقینا پتہ ہووے گا کہ جنگ دے وی کجھ اصول ہوندے نیں جتّاں تے عمل کیتا جاوے تے جنگ

جتّا

!مسلم عن انس بن مالہ الرقیق الخثعمی از صفی الرحمن مبارک پوری صفحہ: ۲۸۹

آسان ہو جاندا اے۔ اسیں اوہناں اصولاں تے ضابطیاں نوں فن حرب دا نام دے سکدے ہاں۔ ۱۹۲۳ وچ اک برطانوی جرنیل جے ایف سی فلر (J.F.C. Fuller) نے اٹھ (۸) جنگی اصولاں دا تذکرہ کیتا سی تے اوہی ۸ اصول، جنگ عظیم دوم توں پہلاں دنیا دیاں ساریاں فوجی تربیت گاہواں وچ پڑھائے جاندے رہے۔ اوہ ۸ اصول ایہہ سن:

- ۱۔ مقصد دا تعین (پچا متھنا)
 - ۲۔ جارحانہ ایکشن (اگے ودھ کے سٹ مارنا)
 - ۳۔ حربی قوت دی کفایت (اپنی طاقت نوں سنبھالنا)
 - ۴۔ ناگہانیت (بجلی وانگ یاں اچن چیت حملہ)
 - ۵۔ حرکیت یاں Mobility (فوج دا ٹھکانہ بدلنا)
 - ۶۔ ارتکاز (قوت نوں اک مٹھ کر کے رکھنا)
 - ۷۔ سیکورٹی (حساس تے ضروری تھاواں دی پوری حفاظت)
 - ۸۔ تعاون (فوجی دستیاں دا آپس وچ رابطہ تے مدد)
- جزل فلرتوں بعد وی فن حرب وچ چوکھی پیش رفت ہوئی اے تے ہن ایہہ تن (۳) اصول وی آج دی جنگ لئی ضروری سمجھے جاندے نیں:

- ۹۔ انصرام یاں Logistics (بندوبست)
 - ۱۰۔ مورال Morale (حوصلہ تے ہمت)
 - ۱۱۔ قومی مساعی یاں National efforts (پوری قوم دی جدوجہد)
- ہن اسیں ویکھدے ہاں کہ چودہ سو ورھے پہلاں مارچ ۱۹۲۴ء وچ فن حرب دے امام تے سپہ سالار اعظم محمد رسول اللہ نے جنگ بدر کوں لڑی۔

(۱) مدینے دی ریاست دا سربراہ (Head of state) اپنی فوج دا کمانڈر انچیف وی سی۔ ایس حیثیت نال جدوں آپؐ نے خطرے دی بوسوگھی تے دوسیانے بندے جناب ابولبابہ تے عاصم بن عدی مدینے واپس بھیج دتے تاں جے اوہ مدینے دی حفاظت کر سکن۔ (ویکھو ضابطہ ۷ سیکورٹی)

(۲) اوس موقع تے جدوں کئی لشکر سپاہ خدا دے سامنے آ کھلوتا سی، آپؐ نے صحابہ دامورال بلند رکھن لئی اک خطاب فرمایا تے آ کھیا۔

{إِنَّكُمْ قَدْ أَصَبْتُمْ بِمَنْزِلٍ مِّنْ مَّنَازِلِ الْحَقِّ لَا يَقْبَلُ اللَّهُ فِيهِ مِنْ أَحَدٍ إِلَّا مَا ابْتُغِيَ بِهِ وَجْهُهُ وَإِنَّ الصَّبْرَ فِي مَوَاطِنِ الْبَاسِ مِمَّا يُفْرِجُ اللَّهُ عَزَّوَجَلَّ بِهِ الْهَمَّ وَيُنْجِي بِهِ مِنَ الْغَمِّ وَتُدْرِكُونَ بِهِ النَّجَاتَ فِي الْأُخْرَةِ... وَإِنَّمَا أَنَا وَأَنْتُمْ بِاللَّهِ الْحَيِّ وَالْقَيُّومِ... وَعَلَيْهِ تَوَكَّلْنَا وَإِلَيْهِ الْمَصِيرُ- يَغْفِرُوا اللَّهُ لَنَا وَلِلْمُسْلِمِينَ }

”سبحنو! آج تسیں حق دیاں منزلاں وچوں اک منزل تے کھڑے او۔ ایس مقام تے اللہ تعالیٰ کسے توں کوئی عمل قبول نہیں کرے گا سوائے اوس عمل توں جیہڑا صرف اوس دی رضائے کیتا گیا ہووے تے جنگ دے ویلے صرف صبر ای اجہی چیز ہوندا اے جہدے نال اللہ تعالیٰ غم تے خوف نوں دور کر دالے تے ایسے صبر دی برکت نال غم توں نجات دیندا اے۔ ایس صبر نال تسیں آخرت توں نجات پاؤ گے۔..... بے شک میں تے تسیں اوس اللہ دی مدد طلب کر دے ہاں جیڑا حج و قیوم اے..... تے اسیں اوس تے ڈور سٹی اے تے اوہدے ول ہی اسیں مڑ کے جانا اے۔ اللہ ساڈی مغفرت فرمائے تے سارے مسلماناں دی وی۔“

کمانڈر انچیف دی ایس پر مغز تقریر دے نال مدنی لشکر دے حوصلے بلند ہو گئے۔ اوہناں نوں ایہہ گل چیتے کرا دتی گئی سی کہ رب دی رضائے کیتا گیا عمل تے جنگ وچ صبر تے حوصلہ روز محشر نجات دا سبب بنے گا۔ ایہہ وی چیتے کرایا گیا کہ اخیر اوس اللہ ول پرت کے جانا اے جہدے ہتھاں وچ ای ہر شے ہے۔

اتھے ایہہ گل چیتے رکھنی پوے گی کہ جدید ہتھیاراں دے ڈھیر تے کونک بھرے ہوئے اسلحہ خانے اُچے مورال توں بغیر بیکار ہوندے نیں۔ سرکار دو عالم دی ایس تقریر نال مسلماناں دامورال بلند ہو گیتے اوہ رسول خدا دے منکراں اُتے قہر خداوندی بن کے نازل ہون لئی تیار ہو گئے (دیکھو ضابطہ نمبر ۱۰۔ مورال)

(۳) لشکر اسلامی ۱۶ رمضان نوں جدوں بدر دے مقام تے اپڑیا اوہدوں نماز عشاء دا ویلا سی۔ اجے ڈیرے لائے ای سن تے حضرت حباب نے ایہہ صلاح دتی کہ ایہہ تھاں جنگی مقصد لئی مناسب نہیں۔ اوہ اوس علاقے دے بھیدی سن ایس لئی اوہناں دا خیال ایہہ سی کہ اگے اوس چشمے کول اپڑنا چاہیدا اے جیہڑا مکئی لشکر دے سب توں چوکھا نیڑے (نزدیک ترین) ہے تاں جے مشرکاں نوں پانی لئی کوئی چشمہ نہ لکھے۔ اوہناں دا خیال ایہہ سی کہ ایوں باقی چشمے مدنی لشکر دے کچھ رہ جان گے جتھوں تیکر قریش دی رسائی ممکن نہیں ہونی۔ جناب حبابؓ نے باقی چشمے خراب کر دین دا وی مشورہ دتا۔ جیہڑا چشمہ قریشی لشکر دے چوکھا نیڑے تے نالے وڈھا وی سی، اوہ ایس پہلے ڈیرے توں اجے چوکھا دریڈا سی۔ پر جو نہی سپہ سالار اعظمؐ قائل ہوئے تے آپؐ نے لشکر نوں کوچ کرن دا حکم دتا تے ادھی رات ویلے نویں چھاؤنی تے جا ڈیرا لایا 1 سارے دن دی مسافت، عشاء دی نماز دا وقت، رات دا ہنیر اتے ٹکاویں بھٹک۔ کوئی شے وی اوس ویلے Mobility وچ رکاوٹ نہیں بنی۔ (دیکھو ضابطہ نمبر ۵ حرکیت)

(۴) اسلامی لشکر نے اوس چشمے تے جا کے فوری طور تے اک حوض تعمیر کیتا تاں جے ویلے دے ویلے پانی دی تھوڑ محسوس نہ ہووے تے جدوں وی لوڑ پوے وافر پانی پین نوں ملدا رہوے۔ ایس چشمے تے قبضے توں بعد اک اُچی تے اجہی تھاں تے کمانڈ ہیڈ کوارٹر تعمیر کیتا جتھوں میدان جنگ پوری طرحاں نظر آؤندا سی۔ جناب ابو بکر صدیق ڈپٹی چیف دی حیثیت نال اوس ہیڈ کوارٹر وچ رسول خدا دے نال رہے۔ جناب سعد بن معاذ اسلامی تواریخ دے ایس پہلے کمانڈ ہیڈ کوارٹر دے چیف سیکورٹی آفیسر بنے۔ کچھ نکلڑے اونٹ سواری لئی ہیڈ کوارٹر دے باہر تیار رکھے گئے، تاں جے ہار دی صورت وچ!

!الرحیق المختوم از صفی الرحمن الرحمان مبارک پوری، صفحہ: ۲۸۹

رسول خدا نوں مدینے پرتن وچ کوئی مسئلہ نہ ہووے۔ ہیڈ کوارٹر دے باہر چیف سیکورٹی آفیسر جناب سعد بن معاذ آپوں تلوار لے کے پہرہ دے بندے رہے 1 (دیکھو ضابطہ نمبر ۹ انصرام) مزے دی گل ایہہ ہے کہ ایہ انصرام اوس بندے ولوں کیتا جا رہیا سی جس نوں رب دی ذات تے کامل بھروسہ سی تے جیہدی سلامتی لئی پوری کائنات دُعاواں منکدی رہندی اے تے رب آپ وی اوس تے درود و سلام بھیجا رہندا اے۔

چیتے رہوے کہ جیس کمانڈ ہیڈ کوارٹر دا پچھے ذکر ہو یا اے اوس نوں اوہدوں وی تے ہن وی مقامی زبان وچ العریش آکھیا جاندا اے۔ عریش دا معنی اے چھیریاں سا بنان۔ آج اوس تھاں تے اک مسیت بنی ہوئی اے جس نوں اوسے عریش دے حوالے نال مسجد العریش دے نام نال یاد کیتا جاندا اے۔

(۵) اوہناں دناں دیاں جنگاں وچ زرہ، کبوتر، لوہے دا ٹوپ، پگڑیاں تے ایس طرحاں دیاں دُجیاں حفاظتی تدبیراں دی وجہ توں یاں مٹی گھٹے یاں لہو دے مونہاں تے لگ جان پاروں یاں دریڈے ہون دی وجہ توں بعض ویلے اپنے بندیاں دی پچھان اوکھی ہو جاندی سی۔ ایس مشکل توں بچن لئی حربی تواریخ وچ پہلی وار کلمہ تعارف (Code word) دی تکنیک اپنائی گئی۔ ایہہ کوڈ ورڈ ”اُخَد“ سی۔ ایوں مجاہدین اسلام بڑی آسانی نال اک دُجے نوں پچھانن وچ کامیاب ہو جاندا سن۔ 2

(۶) مسلماناں نوں قیادت موحده (ساری فوج دا اک ای سالار) نصیب سی جدوں کہ ملی لشکر دے کئی چوہدری سن۔ ایوں ملی لشکر بد نظمی تے بے ترتیبی دا شکار سی پر مدنی لشکر وچ کمال دا نظم و ضبط سی۔ مسلم مجاہدین دی اگلی صف وچ تلوار بند تے نیزہ بردار تے پچھلی صف وچ تیر انداز متعین سن۔ چھوٹے دستیاں (platoons) دے کماندار مقرر کیتے گئے سن تے اوہناں نوں مرکزی لشکر (Main army) توں ترجمہی ترتیب نال پچھلی جانب جھکاؤ دتا گیا سی تاں جے ملی لشکر دے سوارہ (cavry) دا حملہ آسانی نال روکیا جاسکے۔ جنوب ول وادی بدر دے کجے کنڈے دے نال نال جیہڑا رستہ پچھے نوں جاندا سی اوہدے تے وی اک پلاٹون کھلاری گئی تاں جے دشمن پچھوں حملہ آور نہ ہو سکے تے نہ ای پچھلے بنھے اوٹھاں تے حملہ کر سکے۔ (دیکھو ضابطہ نمبر ۳)

اسلامی لشکر مشرکاں دے مقابلے تے اُچپائی تے سی تے نالے اوہناں اجہی تھاں تے صف بندی کیتی سی کہ سورج اوہناں دی کنڈ تے سی۔ ہن جدوں ملی لشکر اگے ودھن دی کوشش کر داسی تے سورج اوہناں دے بالکل سامنے ہوندا سی۔ جیش اسلامی نے ڈیرالاندیاں ایس گل نوں وی سامنے رکھیا سی کہ جے کدرے مینہ پے جاوے تے اوس جنگ وچ کوئی

نقصان نہ ہووے۔ فیر ایہی ہوئی، اوس رات واہوا بارش ہوئی۔ جہدا فیدہ مسلماناں نوں تے ایہہ ہوئیا کہ اوہناں دے پیراں تھلے دی ریت دَب گئی پر مشرکاں دے لشکر وچ، جس پاسے مٹی سی، چیکٹر بن گیا 3 ایوں اوہ تلک تلک کے ڈگدے رے۔

ایہہ حکمت عملی حربی سیانف تے نظم و ضبط دی بہترین مثال اے۔
(۶) سپہ سالار اعظم نے صف بندی کرن توں بعد، جہدی کہ پہلے عرب وچ کوئی مثال نہیں ملدی، اپنے لشکرنوں

! سب الہدی جلد چہارم صفحہ: ۴۹

@ آنحضرت بحیثیت سپہ سالار از محمود خطاب صفحہ: ۱۵۵

مقالہ غزوات نبی از بریگیڈر گلزار احمد۔

ہدایت دی کہ کوئی بندا اوہنی دیر تیکر اگے ودھ کے حملہ نہیں کرے گا، جدوں تک میں اجازت نہ دے دیواں یاں جدوں تیکر دشمن پوری طرحاں زد وچ نہ آجائے۔ فیر ایوں ای ہوئی۔ جدوں دشمن مبارزت 1 توں بعد پوری طرحاں زد وچ آ گیا تے فیر جارحانہ کاروائی نال اوہدا حشر نشر کر دتا گیا۔ (ویکھو ضابطہ نمبر ۲ جارحانہ ایکشن)

ہن اک پاسے تے طاقت دے نشے وچ بد مست تے متکبر قریشی سردار مسلم تلواراں نوں ہمیش لئی توڑ دین دے ارادے نال تیار بیٹھے نہیں تے دُجے پاسے رب دا محبوب بند اصفاء درست کرن توں بعد اپنے ہیڈ کوارٹر (عریش) وچ آ بیٹھدا اے تے رب نوں آکھدا اے، رہا! میں اپنے کرن والے کم پورے کر لے نیں، جو میرے وس وچ سی میں کر بیٹھا ہاں۔ ہن اپنے بندے دے اُٹھے ہوئے ہتھان تے کر دے اتھرواں دی لاج رکھ لے۔ اللہ! تئیں میرے نال کجھ وعدہ کیتا اے، اللہ! آج اوہ وعدہ پورا فرما دے۔ اللہ! میں تیرے اگے تیرے عہد تے تیرے وعدے دا سوالی ہاں، اوس نوں پورا کر دے۔ آپ دُعا فرما رے سن:

{اللَّهُمَّ أَنْجِزْ لِي مَا وَعَدْتَنِي، اللَّهُمَّ أَنْشُرْكَ عَنْكَ وَوَعْدَكَ} 2

اڑیل تے جاہل مشرک دا پہلا قتل:

مشرکاں نوں ایس گل دا پتا لگ گیا سی کہ سپہ سالار اعظم نے اپنی منصوبہ بندی وچ ایہہ کم دی کیتا اے کہ چشمیاں تے قبضہ کر لیا اے تے جیہڑا چشمہ مسلماناں دے بالکل نیڑے ہے اوس تے اوہناں نے اک حوض وی بنا کے راتوں رات بھر لیا اے۔

آج ۱۷ رمضان اے تے جنگ دا مڈھ بجن لگا اے۔ دوویں فوجاں آمنے سامنے تیار کھلوتیاں نیں۔..... جیش خدا پورے نظم و ضبط نال کھلوتا سپہ سالار اعظم دے حکم دا ایڈکن ہار اے..... پلٹوناں آپو اپنی تھاں تے کھلوتیاں نیں۔ جیہڑی پلٹون حوض دی سکیورٹی تے متعین اے اوس دے کماندار حضور دے چاچا حمزہ نیں۔ حمزہ چنگے تگڑے جوان نیں تے مکئی وچ پہلوانی وی کردے رے نیں۔ مشرکاں ولوں اک بیوقوف تے اڑیل جیا بند اسود بن عبدالاسد مخزومی جنگ شروع ہون توں پہلاں ای اگے ودھ رہیا اے۔ تلوار ہوا وچ لہرا رہیا اے تے بک بک کری آؤندا اے۔ اوہ آکھ رہیا اے کہ میں اللہ نال

اقرار کر دیا ہاں کہ میں ایس حوض داپانی پی کے رہواں گا، نہیں تے فیر کوئی وی نہیں پیوے گا۔ تے جے پانی نہ پی سکاں گاتے فیر اوتھے ای مراں گا۔..... ہن اوہ حوض دے نیڑے آ گیا اے۔ حضرت حمزہ اگے ودھے نیں تے رکھ کے تلوار مار دے نیں۔ اوس دی اک لت تے دُجا پیر سنے ادھی پنڈلی دے تر وانگ لے کے دُور جا پیا اے۔ حمزہ خیال کر رہے نیں کہ خورے ہن او پچھاں بھج جاوے گا پر جاہل اُسود بن عبدالاسد دُگدا ٹھنڈا تے جُسے دالہو دگاندا اگے ای ودھ رہیا اے۔ ہن اوہ اپنے آپ نوں گھسیٹ کے حوض دے نیڑے لے گیا اے تاں جے پانی پی کے اپنی قسم پوری کر لوے۔ حمزہ اگے ودھ کے دُجا وار کر دے نیں تے ایوں ایہہ پہلا شکار جہنم چک جاندا اے۔

! تفصیل اگے آوے گی۔

@ الحقیق المختوم از صفی الرحمن مبارک پوری، صفحہ: ۲۹۵

مبارزت نال جنگ شروع ہوندى اے:

عرب دے رواج موجب قریش و لوں عتبہ بن ربیعہ، اوس دے بھرا شیبہ تے پتر ولید نے لشکر وچوں باہر آ کے لاکارا ماریا۔ ایس دا مطلب ایہہ ہوندا سی کہ تسیں وی ساڈے مقابلے وچ اپنے جوان کڈو۔ ایس طریقے نوں مبارزت آ کھدے سن۔ ایس چیلنج دے جواب وچ عوف بن حارث، اوہناں دے بھرا معوذ بن حارث تے عبداللہ بن رواحہ باہر نکلدے نیں۔ ایہہ تے مجاہد مدینے دے رہن والے (انصار) سن، ایس لئی مکے والے اوہناں نوں نہیں پچھاندے سن۔ عتبہ نے مجاہداں نوں پچھیا کہ تسیں کون جے۔

”اسیں آں انصار مدینہ عوف، معوذ تے عبداللہ۔“ مجاہداں جواب دتا۔

”تہاڈے نال تے ساڈا لڑنا نہیں بن دا۔“ عتبہ نے آکھیا

”اے محمد! ساڈی قوم دے، تے ساڈے ورگے بندے ساڈے مقابلے تے کڈ۔ اسیں واہی واناں نال لڑن لئی نہیں آئے، کسے نے واج لائی۔ ایہہ سن کے آپ نے جتناں مجاہداں نوں واپس سد لیا تے حضرت علی، حضرت حمزہ تے حضرت عبیدہ بن حارث نوں مقابلے وچ آؤن دا حکم دتا۔

”ہن سواد ہو یا نا۔“ عتبہ نے آکھیا۔

ایس توں بعد حضرت حمزہ نے شیبہ نال، حضرت علی نے ولید نال تے حضرت عبیدہ نے عتبہ بن ربیعہ نال مقابلہ کیتا۔ حضرت حمزہ تے حضرت علی نے تے اپنے مقابل بندیاں نوں جھٹ وچ مار لیا پر حضرت عبیدہ تے عتبہ دا جوڑ پے گیا۔ مبارزت دے اصول پٹھ جدوں اک واری لہو نکل آؤندا سی تے فیر دُجا بند اوئی اپنے نال دے دی مدد کر سکدا سی۔ ایوں حضرت علی تے حضرت حمزہ اگے ودھے تے اوہناں نے حضرت عبیدہ دی مدد کر دیاں ہوئیاں عتبہ دا وی کم کر دتا۔ حضرت عبیدہ چو کھے پھڑ پھڑ ہو چکے سن تے اوہناں دا اک پیروی وڈھیا گیا سی۔ اوہناں نوں کوئی اچھی سٹ وی لگی سی کہ آپ دی آواز بند ہو گئی سی۔ حضرت علی جناب عبیدہ نوں اپنے موہڈیاں تے چک کے میدان جنگ توں باہر لیائے تے حضور دی خدمت وچ حاضر ہوئے۔ حضرت عبیدہ نے رسول خدا نوں پچھیا۔ ”اے نبی رحمت! کیہہ میں شہادت توں محروم ای رہواں گا۔“

”نہیں، تسلیں شہید ہی او“ سرکار نے جواب دتا۔

۲۱ ویں روزے جدوں مسلماناں دا فاتح لشکر واپس مدینے ول پرت رہیا سی، اوہدوں صفراء دی تھیاں تے جناب عبیدہ اپنے اصل مالک کول جاتے تے میری سرکار دی ایہہ گل پوری ہو گئی کہ عبیدہ ”تسلیں شہید ہی او۔“

مبارزت دا ایڈا بھیڑا انجام دیکھ کے کافر غصے تے غضب نال پاگل جے ہو گئے۔ عتبہ، شیبہ تے ولید جے در ایچھے بندیاں دی ہار تے موت کوئی کئی جی گل نہیں سی۔ کافراں نے ایہہ دیکھ کے حبش رسول تے زوردار حملہ کیتا تے مسلماناں نے چوکی کامیابی نال اپنا دفاع دی کیتا۔ فیر کافراں نے تاثر توڑ حملہ کیتا۔ مسلمان دفاعی جنگ لڑ دے رے کیوں جے رسول خدا نے ایہہ حکم دتا ہو یا سی کہ میرے آکھن توں بغیر اگے نہیں ودھنا۔ کافر مسلماناں دی دفاعی جنگ دی ایس حکمت عملی نوں کمزوری سمجھ دے رے تے اُتے چڑھ چڑھ کے حملہ کر دے رے۔ فیر گھمسان پے گیا تے لڑائی اپنے جوبن تے آ گئی۔

حبش رسول اللہ مقابلہ کر رہیا سی تے سپہ سالار اپنے ہیڈ کوارٹر وچ بیٹھا اپنے مالک نال گلاں کر رہیا سی۔ مالکا! ایہہ فوج کوئی میری تے نہیں نا، ایہہ تے تیری فوج اے۔ تیرے ایہناں غازیوں دا کوئی مفاد نہیں، ایہناں نوں کوئی لالچ نہیں، ایہناں دا کوئی مقصد نہیں۔ جے ہے تے نرا ایہہ ہے کہ تیرے نام نوں بلند رکھن، اے اللہ! اے جی و قیوم، ایہناں نوں برباد ہون توں بچالے۔ آپ دی ایہہ التجا تے توارخ وچ ہمیش لئی محفوظ ہو گئی اے:

{اللَّهُمَّ إِنْ تَهْلِكْ هَذِهِ الْعَصَابَةُ الْيَوْمَ لَا تُعْبَدُ، اللَّهُمَّ إِنْ شَعَنْتَ لَمْ تُعْبَدْ بَعْدَ الْيَوْمِ أَبَدًا}

”اے اللہ! جے اج ایہہ گروہ ماریا گیا تے فیر تیری عبادت کسے نہیں کرنی۔ اے اللہ جے تو چاہویں تے فیر اج توں بعد کدے وی تیری عبادت نہ ہووے۔“

محبوب خدا دُعاواں کر دے جارے سن۔ اپنے رب اگے روڑے سن۔ اوس اگے پکاراں پا رے سن کہ ربا! ساناں بچالے، ربا! اپنے نام دی لالچ رکھ لے جسدا روز ایہہ بندے ورد کر دے نیں۔ ربا! جے ایہہ نہ رے تے فیر کون ہووے گا جیہڑا تیرا نام لوے گا۔ ایس حال وچ چادر موہڈیاں توں ڈگ ڈگ پیندی سی۔ حضرت ابو بکر صدیق چادر پھڑ پھڑ کے موہڈیاں تے رکھ دے تے آکھدے ”یا رسول اللہ! بس کرو۔ تسلیں اپنے رب اگے تھیری پکار پالئی اے۔ اوہ ضرور تہاڈی سنے گا۔“

رب نے اپنے محبوب بندے دی فریاد سن لئی سی۔ خوشخبری نازل ہوئی:

{أَنِّي مُمِدُّكُمْ بِالْفِ مِنَ الْمَلَائِكَةِ مُزْدِفِينَ} (الانفال: ۹)

”میں اک ہزار فرشتیاں نال تہاڈی مدد کراں گا۔ جیہڑے اکثر پچھڑاؤن گے۔“

کچھ ای دیر پچھوں آپ نے حضرت ابو بکر نوں خوشخبری سنائی کہ ابو بکر! خوش ہو جاؤ۔ جبرائیل آگئے نیں، مٹی گھٹے نال بھرے ہوئے۔ نال ای آپ کمانڈ ہیڈ کوارٹر توں باہر آئے۔ آپ نے زرہ پہنی ہوئی سی تے بڑے جوش نال اگے ودھ رے سن تے فرما رے سن:

{سَيُهْزَمُ الْجَمْعُ وَيُوَلُّونَ الدُّبُرَ} (القمر: ۴۵)

”چھیتی ای ایہہ جتھا بار جاوے گا تے کنڈ پھیر کے دوڑے گا۔“

فیر آپ نے کنکریاں تے مٹی دی اک مُٹھ بھر کے قریش ول وگاٹی۔ مشرکاں وچوں کوئی اک وی اجہیا نہیں سی بچیا
جہدیاں اکھاں، نک یا مونہہ وچ کجھ نہ کجھ نہ پیا ہووے ۱ رب آکھدا اے:

{وَمَا زَمِينَتْ اِذْ زَمَيْتَ وَلَكِنَّ اللَّهَ زَمَى} (الانفال: ۱۷)

”جدوں تساں (مٹی) سٹی سی تے اوہ اصل وچ تساں نہیں سگوں اللہ نے سٹی سی۔“

ناگہانی حملہ:

دُشمن تے جدوں ناگہانی وار ہوندا اے، اودوں اس دی فورس غیر منظم تے غیر مرتکز ہو جاندی اے تے ایوں اپنی حربی
طاقت دا چوکھا حصہ گنوا بیٹھدا اے۔ ایس نال اُس دا مورال ڈگ پیندا اے جس نال اس دا نقصان ہووے چوکھا ہو جاند اے۔

!الرتیق المختوم، صفحہ: ۲۹۷

ایہہ ناگہانیت عسکری منصوبہ سازی دا اک چوکھا اہم حصہ اے۔ دُجی عالمی جنگ وچ جدوں جرمنی نے فرانس اُتے حملہ
کیتا تے پہلوں اپنی فضائیہ نوں استعمال کر کے اندھا دھند بمباری کیتی۔ ایس دے نال ای توپ خانہ اہے واہ گولہ باری کر
دار ہیا۔ ایہدے نال جرمن ٹینک ڈویژن پیش قدمی کر دار ہیا۔ فرانس تے اک دا ایہہ عذاب ایڈی چھیتی نال نازل ہو
یا کہ فرانسیسی فوجاں حیران رہ گئیاں۔ جنے چر وچ فرانس نے اپنے آپ نوں سنبھالنا سی، جرمن فوجاں پیرس وچ وڑ
گئیاں۔ اتحادیاں دا خیال سی کہ فرانس وچ اوہناں دے دفاعی مورچے ایڈے پکے تے پیڈے نیں کہ اوہ تھے جرمن فوج
نوں بڑی آسانی نال ڈکيا جاسکے گا پر جرمنان نے شمال ولوں ببیلجیم دے رستے اچن چیت اجہیا حملہ کیتا کہ فرانسیسی
حیران رہ گئے۔

ایوں جدوں سپہ سالار اعظم نے جنگ دی ترغیب دیندیاں ہوئیاں شُد و شُد و (چڑھ دوڑو) دیاں واجاں لاندیاں
اچن چیت جارحانہ حملے دا حکم دتا تے دُشمن حیران رہ گیا۔ کلی لشکرنوں سمجھ نہیں سی آرہی کہ اوہناں نال کیہہ ہو گئی اے۔ تھلے
چیکو دی تلکتن، سامنے اکھاں وچ سورج دیاں لائٹاں، اُتوں مجاہداں دے اک جتھے ولوں روٹیاں وٹیاں دا مینہ تے سبے
کھبویں و سدا تیراں نے کافراں دی مَت مار کے رکھ دتی۔ حبیب خدا اے تیکر جیش خدا نوں اگے ودھن، تے زوردار
حملے دی ترغیب دے رے سن تے آکھ رے سن کہ مجاہدو! چڑھ دوڑو۔ اوں جنت ول ودھو جہدا کھلار آسماناں تے زمین دے
برابر اے۔

کفر و شرک تے واحد نیت دے پر چارکاں دے ایس پہلے تے فیصلہ کن معرکے وچ بڑے بڑے عجیب منظر ویکھن
وچ آئے، جناں وچوں اسیں کچھ دا ذکر کر دے ہاں: جنہاں اسلامی لشکروں لوں ایہہ زوردار حملہ مقصدیت، ناگہانیت تے
باہمی تعاون دی چوکھی چنگی تے تگڑی مثال اے۔ اسلامی لشکر چوکھے جوش تے جذبے نال کافراں دے وچ گھس کے حربی
تواریخ دا اک نواں باب لکھ رہیا سی۔ اک پاسے لوہے دے وچ ڈبے گھوڑیاں تے چڑھے تے جدید اسلحہ سجائے ۹۵۰

جنگجو تے دُجے پاسے ۳۱۲ نہتے جے بندے پر رب سوہنے نے آسماناں توں اپنیاں فوجاں گھل کے طاقت دے گھمنڈ نال اتھرے ہوئے بندیاں تے جہالت نوں سیانف دا نام دین والے نام نہاد سیانیاں نوں ہمیش لئی سبق سکھا دتا۔ ایوں مشرک ۷۰ لاشاں تے ۷۰ ہی قیدی میدان بدروچ چھڈ کے مکے ول دڑکی لان تے مجبور ہو گیا۔ نور فرماؤ:

(۱) جدوں سپہ سالار اعظم زور دار حملے دی ترغیب دے رے سن۔ اوہدوں ایہہ وی آکھ رے سن کہ ”ودھو، جنت ول ودھو، جیڑی بوہت کھلی ڈلھی اے“ اک صحابی عمیر بن حمام نے ایہہ گل سنی تے مونہہ توں نکلیا ”بہت اچھے، بہت اچھے۔“

”ایہہ توں کیہہ آکھ رہیا ایں؟“ رسول خدا نے پچھیا۔

”کوئی خاص گل نہیں اے اللہ دے رسول۔ میں سوچ رہیا ہاں کہ خورے میں وی جنت والیاں وچ شامل ہاں“ جناب عمیر نے جواب دتا۔

”ہاں، تسلیں وی جنت والیاں وچوں جے“ حضور نے بشارت دتی۔

ایہہ سن کے جناب عمیر نے اپنے سامان وچوں کچھ کھجوراں کڈیاں تے کھان لگ پے۔ فیراچن چیت آکھن لگے کہ جے ایہہ کھجوراں کھان تیکر میں جیوندرا رہیا تے ایوں خواخواہ ایہہ دنیا دی حیاتی لمی کرن والی گل ہے نا۔ آپ او سے ویلے اُٹھے، کھجوراں پراں وگائیاں تے کافراں دے لشکر تے ٹٹ پے۔ فیر عمیر پشاں نہیں پر تے تے ایوں لڑ دے لڑ دے اک نہ مکن والی اجہی حیاتی پا گئے جس بارے رب آکھدا اے کہ بندیاں نوں اوس داشعور نہیں۔

(۲) جناب عوف بن حارث نے، جہیڑے ابو جہل نوں جہنم واصل کرن والے معاذ دے بھرا سن، جناب رسول اللہ نوں پچھیا کہ اے اللہ دے رسول! جنگ وچ رب اپنے بندے دی کیہڑی گل توں چوکھا راضی ہوندا اے۔ آپ نے فرمایا کہ عوف! بندے دے جتے تے کوئی زرہ بکتر، کچھ نہ ہووے پراوہ فیر وی دشمن خدا ول اپنا ہتھ ودھا دیوے، ایس گل تے رب بڑا خوش ہوندا اے۔

ایہہ سن کے عوف نے اپنے پنڈے توں زرہ لاہ کے سٹ دتی تے دشمن تے رب دا قہر بن کے نازل ہو گئے۔ عوف وی جناب عمیر وانگ لڑ دے لڑ دے شہید ہو گئے۔

(۳) ایس توں پہلاں جدوں رسول خدا مجاہدین دی صف بندی فرما رے سن تے جناب سواد بن غزیہ نوں ہتھ نال اشارہ کیتا کہ تسلیں ذرا پچھے ہو کے کھلوؤ۔ اشارا کر دیاں ہتھ وچ پھڑے ہوئے تیر دا سرا سواد دے پیٹ نال جا لگا۔ سواد آکھن لگے کہ ایہہ میرے لئی تکلیف دا سبب بنیا اے تے اے رسول خدا، تہانوں تے رب نے انصاف لئی گھلایا اے۔ میں وی ایس دا بدلہ لینا اے۔ میدان جنگ وچ کسے سپاہی دی کمانڈر انچیف اگے ایہہ جسارت بڑی نویکی گل سی۔ پر اوس منصف اعظم نے جھٹ نہ لایا۔ آپ نے اپنی زرہ کھولی، چگا اگوں چک دتا تے اپنا شکم اقدس سواد ول کر دیاں آکھیا ”إِسْتَفْتِ“ (لے بدلہ لے لے) اُسود بڑے ادب نال اگے ودھے تے بطن مبارک دا بوسہ لے لیا۔

”سواد! ایہہ کیہہ؟“ جناب رسول اللہ نے پچھیا تے سواد نے جواب دتا کہ ”اے اللہ دے رسول! حالات تہاڈے سامنے نیں۔ میں ایس موقعے نوں غنیمت جان دیاں فوراً ایہہ فیصلہ کیتا سی کہ ایس دنیا توں رخصت ہون توں پہلاں میری

جلد تہاڑی جلد نال مس ہو جائے۔“ قربان جائیے اوس شمع رسالت دے تے اوس دے پروانیاں دے وی۔ جنگ دا میدان نظر آرہیا اے، بندے گجر مولی وانگ کپے جارے نیں۔ خاش وی ایہہ ہے کہ شہید ہواں جاواں تے چنگا اے پر اوس ویلے نہ سوانی دی یاد آئی اے نہ بال بچے دی فکر نے ستایا اے تے نہ کوئی ہور خاش بے چین کر رہی اے۔ انخیری خاش ایہہ ہی کیتی اے کہ اوس جسد اطہر دے نال میراجسا لگ جاوے۔ بس ہور کچھ نہیں چاہیدا۔

۴۔ میدان جنگ وچ اک تھان تے جناب عبدالرحمن بن عوف سرکار دے حکم موجب دشمن تے تاک لائی کھلوتے سن تے اوتھے اچن چیت آپ دے سچے کھبے دو منڈے آن کھلوتے۔ جنگ دی افراتفری تے دشمن دے حملے دے خوف پاروں جناب عبدالرحمن اک واری تے یکدم پریشان ہو گئے۔ پرفیر جدوں اوہناں ول دھیان نال ویکھیا تے پتالگا کہ اوہ تے اپنے امی منڈے نیں۔ ”چا چاجی! ابو جہل کتھے وے“ اوہناں وچوں اک نے پچھیا۔

جناب عبدالرحمان نے جدوں ایہہ گل سنائی سی تے اوہناں اوس ویلے دی اپنی کیفیت تے نہیں سی دسی پراسیں اوس دا اندازا کر سکدے ہاں۔ چودہ پندرہ ورہیاں دے دو بال، قہر تے غضب دے بھرے ہوئے متکبر لشکر دے اچھے کمانڈر انجیف نوں لہجہ پھر رے نیں جیہڑا لوہے وچ ڈبیا ہو یا اے، جس دے آل دوالے زبردست سکیورٹی اے تے اس سکیورٹی فورس دا چیف اوہداسب توں بھروسے والا کماندار تے سگا پتر عکرمہ اے۔ اوس دے نیڑے کوئی فرشتہ ای جاسکدا اے، اوس دا دشمن تے نہیں۔ جہالت دا سردار وی ایہہ سوچ رہیا ہوئے گا کہ اوہدے ول جس وی ودھنا اے، اپنی موت نوں واج دینی اے۔ خورے ایہی گل اے کہ اچھے تیکر اوس دی آکڑ وچ کوئی فرق نہیں آیا۔ عبدالرحمن آکھدے نیں جدوں منڈے نے مینوں پچھیا کہ ابو جہل کتھے وے تے میں اوس نوں آکھیا۔

”پتر: توں اوس نوں کیہہ آکھنا اے؟“

”چا چاجی! میں سنیا اے اوہ محبوب خدا نوں گالاں کڈ دا اے۔“

”گل تے ایوں ای اے“ میں آکھیا

”تے فیر میں رب نال ایہہ کارا کیتا اے کہ یاں تے اوس نوں ماردیاں گایاں آپوں لڑدا لڑدا امر جاواں گا“ اوس نے جواب دتا۔ ”ہن دسو چا چاجی! ایس سامنے والے جتھے وچ ابو جہل کیہڑا اے؟ میرا وی رب نال ایہی وعدہ اے“ دُجا منڈا بولیا۔ ”اچھا بئی جہدے آل دوالے بندیاں نے ایہہ وگن جیٹی ولی اے، اوہ جے ابو جہل۔“

”اوہدروں میرے منہ وچوں ایہہ گل نکلی تے اوہدروں اوہ دونوں منڈے باز وانگ اڈ کے ابو جہل کول جا پڑے تے اوہ میرے ویکھدیاں ای ویکھدیاں زمین تے مدڑے منہ پٹیا سی۔ اوہنے چروچ ابو جہل دے پتر عکرمہ نے پچھوں اک منڈے دے کھبے موہڈے تے تلوار ماری تے ایس وار نال اوس دی بانہہ ادھیوں چوکی لہہ کے موہڈے دے نال لمکن لگ پئی۔ مجاہد منڈا اوویں ای لڑدار ہیا تے اپنا بچا کردار ہیا۔ فیر اوس ویکھیا کہ کھبی بانہہ لڑائی وچ رکاوٹ بن رہی اے تے اوس نے وڈھیا تے لمکدا ہو یا ہتھ اپنے پیر تھلے دے کے تسمہ نالوں لاہ دتا۔

تواریخ دسدی اے کہ اوہ دوویں ننھے مجاہد سکے بھراسن تے اوہناں دے نام معوذتے معاذ سن۔ اوہناں دے والد

دانا نام حارث سی تے اوہناں دی والدہ اسلام نال چوکی محبت پاروں مدینے دی مشہور سوانی سن جنہاں دانا نام عفرائی سی۔ جس بھرا دے وار نال ابو جہل مرن والا ہوئیا اوس دانا نام معاذ سی تے اوسے دی ہی بعد وچ بانہہ وڈھی گئی۔ معاذ ایس زخم دے باوجود بچ گئے پر معوذ جنگ وچ شہید ہو گئے۔

قتل جہل دے باپ وچ ایہہ گل دسنا وی ضروری جا پدی اے کہ ابو جہل ایہناں نو جوان مجاہداں دے ہتھوں ای جہنم نہیں سی بچ گیا سگوں ہوئیا ایہہ کہ جدوں بدر دامر کہ ختم ہوئیا تے سپہ سالار اعظم نے واج دے کے پچھیا کہ کیہڑا بندہ اے جیہڑا ایہہ پتہ کر کے دے کہ ابو جہل دا انجام کیہہ ہوئیا اے۔ جناب رسول خدا دی ایہہ خاہش جان کے کئی صحابی ابو جہل دی لاش لھن لئی ٹر پے۔ حضرت عبداللہ بن مسعود نے اوس نوں لہ لیا۔ اوس دا اک پیر وڈھیا گیا ہوئیا سی تے چوکھا لہو وگ جان پاروں، تے نالے دُجیاں سٹاں پاروں اوہ ہلن جلن جوگا نہیں سی پر اچے اوس داساہ چل رہیا سی۔ جناب عبداللہ نے اوس دی دھون تے پیر رکھیا تے سرو ڈھن لئی اوس دی داڑھی پھڑائی۔ آپ نے آکھیا:

اوللہ دیا ویریا! اخیر اللہ نے تینوں رسوا کیتا اے نا؟

”مینوں کوں رسوا کیتا اے؟ میرے ورگا تہاڈے وچ کیہڑا اے؟ پر رونا ایس گل دا ہے کہ مینوں واہی واناں دی بجائے کسے ہور (مگڑے بندے) نے قتل کیتا ہوندا۔“

ایس طنز توں بعد ابو جہل فیر بولیا تے پچھیا کہ آج فتح کس دی ہوئی اے؟

”اللہ تے اوس دے رسول دی“ جناب عبداللہ نے جواب دتا۔

فیروی اوس متکبر تے بے وقوف کی سردار دی آکثر نہ گئی۔ اپنی دھون اُتے جناب ابن مسعود دے پیر ول اشارہ کر کے آکھدا اے:

”اوائے بکریاں دیا آجڑیا! توں آج چوکی اُچی تے اوکی تھان تے جا چڑھیا ایں“ ایس توں بعد ہور کوئی مکالمہ نہیں ہوئیا۔ جناب عبداللہ نے اوس داسرو ڈھ لیا تے جا کے رسول خدا دی خدمت وچ حاضر کیتا تے آکھیا ”یا رسول اللہ! ایہہ ہے اللہ دے دشمن ابو جہل داسر“ اوس طاغوت اکبر دے سرنوں اپنے پیراں وچ ویکھ کے آپ نے تن بار فرمایا: ”واقعی! اوس خدا دی قسم اے جہدے سوا کوئی معبود نہیں“ تے فیر فرمایا:

{اللہ اکبر، الْحَمْدُ لِلّٰہِ الَّذِیْ صَدَقَ وَعْدُهُ وَنَصَرَ عَبْدَهُ وَهَزَمَ الْاَحْزَابَ وَخَدَهُ}

”اللہ اکبر، ساری تعریف اوس خدا لئی اے جس نے اپنا وعدہ سچا کر دکھایا، اپنے بندے دی مدد کیتی تے اک

اکلے نے سارے ٹولیاں نوں ہرا دتا۔“

فیر آپ نے ابو جہل دی لاش ویکھن دی خاہش ظاہر فرمائی۔ صحابہ کرام آپ نوں جہالت دی لاش تیکر لے گئے۔ آپ

نے اوس ول اشارہ کر کے فرمایا کہ ایہہ ایس اُمت دافرعون سی۔ 2

۵۔ جنگ وچ لڑدیاں ہوئیاں حضرت عکاشہ بن محسن دی تلوار ٹٹ گئی۔ عکاشہ رسول خدا دی خدمت وچ حاضر ہوئے تے آپ نے اوہناں نوں لکڑی دا اک پھٹا پھڑا دتا تے فرمایا: ”عکاشہ! ایس نال لڑائی کرو“ جناب عکاشہ نے جدوں اوس

پھٹے نون پھڑ کے ہلایا تے اوہ اک لمی، مضبوط تے چم چم کردی ہوئی چٹی تلوار بن گیا۔ 3۔
 فیر حضرت عکاشہ نے او سے تلوار نال لڑائی کیتی۔ اوں تلوار دا نام عون یعنی مدد رکھیا گیا۔ اوہ تلوار فیر حضرت عکاشہ کول
 ای ری تے او سے تلوار نال ای اوہ لڑائیاں لڑ دے رے۔ ایہوں تیکر کہ دور صدیق وچ مرتداں دے خلاف جنگ کردے
 ہوئے شہید ہو گئے۔ جناب عکاشہ نے اخیر جگ وی او سے تلوار نال لڑی۔

۶۔ جنگ ختم ہون توں بعد حضرت مصعب بن عمیر عبدری نے ویکھیا کہ اوہناں دے بھرا ابو عزیز بن عمیر عبدری، جنے
 کافراں ولوں مسلماناں دے خلاف جنگ لڑی سی، دے اک انصاری صحابی ہتھ بندھ رے سن۔ ایہہ ویکھ کے
 حضرت مصعب نے اپنے انصاری مسلمان بھرانوں آکھیا کہ ”ایس دی ماں بڑی مالدار اے، اوہ تہانوں چوکھاندیہ
 دیوے گی، ہتھ پیڑا کر کے پالوؤ“ ایہہ سن کے جناب مصعب دے جنگی قیدی بھرانے آکھیا کہ ”ایہہ گل آکھنی سی
 توں میرے ولوں؟“ جناب مصعب نے جواب دتا:

”آہو، ہن توں نہیں سگوں تینوں قیدی بنان والا ایہہ انصاری مسلمان ای میرا بھرا اے۔“

۷۔ ایس جنگ وچ قتل ہون والے مشرکاں دیاں لاشاں نوں جدوں اک پرانے انبے کھوہ وچ سٹیا جا رہیا سی، اوہدوں
 ! جناب عبداللہ ہجرت توں پہلاں مکئی وچ لوکاں دیاں بکریاں چراندے ہوندے سن۔

@ الر حیق الختوم از صفی الرحمن مبارک پوری، صفحہ: ۳۰۲ # الر حیق الختوم از صفی الرحمن مبارک پوری، صفحہ: ۲۰۵

حضرت ابو حذیفہ وی او تھے موجود سن۔ جدوں آپ دے والد غتبہ نوں کھوہ وچ سٹیا گیا تے نبی اکرمؐ نے جناب ابو حذیفہ
 دے چہرے تے نظر ماری تے اوہناں نوں پریشان ویکھیا۔ آپؐ نے فرمایا: ”ابو حذیفہ! اپنے والد بارے تہاڈے
 دل وچ کوئی گل اے“ جواب وچ جناب ابو حذیفہ نے عرض کیتی:

”واللہ، یا رسول اللہ! باپ دے قتل ولوں تے میں پریشان نہیں پر ایہہ گل ضرور اے کہ میں اوں دی سیانف تے دور
 اندیشی دی وجہ توں ایہہ آس لائی بیٹھا ساں کہ اوہ اسلام ول راغب ہو جان گے پر کفر تے اوں دا خاتمہ ویکھ کے میں
 پریشان ہو گیا ہاں۔“ ایہہ سن کے جناب رسول خداؐ نے حق اندر کوئی دُعا کیتی۔

۸۔ حضرت بلال حبشی دے غلامی دے دناں وچ اک مکی شیطان امیہ بن خلف جناب بلال تے تشدد کر کے تے اوہناں
 نوں ستا ستا کے بڑا اسود لئیدا ہوندا سی۔ اوں دا پتر علی تے اوں توں وی دو ہتھ اگے سی۔ اوہ سیدنا بلال نوں گھوڑی بنا
 لئیدا، چھال مار کے اُتے چڑھ جاندا تے فیر کدے جتا چھل دین والیاں کنکریاں تے، کدے جتا ساڑ دین والی
 ریت اُتے ارکاں تے گوڈیاں بھارنسن تے مجبور کر دا۔ جدوں جناب بلال کولوں نہیں نسیا جاندا سی تے کنڈ تے بیٹھا
 آپ دے ٹڈ وچ دوواں پاسے اوویں اڈیاں مار داسی جویں گھوڑے نوں نسان لئی اوسدا سوار مار دا اے۔ جنگ بدر
 وچ اوہ دوویں پیو پتر کی لشکر وچ شریک سن۔

حضرت عبدالرحمان بن عوف نے کسے وجہ توں مکئی وچ اُمیہ نال ایہہ عہد کیتا سی کہ جے کدی اوہ مدینے دے علاقے
 وچ آئی تے اوہ (عبدالرحمان) اوں دی جان دے ضامن ہون گے۔ بدر دا میدان دشمن خدا توں بدلہ لین دا چوکھا چنگا

موقعہ سی پر جناب عبدالرحمان ایہہ محسوس کر رہے سن کہ وعدے توڑنا محمد رسول اللہ دی تعلیم دا حصہ نہیں۔ ایس لئی اُمیہ نوں لے کے میدان جنگ توں کجھ دریدے پہاڑ ول چلے گئے۔ اُمیہ دا پتر وی اوہناں دے نال رل گیا۔ ہوئیا ایہہ کہ حضرت بلال نے اوہناں نوں فرار ہندیا ویکھ کے کھپ پا دتی۔ ایوں مجاہدین اسلام ٹٹ پے۔ جناب عبدالرحمان اُمیہ نوں بچاندے رے تے مسلماناں علی بن اُمیہ نوں قتل کر دتا۔ اوس توں بعد جدوں اوہ اُمیہ ول ودھے تے جناب عبدالرحمان اپنا عہد پورا کرن لئی اُمیہ نوں زمین تے لٹا کے اوس تے لے پے گئے۔ ایوں عبدالرحمان اپنا وعدہ پورا کرن دا جتن کر دے رے تے دُجے مسلمان رب نال کیئے اپنے وعدے لئی جتن کر دے رے۔ اخیر اُمیہ وی مارا گیا۔ حضرت عبدالرحمان دی وی اک لت زخمی ہوئی۔ زخم ایڈا ڈونگا سی کہ اوس دا نشان مدتوں تیکر ویکھیا جاندا رہیا۔

نرالی تے نویکلی جنگ:

بدر دی جنگ حربی تواریخ دی چوکی نرالی تے نویکلی جنگ اے۔ مسلمان اپنے خونی رشتیاں نوں بھل کے اک پکے تے نہ ٹٹن والے رشتے — اسلامی بھائی چارے نوں سامنے رکھ کے اپنیاں دے ای سامنے شمشیر بکف تے نیزہ بند سن۔ کیا عجیب منظر اے:

۱۔ اک پاسے سپہ سالار اعظم محمد رسول اللہ تے دُجے پاسے پیاری دھی رقیہ دا خاوند ابوالعاص۔

۲۔ اک پاسے عمر بن خطاب تے دُجے پاسے سکا ماما عاص بن ہشام۔

۳۔ اک پاسے ابوبکر صدیق تے دُجے پاسے صدیق اکبر دا پتر عبدالرحمان۔

۴۔ اک پاسے عاشق رسول جناب ابو حذیفہ تے دُجے پاسے ابو حذیفہ دا والد تے دشمن رسول عتبہ۔

۵۔ اک پاسے مصعب بن عمیر جیا مجاہد تے دُجے پاسے سکا بھرا ابو عزیٰ بن عمیر۔

۶۔ اک پاسے شیر خدا علی بن ابی طالب تے دُجے پاسے سکا بھرا عقیل بن ابی طالب۔

۷۔ اک پاسے جناب حمزہ (عم رسول) تے دُجے پاسے جناب عباس (عم رسول)۔

شہدائے بدر:

جویں کچھ ذکر ہوئیا اے قریش دے ستر جنگجو بدر دے معرکے وچ جہنم تکے سن جہناں وچ اوہناں دے چوٹی دے

سردار شیبہ، عتبہ، ابو جہل، ابوالختری، زمعہ بن اسود، عاص بن ہشام، اُمیہ بن خلف تے منبہ بن حجاج شامل سن۔ دُجے

پاسے مسلماناں وچوں صرف چودہ مجاہدین اسلام نوں شہادت نصیب ہوئی جہناں وچوں ۶ مہاجرین تے ۸ انصار سن۔

میدان بدر وچ جس نے سب توں پہلاں جام شہادت نوش کیتا اوہ مجمع سن جیہڑے سیدنا فاروق اعظم دے غلام

سن۔ آپ قریشی لشکر دے کسے تیر نال شہید ہوئے۔ اوس توں بعد حضرت حارث بن سراقہ نوں ایہہ سعادت نصیب ہوئی۔

آپ حوض تے پانی پی رہے سن تے کسے کافر نے نشانہ بنھ کے آپ دی گردن وچ تیر ماریا۔ باقی بارہ شہدائے بدر ایہہ سن:

عبیدہ بن حارث: آپ نبی رحمت دے چاچا زاد بھرا سن۔ بدر دے شہیداں دا مقام تے درجہ کیہہ اے ایس گل دا

اندازا ایبتوں ہندا اے کہ اک واری محبوب خدا نے کجھ صحابیاں نال صفراء دی تھاں تے قیام فرمایا۔ صحابیاں عرض کیتی یا رسول اللہ! ایس تھاں تے مشک دی خوشبو آؤندی اے۔ آپ نے فرمایا کہ ایہدے وچ حیران ہون والی کبھڑی گل اے، اتھے ابو معاویہ دی قبر اے۔ (ابو معاویہ حضرت عبیدہ بن حارث دی کنیت اے) 1

عمیر بن ابی وقاص: آپ اوہی صحابی نے جہناں نوں کئی عمر پاروں واپس پرتن دا آکھیا گیا سی تے آپ نے رونا شروع کر دتا سی۔ آپ دارون ویکھ کے رسول خدا نے جنگ وچ شرکت دی اجازت دے دتی سی۔ آپ عالم اسلام دے عظیم سپہ سالار تے فاتح ایران حضرت سعد بن ابی وقاص دے نکلے ویرن۔

ایس تو دکھ عمیر بن حمام، سعد بن خیشمہ، ذوالشمالین بن عبد عمرو، مبشر بن عبد المنذر، عاقل بن کبیر، صفوان بن بیضاء الفہری، یزید بن حارث خزرجی، رافع بن معلی، عوف بن عفراء تے ابو جہل تے حملے کرن والے معوذ بن عفراء شامل نیں۔ بدر دے شہیداں دیاں قبریں آج تک بدر دے تھاں تے رسول خدا نال اوس دے چاہن والیاں دی محبت دیاں نشانیاں دے طور تے موجود نیں پر مکی والیاں دے اوہ ستر بد نصیب جیہڑے میدان بدر وچ رب دیاں تلواراں دا نشانہ بنے، اوہناں دی کوئی نشانی او تھے نہیں لہدی۔ اوہناں وچوں ۲۴ چوٹی دے سردار اک پرانے کھوہ وچ سٹ کے مٹی پا دتی گئی۔ ۴۵ ہورتھاواں تے دبے گئے پرامیہ بن خلف دی لاش جتھے پئی سی اوہدے تے او تھے ای مٹی پا دتی گئی۔

! الاستیعاب بحوالہ سیرت المصطفیٰ از مولانا محمد ادریس کاندھلوی، جلد دوم صفحہ: ۱۴

اتھے اک چوکی عبرت دوان والی گل یاد آؤندی اے۔ اوہ ایہہ ہے کہ بدر دے پڑاؤ دے اخیر دی دہیڑے آپؐ اوس کھوہ دے کنڈے جا کھلوتے جہدے وچ تکبر تے جہالت دے ۲۴ نمونے دبے گئے سن۔ آپؐ آواز دیندے نیں اے عتبہ، اے شیبہ، اے ابو جہل! ایہہ گل چنگی، نہیں سی کہ تسیں اللہ تے اوس دے رسول دی اطاعت کر دے؟ ساڈے نال ساڈے رب نے جس چیز دا وعدہ کیتا سی، اوس نے اوہ وعدہ سچا کر دکھایا۔ کبھہ تھاڈے رب نے وی تھاڈے نال وعدہ پورا کیتا؟ ایہہ سن کے جناب عمرؓ نے عرض کیتی یا رسول اللہ! تسیں ایہناں بے جان لاشاں نال کلام فرما رہے او۔ جناب رسول خداؐ نے حضرت عمرؓ نوں جواب دتا کہ عمر! قسم اے اوس ذات پاک دی جہدے قبضے وچ میری جان اے، میریاں گلاں نوں تسیں ایہناں مردیاں توں زیادہ نہیں سن رے۔

بدر دے قیدی:

میدان بدر وچ ۷۰ مشرک جنگی قیدی بنائے گئے۔ جدوں فاتح لشکر اسلام مدینے واپس جا رہیا سی تے رستے وچ صفراء دی وادی وچ آپؐ نے اک جنگی قیدی نصر بن حارث نوں قتل کرن دا حکم دتا۔ نصر اوہ بندہ اسی جیہڑا ہجرت مدینہ توں پہلے اسلام دشمنی وچ حدود ودھیا ہوئیا سی تے رسول خداؐ نوں وی تنگ کرن وچ اخیر کر چھڈ داسی۔ رسول خداؐ دے حکم دی تعمیل وچ جناب علیؓ نے نصر بن حارث دی گردن اڈا دتی۔

مکی وچ اک ہور بندہ وی رسول اللہؐ نوں دکھ دے کے بڑا خوش ہوندا سی۔ اسان کچھ ذکر کیتا اے کہ اوس نے

سجدے دی حالت وچ اللہ دے رسول دی کنڈ تے اُٹھ دی اوجڑی لیا رکھی سی۔ اک وار اوس نے گردن اطہر وچ کپڑا پا کے ایسے وٹ دتے سن کہ اپنے ولوں تے اوس نے محبوب خدانوں مارای سٹیا سی۔ اوس بندے دا نام عقبہ بن ابی معیط سی تے بدر دے جنگی قیدیاں وچ اوہ وی شامل سی۔ جدوں لشکر اسلام مدینے ول جاندا عرق الظبیه دی تھاں تے پچاتے رسول خدا نے اوس دشمن خدانوں قتل کرن دا حکم دتا۔

اے تیکر اسیران بدر (P.O.W.S.) دی رہائی، قتل، فدیہ یاں غلامی وچوں کسے امر دا فیصلہ نہیں ہوئیا سی۔ نبی اکرم a نے ایس بارے نور و خوض شروع کر دتا سی پر سوچ ایہہ سی کہ جنگی قیدیاں وچ کجھ قیدی نامی گرامی جنگجو تے بڑے دلیر بندے ہن، جے اوہناں نوں چھڈ دتا تے بدر دی ہار، تے فیر قید دا غصہ کسے وی طرحاں اوہناں نوں چین نال نہیں پیٹھن دیوے گا، پتہ نہیں کس ویلے اوہ انتقام لین لئی نکل آؤن۔ تے جے اوہناں نوں قتل کر دتا تے فیر وی اوہناں دے وارث بدلہ لین لئی نکلن گے۔ ایہی سوچ اسلامیان مدینہ دی وی سی۔ اک وڈھا طبقہ اوہناں دی رہائی دے حق وچ سی، جہناں نے جناب ابوبکر صدیق نوں بارگاہ رسالت وچ اپنا وکیل مقرر کریتا۔ پر دُجے پاسے حضرت عمر بن خطاب ورگے بندے سن جہناں دا خیال ایہہ سی کہ رب دے ویریاں نوں کسے قیمت تے وی معاف نہیں کرنا چاہیدا۔

جدوں رسول خدا مشاورت دے طلبگار ہوئے تے پہلوں جناب ابوبکر صدیق حاضر ہوئے تے عرض کیتی کہ یا رسول اللہ! ایہہ سارے ساڈے اپنے ای رشتے دار نیں۔ جے تسلیں ایہناں نوں معاف کر کے ایہناں تے احسان فرماؤ تے اللہ تہاڈے تے وی احسان فرمائے گا یا فیر تسلیں فدیہ لے کے ایہناں نوں چھڈ دیو، ہو سکدا اے آپ دے کرم توں متاثر ہو کے ایہہ ایمان لے آؤن تے فدیہ دی رقم نال مسلمان وی نکلے ہو جان گے۔ رسول خدا نے جناب ابوبکر دی ساری گل سنی پر کوئی جواب نہیں دتا۔ اوس توں بعد جناب عمر نے حاضر ہو کے صلاح دتی کہ ایہہ لوکی خدا دے دشمن تے رسول خدا دے منکر نیں، آپ نوں مکئی وچوں کڈن والے نیں تے نالے کفر تے گمراہی دے وڈھے تھم نیں۔ جے ایہناں دیاں دھونناں لاہ دیتاں جان تے باقی مشرکاں دے سر ہمیش لئی نیویں ہو جان گے۔ حضرت عمر نے ایہہ صلاح وی دتی کہ جیہڑا جنگی قیدی جییں مسلمان دار رشتے دار اے اوہی اوس نوں قتل کرے۔ اوہناں نے نام لے کے آکھیا کہ عقیل بن ابوطالب نوں اوس دے سکے بھرا حضرت علی قتل کرن۔ نبی رحمت نے حضرت عمر دی ساری گل سنی پر اوہناں اگے وی کوئی حامی نہیں بھری۔

حضرت عمر دی گل بات جاری سی تے جناب ابوبکر صدیق فیر اوتھے اپڑ گئے تے پہلے والی صلاح فیر دتی پر حضرت عمر اپنی گل تے پکے رے۔ ایہہ ویکھ کے جناب رسول خدا نے عام مسلماناں کولوں مشورا منگیا۔ مسلمان وی دو حصیاں وچ ونڈے ہوئے سن۔ ایس موقع تے رسول اللہ نے جناب ابوبکر صدیق نوں حضرت میکائیل فرشتے ورگا تے حضرت ابراہیم تے حضرت عیسیٰ نبی ورگا آکھیا تے جناب عمر نوں حضرت جبرائیل، حضرت نوح تے موسیٰ نال رلایا۔ فیر نبی اکرم a نے فیصلہ سناؤندیاں ہوئیاں حکم فرمایا کہ قیدیاں نوں فدیہ لے کے رہا کر دیو۔

جنگی قیدیاں وچ اک قیدی ابوعزہ (عمرو بن عبد اللہ) وی سی۔ اوس نے رسول خدا دی خدمت وچ حاضر ہون دی

خائش ظاہر کیتی۔ جدوں اوس نوں حاضر کیتا گیا تے اوس نے عرض گزاری کہ یا رسول اللہ! میریاں پنج دھیاں نیں۔ میتھوں وکھ اوہناں دا کوئی کھٹن کمان والا نہیں۔ جے مینوں صدقے طور ای چھڈ دیوتے جو میرے پلے وے اوہ میریاں دھیاں دے کم آ جاوے گا۔ میں کارا کر داہاں کہ اگوں کدے تہاڈے مقابلے وچ نہیں نکلاں گا۔ ایہہ سن کے رسول خدا نے فرمایا جا! توں آزاداں۔

بدر دے چوکھے قیدی فدیہ دے دے دے کے آزاد ہوندے رے۔ جیہڑے چار ہزار درہم طے شدہ فدیہ نہیں دے سکدے سن اوہ دو ہزار لے کے آگئے تے جہناں کول دو ہزار وی نہیں سی اوہ اک اک ہزار درہم وچ وی اپنے قیدی لے گئے۔ کچھ وارث اصولوں ای سکھنے تھ آئے تے اوہ وی اپنے قیدی لے گئے پر اوہ قیدی جیہڑے پڑھے لکھے سن اوہناں دا فدیہ ایہہ مٹھیا گیا کہ اوہ دس، دس بالاں نوں لکھنا پڑھنا سکھان تے بس فیروموج کرن۔

قیدیاں وچ اک بند اسمیل بن عمرو وی سی جیڑا چوکھا زبان آور خطیب سی تے مکے وچ رسول خدا نوں مندا بولداسی۔ حضرت عمر نے مشورہ دتا کہ یا رسول اللہ! ایہدے اگلے دو دند توڑ دینے چاہیدے نیں پر رسول خدا نے ایس گل نوں چوکھا ناپسند کیتا۔

ابوسفیان دا پتر عمرو وی جنگ دے قیدیاں وچ شامل سی۔ دُجے پاسے مکے وچ ابوسفیان نے بغیر کسے وجہ توں حضرت سعد بن نعمان نوں قید کیتا ہونیا سی جیہڑے او تھے عمرہ کرن گئے سن۔ ایویں عمرو بن ابوسفیان نوں حضرت سعد دے بدلے آزادی دتی گئی۔

جناب عباس نوں آکھیا گیا کہ تسیں وی فدیہ دیوتے آزاد ہو جاؤ۔ اوہناں آکھیا کہ بھتیجا! میرے کول ایسے پیسے کتھوں آئے؟ جناب رسول خدا نے پچھیا کہ چاچا جی! اوہ مال کتھے گیا جیڑا چاچا جی ہو راں نال رل کے زمین وچ دیا سی تے آؤن لگیاں میری چاچی نوں آکھیا سا جے کہ جے میں مار یا گیا تے ایہہ میرے پتر اں فضل، عبداللہ تے قسم وچ ونڈ دینا۔ ایہہ سن کے عباس ہو راں دیاں اکھاں گھل گئیاں۔ فیروہناں کولوں سوا وقیہ سونا فدیہ لیا گیا۔ بدر دے قیدیاں وچوں ایہہ سب توں بھار فدیہ سی۔

داماد رسول ابوالعاص:

ابوالعاص بن ربیع مکے دا اک نوجوان تاجر، حضرت خدیجہ دی بھین ہالہ دا پتر تے ایوں جناب خدیجہ دا بھانجا سی۔ جناب خدیجہ دی خائش تے حضرت زینب بنت رسول دارشا ابوالعاص نال ہونیا سی۔ جناب خدیجہ اپنی بھین دی ایس اولاد نال پتر اں طرحاں پیار کردیاں سن۔

مکے وچ جدوں اک اللہ دی عبادت دی دعوت دین دے جرم وچ قریش نے ایہہ فیصلا کیتا کہ محمد دی ذات نوں ہر طریقے نال پریشان کیتا جاوے تے ابولہب نے اپنے پتر کولوں بنت رسول نوں طلاق دوا دتی۔ فیروہ ابوالعاص کول آئے تے اوس نوں آکھن لگے کہ ابوالعاص! اسیں محمد دی اک دھی نوں طلاق دے دتی اے، ہن دُجی (سیدہ زینب) نوں توں طلاق دینی اے۔

”کیوں بئی میں اپنی زوجہ کیوں طلاق دیواں؟“ ابو العاص نے پچھیا۔

”ابو العاص! توں جیہڑی قریشی سوانی تے اُنگل رکھیں گا، اسیں اوسے نال تیرا ویاہ کراں گے پر جویں جاننا ایں زینب نوں طلاق دے دے۔“

”میں قسم چک کے آکھدا جے کہ میں طلاق نہیں دینی۔ ایہہ بھلا کیہہ گل ہوئی کہ اپنی گھر والی نوں چھڈ کے دُجی نال ویا کر لوؤ۔“ ابو العاص نے رڑا رنگ جواب دے دتا۔

انسانِ کامل جناب محمد رسول اللہ نے ابو العاص دی ایہہ نیکی ہمیش یاد رکھی تے اوس نوں چنگے لفظاں نال یاد کر دے رے۔ بدر دے قیدیاں وچ اوہ ابو العاص وی شامل سی۔

مکی توں جدوں قریشی اپنے اپنے بندیاں دا فدیہ لے کے مدینہ وَل جا رے سن تے جناب زینب نے وی اپنے خاوند دا فدیہ گھلنا چاہیا پر گھروں درہم تھوڑے نکلے۔ سیدہ زینب نے سوچیا کہ کدرے ایہہ نہ ہووے کہ ایس رقم وچ ابو العاص نوں آزادی نہ ملے۔ ایس لئی اوہناں نے اپنے گل وچوں ہار لہا کہ مدینہ جان والے بندیاں دے حوالے کر دتا۔ اوہناں وچوں اک بندادر بار رسالت وچ حاضر ہوندا اے تے ابو العاص دی آزادی لئی درہم تے ہار پیش کر دتا اے۔ نگاہِ مصطفیٰ نے اوسے ویلے اوہ ہار پچھان لیا۔

حضور تے رقت طاری ہو گئی۔ سیدہ زینب دا چہرہ اکھاں اگے گھسن لگ پیا۔ ہار دین والی اُمّ زینب سیدہ خدیجہ وی یاد آ گئی۔ اوہ ویلا وی یاد آ گیا جدوں جناب خدیجہ نے سیدہ زینب دی ڈولی ٹور دیاں اپنا ہار اوہناں دے گل وچ پادتا سی۔ رحمت للعالمین a فرمان لگے:

سبحنو! جے مناسب جانو تے زینب دا قیدی تے ہار دوویں چیزاں پر تادیو۔

نبی رحمت دی ایہہ خائش اصحاب نبی لئی حکم دے برابری۔ ہاروی واپس کر دتا گیا تے ابو العاص نوں آزادی وی مل گئی پر جناب رسول خدا نے ابو العاص توں وعدہ لیا کہ اوہ سیدہ زینب نوں مدینہ بھیج دیوے گا۔ آپ نے جناب زید بن حارث تے اک انصاری صحابی نوں سیدہ زینب نوں واپس لیان لئی ابو العاص دے نال مکی بھیج دتا۔ سیدہ زینب دی واپسی وچ کچھ دیر تیکر رکاوٹ بنی ری پرا خیر رب سوہنے نے دھی نوں اوس دے مہربان والد نال ملا دتا۔

ویلا لنگھدا رہیا تے فیر اک واری ایوں ہو گیا کہ ابو العاص مکی والیاں دا مال لے کے شام توں واپس مکی جا رے سن تے صلح حدیبیہ دے نتیجے تے گھروں بے گھر ہوئے بندیاں ابو بصیر تے ابو جندل وغیرہ نے تجارتی قافلہ لٹ لیا۔ ابو العاص راتوں رات بچدے بچاندے مدینے اپڑے تے سیدہ زینب نوں پناہ دین دی بیتی کیتی۔ جناب رسول خدا نوں ایس گل دا پتا لگاتے آپ نے ایس دی اجازت دے دتی پر سیدہ زینب نوں تاکید کیتی کہ اوس نوں اپنے نیڑے نہ آؤن دینا کیوں جے اک مسلمان سوانی کے مشرک دی بیوی نہیں ہو سکتی۔

رسول رحمت نے ابو العاص دا تجارتی مال وی واپس دوا دتا تے اوس دی مکی وَل خیر خیریت نال واپسی دا وی بندوبست کر دتا۔ اوہ جدوں مکی واپس پہنچیا تے اوس نے مکی والیاں دا سامان واپس کر کے اک اک بندے نوں پچھیا کہ ”دسو جے

میرے ول کوئی شے باقی ہے تے؟“

”جزاک اللہ ابو العاص! تسیں بڑے ایماندار تے اعتبار والے بندے جے“ اوہناں آکھیا۔

”کیہہ میں اپنی ذمہ داری پوری کر دتی اے؟“ ابو العاص نے پچھیا

”بنا شک پوری کر دتی اے۔، اسیں راضی ہاں“ اوہناں جواب دتا۔

”تے فیر اشہدان لا الہ الا اللہ و اشہدان محمد عبدہ و رسولہ“

”ایں توں بعد جناب ابو العاص مدینے پرت آئے تے رسول خدا دی اجازت نال سیدہ زینب نال حیاتی

دے دن گزار دے رے۔“¹

بدرتوں اُحدتیکر

سیدہ رقیہ دی وفات:

معرکہ بدر دی روانگی دے ویلے حضرت عثمان نوں صرف ایسی لئی مدینے چھڈ دتا گیا سی کہ جناب سیدہ رقیہ بنت رسولؐ زوجہ عثمان ذوالنورین تگڑے نہیں سن۔ جدوں حضرت زید بن حارث بدر دی فتح دی خوشخبری لے کے مدینے اپڑے اوہدوں حضرت عثمان سیدہ رقیہ نوں دفنا کے پر تے سن۔ سرکارِ دو عالم نوں جواں مرگ دھی دے وچھوڑے دا بڑا صدمہ ہو یا پردھی دے چلانا کرن دے ویلے اوس دے کول نہ بیٹھ سکن دا دکھ ایس سوچ نال گھٹ جاندا سی کہ بدر دی فتح نال ان گنت دھتیاں نوں اک پاک صاف تے محفوظ حیاتی دی ضمانت مل گئی سی۔

سیدہ فاطمہ زہرا تے شیر خدا دا ویاہ:

سرورِ کونین دی اولاد پاک دی تفصیل تے کچھ گزر چکی اے۔ پر ۲ھ دے واقعات وچ ایہہ گل چوکی ضروری جا پدی اے کہ سیدہ فاطمہ الزہرا تے سیدنا علی بن ابوطالب دا ویاہ ایسے ورھے وچ ہو یا سی۔ ایسے ویاہ دے نتیجے تے انسانیت دے محسن دی نسل اگے چلی۔

روزے تے زکوٰۃ دی فرضیت:

روزے تے زکوٰۃ دی فرضیت دا حکم ایسے ورھے وچ ملیا۔ روزہ فرض ہون دے نال ای صدقہ فطر تے عید الفطر جئے سوہنے تحفے وی مسلماناں دے حصے وچ آئے۔ جتھے صدقہ فطر تے زکوٰۃ دے حکم نال ماڑے تے لے مسلماناں دیاں لوڑاں پوریاں ہون دا سامان بنیا، او تھے شوال ۲ھ دی پہلی تاریخ نوں عالم اسلام دی پہلی عید نے وی مسلماناں وچ خوشیاں ونڈیاں۔ کیہہ منظر ہووے گا اوہ جدوں مکے وچ لک لک کے نمازاں پڑھن والے تے اک اللہ دانام لین دے جرم وچ سزاواں کٹن والے سرعام اللہ دی واحدیت دے نعرے مار دے تے اوس دی تسبیح بیان کر دے مدینے توں باہر کھلے میدان ول ٹرے جارے سن، تاں بے سورج تماشا کر لوے ایس گل دا کہ جدوں حق آؤندا اے تے باطل نوں دوڑنا ای پیندا اے۔ کھلے میدان وچ ہزاراں متھے مٹی تے ٹکا کے، توحید دے علمبردار سدھے رستے تے ٹرن دی توفیق دین تے رب دا شکر ادا کر رے سن۔ رب تعالیٰ آکھدا اے کہ ایہہ میری دتی توفیق نال ای ہو یا سی کہ تسبیح کھلے دل نال کھلی تھاں تے بغیر روک ٹوک دے اپنے مالک اگے متھے ٹیک دتے سن۔

{وَ اذْكُرُواْ اِذْ اَنْتُمْ قَلِيْلٌ مُّسْتَضْعَفُوْنَ فِى الْاَرْضِ تَخَافُوْنَ اَنْ يَّتَخَفَتْكُمْ النَّاسُ فَاُولَئِكَمُ وَيَدْلُكُمْ
بِنَصْرِهِ وَاَزْرَقَكُمْ مِنَ الطَّيِّبِ لَعَلَّكُمْ تَشْكُرُوْنَ} (انفال: ۲۶)

”تے یاد کرو جدوں تہیں تھوڑے سی، زمین تے ماڑے بنا کے رکھے گئے سی۔ تہیں ڈر دے سی کہ لوکائی تہانوں چک لے جاوے گی۔ فیر اوس (اللہ) نے تہانوں ٹھکانہ دتا تے اپنی مدد نال تو اڈی تائید کیتی تے پاک چیزاں نال تہانوں روزی دتی تاں جے تہیں شکر ادا کرن والے بن جاؤ۔“

گستاخانِ رسول دا قتل:

مسلماناں دی حربی طاقت ہر نویں دیہاڑے ودھ رے سی تے لوکائی وی دھڑا ادھڑ اسلام قبول رے سی پر انکھ دے مارے کجھ لوکی اہجے وی رسول خدا تے دین اسلام دے خلاف سازشاں توں باز نہیں آ رے سن۔ ایہو جے حالات وچ مسلماناں نے ایہہ فیصلہ کیتا کہ ہن بدتمیزی، گستاخی، سازش تے طعنہ مہنے برداشت نہیں کیتے جان گے تے اٹ دا جواب پتھر نال دتا جاوے گا۔ ایس پالیسی دا سب توں پہلا شکار اک بد بخت یہودی سوانی عَصْمَاء بنی۔

عَصْمَاء نوں شعر آکھن دی بیماری سی۔ رحمت عالم دی مدینے تشریف آوری توں بعد اوہ اپنی شاعری دا سارا زور دین اسلام تے نبی رحمت دے خلاف لاندی سی۔ بدرتوں واپسی تے وی شمع رسالت دے پردانیاں نوں عَصْمَاء دیاں گستاخیاں دا پتلا لگا۔ جناب عمیر بن عدی، جیہڑے اکھاں توں انہی سن تے ایسے پاروں بدر دے معرکے وچ وی شریک نہیں سن۔ اوہناں نے ایہہ منت منی سی کہ رسول خدا نوں خدا بدرتوں صحیح سالم واپس لے آوے تے عَصْمَاء دی ودھی ہوئی جیہڑی نوں میں لگاماں پاواں گا۔ سپہ سالار اعظم جدوں فاتح دی حیثیت نال مدینے پرت آئے تے جناب عمیر نے سبناں متراں کولوں عَصْمَاء دی سون دی تھاں سمجھ لئی۔ فیر اک رات نوں تلوار پھڑی تے اوہدے گھر جاوڑے۔ فیر لوہڑ دے بھالدے اوہدے تیکر جا بچے تے تلوار اوس دے سینے تے رکھ کے ایڈے زور نال دبی کہ آ رہا ہو گئی۔¹

نذر پوری کر کے فجر دی نماز مسجد نبوی وچ پڑھی، حضور توں ساری گل سنائی تے نالے عرض کیتی کہ یا رسول اللہ! ایس قتل تے تہاڑے لئی کوئی مسئلہ تے نہیں بنے گا؟ سید العالمین نے فرمایا کہ عمیر! دل چھوٹا نہ کر ایس قتل تے قبیلے تے دُور دی گل اے، دو بھینڈاں وی نہیں بھڑن گئیاں۔ حضرت عمرؓ نے اپنے ایس یار دی تعریف کر دیاں آکھیا کہ ویکھو سجنو! ایس نا بینے نے کیمہ کر چھڈیا اے۔ رسول خداؐ نے جدوں جناب عمر دی ایہہ گل سنی تے فرمایا کہ عمر! ایس نوں نا بینا نہ آکھو، ایہہ تے اکھاں والا اے۔ اک واری جناب عمیر بیمار ہو گئے تے رسول رحمت نے فرمایا کہ چلو سانوں اوس بصیر (اکھاں والے) کول لے چلو جیہڑا بنی واقف وچ رہندا اے، ایس اوس دا حال چال پچھ آئیے۔

اک دُجا گستاخ رسول ابی عَفْک مدینے دا اک بدتمیز بڈھا یہودی سی۔ اک سو ویہہ (۱۲۰) ورھیاں دی عمر وچ دی اوہ اپنی خباثت توں باز نہیں سی آؤندا۔ رنگ برنگے شعر گھڑنا تے شانِ نبوت وچ گستاخیاں کرنا اوس بڈھے دیشیواسی۔ جدوں اوہ حدوں ودھ گیا تے رسول خداؐ نے پچھیا کہ کیمہ اشیراے جیہڑا میرے لئی اوس خبیث والا کم کرے۔ جناب سالم بن عمیر نے عرض کیتی یا رسول اللہ! میں تے پہلوں ای ایہہ ٹچا متھیا ہو یا سی، ہن تہاں حکم کیتا اے تے حکم دی تعمیل چھیتی ہووے گی انشا اللہ۔ گرمیاں دی رات سی تے بڈھا گوڑھی نیندر مٹتا ہو یا سی۔ حضرت سالم اوس دے گھر گئے تے تلوار دے اک

ای وارنال اوہدا کم کر چھڈیا۔

حضرت سالم بن عمیر چوکھا سوز رکھن والے مسلمان سن۔ خوفِ خدا نال روندے رہندے سن تے ہر ویلے اک عجیب جی کیفیت طاری رہندی سی۔ آپ جنگ بدر وچ وی شریک سن تے بیعت عقبہ وچ وی۔ مدینے دا اک مشہور یہودی کعب بن اشرف سی۔ اوس دے باپ داتعلق بنو طے نال سی پر اوس دی ماں یہودیاں دے قبیلے بنو نضیر وچوں سی۔ یہودیاں دی نسل ماں وٹوں چل دی اے ایس پاروں کعب وی نسلًا یہودی سی۔ اوس بندے وچ ہر اوہ خوبی لہدی سی جہدے نال عرب وچ ٹور پٹا بن داسی۔ مال دولت وادھوں سی، رَجھ کے سوہناسی تے شعرو چنگے آکھدا سی۔ اوس نوں ایس گل تے وی چوکھا مان سی کہ ”میری بیوی عرب دی سب توں چوکی سوہنی تے معطر زنائی ہے“¹ اوس نے اک واری نبی اکرمؐ نوں شہید کرن دی سازش وی کیتی پر رب نے اپنے محبوب دی حفاظت فرمائی۔² اوہ ایڈا خبیث تے وگڑیا ہو گیا بندا سی کہ اوس نے مسلمان سوانیاں دے نام لے لے کے بے ہودہ تے واہیات شعر آکھنے شروع کر دتے³ جنگ بدر وچ قریش دی رسوا کر دین والی شکست دا اوس نوں بڑا منکھ سی۔ اوس نے مسلماناں دی فتح تے ایوں تبصرہ کیتا سی: ”جے محمدؐ نے قریشیاں نوں مار لیا اے تے فیر ہن زمین دا پیٹ ایس دی پشت توں چنگا اے“ جہداسد ہا سدھا مطلب ایہہ سی کہ فیر ایہہ تے مرجان والی گل ہوئی نا! جدوں کعب نے بد معاشی کرن وچ اخیر کر چھڈی تے ساڈی سرکار دے صبر دی وی اخیر ہو گئی۔ پچھیا:

دوستو! کیہڑا اے جہیز اکعب بن اشرف نال نبھڑے گا؟

”میں یا رسول اللہ! حکم تے فرماؤ“ جناب محمد بن مسلمہ اُٹھ کے کھلو گئے۔

”ٹھیک اے، پر سعد بن معاذ نال ضرور مشورہ کر لینا“ جناب رسول خدا نے فرمایا:

مشاورت توں بعد مدینے دے ابو جہل نوں مِت دین لئی جناب محمد بن مسلمہ، جناب ابونا نکلہ، جناب عباد بن بشر، جناب حارث بن اوس تے جناب ابوعبیس بن جبرجے مجاہدان دا اک جتھا تیار ہوندا اے۔ مجاہد اپنی پلاننگ کر دے نیں، اپنی سرکارتوں منظوری حاصل کر دے نیں تے فیر کماندار جناب محمد بن مسلمہ تے جناب ابونا نکلہ، کعب دے ڈیرے تے جا پجدے نیں۔ محمد بن مسلمہ آکھدے نیں:

”کعب جی! ایہہ جس بندے دی اسیں پیروی کر رہے آں اوس نے ساڈے کولوں کجھ صدقہ خیرات منگی اے، سچ تے ایہہ ہے کہ اسیں مصیبت نوں پھڑے گئے ہاں۔ تہاڈے کول حاضر ہونیا وال کجھ دانے پھکے دا بندوبست کرو۔“

”تہاڈا غلہ کدھر گیا؟“ کعب نے پچھیا

”سچ دساں تے ایہہ ہے کہ جو کجھ پلے سی اوس بندے، اُتے اوس دے سبناں بیلیاں تے خرچ کر بیٹھے آں۔“

! فتح الباری بحوالہ سیرت المصطفیٰ از مولانا ادریس کاندھلوی جلد دوم صفحہ: ۱۷۸

@ تاریخ یعقوبی از احمد بن ابی یعقوب واقعہ بنو نضیر، صفحہ: ۴۹

حیات رسول، اُمی از خالد مسعود، صفحہ ۳۵۳۔

”تے ہن فیر کجھ عقل آئی جے کہ ابے وی نہیں۔ میں تہانوں غلہ ادھار دین لئی تیار آں پر میرے کول کوئی شے رہن رکھ دیو۔“ کعب نے آکھیا۔

”مثلاً کیہہ؟“

”اپنیاں سوانیاں مینوں دے جاؤ، رہن دے طور تے۔“

”کعب جی! تہاڈے ورگے سوہنے بندے کول سوانیاں رہن رکھ کے اپنی جان نوں مصیبت پاؤن والی گل ہوئی نا! ذرا سوچو تہاڈے توں سوہنا کوئی ہور بند اوی ہے؟“

”تے چلو فیر اپنے پتراں نوں رہن رکھ دیو۔“

”اسیں اپنے پتراں نوں رہن رکھ دیواں گے تے کعب جی! ساری حیاتی اوہناں لئی مہنا بنیا روے گاتے عرب دے لوکی اوہناں نوں آکھن کرن گے کہ تسمیں تے اوہ جے جہناں نوں اوہناں دے وڈکیاں نے دانے پھکے واسطے رہن رکھ دتاسی۔ ایہہ تے بڑی گھاٹ تے شرم دی گل اے جی۔ جے تسمیں من جاؤ تے اسیں اپنے ہتھیار تہاڈے کول رہن رکھ سکدے آں۔“

اصل وچ محمد بن مسلمہ نے ایہہ پیش کش ایس وجہ توں کیتی سی کہ ایوں کعب دے قلعے تیکر ہتھیار لے کے آؤن دا بہانا لہجہ جاوے گا۔ جدوں ابن مسلمہ معاملہ طے کر چکے سن تے اوس دے دُجے مجاہد جناب ابونا نلہ دی کعب کول جا بچے تے ایوں اداکاری کیتی کہ کعب بڑا خوش ہو گیا۔ ابونا نلہ نے آکھیا کہ ”بھرا جی! تسمیں تے میرے رضاعی بھراوی جے، تہاڈے توں کیہہ لُکاءے؟ ایس شخص (جناب سرور کائنات) دامدینے آؤناتے ساڈے لئی وبال بن گیا اے۔ سارا عرب ساڈا دشمن ہو گیا اے۔ لوکاں نے ساڈے خلاف ایک کر لیا اے۔ ساڈے تجارتی قافلیاں دے رستے بند ہو گئے نیں، ساڈے بال بھٹک نال بلکدے پے نیں تے ساڈا اپنا حال وی کجھ گھٹ نہیں۔“

”میں وی اشرف دا پتر آں، ایوں تے نہیں سی ناہر گل تہانوں دئی آؤندا میں۔ ہن مصیبت نوں پھڑے گئے اونا؟“

جناب محمد بن مسلمہ تے ابونا نلہ دا تیر ٹھکانے جا لگا سی۔ اوہ اپنے مقصد وچ کامیاب ہو گئے سن۔

ہن اوہ جنے مرضی ہتھیار لے کے کعب دے قلعے ول جاندے، اوس نے ایہی سمجھنا سی کہ ہتھیار رہن رکھن لئی لیاندے گئے نیں۔

اوہ سن ۳ھ دے ربیع الاول دی چودھویں رات سی۔ مسلم مجاہداں دا جتھار رسول خدا دی خدمت وچ حاضر ہوندا اے، دعاواں لیندا اے، سپہ سالار اعظم دیاں تھاپیاں لیندا اے، رسول خدا بقیع غرقہ تیکر اوہناں نوں ودعیا کر دے نیں تے آکھدے نیں کہ جاؤ اللہ دیوشیرو! اللہ تہاڈی مدد کرے گا۔

قلعے دے کول جا کے ابونا نلہ زور دی واج دیندے نیں۔ کعب اُٹھدا اے تے نویں ووہٹی پچھدی اے ”سرتاج کدھر؟ ایس واج وچوں تے لہو ڈگ رہیا اے۔“

”بھلے لوکے! ایہہ تے میرے بھرانیں محمد بن مسلمہ تے ابونا نلہ۔“ کعب نے آکھیا۔

بدرتوں اُحد دے وچکار دی حربی صورت حال اک نظر وچ

| نمبر شمار | نام غزوہ | مسلماناں دی طاقت | مسلماناں دا سپہ سالار | کافراں دی طاقت | کافراں دا سپہ سالار | لڑائی دی تھاں | ترخ | نتیجہ |
|-----------|----------------------------|------------------------|-----------------------|---|-------------------------------------|--|-----------------------------|--|
| ۱۔ | بنو قینقاع دا محاصرہ | مدینے دے سارے مسلمان | رسول خدا | بنو قینقاع دے سارے یہودی | x | مدینہ | شوال ۲ ہجری دے مڈھلے دیہاڑے | مدینہ الرسول بنو قینقاع توں پاک ہو گیا |
| ۲۔ | غزوہ بنو سلیم | ۲۰۰ مجاہدین | رسول خدا | بنو سلیم (بنو غطفان دے قبیلے دی اک لڑی) | x | مکہ توں مدینے دے رستے وچ قرقرۃ الکدردی تھاں تے | شوال ۲ ہجری دے اخیر دیہاڑے | کافر بھج گئے تے مسلمان مال غنیمت لے کے مدینے پرت آئے لڑائی دی نوبت نہیں آئی |
| ۳۔ | غزوہ السویق | ۲۰۰ مجاہدین | رسول خدا | ۲۰۰ سوار | ابوسفیان | مکہ توں مدینے ول جانے دے رستے تے پچھا کیتا | 5 ذی الحج بروز ہفتہ ۲ھ | ۱۔ قریش اگے لگ کے دوڑ گئے۔ ۲۔ پتہ لگ گیا کہ مدینے دے یہودی مکے والیاں لئی جاسوسی کر دے سن |
| ۴۔ | غزوہ ذی امر یاں غزوہ غطفان | ۴۵۰ سوار تے پیدل مجاہد | رسول خدا | قبیلہ غطفان دیاں دو شاخاں بنو محارب تے بنو ثعلبہ دے سارے بندے | وعثور غطفانی ذی امر (نجد دا اک پنڈ) | نجد | محرم ۳ ہجری | مشرک بھج گئے تے مسلمان اک پورا مہینہ اوہناں دے گھراں وچ رہ کے پرت آئے |

| | | | | | | | | |
|----|---------------------|------------------------------|---------------------|-------------------------|------------------|--|------------------------|--|
| ۵۔ | غزوہ بجران | ۳۰۰ مجاہدین سوار تے پیادہ | رسول خدا | بنو سلیم | x | بجران (نجد) دے نیڑے اک معدنیاتی مقام) | ربیع الثانی ۳ ہجری | لڑائی نہیں ہوئی |
| ۶۔ | سریہ زید بن حارث | ۱۰۰ سوار مجاہدین | جناب زید بن حارث | قریش دا تجارتی قافلہ | صفوان بن امیہ | قروہ (نجد) | جمادی الثانی ۳ ہجری | ڈھیر سار مال غنیمت ہتھ آیا مشرکاں دا گائیڈ فرات بن حیان عجلی گرفتار ہو کے مسلمان ہو گیا |

ہن اسیں ایناں ۶ مہماں دی تفصیل وچ جانده ہاں تے سب توں پہلوں بنو قینقاع دا محاصرہ:

یہودی ہمیش توں ای اک سازشی تے شرارتی قوم دی حیثیت نال یاد رکھے گئے نیں۔ مدینے وچ میثاق مدینہ دے تحت سیاسی تے معاشرتی مسلمیناں دے حل موجودں پر جدوں یہودیاں نوں ایہہ یقین ہو گیا کہ محمد رسول اللہ دین یہودیت دی کوئی کڑی نہیں سگوں اک وکھراتے اپنی بچھان رکھن والا دین اے تے اوہناں نوں میثاق مدینہ تے افسوس ہون لگ پیا۔ ہن نہ تے اوہ رسول خدا دی رسالت نوں من لئی تیار سن تے نہ ای کسے تنازعے دی شکل وچ آپ نوں حکم یاں منصف سمجھن لئی تیار سن۔ جنگ بدر توں بعد بجائے ایس دے کہ یہودی کوئی سبق سکھدے، اوہناں پہلے توں چوکیاں اتناں تے شرارتاں شروع کردتیاں۔ اوہناں وچوں کجھ تے اعلانیہ اسلام تے پیغمبر اسلام دے خلاف بک بک کرن لگ پے تے کجھ نے خفیہ طور تے مکے والیاں لئی جاسوسی دا کم چھوہ دتا۔ ایوں مدینے دے اندر یہودیاں دا وجود مسلماناں لئی کسے فتنے توں گھٹ نہ رہیا۔

بدر توں واپسی تے جناب رسول خدا نے یہودیاں دے چوکھے ٹکڑے تے شرارتی قبیلے بنو قینقاع نوں ایہہ گل سمجھائی کہ معاہدیاں دی پابندی شرافت تے تہذیب دی نشانی ہوندی اے۔ تہاڈے وی میثاق مدینہ پیٹھ کجھ حقوق و فرائض نیں۔ بھلائی ایسے وچ اے کہ اسیں شہر دا ماحول خراب نہ کریئے ورنہ قریش دا حشر و کیکھ لوہر پر اوہناں نوں تے ایہہ تکلیف ای گھٹ نہیں سی کہ مسلمان بدر وچ مشرکاں نوں مار آئے نیں۔ فیروہار کم کرن موجب اوہناں کول ہتھیاراں دے ڈھیر تے سنیا را کم کرن موجب اوہناں کول مال وی چنگا سی۔ ایس لئی اوہناں نے رسول خدا دی نصیحت تے کن دھرن دی بجائے اگوں جواب دتا کہ:

﴿يَا مُحَمَّدًا إِنَّكَ تَرَىٰ أَنَا مِثْلُ قَوْمِكَ لَا يَغُرُّكَ أَنَّكَ لَقِيتَ قَوْمًا لَا عِلْمَ لَهُمْ بِالْحَرْبِ
فَأَصْبَحْتَ مِنْهُمْ فُرْصَةً وَإِنَّا وَاللَّهِ لَكُنْ حَارَ بَعْنَا لَتَعْلَمَنَّ إِنَّا نَحْنُ النَّاسُ﴾

”اے محمد! تیس سانسوں وی اپنی قوم ورگا ای سمجھدے او اوس قوم نوں شکست دے کے جہاں نوں جنگ کرنی
آؤندی نہیں سی۔ تہا نوں ساڈے نال واسطہ پیا تے اللہ دی قسم اے لگ پتے جان گے کہ اسیں کوں دے لوگ
آں۔“

ایس گستاخی تے دھمکی توں بعد جناب رسول خدا صبر دا گھٹ پی کے بیٹھ گئے کیوں جے رسول خدا دی دنیا تے
تشریف آوری دا مقصد جنگاں کر کے لوکاں نوں کچلنا نہیں سی سگوں لوکاں نوں شر تے فساد توں بچا کے رکھنا تے
اگلی ہمیش دی حیاتی دی شانتی دا بندوبست کرنا سی۔ پر رب نوں کدوں ایہہ گل منظوری کہ کوئی اوس دے محبوب
نوں اکھاں وی کڈے تے فیر اوس مالک کل دی دھرتی تے آکڑ کے وی ٹرے۔ ارشاد ربانی ہو یا:

﴿قُلْ لِلَّذِينَ كَفَرُوا سَتُغْلَبُونَ وَ تُحْشَرُونَ إِلَىٰ جَهَنَّمَ وَ بئْسَ الْمِهَادُ قَدْ كَانَ لَكُمْ آيَةٌ فِي
فِتْنَةِ التَّقَاتِ فَتَةً تُقَاتِلُ فِي سَبِيلِ اللَّهِ وَ أُخْرَىٰ كَافِرَةٌ يَرَوْنَهُمْ مِّثْلَهُمْ رَأَى الْعَيْنِ وَ اللَّهُ
يُؤَيِّدُ بِنَصْرِهِ مَن يَشَاءُ إِنَّ فِي ذَلِكَ لَعِبْرَةً لِّأُولِي الْأَبْصَارِ﴾ (آل عمران: ۱۲-۱۳)

”اے محبوب! آکھ دیو اوہناں لوکاں نوں جہاں نے کفر کیتا کہ مچھیتی ہی تیں تھلے لگ جاؤ گے تے تہا نوں
جہنم ول ہکیا جاوے گا تے اوہ چوکھا بھیڑا ٹھکانا اے۔ بے شک تہاڈے لئی اوہناں دو جتھیاں وچ نشانی سی
جہاں دا (بدروچ) آپس وچ جوڑ پیا۔ اک گروہ لڑداسی اللہ دے رستے وچ تے دُجا کافر سی۔ اوہ اوہناں
(مسلماناں) نوں اپنے توں دگنا ویکھدے سن۔ تے اللہ جس نوں چاہندا اے، اپنی مدد نال طاقت دیندا
اے۔ یقیناً ایہہ دے وچ چوکی عبرت اے اوہناں لئی جہاں نوں کچھ دسد اے۔“

نبی رحمت نے اے بنو قینقاع نال اپنے اگلے ورتاؤ دے کوئی فیصلہ نہیں سی کیتا کہ اوہناں نے اک چوکی ہی گھٹیا تے
کینی حرکت کر دتی۔ ایہہ اک اجہی حرکت سی کہ ایس نوں دنیا دی کوئی وی قوم، مذہب یاں معاشرہ سنے تے یہودی اُتے
ضرور لعنت بھیجے۔ ایہہ واقعہ سارے ای مسلم تے غیر مسلم سیرت لکھیاراں نے بلکل ای معمولی جے فرق نال بیان کیتا اے۔
اسیں اتھے صرف دو اقتباس دیواں گے۔ جسٹس پیر کرم شاہ الازہری لکھدے نیں:

”ہو یا ایہہ کہ اک نال دی وتی دی مسلمان سوانی اپنیاں کچھ شیواں ویکھن لئی بنو قینقاع دے ہزار وچ آئی۔ اوہنے اپنا
سامان و بچیا تے فیر کسے کم لئی اک سنیارے دی ہٹی تے آکے بیٹھ گئی، خورے اوس نے کوئی زیور خریدنا سی۔ گلاں گلاں وچ
اوہنے بیٹھے چول یہودیاں نے بڑی کوشش کیتی کہ اوہ مسلمان سوانی اپنے چہرے توں نقاب چک دیوے پر اوہ ایہہ دے وچ نا
کام ہو گئے۔ فیر اک یہودی نے ایہہ شرارت کیتی کہ چپ چپتے اوس سوانی دے کچھے جا کے اوس دی تہ بند دی اک نکر اک
کندے نال اوس دی قمیض نال اڑا دتی۔ ایہہ حرکت اوس نے ایڈی ہشیاری نال کیتی کہ بی بی نوں کچھ پتہ نہ لگا۔ جدوں اوہ
اُٹھی تے اوس دا سترنگا ہو گیا۔ ایہہ ویکھ کے اوہ کمینہ یہودی اُچی اُچی ہسن لگ پیا۔ اوس سوانی نے اُچی واج نال فریاد کیتی۔“

اک مسلمان کولوں گزر رہی سی۔ اوس نے اپنی دینی بہن دی فریاد سنی۔ بھجدا ہو یا اوتھے اپڑیا تے اوس یہودی نوں مار سٹیا۔ ایہہ ویکھ کے سارے بزار دے یہودی اکٹھے ہو گئے تے اوہناں نے اوس غیرت مند مسلمان نوں شہید کر دتا۔
ہن اسیں اک دُجا اقتباس پڑھدے آں۔ لکھیا غیر مسلم دی اے تے سوانی وی اے:

One of the Jewish goldsmith played a trick on a muslim woman who was trading there: he stealthily pinned her skirt to the back of her upper garments so that when she stood up she exposed herself. Feelings were at such a pitch between the Muslims and the Jews of qaynuqa that one of the helpers leaped on the goldsmith with a cry of rage The fighting escalated horribly and a jew and a muslim were killed casualties were thus equal and Muhammad was called in, in his official capacity as judge of disputes, to restore the peace. But the jews refused to accept his arbitration, barricaded themselves into their fortress and called upon their Arab allies to come to their aid..

”اک یہودی سنیا رے نے اک مسلمان سوانی نال اک شرارت کیتی، جیہڑی اوتھے کچھ خریدن آئی سی۔ اوس نے چپ چپتے اوس دا تہبند اوس دی قمیض نال ایوں اڑا دتا کہ جدوں اوہ اٹھی تے اوس دا سترنگا ہو گیا۔ اس حادثے نال مسلماناں دے تے بنوقینقاع دے یہودیاں دے وچکار جذبات ایڈے بھڑک کھلو تے کہ جدوں اک انصاری مسلمان نے اوس سنیا رے نوں تھپڑ ماریا تے اوتھے خوفناک فساد شروع ہو گیا تے اک مسلمان تے اک یہودی مارے گئے۔ نقصان دوواں پاسیاں دا اکو جھیا سی۔ جناب محمدؐ نوں منصف دی اوہناں دی سرکاری حیثیت وچ تنازعے دے حل دی دعوت دتی گئی پر یہودیاں نے آپؐ نوں ثالث منن توں انکار کر دتا تے اپنے قلعے وچ محصور ہو کے اپنے حلیفاں نوں مدد لئی سنبھل گئے۔“

بی بی کیرن آرمسٹرانگ لکھدی اے کہ فساد دا مڈھ یہودیاں ولوں بھجا۔ بہر حال ایوں مسلماناں دا بنوقینقاع دے یہودیاں نال جوڑ پے گیا۔ مسلماناں نے باہروں محصور یہودیاں دی رسد بند کر دتی۔ پندرہ دناں دے محاصرے توں بعد یہودی ہار منن تے مجبور ہو گئے۔ قلعے دا دروازہ کھول دتا گیا تے مجرم رسول خدا دے سامنے پیش کیتے گئے۔ مدینے دے مشہور منافق عبداللہ بن ابی نے حالات تے نظر رکھی ہوئی سی۔ اوہ خبیث بنوقینقاع دا پرانا حلیف سی۔ اوس نے حاضر ہو کے عرض کیتی کہ ”یا رسول اللہ! میرے دوستاں تے احسان کرو۔“ آپؐ نے اوس دی گل تے کوئی دھیان نہیں دتا۔ اوس نے فیر درخواست کیتی تے آپؐ کچھ خفا ہوئے۔ اخیر اوہ ترلیاں تے آ گیا تے آپؐ دا دامن پھڑکے منتاں کرن لگ پیا تے آکھن لگا کہ ”جدوں تیکر تسیں میرے دوستاں دی رہائی دا حکم نہیں کرو گے میں اپنا ہتھ کچھے نہیں ہٹانا۔ میریاں اوکڑاں وچ ایہو چار سو بے زرہ تے تن سوز رہ بند سپاہی میرا ساتھ دیندے رے نیں۔ جے میرے سامنے ایہناں ست سو بہادراں نوں اک ای لمحے

منہ ضیاء النبی جلد سوم از پیر کرم شاہ الازہری صفحہ: ۳۹-۴۳۸

وچ قتل کر دتا گیا تے بعد وچ میرا کیہہ حشر ہووے گا۔“

بھانویں عبداللہ بن ابی دی چوہدراہٹ ہن پہلے ورگی نہیں سی ری پرا بے وی اوہ اوس تے خزر ج دے اوہناں بندیاں دا چوہدری بنیا پھر داسی جہناں اے اسلام نہیں سی قبولیا۔ ایڈا آکڑ خاں بندا تر لے پائی آؤندا سی۔ دُجے پاسے مسلماناں وچوں جناب عبادہ بن صامت نے وی یہودیوں دی سفارش کیتی۔ ایس تے رحمت اللعالمین نے یہودیوں دی جان بخشی کر دتی پرا ایہہ شرط رکھی کہ اوہ مدینہ چھڈ دین گے۔

عبداللہ بن ابی جدوں گھڑی مڑی نبی اکرمؐ دے اُتے ڈگدا جاندا سی تے اک مسلمان نے اوس نوں ڈکنا چاہیا۔ ایس چکر وچ اوس (عبداللہ) نوں کچھ سٹ لگ گئی۔ ایہہ ویکھ کے بنوقینقاع نے آپوں ایہہ گل آکھ دتی کہ ”جس شہر وچ اسیں عبداللہ ور گے یاردی کوئی مدد نہیں کر سکدے اوس شہر وچ ہن کیہہ رہنا اے۔“ ایوں جھولی وچ سوچھید ویکھ کے بنوقینقاع نے جھولی نہ کھلارن دا فیصلہ کیتا تے بغیر کچھ ہوو تر لے پاؤن توں، رسول خدا دے حکم موجب مدینہ چھڈ دتا۔ کچھ دن اوہ وادی القرئی وچ ٹھہرے پر فیروہ شام دے علاقے اذرعات ول چلے گئے، ایس خیال نال کہ یہودی جس دھرتی دا وعدہ کیتا گیا اے اوہ ایہی دھرتی اے تے ایہدے لئی ہر یہودی دادل وی تڑفدار ہندا اے۔

ایوں اک مسلمان سوانی دی بے عزتی کرن دا نتیجا ایہہ ہوئیا کہ رب نے اوہناں دی ہی سرزمین اوہناں تے تنگ کر دتی، مدینہ یہودیوں دے شرتوں پاک ہو گیا تے مسلماناں نوں اک تنگڑی سیاسی وحدت دے طور تے من لیا گیا۔
غزوہ بنو سلیم:

غزوہ بدر توں کوئی اک مہینا پچھوں مدینے دے جاسوسی دے محکمے ولوں ایہہ خبر ملی کہ قبیلہ غطفان دی لڑی بنو سلیم مدینے تے چڑھائی کرن دی تیاری کر رہے نیں۔ ایہدے جواب وچ نبی اکرمؐ نے دو سو مجاہداں نال اچن چیت اوہناں دے علاقے تے دھاوا بول دتا۔ ایس حملے نال بنو سلیم وچ بھگدڑ مچ گئی تے اوہ افراتفری وچ پنج سواوٹ اپنی و سوں قرقرہ الکلدر دی وادی وچ چھڈ کے آپوں بھج گئے۔ مسلمان فوج نے اونٹاں تے قبضہ کر لیا جیہڑے خمس وکھرا کرن توں بعد مسلمان مجاہداں وچ ونڈ دتے گئے۔

غزوہ سولق:

مکے دے قریش تے مدینے دے بنوقینقاع دا صفایا ہو جان توں بعد ایہہ خیال کیتا جا رہیا سی کہ ہن کچھ امن چین نصیب ہووے گا پرا بے مکے وچ اک متکبر سردار ابوسفیان باقی سی۔ بدر وچ قریش دی شکست توں بعد اوس نے قسم کھا دی سی کہ اوہ محمد رسول اللہ توں انتقام لین توں بغیر اپنے اُتے غسل واجب نہیں ہون دیوے گا۔ اوہ ایہہ سمجھدا سی کہ قریش دی پہلے والی شان و شوکت پر تان لئی ضروری اے کہ مدینے والیاں نال ٹکڑ لے کے ایہ ثابت کیتا جاوے کہ اسیں ماڑے نہیں ہوئے، ساڈے وچ اے وی اوہی دم خم موجود اے۔ ایوں اوہ دو سو سوار لے کے مکے توں نکلیا تاں بے مدینے تے اچن چیت حملہ کر کے اپنی طاقت منوالوے تے نالے اپنی قسم پوری کر لوے۔ جدوں اوہ بنونضیر دے ڈیریاں تے پجیا تے رات ہو چکی سی۔

اوہ جی بن اخطب کول گیا تے مسلماناں دے خلاف اوس توں مدد منگی پر اوس نے معذرت کر لئی۔ فیر اوہ اک دُجے یہودی سردار سلام بن مشکم کول آیا۔ اوس نے ابوسفیان دی چنگی آؤ بھگت کیتی، روٹی ٹکر کھوایا، شراب پيائی تے نالے مسلماناں دی حربی تے سیاسی صورت حال دا دسیا۔ فیر اوہ دوویں سرجوڑ کے بیٹھ گئے تے صلاحیں پے گئے کہ کوں مسلماناں تے کاری ضرب لائی جاسکدی اے۔ صلاح مشورے توں بعد ابوسفیان نے مدینے دے نیڑے اک نومسلم قبیلے دی وسوں عریض تے حملہ کر دتا۔ اوہ تھے حملہ آور لشکر نے دو گھرتے کجھ کجھور دے رکھ ساڑ دتے۔ اک انصاری مسلمان تے اوس دا اک یار جیہڑے اپنی پکیلی تے واہی نیجی داکم کر رے سن، اوہناں نوں شہید کر دتا۔ ایہہ ساری کاروائی اوس نے چوکی جھیتی وچ کیتی کیوں جے اوہ سمجھدا سی کہ ایس حملے دی خبر جدوں وی مدینے دے اندر اپڑ گئی، لشکر اسلام ضرور اوس دا پچھا کرے گا۔

رسول خدا نے واردات دی خبر ملدیاں ای چوکی تیزی نال ابوسفیان دا پچھا کیتا پر اوہناں نے مکے دے رستے اگے لگ کے بھجن والی اخیر کر چھڈی سی۔ ایہتھوں تیکر کہ اوہ سواریاں دا بھار ہولا کرن لئی اوہناں توں کھان پین دا سامان وی تھلے سُٹ دے گئے۔ اوس سامان وچ جیہڑی شے سب توں چوکی سی اوہ ستوسن۔ ستواں دے بھرے کئی تھیلے مسلماناں دے ہتھے چڑھے۔ عربی زبان وچ ستواں نوں سوبق آ کھدے نیں۔ ایہی وجہ اے کہ ایہہ کارروائی غزوہ سوبق دے نام نال مشہور ہوئی۔

غزوہ ذی امریاں غزوہ غطفان:

کجھ چراں پچھوں محرم ۳ھ وچ اک ہور خبر ملی کہ بنو نعلبہ تے بنو محارب دا اک لشکر ذی امر دی تھاں تے اکٹھا ہو کے مدینے تے چڑھائی کرن دیاں تیاریاں وچ جٹیا اے۔ رسول خدا نے حضرت عثمان نوں مدینے وچ اپنا جانشین مقرر کیتا تے آپو کوئی ساڈے چار سو پیادہ تے سوار مجاہداں نوں نال لے کے اوہناں ول ٹر پے تاں جے اوہناں نوں مدینے توں باہر ای ڈک لیا جاوے تے اوہناں دے ارادے مٹی وچ رول دتے جان۔ رستے وچ بنو نعلبہ دا جبار نامی اک بندہ پھڑیا گیا۔ اوہدے توں پچھ گچھ کیتی تے پتہ لگا کہ اوہناں اے تیکر تیاری مکمل نہیں کیتی۔ آپ نے جبار نوں اسلام قبولن دی دعوت دتی۔ اوہ مسلمان ہو گیا تے حضور نے اوس نوں حضرت بلال دی رفاقت وچ دے دتا۔ جبار اک سیانے گائیڈ وانگ اسلامی لشکر نوں دشمن دی سرزمین تیکر لے گیا۔

اودھر دشمن نوں جدوں جیش اسلامی دی خبر ملی تے اوہ آل دوالے دیاں پہاڑیاں وچ کھلر گئے۔ ایس دی اک وجہ تے ایہہ ہوسکدی اے کہ اوہناں دی تیاری ہی اے توڑ نہیں سی چڑھی تے دُجی ایہہ کہ مدینے نوں اطلاع ای غلط ملی سی۔ بہر حال آپ ذی امر تیکر گئے جتھے دی اطلاع سی کہ اوہ تھے لشکر کفار اکٹھا ہو رہیا اے۔ آپ اوہوں دے بدواں تے اپنا رعب و دبدبہ قائم کرن لئی تے مسلماناں دی طاقت دا لوہا منوان لئی پورا مہینا اوہ تھے رے تے فیر مدینے پرت آئے۔ ایس کارروائی وچ کافر بدواں دا سردار وعتور غطفانی سی۔

غزوہ بجران:

ربیع الثانی ۳ھ وچ اک وار فیر بنو سلیم دیاں جنگی تیاریاں دی خبر ملی۔ ہمیش وانگ ایس واری وی رسول خدا پہلے ای تیار ہو کے، تن سو مجاہداں دے اک دستے نال مدینے توں باہر پے۔ سفر تیزی نال جاری سی تاں جے شرارتی بنو سلیم تے

اچن چیت حملہ کرتا جاوے۔ آپؐ بحران تیکر اپڑے تے بنو سلیم دے ای اک بندے نے دس پائی کہ بنو سلیم تڑاں تے بہتریاں مار دے سن پر اسلامی لشکر دے آؤن داسن کے تیر بیتز ہو گئے نیں۔ آپؐ اپنی پالیسی موجب کجھ ڈیرا تھے ٹھہرے تے فیر پچھاں وطاناں نوں مڑ آئے۔

سریہ زید بن حارث:

مکے توں شام دے تجارتی رستے توں قریش کٹے جا چکے سن۔ ہن اوہناں کول تجارت لئی مکہ عراق روٹ باقی سی۔ مسلماناں دی کوشش سی کہ ایہہ رستہ وی اوہناں کولوں کھوہ کے اوہناں دی معیشت تے اک تگڑی سٹ لائی جاوے۔ ایہہ گل پہلے ای پڑھہناں دے علم وچ اے کہ مکے دی معیشت داسارا دارو مدار تجارت تے سی کیوں جے واہی نیجی والا تے او تھے ماحول ای نہیں سی۔ اک دن قریش دے مجمعے وچ صفوان بن امیہ نے آکھیا کہ ”دیکھوئی سجنو! محمدؐ تے اوس دے ساتھیاں نے ساڈی تجارت دارستہ بند کر دتا اے۔ سمجھ نیں آؤندی کہ ایس دا کیہ حل کڈیا جاوے۔ اوہ لوکی ہر ویلے ساحل تے ڈیرے لائی رکھ دے نیں۔ ساحل دے آل دوالے دے لوکاں اوہناں نال معاہدے کر لے نیں۔ اخیر اسیں کیہہ کر یے تے کتھے جاویں۔ جے اسیں اپنے گھراں وچ وڑے رہنے آں تے ایہدا مطلب ایہہ ہے کہ وہیلے بہہ کے ساری پونجی کھا جاویں۔ جے ایوں کیتا تے زندہ رہن تے حیاتی دے باقی دیہاڑے کٹن دی گل کوں بنے گی؟ صورت حال تے ایہہ ہے کہ مکے وچ رہ کے گرمیاں وچ شام توں تے سردیاں وچ حبشہ توں روزی کمالیندے ساں پرہن تے پونجی کھا کے کنگال ہون والی گل رہ گئی اے“

صفوان دی تقریر وری ایس گل بات توں بعد اسود بن عبدالمطلب بولیا کہ ”تسین ساحل دارستہ چھڈ کے عراق دے رستے سفر کرو تے ایس انجانے رستے لئی قبیلہ بنو بکر بن وائل دے اک بندے فرات بن حیان نوں اپنے گائیڈ دے طور تے اجرت دے کے (Hired) نال رکھ لو“ ایس مشورے توں بعد صفوان نے تجارتی قافلہ تیار کیتا جہدے وچ چاندی تے کجھ دجا تجارتی سامان سی جہدی قیمت گھٹو گھٹ اک لکھ درہم دی چاندی اے۔ جدوں قریش مکہ تجارتی قافلے دا پروگرام بنا رہے سن اوہدوں مدینے دا اک بندہ انعم بن مسعود وی مکے آیا ہویا سی۔ اوہ ایہہ سب کجھ دیکھ سن کے بڑی شتابی نال مدینے ہجیا۔ اوہدوں تیکر شراب حرام نہیں ہوئی سی۔ اوہ سلیط بن نعمان دی شراب دی بزم وچ شریک ہوئی تے قریشی قافلے دی ساری گل بات سنا دتی۔ سلیط نے ایہہ سارا واقعہ جناب رسول خدا نوں سنا دتا۔

ایہہ جمادی الثانی ۳ھ دی گل اے۔ آپؐ نے اک سوسوار دے کے جناب زید بن حارث نوں قافلے داراہ ڈکن دا حکم دتا۔ جناب زید بن حارث نے اوس تجارتی قافلے نوں نجد وچ قروہ دی تھاں تے ڈک لیا۔ مشرک خوف زدہ ہو کے دوڑ کھلوتے تے اپنا تجارتی سامان او تھے ای چھڈ گئے۔ مسلماناں نے قریشی گائیڈ فرات ابن حیان نوں گرفتار کر لیا تے اپنے نال مدینے لے آندا۔ فرات نے اسلام قبول کر لیا تے آزاد ہو گیا۔

ہن قریش مکے توں عراق جان والے تجارتی رستے توں وی محروم ہو گئے سن۔ مکے توں شام جان والی تجارتی گزرگاہ توں تے پہلے ہی ہتھ دھو چکے سن۔ ایوں قریش دی معاشی ناکہ بندی پوری ہو گئی تے شام تے عراق ول جان والے سارے

رستے اوہناں دے ہتھوں نکل گئے۔

اُم المومنین حضرت حفصہ نال نکاح:

بدرتوں اُحد دے درمیانی وقفے دا اک ہور قابل ذکر واقعہ حضرت حفصہ نال رسول خدا دی شادی دا اے۔ حضرت حفصہ خلیفہ دوم حضرت عمر بن خطاب دی بیٹی سن۔ جناب حفصہ دے گھر والے (خاوند) جنگ بدرتوں کچھ دیر بعد چلانا کر گئے۔ عدت پوری ہون توں بعد نبی اکرمؐ نے جناب حفصہ نوں اپنے نکاح وچ لے لیا۔ سیدہ حفصہ جناب رسول خدا دی چوتھی بیوی سن ﴿﴾

* * * *

غزوہ اُحد

جبل اُحد:

اُحد اک پہاڑ داناں اے جیہڑا مدینے توں شمال ول مسجد نبوی توں کوئی پنج کلومیٹر دے پندھتے ہے۔ مدینے دی روز و دھدی آبادی پاروں جبل اُحد ہن مدینے دا حصا بن چکیا اے۔ رت رنگا ایہہ پہاڑ لہندے چڑھدے ولوں کوئی چھ کلومیٹر لما اے تے کفر و اسلام دے اک وڈھے معرکے پاروں چوکھا مشہور اے۔ بخاری شریف دی اک حدیث موجب حضرت انس بن مالک دسدے نیں کہ اک وار نبی اکرم اُحد پہاڑ تے چڑھے۔ آپ دے نال جناب ابوبکر صدیق، جناب عمر فاروق تے جناب عثمان غنی وی سن۔ پہاڑ ہلن لگ پیا تے آپ نے فرمایا: ”اُحد! آرام نال رے۔ ایس ویلے اک نبی، اک صدیق تے دو شہید تیرے اُپر کھلوتے نیں۔“

رسول خدا دیاں جنگی چالاں وچ راز داری تے خفیہ طور تے خبراں حاصل کرن دے عمل نوں ہمیش ای چنگا چوکھا ضروری عمل سمجھیا گیا اے۔ جنگ دے میدان وچ کدّ ن توں پہلاں رسول خدا نے ویری ٹولے یا فوجاں دی حربی قوت، سیانف تے حوصلے دی ہر خبر اکھٹی کر لئی ہندی سی۔ جاسوسی دے ایس کھیت وچ حضرت بُسَیْس بن عمرو نے بدر وچ، حضرت معبد نے حمراء الاسد وچ، حضرت اوس بن خویلی نے ذی طویٰ وچ، حضرت بشر بن سعد نے عمرۃ القضاء دے موقع تے ظہران وچ، حضرت حسیل ابن نویرہ نے خیبر وچ، حضرت انس بن مرثد غنوی نے اوطاس وچ تے حضرت عبداللہ بن ابوحدرہ اسلمی نے بنو ہوازن دے خلاف رسول اللہ دے جاسوس دے طور تے چنگے سوہنے طریقے نال اپنے فرض نبھائے۔ ہجرت توں بعد مکے وچ رسول خدا دے چاچا حضرت عباس مسلماناں لئی جاسوسی کردے رے۔ چیتے رہوے کہ حضرت عباس مسلمان تے ہو چکے سن پر اوہناں نے اسلام قبولن دا بقاعدہ اعلان نہیں سی کیتا۔ ابھی گل ہجرت توں بعد مسلماناں دے کم آئی تے اوہناں نوں حضرت عباس راہیں مکے والیاں دیاں حربی چالاں دی پوری واقفیت حاصل ہندی ری۔

شوال ۳ ہجری دے دُجے دھا کے دی گل اے، نبی اکرم مسجد قبا وچ تشریف فرما سن تے مکے توں بنی غفار دا اک بندہ عم رسول جناب عباس بن عبدالمطلب دا اک خط لے کے سرکارِ دو عالم دی خدمت وچ حاضر ہو پئے اوس نے آؤندیاں ای اوہ خط حضور دی خدمت وچ پیش کیتا۔ آپ نے جناب ابی بن کعب کولوں چوکھی راز داری نال اوہ خط پڑھایا تے پتا لگا کہ قریش اک تگڑی تے زور اور فوج لے کے مدینے تے حملہ کرن لئی مکے توں ٹپے نیں۔ جے جناب عباس نے غفاری قاصد نوں چوکھی شتابی نال، تے ہواواں گ اڈ دیاں مدینے پہنچن دی پکی نہ کیستی ہوندی تے خورے خط کی لشکر توں اک ادھی دیہاڑ

ای پہلوں اپڑا پر اوس بندے دی ہمت تے کھری نیت پاروں چوکھے دنوں دا فرق پے گیا۔
 سپہ سالار اعظم حضرت محمدؐ نے ۱۲ شوال نوں بدھ دے دیہاڑے دوصحابیاں نوں، جنہاں دے ناں مونس تے انس سن،
 حالات دی اُگھ سگھ لین لئی شہروں باہر گھلیا۔ اوہناں آکے دسیا کہ قریش دا لشکر مدینے دے اصولوں ای نیڑے آچکيا اے،
 اوہناں دے جنوراں نے مدینے دیاں پکیلیاں دا صفایا کر چھڈیا اے تے کوئی ہراٹا نڈایاں پتر باقی نہیں چھڈیا۔
 مکی لشکر دیاں جنگلی تیاریاں:

عربستان دی سب توں وڈھی عبادت گاہ دے اگل ہتھ بندیاں نوں بدر دے میدان وچ پروں جیڑی سٹ وجی سی اوہ
 بھلن والی تے ہے ای نہیں سی۔ اُپے شملیاں والے ستر جواناں تے سرداراں نوں بدر دے انہے کھوہ کھا گئے سن۔ مکے دا کوئی
 گھرا جیا نہیں سی رہیا جہدے وچ وین پیندے نہ سنے گئے ہوں۔ رہے کھبے قریشی سردار تے اوہناں دیاں کجھ سوانیاں اوس
 دیہاڑے دی اڈیک لائی بیٹھے سن جس دیہاڑے اوہ بدر دے مقتولاں دا بدلہ لے سکسن تے فیراوہ اپنے گواچے ہوئے شرف
 تے چوٹھی عزت نوں نویں سرے حاصل کر سکسن۔ انتقام دی ایس اگ نے مکے دے کافراں نوں ساڑ کے رکھ دتا سی۔ ایوں
 اوہ چوکھیاں ای ماڑیاں حرکتاں تے اِلتاں کر دے رہندے سن۔

ابوسفیان ہن مکے دا اوہ کلا سردار سی جہدا مکے دے قریشیاں تے حکم چلدا سی۔ مکے دے ہر گھر وچوں رون دیاں
 واجاں سنن پاروں اوس نے ایہہ اعلان کر دتا کہ بدر وچ مرن والیاں دا ماتم بالکل نہ کیتا جاوے کیوں جے رون دھون نال
 اک پاسے دشمن خوش ہوئے گا تے دُجے پاسے ساڑے اندروں انتقام دی اگ ٹھنڈی ہو جاوے گی۔ ایس دا نتیجہ ایہہ ہو گیا
 کہ عرب جیہڑے اک اُٹھ دے گم ہو جان تے ورھا ورھا وین پاؤندے رہندے سن، اوہناں اپنے ہوٹھاں نوں جنڈرے لا
 لے تے ایوں انتقام دی اگ نوں ہور ہوا دین دا چوکھا آہر ہوندار ہیا۔ سردار ابوسفیان دا اپنا حال وی ایہہ سی کہ اوس نے ایہہ
 قسم کھادی ہوئی سی کہ جدوں تیکر اوہ بدر دے مقتولاں دا بدلہ نہ لے لوے گا، نہ نہائے گا تے نہ ای لیڑے بدلے گا، نہ منجے
 تے سویں گا تے نہ ای اپنی سوانی نال کوئی تعلق رکھے گا۔

ابوسفیان دی سربراہی وچ جیہڑا تجارتی قافلہ مکے خیر خیریت نال جکھن وچ کامیاب ہو گیا سی، اوس دا سارا سامان
 اچے تیکر دارالندوہ وچ محفوظ پیا سی۔ کسے وی حصہ دار Partner نوں اچے کجھ نہیں سی دتا گیا، نہ اصل زرتے نہ ای
 منافع۔ اک دیہاڑے عبداللہ بن ابوربیعہ، عکرمہ بن ابوجہل، حارث بن ہشام، صفوان بن امیہ تے کجھ ہور بندے صلاح کر
 کے ابوسفیان ول گئے تے جا کے آکھن لگے کہ ابوسفیان! محمدؐ نے ساڈی ساری قوم نوں تباہ کر دتا اے تے ساڈے چوٹی دے
 سرداراں نوں وڈھ کپ کے رکھ دتا اے۔ ہن جٹاں چیرا سیں اپنے مرن والیاں دا بدلہ نہ لے لوئیے ساڈے کلیجے نوں ٹھنڈ نہیں
 پیندی۔ ہووے ناں ہووے تسیں جنگ دی تیاری چھوہ دیو تے فوج دی کمان وی سنبھالو۔ نالے دُجی گل ایہہ ہے کہ دو نکلے
 وی لوڑی دے نیں، اوہناں دا وی کوئی سر بندھ کرو۔ تے ایس لئی ایہہ صلاح وی دینا چاہندے ہاں کہ تجارتی قافلے دا اصل
 سرمایہ مالکاں نوں پرتا دتا جاوے پر نفع جنگی فنڈ دے طور تے رکھ لیا جاوے۔ ابوسفیان نوں ہور کیہہ چاہیدا سی۔ آکھن لگا:
 کجھ بزرگاں دا خیال اے کہ سارا نفع جنگ لئی نہیں سی رکھیا گیا سگوں کجھ حصہ رکھیا گیا سی۔

﴿أَنَا أَوَّلُ مَنْ أَجَابَ إِلَىٰ ذَٰلِكَ، بَنُو عَبْدِ الْمُطَّلِبِ مَعِيَ﴾

”سب توں اگدریں میں اپنا نفع پیش کر دیا ہاں تے بنو عبدالمطلب وی میرے نال نیں۔“

مکے دے تاجر اک دینار دے نال اک دینار کماندے ہوندے سن۔ اک ہزار اٹھاس تے آئے تجارتی سامان داخل کوئی پنجاہ ہزار پونڈ دے برابر سی۔ ایس دا مطلب ایہہ ہونیا کہ اتنا ای نفع ہونیا سی۔ ایویں پنجاہ ہزار پونڈ دی اک وڈھی رقم جنگ دی تیاری لئی جمع کرا دتی گئی ۱۱ جنگ دی تیاری لئی ایہہ ہم نری مکے تیکر نہیں سی سگوں آل دوالے دے قبیلیاں دے سورمیاں نوں وی رلت پان دی دعوت دتی گئی۔ ایس مقصد لئی عمرو بن عاص، عبد اللہ بن الزبیری، ہبیرہ بن وہب، ابو عزمہ عمرو بن عبد اللہ الجسسی جے سیاسی قد کاٹھ والے بندیاں نوں مکے دے دوالے دسوں کیتی بیٹھے قبیلیاں وچ کھلا روتا گیا، جنہاں اپنی چرب زبانی تے عیاری نال، اوہناں دے جنگجو بندے اپنے نال گنڈھ لے۔ ایویں تن ہزار ۱۲ جنگ بازاں دا اک ٹکڑا لشکر اکٹھا ہو گیا جہدے وچ قریش دے نال بنو کنانہ، تہامہ دے قبیلے تے کئی حبشی قبیلیاں دے بندے رل چکے سن۔ ایس لشکر جرار وچ ست سوزرہ پوش تے دوسو گھڑ سوار شامل سن۔

قریشی سوانیاں تے اُحد دا معرکہ:

عرب وچ لشکراں دے نال سوانیاں نوں رکھن دا رواج تے ہمیش ای رہیا اے پر اُحد دی جنگ وچ اچھے طور تے مشرک سوانیاں دی رلت دا بندوبست کیتا گیا۔ اصل وچ عرب دی لوکانی اپنیاں سوانیاں پاروں موت نال کھید جاندی سی۔ اوہ ایہہ سمجھدے سن، تے ٹھیک ای سمجھدے سن کہ جے اوہ میدان وچ تلواراں تے تیراں دا حق ادا کرن وچ کامیاب ہو گئے تے سوانیاں دی نظر وچ اوہناں دا ٹورٹا ہور ودھ جاوے گا۔ دُجی وجہ ایہ ہوندی سی کہ لشکریاں نوں ایہ فکر ہندی سی کہ جے اوہ مارے گئے یاں میدان ہار گئے تے فیر اوہناں دیاں زنانیاں اوہناں دے ویریاں دیاں لونڈیاں بن کے رہن گئیاں۔ عرب وچ ایس توں ودھ کے گھائے دی گل دا سوچیا وی نہیں سی جاسکدا۔ میدان جنگ وچ سوانیاں دے ساتھ دی اک ہور وجہ ایہہ سی کہ اوہ جنگ وچ اپنے مرداں نوں جوش دواندیاں رہندیاں سن۔

جنگ اُحد لئی لشکر دی تیاری چھوی گئی تے قریشی سرداراں دیاں زنانیاں نے آکھیا کہ اوہ وی مدینے دی اٹ نال اٹ وجان لئی لشکر دے نال جان گئیاں۔ مشرک سردار اچھے صلاحواں وچ پے ہوئے سن تے ابوسفیان دی زنانی ہندجیڑی مشرک سردار غتبہ دی دھی وی سی، نے اُٹھ کے تقریر شروع کر دتی تے آکھن لگی ”تے تسین سانوں ڈکن والے کون ہندے جے، جدوں کہ ایسے غلطی پاروں تساں بدر وچ وی مار کھا دی جدوں تساں اپنیاں چھوکریاں نوں جھہ توں واپس موڑ دتا سی جیہڑیاں معرکہ دے ویلے تہاڈے نال ہوندیاں تے تہانوں غیرت دوا کے اگے ودھان دیاں..... ہائے اوہ بدر جتھے ساڈے پیارے، ویریاں دے ہتھوں مارے گئے۔“

۱ تاریخ الخلفاء جلد اول صفحہ: ۲۱۹ بحوالہ ضیاء النبی از پیر کرم شاہ الازہری جلد سوم صفحہ ۲۵۹

۲ غزوہ اُحد، شوقی ابوخلیل صفحہ: ۱۴۰

۳ التواریخ دے مطابق مشرک فوجیاں دی تعداد تن نہیں، پنج ہزاری۔ قاضی سلمان منصور پوری نے وی ۵ ہزار تعداد مانی اے۔

۴ حیات محمد از محمد حسین ہیکل صفحہ: ۳۵۴

ایوں ہند عورتاں دے اک جتھے نوں لشکر دے نال لے جان وچ کامیاب ہو گئی۔ توارخ نے اے تیکر اوہناں سوانیاں دے پٹھ دتے ہوئے ناں یاد رکھے نیں:

- ۱۔ ہند: عتبہ دی دھی، ابوسفیان دی گھر والی تے امیر معاویہ دی ماں۔
- ۲۔ اُمّ حکیم: حارث بن ہشام دی دھی، ابو جہل دی نوہ تے عکرمہ دی بیوی۔
- ۳۔ فاطمہ: ولید دی دھی، حارث بن ہشام دی بیوی تے خالد بن ولید دی بھین۔
- ۴۔ برزہ: مسعود بن ثقفی رئیس طائف دی دھی، صفوان بن امیہ دی بیوی تے عبداللہ بن صفوان دی ماں۔
- ۵۔ ریبطہ: منجہ بن حجاج دی دھی تے عمرو بن العاص دی بیوی۔
- ۶۔ خناس: مالک دی دھی، عمیر دی بیوی تے ابو عزیٰز تے مصعب بن عمیر دی ماں۔
- ۷۔ سلافہ: سعد (یاں سعید) دی دھی، طلحہ دی بیوی تے جنگ اُحد دے کافر علمبرداراں (مسفح، جلاس تے کلاب) دی ماں۔
- ۸۔ عمیرہ بنت علقمہ: ایس سوانی دا تعلق بنو حارث نال سی پر کسے آگو بندے نال اوس دے تعلق یاں رشتے دا پتا نہیں لگ سکیا۔

اُحد دی جنگ مبارزت دی تھاں تے قریشی سوانیاں دے اوہناں شعراں نال شروع ہوئی جیہڑے اوہ ہند دی کمان وچ دف و جا و جا کے گارہیاں سن۔ اوہ آکھ رہیاں سن ’’اسیں اُچی شانناں والیاں اوہ دھیاں ہاں، جیہڑیاں قالیناں تے ٹردیاں نیں۔ ساڈے گلہیاں وچ موتی نیں تے ساڈے سواندھیاں وچ کستوری۔ جے تسیں اگے ودھ کے ویریاں نوں نکرو گے تے اسیں تہاڈے نال جیہیاں پاواں گئیاں تے جے تساں میدان چھڈیا تے سمجھ لوؤ کہ اساں تہانوں چھڈیا۔‘‘

قریش دیاں سوانیاں سولہ سنگھار کر کے دف و جان دیاں، اپنے فوجی جواناں تے ڈل ڈل پیندیاں، اداواں وکھان دیاں تے شعر پڑھ دیاں جدوں مشرکاں دے لشکر نوں ہلاشیری دیندیاں سن تے لشکری تکبر تے مغروری نال ہو ر آکڑ دے سن۔ رسول خدا جدوں دشمنان دی ایہہ آکڑ ویکھدے تے رب سوہنے اگے عرض کر دے کہ رہا میں تے بس تیرے ای سہارے تے ہاں، میرے پلے تے کجھ وی نہیں، میرا جو کجھ وی اے اوہ تیری ہستی نال جڑیاں امیدیاں ای نیں۔ آپ فرما رے سن:

﴿اللَّهُمَّ بِكَ أَحْوَلُ وَبِكَ أَصْوَلُ وَفِيكَ أَقَاتِلُ حَسْبِيَ اللَّهُ وَنِعْمَ الْوَكِيلُ﴾

’’اے اللہ! میں تیری قوت نال ای دشمن تے ہلہ بولدا ہاں تے تیری طاقت نال ای اوہناں تے حملہ کردا ہاں

تے تیری رضائی ای لڑدا ہاں۔ مینوں اللہ ای کافی اے تے اوہی سب توں وڈا کارساز اے۔‘‘

محبوب خدا دی پریشانی تے لشکر اسلام دیاں جنلی تیاریاں:

کفار و لشکر بدھ بارہ شوال نوں مدینے دی نویں ریاست دے سامنے جبل اُحد دے نال اپنے خیمے گڈ چکيا سی۔ محبوب خدا دی پاک زبان تے حَسْبُنَا اللَّهُ وَنِعْمَ الْوَكِيلُ دا ورد جاری سی تے اوس اسلامی ریاست دی حفاظت لئی پریشان سن جہدے وچوں نکلن والیاں توحید دیاں لائیاں نے کجھ ای چراں پچھوں دنیا دے تین براعظماں نوں روشن کر دتا۔ دو جہاناں

دی سرکار نے گئے دنوں وچ بڑے ای دُکھ جرے سن پر آپ دی پاک حیاتی وچ ایوں دی بے چینی پہلوں کدے نہیں سی ویکھی گئی۔ جمعہ ۱۴ (چودہ) شوال دی رات تیکر آپ دی فکر تے پریشانی حدوں پٹی جاندی سی۔ اوہ رات باقی مسلماناں اُتے وی بڑی بھاری سی۔ کسے بندے نے وی رات نوں اکھ لا کے نہ دیکھی۔ اوس تے خزر ج دے مسلمان منڈے ساری رات مسجد نبوی تے حجریاں دا پہرا دیندے رے تاں جے کوئی کافر حملہ کرن دی جرأت نہ کر سکے۔

اُج شوال دی چودہ تریخ اے..... ریاست مدینہ دے پارلیمنٹ ہاؤس (مسجد نبوی) وچ پارلیمنٹ دا اجلاس جاری اے..... اک پاسے جناب ابوبکر، جناب عمر، جناب عثمان تے جناب حمزہ جے اصحاب الرائے تے دانش ور بزرگ تے دُجے پاسے جناب علی جے دلیر تے جاں نثار سنگی جہاد دے جذبے نال بھرے عبداللہ بن عمر، زید بن ثابت تے اسامہ بن زید جے سوہنے تے گھرو منڈیاں نوں لے کے بیٹھے ہوئے نیں۔ حد تے ایہہ ہے کہ اُج وی مشاورت لئی عبداللہ بن ابی جے بندے نوں وی دعوت دتی گئی اے، ایس خیال نال کہ ہے تے اوہ نیت دا کوڑھا پر بعض ویلے عقل دی گل وی کر جانا اے۔ صلاح مشورے وچ اوس نوں نال بٹھان دی دُجی وجہ ایہہ ہے کہ اوہ ایہہ نہ سمجھے کہ رسول خدا تے اوہناں دے بھناں نے اوس دی کوئی پرواہ نہیں کیتی..... اجلاس دی بقاعدہ کارروائی شروع ہو گئی اے۔ سب توں پہلوں سپہ سالار اعظم نے اپنی رائے بیان فرمائی اے۔ صلاح دتی اے کہ مہاجر بھراشہروں باہر نکل کے نگرانی کرن تے مدینے دے پرانے وسنیک (انصار بھرا) شہر دے وچ قلعہ بند ہو کے تاڑ وچ رہن تے جے دشمن شہر وچ آوڑے تے حالات دے مطابق اوہدے نال جوڑ پالین۔

ہن عبداللہ بن ابی بول رہیا اے تے آکھ رہیا اے ”یا رسول اللہ! میں ایس شہر دا پرانا وسنیک ہاں۔ اسیں ہمیش ای ایس شہر دی حفاظت ایوں کیتی اے کہ سوانیاں تے نیانیاں نوں کسے قلعے وچ بند کر کے اوہناں دے چار چھیرے پتھراں دے ڈھیر لا دتے تے شہر دے باہر فصیل کھڑی کر کے تھوڑے تھوڑے پنڈھ تے چوکیاں بنادیتاں۔ فیر جدوں دشمن نے ہلد بول دتا تے اوہدروں سوانیاں تے بالان نے دشمنان تے پتھراں دا مینہ پایا تے اوہدروں مرداں نے تلواراں کھچ لیئاں۔“

”وکیھو یا رسول اللہ! مدینے دی مثال اوس کواری کڑی ورگی اے جیہڑی ہمیش کواری ای ری اے۔ اُج تیکر کسے دشمن نے ساڈے تے فتح حاصل نہیں کیتی۔ اسیں جدوں وی شہر وچ رے کے دفاع کیتا اے، سانوں ستے خیراں رہیاں نیں۔ یا رسول اللہ! دھاڑیاں نوں اُحد اُتے مورچے ملن دیو، جناب میری گل من لین۔ وکیھو یا رسول اللہ! مدینے دی حفاظت دے ایہہ داء تے ول مینوں اپنے وڈکیاں کولوں، سمجھ لوؤ، وراثت وچ لہجے نیں تے نالے اُج دی گھڑی دے سیانیاں نے وی مینوں ایہی گل دسی اے۔“

صلاح مشورے جاری نیں، رسول خدا بڑے آرام تے تحمل نال ابن ابی دی گل بات سن رے نیں تے دل وچ خیال کر دے نیں کہ گل تے ایس نے سیانف دی کیتی اے۔ مہاجراں دے تے انصار دے سارے ای پرانے بندے ایسے گل دے حق وچ نیں تے سوچ رے نیں کہ ہووے نہ ہووے رسول خدا ایسے گل تے راضی ہو جان۔

پارلیمنٹ وچ ایس ویلے کجھ اچھے شیر پیشہ جوان وی موجود نیں جیہڑے بدر وچ ایس پاروں نہ رل سکے کہ اوہ کئی عمر دے سن یاں اوہوں تیکر اوہ مسلمان ای نہیں سن ہوئے یاں اوہناں نے جنگ تے لڑی سی پر اوہ اک وار فیر جہاد و قتال دا سواد لین لئی بے چین نیں تے شہادت دا شوق اوہناں نوں مدینے توں باہر کھچی لے جاندا اے۔ ایہہ گھبر و جیہڑا ہن سامنے اُٹھ کے کھلو گیا اے، نعمان بن مالک اے۔ اوس نے اپنی گل شروع کر دتی اے۔ آکھ رہیا اے:

یا رسول اللہ! لَا تَحْرُمْنَا الْجَنَّةَ فَوَالَّذِي نَفْسِي بِيَدِهِ لَا ذُحُلْنَهَا

”یا رسول اللہ! سانوں جنت توں محروم نہ فرماؤ۔ اُس ذات دی قسم اے جہدے ہتھ وچ میری جان اے میں

جنت وچ داخل ہو کے رہواں گا۔“

رسول خدا: لِمَ؟ (کیوں؟)

نعمان بن مالک: لَا نَأْتِي أَحَبُّ إِلَهُ تَعَالَى وَرَسُولَهُ وَلَا أَفْرُ يَوْمَ الرَّحْفِ

”میں اللہ تے اوس دے رسول نال محبت رکھدا ہاں تے میدان توں بھجدا وی نہیں۔“

رسول خدا: صَدَقْتَ (نعمان! توں سچ آکھیا اے)

ہن اک دُجے نو جوان حضرت اوسؓ اپنی رائے دے رے نیں تے فرما رے نیں ”یا رسول اللہ! سانوں ایہہ گل چنگی نہیں لگی کہ مکے دے قریش پچھاں پرت کے ایہہ گل آکھن کہ دیکھ لوئی لوکو! اساں محمد نوں مدینے دے گھراں تے قلعیاں وچ بند کر کے رکھ دتا جے، ایوں تے اوہ ہور شیر ہو جان گے۔ اے اللہ دے رسول! بدر وچ تے اسیں تن سوتیراں ساں، فیر وی اللہ نے سانوں سرخرو کیتا۔ ہن تے اسیں واہوا چوکھے بندے آں۔ اسیں تے ایس دن نوں اڈیک رے ساں۔“

لو اک ہور جوان اُٹھیا جے۔ آکھ رہیا اے:

”مینوں ایہہ گل رتی بھر برداشت نہیں ہونی کہ قریش مکے جا کے ایہہ آکھن کہ محمد ساڈے کولوں ڈر کے قلعے وچ

جاوڑے۔ سجنو! جیہڑے ویریاں نے ساڈا پکلی بٹا، ہر شے اجاڑ دتی اے تے ساڈے پھلاں دے رُکھ کو نہ موبنے کر دتے نیں، جے اسیں آج اوہناں نوں ڈکا نہ لایا تے سوچو کہ فیر سانوں پھل کوں نصیب ہووے گا؟ ساڈا دشمن بدر دی ہارتوں بعد اک سال تیکر دوڑ بھج وچ جٹیا رہیا اے تے تاں کدرے جا کے کجھ عرباں تے اوہناں دے حبشی غلاماں نوں نال گنڈن وچ کامیاب ہوئیا اے۔ قریش دی ایہہ جرأت سانوں کدے وی گوارا نہیں کہ اپنے گھوڑے تے اُٹھ ساڈے شہر دے اندر لے آؤن۔ ایوں تے اوہ کسے نہ کسے دیہاڑے سانوں تھلے لالین گے۔“

نو جواناں نے کھل کے اپنے جذبیاں دا اظہار کر لیا اے پر گل اچھے مکئی نہیں۔ کجھ سیانی عمر دے بندے وی شہرتوں باہر نکل کے جوڑ پاؤن دے حق وچ دسدے نیں۔ اللہ تے اوس دے رسول دے شیر جیہڑے آپ دے چاچا وی نیں، عرض کر رے نیں۔

﴿وَالَّذِي أَنْزَلَ عَلَيْكَ الْكِتَابَ لَا أَطْعَمُ الْيَوْمَ طَعَامًا حَتَّىٰ أَجَالِدَهُمْ بِسَيْفِي خَارِجَ

الْمَدِينَةِ﴾

”یا رسول اللہ! اوس ذات دی قسم اے چنے تہاڈے تے کتاب نازل فرمائی کہ میں آج اوس ویلے تیکر کچھ نہیں کھاواں گا جدوں تیکر میں مدینے توں باہر نکل کے اپنی تلوار نال فیصلہ نہیں کر لیندا۔“
لوہن مرد پیر حضرت خیشمہ دی واری اے۔ فرماؤندے نیں:

”امید ہے اللہ سانوں فتح یاب ای کرے گا، نہیں تے شہادت تے نصیب ہووے گی جہدے توں میں بدر وچ محروم رہ گیا ساں۔ میں تے بدر توں تیکھے ہٹن لئی وی تیار نہیں ساں پر میرا پتر سعدوی مڑن والا کدوں سی؟ اخیر اساں پیو پتراں قرعہ پایا، میرے پتر دی قسمت جاگ پئی تے اوہ بدر وچ شہید ہو گیا۔ یا رسول اللہ! اوس رات میں بڑا رویا سا ہے۔ فیر میرے پتر نے مینوں دسیا کہ اباجی! رب نے جیہڑے ساڈے نال وعدے کیتے سن، اسیں اوہ سارے پورے ہندے ویکھ لے نیں، تسیں وی ساڈے نال آ رلو۔ یا رسول اللہ! مینوں رب دی سونہ جے، میں تے اوہدوں دا ای اپنے پتر دے نال جنت وچ رہن دی اڈیک لائی بیٹھا ہاں۔ اے رسول خدا! ویکھ لوؤ میں بڈھا ہو گیا ہاں، میریاں وڈیریاں ہڈیاں جواب دے رہیاں نیں، میرے وچ دم نہیں رہیا۔ میں بس ہن اپنے رب نال ملاقات چاہندا ہاں۔“

رسول خدا نے ساریاں گلاں سنیاں نیں پر فیروی فرما رے نیں دوستو! ”مینوں تہاڈی ہار دا خطرہ اے“ پر ایہدے تے وی جذبہ جہاد نال بھرے ہوئے مجاہداں دی ضد وچ کوئی گھٹا نہیں آیا۔ ہن رسول خدا دے سامنے دواہی رستے نیں۔ اک ایہہ کہ اکثریت دی رائے توں من کے شہروں باہر دشمن نال ٹکر لین تے دُجا ایہہ کہ اللہ وحی نال اپنے محبوب نوں کوئی حکم جاری کر دیں۔

ایہناں صلاحواں وچ نماز جمعہ دا ویلا ہو گیا۔ رسول خدا نے نماز جمعہ پڑھائی۔ گل بات تے صلاحواں جاری رہیاں۔ نماز عصر دا وی ویلا ہو گیا۔ عصر تیکر نہ تے مدینے توں باہر جا کے لڑن والیاں اپنا فیصلہ بدل دیا تے نہ ای جبرائیل تشریف لیاے کہ اوہ کسے حکم ربی نال مسلماناں نوں پابند کر دیندے۔ عورتوں بعد سپہ سالار اعظم، جناب صدیق اکبر تے جناب عمر فاروق دے نال گھر تشریف لے گئے۔ حضرت اُسید بن خضیر تے سعد بن معاذ، جیہڑے قلعہ بندی دے حامی سن، اوہناں اک وار فیر باہر کھلوتے مسلماناں نوں، تے اچھے طور تے نوجوان منڈیاں نوں ایہہ گل سمجھان دی چتا کیتی کہ ”وکیھو! تہا نوں ایہ اندازا وی ہو گیا اے کہ رسول خدا شہروں باہر نکل کے جنگ کرن دے حق وچ نہیں ہن فیروی تسیں ضد کیتی بیٹھے او۔ ایہہ کڈی ماڑی گل اے؟ اے وی ویلا ہے آپ دی رضا تے راضی ہو جاؤ۔“

گل تے جواناں دی سمجھ وچ آ گئی پر اوہنے چیر نوں اوہ ویلا کھنجاہ بیٹھے سن۔ اچن چیت رسول خدا زہ پہن کے باہر تشریف لیاے۔ مسلمان بھج کے اگے ودھے تے عرض کیتی کہ ”یا رسول اللہ! تساں رائے مگئی سی، اساں رائے دے دتی۔ ساڈا مقصد کوئی تہاڈی مخالفت تے نہیں سی۔ خدا توں بعد صرف تہاڈا فرمان ہی تے ہے جہدے تے اسیں کٹ مرنا اے“ پر رسول خدا نے جواب دتا کہ کسے نبی نوں ایہہ گل نہیں چچی کہ اوہ ہتھیار بنھ کے لاہ دوے، جدوں تیکر کہ رب اوس دے تے اوس دے دشمن دے وچکار فیصلہ نہ کر دے۔ آپ نے گل اگے ٹوڑ دیاں حوصلے تے صبر توں کم لین دی ہدایت کیتی تے ارشاد فرمایا کہ

﴿اٰمُضُوْا عَلٰی اِسْمِ اللّٰهِ تَعَالٰی وَاَلَكُمُ النَّصْرُ مَا صَبَرْتُمْ﴾

”بس ہن اللہ دانالے کے اگے ودھو، جے تیں صبر کرو گے تے اللہ دی نصرت تہاڈے نال رہوے گی۔“

ایوں عصر توں بعد اک ہزار مجاہد عربستان دے اوس ویلے دے سب توں تگڑے لشکر دا مقابلہ کرن لئی مدینے توں باہر نکلن لئی تیار ہو گئے۔ لشکر وی ایہو جہیا کہ جہدے وچ ست سوزرہ پوش تے گھٹو گھٹ دوسو گھڑ سوار شامل سن تے تیکر تے غرور دی کوئی انت ای نہیں سی۔ دُجے پاسے مسلماناں دی فوجی طاقت دا حال ایہہ سی کہ صرف پنجہ سوار تے باقی سب پیادہ۔ تن سو بندے ایہو جے سن جیہڑے اعتبار دے قابل ای نہیں سن، کیوں جے یاں تے اوہ مسلمان ہو کے وی اے تیکر عبداللہ بن ابی دے اثر و رسوخ وچ سن تے یاں اوہ یہودی سن تے عبداللہ دے پرانے حلیف ہون پاروں اوس دے نال ٹرن تے مجبور سن۔

اسلامی لشکر مدینے توں باہر شیخین دی تھاں تے اپڑیا تے کمانڈر انچیف نے فوج دا معائنہ کرنا چاہیا۔ معائنہ کر دیاں پتہ لگا کہ فوج وچ کجھ اچھے منڈے وی نیں جہناں دا جہاد دا جذبہ ڈل ڈل پیندا اے پر اوہ اے جے کئی عمر دے بال نیں تے لڑن بھرن دا وی اوہناں نوں کوئی تجربہ نہیں۔ رحمت اللعالمین نوں بھلا ایہہ کیوں گوارا ہو سکدا اسی کہ نری فوج دی تعداد دودھان لئی نا تجربہ کار بالاں نوں جنگ دی اگ وچ جھونک دیندے۔ ایس لئی آپؐ نے اسامہ بن زید، براء بن عازب، عبداللہ بن عمر، زید بن ثابت، ابوسعید خدری، نعمان بن بشیر، سمرہ بن جندب تے رافع بن خدیج نوں واپس مدینے پرت جان دا حکم دتا۔ رافع بن خدیج دے جذبیان دے واری جاییں، اوس نے ایہہ ہوشیاری دکھائی کہ منڈیاں دے پچھلے پاسے کھلو کے اڈیاں زمین توں چک لییاں تاں جے قد چوکھا جا پے تے عمر وی چوکی لگے۔ نال ای اوہناں کسے صحابی کولوں ایس گل دی تصدیق وی کروائی کہ اوہ بہت ماہر تیر انداز وی نیں۔ ایوں جناب رافع نوں اُحد وچ تیراں دے جوہر دکھان دی اجازت مل گئی۔ سمرہ وی اے جے کئی عمر دے منڈے سن پر اوہ سمجھ دے سی کہ اوہ طاقت تے جُستے وچ رافع تے بھارے نیں۔ عرض کییتی کہ ”یا رسول اللہ! تہاڈا حکم ساڈے لئی پکاتے پیڈا حکم اے۔ کیہہ مجال اے دَم مارے پر عرض ایہہ ہے کہ میں تے رافع توں وی تگڑا ہاں۔ اوہ وی دشمن نوں پھڑکائے گاتے رب نے چاہیا تے میں وی کچھ نہیں رہواں گا۔ یا رسول اللہ! تیں اپنی تسلی لئی ساڈا گھول کرا کے ویکھ لوؤ، جے میں رافع دی کنڈ لائی تے فیر مینوں وی اجازت بخش دینا۔“ ایہہ سن کے رسول خداؐ نے دوواں دی کشتی کرائی۔ سمرہ بن جندب نے رافع نوں ٹاہ لینا، رب جانے سمرہ نے زور نال رافع دی کنڈ لائی یا کوئی تر لا مار لیا کہ ”وکیہ رافع! تیرا تے سوہرا ہی گیا اے، توں یار وی ایں تے بھرا وی، جے توں میتھوں دَھے جاویں تے تیرا کیہہ نقصان اے؟ وکیہ یار! مینوں جنت توں محروم نہ کر۔ بہر حال سمرہ جت گیا تے ایوں اوس نوں وی خدا تے اس دے رسول دے دشمن نال ٹکر لکین دا موقع مل گیا۔

شیخین دے مقام تے جیہڑی دُجی چیز سامنے آئی اوہ ایہہ سی کہ اسلامی لشکر وچ رسول خداؐ نوں کجھ اچھے بندے نظر آئے جہناں نوں آپؐ نہیں پچھان دے سن۔ پچھیا تے پتہ لگا کہ ایہہ عبداللہ بن ابی دے حلیف یہود نیں۔ ایہہ سن کے آپؐ نے فرمایا کہ ”مشرکاں دے اک جتھے دے خلاف جنگ وچ، دُجی قسم دے مشرکاں دی امداد کوئی معنے نہیں رکھدی۔ ایوں اوس

مشکل گھڑی ویج وی آپؐ نے اوہناں دی مدد قبول توں صاف انکار کر دتا تے اوہناں نوں آکھیا کہ ویکھو عیٰ سبحو! ”تہاڈے سامنے دورستے نیں۔ پہلا ایہہ کہ تسیں اللہ دی واحدیت دا اقرار کر کے مسلمان ہو جاؤ تے ساڈے نال رُل کے مشرکاں دے خلاف جنگ کرو تے دُجارتا مدینے نوں جاندا اے، تسیں واپس پرت جاؤ۔ ایہہ سن کے یہودی جتھے نے مدینے پرت جان دا فیصلہ کر لیا۔

عبداللہ بن ابی، جبہڑا پہلوں ای ایس گل تے نراض سی کہ لڑائی مدینے توں باہر لڑن دا فیصلہ کیوں کیتا گیا اے۔ اوس نوں اک بہانہ مل گیا تے اوہ وی اپنے نال دے بندیاں نوں لے کے مدینے پرت گیا۔ یہودی حلیف جتھے تے عبداللہ دے نال دے چوٹھے مسلماناں دی کل تعداد تن سو دے نیڑے تیڑے سی۔ یہودیاں تے منافقاں دی ایس واپسی توں بعد اسلامی لشکر ہور ماڑا ہو گیا تے رسول خداؐ دی پریشانی ویج وادھا ہو گیا۔

ست سو مجاہدین اسلام ہن شیخین دی تھاں تے ڈیرے لائی بیٹھے سن۔ رات ہو گئی تے کمانڈر انچیف نے محمد بن مسلمہ دی کمان ویج پنجابہ مجاہداں دا اک دستہ لشکر دی حفاظت تے چوکیداری لئی مقرر کیتا۔ اصل ویج جناب محمد بن مسلمہ دی ذمہ داری ایہہ سی کہ اوہ دشمن تے نظر رکھن۔ کئی لشکر نے وی مسلماناں نوں ڈیرے لاندیاں ویکھ لیا سی۔ ایوں اوہناں نے وی اک جتھے عکرمہ بن ابوجہل دی سربراہی ویج پہرے داری لئی مقرر کر دتا۔ تہجد دے ویلے آپؐ نے شیخین توں کوچ دا حکم فرمایا۔ عین نماز فجر دے ویلے اسلامی لشکر نے کفار دے بالکل سامنے جبل اُحد دے نال ڈیرے لالے۔ اُحد دیاں ٹیسیاں تے بلالؓ دی واج گونجی، لشکر اسلام دے کمانڈر انچیف تے امامؐ نے نماز فجر پڑھائی تے فیر جنگ دی تیاری چھوہ دتی۔ ایس موقع تے آپؐ نے مجاہداں نوں ایہہ گل وی دسی کہ آپؐ نے راتیں خواب ویج ویکھیا اے کہ فرشتے حضرت حمزہؓ نوں غسل دے رے سن ﴿﴾ آپؐ نے جبل اُحد دے نال اپنیاں صفیاں ایوں ترتیب دتیاں کہ پہاڑ ول کنڈ ہو گئی۔ مجاہداں دیاں صفیاں دے پچھے، جبل رماۃ دے تھلے آپؐ نے اپنا ہیڈ کوارٹر بنایا ﴿﴾ جنگ بدر ویج جبہڑا کوڈورڈ اُحد، اُحد مقرر کیتا گیا سی اوہ بدل دتا گیا تے نواں کوڈورڈ ”اُمت، اُمت“ مقرر کیتا گیا۔ حضرت مصعب بن عمیرؓ نوں علم عنایت کیتا گیا۔ حضرت زبیر بن عوامؓ رسالے دے افسر مقرر ہوئے۔ حضرت مقدادؓ، حضرت علیؓ تے حضرت حمزہؓ نوں کچھ خاص ہدائیاں جاری کیتیاں گئیاں۔ جناب عبداللہ بن جبیرؓ نوں سب توں بھاری تے وڈی ذمہ داری دتی گئی۔ اوہناں نوں اوہ واحد رستہ سنبھالن دی ہدایت کیتی گئی جتھوں دشمن بڑا خوفناک حملہ کر سکد اسی۔ اوہناں دی کمان ویج پنجابہ سیانے تے تجربہ کار تیر انداز دتے گئے تے اوہناں نوں اخیر لمے تیکر اوس گھاٹی نوں نہ چھڈن دی تاکید کیتی گئی جوں توارخؓ جبل عینین، جبل رماۃ، عبداللہ بن جبیرؓ والی گھاٹی یاں خالد بن ولیدؓ دے حملے والا رستہ دے نانواں نال یاد کردی اے۔ جناب رسول خداؐ نے گھاٹی دے محافظ تیر انداز جتھے نوں ہدایت کیتی کہ ”جنگ دا نتیجہ کچھ وی ہووے، جت ہووے یاں ہار، تہانوں گھاٹی چھڈن دی بالکل اجازت نہیں۔ تہاڈا اک ای کم اے تے اوہ ایہہ ہے کہ تسیں ساڈی کنڈ دا دھیان رکھنا اے۔ مینوں شبا اے کہ دشمن کنڈ پچھے وار کرن دی کوشش کرے گا۔

تسلیں اپنی تھان تے ڈٹے رہنا تے اوتھوں ہلن دانان وی نہ لینا۔ جے تسلیں ایہہ دیکھو کہ اسیں قتل ہو رہے آں تے فیروی تسلیں اپنی تھان نوں ذرا وی نہیں چھڈنا تے نہ ای ساڈی مددیاں سانوں بچاؤن دی چٹنا کرنا۔ تہاڈا کم بس ایہہ ہے کہ تسلیں دشمن تے تیر وساندے رہنا۔ چیتے رکھو کہ وسدے تیراں وچ گھوڑے اگے نہیں ودھدے۔“ ایس توں بعد آپؐ نے مجاہداں دا حوصلہ ودھایا، اوہناں نوں چیتے کرایا کہ اوہ کس وڈھے مقصد لئی جہاد کرن نکلے نیں، اوہناں نوں شہادت دے اُپے درجے تے وڈھے مرتبے دا چیتا کرایا تے معرکہ قتال وچ صبر تے حوصلے دی تلقین کیتی۔

شمشیر نبیؐ تے ابو دجانہؓ:

مسلمان مجاہداں دے جوش تے جذبے نوں ودھان لئی سپہ سالار اعظمؐ نے اک چوکھا ای سوہنا طریقہ ایہہ وی آزمایا کہ مجاہداں دے سامنے کھلو کے اپنی تلوار نیام وچوں باہر کڈی تے واج دتی:

”مسلمانو! ہے کوئی جہیر امیری ایس تلوار دا حق ادا کر دیوے؟“

زبیر بن عوامؓ: میں حاضر آں یا رسول اللہ۔

رسول خداؐ: ہو رکوئی مجاہد؟

صدیق اکبرؓ: یا رسول اللہ! مینوں حکم کرو۔

رسول خداؐ: خدا دے شیر دل مجاہدو! کوئی ہو رجو؟

عمر فاروقؓ: سالار اعظم! شمشیر نبیؐ دا حق فاروق ای ادا کر سکدا اے۔

رسول خداؐ خاموش نیں۔ ایس توں پہلاں کہ آپؐ کسے دُجے مجاہد نوں طلب فرماؤندے، اک مرد دلیر اُٹھ کھلوندا اے۔ ایہہ سماک بن خشرہ اے تے خزر ج دے رئیس سعد بن عبادہ دے چاچے دا پتر اے۔ ہجرت نبویؐ توں پہلوں ای رسول خداؐ دے دیدار توں بغیر ای آپؐ تے ایمان لیا چکیا سی۔ پہلواناں ورگا جتا اے تے قد کاٹھ وی چنگا اے۔ ایہہ مجاہد مدینے وچ ابو دجانہ دی کنیت نال مشہور اے۔ عرض کردا اے:

یا رسول اللہ! ایس تلوار دا حق کیہہ اے؟

رسول خداؐ: دشمنناں دے بوتھیاں تے ایوں وجے کہ ایہہ وگی ہو جاوے۔

ابو دجانہؓ: یا رسول اللہ! فیرا ایہہ تلوار مینوں عنایت کر دیو۔

رسول خداؐ: کدرے ایوں نہ ہووے کہ تسلیں ایہہ تلوار لے کے پچھلیاں صفیاں وچ لڑو!

ابو دجانہؓ: نہیں یا رسول اللہ! ایوں نہیں ہووے گا، رب دی سونہہ اگے ای ودھاں گا۔

رسول خداؐ نے اپنی تلوار ابو دجانہ دے ہتھ وچ دے دتی۔ ابو دجانہؓ داٹوہر دیکھیا نہیں جاندا۔ اوہناں اپنا لال پٹکا سرتے ولایا تے دوواں فوجاں دے وچکار کدے اوہدے کدے ایدھر آکڑ کے ٹھلنا شروع کر دتا۔ ابو دجانہؓ دا لال پٹکا تے پہلوں ای مدینے وچ موت دی پگ سجھیا جاندا سی، ہن تے ہتھ وچ تلوار تے سینے وچ خدا دے رسولؐ تے اپنے سپہ سالارؐ دا دتا ہو یا اعتماد وی سی۔ میرے ماپے واری جان ابو دجانہؓ توں، اوہ عربستان دے خوفناک تے مغرور ہوئے لشکرنو ایں قہر تے غضب نال دیکھ رہیا سی

کہ جے ہنے ای سرکار اوس نوں حکم دین تے اوہ اوہناں نوں کچیاں کھا جاوے۔ سرکار دو عالم نے ابو دجانہ دی ایہہ اکڑ ویکھ کے فرمایا کہ ”اللہ ایس ٹور نوں پسند تے نہیں کردا پر جہاد دے موقع تے (دشمن تے رعب پاؤن لئی) ایہہ جائز اے۔“

قریش دا خوفناک تے مغرور لشکر:

قریش دے مغرور لشکر دیاں تیاریاں توں ایوں لگدا سی کہ اوہ مدینے نوں ایوں مٹا دین گے جو یں کوئی غلط لکھیا گیا اکھر مٹایا جاندا اے۔ اوہناں دی ہر حرکت توں تکبر تے غرور ڈل پیندا سی۔ ایوں جا پدا سی کہ ایس وار نہ تے اوہ بندے مروا کے مکے ول بھجن گے تے نہ ای اوہ جنگ دے میدان وچ کوئی غلطی کرن گے۔ اوہناں حربی لوڑاں دے عین مطابق صف بندی کیستی۔ مینہ تے خالد بن ولید نوں مقرر کیا، میسرہ تے عکرمہ بن ابوجہل نوں لایا تے لشکر دا علم عبدالعزیٰ طلحہ بن ابوطلمحہ نوں پھڑایا گیا۔ صفان دے کچھے وڈھے تے اخیر مورچے تے زنانہ لشکر سی جہدی کمان ہند زوجہ ابوسفیان دے ہتھ وچ دتی گئی۔ اس زنانہ جتھے دا اسلحہ دف، طبل، سولہ سنگھار تے فوجیاں نوں اک طرحاں تاء دین والے شعر تے گیت سن۔ ابوسفیان اپنے فوجیاں نوں غصہ تے جوش دواں لئی سارے نفسیاتی حربے وی ورت رہیا سی۔ اپنے علمبردار طلحہ نوں پکیاں کرن لئی اوس نوں آکھدا اے کہ ”وکیھ لے میاں! جھنڈے دی سانجھ کر سکنا ایں تے پھڑ لے، نہیں تے اے ویلا ای کسے ہور نوں دے دے۔“ طلحہ آکڑ کے جواب دیندا اے ”ابوسفیان جی! جوڑ تے پین دیو فیروکھیا جے کہ قبیلہ عبدالدار تہانوں کیہہ کرتب دکھاندا اے“ ابوسفیان دا حربہ کامیاب رہیا۔ طلحہ دے قبیلے نے طلحہ دا جواب سن کے نعرے بازی شروع کر دتی تے ایوں اوہناں دا جوش ہور ودھ گیا۔

ابو عامر فاسق:

قریشی لشکر دا اک خوفناک تے نفرت جوگ کردار ابو عامر وی سی۔ ابو عامر جس دا اصل ناں عبد عمرو بن صفی سی، مدینے دا پرانا و سنیک سی تے اوس قبیلے وچ اوہدا ویں ای ٹوہر ٹپا سی جیہڑا قبیلہ خزرج وچ عبد اللہ بن ابی داسی۔ اوس نوں وی جناب رسول خدا توں اوویں دی ہی تکلیف سی جو یں دی عبد اللہ بن ابی نوں سی۔ رسول خدا دی مدینے وچ تشریف آوری نال اوس دی چوہدرہ ماری گئی سی تے ایوں اوہ مدینہ چھڈ کے مکے جاو سیاسی۔ دیس چھڈ کے پردیس ڈیرے لان وچ صرف اک ای رازی تے اوہ ایہہ سی کہ اوہ کافراں نوں تپا دیوے، رسول خدا دے قتل دی سازش تیار کرے تے ہووے نہ ہووے اک وار اوہ فیر مدینے وچ منڈلی لا کے بیٹھے تے لوکاں اوس دیاں لتاں گئے۔ جنگ بدر وچ اوہ کسے گلوں مشرکاں دے نال رل کے مدینے تے حملہ آور نہ ہو سکیا پر ہن اوہ اپنی ای جمن بھوں دی اٹ نال اٹ کھڑکان لئی قریشی لشکر نال رلت پا چکیا سی تے نالے اوہناں نوں ایہہ یقین وی دوا چکیا سی کہ جیہڑی گھڑی میں لشکر اسلام ول و اج دتی تے میرے قبیلے اوس دے بندیاں نوں ایہہ پتا لگا کہ ایہہ ابو عامر دی و اج اے تے اوہناں اوسے ویلے محمد نوں چھڈ کے میرے نال آ رلنا اے۔ ابو عامر نوں ایس گل دا پک وی سی کہ اوس دی گل نہیں موڑن گے۔ ابو عامر دے جتھے وچ قبیلہ اوس دے اوہ بندے شامل سن جیہڑے اوس نوں اک نیک تے پرہیزگار بندہ سمجھ دیاں ہونیاں مدینے وچ اوس دی چوکی ٹہل سیوا کر دے ہندے سن تے فیر اوس دے مکے ٹر جان مگروں اوہ وی مکے ٹر گئے سن۔ ایس توں وکھ اوس دی کمان وچ مکے دے سرداراں دے کجھ غلام وی سن۔

لہو دے چھٹے:

دوویں فوجاں آمنے سامنے تیار سن تے ابو عامر نے اچی ساری و اج لائی ”اویں قبیلہ اوس دے لوکو! مینوں پچھانوں،

میں ابو عامر آں۔“ ایہہ واج لا کے ابو عامر امید لائی بیٹھاسی کہ جویں اوس دے جوان شہد دیاں کھیاں نیں تے اوہ ملکہ مکھی، پراوسیاں نے ایہہ ثابت کر دتا کہ اوہ شہد دیاں کھیاں تے ضرور نیں پراوہناں جس چھتے دے دوالے کھمنا اے اوہ پہلوں ای اوہناں دے کول اے۔ اوہناں ابو عامر نوں جواب دتا:

”آ ہو بدکارا! اسیں تینوں پچھان لیا اے پر ساڈیاں اکھاں توں دور ہو جا۔ جارب تیری مراد کدے پوری نہ کرے۔“ ایہہ سن کے فسادی ابو عامر بڑا چکی ہو گیا تے آکھن لگا ”افسوس کہ میرے توں بعد میری قوم فتنہ تے فساد دا شکار ہو گئی اے۔“ فیر اس نے اسلامی لشکرنوں تیر مارنا شروع کر دتے۔ تیر مک گئے تے اس نے پتھر دگنا شروع کر دتے۔ فیر رسول خدا نے جنگ دا اذن دتا۔ دوویں فوجاں اک دے جے نوں جٹ پیاں تے لہو دے چھٹے اڈ اڈ کے اُحد پہاڑ نوں رتا کرن لگ پے۔ نال ای عکرمہ بن ابو جہل دے جتھے نے مسلماناں دے بازو تے اک زور دار حملہ کر دتا۔ جواب وچ مسلماناں نے اوہناں ول ایوں پتھر وگائے کہ اوہناں دی مت مار کے رکھ دتی۔ مسلماناں دے بازو تے حملہ اوویں وی ایڈا سوکھا نہیں سی کیوں جے جبل اُحد نے اوہناں دی کنڈ نوں سانھیا ہو گیا سی۔ ایس اقدام دا نتیجا ایہہ ہو گیا کہ ویریاں دی دال نہ گلی تے ایڈا گٹرا حملہ وی بری طرحاں ناکام رہیا۔

ابو عامر تے عکرمہ دے جتھے پچھے دھکے گئے تے مشرکاں دے علمبردار طلحہ نے اگے ودھ کے مجاہداں نوں ایہہ ٹھکر کیتی کہ کیوں ہی محمد دیو متر! تہاڑے وچ کبھڑا سور ما اے جیہڑا مینوں دوزخ وچ اپڑا دیوے یاں میرے ہتھوں جنت وچ بچ جا وے۔ طلحہ دی ایس شرارت توں بعد ”محمد دے متر“ کجھ دی لئی خوش رہے، خورے ایس لئی ہی سالار اعظم اوس دی ٹھکر دا آپوں نوٹس لے کے کوئی حکم جاری فرمان گے۔ اونے چر وچ طلحہ نے فیر کبھڑا شروع کر دتی تے آکھن لگا کہ ”لات وعزلی دی سونہ، تسین چوٹھے او، جے تسین اپنے ایمان دے پکے ہندے تے فیر تہاڑے وچوں کوئی نہ کوئی بندا ایس ویلے ضرور میرے مقابلے لئی نکل آؤندا۔“ ایہہ سن کے شیر خدا علی المرتضیٰ اسلامی صفیاں وچوں نکل کے طلحہ دے سامنے جا پڑے تے آکھن لگے کہ ”محمد تے اوس دے رب دیا ویریا! میں آں محمد دا اوہ متر جیہڑا تینوں دوزخ تیکر اپڑا سکدا اے۔ فیر اجہی تلوار ماری کہ طلحہ دی لاش زمین تے سی۔ طلحہ توں بعد اوس دا بھرا عثمان اگے ودھیا۔ اوس دے پچھے سوانیاں وی شعر پڑھیاں اگے ودھ رہیاں سن۔ عثمان نے علم ہتھ وچ لیا تے حملے لئی اگاں پیر پٹیا۔ حضرت حمزہ مقابلے لئی نکلے تے اگے ودھ کے تلوار دا وار، اوس دے موہڈے تے، ایوں کیتا کہ تلوار نے لگ تیکر اس دے دو ٹوٹے کر دتے۔ نال ای جناب حمزہ دی زبان مبارک توں نکلیا ”پچھان لوؤ) میں ساقی حجاج (عبدال مطلب) دا پتر آں۔“

ہن جنگ زوراں تے سی۔ حضرت حمزہ، حضرت علی تے حضرت ابو دجانہ مشرک فوج دے اندر جا گھسے تے صفیاں دیاں صفیاں دا صفایا کر دتا۔ حضرت ابو دجانہ تے ایتھوں تیکر اگے ودھ گئے کہ اخیر صی صف وچ قومی ترانے گاؤن والیاں زنانیاں تیکر اپڑ گئے۔ اوہ تھے ہند جیہڑی زنا نہ لشکر دی کمانڈر سی، اوس نال وی ٹاکرا ہو گیا پر جناب ابو دجانہ نے تلوار اُگر کے فیر اپنے ہتھ نوں ڈک لیا۔ حضرت زبیر فرماندے نیں کہ جنگ توں بعد میری ملاقات ابو دجانہ نال ہوئی تے میں آکھیا کہ

ع ۲ آنحضرت بحیثیت سپہ سالار از محمود خطاب شیت (اردو ترجمہ) صفحہ ۲۰۲۔

”ابو دجانہ جی! تہاڑے جنگی کارنامیاں داسواد آگیا پر ہندونوں قابو کر کے فیر اوس نوں چھڈ دین والی گل مینوں کوئی ایڈی چنگی نہیں لگی۔“ ایس تے اللہ دے شیر دل مجاہد تے شمشیر نبی دے راکھے نے جواب دتا۔

﴿وَكَرِهْتُ أَنْ أَضْرِبَ بِسَيْفِ رَسُولِ اللَّهِ صَلَّى اللَّهُ عَلَيْهِ وَسَلَّمَ إِمْرَأَةً لَنَا أَصْرَلَهَا﴾
 ”مینوں ایہہ گل چنگی نہ لگی کہ میں حضور دی تلوار نال اک زنانی تے وار کر داتے زنانی وی ایہہ جی جس دا اوس ویلے کوئی مددگار نہیں سی۔“

قربان جانیے خدادے اوس شیر دے، اوس نے سچی مچی سیف رسولِ داحق ادا کرتا۔

بنی عبدالدار دا قبرستان:

ابوسفیان نال بنو عبدالدار دے لوکاں نے ایہہ کارا کیتا سی کہ اوہ علم دے نال ای مرن گئے۔ سو کفر تے شرک دے کھوہ وچ ٹکونک ڈبے عبدالدار دے پرچم برداراں نے ایوں ای کیتا۔ عثمان توں بعد پرچم ابوسعہد بن ابوطحہ دے ہتھ وچ آیا۔ حضرت سعد بن ابی وقاص نے جدوں دیکھیا کہ ابوسعہد جھنڈا اُچا کیتی جاندا اے تے آپ نے نشانہ بنھ کے اوہدی دھون تے تیر ماریا تے اوہ تیر اوس داکم کر گیا۔ ابوسعہد جہنم پہنچ گیا تے طلحہ دا پتر مسافع بن طلحہ آگے ودھیا تاں جے جھنڈے نوں سانجھے پر اوہ حضرت عاصم بن ثابت دے تیر دا نشانہ بنیا۔ فیر مسافع دے بھراتے سب توں پہلے علم بردار دے دے پتر حارث نے قریش دا علم اُچا کرنا چاہیا پر جناب عاصم دا اک ہور تیر اوس داوی کم کر گیا۔ جدوں اوہناں دی ماں سلافہ بنت سعد نوں پتا لگا کہ اوس دا دُجا پتر وی مدنی مجاہداں دے تیر نال پھڑ ہو گیا اے تے اوہ بھیجی بھیجی آئی۔ مرنے پئے حارث داسراپنی گود وچ رکھیا تے پچھیا پترا بس جاندا جاندا ایگل دس جا کہ تیرا قاتل کون اے، فیر میں اوس نال نبھڑ لوں گی۔ ایہہ سن کے حارث نے ماں نوں جواب دتا کہ اوس نے تیر مار دیاں ایہ آکھیا سی کہ اوہ ابنِ قلع اے۔ سلافہ نوں سمجھ لگ گئی کہ فیر تیر مارن والا عاصم ای ہو سکدا اے۔ اوس نے ایہہ نذر وی منی کہ جے اوہ دے پتراں دے قاتل عاصم داسرا اوس دے قبضے وچ آ گیا تے فیر اوہ اوس دا کولا بنا کے اوس وچ شراب پئے گی۔ سلافہ نے جنگ دے میدان وچ ایہہ اعلان دی کردتا کہ جیہڑا بندہ عاصم نوں پھڑ کے سلافہ دے حوالے کرے گا اوہ اوس بندے نوں سو اٹھ انعام دیوے گی۔

جدوں حارث دے ہتھوں جھنڈا ڈگ پیا تے اوس دا بھرا کلاب آگے ودھیا تے اوس نے جھنڈا اُچا کر دتا پر اوہ چھیتی نال ای حضرت زبیر بن عوام دے ہتھوں جہنم پہنچ گیا۔ فیر بنو عبدالدار دا اک ہور جیالا جلاس آگے ودھیا، جیہڑا طلحہ دا چوتھا پتر سی، تے اوس نے مکی لشکر دا جھنڈا لہرا دتا۔ تھوڑے ای چیر پچھوں اوس نوں حضرت طلحہ بن عبد اللہ نے تھماں مار دتا۔ طلحہ کیاں داسارا خنوادہ ماریا گیا تے قریشی پرچم ارطاة بن شرجیل نے پھڑ لیا۔ فیر شریح بن قارظ، ابو زید بن عمرو، شرجیل بن ہاشم تے حبشی غلام صواب نے جھنڈا سناہن دے جتن کیتے پر ایہہ سارے دے سارے مسلم مجاہداں دے ہتھوں ٹھکانے لگدے گئے۔ ایوں اُحد دا میدان نہ صرف بنو عبدالدار دا سگوں سارے ای قریشی علمبرداراں دا قبرستان بن گیا۔

کسے فوج دے ۱۱ علمبرداراں دا اگڑ کچھڑ قتل ہو جانا کوئی بچی جی گل نہیں ہوندی۔ ایس توں وکھ وی اوہناں دے کچھ بندے مارے گئے سن۔ ایوں دی مار نفسیاتی حوالے نال کسے وی فوج لئی بڑا وڈھا گھانا ثابت ہوندی اے تے اوس فوج دا مورال ڈھیر تھلے ڈگ پیندا اے۔ مکے دے مشرکاں نال وی ایہی ہوئی۔ اوہناں دے حوصلے جواب دے گئے تے اوہناں میدان چھڈ کے بھجنا شروع کر دتا۔ اس افراتفری وچ نہ تے اوہناں نوں اپنیاں سوانیاں دا کوئی دھیان رہیا تے نہ ای اوس بت دا جتوں اوہ برکت لئی اپنے نال لیاے سن۔ اوہناں دا معبود (بت) اُٹھ توں ڈگ کے زمین نے منہ پر نے پیہا ^{۱۱} تے سوانیاں دا حال ایہہ سی کہ کوئی اوہناں دی فریاد سنن والا نہیں سی۔ کسے نوں کسے دی کوئی ہوش نہیں سی۔ ہندتے اوس دیاں مکھیاں شیدائیاں دا نگ مکے ول بھج رہیاں سن۔ پائینچے اُتار سن تے اوہناں دیاں پنیاں (پنڈلیاں) تنکیاں ہو رہیاں سن۔ پیراں دیاں جھانجراں صاف دکھائی دے رہیاں سن پر اوہناں دے مرداں دا اوہناں ول کوئی دھیان نہیں سی۔ اوہناں نوں اپنی پاہجو پئی سی۔ سوانیاں تے سوانیاں سن، مکے دے مشرک اپنے اوس معبود بت دی وی حفاظت نہ کر سکے جتوں اوہ برکت لئی کعبے وچوں چک لیاے سن۔ مشرکاں دا اوہ بے وسہ پروردگار زمین تے مڈرے منہ پیہا سی تے اوہناں مشرکاں دے ٹھڈے کھاندا پھر داسی جھیرے اوہدے اگے متھا ٹیکدے سن۔

پاسا پلٹ گیا:

مسلمان مجاہداں نے مشرک فوجیاں دا دور تیکر پچھا کیتا تے اوہناں نوں جنگ دے میدان توں چوکھا دور دھک دتا جدوں تسلی ہو گئی کہ کئی لشکر ہن دور نکل گیا اے تے مسلمان فوجی مال غنیمت اکٹھا کرن لگ پے۔ عبداللہ بن جبیر دی پلٹوں بڑے چانواں نال گھائی توں ایہہ سارا کچھ ویکھ ری سی۔ جت دا چاء وکھرا ای ہوندا اے، اوس جتھے دے بندیاں اک دُجے نال صلاح کیتی کہ ہن او تھے کھلون دا کیہہ فیہہ اے، قریشی لشکر مکے ول پرت گیا اے تے مسلمان بڑی موج نال کافراں دا چھڈیا مال اسباب اکٹھا کر رہے نیں۔ ایوں جتھے دے امیر جناب عبداللہ دے ڈکن دے باوجود چوکھے تیر انداز مجاہد گھائی چھڈ کے باقی بھراواں نال میدان دے وچ آوڑے۔ دُجے پاسے خالد بن ولید نے، جس نے پہلوں ای گھائی تے نظر رکھی ہوئی سی، جدوں ایہہ ویکھیا کہ مسلماناں دا تیر انداز دفاعی جتھے اپنی تھاں چھڈ کے ٹر گیا اے تے اوس نے جا کے او سے گھائی توں حملہ کر دتا۔ خالد دے حملے دے ویلے جناب عبداللہ بن جبیر دے نال صرف دس بندے رے گئے سن۔ اوہ دس بندے خالد دے زور اور جتھے نوں ڈکانہ لاسکے تے سارے دے سارے اللہ دی لڑائی لڑ دیاں شہید ہو گئے۔ ہن کافراں لئی رستہ صاف سی۔ خالد نے اگے ودھنا شروع کر دتا تے نال ای اپنے کھبے پاسے کافر فوجیاں نوں واجاں مار مار کے دسیا کہ مسلمان پوری طرحاں گھیرے وچ آ گئے نیں۔ پچھلے پاسے میں اپنے بندے لے کے اپڑ گیا ہاں تے اگوں تسیں حملہ کر دیو۔ فیر ایوں ای ہوئی تے مسلماناں اُتے تیراں تے تلواراں دا مینہ پے گیا۔ اوہناں دی بے بسی دیکھی نہیں سی جاندی۔ محبوب خدا آپوں دشمنان دے گھیرے وچ آ گئے پر مسلماناں نوں تے ایہہ وی پتا نہیں سی رہیا کہ اوہناں دے پیارے رسول کس حالت وچ تے کتھے سن، پر حیاتی دی سب توں اوکھی گھڑی وچ وی شمع رسالت دے یاراں (۱۱) پروانے اپنیاں جاناں قربان کرن لئی

آپؐ دے دوالے چکر کٹ دے رہے۔ اوہناں پروانیاں وچوں جناب علی المرتضیٰ، جناب ابو بکر صدیق، جناب سعد بن ابی وقاص، جناب زبیر بن عوام، جناب ابو دجانہ تے جناب طلحہ دے نال تواریخ نے چیتے رکھے ہوئے نیں۔

مجاہداں دا ایہہ نکاحیا جتھا پوری دیانت نال ایمان تے وفا داحق ادا کردار ہیا تے بڑی بے جگری نال مشرکاں دے وار ڈکدار ہیا تے موقعہ ملن تے آپوں وی حملہ کردار ہیا۔ مجاہداں دی کوشش سی کہ اوہ مشرکاں دا گھیرا توڑ کے کوئی رستہ بنالین تے رسول خداؐ نوں کسے محفوظ تھاں تیکر اپڑا کے فیر مشرکاں نال ٹکر لین پر مشرک نیڑے توں نیڑے ہندے گئے تے ایناں نیڑے ہو گئے کہ آپؐ اوہناں دے پتھراں دی زد وچ آ گئے۔ اک بد بخت نے اک پتھر مبارک مکھڑے تے دے ماریا جہدے نال سوہنا مکھڑا زخمی ہو گیا تے کئی دند مبارک شہید ہو گئے۔ اوس نازک گھڑی وچ رسول خداؐ نے بڑی سیانف تے ہمت نال اپنے آپ نوں سنبھالیا تے خدا دے جیہڑے شیر دل مجاہد آپؐ دے نال رہے گئے سن اوہناں دے نال نال رستا بناندے ہوئے مدینے ول نکلن دا جتن کرن لگ پے۔ اچن چیت آپؐ اک مدّھے وچ جا ڈگے، جیہڑا جنگی چال دے طور تے ابو عامر نے پٹیا ہو یا سی۔ شیر خدا علی المرتضیٰ نے اوس ویلے آپؐ دا ہتھ مبارک اپنے ہتھ وچ پھڑیا ہو یا سی۔ جناب علی نے ہتھ گھٹ کے پھڑ لیا تے جناب طلحہ بن عبد اللہ نے آپؐ نوں اٹھن لئی سہارا دتا تے آپؐ اوس ٹوئے وچوں نکل کے سدّھے ہو کے کھلو گئے۔

مکّے دے کافر ایس موقعے نوں غنیمت جاندیاں ہو یاں آپؐ نوں تے آپؐ دے سکیاں نوں شہید کرن لئی پوری طاقت نال حملے تے حملہ کر رہے سن۔ اوہناں نوں ایس گل دا پورا یقین ہو گیا سی کہ ہن محمدؐ تے اوس دے نال دے بچ کے نہیں جاسکدے۔ پر محمدؐ نوں ربؐ نے ایس کم لئی تے دنیا تے نہیں سی گھلیا کہ اوہ اپنی ناکام کوشش توں بعد انسانیت نوں اوویں ای تڑنڈا چھڈ کے ربؐ کول جا بجن۔ سگوں اوس نوں واپس لے جان لئی تے گھلیا ای نہیں سی گیا۔ واپس جان والے تے چرو کئے اپنا کم کر کے جا چکے سن۔

کافراں دے تابڑ توڑ حملیاں نال مسلمان شہیداں دیاں لاشاں دے ڈھیر لگ رہے سن۔ اوہناں شہیداں وچ اک جناب مصعب بن عمیر وی سن جیہڑے اپنے قد کاٹھ تے مہاندے ولوں بلکل نبی رحمتؐ ور گئے سن۔ جناب مصعب دی لاش نوں ویکھ کے اک کافر نے رولا پا دتا کہ ”ویکھو! میں محمدؐ نوں قتل کر دتا اے۔“ جناب رسول خداؐ دی شہادت دی چوٹی خبر جنگل دی اگت و انگ جنگ دے پورے میدان وچ کھل گئی۔ ایس خبر نے مسلمان مجاہداں دا رہیا کھیا حوصلہ وی توڑ دتا تے اوہناں دے دل ایڈے بھیڑے ہو گئے کہ اوہناں اک پل وی جنگ دے میدان وچ کھلونا گوارا نہ کیتا۔ جناب عمر فاروق ور گے جری تے دلیر بندے وی مایوسی دا شکار ہو گئے۔ حضرت انسؓ دے چاچا جناب ابن نصر لڑ دے لڑ دے واہوا دریڈے نکل گئے تے او تھے ویکھیا کہ جناب عمر فاروق ہتھیا رستی بیٹھے نیں۔ حضرت ابن نصر نے پچھیا کہ ”ابن خطاب! اتھے کیہہ کردے او؟“ جناب عمرؓ نے جواب دتا کہ ”ہن جدوں رسول خداؐ ای ساڈے وچ نہیں رہے، اوہناں شہادت پالئی اے تے اسیں کاہدے لئی تے کس لئی لڑنا اے؟“ جناب ابن نصر نے بڑا ای سوہنا جواب دتا۔ آکھن لگے کہ ”ابن خطاب! جے ایہہ گل اے تے فیر اسیں محمدؐ رسول اللہؐ توں بعد زندہ رہ کے وی کیہہ کرنا اے؟“ ایہہ آکھ کے شیر وانگ کافر فوج دے وچ جاوڑے تے اخیر لڑ دے لڑ دے جان مالک دے حوالے کر دتی۔ لڑائی توں بعد جدوں اوہناں دے خاکی جتے نوں ویکھیا گیا

تے اوس تے پتھر، تلوار تے نیزے دے ۸۰ سٹی توں چوکھے پھٹ سن۔ کوئی بندا وی اوہناں نوں پچھان نہ سکيا۔ اخیر اوہناں دی بھین نے انگلی دی اک نشانی توں اوہناں نوں پچھاتا۔

مشرکاں دے حملے اے وی جاری سن تے دُجے پاسے رسول خدا تے واری جان والے سنگیاں دی قربانی دا سلسلہ وی جاری سی۔ مسلماناں نوں پانی پیاں والی اک مجاہدہ نے جدوں آپؐ نوں مصیبت وچ پھسیاں ویکھیا تے اوس تے ایمان دا جذبا ایوں سوار ہو گیا کہ اوس نے پانی پیاں والی مشک ہتھوں سٹ دتی تے تلوار کھچ کے رسول خدا دی جان بچان دا جتن کرن لگ پئی، تے نال ای ویریاں تے پتھراں دا مینہ پادتا۔ قبیلہ خزرج دی اوس جرأت وند مجاہدہ دا ناں اُم عمارہ نسبیہ اے۔ اُحد دے اک چوکھے ای دلیر تے مشہور غازی ابو دجانہ نے اپنے جسے نوں رسول خدا لئی ڈھال بنا دتا۔ اوہناں اپنی کنڈ تے رب دے محبوب ول کرنی گوارا نہ کیتی پر اپنا منہ آپؐ ول کر کے اپنی کنڈ تے پٹھ تے تیر کھاندے رے۔ تیراں نال اوہناں دا جستا چھانی بن گیا پر آپؐ نے اُف نہیں کیتی تے یار دی یاری دا حق ادا کرن دا حق ادا کر دتا۔ ایوں اک دُجے غازی جناب سعد ابن ابی وقاص آپؐ دے اک پاسے آکھلو تے تے تیر اندازی کرن لگ پے۔ رسول خدا جناب سعد دی تیر اندازی دے کر شے وی ویکھدے رے تے آپؐ وی دشمن ول اچھے تیر مارے کہ کمان ٹٹ گئی۔

مجاہداں دی ہمت تے حوصلہ ویکھ کے مشرک فوج اک وار فیر ہل کے رہ گئی۔ اوہناں دے حملے دا زور کچھ ٹٹا تے رسول خداؐ اپنے صحابیاں نال اُحد دی اک ٹیسی تے چڑھن وچ کامیاب ہو گئے۔ اُچیائی تے ہون پاروں محبوب خدا اپنے صحابیاں نوں صاف نظر آؤن لگ پے۔ سب توں پہلاں جناب کعب بن مالک نے آپؐ نوں ویکھیا جیہڑے اوس ویلے کچھ دریڈے، اوہناں مسلماناں دے کول کھلو تے سن جیہڑے کافراں دے زور اور حملے پاروں تتر بتر ہو گئے سن۔ جناب کعبؓ نے ویکھدیاں ساری اوہی کم کیتا جیہڑا اوہناں نوں اوس ویلے کرنا چاہیدا سی۔ اوہناں پکار پادتی کہ ”اللہ دے شیر دل مجاہدو تے شمع رسالت دے پروانیو! ودھائیاں، مبارک! رسول خداؐ زندہ جیوندے جاگدے سلامت موجود نیں۔“ جناب کعب دی ایس منادی نال جتھے اک پاسے مسلماناں نوں اک نواں حوصلہ تے ولولہ ملیا او تھے ای ایہ نقصان دی ہو گیا کہ کافراں نے اک وار فیر تگڑا حملہ شروع کر دتا۔ اُبی بن خلف دوڑ کے اگے ودھیا تے اُچی ساری واج دے کے آکھن لگا کہ ”چنگا بی جے محمد اے تیکر جیوند اے تے فیر میری حیاتی دی کیہ لوڑاے؟ دسو مسلمانو! کتھے جے محمد؟“

ایس دھرتی تے ابن خلف توں وڈا بد بخت کیہڑا پیدا ہوا ہووے گا۔ محبوب خداؐ نے جناب حارث بن صمہ توں نیزہ لے کے ابن خلف نوں اچھیا زور دا کچوکا دتا کہ اوہ گھوڑے تے ای ترفن لگ پیا۔ اوس نے گھوڑا پچھاں نوں بھجان دا بڑا جتن کیتا پر بھیڑے بختاں والے اوس بد تمیز کافر دی موت رب دے رسول دے ہتھوں لکھی گئی سی، تھوڑے پنڈھ تے ای جا کے جہنم بیج گیا۔ تواریخ تے سیرت دیاں کتاباں وچ ایہو جہیاں روایتاں وی ملدیاں نیں کہ اُبی بن خلف نوں کسے ایہہ گل آکھی ہوئی سی کہ محمدؐ کھندے نیں کہ ابن خلف دی موت اوہناں دے ہتھوں آوے گی۔ خیال کیتا جاندا اے کہ اوس دی موت دا سبب ایہہ

سیرت النبی از شبلی نعمانی جلد اول صفحہ: ۲۲۱

آں حضرت بحیثیت سپہ سالار از محمود خطاب صفحہ: ۲۰۸

نفسیاتی اثر ای بنیاسی ورنہ پھٹتے کوئی ایڈاڈونگا نہیں سی۔

تتر بتر ہوئے مسلمان مجاہد اک وارفیر اکٹھے ہو کے اُحد دی سب توں اُچی ٹیسی تے اپڑ گئے سن۔ خالد اپنے فوجیاں نوں لے کے اوتھے وی اپڑ گیا۔ مسلماناں نے اوتھے ڈٹ کے مقابلہ کیتا تے اوس نوں پشاش پرتن تے مجبور کر دتا۔ رسول خدا اوس ویلے چہرہ مبارک دی سٹ پاروں چوکھے تکلیف وچ سن۔ آپؐ نے جدوں دیکھیا کہ کافر واپس پرت گئے نیں تے آپؐ کچھ آرام کرن لئی اوتھے بیٹھ گئے۔ بیٹھے بیٹھے نماز ادا کیتی، مالک نال کچھ گلاں کیتیاں۔ اک وارفیر اوس نوں ”اکبر“، ”علی“، تے ”عظیم“ منن دا اعلان کیتا۔ باقی مسلماناں نے وی آپؐ دے پچھے بیٹھ کے نماز پڑھی تے رب کولوں اپنیاں غلطیاں دی معافی منگی۔

حضرت کعب بن مالک دے رولا پاؤن دے باوجود چوکھے کافراں نوں ایس گل دا یقین نہیں سی آؤندا کہ جناب رسول خدا ﷺ زندہ سلامت موجود نیں۔ ایس لئی ابوسفیان نے اپنے تئیں جنگ جٹن توں بعد، جدوں مکے پرتن دا فیصلہ کیتا تے پہاڑ تے چڑھ کے واجاں لائیاں:

”دسو مسلمانو! کیہہ تہاڈے وچ محمد زندہ نیں؟“

مسلماناں نے جدوں کوئی جواب نہ دتا تے ابوسفیان تے ایہہ سمجھیا کہ ایہہ مطلب اے کہ محمدؐ زندہ نہیں تے نال ای اوس نے اُچی ساری واج دے کے ایہہ پچھیا کہ ”دسو! ابو قحافہ دا پتر (جناب ابو بکر صدیق) تہاڈے وچ موجود اے؟“ مسلمان فیر چپ رے تے ابوسفیان نے فیر جناب عمر فاروق پاروں وی ایہی سوال کیتا۔ مسلمان مجاہداں نوں نہ تے اوہناں دے محبوب کمانڈر نے کوئی حکم دتا تے نہ ای اوہناں نے ابوسفیان دے سوالاں دا کوئی جواب دتا۔ ایہ خاموشی دیکھ کے ابوسفیان آکھن لگا ”کہ لوہی، ایہہ جتنے اگے اپڑے۔“ ایہہ سن کے جناب عمر فاروق کولوں رہیا نہ گیا تے رسول خدا توں اذن حاصل کرن توں بعد غصے نال ابوسفیان نوں واج دے کے آکھیا کہ ”اوہ رب تے اوس دے رسولؐ دیا دشمن! جہناں لوکاں دا پچھیا ای اوہ سارے ای جیوندے نیں۔ اللہ نے اوہ شے باقی رکھی اے جہدے نال تینوں پیڑا اُٹھدی روے، تے نالے سن لے کے اللہ دے رسولؐ تیریاں گلاں سن رے نیں۔“

”تے جے ایہہ گل اے تے فیر اگلے سال بدر وچ فیر ساڈا ٹاکرا ہووے گا۔“ ابوسفیان نے جواب دتا۔

فیر آکھن لگا کہ ”مسلمانو! سمجھ لو کہ ایہہ دن بدر دے دن دا بدلہ اے۔ دیہاڑے پھر دے رہندے نیں تے جنگ کھوہ دیاں ٹنڈاں وانگ ہوندی اے، کدے اُتے تے کدے تھلے۔ بس حساب برابر ہو گیا اے۔“

ایہہ سن کے رسول خدا دے حکم موجب جناب عمر فاروق نے جواب دتا کہ ”نہیں، حساب برابر نہیں ہو گیا۔ ساڈے مر جان والے جنت وچ نیں تے تہاڈے دوزخ دا بالن بنے نیں، حساب برابر کویں ہو گیا؟“

میدان اُحد وچ مشرکاں دے صرف ۲۲ آدمی قتل ہوئے جدوں کہ مسلم مجاہداں وچوں ستر (۷۰) نے شہادت دا جام نوش کیتا جہناں وچ سیدنا حمزہ (رسول خدا دے چاچا)، حضرت حمزہ دے بھانجے جناب عبداللہ بن جش، جناب ابوسعید خثیمہ، حضرت حظلہ (فاسق ابو عمر دے صاحبزادے) حضرت عمرو بن جوح، حضرت انس بن نضر، حضرت عباس بن عبادہ، حضرت

خارجہ بن زید، حضرت ابوسفیان بن حرث، حضرت اوس بن ارقم تے حضرت سعد بن ربیع ورگے مردانِ خدا شامل نیں۔ میدانِ اُحد وچ مسلماناں دا ایڈا وڈا نقصان جبلِ رماۃ خالی کر دین دی وجہ توں ہو گیا۔ بھاویں ایس دا ذکر کچھ ہو چکیا اے پر ضرار بن خطاب دا بیان وی اسلامی تواریخ دی اوس چوکی ماڑی گھڑی دی ٹھیک ٹھیک مورت کھچدا اے۔ ضرار آکھدے نیں:

”میں اوس جنگ وچ کافراں وٹوں مسلماناں دے خلاف لڑ رہیا ساں تے بدر دے میدان وچ اپنے وڈے وڈے سرداراں دے قاتلاں نوں بھالدا پھر داساں، تاں جے موقع ملن تے اوہناں دا بدلا لے سکاں۔ اوتھے چنگا جوڑ پیا تے مسلماناں نے مار مار کے سانوں نھٹا دتا۔ میرے دل وچ بھانھڑ بلن لگ پے کہ ایہہ تے بدرتوں وی وڈی ہار اے۔ میں گھڑی مڑی خالد نوں آکھدا ساں کہ پرت کے حملہ کر، پراوہ آکھدا سی کہ کوں حملہ کراں، اگے ودھن دا تے کوئی چارہ نہیں۔ اچن چیت میری نظر جبلِ رماۃ تے پئی۔ اوتھے مسلماناں دے تھوڑے جے بندے دے۔ میں خالد نوں واج دتی کہ ابنِ ولید! اوس پہاڑی نوں وکھ۔ جدوں اوس نے اودھر ویکھیا تے اوسے ویلے اپنا گھوڑا موڑ لیا تے واہوا ٹکاواں حملہ کر دتا۔ اوتھے جیہڑے تھوڑے جے بندے سن، اوہناں نوں قتل کر دتا تے اچن چیت مسلماناں تے پچھوں حملہ کر دتا۔ اوہناں نوں کوئی چیت چیتا وی نہیں سی کہ اوہناں تے اوس پاسیوں وی حملہ ہو سکدا اے۔ فیرا سیں اوہناں نوں تلواراں نال وڈنا شروع کر دتا تے اوہناں تے گھوڑے نساہ دتے۔ فیرا ساڑی مرضی سی کہ جٹوں دل کر دا قتل کر دیندے۔ اے ایساں گوجر لگا سی جناں گوارا اٹھنی داددھ چوندیاں لگدا اے تے اچن چیت انصار فیرا کٹھے ہو کے سانوں پے گئے۔ اللہ اوہناں تے رحم کرے اوہ بڑے صابر سن۔ اسیں گھوڑیاں تے سوار ساں تے اوہ پیدل پراوہ فیر وی سانوں چمبو چمبو کے جان دی بازی لا رہے سن۔ میں اوہناں وچوں دس۰۰۰ بندیاں نوں قتل کیتا پراوہ فیر وی جان دا نذرانہ دین توں باز نہ آئے۔“

ہند۔ زناتی یاں چڑیل:

جنگ بدر وچ ابوسفیان داسوہراتے ہند دا پیو عتبہ سیدنا حمزہ دے ہتھوں قتل ہو گیا سی۔ عتبہ جنگ اُحد دے اک دُجے کافر سپاہی جبر بن مطعم دا چاچا وی سی۔ جبر اپنے نال اپنے اک حبشی غلام حبشی نوں وی لے کے آیا سی۔ حبشی حبشیاں دے خاص ہتھیار حربہ نوں ورتن دا بڑا سیانا سی۔ مکے توں ٹردیاں جبر نے حبشی نوں آکھیا کہ ”لے بھئی حبشی، میرے چاچے دے بدلے محمدؐ دا چاچا کم آؤنا چاہیدا اے۔ نالے اوہ میرے چاچے دا قاتل وی اے۔ جے توں اوس (سیدنا حمزہ) نوں قتل کر دیویں تے فیر توں آزاداں۔“ ایسے حبشی نال دُجا سودا عتبہ دی دھی تے ابوسفیان دی سوانی ہند نے کیتا تے آکھیا کہ ”حبشی! جے توں جبر دی گل پوری کر دیاں حمزہ نوں قتل کر دیویں تے میں تینوں مال نال لد دیواں گی۔“ حبشی نوں آزادی، تے فیر آزادی توں بعد مال دولت دے لالچ نے پاگل کر چھڈیا سی۔ اوس نوں پتا ای نہیں سی کہ اوہ بد نصیب کیہہ کر رہیا اے۔ سارے معرکے وچ اوہ سیدنا حمزہ دی تاڑ وچ لگا رہیا تے موقع ملدیاں ای حربہ مار کے محسنِ نبوت نوں شہید کر دتا۔

جنگ توں بعد ہند نے شہیداں دیاں لاشاں وچوں سیدنا حمزہ دی لاش لبھائی تے اپنے غضب دی اگ بجھاوان لئی، جاہلیت تے درندگی توں کم لیندیاں ہوئیاں، جناب حمزہ دا پیٹ چاک کیتا، کلیجہ کڈیا تے دندان تھلے مدنا شروع

کر دتا۔ جدوں کھانہ سکی تے منہ وچوں باہر سٹ دتا۔ فیر اوس نے عم رسول داک تے کن وڈے۔ فیر باقی شہیداں نال ایہو چڑیاں ورگا سلوک کیتا۔ شہیداں دے پاک تے مقدس جُیاں نالوں لنگ وڈے، اوہناں دا ہار بنایا تے مکے تیکر اوس نے اوہ ہار اپنے گل وچ لکائی رکھیا۔ شہیداں دیاں لاشاں دی ایس بے حرمتی وچ ہند دیاں سولہ سہیلیاں نے وی بہت کجھ کیتا۔

مسلمان سوانیاں تے اُحد دا معرکہ:

اک پاسے مکے دیاں قریشی سوانیاں بدبختی نال اپنیاں جھولیاں بھر رہیاں سن تے دُجے پاسے کجھ نیک بخت مسلمان سوانیاں خدا تے اوس دے رسول دے رستے وچ جان قربان کر دین دے جذبے نال اُحد دے معرکے وچ اپنے جوہر دکھا رہیاں سن۔ اوہناں سوانیاں وچ جیہڑا ناں چوکھا سر کڈ دا دکھالی دیندا اے اوہ اُم عمارہ دا اے، جنہاں دا ذکر پچھے وی ہو چکیا اے۔ اُم عمارہ نسیبہ بنت کعب مدینے دے قبیلے خزرج دی اک سوانی سن۔ آپ دا جوان پتر عمارہ، اک دُجا پتر تے خاوند میدان اُحد وچ جہاد کر رہے سن۔ اوس دیہاڑے دوپہر تیکر آپ مجاہداں نوں پانی پیاندیاں رہیاں پر فیر جدوں رسول خدا نوں مصیبت وچ ویکھیا تے مشک چھڈ کے تلوار پھڑلئی تے اک شیرنی وانگ کافراں نوں اگے لالیا۔ جے تیر اندازی دا موقع آیتے اوہدے وچ وی اخیر کر چھڈی۔ اک موقع تے اک کافر نے آپ دے اک پتر نوں زخمی کر دتا۔ تھوڑے چیر پچھوں اوہ کافر لڑدا ہو نیا فیراگے ودھیا۔ نبی اکرمؐ نے اوس نوں پچھان لیا تے اُم عمارہ نوں آکھیا کہ ”اُم عمارہ! تیرے پتر نوں ایسے بندے پھڑکیتا سی۔“ ایہہ سن کے اُم عمارہ نے اوہدی لت تے اچھی تلوار ماری کہ ادھی لت وڈھ کے رکھ دتی۔ اوہ کافر اوسے ویلے زمین تے ڈگ پیا۔ اس بدلے تے محبوب خدا ایذا خوش ہوئے کہ آپ دے دندان مبارک نظر آؤن لگ پے۔ جناب اُم عمارہ دی رسول رحمت ہمیش ای تعریف کر دے رہے۔ اک دن اوہناں نے جدوں رسول خدا نوں بڑا مہربان ویکھیا تے آکھیا کہ ”یا رسول اللہ! دُعا فرماؤ کہ اللہ تعالیٰ جنت وچ سانوں حضور دی رفاقت عطا فرمائے۔“ حضور نے اوہناں دی خائش تے اوسے ویلے دُعا فرما دتی۔ ایہہ ویکھ کے رسول رحمت اُتے واری واری جان والی اوس بھاگاں والی سوانی نے آکھیا کہ ”ہن مینوں ایس گل دی کوئی فکر تے پرواہ نہیں کہ دنیا تے میرے اُتے کیہہ کیہہ مصیبت آؤندی اے۔“

رسول خدا دی شہادت دی افواہ مدینے اپڑی تے سیدہ فاطمہ زہرہ وی میدان اُحد وچ اپڑ گئیاں۔ سیدہ فاطمہ اپنے پیارے باپ دی حالت ویکھ کے رون لگ پیاں۔ آپ نے اوہناں نوں گود وچ لے کے پیار کیتا تے حوصلہ دتا۔ حضرت علی اوہدوں رسول خدا دا چہرہ مبارک دھوڑے سن پر زخم وچوں خون بند نہیں سی ہو رہیا۔ کدھروں چٹائی دا ٹکڑا مل گیا۔ حضرت فاطمہ نے اوہ ساڑ کے سفوف بنایا تے اوس نوں زخم وچ بھریا، جہدے نال خون بند ہو گیا۔

حضرت عائشہ صدیقہ تے حضرت اُم سلیم اپنے موہڈیاں تے پانی دیاں مشکاں چک چک کے زخمی غازیاں نوں پانی پیاندیاں رہیاں تے بغیر کسے ڈرتوں پورے میدان وچ چکر لاندیاں رہیاں۔

حضرت عبداللہ بن جحش دی بھین حضرت حمزہ بنت جحش نے وی میدان اُحد وچ اک مجاہدہ دی حیثیت نال شرکت کیتی

تے زخمیاں دی مرہم پٹی کر دیاں رہیاں۔ رسول خدا دی خادمہ جناب اُم ایمن وی میدان وچ موجود رہیاں تے پیاسے غازیاں نوں پانی پیاندیاں رہیاں۔ حضرت سمیرا بنت قیس تے حضرت کلثوم بنت رافع وی اُحد دے میدان وچ اپڑ گئیاں سن۔ حضرت سمیرا نوں اوہناں دے پتر دی تے حضرت کلثوم نوں اوہناں دے والد، بھراتے شوہر دی شہادت دی خبر دتی گئی تے اللہ دیاں گولیاں آکھن لکیاں کہ سانوں پہلوں ایہہ دسوک ساڈے آقا کس حال وچ نیں۔ مجاہداں نے دسیا کہ الحمد للہ رسول خدا ٹھیک ٹھاک نیں۔ اوہناں نوں یقین نہ آیا تے ضد کیتی کہ اسیں اپنیاں اکھاں نال آپ نوں ویکھنا چاہندیاں ہاں۔ جدوں اوہناں نے آپوں رسول خدا دی زیارت کر لئی تے آکھن لکیاں کہ یا رسول اللہ! جدوں ساڈے آقا موجود نیں تے فیر ساڈے لئی کوئی مصیبت، مصیبت نہیں۔

رسول خدا دی پھوپھی تے سیدنا حمزہ دی بھین جناب حضرت صفیہ وی تلوار سونت کے میدان اُحد وچ اپڑ گئیاں سن۔ جناب حمزہ دے شہید جئے نوں ایس حال وچ ویکھیا کہ اوہناں دا سینہ چاک سی۔ نک، کن تے ہونٹھ وڈے ہوئے سن۔ انگلاں غیب سن تے آپ نوں پچھانا اوکھا ہو رہیا سی۔ بھرا دی ایہہ حالت ویکھ کے آپ دارورو برا حال ہو گیا۔ اخیر رب دی رضا تے راضی ہوئیاں تے بھرانوں اُحد دے میدان وچ مناں مٹی تھلے دُوب کے گھر پرت آئیاں۔

جنگ اُحد وچ جیہڑیاں سوانیاں نے قربانی دتی اوہناں وچ اک ناں حضرت جمیلہؓ دا وی اے۔ جمیلہ، منافق سردار عبداللہ بن ابی دی دھی تے حضرت حنظلہ دی گھر والی سی۔ جس دن اُحد دے معرکہ ہوئیا اوس توں اک دن پہلوں حضرت حنظلہ تے حضرت جمیلہ دا ویاہ ہوئیا۔ قربان جانیئے حنظلہ جئے پروانیاں توں، اک پاسے والد ابو عامر کافراں ولوں جنگ کر رہیا اے، دُجے پاسے سوہرا عبداللہ بن ابی ساتھ دین توں انکاری اے تے تیجے پاسے ایہہ بہانہ وی اے کہ میرا تے اے آج ویاہ ہوئیا اے پر رسول خدا دے اوس عاشق صادق نے کسے گل دی پرواہ نہیں کیتی۔ فیر اوس نیک بخت بی بی جمیلہ دی ہمت تے حوصلے دے قربان جانیئے، اوس نویں ووہٹی نے وی اپنے لاہڑے نوں نہیں ڈکیا۔ حد تے ایہہ ہے کہ جدوں جہاد لئی منادی ہوندی اے اوہدوں غسل جنابت دی وی لوڑ سی پر سوانی نے ایہہ بہانہ وی بنا کے جہاد دی منادی تے بلیک آکھن توں نہیں ڈکیا۔ سگوں آپ وی حنظلہ دے نال میدان جنگ ول ٹریاں۔ جدوں حنظلہ شہید ہو گئے تے آپ نے فرمایا کہ ”میں فرشتیاں نوں ویکھ رہیاں کہ اوہ آسمان تے زمین دے وچکار چاندی دے برتتاں وچ صاف پانی لے کے حنظلہ نوں غسل دے رے نیں۔“ شہید نوں تے غسل دی لوڑ ای نہیں ہوندی، فیر ایس ارشاد تے مجاہداں نوں حیرت تے ہونی سی۔ حضرت جمیلہ نے رسول خداؐ اے ایہہ ارشاد مبارک سنیا تے عرض کیتی کہ ”اوہ ناپاکی دی حالت وچ ای میدان جنگ وچ آگئے سن۔“ ایہہ سن کے رسول خداؐ نے فرمایا کہ تاں ای فرشتے اوس نوں غسل دے رے نیں۔

ایسے پاروں تواریخ جناب حنظلہ نوں غسل ملا کہ دے ناں نال یاد کر دی اے۔ حضرت جمیلہ تے حضرت حنظلہ دے اوس اک سہاگ رات دے تعلق دے نتیجے تے جناب جمیلہ حاملہ ہو گئیاں سن۔ آپ نے حنظلہ دی جس نشانی نوں جنم دتا اوس داناں عبداللہ رکھیا گیا۔ بھانویں عبداللہ منافقاں دے چیف عبداللہ بن ابی دادوہتر تے بد بخت ابو عامر سازشی دا پوتر اسی پرواہ حضرت حنظلہ جئے سچے، اُچے تے سوہنے عاشق رسول دا پتر وی سی۔ عبداللہ نے وڈے ہو کے مدینے وچ چوکی عزت

تے محبت کھٹی۔ ایسے عبداللہ بن حظلہ نوں مدینے والیاں اوس ویلے اپنا امیر بنایا جدوں اوہناں یزید نوں اپنا حکمران منن توں انکار کر دتا سی ﴿﴾
خونی رشتے آمنے سامنے:

بدر دی جنگ طرھاں اُحد دی جنگ وی اک نویکلی جنگ سی جہدے وچ توحید دے علمبردار تے شرک توں نفرت کرن والے عاشقانِ خدا، اوس دے محبوب بندے تے اخیری رسول دی واج تے لبیک لبیک آکھدے ہوئے مقتل ول دوڑن لئی تیار ہو گئے سن تے ایس گل نوں اصلوں ای بھل بھلا گئے سن کہ دین دے بھائی چارے دے رشتے توں ہٹ کے وی کوئی رشتا ہوندا اے۔ جناب حظلہ نوں وی ایس گل نال کوئی غرض نہیں سی کہ جہاں بندیاں نال جنگ لئی اوہناں نے اپنی تلوار نوں بے نیام کر لیا اے اوہناں وچ آپ (حظلہ) دا بد بخت باپ وی شامل سی۔ ذرا ویکھو کہ:

اک پاسے حضرت حظلہ تے دُجے پاسے اوہناں دا باپ ابو عامر
 اک پاسے حضرت ابوبکر تے دُجے پاسے اوہناں دا پتر عبدالرحمان
 اک پاسے حضرت مصعب بن عمیر تے دُجے پاسے اوہناں دی ماں خناس بنت مالک
 چیتے رہوئے کہ جناب حظلہ، منافقاں دے چیف عبداللہ بن اُبی دے جوئی وی سن۔
خدا دے محبوب ڈونگیاں سوچاں وچ:

احد دے شہیداں نوں دفن کرن توں بعد خدا دے محبوب اپنے پھڑ ہوئے تے دل دے بجھے غازی سنگیاں نوں لے کے مدینے پرت آئے۔ گھر آئے تے سوچاں ای سوچاں سن، ایڈیاں ڈونگیاں سوچاں کہ حیاتی وچ کدے ایوں دیاں سوچاں نال واہ نہیں سی پیا۔ آپ a کئے ای نہیں سگوں شمع رسالت دے سارے پردانے ایسے حالت وچ سن۔ پھڑ ہوئے جئے، اداس دل تے اپنے پیاریاں نوں لہجھ دیاں اکھاں دے اتھرو ویکھے نہیں سن جاندا۔

رسول اللہ a نوں کدے ایہہ خیال آ وندا سی کہ مدینے دے یہودیاں، مشرکاں تے منافقاں نوں ساڈی ہارتے بڑی خوشی ہوئی ہونی اے تے کدے ایہہ کہ کل تیکر مسلماناں دا ایڈا ٹوہر ٹپا سی کہ کوئی اُچی گل نہیں سی کر سکتا تے اج ایہہ کیہہ بن گئی اے۔ کدے عبداللہ بن ابی ول دھیان جاندا سی کہ اوس دی گل نہیں سی منی تے نالے اوس دے حلیف یہودیاں نوں مدینے توں جلا وطن کر دتا سی تے کدے ایہہ خیال آ وندا سی کہ ہن جے مسلمان چپ کر کے بیٹھ گئے تے فیر سارے عرباں دی نظر وچ حقیر ہو جان گے، مدینے وچ عزت وقار کم شک جاوے گاتے کدے دے مشرک سارے عرب وچ ساڈا گڈا بن گے۔ ایوں دیاں ڈونگیاں سوچاں نے ساری رات اوس ہارے ہوئے کمانڈر انچیف نوں پریشان کیتی رکھیا۔ اخیر رات ای رات آپ a نے ایہہ فیصلہ کر لیا کہ دن چڑھ دیاں ای قریش دا پچھا کیتا جاوے گا تاں جے احد دی ہار دا دھبہ صاف کر کے مسلماناں دے اندر اک اجیہا حوصلہ تے اعتماد پیدا کیتا جاوے کہ اوہ فیر دنیا تے ٹوہر پٹے نال رہ سکے ﴿﴾

کافراں دا چچھا:

مجاہداں دی اک وڈی جماعت اُحد دے زخماں نال لہو لہان ہوئی ہوئی سی۔ کسے دی بانٹئی ہوئی سی، کسے دی لت وڈی ہوئی سی، کسے داسر پانا ہوئی سی، کسے دے سینے تے نیزہ وجیسی تے کسے دی پشت نوں تیراں نے چھیکو چھیک کیتا ہوئی سی۔ محبوب خدا دا اپنا حال ایہہ سی کہ مبارک مکھڑا پیڑ نال بھریا ہوئی سی پر واری جانیے اوس نوکیلے لشکرتوں تے اوس لشکر دے ڈونگیاں نگا ہواں والے سالارتوں کہ اوہ کفر تے باطل دے غور نوں اپنے پیراں تھلے مدّن لئی اوس دا چچھا کر دیاں ہوئیاں مکے ول لشکر کشی تے تیار ہو گئے۔

عبداللہ بن اُبی نے ایس موقعے نوں غنیمت جانیاتے ایہہ خیال کیتا کہ رسول خدا نوں ہن اوس دی لوڑ اے، ایس لئی اوس دی ہر گل من لئی جاوے گی۔ ایوں اوس نے اُحد دی منافقت داداغ دھون لئی ابوسفیان دا چچھا کرن وچ مدد دی پیش کش کیتی پر آپؐ نے فرمایا کہ ”نہیں اسلام نوں تیرے کولوں مدد دی لوڑ نہیں، جاسوانیاں نال جا کے آرام کر۔“

سپہ سالار اعظمؐ اپنے شیر دل غازیوں نوں نال لے کے مکے ول دَوڑ پئے۔ مدینے توں کوئی بارہ کلومیٹر دور تیکر مشرک لشکر دا چچھا کیتا پر اوہ چوکھا دریا جاکھیا سی۔ ایوں آپؐ نے حمراء الاسد دی تھاں تے ڈیرے لا دتے۔ او تھے قبیلہ بنو خزاعہ دا اک بندہ معبد (یاں معن) خزاعی حاضر ہوئی تے اسلام قبول کر لیا۔ حضور نے اوس نوں حکم دتا کہ اوہ واپس جاوے تے ابوسفیان نوں اسلامی لشکر ولوں ایڈا خوف زدہ کرے کہ اس نوں بھجیاں راہ نہ لہے۔ ابوسفیان نوں معبد دے مسلمان ہو جان دا تے اوس دے مشن دا کچھ پتا نہ لگ سکیا۔ اوہ مکے دے رستے وچ الروحادی تھاں تے اپڑیا سی تے پچھوں معبد جا ملیا۔ ابو سفیان نے آپوں ای معبد نوں مدینے دے حال حالات بارے سوال کر دتا۔ معبد نے آکھیا کہ توں مدینے دی گل کر رہیا ایں، محمد تے اوس دے سنگی ساتھی، نویں تے تازہ دم فوجیاں دے نال تہاڈا چچھا کر دیاں ہوئیاں تہاڈے کول اپڑن والے نیں۔ میں نہیں سمجھدا کہ تسیں ایڈے وڈے لشکر دا مقابلہ کر سکو۔ نا تے تسیں تھکے ٹٹے او تے مدینے دی فوج تازہ دم اے، کوئی جوڑ ای نہیں بن دا تہاڈا اوہناں دا۔ بس بے خیر چاہیدی جے تے مکے ول دڑ کی لا دیو۔ کچھ ایوں دی ای چال ابوسفیان نے وی چلی۔ اوس نے مدینے ول آؤندے کچھ مشرکاں نوں لا لچ دے کے ایس گل تے راضی کر لیا کہ اوہ مسلماناں نوں ایہہ گل دسن کہ مکی لشکر اک وار فیر پوری، تے پہلے توں وی چوکی طاقت نال حملہ کرن لئی مدینے ول چڑھیا آؤندا اے۔ اوہناں ابھی کار کیتی تے اسلامی لشکرتوں واہوا ڈرایا پر محمد رسول اللہ دے سنگی ساتھیاں نے ایس گل دی اصلوں ای پرواہ نہ کیتی تے اوہناں نوں آکھیا کہ اسیں گھروں لڑن مرن لئی ای تے نکلے آں، ڈر کس گل دا؟ نا لے آکھیا کہ ساڈے لئی اللہ کافی اے۔ تے اوہ بڑا کار ساز اے۔

سپہ سالار اعظمؐ اپنی ہمت، حوصلہ تے پیڈا ارادہ وکھان لئی تن راتاں تیکر حمراء الاسد دی تھاں تے وڈے وڈے بھانھڑ لا کے کافر لشکرتوں ڈراندے رے۔ ابوسفیان پچھے ویکھدا تے رہیا پر اوس نے پچھے پرتن دا حوصلہ نہیں کیتا۔ ایس مہم وچ مسلماناں نے دو مشرکاں نوں، جہیزہ پچھے رہ گئے سن، پھڑ کے لے آندا، جنہاں دے ناں معاویہ بن مغیرہ تے ابوعزۃ الجصّی سن۔

کس دی جت کس دی ہار:

اُحد دے معرکے وچ کافراں دی تعداد مسلماناں توں چار پنج گنا زیادہ سی۔ جنگی ساز و سامان نوں دیکھیے تے کوئی جوڑ ای نہیں سی بن رہیا تے جے کمانڈراں تے فوجی افسراں ول دھیان ماریے تے مسلماناں ول حربی ماہراں دا کال نظر آؤندا اے جدوں کہ مشرک لشکر وچ خالد بن ولید، عکرمہ بن ابی جہل، عمرو بن العاص تے ابن ہشام جے سیانے تے اُچے قد دے کمانڈر دسدے نیں۔ ایس بے جوڑ مقابلے دا انجام دیکھن نوں تے ایہہ نظر آؤندا سی کہ مدینے دی اٹ نال اٹ و جادتی جاوے گی تے مسلماناں نوں ہمیش لئی اپنے غلام بنا لیا جاوے گا پرا یوں نہ تے ہونا سی تے نہ ہوئی۔ سگوں ہوئی ایہہ کہ جنگ دی مڈھلی گھڑی وچ ای مسلماناں نے کافراں نوں اگے لالیا تے اوہناں دیاں صفائیاں چیر دے ہوئے اگے لنگھ گئے کہ اخیر صاف وچ کافر سوانیاں تیکر اپڑ گئے۔

جنگ دے دُجے مرحلے وچ مسلماناں دی اک غلطی پاروں قریش دا پلڑا بھارا ہو گیا تے گھٹو گھٹ دس فیصد مسلمان شہید ہو گئے۔ ایڈے وڈے نقصان توں بعد چاہیدا تے ایہہ سی کہ مسلمان میدان چھڈ کے بچ جانے پر ہوئی اے کہ اوہ اُحد دی اک ٹیسی نوں مور چا بنا کے فیر جنگ لئی تیار ہو گئے۔ اوہ تھے اوہناں نہ صرف کافراں دا ڈٹ کے مقابلہ کیتا سگوں جان لکیاں جدوں ابوسفیان نے ایہہ آکھیا کہ اگلے سال بدر وچ فیر جوڑ پوے گا تے مسلماناں دا جواب ایہہ سی کہ ”سانوں منظور اے۔“

جنگ دے دُجے ای دن مسلماناں نے مکی لشکر دا پچھا کیتا تے پچھا کر دے ہوئے مدینے توں ۸ میل دور نکل گئے جہدے توں پتا لگدا اے کہ اُحد وچ نہ تے مسلماناں دی حربی قوت دا خاتمہ ہوئی سی تے نہ ای اوہناں دا مورال ڈگیا سی۔ سگوں اوہ ابو سفیان نوں لاکارے مار دے رے۔ ابوسفیان نوں مسلماناں دی ایس مہم دا پتا وی لگ گیا پرا اوس نے پچھے پرت کے حملہ کرن دی جرات نہ کیتی۔ جنگ وچ بار دا مطلب ایہہ ہوندا اے کہ فوج دا پوری طرحاں خاتمہ ہو گیا اے تے ملک اُتے دشمن فوج دا قبضہ ہو گیا اے۔ جتاں چر اقتدار اعلیٰ موجود اے تے جغرافیائی سرحدیں (Geo-political Boundries) محفوظ نیں، اوہناں چر ریاست نوں ستے خیراں نیں۔ اُحد دی جنگ توں بعد مدنی لشکر دا کمانڈر انچیف، جیڑا اپنی ریاست دا مقتدر اعلیٰ (Head of State) وی سی، اپنی فوج دی بقاعدہ کمان کر دیاں ہوئیاں مدینے وچ داخل ہوئی تے جس ریاست دا اوہ مقتدر اعلیٰ سی اوہ ریاست پوری طرحاں قائم قائم تے محفوظ سی۔ میں استھے دُجی جنگ عظیم دی مثال دینا چاہواں گا جدوں جرمن فوجاں نے روس دے اک وڈے حصے تے قبضہ کر لیا سی۔ تے اوس قبضے دے باوجود ایہہ گل نہ آکھی گئی کہ جرمنی نے روس نوں فتح کر لیا اے کیوں جے روس دیاں فوجاں قائم قائم رہیاں تے نالے روس دی مملکت دا سربراہ وی اوہی رہیا۔

جنگ اُحد وچ کافر فوج نے بھاویں مسلماناں دا چوکھا جانی نقصان کیتا پرا وہ فوج نہ تے مدینے دی آزاد مسلم ریاست تے قبضہ کر سکی تے نہ ای اسلامی لشکر دا خاتمہ کر سکی۔ سگوں مسلماناں دی اگلے دن دی یورش ایہہ گل دسدی اے کہ اوہناں دے حوصلے، ولولے تے ایمان وچ وی رتی بھر فرق نہیں سی آیا۔

ایس لکھت نوں پڑھن توں بعد کوئی وی پڑھنہا بڑی آسانی نال ایہہ فیصلہ کر سکدا اے کہ اُحد دے میدان وچ جت

رکس دی ہوئی تے ہار کس دی ہوئی۔ تے جے ایہہ فیصلہ کرن وچ سانوں کسے اوکڑ دا سامنا کرنا پوے تے فیر سانوں بدلیج الزمان سعید دی ایہہ گل پڑھ لینی چاہیدی اے کہ:

The companions of the future defeated the companions of the present in the second stage of uhud. ☞

”اُحد دے دُجے مرحلے وچ آؤن والی کل دے صحابیوں نے آج دے صحابیوں نوں ہرا دتا۔“
یعنی جت سی یاں ہار سی، کوئی فرق نہیں پیندا۔ سبناں وچوں جیہڑے مارے گئے اوہناں نوں جنتاں وچ محل لہے گئے تے دشمنوں وچوں جیہڑے بچ گئے اوہ رسول خدا دے سنگی ساتھی تے اسلامی دنیا دے نہ بھلے جان والے ہیرو تے سپہ سالار بن گئے۔ آج دنیا دی حربی تواریخ دا کیہڑا ورقہ اے جس نوں پڑھدیاں سانوں خالد بن ولید تے عمرو بن عاص دے ناں نظر نہیں آؤندے۔

* * * *

سن ۳ ہجری سے ۴ ہجری دے اہم واقعات

سیدہ اُمّ کلثوم دا نکاح:

سیدہ اُمّ کلثوم رحمت اللعالمین دی صاحبزادی سن۔ آپ حضرت رقیہ توں چھوٹے تے حضرت فاطمہ توں وڈھے سن۔ جدوں حضور دی صاحبزادی تے حضرت عثمان دی زوجہ سیدہ رقیہ دا انتقال ہو گیا تے حضور نے سیدہ اُمّ کلثوم نوں حضرت عثمان نال ویاہ دتا۔ ایسے ویاہ پاروں حضرت عثمان ذوالنورین اکھوائے۔ ایہہ نکاح ربیع الاول ۳ ہجری وچ ہو گیا تے رخصتی تن مہینے بعد جمادی الثانی وچ ہوئی۔

سیدہ اُمّ کلثوم دا نکاح حضرت عثمان نال ایوں ہو گیا کہ ۲ھ وچ سیدہ رقیہ دا انتقال ہو گیا تے حضرت عثمان بہت پریشان رہن لگ پے۔ سیدہ رقیہ بہت ہی خوبصورت تے حسین و جمیل خاتون سن۔ میاں بیوی وچ پیار وی بہت زیادہ سی تے لوکاں اوس جوڑے نوں احسن الزوجین دے ناں نال یاد کر دی سی۔ اسی جدائی تے حضرت عثمان دے غم نوں ہر بندہ سمجھ سکدا اے۔ رحمت عالم دی اوہناں دے دکھ درد نوں سمجھدے سن فیروں اک دن آپ نے اوہناں نوں پریشان رہن دی وجہ پچھ ہی لی۔ حضرت عثمان نے عرض کیتی کہ یا رسول اللہ! دکھی نہ ہوواں تے کیہہ کراں، جیہڑا صدمہ میں ویکھیا اے کوئی چھوٹا جیہا تے نہیں۔ حضور دی صاحبزادی دے انتقال نال میرا لک ٹٹ گیا اے۔ نالے حضور نال جیہڑا قربت دارشتا سی اوہ وی مک گیا۔ جناب عثمان دی ایہہ گفتگو سن کے رسول رحمت نے فرمایا کہ مینوں جبرائیل g نے اللہ تعالیٰ دی بارگاہ توں ایہہ حکم پچایا اے کہ میں اپنی دھی اُمّ کلثوم نوں، اوسے حق مہر تے جیہڑا رقیہ داسی، تہاڈے عقد وچ دے دیواں۔ ایوں رسول خدا نے سیدہ اُمّ کلثوم نوں سیدنا عثمان دے عقد وچ دے دتا۔

تواریخ دیاں کتاباں ایہہ گل وی دسدیاں نیں کہ جدوں حضرت حفصہ بنت عمر بن خطاب بیوہ ہو گئیاں تے حضرت عمر نے ایہہ گل سوچی کہ سیدہ رقیہ دے چلانا کر جان نال حضرت عثمان وی کتے رہ گئے نیں، جے اوہناں دوواں دا ویاہ کر دتا جاوے تے حفصہ نوں بیوگی دا دکھ بھل جاوے گا تے جناب عثمان دا گھر وی آباد ہو جاوے گا۔ جدوں جناب عمر فاروق نے جناب عثمان نال گل کیتی تے آپ خاموش رے، کیوں جے اوہناں دے کنیں ایہہ گل پے چکی سی کہ حضرت حفصہ نال رسول خدا عقد کرنا چاہندے نیں۔ حضرت عمر نے حضرت عثمان دے رویے دی رسول خدا اگے شکایت کر دی۔ ایہہ شکایت سن کے رسول خدا نے فرمایا کہ ”ابن خطاب! میں حفصہ واسطے عثمان توں بہتر شوہر تے عثمان واسطے حفصہ توں بہتر زوجہ دی دس

عہ درالمنثور صفحہ: ۲۰۷ بحوالہ صحابیات از علامہ نیاز فتح پوری صفحہ: ۱۲۸

پاواں؟“ فیر آپ نے حضرت حفصہؓ نوں اپنے نکاح وچ لے لیا تے سیدہ اُم کلثومؓ دا نکاح حضرت عثمان نال کر دتا۔
حضرت حسن دی ولادت:

ایسے سال دے پندرھویں روزے حضرت حسن دی ولادت پاک ہوئی۔ جدوں جناب حسن دی ولادت دا وقت نیڑے آیا تے نانا جان نے حضرت اسماء بنت عمیسؓ تے اُم ایمن نوں خاتونِ جنت سیدہ فاطمہ الزہرہؓ دی خدمت لئی بھیج دتا۔ اوہناں نے آیت الکرسی تے معوذتین پڑھ کے سیدہ تے دم کیتا۔ حضرت حسن دی ولادت ہوئی تے آپ دا جسم بلکل پاک صاف سی۔ آپ دی ولادت اُمت واسطے برکتاں دا سبب بنی۔ بیٹے دے جنم تے خوشی کرن دا ڈھ جناب حسن توں ای بچا۔ رسول خداؐ نے ستویں دن دو ہترے دا عقیقہ کیتا تے دود بنے ذبح کیتے تے اپنی دھی رانی نوں آکھیا کہ پتر دے سر دے وال لوا کے اتنے وزن دی چاندی صدقہ کر دیو۔ حکم دی تعمیل کیتی گئی۔ اوسے دن ای حضور دے حکم نال حضرت حسن دا خنہ کیتا گیا تے رسول خداؐ وی دو ہترے نوں پیار کرن لئی تشریف لیائے۔

آپؐ نے جدوں نومولود داناں پچھیا تے حضرت علیؓ نے عرض کیتی کہ یا رسول اللہ! میری کیہہ مجال سی کہ حضور دی مرضی توں بغیر کوئی ناں رکھ دیندا۔ حضورؐ نے فرمایا کہ میری وی ایہہ طاقت نہیں کہ میں اپنے رب توں پہل کر اں۔ اوسے ویلے جبرائیل حاضر ہوئے تے عرض کیتی کہ ”یا رسول اللہ! اللہ تعالیٰ سلام فرماندے نیں۔ تے حکم دتا اے کہ علیؓ دا تعلق تہاڈے نال اس طرحاں اے جو یں ہارون دا تعلق موسیٰؑ نال سی پر تہاڈے بعد کوئی نبی نہیں آؤنا۔ تیں اپنے پتر داناں اوہ رکھو جیہڑا ہارون دے پتر داناں سی۔ حضورؐ نے پچھیا کہ ہارون دے پتر داناں کیہہ سی؟ حضرت جبرائیلؑ نے عرض کیتی کہ شیر۔ حضورؐ نے فرمایا کہ میری زبان تے عربی اے۔ ایہ سن کے جبرائیلؑ نے عرض کیتی کہ فیر ایس داناں حسن رکھو۔ ایوں حضورؐ نے اس صاحبزادے داناں حسن رکھ دتا۔

جناب حسن نوں حضرت عباسؓ دی زوجہ محترمہ حضرت اُم الفضلؓ نے اپنے پتر قسم دے نال ددھ پیا یا۔ جناب حسن وڈھے ہو کے اپنی پارسائی تے پرہیزگاری پاروں چوکی قدر دی نگاہ نال ویکھے گئے۔ آپؐ نے گھٹو گھٹ ویہ (۲۰) وار مدینے توں پیدل چل کے خانہ کعبہ دی زیارت کیتی تے ایوں ای پندرہ (۱۵) حج وی کیتے۔ آپؐ نے اپنی حیاتی وچ دو واری اپنا سارا مال راہ خدا وچ صدقہ کر دتا۔

آپؐ گورے چٹے تے سوہنے گھبرو جوان سن۔ موٹیاں موٹیاں اکھاں، پھلاں ورگیاں گلاں، کناں تیکر ڈگدے کنڈلاں والے وال تے سنکھنی کالی داڑھی ویکھن والیاں دا دل موہ لیندے سن۔ ویکھدیاں ای پتا لگ جاندا سی کہ ایہہ کس دادو ہترا اے۔
حضرت حفصہؓ تے حضرت زینب بنت خزیمہؓ:

امہات المؤمنین حضرت حفصہ بنت عمر بن خطابؓ تے حضرت زینب بنت خزیمہؓ نوں شرف زوجیت وی تن ہجری وچ بخشیا گیا۔ دوواں ازواجِ مطہرات دا تفصیلی ذکر ازواجِ مطہرات دے باب وچ آوے گا۔

قانون وراثت:

سن تن ہجری وچ اللہ تعالیٰ نے اسلام دا قانون وراثت پورا پورا بیان فرما دتا۔ اے تیکر وراثت وچ ذوی الارحام دا کوئی حصہ نہیں سی، ہن اوہناں نوں وی وراثت وچوں حاصل گیا۔
مشرکہ نال نکاح:

۳ھ توں پہلاں مسلماناں نوں اجازت سی کہ اوہ اہل کتاب توں وکھ کسے مشرک سوانی نال وی ویاہ کر لین پر اس سال اللہ تعالیٰ نے اوہناں نال ویاہ تے پابندی لا دتی تے مشرک سوانی نوں مسلمان مرد تے حرام قرار دتا۔
ہر تیر مسلماناں ول:

اُحد وچ مسلمان مجاہداں نے رسول دے حکم توں جیہڑی لا پرواہی ورتی اللہ نے اپنے کرم تے نترے ہوئے حکم نال مجاہداں دی اوس لا پرواہی تے غفلت نوں معاف کر دتا پر لوکاں اوس نوں معاف کرن لئی تیار نہ ہوئی۔ لوکاں اپنی تھیں ایس گل دا پک کیتی بیٹھی سی کہ محمد رسول اللہ دی جے دے دیہاڑے بیت گئے نیں۔ تے بدر وچ مسلماناں دا جیہڑا ٹوہر ٹپا بنیا سی اوہ مٹا کھلوتا اے۔ کمزوری اُنج وی زور اور ول زور اور داسد اہوندی اے۔

اُحد توں بعد مسلماناں نال وی ایہی کار ہوئی۔ جس قبیلے وچ وی کوئی ساہ ست ہے سی اوہ مسلماناں نوں تھلے لا کے اپنا رعب دبا بنان دے چکر وچ سی۔ ہر سردار توحید دے علمبرداراں نوں ایوں مٹا دینا چاہندا سی جو یں اوہ خدائے واحد دے نام لیوا نہیں سگوں کوئی غلط لکھے ہوئے اکھر ہوں۔ ایوں جا پدا سی کہ پورے عربستان وچ جیہڑا وی تیر کسے کمان وچوں نکلے گا اوہ دارُخ ہن مسلماناں ول ای ہووے گا۔

سب توں پہلاں قطن پہاڑ دے نیڑے فید دے علاقے وچ وسوں کیتی بیٹھے دوزور اور بھراواں طلحہ بن خولید تے سلمہ بن خولید نے صلاح کیتی کہ رسول خدا نال جنگ کر کے اوہناں دی ری کھسی طاقت مکا دتی جاوے تے فیر سارے علاقے وچ اپنی جے ہو جائے گی۔ رسول اکرم دے انٹیمی جنس ونگ نے بڑی شتابی نال ایہہ خبر آپ تیکر اپڑا دتی۔ آپ نے مدینے دے اندر رہ کے اوہناں نوں اڈیکن دی بجائے اوہناں تے پیشگی تے اچن چیت حملے دا فیصلہ کیتا تے جناب ابو سلمہ بن عبدالاسد مخزومی نوں ڈیڑھ سو مجاہداں نال خولید دے پتراں دی سرکوبی دا حکم دتا۔ حضرت ابوسلمہ جدوں اسلامی لشکر نوں لے کے قطن دے نیڑے اپڑے تے سازشی ٹولے تے اہجیا رعب پیا کہ اوہ اگے لگ کے بھج کھلوتے۔ مسلمان مجاہداں نے اوہناں دا مال ڈنگرو یڑھ لیا نڈا تے تن بندے وی پھڑ لیا نڈے۔ لشکر اسلام کوئی یارھویں بارھویں دیہاڑے بڑی شان نال مدینے واپس پر تیا تے لوکاں دی ایہہ سوچ غلط ثابت ہو گئی کہ مسلمان چوکھے لسنے پے گئے نیں پر ایس مہم دا اک نقصان ایہہ ہو یا کہ قوم ابوسلمہ جے اک سیانے کمانڈر توں محروم ہو گئی۔

ابوسلمہ جنگ اُحد وچ پھڑ ہو گئے سن۔ کوئی مہینا کو علاج معالجہ کیتا تے ول ہو گئے پر قطن ول لشکر کشی دے نتیجے تے اوہی زخم فیر کھل گئے۔ ایس وار اوہناں زخماں دا علاج نہ ہو سکیا تے اخیر ایہ دلیر غازی تے سیانا سپہ سالار ۲۷ جمادی الثانی ۴ھ نوں اللہ نوں پیارا ہو گیا۔

جناب ابوسلمہ بن عبدالاسد مخزومی قرشی دا اصل ناں عبداللہ سی۔ آپ نبی رحمت دی پھوپھی دے پتر تے رضاعی بھرا وی سن۔ آپ حبشہ دے مہاجر اں وچ شامل سن۔ ہجرت مدینہ توں بعد آپ وی مدینے اپڑ گئے۔ غزوہ بدر وچ اپنی بہادری دے جوہر دکھاندے رے تے غزوہ احد وچ وی بڑی ثابت قدمی نال لڑے۔ جناب ابوسلمہ دی بیوہ جناب اُم سلمہ نوں بعد وچ اُم المؤمنین بن دا شرف حاصل ہوئی۔

جنہاں دناں وچ جناب ابوسلمہ قطن دی مہم تے سن، اوہناں دناں وچ ای رسول خدا دے محکمہ جاسوسی نے ایہہ خبر دی کہ عرنہ دی تھاں تے سفیان بن خالد ہڈی ناں دا بندہ مسلماناں دے خلاف فوج اکھٹی کر رہیا اے۔ آپ نے جناب عبداللہ بن انیس نوں حکم دتا کہ اوہ سفیان نوں قتل کر دیں۔ جناب عبداللہ اوس خبیث توں بلکل واقف نہیں سن، ایس لئی رسول خدا اگے عرض کیتی کہ سفیان دی سبجان پچھان لئی کوئی گل دس دیں۔ آپ نے فرمایا کہ ”عبداللہ! جدوں اوس نوں دیکھیں گاتے اوس توں ڈر جاویں گاتے نالے تینوں شیطان یاد آ جاوے گا۔“ جناب عبداللہ نے رسول خدا کوں کوئی داء مارن دی یاں حربی چال چلن دی اجازت منگی جیڑی اوہناں نوں مل گئی۔ فیر جناب عبداللہ نے اللہ داناں لے کے تلوار پھڑی تے عرنہ ول ٹرپے۔ عرنہ اپڑے تے رسول خدا دی دسی نشانی موجب اوس نوں پچھان گئے تے نالے اوس نوں دیکھ کے ڈر وی گئے۔ پر عبداللہ اوس دے نیڑے ہوندے گئے، اخیر اوس نے پچھیا کہ جونا! کون ایں تے کوں آیا ایں؟ عبداللہ آکھن لگے کہ ”سردار! پتا لگاسی کہ تسیں محمد دے خلاف لڑن لئی فوج اکھٹی کر رے او، میں بنو خزاعہ دا بندہ اہاں تے تہاڈے موہڈے نال موہڈا لانا چاہندا ہاں۔“ فیر عبداللہ اوہدے نال نال ٹر دے رے تے اوہدے مطلب دیاں گلاں کر دے رے۔ گلاں کر دے کر دے اوس دے خیمے تیکر اپڑ گئے۔ اوہدے سنگی ساتھی اپنے اپنے خیمیاں وچ ٹر گئے پر عبداللہ دیاں سفیان نال گلاں نہ مکیاں۔ ایہتوں تیکر کہ جدوں سارے لوکی سو نہ گئے تے عبداللہ ہوراں سفیان دی دھون تے تلوار ماری تے دھون وڈھ کے مدینے ول ٹرپے۔ وڈھے ویلے، جدوں اوس دے بندیاں سردار ہوراں دی سرکٹی لاش دیکھی تے حساب لایا کہ ہووے نہ ہووے ایہہ کم اوسے بندے دا ہی اے جیہڑا راتیں سردار ہوراں نال مٹھیاں مٹھیاں گلاں کر رہیا سی۔ سفیان دے بندے قاتل نوں لہمن چارے پاسے نکل کھلو تے پر عبداللہ اک غار وچ لک گئے جہدے باہر کلڑی نے جالا لا دتا تے ایوں اوہ بندے جناب عبداللہ تیکر نہ اپڑ سکے۔ امن چین ہوئی تے جناب عبداللہ مدینے ول ٹرپے۔ جدوں اوہناں جناب رسول خدا نوں مہم دی کامیابی دی خبر سنائی تے آپ بڑے راضی ہوئے تے عبداللہ ہوراں نوں اک سوٹا (عصا) تحفہ دتا تے فرمایا کہ ”عبداللہ! لے ایس نوں پھڑ کے ہیشٹاں وچ وڑ جا۔“ جناب عبداللہ نوں رسول خدا دے اوس تحفے نال ایڈا پیاری کہ جدوں موت دا ویلا آیتے اپنے گھر والیاں نوں وصیت کیتی کہ اوہ لاٹھی وی اوہناں دے نال ای دفن کیتی جاوے۔

چیتے رہوے کہ جناب عبداللہ بن انیس انصار مدینہ وچوں سن تے بنو سلمہ دے حلیف سن۔ آپ بیعت عقبہ، غزوہ بدر تے غزوہ احد وچ شریک ہوئے سن۔ آپ مسلماناں دے اوس جتھے وچ وی شامل سن جنہاں بنو سلمہ دا بت توڑ یا سی۔ آپ

۴۷ھ وچ فوت ہوئے سن۔

بُر معونہ دا حادثہ:

مدینے توں نجد دے راہ وچ بنو عامر دے علاقے، تے قبیلہ بنو سلیم دے پتھر یلے میدان دے وچکار لے علاقے وچ اک کھوسے جیہڑا بنو سلیم دی ملکیت سی، اوس نوں معونہ دا کھوسے یاں بُر معونہ آکھدے سن۔ صفر ۴ھ وچ اوس علاقے توں اک بندہ عامر بن مالک، جہدی کنیت ابو براء سی پر اوہ ملائعہ الاسنہ (نیزیاں نال کھیڈن والا) دے نام نال مشہور سی، سرکار دو عالم دی خدمت وچ حاضر ہوئی تے آپؐ نال چوکی محبت دا اظہار کرن لگ پیا۔ آپؐ نے اوس نوں اسلام دی دعوت دتی پر اوہ آکھن لگا کہ تسیں نجد وچ کجھ بندے میرے نال ٹور دیوتاں جے اوہ اوتھے جا کے اسلام دی تبلیغ کرن، اُمید اے نجد دی لوکائی مسلمان ہو جاوے گی۔ خیال سی کہ ابو براء دُجے نجدیاں دے نال ای اسلام قبولن دا اعلان کرنا چاہندا سی۔ نبی رحمت نے ایہہ اندیشہ ظاہر کیتا کہ اہل نجد مسلماناں نوں نقصان پہنچان گے پر فیرا لیس خیال نال کہ اخیر رب داسنیہا لوکائی تیکر اڑانا تے ہے ای، اپنے ستر اچھے جان نثار ساتھی جیہڑے قرآن پڑھنا جان دے سن تے دین دیاں گلاں نوں سمجھدے سن، منذر بن عمر دی قیادت وچ ابو براء دے نال نجد وچ ٹور دتے۔ نالے ابو براء نے وی آپؐ نوں تسلی دتی کہ کسے دی کیہہ مجال اے کہ اوہ ابو براء دے ہندیاں مسلماناں ول بھیڑی اکھنال دیکھے۔

ستر قاریاں دے اوس تبلیغی جتھے وچ جناب حرام بن ملحان، عروہ بن اسماء، نافع بن بدیل تے عامر بن فہیرہ ورگے مشہور صحابی شامل سن۔ جتھے نے بنیر معونہ دی تھاں تے جا کے ڈیرے لالے تے نال ای حرام بن ملحان دے ہتھ رسول خداؐ دا دعوت نامہ بنو عامر دے سردار عامر بن طفیل ول گھل دتا۔

عامر بن طفیل بڑا گھٹیا تے لالچی جیہڑا سردار سی۔ اوس نے مسلماناں دی ہر دیہاڑے ودھی جاندی شان نوں ویکھ کے جناب رسول خداؐ ول سنیہا گھلیا سی کہ اوہ آپؐ دا ساتھ دین لئی تیار اے پر ایس شرط تے کہ شہری علاقیاں وچ جناب رسول خداؐ دی حکومت ہووے گی تے پنڈاں وچ عامر دی۔ یاں جے ایوں نہیں تے فیرا رسول خداؐ عامر نوں اپنا جانشین من لین تے جے ایہہ شرط وی منظور نہیں تے فیرتیجی گل دا فیصلہ تلواراں کرن گلیاں۔ ہن جدوں حضرت حرام نے رسول رحمتؐ دا نامہ مبارک عامر دے حوالے کیتا تے اوس نے خط پڑھن دی بجائے اپنے اک بندے نوں حکم دتا تے اوس بد بخت نے حضرت حرام نوں پکھے ایوں نیزہ ماریا کہ اوہ آ رہا ہو گیا۔ جناب حرام زمین تے ڈگ پے تے اچن چیت آپؐ دے منہوں نکلیا: ”اللہ اکبر فزت ورب الکعبة“ اکبر، رب کعبہ دی سونہہ میں بازی جت لئی اے ﴿﴾ رب کعبہ دی قسم چک کے اپنی کامیابی دا اعلان کرن والے رب دے محبوب دے ایہہ محبوب بندے (حضرت حرام) جناب اُم سلیم دے بھراتے حضرت انس دے ماما جی سن۔

بچ عامر بن طفیل دی ایس قتل نال تسلی نہ ہوئی تے اوس نے اپنے قبیلے نوں واج ماری کہ سارے دے سارے مسلماناں نوں قتل کر دتا جاوے۔ پر اوہناں نے جواب دتا کہ ”سردار! ساڈے ای اک بندے ابو براء نے اوہناں نوں پناہ دتی اے، ایس اوس دی پناہ نوں رد کر کے مسلماناں نوں قتل نہیں کر سگدے۔ ایہہ سدھی سدھی معاہدہ توڑن والی گل اے۔“ ایہہ

جواب سن کے عامر نے قبیلہ بنو سلیم نوں پکاریا۔ بنو سلیم دیاں لڑیاں عُصَیَّہ، رِغْل تے ذُکوان دے بندیاں نے آکے صحابہ کرام دامحاصرہ کر لیا۔ اوہناں نوں کوئی چیت چیتا وی نہیں سی کہ کوئی اچھے بندے اوہناں تے حملہ کر دین گے، جہناں دے بخت سنوارن لئی اوہ لے پینڈے کر کے پردیس وچ ڈیرے لائی بیٹھے سن۔ پر شوہدے نجدی بتکیاں تلواراں لے کے اگاں توں اگاں ودھدے گئے تے خیماں وچ بیٹھے مسلماناں نوں شہید کر دتا۔ اوہناں عالم فاضل مسلماناں وچوں صرف دو مسلمان زندہ بچ سکے جہناں وچ اک حضرت کعب بن زید سن جیہڑے چوکھے پھڑھڑے سن پر اوہناں نوں دشمن مردہ سمجھ کے چھڈ گئے تے دُجے جناب عمرو بن اُمیہ ضمری سن جیہڑے اونٹ چران لئی چوکھے دریڈے نکل گئے سن۔ واپس پر تے عامر دے بندیاں نے آپ نوں اسیر بنا لیا۔ جدوں آپ نوں عامر دے سامنے پیش کیتا گیا تے اوس نے آپ دے متھے دے اُتوں سردے وال لوادے آکھن لگا کہ توں میرا غلام ایں پر میں تینوں آزاد کرناواں کیوں جے میری ماں نے اک غلام آزاد کرن دی نذر مئی سی پر اوہ نذر پوری نہیں کر سکی سی۔

جدوں جناب عمرو بن اُمیہ مدینے ول واپس جا رہے سن تے راہ وچ بنو عامر بن صعصعہ قبیلے دے دو بندیاں نال اوہناں دا ٹاکرا ہو گیا۔ جناب عمرو نے پچھیا کہ تہاڈا تعلق کیہڑے قبیلے نال اے تے اوہناں نے جواب دتا کہ بنو عامر نال۔ عمرو سخت غصے وچ سن۔ اوہناں نے سمجھیا کہ اوہ بندے اوسے بنو عامر دے قبیلے دے نیں جس نے مسلمان قاریاں نوں شہید کیتا اے، ایوں دو پہر ویلے اوہناں ستے ہونیاں نوں قتل کر دتا۔ جناب عمرو نوں ایس گل دا پتا ای نہ لگ سکيا کہ اوہ بندے بنو عامر بن طفیل دے نہیں سگوں بنو عامر بن صعصعہ دے سن۔ دُجی گل ایہ وی سی کہ اوہناں بندیاں نوں رسول خداؐ نے امان دتی ہوئی سی پر ایس گل دا وی جناب عمرو نوں علم نہیں سی۔ ایوں جدوں عمرو مدینے اپڑے تے جناب رسول خداؐ دہرے صدمے نال دو چار ہوئے۔ اک صدمہ اپنے پیاریاں دی شہادت دا تے دُجا اوہناں بندیاں دے قتل دا جیہڑے آپ دی امان وچ سن۔ بنو عامر دے اوہناں دو بندیاں دے قتل نے اگے جا کے اسلامی تواریخ تے بڑے ڈونگے اثرات چھڈے، جہدا ذکر اگے آوے گا۔

رجیع دا المناک حادثہ:

رجیع دا افسوس ناک واقعہ اسلامی تواریخ وچ کئی ناناواں نال مشہور اے جو یں کہ سریہ رجیع، سریہ مرشد بن ابی مرشد، سریہ عاصم بن ثابت، عُضَل تے قارہ قبیلیاں دی غداری، تے بنو ہذیل دا انتقام وغیرہ۔ ایہہ سارے اپنی اپنی تھاں تے ٹھیک جاپدے نیں کیوں جے ایہناں دا ایس حادثے نال ڈونگا تعلق اے۔

جزیرہ نمائے عرب وچ الرجیع ناں دے دو تھاں نیں۔ اک خیبر دے نیڑے اے جتھے غزوہ خیبر دے موقع تے رسول خداؐ نے پڑاؤ کیتا سی تے دُجا مکے تے طائف دے وچکار اُلھداہ دے نیڑے ہے۔ اوس تھاں تے بنو ہذیل دا اک کھوہ وی سی جنوں بَر معاویہ آکھدے سن ﴿﴾ ایہہ چشمہ عسفان توں ۸ میل دے پندھ تے سی ﴿﴾ ایس حادثے دا تعلق ایسے بعد

والے رجب نال اے۔ ہونیا ایس طرحاں کہ رسول خدا دے خلاف سازشاں کرن والے سفیان بن خالد نوں جناب عبداللہ بن اُنیس قتل کر آئے سن۔ اوس دے قبیلہ دار کجھ چراں تیکر تے نموش بیٹھے رہے پر فیر بنو ہذیل نے بدلہ لین دا سوچیا۔ ایوں اوہناں دے غصہ تے قارہ قبیلیاں دے کجھ بندے رسول خدا دی خدمت وچ حاضر ہوئے تے آکھن لگے کہ ”اسیں مسلمان تے ہو گئے آں پر سانوں دین دنیا دی سمجھ کوئی نہیں، تے اے اللہ دے رسول! جے تسیں کجھ سیانے بندے ساڈے نال ٹور دیو تے اوہ دین دی تعلیم دین گے تے نالے سانوں قرآن پڑھان گے۔“ رسول خدا نے اوہناں دی درخواست تے دس صحابہ کرام نوں اوہناں دے نال جان دا حکم دتا تے عاصم بن ثابت یاں مرثد بن ابی مرثد خالد نوں اوہناں دا امیر مقرر کیتا۔

رسول خدا دے حکم دی تعمیل وچ عضل تے قارہ دے بندیاں دے نال مسلمان مبلغاں دا اوہ نکاحیا جتھا جدوں رجب دی تھاں تے اپڑیا تے دھوکے باز کافر ہمرائیاں نے بنو لحيان نال رل کے ایہہ سازش کیتی کہ اوہناں مسلماناں نوں مکے لے جا کے، اوہناں دے دشمنان اگے وچ کے منہ منگیا مل وصولیا جاوے۔ اوہناں نے بنو لحيان نوں ایہہ لالچ دتا کہ وٹے مل وچ اوہناں دا سانواں حصہ ہووے گا۔ ایوں رب تے اوس دے محبوب دا جھنڈا اُچا کرن دے جذبیاں نال بھرے، بے وطن ہوئے معصوم مسلماناں نوں کافراں نے گھیر لیا۔ جدوں مسلماناں نے وی اپنیاں تلواراں نیاماں وچوں کھچ لئیاں تے کافراں نے ٹیک چالیاں چھوہ دتیاں تے آکھن لگے کہ ساڈا ارادہ تے کوئی بھیڑا نہیں سی پر لگدا اے کہ تسیں ساڈے نال لڑنا چاہندے او۔ ہن خیر ایدے وچ اے کہ تسیں اپنے آپ نوں ساڈے حوالے کر دیو پر مسلماناں نے اپنے آپ نوں کسے کافر دی پناہ وچ دین توں رڑا رنگا جواب دے دتا۔ فیر جو ہونا سی اوہی ہوئی۔ لڑائی شروع ہو گئی۔ جناب زید بن دشہ، خبیب بن عدی تے عبداللہ بن طارق گرفتار ہو گئے تے اللہ دے باقی شیراں نے رجب دی تھاں تے ای شہادت دا پیالہ پی لیا۔

شہید ہون والے مردان خدا وچ جناب عاصم بن ثابت وی شامل سن جہناں نے اُحد دے معرکے وچ کافرہ سلافہ بنت سعد دے علمبردار پتراں نوں موت دی نیند سوائیا سی۔ اوہدوں سلافہ نے ایہہ قسم کھا دی سی کہ اوہ عاصم نوں قتل کر کے اوس دی کھوپڑی وچ شراب پیوے گی۔ جدوں سانجھ رجب وچ اوہ شیر دل غازی شہید ہو گیا تے کافراں نے ایہہ چاہیا کہ اوہ جناب عاصم دا سر کٹ کے مکے سلافہ کول لے جان تاں جے اوہ اپنی قسم پوری کر لوے تے نالے سانوں اوہدے کولوں منہ منگیا مال مل جاوے گا۔ جدوں کافر ایس ارادے نال جناب عاصم دی لاش ول ودھے تے شہد دیاں کھیاں نے اللہ دے مجاہد نوں اپنی حفاظت وچ لے لیا۔ جدوں کوئی پلیت ہتھ اوہناں ول ودھن دا جتن کر دا تے شہد دیاں کھیاں دا اوہ خدی لشکر اوس تے ہلہ بول دیندا۔ فیر اوہناں سوچیا کہ شام ویلے تے کھیاں اپنے چھتیاں وچ ٹر جان دیاں نیں، اوس ویلے اسیں اپنا کم کر لوں گے پر شام نوں وادی وچ اچھیا ہڑھ آیا کہ اوہ جناب عاصم دے جسم پاک نوں روہڑ کے لے گیا۔ ایوں کافر سازشی ہتھ مل دے رہ گئے۔ اصل وچ گل ایہہ سی کہ جناب عاصم نے اللہ تعالیٰ اگے ایہہ دعا کیتی ہوئی سی کہ مالکا! میرے جسے نوں

عہ ابن سعد، ابن کثیر امام بخاری تے شبلی نعمانی نے ۱۰۱۰ دی تعداد دی اے جدوں کہ ابن ہشام تے محمد حسین ہیکل نے ۶۱ دی تعداد لکھی اے۔

کے کافر دانا پاک ہتھ نہ لگنا دینا۔

ایس ناکامی توں بعد کافر پھڑے گئے مسلماناں نوں نال لے کے مکے ول ٹر پے تاں جے او تھے اوہناں دا مل وٹ سکے۔ راہ وچ جدوں ظہران دی تھاں تے اپڑے تے حضرت عبداللہ بن طارق نے اپنے آپ نوں آزاد کرا کے تلوار کھچ لئی تے لکارا ماریا کہ آؤ بئی خدا دے دشمنو! اگے ودھو تے فیر ابن طارق دی تلوار دا تماشہ دیکھو۔ کافراں دے وڈھے سارے جتھے وچوں کسے نوں مقابلے دی جرأت نہ ہوئی تے دوروں ای جناب عبداللہ تے پتھر وگان لگ پے۔ اوہناں حضرت عبداللہ نوں اپنے پتھر مارے کہ آپ شہید ہو گئے۔ گرفتار خبیث تے زید اپنے بے وطن مسلمان بھرا دی شہادت دا منظر دیکھدے رے پر رب دے شیر اپنی گرفتاری پاروں جناب عبداللہ دی کوئی مدد نہ کر سکے۔ ظہران وچ اوہناں دا مزار آج وی عاشقان مصطفیٰ نوں ایہہ درس دیندا اے کہ مسلمانو! خدا تے اوس دے رسول دی اطاعت تے ہمیش ای ڈٹے رہنا بھانویں پتھراں دا مینہ تہانوں پھیہہ کے رکھ دیوے۔

ہن کافر زندہ رہن والے باقی دوا سیر مسلماناں نوں لے کے فیر مکے ول ٹر پے۔ حضرت خبیث نے جنگ بدروچ حارث بن عامر نوں قتل کیتا سی، ایس لئی اوہناں نوں حارث دے پتر عقبہ اگے وچ دتا گیا تاں جے اوہ خبیث نوں قتل کر کے اپنے پیو دے قتل دا بدلہ لوے۔ جناب خبیث کوئی اک مہینے تیکر اپنے قاتلاں دے گھر وچ قید رے۔

حضرت خبیث نے اپنی اسیری دے دن حارث دی اک اجہی حویلی وچ گزارے جتھے حارث دی اک ویاہی ہوئی دھی زینب وی رہندی سی۔ جدوں جناب خبیث دے قتل دی تیغ تھ لئی گئی تے اوہناں نے زینب دا ترلا ماریا کہ اوہ اوہناں نوں حجامت ٹھیک کرن لئی رچھ دے دیوے۔ بنت حارث جناب خبیث نوں کوئی عام قیدی نہیں سمجھدی سی تے اوہناں دا احترام کردی سی، ایس لئی اوس نے رچھ دا بندوبست کر دتا۔ کچھ دیر پچھوں زینب کسے دھیانے لگ گئی تے اوس دا اک نکاجیا پتر (حارث دا دو تھرا) جناب خبیث کول جا بجا۔ آپ نے دشمن خدا دے دوہترے نوں جھولی وچ بٹھالیا تے اوس نوں پیار کر دے رے۔ اچن چیت زینب دی نظر پے گئی۔ اوہ جناب خبیث دے تھ وچ اُسرا تے جھولی وچ اپنے پتر نوں ویکھ کے گھاہر گئی۔ آپ نے اوس نوں پریشان دیکھیا تے فرمایا ”زینب! تینوں ڈراے بئی میں ایس چھوہر نوں قتل کر دیواں گا، یاد رکھ مسلمان ایچ نہیں کر دے، میں وی انشاء اللہ ایس نوں کچھ نہیں آکھاں گا۔“ جدوں زینب مسلمان ہو گئی تے اوہ دسویں ہوندی سی کہ اوس نے خبیث توں چنگا کوئی قیدی حیاتی وچ نہیں دیکھیا۔ اوس نے دسیا کہ اک دن خبیث ساڈے بندی خانے وچ بیٹھے انگور کھا رہے سن، ایس حالت وچ کہ پیراں وچ بیڑیاں پیاں تے نالے مکے وچ اوہناں دناں وچ انگور داناں نشان وی نہیں سی ۛ زینب جناب خبیث نوں بے موسے انگور کھاندیاں ویکھ کے حیران تے ضرور ہوئی پر فیر اوس دی عقل نے کم کیتا کہ اصل وچ اوہ رب ولوں اپنے بندے لئی بہشتاں دا تحفہ سی۔

جدوں بنی حارث اوہناں نوں قتل کرن لگے تے اوہناں نے دو رکعت نماز پڑھن دی مہلت منگی۔ آپ نے چھیتی نال ای نماز پڑھ لئی تے فیر فرمایا کہ جے مینوں ایہہ ڈرنہ ہوندا کہ تسیں آکھو گے کہ موت توں ڈردا نماز لمی کر گیا اے تے فیر میں ۛ مختصر سیرت رسول از عبداللہ بن محمد بن عبد الوہاب، صفحہ ۵۰۰.....

نماز لمی کر کے ای پڑھدا۔

مقتل ول جان لگیاں دو رکعت نماز پڑھن دارواج اصل وچ جناب خبیب دی سنت اے جیہڑی اے تیکر جاری اے۔ جدوں جناب خبیب نوں شہید کرن لئی حرم دی حد توں باہر تنعم دی تھاں تے لے جایا گیا تے آپ نے اوہناں مشرکاں دے حق وچ بدعا کیتی تے رب العزت دی بارگاہ وچ عرض کیتی کہ یا اللہ اسماں تیرا تے رسول داسنیا لوکاں تیکر اپڑا دتا اے۔ ہن جو کجھ ایہہ لوک ساڈے نال کر رہے نیں، ایس دی خبر اپنے حبیب تیکر اپڑا دے۔ اے اللہ ایہناں ظالماں دی گنتی گھٹ کر دے، ایہناں نوں تیتلا تیتلا کر دے تے ایہناں وچ کسے نوں جیوندانہ چھڈیے۔ ایس بدعا توں بعد کافراں نے آپ نوں نیزے مارنے شروع کر دتے۔ فیر آپ نوں اک پھٹے نال، ننھ دتا گیا، تے فیر بے وسے عاشق رسول نوں عقبہ بن حارث نے برچھاما مار کے شہید کر دتا۔ تختہ دار ول جان دے اوس مرد حق نوں مکے دی جاہل لوکاں نے پچھیا کہ:

﴿أَتُحِبُّ أَنَّ مُحَمَّدًا مَكَانَكَ﴾

(کیہہ توں ایہہ پسند کرنا ایں کہ اس ویلے تیری تھاں تے محمد (علیہ الصلوٰۃ والسلام) ہوندا؟) ایہہ سن کے توحید دے اوس علمبردار تے شیع رسالت دے پروانے نے جواب دتا کہ تسیں ایس تھاں دی گل کر دے او، رب دی سونہ مینوں تے ایہہ گل وی وارا نہیں کھاندی کہ میری حیاتی دے بدلے میرے آقائے پیروں وچ کنڈاوی چھے۔ جس دیہاڑے جناب خبیب نوں شہید کیتا گیا، صحابیوں نے جناب رسول خدا دی زبان مبارک توں ایہہ اکھر سنے:

﴿عَلَيْكَ السَّلَامُ خُبَيْبُ قَتَلْتَنِي قُرَيْشٌ﴾

”خبیب: تینوں سلام۔ اوس نوں قریش نے قتل کر دتا اے۔“

جناب خبیب نوں قتل کرن والے تماش بیناں دی اوس منڈلی وچ معاویہ بن ابوسفیان تے سعید بن عامر وی موجود سی جیہڑے بعد وچ مسلمان ہو گئے۔ معاویہ آکھدے نیں کہ جدوں جناب خبیب نے بدعا کیتی تے ساڈے اُتے اوس دا اتنا خوف سوار ہو گیا سی کہ میرے لبے نے مینوں زمین تے لمیاں پا دتا۔ میرے لبے دا ایہہ اعتقاد سی کہ جے بدعا ویلے بنداپاسے پرنے لماپے جاوے تے بدعا دا اثر نہیں ہوندے پر جناب خبیب دی بدعا دا خوف ہمیش ای اوہناں لوکاں دے نال نال رہیا۔

اک وار ایوں ہو گیا کہ جناب عمر فاروق نے حمص دا دورا کیتا تے لوکاں نوں اپنے گورنر سعید بن عامر ولوں پچھیا۔ لوکاں نے صاف صاف آکھ دتا کہ آہو سانوں تہاڑے گورنر نال کئی شکائتاں نیں۔ خلیفہ نے آکھیا تے دسو فیر کیہہ کیہہ شکائتاں نیں؟ لوکاں نے جواب دتا کہ پہلی شکایت تے ایہہ اے کہ اوہ ساڈے کول اوس ویلے آؤندا اے جدوں سورج چوکی اُچھیا تے ہوندا اے یعنی کوئل کر کے آؤندا اے۔ دُجی شکایت ایہہ ہے کہ جے رات نوں اوس دی روٹی ورجو تے اوہ انکار کر دیندا اے تے نالے اوہ رات نوں کسے بندے دے متھے دی نہیں لگدا۔ تیجی شکایت ایہہ ہے کہ اوہ مہینے وچ اک دن گھراں رہندا اے تے ساڈے کول نہیں آؤندا تے چوتھی شکایت ایہہ ہے کہ کسے ویلے اوس نوں غش پے جاندا اے۔

ایہہ شکائتاں سن کے جناب فاروق اعظم نے گورنر نوں طلب کیتا تے آکھیا کہ ”دس بئی سعید کیہہ ایہہ گلاں ٹھیک نیں؟“

ترجما: جے تینوں ایہوجئی غداری دیکھن داشوق ہووے جہدے وچ کوئی شک نہیں تے فیر رنج اپڑ جاتے اوتھے بنو لہیان دامحلہ پچھ لے، اوہ اچھے لوک نہیں جنناں اک دُجے نوں گوانڈی دامال کھان دی وصیت کیتی ہوئی اے۔ کُتے، باندرتے بنولہیان دے بندے وچ کوئی فرق نہیں۔ جے کسے دیہاڑے بکرا بول پوے تے اوہ اوہناں دا خطیب اے تے کاں ورگا پکھیر وی اوہناں وچ عزت دار تے ذیشان اے۔

ابوسفیان دی اک ہور چال:

مکے وچ اک دیہاڑے ابوسفیان منڈلی لا کے جوئی داراں نال گپ شب کر رہیا سی۔ اوہناں نوں آکھن لگا کہ بندو! محمدؐ عام لوکانی طرحاں یثرب دیاں گلیاں وچ لگا پھر دا اے۔ کوئی باڈی گارڈیاں ایوں دا کوئی دُجا بندا اوس دے نال نہیں ہوندا۔ جیویں جان دے او کوئی بندہ ہمت کروتے لک چھپ کے کوئی اجیا وار کرو کہ اوہدے والا کم ہو جاوے۔ ایوں اوس توں اسیں اپنا بدلا وی لے لوں گے تے اگے وانگ دی حیاتی وی گزارن لگ پواں گے۔ اوس ویلے تے کسے بندے حامی نہ بھری پر جدوں ابوسفیان اپنے گھر اپڑ گیا تے اک بدوی مگرے مگر اوہدے کول اپڑ گیا تے آکھن لگا کہ ابوسفیان! گل ایہہ ہے کہ میرے کول چیل دے پر جڈا اک خنجر اے تے نال میں راہواں داوی سیانا واں، جھیرڈی گل توں کیتی اے اوس نوں میں توڑ چا ہڑ سکدا ہاں پر خرچا پانی تیرے ذمے ای۔ ابوسفیان نے آکھیا کہ اوہ تے ہونا اے۔ فیر ابوسفیان نے اوس نوں سواری تے سفر خرچ دتا۔ ایوں اوہ بدورات ویلے اپنے پلیت ارادے نال مدینے ول ٹر پیا۔ جھویں دن مدینے اپڑیا تے محبوب خدا ولوں پچھدا پچھاندا بنو عبدالاشہل دے محلے وچ آپ کول جا بچیا۔ رسول خدا اوہدوں مسیتے بیٹھے صحابہ نال اللہ دے دین دیاں گلاں کر رے سن۔ آپ نے جدوں اوس نوں دیکھیا تے فرمایا کہ ایہہ بندہ کوئی جنگے ارادے نال نہیں آیا پر اللہ تعالیٰ ایس نوں کامیاب نہیں ہون دیوے گا۔ ایسے وچ اوہ بندہ ہور نیڑے ہو گیا تے آکے آکھن لگا کہ دسوئی بندو! تہاڈے وچ ابن عبدالمطلب کیہڑا اے؟ ایہہ سن کے جناب سرور کائنات نے فرمایا کہ ”میں آں عبدالمطلب دا پتر“۔ آپ a دی آواز سن کے اوہ حضور دے ایوں نیڑے ہو گیا جویں بندہ کوئی راز دی گل کردا اے۔ ایہہ دیکھ کے حضرت اُسید بن حنیر نے اوس دے گلوں وچ ہتھ پا کے اوس نوں پچھے کھچ لیا تے اوس نوں سختی نال آکھیا کہ ”پچھے ہٹ جا رسول خدا توں“ جدوں اوس نوں دھکا دتا تے پتا لگ گیا کہ اوس نے تہہ بند وچ خنجر لکایا ہو یا سی۔ خنجر دیکھ کے حضرت اُسید نے عرض کیتی کہ ”یا رسول اللہ! ایہہ بندہ دھوکے باز تے غدار لگدا اے۔“

جدوں بدودی چال پھڑی گئی تے اوس نے معافی منگنی شروع کر دی پر حضرت اُسید نے اوس نوں گریبان توں پھڑ لیا۔ فیر رسول خدا نے آکھیا کہ جے سچی گل کریں گاتے تیرا ای فیدہ اے تے جے جھوٹ توں کم لوں گاتے فیر سن لے کہ مینوں تیرے ارادے دا پتا لگ چکیا اے۔ ایہہ سن کے اوس نے ساری گل سچ سچ سنا دی تے رحمت دو عالم نے اپنے قتل دے ارادے نال آون والے بندے نوں معاف کر دتا۔ حضور نے اوس ویلے تے اوس نوں حضرت اُسید دے حوالے کر دتا پر اگلے دن جدوں حضرت اُسید نے اوس دی پیشی کرائی تے آپ نے حکم جاری فرمایا کہ ”توں امان وچ ایں، جتھے دل کردا ای جا پر اک گل ایس توں وی چنگی آ، جے مرضی آتے قبول کر لے۔“

”اوہ کیہہ گل اے؟ اوس نے پچھیا۔“

”مسلمان ہو جاتے آکھ لا الہ الا اللہ محمد رسول اللہ۔“ رسول خدا نے جواب دتا۔

ایسن کے اوہ خوشی خوشی مسلمان ہو گیا تے آکھن لگا کہ ”اے اللہ دے رسول! میں کدے کسے بندے توں نہیں ڈریا۔ پر تہانوں وکھے کے تے میں چکرا گیا ساں۔ دُجی گل ایہہ ہے کہ جیہڑیاں گلاں میرے تے ابوسفیان دے وچکار ہوئیاں سن اوہناں دا کسے تیجے بندے نوں کجھ پتا نہیں سی۔ تہانوں اوہناں گلاں دا پتا لگ گیا اے جہدے توں ایہہ گل سمجھ آؤندی اے کہ تسیں سچ سچ اللہ دے رسول او، تے ابوسفیان دا جتھا شیطان دا جتھا اے۔“ اوہدیاں گلاں سن کے رسول خدا تبسم فرماؤندے رے۔ اوہ بدو کئی دیہاڑے مدینے وچ رہیا فیر جناب رسول خدا دی اجازت لے کے ٹر گیا تے اوس دا ذکر

کدھرے ویلے دی دھوڑ تھلے دیا گیا۔

بنو نضیر دے یہودیوں دی جلا وطنی:

پچھے بئیر معونہ دے حادثے دے ذکر وچ ایہہ گل تسیں پڑھ چکے او کہ حضرت عمرو بن اُمیہ ضمری دے ہتھوں دوا جے بندے بھل پلکھے وچ مارے گئے سن جیہڑے جناب رسول خدا دی امان وچ سن۔ اوہناں مرن والیاں دے قبیلے بنو عامر دا تعلق بنو نضیر نال وی سی سگوں اوہ قبیلہ بنی نضیر دا حلیف سی۔ ایس لئی اک دیہاڑے نبی اکرم اوہناں دی دی دیت (خون بہا) ولوں صلاح مشورہ کرن لئی بنو نضیر دی گڑھی تشریف لے گئے جیہڑی مدینے توں باہر کوئی چھ میلاں دے پندھ تے سی۔ اوہدوں آپ دے نال دس صحابی سن جنہاں وچ حضرت ابو بکر، حضرت عمر تے حضرت علی وی شامل سن۔ آپ نے پوری گل سنائے بنا ای اوہناں نوں پچھیا کہ دسوئی بنو عامر دے اک مقتول دی دیت کیہہ ہونی چاہیدی اے۔ بنو نضیر دے بندے ایس صلاح مشورے تے چوکھے راضی ہوئے پر فیر اوہناں دے دلاں وچ ایہہ گل آئی کہ مسلماناں نے ساڈا سرغنہ کعب بن اشرف قتل کیتا سی، آج توں ودھ بدلائین دا ہو ر کیہڑا دن ہووے گا۔ اوہناں نوں ایہہ گل وی چھتے آگئی کہ مکے دے سردار اوہناں نوں چھٹیاں پئے لکھدے نیں کہ ساڈے بندے جناب رسول خدا نوں یثرب وچوں کڈ دیونہیں تے تہانوں نکلراں گے۔ کسے بندے ایہہ گل وی آکھ وتی کہ عبداللہ بن اُبی تے ربیعہ بن مالک ورگے گنڈے بندے وی ساڈے نال نیں، ڈر کس گل دا اے؟ ایوں بنو نضیر دا اک بد بخت عمرو بن جہاش بن کعب آپ a دے اُتے اک بھارا پتھر سٹن لئی اوس گھر دے کوٹھے تے چڑھ گیا جہدی کندھ دے نال ٹوہ لا کے آپ بیٹھے ہوئے سن۔ رسول خدا نوں یہودیاں دے ارادے دا پتا لگ گیا تے آپ چپ چپے مدینے واپس پرت آئے۔ یاران نبی نے ایہہ سمجھیا کہ آپ کسے ضروری کم لئی ذرا دریڈے نکل گئے نیں تے ہنے پچھاں پرت آؤن گے۔ اوہ دیوانیاں وانگ سچے کجے رسول خدا نوں بھال دے رے تے اک دجے نوں آکھدے رے کہ ایہہ آج کیہہ بن گئی، ساڈا سوہنا کتھے ٹر گیا؟ سانوں کوئی حکم دتے بنا ای سوئی سرکار کتھے گئی۔ اصحاب نبی اے ایسے پریشانی وچ سن تے جناب ابو بکر صدیق نے صلاح وتی بئی استھہ کھلو کے نری چتا کری جان دا کوئی فیدا نہیں، چلے تے سرکار نوں کدھرے لھیں۔ یہودیاں نے جدوں صحابہ کرام نوں واپس جان دیاں ویکھیا تے حئی بن اخطب آکھن لگا

کہ ابوالقاسم دے سجنو! آج ابوالقاسم نے بڑی چھیتی کیتی اے۔ اسیں تے اوہناں دے حکم دی تعمیل کرن دی تیاری پے کر دے ساں پر اوہ خورے کتھے ٹر گئے نیں۔ ابن اخطب تے دُجے یہودی، وچوں ایس گل تے پریشان سن کہ منصوبا کامیاب نہیں ہوئیا۔

رسول خدا دے سنگی ساتھی آپ دی کھوج وچ مدینے ول ٹر پے۔ راہ وچ اک بندے نال ٹاکرا ہوئیا جس نے صحابہ کرام دے پچھن تے دسیا کہ اوس نے تے سرکارنوں مدینے دی اک مسیت وچ دیکھیا اے۔ ایہہ سن کے اوہناں دی جان وچ جان آئی تے اوہ کابلی کابلی پیر پندے حضور دے پیراں وچ جا ڈگے۔

نبی آخر نے اپنے پیاریاں نوں اوہ ساری گل سمجھا دتی جیہڑی اللہ نے آپ نوں سمجھائی سی۔ آپ نے جدوں صحابہ دا دھیان ایس گل ول کرایا کہ اوہناں دیاں سیتریں چوکیاں گوہ گوچریاں سن تے اوہناں تے ساری حقیقت کھل کے سامنے آ گئی۔ دُجے پاسے بنو نضیر دی گڑھی وچ وی ایہی گلاں ہور ہیاں سن تے منصوبے دی ناکامی دے سبب تے غور کیتا جا رہیا سی۔ اک سیانی جی عمر دا یہودی کنانہ بن صوریہ آ کھدا اے:

”بجھوئی بندو! ابوالقاسم کیوں اُٹھ کے ٹر گیا سی؟“

”رب دی سونہ، سانوں ککھ پتا نہیں“ اک بندے نے جواب دتا۔

”ایہہ جیہڑی اسیں چال چلی سی، رب نے ابوالقاسم نوں ساری گل دس دتی سی۔“

”اوہ کیوں بی؟“

”اوہ ایس طرحاں کہ بخدا اوہ اللہ دے سچے رسول تے اخیر نبی نیں، ایس گل دا سمجھنا (ساریاں) نوں پتا اے۔ گل تے صرف ایہہ ہے کہ تسیں چاہندے سی کہ اخیر نبی جناب ہارون دی اولاد وچوں ہووے پر ابوالقاسم اولاد اسماعیل وچوں نیں، بس تہانوں ایسے گل دا ساڑا اے۔ سچ تے ایہہ ہے کہ اوہناں وچ اوہ ساریاں نشانیاں موجود نیں جیہڑیاں تورات وچ دسیاں گئیاں نیں۔ سن لوؤ تے کن کھول کے سن لوؤ بی جے تہاڈا حال ایہی رہیا تے مینوں ایگل وکھالی دیندی اے کہ تہانوں دیس نکالا دے دتا جاوے گا۔“

اوس سیانے یہودی نے اوہناں نوں ایہہ گل وی آکھی کہ اوہناں دی خیر صرف دواں گلاں وچ اے، تھی ہر گل تباہی ول جاندی اے۔

”دسو بزرگو! اوہ دو گلاں کبھڑیاں نیں“ بندیاں نے پچھیا۔

”پہلی گل تے ایہہ ہے“ اوس نے آکھیا کہ ”جدوں تہانوں پتا اے کہ جہدے نال ویریاں جے اوہ اللہ دے سچے رسول نیں تے فیر چپ کر کے اوہناں تے ایمان لے آؤ۔ ایس دا فیدا ایہہ ہووے گا کہ تہاڈا مال ڈنگر، رُکھ، پکلی بٹا، گھر بارتے ہر شے بچی رہوے گی۔ تہانوں مدینہ چھڈن داوی نہیں آکھیا جاوے گا تے تہاڈا ناں اگل ہتھ صاحبیاں وچ گنیا متھیا جاوے گا۔“

”نہیں بی ایہہ تے ساتھوں نہیں ہونا، اسیں تورات تے جناب موسیٰ نوں کوں چھڈ دے۔“ یہودیاں نے جواب دتا۔

”تورات تے جناب موسیٰ نے جیہڑی گل دی اے، میں تہانوں اوہی گل آکھ رہیا ہاں“
 ”نہیں، تسیں دُجی گل کرو۔“

”دُجی گل ایہہ ہے کہ جے تہانوں شہر چھڈن دا حکم ملے تے حکم من لینا، تہاڈی بچت ہو جاوے گی۔“
 ”چلو ایہہ گل تے وارا کھاندی اے۔“

ابن صوریہ دے نال نال ایہہ گل سلام بن مشکم نے وی آکھی تے جی بن اخطب نوں تاکید کیتی کہ دیکھیں، کدھرے غلطی نہ کر بہوئیں اسیں آکھ رے ہاں بنی ایہدے تے عمل کرنا ہی چنگا ای۔ جی بن اخطب نے آکھیا کہ جے ایہدے وچ ای تہانوں چنگیائی دسدی اے تے چلو فیروں ای سہی۔

اودر گڑھی بنو نضیر وچ نیجا سنن دیاں تیاریاں ہو رہیاں سن تے اودر مدینے وچ جناب رسول خداؐ نے جناب محمد بن مسلمہ نوں طلب فرمایا۔ ابن مسلمہ آئے تے آپؐ نے اوہناں نوں ہدایت کیتی کہ اوہ بنو نضیر ول قاصد بن کے جان تے اوہناں تیکر ایہہ سنیہا پڑا دیں کہ:

أَنْ أُخْرِجُو مِنْ بَلَدِي لَقَدْ نَقَضْتُمْ الْعَهْدَ الَّذِي جَعَلْتُ لَكُمْ بِمَا هَمَمْتُمْ بِهِ . لَقَدْ أَجَلْتُكُمْ
 عَشْرًا فَمَنْ رَوَى بَعْدَ ذَلِكَ ضَرْبَتْ عُقُقَهُ

”میرے شہر وچوں نکل جاؤ، تسیں ساڈے نال کیتے گئے اپنے کارے توں پھر گئے او۔ نہیں تے دس دناں بعد تہاڈے وچوں جیہڑا نظر آ گیا اودہی گردن مار دتی جاوے گی۔“

جناب محمد بن مسلمہ اپنے آقائے حکم موجب بنو نضیر کول جاتے تے اوہناں نوں اک دھا کے دے وچ شہر چھڈن دا حکم سنا دتا۔ بنو نضیر دے بندیاں نے انگلاں دنداں تھلے دب لیاں تے آکھن لگے کہ ”ابن مسلمہ! قبیلہ اوس دے کسے بندے کولوں ایہہ امید نہیں سی کہ اوہ ایہو جیہ سنیہا لے کے ساڈے کول آوے گا۔“ بنو نضیر اصل وچ جناب ابن مسلمہ نوں ایہہ گل چیتے کرا رے سن کہ جدوں اوہناں دا قبیلہ خزرج نال لڑائیاں کر داسی تے یہودی ابن مسلمہ دے قبیلے اوس دا ساتھ دیندے سن۔ ابن مسلمہ نے جواب دتا کہ آہو ایہہ گل ٹھیک اے کہ تسیں ساڈے حلیف سی پر ہن دلاں دی حالت اوہ نہیں ری۔ سلام بن ابی الحقیق تے جی بن اخطب جے نام نہاد یہودی دانش ور سارا کجھ سمجھدیاں ہوئیاں وی نا سمجھ بن رے سن۔ اوہ بھل رے سن کہ ہن حلیف، حلیف نہیں رے تے حریف، حریف نہیں رے۔ اوس تے خزرج دیاں جیہڑیاں جنگاں دا اوہ ذکر کر رے سن اوہ ہن گئے دناں دے قصے کہانیاں توں ودھ کجھ وی نہیں سن۔ ہن تے بس اک ای رشتہ سی تے اوہ رشتہ غلامی رسول داسی، ہن بس اک ای جنگ سی تے اوہ جنگ عدو رسول نال سی، بھاویں اوہ پیو ہووے تے بھاویں پتر۔

بنو نضیر دے یہودی چوکھے وگڑے ہوئے سن۔ لوڑاں توں ودھ وسیلیاں نے اوہناں دا دماغ خراب کیتا ہوئی سی۔ اوہناں نوں اپنے کپے پیڈے قلعے وی نظر آوندے سن۔ اُتوں عبداللہ بن اُبی نے وی اوہناں نوں سنیہا گھلیا کہ تھلے نہ لکھا جے، بنو قریظہ تہاڈے نال نہیں تے نالے میں وی دوہزار بندے لے کے تہاڈے نال آزلاں گا۔ ایہہ سارا کجھ سوچ کے بنو نضیر

حیات محمدؐ از محمد حسین ہیکل، واقعہ بنو نضیر

نے مدینہ چھڈن توں انکار کرتا تے جواب دتا کہ جو دل بے کر لوؤ، اسیں نہ تے شہر چھڈنا اے تے نہ ای اپنا مال متاع۔ بنو نضیر اپنے وڈے چوہدری حمی بن اخطب دے آکھے لگ کے قلعہ بند ہو گئے۔ دُجے پاسے مسلماناں نے الٹی میٹم دے دس دیہاڑے گزر جان توں بعد بنو نضیر تے چڑھائی کردتی۔ رسول خدا نے پندرہاڑے اوہناں داما حصارا کیتا تے باہروں کوئی بند ابشر اوہناں دی مدد لئی نہ آیا۔ نہ ہی بنو قریظہ، نہ ہی عبداللہ بن ابی تے نہ ہی کوئی ہور۔ جدوں محاصرے نے طول پھڑ لیا تے رسول خدا نے قلعے دے باہر، یہودیوں دی ملکیت، کجھوراں دے کجھ رُکھ وڈھا دتے تاں جے یہودی گل بات لئی تیار ہون تے نالے اوہ ایہ گل وی سوچن تے مجبور ہو جان کہ جیہڑے نخلستان لئی اوہ سارے خطرے مل لے رے نیں جے اوہی نہ رہیا تے لڑائی جھگڑے دا کیہہ فیدا؟ کجھوراں دے کجھ رُکھ وڈھاں دی ایہہ وجہ وی ہو سکدی اے کہ اوہ اوس ویلے دی جنگی ضرورت ہووے۔

امام سیہلی تے جناب شبلی نعمانی دا خیال اے کہ جیہڑے رُکھ وڈھے گئے سن اوہ اک خاص قسم دی کجھوری تے عرب دی لوکائی دی عام خوراک نیں سی۔ فقیر ایہہ سمجھدا اے کہ ایہناں دوواں بزرگاں دی رائے بڑی جان داراے۔ جے سورہ حشر دی پٹھ لکھی گئی آیت ول دھیان کریئے تے ایس واقع دی ساری حقیقت سامنے آ جاندی اے۔ آیت مبارکہ اے:

﴿مَا قَطَعْتُمْ مِنْ لَيْنَةٍ أَوْ تَرَكْتُمْوهَا قَائِمَةً عَلَىٰ أُصُولِهَا فَبِإِذْنِ اللَّهِ وَلِيُخْزِيَ الْفَاسِقِينَ﴾ (الحشر: ۵)

”تسین لینہ دے جیہڑے رُکھ وڈھائے یاں جیہڑے اپنے مڈھاں تے قائم رہن دتے، سب اللہ دے حکم نال سی تاں جے اوہ فاسقاں نوں ذلیل کرے۔“ خیال فرماؤ:

۱۔ اللہ نے کجھور دا نہیں سگوں کجھوری خاص قسم لینہ دا ناں لیا اے۔

۲۔ سارا نخلستان نہیں سگوں کجھ رُکھ وڈھے گئے جوں کہ اُو تَرَكْتُمْوهَا توں پتا لگدا اے۔

۳۔ کسے رُکھ نوں اگ نہیں لائی گئی۔

۴۔ رُکھ وڈھن دا کم اذن ربی دے تحت کیتا گیا۔

۵۔ ایس دا مقصد بنو نضیر نوں نفسیاتی طور تے کمزور کرنا سی۔

بہر حال لینہ دے رُکھ وڈھے جان توں بعد یہودیوں تے ایڈا رعب پے گیا کہ اوہ تر لیاں تے آ گئے۔ بنو نضیر دی بد عہدی، رسول خدا دے قتل دی سازش تے آپ دے الٹی میٹم موجب حق تے ایہہ سی کہ اک اک یہودی نوں چگ چگ کے اوس پتھر نال قتل کیتا جاندا جہدے نال اوہ رسول خدا نوں قتل کرنا چاہندے سن پر قربان جائیے اوس رحمت اللعالمین توں جس نے اپنے قتل دی سازش کرن والیاں نوں وی معاف فرما دتا۔ ابن سعد آکھدے نیں کہ رسول اللہ نے فرمایا کہ جاؤ تہا نوں معاف کیتا۔ اپنی ہر شے اپنے اٹھاں تے لد لے جاؤ۔ تہاڈا مال ڈنگر وی تہاڈے نال جاوے گا پر چیتے رہوے کہ ہتھیار لے کے قلعے توں باہر نہ آنا۔ فیرایوں ای ہوئی، بنو نضیر اپنے چھ سو (۶۰۰) اٹھاں تے جتاں مال لد سکدے سن، لد کے لے گئے تے جاندے جاندے اپنے گھراں نوں وی برباد کر گئے۔

بنو نضیر دے کجھ یہودی شام دے پناہ گیر بنے تے حمی بن اخطب تے سلام بن ابی الحقیق جے چوہدری بندیاں نے

خیبر وچ جاڈیرے لائے۔ خیبر دی لوکائی نے اوہناں دی چوہدراہٹ نوں مَن لیا تے اوہ راضی خوشی اوہتھے وٹوں کر دے رے۔ بنو نضیر دا محاصرہ اوہناں دے دو بندیاں یا مین بن عمرو تے سعید بن وہب دی خوش بختی دا سبب بنیا، کیوں جے اوہناں مسلمان ہو کے اپنی دنیاوی بچائی تے آخرت وی۔

بنو نضیر نے اپنے دیس نکالے دے باوجود اپنی آکڑ قائم رکھی تے مدینے دے علاقے وچوں نکلن لکیاں ایوں دکھائی دتی جویں اوہناں نوں کسے گل دا کوئی منکھ نہیں۔ اُج دے دور دی اک مستشرق سیرت نگار بی بی کیرن آرمسٹرانگ نے ایس دیس نکالے دا نقشہ ایوں کھچیا اے:

Nadhir loaded all their possessions, even breaking down the lintels of their doors rather than leaving them for Muhammad and left the oasis in a proud procession as though they were going in triumph. The women dressed in all their jewels and finery, beating tambourines and singing to the accompaniments of pipes and drums. ☞

”بنو نضیر نے اپنی ہر شے (اوٹھاں تے) لد لئی، ایتھوں تیکر کہ اوہناں اپنے گھراں دیاں چوگاٹھاں تیکر توڑ دیتاں تاں جے او محمد دے کم نہ آسکن تے نخلستان وچوں ایوں غرور نال نکلے جویں اوہ کسے جت دا جشن منا رے ہون۔ زنانیاں نے سوہنے لیڑے لپے تے اپنیاں ساریاں ای ٹوماں پائیاں ہوئیاں سن۔ اوہ طبل وچاندیاں تے بانسریاں تے ڈھولاں دے نال گاؤندیاں گڑھی توں باہر گئیاں۔“

نبی رحمت دے صحابہ بنو نضیر دی کسے حرکت تے غصے وچ نہیں آئے۔ اوہناں جو وی آکھیا، جویں دے وی گیت گائے، اللہ دے رسول تے اوس دے بھناں نے صبر دا مظاہرہ اکیٹا سگوں اک اچھے یہودی دامال آپ نے اوہدے اٹھ تے اپنے ہتھ نال لدا یا جیہڑا اپنی گڑھی وچ چوکھا عزت دار سمجھیا جانداسی۔ سپہ سالار اعظم دی حکمت عملی:

بنو نضیر نے اپنے قلعیاں ورگے گھراں دیاں چھتاں تے پتھرا کٹھے کینے سن جہناں نال اوہ مسلماناں تے چوکی سوکڑ نال سنگ باری کر سکدے سن۔ ایس توں اگدیں ہتھیاراں دے دی اوہناں نے ڈھیر لائے ہوئے سن۔ دانہ پھکا اوہناں کول واہوں سی تے پانی دے قدرتی ذخیرے اوہناں دے قلعیاں وچ میوندے نہیں سن۔ پر سپہ سالار اعظم دی حربی حکمت عملی کجھ ایوں دی سی کہ متکبر تے خونخوار یہودی آپ دے پیراں وچ آڈگے۔

آپ نے سب توں پہلاں بنو نضیر دے گھراں نوں اوس ساز و سامان توں پاک کیتا جیہڑا خطرناک ثابت ہو سکدا سی۔، فیر قلعہ بند یہودیاں دے آل دوالے دا جائزہ لیا۔ آپ اپنے صحابہ نوں اک تھاں توں دُجی تھاں تے اک پاسے توں دُجے پاسے منتقل کر دے رے۔ ایہہ حرکت (Mobility) ایڈی تیزی تے ہشیاری نال کیتی جاندی سی کہ قلعہ بند یہودیاں نوں سمجھ ای نہیں گدی سی کہ کیہہ ہو رہیا اے۔ اوہ گھابر گئے کہ مسلمان چوں پاسیوں اوہناں نوں ول کے کوئی خوفناک چال

چلن لگے ہیں۔

مسلماناں وچ اجہیا ڈسپلن ویکھن نوں مل رہیاسی جہدی عربستان دی حربی تواریخ وچ کوئی مثال نہیں ملدی۔ اوہ اپنے کمانڈر دے اک اشارے تے اپنا سب کچھ قربان کرن لئی بے تاب سن۔

ابداع اک حربی اصطلاح اے جہدا مطلب اجہی تدبیر کرنا اے کہ دشمن اپنا ارادہ بدل کے اجہی پالیسی تے مجبور ہو جاوے جیہڑی ساڈی مرضی تے خاش دے مطابق ہووے تے جنگ وچ سانوں اوس دا چوکھا فیدا ہووے۔ بنو نضیر دے محاصرے وچ لینہ کجھوراں دے کچھ رُکھ وڈھا دینا سپہ سالار اعظم دا اک بہترین ابداع سی جس دا مطلب ایہہ سی کہ اسیں لڑن آئے ہاں تے کسے وی حالت وچ محاصرہ چھڈ کے پچھاں نہیں پرتاں گے، یہودیو! تگڑے ہو جاؤ۔ ایس ابداع نال سورہ حشر وچ رب دے کہن موجب یہودی رسوا ہو گئے تے اوہناں دا مورال ایناں تھلے ڈگ پیا کہ اوہ ہتھیار سٹن تے مجبور ہو گئے۔ ٹھیک وقت تے ٹھیک فیصلہ کسے فوج دے سالار دا اجہیا کمال ہندا اے جیہڑا اوس نوں سرخرو کر دیندا اے۔ سپہ سالار اعظم نے سچ مچ ایہ کمال کروکھایا۔

مال فے:

بنو نضیر دی غیر منقولہ جائیداد رسول خدا لئی مال فے دے طور تے مخصوص سی۔ آپ نے اوہ مال مہاجر مسلماناں وچ وٹا دتا تاں جے انصار بھراواں توں کچھ بھار ہولا ہو جاوے تے مہاجراں نوں روٹی دے اپنے وسیلے مل جاوے۔ دوانصاری مسلماناں نوں وی اوس مال وچوں حصا دتا گیا جیہڑے مالی طور تے چوکھے لے سن، اوہناں دے نام سہل بن حنیف تے ابو دجانہ دسے گئے ہیں۔

سازشی عمرو و قتل:

جوس کچھ ذکر ہو یا اے بنو نضیر دے دو بندے یامین بن عمرو تے ابوسعید بن وہب مسلمان ہو گئے سن۔ جناب یامین اوس بد بخت عمرو بن جاش دے نیڑے دے رشتے دار سن جس نے جناب رسول خدا اُتے چھت توں پتھر دگا کے مارن دی سازش کیتی سی۔ اک دن جناب رسول خدا نے حضرت یامین بن عمرو نوں آکھیا کہ ویکھیا ای یامینا! تیرے چاچے دے پتر نے میرے خلاف کویں سازش تیار کیتی سی۔ ایہہ سن کے جناب یامین دی غیرت نے جوش ماریا تے اوہناں نے سازشی عمرو نوں قتل کر دتا۔

بدر ثانی:

مدینے توں بنو نضیر دی جلا وطنی توں بعد مسلماناں نوں کچھ سکون ہو گیا۔ یہودی سازشاں مک گئیاں۔ منافقاں دا مورال ڈگ پیا تے مسلمان خوشحالی دے دیہاڑے گزارن لگ پے۔ جتھے مہاجر مسلمان بنو نضیر دے چھڈے باغاں دی وجہ توں رَجھ کے روٹی کھان لگ پے اتھے انصاری مسلمان وی مالی طور تے بہتر ہو گئے، کیوں جے اوہناں دے موہڈیاں توں مہاجر بھراواں دی کفالت دا بھار اُتر گیا سی۔ آرام سکون دیاں کچھ ای گھڑیاں گزریاں سن تے شعبان دا مہینا آ گیا۔

رسول خدا نوں ایہ گل چیتے سی کہ پروں اُحد توں واپسی ویلے ابوسفیان نے چیلنج کیتا سی کہ آؤندے سال بدر وچ جوڑ

پوے گا۔ اوس نے آکھیا سی:

﴿الْمَوْعِدَ بَيْنَنَا وَبَيْنَكُمْ بَدْرٌ مِنَ الْعَامِ الْقَابِلِ﴾

”رسول خدا نے ابوسفیان دا چیلنج قبول کیتا سی تے جناب عمر بن خطاب نوں حکم دتا سی کہ عمر:

﴿قُلْ نَعَمْ إِنْ شَاءَ اللَّهُ﴾

”آکھو، انشاء اللہ ایو اے ہووے گا۔“

رسول خدا نے جدوں اپنی ایس خاہش دا اظہار فرمایا کہ بدر وچ ابوسفیان نال جوڑ پانا ای پانا اے تے ایہہ خبر مکے تیکر وی اپڑ گئی۔ اوہتھے ابوسفیان چوکھا پریشان ہوئیا کیوں جے اوہ جنگ توں بچنا چاہندا سی۔ ایس لئی اوس نے اپنے بندیاں راہیں مدینے دے آل دوالے ایوں دا پروپیگنڈہ کرنا چاہیا کہ مسلماناں تے رعب پے جائے تے اوہ مقابلے لئی مدینے توں باہر نہ نکلن پر ابوسفیان دی ایہہ چال کامیاب نہ ہوئی تے مسلماناں نے تیاری جاری رکھی۔

اوہناں دنوں وچ مدینے دا اک چکر باز تے چرب زبان بندانعم بن مسعود مکے اپڑیا تے ابوسفیان دے ٹولے نوں آکھن لگا کہ اپنا بلا کر لوؤ، مسلماناں نے پورا ٹل لا کے اپنا لشکر تیار کیتا اے تے اوہناں متھے گئے دناں تے بدر وچ اپڑ جانا اے۔ ابوسفیان نے ایہہ خبر سنی تے گھبرا گیا تے آکھن لگا کہ ”یار نعیم! میرا تے جنگ دا کوئی ارادہ نہیں۔ ہووے نہ ہووے جنگ ٹل ای جائے تے چنگا اے۔ ویکھیں نامک وچ خشک سالی اے۔ مینہ دا وسنا خاب بن گیا اے، چراگا ہواں وچ ہرا تیتلا ویکھن نوں نہیں بھدا، پانی دے تلاء سکے کھلوتے نیں تے بکریاں دے تھن لکڑوا نگ کھڑکدے نیں۔ ہن دس، لڑن دا کوئی واہ ہے؟ تے جے توں بھرا!، نیکی کریں تے مدینے جا کے ایوں دا پروپیگنڈہ کر کہ مسلمان ترٹھ جان، اسیں تینوں تیرا پورا پورا حق دیواں گے۔“

”چلو فیر گل ٹک لوؤ،“ نعیم نے آکھیا۔

”مدینے جان لئی اک برق رفتار اٹھ ساڈے ولوں ہوئیا، تے اہدوں وکھ ۲۰ اٹھ ہور“

”مینوں منظور اے، پر ویکھ لیں سردار! جیہڑا کارا کیتا ای، پکار ہویں۔ کم ہندیاں ای اٹھ میرے حوالے کر دیویں۔“

”نعیم جی! کوئی بے اعتباری اے تے دسو کھدی ضمانت دیوینے۔“

”تسیں اٹھ سہیل بن عمرو دے حوالے کر دیو، جے میں مسلماناں نوں مدینے وچ ڈک دیواں تے اٹھ میرے، نہیں

تے تسیں اپنا مال سہیل توں واپس منگ لینا“

”سانوں منظور اے“ ابوسفیان نے آکھیا۔

مدینے اپڑ کے نعیم نے کمال چالاکی دکھائی۔ اوس نے گھر گھر جا کے دسیا کہ ایس وار مکے والیاں جیہڑا لشکر اکٹھا کیتا اے، عرب دی کوئی قوم اوس دا مقابلہ نہیں کر سکدی۔ نالے ابوسفیان نے ارادہ کیتا اے کہ مسلماناں نال اُحدتوں وی بھیڑی کیتی جاوے۔ ایہ سن کے مسلماناں دے حوصلے کمزور ہوندے گئے تے سوچن لگ پے کہ بدر وچ نہ ای رخ کیتا جائے تے چنگا اے۔ رسول خدا نوں جدوں ایس تھوڑ دلی دا انداز ہوئیا تے آپ نے ناراض ہوندا فرمایا کہ ”خدا دی قسم اے جے بدر

وچ مینوں اگلے نوں وی جانا پیتا تے میں پیر کچھ نہیں ہٹاواں گا۔“

رسول خدا دی نرآنسگی تے بدر وُل ودھن دا پکا پیڈا ارادہ ویکھ کے صحابہ کرام نے جنگ دی تیاری چھوہ دتی تے رسول خدا نے عبداللہ بن اُبی دے پتر حضرت عبداللہ بن عبداللہ نوں مدینے وچ اپنا نائب مقرر کیتا تے بس فیرویکھدیاں ای ویکھدیاں اک ہزار ۵۰۰ مجاہداں دا لشکر اپنے محبوب سپہ سالار دی سالاری وچ بدر وُل ٹر پیا۔ دُجے پاسے ابوسفیان وی بکھے دِل تے ٹٹے ارادے نال جہنم دے دو ہزار توں چوکھے خریداراں نال بدر وُل ٹر پیا۔ پر حالت ایہہ سی کہ دو دناں دے سفر توں بعد پیر توڑ کے بہہ گیا تے نال دیاں نوں آکھن لگا کہ جدوں لڑن تے دِل نہیں مَن دا تے اگاں ودھن دا کیہہ فیدا؟ ایوں مکی لشکر مکے واپس پرت گیا۔

اسلامی لشکر پورے اٹھ دیہاڑے بدر وچ موجود رہیا تے مکے والیاں دے چیلنج دا جواب دین لئی اوہناں نوں اڈیکدا رہیا۔ اوہناں دناں وچ بدر وچ میلہ وی لگا ہونیا سی۔ مجاہدین اسلام میلے وچ سودے دی خرید و فروخت وی کر دے رے تے ایوں اوہناں کچھ مالی فیداوی حاصل کر لیا۔ اخیر رب دا شکر ادا کر دے ہوئے راضی خوشی مدینے پرت آئے۔

ایس معرکے نوں تواریخ غزوہ بدر الصغر مئی تے بدر الموعود دے ناواں نال وی یاد کردی اے۔

غزوہ ذات الرقاع:

غزوہ بدر الصغر مئی توں واپسی توں بعد جناب رسول خدا تے صحابہ کرام بڑے راضی سن، کیوں جے عرب دے کافراں تے اک وار رعب پے گیا سی تے نالے ایہہ گل غلط ثابت ہو گئی سی کہ اُحد دے معرکے وچ مسلماناں دا لک ٹٹ گیا اے تے ہن اوہ اٹھن جو گے نہیں رے۔ سکھ چین دے اوہناں دناں وچ ای ریاست مدینہ دے محکمہ جاسوسی نے ایہہ خبر دتی کہ بنو غطفان مدینے تے حملہ کرن لئی نجد دے علاقے وچ اکٹھے ہو رہے نیں۔ سپہ سالار اعظم نے شتابی نال چار سو مجاہداں دا اک لشکر تیار کیتا تے اوہناں تے پیشگی حملا کر دتا۔ بنو غطفان دے دوویں قبیلے بنو محارب تے بنو ثعلبہ مسلماناں نوں ویکھ کے ایوں اگے بھج کھلوتے کہ بال بچے تے سوانیاں وی کچھ چھڈ گئے۔ مسلمان مجاہد جٹاں کچھ اوہناں دے مال وچوں لد سکدے سن لد کے مدینے وُل ٹر پے۔

نجد دا علاقہ مدینے توں چوکھا دریا سی تے نالے ایہہ خبر وی ملی سی کہ نجد دے کافراں نوں ہلا شیری دین لئی خالد بن ولید ۱۱ وی اوہناں وچ موجود اے، ایس لئی مسلماناں نے چوکھا خوف محسوس کیتا۔ مسلماناں نوں ایہہ ڈر سی کہ جے بنو محارب تے بنو ثعلبہ نجد دے کچھ ہو رقبیلیاں نوں نال رلا کے پچھا کرن لگ پے تے فیرویکھدیاں دا نقصان وی ہو سکدا سی۔ ایہہ صورت حال ویکھ کے رسول خدا نے مسلماناں نوں نماز خوف پڑھائی جیہڑی اسلام دی پہلی نماز خوف سی۔ نجد وُل لشکر کشی دی ایہہ ہم پندراں دناں وچ توڑ چڑھی تے رسول خدا اپنے مجاہداں نال راضی بازی مدینے پرت آئے۔

ذات الرقاع دی وجہ تسمیہ:

وکھو کھ مسلمان مورخاں تے سیرت نگاراں نے ذات الرقاع دے ناں تے وکھو کھ خیال ظاہر کیتا اے۔ یقین نال

۱۔ آں حضرت بحیثیت سپہ سالار از محمود خطاب صفحہ: ۲۵۷۔ سبل الہدی وچ ایہہ تعداد ۱۵۰۰ دسی گئی اے۔

۲۔ زاد المعاد تے حیات محمد از محمد حسین بیگل

نہیں آکھیا جاسکدا کہ ایس ناں دی اصل وجہ تسمیہ کیہہ اے۔ سیرت نگار آکھدے نیں:

(i) رقاق جمعہ اے تے اس دا واحد رقعہ اے۔ ایس دا مطلب اے کپڑے دا اوہ ٹکڑا جہدے نال گاہنڈا (پیوند) لایا جاندا اے۔ مسلماناں نے اپنے پاٹے ہوئے جھنڈیاں نوں ٹاکیاں لائیاں ہونیاں سن۔ ایس لئی ایس غزوہ نوں غزوہ ذات الرقاق آکھیا گیا۔

(ii) پتھر پللی تے گرم زمین اُتے لما پینڈا کرن نال مجاہداں دے پیر زخمی ہو گئے سن تے اوہناں نے اپنے پیراں تے لیراں ول لیاں سن۔ ایس لئی ایس غزوہ نوں ایس ناں نال چیتے کہینا جاندا اے۔

(iii) نجد دے جس علاقے وچ کافر کھٹے ہوئے سن اوس دے پہاڑ اُتے چٹے، کالے تے لال رنگ دیاں دھاریاں سن۔ ایوں جا پداسی جویں وکھو وکھ رنگاں دے لیڑے سکے پائے ہوئے نیں۔

(iv) جس وادی وچ جوڑ پیا، اوس وچ اک رُکھ سی جہداناں ذات الرقاق سی۔

ذات الرقاق دا غزوہ ۴ھ دا آخری غزوہ سی تے ایہدے نال مسلماناں دے وقار دی بحالی دی رہی سہی کسروی پوری ہو گئی تے آل دوالے دیاں رڈاں وچوں باہر نکلن والے سب سپولیاں نے اک وار فیر اپنے منہ رڈاں دے اندر کر لے۔

میر اللہ کافی اے:

قبیلہ بنو محارب دا اک وگڑیا ہوا بند اغورث بن حارث اپنے سرداراں کول گیا تے آکھن لگا کہ محمد نے لشکر کشی کر کے سانوں وادی وچوں کڈ دتا اے، جے تسیں موہڈا لاؤ تے میں اوس نوں تھماں ای مار دیاں۔ سرداراں نے آکھیا کہ ہو رکیہ چاہیدا اے، تیاری پھڑتے جے تیرے تے کوئی اوکھا ویلا آیا تے فیر اسیں اپنے پیو دے ہوئے تے تیرے نال رھواں گے۔ ایہہ ہلاشیری وکھ کے غورث اپنا ناں پتا تے اگا پچھا کاؤندا کاؤندا اوس رُکھ تھلے جا بجیا جتھے رسول خدا آرام فرما رہے سن۔ آپ دی تلوار اوس رُکھ نال لٹک رہی سی۔ اوس نے اچن چیت تلوار پھڑی، نیام وچوں کڈی تے ہوا وچ لہرا ندا آکھن لگا:

﴿يَا مُحَمَّدُ أَمَا تَخَافُنِي﴾

”اے محمد! میرے توں ڈرے او؟“

”نہیں تے“ رسول خدا نے جواب دتا۔

اوس نے تلوار وکھان دیاں فیر پچھیا۔

﴿أَمَا تَخَافُنِي وَفِي يَدِي السَّيْفُ﴾

”اے وی نہیں ڈرے جد کہ میرے ہتھ وچ تلوار اے۔“

﴿بَلْ يَمْنَعُنِي اللَّهُ مِنْكَ﴾

”میر اللہ مینوں تیرے کولوں بچائے گا۔“

آپ نے دھڑلے نال جواب دتا۔

ایس دن کے اوس کافر دی اجہی حالت ہو گئی کہ اوہ اپنے ہتھ نال تلوار سرکار دو عالم دے سامنے رکھ کے ٹٹھیں پیریں

پرت گیا۔

جناب جابر تے سرکار دی دلنوازی:

ایسے غزوہ ذات الرقاع توں واپسی تے اک چوکھا ایمان افروز واقعہ پیش آیا۔ ہو یا ایہہ کہ مدینے ول جانیاں جناب جابر بن عبد اللہ اپنے وڈیرے تے لے جئے اونٹھ تے سوار سن تے گھڑی مڑی پکھے رہ جانے سن۔ ایہہ دیکھ کے مہربان آقا و مولانا نے پچھیا کہ جابر کیہہ گل اے، اُٹھ نوں ٹوردا کیوں نہیں؟

”یا رسول اللہ! ایہ ایناں کوای ٹرن جوگا اے“

”چل فیر ایس نوں بٹھا دے“ رسول خدا نے حکم دتا۔

رسول خدا دے حکم موجب حضرت جابر نے اپنا اُٹھ بٹھا دتا۔ آپ نے جناب جابر دے ہتھوں سوٹی پھڑکے اُٹھ دے جسے تے ایوں رگڑی جویں کسے بال نوں ساداش دیندیاں اوہدے پنڈے تے تھاپی دتی جاندی اے۔ فیر حکم دتا کہ چل ہن ایس نوں ٹور۔ جابر آکھ دے نیں کہ اُٹھ دیاں گلاں ای کجھ ہو رسن۔ اوہ ایوں سی کہ جویں اوہدے پنڈے وچ بجلی بھری گئی اے پر میں اوس نوں حضور دے اُٹھ توں اگے نہ لنگن دتا۔ میں تے رسول خدا گلاں کردے رے تے پنڈھ نہڑ دار ہیا۔

جابر آکھ دے نیں کہ گلاں کردیاں کردیاں حضور چوکھے مہربان ہو رے سن۔ آکھ دے نیں:

جابر! اُٹھ دیکھنا ای؟

”یا رسول اللہ، تسبیح ایوں ای لے لوؤ۔“

”نہیں، میں تے مُل تار کے لوں گا۔“

”چلو فیر آقا، دسو کیہہ دیندے او۔“

”اک درہم ٹھیک اے؟“

”نہیں یا رسول اللہ، جے مُل دینا جے تے فیر مل دیو۔ دیکھو میرے پیارے آقا! ایہ تے نری گھاٹے والی گل

ہوئی نا!“

”چل جابر، کجھ ودھا دیندے ہاں..... اچھا چل اک اوقیہ تے گل مک گئی۔ ٹھیک اے؟“

”ٹھیک اے آقا“ میں ہس دیاں ہوئیاں آکھیا۔

حضرت جابر فرماؤندے نیں کہ جدوں اُٹھ دا مُل ٹکیا گیا تے کجھ پنڈھ وی نہڑ گیا۔ تھوڑا اگے جا کے سرکار رحمت

اللہ العالین دی اپنے غلام تے فیر نظر سوٹی ہوئی۔ غلام نال لاڈیاں کردیاں پچھیا:

”جابر، ایہہ دس بئی ویاہ کر لیا ای۔“

”جی یا رسول اللہ، کر لیا اے“ جناب جابر نے عرض کیتی۔

”ایہہ دس کہ کواری نال کیتا ای کہ شیبہؓ نال“

شیبہؓ خاوند دیدہ سوانی نوں آکھ دے نیں بھادیں اوہ بیوہ ہوے تے بھانویں مطلقہ۔

”ثیبہ نال یا رسول اللہ“

”کواری نال کیوں نہیں؟“

”اے اللہ دے رسول! میرے والد جناب عبداللہ جنگ اُحد وچ شہید ہو گئے سن۔ اوہناں دیاں ست دھیاں سن۔ میرے ول وچ ایہہ گل سی کہ کسے سیانی عمر دی سوانی نال ویاہ کراں گاتے اوہ میریاں بہناں داوی خیال کرے گی، کواری کولوں ایہ کم نہیں ہوناسی۔“

”تیرا فیصلہ ٹھیک اے انشاء اللہ“ رسول رحمت نے شواش دے انداز وچ آکھیا۔

گلاں ہندیاں رہیاں تے پندھ نبھڑدا رہیا۔ جابر آکھدے نیں کہ رسول خدا نے فرمایا کہ اسیں جدوں صرارناں دے پنڈ کول اپڑاں گے تے اوہ تھے انشاء اللہ اُٹھ ذبح کراں گے، مجاہداں دی روٹی ورجاں گے تے دیہاڑی آرام کراں گے۔ اوہنے چروچ تیری سوانی نوں تیرے آؤن دا پتا لگ جاوے گا۔ اوہ گھر دے پردے، بسترے دیاں چادراں تے تکیاں دے غلاف دھو بنا کے پاوے گی تے تینوں جی آیاں نوں آکھن لئی تیار ہو جاوے گی۔“

”پر یا رسول اللہ! ایس غریب کول ایہہ شیواں کتھوں آئیاں؟“

”گھا برنہ، اوہ ویلا آؤن والا اے جدوں ایہہ سارا کجھ تیرے کول ہووے گا۔“ حضورؐ نے بشارت دتی۔ فیر جدوں صرار اپڑے تے حضور دے فیصلے موجب اوویں ای ہونیا۔ شام نوں مدینے اپڑے تے جناب جابر نے خوشی خوشی ساری گل اپنی سوانی نوں سنا دتی۔ اوہ وی حضور دی دتی گئی خوشخبری سن کے چانواں نال رجھن لگ پئی۔

سویرے جناب رسول خدا دا خرید یا گیا اُٹھ لے کے جدوں جناب جابر آپ دی خدمت وچ حاضر ہوئے تے آپ نے جناب بلال نوں حکم دتا کہ بلال جاؤ تے جابر نوں اُٹھ دا ملل اک اوقیہ سونا دے دیو۔ بلال وی تے مہربان تے رحمت عالم آقا دا غلام سی، اوس نے جناب جابر نوں اک اوقیہ توں ودھ ای دتا۔ جدوں اُٹھ دی گل ہوئی تے آقا نے فرمایا کہ جابر، ایہہ وی تیرا ہی اے۔

جابر اپنا اُٹھ تے اُس دا ملل سگوں مل توں کجھ ودھ لے کے پٹھیاں چھالاں مار دے گھر پرت گئے۔ جابر آکھدے نیں کہ جدوں تیکر اوہ اوقیہ اوہناں کول رہیا، گھر وچ برکتاں ای برکتاں تے وادھوں رزق رہیا۔ ایوں رسول خدا دا جناب جابر نوں ایہہ آکھنا کہ ان شاء اللہ، ہر شے تیرے کول ہووے گی، چھیتی ای ٹھیک ثابت ہو گیا۔

اوس مبارک زبان والی ہستی تے لکھاں سلام۔

الرحمن الرحیم:

جناب جابر ایس سفر دا اک ہور واقعہ وی سنا دے ہندے سن۔ فرماؤندے سن کہ اک صحابی کسے چڑی دا بوٹ (یاں کسے دُجے پکھیر ودا بچہ) پھڑ لیا یا۔ رسول خدا اوس بوٹ ول مہربان نظر نال ویکھ ای رے سن کہ اوس بوٹ دی ماں، صحابی رسول دے ہتھ اُتے آ بیٹھی، سگوں اپنے آپ نوں اوہ تھے ڈیگ دتا۔ ایہہ ویکھ کے رسول اللہ نے فرمایا کہ تہانوں حیرت نہیں ہونی چاہیدی۔ نالے چیتے رکھو کہ تہاڈا رب تہاڈے تے ایس ماں نالوں چوکھا مہربان اے۔

۴ھ دے کچھ ضروری واقعات:

(i) رسول خدا دے دوہترے، حضرت رقیہ بنت رسول تے حضرت عثمان ذوالنورین دے پتر جناب عبداللہ بن عثمان چھ سال دی عمروج فوت ہو گئے۔ رسول خدا نے نماز جنازہ پڑھائی تے حضرت عثمان نے جناب عبداللہ نوں قبر وچ اتاریا۔

(ii) جناب ابوسلمہ عبداللہ بن عبدلاسد جناب رسول خدا دی پھوپھی دے پتر سن۔ اوہ رسول خدا دے رضاعی بھائی وی سن، کیوں جے اوہناں نے وی ابولہب دی کنیز ثویبہ دا دُھ پیتا سی۔ مکے دے مشرکاں توں تنگ آ کے جیہڑے مڈھلے مسلماناں نے حبشہ ول پہلی ہجرت کیتی سی ابوسلمہ تے اوہناں دی سوانی اُم سلمہ اوہناں وچ شامل سن۔ حبشہ توں آپ مکے پرت آئے تے فیر اپنی اسلامی ریاست مدینہ تشریف لے گئے۔ جناب ابوسلمہ نے جنگ بدر تے اُحد، دوواں وچ جہاد کیتا سی۔ اُحد وچ اک ڈونگا زخم لگا سی جیہڑا ٹھیک ہو گیا سی پر اک سفر وچ اوہ زخم فیر تازہ ہو گیا تے اخیر اوہ زخم نال ۴ جمادی الاول نوں اللہ نوں پیارے ہو گئے۔

جدوں اُم سلمہ دی عدت پوری ہو گئی تے رسول خدا نے حضرت عمر نوں جناب اُم سلمہ ول شادی داسنہیا دے کے کھلیا پر اُم سلمہ نے آنکھیاں دے میں بال بچے دار ہاں تے ہن محنت مزدوری کر کے اوہناں دا پیٹ پالنا اے۔ دُجا ایہہ کہ میں چوکی آنکھ والی سوانی ہاں، ایہ نہ ہووے کہ سوکناں نال لڑ دی رہواں۔ ایہ سن کے رسول خدا نے آنکھیاں کھالیاں داناں نفقہ تے ساڈے ذمے رہیا، باقی رہی آنکھ والی گل تے ایس لئی وی ایس اپنے رب اگے دُعا کراں گے۔ رسول خدا دے ایس ویروے توں بعد اُم سلمہ نے ہاں آکھ وئی تے ایوں ۴ھ وچ اوہناں ام المومنین بن دا شرف حاصل کر لیا۔

(iii) اُم المومنین اُم المساکین حضرت زینب بنت خزیمہ ایسے ورھے ربیع الثانی دے مہینے وچ چلانا کر گئیاں۔ آپ دی مرقہ مبارک جنت البقیع وچ اے۔ جناب زینب دی رسول خدا نال رفاقت دی مدت صرف اٹھ مہینے ہے۔

(iv) ایسے ورھے شعبان دی بیخ ترخ نوں رسول خدا دی پیاری صاحبزادی خاتون جنت سیدہ النساء حضرت فاطمہ الزہرہ دے گھر دُجے پتر نے جنم لیا جہناں داناں حسین رکھیا گیا۔ جناب سیدنا حسین دی کنیت ابو عبداللہ نے لقب سبط رسول اے۔ رسول خدا نے جناب سیدنا حسن طرحاں آپ نوں وی جنتی نو جواناں داسر دار ہون دی بشارت وئی۔ رسول خدا نے اپنے دوواں لاڈلیاں نال ایناں پیار کیتا کہ فرمایا کر دے سن کہ جنے ایہناں دوواں نال محبت کیتی اوس نے میرے نال محبت کیتی تے جس نے ایہناں نال بغض رکھیا اوس نے میرے نال بغض رکھیا۔ سن چار ہجری وچ اکھاں کھولن والے ایس نیانے نے طاغوتی طاقتاں دیاں اکھاں وچ اکھاں پاکے گل کرن دی اجہی روشن مثال قائم کیتی کہ لسیاں تے ماڑیاں نوں حیاتی گزارن دا ڈھنگ آ گیا۔

(v) رسول خدا دی چاچی، حضرت علی دی والدہ تے حضور دے محسن جناب ابوطالب دی سوانی حضرت فاطمہ بنت اسد بن ہاشم ایسے ورھے چلانا کر گئیاں۔ حضرت فاطمہ نوں اسلامی تواریخ بڑے ادب تے پیار نال یاد کر دی اے۔ آپ تواریخ دی پہلی سوانی نیں جہناں اک ہاشمی بچے نوں جنم دتا کیوں جے آپ داتے جناب ابوطالب، دوواں داتعلق خاندان ہاشم نال سی۔ ایس توں وی وڈھی وجہ ایہہ ہے کہ جدوں ننھے حضور اپنے مہربان چاچا ابوطالب دی کفالت وچ گئے تے ایس کراماں

والی چاچی نے حضور نون ماں ورگا پیار دتا۔ حضور نون وی جناب فاطمہ نال چوکھا پیاری۔ جدوں ایہہ پیاری چاچی فوت ہوئی تے آپ نے اپنی قمیض اوہناں دے گل پا دتی۔ قبر وچ کچھ دیر لے پے رے۔ جدوں دفن کر دتا تے فرمایا کہ ماں! اللہ تینوں جزا دیوے۔ بے شک توں سب توں چنگی ماں ایں۔ ایس توں بعد حضور نے ارشاد فرمایا کہ میں اپنی قمیض ایس لئی ماں دے گل پائی اے کہ اللہ ایہناں نوں جنت دی پوشاک پوائے تے قبر وچ ایس لئی لماپے گیا ساں کہ قبر ایہناں تے کشادہ ہو جاوے ﴿﴾ شراب حرام ہوکئی:

۴ھ وچ اللہ تعالیٰ نے اپنے محبوب دی اُمت نوں شراب جی گندگی توں پاک کر دتا تے اک چوکھے نترے ہوئے حکم راہیں ارشاد فرمایا:

﴿يَا أَيُّهَا الَّذِينَ آمَنُوا إِنَّمَا الْخَمْرُ وَالْمَيْسِرُ وَالْأَنْصَابُ وَالْأَزْلَامُ رِجْسٌ مِّنْ عَمَلِ الشَّيْطَانِ فَاجْتَنِبُوهُ لَعَلَّكُمْ تُفْلِحُونَ ۝ إِنَّمَا يُرِيدُ الشَّيْطَانُ أَنْ يُوقَعَ بَيْنَكُمْ الْعَدَاوَةَ وَالْبَغْضَاءَ فِي الْخَمْرِ وَالْمَيْسِرِ وَيَصُدَّكُمْ عَنْ ذِكْرِ اللَّهِ وَعَنِ الصَّلَاةِ فَهَلْ أَنْتُمْ مُنْتَهُوْنَ﴾ (المائدہ: ۹۰، ۹۱)

”اے ایمان والو! ایہ شراب جو، بت تے پاسے (جوئے دے تیر) سب گندتے شیطان دیاں التاں نیں۔ ایس لئی ایہناں توں بچو، تاں بے تہا نوں (اللہ دی) خیر رہوے۔ شیطان تے ایہی چاہندا اے کہ اوہ شراب تے جوئے نال تہاڈے وچ دشمنی تے ویر پا دے۔ تے نالے تہا نوں اللہ دے ذکر تے نماز توں ڈک دیوے۔ تے کیہہ فیرتیں باز آ جاؤ گے۔“

چیف سیکرٹری دی تبدیلی:

۴ھ تک رسول اللہ دا چیف سیکرٹری اک یہودی منڈا سی جیہڑا سریانی تے عبرانی زبانوں وچ آپ دی ساری خط و کتابت کر داسی۔ ہن اک پاسے تے ڈاک داکم ودھ رہیاسی تے دُجے پاسے یہودیوں نال تعلقات وی خراب ہو رہے سن۔ ایس لئی آپ نے ایہہ فیصلہ فرمایا کہ چیف محرر تبدیل کر دتا جاوے۔ بدیسی زبانوں وچ خط و کتابت لئی آپ نے حضرت زید بن ثابت نوں حکم دتا کہ اوہ چھیتی توں چھیتی عبرانی تے سریانی زبانوں سکھن۔ آقا دے حکم دی تعمیل وچ جناب زید نے کچھ دنوں وچ ای ایہہ کم کر دکھایا۔

جناب زید بن ثابت کا تب وحی وی سن۔ حضرت ابو بکر صدیق نے جناب زید دی مگرانی وچ ای قرآن پاک اک تھاں تے اکٹھا کیتا۔ حضرت عثمان دی خلافت دے دنوں وچ قرآن پاک دے کچھ اکھراں دی قرأت اُتے جدوں بے اتفاقی دا خطرہ محسوسیا گیا تے حضرت عثمان دے حکم نال جناب زید نے کلام پاک دے اک اک حرف دی پڑتال کیتی تے فیر اوسے نئے دیاں نقلاں ساری سلطنت وچ گھلیاں گئیاں، جس نوں جناب زید بن ثابت نے درست منیا۔ ایوں اسلامی تواریخ وچ جناب زید دا ناں ہمیش لئی ادب تے احترام دی علامت بن گیا۔

* * * *

ہجرت و انجواں سال

دومتہ الجندل:

ایہہ سعودی عرب دے مشہور صحرا نفود کبریٰ دے شمال وُل واقع اک وڈھا تواریخی شہر اے۔ دومتہ الجندل سڑک راہیں تبوک نال ملیا ہویا اے، تے تبوک توں تقریباً ۴۰۰ کلومیٹر دور شمال مشرق وُل واقع اے۔ دومتہ الجندل توں اک پاسے عراقی سرحد وُل جدیدہ عرعر تیکر سڑک جاندی اے جیہڑی وادی عرصہ توں لنگدی اے تے دُجے پاسے اک سڑک شمال مغرب وُل وادی سرحان توں ہوندی اردن دے دارالحکومت عمان تیکر جاندی اے۔ دومتہ الجندل وچ اک تواریخی مسیت ”مسجد عمر بن خطاب“ دے نام نال مشہور اے۔ حضرت علی دی خلافت دے دناں وچ جنگ صفین توں بعد حضرت ابو موسیٰ اشعری تے حضرت عمرو بن العاص ایسے تھاں تے ثالثی لئی اکٹھے ہوئے سن۔

۵ھ وچ رسول خداؐ نوں ایہہ خبر ملی کہ دومتہ الجندل تے ایس دے آل دوالے قزاقاں تے لٹیریاں نے ڈیرے لائے ہوئے نیں۔ اوہ نہ صرف تجارتی جتھیاں تے حملہ کر کے اوہناں دا مال کھوہ لیندے نیں سگوں آؤندے جاندے مسافراں نوں وی لٹ لیندے نیں۔ آپؐ نوں ایہہ دس وی پئی کہ ہن اوہناں دے حوصلے ایس حد تیکر ودھ گئے نیں کہ اوہ مدینے تے حملے دیاں تیاریاں کر رہے نیں۔ ایس توں پہلے کہ اوہ مدینے دی ریاست تے چڑھائی کر دے ایہہ ضروری سمجھیا گیا کہ اوہناں کا فرماں نوں اوتھے ای ٹھل پائی جاوے۔

دُجی وجہ ایہہ وی سی کہ ہن تیکر مسلماناں دیاں حربی سرگرمیاں دامرکز مکے تے مدینے دا آل دوالا یاں چوکھے توں چوکھا نجد دا علاقہ قاسی۔ عربستان توں باہر دے طاقتور حکمراناں نوں اچھے اسلام دا کچھ تھوہ پتا نہیں سی۔ دومتہ الجندل وُل لشکر اسلام دی چڑھائی نال شاہ روم، پیغمبر اسلام تے دین اسلام توں جانو ہوسکد اسی۔ ایس لئی ۲۵ ربیع الاول ۵ھ نوں حضورؐ نے مدینے وچ جناب سبہ بن عرفطہ غفاری نوں اپنا نائب مقرر کیتا تے آپؐ نوں اک ہزار مجاہداں دے لشکر دی کمان کر دے ہوئے دومتہ الجندل وُل ٹرپے۔ کوئی چندراں راتاں دی مسافت توں بعد آپؐ جدوں فسادیاں دے ٹھکانے تے اپڑے تے اوتھے زے اٹھاں تے بکریاں دے اجڑ چر دے ہوئے نظر آئے، تے وستیاں بندیاں توں بلکل خالی نظر آئیاں۔ لشکر اسلام نے جتاں کو مال ڈنگر دلیا گیا، وُل لیا۔ باقی اپنے مالکاں وانگ جدھر منہ آیا، بھیج وگے۔ سپہ سالار اعظم نے شہروں باہر میدان وچ ڈیرا لایا۔ کچھ دن اوتھے قیام فرمایا تے آل دوالے نکلے نکلے فوجی دستے گھلے پر صرف اک بندہ تھتھے چڑھیا۔ اوس دی قید اوس دے بخت سنوار گئی کیوں جے اوہ مسلمان ہو گیا سی۔ کچھ دناں پچھوں حضورؐ مدینے وُل پرت گئے تے اوکڑاں بھرے سفر توں بعد ۲۰

ربیع الثانی نوں مدینے اپڑ گئے۔
غزوہ مریسج یاں غزوہ بنی مصطلق:

غزوہ مریسج تے غزوہ بنی مصطلق اصل وچ اک ہی غزوے دے دونوں نیں۔ بنو خزاعہ عرب دا اک مشہور قبیلہ سی تے قریش نال اوہناں دی چنگی یاری سی۔ گل ایوں ہوئی کہ قریش نوں کسے ویلے ایہہ خیال آیا کہ اوہ جناب ابراہیم دی نسل وچوں نیں، ایس لئی اوہ دُجے قبیلیاں توں چوکھے عزت دار نیں۔ حج دا اک وڈا ہار کن عرفات دے میدان وچ ڈیرا لانا اے، پر قریش نے آپوں ای ایہہ فیصلہ کر لیا کہ لوکاں تے عرفات جائے پر قریش عرفات نہیں سگوں مزدلفہ وچ ٹھہرن گے، کیوں جے عرفات حرم دیاں حدوں توں باہر اے۔ اپنی ایس اچھی حیثیت پاروں اپنا لقب احسن رکھیا۔ جیہڑے قبیلے قریش دی ایس حیثیت نوں من لیندے سن یاں ایہہ پابندیاں قبول کر لیندے سن، اوہ قریش دے حلیف ہوندے سن تے اوہا درشتہ وی لے دے لیندے سن۔ قبیلہ بنو خزاعہ ایسے پاروں قریش دا حلیف سی۔

بنو خزاعہ دی اک لڑی بنو مصطلق سی جیہڑی مکے توں مدینے دے رستے تے قدید دے نیڑے، مریسج دی تھاں تے وسوں کیتی بیٹھی سی۔ اوس خاندان دا سردار حارث بن ابی ضار سی۔ اوس نوں خورے قریش دی یاری دا گھمنڈ سی یاں کوئی ہور آکرسی، اوہ رجب ۵ ہجری وچ مدینے تے حملے دیاں تیاریاں کرن لگ پیا۔ رسول خدا دے جاسوسی دے محکمے نے آپ تیکر ایہہ خبر پہنچا دتی۔ آپؐ نے جناب بُریدہ بن حصیب نوں پوری رپورٹ تیار کرن لئی مریسج ول جان دا حکم دتا۔ جدوں جناب بُریدہ نے ایس گل دی تصدیق کر دتی تے رسول خدا نے اسلام دے مجاہداں نوں جہاد دی دعوت دتی تاں جے حارث بن ابی ضار تے آل دوالے دے بدواں دا دماغ ٹھیک کیتا جاسکے۔ ایوں آپؐ نے مدینے وچ جناب زید بن حارثؓ نوں اپنا نائب مقرر فرمایا تے سوموار ۲ شعبان نوں اک ہزار مجاہداں دے لشکر نوں مدینے توں کوچ دا حکم دتا۔ حضور دیاں پاک پیماں وچ حضرت عائشہ دے نام دا قرعہ نکلیا تے ایوں اوہ وی نال گئیاں۔ بنو مصطلق دا علاقہ جانا پچا جاسی، چوکھا دریڈا وی نہیں سی تے خبراں ایہہ سن کہ دشمن اسلام کوئی ایڈا زور اوروی نہیں، ایس لئی مدینے دے بوہت سارے منافق وی لشکر دے نال رل گئے تاں جے اوہ رسول خدا نوں اپنی وفاداری دا یقین دواسکے تے نالے مال غنیمت وچوں حصاوی حاصل کر لین۔ اوہناں منافقاں وچ عبداللہ بن اُبی تے اوس دا ٹولا وی شامل سی۔

لشکر اسلام اپنے کمانڈر انچیف حضرت محمدؐ تے ڈپٹی کمانڈر انچیف جناب عمر بن خطاب دی کمان وچ تکبیر دے نعرے ماردا مریسج ول ودھدا رہیا۔ مریسج دے چشمے کول اپڑے تے او تھے کمان ہیڈ کوارٹر بنا دتا گیا۔ مہاجرین دا علم حضرت ابو بکر صدیق تے انصار دا سعد بن عبادہ نوں عنایت کیتا گیا۔ ”یا منصور“ دا کوڈ ورلڈ دسیا گیا تے مجاہداں دیاں صفوں لڑائی لئی تیار ہو گئیاں۔ جدوں حارث تے اوس دے حریف قبیلیاں نوں پتا لگاتے اوہناں دے ہوش اُڈ گئے۔ سارے ای چوٹھے سنگی ساتھی روفو چکر ہو گئے تے حارث دا کلا قبیلہ کیتی نوں پھڑیا گیا۔ بنو مصطلق نوں جدوں مجاہدین اسلام نال لڑنا پیتا تے ویکھدیاں ای ویکھدیاں دس بندے مروا بیٹھے۔ اک مجاہد اسلام نے وی شہادت دا جام پیتا تے فیر بنو مصطلق نے ہتھیار سٹ دتے۔

کچھ بزرگاں دا خیال اے کہ ایس غزوہ دے وناں وچ مدینے دے حاکم زید بن حارث نہیں سگوں ابو ذر غفاریؓ، کچھ نے ہور نام وی لے نیں۔

اوہناں دے سارے مرد، بچے تے سوانیاں جنگی قیدی بنا لے گئے تے اوہناں نوں اگے لاکے مدینے لے آند گیا۔
عبداللہ بن اُبی دافتنہ:

عبداللہ بن اُبی نوں مدینے وچوں اپنی چوہدرہ دے مک شک جان دا دکھ کدے وی بھل نہیں سکیا۔ اوہدا جدوں وی داء لگا اوس نے ڈنگ ماریا۔ غزوہ بنو مصطلق وچ وی اوہ سازشاں کرن لئی لشکر اسلام دے نال رہیا۔ مریسج دے چشمے تے وی اوس نے مسلماناں نوں آپس وچ لڑان لئی پورے جتن کیتے۔

ہوئی ایہہ کہ حضرت عمر دے اک نوکر جناب ججہ مسعود غفاری تے اک انصاری مسلمان جناب سنان دافتنہ توں پانی لین دے چکر وچ کوئی تھوڑا ججہا بھگڑا ہو گیا۔ حضرت عمر دے ملازم نے انصاری مسلمان نال جدوں کجھ کتھن مکی کیتی تے اوس نے انصاری مسلماناں نوں مد لئی پکاریا۔ جدوں اوہ اکٹھے ہون لگ پے تے مارن والے نے مہاجراں نوں واج لائی۔ کوئی وڈھی گل نہیں سی کہ اسلامی اخوت دے نہ ٹٹن والے رشتے نوں توڑ کے وکھادتا جاندا پر رسول خدا نوں ایس گل دی خبر ہو گئی۔ آپ نے مسلماناں نوں مخاطب کر کے فرمایا کہ ”میں تہاڈے اندر موجود ہاں تے تسیں جاہلیت دیاں پکاراں پارے او! ایہہ کم چھڈ دیو جیہڑا بدبودار اے“ ایوں لشکر اسلام دے مجاہد آپس وچ لڑدے لڑدے رہ گئے۔

عبداللہ بن اُبی نوں ایوں دے کم رب دیوے۔ اوس نے انصار نوں مہاجراں دے تے سرور کائنات دے خلاف واہوا بھریا۔ آکھن لگا میں ایوں دا ذلیل کرن والا دن پوری حیاتی وچ نہیں ویکھیا سی۔ ایہہ مہاجر روندے کر لاندے تے اُجڑے پچڑے ساڈے کول آئے۔ اساں ایہناں لئی اپنے گھراں دے بوئے کھول دتے تے اپنے مال اسباب وچ ایہناں نوں حصے دیندے رہے۔ آج ایہہ مہاجر ساناں ای گھوریاں وندے نیں۔ ساڈی تے ایناں بھک مٹگے مہاجراں دی مثال ایوں ہے جو یں کسے آکھیا سی کہ اپنے کتے نوں موٹا کرو تاں جے تہاں نوں وڈھ کھائے۔ ایہدے نالوں تے مرجانا ای چنگا سی ﴿جتنے منڈلی لا کے منافقاں دا چیف بک بک کر رہیا سی او تھے جناب زید بن ارقم وی موجود سن۔ اوہناں نے ساری گل اوویں ای رسول خدا نوں جاسنائی۔ آپ نے اپنی تسلی واسطے جناب زید نوں آکھیا:

﴿يَا غُلَامُ لَعَلَّكَ غَضِبْتَ عَلَيْنِ﴾

”جوانا! لگدا اے تینوں اوس تے کسے گل دا غصہ اے۔“

”نہیں یا رسول اللہ! اللہ دی قسم اے میں سارا کجھ اپنے کتاں نال سنیا اے۔“ زید نے جواب دتا۔

”ہوسکدا اے تیرے کتاں نوں غلطی لگی ہووے“ ارشاد نبوی ہوئی۔

ایس توں بعد زید نال کجھ گلاں رسول خدا نے تے کجھ انصار نے کیتیاں پر زید اپنی گل تے پکے رہے تے آکھن لگے کہ رب دی سونہر قبیلہ خزرج وچ کوئی بندا وی مینوں عبداللہ بن اُبی توں ودھ کے پیارا نہیں سی، میں جو سنیا اے اوہی دسیا اے۔ گل ایہہ ہے کہ جے میرا باپ وی مسلماناں یاں رسول خدا دے خلاف ایوں دیاں گلاں کرداتے میں تاں وی حضور دی بارگاہ وچ سچ سچ دس دیندا۔

جدوں سب نوں زید دیاں گلاں دالیقین ہو گیا تے جناب عمر بن خطاب نے عبداللہ بن اُبی دے قتل دا مشورا دتا پر حضور رحمت عالم نے اوہ مشورا نہ منیا۔ ایس موقع تے عبداللہ بن اُبی دے پتر حضرت عبداللہ بن عبداللہ نے عرض کیتی یا رسول اللہ! جے میرے باپ دے قتل دا فیصلہ فرماؤ تے ایہہ کم میرے ذمے لانا۔ ایہہ نہ ہووے کہ کدے مینوں اپنے باپ دے قاتل تے غصہ آ جائے تے میں اوس نوں قتل کر کے جہنم دالبن بن جاواں۔ ایہہ سن کے اوس مہربان چیف جسٹس دی مبارک زبان توں نکلیا کہ ”نہیں عبداللہ، نہ تے اوس دے قتل دا ارادہ کیتا اے تے نہ ای کسے نوں حکم دتا اے۔ جدوں تیکر اوہ ساڈے نال رہوے گا، اسیں اوس نال چنگا ای ورتاں گے۔“

ایہہ حالات ویکھ کے حضور نے اوسے ویلے مریمیں توں کوچ کرن دا حکم دتا۔ سارا دن سفر جاری رہیا، رات وی ایوں ای گزر گئی، دُجے دن دوپہر ویلے ڈیرے لان دی اجازت ملی۔ سفر دی ایڈی بے آرامی گئے دناں وچ کسے وی نہیں سی ویکھی۔ ہن جدوں لمے پے تے نکاویں نیندر آئی۔ جدوں جاگے تے عبداللہ بن اُبی دیاں دُکھ دین والیاں گلاں گئی پلک دی بھٹی ہوئی کہانی بن گئیاں سن۔ لشکر فیر مدینے ول ٹر پیا تے فیر جاز دے اپنے علاقے وچ فوئق التبع ناں دے چشمے کول اگلی رات بسر کیتی۔

اک وڈھے منافق دی موت:

لشکر اسلام جدوں مدینے دے نیڑے اپڑیا تے بڑی تیز ہنیری آئی۔ ایوں جا پدا سی کہ ہنیری ہر شے نوں زمین وچ دب دیوے گی۔ صحابہ کرام بوہت پریشان ہوئے تے اوہناں دے دلاں وچ کئی طرحاں دیاں گلاں آئیاں۔ حضور نے اپنے جاں نثار بھناں نوں حوصلہ دتا تے فرمایا کہ پریشان نہ ہوؤ، اج منافقاں دا اک وڈھا رئیس رفاعہ بن زید مر مک گیا اے۔ چھیتی ہی اس گل دی تصدیق ہو گئی کہ جو رسول خدا نے فرمایا سی، ٹھیک سی تے جے اوہ نہ وی مر یا ہوندا تے رسول خدا دی زبان مبارک توں اوس دی موت دی گل نکلدیاں سارایں مر جاندا۔ بھلا رب ایہہ کوں گوارا کر دا کہ اوس دے محبوب دی زبان توں کوئی گل نکلدی تے اوہ پوری نہ ہوندی۔

رسول خدا دی ناقہ:

ایس تیز ہنیری وچ رسول خدا دی اک ناقہ گم ہو گئی۔ ہنیری کھلوتی تے کجھ صحابی ناقہ دی تلاش وچ جے کجھ کھلر گے۔ ایہہ ویکھ کے زید بن صلیت ناں دے اک منافق نے ٹچر کیتی کہ رب نے آپ نوں دس نہیں پائی کہ اٹھنی کتھے وے؟ حضرت اُسید نوں ایس گل دا بڑا وٹ چڑھیا تے آکھن لگے کہ زید! جے مینوں رسول خدا دی نراںسگی دا ڈرنہ ہوندا تے میں نیزہ تیرے وچوں پار کر دیندا۔ زید ڈردا مارا حضور کول اپڑ گیا۔ اوس نوں ویکھ کے حضور نے ارشاد فرمایا کہ اک منافق نوں ایس گل دا بڑا چاء چڑھیا اے کہ رسول اللہ دی اٹھنی گم ہو گئی اے تے آکھدا اے کہ کیہہ اللہ اپنے رسول نوں کوئی دس نہیں پاندا۔ سن لے اللہ نے مینوں دس پادتی اے۔ میری ناقہ اوس سامنے والی گھاٹی وچ اے تے اوس دی کلیل اک رکھ نال اڑی ہوئی اے۔ صحابہ کرام e اوس گھاٹی وچ گئے تے ویکھیا کہ اٹھنی دی کلیل رکھ نال اڑی ہوئی سی۔ اوہناں اٹھنی اوتھوں لے کے رسول خدا دی خدمت وچ پیش کر دتی۔ ایہہ ویکھ کے زید دلوں مسلمان ہو گیا۔

اُم المؤمنین حضرت جویریہ:

حضرت جویریہ بنو مصطلق دے سردار حارث بن ابی ضراردی دھی سن تے جنگی قیدی بن کے مدینے آئیاں سن۔ آپ نے اوہناں نوں آزاد کر کے اوہناں نال نکاح فرمالیا۔ (تفصیل امہات المؤمنین دے باب وچ) ایس نکاح دا بنو مصطلق نوں بوہت فیدا ہو یا۔ مسلماناں نے سارے قیدی ایہہ آکھ کے آزاد کر دتے کہ کسے مسلمان لئی ایہہ گل جنگی نہیں کہ اوہ رسول خدا دے سوہریاں دے کسے جی نوں قید کیتی رکھے۔ ایس آزادی توں بعد سارے دے سارے بنو مصطلق مسلمان ہو گئے۔

بنو مصطلق یکے پیڈے مسلمان:

بنو مصطلق اپنے سردار سنیں (سمیت) جدوں مسلمان ہو گئے تے فیر اوہ ایمان تے یکے رے۔ رسول خدا نال رشتے داری وی دین اسلام دے گھیر وچوں باہر نہ نکلن دی اک وڈھی وجہی۔ جدوں اوہ اپنے علاقے ول واپس پرت گئے تے کجھ چراں پچھوں رسول اللہ نے جناب ولید بن عقبہ بن ابی معیط نوں زکوٰۃ دی وصولی لئی اوہناں ول **بھیجیا** جدوں ولید اوہناں دے علاقے وچ اپڑ گئے تے بنو مصطلق ولید نوں رسول خدا دا نمائندہ سمجھ کے اوہناں نوں جی آیاں نوں آکھن لئی آبادی توں باہر نکل آئے۔ ولید بنو مصطلق دے جتھے ویکھ کے گھاہر گئے تے سواری واپس مدینے ول بھا وتی۔ مدینے آ کے رسول خدا نوں شکایت کیتی کہ بنو مصطلق میرے قتل لئی تیار ہو گئے سن تے نالے اوہ زکوٰۃ دین توں انکاری نیں۔

مسلماناں نوں ایس گل تے بڑا غصہ چڑھیا تے اوہناں نال جہاد کرن دا ارادہ کر لیا۔ اوہنے چراں نوں بنو مصطلق دا اک وفد رسول خدا دی خدمت وچ آ حاضر ہوئیا تے عرض کیتی کہ یا رسول اللہ! سنیا اے کہ ولید نے تہاڈے اگے ساڈی شکایت لائی اے۔ سچ تے ایس توں بلکل ای وکھ اے۔ اسیں زکوٰۃ وی دینا چاہندے ساں تے نالے اوس دا استقبال وی کرنا چاہندے ساں۔ بس اوس نوں کوئی بھلیکھا لگا اے۔ ایوں حضور نے جہاد دا ارادہ ترک کر دتا۔

سیدہ عائشہ صدیقہ تے بہتان:

جویں کہ کچھ ذکر ہوئیا اے غزوہ بنو مصطلق وچ مدینے دے بہت سارے منافق وی شریک سن۔ اوہناں نے لشکر اسلام دے مدینے پرتن ویلے، مدینے دے کول اک پڑاؤ تے پیش آؤن والے اک نکلے جئے واقعہ نوں اجیا رنگ دتا کہ مدینے دی ساری اسلامی ریاست ہل کے رہ گئی۔ ہوئیا ایہہ کہ حضرت عائشہ صدیقہ اپنی سواری دے ہودج توں نکل کے لشکر توں کجھ دور نکل گئیاں۔ واپس پرت کے آئیاں تے پتا لگا کہ ہار کدرے راہ وچ ڈگ پیا اے۔ پریشانی وچ فیر اوہدراں ٹر پیاں جتھے پہلوں گئیاں سن۔ ہار تے لہجہ گیا پر جدوں واپس آئیاں تے قافلہ کوچ کر چکیا سی۔

جناب عائشہ ہولے جئے جئے دی سوانی سن۔ جدوں لشکر مدینے ول ٹرن لگا تے اوہناں دا ہودج عادت موجب چک کے اُٹھ تے رکھ دتا گیا تے کسے نوں ایس گل دا خیال نہ رہیا کہ اُم المؤمنین ہودج وچ سواری نہیں ہو سکیاں۔ بس اُٹھ نوں ہک کے اگلی منزل ول روانگی پھڑلئی گئی۔ جناب عائشہ نے اوس ویلے اوہی کم کیتا جیہڑا اوہناں نوں کرنا چاہیدا سی۔ اوہناں کمال دانش مندی تے عقل توں کم لیا تے چادر دی بٹگل مار کے اوسے تھان تے بہہ گئیاں جتھے اوہناں دی سواری بیٹھی سی تاں بے سکھنا ہودج ویکھ کے جدوں تلاش کرن والے پچھاں پرتن تے اوہناں نوں کوئی پریشانی نہ ہووے۔

دستور موجب لشکر دے پچھے اک ہشیار سوار رکھیا جاندا سی تاں جے اوہ پچھے دی ڈنگی ٹھہری شے پھڑ لیا وے۔ غزوہ بنو مصطلق وچ ایہہ خدمت حضرت صفوان بن معطلق دے ذمے سی۔ دن دی تھوڑی تھوڑی لوہ لگی سی جدوں صفوان قافلے دے پڑاؤ والی تھاں تے اپڑ گئے۔ اوہدوں تیکر جناب عائشہ صدیقہ c دی اکھ لگ چکی سی۔ جناب صفوان نے اک سُستی ہوئی سوانی نوں ویکھیا تے اوس نوں پچھا تن لئی کجھ نیڑے ہو گئے۔ خیال کیتا تے آپ نوں سمجھ لگ گئی کہ سُستی ہوئی سوانی کوئی عام سوانی نہیں سگوں جناب عائشہ صدیقہ نیں۔ اُنج وی جناب صفوان نے پردے دے حکم توں پہلاں جناب عائشہ نوں ویکھیا ہو یا سی۔ جدوں یقین ہو گیا کہ آپ اُم المؤمنین عائشہ ہی نیں تے اوس ویرانے وچ تے بے بسی دی حالت وچ آپ نوں ویکھ کے جناب صفوان دی زبان توں اچن چیت انا لله و انا الیہ راجعون نکلیا۔ ایہہ اکھر جناب صدیقہ دے کنیں پئے تے اوہناں دی اکھ کھل گئی۔ آپ نے فوراً پردہ فرمایا تے جناب صفوان نے اپنی سواری اوہناں دے نیڑے بٹھا دتی۔ جناب عائشہ اُٹھ تے سوار ہو گئیاں تے حضرت صفوان نکیل پھڑ کے پیادہ پاٹرن لگ پے۔ کاہلی کاہلی پیر پٹن دا فیدا ایہہ ہو یا کہ دوپہر تیکر آپ قافلے دے نال جا رلے۔ ایس سفر وچ نہ تے جناب صدیقہ نے حضرت صفوان نال کوئی گل کیتی تے نہ ای حضرت صفوان نے پچھے رہ جان دی کوئی وجہ پچھن دی جسارت کیتی۔

جویں پچھے ذکر ہو یا اے ایس غزوے وچ بوہت سارے منافقاں نے دی رلت پائی سی۔ اوہناں نے، تے اچھے طور تے اوہناں دے چیف عبداللہ بن ابی نے ایس موقع نوں غنیمت جانیا تے چوکی بیدردی تے بے غیرتی نال خاندان رسول خدا دی کردار کشی شروع کر دتی۔ اوہناں نے ایوں واہی تباہی کبی کہ کجھ مسلمان وی منافقاں دے نال رلن بنا نہ رہ سکے۔ اوہناں وچوں حضرت حمہ، حضرت مسطح تے حضرت حسان دے نام تواریخ نوں چیتے نیں۔

شاعراں تے ادیبان نوں نکی جی گل نوں وڈھا کر کے دس دی بیماری ہوندی اے۔ حضرت حسان بن ثابت عرب دے مشہور شاعر سن تے رسول خدا نال چوکی محبت کر دے سن۔ پرشاعر نوں تے ایوں دی گل رب دیوے۔ اوہناں نوں خیال نہ رہیا کہ اوہ جس گل نوں ہوا دے رے نیں اوہ بہت وڈھا ظلم اے، جہدے نتیجے تے نہ صرف رسول خدا نوں اذیت پونجی ری اے سگوں رسول خدا دے یار غار دے دل تے وی گھٹ نہیں بیت ری۔ حضرت حمہ اُم المؤمنین حضرت زینب بنت جحش دی سکی بھین تے رسول خدا دی سالی سن۔ جناب حمہ دے دل وچ خورے ایہہ گل آئی ہووے گی کہ رسول خدا دیاں باقی بیبیاں تے جناب زینب دے جوڑ دیاں نہیں سگوں کلی عائشہ ای ہے جیہڑی سچ سچ دی سوکن اے، تے جے عائشہ دا پتا کٹیا جاوے تے فیر میری بھین دی گڈی چڑھ جاوے گی۔ ایسے لئی خورے حضرت حمہ نے ٹکا کے بہتان بازی کیتی تے ایہہ گل بھل گئیاں کہ ایس سازش نال اوہناں دے بہنوئی تے رب دے رسول نوں کیسی تکلیف پونجی رہی اے۔ حضرت مسطح تجے مسلمان سن جنہاں نے حضرت عائشہ دی کردار کشی کیتی۔

رب دا کرنا ایہہ ہو یا کہ جدوں لشکر مدینے اپڑیا تے جناب عائشہ صدیقہ بیمار ہو گئیاں، بیماری لمی ہو گئی تے صدیقہ گھر جوگی ہو کے رہ گئیاں۔ اوہناں نوں کجھ پتا نہیں سی کہ مدینے دیاں گلیاں تے منافقاں دے چوپالاں وچ کیہہ کجھ آکھیا جا رہیا اے تے فیر ایس بکواس نال محبوب خدا دے قلب تے کیہہ بیت ری اے۔ ہاں ایہہ ضرور اے کہ جناب عائشہ

صدیقہ نے آپؐ دارویہ کچھ بدلایا محسوس کیا سی۔ صدیقہ آپوں آکھدیاں نیں کہ آپؐ میرے کول تشریف لیاؤندے سن تے نگا جیہا سوال کر کے پچھ لیندے سن کہ کَیْفَ تَیْکُم (ہاں ہی عائشہ) ”کیہہ حال اے؟“ تے بس کوئی زیادہ گل بات نہیں کردے سن۔ گئے دناں وچ تے کدے وی ایہہ نہیں ہوئی سی کہ صدیقہ جی پیا ری بیوی بیمار ہووے تے رحمت اللعالمین جیہا پیارا خاوند بس عام رشتے داراں وانگ حال پچھ کے ٹر جائے پر فیروہ صدیقہ کسے نتیجے تے نہ اپڑ سکیاں۔

اک دن ایوں ہو گیا کہ طبیعت کچھ سنھلن تے جناب عائشہ دا گھروں باہر جان تے دل کیتا، اُن وی اوہدوں گھراں دے وچ بیت الخلاء دارواج نہیں سی تے رواج توں ہٹ کے کم تے صرف مجبوری دی حالت وچ ای کیتا جاندا سی۔ ہن آپؐ نے کچھ چنگا محسوسیا تے اُمّ مسطح دے نال قضاء حاجت لئی باہر ٹر گئیاں۔ راہ وچ اچن چیت اوہناں دی زبان توں نکلیا:

”مسطح تیرا لکھ نہ رَوے۔“

”ہائیں! پھوپھی! ایہہ کیہہ؟ بدر دا غازی تے نالے تہاڈا پتر، اوس لئی بددعا؟“

”تینوں تے جویں کسے گل دا پتا ای نہیں:“ اُمّ مسطح نے جواب دتا۔

”کیہہ مطلب؟ کیہہ بھارت پائی جے؟“ مینوں تے سچ مچ کسے گل دا نہیں پتا۔“

”بھولے، مسطح وی اوہناں لوکاں وچ اے جیہڑے تینوں بدنام کر دے پھر دے نیں“ اُمّ مسطح نے آکھیا۔

”پھوپھی کس گل دی بدنامی؟ مینوں پوری گل سناؤ“ جناب عائشہ نے آکھیا۔

جدوں اُمّ مسطح نوں یقین ہو گیا کہ جناب عائشہ صدیقہ نوں کسے گل دا وی پتہ نہیں تے اوہناں نے پوری کہانی سنا دتی۔ عائشہ آکھدیاں نیں کہ ”ایہہ سب کچھ سن کے میرے ہتھاں دے طوطے اُڈ گئے تے مینوں ایوں جاپیا جویں میرے اُتے کوئی پہاڑ آڈگا اے۔ بیمار تے میں پہلوں وی ساں، ایس خبر نے تے مینوں کا سے گل جوگانہ چھڈیا۔ حضور دے غصے دی وی مینوں سمجھ لگ گئی سی۔ جویں توں گھرا پڑی۔ کچھ چیر پچھوں حضور تشریف لیائے۔ آپؐ نے سلام کیتا تے میرا حال چال پچھیا۔ میں عرض کیتی کہ یا رسول اللہ! جے اجازت بخشو تے میں کچھ دناں لئی پیکے نہ ہو آواں“ رسول خداؐ نے جناب عائشہ نوں اجازت دے دتی تے آپؐ جناب ابوبکر صدیق دے گھر آ گئیاں۔ او تھے آکے آپؐ نے اپنی امی نوں پچھیا کہ امی! لوکائی میرے ولوں کیہہ کہانیاں بنا رہی اے؟۔ امی نے لاڈلی دھی نوں تسلی دتی تے آکھیا کہ ”عائشہ! دل چھوٹا نہ کر، جدوں کسے بندے دی کوئی سونی گھر والی ہندی اے، بندہ گھر والی نال پیار وی ڈاڈا کر دا ہووے، گھر والی دیاں سوکناں وی ہون تے فیراوتھے ایہہ کچھ ہوا ای جاندا اے“ ایہہ جواب سن کے جناب عائشہ نوں ایس گل دا پک ہو گیا کہ اُمّ مسطح جو کچھ آکھیا سی، ٹھیک ای آکھیا سی۔ بس فیرا تھرو سن تے عائشہ سن۔ ساری ساری رات جاگدیاں تے روندیاں لنگ جاندی۔ بیماری تے بہتان دے صدمے نے آپؐ دی صحت دا جنازا کڈ دتا۔

دُجے پاسے رسول خداؐ دی پریشانی وی دیکھی نہیں سی جاندی۔ کدے کسے نوں پچھدے کہ ”تیرا عائشہ ولوں کیہہ خیال اے“ تے کدے کسے نوں پچھدے کہ ”دَس نئی صفوان بن معطل کوں دا بندہ اے۔“ مدینے دی اسلامی ریاست ایس

عہد مسطح حضرت ابوبکر صدیق دی خالہ زاد بہین سن۔

خوفناک مسئلے (Burning issue) دی وجہ توں ہل کے رہ گئی۔ کچھ دور دی گل نہیں سی کہ ایس بہتان پاروں اک وار فیر جہالت دے وناں دی یاد تازا ہو جاندی تے اوس و خزر ج دیاں تلواراں بے نیام ہو جاندیاں پر رسول خدا نے کمال دانش وندی تے تھل نال، ریاست دیاں جڑاں پٹ دین والے اوس مسئلے تے قابو پالیا۔ آپ نے معتبر لوکاں توں گواہی منگی تے کسے وی جناب عائشہ تے انگلی نہ چکی۔ اک دن جناب اسامہ بن زید تے جناب علی بن ابوطالب نوں پچھیا تے جناب اسامہ نے عرض کیتی کہ یا رسول اللہ! مینوں تے جناب عائشہ وچ کوئی برائی نہیں دسدی۔ حضرت علی نے مشورہ دتا کہ تسیں گھر دی خادمہ بریرہ نوں کیوں نہیں پچھدے؟ جناب بریرہ نوں پچھیا گیا کہ بریرہ عائشہ دی کوئی ماڑی چنگی گل دیکھی سنی آ تے دس۔ اوہناں نے جواب دتا کہ مینوں تے ایس توں دکھ کوئی برائی نظر نہیں آئی کہ کدے کدے گنیا ہو یا آٹا دھیان نال نہیں سنبھالیا جاند تے بکری آکے کھا جاندی اے۔ اک دن جناب عمر فاروق نوں پچھیا کہ تہاڈا کیہ خیال اے۔ جناب عمر نے جواب دتا کہ یا رسول اللہ! میں تے اپنے کتاں تے اکھاں دی راکھی بہن والا بندہاں، جتاں چر میرے کن کچھ سن نہ لین تے اکھاں کچھ دیکھ نہ لین میں کوئی گل نہیں کردا۔ بخدا مینوں یقین اے کہ منافق جھوٹ بکدے نیں۔ تہاںوں تے رب نے ایس گل توں وی پاک رکھیا اے کہ تہاڈے پنڈے تے مکھی بہہ جاوے کیوں جے اوہ نجاست تے گندے ڈگدی اے۔ فیر ایہہ کوں ہوسکدا اے کہ حضور دی کوئی اجہی بیوی ہووے جیہڑی کوئی گندی حرکت کرے تے اللہ تہاڈا تے اوس داتعلق قائم رکھے۔ حضور نے جناب عمر فاروق دی ایس دلیل نوں بڑا پسند فرمایا۔

دکھ تے پریشانی دی گھڑی وچ بندے تے کیہہ بیت ری ہوندی اے، ایس داہر کسے نوں پتا اے۔ رسول رحمت دی پریشانی کسے وی عام بندے دی پریشانی نالوں چوکھی تے وڈھی پریشانی سی۔ اک اجہی ہستی جہدا فرمان ایہہ ہووے کہ طہارت ایمان دا حصا اے تے جہدا درس ایہہ ہووے کہ عفت و عصمت دی حفاظت جنت دی ضمانت اے، اوس دے اپنے گھر وچ جدوں کوئی خرابی دے گی تے فیر لوکاں دیاں زباناں کون بند کرے گا؟ ایسے پریشانی وچ اک دیہاڑے آپ نے حضرت عثمان ذوالنورین نال صلاح کیتی۔ جناب عثمان نے جیہڑا جواب دتا اوہ سونے دے پانی نال لکھن جوگ اے۔ عرض کیتی یا رسول اللہ! ساڈے آقادرے رب نوں تے ایناں وی گوارا نہیں کہ جناب دا پر چھاواں زمین تے پوے، خورے اوس تھان تے مٹی پلٹت ہووے یاں کسے بندے دا پیر سرکار دے پر چھاویں تے آجاوے۔ جدوں رب ایہہ برداشت نہیں کردا تے فیر اوس دی عزت ایہہ کوں گوارا کر سکدی اے کہ جناب دی پاک بی بی کسے ول دیکھے یاں کوئی نظر آپ دی عصمت ول اٹھے۔

بہتان بازی کرن والیاں وچ حضرت زینب بنت جحش دی بہن وی شامل سن۔ ہن جے ذرا وی کوئی گل ہوندی تے اُم المؤمنین جناب زینب وی اپنی بھین حمہ دا ساتھ دیندیاں جد کہ جناب عائشہ جناب زینب دی سوکن وی سن۔ پر جدوں رسول خدا نے حضرت زینب نوں پچھیا کہ اوہناں دا ایس امر تے کیہہ خیال اے تے اوہناں نے صاف جواب دتا کہ ”مینوں تے عائشہ وچ خیرای خیر دسدی اے، شر کوئی نہیں۔“

مدینے دے گھراں وچ ہن دواں گلاں سن۔ اک ایہہ کہ ”دیکھو، عائشہ نے کیہہ کیتا“ تے دُجی ایہہ کہ ”اُم المؤمنین

عائشہ، صدیقہ وی میں تے طاہرہ وی، منافق جھوٹ بکدے نیں۔“ ایوں دی گفتگو اک دیہاڑے حضرت ابوایوب انصاری دے گھروچ وی ہو رہی سی۔ جناب ابوایوب نے آکھیا کہ ”اُم ایوب! ویکھیا ای لوکا کی سیہہ آکھ رہی اے؟“ دانش وند سوانی نے بڑا سوہنا جواب دتا تے آکھیا ”ابوایوب! ایہہ دسو کہ جے صفوان دی تھاں تے تسیں ہوندے تے تسیں رسول خدا دے حرم نال کسے برائی دا ارادہ کر لیدے؟“

”حاشا وگلا“ ابوایوب چپک اٹھے۔

فیر اُم ایوب آکھیا کہ ”جے عائشہ دی تھاں تے میں ہوندی تے میں اللہ دے رسول نال خیانت دی کدی جرأت نہ کر دی تے عائشہ دا مقام تے میرے توں بوہت اچا اے۔“

فیر اک دیہاڑے ایوں ہو گیا کہ جناب عائشہ اپنے پیکے گھر بیٹھی رو رہی سن۔ اک انصار عورت حضرت عائشہ دی خبر گیری لئی آئی۔ آپ دا حال ویکھ کے اوس نے وی رونا شروع کر دتا۔ جناب ابو بکر صدیق تے آپدی گھر والی حضرت عائشہ کول آ بیٹھے۔ اُتوں رسول خدا وی تشریف لے آئے۔ آپ السلام علیکم آکھ کے جناب عائشہ دے کول آ بیٹھے تے ارشاد فرمایا کہ ”عائشہ، جے توں بری ایس تے اللہ تعالیٰ تیری برأت دا اعلان کر دیوے گا تے جے تیرے کولوں کوئی گناہ ہو گیا اے تے فیر اللہ تعالیٰ توں بخشش منگ تے تو بہ کر۔ بنداجدوں اپنے گناہ دا اقرار کر لید اے، تے اوس توں توبہ کر لید اے تے اللہ اوس دی توبہ قبول کر لید اے۔ رسول خدا دی تنبیہ مکدیاں نال ای اُم المؤمنین دیاں رگاں وچ غصے نال خون دوڑ اٹھیا۔ اتھرو کرنا بند ہو گئے تے عائشہ اپنی امی ول ویکھن لگ پے۔ اپنی امی نوں چپ لگی ویکھ کے آپ دی نظر جناب ابو بکر صدیق ول اٹھی۔ اوہ وی چپ دے چپ۔ جناب عائشہ نے پچھیا:

”تسیں کجھ بولدے کیوں نہیں؟“

”دھیے! کیہہ بولنے، جدوں سانوں کسے گل دا پتا ہی نہیں۔“

ایہ آکھ کے دوواں نے نیویں پالئی۔ اُم المؤمنین دیاں اکھاں ساون بھادروں دا بدل بن گئیاں تے روندیاں روندیاں ای اپنے ماں پیو اگے تے سردے سائیں اگے عرض کیتی کہ ”تسیں اک گل سن کے اوس تے پکے ہو گئے او۔ ہن جے میں آکھاں کہ میں بے گناہ ہاں، تے اللہ نوں پتا اے کہ میں بے گناہ ہاں، پر تسیں منو گے نہیں۔ ہاں، جے میں اقرار کر لواں جد کہ اللہ نوں خوب علم اے کہ میں بے گناہ ہاں تے تسیں ہنے ای من لوو گے۔ ہن میں تے اوہی گل آکھاں گی جیہڑی حضرت یوسف دے والد نے آکھی سی کہ ”بس صبر ای چنگا اے جہدے وچ شکایت داناں نہ ہووے۔“

تھوڑے ای چیر پچھوں حضور تے وحی نازل ہوئی۔ وحی توں بعد حضور دا چہرہ انور کھلیا کھلیا دسیا۔ سب توں پہلاں سرکار نے جناب عائشہ ول ویکھیا تے فرمایا کہ ”عائشہ خوش ہو جا، رب رحیم نے تینوں بری فرما دتا اے۔“ ایہہ سن کے جناب عائشہ دی امی نے اوہناں نوں آکھیا کہ ”دھیہا، حضور دے سامنے کھلو جاتے اوہناں دا شکریہ ادا کر۔“ جناب عائشہ غصے وچ سن۔ جواب دتا ”میں کسے دے سامنے کھلوواں گی تے نہ ای سوائے اللہ دے کسے دا شکریہ ادا کراں گی۔ میری برأت تے پاکیزگی دا اعلان تے رب نے کیتا اے۔“ ایہ اعلان ایوں ہو گیا:

﴿إِنَّ الَّذِينَ جَاءُوا بِالْإِفْكِ عُصْبَةٌ مِّنْكُمْ لَا تَحْسَبُوهُ شَرًّا لَّكُم بَلْ هُوَ خَيْرٌ لَّكُمْ لِكُلِّ امْرِئٍ مِّنْهُمْ مَّا اكْتَسَبَ مِنَ الْإِثْمِ وَالَّذِي تَوَلَّى كِبْرَهُ مِنْهُمْ لَهُ عَذَابٌ عَظِيمٌ ۝ لَوْلَا إِذْ سَمِعْتُمُوهُ ظَنَّ الْمُؤْمِنُونَ وَالْمُؤْمِنَاتُ بِنَفْسِهِمْ خَيْرًا وَقَالُوا هَذَا إِفْكٌ مُّبِينٌ ۝ لَوْلَا جَاءُوا عَلَيْهِ بِأَرْبَعَةِ شُهَدَاءَ فَإِذْ لَمْ يَأْتُوا بِالشُّهَدَاءِ فَأُولَئِكَ عِنْدَ اللَّهِ هُمُ الْكَاذِبُونَ ۝ وَلَوْلَا فَضْلُ اللَّهِ عَلَيْكُمْ وَرَحْمَتُهُ فِي الدُّنْيَا وَالْآخِرَةِ لَمَسَّكُمْ فِي مَا أَفَضْتُمْ فِيهِ عَذَابٌ عَظِيمٌ ۝ إِذْ تَلَقَّوْنَهُ بِالسِّنَنِكُمْ وَتَقُولُونَ بِأَفْوَاهِكُمْ مَّا لَيْسَ لَكُم بِهِ عِلْمٌ وَتَحْسَبُونَهُ هَيِّنًا وَهُوَ عِنْدَ اللَّهِ عَظِيمٌ ۝ وَلَوْلَا إِذْ سَمِعْتُمُوهُ قُلْتُمْ مَّا يَكُونُ لَنَا أَنْ نَتَكَلَّمَ بِهَذَا سُبْحَنَكَ هَذَا بُهْتَانٌ عَظِيمٌ ۝ يَعِظُكُمُ اللَّهُ أَنْ تَعُودُوا لِمِثْلِهِ أَبَدًا إِنْ كُنْتُمْ مُّؤْمِنِينَ ۝ وَيُبَيِّنُ اللَّهُ لَكُمُ الْآيَاتِ وَاللَّهُ عَلِيمٌ حَكِيمٌ ۝ إِنَّ الَّذِينَ يُحِبُّونَ أَنْ تَشِيعَ الْفَاحِشَةُ فِي الَّذِينَ آمَنُوا لَهُمْ عَذَابٌ أَلِيمٌ فِي الدُّنْيَا وَالْآخِرَةِ وَاللَّهُ يَعْلَمُ وَأَنْتُمْ لَا تَعْلَمُونَ ۝ وَلَوْلَا فَضْلُ اللَّهِ عَلَيْكُمْ وَرَحْمَتُهُ وَأَنَّ اللَّهَ رءُوفٌ رَّحِيمٌ ۝﴾ (نور: ۱۱-۲۰)

”جیہڑے لوکاں طوفان کھڑا کیتا اے ایہہ تہاڑے وچوں ای اک ٹولا اے۔ تسیں ایس نوں اپنے لئی برانہ جانو سگوں ایہہ تہاڑے حق وچ چنگا اے۔ اوہناں وچوں ہر اک تے اوہناں ای گناہ اے جتاں اوہناں نے کمایا اے تے جس نے اوہدے وچوں وڈھا حصا لیا اے اوہدے لئی عذاب عظیم اے۔ ایہہ (بہتان) سن دیاں سار ای مومن مرداں تے مومن عورتاں نے اپنے حق وچ چنگا گمان کیوں نہ کیتا تے سندیاں سارا کیوں نہ بول پے کہ ایہہ سدھا سدھا بہتان اے تے نالے اوہ ایس گل تے چار گواہ کیوں نہ لیاے۔ فیر جدوں اوہ گواہ نہیں لیاے تے فیر ایہہ (بہتان باز) اللہ دے نزدیک رے ای چوٹھے نیں تے جے تہاڑے تے اللہ دا فضل تے اوس دی رحمت نہ ہوندی، دنیا وچ وی تے آخرت تے وی، تے فیر جس شغل وچ تسیں پے گئے سی ایہدے وچ تہاڑے تے سخت عذاب ہوندا۔ (فیر) جدوں تسیں اوس (بہتان) تے اپنیاں زباناں چلا رے سی تے اپنے مونہاں توں اجہی گل کہہ رے سی جہدا تہانوں کوئی علم نہیں سی تے تسیں اوس نوں ایوں جی گل سمجھ رے سی جدوں کہ اللہ دے نیڑے اوہ چوکی وڈھی گل اے تے تسیں سن دیاں سارا ایہہ گل کیوں نہ آکھ دتی کہ ساڈے مونہوں ایہوں جی گل چنگی نہیں لگدی۔ (اے اللہ) پاک اے تیری ذات، ایہہ تے بہت وڈھا الزام اے۔ اللہ تہانوں مت دیندا اے کہ جے ایمان والے او تے ایوں دی حرکت فیر کدے نہ کرنا۔ تے اللہ تہاڑے نال سدھی سدھی گل کرا اے تے (چیتے رکھو کہ) اللہ ہر شے نوں جان والا تے چوکی دانائی والا اے۔ اوہ لوک جیہڑے چاہندے نیں کہ مسلماناں وچ بے حیائی پھیلے، اوہناں لئی دنیا وچ وی چنگا چوکھا عذاب اے تے آخرت تے وی (تے ایہہ پکی گل جے کیوں جے) اللہ نوں تے ہر شے دا علم اے پر تسیں کجھ نہیں جان دے۔ تے جے تہاڑے تے اللہ دا فضل تے اوس دی رحمت نہ ہوندی (تے سوچو کہ فیر کیہہ ہوندا)

پر اللہ تے چوکھا شفقت کرن والا تے مہربان اے۔“

جدوں رب نے جناب عائشہ دی نیک نامی تے مہر لادتی تے جناب ابوبکر صدیق آکھن لگے کہ مسطح دی غریبی دی وجہ توں میں جیہڑا اوس نوں خرچا پانی دیندا ساں، واللہ آج توں اوہ بند۔ جناب صدیق دے ایس فیصلے تے اللہ نے ایہہ آیت نازل فرمائی:

﴿وَلَا يَأْتِلِ أُولُوا الْفَضْلِ مِنْكُمْ وَالسَّعَةِ أَنْ يُؤْتُوا أُولَى الْقُرْبَىٰ وَالْمَسَاكِينَ وَالْمُهَاجِرِينَ فِي سَبِيلِ اللَّهِ وَلْيُغْفِرُوا أَلَا تُحِبُّونَ أَنْ يَغْفِرَ اللَّهُ لَكُمْ وَاللَّهُ غَفُورٌ رَحِيمٌ﴾

(النور: ۲۲)

رب رحیم دے ایس حکم توں بعد جناب صدیق اکبر نے اپنا فیصلہ واپس لے لیا تے فرمایا ”رب دی سونہہ، مینوں ایہہ گل اپنے پہلے فیصلے نالوں چنگی لگدی اے کہ رب مینوں بخش دیوے۔ واللہ، میں ہن خرچا بند نہیں کراں گا۔“

طبرانی دی اک روایت موجب حضرت عائشہ دارشاد اے کہ جدوں میری برأت اُتری تے جناب ابوبکر صدیق نے خوشی نال میرا سر چم لیا۔ میں ابا جی نوں پچھیا کہ آج توں پہلوں تساں ایہہ تہمت میرے توں دور کیوں نہ کیستی؟ ایہہ سن کے اوہناں نے جواب دتا کہ پتر! مینوں کیہڑا آسمان چھاں دیندا تے کیہڑی زمین میرا بھار چکدی جے میں اوہ گل آکھدا جس دا مینوں کچھ پتہ تھوہ ای نہیں سی۔

اک ویروا:

جناب عائشہ صدیقہ تے بہتان توں بعد اک مہینے توں چوکھے چیر لئی جناب رسول خداؐ، مڈھلے مسلمان تے ہر دکھ سکھ دے سانجھے دار جناب ابوبکر صدیق، جناب صدیق دی گھر والی تے فیر مدینے دا ہر مسلمان سخت اذیت تے کرب وچ حیاتی دے دن گزار دارہیا۔ اک وار تے اوس تے خزر ج قبیلیاں دی پرانی دشمنی، جیڑی کئی جنگاں دا سبب بنی، فیر جاگ پین لگی سی پر رسول خداؐ نے جناب عائشہ دی برأت وچ اک اکھروی زبان مبارک توں ادا نہیں فرمایا۔ ایس خموشی تے کچھ لوگ سوالیہ نشان لاندے رے نیں تے اے وی لا رے نیں۔ ایہہ لوک پچھدے نیں کہ:

۱۔ رسول خداؐ اپنے بھٹاں متراں نال صلاح مشورے کیوں کردے رے؟

۲۔ گھر دی لوٹدی جناب بریرہ توں جناب عائشہ دی صفائی کیوں منگی؟

۳۔ رسول خداؐ نوں اللہ دی معرفت سب توں زیادہ حاصل سی، اپنے مرتبے دا وی علم سی تے ایہہ وی جان دے سن کہ آپ کس مقام تے فائز نیں۔ فیر آپ نے کچھ دُجے صحابہ کرام و انگ ایہہ کیوں نہ فرما دتا کہ:

﴿سُبْحَنكَ هَذَا بُهْتَانٌ عَظِيمٌ﴾ (النور)

۴۔ کیا اس واقعے توں ایہہ پتہ نہیں لگدا کہ رسول خداؐ غیب دا علم نہیں رکھدے سن؟

ایہناں سوالاں دے جواب توں پہلاں جے اسیں ایس گل تے گھوہ کر لوینے کہ اخیر ایہہ سوال کرن والے لوکاں دا بچا

کیہہ ہے تے اڈھوں چوکھا مسئلہ حل ہو جاندا اے۔ جے گل نری ایہہ ہے کہ رسول خدا نوں کائنات دے سارے رازاں دا اوویں علم نہیں سی جویں خالق کائنات نوں ہے، تے ایہہ گل سچ اے پرسوال ایہہ ہے کہ ایہہ لوگ اپنے رسول دی ”ماواقفیت تے بے علمی“ ثابت کرن لئی ایڈاٹل کیوں لاندے رہندے نیں؟ ایہدے نال دین دی کیہہ خدمت ہوندی اے تے جے ایہہ آکھ دتا جاوے کہ رب توں بعد کائنات دے کھلار دا، سب توں چوکھا علم محبوب خدا نوں ہی اے تے ایس نال دین نوں کیہہ نقصان پہنچدا اے؟ ایس گل دا اوہناں لوکاں کول کوئی جواب نہیں۔ اوہناں دی حیاتی دانرا اک ای مقصد اے تے اوہ مقصد ایہہ ہے کہ اوہ کسے نہ کسے طرحاں ایہہ ثابت کر دین کہ بس حضور غیب نہیں جان دے سن۔

ہن اسیں ایہناں سوالاں دے اوس سوہنے تے دل کھجیوں جواب ول آندے ہاں جیہڑا جناب شیخ عبداللہ بن محمد بن عبدالوہاب نے دتا اے۔ لکھدے نیں:

”ایس طرحاں دی صورت پیدا کرن وچ اللہ تعالیٰ دی حکمت سی تے رہندی دنیا تیکر رسول اللہ تے پوری اُمت مسلمہ دا امتحان سی، تاں جے ایس پاروں اوہ بہتیاں دے درجے بلند کرے تے بہتیاں نوں جہنم وچ سٹ دیوے۔ ہدایت والیاں دے ایمان تے ہدایت وچ وادھا کرے تے ظالماں دے نقصان تے گھائے نوں ہور ودھاوے۔ عدل تے سچ اُتے اللہ تعالیٰ، اوس دے رسول، اہل بیت تے دُجے نیک بندیاں پاروں چنگا خیال کرن وچ ثابت قدمی نصیب ہووے تے منافقاں دے چوٹھ تے نفاق وچ وادھا ہووے تے اوہناں دی اصلیت رسول اللہ تے مسلماناں دے سامنے آجاوے۔ جناب عائشہ صدیقہ تے اوہناں دے مایاں دی عبودیت اپنے کمال تے اپڑی نظر آوے تے اوہناں تے اللہ دیاں نعمتاں دامینہ پے جاوے۔ مخلوق توں اوہناں دی اُمید اصلوں ای ٹٹ جاوے تے اللہ تعالیٰ توں سوا ہر پاسیوں مایوسی نظر آوے۔“

ہن جدوں ایہہ پتا لگ گیا کہ ایہہ اللہ دی حکمت سی تے اسیں اک پیرا گے پٹ دے ہاں تے اہل نظر اگے ایہہ سوال رکھدے ہاں کہ واقعہ اِک فک دے کسی حصے توں ایہہ پتا لگدا اے کہ رسول خدا نوں جناب عائشہ دی بے گناہی دا کجھ علم نہیں سی؟ کہ صرف ایس گل توں کہ رسول خدا پریشان سن تے نالے اوہناں جناب عائشہ دی بیگناہی دا اعلان نہیں کیتا؟ آؤ ویروا کریے۔

۱۔ واقعہ اِک فک ایڈا وڈھا مسئلہ سی کہ ایہدے نال اسلامی ریاست ہل کے رہ گئی۔ رسول خدا ایہہ سمجھ رے سن کہ ہر وڈھے مسئلے وانگ اتھے وی اللہ تعالیٰ وحی دے ذریعے آپ دی راہنمائی فرمان گے۔ ایس لئی آپ خموش رے۔

۲۔ آدم توں لے کے خاتم الانبیاء تیکر کدے کسے نبی دی بیوی بے حیائی نہیں کیتی جناب عائشہ تے ایہہ شبہ کیوں ہو سکدا سی؟

۳۔ حضرت صفوان بن معطل دا رسول خدا دے گھر آن جان سی۔ ایہہ قربت جناب صفوان دی پاکبازی دی دلیل سی۔ فیہر اوہناں ایہہ وی فرمایا کہ ”سبحان الله فَوَالَّذِي نَفْسِي بِيَدِهِ مَا كَشَفْتُ مِنْ كَنْفِ اُنْثَى“ (سبحان اللہ، اوس ذات دی قسم اے جہدے ہتھ وچ میری جان اے میں تے کدے کسے سوانی داستری نہیں کھولیا۔) ایس توں اگلی

گل تے بوہت وڈھی اے۔

۴۔ ارشاد باری تعالیٰ ہے اَلْخَبِيثَاتُ لِلْخَبِيثِينَ (خبیث عورتاں خبیث مرداں لئی نیں)
فیرایہ کوں ہو سکہ اسی کہ کوئی خبیث عورت اک ایچے مرد دے جسے وچ آؤندی جیہڑا آدمیت داحسن اے تے جس
دی حیاتی دا اک اک ساہ انسانیت لئی اُسوہ کُسن اے۔

۵۔ رسول خدا نے منبر تے کھلو کے آکھیا:

﴿وَاللّٰهُ مَا عَلِمْتُ عَلَىٰ اَهْلِيْ اِلَّا خَيْرًا وَّلَقَدْ ذَكَرُوا رَجُلًا مَّا عَلِمْتُ عَلَيْهِ اِلَّا خَيْرًا وَّلَقَدْ ذَكَرُوا
رَجُلًا مَّا عَلِمْتُ عَلَيْهِ اِلَّا خَيْرًا وَّ مَا يَدْخُلُ عَلَىٰ اَهْلِيْ اِلَّا مَعِيَ﴾

”خدا دی قسم اے میں تے اپنی گھر والی وچ بھلیائی ای دیکھدا ہاں تے جہدے نال گل جوڑی گئی اے اوہ وی
بھلا مانس بند اے۔ اوہ جدوں وی میرے گھر گیا اے میرے نال ای گیا اے۔“

۶۔ ایس توں پہلاں بڑے ترے ہوئے لفظاں وچ مسلماناں توں واج دے کے پچھیا کہ اے مسلمانو! دسو اوس بندے
توں کون میرا بدلا لیندا اے جئے میری گھر والی نوں بدنام کیتا اے؟ تے ایہہ سن کے سعد بن معاذ اُٹھ کے کھلو گئے
تے آکھن لگے آقا، میں حاضر آں، حکم کرو میں اوس دی دھون لا دیواں گا۔ ایہہ کوئی حسن یوسف نہیں سی کہ انگلیاں
کٹیاں جاندیاں، تے اوہ وی سوانیاں دیاں سگیاں ایہہ واج تے اوس سوہنے دی سی جہدے اگے کئی یوسف ہتھ بندھ
کے کھلو تے دسدے نیں۔ پر رسول رحمت نے جدوں ایہہ دیکھیا کہ ایس بدلے نال سیاسی مسئلے پیدا ہون گے تے
آپ خموش ہو گئے۔ جے آپ نوں رتی بھرو کوئی شبہ ہندا تے ایہہ گل نہ آکھدے کہ ”يَا مَعْشَرَ الْمُسْلِمِينَ مَنْ
يَعْتَدِ رُنًى.....“

۷۔ حضور دی حیاتی دا مطالعہ کرن والا ہر بندہ جان دا اے کہ آپ نے کدے وی کئی عمر دے منڈیاں نوں غزو یاں نال
جان دی اجازت نہیں بخشی۔ جناب صفوان بن معطل وی ضرور سیانی عمر دے بندے ہون گے جیہڑے نہ صرف جنگ
وچ شریک سن سگوں اوہناں دے ذمے اک چوکھا ذمہ داری داکم سی کہ اوہ لشکر دے کیرٹیکر (Care Taker) سن
۔ اوس سیانی عمر دے بندے نے ایچے تیکر ویاہ کیوں نہیں سی کیتا؟ امام ابن کثیر لکھدے نیں کہ تحقیق توں پتا لگا سی کہ
جناب صفوان ”حصور“ آدمی سن تے اوہناں نوں عورتاں دی کوئی خاہش نہیں سی۔

۸۔ امام رازی فرماندے نیں کہ وحی (سورہ نور) توں پہلاں وی حضور نوں حضرت عائشہ دی پاک دامنی دا علم سی کیوں
جے نبی دا ایہہ گلاں توں پاک ہونا جیہڑیاں لوکاں نوں متنفر کر دین ضرورت عقلیہ وچوں ہے۔

۹۔ حضور دی پریشانی آپ دے عدم علم دی دلیل نہیں ہو سکہ دی۔ اوہ ہستی جیہڑی دجیاں نوں ایہہ بشارت دیندی اے کہ

محمد بخاری شریف، جلد دوم واقعہ اقلک۔

سیرت النبی از ابن کثیر جلد دوم صفحہ: ۲۲۴

فیضیاء النبی از جسٹس کرم شاہ از ہری جلد سوم صفحہ: ۶۵۶۔ تے سیرت حلبیہ جلد ۴ صفحہ: ۳۳۶

تسلیں مینوں اپنیاں زبانوں تے شرمگاہوں دی ضمانت دیو، میں تہانوں جنت دی ضمانت دیندا ہاں اوس دے اپنے گھر وچ زبان تے شرمگاہ دی حفاظت نہ کر سکن دی تہمت جناب رسول خدا لئی بوہت وڈھا صدمہ سی۔ غور کرو اگر پشاور دے کسے اچھے بندے تے ایہہ الزام لایا جاوے کہ پچھلے رمضان دی اک طاق رات نوں اوہ لہور دے اک بے حیائی دے اڈے وچ ویکھیا گیا سی تے اوہ پریشان ہووے گا کہ نہیں؟ جدوں کہ اوہ بند اوس رات پشاور دی اک مشہور مسجد وچ اعتکاف بیٹھا ہو گیا سی۔ ہن اوہ بند پشاور رابطہ کرے گا، اوس مسیت دے معتکف بندیاں دا ریکارڈ کڈاوے گاتے کجھ ہور شہادت نال اوہ لہور وچ اپنی بے گناہی ثابت کرن لئی لوکاں نوں ثبوت دیوے گا۔ بندے نوں پتا اے کہ اوہ بے گناہ اے۔ پر دسو کہ بے گناہی ثابت ہون تیکر اوہ پریشان ہووے گا یا نہیں؟

ایہہ اوہ گلاں نیں جہدی بنیاد تے اسیں ایہہ آکھن تے مجبور آں کہ خدا ای جان دا اے کہ اوس نے اپنے محبوب بندے نوں نزول وحی توں پہلاں اصل گل دسی کہ نہیں تے جیہڑے لوک علم دے شہر دی بے علمی ثابت کرن لئی دن رات پریشان ہو رہے نیں، اللہ اوہناں نوں ہدایت دیوے۔

واقعہ اِ فک ساڈے لئی سبق:

حیات نبی دے ایس بوہت ہی وڈھے واقعے وچ مسلماناں لئی کئی سبق نیں۔ آؤ اوہناں تے جھاتی پائیے۔

- ۱۔ عورت دا خاوند دی مرضی توں بغیر گھروں نکلنا سخت ضرورت وچ جائز اے۔
- ۲۔ دینی یاد دیاوی اوکڑاں ویلے انا للہ وانا الیہ راجعون کہنا مستحب اے۔
- ۳۔ جدوں کوئی مسئلہ حل ہوندا سد اہووے تے بغیر کسے دے قسم کھوان توں وی قسم کھانا جائز اے۔
- ۴۔ جے کسے تے کوئی الزام لگے تے الزام اوس بندے توں چھپانا مستحب اے جدوں کہ اوہدے ذکر وچ کوئی فیدہ نہ سد اہووے۔
- ۵۔ جدوں خاوند نوں اپنی بیوی دی کسے غلط حرکت دی خبر ملے تے خاوند نوں چاہیدا اے کہ بیوی نال ورتاوا کجھ سخت کر دیوے تاں جے اوہ اوس دی وجہ دا پتہ کر کے اپنی اصلاح کر لوے۔
- ۶۔ عورت اپنے پیکے جان لئی خاوند دی اجازت حاصل کرے۔
- ۷۔ نیڑے دے رشتے داراں نال چنگا سلوک کرنا چاہیدا اے بھانویں اوہ ماڑا کم کرن (جو یں کہ حضرت مسطح نال ہو یا۔)
- ۸۔ سوانیاں دا اک دُجے دی صفائی پیش کرنا جائز اے۔
- ۹۔ غیب دی گل یقین نال صرف اللہ ای جان دا اے۔
- ۱۰۔ زنا دی تہمت تے حد قذف واجب اے۔

ایس توں وکھ دوگلاں اچھیاں نیں جیہڑیاں منگ کر دیاں نیں کہ اوہناں نوں کھول کے بیان کیتا جاوے۔ مڈھلی گل ایہہ ہے کہ اسلام دے گئے متھے ضابطے، طریقے، جزایاں سزا دے معاملے وچ نرمی جائز نہیں پر جے اوس دے نتیجے تے کوئی اچھیا فتنہ کھڑا ہو جاوے جیہڑا دین اسلام تے اُمت مسلمہ لئی گھائے داسبب بنے تے فیر چک دار رو یہ نہ صرف جائز اے سگوں ضروری اے، جویں کہ ایس ویکھدے ہاں کہ عبد اللہ بن اُبی تے حد قذف بارے تواریخ خموش اے۔ دُجی گل زنا تے حد دی اے کہ اک جتھے (قرآن دے مطابق) ولوں تہمت دے باوجود جناب صدیقہ تے حد جاری نہیں کییتی گئی کیوں جے تہمت باز تعداد وچ جنے وی سن اوہ اوویں گواہی نہیں دے رے سن جیہڑی حد لئی ضروری سی، تے دیندے وی کس طرحاں؟ اوہناں کول ایس توں وکھ کوئی گل ہے ای نہیں سی کہ حضرت صفوان تے جناب عائشہ صدیقہ لشکر دے نال نہیں سن سگوں کجھ چر پکھوں نال رے نیں۔ اک بہت ای ضروری گل جیہڑی مسلماناں نوں پلے پنھ لینی چاہیدی اے اوہ ایہہ ہے کہ رسول خدا جناب عائشہ صدیقہ نوں ایہہ ہدایت فرماندے رے کہ عائشہ جے کوئی غلطی کر ٹیٹھی ایس تے توبہ کر۔ رب دے سامنے جرم دا اقرار تے فیر دلوں توبہ رب دے کرم تے بخشش داسبب بن جاندی اے۔ ایہہ نہیں آکھیا کہ عائشہ! جے جرم کیتا ای تے حد لئی تیار ہو جا۔ تے فیر جدوں رب نے جناب عائشہ صدیقہ دی بے گناہی تے پاکبازی دا اعلان فرمادتا تے حضور نے تہمت لان والیاں تے حد جاری کر دتی۔ اوہناں کول اک تے پہلے ای کوئی گواہی نہیں سی دے جے نزول وحی تے حد قذف دے اعلان توں بعد اک لکھ گواہ وی جھوٹ گھڑ دے رہندے تے اوہناں دی کوئی حیثیت نہیں سی۔ ثابت ایہہ ہندا اے کہ ہندا جدوں کوئی غلطی کر لید اے بھاویں اوہ غلطی گناہ کبیرہ ای کیوں نہ ہووے، کسے نوں اوس گناہ دار ولا پاؤن دا کوئی حق نہیں۔ ہاں جے اوس رو لے نال سوسائٹی نوں کوئی فیدہ پہنچدا اے تے اوہ وکھری گل اے۔ چیتے رہوے کہ رسول خدا نے شاعر اسلام حسان بن ثابت، جناب صدیق اکبر دے عزیز حضرت مسطح تے بی بی آمنہ بنت حشش نوں ایہہ نہیں آکھیا کہ توبہ کر لوؤ سگوں اوہناں تے حد جاری فرمادتی سی۔ ایس فیصلے توں ایہہ سبق ملدا اے کہ کسے دے جرم نوں نہ اچھا لو، خاص طور تے زنا دے جرم نوں۔ فیر ایہہ گل وی چیتے رکھنی چاہیدی اے کہ ایس جرم تے چار گواہ پیش کرنا تقریباً ناممکن ہندا اے۔

تیمم:

۵: ہجری دا ای واقعہ اے رسول خدا کسے سفر تے نکلے۔ حضرت عائشہ صدیقہ وی نال سن۔ جویں سوانیاں دی عادت ہوندی اے جان لگیاں حضرت عائشہ اپنی بھین اسماء کولوں ہار منگ کے لے گئیاں۔ اوہ ہار کدرے ڈگ پیا۔ رسول خدا نے حضرت اسید بن حنیر نوں کجھ دے صحابہ دے نال ہار بھن لئی ٹور دتا۔ ہار بھدیاں ایڈی کویل ہو گئی کہ نماز دا ویلا آ گیا پر ہار اچھی تھاں تے گم ہو گیا سی جتھے پانی دا اک ٹبکا وی نہیں سی۔ ایس پریشانی وچ حضرت ابوبکر صدیق نے جناب عائشہ نال نراض ہوندا آکھیا کہ دھیا، دھیان کریا کرتوں کیرہ ہر سفر وچ دجیاں نوں پریشان کر دینی ایں۔ ایس موقعے تے ایہہ آیت صعید (مٹی) یاں آیت تیمم نازل ہوئی:

﴿وَإِنْ كُنْتُمْ مَرْضَىٰ أَوْ عَلَىٰ سَفَرٍ أَوْ جَاءَ أَحَدٌ مِّنْكُم مِّنَ الْغَائِطِ أَوْ لَمَسْتُمُ النِّسَاءَ فَلَمْ تَجِدُوا مَاءً فَتَيَمَّمُوا صَعِيدًا طَيِّبًا فَامْسَحُوا بِوُجُوْهِكُمْ وَ أَيْدِيكُمْ إِنَّ اللَّهَ كَانَ عَفُوًّا

غَفُورًا ﴿النساء: ۴۳﴾

”جے تسیں بیمار ہو جاؤ ویاں سفر وچ ہوؤ یاں تہاڑے وچوں کوئی بندہ استغجے توں آیا ہووے یاں تساں پیہیاں نال قربت کیتی ہووے تے فیر تہا نوں پانی نہ لہجے تے پاک مٹی نال تیم کر لیا کرو یعنی اس (پاک مٹی) تے ہتھ مار کے اپنے مونہاں، تے اپنے ہتھاں تے ہتھ پھیر لیا کرو۔ ایہدے وچ شک نہیں کہ اللہ بڑا معاف کرن والا تے بخشن والا اے۔“

حضرت صفوان تے حضرت حسان دا جھگڑا:

ایس واقعے وچ حضرت صدیق اکبر نے رب دے حکم موجب حضرت مسطح نوں معاف فرما دتا۔ حضرت عائشہ نے حضرت حسان بن ثابت نوں وی معاف کر دتا تے فرمایا کہ ایہہ تھوڑا اے کہ حسان دیاں اکھاں جاندیاں رہیاں نیں۔ پر حضرت صفوان نے دلوں گل نہ کڈی تے اک دن جناب حسان تے تلوار نال حملہ کر دتا۔ جناب عبداللہ بن رواحہ نے ایہہ واردات ویکھ لئی تے اوہناں نوں نال لے کے رسول خدا کول حاضر ہو گئے۔ آپؐ نے حضرت حسان نوں چنگے رویے دی ہدایت فرمائی تے نالے ایہہ وی آکھیا کہ جیہڑا زخم تینوں لگا اے اوہ معاف کر دے۔ ایہدے بدلے حضور نے حضرت حسان نوں اوہ باغ عطا کر دتا جیہڑا ابو طلحہ نے خیرات کیتا سی۔ نالے اک لونڈی سیرین قبیطیہ وی عطا کیتی۔ اوہدے لطن وچوں حضرت حسان بن ثابت دے بیٹے حضرت عبدالرحمن پیدا ہوئے۔

حضرت زینب بنت جحش نال نکاح:

حضرت زینب بنت جحش رسول خدا دی پھپھیری بہن سن۔ آپؐ نے زینب دا نکاح اپنے آزاد کیتے غلام زید نال کر دتا۔ زید نوں جناب رسول خدا نے پترال طرحاں رکھیا ہو یا سی۔ ایس لئی لوکاں نے اوہناں نوں زید بن محمد آکھ دی سی۔ فیروی جناب زینب نوں ایہہ گل چنگی نہ لگی کہ اوہ اک اچھے بندے دی سوانی بن کے رہن جیہڑا کل تیکر غلام سی۔ دوواں جیاں وچ اُن بن ودھ گئی تے جناب زید نے گھر والی نوں طلاق دے دتی۔ اللہ نے زینب دا نکاح اپنے محبوب نال کر دتا (تفصیل اُمہات المؤمنین دے باب وچ)

ایس نکاح نال عربستان دی ایہہ رسم ختم ہو گئی کہ منہ بولیا پتر وی پتر ہی ہندا اے۔

* * * *

بنو نضیر جیہڑے رسول خدا نال ویرکٹن لئی کجھ وی کرن لئی تیار سن، قریش نوں آکھن لگے کہ جے سچ پچھوتے دین تے
تہاڈا ای چیزگا اے۔

﴿أَلَمْ تَرَ إِلَى الَّذِينَ أُوتُوا نَصِيبًا مِّنَ الْكِتَابِ يُؤْمِنُونَ بِالْجِبْتِ وَالطَّاغُوتِ وَيَقُولُونَ لِلَّذِينَ
كَفَرُوا هَؤُلَاءِ أَهْدَى مِنَ الَّذِينَ آمَنُوا سَبِيلًا ۚ أُولَٰئِكَ الَّذِينَ لَعَنَهُمُ اللَّهُ وَمَن يَلْعَنِ اللَّهُ
فَلَنُتَجَدَّلَهُ نَصِيرًا﴾ (النساء: ٥١ - ٥٢)

”کیسہ تسان او ہنالا لوکاں نوں نہیں دیکھیا جہناں نوں (آسمانی) کتاب وچوں حصا دتا گیا تے ہن اوہ ایمان لے آئے نیں جبت تے طاغوت (بتاں) تے۔ کافراں پاروں آکھدے نیں کہ مسلماناں نالوں ایہہ چوکھے ہدایت والے نیں۔ ایہی اوہ لوک نیں جہناں نوں اللہ نے پھکار دتا اے تے جنوں اللہ پھکارے فیراوس دا کوئی مددگار نہیں۔“

بنو نصیر دے یہود ماں نے تو حید دے مقابلے تے بت پرستی دی جیہڑی تعریف کیتی اوس دا دکھ آج تیکر یہودی دانش ور

محسوس کر دے نیں۔ یہودی مستشرق ڈاکٹر اسرائیل ولسفون اپنی کتاب، تاریخ الیہودی بلا دا العرب، وچ لکھدے نیں کہ ”یہود نے ایہہ کیمہ کہتی کہ قریش دے سامنے بت پرستی نوں اسلامی توحید دے مقابلے تے چنگا آکھدے رے؟ اوہناں نوں ایس معاملے وچ ایس حد تک دشمنی دا ثبوت نہیں دینا چاہیدا سی کہ حق سچ توں ای انکاری ہو گئے..... اوہ بھل گئے کہ اوہناں دے وڈے نے کوں بت پرستی دے خلاف کئی قوماں نال جنگاں کیتیاں تے توحید پھیلاں دے جرم وچ اوہناں دے کئے وڈیاں نے شہادت دے جام پیتے۔“

جدوں قریش تے بنو نضیر وچ مسلماناں تے سانجھے حملے دا معاہدہ ہو گیا تے بنو نضیر دے سفارت کار بنو غطفان تے بنو سلیم کول گئے تے اوہناں نوں وی جنگ وچ رلت تے راضی کر لیا۔ ایڈے زور و قبیلیاں دے نال رل جان نال حملہ آوراں دی طاقت ودھ گئی تے بنو مرہ، بنو سعد فزارہ، بنو اسد تے اشجع جے قبیلے وی مدینے دی اٹ نال اٹ و جان لئی تیار ہو گئے۔ ایہہ سارے قبیلے جہناں نوں اللہ نے احزاب دا نام دتا اے، رل کے دس ہزار دالشکر بن گئے۔ سب قبیلیاں دی سالاری اوہناں دا اپنا اپنا سردار کر رہیا سی۔ پراوہناں دا کمانڈر انچیف ابوسفیان بن حرب ای سی ﷺ

رسول خدا نوں جدوں کافراں دے ایس خوفناک ارادے دا پتا لگیا تے آپ نے اپنے طریقے موجب اپنے اصحاب نال صلاح مشورا چھوہ دتا۔ سب نے اپنا اپنا خیال ظاہر کیتا پر رسول خدا نوں جناب سلمان فارسی دی ایہہ صلاح پسند آئی کہ مدینے دے باہر اک خندق کھودی جائے تاں جے دشمن شہر دے وچ وڑاں نہ سکے۔ تن پاسیوں تے مدینے دا قدرتی دفاع موجود سی۔ چوتھے پاسے یعنی شمال ول خندق پٹی گئی جہدی لمبائی ۵۵۴۴ میٹر، اوسط چوڑائی ۴۰۶۲ میٹر تے اوسط ڈنگیائی ۳۰۲۳ میٹر سی۔ مسلمان مجاہداں دی تعداد تن ہزار سی۔ دس دس بندیاں دی اک کمپنی نوں چالیس چالیس ذراع (ہتھ) لمی خندق پٹن داکم دتا گیا۔ حضرت سلمان فارسی جیہڑے ماہر حرب وی سن، اوہ نگرانی کر دے رے۔ مجاہداں دی حوصلہ افزائی لئی رسول خدا آپ مٹی چک چک کے سہ دے رے۔ تے اوہناں نوں کم تیز کرن دی تلقین کر دے رے۔ چھ دن راتاں دی تھکا دین والی کوشش دے نتیجے تے جناب سلمان فارسی تے رسول خدا دے نقشے موجب خندق داکم توڑ چڑھ گیا۔

نال نال ای اوہناں گھراں دی مرمت وی کر لئی گئی جیہڑے دشمن دی زد وچ آسکدے سن تے خندق توں دو فرلانگ دے فاصلے تیکر سن۔ سوانیاں تے نیانیاں نوں اوہناں حویلیاں وچ اکٹھا کر دتا گیا جیہڑیاں قلعے داکم دیندیاں سن۔ خندق دے اندر لے پاسے پتھراں دے ڈھیر اکٹھے کیتے گئے تاں جے لوڑ پوے تے دشمن ول وگائے جاسکے

ایہہ سطوراں لکھدیاں ایس فقیر دے دماغ وچ ایہہ خیال آ گیا کہ ایڈی ڈوگی نہر وچوں نکلن والی لکھاں ٹن مٹی جناب رسول خدا تے آپ دے چیف انجینئر سلمان فارسی نے کتھے سٹائی ہووے گی، اندر مدینے والے پاسے یاں باہر کافراں پاسے؟ جیہڑیاں کتاباں میرے مطالعے وچ آئیاں کسے وچوں مینوں ایس گل دا جواب نہیں مل سکيا۔ ہن قیاس توں وکھ کوئی

طبقات ابن سعد جلد اول صفحہ: ۲۷۴

السیرت النبوی از ڈاکٹر شوقی ابوخلیل صفحہ: ۲۷۸

حیات محمد از محمد حسین ہیکل، جنگ خندق۔

شے نہیں جہدے توں مدد لئی جاسکے تے قیاس توں ایہہ پتہ لگدا اے کہ مٹی اندر لے پاسے سٹائی گئی سی، جہدے توں ایہہ فیدے حاصل کیے گئے۔

(i) خندق دی مٹی دشمن دی پہنچ توں باہر ہوگئی ایس لئی اوہ خندق نوں پور نہ سکے۔

(ii) جے کسے دشمن دا کوئی اتھرا گھوڑا خندق نوں ٹپ وی آئی تے اگے اوس نوں مٹی دے ڈھیراں دی شکل وچ دُجی وڈھی رکاوٹ دا سامنا کرنا پیا۔

(iii) مٹی دے ڈھیراں نے مورچیاں دا کم دتا تے مسلمان وسدے تیراں اگے اپنا بچا کر دے رے۔
غزوہ خندق دی تاریخ:

موسیٰ بن عقبہ لکھدے نیں کہ جنگ خندق ۴ ہجری وچ ہوئی۔ علامہ ابن حزم اوہناں دی تائید کر دے ہوئے لکھدے نیں کہ موسیٰ دی گل ٹھیک اے تے ایہدے وچ کوئی شک نہیں کہ ایہہ جنگ ۴ ہجری وچ ای ہوئی سی۔ اتھے ایہہ سوال پیدا ہوندا اے کہ جنگ اُحد تے تن ہجری وچ ہوئی سی جے خندق ۴ ہجری وچ ہوئی سی تے فیراوہ واقعہ (بدر آخر) کدوں پیش آیا جہدے وچ ابوسفیان اپنے چیلنج موجب میدان بدر وچ اتریا پر قحط سالی دا بہانہ بنا کے جنگ توں بچدا ہو گیا واپس مکے پرت گیا سی۔ ایس لئی ایہناں دو توں وکھ سارے ای اہل سیرت تے مغازی دا ایس گل تے ایکا اے کہ جنگ خندق ۵ ہجری وچ ہوئی سی۔ ایس غزوہ دے مہینے تے وی سیرت نگاراں دا اختلاف نظر آؤندا اے۔ موسیٰ بن عقبہ، ابن کثیر، ابن ہشام، محمود خطاب، شوقی ابوخلیل تے جسٹس کرم شام از ہری ہوراں دے خیال موجب ایہہ جنگ شوال وچ ہوئی جد کہ ابن سعد، حمید اللہ تے شبلی نعمانی لکھدے نیں کہ جنگ دامہینہ ذی القعدسی۔ ایہہ نکاحیا اختلاف بڑی آسانی نال سمجھ آجاندا اے کیوں جے ایہہ کارروائی اک مہینے تیکر جاری ری سی۔ ایوں جا پدا اے کہ جہیزے بزرگاں نے شوال دامہینا لکھیا اے اوہناں نے اوس دیہاڑے نوں سامنے رکھیا اے جدوں رسول خدا خندق دی تیاری لئی ہتھیار پھڑ کے مدینے توں باہر نکلے سن تے جہیزے ذی القعدنوں ٹھیک سمجھدے نیں اوہناں لشکر اسلام دی خیر خیریت نال واپسی نوں سامنے رکھیا ہووے۔ ایہہ وی ہوسکدا اے کہ خندق دی کھدائی تے شوال وچ ہوئی ہووے پر جدوں کافراں دا لشکر مدینے اپڑیا تے اوہناں خندق دے دُجے پاسے اسلامی لشکرنوں تیار ویکھیا، اوہدوں تیکر ذی قعد دامہینا شروع ہو گیا ہووے۔

خندق ویکھ کے کافراں دی پریشانی:

عربستان دا دس ہزار فوجیاں دا مغرور یا ہونیہ اتحادی لشکر شوال دے تھے دھا کے وچ میدان اُحد وچ آ اتریا۔ جدوں او تھے کوئی مسلمان مجاہد نظر نہ آئی تے کافر لشکر مدینے ول کوچ کر گیا۔ کیہہ ویکھدے نیں کہ مدینے دے باہر خندق پٹی ہوئی اے تے مسلمان بڑی ہشیاری تے ہوش وندی نال اوس خندق دی حفاظت کر رہے نیں۔ ابوسفیان حیرت نال اکھاں پاڑ پاڑ کے کدے کدے تے کدے کدے خندق ویکھدا رہیا۔ ”ایہہ کیہہ بنیاں؟ ہن کیہہ کریئے، لے بھئی ایہہ چنگی ہوئی جے، عرباں لئی ایوں لُک لُک لڑنا تے نرا مہنا اے؟ محمد نوں تک نہیں جے پئی مدینے توں باہر نکلن دی۔“ ایوں دیاں کئی گلاں کافر لشکر وچ ہونداں رہیاں۔ دس ہزار دے ایس یونائیٹڈ انسنس دے مقابلے تے تن ہزار مردان خدا شہادت دے جذبے تے

طلب نال میدان جنگ وچ کھلوتے اپنے کمانڈر انچیف محمد رسول اللہ دے حکم دا انتظار کر رہے سن۔ رسول خدائی لال رنگ دے تنبو نال کمانڈ ہیڈ کوارٹر بنایا گیا ﴿حَمَّ لَا يُنْصَرُونَ﴾ دا شعار (کوڈ ورڈ) مقرر رکیتا گیا تے خندق دے نیڑے آؤن والے ہر کافر تے تیراں دامنہ پاؤن داکم چھوہ دتا گیا۔

دُجے پاسے مشرکاں دے گشتی دستے کسے اچھے پوائنٹ دی کھوج وچ سن جتھوں خندق نوں کسے نہ کسے طرحاں پار کیتا جاسکے۔ ایوں دی تھان اخیر اوہناں لہجہ امی لئی۔ اوس تھان توں اک بڈھا ماہر حرب عمرو بن عبدود، عکرمہ بن ابو جہل، نوفل بن عبد اللہ تے ضرار بن خطاب ورگے بندے خندق پار کر گئے تے اوہناں دے گھوڑے خندق تے جبل سلع دے وچکار چکر کٹن لگ پے۔ اوہناں نوں ویکھ کے حضرت علی کجھ مجاہداں نال آگے ودھے تے اوس تھان تے قبضہ کر لیا جتھوں اوہناں نے اپنے گھوڑے پٹائے سن۔ ایوں اوہناں دی واپسی دارستاند ہو گیا۔

مُبارزت:

عکرمہ دے ٹولے نے جدوں اپنے آپ نوں گھیرے وچ ویکھیا تے بڈھے عمرو نے واج لائی کہ مسلمانو! میدان وچ آؤ۔ جناب علی نے اوس دے مقابلے وچ نکلن لئی اجازت طلب کیتی۔ سپہ سالار اعظمؐ نے اپنے دست مبارک نال جناب علی دے سر تے عمامہ بٹھیا، اپنی تلوار عطا فرمائی تے دُعا فرمائی کہ اللہ! علی دی مدد فرما۔ جناب علی تے عمرو اک دُجے ول ودھے۔ مٹی دا اک طوفان اُٹھیا، تلواراں چلن دی واج آئی پر اُد دی مٹی وچ کوئی بندہ نظر نہ آیا۔ اچن چیت اللہ اکبر دی واج آئی، ایہہ واج جناب علی دی سی۔ آپ مٹی دے طوفان وچوں باہر نکل آئے۔ جنگجو عمرو دی لاش خندق دی مٹی نوں لال کر چکی سی۔ اُد دی مٹی وچ خندق پار کر کے آؤن والے سورمیاں داداء لگ گیا تے اوہ پشال پرت گئے پر نوفل بن عبد اللہ، حضرت زبیر بن عوام دے قابو آ گیا تے آپ نے تلوار مار کے اوس دے دو ٹکڑے کر دتے۔

ٹِل دیاں اوکڑاں:

اوس دیہاڑی دو کافراں دی موت ایس گل دا فیصلہ سی کہ ہن کسے وی ویلے دوواں فوجاں دا جوڑ پے جاوے گا۔ فیر ایوں ای ہو گیا، کافراں نے پورے ٹل نال تیر اندازی شروع کر دتی۔ کافراں نے خندق پُر رکے یاں ٹپ کے پار جان لئی پورا ٹل لایا۔ اک کمپنی جہدا ٹپچا جناب رسول خدا سن، خالد بن ولید دی کمان وچ وار وار اگے ودھی پر اللہ نے اپنے محبوب نوں اپنی امان وچ رکھیا۔ اوس دن جناب رسول خدا نوں کوں دیاں اوکڑاں دا سامنا کرنا پیا، ایس دا انداز ایس گل توں ہوندا اے کہ آپؐ ظہر توں عشاء تک کوئی نماز وی نہ پڑھ سکے۔ ﴿

دس ہزار کافراں دے خونخوار لشکر دا مقابلہ جاری سی کہ خیبر وچ وسوں کیتی بیٹھے بنو نضیر دے یہودی سرداراں نے اک ہو ر چال چلی۔ اوہناں نے ویکھیا کہ ایس توں چنگا موقع فیر حیاتی وچ کدے نہیں لہھنا۔ تے جے مدینے وچ بیٹھے بنو قریظہ

کولوں مسلمان سوانیاں تے بالاں اُتے حملہ کرا دتا جاوے تے مسلمان خندق دی نگرانی چھڈ کے پشائ نس آؤن گے۔ فیر ابوسفیان دالشکر مدینے وچ آوڑے گا تے دنیاوی کوئی طاقت مسلماناں نوں بچا نہیں سکے گی۔ ایوں بنوفضیر داسرغنہ حی بن اخطب بنوقریظہ ول ٹریا۔ سازش تیار ہوگئی:

بنوقریظہ دے یہودیوں دا سردار کعب بن اسد سی۔ جدوں بنوفضیر دی ایس سفارت دا کعب نوں پتا لگا تے اوس نے خیال کیتا کہ اوہداتے محمد رسول اللہ نال معاہدہ ہو چکیا اے۔ معاہدے دی خلاف ورزی دی نہ تے اوس دا دین اجازت دیندا اے تے نہ ای معاہدہ توڑن دا اوس نوں کوئی دنیاوی فیدہ ہونا اے، فیر اوہ ایس سازش وچ کیوں شریک ہووے۔ ایوں کعب نے بنوفضیر دے سردار حی بن اخطب دے آون توں پہلاں گڑھی دا گیٹ بند کروا دتا۔ حی سمجھ رہیا سی کہ ایہہ جیوندے رہن دا اخیرى موقعہ اے، اوہ ٹیٹھاں طرحاں بُوئے اگے بیٹھا رہیا۔ کعب نے جدوں اک یہودی سردار نوں اپنے بُوئے تے بیٹھا دیکھیا تے اوہدے احترام وچ گیٹ کھلوا دتا۔ حی بن اخطب آکھن لگا:

”اے کعب! تینوں کیہہ ہو گیا اے؟ میں دنیا دے مشہور لوکاں دالشکر اکٹھا کر لیا اے۔ قریش تے بنوغطفان شمشیر بکف نیں۔ اوہ معاہدہ کر کے آئے نیں کہ محمد تے اوس دے نال دیاں نوں بئے لا کے ای پشائ پرتن گے۔“ ایہہ سن کے کعب نے جواب دتا:

”محمد معاہدیاں تے وعدیاں دا سچا آدمی اے، سانوں وی اپنے عہد تے قول دا پکار ہنا چاہیدا اے“

”تہاڈا حشر دُجے یہودیاں ورگا ای ہونا اے۔“ حی نے آکھیا۔

”معاہدہ توڑن توں بعد وی تے حشر خراب ای ہونا اے“ کعب نے جواب دتا۔

”مسلمان زندہ بچن گے تے کچھ کرن گے نا، ایہہ خندق راہ وچ نہ ہندی تے ہن تیکر ملیا میٹ ہو گئے ہوندے“

”چل بھرا، جویں راضی ایں“ کعب عہد شکنی تے تیار ہو گیا پر نال ای پکھن لگا کہ جے حملہ آورنا کام پرت گئے تے بنو قریظہ دی حفاظت کس دی ذمہ داری ہووے گی؟

”فیر اسیں بنوفضیر والے وی تہاڈے نال ای جیواں مراں گے“ ایہ جواب سن کے چھوٹے دل دماغ والا کعب پوری طرحاں بدعہدی لئی تیار ہو گیا۔

ہن اک پاسے تے حی بن اخطب نے محاصرہ کرن والے کافراں نوں ایہ شخیری جاسنائی کہ بنوقریظہ کاروائی لئی تیار نیں، جہدے نال حملہ آور کافر ہور شیر ہو گئے تے دُجے پاسے بنوقریظہ دے بندیاں نے اپنے قلعیاں وچوں نکل کے شہر دا گشت شروع کر دتا۔ ایہتوں تیکر کہ اوہ اوس حویلی دی جاسوسی دی کرن لگ پے جہدے وچ مسلمان سوانیاں تے بالاں نے پناہ لئی ہوئی سی۔ ایوں دے اک بندے نوں حویلی وچوں رسول خدا دی پھوپھی سیدہ صفیہ بنت عبدالمطلب نے ویکھ لیا۔ سیدہ نے حویلی دے مالک تے نگران حضرت حسان بن ثابت نوں صلاح دتی کہ ہوسکدا اے اوہ یہودی ساڈی جاسوسی لئی آیا ہووے ایس لئی اوس دا قصہ ختم کر دینا چاہیدا اے۔ پر حضرت حسان ایس کم لئی تیار نہ ہوئے۔ جناب حسان دی بے ہمتی ویکھ

کے سیدہ آپوں اگے ودھیاں تے یہودی دے سرتے زوردار لٹھ مار کے اوس نوں تھان مار دتا۔

ایہہ خبر بنو قریظہ تیکر تے اپڑنی ای سی، رسول خدا تیکر وی اپڑ گئی۔ بنو قریظہ نوں جدوں اپنے بندے دے مرن دا پتا لگا تے اوہناں نے ایس توں دو نتیجے اخذ کیے۔ اک مسلماناں نوں ساڈی بد عہدی دا پتا لگ گیا اے تے دُجا ایہہ کہ جس حویلی وچ مسلمان سوانیاں محفوظ نیں اوس وچ اوہناں دی حفاظت لئی فوج وی موجود اے، ایس لئی بنو قریظہ دا کوئی بندادوبارہ حسان دی حویلی دے نیڑے نہ آیا۔

رسول خدا نے بنو قریظہ دے ارادیاں دا پتا کرن لئی اک چار رکنی سفارتی جتھا اوہناں ول ٹور دتا۔ جتھے وچ حضرت سعد بن معاذ، سعد بن عبادہ، عبداللہ بن رواحہ تے خوات بن جبیہ ورگے معتبر تے سیانے بندے شامل سن پر جدوں اوہناں بنو قریظہ نال گل بات کیتی تے اوہناں اگوں سدھیاں گالاں کڈیاں۔ مسلمان سفارت کاراں جدوں اوہناں نوں یاد کرا یا کہ تیسیں محمد رسول اللہ نال معاہدہ کیتا ہویا اے تے آکھن لگے کہ ”کون محمد تے کیہڑا معاہدہ؟ جاؤ، کم کرو جا کے“

بنو قریظہ دی بد عہدی دی خبر سعد وغیرہ نے بڑے راز نال رسول خدا نوں دی تاں جے دُجے مسلمان پریشان نہ ہون پر کسے نہ کسے طرحاں مسلماناں نوں ایس گل دا پتا لگ گیا۔ ہن سامنے دس ہزار کافراں دا خونخوار لشکر سی تے کچھ بنو قریظہ دے بد عہد یہودی، جیہڑے کسے وی ویلے اپنے گوانڈ لکے بیٹھے مسلمان بالاں تے سوانیاں تے حملہ کر سکدے سن۔ مدینے وچ اوہدوں دواہی مخلص بندے موجود سن، اک جناب عبداللہ بن اُم مکتوم جیہڑے نابینا سن تے ریاست وچ قائم مقام سن تے دُجے حضرت حسان بن ثابت ورگے ٹلے مٹھے صحابی رسول جہناں نوں شعر آکھن توں سوا ہور کوئی کم نہیں آؤنداسی۔ مسلماناں نوں ایوں چا پداسی کہ ہن بچن دی کوئی صورت باقی نہیں رہ گئی۔ ڈردے ماریاں کلیجے مونہاں نوں آگئے سن۔ کچھ لوکاں نے، جہناں نوں اللہ نے منافق آکھیا اے، ایہتھوں تیکر آکھنا شروع کر دتا کہ ”ساڈے نال تے محمد نے کسریٰ و قیصر دے خزانیاں تے قابض ہون دا وعدہ کیتا سی پر اتھے تے حالت ایہہ ہے کہ اسیں قضائے حاجت لئی وی باہر نہیں جاسکدے“ ایس صورت حال نوں رب علیم وخبیر نے ایوں بیان فرمایا اے:

﴿إِذْ جَاءَ وَكُمْ مِّنْ فَوْقِكُمْ وَمِنْ أَسْفَلَ مِنْكُمْ وَإِذْ زَاغَتِ الْأَبْصَارُ وَبَلَغَتِ الْقُلُوبُ الْحَنَاجِرَ وَتَظُنُّونَ بِاللّٰهِ الظُّنُونَا إِنَّكَ ابْتُلِيَ الْمُؤْمِنُونَ وَزُلْزِلُوا زِلْزَالًا شَدِيدًا وَإِذْ يَقُولُ الْمُنْفِقُونَ وَالَّذِينَ فِي قُلُوبِهِمْ مَّرَضٌ مَّا وَعَدَنَا اللّٰهُ وَرَسُولُهُ إِلَّا غُرُورًا﴾ (الاحزاب: ۱۰-۱۲)

”(اوہ ویلا چیتے کرو) جدوں (کافر) تہانوں اتوں دی وی پے تے بیٹھوں وی تے جدوں اکھاں کھلیاں دیاں کھلیاں ای رہ گئیاں تے کلیجے منہ نوں آؤن لگ پے، تے تیسیں لوگ اللہ نال رنگ دے گمان کرن لگ پے۔ اوہدوں مسلماناں نوں آزمایا گیا تے اوہ بری طرحاں ہلائے گئے۔ تے جدوں منافق تے اوہ لوگ جہناں دے دلال وچ بیماری اے، آکھدے سن کہ اللہ تے اوس دے رسول نے جیہڑا وعدہ کیتا سی، اوہ دھوکے

توں سوا کچھ نہیں سی۔“

حارث غطفانی دی سودے بازی:

جوں جوں محاصرہ طول پھڑ رہیا سی، مسلماناں دے نال نال محاصرہ کرن والے کافر وی پریشان ہو رہے سن، خاص طور تے بنو غطفان۔ اک دیہاڑے خندق دے دُجے پاسیوں بنو غطفان دے چیف حارث غطفانی نے رابطہ کیتا تے آکھن لگا کہ ”اے محمد! جے مدینے دی اڑھی پیداوار خراج دے طور تے دینی منظور کر لوؤ تے چنگی گل اے، نہیں تے چیتے رکھو کہ ساڈیاں فوجاں مدینے نوں پامال کرن لئی کافی نیں۔“ رسول خدا نے حارث نوں جواب دتا کہ ”میں اوس و خزرج دے سرداراں نال مشورہ کرن توں بغیر کوئی معاہدہ نہیں کر سکدا۔“ فیر جدوں آپؐ نے سعد بن عبادہ تے سعد بن معاذ نال صلاح کیتی تے اوہناں عرض کیتی کہ یا رسول اللہ! ایوں دی دناست تے اوہناں نے کدے جاہلیت وچ وی گوارا نہیں کیتی سی ہن تے اوہ اسلام قبول کر چکے نیں۔ ایوں مسلماناں نے خراج دین توں انکار کر دتا۔

نعیم بن مسعود دی تدبیر:

رسول خدا دے شہر دا محاصرہ کرن والے قبیلیاں وچوں اک قبیلہ اشجع وی سی۔ اوہناں دا اک سیانا تے مشہور بندہ نعیم بن مسعود مسلمان ہو گیا تے رسول خدا کول حاضر ہو کے عرض کیتی کہ یا رسول اللہ! میں اسلام قبول کر لیا اے تے میرے مسلمان ہون دا اے میری قوم نوں پتا نہیں لگا۔ رسول خدا نے فرمایا کہ فیر توں کلا اہجیا آدمی ایں جیہڑا مسلماناں دی مدد کر سکدا ایں۔ کوئی اہجی ترکیب کر کہ دشمنان وچ پھٹ پے جاوے۔ جناب نعیم دا بنو قریظہ نال پرانا تعلق سی۔ رسول خدا دا حکم سن کے آپ بنو قریظہ جاتے تے اوہناں نوں پچھیا کہ دوسری میرا تہاڑا کوں داتعلق اے؟

”بناشک تسیں ساڈے سچے تے پکے یاراؤ“ بنو قریظہ نے جواب دتا۔

”اک گل کراں؟“ جناب نعیم نے پچھیا۔

”جم جم کرو“

”گل ایہہ ہے کہ قریش تے غطفان دے نال لگ کے جیہڑی تہاڑاں محمد نال بد عہدی کیتی اے، ایہہ چنگی گل نہیں۔“ قریش تے غطفان اپنے اپنے علاقیاں نوں پرت جان گے تے مسلمان تہاڑے تے حملہ کر دین گے۔ فیر کیہ کرو گے؟ دوسو تسیں مقابلہ کر لوؤ گے؟ نہیں نا! ایس لئی میرے آکھے لگو تے قریش تے بنو غطفان نوں آکھو کہ جتاں چیر اوہ کچھ بندے ریغمال دے طور تے تہاڑے کول نہیں بھیج دے تسیں جنگ وچ اوہناں دا ساتھ نہیں دیو گے تاں جے محمد دے حملے دی صورت وچ اوہ تہاڑی مدد دے پابند ہو جان۔“ نعیم دی گل بنو قریظہ دی سمجھ وچ آ گئی تے اوہناں نے قریش ول سفارت کارٹورن دا فیصلہ کر لیا۔

بنو قریظہ دے سفارت کاراں توں پہلاں جناب نعیم قریش دے سرداراں کول اپڑ گئے تے اوہناں نوں جا کے آکھیا کہ سچو! میں یاری نبھا رہیا ہاں۔ گل ایہہ ہے کہ بنو قریظہ محمدؐ نال اپنا معاہدہ توڑ کے پچھتا رہے نیں تے ہن صلح دے چکر وچ نیں۔ اوہناں نے محمدؐ نوں عہد شکنی دے بدلے وچ قریش تے غطفان دے سردار قید کر کے پیش کرن دا کاراوی کیتا اے

تاں جے مسلمان اوہناں نوں قتل کر دین تے محمد نے صلح دی ایہہ شرط منظور کر لئی اے۔ تسیں ہن دھیان کریا جے تے اپنا کوئی بندہ بنو قریظہ ول نہ ٹور بیٹھنا۔ ایس توں بعد بنو عطفان نوں وی جناب نعیم نے ایہہ گل سمجھا دتی۔

اگلے جمعہ تے ہفتہ دی درمیانی رات ابوسفیان نے عکرمہ بن ابوجہل دی قیادت وچ ایک جتھا بنو قریظہ ول ٹوریا تے آکھ گھلیا کہ سویرے محمد تے حملے لئی تیار ہو جاؤ۔ بنو قریظہ نے جواب دتا کہ کل ہفتے دادن اے، اسیں ہفتے والے دن نہیں لڑ سکدے۔ اسیں بھلے نہیں کہ پہلاں جہاں لوکاں ایس دن ولوں شریعت دی خلافت ورزی کیتی سی اوہناں تے اللہ دا عذاب نازل ہو یا اے، کجھ لوکاں نوں تے باندھتے سور بنا دتا گیا۔ نالے گل ایہہ ہے کہ تسیں اپنے کجھ بندے یرغمال دے طور تے ساڈے کول بھیجو، نہیں تے اپنے راہے پوؤ۔ اندیشہ ایس گل دا اے کہ لڑائی زوراں تے آجائے گی تے تسیں اپنا بوریا بستر گول کر جاؤ گے تے کچھ مسلماناں کولوں مار کھان نوں اسیں رہ جاواں گے۔

جدوں عکرمہ ہو ریں واپس پرتے، ابوسفیان نوں ساری گل سنائی تے اوہ آکھن لگے کہ واللہ نعیم دی گل ٹھیک ای سی۔ فیر اوہناں بنو قریظہ نوں سنبھا گھلیا کہ اسیں اپنا کوئی بندہ تہاڑے ول کھلن لئی تیار نہیں۔ ایہدے جواب تے یہودیوں نے آکھیا کہ فیر تہاڑا رستا اوہ تے ساڈا اوہ۔ ایوں دوواں فریقاں دا اعتماد اٹھ گیا تے اوہناں وچ پھٹ پے گئی۔ نعیم دی چال پوری طرحاں کامیاب ری تے کافراں دے حوصلے ٹٹ گئے۔

حربی تے سفارتی کوششاں دے نال نال رسول خدا تے آپ دے سجن متر اپنے رب اگے دعاواں دی کر دے رے۔ مسلماناں دی دُعا سی کہ اللہ ساڈا پر دار کھیں تے خطریاں توں ساڈی حفاظت فرما۔ دُجے پاسے محبوب خدا وی اپنے خالق و مالک نوں پکار رے سن تے عرضاں کر رے سن کہ اے اللہ! اے کتاب اتارن والے تے چھیتی حساب لین والے اللہ، ایہناں لشکراں نوں شکست دے۔ اللہ ایہناں نوں شکست دے تے نال جھنجھوڑ کے رکھ دے۔ اخیر اللہ نے اپنے پیارے بندے، تے اپنے بندے دے پیاریاں دیاں دُعاواں سن لئیاں۔ سخت سردی نال ٹھردے تے کمبدے کافراں تے ہنیری دا عذاب نازل کیتا، جہدے نال اوہناں دے خیمے اکھڑ گئے تے ہانڈیاں پٹھیاں ہو گئیاں۔ عجیب منظر سی، چاہیاں دا بالن کاغذی جہازاں وانگ اڈر رہیا سی، خیمے پتنگاں بنے ہوئے سن، ٹھردے ہتھاں وچوں ہتھیار ڈگ ڈگ جاندے سن تے اٹھ تے گھوڑے ڈردے مارے کدے نہ سنیاں گئیاں و اجاں کڈرے سن۔ اوس ٹھردی تے کر لاندی رات وچ رسول خدا نے حضرت حذیفہ بن یمان نوں حکم دتا کہ اوہ حالات تے نظر رکھن۔ جناب حذیفہ نے رپورٹ دتی کہ مشرک واپسی دی تیاری کر رے نیں۔ سویر تیکر طوفان کھلو چکیا سی تے گرد غبار بہہ گیا سی۔ پر لے پاسے دھیان ماریا تے میدان صاف سی۔ ابن ہشام حذیفہ دے حوالے نال لکھدے نیں کہ میں جدوں مشرکاں کول ججیا تے ہنیری نے سب نوں پریشان کیتا ہو یا سی۔ نہ اگ بلدی سی تے نہ کوئی خیمہ کھلوندا سی۔ فیر میں دیکھیا کہ ابوسفیان اٹھ کے کھلو گیا تے آکھن لگا کہ اے قریش! واللہ تسیں اجہی تھاں تے ڈیرے لائی بیٹھے او جتھے پیراں دیاں جتیاں تیکر ٹٹ گئیاں نیں۔ بنو قریظہ نے ساڈے نال کارا کر کے توڑ دتا تے ایوں دیاں گلاں کیتیاں جیہڑیاں سانوں چھدیاں رہیاں۔ اُتوں ایس ہنیری نے سانوں پریشان کر دتا

اے۔ نہ اگ بلدی اے نہ کوئی تنبو کھلونا اے۔ بس میں تے ہن ایس گل نوں ای ٹھیک سمجھدا ہاں کہ پشاں پرت جاپے۔ فیر ابوسفیان اپنے اٹھ کول آیا، اٹھ رسی نال بجا ہو گیا سی۔ ابوسفیان نوں پتا ای نہیں سی۔ کسے بندے نے ویکھیا تے رسی کھول دتی تے ابوسفیان مکے ول ٹرپیا۔ حذیفہ آکھدے نیں کہ جے رسول خدا مینوں منع نہ کردے تے میں ابوسفیان نوں تیر مار کے قتل کردیندا (یاں کرسکدا اساں) فیر میں رسول اللہ دی خدمت وچ حاضر ہو گیا۔ آپ اوس ویلے اک چادر دی بگل مار کے نماز پڑھ رہے سن۔ جدوں حضور نے مینوں ویکھیا تے مینوں اپنے کول کر لیا تے چادر میرے اُتے وی پادتی۔ آپ نے سلام پھیریا تے میں سارا واقعہ عرض کر دتا۔

ابن سعد لکھدے نیں کہ رسول خدا ۲۳ ذی قعد بدھ دے دیہاڑے مدینے واپس پرت گئے۔ تے واپسی دے ویلے فرمایا کہ ”ہن اسیں اوہناں اتے چڑھائی کراں گے۔ اوہ ہن ساڈے تے لشکر کشی نہ کر سکن گے، سگوں ساڈا لشکر اوہناں ول ودھے گا۔“

کافراں دی واپسی دا ذکر مالک دو جہاں نے ایہناں لفظاں نال کیتا اے:

﴿وَرَدَّ اللَّهُ الَّذِينَ كَفَرُوا بِغَنِيظِهِمْ لَمْ يَنَالُوا خَيْرًا وَكَفَى اللَّهُ الْمُؤْمِنِينَ الْقِتَالَ﴾

(سورۃ: الاحزاب: ۲۵)

”اللہ نے کافراں نوں غصے نال بھرے ہوئے ای پشاں پرتا دتا ایوں کہ اوہناں نوں کچھ ہتھ نہ لکيا تے اللہ نے مسلماناں دی لڑائی اپنے ذمے لے لی۔“

خندق دے شہید:

ایس جنگ وچ تن مشرک واصل جہنم ہوئے تے چھ مسلماناں نے شہادت دے جام پیئے۔ ابن سعد نے حضرت انس بن اوس، عبداللہ بن سہل، ثعلبہ بن عنمہ تے کعب بن زید چار شہیداں دے نام دتے نیں۔ حضرت سعد بن معاذ جیہڑے قبیلہ اوس دے سردار تے بڑے دھڑلے والے بندے سن اوہ وی ایسے معرکے دے زخم پاروں اللہ نوں پیارے ہوئے۔ ۶ ویں شہید حضرت طفیل بن نعمان نیں۔ یونائیٹڈ الائنس دا دھڑن تختہ:

جوں کہ اساں کچھ پڑھیا اے کافراں دی اتحادی فوج مایوس تے ناکام ہو کے اک لٹا محاصرہ ختم کرن تے مجبور ہو گئی۔ آؤ ویکھدے ہاں کہ عربستان دے ایس سب توں تگڑے یونائیٹڈ الائنس دے دھڑن تختے دے اسباب کیہہ سن:

۱۔ ونڈھی ہوئی قیادت:

اتحادی فوجاں دی سالاری آکھن نوں تے ابوسفیان دے ہتھ وچ سی پراصل گل ایہہ سی کہ ہر قبیلے دا جدا جدا سالاری،

۱۔ آنحضرت بحیثیت سپہ سالار از محمود خطاب صفحہ: ۲۷۴

۲۔ طبقات ابن سعد جلد اول صفحہ: ۲۷۷

۳۔ بخاری شریف جلد دوم

۴۔ آنحضرت بحیثیت سپہ سالار از محمود خطاب صفحہ: ۲۷۴

جیہڑے مسلماناں تے حملہ کرن لئی کسے اک پروگرام تے اکٹھے نہ ہو سکے۔ بنو غطفان مدینے دی ادھی پیداوار بطور خراج منگدے رے، بنو قریظہ یرغمالی منگدے رے تے اشج دے بندیاں نے کوئی ڈوگی دلچسپی نہ لئی۔ ایہتھوں تیکر کہ جناب نعیم ورگے سیانے بندے مسلمان ہو کے نہ صرف رسول خدا کول چج گئے سگوں مسلماناں دی چوکی مددوی کیتی۔

۲۔ خندق دا حربہ:

یونانیٹڈ الائنس دے کمانڈراں لئی خندق دی موجودگی اک بلکل نویکیلی تے انہونی گل سی۔ اوہناں نوں ایہہ وی نہیں پتہ سی کہ ایہو بے موقعیاں تے حملہ آور فوج کیہڑے حربے ورت سکدی اے۔

۳۔ ٹھنڈ دیاں اوکڑاں:

جویں کہ پچھے ذکر ہوئیا اے جنگ دے دنوں وچ زبردست ٹھنڈ پے ری سی۔ حملہ آور فوج جدوں مکے توں کوچ کیتا سی تے اوہناں نوں ایس گل دا اصلوں ای کوئی پتا نہیں سی کہ اوہتھے پورا مہینا لگ سکدا اے۔ ایس لئی اوہ اپنے نال سردی توں بچن دا سامان نہ لیا سکے۔ ایہتھوں تیکر کہ کھان پین دا سامان وی مہینے جوگا نہیں سی۔ ایوں مدینے دالما محاصرہ خود محاصرہ کرن والیاں لئی عذاب بن گیا۔

۴۔ اک دُجے تے اعتماد دی کمی:

اتحادی فوجاں وچ رنگ رنگ دے جنورا کٹھے کیتے ہوئے سن۔ اوہناں دا ایہہ سانجھا مقصد اپنی تھاں کہ مدینے دی اٹ نال اٹ وچا دیو پر اوہناں دی اصل نظر مال غنیمت تے ہی سی۔ ایس معاملے وچ اتحادی فوجاں دے لالچ دی ایہہ حد سی کہ جے اوہناں نوں اپنے ای حلیفاں توں مال کھوہن دا موقع ملدا تے اوہ اوس نوں وی ضائع نہ کردے۔ اتحادیاں دی ایس کمزوری دا اوہناں سب نوں پتہ سی ایس لئی اوہ اک دُجے تے کوئی چوکھا اعتماد نہ کر سکے۔

۵۔ برداشت دا گھاٹا:

کسے شہریاں آبادی دا محاصرہ کر لینا اوہڈا اوکھا نہیں ہوندا جہناں اوس محاصرے تے پیڑے پیریں کھلو تے رہنا۔ ایہہ کم اوہ جماعت کر سکدی اے جیہڑی چوکی منظم ہووے تے اوہدے سامنے کوئی اچھیا ٹپچا ہووے جیہڑا اوہناں نوں ہمیشہ دا کوئی فیدہ دے سکے۔ اوہناں کول دبنگ قسم دی قیادت ہووے تے اوہناں کول صبر تے حوصلہ وادھوں ہووے۔ مدینے دا محاصرہ کرن والے لشکریاں وچوں چوکھے خانہ بدوش قسم دے بندے سن۔ کدے اتھتھے تے کدے اوہتھے تے جیہڑے لوکی شہری زندگی دے عادی سن اوہ نال ای مجلساں تے منڈلیاں دے وی عادی سن۔ مکے دیاں حویلیاں تے بازاراں وچ جیہڑی موج لگدی سی اوہ مدینے دے باہر کھلے میدان وچ کویں لگ سکدی سی۔ ایس لئی اوہ اک دُجے نوں آکھن لگ پے کہ واپس پرت جانا ای چنگا اے۔

غزوہ خندق دے فیدے:

اتحادی فوجاں دے خوفناک حملے تے محاصرے نے مسلماناں نوں نفسیاتی طور تے چوکھا توڑ دتا سی پر سپہ سالار اعظم a دی مثالی قیادت پٹھ مسلمان پہلے نالوں زیادہ طاقت ور بن کے ابھرے۔ فیر جنگ دے وچ خندق والی جیہڑی

جِدَت سامنے آئی اوس توں اتحادیاں نے ایہہ اندازا کر لیا کہ مسلماناں نوں دفاع کرنا آؤندا اے تے اوہ سارے حربی ہتھکنڈے ورتن اُتے حاوی نیں۔ اتحادیاں دی ناکامی دا ایہ مطلب وی سامنے سی کہ ہن اوہ دوبارہ مدینے تے حملہ کرن لئی ایذا وڈھا لشکر کدے اکٹھا نہیں کر سکن گے۔ ایس اطمینان نال رسول خدا تے مسلماناں نوں توحید دی تبلیغ تے چنگے دفاع لئی کم کرن دے رستے سدھے ہو گئے۔

نبی a دے معجزے:

خندق دی کھدائی تے اتحادی فوجاں دے محاصرے دے دناں وچ نبوت دیاں کئی نشانیاں سامنے آئیاں۔ اک دن حضرت جابر بن عبد اللہ نے رسول خدا دی طبیعت وچ سخت بھک دے آثار دیکھے۔ گھر گئے تے اک چھوٹی جٹی بکری ذبح کر لئی تے تقریباً ڈھائی کلو جو وی پیس لے۔ فیر بڑے راز نال رسول خدا اگے التجا کیتی کہ یا رسول اللہ! آؤروٹی کھاؤ تے جے چاہو تے کچھ دوستاں نوں وی نال لے لوؤ۔ ڈھائی کلو آٹا تے بکری دا کوئی تن چار کلو گوشت اٹھ دس بندیاں دی روٹی بن دی اے پر رحمت عالم نے کوئی ہزار کو بندے نال لے لے۔ جابر ایس گل تے بڑا پریشان ہوئے کہ ہن کیہہ بنے گا۔ پر ہونیا ایہہ کہ گوشت دی ہانڈی ڈل ڈل پیندی ری تے تنور وچوں روٹیاں دے کئی پورے گئے پر گوشت تے آٹا مکن داناں وی نہ لے رے سن ﴿﴾

حضرت نعمان بن بشیر دی بھین آکھدیاں نیں کہ اک دن میری ماں عمرہ بنت رواحہ نے اک لیڑے وچ کچھ کجھو راں دے کے آکھیا کہ جا اپنے باپ تے مامے نوں دے آ۔ اوہ بالڑی کجھو راں لے کے جارہی سی تے رسول خدا دی نظر پے گئی۔ آپ نے اوس نوں پچھیا تے اوہنے جواب دتا کہ ایہہ کجھو راں نیں تے میں اپنے والد بشیر بن سعد تے مامے عبد اللہ بن رواحہ واسطے لے کے جاری آں۔ آپ نے اوہ کجھو راں اوس بالڑی توں لے لیاں تے اوہناں نوں اک کپڑے تے کھلار دتا۔ اُتے دُجا کپڑا پا کے اوہناں نوں ڈھک دتا تے فیر اک صحابی نوں آکھیا کہ جاؤ تے دوستاں نوں کجھو راں دا سدّادے آؤ۔ حضور دافران سن کے خندق کھودن والے سارے مجاہد اکٹھے ہو گئے تے کجھو راں کھان لگ پے۔ جدوں سارے مجاہداں نے کجھو راں رجھ کے کھالیناں تے اہے اوہ کپڑے توں باہر ڈگ رہیاں سن۔

ایس نہ مکن والے دسترخواں دے میزبان تے لکھاں سلام۔

بنو قریظہ دا محاصرہ:

بنو قریظہ دی بدعہدی تے غداری دا پچھے ذکر ہو چکیا اے۔ خندق توں واپسی تے اہے رسول خدا نے کوئی مشاورت نہیں فرمائی سی کہ اوہ سہ دیہاڑے جناب جبرائیل حاضر ہوئے تے عرض کیتی کہ یا رسول اللہ! اساں تے اہے ہتھیار نہیں لاہے تے تسلیں ویلے ہو کے بیٹھ گئے او۔ میں ملائکہ دے اک جتھے نال کافراں دا پچھا کر رہیاں ساں تے اوہناں نوں روحاء تیکر دوڑا کے واپس پر تیاہاں۔ خدا دا حکم ایہہ ہے کہ جدوں تیکر بنو قریظہ دا ملک نہ ٹھپ لیا جاوے، ہتھیار اتارن دی اجازت نہیں۔ رب دا حکم ملدیاں سارای آپ نے حضرت بلال نوں حکم دتا کہ اوہ اذان دین تے اُچی واج نال ایہہ اعلان کر دین کہ

مسلمان عصر دی نماز بنوقریظہ وچ ادا کرن گے۔

آؤ ذرا چیتے کر لوئے کہ بنوقریظہ کون سن۔ بنوقریظہ یثرب دے تن یہودی قبیلیاں وچوں اک قبیلہ سی جیہڑا بنونضیر نال نیڑے دی رشتہ داری رکھدا سی۔ بنوقریظہ تے بنونضیر دوویں مل کے بنودریہ اکھواندے سن۔ ایہہ دُجے یہودیوں توں چوکھا چر بعد یثرب وچ آباد ہوئے۔ بنوقریظہ دیاں دو لڑیاں سن جیہڑیاں بنوکعب تے بنوعمر و دے نانواں نال پچھائیاں جاندیاں سن۔ اوہ شہرتوں باہر جنوب ول مہنروری وادی وچ اپنے ہم نسب قبیلے بدل دے نال رہندے سن۔ اوہناں دے شمال مغرب ول اوس قبیلہ دا علاقہ سی۔ شمال مشرق ول بنوعبدالاشہل دا تے مشرق ول حرہ پاؤندا سی۔ بنوقریظہ یہودی زمیناں دے مالک سن۔ اپنی زرعی پیداوار تے تجارت پاروں بڑے مزے دے دن گزار رے سن۔ رسول خدا دی یثرب وچ تشریف آوری ویلے اوہناں وچ ۵۰ سپاہی موجود سن تے اوہناں کول اسلحے دا اک وڈھا ذخیرہ وی موجود سی۔ بنوقریظہ دا رشتہ دا قبیلہ بنونضیر حئی بن اخطب ورگے جاہل سرداراں دی وجہ توں رسول خدا دے قتل دی سازش کر کے، مدینہ بدر ہو چکیا سی۔ اوہناں دے چوکھے گھراں نے خیبر وچ ڈیرے لالے سن تے ہن اوسے شہر بدر یہودی سردار حئی دے آکھن تے بنوقریظہ نے جنگ خندق وچ رسول خدا نال دشمنی کر کے رب دے عذاب نوں دعوت دتی سی۔

اللہ تعالیٰ دے حکم موجب آپؐ نے بنوقریظہ دی گڑھی ول کوچ کرن دی تیاری چھوہ دتی۔ گئے دن اک واک واک وار فیر ابن اُم مکتوم نوں مدینے وچ اپنا نائب مقرر کیتا تے حضرت علی نوں جنگ دا پھریرا دے کے مجاہداں دے اک جتھے نال بنوقریظہ ول لور دتا۔ حضرت علی دا فوجی دستہ جدوں بنوقریظہ دے نیڑے اپڑیا تے اوہناں نے رسول خدا نوں گالاں بکدیاں شروع کر دتیاں۔ جناب علی کول رسول خدا دا کوئی واضح حکم نہیں سی، ایس لئی اوہ آپؐ نوں اڈیکدے رے۔ تھوڑے چر پچھوں محبوب خدا وی کجھ صحابیاں نال اتھے جاتے تے اوہناں دے کھوہ کول ڈیرے لالے۔

جوں جوں مسلماناں نوں رسول خدا دے حکم دا پتا لگدا رہیا اوہ بنوقریظہ ول کوچ کر دے رے۔ کوچ دے حکم دے نال ایہہ حکم وی ملدا رہیا کہ عصر دی نماز بنوقریظہ دی گڑھی وچ پڑھنی اے۔ ایس حکم موجب کجھ مسلماناں نے عصر دی نماز وقت ہون دے باوجود نہ پڑھی کہ رسول خدا نے آکھیا سی کہ بنوقریظہ کول پڑھنی اے۔ ایہہ رسول خدا نال صحابیاں دی بے پناہ محبت دی نشانی اے کہ جو زبان مبارک توں نکل گیا، اوہ پورا کر دینا اے۔ ایوں کجھ صحابی جیہڑے عشاء ویلے بنوقریظہ اپڑے، اوہناں عصر دی نماز عشاء توں بعد پڑھی۔

رسول خدا دے حکم موجب اوسے رات بنوقریظہ دا محاصرہ کر لیا گیا۔ محاصرے دے دن اک دُجے اُتے کدے کدار تیر پتھر وگائے گئے پر اوہدے نال کوئی جانی نقصان نہ ہوئیا۔ جدوں محاصرے نوں چوکھے دن بیت گئے تے اوہی کعب بن اسید جس نے بنونضیر دے حئی بن اخطب دے آکھن تے اپنی حیاتی تے اپنی آخرت نوں برباد کیتا سی، سیانف وکھان لگ پیا۔ آکھن لگا کہ ”بنوقریظہ دے بند یو! میں تہا نوں تن مشورے دیندا ہاں، اک من لوؤ۔“

”دوسر دار کیہہ نہیں اوہ مشورے۔“ بندیاں نے پچھیا۔

کعب نے آکھیا:

”ایس گل داہر کسے نوں پتا اے کہ محمد اللہ دے نبی تے رسول نیں تے ایہہ اوہی ہستی نیں جہاں نوں تسیں اپنی کتاب وچ پڑھدے او۔ فیر کیہہ ایہہ چنگی گل نیں کہ اسیں محمد دے دین وچ داخل ہو کے اپنی جان، مال تے بال بچیاں نوں محفوظ کر لوئیے۔“

جواب: نہیں سردار، اسیں تو رات توں وکھ کوئی دُجی شریعت قبول نہیں کر سکدے۔
دُجا مشورہ: اپنے بال بچے تے سوانیاں اپنے ہتھاں نال قتل کر کے محمد دے مقابلے لئی نکل پویے۔ فیر جتوں رب دیوے۔
جے اسیں مارے گئے تے گھر والیاں دا دُکھ دل وچ لے کے نہ جاواں گے کہ اوہناں دا کیہہ بنے گاتے جے زندہ بچ گئے تے اپنے اپنے گھر فیر آباد کر لوں گے۔

جواب: اپنے زن و بچہ نوں اپنے ہتھاں نال قتل کر دین توں بعد جے اسیں بچ وی گئے تے اجہی حیاتی دا کیہہ فیدہ؟
تجا مشورہ: اپنے آپ نوں محمد دے حوالے کر دیو۔

کعب دے ایس مشورے تے بنوقریظہ دے بندیاں نے آپس وچ صلاحواں شروع کر دتیاں۔ اک سیانے نے آکھیا کہ ساڈے نال اُس توں ودھ کیہہ ہوو گی جیہڑی بنونضیر نال ہوئی سی۔ قبیلہ اوس دے مسلمان بچن وی ساڈی مدد کرن گے۔ ایس لئی ساڈا مطالبہ ایہہ ہونا چاہیدا اے کہ سانوں شام ول جان دی اجازت دے دتی جاوے۔ ایس مطالبے نال اوہناں اپنا قاصد رسول خدا دی خدمت وچ حاضر کیتا پر آپؐ نے فرمایا کہ پہلوں اپنے آپ نوں میرے حوالے کر دیو، مذاکرات بعد دی گل اے۔

ایس ناکامی توں بعد بنوقریظہ نے اپنے سفیر قبیلہ اوس دے مسلماناں ول بھیجے تے درخواست کیتی کہ جویں کل خزرج نے اپنے حلیف قبیلہ بنونضیر دی سفارش کیتی سی، تسیں وی رسول خدا اگے ساڈی سفارش کرو۔ بنوقریظہ دے آکھن تے اوس نے رسول خدا دا ترلا ماریا کہ اوہناں نوں اپنا مال اسباب لے کے مدینہ چھڈن دی اجازت دے دتی جاوے۔ ایس سفارش تے رسول خدا نے اوس نوں پچھیا کہ کیہہ تہا نوں ایہہ منظور اے کہ اس مسئلے تے کسے بندے نوں ثالث من لیا جاوے۔ جدوں اوس نے ایہہ تجویز منظور کر لئی تے سرکار نے فرمایا کہ فیر جاؤ تے بنوقریظہ نوں آکھو کہ اپنی مرضی دا ثالث مقرر کر لین، میں وی اوسے نوں تسلیم کر لوں گا۔ ایوں ۲۵ دناں دے محاصرے توں بعد سفارت کاری شروع ہو گئی۔

ایس سفارت کاری دے نتیجے تے بنوقریظہ نے حضرت سعد بن معاذ نوں اپنا ثالث مقرر کر دتا۔ جناب سعد نے اپنے قبیلے اوس، تے جھگڑے دے دُجے فریق جناب رسول خدا نوں وی پچھیا کہ کیہہ اوہناں نوں آپ (سعد) دی ثالثی منظور اے؟ جدوں سب نے آپ دی ثالثی نوں من لیا تے آپ نے ایہہ فیصلہ صادر فرمایا:

الف: بنوقریظہ دے سارے بالغ مرد قتل کر دتے جان۔

ب: سوانیاں تے بچے گرفتار کیتے جان۔

ج: اوہناں دا سارا مال ضبط کر کے مسلماناں وچ تقسیم کر دتا جاوے۔

جناب سعد بن معاذ دا فیصلہ سنن توں بعد رسول خدا نے فرمایا کہ ”خدا دی قسم اے سعد! تہاڈا ایہہ فیصلہ اللہ تے

مسلمانان دی مرضی دے حرف بہ حرف موافق اے۔ مینوں وی وحی دے ذریعے ایہی حکم دتا گیا۔“

ایس فیصلے تے عمل کرن لئی اگلے دن بزار دے وچکار ڈونگے مُدے پٹے گئے۔ مجرماں نوں ٹولیاں وچ لیاندا گیا تے اک اک دی گردن مار کے اوہناں نوں مُدیاں وچ سٹ کے اُتے مٹی پادتی گئی۔ ثالثی فیصلے موجب بالاں تے سوانیاں نوں قید کر لیا گیا۔ کچھ منڈے جہناں دی عمر دا فیصلہ کرن وچ مشکل ہو رہی سی، اوہناں دی جان بخشی کر دتی گئی جو یں کہ رفاہ تے عطیہ قرظی جے منڈے۔ عطیہ قرظی بعد وچ مسلمان ہو گئے تے اپنے قتل توں بچن دیاں گلاں آپوں سناندے رے۔

یہودیاں دے قتل دے ویلے صرف اک یہودی عورت نوں قتل کیتا گیا جہداناں بناتہ سی تے اوہ حکم قرظی دی سوانی سی۔ اوس دا جرم ایہہ سی کہ اوہنے حضرت خلد بن سوید نوں محاصرے دے دناں وچ اُتوں پچکی دا پٹر سٹ کے شہید کر دتا سی۔ حضرت عائشہ جدوں کدرے بنو قریظہ دا ذکر کردیاں سن تے گل سناندیاں ہوندیاں سن کہ بناتہ میرے کول بیٹھی بڑی ہس ہس کے بے فکری نال گلاں کر رہی سی جدوں کہ اوس نوں پتا سی کہ اوہ قتل کر دتی جاوے گی۔ اوس نوں وادج دتی گئی تے اوہ بڑی تسلی نال ہس دی ہس دی گئی تے اوس دی گردن تن توں جدا کر دتی گئی۔

ایس عورت دے ہتھوں جناب خلد بن سوید نوں شہید کران والا بندہ زبیر بن بطاء سی۔ اوہ واجب القتل تے پہلوں وی سی پر جناب خلد دی شہادت توں بعد اوس دا جرم دوہرا ہو گیا سی پر زمانہ جاہلیت دی لڑائی جنگ بعاث وچ اوس نے حضرت ثابت بن قیس دی کوئی مدد کیتی سی۔ ایس احسان دے بدلے دے طور تے جناب ثابت نے رسول خدا اگے سفارش کر کے بڈھے زبیر نوں معافی دوا دتی۔ ثابت اوس یہودی کول آئے، اوس نوں جان بخشی دی خوشخبری سنائی تے زبیر آکھن لگا کہ میرے جہیا بڈھا بند اپنے بال بچیاں توں بغیر زندہ رہ کے کیہہ کرے گا؟ جناب ثابت حضور دی خدمت وچ حاضر ہوئے تے اوس دے بیوی بچیاں نوں وی آزادی دوا دتی۔ ایہہ خبر لے کے جدوں جناب ثابت زبیر کول آئے تے اوہ آکھن لگا کہ مال اسباب تے مسلمان لے گئے، اسیں کویں زندہ رواں گے۔ جناب ثابت فیر حضور دی خدمت وچ حاضر ہوئے تے حضور نے اوہناں دی سفارش تے زبیر دا مال اسباب وی واپس کرا دتا۔ ایہہ خوشخبری لے کے جدوں ثابت اوس کول آئے تے اُس نے واری واری بنو قریظہ دے سردار کعب بن اسید، نصیری سردار حنی بن اخطب تے عزال بن سموال دا پچھیا۔ جدوں اوس نوں دسیا گیا کہ اوہ سارے قتل کر دتے گئے نیں تے آکھن لگا کہ ”ثابت! میرے احسان دا بدلہ ایہہ دے دے کہ مینوں چھیتی نال اوہناں کول اپڑا دے۔“ ایوں بڈھے احسان فراموش یہودی نے دھکے نال کفر تے اپنی حیاتی دا خاتمہ کر لیا۔ فیروہی حضرت ثابت نے اوس دے پتر عبدالرحمن نوں قتل ہون توں بچا لیا۔ ایہہ اوہی عبدالرحمان نیں جیہڑے بعد وچ مسلمان ہو کے حضرت عبدالرحمان بن زبیر دے نام نال پچھانے گئے تے جلیل القدر صحابی بنے۔

سیرت حلبیہ جلد چہارم صفحہ: ۴۱۲

الریق المختوم از صفی الرحمن مبارک پوری صفحہ: ۳۳۱

بنو قریظہ نال سلوک دا جواز:

۱۔ بنو قریظہ نے مسلماناں دی حیاتی دے سب توں اوکھے ویلے مسلماناں نال بد عہدی تے غداری کر کے اوہناں نوں دنیا توں ایوں مٹا دینا چاہیا جو یس کسے غلط لکھے گئے اکھرنوں مٹایا جاندا اے۔ جے بنو قریظہ نوں ذرا وی موقع مل جاندا یاں مسلمان سوانیاں دے قلعے دی کندھ نال یہودی جاسوس حضرت صفیہ دے ہتھوں قتل نہ ہو جاندا تے فیر حئی بن اخطب اوہ کجھ کر جاندا جیہڑی اُحد وچ دی نہیں ہوئی سی۔ ایس خوفناک غداری دی سزا دنیا دے کسے وی مذہب، معاشرے، قوم ملک یا آئین وچ موت توں گھٹ نہیں۔

۲۔ یہودیاں نے اپنی مرضی دا ثالث مقرر کیتا، اوہ ثالث (حضرت سعد بن معاذ) چوکی تکلیف تے اذیت برداشت کر کے مدینے وچ قائم رفیدہ ؓ دے اپریشن تھیر توں اُٹھ کے موقع تے گئے۔ فیر اوہناں دے فیصلے تے اوس دور، یاں آج دے یہودیاں نوں اعتراض کرن دا کیہہ حق ہو سکدا اے۔ ثالثی دے خلاف تے کوئی اپیل نہیں ہوندی۔

۳۔ قتل یہود دا فیصلہ تورات مقدس دے بلکل مطابق اے۔ ملاحظہ کرو کتاب استثناء، باب ۲۰ دیاں آیتاں ۱۰ تا ۱۴: ”جدوں تسلیس کسے شہر تے حملہ کرن لئی جاؤ تے پہلوں صلح داسنہیا گھلو۔ جے اوہ صلح کر لین تے اپنے پھاٹک تہاڑے لئی کھول دین تے اوہ توں دے باشندے واجلزار بن کے تہاڑی خدمت کرن۔ تے جے اوہ صلح نہ کرن، سگوں لڑنا چاہن تے اوہناں دا محاصرہ کرو۔ تے جدوں تہاڑا خدا اوہناں نوں تہاڑے قبضے وچ کر دیوے تے فیر مرداں نوں قتل کر دینا پر سوانیاں، بچے، جانور تے مال اسباب تیرے لئی مال غنیمت نیں۔“

۴۔ محاصرہ کرن ویلے جدوں پہلا جتھا حضرت علی دی قیادت وچ بنو قریظہ دی گڑھی وچ اپڑیا تے اوہناں داروہ لڑا کیاں والا سا۔ اوہناں رسول خدا تے جناب علی نوں گالاں بکیاں جہدے توں پتا چلدا اے کہ اوہناں نوں نہ تے اپنے پہلے رویے تے کوئی شرم محسوس ہوئی تے نہ ای اگوں اوہ بندے دے پتر بن دے موڈ وچ سن۔

۵۔ اوہناں دے برادر قبیلے بنو نضیر نوں مدینے توں باہر اپنی مرضی دی حیاتی گزارن دا موقع دتا گیا پر اوہناں دے سردار حئی بن اخطب، تے دُجے بندیاں نے اوہ فتور مچایا کہ پورے عرب نوں جنگ دی آگ وچ ولیٹ دتا۔ بنو قریظہ مدینے دے اندر رہ کے مسلماناں نوں دنیا توں ختم کر دین دیاں سازشاں کرن توں باز نہ آئے، باہر جا کے اوہ کیہہ کجھ نہ کر دے۔ اوہناں دا قتل ای امن دی ضمانت سی۔

۶۔ مسلمان مفسر، محدث تے سیرت نگار آکھدے نیں کہ سورہ احزاب دیاں آیتاں ۲۶ تے ۲۷ دی شان نزول قریظہ دا واقعہ ای ہے۔ ایہدے وچ رب نے کدرے اپنی ناراضی دا اظہار نہیں کیتا سگوں رسول خدا نے جناب سعد دے فیصلے دے وقت ای فرمادتا سی کہ رب دا فیصلہ ایہی سی جیہڑا سعد دا اے۔

عہد مدینے دی اک مشہور جراح بی بی

﴿وَأَنْزَلَ الَّذِينَ ظَاهَرُوهُمْ مِنْ أَهْلِ الْكِتَابِ مِنْ صَيَاصِيهِمْ وَقَذَفَ فِي قُلُوبِهِمُ الرُّعْبَ
فَرِيقًا تَقْتُلُونَ وَتَأْسِرُونَ فَرِيقًا وَأَوْرَثَكُمْ أَرْضَهُمْ وَدِيَارَهُمْ وَأَمْوَالَهُمْ وَأَرْضًا لَمْ تَطْلُوهَا
وَكَانَ اللَّهُ عَلَى كُلِّ شَيْءٍ قَدِيرًا ۝﴾ (الاحزاب: ۲۶، ۲۷)

”تے جیہڑے اہل کتاب نے اوہناں دی مدد کیتی سی اللہ نے اوہناں نوں اوہناں دے قلعیوں توں تھلے لاہ دتا
تے اوہناں دے دلاں وچ تہاڈا رعب بٹھا دتا۔ فیر اک ٹولے نوں تسیں قتل کرن لگ پے تے اک ٹولے نوں
قید۔ اللہ نے تہاں نوں اوہناں دی زمین، گھراں تے مالاں دا مالک بنا دتا تے اوس زمین دا وی جہدے تے
تسیں ابے تیکر قدم نہیں سی رکھیا۔ تے اللہ تے ہر چیز اُتے پوری قدرت رکھدا اے۔“
اُپر دیاں آیتاں دا تعلق ایس واقع نال ایس پاروں وی یقینی لگدا اے کہ ایہہ آیتاں سورہ احزاب دیاں نیں تے
نالے ایس توں پہلی (۲۵ ویں) آیت دی ایسے واقعے ول اشارہ کردی اے۔
۷۔ اوس دُور دے جنگی قانون ایس سلوک دی اجازت دیندے سن۔
دُجا پاسا:

ایس گل تے بھوراوی شبہ نہیں کہ بنو قریظہ نال جیہڑا سلوک ہو یا اوہ اُس سلوک دے مستحق سن۔ پروکھنا ایہہ ہے کہ
ایہہ سلوک ہو یا وی کہ نہیں! آؤ ذرا اوہناں پاسیاں تے جھاتی پائیے جہدے توں پتا لگدا اے کہ بنو قریظہ نوں ایڈی سخت سزا
نہیں ملی، جی دسی جاندی اے قرآن آکھدا اے:

﴿فَرِيقًا تَقْتُلُونَ وَتَأْسِرُونَ فَرِيقًا﴾ (الاحزاب: ۲۶)
”اک فریق نوں قتل کرن لگ پے تے اک فریق نوں قید۔“

فریق دا لفظ اک ای قسم دے لوکاں لئی ورتیا جاند اے یعنی اک قوم، اک جماعت، اک قافلہ یاں اک فوج دے دو
وکھو کھٹولیاں نوں تے ”فریق“ آکھیا جاسکدا اے پر ایہہ نہیں ہوندا کہ کسے اک جماعت دے مرداں نوں اک فریق آکھیا
جائے تے عورتاں نوں دُجا فریق۔ فیر ایہہ ہے کہ قرآن دے رستے وچ ایوں آکھن وچ کیہہ رکاوٹ سی کہ تسیں مرداں نوں
قتل کرن لگ پے تے عورتاں نوں قید؟ ایوں جا پدا اے کہ بنو قریظہ دے کجھ مرداں نوں قتل کیتا گیا تے کجھ نوں قید کیتا گیا،
جیہڑے یاں تے مسلمان ہو گئے تے یاں غلام بن کے وک گئے۔

۲۔ روایت ایہہ ہے کہ جنگی قیدی سعد بن زید انصاری دے ہتھ نجد ول وچن لئی بھیج دتے گئے تاں جے اوہناں دے
بدلے گھوڑے تے ہتھیار وغیرہ خریدے جاسکے (سیرت حلبیہ، چوتھی جلد صفحہ: ۴۱۸) دُجی روایت موجب جنگی قیدی
سعد بن عبادہ دی سربراہی وچ شام بھیجے گئے (امتناع الاسماع جلد اول صفحہ: ۹۷) گھوہ جوگ گل اے کہ پہلی روایت
وچ قیدی لے جان والے بندے ابن زید نیں تے دُجی روایت موجب ابن عبادہ۔ پہلی روایت موجب قیدی نجد ول
بھیجے گئے تے دُجی موجب شام ول۔ صحیح گل دا پتا نہیں لگ سکیا۔

۳۔ سیرت نگاراں دا ایس گل تے اتفاق اے کہ رسول خدا نے حکم دتا کہ ”ماں تے اوس دے بچیاں نوں اوہدوں تیکر

و کھرانہ کیتا جاوے جدوں تیکر اوہ بالغ نہ ہو جان۔ جس طرحاں ہر بچے دی کوئی ماں ہوندی اے بنوقریظہ دے بالاں دیاں وی کوئی مانواں ہون گئیاں۔ جدوں اوہ نجدیاں شام ول وکن لئی گئے تے کوں وک گئے؟ کیہہ مسلماناں نے خریداراں نوں وی ایس اصول دا پابند کر دتا سی تے کیہہ خریداراں ایس اصول دے پابند ہوسکدے سن؟ گل کجھ ہور جاپدی اے۔

۴۔ روایت ایہہ ہے کہ باندیاں نوں حضرت عثمان غنی تے حضرت عبدالرحمان بن عوف نے خرید لیا۔ حضرت عثمان نے وڈھیریاں سوانیاں خرید لئیاں تے حضرت عبدالرحمان نے ٹیاراں (سیرت حلبیہ چوتھی جلد صفحہ: ۴۱۸) فیر مدینے توں باہر کیہڑیاں باندیاں و پچیاں گئیاں؟

۵۔ ارشاد ربانی اے:

﴿وَقَاتِلُوا فِي سَبِيلِ اللَّهِ الَّذِينَ يُقَاتِلُونَكُمْ وَلَا تَعْتَدُوا إِنَّ اللَّهَ لَا يُحِبُّ الْمُعْتَدِينَ﴾

(البقرہ: ۱۹۰)

”تے اللہ دی راہ تے جنگ کرو اوہناں لوکاں نال جیہڑے تہاڈے نال لڑدے نیں تے زیادتی نہ کرو۔ اللہ واقعی حد پٹن والیاں نوں پسند نہیں کردا۔“

ایس آیت کریمہ نوں پڑھن توں بعد ایہہ سوال ذہن وچ آؤندا اے کہ ایس واقعے نوں محفوظ کر دیاں راویاں کولوں کدرے کوئی غلطی تے نہیں ہوئی۔ (جویں کہ جناب رسول خدا دی ترجیح پیدائش، جناب عائشہ صدیقہ دی عمر مبارک تے جناب زینب بنت جحش نال عقد دے معاملیاں وچ غلطیاں ہوئیاں نیں)

۶۔ کجھ غیر جانبدار مستشرقین وی ایہہ گل سوچ رہے نیں کہ محمد جے امن پسند لیڈر جس نے اُحد دے موقعے تے ابودجانہ دی ٹور وکھ کے ایہہ کہہ دتا کہ ایوں دی چال اللہ نوں پسند نہیں جہدے وچ تکبر ہووے، تے جے فتح مکہ دے موقعے تے ہندجی عورت نوں معاف کر دتا، بنوقریظہ دے معاملے وچ اوس لیڈر دے کردار نوں کدرے توڑ مروڑ تے نہیں دتا گیا۔ جویں کہ مارٹن فارورڈ دی کتاب ’محمد‘ اے شارٹ بائیوگرافی وچ آکھیا گیا اے ﴿﴾

ابولبابہ دی توبہ:

جدوں مسلماناں نے اپنے زور اور محاصرے نال بنوقریظہ نوں ڈرا دتا سی تے اوہناں بارگاہ رسالت وچ ایہہ بینتی کیتی سی کہ ابولبابہ بن منذرنوں اوہناں کول بھجیا جاوے، تاں جے اوہناں نال کجھ صلاح مشورا کیتا جاوے۔ سرکار نے ابولبابہ نوں اجازت دے دتی سی۔ قریظہ نے جدوں ابولبابہ نوں پچھیا کہ دوساں اپنے معاملے وچ محمد نوں اپنا حکم من لوئے؟ زبان توں تے آپ نے اوہناں نوں ”ہاں“ کہہ دتی پر نال ای ایوں دا اشارہ کر دتا کہ اوہ تہاں قتل کر دین گے۔ یہودیوں نوں تے پتا نہیں ایس اشارے توں کجھ سمجھ لگی یاں نہیں پر ابولبابہ آکھدے نیں کہ مینوں ضرور میرے ضمیر نے جھٹکے دینے شروع کر دتے کہ ایوں دا اشارہ کر کے میں اللہ تے اوس دے رسول نال خیانت کیتی اے۔ آپ بنوقریظہ دی گڑھی

وچوں نکل کے سدھے مسجد نبوی گئے تے مسیت دے اک ستون نال اپنے آپ نوں بنھ لیا۔ تے آکھن لگے کہ میرے کولوں جیڑا گناہ ہو گیا اے، جناں چیر اللہ نے اوہ معاف نہ کردتا، میں ایتھوں نہیں جانا۔ جدوں رسول خدا نے ایہہ محسوس کیا کہ ابولبابہ نے واپس پرتن وچ دیر کردتی اے تے آپ نے صحابہ نوں اوہناں بارے پچھیا۔ صحابہ نے ساری گل سنا دتی تے رسول خدا نے فرمایا کہ غلطی کرن توں بعد سدھا میرے کول ای آجاندا تے میں اللہ کولوں اوہدے واسطے مغفرت طلب کردا۔ ہن جے اوہ ایس پاسے لگ گیا اے تے میں اوس نوں ستون نالوں نہیں کھولاں گا جدوں تیکر کہ اللہ تعالیٰ اوس دی توبہ قبول نہیں کرلیندے۔

جناب ابولبابہ ۶ دن اوسے ستون نال بجے رہے۔ جدوں نماز دا ویلا ہونداتے اوہناں دی گھر والی جاندی تے اوہناں نوں کھول دیندی۔ نماز پڑھ لیندے تے گھر والی اوہناں نوں اوٹھے ای بنھ کے واپس آ جاندی۔ اک رات سرکارِ دو عالم حضرت اُم سلمہ دے گھر تشریف فرما سن۔ سرگی دے ویلے جناب اُم سلمہ نے دیکھیا کہ حضور مسکرا رہے نیں۔

”سرکار کوئی خاص گل لگدی اے؟“ سیدہ اُم سلمہ نے پچھیا۔

”ہاں اُم سلمہ! اللہ نے ابولبابہ دی توبہ منظور کر لئی اے۔“ سرکار نے جواب دتا

”حضور اجازت ہووے تے میں ایہہ خشمیری ابولبابہ نوں سنا دیواں“ اُم المؤمنین نے پچھیا۔

”جویں تہاڑی مرضی۔“

جناب اُم سلمہ نے اپنے حجرے دے دروازے تے کھلو کے واج دتی۔ ”اے ابولبابہ! ودھائیاں، تہاڑی توبہ اللہ نے قبول کر لئی اے۔“ اُم المؤمنین دی زبان مبارک توں ابولبابہ دی توبہ دی قبولیت دا اُس کے صحابہ کرام ابولبابہ نوں ستون نالوں کھولن لئی اگے ودھے۔

”نہ او بھائی میرے نیڑے نہ آیا جے۔“ ابولبابہ نے آکھیا

”کیوں، ہن کیہڑی کسر رہ گئی اے؟“ صحابہ نے پچھیا

”نہ بس مینوں کوئی نہ کھولے۔ جدوں حضور خود تشریف لیان گے تے اپنے مبارک ہتھ نال مینوں کھولن گے۔“

فیر سرکارِ فجر دی نماز لئی تشریف لیائے تے اوہناں اپنے دستِ مبارک نال جناب ابولبابہ نوں کھول کے آزاد فرمایا۔

سعد تیرے بختاں توں واری جاواں:

خندق دے غزوے وچ عاشق رسول جناب سعد بن معاذ نوں اک قریشی حیان بن عرقہ نے تیر مار کے زخمی کر دتا۔ رسول خدا نے آپ دا کچھ علاج معالجہ کیتا پر زخمی ہتھ فیر سچ جانداسی۔ سعد نے محسوس کیتا کہ ہن ایہہ زخم ٹھیک نہیں ہوندا تے اللہ اگے دُعا کیتی کہ یا اللہ بنو قریظہ دے انجام تیکر میری سلامتی ضرور رکھنا۔

رسول خدا جدوں بنو قریظہ دے محاصرے وچ رُجھ گئے تے آپ نے جناب سعد نوں مدینے دی مشہور جراحہ (سرجن) رفیدہ بنت سعد دی نگرانی وچ دے دتا پر رفیدہ دی سیانف وی کم نہ آئی تے سعد ہوراں دی تکلیف ودھدی گئی۔ اُتوں ایہہ ہو گیا کہ بنو قریظہ نے جناب سعد نوں اپنا ثالث بنا لیا۔ رسول خدا نے وی ثالثی لئی جناب سعد تے اتفاق فرمایا۔ ایوں مسجد

نبوی دے نیڑے رفیدہ دے گشتی ہسپتال توں بنو قریظہ دی گڑھی تیکر دا پندھ سعد ہوراں تکلیف وچ اک نچرتے بیٹھ کے کیتا۔ ایس سفر نے یقیناً جناب سعد دی تکلیف نوں ودھایا ہووے گا۔ ثالثی فیصلے توں بعد آپ واپس تشریف لے گئے، زخم چوکھا خراب ہو گیا تے فیر ایہی زخم مدینے دے اک خوبصورت جوان، رسول خدا دے اک بھروسے دے سنگی تے علاقے دے اک طاقت ور سیاسی آدمی نوں لوکا ئی توں ہمیش لئی دکھ کرن دا سبب بن گیا۔

جناب سعد دی میت اوہناں دے گھر لے جائی گئی۔ حضرت حارث بن اوس، اُسید بن حضیر تے سلمہ بن سلامہ جئے انصاری بزرگاں نے آپ نوں غسل دتا۔ آپ دے جنازے نوں موڈھا دین لئی اللہ دے محبوب نال نال رے۔ قبر وچ لاہے گئے تے سرکار قبر دے نال کھلو تے رے۔ قبر وچ اتار دیاں سارای محبوب خدا دے سوہنے مکھڑے دارنگ بدل گیا۔ سرکار نے تن واری سبحان اللہ تے تن واری اللہ اکبر فرمایا۔ صحابہ کرام نے ایڈے جوش نال نعرے مارے کہ جنت البقیع دا کونہ کونہ گونجن لگ پیا۔ نبی رحمت دے اک اک قول تے فعل دے صدقے واری جان والے سوہنے بچناں نے پچھیا کہ یا رسول اللہ! لکدا اے کہ کوئی خاص گل ہوئی اے۔

”ہاں قبر نے سعد نوں گھٹیا سی۔ قبر دے ایس عمل توں جے کوئی بچ سکدا تے سعد ضرور بچ جاندا۔

اللہ نے فیر رحم فرمایا تے ایہہ تنگی دور کر دتی۔“

جیہڑی رات حضرت سعد نے وصال فرمایا، جبرائیل امین پھل دار ریشمی عمامہ بنھ کے بارگاہ رسالت وچ حاضر ہوئے تے پچھیا کہ یا رسول اللہ! آج کیہڑی ہستی چلانا کر گئی اے جہدے لئی آسمان دے دروازے کھول دتے گئے نیں تے رب رحمان دا عرش وی جھوم رہیا ہے؟ فرمایا: ’سعد‘ حضرت ابن عمر توں روایت اے کہ رسول خدا نے فرمایا کہ سعد بن معاذ دی وفات تے ستر ہزار ایچے فرشتے زمین تے اترے جیہڑے آج تیکر زمین تے نہیں آئے سن ﴿﴾

سعد تیرے بختاں توں واری جاواں

ضغطہ قبر:

حضرت ابوسعید خدری فرماندے نیں کہ ”سعد دی قبر کھودن والیاں وچ میں وی شریک ساں۔ ایسں قبر کھودی جاندا ہے ساں تے مشک دی خوشبو آؤندی ری“ ﴿﴾ پر قبر دے بھینچن والا معاملہ اوہناں نال وی ہوئیا۔ اک وار حضرت سعد دی گھر والی نوں سوال کیتا گیا کہ کیہہ اوہناں نوں ایس حوالے نال رسول خدا دا کوئی قول معلوم اے۔ اوہناں نے جواب دتا کہ ایسں سنیا اے کہ رسول خدا نوں ایس بارے پچھیا گیا سی تے آپ نے فرمایا سی کہ پیشاب توں طہارت حاصل کرن وچ اوہ (سعد) کچھ کوتاہی کر جاندا ہے۔

اک وار جناب عائشہ نے سرکارِ دو عالم نوں آکھیا کہ جدوں دا ایس ضغطہ قبر دا سنیا اے، ایوں پریشان جئی آں۔ رسول رحمت نے جواب دتا ”عائشہ! مومن واسطے ضغطہ قبر دی ایہہ حالت ہووے گی جو یں اک شفیق ماں اپنے بچے دے سر

سیرت النبی از ابن کثیر جلد دوم صفحہ: ۱۷۷

سیرت حلبیہ جلد چہارم صفحہ: ۴۱۵

نوں اپنے ہتھال نال دباندى اے، جدوں اوہدے سرنوں پیڑ ہوڑی ہووے۔ تے منکر نکیر دی ضرب ایوں ہووے گی جو یں اکھ وچ سرمہ لایا جاندا اے۔

حضرت ریحانہ:

رسول خدا نے بنو قریظہ دے قیدیاں وچوں اک سوانی ریحانہ بنت عمر واسے لئی منتخب فرمائی۔ جناب ریحانہ دی حیاتی دے اوہ دن جیہڑے آپ نے رسول خدا دے نال گزارے، اوہ کویں گزرے، ایس دی تفصیل امہات المؤمنین دے باب وچ پڑھو۔

سریہ عبداللہ بن عتیک:

جہاں لوکاں مسلماناں نوں دنیا دے صفحے توں مٹان دی کوشش کیتی سی اوہناں وچ اک بد بخت یہودی سلام بن ابو الحقیق وی سی۔ سلام جنگ خندق دے وڈھے سازشی کردار حنی بن اخطب دایارسی تے اوہدے نال رل کے پورے عرب دے قبیلیاں نوں مدینہ منورہ تے حملے دی ترغیب دیندار ہیا۔

جدوں بنو قریظہ اپنے انجام تیکر اپڑ گئے تے رسول خدا نے اوہدے نال دوہتھ کرن لئی جناب عبداللہ بن عتیک انصاری دی سالاری وچ پنج مجاہداں دا اک فوجی دستا خیرول ٹور دتا تے حکم دتا کہ اوہ ابورافع سلام بن ابی الحقیق والا کم کر چھڈن۔ رات ہوئی تے کمپنی کمانڈر عبداللہ نے نال دے چار مجاہداں نوں قلعے دے نیڑے رہن دی ہدایت کیتی تے آپوں یہودی سردار دی سوں لین لئی قلعے دے گیٹ تیکر اپڑ گئے۔ عبداللہ کسے نہ کسے طرحاں قلعے دے اندر وژن وچ کامیاب ہو گئے تے اندر جا کے ڈنگراں دے واڑے وچ لگ گئے۔ جدوں عبداللہ نے ویکھیا کہ سارے بندے گلاں باتاں ختم کرن توں بعد اپنے اپنے کمریاں ول ٹر پے نیں تے آپ ابورافع سلام دا پچھا کر دے ہوئے اوہدے بالا خانے تیکر اپڑ گئے۔ چو کھے ہنیرے دی وجہ توں جناب عبداللہ نوں ایس گل دا پتا نہ لگ سکیا کہ شکار کتھے لما پیا اے۔

”اے سردار، اے ابورافع جی!“ جناب عبداللہ نے واج چاہ ماری۔

”کیہڑا جوان اے ہی، ایس ویلے آجا، اگاں آجا“ اوس نے جواب دتا۔

جناب عبداللہ نوں سلام دے بولن نال اندازا ہو گیا سی کہ اوہ اوس ویلے بالا خانے دے کیہڑے پاسے لما پیا سی۔ آپ نے کھچ کے تلوار دا اہبیا وار کیتا کہ فیر ابورافع سلام بن ابو الحقیق دی واج وی نہ نکل سکی۔

جناب عبداللہ ہولی ہولی پیر پندے خیر خیریت نال قلعے دے گیٹ دے نیڑے اپڑ گئے پر پوڑیاں اُتر دیاں ہنیرے دی وجہ توں بڑی بھیڑی طرحاں ڈگے۔ ایوں رسول خدا دا بھروسہ دایار، دلیر مجاہد تے ہشیار کمانڈر اپنی لت تڑوا بیٹھا۔ ٹی لت دے باوجود چوکھا ای راضی تے ہسدا مسکراںدا سالار عبداللہ بن عتیک جدوں کامیاب فوجی مہم توں بعد مدینے اپڑیا تے مبارکاں ودھائیاں دیاں واجاں تے اپنے کمانڈر انجیف دی شاداش نال ٹی لت دا صدمہ بھل گیا۔

سلام بن ابو الحقیق دے قتل نال خدائے واحد دا نام لین والے توحید پرستوں دے رستے دا اک چوکھا ای وڈھا پتھر چکیا

گیا۔ ایس واقعے نال پورے علاقے وچ مسلماناں دی دھاک بیٹھ گئی تے لوکاں ایہہ گل آکھن لگ پئی کہ ہن مدینے اتے رسول خدا اقدس اقدس توڑ چڑھ گیا اے تے ہن کسے مائی دے لال نوں اکھاں وچ اکھاں پا کے گل کرن دی جرات نہیں ہووے گی، اوہ بھانویں یہودی ہووے یاں منافق۔
پردے دا حکم:

سن ۵ھ وچ جدوں رسول خدا نے حضرت زینب بنت جحش نال عقد فرمایا تے ویسے دے ویلے پردے دا حکم نازل ہوئیا۔ ارشاد ربانی اے:

﴿قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ ذَلِكَ أَزْكَى لَهُمْ إِنَّ اللَّهَ خَبِيرٌ بِمَا يَصْنَعُونَ﴾ وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ وَيَحْفَظْنَ فُرُوجَهُنَّ وَلَا يُبْدِينَ زِينَتَهُنَّ إِلَّا مَا ظَهَرَ مِنْهَا وَلْيَضْرِبْنَ بِخُمُرِهِنَّ عَلَى جُيُوبِهِنَّ وَلَا يُبْدِينَ زِينَتَهُنَّ إِلَّا لِبُعُولَتِهِنَّ أَوْ آبَائِهِنَّ أَوْ آبَاءِ بُعُولَتِهِنَّ أَوْ أَبْنَائِهِنَّ أَوْ أَبْنَاءِ بُعُولَتِهِنَّ أَوْ إِخْوَانِهِنَّ أَوْ بَنِي إِخْوَانِهِنَّ أَوْ نِسَائِهِنَّ أَوْ مَا مَلَكَتْ أَيْمَانُهُنَّ أَوِ التَّابِعِينَ غَيْرِ أُولَى الْأَرْبَةِ مِنَ الرِّجَالِ أَوِ الطِّفْلِ الَّذِينَ لَمْ يَظْهَرُوا عَلَى عَوْرَتِ النِّسَاءِ وَلَا يَضْرِبْنَ بِأَرْجُلِهِنَّ لِيُعْلَمَ مَا يُخْفِينَ مِنْ زِينَتِهِنَّ وَتُوبُوا إِلَى اللَّهِ جَمِيعًا أَيُّهَا الْمُؤْمِنُونَ لَعَلَّكُمْ تُفْلِحُونَ﴾ (النور: ۳۰، ۳۱)

” (اے نبی) مومن مرداں نوں حکم دے دیو کہ اپنیاں نظراں نیویاں رکھن تے اپنیاں شرم گاہواں دی حفاظت کرن، ایہی اوہناں واسطے سٹھرائی اے۔ بنائشک اللہ جان دا اے، جو کجھ لوک کر دے نیں۔ تے مومن عورتاں نوں (وی) حکم دے دیو کہ اوہ وی اپنیاں نظراں نیویاں رکھن تے اپنیاں شرم گاہواں دی حفاظت کرن تے اپنی زینت ظاہر نہ کرن سوائے اوس توں جیہڑی آپوں ظاہر ہو جاوے۔ تے اپنے گلو یاں تے اپنیاں چادراں دی بکل مار لین۔ تے اپنا حسن تے سنگھار نہ ظاہر ہون دین سوائے اپنے خاوندان توں یاں اپنے باپاں توں یا اپنے سوہریاں توں یاں اپنے پتراں توں یا اپنے خاوندان دے پتراں توں یاں اپنے بھراواں توں یاں اپنے بھتیجیاں توں یاں اپنے بھانجیاں توں یاں اپنیاں عورتاں توں یاں اپنے غلاماں توں یاں نال رہن والے اچھے بندیاں توں جیہڑے جنس (مخالف) دی کوئی غرض نہیں رکھدے یاں اچھے منڈے جہاں نوں اچھے عورتاں دیاں گلاں دی سمجھ نہیں۔ تے زمین تے ایوں پیر مار مار کے نہ ٹرن کہ اوہناں دا لکھا ہوئیا سنگھار ظاہر ہو جاوے۔ تے اے ایمان والیو! اللہ اگے توبہ کرو (تے کر دے رو) تاں جے تہاں نوں بھلیائی لکھے۔“

اللہ تعالیٰ نے مسلمان مرداں تے عورتاں نوں جیہڑا سا نجھا حکم دتا اے اوہ غص بصر یعنی نظراں نوں نیویاں رکھن دا تے حفظ فروج یعنی شرم گاہواں دی حفاظت دا اے۔ باقی تاکیداں تے وضاحتاں صرف عورتاں لئی نیں کیوں جے عورت دے پردے نال باقی مسئلے آپوں مک جاندے نیں۔ غص بصر تے غور کریے تے پتا لگدا اے کہ ایس دا مطلب ایہہ نہیں کہ کوئی مسلمان مردیاں سوانی کدے وی اُچی نظر کر کے نہ دیکھے سگوں اصل گل ایہہ ہے کہ اوس چیز توں پرہیز کیتا جاوے جنہوں

حدیث پاک وچ اکھاں دا زنا آکھیا گیا اے۔ ایس حقیقت توں انکار نہیں کیتا جاسکدا کہ جے نیک نیتی نال غص بصر کر لیا جاوے تے حفظ فروج دا کم سوکھا ہو جاندا اے۔

آکھیا جاندا اے کہ جدوں انسان اکھاں کھول کے دنیا تے روے گا تے فیر سب ای چیزاں تے اوس دی نظر پوے گی۔ ایہہ تے نہیں ہو سکدا کہ کوئی مرد کسے سوانی نوں یاں کوئی سوانی کسے مرد نوں کدے ویکھے ای نہ۔ ایس دا جواب صحابی رسول حضرت جریر نے دتا اے۔ آکھدے نیں میں رسول خدا نوں پچھیا جے اپن چیت نظر پے جاوے تے فیر میں کیہہ کراں؟ جواب ملیا ”نظر پھیر لے۔“ کجھ لوک آکھدے نیں کہ رسول خدا نے حضرت علی نوں مخاطب کر کے فرمایا سی کہ اے علی! پہلی نظر تہا نوں معاف اے۔ ایس دا غلط مطلب لیا جاندا اے تے سمجھیا جاندا اے کہ کسے دی سوانی نوں، بھانویں کوئی وجہ وی نہ ہووے، اک نظر ویکھن وچ کوئی ہرج نہیں۔ اس دا جواب اک تے ایہہ ہے کہ اپنے ای ضمیر نوں پچھ لیا جاوے کہ ہرج ہے یاں نہیں تے دوسرے رسول خدا دی ایہہ حدیث چیتے رکھنی چاہیدی اے کہ جیہڑا ابتدا کسے غیر محرم زنانی دے محاسن تے شہوت دی نظر پاوے گا، قیامت والے دن اوہ دیاں اکھاں وچ پتنگھریا ہو یا سیسہ پایا جاوے گا۔

بعض موقعے ایوں دے وی آؤندے نیں کہ غیر محرم زنانی نوں ویکھنا ضروری ہو جاندا اے جویں کہ کسے مریضہ نوں ڈاکٹر ویکھدا اے یاں کوئی عورت کسے مقدمے وچ فریق یاں گواہ دی حیثیت وچ جج دے سامنے پیش ہندی اے یاں کوئی عورت اک وچ گھر گئی ہووے یاں پانی وچ ڈب ری ہووے۔ اوہدی جان یاں عزت نوں خطرا ہوئے تے ایس حالت وچ چہرہ تے دور دی گل ستر ویکھنا وی ضروری ہو جائے تے ویکھیا جاسکدا اے۔ اوس دے جسم نوں ہتھ لایا جاسکدا اے۔ سگوں ڈبدی یاں سڑدی عورت نوں کچھڑ چک کے لیانا وی نہ صرف جائز اے سگوں فرض اے۔ حکم ایہہ ہے کہ اجہی صورت وچ جتھے تیکر ممکن ہووے اپنی نیت نوں پاک رکھو تے جے بندے بشر دے جذبات وچ کجھ تھوڑی بوہت ہلچل ہوندی وی اے تے گناہ دی کوئی گل نہیں، کیوں جے بندا تے بندا ای اے۔ ایہہ ہر چیز تے قادر نہیں ہو سکدا ۱۱ ایوں ای نکاح وغیرہ دے ارادے نال وی عورت نوں ویکھن وچ کوئی برائی نہیں۔

اُم المؤمنین حضرت اُم حبیبہ حرم نبوت وچ:

اُم حبیبہ رسول خدا دے دشمن نمبر اک ابوسفیان تے مکروہ کردار دا مظاہرہ کرن والی سوانی ہندی دھی سن پر اللہ جدوں کسے تے اپنے کرم تے اپنی رحمت دا مینہ پانا چاہوے تے کون ڈک سکدا اے۔ اُم حبیبہ اوہناں بھاگاں والیاں سوانیاں وچوں سن جہاں نے اسلام دے مڈھلے دناں وچ ای اپنے دلاں تے اک اللہ تے اوس دے اخیر رسول دی محبت دارنگ چڑھا لیا۔ جدوں مشرکاں نے مسلماناں نوں تنگ کیتا تے آپ اپنے خاوند عبداللہ بن جحش نال حبشہ ول ہجرت کر گئیاں۔ کچھ چراں بعد عبداللہ مرتد ہو گیا تے فیر اوتھے ای مر گیا۔ اوہدے مرن توں بعد رسول خدا نے نجاشی شاہ حبشہ راہیں اُم حبیبہ نوں نکاح دا سنہیا گھلیا۔ اُم حبیبہ نے خوشی خوشی حضور دی زوجیت وچ آنا پسند کر لیا۔ تے ایوں آپ حبشہ توں مدینے تشریف لے آئیاں (تفصیل امہات المؤمنین دے باب وچ)

اُم سعد دا کھوہ:

حضرت اُم سعد رسول خداؐ دے قریبی ساتھی تے ماہر حرب حضرت سعد بن عبادہ دی ماں نیں۔ آپ اوہ خوش بخت سوانی نیں جہناں نے اوہناں دناں وچ مدینے توں مکے جا کے اسلام قبولیا جدوں مکے دے لوک اسلام قبولن والیاں تے ظلم دے پہاڑ توڑی آؤندے سن۔ رسول خدا اک حربی سفر وچ مدینے توں باہر گئے ہوئے سن تے پچھوں اُم سعد چلانا کر گئیاں۔ جدوں سرکار واپس تشریف لیائے تے حضرت سعد بن عبادہ نال اُم سعد دی قبر تے تشریف لے گئے تے اوہناں واسطے دُعا فرمائی۔

حضرت سعد نے عرض کیتی یا رسول اللہ! میری والدہ بس اچانک ای چلانا کر گئیاں نیں جے اوہناں نوں کجھ مہلت ملدی تے اوہناں ضرور کجھ نہ کجھ صدقہ کرنا سی۔ حکم فرماؤ میں اوہناں ولوں کجھ صدقہ کر دیواں؟

”ہاں صدقہ کرو“ سرکار نے حکم دتا

”حضور! کس صدقے وچ چوکی فضیلت اے؟“

”پانی وچ“ آقا نے جواب دتا۔

ایوں حضرت سعد بن عبادہ نے کھوہ بنوایا تے آکھیا:

﴿هَذِهِ لَأُمِّ سَعْدٍ﴾

”ایہہ کھوہ اُم سعد لئی اے۔“

* * * *

۶ ہجری

تو تاریخ پاسا پلٹدی اے:

۵ھ دے حربی معاملے کچھ ایس طرحاں دے رے کہ لوکائی نے رسول خدا نوں اک سیاسی اکائی مَن لیا۔ ایہدے نال ای عرب دے دور دریڈے دے علاقیاں وچوں ریاست مدینہ وُل وفداں دی آمد شروع ہو گئی۔ ایس لڑی دا پہلا وفد قبیلہ مزینہ داسی۔ وفد وچ دس (۱۰) بندے شامل سن تے اوہناں دا سردار خزاعی بن عبد فہم سی۔ اوہناں نے اپنی قوم ولوں رسول خدا دی بیعت فرمائی۔ بیعت توں بعد حضور نے اوہناں نوں اپنی قوم ول واپس پرتن دی ہدایت فرمائی تے اوہناں نوں مہاجر اں دے برابر قرار دتا۔ وفد واپس پرتیا تے قوم نے خزاعی دی گل دی پرواہ نہ کیتی۔ حضور نوں پتا لگاتے آپ نے حضرت حسان بن ثابت نوں شاعری دا حربہ ورتن دی ہدایت کیتی۔ حضرت حسان دا شعری سنیہا جدوں قبیلہ مزینہ کول اپڑیا تے جناب خزاعی نے اک وار غیر قوم نوں اسلام دی دعوت دتی۔ فیراوہ سارے مسلمان ہو گئے تے وفد بن کے رسول خدا دی خدمت وچ حاضر ہوئے۔

فتح مکہ دے دن قبیلہ مزینہ دا جھنڈا رسول خدا نے جناب خزاعی نوں عطا کیتا۔ اوس دن اوہناں دی تعداد اک ہزار

سی۔

سریہ محمد بن مسلمہ الاسہلی (بنو بکر ول)

قرطاج دے اک قبیلے عامر بن صعصعہ دی اک شاخ سی جیہڑی حرمین دے چڑھدے پاسے آباد سی تے اوہناں دی گڑھی دا نام سریہ سی۔ حضور نوں دس پئی کہ اوہ لوک مدینے تے حملہ کرنا چاہندے نیں۔ ایس خطرے موجب ۱۰ محرم ۶ھ نوں حضرت محمد بن مسلمہ دی کمان وچ ۳۰ مجاہداں دا اک دستا اوہناں ول ٹور دتا گیا۔ مسلمان مجاہداں نے اچن چیت اوہناں تے حملہ کر دتا۔ اوہناں دے چوکھے بندے بچ نِس گئے پر کچھ مارے وی گئے۔ کوئی ڈیڑھ سواوٹھ تے تن ہزار بکریاں مسلماناں دے ہتھے چڑھیاں جہاں نوں مسلمان ویڑھ کے مدینے لے آئے۔ مسلمان مجاہداں نے واپسی تے اک دُجے قبیلے دے سردار نوں قید کر لیا ندا جیہڑا اوہدوں عمرے دی نیت نال مکے جا رہیا سی۔ مدینے اپڑے تے سرکار دو عالم نے دسیا کہ جس بندے نوں جنگی قیدی بنا لیاے جے اوہ بنو حنیفہ دا سردار ثمامہ بن اثال اے۔ حضور نے اوہدے نال چنگے ورتاوے دی ہدایت فرمائی تے اپنے گھروں وی اوہدے لئی ددھ گھل دے رے۔ حضور اوس نوں اسلام دی دعوت وی دیندے رے۔ ثمامہ تے جدوں اللہ دا کرم ہو گیا تے اوس نے اسلام قبول کر لیا تے فیر حالت ایمان وچ ای عمرہ ادا کیتا۔

طبقات ابن سعد جلد اول صفحہ ۴۰۶۔ پیر کرم شاہ ازہری تے تاریخ احمیس دے حوالے نال وفد دے سربراہ دا ناں بلال بن حارث دسیا اے (جلد چہارم صفحہ ۹۶)۔

مکے والیاں نوں شامہ دے مسلمان ہو جان دا پتا لگ چکیا سی ایس لئی مکے اپڑن تے اوہناں نے شامہ نال بدتمیزی شروع کر دتی۔ آپ جدوں اپنے وطن یمامہ آئے تے مکے ول گندم دی برآمد روک دتی۔ ایس فیصلے نال مکے والیاں تے اک وڈھی مصیبت آئی۔ رحمت اللعالمین نبی کولوں مکے والیاں دی بھک تے تکلیف نہ جری گئی۔ آپ a نے حضرت شامہ نوں لکھ گھلیا کہ مکے ول گندم کھلن تے پابندی دا حکم واپس لیا جاوے۔ حضرت شامہ نے حکم دی تعمیل فرمائی تے مکے والیاں نوں روٹی کھان نوں لکھی۔

سریہ محمد بن مسلمہ (بنو ثعلبہ ول):

مدینے توں ۴۰ کلومیٹر دور بنو ثعلبہ دا اک علاقہ ذوالقصبہ اکھوانداسی۔ حضور نوں ایہہ خبر ملی کہ او تھے ثعلبہ دے آدمی مدینے تے حملے لئی اکٹھے ہو رہے نیں۔ حضور نے ربیع الاول ۶ھ وچ ۱۰۰ صحابیوں دا اک فوجی جتھا جناب محمد بن مسلمہ دی سالاری وچ ذوالقصبہ ول ٹور دتا۔ او تھے سو آدمی اکٹھے ہو گئے تے اوہناں نے سارے مسلمان مجاہداں نوں شہید کر دتا، صرف محمد بن مسلمہ بچ کے نکل سکے۔ حضور نے چالی (۴۰) مجاہداں دے اک دُجے جتھے نوں حضرت ابو عبیدہ بن جراح دی قیادت وچ کوچ کرن دا حکم دتا پر اوہ لوگ بھیج نس گئے۔ کجھ دناں بعد ثعلبہ دے کجھ بندے اُٹھ چراندے چراندے مدینے دے نیڑے اک چراگاہ تیکر آ گئے۔ حضور نے فیر حضرت ابو عبیدہ نوں چالی (۴۰) مجاہداں نال ٹوریا۔ بنو ثعلبہ دے بندے مدنی لشکرنوں ویکھ کے دُڑکی لا گئے پر مال ڈنگر کچھے چھڈ گئے۔ ابو عبیدہ اوہناں نوں ویڑھ کے مدینے لے آئے۔

غزوہ بنو لحيان:

بنو لحيان اوہی بد بخت لوگ نیں جیہڑے ۱۰ مسلماناں نوں دھوکے نال اپنے علاقے وچ لے گئے سن تے فیر او تھے اوہناں نوں شہید کر دتا سی۔ صرف دو مسلمان زید بن دشنہ تے خبیب بن عدی زندہ بچے۔ بنو لحيان نے اوہناں نوں مکے لے جا کے مشرکاں اگے وتیج دتا جنہاں نے آپ دوواں نوں شہید کر دتا۔ رسول خدا نوں بنو لحيان دے ایس دھوکے تے اپنے سبھاں دی شہادت دا بڑا منکھ رہیا پر حالات اوہناں کولوں بدلہ لین دی اجازت نہیں دے رہے سن۔ ہن جدوں حضور نے ویکھیا کہ موذی سپاں نے اپنے منہ رڈاں دے اندر واڑ لے نیں تے آپ نے محسوس کیتا کہ ہن رجب دے شہیداں دا بدلا لین دا ویلا آ گیا اے۔

ربیع الاول ۶ھ وچ حضور نے حضرت ابن اُم مکتوم نوں مدینے وچ اپنا جانشین بنایا تے دوسو مجاہداں دا اک دستہ لے کے ظالماں تے یلغار کرن لئی نکل آئے۔ آپ نے صحابہ دی شہادت والی تھان تے جا کے اوہناں لئی دُعا فرمائی۔ بنو لحيان نوں آپ دی آمد دی خبر ہو گئی سی ایس لئی اوہ پہاڑ دیاں ٹیسیاں تے جا چڑھے۔ آپ دو دن او تھے رہے پر بنو لحيان دا کوئی بندا قابو نہ آیا۔ اوس توں بعد آپ عسفان ول چلے گئے۔ فیر دس (۱۰) جوان کراغ الغمیم ول ٹورے تاں بے قریش نوں وی آپ دی آمد دی خبر ہو جاوے۔ چوداں (۱۴) دن مدینے توں باہر گزار کے آپ خیر خیریت نال واپس دارا الخلافہ وچ تشریف لے آئے۔

سر یہ غمر:

ربیع الاول ۶ھ وچ ای حضورؐ توں ایہہ اطلاع ملی کہ نجد دا اک قبیلہ اسد کوئی بھیڑیاں صلاحواں پیا کر دا اے۔ حضورؐ نے حضرت عکاشہ بن محسن الاسدی دی سالاری وچ ۴۰ مجاہداں دا اک جتھا اوہناں نوں راہے پان لئی، اوہناں ول ٹور دتا۔ جدوں ایہہ جتھا اسد دے علاقے وچ چشمہ غمر تے اپڑیا تے اوہ لوگ تتر بتر ہو گئے۔ ایوں لڑائی دی نوبت نہ آئی۔

سر یہ جموم:

جموم، مَر الظہر ان دی تھاں تے اک چشمہ دا نام سی۔ ایس تھاں نوں ہن وادی فاطمہ آکھدے نیں۔ ربیع الثانی ۶ھ وچ رسول خداؐ نوں خبر ملی سی کہ اوہ بنو سلیم کے شرارت لئی اکٹھے ہو رہے نیں۔ آپؐ نے حضرت زید بن حارثہ نوں کجھ مجاہد دتے تاں جے اوہ بنو سلیم نوں سبق سکھان۔ حضرت زید کجھ قیدی تے کجھ مال غنیمت لے کے واپس پرت آئے۔

عمیس دی مہم:

سر یہ جموم توں کجھ ای دناں بعد جمادی الاول ۶ھ وچ حضرت زید بن حارثہ دی قیادت وچ ۱۷۰ سواراں دا اک جتھا عمیس ول ٹوریا گیا۔ اس مہم وچ قریش دے اک تجارتی قافلے دا مال ہتھ آیا جیہڑا رسول اللہؐ دے داماد ابوالعاص دی قیادت وچ مکہ واپس پرت رہیا سی۔ ابوالعاص اوہدوں تیکر مسلمان نہیں ہوئے سن۔ اوہ دوڑ کے مدینے اپڑ گئے تے حضرت زید بن حارثہ رسول اللہؐ (یعنی اپنی بیوی) دی پناہ لے لئی۔ حضرت زید دی سفارش تے رسول خداؐ نے سارا مال واپس کرا دتا تے ابوالعاص نوں وی مکہ پرتن دی ازادی دے دتی۔ ابوالعاص سارا مال لے کے مکہ اپڑ گئے پر جہدا جہدا مال ہے سی، اوس نوں پرتا کے آپوں مدینے آ گئے تے آ کے مسلمان ہو گئے۔

غزوہ ذی قرد:

عیینہ بن حصین مزاری جنگ خندق وچ مسلماناں دے ہتھوں رسوا ہو چکیا سی۔ ہن اوہ میدان جنگ وچ تے مقابلے دی ہمت نہیں کر سکدا سی ایس لئی اوس نے مسلماناں توں بدلا لین لئی ڈاکہ زنی ورگے گھٹیا حربے شروع کر دتے۔ جمادی الاول ۶ھ وچ اوس نے مدینے دی چراگاہ غابہ تے ڈاکہ ماریا۔ اوس نے چھیڑو نوں قتل کر دتا، اوس دی سوانی نوں لوٹدی بنالیا تے ۲۰ اونٹنیاں ہک کے لے گیا۔ ایس واقعے دی اطلاع سب توں پہلوں حضرت سلمہ بن عمرو بن الاکوع نوں ہوئی۔ آپؐ نے ابن حصین دے ٹولے دا پچھا کیتا تے اوہناں تے تیراں دا مینہ پا دتا۔ جدوں رسول خداؐ نوں ایس حادثے دی خبر ملی تے آپؐ نے حضرت سعد بن زید نوں اک فوجی دستے دا قائد بنایا تے اوس نوں دشمن دے کچھ لا دتا۔ حضرت سعد دے مجاہداں نے عیینہ بن حصین دے پتر حبیب نوں قتل کر دتا تے اپنیاں اونٹنیاں اوہدے توں کھوہ لئیاں۔ رسول خداؐ وی اک فوجی دستے نال مگر جالے پر اوہنے چیر نوں حضرت سعد دے جتھے دے اک مجاہد ابوقادہ میدان جت چکے سن۔ کجھ چراں پچھوں قید ہون والی غفاری سوانی وی مشرکاں دے قید خانے وچوں فرار ہو کے مدینے اپڑ گئی۔

طرف دی مہم:

مدینے دے چڑھدے پاس ۳۶ میل دے پندھ تے طرف نام دا اک چشماسی۔ جمادی الثانی ۶ھ وچ مدینے ایہہ خبر اپڑی کہ بنو نضله دے کچھ بندے مدینے تے حملے لئی اکٹھے ہو رہے نیں۔ حضور نے ۱۵ مجاہداں دا اک فوجی جتھا حضرت زین بن حارث دی قیادت وچ طرف ول ٹور دتا پر کوئی بندہ مقابلے لئی نہ آیا۔

سریہ فدک:

مدینے دے شمال ول کوئی ۱۲۰ میل دے پندھ تے، خیبر تے وادی القریٰ دے وچکار اک مشہور آبادی فدک اکھواندی سی۔ پر او تھے بنو سعد بن بکر دا قبیلہ وی آباد سی۔ حضور نوں ایہہ خبر ملی کہ ایس قبیلے دے لوکی خیبر دے یہودیوں نوں مدینے تے حملے دا نہ صرف مشورہ دے رہے نیں سگوں اوہناں دی فوجی مدد دا وعدہ وی کر چکے نیں۔ نبی اکرمؐ نے ایس فتنے تے قابو پان لئی شعبان ۶ھ وچ سیدنا علی المرتضیٰ دی سلاری وچ ۳۰ مجاہداں دے اک لشکر نوں فدک ول کوچ کرن دا حکم دتا۔ شیر خدا دے لشکر نے خیبر تے فدک دے وچکار بیچ نامی اک چشمے تے جا کے ڈیرے لالے۔ او تھے بنو سعد بن بکر نال جوڑ پیا پر چھیتی ای اوہ کنڈ وکھا کے نس گئے۔ اسلامی لشکر نوں دو ہزار بکریاں تے کئی سواوٹھ مال غنیمت دے طور تے لہے۔

سریہ دُومۃ الجندل:

شعبان ۶ھ دی گل اے اک دیہاڑے رسول خدا مسجد وچ تشریف فرما سن۔ حضرت ابو بکر صدیق، حضرت عمر فاروق، سیدنا عثمان ذوالنورین، شیر خدا علی المرتضیٰ، حضرت عبداللہ بن عمر، حضرت عبداللہ بن مسعود، حضرت معاذ بن جبل تے حضرت عبدالرحمان بن عوف ورگیاں عظیم الشان ہستیاں وی آقا دی خدمت وچ حاضر سن۔ او تھے اک نوجوان انصاری حاضر خدمت ہوئیا تے سلام کر کے بیٹھ گیا۔ فی عرض کیتی سو ”یا رسول اللہ! سب توں چنگا مسلمان کیہڑا اے؟“

ارشاد فرمایا: جہدا اخلاق چنگا ہووے۔

کیہڑا مسلمان چوکھا سیانا تے عقل وندا اے؟ اوس نے سوال کیتا۔

ارشاد ہوئیا: جیہڑا سب توں چوکھا موت نوں یاد کردا ہووے تے موت آؤن توں پہلوں موت دی سب توں چوکھی تیاری کردا ہووے۔ بس اوہی چوکھا سیانا تے عقل وندا اے۔

حکیم اعظم دی حکمت تے دانائی دی گل سن کے انصاری نوجوان تے نموش ہو گیا پر آپؐ نے حکمت دیاں گلاں جاری رکھیاں تے فرمایا کہ بیچ گلاں توں بچے رہنا تاں بے تسلیں اللہ دے عذاب توں بچے رہو۔ چیتے رکھو:

۱۔ جس قوم وچ بے حیائی عام ہو جاوے اللہ اوس تے طاعون تے ایہدے ورگیاں اچھیاں بیماریاں نازل کر دیندا اے جیہڑیاں پہلوں ظاہر نہ ہونیاں ہوں۔ (جویں کہ آج کل ایڈز)

۲۔ جیہڑی قوم ناپ تول وچ فرق پاندی اے، اللہ اوس نوں قحط سالی تے مصیبتاں وچ پادیندا اے۔

۳۔ جیہڑی قوم اپنے مال دی زکوٰۃ نہیں دیندی اوہناں توں بارش روک لئی جاندی اے۔ جے بے زبان جنور نہ ہوں تے

حضرت سلمان منصور پوری نے تعداد تن سو لکھی اے۔

اوہناں نوں پانی دا اک تہکا وی نصیب نہ ہووے۔

۴۔ جیہڑی قوم عہد شکن ہو جاندی اے (کیتے گئے کاریاں دا دھیان نہیں رکھدی) اللہ تعالیٰ اوہناں تے اوہناں دے دشمنان نوں مسلط کر دیندا اے۔

۵۔ جدوں فیصلے کردیاں کتاب اللہ ول کنڈ کر لئی جاوے، اوہدوں اللہ اس قوم دی وحدت نوں پارہ پارہ کر دیندا اے تے اوہ اک دجے تے ای ظلم کرن لگ پیندے نیں۔

ایس توں بعد رسول رحمت حضرت عبدالرحمن بن عوف نال مخاطب ہوئے تے فرمایا کہ عبدالرحمن! میں آج یاں کل تینوں اک مہم تے بسیجنگا ہاں، تیاری کر لے۔ اگلے روز جناب عبدالرحمان نوں اپنے کول بٹھایا، اپنے دست مبارک نال اوہناں دا کالا عمامہ ٹھیک کر کے، نبھیا۔ تھلے والا شملہ چار کو انگلاں موہڈیاں دے وچکار لٹکا دتا تے فرمایا اے ابن عوف! عمامہ ایوں ای سوہنا لگدا اے۔ فیر سیدنا بلال نوں حکم دتا کہ عبدالرحمن نوں اک جھنڈا پھڑادیو۔ فیر اللہ عزوجل دی حمد و ثنا کہیتی، درود شریف پڑھیا تے حضرت عبدالرحمان نوں مخاطب ہو کے فرمایا کہ اللہ دی راہ تے جہاد لئی نکل جاؤ تے دومتہ الجندل جا کے قبیلہ بنو کلب نوں اسلام دی دعوت دیو۔ تے جے بنو کلب دے عیسائی مسلمان ہو جاوے تے رکیں قبیلہ اپنی دھی تہاڈے نکاح وچ دیوے تے اوس نال نکاح کر لینا۔

۰۰ مجاہداں دی سالاری دی ذمہ داری نبھاندیاں جناب عبدالرحمان بن عوف، اللہ دی نصرت تے اپنے آقا دیاں دعاواں لیندیاں دومتہ الجندل اپڑ گئے تے تبلیغ واکم شروع کر دتا۔ پہلے دو دیہاڑے تے اوہناں لوکاں تے کوئی اثر نہ ہوئیا سگوں بنو کلب نے تلواراں تیز کر نیاں شروع کر دتیاں پر تیسرے دن رحمت خداوندی جوش وچ آئی تے دومتہ الجندل دے رئیس اصح بن عمرو نے اسلام قبول کر لیا۔ اوس توں بعد اسلام قبول کرن والیاں دا اتنا بھج گیا تے سوائے چند عیسائیاں توں ساریاں نے اسلام قبول کر لیا۔ سرکار دو عالم دی پیش گوئی دے مطابق جناب اصح دی دھی ثماضر جناب عبدالرحمن دے نکاح وچ آئی۔ تماضر دی نیک بختی اوس نوں مدینے لے آئی۔ اوہناں دے لطن وچوں عبداللہ نام دے اک پتر نے جنم لیا۔ عبداللہ تواریخ اسلام وچ ابوسلمہ بن عبدالرحمان دے نام نال مشہور ہوئے۔ آپ حافظ قرآن، وڈھے محدث تے چوٹی دے عالم سن۔ جناب ابوسلمہ دی وفات ۹۴ھ وچ ہوئی۔

سریہ اُمِ قُرفہ:

اُم قُرفہ حجاز دی اک مشہور وڈیری سوانی سی۔ اوس دا اصل ناں فاطمہ بنت ربیعہ سی تے اوہ ربیعہ بن بدر فزاری دی دھی سی۔ اپنے ڈھیر سارے پتراں تے پوتریاں، تلواراں دی وڈی تعداد تے قبیلے وچ چوکھے ٹوہرے پاروں ایہ مائی بڑی متکبری ہوئی سی۔ اوس دی طاقت علاقے وچ ضرب المثل بنی ہوئی سی تے اوس دے غرور دی حالت ایہہ سی کہ اک واری اوس نے اپنے ۳۰ پتراں تے پوتریاں دا اک فوجی جتھا تیار کیتا تے اوس نوں ہدایت کیتی کہ ”مدینے تے چڑھائی کر دیو تے محمد نوں قتل کر دیو۔“ پر اللہ نے اوس دی بدتمیزی تے سازش نوں کچل کے رکھ دتا تے اوہ سارے دے سارے مارے گئے۔

رمضان ۶ھ وچ حضرت زید بن حارث دی سربراہی وچ مسلماناں دا اک تجارتی قافلہ شام ول جا رہیا سی۔ جدوں اوہ

وادی القریٰ وچ اڀرے تے ایس مائی نے مسلماناں تے حملہ کرا دتا۔ اوہناں نوں چوکھا مار یا کٹیا تے سارا مال وی کھوہ لیا۔ حضرت زید نے مدینے واپس آ کے حضورِ نوں ساری گل سنائی تے آپؐ نے جناب زید دی ای سالاری وچ (یاں حضرت ابو بکر صدیق دی سالاری وچ) اُم قرفہ دے قبیلے بنو فزارہ نوں سوا پکھان لئی اک لشکر اوہناں ول ٹور دتا۔ اسلامی لشکر نے بد تمیز مائی اُم قرفہ نوں قتل کر دتا تے اوس دی اک دھی نوں گرفتار کر لیا۔ باقی سب لوگ علاقہ چھڈ کے نس گئے۔ ایوں بنو فزارہ دا غرور تے گھنڈ مٹی وچ رُل گیا۔

اُم قرفہ دی دھی نوں حضرت سلمہ بن اکوع نے گرفتار کیتا سی جیہڑی میدان جنگ وچ تے اوہناں دے ای حوالے کیتی گئی پر مدینے واپسی تے رسول خدا نے اوس نوں مکے بھیج دتا تے اوس دے بدلے کئی مسلمان اسیراں نوں آزادی دوا دتی۔
سریہ عربین:

عسک تے عربین دے کجھ لوکاں نے مدینے آ کے اسلام قبولیا تے فیر او تھے ای رہن لگ پے۔ مدینے دی آب و ہوا اوہناں نوں راس نہ آئی تے اوہ بیمار پے گئے۔ رسول خدا نے اوہناں نوں مدینے توں باہر کھلی فضا وچ رہن دا مشورہ دتا۔ اوہناں دی خدمت لئی اپنے ایک آزاد کیتے غلام جناب یسار نوں نال ٹوریا تے کجھ اوٹھیاں نال دتیاں تاں جے اوہ اوہناں دا ددھ پیندے رہن۔ اوہ لوکی جدوں ہٹے کٹے ہو گئے تے اوہناں نے رسول خدا دے غلام تے اپنے محسن جناب یسار نوں قتل کر کے اوٹھیاں اپنے علاقے ول ہک لئیاں۔ جناب یسار نوں شہید وی ایوں کیتا گیا کہ اوہناں دیاں اکھاں کڈیاں تے فیر ہتھ پیر وی وڈھ دتے۔ جناب رسول اللہ نوں ایس احسان فراموشی دا چوکھا دکھ لگا۔ آپؐ نے جناب گرز بن جابر فہریؓ نال ۲۰ مجاہد ٹور کے اوہناں نوں عربیاں دے مگر لا دتا۔ حضرت کرز دے مجاہد جتھے نے اوہناں نوں جا پھڑیا۔ جیہڑے اٹھ (۸) قاتل قابو آئے، اوہناں نوں قصاص دے طور تے اوویں ای قتل کیتا جو یں اوہناں نے رسول خدا دے خادم تے اپنے محسن یسار نوں قتل کیتا سی۔

اک وڈھی تبدیلی:

ایس سریہ توں بعد مسلماناں دی حربی توارخ وچ اک وڈھی تبدیلی نظر آؤندی اے۔ ایسے سال وچ خدا دے دشمنان نے رسول خدا نال اک وڈھا معاہدہ کر کے آپؐ نوں اپنے جوڑ دامت لیا۔ ایس معاہدے دے نتیجے تے ہن محبوب خدا تے آپؐ دے جان نثار نہ صرف اک سیاسی وحدت بن گئے سگوں آپؐ دی نویں ریاست، ریاست مدینہ، دیاں سرحدیں دا احترام لازم ہو گیا۔ ایس معاہدے نوں صلح حدیبیہ دے نام نال چیتے کیتا جاندا اے۔
صلح حدیبیہ:

قوماں دی سیاسی توارخ دا ڈونگھا مطالعہ کیتا جاوے تے پتا لگدا اے کہ کئی دستاویزاں یاں معاہدیاں نے توارخ دے دھارے دا رخ موڑ کے رکھ دتا۔ اوہناں معاہدیاں دے نتیجے تے انساناں نوں سکھ چین دا ساہ لینا نصیب ہو گیا تے فیر امن دی اوس فضا وچ لوکاں دی معاشرتی تے معاشی مسائل گھٹنا شروع ہو گئے، تے بعض ویلے ہر پاسے خوشحالی ای خوشحالی جھومر پونڈی نظر آئی۔ ایس سلسلے وچ مغربی مورخین ۱۲۱۵ء دی دستاویز میگنا کارٹا (Magna Carta) دا ذکر بڑے چاء نال کر

دے نیں، کیوں جے اوہدے نتیجے تے بادشاہ نے انگلستان دی رعایا دے بوہت سارے حقوق تے شخصی آزادیاں نوں تسلیم کر لیا۔ پر جے غیر جانبدار نظر نال ویکھئے تے پتا چلدا اے کہ سیاسی دستاویزاں دی توارخ وچ حیران کردین والی تے انسان تے کدے نہ کن والے اثرات مرتب کرن والی دستاویز صلح نامہ حدیبیہ، میکنا کارنا توں ڈھیر وڈھی دستاویز اے۔ بعض ویلے تے بندہ ایہہ وی سوچن تے مجبور ہو جاندا اے کہ کینئر بری (Canterbury) دے آرج بشپ سٹیفن لیگلٹن نے تھیر ویلی ول مارچ داسبق تے طریقہ اوس مارچ توں سکھیا اے جیہڑا اوہدے توں چھ سو ورھے پہلاں رسول خدا نے مدینے توں مکے ول کیتا سی تے جہدے نتیجے تے صلح نامہ حدیبیہ جی، عظیم الشان دستاویز مرتب ہوئی۔

صلح حدیبیہ دے اسباب وچوں سب توں وڈھا سبب رسول خدا دی ایہہ خواہش تے کوشش سی کہ مکے دے لوکی وکھو وکھ معبوداں دی پوجا چھڈ کے اپنے سر اک اللہ دے اگے جھکا دین تاں جے اوہناں دی دنیا تے آخرت دوویں سور جان۔ رسول خدا ایہہ گل وی محسوس کر رے سن کہ اسلام دی بچکولے کھاندی بیڑی نوں کنڈے لان لئی جویں دے ملاحوں دی لوڑ اے، اوہ اخیر مکے وچوں ای لکھنے نیں، اوسے مکے وچوں جتھوں صدیق اکبر، عمر فاروق، عثمان غنی تے شیر خدا علی المرتضیٰ لکھے سن۔ بھانویں مدینے وچ اوس و خزر ج دے انصار نے اسلام دے اگے وڈھن لئی مواخات ورگیاں سونہیاں مثالیں قائم کیتیاں سن پر آل دوالے کھلے رے یہودی راہواں وچ رکاوٹاں کھلیاں کرن لئی وی تھیرے سن۔ یہودی نسلاں دی وگڑی ہوئی تے اپنے انبیاء دی قاتل قوم سی تے دُجے پاسے مکے وچ اوہ قوم و سوں کیتی بیٹھی سی جہدے وچ اللہ نے اپنے اخیر نبی تے محبوب دا ظہور فرمایا سی۔ ایس لئی مکے وچ توحید دے نعریاں دا گوچنا رسول خدا نوں بڑا عزیز سی۔ مکے توں نکلیاں ۶ ورھے وی ہو گئے سن تے رسول خدا نوں ہن وطن دی یاد وی ستارہی سی۔ ایہہ گل وی چیتے رکھنی پوے گی کہ ہجرت ویلے جناب رسول خدا نے مکے نوں مخاطب کر دیاں آکھیاں کہ اے مکہ! تینوں چھڈ کے جان تے دل تے نہیں کردا پر کیہ کراں تیرے لوکاں مینوں مجبور کر چھڈ یا اے۔ شیع رسالت دے پروانیاں دا حال وی آپ توں وکھ نہیں سی۔ جدوں وطن دی یاد آؤندی سی تے کلیجے نوں رگھ پیندا سی۔ دل کرداسی کہ پر لگ جان تے ہنے ای اڈ کے اک وار فیروہناں گلیاں بازاراں وچ اپڑ جان جتھے اوہناں اپنے بچپن دے سوہنے دیہاڑے گزارے سن۔ ایہناں سب گلاں توں وڈھی گل ایہہ سی کہ اوہ قبلہ جہدے ول منہ کر کے اوہ نماز پڑھدے سن تے جس دے کالے پتھر نوں چن نال اوہناں دے دلاں نوں قرار نصیب ہوندا سی اوس نوں ہتھ لائیاں وی پورے ۶ ورھے بیت گئے سن۔

مسلماناں دی بے چینی پیرو پیرو دھری سی کہ اک سویرے مسجد نبوی وچ بیٹھیاں رسول خدا نے اپنے اصحاب نوں ایہہ خوش خبری سنائی کہ اسیں چھیتی ای مسجد حرام وچ بے خوف و خطر داخل ہوواں گے۔ ایہہ سندیاں ساراں مسجد نبوی وچ الحمد للہ، الحمد للہ دیاں صداواں بلند ہو گئیاں۔ رسول خدا نے ایہہ ارشاد اپنے اک خواب دی بنیاد تے فرمایا سی۔ انبیاء دے خواب وی وحی ہوندے نیں، ایس لئی ایس گل تے شک و شبہ دی بھوراوی گنجائش باقی نہیں سی تے مسلماناں نوں ایہہ یقین ہو گیا سی کہ زیارت کعبہ اوہناں دی قسمت وچ لکھ وتی گئی اے۔ ایس گل دا البتہ اصحاب نبی ضرور ویروا چاہندے سن کہ ایہہ سب کچھ کویں ہووے گا؟ قریش اطاعت کر کے مسلماناں نوں دعوت دین گے، مسلمان بزور شمشیر مکے جاوڑن گے یاں اللہ

کوئی تیارستہ کڈے گا!

مسلمان سوچاں دے سمندر وچ غوطے کھاندے رے تے سفر دیاں تیاریاں کردے رے۔ مدینے وچ منادی وی کرا دتی گئی کہ رسول خدا دی سربراہی وچ جتھا زیارت کعبہ لئی تے عمرہ ادا کرن لئی مکے روانہ ہو رہیا اے۔ طواف کعبہ لئی مسلمان یاں غیر مسلمان دی اوہدوں تیکر کوئی تمیز نہیں سی ایس لئی غیر مسلمان حلیف قبیلیاں نوں وی نال لڑن دی دعوت دتی گئی۔ اوہناں وچوں کجھ تے نال لڑ پے پر کجھ نے مال ڈنگر تے جینا جنت دے بہانے کر کے معذرت کر لئی۔ رسول خدا اپنے حلیف قبیلیاں نوں آکھی آؤندے سن کہ عام سفر وچ نال رہن والی تلوار توں وکھ کوئی ہتھیار نال نہ بٹھیا جائے پر فیروی کجھ شرارتی بندیاں نے ایہہ آکھنا شروع کر دتا کہ ”ہن لگ پتے جان گے۔ چلے نیں نامکے ول اوہناں دے گھر جا کے لڑن، ہن سمجھ لگ جائے گی۔ محمد تے ایس دے نال دے نرا اوٹھاں دالون بھٹن کے کھانا جان دے نیں جد کہ مکے والے تگڑے تے بہادر لوکی نیں۔“ اوہناں بے عقلاں نوں ایہہ گل بھل گئی سی کہ محمد وی اوہناں وچوں ای سن تے اوہناں وی مکے دے کھوہاں دا پانی پیتا سی۔

ہجرت مدینہ دے ویلے جناب ابوالیوب انصاری دے بوہے اگے دھون وچھا دین والی نیک بخت ناقہ قصویٰ اپنے بھاگاں تے ناز کردی پھر دی سی کہ اک وار فیروں نوں محبوب خدا دے جسم پاک نال اپنا جُستاس کرن دی توفیق نصیب ہونی سی۔ رسول رحمت نے قصویٰ دے پنڈے تے ہتھ پھیریا تے اوہ مست جی ہو گئی۔ مالک دیاں تیاریاں جوں جوں توڑ چڑھ رہیاں سن، بھاگ بھری قصویٰ نوں چاء چڑھی جاندے سن۔ اخیر ذی قعدہ ۶ھ دی پہلی تاریخ نوں پیر دے دیہاڑے حضور نے حضرت نمیلہؓ نوں قائم مقام صدر بنایا، ریاست مدینہ دی ذمہ داری اوہناں نوں سونپی، قربانی لئی ستر اوٹھ نال لے تے اپنی ناقہ قصویٰ تے سوار ہو کے پندرہ سو بھناں دے نال اک وار فیراک ایجے سفر تے لڑ پے جوں رہندی دنیا تیکر چیتے رکھیا جاوے گا۔ مدینہ منورہ توں چھ میل دے پندھ تے ذوالحلیفہ ناں دے پنڈ جا کے احرام بٹھیا۔ رسول اللہ نے دو رکعت نماز پڑھی تے مسجد دے دروازے تے ہی ناقہ تے سوار ہو گئے۔ ناقہ قصویٰ دامنه قبلے ول ہوئی تے آپؐ نے عمرے دی نیت کیٹی، لَبَّيْكَ اللَّهُمَّ لَبَّيْكَ پکاریا تے قافلہ مکے ول لڑ پیا۔

ایس سفر وچ جہناں خوش بخت پیماں نے رلت پائی اوہناں وچوں اُم المؤمنین حضرت اُم سلمہ، حضرت اُم عمارہ، حضرت اسماء بنت عمرو تے حضرت اُم عامر دے نام تواریخ نوں چیتے نیں۔

طواف کعبہ دا شوق دل وچ وساکے نبی آخر دا قافلہ اگے ودھ رہیا سی۔ بنو خزاعہ دے علاقے وچ اپڑے تے اوس ہمدرد قبیلے نے اک بندے بشر بن سفیان نوں مکے گھلیا تاں جے اوہ مکے والیاں دے حال حالات دی خبر دیوے۔ نال ای اپنے ہم سفر ساتھیوں وچوں ۲۰ بندیاں دا اک جاسوسی دستہ تیار کیتا تے اوس داسر براہ حضرت عباد بن بشر نوں بنا کے اگے ٹور دتا۔ جاسوسی جتھے دے کوئی خبر دین توں پہلے ای خزاعہ دا بندہ بشر بن سفیان پچھاں پرت آیا تے آکے دسیا کہ مکے والیاں نوں مدنی زائرین دے آؤن دی خبر مل چکی اے تے اوہ مکے توں باہر نکل کے ذوطویٰ دی تھاں تے اکٹھے ہو کے لڑن مرن لئی تیار

کچھ سیرت لکھیاراں دا خیال اے کہ مدینے دا والی حضرت عبداللہ بن اُم مکتوم نوں بنایا گیا سی۔

بیٹھے نہیں تے اوہناں دے اک اک بندے نے قسم کھادی اے کہ مسلماناں نوں کسے حال وچ وی مکے وچ نہیں وڑن دتا جاوے گا۔ اوس نے ایہہ وی دسیا کہ مسلماناں نوں ڈکن لئی دوسو شہسواراں دا اک دستہ خالد بن ولید دی سربراہی وچ کراع الغمیم دی تھاں تے جا بجیا اے۔ مکے دے کافراں دے ایہہ ارادے جان کے رسول خدا نوں بہت دکھ ہو یا تے اچن چیت آپ دی زبان مبارک توں نکلیا کہ ”ایہہ کڈے منکھ دی گل اے کہ قریش جنگاں نال برباد ہو کے وی سیانے نہیں ہوئے۔ جے آج ایہہ مسلماناں، تے دُجے عرب زائراں نوں طواف کعبہ تے زیارت توں نہ ڈکدے تے ایہناں دا کیہہ وگڑدا“ ایس توں بعد دے ارشاد مبارک توں پتہ لگدا اے کہ آپ کچھ غصے وچ دی سن۔ آپ نے فرمایا کہ ”قریش کسے مغالطے وچ نہیں رب دی سونہہ میں اوہناں نال لڑدار ہواں گا، اوہدوں تیکر کہ اللہ مینوں غالب کر دیوے یاں تقدیر مینوں آہتھ پاوے“ رسول خدا ایس موقع تے ایہہ وی سوچ دے رے کہ اسیں تے گھروں بیت اللہ دا طواف کرن آئے ہاں، ہتھیار ساڈے کول کوئی نہیں، قربانی دے جانور اسیں نال بکلی لیا ندے ہاں تے ایہہ اجے نادان نیں کہ خالد ورگے سپہ سالار نوں ساڈے نال ٹکر لین لئی اگے لا دتا نیں۔

زیارت کعبہ دے طلب گار مسلماناں دا سالار تے امن دا پیغمبر، محبوب خدا کسے وی طرحاں جنگ کرن لئی تیار نہیں سی۔ ہن مکے دے مشرکاں دے تیور ویکھ کے آپ نے جناب ابو بکر صدیق نال مشورا کیتا کہ ایس صورت حال وچ کیہہ کرنا چاہیدا اے۔ اوس مشیر خاص نے عرض کیتی کہ یا رسول اللہ! اللہ تے اوس دار رسول ای بہتر جان دے نیں کہ کیہہ کرنا چاہیدا اے پر جے مینوں پچھو تے عرض کراں گا کہ اسیں گھروں لڑن نہیں آئے۔ بس جس مقصد لئی آئے ہاں، اوس لئی اگے ودھو۔ ہاں ایہہ ضرور اے کہ جے سانوں کسے بیت اللہ دے طواف توں ڈکیتے فیر اسیں اوس نال جنگ کراں گے۔ اوس توں بعد جناب اُسید بن حضیر نال مشاورت کیتی گئی تے اوہناں نے جناب صدیق اکبر والی ہی صلاح دتی۔ ایہہ سن کے حضور نے ارشاد فرمایا:

﴿فَسِيرُوا عَلَىٰ اِسْمِ اللّٰهِ﴾

”تے فیر اللہ داناں لے کے ٹر پوو۔“

تے نال ای ساتھیاں نوں پچھیا کہ مکے نوں جان والے ایس معروف رستے توں ہٹ کے جے کسے دُجے رستے توں کوئی بندہ واقف اے تے اگے لگے۔ اک صحابی نے عرض کیتی کہ یا رسول اللہ! مینوں وادی دے اک اجے رستے دا پتا اے جتھے لوکاں گھٹ ودھ ای آؤندی جاندی اے۔ آپ اوس صحابی نوں گائیڈ بنا کے تے خالد بن ولید دے فوجی جتھے نال ٹکرائے بغیر حدیبیہ دے نیڑے اپڑ گئے۔ اودھر جدوں خالد نوں ایس گل دا پتا لگا کہ مسلمان عام رستے توں چھڈ کے مکے ول ودھے جا رہے نیں تے اوہ مسلماناں دے کسے ممکنہ حملے توں مکے نوں بچان لئی واپس مکے پرت گیا۔

نکے جے تے اوکھے جے رستے توں نکل کے جدوں مسلمان میدان وچ اپڑے تے آپ نے ساتھیاں نوں نَسْتَغْفِرُ اللّٰهَ وَتَتُوبُ اِلَيْهِ پڑھن دی ہدایت فرمائی۔ جدوں سب نے ایہہ پڑھ لیا تے ارشاد فرمایا کہ بس اپنی کو گل سی جیہڑی بنی اسرائیل نے آکھن توں انکار کر دتا سی۔ اوس تھاں تے حضور دی اوٹھنی قصوی آپوں بیٹھ گئی۔ صحابیاں نے سمجھیا کہ خورے

اٹھنی تھک کے بہہ گئی اے۔ حضور نے ساتھیاں دی تشویش دا اندازہ لایا تے فرمایا کہ ”دوستو! ایس نوں کوئی اوہر نہیں تے نہ ای ایہہ کوئی التاں کردی اے۔ ایس نوں اوس ذات نے اگے جان توں ڈکيا اے جس نے ابرہہ دے ساتھیاں نوں اگے جان توں ڈکيا سی۔ بس اتھے ڈیرے لا دیو۔“

”پر یا رسول اللہ! اتھے تے پانی دا تبرک نہیں۔ آل دوالے دے کھوہ سکے پئے نیں۔“ اصحاب نبی نے عرض کیتی۔ ایہہ سن کے رسول رحمت نے اپنے ترکش وچوں اک تیر کڈیا تے اک صحابی نوں حکم دتا کہ جاؤ تے کسے کھوہ وچ گڈ دیو۔ صحابی نے حکم دی تعمیل کیتی۔ اوہدروں تیر کھوہ وچ لگاتے اوہدروں پانی نے جوش مارنا شروع کر دتا۔ ویکھدیاں ای ویکھدیاں کھوہ پانی نال بھریا گیا۔ فیر جناں چیر وی اصحاب نبی اوس تھاں تے رے، اوس کھوہ دا پانی ورتدے رے، کھوہ وچوں پانی نہ مکیا۔ ایہہ حدیبیہ دی تھاں سی۔

حدیبیہ مکے توں ۱۲۱۴ کلومیٹر، تے جدے توں ۴۵ کلومیٹر دے پندھ تے ہے۔ ایہہ حرم مکہ دی مغربی حد اے۔ جدوں حضرت ابراہیم نے خانہ کعبہ نوں نویں سرے اساریا سی تے مکہ اک وستی بنیا سی، اوہدوں جناب ابراہیم نے ایس وستی نوں اک حرم قرار دتا تے ایس دیاں حدیں مقرر کیتیاں تے ہر پاسے اخیری حدیں تے منارے تعمیر کیتے تاں جے پتا لگ سکے کہ ایہتھوں حرم دی حد شروع ہوندی اے۔ عہد نبوی وچ اوہناں مناریاں دیاں نشانیاں موجود سن۔ آپؐ نے اوہناں دی مرمت وی کروائی۔ جناب ابراہیم g دیاں بدھیاں حدیں ای اے تیکر قائم نیں۔

اوہ پہاڑ جہاں مکے نوں گھیریا ہوئیا اے حدیبیہ دی تھاں تے مکہ جان دے نیں تے فیر ساحلی میدان شروع ہو جان دے نیں۔ عہد نبوی وچ اتھے کئی اک کھوہ سن جہاں دا پانی مٹھاسی، پر آبادی دا کوئی ثبوت نہیں ملدا۔ خیال اے کہ اوہناں کھوہاں دا پانی حاجیاں تے دُجے مسافراں دے کم آؤندا ہووے گا۔ حدیبیہ دی تھاں تے ببول وغیرہ دے درخت کثرت نال نظر آؤندے نیں۔ حدیبیہ دی تھاں تے ہن جیہڑا پنڈ آباد اے اوس دا نام شمیمیہ سی پر اچ کل اوس نوں حدیبیہ شمیمی آکھدے نیں۔

خالد بن ولید دے گھڑ سوار دستے دے مکے اپڑن توں بعد اہل مکہ دی تشویش ودھ گئی سی۔ اوہ مسلماناں دی صحیح تعداد، ہتھیاراں دی نوعیت تے ایس مسافرت دی ٹھیک وجہ توں اے تیکر آگاہ نہیں سی۔ فیر ایہ پریشانی وی سی کہ اخیر مسلماناں کول کبھڑی اجہی چیز آگئی اے کہ خندق پٹ کے اپنا دفاع کرن والیاں اچن چیت مکے تے چڑھائی کر دتی اے، کجھ تے خاص گل ہے کہ اوہناں ایڈی جرأت کیتی اے۔ دُجے پاسے ایوں دی ہی صورت حال مسلماناں وِل وی سی۔ رسول خدا دی پریشانی ایہہ سی کہ اوہ تے سامان حرب وچوں کوئی چیز نال ای نہیں لیا، جے مکے والیاں حملہ کر دتا تے کیہہ بنے گا۔ خالد بن ولید تے عکرمہ بن ابو جہل دیاں پھرتیاں ایہہ گل دس رہیاں سن کہ اوہناں کسے صورت وچ وی مکے وڑن دی اجازت نہیں دینی۔ دوواں پاسیاں دی ایسے تشویش دے دوران ای اچن چیت سفارت کاری شروع ہو گئی۔

تہامہ داقبیلہ بنو خزاعہ، رسول خدا دا خیر خواہ تے راز داری۔ اوس قبیلے دا سربراہ ہدیل بن ورقا خزاعی اپنے کجھ بندیاں دے نال حضورؐ دی خدمت وچ حاضر ہوئیا تے آکھن لگا کہ قریش دے قبیلے کعب بن لوئی تے عامر بن لوئی تہاڑے نال

جنگ لئی اگل ہتھ نہیں تے اوہ لوکی ایہہ فیصلہ کیستی بیٹھے نیں کہ تہانوں اگے نہیں ودھن دینا۔ ہن تسیں دسو کہ خیر نال آئے او؟
 ”ہاں بدیل جی! اسیں تے خیر نال ای آئے ہاں۔ بس بیت اللہ دی زیارت داشوق اتھے لے آیا اے۔ تسیں
 آپوں سوچو کہ جنگ کرن والے احرام، بھ کے تے قربانی دے جنور نال لے کے جنگ کرن آؤندے نیں، تے فیر بغیر
 ہتھیاراں توں؟ ویکھو، ساڈا لڑائی دا کوئی ارادہ نہیں تے نہ ای اسیں مکے تے قبضہ کرن آئے ہاں۔“ رسول خدا نے پوری
 گل سمجھا دتی۔

جناب محمدؐ نے بدیل نوں ایہہ وی آکھیا کہ ”جے قریش دی سمجھ وچ گل آجائے تے اوہ کجھ دیر لئی اک پاسے ہو جان،
 میں باقی قبیلیاں نال گل بات کردار ہواں گا۔ جے اوہ مسلمان ہو گئے تے قریش وی اپنا سجدہ کر لین گے تے جے اوہناں
 نوں فیروں گل وارا نہ کھادی تے لڑنا مرنا ای ضروری سمجھیا تے فیر لڑائی لئی تازہ دم تے ہوا ای جان گے۔“
 گل بدیل دی سمجھ وچ آ گئی۔ اوہ اہل مکہ کول واپس گیا تے اوہناں نوں دسیا کہ مسلمان لڑائی کرن نہیں، سگوں صلح
 کرن آئے نیں تے نالے بیت اللہ دی زیارت لئی ترلا مارے نیں۔ اوس نے مشورہ دتا کہ سانوں جلد بازی نہیں کرنی
 چاہیدی تے نہ ای اوہناں دے گل پینا چاہیدا اے۔ بدیل دی گفتگو سنن توں بعد اہل مکہ نے اپنا فیصلہ سنایا تے آکھیا کہ اوہ
 جویں وی آئے نیں، اسماں اوہناں نوں مکے وچ نہیں وڑن دینا۔ ایہہ فیصلہ سنن توں بعد عروہ بن مسعود اٹھ کے کھلو گیا تے
 آکھن لگا:

”لے بھئی جوانو! اک گل دسو! کیہہ تسیں میرے نانکے (نھیال) تے میں تہاڈا دوہترا نہیں؟“

”بنا شک ہے او۔“

”کیہہ میں تہاڈے پتراں، بچا نہیں؟“

”کیوں نہیں؟“

”میرے ولوں دلاں وچ کوئی وسوسہ کہ میں تہاڈے گھائے دی گل کراں گا؟

”بلکل نہیں“

کیہہ میں عکاظ والیاں کول تہاڈے لئی ونگار نہیں پائی؟“

”پائی اے۔“

میں اپنے سارے بندے لے کے تہاڈی مدد کرن لئی نہیں آیا؟

”آئے او“

”تے فیر سنو کہ جویں بدیل ہو راں دسیا اے، سانوں لڑائی جھگڑا نہیں کرنا چاہیدا تے نالے جے آکھوتے میں

محمدؐ a نوں مل کے گل اگے ٹوراں۔“

”تہاڈی سیانف تے سانوں بھوراوی شک نہیں۔ جاؤ تے محمدؐ (a) نال گل بات کر کے اوس نوں راضی کرو کہ اوہ

اپنے بندے نال لے کے پشاں پرت جائے۔“

عروہ بن مسعود ثقفی دربار رسالت وچ حاضر ہوئیا تے بڑی دانائی نال گل بات چھوہ دتی تے آکھن لگا کہ لڑائی جھگڑا کوئی سیانف دی گل نہیں۔ رسول خدا نے اوس نوں اوہی جواب دتا جیہڑا بدیل نوں دتاسی کہ اوہ نہ تے لڑائی دے ارادے نال آئے نیں تے نہ ہی لڑن دی پوزیشن وچ نیں۔ ایہہ سن کے عروہ نے ایہہ تڑی وی لائی کہ جہناں نال تہاڈا جوڑ پینا اے ایہہ قریش نیں تے اوہ لڑن مرن لئی تیار بیٹھے نیں۔ اوہ جنگی درندیاں دیاں کھلاں گل پائی بیٹھے نیں جہدا سد اسدا مطلب ایہہ ہے کہ قریش نے اوہناں درندیاں وانگ ای تہاڈے تے حملہ کرنا اے۔ دُجی گل ایہہ ہے کہ جیہڑے بندے تسیں اکٹھے کر لیاے او، ایہہ تے نرا چوں چوں دامر بہ اے۔ شاں پندیاں ویکھ کے ایناں بچ نَس جانا اے، تے بے فرض کرو کہ تسیں قریش تے غالب آوی گئے تے ایہہ دسو کہ پورے عرب وچ پہلوں دی کدے اپنے ہتھیں کسے اپنے قبیل نوں برباد کیتا اے؟ ایہہ بڑا وڈا نفسیاتی حملہ سی جہدے توں کوئی وی بندہ بچ نہیں سکدا تے ایہہ سوچن تے مجبور ہو جانا اے کہ گل تے ٹھیک اے۔ شہر میرا، قبیلہ میرا، جی میرے تے بجن میرے۔ اخیر میں کیہ لگاواں کرن؟ کہدے نال لڑن لگاواں تے کس دی دھون وڈاں گا؟ پر عروہ ایہہ گل بھل رہیاسی کہ جس ہستی تے جس لشکر نال اوہ مذاکرات کر رہیاسی اوہناں نیڑے کسے خنوا دے، قبیلے، رشتے یاں علاقے دی کوئی اہمیت نہیں، بے کر ہے تے اوہ اوس بھائی چارے دی اے جیہڑا اللہ تے اوس دے رسول نے قائم کیتا سی تے جہدی بوہت سوہنی مثال مدینے دی عظیم الشان اسلامی ریاست وچ لہدی سی۔

عروہ دی سفارت کاری ویلے جناب ابوبکر صدیق وی رسول خدا کول بیٹھے ہوئے سن تے حفاظتی دستے وچ کچھ جناب مغیرہ بن شعبہ وی تنگی تلوار لے کے کھلوتے ہوئے سن۔ عروہ نے جدوں ایہہ گل آکھی کہ شاں پندیاں ویکھ کے مدینے والیاں نَس جانا اے تے جناب صدیق اکبر نوں بڑا وٹ چڑھیا۔ عروہ دی ایہہ گل مسلماناں لئی کسے گالی توں گھٹ نہیں سی کہ اوہناں اپنے آقا نوں چھڈ کے دوڑ جانا اے۔ جناب صدیق توں ایہہ گل نہ جری گئی تے اوہناں وی عروہ نوں گال کڈھیاں آکھیاں کہ بھلا اسیں محمد رسول اللہ نوں چھڈ کے دوڑ جاواں گے۔ عروہ نے جدوں آپؐ دا ایہہ رد عمل ویکھیا تے کچھن لگا کہ ایہہ ایڈا اکھا بندا کیہڑا اے؟ حضورؐ نے دسیا کہ ایہہ ابوبکر اے تے عروہ آکھن لگا کہ بے تہاڈا لحاظ نہ ہوندا تے میں ایس نال جنگی طرحاں نبھڑدا، پر ہن نہیں۔

عروہ جناب رسول خدا نال گل بات کر دیاں ہوئیاں عرب دے رواج موجب گھڑی مڑی آپؐ دی داڑھی مبارک نوں ہتھ لا رہیاسی۔ جناب مغیرہ بن شعبہ جیہڑے تلوار لے کے حضور دے کچھ کھڑے سن، اوہناں نوں ایہہ گل جنگی نہ لگی کہ ریش مبارک نوں کسے کافر دے ناپاک ہتھ لگن۔ اوہ عروہ نوں آکھن لگے کہ اپنا ہتھ حضور توں دور رکھے۔ جدوں اوہ باز نہ آیا تے جناب مغیرہ نے اوس دے ہتھ تے تلوار دی نوک ماری۔ عروہ نے غصے وچ آکے پچھیا کہ ایہہ ایڈا اتھرا بندا کیہڑا اے۔ جدوں اوس نوں دسیا گیا کہ ایہہ اوس دا بھتیجا مغیرہ بن شعبہ اے تے اوس نوں ہور غصہ چڑھیا، کیوں بے چاچا ہون پاروں اوس نے جناب مغیرہ دے ہتھوں قتل ہون والے بندیاں دی دیت ادا کیتی سی۔ پر گل ایہہ ہے کہ ہن اک ای رشتا تے اک ای معیاری تے مغیرہ اوس رشتے تے معیار اُتے اک کھرے بندے وانگ پکے ہو گئے سن۔

چیتے رہوے کہ جنگی لباس وچ ہون پاروں عروہ جناب ابوبکر صدیق نوں نہیں پہچان سکیا سی۔

قریشی سفارت کار نے رسول خدا نال جیہڑی گل بات کیتی اوہ ساری قریش نوں جاسنائی۔ اوس نے رسول خدا نال اوہناں دے بھناں دی محبت تے عقیدت دا نقشہ کھچدیاں ایہہ وی آکھیا کہ ”اے قوم قریش! واللہ میں بادشا ہواں دے درباراں وچ گیا ہاں۔ قیصر و کسریٰ تے نجاشی دے دربار ویکھے نیں۔ واللہ میں نہیں ویکھ سکیا کہ کسے بادشاہ دی رعایا اوس دی ایڈی تعظیم کر دی ہووے جو میں محمد دے صحابہ اوس دی کر دے نیں۔ واللہ اوہ تھکدے نیں تے اوہ لعاب کسے صحابی دی تلی تے پیندا اے تے اوہ اوس نوں اپنے منہ تے جتے تے مل لیندا اے۔ اوہ کوئی حکم کر دے نیں تے ہر کوئی چاہندا اے کہ اوہی سب توں پہلوں حکم دی تعمیل کرے۔ محمد جدوں وضو کر دے نیں تے اوہناں دے بھن وضو دے پانی نوں تھلے نہیں ڈگن دیندے، اوس ورتے ہوئے پانی تے ٹٹ پیندے نیں تے اوس نوں تبرک سمجھ کے سانجھ لیندے نیں یاں اپنے اُتے مل لیندے نیں۔ جدوں اوہ بولدے نیں تے سناٹا چھا جاندا اے۔ اوہناں دی عظمت تے بزرگی دے اوہ رنگ نیں کہ کوئی اوہناں نوں نظر بھر کے نہیں ویکھدا۔ اے قوم قریش! واللہ، اجے بندے نوں مات دینا ممکن نہیں ہے۔ اوہناں تہاڈے اگے اک معقول گل رکھی اے تے چنگی گل ایہی ہے کہ ایس نوں قبول کر لوؤ۔“ پر قریش اپنی ضد تے پکے رے کہ اسیں محمد a تے اوس دے صحابہ نوں مکے نہیں وڑن دینا۔

ہن قریش نے اک ہور چال چلی تے حبشیاں دے سردار حلیس بن علقمہ کنانی نوں آکھیا کہ اوہ جا کے جناب محمد رسول اللہ نال گل بات کرے تے اوہناں نوں ایس گل تے راضی کرے کہ اوہ ایس سال عمرہ کیجے بغیر واپس پرت جان۔ ایس سفارت وچ اک راز ایہہ سی کہ جے حلیس کامیاب ہو گیا تے مکے والیاں دے ٹوہر بن جان گے تے جے مدینے والیاں اوس دی گل نہ منی تے فیر ایسے غصے وچ حلیس پوری طرحاں ساڈے موہڈے نال موہڈا لاوے گا۔

رسول خدا نے حلیس نوں آوندیاں ویکھیا تے صحابہ نوں ہدایت فرمائی کہ قربانی دے جنوراں نوں کھڑا کر دیوتاں جے حلیس ویکھ لوے، ایہہ اوہناں لوکاں وچوں اے جیہڑے قربانی دے جنوراں دی چوکھی تعظیم کر دے نیں۔ حلیس نے جدوں جنور ویکھے تے اوہ وی ایس طرحاں کہ بھک دے ہتھوں مردے جانے سن پر آل دوالے دے پٹھے دتھے نوں منہ نہیں مارن دتا، تے اوہ مسلماناں دی دیانت تے امن طلبی توں بڑا متاثر ہوئی۔ حلیس بغیر گل بات توں واپس پرت گیا تے قریش نوں آکھن لگا کہ قسم ہے رب کعبہ دی، ایہہ لوکی تے زرا عمرہ کرن آئے نیں۔ اسیں اوہناں نوں بیت اللہ دی زیارت توں کوں ڈک سکدے ہاں۔

”بدو وادوای رہیا ایں نا؟“ قریش نے غصے نال آکھیا۔

حلیس دا غصا وی قریش توں گھٹ نہیں سی۔ آکھن لگا ”او قریشی ٹولے! رب دی سونہہ اسیں تہاڈے نال کوئی اجیہا کارا نہیں سی کیتا کہ جے کوئی اللہ دا بندہ بیت اللہ دی زیارت لئی آئے تے اسیں اوس نوں ڈکاں گے۔ قسم اے اوس ذات پاک دی جہدے قبضے وچ حلیس دی جان اے جے تسیں محمدؐ نوں بیت اللہ دی زیارت توں ڈگو گے تے فیر تہاڈا رستا اوہ تے ساڈا ایہہ۔ میں حبشیاں نوں لے کے تہا تھوں وکھ تے اڈرا حیاتی دے دن کٹاں گا۔ قریش نے جدوں حلیس دے تیور ویکھے تے گھابر گئے، کیوں جے سارے حبشی لڑائی دے سیانے سن تے اگوسر دار حلیس دی سرداری وچ اک مٹھن۔

ایس حال وچ اک پاسے تے قریش دی پریشانی پُروں پُروں ودھ رہی سی کہ ہن کرن تے کیہ کرن تے دُجے پاسے رسول خداؐ وی ایس سوچ وچ ڈبے ہوئے سن کہ جے گل کسے پاسے نہ لگی تے کیہ بنے گا۔ آپؐ نے ایہہ وی محسوس کیا کہ قریش دے سفارت کار مکے جاکے ٹھیک گل نہیں دسدے تے جے دسدے نیں تے قریش اڑی کیتی بیٹھے نیں۔ ایس لئی آپؐ نے فیصلہ کیتا کہ اپنا اک سیانا بند قریش ول ٹورن، تاں جے اصل گل دا پتا لگ سکے۔ ایوں آپؐ نے حضرت خیراش بن اُمیہ نوں مکے جان دا حکم دتا۔ مکے دے ہوڑ مت لوکاں نے سفارت دے منصب دی پرواہ نہ کر دیاں ہوئیاں اوہناں دا اونٹ مار سٹیا تے جناب خیراش نوں وی گھیر لیا۔ خلیس دے بندے، جیہڑے ایہہ سارا کچھ دیکھ رہے سن، اوہناں اگاں ودھ کے آپ دی جان بچائی۔

قریش دی ایہ حرکت چوکی ہر کھ جوگ سی تے ایس توں ایہہ پتا وی لگ رہیا سی کہ اوہ کسے وی طرحاں سدھے پاسے نہیں آؤنا چاہندے۔ ایوں مسلمان وی کچھ ہشیار ہو گئے تے سوچن لگ پے کہ قریش ایس توں اگے وی کوئی حرکت کر سکدے نیں۔ فیر ایوں ای ہوئی۔ اک راتیں قریش دے ۴۰/۵۰ بندیاں پہلے تے مسلماناں تے پتھر وگائے تے فیر اچن چیت خمیاں دے اندر آکے حملا کر دتا۔ مسلماناں نے کمال ہشیاری نال سارے بندے پھڑ کے حضورؐ دی خدمت وچ پیش کر دتے تے عرض گزاری کہ آقا! ایہناں نال کیہ سلوک کرن دا حکم دیندے او۔ امن تے بھلائی دے قائد نے اوہی حکم دتا جہدی اُمیدی۔ ارشاد ہوئی ”سارے ای چھڈ دیو۔“

عرب دے صدیاں پرانے رواج موجب حرام مہینیاں وچ جنگ و جدل دا سوچیا وی نہیں جاسکدا سی۔ دُجی چوکی وڈی گل ایہہ سی کہ حدیبیہ دی تھاں وی حرم دا حصہ سی پر قریش نے ایہناں دوواں گلاں دی پرواہ نہ کر دیاں ہوئیاں عمرے دی غرض نال آئے مسلماناں تے دھاوا بول دتا۔ مسلماناں نے بندے قیدی وی بنا لے پر فیروہی اوہناں نوں امن چمین نال واپس جان دی اجازت دے دتی۔ ایس وچ کیہ رازی؟ راز ایسی کہ اک معاہدہ ہون والا سی، جیہڑا بدامنی وچ ممکن نہیں سی، اجہیا معاہدہ جس نوں اللہ نے فتح مبین آکھیا۔

﴿وَهُوَ الَّذِي كَفَّ أَيْدِيَهُمْ عَنْكُمْ وَائْتَدِيَكُمْ عَنْهُمْ بِبِطْنٍ مَكَّةَ مِنْ بَعْدِ أَنْ أَظْفَرَكُمْ عَلَيْهِمْ﴾

(الفتح: ۲۴)

”تے اوہی اے جس نے مکہ دے لٹن وچ اوہناں دے ہتھ تہاڑے توں ڈکے تے تہاڑے ہتھ اوہناں توں،

ایس توں بعد کہ تسیں اوہناں نوں قابو کر چکے سی۔“

ایس توں بعد جناب رسول اللہؐ نے جناب عمر فاروق نوں یاد فرمایا تے حکم دتا کہ اوہ گل بات نوں اگے ٹورن تے مکے جاکے قریش نوں ملن۔ جناب فاروق نے صلاح دتی کہ ایہہ ڈپلومیسی داکم اے پر میں اپنے دل وچ مشرکاں دے خلاف جیہڑا بغض تے غصہ رکھدا ہاں، میرے کولوں اوہ چھپایا نہیں جانا۔ ایس لئی بہتر اے کہ ایس کم دی ذمہ داری جناب عثمان نوں دتی جاوے۔ حضرت عثمان دے خاندان دے کئی بندے مکے وچ موجود سن تے نالے اوہناں داکمے وچ چنگا اثر و رسوخ وی سی۔ حکیم اعظم نوں جناب عمر فاروق دی ایہہ گل چنکی لگی تے ایوں حتیٰ گل بات لئی جناب عثمان ذوالنورین مکے اپڑ گئے۔ حضورؐ نے جناب عثمان نوں ہدایت فرمائی کہ اوہ اہل مکہ دیاں غلط فہمیاں دور کرن تے اوہناں نوں ایس گل تے راضی کرن

کہ اوہ مسلمانانوں کعبہ دی زیارت کرن دی اجازت دے دین۔ آپؐ نے اوہناں نوں ایہہ ہدایت وی فرمائی کہ جے ہو سکے تے مکے وچ اچے تیکر وسوں کیتی بیٹھے مسلمان مرداں تے سوانیاں نوں ایہہ گل وی دسدے جانا کہ غم نہ کرن، اوکھے دن بس ملکن ای والے نیں، مکہ چھیتی ای فتح ہو جاوے گا تے دین حق نوں غلبہ مل جاوے گا ﴿۱﴾

جناب عثمان ذوالنورین اچے شہر وچ وڑے وی نہیں سن تے اوہناں دی اپنے چاچے دے پتر ابان بن سعید نال ملاقات ہو گئی۔ ابان نے آپؐ نوں اپنی امان وچ لے کے مکے دے لوکاں نوں ایہہ گل دس دتی۔ جدوں آپؐ نے قریش اگے رسول خدا دا پیغام رکھیا تے اوہ آکھن لگے کہ عثمان جی! سدھی گل تے ایہہ جے نئی جے کرتسیں آپؐ بیت اللہ دا طواف کرنا جے تے ضرور کرو پر ایس توں اگے کوئی شے ساڈے وارا وچ نہیں جے۔ جناب عثمان نے ہتھیرا سمجھایا کہ ”اسیں سارے بیت اللہ دی زیارت لئی آئے ہاں، جہدی تعظیم ساڈے دین دا حصہ ہے۔ اسیں قربانی دے جنور نال لیاندے نیں۔ بس اپنی گل اے، ایس توں بعد اسیں گھڑی پل وی مکے وچ نہیں ملنا۔“

”پر عثمان! تسیں سمجھ لوؤ کہ اسان قسم کھالئی اے کہ ایس سال اسان محمد نوں مکے وچ نہیں وڑن دینا۔“ قریش نے جواب دتا۔ ہن جناب عثمان نے ایہہ کوشش شروع کر دتی کہ مکے والیاں دی قسم ٹے بغیر کوئی اچھا حل نکل آوے کہ مسلمان طواف کعبہ تو محروم نہ ہوں۔ ایوں گل بات دا کھلار و دھدار ہیا۔ جناب عثمان کجھ بندے وچ لے کے کوئی حل کڈن دی چنتا کر دے رہے پر گل کسے پاسے نہ لگی۔ اٹنا نقصان ایہہ ہو گیا کہ ایس تاخیر پاروں مسلمانان وچ جناب عثمان دی شہادت دی افواہ پھیل گئی۔

بیعت رضوان:

مسلمان پہلوں ای ایس گل تے بھرے بیٹھے سن کہ مکے والیاں ادب والے مہینے وچ وی مسلمانانوں نہ صرف مکے وچ وڑن توں ڈک دتا اے سگوں حرم دی حدود دے اندر، حدیبیہ دی تھاں تے اوہناں تے حملہ کر کے پوری عرب روایت نوں پیراں تھلے مد کے رکھ دتا اے۔ ہن جدوں اوہناں نوں قتل عثمان دی چوٹی خبر ملی تے مسلمانان دا غم و غصہ دیکھن والا سی۔ ہر مسلمان پھٹر ہوئے شیر و انگ اپنے شکار تے جھپٹن لئی تیار سی۔ اک اک بندے نے تلواراں دے قبضیاں تے ہتھ رکھ لیا۔ خود رسول خدا نے اعلان فرما دتا کہ ہن میں اوہناں نال جوڑ پان توں بنا پٹیاں نہیں مڑاں گا۔ ﴿۲﴾ آپؐ نے صحابہ نوں حکم دتا کہ اوہ جان دی بازی لان واسطے تیار ہو جان۔ آپؐ نے جناب عمر فاروق نوں حکم دتا کہ اعلان فرما دیو:

﴿وَقَدْ نَادَىٰ عُمَرُ رَضِيَ اللَّهُ عَنْهُ أَنَّ رُوحَ الْقُدُسِ نَزَلَ عَلَىٰ رَسُولِ اللَّهِ صَلَّى اللَّهُ عَلَيْهِ وَآلِهِ

وَسَلَّمَ وَأَمَرَ بِالْبَيْعَةِ فَأَخْرَجُوا عَلَىٰ اسْمِ اللَّهِ وَبَايَعُوا﴾ ﴿۳﴾

”تے جناب عمر نے منادی کر دتی کہ لوکو! جناب رسول خدا تے جبرائیل امین نازل ہوئے نیں تے اوہناں

تھاڑے کولوں بیعت لین دا آکھیا اے۔ بس اللہ دا نام لے کے نکلو تے بیعت کرو۔“

پیغمبر اعظم کیکر دے اک رکھ نال ٹوہ لا کے کھڑے ہو گئے تے صحابہ کرام جناب عمر فاروق دا اعلان سنن توں بعد

۱۔ السيرة النبوية از احمد بن زبني جلد ۲ صفحہ ۱۸۵

۲۔ حیات محمد از محمد حسین ہیکل صفحہ ۴۶۴

۳۔ امتاع الاسماع جلد اول صفحہ ۲۲۴

پروانیاں وانگ شمع رسالت اُتے ڈگدے رے، تے اللہ تے اوس دے رسول دے حکم تے جان قربان کرن دا کارا کر دے رے۔ کڈی وڈھی تے کڈی عجیب داستان اے ایس عشق دی کہ گھرتوں ڈھائی سومیل دُور، بغیر حربی سامان توں سارے دے سارے بجن اک اجے دشمن نال ٹکریلین لئی تیار ہو گئے جیہڑا اپنے گھر وچ بیٹھاسی تے اوس دے غرور تے تکبر دی کوئی حد نہیں سی۔ ایہہ سارا کجھ صرف ایس لئی ہو گیا کہ واج مارن والے محمد رسول اللہ سن۔ ایس بیعت نوں توارخ اسلام وچ بیعت رضوان دے نام نال یاد کیتا جاندا اے۔

بھانویں ایہہ بیعت اک اجے قتل دا بدلہ لین لئی سی جیہڑا قتل ہو یا ای نہیں سی تے جناب عثمان ذوالنورین صحیح سلامت اپنے کپ وچ واپس پرت آئے سن پر فیروی اللہ ایس تے چوکھاراضی ہو یا: سورہ فتح وچ ایس دا ذکر ایس طرحاں ہے:

﴿لَقَدْ رَضِيَ اللَّهُ عَنِ الْمُؤْمِنِينَ إِذْ يُبَايِعُونَكَ تَحْتَ الشَّجَرَةِ فَعَلِمَ مَا فِي قُلُوبِهِمْ فَأَنْزَلَ السَّكِينَةَ عَلَيْهِمْ وَأَثَابَهُمْ فَتْحًا قَرِيبًا﴾ (الفتح: ۱۸)

”بے شک اللہ مومنوں تے اوس ویلے راضی ہو گیا جدوں اوہ اک درخت دے تھلے تہاڈے تھ تے بیعت کر رے سن۔ بس رب نوں علم سی جو کجھ اوہناں دے دلاں وچ سی۔ فی رب نے اوہناں تے تسلی نازل کیتی تے چھیتی ای اوہناں نوں فتح نال نوازا۔“

ایس موقع تے جس صحابی نوں سب توں پہلوں بیعت دا شرف حاصل ہو یا اوہ حضرت سنان بن ابی سنان بن وہب بن مھسن سن تے اخیر بیعت حضرت عثمان ولوں سی۔ اوہ ایس طرحاں کہ جدوں سارے صحابہ کرام بیعت کر چکے سن تے جناب رسول خدا نے اپنا سجا ہتھ مبارک اپنے کبھے تھ تے رکھیا تے اپنے مالک اگے عرض کیتی:

﴿اللَّهُمَّ هَذِهِ عَنْ عُثْمَانَ فَإِنَّهُ فِي حَاجَتِكَ وَحَاجَةِ رَسُولِكَ﴾

”اے اللہ! ایہہ تھ عثمان ولوں اے کیوں بے اوہ تیرے تے تیرے رسول دے حکم نال گیا ہو یا اے۔“

استھے اک چوکھ ضروری تے وڈھا سوال پیدا ہوندا اے کہ اک اوہ بندہ جیہڑا قتل ہو چکیا اے تے اوس دے ہی قتل دے بدلے لئی بیعت لئی جاری ہووے، اوس ولوں بیعت کرن دی کیہ لوڑ سی؟ فیہر بیعت وی ایوں دی کہ نہ صرف اوس ویلے دا سگوں پوری انسانی توارخ دا معتبر ہتھ، عثمان دا ہتھ بنیا۔ ایوں جا پدا اے کہ رسول خدا نوں علم سی کہ جناب عثمان شہید نہیں ہوئے سگوں سفارت کاری وچ رُجھے ہوئے نیں۔ تے فیہر سوال ایہہ پیدا ہوندا اے کہ بیعت کیوں لئی گئی۔ ایس سوال دے دو جواب سامنے آؤندے نیں۔ پہلا ایہہ کہ جویں رسول خدا نے جناب عمر نوں اعلان کرن دی ہدایت کر دیاں آکھیاں کہ ایہہ بیعت اللہ دے حکم نال سی۔ رب نے اپنے بندیاں نوں ایڈی وڈھی پھیل دا کجھ تے اجر دینا سی، تے اوہ اجر ایہہ سی کہ رب نے ایہ اعلان کرنا سی کہ ”لَقَدْ رَضِيَ اللَّهُ عَنِ الْمُؤْمِنِينَ“

دُجی حکمت ایہہ سی کہ مکے دے کافر جیہڑے اے تیکر مذاکرات نوں ناکام کرن تے تلے ہوئے سن، اوہناں تے رعب پے گیا کہ مسلمان ایڈے وی بے وسے تے کمزور نہیں بئی اوہناں نوں جنگ دا ڈراوا دے کے مرضی دیاں گلاں منوا

لو اس گے۔ ایسے بیعت دے نتیجے تے اوہناں نے فیراک سفارتی وفد سہیل بن عمرو دی سربراہی وچ حدیبیہ ول گھلیا۔
چیتے رہوے کہ ایس بیعت وچ مسلماناں دا جذبہ سلاہن جوگ سی۔ کئی مسلمان گھڑی مڑی بیعت لئی اگے ودھ رے
سن۔ حضرت سلمہ بن الاکوعؓ نے تن واری بیعت کیتی۔ پر بد قسمتی ویکھو کہ جد بن قیس سلمیٰ نے بیعت نہ کیتی۔ حضرت جابر
فرماندے نیں کہ میں ویکھیا کہ جد بن قیس اپنے اونٹ دے نال لگ کے لکھا ہونیا سی ﴿

سہیل بن عمرو اپنے دوڑے بندیاں حویطب تے مکرز بن حفص دے نال حدیبیہ دی تھاں تے حضور دی خدمت وچ
حاضر ہونیا تے آپؐ نے صحابہ نوں ایہ خوش خبری سنائی کہ ہن کم سدھا ہو جائے گا۔ آپؐ چار زانوں ہو کے بیٹھ گئے۔ سہیل وی
دوزانوں ہو کے بیٹھ گیا۔ جناب عبادہ بن بشر تے سلمہ بن اسلم حفاظتی دستے دے طور تے حضور دے کچے ادب نال کھڑے
ہو گئے۔ گل بات شروع ہو گئی۔ سہیل ایس گل تے اڑیا رہیا کہ مسلمان ایس سال عمرہ کیتے بغیر واپس جان گے۔ کئی واری گل
رولے وچ پئی تے سہیل اُچی اُچی بولن لگ پیا۔ حضرت عبادہ بن بشر کولوں نہ رہیا گیا تے اوہناں سہیل نوں سختی نال آکھیا
کہ اودہ بارگاہ رسالت وچ اُچی وارج نال گل کر کے بے ادبی داسزاوار نہ بنے۔

جدوں مذاکرات توڑ چڑھ گئے تے لکھن دی واری آئی۔ حضور نے جناب علی شیر خدا نوں معاہدہ لکھن دی ہدایت فرمائی
تے آکھیا کہ لکھو ”بِسْمِ اللّٰهِ الرَّحْمٰنِ الرَّحِیْمِ“۔ ایس کے سہیل نے اعتراض کیتا کہ اسیں اللہ نوں تے جان دے ہاں
پر رحمن تے رحیم داسناں نہیں پتہ۔ اوس نے زور دتا کہ عرب دے رواج موجب باسمک اللہم لکھیا جاوے۔ حضور
نے حضرت علی نوں حکم دتا کہ سہیل جویں کہند اے اوویں ای لکھو۔ فیر جدوں فریقین دے نام لکھن دی واری آئی تے حضور
نے اپنا نام مبارک محمد رسول اللہ لکھوایا۔ ایہہ سن کے سہیل آکھن لگا کہ جے ایہہ معاہدہ محمد رسول اللہ نال اے تے فیر باقی
کیہڑی گل رہ گئی اے، جھگڑاتے ایسے گل دا اے کہ اسیں تہانوں اللہ دار رسول من لئی تیار نہیں۔ ایس لئی تیں اتھے محمد بن
عبداللہ لکھو۔ امن تے سلامتی دے پیغمبر نے آکھیا کہ میں تے اللہ دار رسول ہی آں، تیں نہ منوتے تہاڑی مرضی اے۔
نال ای آپؐ نے جناب علی المرتضیٰ نوں حکم دتا کہ علی! میں محمد بن عبداللہ دی ہاں، بس توں ایہی لکھ دے۔ جناب علی المرتضیٰ
نے عرض کیتی کہ آقا! میرے ہتھ تے میرا قلم رسول اللہ دے اکھرتے لیک پھیرن دی جسارت نہیں کر سکدے۔ ایوں حضور
نے اپنے ہتھ نال ایہ لفظ کٹ دتا۔ ایس توں بعد ایس لکھت تے اتفاق ہو گیا:

”بِسْمِکَ اللّٰهُمَّ هَذَا مَا اصْطَلَحَ عَلَیْہِ مُحَمَّدٌ بْنُ عَبْدِ اللّٰهِ وَسَهْلُ بْنُ عَمْرِو اصْطَلَحَا عَلَی
وَضَعِ الْحَرْبَ عَشْرَ سِنِیْنَ یَاْمُنُ فِیْہَا النَّاسُ وَیَكْفُ بِعَظْمُہُمْ عَنْ بَعْضِ، عَلَی اَنَّہُ لَا اِسْلَالَ
وَلَا اِغْلَالَ۔ وَاِنَّ بَیْنَنَا عِیْبَةً مَّكْفُوْفَةً وَاِنَّہُ مِنْ اَحَبِّ اَنْ یَدْخُلَ فِیْ عَہْدِ مُحَمَّدٍ وَعَقْدِہُ فَعَلَ
وَاِنَّہُ مِنْ اَحَبِّ اَنْ یَدْخُلَ فِیْ عَہْدِ قُرَیْشٍ وَعَقْدِہَا فَعَلَ وَاِنَّہُ مِنْ اَتٰی مُحَمَّدًا مِنْہُمْ بِغَیْرِ اِذْنِ
وَلِیْہِ رَدَّہُ مُحَمَّدٌ اِلَیْہِ وَاِنَّہُ مِنْ اَتٰی قُرَیْشًا مِنْ اَصْحَابِ مُحَمَّدٍ لَمْ یَرُدُّوْہُ۔ وَاِنَّ مُحَمَّدًا یَرْجِعُ عَنَّا
عَامَةً هَذَا بِاَصْحَابِہِ وَیَدْخُلُ عَلَیْنَا مِنْ قَابِلٍ فِیْ اَصْحَابِہِ وَیُقِیْمُ بِہَا ثَلَاثًا۔ وَلَا یَدْخُلُ عَلَیْنَا

بِسَلَّاحٍ إِلَّا سَلَّاحُ الْمُسَافِرِ الشُّيُوفُ فِي الْقَرَبِ.

”اے اللہ! تیرے نام نال۔ ایہہ اوہ معاہدہ اے جہدے تے محمد بن عبد اللہ تے سہیل بن عمرو نے صلح کیتی اے کہ دس ورہیاں تیکر دوواں دھراں وچ جنگ نہیں ہووے گی، لوکی امن نال رہن گے تے کوئی کسے تے ہتھ نہیں چکے گا۔ کوئی چوری تے خیانت وی نہیں کرے گا۔ اک دُجے دے رازنوں راز رہن دیواں گے۔ جس قبیلے دی مرضی ہووے اوہ محمد نال معاہدہ کر لوے تے جہد دل کرے اوہ قریش نال کر لوے۔ مکے والیاں وچوں جیہڑا بند اپنے ولی دے اذن توں بغیر محمد ول جائے گا تے محمد اوس بندے نوں واپس کر دین گے تے جے محمد دے اصحاب وچوں کوئی بند قریش ول جائے گا تے اوہ اوس نوں واپس نہیں کرن گے۔ تے محمد اس سال اپنے اصحاب سنے واپس (مدینے) چلے جان گے۔ اگلے ورھے اپنے اصحاب نال عمرہ کرن لئی آؤن گے تے تن دیہاڑے مکے وچ ٹھہرن گے۔ اوہناں کول تلوار توں وکھ کوئی ہتھیار نہیں ہووے گا تے تلواراں وی نیاں ماں دے اندر ہون گیناں۔“

ایس صلح نامہ تے گواہ دے طور تے جناب ابو بکر صدیق، جناب عمر بن خطاب، جناب علی المرتضیٰ، جناب عثمان بن عفان، جناب عبدالرحمن بن عوف، جناب عبد اللہ بن سہیل بن عمرو، جناب سعد بن ابی وقاص تے جناب محمد بن مسلمہ نے دستخط فرمائے۔ قریش ولوں سہیل بن عمرو، مکرز بن حفص تے حویطب بن عبد العزیٰ نے دستخط کیتے۔

صلح حدیبیہ دیکھن نوں تے مسلماناں لئی چوکھا گھٹے داسودا سی۔ اوہناں دی حالت ایہہ سی جویں حدیبیہ دی دھرتی اوہناں دے کیجے کھا گئی ہووے۔ اوہناں نوں ایہہ قبول تے گوارا سی کہ اوہ اپنیاں جاناں قربان کر دین پر قریش نال قریش دیاں شرطیں تے صلح، اوہناں لئی بڑی ذلت تے بے عزتی دی گل سی۔ اوہ شاناں والے صحابہ جہناں نوں رسول خدا اگے کسے کافر دا اُچی واج نال گل کرنا وی پسند نہیں سی اوہ آپ رسول خدا کولوں وضاحتاں تے ویرویاں دے چاہن وندن۔ جناب عمر فاروق تے اصلوں ای اپنے جذبات تے قابو نہ رکھ سکے۔ پریشانی تے دکھ دی حالت وچ جناب ابو بکر صدیق کول گئے تے آکھن لگے:

ابو بکر جی! ایہ دسو کہ حضور اللہ دے سچے نبی نہیں؟

”ہے نیں“ (جناب ابو بکر نے جواب دتا)

”کیہ اسیں حق اُتے تے قریش باطل اُتے نہیں؟ کیہہ ساڈے مقتول جنت وچ تے اوہناں دے مقتول دوزخ وچ نہیں؟“

”ہاں ابن خطاب بنا شبہ ایوں ای ہے۔“

”فیر اسیں دین دے معاملے وچ ایہہ ذلت کیوں برداشت کیتی اے جدوں کہ اللہ نے اے ساڈے تے اوہناں

وچکار کوئی فیصلہ نہیں کیتا۔“ جناب عمر نے پچھیا

ذرا شان صدیقی ویکھو۔ جواب دیندے نیں:

”اے اللہ دے بندے! حضور اللہ دے رسول نیں تے اوہ اپنے رب دی نافرمانی نہیں کر دے تے رب ای اوہناں دا

مددگارے۔ ایس لئی حضورؐ دادامن ہمیش پھڑی رکھو۔ رب دی سونہ آپ حق اُتے نیں تے نالے اللہ دے سچے رسول نیں۔“
 ”میں وی گواہی دیندا ہاں کہ حضور اللہ دے رسول نیں پر ایہہ دسو کہ کیہ حضور نے ایہہ نہیں سی فرمایا کہ اسیں بیت اللہ
 دی زیارت کراں گے تے نالے طواف کراں گے۔“

”بے شک حضور نے ایوں ای فرمایا سی۔ پر ابن خطاب! ایہہ دسو کہ کیہ حضور نے ایہہ فرمایا سی کہ تسیں ایسے سال ای
 خانہ کعبہ دا طواف کرو گے؟“ جناب صدیق اکبر نے پچھیا۔
 ”نہیں خیر، ایہہ تے نہیں سی آکھیا“ جناب فاروق نے جواب دتا۔
 ”تے فیراے فاروق! تسلی رکھو کہ جو اوہناں فرمایا، اوویں ای ہووے گا۔“

حضرت عمر فاروق دی بے چینی اوہناں دی رسول خدا نال محبت تے اپنے دین تے استقامت دی چوکی وڈی دلیل
 اے پر فیروسی آپ پوری حیاتی پریشان رہے کہ حدیبیہ دی تھاں تے اوہناں دی استقامت وچ کیوں تے کوں گھانا آ گیا
 سی۔ آپ نے اپنی اس پریشانی دا اک وار آپوں ذکر کیتا سی۔ آکھدے نیں کہ ”اوہ گلاں جیہڑیاں میرے منہوں نکلیاں سن
 اوہناں دی تلافی لئی میں صدقے کردا رہیا، روزے رکھدا رہیا، نفل پڑھدا رہیا تے غلام آزاد کردا رہیا تاں جے جیہڑی
 لغزش اوس دن میرے کولوں ہوئی سی، اللہ اوس نوں معاف کر دیوے۔ ایہہ کم اوہوں تیکر کردا رہیا جدوں تیکر مینوں خیر دی
 اُمید نہیں سی ہو گئی۔“

ایس صورت حال دا ذکر اک مستشرق نے بڑے سوہنے اکھراں نال کیتا اے:

"The Muslims were very disappointed and showed it but Muhammad and Abu Bakr were more farsighted. At the cost of a great many concessions, some of which were humiliating but not really benificent, they had got what they wanted. The Qurayshites had negotiated with Muhammad, and had therefore recognised his authority. Most important of all, they had admitted that he and his men were respectable followers of the cult of the city. since they were to be allowed to come and practise it there the next year. The implications of all this were very soon apparent." □

”مسلمان چو کھے مایوس ہو چکے سن تے اوہناں ایس مایوسی دا اظہار وی کیتا۔ پر جناب محمد تے ابو بکر چو کھی
 ڈوگھی نظر والے بندے سن۔ کئی ساریاں رعائتاں دے مل تے جہناں وچ کجھ رسوا کن وی سن، بھانویں غیر
 اہم ای سہی، اوہناں نے اوہ سب کجھ حاصل کر لیا جو اوہناں نوں چاہیدا سی۔ قریش نے محمد نال مذاکرات کر
 کے اوہناں دی حیثیت نوں تسلیم کر لیا سی۔ سب توں وڈی گل ایہہ ہے کہ قریش نے ایہ من لیا سی کہ محمد تے
 اوہناں دے اصحاب مکے دے دین تے چلن والے عزت جوگ بندے نیں، ایسے لئی اوہناں نوں اگلے سال

سبل الہدی جلد ۵، صفحہ: ۸۷

مکے آؤں تے عمرہ کرن دی اجازت دے دتی گئی سی۔ ایہناں ساریاں گلاں دا کیہ مطلب سی، ایہ بڑی چھیتی ظاہر ہون والا سی۔“

جدوں میثاق حدیبیہ لکھیا جا رہیا سی اوہدوں سہیل بن عمرو دا پتر ابو جندل، جیہڑا مسلمان ہو چکیا سی پر سہیل نے اوس نوں بیڑیاں پائیاں ہوئیاں سن، بیڑیاں سنے کسے نہ کسے طرحاں حدیبیہ اپڑ گیا۔ سہیل نے جدوں اپنے پتر نوں ویکھیا تے غصے نال لال پیلا ہو گیا۔ اوس نے ابو جندل نوں گریبان توں پھڑ لیا تے چنگار جھ کے کٹیا۔ فیر آکھن لگا کہ اے محمد! ایہ پہلا بندہ اے جیہڑا آج دے معاہدے موجب تساں سانوں واپس پرانا اے۔ جناب رسول اللہ نے سہیل نوں جواب دتا کہ اے تے معاہدہ لکھیا جا رہیا اے۔ ایس دا نافرمان ہونا تے بعد دی گل اے، اے تے دستخط وی نہیں ہوئے۔

”چلو جے ایہ گل اے تے فیر معاہدہ کا لعدم سمجھو۔“ سہیل نے جواب دتا۔

جناب رحمت العالمین کولوں ابو جندل دی حالت ویکھی نہ گئی تے سہیل نوں آکھن لگے کہ جے میں تہا نوں ذاتی درخواست کراں کہ ایس نوں میرے کول رہن دیو تے کیہ جواب دیو وگے؟ سہیل نے جواب دتا کہ ”میرا جواب فیرو نہیں وچ ہی اے۔“ ابو جندل ایہہ سارا کچھ ویکھ تے سن رہے سن۔ جدوں اوہناں نوں ایہہ احساس ہو گیا کہ اوہناں نوں واپس مکے جانا پوے گاتے اوہناں مسلماناں دا بڑا ہی ترلا ماریا کہ ہن اوہناں دی پہلے توں وی چوکی شامت آؤنی اے پر ایفائے عہد تے ملت دے اجتماعی مفاد دا تقاضا ایہی سی کہ ابو جندل نوں اوہدے باپ نال واپس کر دتا جاوے۔ حضور نے تے جناب عمر فاروق نے ابو جندل نوں تسلی دتی کہ انشاء اللہ چنگے دن آؤں والے نیں، بس تھوڑے صبر دی لوڑ اے۔ جناب عمر فاروق نے تے غصے وچ ایہہ وی آکھ دتا کہ ”ابو جندل! ایہہ مشرک لوگ نیں۔ ایہناں وچ ہر اک دا خون ایوں ہے جو یں کتے دا خون“ جناب عمر آکھدے نیں کہ ایس توں بعد اوہناں نوں ایہہ اندیشہ وی ہو گیا کہ کدرے ابو جندل اپنے باپ نوں قتل ای نہ کر دیوے۔ ایوں ابو جندل نوں واپس مکے بھیج دتا گیا۔

معاہدے دی لکھت توں بعد جناب رسول خدا نے احرام کھول دتا تے قربانی دے جنور ذبح کر دتے۔ اپنے آقا دی پیروی کر دے ہوئیاں صحابہ کرام نے وی احرام کھول دتے تے قربانیاں کر دتیاں۔ کوئی ۱۹/۲۰ دناں دے قیام توں بعد تھکے ہوئے جیسے تے ٹٹے ہوئے دل لے کے مسلماناں دا ایہ قافلہ مدینے ول پرت گیا۔ واپسی تے جدوں عسفان دی تھاں تے اپڑے تے کھان پین دا سامان مک گیا۔ صحابہ کرام چوکھے پریشان ہوئے تے حضور کولوں کچھ جنور ذبح کرن دی اجازت منگی پر جناب عمر فاروق نے مخالفت کیتی تے آکھن لگے کہ اے چوکھا سارا سفر باقی اے، سواری دے جنوراں نوں ذبح کر کے تنگ ہون والی گل اے۔ اوہناں ایہ وی صلاح دتی کہ سارے صحابہ اپنا اپنا راشن پانی حضور کول اکٹھا کر دیں۔ حضور برکت دی دُعا فرمان گے تے اللہ سانوں منزل تے اپڑا دیوے گا۔ حضور نے جناب عمر دی گل من لئی تے کھانے تے دُعا فرمائی۔ تقریباً ڈیڑھ ہزار بندے نے رجبہ کے کھانا کھالیا، سکھنے پانڈے تے تھیلے فیر بھر لے پر راشن دی ڈھیری اوڈی دی اوڈی ای رہی۔ رب دی عطا دا ایہ نظارہ ویکھ کے غریب پرور آقا حسن لگ پے تے اوہ وی ایوں کہ دندان مبارک ظاہر ہو گئے۔

عشاق مصطفیٰ دایہ قافلہ جدوں کراغ الغمیم دی تھاں تے اڑیا۔ تے رب نے اپنے محبوب نوں ایہ شخمیری سنائی۔

﴿إِنَّا فَتَحْنَا لَكَ فَتْحًا مُّبِينًا﴾ (الفتح: ۱)

”بناشبہ اسیں تہا نوں اک اجہی فتح دتی جہدے وچ کوئی شبانہیں۔“

رب دے ایس نترے ہوئے سنیپے توں بعد مسلماناں دی بے چینی ختم ہو گئی تے اوہ اوہناں دناں نوں اڈیکن لگ پے جہناں وچ اوہ اس فتح مبین دے نظارے ویکھدے۔

ایس کم لئی مسلماناں دیاں اکھاں نوں چوکھے چراں تیکر اڈیکن دی زحمت نہیں کرنی پئی سگواں ایہہ کم مسلماناں دے مدینے اپڑن توں وی اگدیں شروع ہو گیا سی۔ بدیل بن ورقاء، عروہ بن مسعود تے حبشی سردار حلیس ورگے سفارت کاراں نوں قریش نے اوہدوں ای نراض کر لیا سی۔ اوہناں لوکاں نے اپنیاں اکھاں نال رسول خدا دی تعظیم تے مسلماناں دی تنظیم دے نظارے ویکھے سن تے اوہ ایس حد تیکر متاثر ہو چکے سن کہ محمد رسول اللہ دے نیڑے ہون دی خواہش دیاں چنگاریاں اوہناں دے دلاں اندر تلکھن لگ پیاں سن۔

ایس صلح دی وجہ توں آل دوالے دے رستے محفوظ ہو گئے سن تے اسلامی سفارت کار تے پیام ور چوکھے امن چین نال دعوت اسلام داکم کرن لگ پے۔ دنیا دے بادشاہواں نوں دعوت اسلام لئی خط لکھے گئے تے لوکاں نوں ایس نویں دین دی خبر مل گئی۔ قریش ولوں کسے خطرے توں بے نیاز ہون توں بعد آپ خیرول ودھے تے فتح خیبر دے نتیجے تے مسلماناں دی نہ صرف سیاسی حیثیت بہتر ہوئی سگواں مالی طور تے وی اطمینان نصیب ہو گیا۔ اسلام دے دائرے وچ داخل مسلمان جتھے دی تعداد ڈیڑھ ہزار سی تے جدوں ۲۱ مہینیاں دے بعد قریش دے معاہدہ توڑن پاروں رسول خدا قریش نوں ہتھ پاؤن لئی مکے ول ودھے تے اوہدوں آپ دے جاں نثاراں دی تعداد دس ہزار سی۔ آپ دی بے پناہ حکمت تے دانش وری نال مکہ مکرمہ فتح ہو گیا۔ اوس موقع تے جدوں بیت اللہ دی چابی جناب رسول خدا نوں پیش کیئی گئی تے حکیم اعظم نے فرمایا کہ عمر بن خطاب نوں بلاؤ۔ جدوں عمر حاضر ہوئے تے آپ نے چابی ول اشارہ کر کے فرمایا کہ عمر هذا الذی قُلْتُ لَكُمْ (ایہہ او چیز اے جہیڑی میں تہا نوں آکھی سی) فیر جدوں ۱۰ھ وچ حجۃ الوداع دے موقع تے حضور نے عرفات وچ قیام فرمایا تے آپ نے اک وار فیر جناب عمر نوں یاد کرایا کہ عمر هذا الذی قُلْتُ لَكُمْ۔ ایس صلح مبین دیاں برکتاں دا ذکر ادھورا رہوے گا جے ایس واقعے دا ذکر نہ کیتا جاوے تے۔

ہوینا ایہہ کہ مکے وچ اک نوجوان ابوبصیر حق دی دعوت قبولن دے جرم وچ اہل مکہ دا ظلم تے جبر برداشت کر رہیا سی۔ اوہناں ابوبصیر نوں لوہے دے سنگل مار کے اک کوٹھڑی وچ بند کیتا ہو گیا سی۔ اوہ کسے طرحاں سنگل تڑوا کے قید وچوں آزاد ہو گیا تے پکھا پاہنا لے پینڈے کٹ دا شیع رسالت تے آڈ گیا۔ مدینے دے امن چین تے محبوب دی قربت نال ابوبصیر نوں ایوں جاپیا جو یں اوہ جنت وچ آوڑیا اے پر ابے تن دیہاڑے ای گزرے سن تے اک نویں مصیبت نے اوس وچارے دے بوہے دی کنڈی کھڑکا دتی۔

مکے توں کوثر تے خنیس عامری نام دے دو بندے مدینے اپڑ گئے۔ اوہناں ابوبصیر دے قبیلے دے اخنس بن شریق تے

از ہر بن عبدعوف دا اک خط پیش کیتا جہدے وچ ابوبصیر دی واپسی دی منگ کیتی گئی سی۔ معاہدے دے مطابق رسول خدا نے ابوبصیر نوں اوہناں دے حوالے کر دتے اوس نوں تسلی دتی کہ اللہ اوس لئی نجات دار ستا کڈے گا۔ ابوبصیر چوکھا پریشان ہوئیا پر صحابہ نے وی تسلی دتی کہ سرکار دی زبان مبارک توں ایہ گل نکل گئی اے کہ اللہ تیری نجات تے رہائی دا بوہا کھول دے گا تے بس فیرا نشاء اللہ ایوں ای ہووے گا۔ ایوں ابوبصیر نوں اہل مکہ دے نمائندیاں دے حوالے کر دتا گیا۔

کوثر تے خنیس، ابوبصیر نوں نال لے کے مکے ول پرت گئے۔ ذوالحلیفہ اپڑے تے ظہر دا ویلا ہو گیا سی۔ ابوبصیر نے نماز پڑھی، کھجور اں والی پوٹلی کھولی، نال دیاں وی روٹی کڈی تے رل کے کھان لگ پے۔ روٹی توں بعد گلاں وچ لگ گئے۔ خنیس اپنی تلوار دیاں تعریفاں کرن لگ پیتے آکھن لگا کہ ایس نال میں مدینے والیاں دا قتل عام کراں گا۔ ابوبصیر نے اوس نوں گلاں وچ لا کے تلوار آپوں پھڑائی تے خنیس دے سنہلن توں پہلوں ای اکو وار وچ اوس داکم کر چھڈیا۔ کوثر نے ایہہ ویکھ کے مدینے ول دھڑکی لا دتی تے مسجد نبوی وچ حضور گول جا پڑیا۔ ہن اوس دی منگ ابوبصیر نہیں سی سگوں اپنی جان دی امان سی۔ رحمت عالم نے اوس نوں اپنی پناہ وچ لے لیا۔ تھوڑی ای دیر بعد ابوبصیر وی اپڑ گیا تے عرض کیتی کہ کارے پورے کرن والے سوہنے آقا! تسلیں اپنا کارا پورا کر چھڈ یا سی۔ مینوں دشمن دے حوالے کر دتا سی پر میں اپنا دین بچا کے فیرا حاضر ہوئیا۔ حضور نے فرمایا کہ ابوبصیر! تیری گل ٹھیک اے پر میں اے وی تینوں مدینے وچ نہیں رکھ سکدا۔ تیرا جدھر دل کردا اے، ٹر جا۔

کمال دی گل نہیں کہ ابوبصیر مسلمان وی اے، دکھ تے سقاں وی جھلیاں نیں، شیع رسالت تے جان وارن لئی وی تیار اے، آقا دے حکم دی تعمیل وچ اپنی جان نوں وی خطرے وچ پا چکیا اے، فیرو حکم ایہہ ہے کہ ”ابوبصیر چلا جا، مدینہ چھڈ کے کدرے ہو رتھاں چلا جا، میں تینوں اتھے نہیں رکھ سکدا، کیوں جے میرا دین کیتے کارے توڑن دی اجازت نہیں دیندا۔“ دُجے پاسے ویکھو کہ ابوبصیر توں بلکل ای اُلٹ دشمن اسلام کوثر جناب رسالت وچوں امان پا گیا کہ اوس ہستی دی رحمت اللعالمینی دا ایہی تقاضا سی۔

ابوبصیر نے حکم رسالت دی تعلیم وچ مدینہ منورہ چھڈ دتا تے سیف البحر دی تھاں تے جا کے ڈیرے لالے، جیہڑی مکے دے تجارت دے رستے تے پیندی سی۔ جیہڑیاں دو چار کھجور اں پلے ہے سن پہلوں تے اوہناں تے گزارا کیتا تے فیر سمندر دیاں مچھلیاں تے۔ جدوں ابوبصیر دے ہتھوں خنیس دے قتل تے ہن اوس دے سیف البحر دی تھاں تے ڈیرے دی خبر مکے اپڑی تے او تھے تھڑھلی مچ گئی۔ مکے والیاں دے ظلم تے جبر توں تنگ سارے مسلمان ہولی ہولی ابوبصیر دے ڈیرے ول بھج گئے۔ حدیبیہ دی تھاں تے مکے واپس کیتے جان والے ابو جندل وی او تھے اپڑ گئے تے ابوبصیر دی تھاں تے جتھے دے لیڈر بن گئے۔ ابو جندل دے آؤن تیکر اوہناں لوکاں دی تعداد سترسی پر فیرو بنو غفار، اسلم تے جہینہ قبیلیاں دے بندیاں دے نال رلن نال اوہناں دی تعداد سو تیکر اپڑ گئی۔ تجارتی رستے اُتے ہون پاروں اوہناں مکے والیاں دی چنگی خاطر کیتی تے جیہڑا تجارتی جتھا او تھوں لنگدا، اوس توں ہر شے کھوہ موہ لیندے تے دل کردا تے بندے وی مار دیندے۔ ایوں اوہناں نے مکے والیاں داک وچ دم کر دتا۔ اخیر ابوسفیان آپوں حاضر ہوئیا تے حضور اگے عرض گزاری کہ اوہناں بندیاں نوں مدینے بلا

لیا جاوے، اسیں اعتراض نہیں کراں گے۔ اَمَن تے راستی دے پیغمبر نے ایہ گل من لئی تے ابوبصیر تے ابوجندل نوں اپنے مسلمان ساتھیاں نال مدینے آؤن دی ہدایت کردتی۔

رسول خداؐ دا خط جدوں سیف الحرا پڑیا تے ابوبصیر حالت نزع وچ سن۔ اوہناں اپنے پیارے آقاؐ دا حکم نامہ پڑھنا شروع کیتا، خط وچوں محبوب دے لمس نوں محسوس کیتا، اوس دی مہک نال اپنی روح نوں تسکین دتی تے نال ای جان مالک دے حوالے کردتی۔ ابوجندل نے نماز جنازہ پڑھائی تے اوہ تھے ای تدفین کردتی۔ ابوجندل نے اوہ تھے اک مسجد وی تعمیر کردتی۔ تاں جے مسافر اوہ تھے نماز وی پڑھن تے اوس عاشق صادق دی قبر دی زیارت کر کے ایس گل داوی مزہ لین کہ محمد رسول اللہؐ نال پیار کرن والیاں نوں اللہ کوں زندہ رکھدا اے۔

صلح حدیبیہ تے مسلمان سوانیاں:

اسلام دے کٹر دشمن عقبہ بن ابی معیط دی بیٹی اُم کلثوم مسلمان ہو چکی سی۔ مکے وچ اوہ اپنے لوکاں دے ہتھوں بڑی دکھی سی۔ اک دن اوس نوں موقع ملیا تے اوہ مدینے وچ جناب رسول اللہؐ دی خدمت وچ حاضر ہو گئی۔ اوس دے دو بھرا عمارہ تے ولید اوس دا چچا کر دے ہوئے مدینے اپڑ گئے تے اوس دی واپسی دا مطالبہ کیتا۔ حضورؐ نے اوہناں دی گل نہ منی تے فرمایا کہ حدیبیہ دے معاہدے وچ کسے سوانی دی واپسی دا کوئی ذکر نہیں تے نہ ای کوئی مسلمان سوانی کسے مشرک مرد دی گھر والی بن سکدی اے۔ چیتے رہوے کہ اُم کلثوم، عمرو بن عاص دے نکاح وچ سن جے اے تیکر اسلام قبول نہیں کیتا سی۔

اک دو جا واقعہ ایہہ وی پیش آیا سی کہ سعیدہ بنت حارث اسلمیہ مسلمان ہو گئی پر اوس دے خاوند صفی بن النصب نے اسلام قبول نہ کیتا۔ سعیدہ مکے توں دوڑ کے رسول خداؐ دی خدمت وچ حاضر ہوئی تے گمراہی صفی وی اپڑ گیا۔ اوس نے وی ایہ مطالبہ کیتا کہ اوس دی سوانی واپس کیتی جاوے۔ پر آپؐ نے جواب دتا کہ میثاق حدیبیہ سانوں عورتاں دی واپسی دا پابند نہیں کردا۔ ایس طرحاں دے حالات وچ اللہ تعالیٰ نے ایہہ پالیسی جاری فرمائی کہ:

﴿يَا أَيُّهَا الَّذِينَ آمَنُوا إِذَا جَاءَكُمُ الْمُؤْمِنَاتُ مُهَاجِرَاتٍ فَامْتَحِنُوهُنَّ ۚ اللَّهُ أَعْلَمُ بِإِيمَانِهِنَّ ۚ اللَّهُ
أَعْلَمُ بِإِيمَانِهِنَّ فَإِنْ عَلِمْتُمُوهُنَّ مُؤْمِنَاتٍ فَلَا تَرْجِعُوهُنَّ إِلَى الْكُفَّارِ لَا هُنَّ حِلٌّ لَّهُمْ وَلَا هُمْ
يَحِلُّونَ لَهُنَّ﴾ (الممتحنہ: ۱۰)

”اے ایمان والیو! جدوں تہاڈے کول مسلمان سوانیاں ہجرت کر کے آجان تے اوہناں دی پرکھ پڑچول کر لوؤ۔ اللہ تے اوہناں دے ایمان نوں چنگی طرحاں جان دا اے۔ فیر جدوں تہانوں ایہ پتہ لگ جاوے کہ اوہ سچ مچ مومن نیں تے اوہناں نوں کافراں ول نہ پرتاؤ۔ نہ تے اوہ کافراں لئی حلال نیں تے نہ ای کافراں اوہناں لئی حلال نیں۔“

۶ھ دے کچھ ہو رواقعات

شراب حرام ہوگئی:

مورخان تے سیرت لکھیاراں وچ ایس گل تے چوکھا اختلاف اے کہ شراب کدوں حرام قرار دتی گئی۔ کوئی چار ہجری نوں درست من دا اے تے کوئی ۶ ہجری نوں۔ اصل وچ گل ایہ ہے کہ شراب دی حرمت دے اشارے ایس دی قطعی حرمت توں پہلے ملنا شروع ہو گئے سن تے ہوسکدا اے کہ ایہناں اشاریاں دی بنیاد تے ای کچھ بزرگاں نے ایہہ آکھ دتا ہووے کہ شراب ۶ ہجری توں پہلے ہی حرام ہوگئی سی۔ حرمت شراب دے سلسلے دی سب توں پہلی آیت ایہی۔

﴿وَمِنْ ثَمَرَاتِ النَّخِيلِ وَالْأَعْنَابِ تَتَّخِذُونَ مِنْهُ سَكَرًا وَرِزْقًا حَسَنًا إِنَّ فِي ذَلِكَ لَآيَةً لِّقَوْمٍ يَعْقِلُونَ﴾ (النحل: ۶۷)

”تے کجور تے انگور دے پھلاں توں تسمیں نشہ (وی) حاصل کر دے او تے پاک رزق (وی) بنا شبہ ایہدے وچ (وی) عقل والیاں لئی (ساڈی قدرت دیاں) نشانیاں نیں۔“

اس آیت کریمہ وچ اشارہ ایہ ہے کہ انسان کجور تے انگور دے پھلاں توں دو طرحاں دیاں چیزاں بناندا اے۔ اک نشہ آور چیز جنہوں خمر یا شراب آکھیا جاندا اے تے دوسری رزق حسن یعنی چنگا رزق، کہ کجور تے انگور بھانویں تازہ کھالے جاون تے بھانویں سکا کے۔ مقصد ایہ وے کہ اللہ نے اپنی قدرت نال کجور تے انگور دے پھل انسان نوں دے دتے نیں تے نال ای اوہناں نوں ورتن دا اختیار وی۔ ہن ایہہ بندے دی اپنی مرضی اے کہ اوہ نشہ والی چیز بنا کے عقل نوں خراب کرے یاں غذا بنا کے طاقت حاصل کرے۔ اللہ نے ایس آیت وچ سکّر دے مقابلے تے رزق حسن دا ذکر کر کے ایہہ دس دتا اے کہ سکّر کیہ اے۔ چوکھے مفسراں دے نیڑے سکّر دے معنی نشہ آور مشروب ای اے۔ ایس آیت دے نزول دے ویلے شراب حلال سی تے مسلمان پیندے پیاںدے وی سن پر ایس وچ اشارہ دتا گیا کہ ایس دا پینا چنگا کم نہیں ۱۱۱ کچھ چراں بعد ایہ آیت نازل ہوئی:

﴿يَسْأَلُونَكَ عَنِ الْخَمْرِ وَالْمَيْسِرِ قُلْ فِيهِمَا إِثْمٌ كَبِيرٌ وَمَنَافِعُ لِلنَّاسِ وَإِثْمُهُمَا أَكْبَرُ مِنْ نَّفْعِهِمَا﴾ (البقرة: ۲۱۹)

”اوہ تہاڈے کولوں شراب تے جوئے ولوں پچھدے نیں۔ تسمیں فرما دیو کہ ایہناں دوواں وچ وڈھا گناہ اے (بھانویں) لوکاں لئی کچھ فیداوی اے پر ایہناں دا گناہ فیدے نالوں چوکھا وڈا اے۔“

ایس آیت توں بعد کچھ لوکاں شراب چھڈ دتی پر کچھ پیندے رے۔ اک دن حضرت عبدالرحمن بن عوف نے کچھ

سجناں دی روٹی ور جی۔ روٹی توں بعد شراب دا دور چلیا۔ اے شراب دے نشے وچ ہی سن تے نماز مغرب دا ویلا ہو گیا۔
اوتھے ای باجماعت نماز شروع کر دتی۔ جس دوست امامت کرائی، اوس نے سورہ کافرون تلاوت کیتی تے ساری غلط پڑھی۔
اوس ویلے ایہ آیت کریمہ نازل ہوئی۔

﴿يَا أَيُّهَا الَّذِينَ آمَنُوا لَا تَقْرَبُوا الصَّلَاةَ وَأَنْتُمْ سُكَرَىٰ حَتَّى تَعْلَمُوا مَا تَقُولُونَ﴾

(النساء: ۴۳)

”اے ایمان والیو! جدوں تسیں نشے دی حالت وچ ہوو تے نماز دے نیڑے نہ جاؤ، اوہدوں تیکر کہ تہانوں
اوس گل دی سمجھ لگ جاوے جو تسیں بولدے او۔“

ایس حکم الہی توں بعد وی سارے مسلماناں نے شراب ترک نہ کیتی۔ کجھ مسلمان شراب نوشی کر دے رے پر اوس ویلے
جدوں کسے نماز تے کوئی فرق نہ آوے جو یں کہ فجر یاں عشاء دی نماز توں بعد چوکھا وقت مل جاندا اے۔ فیراک واریاں
ہوئیا کہ حضرت عثمان بن مالک نے کجھ دوستاں دی دعوت کیتی۔ پروہنیاں وچ حضرت سعد بن ابی وقاص وی شامل سن۔
ساریاں نے ہی رل کے شراب پیتی تے نشے وچ فضول بولنا شروع کر دتا۔ حضرت سعد نے مدہوشی وچ کجھ اچھے شعر پڑھے
جہدے نال اک انصاری مسلمان غصے وچ آ گیا تے اونٹ دے جڑے دی اک ہڈی حضرت سعد دے سرو وچ دے ماری۔
آپ نوں چوکی سٹ لگی تے شکایت کرن لئی دربار رسالت وچ اپڑ گئے۔

جدوں حضرت سعد بن ابی وقاص رسول خدا کول تشریف لیائے تے اوتھے حضرت عمر فاروق وی تشریف رکھدے سن،
جیہڑے شراب دے پیدا کیتے مسلیں ہتھوں چوکھے پریشان سن۔ اوہناں نے بارگاہ الہی وچ التجا کیتی کہ اے اللہ! شراب
ولوں کوئی نتریا ہو یا حکم نازل فرما۔ رب نے اپنے محبوب دے محبوب دی گل کدوں موڑنی سی۔ اوسے ویلے وحی نازل ہوئی:

﴿يَا أَيُّهَا الَّذِينَ آمَنُوا إِنَّمَا الْخَمْرُ وَالْمَيْسِرُ وَالْأَنْصَابُ وَالْأَزْلَامُ رِجْسٌ مِّنْ عَمَلِ الشَّيْطَانِ
فَاجْتَنِبُوهُ لَعَلَّكُمْ تُفْلِحُونَ ۝ إِنَّمَا يُرِيدُ الشَّيْطَانُ أَنْ يُوقَعَ بَيْنَكُمْ الْعَدَاوَةَ وَالْبَغْضَاءَ فِي
الْخَمْرِ وَالْمَيْسِرِ وَيَصُدَّكُمْ عَنْ ذِكْرِ اللَّهِ وَعَنِ الصَّلَاةِ فَهَلْ أَنْتُمْ مُنْتَهُوْنَ ۝﴾

(المائدہ: ۹۰، ۹۱)

”اے ایمان والیو! ایہ جیہڑے شراب، جوا، بت تے جوئے دے تیرنیں، سب ناپاک چیزاں نیں تے شیطان
دیاں کارستانیاں نیں۔ بس ایہناں توں بچو تاں جے تسیں فلاح پاؤ۔ شیطان تے تہاڈے وچ شراب تے
جوئے نال دشمنی تے ویر پانا چاہندا اے۔ (تاں جے) تہانوں نماز تے اللہ دی یاد توں ڈک دوے۔ ہن دسو
کہ اے وی باز آؤ گے کہ نہیں؟

رسول خدا نے جدوں جناب عمر فاروق نوں رب دا ایہہ حکم سنایا تے عمر پکار اٹھے: اِنْتَهَيَا يَا رَبِّ، اِنْتَهَيَا يَا رَبِّ
(اے رب! اسیں باز آ گئے۔ ربا! اسیں باز آ گئے۔)

ایس نترے ہوئے حکم توں بعد جناب رسول خدا تے جناب عمر فاروق نے اللہ دا شکر ادا کیتا تے سکھ داسا لیا۔ نال ای

مدینے وچ منادی کرا دتی گئی کہ شراب حرام ہو گئی اے۔ جدوں ایہ اعلان کیتا جا رہیا سی اوس ویلے حضرت انس اک تھاں تے شراب دی محفل سجائی بیٹھے سن۔ کتاں وچ ایس اعلان دی واج پندیاں ساری، ساری دی ساری شراب گندے پانی وانگ گلی وچ روہڑ دتی۔ ایہ وی نہیں کہ تعمیل حکم وچ صرف جناب انس نے ای جلدی کیتی سگوں اوس دیہاڑے اتنی چوکی شراب روڑی گئی کہ مدینے دیاں گلیاں وچ تلکن ہو گئی۔
ظہار دا حکم:

سن ۶ھ دی ہی گل اے کہ اک واری حضرت اوس بن صامت اپنی گھر والی خولہ بنت ثعلبہ نال کسے گل توں جھگڑ پے تے اوس نوں آکھ دتا کہ ”خولہ! آج توں بعد توں میرے لئی ماواں بجا ایں۔“ عرب دے رواج موجب ایہہ گل سدھی سدھی طلاق سی۔ ایوں حضرت اوس تے خولہ وکھ ہو گئے۔ تھوڑی دیر بعد جدوں اوس بن صامت دا غصہ دور ہو گیا تے جناب خولہ نوں آکھن لگے کہ میرے کولوں غلطی ہوئی اے، میں تے تیرے بنا نہیں رہ سکدا۔ حضرت خولہ نے جواب دتا کہ ہن فیصلہ رسول خدا ہی فرمان گے، میں کچھ نہیں آکھدی۔

حضرت خولہ جناب رسول اللہ توں ہدایت لین لئی بارگاہ نبوی وچ حاضر ہوئیاں تے ساری گل سنا دتی۔ عرض کیتی کہ ویکھو یا رسول اللہ! اوس نے جدوں میرے نال ویاہ کیتا سی میں اک مالدار سوانی ساں تے نالے خاندان وی چوکھا وڈا سی۔ ہن جدوں میرے پچھلے مرک گئے نیں، مال دولت وی اوس نے ورت لیا اے، جوانی گئے دناں دا قصا بن گئی اے تے اوس نے مینوں طلاق دے چھڈی اے۔ ہن جے اوہ میرے ول رجوع کرنا ای چاہندا اے، تے اے اللہ دے رسول! کوئی راہ کڈو۔

”نہیں خولہ توں ہن اوس تے حرام ہو گئی ایں۔“ رسول خدا نے جواب دتا۔
ایہ فیصلہ سنن توں بعد جناب خولہ نے رونا شروع کر دتا تے ایس گل دا شکوہ شروع کر دتا کہ ہن بچے کدھر جان گئے۔“
جے میں اوہناں نوں اوس دے حوالے کرنی آں تے اوہناں دا مستقبل برباد ہوندا اے تے جے اپنے کول رکھدی ہاں تے وچارے کچھ نال مرجان گے۔ یا رسول اللہ! میرا مسئلہ حل کرو۔“
”میں دس دتا اے ناکہ تہاں نوں طلاق ہو گئی ہے۔“ رسول خدا نے فیہ فرمایا۔

ایس مایوسی وچ جناب خولہ نے چیخنا شروع کر دتا تے رب اگے التجا کیتی کہ ربا ہن میرے کول کوئی رستا نہیں۔ اپنے دکھ درد دا شکوہ تیری ہی بارگاہ وچ کرنی آں۔ خولہ اے دربار رسالت وچ ہی موجود سن کہ جبرئیل امین رب دا سنہیا لے کے آئے۔

﴿الَّذِينَ يُظَاهِرُونَ مِنْكُمْ مِنْ نِسَائِهِمْ مَا هُنَّ أُمَّهَاتُهُمْ إِنَّ أُمَّهَاتُهُمْ إِلَّا اللَّائِي وَلَدْنَهُمْ
وَأَنَّهُمْ لَيَقُولُونَ مَنَّكَرًا مِنَ الْقَوْلِ وَزُورًا ط إِنَّ اللَّهَ لَعَفُوفٌ غَفُورٌ ۝ وَالَّذِينَ يُظَاهِرُونَ مِنْ
نِسَاءِهِمْ ثُمَّ يَقُولُونَ لِمَا قَالُوا فَتَحْرِيرُ رَقَبَةٍ ۖ مِنْ قَبْلِ أَنْ يَتَمَاسَّ إِلَيْكُمْ تُوعَظُونَ بِهِ وَاللَّهُ
بِمَا تَعْمَلُونَ خَبِيرٌ﴾ (المجادلة: ۳، ۲)

”جیہڑے تہاڑے دچوں اپنیاں سوانیاں نال ظہار کر پٹھن (ماں کہہ پٹھن) تے فیرا وہ سوانیاں اسنہاں دیاں ماواں نہیں بن جان دیاں۔ اوہناں دیاں مانواں تے اوہ نیں جہاں نے اوہناں نوں جھیا۔ تے اوہ اک غلط تے چوٹھی گل کر دے نیں۔ تے اللہ معاف کرن والا تے بخشن والا اے۔ تے جیہڑے لوکی اپنیاں عورتاں نوں ماں آکھ پٹھن تے فیرا وہ کم کرنا چاہن جیہڑا آکھیا گیا تے فیرا وہ اپنی بیوی نوں ہتھ لان توں پہلاں اک بردہ آزاد کرن۔ ایہدے نال تہانوں نصیحت ہووے گی۔ تے اللہ اوس دی خبر رکھدا اے جو تسیں کر دے او۔“

ایس توں بعد دیاں آیتاں وچ اللہ نے غلام آزاد کرن دی ہمت نہ رکھن والیاں لئی کجھ رعایتاں وی دیتاں نیں۔

نزول وحی توں بعد رسول خدا نے جناب اوس نوں بلایا تے اوہناں نوں قرآنی آیات سنا کے تے مناسب ہدائتاں دے کے رخصت فرمایا۔ ایوں اک مومنہ دی فریاد سن کے رب رحیم و کریم نے ہمیش لئی اک پالیسی جاری فرمادی۔

اصحاب نبی حضرت خولہ دی ایس پاروں ڈھیر عزت کر دے سن کہ اوہ قرآنی آیتاں دا شان نزول بنن ولی سوانی سن۔ اک واری جناب فاروق اعظم مسلماناں دے اک وڈے جتھے نال کدرے جا رہے سن تے راہ وچ جناب خولہ نال ٹاکرا ہو گیا۔ خولہ کوئی گل کرنا چاہندیاں سن، ایس لئی سب لوکاں نوں کجھ دیر رکنا پے گیا۔ کجھ صحابہ نے جناب عمر نوں پچھیا کہ تسیں ایس مائی لئی ایڈے جتھے نوں کیوں کھلا ری رکھیا اے؟

”تہانوں پتہ اے ایہہ کون سی؟“ جناب عمر نے الٹا سوال کر دتا۔

”نہیں،“ لوکاں نے عرض کیتی۔

”ایہ اوہ سوانی اے جہدی گل اللہ نے ست اسماناں توں اُتے سنی سی، میں کون آں کہ اوس دی گل نہ سندا۔ واللہ جے

اوہ آپوں نہ ٹر جان دی تے مینوں رات تیکر وی اوہدے لئی کھلونا پیندا تے میں کھلو تے رہنا ہی ۱۱ جناب عمر تے جواب دتا۔ پہلی نماز استسقاء:

رمضان ۶ھ وچ کجھ صحابہ کرام نے رل کے بارگاہ نبوت وچ ایہ التجا کیتی کہ مدینے تے مدینے دے آل دوالے پانی دی کمی پاروں گھاہ تے رکھ سک رے نیں، تے پٹھا دتھا نہ لبھن پاروں مال ڈنگروی مرنا شروع ہو گیا اے۔ جے ایہی حال رہیا تے لوکائی وی فاقیاں تے مجبور ہو جائے گی، ایس لئی، یا رسول اللہ! رب کریم اگے بارش دی دُعا کرو۔ رسول خدا نوں اپنے سبھاں دی ایہہ گل چنگی لگی تے دُعا لئی مدینے توں باہر ٹر پے۔ عید گاہ وچ جا کے دو رکعت نماز پڑھائی۔ پہلی رکعت وچ سورۃ فاتحہ توں بعد سُبْحِ اسْمِ رَبِّکَ الْأَعْلٰی تے دوسری رکعت وچ هَلْ اَتٰکَ حَدِیْثُ الْغَاشِیَةِ دی تلاوت فرمائی۔ نماز توں بعد لوکاں ول منہ کر لیا، چادر مبارک نوں اُلٹا کے فیرا تے لے لئی تے دست دُعا اُچا کیتا تے رب سوہنے اگے بارش دی دُعا کیتی۔ اے صحابہ عید گاہ وچ ای بیٹھے سن کہ بدل دیاں ٹکڑیاں دسَن لگ پیاں۔ ہولے ہولے بدل اکٹھے ہو گئے۔ سارا اسمان بدل نال بھر گیا تے ویکھدیاں ای ویکھدیاں شرالائے دار مینہ شروع ہو گیا۔ ست دن اٹو ٹک مینہ پیندا رہیا۔ ایوں جا پداسی کہ مالک نے بدلاں نوں حکم دتا سی کہ جدوں تیکر میرا محبوب آپوں حکم نہ دیوے، ایوں ای ورھدیاں رہنا اے۔ ستویں دن صحابہ

کرام فیہ حاضر ہوئے تے عرض کیتی کہ یا رسول اللہ! مینہ توں نقصان ہون لگ پیا اے دُعا فرماؤ کہ مینہ بند ہو جائے۔ ایہ سن کے رسول خدا ہسن لگ پے تے فیہ بدلاں ول اُنکل کر کے فرمایا حَوَالِیْنَا لَا عَلَیْنَا سَاڈے آل دوالے و سَو پر ساڈے اُتے نہیں۔
محبوب خدا دا ایہ حکم سن کے بڈل مدینے توں دور نکل گئے۔

حج دی فرضیت:

چو کھے مفسرین دا خیال اے کہ سورہ بقرہ دی آیت نمبر ۱۹۶، جہدے وچ پہلی واری حج دا ذکر آیا اے، اوہ حدیبیہ دی تھاں تے نازل ہوئی سی۔ حدیبیہ دا واقعہ ۶ھ وچ پیش آیا سی ایس لئی ایہہ سمجھیا جاندا اے کہ حج ۶ھ وچ فرض ہوئی سی ﴿

* * * *

صلح حدیبیہ توں بعد دے حالات

غزوہ خیبر:

حدیبیہ توں واپسی تے لشکر اسلام نے کوئی تن ہفتے آرام کیتا ہووے گا کہ رسول خدا نے خیبر دے سازشی تے کینہ پرور یہودیاں نوں سبق سکھا لئی، خیبر تے لشکر کشی دا حکم دتا۔ آپ نے حدیبیہ دے سارے مجاہداں نوں خاص طور تے تیاری دی ہدایت فرمائی پر باقیوں نوں جاؤن توں ڈکیا نہیں۔ ہاں ایہہ ضروری کہ اللہ دے حکم موجب اوہناں نوں مال غنیمت وچوں کوئی حصہ نہ دین دا اعلان کیتا گیا۔ فیروی حدیبیہ دے مقابلے تے کوئی ڈیڑھ دو سو مجاہداں دا اضافہ ہو گیا۔ محرم ۷ھ وچ یہودیاں دے ہتھوں سترے ہوئے ۱۷۰۰ مجاہداں دا لشکر، سپہ سالار اعظم دی کمان وچ خیبر ول روانہ ہو گیا۔

جوں کہ کچھ ذکر ہو چکیا اے، مدینے وچ یہودیاں دے تن مشہور قبیلے آباد سن..... بنو قینقاع، بنو نضیر تے بنو قریظہ۔ ہجرت مدینہ توں فوراً بعد رسول خداؐ نے اوہناں نال کجھ معاملے طے کر لے سن تے ایوں مدینے دا نظم و ضبط، میثاق مدینہ دے تحت ای چلن لگ پیا۔ یہودیاں دا خیال ایہی سی کہ بہت جلدی مکے والے مدینے تے چڑھائی کرن گے تے محمدؐ تے اوس دے نویں دین والا کم کر چھڈن گے پر ہونیا ایہہ کہ جنگ بدر دے نتیجے نے اوہناں دیاں ساریاں آساں اُمیداں تے پانی پھیر دتا۔ ہن اوہناں دا اندر دا بغض تے فساد سامنے آؤن لگ پیا تے اوہ میثاق مدینہ نوں توڑن دے بہانے لکھن لگ پے۔ جدوں بنو قینقاع نے شرائطاں شروع کیتاں تے رسول خداؐ آپوں اوہناں دی گڑھی وچ تشریف لے گئے تے اوہناں نوں رویہ ٹھیک کرن دی ہدایت کیتی۔ گل نوں جھن دی بجائے اوہناں نے گستاخیاں شروع کر دتیاں تے آکھن لگے کہ بدر وچ قریش نوں شکست دین دا ایہہ مطلب نہیں کہ تسیں سانوں وی ہرا لوؤ گے، اوہ تے اناڑی بندے سن جس دن ساڈے نال جوڑ پوے گا، پتہ لگ جائے گا۔

ایہ واقعہ وی تسیں کچھ پڑھ آئے او کہ اوہناں اک دکان تے اک مسلمان سوانی دی بے حرمتی وی کیتی سی۔ فیر جدوں ۶ھ وچ دو مقتولاں دے خون بہا دا حصہ لین لئی رسول خداؐ بنو نضیر ول گئے تے اوہناں نے آپؐ دے قتل دا منصوبہ وی تیار کر لیا سی۔ ایوں دیاں حرکتاں توں یہودیاں نوں جلا وطن ہونا پیاسی تے اوہ خیبر دی تھاں تے اکٹھے ہو گئے سن۔

خیبر وچ وی یہود اپنیاں حرکتاں توں باز نہ آئے۔ اوہناں قریش مکہ نال وی رابطے رکھے تاں جے کسے موقع تے اکٹھے ہو کے محمدؐ رسول اللہؐ تے اوہناں دے ساتھیاں نوں ہتھ پاؤن۔ اوہناں اپنے چوٹی دے بندیاں دا اک وفد وی مکے گھلایا تاں جے مکے والیاں نوں جناب رسول اللہؐ دے خلاف بھڑکایا جائے، اوس وفد وچ سلام بن ابی الحقیق حی بن اخطب تے کنانہ بن ابوالحقیق ورگے کھڑ پنچ شامل سن۔ اوہ کجھ دُجے قبیلیاں کول وی گئے تے اخیر اوہناں دیاں ای کوششاں نال جنگ

احزاب تیکر گل آجی۔ ایسے جنگ دے دناں وچ جی بن اخطب رات دے ہنیرے وچ بنی قریظہ دے رئیس کعب بن اسد کول آیا تے اوس نوں مسلماناں دے خلاف اکٹھے ہون والے لشکر داحضا بن تے راضی کر لیا۔

ہن یہود خیبر مدینے تے حملے دیاں تیاریاں کر رہے سن۔ سلام بن مشکم نے ایہ بندوبست وی کر لیا سی کہ جے لوڑ پئی تے تیماء، فدک تے وادی القریٰ وچ وسوں کیتی بیٹھے یہودیاں توں وی مدد لئی جاوے گی۔ اوہناں دا اک وفد کنانہ بن ابی الحقیق دی قیادت وچ غطفان وی گیا تے اوہناں نوں مسلماناں دے خلاف لڑائی دی شکل وچ خیبر دی اڑھی پیداوار دین دا وی لالچ دتا۔ یہودیاں نے مدینے دے اندر دے حال حالات تے نظر رکھن لئی رئیس المنافقین عبداللہ بن ابی نال وی رابطہ رکھیا۔ عبداللہ نے یہودیاں دی حوصلہ افزائی کیتی تے اوہناں نوں یقین دوا یا کہ اوہ لشکر اسلام اُتے حاوی ہو جان گے۔

جدوں بنو غطفان نوں پتا لگا کہ مسلماناں دا لشکر خیبر تے حملے لئی نکل گیا اے تے اوہناں نے یہودیاں نال اپنے وعدے موجب اپنے جنگجو جواناں دا اک جتھا تیار کیتا تے اوس نوں خیبر ول ٹور دتا۔ اے تھوڑا ای دریدے گئے سن تے اوہناں نوں ایوں جاپیا کہ جویں کسے نے بنو غطفان تے حملا کر دتا اے۔ اوہ اوتھوں ای واپس پرت آئے تاں جے اپنے اہل عیال دی حفاظت کر سکن۔ واپس آئے تے اوتھے کسے حملہ آور دا کوئی نام نشان نہیں سی پر فیروہ اپنے علاقے وچ ای رے تے واپس خیبر ول نہیں گئے۔ خیال کیتا جاندا اے کہ رسول خداؐ نے کوئی فوجی دستہ بنو غطفان ول گھلیا ہووے گا تاں جے اوہناں نوں اپنی پے جاوے تے اوہ یہودیاں دی مدد لئی باہر نہ نکلن۔

دُجے پاسے اسلامی لشکر اپنے عظیم الشان سالار دی کمان وچ خیبر ول ودھدا جاندا سی۔ تقریباً ۵۰ کلو میٹر دا پندھ تن دناں وچ نبھیر کے رات دے دے ویلے لشکر اسلام خیبر دے نیڑے جا بجیا۔ عشاء دی نماز پڑھن توں بعد حضورؐ نے اپنے گائیڈ نوں طلب فرمایا۔ حُسیل بن خارجہ حاضر ہوئیا تے اوس نوں ہدایت فرمائی کہ اوہ لشکر نوں اوس تھاں تے لے جاوے کہ شام توں خیبر آؤن والا رستا ڈکيا جاوے۔ ایس فیصلے وچ راز ایہ سی کہ بنو غطفان اوسے رستے تے ای خیبر اپڑ سکدے سن۔ لشکر اسلام نے رجیع دی وادی وچ جا کے ڈیرے لالے۔ جدوں اہل خیبر نوں لشکر اسلام دے آؤن دا پتا لگا تے اوہ اپنے قلعیاں وچ مورچہ بند ہو گئے۔ اسلامی لشکر نے اگے ودھ کے کمال ہشیاری نال صف بندی کیتی تے خیبر دے سارے قلعیاں دا محاصرہ کر لیا۔ یہودیاں نے سلام بن مشکم دے مشورے نال اپنا مال اسباب، سوانیاں تے نیاں اک قلعے وچ اکٹھے کر دتے تے کھان پین دا سامان دُجے قلعے وچ۔ جنگجو جواناں لئی اک تے قلعے دا انتخاب کیتا گیا۔

مقابلہ شرع ہوئیا تے سب توں پہلاں دوویں لشکر حصون نطاۃ دے تھلے آ منے سامنے ہوئے۔ چنگا گھڑا جوڑ پیا۔ گھٹو گھٹ ۵۰ مجاہد زخمی ہوئے۔ یہودیاں دا اُچے شملے والا نام نہاد دانش ور سردار سلام بن مشکم ماریا گیا۔ اوس توں بعد قلعہ ناعم، حارث بن ابونزب دی کمان وچ دے دتا گیا۔ مسلماناں نے اوہناں نوں قلعہ بند ہون تے مجبور کر دتا۔ مسلماناں نے محاصرہ قائم رکھیا تے دُجے پاسے یہودی وی ڈٹے رے۔ اصل وچ اوہناں نوں ایس گل دا پتا سی کہ جے آج مسلمان جت گئے تے ایس داسد ہاسدھا مطلب ایہ ہے کہ عربستان دی زمین بنو اسرائیل لئی تنگ ہو گئی ہے۔

مسلماناں نوں قلعہ ناعم دا محاصرہ کیتیاں کئی دن ہو گئے سن پر کوئی نتیجا سامنے نہیں آ رہیا سی۔ اک دن آپؐ نے علم

جناب صدیق اکبر دے سپرد کیتا تے قلعے تے زور دار حملے دی ہدایت کیتی۔ اوہناں نے جی توڑ کے زور ماریا پر قلعہ فتح نہ ہو سکیا۔ دُجے دن جناب عمر فاروق نوں علم دتا گیا۔ جناب عمر دی کمان وچ وی فوجی دستے نے پورا زور ماریا پر گل نہ بن سکی۔ تیجے دیہاڑے رسول خدا نے پرچم اسلام جناب علی بن ابوطالب دے حوالے کیتا تے ہدایت فرمائی کہ علی! حملہ کر دیو، ایہتھوں تیکر کہ اللہ تعالیٰ تہاڈے ہتھوں فتح عطا فرما دیوے۔ اوہدروں یہودی وی قلعہ ناعم توں باہر نکل آئے۔ اک یہودی جوان نے جناب علی تے وار کیتا تے سپر ہتھ توں ڈگ پئی۔ اچن چیت آپ دی نظر بوہے دے اک پلے تے پے گئی۔ جناب علی نے اوس نوں پھڑ لیا تے اوہدے توں ای ڈھال دا کم لیا۔ جناب علی نے بہادری دے اوہ جوہر دکھائے کہ یہودی گھبرا کے فیر قلعہ بند ہو گئے۔

قلعہ ناعم تے قابض ہون توں بعد مسلماناں نے قلعہ قنوص تے قلعہ صعب بن معاذ دا محاصرہ کیتا۔ دوواں لشکراں نے بڑا زور دار مقابلہ کیتا۔ یہودی اپنی زمین دا اک چٹا وی آسانی نال مسلماناں دے حوالے کرن لئی تیار نہیں سن پر اخیر اوہ لشکر اسلام دی دلاوری اگے بے بس ہو گئے۔ اپنیاں قلعیاں نوں خالی کرن توں بعد یہود قلعہ زبیر وچ اکٹھے ہو گئے۔ ایہ اک محفوظ قلعہ سی تے چوکی اُچی تھان تے سی، ایس لئی اوہتھوں تیکر پہنچ کے فیر قلعہ بند جواناں نال لڑائی کوئی سوکھا کم نہیں سی۔ رسول خدا نے اوس قلعے دا محاصرہ کرن دا حکم دتا۔ تن دیہاڑے گزرے سن کہ اک یہودی بندے نے ای آ کے حضور دی خدمت وچ عرض کیتی کہ ”اے ابوالقاسم! جے تسیں اک مہینا وی محاصرہ کیتی رکھو تے فیروی ایہناں نوں کوئی پرواہ نہیں۔ جے ایہناں نال نہڑنا جے تے تھلے پانی دے چشمیاں تے قبضہ کرو، جتھوں ایہ رات نوں چپ چپتے پانی لیاؤندے نیں، فیر ایہ آپوں ای تہاڈے اگے گوڈے ٹیک دین گے۔“ آپ نے ایوں ای کیتا۔ فیر یہود نے قلعہ زبیر توں باہر آ کے جنگ کیتی۔

مرحب یہودیاں دا ٹکڑا تے مشہور جنگجو بنداسی۔ عرب وچ مشہور سی کہ مرحب دی طاقت اک ہزار بندیاں دے برابر اے تے جنگ وچ وی اوہ اک ہزار تے بھارا ہوندا اے۔ اوہ چوکھے تکبر تے غرور نال شعر پڑھدا باہر آیا۔ اکھے خیبر جان دا اے کہ مرحب کبھدا نام اے، مینوں شیراں نال مقابلہ کرنا آؤندا اے، آؤ کون اے جیہڑا میرا مقابلہ کرے گا؟ رسول خدا نے مجاہدین اسلام ول ویکھیا تے پچھیا کہ کبھڑا اے جیہڑا ایس دا مقابلہ کرے گا۔ جناب محمد بن مسلمہ انصاری نے عرض کیتی کہ یا رسول اللہ! جے کل اس دے ہتھوں میرا بھرا محمود شہید ہو یا اے آج ایہدا جوڑ میرے نال پٹن دیو۔ ”اجازت اے۔“ رسول خدا نے ارشاد فرمایا:

مقابلہ شروع ہو گیا۔ مرحب نے اہجیا زوردار وار کیتا کہ جے محمد بن مسلمہ اوس نوں سپر تے نہ ڈک لیندے تے شہید ای ہو جاندا پر مرحب دی تلوار ڈھال دے وچ ای اڑی رہ گئی۔ ابن مسلمہ نے مرحب تے وار کیتا تے فیر اوس نے دُجا ساہ نہیں لیا۔ ایس توں بعد عام مقابلہ شروع ہو گیا۔ یہود بے دریغ ہو کے لڑے تے کئی مسلمان شہید ہو گئے۔ تقریباً دس یہودی وی قتل ہوئے پر قلعہ فتح ہو گیا۔

حیات محمد از محمد حسین ہیکل صفحہ: ۲۸۶۔ صحیح مسلم وچ سلیم بن رکوع توں روایت اے کہ مرحب نوں قتل کرن والے جناب علی المرتضیٰ سن۔ اوس روایت موجب جناب علی نے مرحب دا ہر حضور دی خدمت وچ وی پیش کیتا۔

قلعہ زیر توں نکل کے یہود قلعہ ابی وچ بند ہو گئے۔ اسلامی لشکر نے ایس داوی محاصرہ کر لیا۔ یہودیاں دا عزال نامی اک بہادر ”ہل من مبارز“ (کیہڑا اے جیہڑا میرے مقابلے تے آؤندا اے) آکھدا ہویا باہر آئیا۔ حضرت حباب بن منذر نے اوس دا چیلنج قبول کیتا تے فیر اپنے دلیر جنگجو ہون دی صلاحیت منواوی لئی۔ حضرت حباب نے اوس دی سچی بانہہ وڈتی تے فیر جدوں اوہ قلعے ول دوڑیا تے آپ نے اگے ودھ کے اوس نوں قتل کر دتا۔ فیر اک دُجا یہودی چیلنج کر دا ہویا باہر آیا۔ اوس دے مقابلے تے اسلام دا اوہ اُچی شان والا شیدائی مجاہد سامنے آیا جس دی ٹورتے لال پٹی جنگاں وچ خاص طور تے مشہور ہوندی سی۔ استھ وی اوہ لال پٹکا سرتے ول کے بڑے ٹوہرنال ٹردے ہوئے اگے ودھے۔ مجاہدین اسلام اوہناں دی چال تے اسٹائل دا سواد لے رے سن۔ یہودی نال جوڑ پیا تے آپ نے اوس نوں جہنم واصل کر دتا۔ ایہ عظیم الشان مجاہد حضرت سماک بن خرشہ انصاری سن جہاں نوں توارخ ابودجانہ دے نام نال چیتے کردی اے۔

یہودی دے قتل توں بعد ابودجانہ چیتے دی لپک وانگ قلعے ول ودھے تے گیٹ بند ہون توں پہلاں ای اندر جا وڑے۔ مجاہدین نے جدوں دیکھیا کہ ابودجانہ اندر جا وڑے نیں تے سارے دے سارے اندر ا پڑ گئے۔ او تھے زوردار لڑائی ہوئی تے اخیر سارے یہودی نس کے قلعہ نزار وچ جا وڑے۔

یہودیاں نوں ایس گل دا پکا یقین سی کہ مسلمان ایس قلعے وچ داخل نہیں ہو سکدے کیوں جے ایہہ اوہناں داسب توں مضبوط تے محفوظ قلعہ سی۔ ایہی وجہ سی کہ اوہناں نے اپنیاں سوانیاں تے نیانے ایسے قلعے وچ رکھے ہوئے سن۔ مسلماناں نے اگے ودھ کے قلعہ نزار دا محاصرہ کر لیا۔ ہن نہ تے مسلماناں لئی قلعے دے اندر جان دا کوئی رستائل رکھیا سی تے نہ ای یہودی باہر آ کے لڑن دی جرأت کر رہے سن البتہ قلعے دے اندروں تیر تے پتھر مار مار کے مسلمان مجاہداں نوں پھڑکڑے سن۔ اخیر رسول خداؐ نے منجیق نصب کرن دا حکم دتا۔ منجیق نال قلعے دیاں کندھاں تے مورے ہو گئے تے مسلمان اندر جا وڑے۔ اندر یہودی سوانیاں تے اوہناں دے بال بچے وی سن، ایس توں اندازہ کیتا جاسکدا اے کہ یہودی کویں جان توڑ کے لڑے ہون گے۔ زبردست مقابلہ ہوئیا تے اخیر کچھ گرفتار ہوئے، کچھ قتل ہوئے تے کچھ بچھ بس گئے۔ اوہ اپنیاں سوانیاں تے نیانے وی مسلماناں دے رحم و کرم تے چھڈ گئے۔

نزار دی فتح دا مطلب ایہی سی کہ خیبر دا ادھا علاقہ یعنی نطاۃ تے شق دا علاقہ مسلماناں دے قبضے وچ آ گیا اے۔ ایس علاقے وچ چھوٹے چھوٹے ہور قلعے وی ہے سن پر اوہ قلعے نہ تے یہودیاں نوں محفوظ کر سکدے سن تے نہ ای اسلامی لشکر اگے اوہناں دی کوئی حیثیت سی۔ ایس لئی اوہناں آپوں ای اوہ قلعے خالی کر دتے تے آپ خیبر دے دُجے منطقے کتیبہ ول دوڑ گئے۔ کتیبہ وچ صرف تن قلعے سن، حصن قنوص، حصن وطح تے حصن سلام۔

حصن قنوص ایس علاقے داسب توں وڈا تے مضبوط قلعہ سی۔ لشکر اسلام نے ۲۰ دناں تک ایس دا محاصرہ کیتی رکھیا۔ اخیر جناب علی المرتضیٰ دی کمان تے شجاعت نال ایہ قلعہ فتح ہو گیا۔ ایس قلعے وچ پناہ لین والے بوہت سارے یہودنوں قیدی بنا لیا گیا۔ ایس توں بعد مسلماناں نے ایس علاقے دے باقی دو قلعیاں ول دھیان کیتا تے کچھ ہی چراں وچ وطح تے سلام دے قلعیاں اُتے پرچم اسلام لہرا اندا نظر آ گیا۔

گل بات دا مڈھ:

حصون و طحّ تے سلام دا محاصرہ جاری سی، چودہ دیہاڑے بیت گئے سن پر کسے یہودی نے قلعیاں توں باہر آ کے لڑائی کرن دی جرأت نہ کیتی۔ حضور نے ارادہ فرمایا کہ مخینقاں نصب کر کے قلعیاں تے سنگ باری کیتی جاوے۔ اودھر قلعیاں وچ بند یہودیاں نے وی حساب لالیا کہ جے ایہ محاصرہ کجھ دن ہور جاری رہیا تے نوبت ایہ آ جاوے گی کہ اوہ بھگے مرنا شروع ہو جان گے۔ دُجے ایہ کہ جے مسلماناں نے مخینقاں دا استعمال شروع کر دتا تے قلعیاں دیاں دیواراں ٹٹ جاوُن گئیاں تے فیر اوہناں نوں بے دریغ قتل کر دتا جاوے گا۔ ایس لئی محصور یہودیاں نے گل بات کرن دی کوشش شروع کر دتی۔ کنانہ بن ابی الحقیق نے شاخ نام دے اپنے اک بندے نوں حضور انور دی خدمت وچ بھیجی تے گل بات کرن لئی حاضر ہون دی اجازت منگی۔ نبی اکرمؐ نے کنانہ نوں مذاکرات لئی آؤن دی اجازت دے دتی۔

دوواں فریق وچ ہون والے مذاکرات کامیاب رے تے نبی رحمت نے کمال شفقت دا مظاہرہ کر دیاں ہوئیاں قلعہ بند یہودیاں دی جان بخشی کر دتی۔ ایہ مطالبہ وی من لیا کہ اوہناں دے بال بچیاں تے سوانیاں نوں غلام لونڈی نہیں بنایا جائے گا سگوں اوہ اپنے وڈکیاں دے نال ای خیر توں کوچ کرن گے۔ اوہناں دا مال اسباب رسول خدا دے حوالے ہووے گا۔ یہود صرف اوہناں کو مال اپنے نال لے جان دے حقدار ہون گے جتناں اک بند چک سکدا اے۔ مطلب ایہ کہ اوہناں نوں کسے سواری تے مال لے جان دی اجازت نہیں ہووے گی۔ رسول اللہ نے ایہ وی فرمایا کہ ”جے تسیں میرے توں کجھ لکھیا تے فیر اللہ تے اُس دار رسول بری الذمہ ہون گے۔“ ایس صلح توں بعد جتنے قلعے مسلماناں دے حوالے کر دتے گئے تے ایوں خیر داسارا علاقہ مسلماناں دے قبضے وچ آ گیا۔

یہودیاں دا اخیر حربہ:

یہودیاں دی خائش اُتے اوہناں نال صلح ہو چکی سی۔ لڑائی دا جوش ٹھنڈا پے گیا سی، مسلمان مال غنیمت و نڈن وچ رُجھے ہوئے سن پر یہود اچے وی رسول خدا دے خلاف سازشاں وچ جُٹے سن۔ اوہدوں اک یہودی سوانی زینب نے وی جناب رسول اللہ نوں شہید کرن دا پروگرام بنایا۔

زینب، یہودی رستم مرحب دی بھین سی جیہڑا ایسے جنگ وچ جناب محمد بن مسلمہ (یاں حضرت علی) دے ہتھوں قتل ہو یا سی۔ اوس دا خاوند سلام بن مشکم وی یہود دا اگل ہتھ بنداسی جیہڑا جنگ دے مڈھلے دناں وچ ای مسلماناں دے ہتھوں ماریا گیا سی۔ اوس نے اندرون اندر ایہ پتہ کر لیا سی کہ رسول خداؐ نوں دسی دا گوشت بڑا پسند اے۔ فیر اک دن اوس نے اک بکری دی دسی نوں سوہنے طریقے نال بھن کے تے اوہدے اُتے چنگا چوکھا زہر لا کے گوشت رسول خداؐ دی خدمت وچ پیش کیتا۔ آپؐ نے اچے پہلاقمہ ای لیا سی تے آپؐ نوں پتہ لگ گیا کہ کوئی گڑبڑ اے۔ آپؐ نے بوٹی منہ وچوں باہر سٹ دتی پر دعوت وچ نال بیٹھے صحابی حضرت بشر بن براہ لقمہ اندر لنگاہ گئے تے اوہدے زہر پاروں شہید ہو گئے۔ آپؐ نے جدوں زینب توں اس جرم دی باز پرس کیتی تے آکھن لگی کہ جو تساں ساڈی قوم نال کر چھڈی اے، اوس دا تہانوں وی پتہ اے۔

ایہ شرط صرف و طحّ تے سلام دے قلعیاں تیکر محدود سی نہ کہ ایس توں پہلے دے قیدیاں اُتے ایس دا اطلاق ہوندا سی۔

میں تے ایہ کم ایس وجہ توں کہتا اے کہ جے تسیں اللہ دے نبی ہوئے تے تہا نوں اللہ ایس زہر توں بچا لوے گاتے جے
نرے بادشاہ ای جے تے فیر میری قوم نوں تہا ڈے توں نجات مل جاوے گی۔ ایس گل داسد ہاسدھا مطلب ایہی کہ ہن
اوس نے آپ نوں اللہ داسچا نبی من لیا اے۔ ایوں نبی رحمت نے اوس نوں معاف کر دتا۔
رسول خدا دا اک ہور احسان:

کنانہ بن ابی الحقیق دے ذریعے یہودیوں نال جیہڑا معاہدہ ہو یا سی اوس دے مطابق جلاوطنی یہودیوں دامتد رسی پر
ہو یا ایہ کہ جدوں لڑائی ٹھنڈی ہو گئی تے اوہناں نے اک واری فیر جناب رسول خدا دا ترلا ماریا کہ اوہناں نوں خیبر وچ ای
رہن دتا جاوے تاں جے اتھے دی زرعی اراضی دی چنگی طرحاں سانجھ ہو سکے۔ رسول خدا نے وی ایہہ گل محسوس کیتی کہ
مدینے وچ رہ کے یاں مدینے توں اتھے خیبر وچ آ کے واہی نبی کرنا صحابہ کرام لئی جے ناممکن نہیں تے اوکھا کم ضرور اے،
تے ایہدے نال دعوت اسلام داکم متاثر ہون دا وی خطرہ اے۔ ایوں آپ نے خیبر دیاں پکیلیاں ادھ دے حصے تے اوہناں
نوں دے دتیاں۔ ایس کم دی نگرانی لئی حضرت عبداللہ بن رواحہ نوں خیبر دار یونیوا فرست کر کیتا گیا۔

رسول رحمت دی ایس عنایت نال جتھے یہود بے خانماں ہون تے پکھے مرن توں بچ گئے او تھے مسلماناں لئی وی مالی
آسودگی دا مڈھ بھج گیا۔ ایس دا انداز ایس گل توں ہندا اے کہ جناب عبداللہ بن عمر فرماتے نیں کہ خیبر دی فتح توں پہلاں
اسیں مالی طور تے پریشان ہی ساں۔ ایوں حضرت عائشہ صدیقہ دی اک روایت موجب ”جدوں خیبر فتح ہو یا تے اسیں
آکھیا کہ ہن سانوں پیٹ بھر کے کھجور لکھے گی۔“ ایہ خشالی ایس گل توں وی ثابت ہوندی اے کہ جدوں رسول اللہ مدینے
پر تے تے مہاجر مسلماناں نے اپنے انصاری بھراواں نوں کھجور دے اوہ درخت والیں پر تاتے جیہڑے انصار نے امداد دے
طور تے اوہناں نوں دتے ہوئے سن کیوں جے ہن خیبر دا مال تے کھجوراں ای وادھوں سن۔

اُم المؤمنین حضرت صفیہ:

صفیہ یہودی سردار حنی بن اخطب دی دھی تے اک دُجے یہودی چیف کنانہ بن ابی الحقیق دی سوانی سی ۱۰۰ تے خیبر
دے موقعے تے قید ہوئی سی۔ اے لشکر اسلام تے سارے قیدی خیبر وچ ای سن تے اک مجاہدِ دِھیہ کلبی ۱۱۰ نے حضورؐ
کولوں اک لونڈی دا مطالبہ کیتا۔ جدوں حضورؐ نے اوہناں نوں اجازت دے دتی تے دِھیہ ہوراں صفیہ تے انگل رکھی۔
اصحاب نبی دی ڈوگی نظر تے سیانف نوں ایہ گل چنگی نہ لگی کہ اک اجہبی سوانی جیہڑی اک سردار دی دھی، اک دُجے سردار دی
بیوہ تے حضرت ہارون g دی اولاد وچوں ہووے، اوہ حسب نسب دے لحاظ نال اک عام بندے دی لونڈی بن کے

سیرت لکھیاراں وچ ایس گل تے شدید اختلاف دسد اے کہ کنانہ دے پیو دا نام کیہ سی۔ چوکیاں دا خیال اے کہ کنانہ ابو الحقیق دا پتر سی پر ابن ہشام تے
محمد حسین ہیکل جے اُچے لکھیاراں نے کنانہ نوں ابو الحقیق دا پتر اسیا اے تے ایس دے والد دا نام رنج دیا اے۔ ایوں اوس دا نام کنانہ بن رنج بن ابو الحقیق
لکھیا اے۔ التبعہ ایس گل تے سب دا اتفاق اے کہ صفیہ دے گھر والے دا نام کنانہ سی۔ ایس فقیر نے سلمان منصور پوری دی تحقیق موجب کنانہ بن ابی الحقیق
نوں ٹھیک نیا اے۔

۱۲۰ دِھیہ کلبی مشہور صحابی، محدث تے سیرت نگار سن۔ آکھیا جاندا اے کہ آپ دی صورت حضرت جبرائیل g نال ملدی سی۔ قیصر روم ول رسول خدا دا نامہ
مبارک جناب دِھیہ امی لے کے گئے سن۔ آپ نے لمبی عمر پائی سی تے جناب معاویہ دے دور حکومت تک جیوندے رہے سن۔

رہوے۔ ایہ کم سیاسی تے سفارتی حوالیاں نال وی ایڈا چنگا نہیں سی۔ ایس لئی کجھ دانش ور صحابیوں نے رسول خدا نوں مشورا دتا کہ اوہ صفیہ نوں اپنے کول رکھن، ایوں اوس دی ول جوئی وی ہو جاوے گی۔

صفیہ ستاراں (۱۷) سالوں دی چوکھی سوہنی کڑی سی تے شکل صورت توں سچ مچ بادشاہزادی نظر آؤندی سی۔ جے رسول خدا اوس نوں اپنے لئی خاص نہ فرماندے تے ایس گل دا ڈرسی کہ اوہ مجاہداں وچکار کسے جھگڑے یاں اختلاف دی وجہ بن جاندی۔ ایس لئی حضور نے وجہ نوں کسے دوسری کنیز نوں ملن دا حکم دتا تے صفیہ نوں آزاد کر کے ایہ اختیار دے دتا کہ اوہ چاہوے تے اپنے یہودی رشتے داروں کول واپس چلی جاوے، تے چاہوے تے اسلام قبول کر کے حضور دی زوجیت دا شرف حاصل کر لوے۔

﴿اَخْتَارُ اللّٰهَ وَرَسُوْلَهٗ﴾

”میں اللہ تے اوس دے رسول نوں اختیار کر دی ہاں۔“

جناب صفیہ نے جواب دتا۔

جناب صفیہ دے ایس فیصلے توں بعد رسول خدا نے اوہناں نوں اپنے نکاح وچ لے لیا۔ اوس وقت صفیہ حیض دی حالت وچ سن۔ مدینے ول واپسی دے ویلے جدوں آپؐ صہبا دی تھاں تے اپڑے تے اوہناں دا جسم پاک ہو گیا۔ اوس توں بعد حضرت اُم سلیم نے جناب صفیہ نوں تیار کیتا تے فیر اوہناں نوں رسول خدا دے خیمے وچ بھیج دتا۔ آپؐ نے دولہا دی حیثیت وچ صبح کیستی تے سویرے کھجوریں تے ستواں نال ویسے دی دعوت کیستی۔ (امہات المؤمنین دا باب وی دیکھو) اتھتھے اک مستشرق میکسم روڈنسن دا ذکر ضروری جا پدا اے۔ لکھدا اے:

By so doing he was violating his own previous commands, according to which his supporters had to wait untill the beginning of the next menstrual cycle before having intercourse with their captives.■

”ایوں کر کے اوہ (جناب رسول خداؐ) اپنے ہی پچھلے حکماں دی خلاف ورزی کر رہے سن جہناں موجب اوہناں

دے حمایتیاں (صحابہ) نوں کسے لونڈی نال بدنی تعلق بنان توں پہلاں اگلے حیض دا انتظار کرنا پیندا سی۔“

اصل وچ گل ایہ ہے کہ میکسم روڈنسن اسلامی ضابطیاں توں پوری طرح واقف نہیں۔ اوس نوں پتہ ہونا چاہیدا اے کہ کسے وی خاوند دیدہ سوانی نال نکاح توں پہلاں ایہ جاننا ضروری اے کہ اوہ کدے حاملہ تے نہیں۔ جے اوہ حاملہ ہووے تے اوس نال نکاح نہیں ہو سکدا، اتھتھوں تیکر کہ اوہ بچہ جن لوے۔ اوس زمانے وچ آج طرحاں دیاں سہولتاں (Pathological facilities) موجود نہیں سن، ایس لئی عورت دے حاملہ ہون یاں نہ ہون دا اندازا حیض توں ہی کیتا جانداسی۔

جتھوں تیکر جناب صفیہ دا تعلق اے، غیر مسلم ہون پاروں نہ تے اوہناں اُتے عدت لاگو ہوندى سی تے نہ ای اوہناں

محمد فرہنگ سیرت از سید فضل الرحمن

تاریخ انبیس جلد ۲ صفحہ: ۵۷ بحوالہ ضیاء النبی جلد ۴ صفحہ: ۲۳۵

دے حاملہ ہون دا کوئی شباسی، کیوں جے گرفتاری والے دن آپ حالت حیض وچ سن تے جوئیں اُتے ذکر ہوئیا اے، مدینے واپسی ویلے سد صہبا دی تھان تے جا کے اوہناں دا جسم پاک ہوئیا۔ ایس لئی ایہہ کہنا غلط اے کہ جناب رسول خداؐ نے اپنے ای کسے قانون نوں آپوں توڑ دتا سی۔

خیبر دی قانون سازی:

صہبا توں بعد لشکر اسلام وادی القرئی ول کوچ کر گیا۔ اوہ وادی وی یہودیوں دا اک وڈا گڑھ سی۔ جدوں مسلمان او تھے اُپرے تے یہودیوں نے تیراں نال اسلامی لشکرنوں ’جی آیاں نوں‘ آکھیا۔ ایس تیر اندازی دے نتیجے تے رسول خداؐ دا اک سیاہ فام غلام مدغم شہید ہو گیا۔ صحابہ کرام نے ”جنت مبارک“ دیاں واجاں لائیاں تے رسول خداؐ نے فرمایا کہ نہیں خیبر وچ مال غنیمت دے ونڈے جان توں پہلاں ایس نے جیہڑی چادر چک لئی سی اوہ ایہدے تے اک بن کے بھڑک ری اے۔ جدوں باقی صحابہ نوں ایس قانون دا پتا لگا تے اک صحابی اک دو تسمے لے کے حضورؐ دی خدمت وچ حاضر ہوئے تے آپؐ نے فرمایا کہ ایہ وی اک واسطے ہی نیں ۞

وادی القرئی دی لڑائی وچ آپؐ نے ظہر تے عصر دی نماز بقاعدہ باجماعت پڑھائی تے یہودوئوں خطرے نوں نماز قضاء کرن دا جواز نہیں بنایا۔

ایسے جنگ توں بعد مدینے ول واپسی تے اک دُجی تھان تے چوکی رات تیکر سفر کر دے رے پر فیہر لشکر اسلام آرام کرن لئی لیٹ گیا۔ مگرانی دی، تے نالے نماز ویلے جگان دی ذمہ واری جناب سیدنا بلال حبشی نے لئی۔ سارے لوکی سو گئے تے جناب بلال نے نماز نیت لئی۔ ویلھے ہوئے تے کاٹھی نال ٹوہ لاکے بیٹھ گئے پر اللہ دا کرنا ایہ ہوئیا کہ اوہناں دی اکھ لگ گئی۔ سویرے دُھپ لگی تے جاگ آئی۔ سب توں پہلاں جناب رسول خداؐ اُٹھے تے جناب بلال نوں پچھیا کہ ”بلال! ایہ تساں کیہ کیتی؟“

”یا رسول اللہ! جس ذات نے تہانوں سنوایا اوس نے مینوں وی سنوایا“ جناب بلال نے عرض کیتی ایہ سُن کے رحمت عالم نے ارشاد فرمایا کہ ”ہاں بلال! تساں ٹھیک آکھیا اے۔“

فیہر تھوڑے پندھ تے جا کے حضورؐ نے وضو فرمایا۔ سارے صحابہ نے وی وضو کیتا۔ جناب بلال نے تکبیر آکھی تے رسول خداؐ نے نماز پڑھائی۔ فیہر فرمایا کہ جدوں نماز پڑھنا بھل جاؤ (یاں سُن رہ جاؤ) تے فیہر جدوں یاد آوے اوسے ویلے پڑھ لوؤ کیوں جے اللہ فرماندا اے اَقِمِ الصَّلَاةَ لِذِكْرِي (تسین میرے ذکر لئی نماز پڑھدے رہوؤ۔) ۞

حضورؐ خیبر دے محاصرے دے دناں وچ اک آجڑی بکریاں دا اجڑ لے کے حضورؐ کول حاضر ہوئیا تے آکھن لگا کہ ”یا رسول اللہ! میں اک یہودی دا نوکر ہاں تے اوس دیاں بکریاں چارناواں۔ ایہ بکریاں وی اوسے یہودی دیاں نیں۔ میں مسلمان ہونا چاہندا ہاں، دسو میرے لئی کیہ حکم اے۔“

صحیح بخاری۔ میں ایس روایت نوں بچھے ول تے کتبہ دے ہتھان نال نقل کیتا اے کیوں جے ایس نوں مننا اوکھا لگا اے۔

حضورؐ نے اوس نوں بکریاں یہودی دے قلعے ول ہک دین دی ہدایت فرمائی تے اُس نوں اسلام دے دائرے وچ داخل کر لیا۔ فیراوہ آجڑی اوسے قلعے دے محاصرے لئی جہاد وچ شریک ہوئیا تے اللہ دا کرنا ایہ ہوئیا کہ اوتھے ای شہید وی ہو گیا۔ رسول خداؐ نوں خبر ملی تے آپؐ اوس آجڑی دی میت تے گئے۔ پر ویکھدیاں سارای چہرہ مبارک دے پاسے پھیر لیا۔ اک صحابی نے عرض کیتی کہ یا رسول اللہ! ایس توں توجہ کیوں ہٹ گئی اے۔

”اک حور جیہڑی ایس دی بیوی اے، ایس کول آ بیٹھی اے۔“ رسول خداؐ نے وجہ دس دتی۔ ایس شہید دا نام اسود راعی سی ؑ مال غنیمت وچ خیانت دی سزا، موقعہ ملدیاں سارای قضا نماز دی ادائیگی، شہید نوں اوس دی حور بیوی اوس دے دفنان توں پہلا ای آملدی اے جے احکامات خیبر دے دناں وچ ای دتے گئے۔ ایس توں دکھ ایسے معرکے وچ گدھے دا گوشت تے متعہ حرام کیتا گیا۔ متعہ کیا اے؟ آؤ ویکھئے۔

متعہ اک اجیہا ویاہ سی جہدے وچ میاں بیوی دے تعلقات موجود رہن دی اک مدت مقرر کر لئی جاندی سی تے اوس مدت دے مکن تے میاں بیوی وچ علیحدگی ہو جاندی سی۔ جہالت دے دناں وچ ایس دا عام رواج سی پر خیبر دے موقع تے اللہ نے ایس تے پابندی لا دتی تے ایس نوں حرام قرار دے دتا۔ ایہ نکاح توں ایوں دکھ نظر آؤندا اے:

متعہ

نکاح

- ۱۔ نکاح لئی ولی دی اجازت نوں ضروری سمجھیا جاندا اے۔
- ۲۔ ایجاب و قبول وچ دو گواہاں دی موجودگی ضروری اے۔
- ۳۔ علیحدگی واسطے طلاق ضروری اے۔
- ۴۔ نکاح وچ ازدواجی زندگی دے سارے قانون جویں کہ طلاق، ظہار تے ایلاء وغیرہ لاگو ہوندے نیں۔
- ۵۔ وراثت دے قانون لاگو ہوندے نیں۔
- ۶۔ پیدا ہون والے بچے اوس عورت دے خاوند دے ای منے جاندے نیں۔
- ۷۔ طلاق یاں وفات وچ عدت دی مدت مقرر اے۔
- ۸۔ عدت زیادہ توں زیادہ دو حیض اے۔
- ۹۔ متعہ وچ کوئی وراثت نہیں۔
- ۱۰۔ مرد بچے نوں اپنا نہ منے تے اوس نوں حق حاصل اے۔
- ۱۱۔ گواہ ضروری نہیں۔
- ۱۲۔ مدت ختم ہون تے آپوں ای علیحدگی ہو جاندی اے۔
- ۱۳۔ ایہدے وچ ایس مدت وچ کوئی گنجائش نہیں۔

شہداء خیبر:

وگھو وگھ سیرت لکھیا راں نے خیبر دے معرکیاں وچ شہید ہون والیاں دی تعداد ۱۵ توں ۲۳ دسی اے۔ کجھ سیرت لکھیا راں تے محققاں موجب ایہ تعداد ایس طرحاں اے:

عہد ابن ہشام جلد دوم صفحہ ۲۳۔ روایت اے کہ جدوں شہید زمین تے ڈگدا اے تے حوراں وچوں اوس دی بیوی اوسے ویلے اوس کول آ بیٹھدی اے تے اوس دے چہرے نوں صاف کردی اے۔

قاضی سلمان منصور پوری نے ایس دا نام اسلم لکھیا اے۔

۱۹ محمود خطاب شیت:

۱۹ قاضی سلمان منصور پوری:

۱۹ صفی الرحمن مبارک پوری:

۱۵ جسٹس کرم شاہ الازہری

۱۶ جنرل گل پاشا

وادی القرئی، فدک تے تیماء:

جوں کچھ ذکر ہوئیا اے، خیبر توں فارغ ہون توں بعد اسلامی لشکر نے وادی القرئی دارخ کیتا۔ اوہوں دے یہودنوں اسلام دی دعوت دتی گئی پر اوہناں قبول نہ کیتی۔ اخیر لڑائی ہوئی تے شام تیکر اوہناں دے اہندے مارے گئے۔ اگلے دیہاڑے سویر ہونداں ہی اوہناں نے ہارمن لئی تے اپنا مال اسباب حضور دی خدمت وچ پیش کر دتا۔ اوہوں دی زراعت یہود دے تھہ وچ ای ری پر اوہناں تے خیبر والی شرط لاگو ہو گئی۔

رسول خداؐ نے حضرت حُصَہ بن مسعودؓ نوں، اسلام دی دعوت لئی، فدک ول ٹور دتا سی پر فدک والیاں نے وی اسلام قبول نہ کیتا تے اپنی زرعی زمین دی ادھی پیداوار تے صلح کر لئی۔ تیماء دے یہودیاں نوں جدوں وادی القرئی تے فدک دے حالات دا پتہ لگا تے اوہناں نے آپوں ای پیشگی بندے گل کے مسلماناں نال معاہدا کر لیا تے اپنی اپنی تھاں تے وسوں کیتی بیٹھے رے۔

حصون خیبر، وادی القرئی، فدک تے تیماء دے یہودیاں دے ہارمن لین نال عربستان وچوں یہودیاں دی طاقت دا جنازہ نکل گیا۔ ایوں قریش مکہ توں بعد اک دے دے دشمن ولوں وی تسلی ہو گئی تے مسلماناں نے سکھ داساہ لینا شروع کیتا۔ بھانویں آل دوالے دے بدووی مدینے دی نویں ریاست تے نظراں ٹکائی بیٹھے سن پر اوہ اپنے جوگے نہیں سن کہ مسلماناں لئی کوئی وڈا مسئلہ پیدا کر سکدے۔

دُجے پاسے اک اچھے دشمن تے قابو پانا وی مشکل کم سی جس دا کوئی قلعہ نہیں سی، کوئی شہر نہیں سی تے کوئی محاذ نہیں سی۔ ربیع الاول ۷ھ دی گل اے نجد دے دو قبیلے مدینے تے حملے لئی گٹھ جوڑ کر رے سن۔ رسول خداؐ نے حضرت ابوذر غفاری (یاں حضرت عثمان بن عفان) نوں مدینے دا قائم مقام صدر مقرر کیتا تے مجاہداں دا اک وڈا جتھالے کے نجد ول کوچ کر گئے۔

نجد ول چڑھائی دی ایہ تکنیک آؤن والے دناں وچ مسلماناں دے بڑا کم آئی۔ راہ وچ نکلے موٹے جیہڑے واقعات پیش آؤندے رے اوہناں نال بددواں تے بڑے چنگے اثرات مرتب ہوئے۔ عطفان دے قبیلیاں نے اس غزوے توں بعد سرچکن دی جرات نہ کیتی تے اخیری اسلام قبول کر لیا۔ ایس غزوے وچ بھانویں آ منے سامنے کوئی بقاعدہ لڑائی نہ ہوئی پر فیروہ ایس حربی سفر توں مسلماناں نے بڑا فیدہ چکیا۔

شہنشاہواں نون دعوت اسلام

جوں کہ تسلیں کچھ پڑھ آئے اوحدیہ تون واپسی تے رسول خدا نے دنیا دے سارے وڈھے شہنشاہواں نون خطاں دے ذریعے اسلام دی دعوت وئی۔ مدینے دی نوین ریاست ولوں، جس دی اپنی عمر اے ۶ ورھے ہوئی سی، عظیم الشان حکومتاں دے سربراہواں تے فوجی طاقت دے نئے وچ ڈھت حکمراناں نون خط کوئی سوکھا کم نہیں سی۔ ایس لئی زبردست استقامت، اپنے اللہ دی ذات تے پورا بھروسا تے اپنی حکومتی ٹیم اُتے بھرواں اعتماد چاہیدا سی، تے ایہ سارا کچھ ریاست دے سربراہ محمد رسول اللہ وچ پوری طرحاں موجود سی۔

صدر مدینہ جناب محمد رسول اللہ نے دنیا دیاں سیاسی طاقتاں نون جیہڑے خط لکھے اوہناں دی تعداد ڈھائی سوتوں زیادہ اے تے اوہناں دامتین ڈاکٹر حمید اللہ دی کتاب ”الوثائق السیاسیہ“ وچ لکھدا اے۔ اوہناں وچوں چار اصل خط ایس ویلے دنیا دے سامنے آچکے نیں جنہاں دی تصدیق عالمی محقق کر چکے نیں۔

ایس تھلے جیہڑے ۸ خطاں دا ذکر کر رہے آں ایہ اوہناں ۲۵۰ خطاں وچوں اوہ خط نیں جیہڑے وڈھیاں تے طاقتور ریاستاں دے شہنشاہواں نون لکھے گئے۔ ایہ خط ۶ھ دے اخیر دی دناں یاں ۷ھ دے مڈھلے مہینیاں وچ لکھے گئے سن۔ کچھ محققاں تے سیرت لکھیاراں نے ایہناں خطاں دی تاریخ پہلی محرم ۷ھ لکھی اے، جوں کہ قاضی سلمان منصور پوری لکھدے نیں: ”۷ھ کے ماہ محرم کی پہلی تاریخ تھی کہ نبی نے پادشاہان عالم کے نام دعوت اسلام کے خطوط مبارک اپنے سفیروں کے ہاتھ روانہ فرمائے۔ جو سفیر جس قوم کے پاس بھیجا گیا وہ وہاں کی زبان جانتا تھا تاکہ تبلیغ بخوبی کر سکے۔“

قاضی صاحب نے ایس تے خصائص الکبریٰ دا حوالہ وی دتا اے پر فیروی ایہ گل ٹھیک نہیں جا پدی۔ اوہ ایس لئی کہ سارے سیرت لکھیاراں دا ایس گل تے اتفاق اے کہ خیبر دی فتح تون بعد جس بندے نے جناب صفیہ نون لونڈی دے طور تے لینا چاہیا سی اوہ دجیہ کلبی ہی سن۔ قاضی صاحب نے آپون وی دجی جلد وچ حضرت صفیہ دے ذکر وچ جناب دجیہ کلبی والی گل نقل فرمائی اے۔ آپ نے ہر قل شاہ روم ول رسول خدا دے قاصد دا نام وی دجیہ بن خلیفہ کلبی ہی لکھیا اے ۱۱ سوال ایہ ہے کہ جے جناب دجیہ کلبی محرم دی پہلی تاریخ نون رسول خدا دا نامہ مبارک لے کے ہر قل ول ٹر گئے سن تے اوہناں جنگ خیبر وچ شرکت کوں کر لئی؟ ایوں جا پدا اے کہ کچھ بادشاہواں نون خط جنگ خیبر تون بعد لکھے گئے سن۔ اصل وچ وڈے شہنشاہواں دیاں اکھاں وچ اکھاں پاکے گل کرن دا ویلا بن داوی خیبر تون بعد دا ہے۔

خطاں دی تفصیل وچ جان توں پہلاں اک گل دا ذکر ضروری جا پدا اے کہ رسول خدا تے دین اسلام، اللہ دی زمین تے دنیا دے شنشہا ہواں طرحاں ذہناں تے جسمیں تے حکومت کرن نہیں آئے سن سگوں دلاں دی حکمرانی لئی آئے سن، تے ایہ سنیہا لے کے آئے سن کہ لوکو! اللہ دی زمین تے بس اللہ دی حکومت ہونی چاہیدی اے، تے بندیاں اُتے بندیاں دی خدائی والا کم مک شک جانا چاہیدا اے۔ دنیا دے طاقتور ترین حکمراناں نوں اسلام دی دعوت دا مطلب وی ایہ نہیں سی کہ اوہ اپنیاں سلطنتاں تے حکومتاں توں دست بردار ہو جان سگوں دعوتی رقعیاں دا مطلب تے ایہ سی کہ اپنی رعایا تیکر اللہ دا پیغام اپڑا دیو تے فیروہناں اُتے اوویں حکمرانی کرو جویں اللہ آکھدا اے۔ ۲۰۰۲ء وچ ہندوستان وچ چھپی اک کتاب وچ اک ہندو مصنف نے ایس فلسفے دا ایوں ذکر کیا اے:

Prophet Muhammad is declared as apostle of peace as he was sent to earth to spread the message of peace, harmony, social equality, justice so as to cultivate a pragmatic, progressive and permissive society where there existed no animosity, ill will, acrimony, religious intolerance, social disparities etc. 'Silm' is the root word of Islam which means peace; hence peace is the hallmark of Islam. Even the first verse of the Quran, which reads as follows:

"In the name of God, most merciful, the most compassionate." ☞

”محمد رسول (اللہ) نوں تے بنایا ای امن دا پیغمبر گیا اے کیوں جے اوہناں نوں دنیا تے امن چین، سماجی مساوات تے عدل دا پیغام عام کرن لئی گھلایا گیا سی۔ تاں جے دنیا تے اک افادی، ترقی پسند تے پر تحمل سوسائٹی دی بنیاد رکھی جائے جتھے دشمن داری، کینہ پروری، سخت مزاجی، مذہبی عدم رواداری تے سماجی نا انصافیاں دا کوئی وجود نہ ہووے۔ ”سلم“ اسلام دا اک مڈھلا اکھراے جہدا مطلب اے بس امن۔ اس دا مطلب ایہ ہونیا کہ امن اسلام دی عینہ اے، ایہتھوں تیکر کہ قرآن دی پہلی آیت ایہ ہے:

”اللہ دے نام نال جیہڑا بے حد مہربان تے چوکھارم کرن والا اے۔“

شیو شرجی دسنا ایہ چاہندے نیں کہ اسلام دا ہر فعل امن تے بس امن لئی ہندا اے۔ صلح حدیبیہ یاں معرکہ خیبر توں بعد کیتی گئی خط و کتابت وچ وی ایہی جذبہ سی کہ دنیا توں نا انصافی، ظلم و جبر تے معاشرتی نا ہمورابیاں دا مڈھ پٹ دتا جاوے تاں جے رب دی مخلوق کسے طمعے یاں کسے ڈرتوں کسے نا خدا نوں خدا منن تے مجبور نہ ہو جاوے تے نہ ای بندیاں تے بندیاں دی خدائی دا شوق رکھن والیاں دا وسیلہ بنے۔

ہن اسیں خطاں ول آؤندے ہاں۔

شاہ حبش نجاشی:

حبشہ ول مسلمان دو ہجرتاں کر چکے سن۔ حبشہ دے بادشاہ نجاشی دی شہرت وی چنگی سی۔ تے اوس دا جیہڑا مسلماناں

نال سلوک ہوندا اسی ایس بنیاد تے وی ایہ آکھیا جاسکدا اسی کہ اوس دا جواب سلاہن جوگ ہووے گا۔ ایس لئی مڈھلے دنوں وچ جیہڑے خط لکھے گئے اوہناں وچوں اک خط جناب عمرو بن اُمیہ ضمری دے ہتھ نجاشی حبشہ جناب اصحفہ بن ابجرنوں وی لکھیا گیا۔

جناب عمرو بن اُمیہ بن خویلد بن عبد اللہ ضمری دی کنیت ابو اُمیہ اے۔ آپ مہاجرین حبشہ وچ شامل سن۔ پر ہجرت مدینہ توں بعد مدینے تشریف لے گئے۔ بڑے سیانے بندے سن تے ہجرت حبشہ پاروں اوتھوں دی رہتل تے زبان توں وی واقف ہو گئے۔ ایسے پاروں ایس سفارت کاری لئی رسول خدا دی نظر اوہناں تے گئی۔ آپؐ نے حضرت اُم حبیبہ دے نکاح دی وکالت وی کیتی۔ آپؐ دور معاویہ وچ ۶۰ھ دے نیڑے تریڑے فوت ہوئے۔ ڈاکٹر حمید اللہ دی تحقیق موجب صدر مدینہ جناب محمد رسول نے جیہڑا خط لکھیا اوہ ایہ ہے:

”بسم اللہ الرحمن الرحیم

محمد رسول ولوں حبشہ دے عظیم بادشاہ نجاشی ول۔ سلام اوہدے تے جیہڑا راہ ہدایت تے چلے۔ اما بعد میں تہاڈے اگے اوس اللہ دی حمد و ثناء بیان کردا ہاں جس توں سوا کوئی معبود نہیں۔ اوہ سچا بادشاہ اے، ہر عیب توں پاک اے، سلامت رکھن والا، امان دین والا تے نگہبان اے۔ میں گواہی دیندا ہاں کہ عیسیٰ بن مریم روح اللہ نیں تے اوس دا کلمہ نیں جیہڑا اوہناں مریم نوں القاء کیتا۔ اوہدی روح تے پھونک نال مریم، جناب عیسیٰ لئی حاملہ ہوئیاں، بلکل اوویں ای جویں اللہ نے جناب آدم نوں اپنے ہتھ نال پیدا کیتا۔ میں تہانوں اللہ وحدہ لا شریک لہ ول تے اوس دی اطاعت لئی دوستی دی دعوت دیندا ہاں۔ جے تسمیں میری پیروی کرو گے تے میرے پیغام تے ایمان لیاؤ گے تے جان لوؤ کہ میں اللہ دا رسول ہاں۔ میں تہانوں تے تہاڈے لشکرنوں اللہ تے ایمان دی دعوت دیندا ہاں۔ میں حق دا پیغام تہانوں اپڑا دتا اے تے تہاڈی خیر خواہی کردتی اے۔ بس میری نصیحت تے عمل کرو تے اوس تے سلام جیہڑا ہدایت دی پیروی کرے۔“ محمد رسول اللہ (مہر)

جدوں جناب عمرو بن اُمیہ نے رسول خدا دا ایہ نامہ مبارک جناب نجاشی دے حوالے کیتا تے اوہناں اوہ خط اکھاں تے رکھیا تے تخت توں اتر کے زمین تے آ بیٹھے۔ فیر اوہناں جناب جعفر بن ابوطالب دے ہتھ تے جیہڑے اوہدوں حبشہ وچ موجود سن، اسلام قبول کر لیا تے رسول خدا نوں لکھ **بسم اللہ** اے اللہ دے نبی! تہاڈے تے اللہ دی سلامتی، رحمت تے برکت نازل ہووے، اوہ اللہ جس توں سوا کوئی عبادت دے لائق نہیں، اما بعد اے اللہ دے رسول! مینوں تہاڈا غلط لگیا اے جہدے وچ تساں جناب عیسیٰ دا وی ذکر فرمایا اے۔ خدائے زمین و آسمان دی قسم! جو تساں ذکر فرمایا اے جناب عیسیٰ ایس توں بھوراوی وکھ نہیں سن۔ جیہڑی تساں دعوت دتی اے اوس نوں میں سمجھ لیا اے۔ میں تہاڈے چاچے دے پتر تے تہاڈے صحابہ دی عزت کیتی اے۔ میں گواہی دیندا ہاں کہ تسمیں اللہ دے سچے رسول او۔ میں تہاڈے چاچے دے پتر دے ہتھ تے تہاڈی بیعت کیتی اے تے اوہناں دے ہتھ تے رب العالمین واسطے اسلام قبول کر لیا اے۔“

رسول خدا نے جناب عمرو بن اُمیہ نوں ایہ وی پکی کیتی سی کہ اوہ مہاجرین حبشہ نوں واپسی دی ہدایت کرن۔ ایس گل دی اطلاع جناب نجاشی نوں وی دتی گئی تے اوہناں نے دو کشتیاں دا بندوبست کر دتا۔ اک کشتی وچ جناب جعفر بن

ابوطالب تے جناب ابوموسیٰ اشعری وغیرہ بیٹھ گئے تے سدھے خیبر پہنچ کے رسول خدا دی خدمت وچ حاضری دتی تے دُجی کشتی جہدے وچ چوکھے بال تے سوانیاں سن، سدھی مدینے اپڑ گئی۔

جناب اصحفہ، نجاشی حبشہ نے رجب ۹ھ وچ وفات پائی۔ رسول خدا نے اوسے دن اپنے صحابہ نوں دس دتا کہ اصحفہ چلانا کر گئے نیں۔ آپؐ نے مدینے وچ اوہناں دی غائبانہ نماز جنازہ وی پڑھائی۔
شاہ مصر مقوقس:

اک دانش ور صحابی جناب حاطب بن ابی بلتہ جبہڑے یمن دے رہن والے سن کسے زمانے وچ مکے آ گئے سن۔ مکے وچ ای مسلمان ہو گئے تے فیہ ہجرت مدینہ دی وی سعادت حاصل کیتی۔ آپؐ نے دور عثمانی وچ ۶۵ سال دی عمر وچ ۳۰ھ وچ وفات پائی۔ رسول خدا نے مصر وچ سفارت کاری لئی اوہناں نوں مناسب بندہ سمجھدیاں ہوئیاں مقوقس بادشاہ ول ٹور دتا۔
جناب حاطب نے رسول خدا دا نامہ مبارک اوس تیکر اپڑایا۔ اوس نے پڑھیا تے کوئی کلمہ خیر آ کھیا۔ فیہرہا تھی دے دنناں دے بنے ہوئے اک ڈبے وچ اوس نوں محفوظ کر دتا پر مسلمان نہیں ہوئیا۔ رسول خدا نے اپنے خط وچ اوس نوں خبردار کیتا سی کہ اسلام دی دعوت قبول نہ کرن دا مطلب ایہ ہووے گا کہ اوس دی رعایا دی گمراہی دا گناہ وی اوہدے کھاتے وچ پوے گا۔

قبطیاں دے اوس سیانے سردار نے جناب رسول اللہ نوں جواباً لکھیا کہ اوس نوں پتہ سی کہ اجدے اک نبی دا ظہور ہونا اے پر اوہ سمجھدا سی کہ اوہ شام وچ ظاہر ہون گے۔ اوس نے رسول خدا لئی اک ہزار مثقال سونا، کچھ کپڑے، اک خچر تے دو کنیراں تحفے دے طور تے وی بھیجے۔ جدوں جناب حاطب ایہ تحفے تے مقوقس دا خط لے کے رسول خداؐ دی خدمت وچ حاضر ہوئے تے آپؐ نے فرمایا کہ

﴿صَلِّ الْحَبِیْثُ بِمُلْکِہِ وَلَا بَقَاءَ لِمُلْکِہِ﴾

”حبیث نے اپنی حکومت بچان لئی بخیلی کیتی اے پر اوہ بڑی نہیں۔“

مقوقس دیاں گھلیاں گئیاں کنیراں دے نام ماریہ تے سیرین سن۔ ماریہ نوں رسول خداؐ نے اپنے کاشانے وچ عزت بخشی تے سیرین حضرت حسان بن ثابت نوں عطا کر دتی۔ اوہناں دے لطن وچوں حضرت حسان دے بیٹے عبدالرحمان پیدا ہوئے۔ تحفے وچ آیا ہوئیا خچر بعد وچ دلدل دے نام نال مشہور ہوئیا تے جناب معاویہ دے دور تیکر جیوندار ہیہا۔
کسرائے فارس خسرو پرویز:

رسول خداؐ کمال دی جوہر شناس ہستی سن۔ کیہڑا بندہ اکیہ کر سکدا اے، ایس دی ونڈ لانا اوہناں تے ختم سی۔ جناب عبداللہ بن حذافہ اوہ صحابی سن جہاں دی سیانف تے کوئی شبہ نہیں سی۔ اوہ قریش دی شاخ بنو سہم نال تعلق رکھدے سن۔
مڈھلے دنناں وچ اسلام قبول کر کے ہجرت حبشہ وچ وی شریک ہوئے سن۔ رسول خداؐ نے اوہناں نوں دعوتی خط دے کے ایران ول ٹوریا۔

کسری رحمت عالم دا مبارک رقعہ پڑھ کے بڑا اچھا تے نالے رفعتے نوں ٹوٹے ٹوٹے کر کے سٹ دتا۔ جناب عبداللہ

نے مدینے آ کے رسول خدا نوں ایہ واقعہ سنایا تے آپؐ نے فرمایا کہ اللہ ایوں ای اوس دی بادشاہت دے ٹوٹے کرے گا۔ کسری نے اپنے ماتحت یمن دے گورنر باذان نوں ایہ حکم دی گھلیا کہ حجاز وچ ایہ بندہ جیہڑا نبوت دا دعویٰ کر رہیا اے اوس نوں میرے حضور پیش کیتا جاوے۔ باذان نے اپنے بادشاہ دے حکم موجب دو بندیاں نوں خط دے کے رسول اللہ ﷺ نوں دتا جہاں نہ صرف اوہ خط آپؐ دے حوالے کیتا سگوں ایہ تڑی دی لائی کہ جے آپوں جا کے شہنشاہ فارس نوں نہیں ملدے تے اوہ تہانوں وی قتل کریگا تے تہاڈی سلطنت دی وی اٹ نال اٹ کھڑکا دوے گا۔ آپؐ نے چوکھے قتل نال اوہناں دیاں گلاں سنیاں تے آکھیا کہ کل جواب دیواں گا۔

اللہ تے اوس دے رسول نوں کسری ایران دا تکبر چنگا نہ لگا۔ رومی فوجاں دے ہتھوں ایران دی شامت دے نتیجے تے ایران وچ بغاوت دے جیہڑے آثار نظر آ رہے سن اوہدے نتیجے تے کسری ایران خسرو پرویز نوں اوہدے پتر شیرویہ نے قتل کر دتا تے آپؐ بادشاہ بن گیا۔ ایہ منگل ۱۰ جمادی الاولیٰ ۷ھ دی رات دا واقعہ اے۔

سویرے جدوں دوویں ایرانی سفارت کار حضورؐ دی خدمت وچ حاضر ہوئے تے حضورؐ نے اوہناں نوں آکھیا کہ کیہڑا فارس تے کیہڑا خسرو پرویز؟ اللہ نے اوہدا کم کر چھڈ یا اے۔ تسلیں ہن واپس یمن جاؤ تے جا کے باذان نوں میرے ولوں اسلام دی دعوت دیو۔ آپؐ نے اوس نوں ایہہ سنہیا دی گھلیا کہ جے اوہ مسلمان ہو کے یمن دا الحاق مدینے دی ریاست نال کر دیوے تے حکومت وی اوہدے کول روے گی تے اوس تے کوئی ٹیکس وی لاگو نہیں ہووے گا۔

سفارت کاراں نے یمن جا کے باذان نوں ساری گل بات سنا دتی۔ تھوڑے ای چیراں بعد ایہ خبر مل گئی کہ باذان نے، تے یمن وچ موجود کچھ ہور ایرانی افسراں نے اسلام قبول کر لیا اے۔

شہنشاہ روم ہرقل:

جناب دجیہ بن خلیفہ کلبی دا تعلق عرب دے مشہور قبیلے بنو کلب نال سی۔ دجیہ رسول خداؐ دے بھرویوں بھروسے دے بندے سن تے شکل صورت دے چوکھے ای سوہنے سن۔ حضرت جبرائیل اکثر اوہناں دی شکل وچ رسول خداؐ کول حاضر ہوندے رے۔ روم دے شہنشاہ تک خط اپڑان لئی اوہناں دا انتخاب ہو گیا۔

جدوں ہرقل روم، ایران نوں شکست دے کے اوس مقدس صلیب نوں واپس لین وچ کامیاب ہو گیا جس نوں ایرانی بادشاہ بیت المقدس نوں فتح کر کے اپنے نال لے گیا سی، تے اوہ اپنی منت پوری کرن لئی تے صلیب نوں اوس دی اصل تھاں تے نصب کرن لئی پیدل بیت المقدس گیا۔ اوہ تھے اوس نوں رسول خداؐ دا نامہ مبارک دتا گیا۔ ہرقل نے اوہ تھے حکم جاری کیتا کہ جے دجیہ کلبی توں کھ حجاز دا کوئی بندہ بیت المقدس وچ موجود اے تے اوس نوں اوہدے حضور پیش کیتا جاوے۔ حکم دی تعمیل ہوئی تے حجازی بندے اوس کول حاضر کیتے گئے۔ اوہ تھے ہرقل نے ابوسفیان بن حرب نال کچھ سوال جواب کیتے تے فیر آکھن لگا کہ ”جو کچھ تہاں دسیا اے جے ایہ ٹھیک اے تے فیر اوہ بندہ (جناب رسول خداؐ) بڑی چھیتی میرے پیراں والی جگہ دامالک بن جائے گا۔ مینوں پتہ سی کہ اک نبی آؤن والا اے پر میرا ایہ گمان نہیں سی کہ اوہ تہاڈے وچوں ہووے گا۔ جے مینوں یقین ہوندا کہ میں اوہناں کول اپڑ سکاں گا تے اوہناں نال ضرور ملاقات کردا تے جے اوہناں دے نیڑے ہوندا تے

”اوہناں دے پیر دھوندا۔“

فیر رسول خدا دا خط مبارک پڑھیا تے روم دے وڈے وڈے رئیس جیہڑے اوہدے نال بیت المقدس آئے ہوئے سن، اوہناں نوں دربار وچ اکٹھے ہون دا حکم دتا۔ جدوں سارے حاضر ہو گئے تے اوہناں نوں سوال کیتا: ”اوہ روم دے وٹیکو! کیہ تسیں ہدایت تے بھلائی چاہندے اوتاں جے تہاڈا ملک تہاڈے واسطے باقی رہوے؟ تے کیہ تسیں اوس دی پیروی کردے اوہ جو عیسیٰ بن مریم نے حکم دتا اے؟“

”جہاں پناہ! اوہ کیہ اے۔“ رومی سرداراں نے پچھیا۔

”کیہ تسیں اوس نبی عربی دی پیروی کرو گے؟“ شہنشاہ نے فیر سوال کر دتا۔

ایہ سن کے اوہناں دا حال وحشی کھوتیاں وانگ ہو گیا تے اوہناں صلیباں بند کر لیاں۔ جدوں ہر قل نے ایہ صورت حال دیکھی تے اوہناں توں مایوس ہو گیا سگوں اوس نوں اپنی جان تے اپنی سلطنت دی فکر پے گئی۔ اپنے سرداراں نوں آکھن لگا کہ جو کجھ میں تہانوں آکھیا اے ایہ صرف تہاڈی آزمائش لئی سی۔ میں ایہ دیکھنا چاہندا ساں کہ تسیں اپنے دین تے کتنے پکے او۔ بس میں تہانوں اوویں ای پایا اے جو میں چاہندا ساں۔

ایہ سن کے رومی چوہدر اہٹ بڑی خوش ہوئی تے سارے سجدے وچ ڈگ پئے۔ ایوں اوہ چوہدر اہٹ شہنشاہ روم دی بد قسمتی دا سبب بن گئی تے اوہ اسلام دی روشنی توں دور ای رہیا۔

حارث بن ابی شمر غسانی:

جناب شجاع بن وہب اسدی وی اسلام دے مڈھلے دنوں دے مسلمان سن تے حبشہ ول ہجرت کرن والیاں وچ شامل سن تے ہجرت مدینہ توں بعد، پر جنگ بدر توں پہلاں مدینے اپڑ گئے سن۔ اوہناں جنگ بدر وچ وی حصہ لیا سی تے دو جنگی مہماں دی کمان وی کیتی سی۔ بڑے سیانے تے دانش ور بندے سن۔ جنگ یمامہ وچ شہید ہوئے سن۔

نموطہ (دمشق) دے بادشاہ حارث بن ابی شمر غسانی نوں دعوت اسلام دی ذمہ داری جناب شجاع بن وہب اسدی نوں دتی گئی۔ شجاع آکھدے نیں کہ ”جدوں میں دمشق اپڑیا تے حارث نخلستان وچ سی تے قیصر دی مہمان نوازی دیاں تیاریاں کر رہیا سی، جیہڑا حمص توں ایلیا (بیت المقدس) آیا ہو یا سی۔ میں دو تن دن اوس دی ڈیوڑھی تے بیٹھا رہیا۔ فیر جدوں اوہ باہر آیا تے میں رسول خدا دا نامہ مبارک اوس نوں دتا۔ اوس نے خط پڑھ کے سٹ دتا تے آکھن لگا کہ ”میرے کولوں میرا ملک کون کھو سکدا اے۔ میں اوہدے ول آپ جاواں گا۔ جے اوہ یمن وچ اے تے میں او تھے وی اپڑاں گا۔ فیر اوہ اٹھ کے کھلو گیا تے حکم دتا کہ گھوڑے تیار کیجئے جان تے نالے مینوں آکھن لگا کہ جو کجھ اتھے دیکھیا ای اپنے آقا نوں دس دینا۔ فیر اوس نے مشورہ کرن لئی قیصر ول اک رقعہ لکھیا تے اوس نوں میرے آؤن دی تے اپنے جواب دی تفصیل وی لکھی۔ قیصر نے اوس نوں کسے معرکے توں باز رہن دی ہدایت کیتی تے نالے اوس نوں اپنے کول سد لیا۔ قیصر دا جواب آیا تے حارث نے مینوں بلا کے پچھیا کہ میں کدوں تیکر واپس جان دا ارادہ رکھنا واں۔ میں اوہنوں دسیا کہ انشاء اللہ کل واپس پرت جاواں گا۔ ایہہ سن کے اوس نے میرے لئی سو منتقال سونے دا حکم جاری کر دتا۔ میں جدوں رسول خدا دی خدمت وچ حاضر ہو یا تے

اوہناں نوں ساری حقیقت سنائی۔ آپؐ نے ارشاد فرمایا کہ ”بس اوس داملک ویران ہو گیا۔“

جناب شجاع نے رسول خداؐ نوں حارث بن شمر غسانی دے اک دربان مری دی گل وی سنائی۔ جدوں شجاع، حارث نال ملاقات لئی اڈیک وچ بیٹھسن تے اوہناں مری نوں رسول خداؐ دی ذات، تے اوہناں دی دعوت بابت دسیا۔ مری روم دارہن والا سیانا بنداسی۔ اوہ گلاں سُندار ہیا تے ہولی ہولی موم ہو گیا تے اخیر اُچی اُچی رونا شروع کر دتا۔ آکھن لگا کہ میں انجیل پڑھدا ہاں۔ اخیر نبی دیاں ابھی صفتاں میں انجیل وچ پڑھیاں نیں۔ میں اوہناں تے ایمان لیاؤنا تے گواہی دینا واں کہ اوہ اللہ دے نبی نیں پر بے میں کھل کے گل کراں گاتے مینوں ڈراے کہ کدرے حارث مینوں قتل ای نہ کرا دیوے۔

واپسی ویلے مری نال ملاقات ہوئی تے اوس نے کجھ زادراہ جناب شجاع نوں پیش کیتا تے نالے رسول خداؐ نوں سلام آکھن دی وی درخواست کیتی۔ جدوں جناب شجاع نے مری داسلام حضور دی خدمت وچ پیش کیتا تے اوس دی ساری گل وی حضور نوں سنائی تے آپؐ نے ارشاد فرمایا کہ:

صَدَقَ اوس (مری) نے سچ آکھیا۔

حاکم بحرین منذر بن ساوی:

حضرت علاء بن حضرمی اک سیانے تے باصلاحیت صحابی سن۔ اوہناں دا اصل نام عبداللہ سی تے اوہ حضرت موت دے رہن والے سن۔ آپؐ بڑے مستجاب الدعوات بندے سن۔

منذر بن ساوی شاہ بحرین تک نامہ رسالت اپڑان داکم جناب علاء بن حضرمی دے ذمے لگا۔ منذر ایرانی شہشاہ ولوں بحرین دا گورنری۔ جدوں جناب علاء نے رسول خداؐ دا خط منذر نوں اپڑایا تے اوس نے اہل بحرین نوں پڑھ کے سنا دتا۔ فیر اوس نے رسول خداؐ نوں لکھیا کہ ”میرے لوکاں وچوں کجھ نے تے اسلام نوں محبت تے پاکیزگی دی نظر نال ویکھیا اے تے بعض نے ایس نوں پسند نہیں کیتا۔ میری حکومت وچ یہود تے مجوس وی نیں، اوہناں لئی کوئی حکم صادر فرماؤ۔“ رسول خداؐ نے جواباً لکھیا:

بِسْمِ اللّٰهِ الرَّحْمٰنِ الرَّحِیْمِ

محمد رسول اللہ ولوں منذر بن ساوی ول

تہاڈے تے سلام۔ میں تہاڈے نال اللہ دی حمد کردا ہاں، جس دے سوا کوئی عبادت دے لائق نہیں تے میں گواہی دیندا ہاں کہ محمدؐ اوس دے بندے تے رسول نیں۔ اما بعد میں تہانوں اللہ عزوجل دی یاد دلاندا ہاں۔ چیتے رہوے کہ جیہڑا بندہ بھلیائی تے خیر خواہی کرے گا اوہ اپنے ای واسطے بھلیائی کرے گا تے جیہڑا کوئی میرے قاصداں دی اطاعت کرے گا، اوس نے میری ای اطاعت کیتی۔ جیہڑا اوہناں نال خیر خواہی کرے گا، اوس نے میری خیر خواہی کیتی۔ میرے قاصداں نے تہاڈی تعریف کیتی اے۔ میں تہاڈی قوم ولوں تہاڈی سفارش من لئی اے۔ بس مسلمان جس حالت تے ایمان لیاے نیں اوہناں نوں اوہناں دے حال تے چھڈ دیو۔ میں خطا کاراں نوں معاف کر دتا اے۔ تے تسلیں جدوں تیکر سدھے رستے تے رہو وگے، اسیں تہانوں معزول نہیں کراں گے۔ تے جیہڑا یہودیت یا مجوسیت تے قائم رہوے، اوس تے جزیہ اے۔

شہابان عمان جیفر تے عبد:

شہابان عمان جیفر تے عبد پسران جلندی ول جیہڑے قاصد گئے اوہناں دا نام عمرو بن عاص سی۔ حضرت عمرو بن عاص دا نام اسلامی تواریخ دا بڑا وڈا ہا نام اے۔ آپ بڑے وڈے مدبر، خطیب، سیاستدان تے سپہ سالار سن۔ اوہناں دے گھرانے نوں بہترین گھرانہ قرار دتا گیا سی۔ اوہناں داسب توں وڈا کارنامہ مصر دی فتح اے۔

حضرت عمرو بن عاص عمان اپڑے تے پہلوں عبد نوں ملے۔ عبد نے جناب عمرو نال بڑا تفصیلی انٹرویو کیتا، جہدے وچ جناب عمرو دے والد عاص دے دین توں لے کے آل دوالے دیاں سلطنتاں دا رد عمل شامل سی۔۔ فیراوس نے جناب عمرو نوں وڈے بھرا جیفر نال ملو دتا۔ جیفر تے مہر توڑ کے خط کھولیا تے پڑھ کے عبد نوں پھڑا دتا۔ اوس نے وی خط پڑھ لیا۔ فیر جیفر نے پچھیا:

”قریش دا کیہ حال اے؟“

”سب نے اطاعت کر لئی اے، کسے دین ول رغبت توں تے کسے ڈردیاں ماریاں۔“ حضرت عمرو نے جواب دتا۔

محمد دے قریبی بندے کوں دے نیں؟“ بادشاہ نے پچھیا

”اوہناں سوچ سمجھ کے تے اپنی مرضی تے رغبت نال اسلام قبول کیتا اے۔“

”اچھا کل فیر میرے نال ملاقات کرنا۔“

اگلے دن جدوں جناب عمرو بن عاص، جیفر بادشاہ نوں ملے تے اوس نے آکھیا کہ ویکھ عرو! جے میں اپنی بادشاہت اک اجے بندے دے حوالے کر دیاں جہدے شاہسوار اتھے اپڑے ای نہیں تے میں پورے عرب وچ سب توں چوکھا ماڑا حکمران سمجھیا جاواں گا تے نالے سن لوؤ کہ جے اوس دے شہسوار اتھے اپڑے تے ایوں دا جوڑ پوے گا کہ تساں گئے دناں وچ ویکھیا ہووے گا تے نہ سنیا ہووے گا۔ جناب عمرو نے ایہہ گل بات سنی تے اوہناں نوں آکھیا کہ ایس دا مطلب ایہ ہے کہ مینوں ہن واپس چلے جانا چاہیدا اے۔

”نہیں، کل تیکر رُک جاو۔“ بادشاہ نے آکھیا

ایوں جا پدا اے کہ رات دوواں بھراواں نے آپس وچ صلاح مشورے کیتے تے اللہ نے اوہناں نوں صراط مستقیم تے چلن دی عقل وی عطا فرمائی، کیوں جے اگلے دن اوہناں اسلام قبول کرن دا اعلان کر دتا۔

حاکم یمامہ ہوزہ بن علی:

یمامہ دے حاکم ہوزہ بن علی نوں اسلام دی دعوت دین لئی رسول خدا نے جناب سلیط بن عمرو بن عبد شمس دا انتخاب فرمایا۔ آپ مڈھلے دناں دے مسلمان سن تے حبشہ ول ہجرت کرن والے مسلماناں وچ شامل سن۔ آپ بدر دے معرکے وچ وی شریک سن۔ رسول خدا دے بڑے بھروسے دے بندے سن تے بوہت سارے غزویاں وچ آپدے نال رے سن۔

عہد صدیقی وچ جنگ یمامہ وچ شہید ہوئے سن۔

جناب سلیط نے نامہ گرامی ہوزہ بن علی دے حوالے کیتا تے اوس نے اوہناں دی بڑی آؤ بھگت کیتی۔ فیراوس نے

رسول خداؐ نوں جواباً لکھیا کہ ”عرب تے جیہڑی میری ہیبت اے، اوس داسب نوں پتہ اے۔ جے کجھ علاقے مینوں دے دیوتے میں ضرور تہاڑی اطاعت کر لوں گا۔“ اوس نے جناب سلیط نوں ہجر دامنیا ہو گیا کپڑا تے کجھ ہور تحفے وی دتے۔ حضرت سلیط ایہ تحفے تے ہوزہ داخلہ لے کے رسول خداؐ دی خدمت وچ حاضر ہوئے تے رسول خداؐ نے فرمایا کہ جے اوہ اک گھڑ زمین وی میرے کولوں منگے گا تے میں نہیں دیواں گا۔ جو کجھ اوہ دے قبضے وچ اے اوہ وی تباہ ہووے گا تے اوہ آپوں وی۔ فیر جدوں رسول خداؐ مکہ فتح کر کے واپس پرتے تے آپؐ نے فرمایا کہ آج ہوزہ مر گیا اے۔ جناب رسول خداؐ نے ایہ وی فرمایا کہ ایسے یمامہ وچ اک کذاب نبوت دا دعوت کرے گا، جیہڑا میرے بعد قتل کر دتا جاوے گا۔

”اوس نوں کون قتل کرے گا۔“ اک صحابی نے عرض کیتی۔

”توں تے تیرے ساتھی“ رسول خداؐ نے جواب دتا۔

تواریخ دسویں صدی اے کہ فیر اوتھے مسیلمہ کذاب نے نبوت دا دعویٰ کیتا تے اوہ اوہناں مسلماناں دے ہتھوں قتل وی ہو گیا۔ ایوں رسول خداؐ امبارک ارشاد سو فیصد پورا ہو گیا۔

شرجیل بن عمرو غسانی حاکم اردن:

حارث بن عمیر ازدی مدینے دے اوہناں لوکاں وچ گئے جاندے سن جہاں دی سیانف تے دانش دے چرچے ہوندے سن۔ رسول خداؐ نے موتہ (اردن) دے حاکم نوں اسلام دی دعوت دین لئی جناب حارث بن عمیر ازدی دا انتخاب فرمایا۔ آپؐ محبوب خدا دے حکم دی تعمیل وچ سفر دیاں صعوبتاں برداشت کر دے ہوئے موتہ اپڑے تے آقاؐ دا خط شرجیل دے حوالے کر دتا۔ اوس نے حضرت حارث نوں گرفتار کر لیا تے فیر اوسے حالت وچ اوہناں نوں شہید کر دتا۔ جدوں رسول خداؐ نوں شرجیل دی ایس سفارتی بددیانتی دا پتہ لگاتے آپؐ نے شہادت حارث دا بدلہ لین لئی حضرت زید بن حارثہ دی کمان وچ تن ہزار مجاہداں دے اک لشکر نوں کوچ دا حکم دتا جہدے نتیجے تے سریہ موتہ پیش آیا۔

* * * *

۷۷ تے ۸۷ دے اہم واقعات

۷۷ دیاں کچھ مہماں:

۷۷ اسلامی توارخ دا چوکھا اہم سال ہے۔ ایس وچ دشمنان نوں سدھ کرن لئی رب نے بڑے چنگے موقعے دتے تے ہولے ہولے ڈنگ مارن لئی تیار بیٹھے سب اپنیاں اپناں رڈاں وچ وڑ دے گئے۔

خیبر دے وڈے معرکے توں بعد پہلی مہم صفر یاریج الاول وچ غالب بن عبد اللہ لیشی دی کمان وچ قبیلہ بنو ملوح نال جوڑ پاؤن لئی قیدی وُل گئی۔ غالب ہوراں بشر بن سوید دے رشتے داراں دے قتل دا بدلہ لے لیا تے اوہناں دا مال ڈنگروی ہک لیائے۔

شعبان دے مہینے وچ حضرت عمر بن خطاب دی کمان وچ ۳۰ مجاہداں دا اک جتھا بنو ہوازن وُل گھلیا گیا۔ پر اوہناں نال جوڑ نہیں پایا۔

شعبان وچ ای اک دُجا حربی جتھا حضرت بشیر بن سعد انصاری دی کمان وچ بنو مرہ وُل ٹوریا گیا۔ سوائے جناب بشیر بن سعد توں سارے ۲۹ مجاہد شہید ہو گئے تے ایوں بنو مرہ نوں سبق سکھان دی کوشش کامیاب نہ ہوئی۔

رمضان دے مہینے وچ حضرت غالب بن عبد اللہ لیشی دی قیادت وچ ۱۳۰ مجاہداں دا اک لشکر بنو عوال تے بنو عبد دے خلاف کاروائی لئی گھلیا گیا۔ جناب غالب نے بھروسے کارروائی کر کے باغی قبیلیاں نوں سبق سکھا دتا۔ ایس مہم وچ جناب اسامہ بن زید دے ہتھوں اک اچھا بندہ قتل ہو گیا جسنے لا الہ الا اللہ آکھ دتا سی۔ ایس گل تے رسول خداؐ نے جناب اسامہ نوں بڑا ڈانٹیا سی۔

شوال دے مہینے وچ بنو غطفان دے گٹھ جوڑ دی خبر ملی۔ حضرت عبد اللہ بن رواحہ کمانڈر اسلامی دستے نے ۳۰ سازشیاں نوں مدینے آؤن تے راضی کر لیا تاں جے گل بات کیستی جاوے۔ راہ وچ کسے بدگمانی دے نتیجے تے لڑائی ہو پئی تے اوہ سارے سازشی مارے گئے۔

شوال وچ ای بنو فزارہ تے بنو عذرہ دے علاقے وچ مدینے تے حملے دیاں تیاریاں ہو رہیاں سن۔ اوہناں دی سرکوبی لئی حضرت بشر بن کعب انصاری نوں ۳۰۰ مجاہداں دے نال گھلیا گیا۔ دشمن دوڑ بھج گیا۔

ذوالحجہ دے مہینے وچ رسول خداؐ نے ۵۰ مجاہداں نوں حضرت ابوالعوجاء دی کمان وچ بنو سلیم نوں اسلام دی دعوت دین لئی بھیجیا۔ بنو سلیم نے دعوت حق قبول دی بجائے سخت لڑائی کیتی۔ لڑائی وچ اسلامی سالار جناب ابوالعوجاء زخمی ہو گئے پر مسلماناں نے بنو سلیم دے دو بندے قید کر لے۔

عمرہ قضاء:

﴿لَقَدْ صَدَقَ اللَّهُ رَسُولَهُ الرُّؤْيَا بِالْحَقِّ لَتَدْخُلَنَّ الْمَسْجِدَ الْحَرَامَ إِنْ شَاءَ اللَّهُ آمِنِينَ مُحَلِّقِينَ رُءُوسَكُمْ وَمُقَصِّرِينَ لَا تَخَافُونَ فَعَلِمَ مَا لَمْ تَعْلَمُوا فَجَعَلَ مِنْ دُونِ ذَلِكَ فَتْحًا قَرِيبًا﴾ (الفتح: ۲۷)

”یقیناً اللہ نے اپنے رسولؐ کو خواب دکھایا سی، مطابق حق دے۔ کہ تیس مسجداں حرام وچ ضرور داخل ہو وگے، جدوں اللہ نے چاہیا۔ امن و امان نال، سرمنڈا دے ہوئے یاں وال کٹواندے ہوئے، تہانوں کوئی ڈر نہیں ہووے گا۔ بس اللہ اوہ جان دا اے جو تیں نہیں جان دے۔ بس اوس نے تہانوں پہلوں ای لگدے ہتھ اک فتح دے دتی۔“

پچھلے سال جدوں رسول خداؐ نے اپنے ایس خواب دا ذکر کیتا سی کہ اسیں بیت اللہ دا طواف کراں گے تے فیر حدیبیہ دے معاملے پاروں واپس پرتنا پیا سی تے بہت سارے مشرکاں تے منافقاں نے ایس گل نوں بڑا اچھا لیا سی۔ کافر تے مشرک تے دور دی گل، بڑے بڑے جید صحابہ وی اک دوجے نوں ایہ پچھدے پھر دے سن کہ کہیہ رسول خداؐ نے ایہ نہیں سی فرمایا کہ اسیں بیت اللہ دا طواف کراں گے۔ مطلب ایہ سی کہ ہن طواف کیتے بغیر واپس کیوں پرتے جان دے نیں؟ اللہ نے سورہ فتح وچ ایہ گل تیار دتی کہ میرے محبوب دا خواب سچا ہی سی کہ تیں مسجداں حرام وچ داخل ہوو گے پر اوہدوں، جدوں اللہ نے چاہیا۔ رہی ایہ گل کہ جدوں ایڈی پچھل کر کے عمرے واسطے آئے ہاں، تے ایسے سال عمرہ کیوں نہیں کیتا گیا تے ایس گل دا جواب بس ایہی اے کہ ”اللہ اوہ کجھ جان دا اے جو تیں نہیں جان دے۔“

۷ھ وچ جدوں ذی قعدہ دا چن نظر آ گیا تے اک سال دی مدت پوری ہو گئی تے رسول خداؐ نے اپنے صحابہ کرام نوں عمرہ دی تیاری دا حکم دتا۔ آپؐ نے فرمایا کہ کوئی وی بنداجیہڑا صلح حدیبیہ وچ شامل سی، پچھ نہ رہوے۔ ایس اک سال دی مدت وچ کئی صحابہ شہید ہو گئے سن تے کئی چلانا کر گئے سن، فیروی تعداد گھٹن دی بجائے ودھ گئی۔ ویکھدیاں ای ویکھدیاں بیت اللہ دے پروانیاں دی تعداد دو ہزار تیکر اپڑ گئی، تے سوانیاں تے بال ایس توں دکھ سن۔

رسول خداؐ دے حکم موجب جنگی ساز و سامان تے ہتھیار وی نال رکھے گئے۔ حضرت ابو رہم غفاری نوں ریاست مدینہ دا قائم مقام مقرر کیتا گیا، قربانی دے سٹھ (۶۰) اونٹ نال تیار کیتے گئے، سو گھوڑے سواری لئی تے بے لوڑ پوے تے جنگی مقصد لئی وی تیار کیتے گئے تے رب سوہنے دا نام لے کے مکے ول کوچ دا حکم دے دتا۔ رسول خداؐ نے اپنے جان نثاراں نوں حکم دتا کہ ساز و سامان وادی یا جج وچ سنور کیتا جاوے۔ آپؐ نے ایہ حکم وی فرمایا کہ طواف دے پہلے تن چکر دوڑ کے لائے جان تاں بے ایہ گل غلط ثابت ہو جائے کہ مسلمان مدینے دے موسیٰ بخار دے پھنڈے ہوئے نیں تے اوہناں دے جسیاں وچ کوئی ساہ ست باقی نہیں رہیا۔

قریش نوں ایس گل دی خبر مل گئی سی کہ مسلمان اپنے نال حربی ساز و سامان لے کے آ رہے نیں۔ فیر اوہناں جدوں یا نج دی تھان تے انوٹری انچارج حضرت بشیر بن اسعد کول اسلحے دے انبار لگے ویکھے تے اوہناں مکرز بن حفص دی سربراہی

وچ اک سفارتی وفد رسول خدا ول بھیج کے ایہہ عرض کیتی کہ غدر تے عہد شکنی کدے وی آپؐ داسیوا نہیں رہیا۔ فیہ معاہدے دے خلاف ورزی کردے ہوئیاں ہتھیاراں دی اپنی تعداد اپنے نال کیوں لے آئے او؟
 ”میں اپنے عہد داپکا ہاں۔ یقین رکھو کہ میں ہتھیار لے کے حد و حرم وچ ہرگز داخل نہیں ہواں گا۔“ رسول خدا نے جواب دتا۔

”سانوں تہاڈے توں ایہی امید سی کہ تسیں اپنے وعدے نبھاؤ گے۔“ مکرز نے خوشی خوشی دل دی گل دس دتی۔
 ہتھیار اپنی جگہ تے رہ گئے تے خدائے واحد دے من والے بندیاں دا قافلہ ”میں حاضر آں، یا اللہ میں حاضر آں“ دیاں پکاراں پاؤندامکے ول ٹر پیا۔ مرالظہر ان دی تھاں تے اپڑے تے سالار قافلہ رسول رحمت نے ڈیرے لان دا حکم دے دتا۔

”ہن قریش دا پتر تے مکے دی شانناں والی دھرتی دا شانناں والا فرزند اپنی اوسے اٹھ قصواء تے بیٹھا شاہانہ وقار نال مکے وچ داخل ہو رہیا اے جس قصواء تے سوار ہو کے اوہ مدینے گیا سی۔ تھون ول جان والی پہاڑی گھاٹی دے رستے تے شمع رسالت دے پروانیاں نے اوس شمع نوں گھیرے وچ لیا ہوئیا اے۔ تے لبیک اللہم لبیکیاں واجاں لاندے پیروں پیراگے ودھے جا رہے نیں۔ شہشاہ دو جہاں دے دربان عبداللہ بن رواحہ نے قصواء دی نکیل پھڑی ہوئی اے تے شہشاہ دے غلام اپنے آقا دے حکم تے کٹ مر لئی بے تاب ہوئے پھر دے نیں۔ اوہ اڈیک رے نیں کہ جدوں ای زبان نبوت توں کوئی حکم ملے تے اسیں تعمیل کرن وچ اک دُجے توں بازی لے جائیے۔ ہن نکیل بردار خادم اپنے آقا دی شان وچ اُچی اُچی کوئی شعر پڑھ رہیا اے۔ غور کرو اوہ پکار رہیا اے:

خَلُّو بَنِي الْكَفَّارِ عَنْ سَبِيلِهِ. أَلْيَوْمَ نَضْرِبُكُمْ عَلَىٰ تَنْزِيلِهِ. (ضیاء النبی: ۳۳۹/۴)

اوہ پکار رہیا اے او فرزند ان کفر! میرے آقا لئی راہواں خالی کر دیو۔ آج اسیں تہاڈے نال قرآن دی تنزیل تے جنگ کر دے ہاں۔ اسیں تہانوں اجہی سٹ ماراں گے جیہڑی تہاڈیاں گردناں نوں تہاڈے موہڈیاں توں دکھ کر دیوے گی تے سبناں نوں سبناں توں دور کر دیوے گی۔ او فرزند ان کفر! میرے آقا دے رستے خالی کر دیو۔ خالی کر دیو رستے، کیوں جے ساریاں بھلیائیاں ایس رسول دی ذات وچ نیں۔ اے میرے پروردگار! میں ایہدے ارشاد تے ایمان لیاندا ہاں کہ ایس دے ہر حکم نوں قبول کرن وچ ای اللہ داحق اے۔

لوسنو، اچن چیت اک ہو ر آواز آؤندی اے:

”خاموش ہو جاؤ عبداللہ۔ حضورؐ دی موجودگی وچ تے فیہ حرم وچ شعر پڑھی جا رہیا ایں۔“ ایہ آواز عمر بن خطاب دی اے۔ اوہ عبداللہ نوں ڈانٹ رہے نیں کہ ایس طرحاں محبوب خدا دی بے ادبی ہوسکدی اے پر عبداللہ توں پہلوں ای فیصلہ کرن والے نے فیصلہ کر دتا اے، تے کون اے جیہڑا اوہدے اگے چون وچراں کرے۔ آواز آؤندی اے:

”عمر، ایس نوں کچھ نہیں کہنا۔ ایہ شعر کافراں لئی تیر دی مارتوں وی چوکھے تیز نیں، ایہ آواز فیصلہ کرن والے دی اے، اوس دی اے جہدے فیصلے تے رب نے وی نہیں بولنا۔ اوہ وی کہے گا کہ جے محبوب آکھدا اے کہ عبداللہ نوں شعر پڑھنے

چاہیدے ہیں تے چلو فیر پڑھداروے، میں وی سناں گا۔

ہن حضور عبداللہؐ نوں ہدایت کر رے میں کہ اے روادہ دے بیٹے، تسیں کہو کہ لَا إِلَهَ إِلَّا اللَّهُ - وَحْدَهُ نَصْرَ عَبْدُهُ - وَأَعَدَّ جُنْدَهُ - وَهَزَمَ الْأَحْزَابَ وَحْدَهُ. ”کوئی معبود نہیں سوائے اللہ واحد دے جس نے اپنے بندے دی مدد کیتی تے اوس دے لشکر نوں غالب کیتا تے ککے اوس اللہ نے کافراں دے ٹولیاں نوں شکست دتی۔

ہن عبداللہؐ وی تے باقی مسلمان وی ایہی جملے دُہرا رے میں۔ مکے دے کافر اپنے پروگرام دے مطابق سامنے والی پہاڑی قعیقان دی چوٹی تے چڑھ کے ایہ سارا نظارہ وکھ رے میں۔ اوہ اڈیک لائی بیٹھے میں کہ تاپ دے مارے مسلمان پیلے چہریاں نال طواف کر دے ڈگدے پھرن گے تے اسیں اوہناں دامتاشا ویکھاں گے۔

حضورؐ نے اضطباع کیتا ہوئیا اے یعنی اپنی چادر بے موہڈے دے تھلے بغل توں گزار کے کھبے موہڈے تے سٹی ہوئی اے۔ باقی مسلماناں وی حضورؐ دی پیروی وچ ایوں ای کیتا ہوئیا اے۔ طواف شروع ہوندا اے۔ اک اللہ دے منن والے دوڑاں لا رے میں تے سامنے کافراں اپناں انگلاں دنداں تھلے دبی آؤندے میں، تے اک دُجے نوں آکھ رے میں کہ ایہ تے کوئی ہور ای گل نکلی اے۔

طواف مکمل ہو گیا تے قربانی دی واری آئی۔ رسول خداؐ نے فرمایا کہ سارا مکہ ای قربان گاہ اے۔ فیر مر وہ دے نیڑے جنوراں نوں قربان کر دتا گیا تے سرمنڈ والے گئے۔ فیر کچھ صحابہ نوں یا حج بھیج دتا گیا تاں جے اوہ اسلحہ خانے دی حفاظت کرن تے اوتھے بیٹھا حفاظتی دستہ عمرہ کر لوے۔ آپوں رسول خداؐ بیت اللہ دے اندر تشریف لے گئے۔ ساری رات اپنے معبود واحد دی عبادت وچ گزار دتی۔ آقا دے حکم موجب جناب بلال نے فجر دی بانگ دتی تے مکے دے مشرکاں نوں سب سنگھ گیا۔

”اللہ بوہت وڈا اے، اللہ بوہت عظیم اے، میں گواہی دیندا ہاں کہ اوہدے توں وکھ کوئی معبود نہیں۔ میں گواہی دیندا ہاں کہ محمد اللہ دے رسول نہیں۔“

بلال دی آواز قعیقان دی ٹیسی تیکر جاری سی۔ ایہ کیہ؟ مشرک ڈونگیاں سوچاں وچ ڈب گئے سن۔ اک کالا حبشی جیہڑا کل تیکر اوہناں توں تے اوہناں دے نیانیاں نوں مار کھاندا ہوندا اسی آج اوہ غلام منڈا خانہ کعبہ دی چھت تے چڑھ کے کویں پنگ رہیا اے۔ عکرمہ نے دنداں تھلپوں انگل کڈی تے آکھن لگا کہ اللہ نے ابوالحکم (ابوجہل) تے بڑا کرم کیتا کہ ایس غلام حبشی توں ایہ ککے سنن توں بچالیا۔

”خدا داسکرا اے کہ میرا باپ ایہ منظر ویکھن توں پہلے مر گیا۔“ صفوان بن اُمیہ بولیا۔

”اللہ داسکرا اے کہ میرے والد نوں ایہ دن نہیں ویکھنا پیا۔“ خالد بن ولید نے وی اپنے دل دی بھڑاس کڈی۔

حضرت میمونہ بنت حارث:

حضرت میمونہ نے بیوہ ہون توں بعد اپنا معاملہ اپنی وڈی بہن حضرت اُم الفضل زوجہ حضرت عباسؓ نوں سونپ دتا ہوئیا سی تے حضرت اُم الفضل نے میمونہ دی ذمہ واری اپنے گھر والے حضرت عباسؓ تے پائی ہوئی سی۔ حضرت عباسؓ نے وچ

پے کے جناب میمونہ دا نکاح رسول خدا نال کرا دتا۔ (تفصیل لئی اُمہات المؤمنین دا باب دیکھو)

مسلماناں نوں مکے آئیاں تن دن گزر گئے سن۔ معاہدہ حدیبیہ وچ ایہی گل لکھی گئی سی۔ ایوں چوتھے دن ظہر ویلے مکے دے چوہدریاں نے سہیل بن حویطب نوں رسول خدا ول بے بیجا اہ آپ نوں مکے توں نکل جان دا آکھ۔ رسول خدا نے معاہدے موجب کوچ دا حکم دتا تے سرف دی تھاں تے جا کے ڈیرے لالے۔ جناب میمونہ اہے سفر لئی تیار نہیں سن، ایس لئی رسول خدا نے اپنے اک غلام ابورافع نوں مکے ای رہن دتا تاں جے حضرت میمونہ دی تیاری توں بعد جناب ابورافع اوہناں نوں نال لے آون۔ فیر ایوں ای ہوئی تے ابورافع حضرت میمونہ نوں نال لے کے سرف دی تھاں تے اپڑ گئے۔

مدینے واپس آ کے مسلمان امن سلامتی نال رہن لگ پے۔ رسول خدا نوں ایس گل دا پورا یقین سی کہ اسلام دے اوکھے دن بیت گئے نیں۔ مکے دے قریش، علاقے دے یہودی، نجد دے وکڑے قبیلے تے آل دوالے کھلے بدوواں نوں سمجھ لگ گئی سی کہ ہن واحدانیت دے ہڑ دے اگے۔ نہ مارنا سوکھا کم نہیں۔ مکے دے جگر دے ٹکڑے:

مکے دی اک بیٹھک وچ قریش دے سردار رسول خدا دی تیزی نال ودھی جاندی سیاسی طاقت تے بحث مباحثہ کر رے سن۔ اچن چیت اک جوان اٹھ اے تے آکھ اے کہ ”عقل ونداں نوں پتہ لگ چکیا اے کہ محمد شاعر نہیں تے نہ جادوگر۔ اوہناں دا کلام اصل وچ رب العالمین دا کلام ہوندا اے۔ بس اوہناں دی اطاعت ہر کسے تے واجب اے۔“ ایہ جوان خالد بن ولید اے جنے اُحد دی جنگ وچ سارا نقشہ بدل کے رکھ دتا سی۔

”خالد! ایوں جا پدا اے تسیں وی ستارہ پرستاں دا مذہب اختیار کر لیا اے۔“ عکرمہ بن ابو جہل نے اپنا غصہ کڈیا۔

”تسیں جو دی جانو تے جو دی سمجھو، میں تے مسلمان ہو گیا جے“ خالد ہو ریں فیر بولے۔

”قریش تہاڈے توں ایہہ اُمید نہیں رکھدے سن۔“

”کیوں قریش نوں ایس گل وچ کیہ اچھ نظر آ وندا اے؟“

”محمد نے تیرے باپ نوں قتل کرایا۔ کرایا اے نا؟ تیرا چاچا تے چاچے دا پتر محمد دے بندیاں نے مارے۔ مارے

نیں نا؟ رب دی سوہنہ جے تیری تھاں تے میں ہوندا تے ایوں دی گل کدے نہ کردا۔“

”ایہ جاہلیت دی بحث اے۔ جدوں ساری حقیقت کھل چکی اے تے بے کار آکڑ کس کم دی؟ بس میں مسلمان ہو گیا

وال۔“

کچھ ای چر پچھوں خالد دے مسلمان ہون دی خبر ابوسفیان تیکر وی اپڑ گئی۔ ابوسفیان نے خالد نوں اپنے کول سد گھلایا

تے آکھن لگا کہ خالد! میں کیہ سن رہیا ہاں؟

”تسیں ٹھیک سنیا اے سردار“ خالد نے جواب دتا۔

”اچھا جے ایہ ٹھیک اے تے لات تے عزی دی قسم اے میں محمد توں پہلاں تیرے نال نبھڑاں گا۔“

”تسیں جو دی کہو، میں مسلمان ہو چکیا واں“

ابوسفیان غضب ناک ہو کے اُٹھ اے، اوس دے حواری وی نال ای اُٹھ جاندے نیں، سارے رُل کے خالد دے گل پے جاندے نیں پر عکرمہ اگے ہوندا اے تے ابوسفیان دا پلا کھج کے آکھدا اے کہ ابوسفیان جی! ایوں گل بن دی نظر نہیں آؤندی۔ مینوں تے اندیشہ اے کہ ہور سال تیکر سارے مکے والیاں محمد دین قبول کر لینا اے۔

مکے وچ خالد دا مسلمان ہونا اک گرما گرم خبر (Burning Issue) دے طور تے سنیا گیا۔ اوہدرا یہ بحث مباحثہ جاری سن تے اوہدر خالد نے اپنے مسلمان ہون دی خبر تے تحفے دے طور تے کجھ گھوڑے رسول خدا دی خدمت وچ بھیج دتے۔

جناب خالد بن ولید دے مسلمان ہو جان دے کچھ کئی سارے جذبے نظر آؤندے نیں۔ مثال دے طور تے ایہ کہ عرب وچ اوہناں دی پچھان اک سیانے تے دلیر کمانڈر دی سی پر صلح حدیبیہ توں بعد کمانڈر دی حیثیت نال اپنے آپ نوں منوان دی گنجائش ختم ہو گئی سی۔ دُجی وجہ ایہہ سی کہ وڈا بھرا ولید بن ولید پہلے ہی مسلمان ہو چکیا سی تے اوہ عمرہ قضا دے ویلے جدوں مکے آیا تے خالد نوں لہجدار ہیبتاں جے اوس نوں سدھے راہ تے ٹرن دی ہدایت کرے۔ خالد دُجے بوہت سارے کافراں طرحاں مکے توں باہر نکل کے بیٹھ گئے سن۔ ایس لئی جناب ولید دی اوہناں نال ملاقات نہ ہو سکی۔ فیر جناب ولید نے خالد دے نام اک رقعہ چھڈیا کہ ”خالد! تیری عقل و دانش داتے جواب نہیں، اسلام چھیا سچا مذہب تیرے توں کوں پوشیدہ اے۔“ جناب ولید نے ایہ وی لکھیا کہ ”رسول خدا تہانوں یاد کر دے رے نیں تے مینوں بار بار پچھدے رے نیں کہ خالد کتھے وے؟ سو خالد اچھے وی ویلا ای، اپنے آپ نوں ضائع نہ کر۔“

ایس عظیم سپہ سالار دے مسلمان ہو جان دی اک ہور وجہ ایہ وی نظر آؤندی اے کہ ولید دی بیوی یعنی خالد دی والدہ، جناب عباس دی بیوی اُم الفضل تے ابورہم دی بیوی سکلیاں بھیناں سن۔ ابورہم دی وفات توں بعد عمرہ قضا دے دناں وچ جناب عباس دی خواہش تے حضرت میمونہ رسول خدا دے نکاح وچ آ گئیاں تے ایوں اپنے نویں دیس مدینے اپڑ گئیاں۔ اُم المومنین میمونہ نوں اپنے بھانجے نال بڑا پیار سی تے خالد وی خالہ نال بڑا پیار کرداسی۔ اُتوں ایہہ وی ہو گیا کہ رسول خداؐ جناب میمونہ دیاں دو بہناں حضرت سلمیٰ بیوہ سید الشہداء حضرت حمزہ تے عمارہ نوں وی اپنے نال مدینے لے گئے۔ ایس رخصتی توں بعد خالد اس رہن لگ پے۔

حربی کارنامیاں دی معطلی، وڈے بھرا ولید دا خط، رسول خدا دا خالد نوں یاد کرنا تے ملن دی خواہش کرنا تے مکے توں ماسیاں دار خضت ہو جانا تے فیر خالہ میمونہ دار حرم نبی وچ شامل ہو جانا جناب خالد بن ولید دے اسلام دے نیڑے ہون دے سبب بنے، تے اخیر اک دن آپ بارگاہ رسالت وچ حاضر ہو گئے۔

جناب عمرو بن العاص:

جناب عمرو بن عاص وی کفار دے چوٹی دے کمانڈر سن۔ اوہ آکھدے نیں کہ ”میرے دل وچ اسلام دی عداوت گٹ گٹ کے بھری ہوئی سی تے حدیبیہ توں بعد، تے اگلے ورھے رسول خدا دی مکہ آمد توں پہلاں میں مکہ چھڈ دینا چاہندا

ساں۔ ایسے پریشانی وچ میں کجھ دن رھط وچ جاڈیرے لائے۔ فیراک دن مکے واپس آئیاتے اپنے قبیلے دے لوکاں نوں اکٹھا کر کے ایہ صلاح دتی کہ اوہناں نوں مکہ ہمیش لئی چھڈ کے حبشہ ٹر جانا چاہیدا اے۔ مینوں محمدؐ دی غلامی نالوں نجاشی دی تابعداری جنگی لنگدی اے۔ ایوں اسیں لوک حبشہ ول کوچ کر گئے۔ اک دن میں اوتھے عمرو بن اُمیہ ضمری نوں دیکھیا جیہڑا رسول خدا دا خط لے کے نجاشی ول آئیہوئی سی۔

اسیں جدوں نجاشی کول حاضر ہوئے تے اوس نوں عرب دے بوہت سارے تحفے دتے سن، ایس لئی میں ایہہ خیال کیتا کہ نجاشی میری ہر گل من لوے گا۔ ایسے خیال نال میں نجاشی نوں ایہہ درخواست کیتی کہ عمرو بن اُمیہ اوس بندے دا قاصد اے جنے ساڈے نامور افراد نوں قتل کیتا اے، ایس لئی ایہ بندہ قتل کرن لئی ساڈے حوالے کر دیو۔ ایہ سندیاں سار ہی نجاشی غصے نال لال پیلا ہو گیا تے اوہنے رکھ کے اک تھپڑ میرے منہ تے دے ماریاتے آکھن لگا کہ توں اک اجہی ہستی دے قاصد نوں اپنے قبضے وچ لین دا سوال کیتا اے جہدے کول جبرائیل حاضر ہو بندے نیں۔“

خالد بن ولید نال ٹاکرا:

ایس توں بعد کسے بہانے میں اپنے ساتھیاں توں وکھ ہو گیا تے یمن دے رستے مدینے ول کوچ کر گیا۔ مرالظہر ان توں لنگھدا ہوئیہ جدوں میں ہدایہ دی وستی وچ اپڑیا تے اوتھے میری ملاقات خالد بن ولید تے عثمان بن طلحہ نال ہو گئی جیہڑے اسلام قبولن دے ارادے نال مدینے جا رہے سن۔

تتاں دی آپس وچ گل بات ہوئی، اپنے ارادے تے خیال اک دُجے نوں دتے، اوٹھنیاں تیار کیتیاں تے مدینے اپڑ گئے۔ حرہ دی تھاں تے دھوتے ہوئے کپڑے پائے۔ اونے چیر نوں ڈیگر دی بانگ ہو گئی۔ اسیں فیر ٹر پے تے بارگاہ رسالت وچ جا کے اوس دی رحمت اللعالمینی دے مزے لین لگ پے۔ سانوں وکچہ کے اوس سوہنے محمدؐ دا چہرہ مبارک ہو رکھل اُٹھیا۔ جنے صحابہ حضورؐ دے نال بیٹھے سن سب نوں چاء چڑھ گیا۔

حضرت خالد بن ولید دے نال تشریف لیاؤن والے جناب عثمان بن طلحہ مکے دے دھڑلے والے بندے تے کلید بردار کعبہ ﷻ ایس طرحاں اوہناں دی پچھان اک وڈے سرکاری افسر والی سی۔ جناب خالد بن ولید تے جناب عمرو بن عاص دے نال اوہناں وی اللہ دی واحدانیت تے رسالت محمدؐ دا اعلان فرمایا۔

رسول خداؐ نے ایہناں تتاں ہستیاں نوں اسلام قبولن دی غرض نال اپنے ول آؤندیاں دیکھیا تے ارشاد فرمایا کہ:

”آج مکے نے اپنے جگر دے ٹکڑے ساڈی جھولی وچ سٹ دتے نیں۔“

جنگِ مَوْتہ:

مَوْتہ اُردن دا اک شہر اے جیہڑا اک زرخیز میدان وچ بحیرہ مرداردی جنوبی نکر دے مشرق تے کرک توں تقریباً جنوب ول اے۔ مدینے توں مَوْتہ جان لئی بحیرہ قلزم نوں کھپے پاسے چھڈ کے ایس دے بلکل متوازی، اوہنے ای پندھ تے رہنا پیندا سی جنے پندھ تے مدینہ شریف سی۔ مدینے توں خیبر، علا، تبوک تے معاون توں ہونڈیاں تقریباً اک ہزار کلومیٹر دے

یعنی بیت اللہ دی چابی اپنے کول رکھن دا شرف اوہناں نوں حاصل سی۔

فاصلے تے واقع بحیرہ مردار دا ایہ ساحلی شہر مسلماناں تے رومیاں دی پہلی جنگ دا اکھاڑہ بنیا۔
امرا جیش دی تکون:

جنگ مؤتہ لئی رسول خداؐ نے جیہڑا لشکر تیار فرمایا سی اوس داسپہ سالار حضرت زید بن حارثہؓ نوں بنایا۔ نال ای فرمادتا کہ
جے زید شہید ہو جائے تے جعفر بن ابوطالب امیر ہون گے، جے اوہ وی شہید ہو جان تے فیر عبد اللہ بن رواحہ امیر لشکر ہون
گے۔ آؤ جنگ دے واقعات توں پہلاں ایہناں تیناں شاناں والیاں ہستیاں توں جانو ہولوئیے۔
زید بن حارثہ:

حضرت زید دا تعلق بنو کلب نال سی۔ اے بال ای سن جدوں اک قبیلے نے غارتگری کر دیاں اوہناں نوں اغوا کر لیا
تے فیر غلام دے طور تے اوہناں نوں بازار وچ بیچ دتا۔ حضرت خدیجہ دے بھتیجے حکیم بن حزام بن خویلد نے اوہناں نوں
خرید کے اپنی پھوپھی حضرت خدیجہ دی خدمت لئی دے دتا۔ اوہدوں جناب خدیجہ رسول خداؐ دے نکاح وچ آ گئیاں سن۔
ایوں اوہناں نے زید نوں جناب رسول اللہ دی خدمت وچ پیش کر دتا۔ آپؐ زید نال بوہت پیار کر دے سن۔

جدوں زید دے والد نوں پتہ لگا کہ زید مکے وچ اک قریشی جوان محمد دی غلامی وچ اے تے اوہ اوہناں نوں واپس
لین لئی آپؐ کوں اپڑ گئے۔ حارثہ نے رسول خداؐ نال سودے بازی شروع کیتی تے آپؐ نے فرمایا کہ میں ایس نوں بغیر کچھ
لین دین توں ای آزاد کر دا ہاں۔ آپؐ نے زید نوں آزاد کر دتا تے حارثہ نوں آکھیا کہ ”حارثہ جی! جے جاندا ہے تے
لے جاؤ۔“ جدوں حارثہ نے زید نوں پچھیا تے اوہناں آکھیا کہ ”بابا جی! تسیں میرے تے میں تہاڈا ہاں۔ اسیں ضرور
ملاں ورتاں گے پر جے تسیں مہربانی کرو تے مینوں جناب محمد کوں ای رہن دیو۔“ حارثہ نے پتر دی خواہش موجب اوہناں
نوں رسول خداؐ دی خدمت وچ ای رہن دتا۔ رسول اللہؐ نے زید نوں اپنا پتر بنا لیا تے ایوں اک غلام منڈا زید بن محمد دے
نام نال پچھانیا جان لگ پیا۔ اوس چوکھے مہربان نے رحمت اللعالمین نبی دی محبت تے مہربانی دا ایہہ واقعہ اوس دور دا اے
جدوں اے آپؐ نے اعلان نبوت نہیں فرمایا سی۔

زید جوان ہوئے تے آپؐ نے اوہناں دا ویاہ اپنی سکی پھوپھی دی دھی زینب نال کر دتا۔ زینب تے زید دی بن نہ آئی
تے اخیر گل طلاق تیکر اپڑ گئی۔ جناب زید تے زینب دے دکھ ہون دا ذکر سورہ احزاب وچ کیتا گیا اے۔ ایوں زید اوہ کٹے
صحابی نیں جہاں دا ذکر قرآن وچ موجود اے۔

حضرت جعفر بن ابوطالب:

حضرت جعفر، محسن نبوت جناب ابوطالب دے پتر تے شیر خدا حضرت علی دے بھرا سن۔ آپ دی والدہ دا نام فاطمہ
سی۔ جناب جعفر عمر وچ حضرت علی توں دس ۱۰ سال وڈے سن تے اپنے والد طرحاں چوکھے سوہنے تے گھرو جوان سن۔
آپؐ کچھ چرلئی اپنے چاچے حضرت عباس دی کفالت وچ وی رہے۔ اسلام دے مڈھلے دور دے مسلمان سن تے حبشہ ول
ہجرت کرن والے مسلماناں وچ شامل سن۔ جنگ مؤتہ وچ سپہ سالار دی حیثیت نال لڑ دیاں ہوئیاں شہادت دا جام نوش
کیتا۔ شہید ہون توں پہلاں آپؐ دے دوویں بازو دشمن دیاں تلواراں دے واراں نال وڈھے گئے سن۔

حضرت ابن عباس توں روایت اے کہ اک دن سرکارِ دو عالم نے ارشاد فرمایا کہ میں آج رات جنت وچ گیا ساں۔ اوہ تھے میں جعفر بن ابوطالب نوں فرشتیاں نال پرواز کر دیاں ویکھیا۔ اللہ تعالیٰ نے اوہناں دے کٹے ہوئے دو بازو اں دی تھیں تے اوہناں نوں دو پر عطا کر دتے نیں۔ اک دن ایوں وی ہوئیا کہ صحابہ دی اک مجلس وچ بیٹھیاں حضور نے اپنا سر مبارک آسمان ول کیتا تے فرمایا ”وعلیکم السلام ورحمۃ اللہ“ صحابہ نے عرض کیتی کہ یا رسول اللہ! کس دے سلام دا جواب دے رے او؟ ارشاد ہوئیا کہ بنے جعفر بن ابوطالب فرشتیاں دی اک جماعت نال میرے کولوں گزرے نیں، اوہناں نے مینوں سلام آکھیا سی۔ میں اوہناں دے سلام دا جواب دتا اے ﴿ رسول خدا دے ایس ارشاد توں بعد جعفر شہید نوں جعفر طیار (پرواز کرن والا) دے نام نال یاد کیتا جان لگ پیا۔ جناب جعفر دی گھر والی دا نام اسماء بنت عمیس سی۔ اسماء بڑے حوصلے والی سوانی سی۔ جناب جعفر دی شہادت تے رسول خدا نے حضرت اسماء نوں حوصلہ دیندیاں ایہ ارشاد فرمایا سی کہ ”میں دنیا تے وی تے آخرت تے وی جعفر دے بچیاں دا والی تے سرپرست ہاں۔“

شہادت دے ویلے اہل بیت دے ایس سوہنے گھر و دی عمر صرف ۳۳ ورھے سی۔ ﴿

حضرت عبداللہ بن رواحہ:

جناب عبداللہ بن رواحہ دا تعلق انصار دے قبیلے خزرج نال سی۔ حضرت حسان بن ثابت دے پائے دے شاعر سن۔ بیعت عقبہ ثانیہ دی رات اوہناں نوں وی نقیب مقرر کیتا گیا۔ آپ سارے غزویاں وچ شامل رے۔ آپ رسول خدا نوں بہت پسند سن۔ میدان بدر وچ قریش دے متکبر سرداراں عتبہ، شیبہ تے ولید دے مقابلے تے مبارزت لئی جیہڑے تن مجاہد میدان وچ نکلے سن اوہناں وچ اک عبداللہ بن رواحہ سن۔

رسول خدا دے ایس شیدائی غلام نوں اپنے آقا نال کئی محبت سی، ایس دا انداز ایس گل توں ہوندا اے کہ اک دن رسول خدا مسجد وچ خطبہ ارشاد فرما رہے سن۔ حضور نے مسجد وچ کھلوتے کچھ بندیاں نوں ہدایت فرمائی کہ اجلسو (لوگو! بیٹھ جاؤ) جناب عبداللہ نے مسجد توں باہر رسول خدا دی زبان مبارک توں اجلسو والفظ سنیا تے فیر اپنے پیراں نوں جنبش دی اجازت نہیں دتی، بس اوہ تھے ای بیٹھ گئے تے بیٹھے ای رے۔ حضور خطبے توں فارغ ہوئے تے کسے صحابی نے دسیا کہ یا رسول اللہ! عبداللہ مسجد توں باہر ای بیٹھ رہیا اے تے خطبہ سنن اندر وی نہیں آیا۔ کچھ صحابہ جا کے پچھیا کہ عبداللہ جی! تہانوں کیہ بنی؟

”زبان رسالت توں ایہ آواز میرے کنناں تیکر اپڑی سی کہ بیٹھ جاؤ، بس میں بیٹھ گیا۔“ جناب عبداللہ نے جواب دتا۔ ایہ گل جدوں رسول خدا نوں دسی گئی تے آپ بڑے خوش ہوئے تے عبداللہ نوں دعاواں دیندے رے۔ رسالت محمدی دا ایہ عاشق صادق دی موت دی جنگ وچ سپہ سالار دی حیثیت نال دشمن دیاں صفیاں نوں چیر دار ہیا تے اخیر شہادت دا پیالہ پین وچ کامیاب ہو گیا۔

سیرت ابن کثیر جلد ۳ صفحہ: ۴۷۷

حیات محمدؐ از محمد حسین ہیکل صفحہ: ۵۰۷

جنگ دے اسباب:

جویں کچھ ذکر ہو یا اے عرب دے تن خطرناک دشمنوں سکھ داساہ آیتاے آپؐ نے دعوت اسلام لئی خط تے تبلیغی وفد دے مکاں ول گھلنے شروع کردتے۔ ایس سلسلے دا اک وفد جناب کعب بن عمیر غفاری دی سربراہی وچ دی بصبیجہ گیا۔ جدوں ایہ تبلیغی وفد ذات طلح دی تھاں تے اپڑیا تے حضرت کعب نے اوہناں لوکاں نوں اسلام دی دعوت دتی پر اوہناں تے تیراں دا اہیامینہ پایا کہ سوائے حضرت کعب بن عمیر توں سارے، پندراں دے پندراں، مسلماناں شہید کردتے۔ ایسے موقعے وچ رسول خدا نے اردن دے حکمران شرجیل بن عمرو غسانی نوں دعوتی خط لکھیا پر شرجیل نے آپؐ دے قاصد جناب حارث بن عمیر از دی نوں شہید کر دتا۔

دعوت حق دے جواب تے ذات طلح دے مشرکاں دا جرم کسے وی طرحاں قابل معافی نہیں سی۔ ایوں ای کسے سفارت کار د اقل انسانی تواریخ دے کسے وی دور وچ جائز نہیں سمجھیا گیا۔ پر اللہ نوں ایس طرحاں ای منظور سی کہ ایہ شہادتیاں جنگ مَوْتہ دا سبب بنن والیاں سن، اوس جنگ دا جیہڑی بالآخر جنگ تبوک تے فیر عہد فاروقی وچ پورے ملک شام دی فتح دا سبب بنی۔

اوپر ذکر کیتے گئے دوواں جرماں دی سزا دین لئی جمادی الاول ۸ھ (۶۲۹ء) وچ رسول خدا نے تن ہزار مجاہداں دا لشکر تیار کیتا تے وفاتے امتحان دیاں اوکھیاں راہواں تے ٹور دتا۔ نبی مکرم اسلام دے مجاہداں نوں رب راکھا آکھن لئی آپوں ثنیۃ الوداع تیکر تشریف لیائے تے اوتھے لشکر اسلام نوں کجھ ہدایت فرمائی۔ ایہہ ہدایت یاں حکم حربی تواریخ دے اوہ اکھرنیں جہناں تے اسلامی دنیا جہناں وی فخر کرے، کرسکدی اے۔ ہادی برحق نے فرمایا:

”میں تہانوں اللہ توں ڈر دے رہن دی وصیت کردا ہاں تے جیہڑے مسلمان تہاڈے نال نیں اوہناں نال بھلیائی کرن دی تاکید کردا ہاں۔ اللہ دا نام لے کے اللہ دے رستے تے، اللہ دے منکراں نال جنگ کرو۔ کسے نال دھوکہ نہ کرنا، بددیانتی نہ کرنا، کسے بچے یاں سوانی نوں قتل نہ کرنا۔ کسے بزرگ، تے اپنیاں خانقاہواں تے گوشہ نشین رہن والیاں تے وار نہ کرنا۔ کجھو ردے کسے رکھ نوں نقصان نہ اپڑے، کسے دُجے رکھ نوں وی نہ وڈناتے کسے مکان نوں ڈھان دی کوشش نہ کرنا۔“

فیر نبی رحمت نے لشکر اسلام نوں دُعا دتی تے مجاہداں نوں وصیت کیتی کہ شہید حارث بن عمیر دے مزار تے حاضری دینا تے اوتھے جنے لوگ نیں اوہناں نوں اسلام قبول کرن دی دعوت دینا۔ جے اوہ دعوت قبول کر لین تے چنگی گل اے ورنہ اللہ توں مدد طلب کر دے ہوئے اوہناں نال جنگ کرنا۔

خیال کیتا جاندا اے کہ اسلامی لشکر دے کوچ دی خبر اوسے دن ای دشمن نوں مل گئی سی۔ مجاہدین جدوں معان (شام وچ) دی تھاں تے اپڑے تے اوہناں نوں جناب حارث بن عمیر شہید دے قاتل شرجیل دے لشکر دے آؤن دی خبر ملی۔ اک لکھ لشکریاں دی ایہہ فوج شرجیل نے آل دوالے دے قبیلیاں توں اکٹھی کیتی سی۔ دُجے پاسے ہرقل نے وی یونانی تے

عربی سپاہیاں دی اک لکھ دی فوج تیار کیتی تے بلقا دے نیڑے ڈیرے لائے۔ لشکر اسلام دے انٹیلی جنس ونگ نے جدوں ایہ صورت حال دیکھی تے پورے دو دن ایس سوچ وچ پے رے کہ ہن کیہ کرنا چاہیدا اے۔ اک مجاہد نے ایہ صلاح دتی کہ رسول خدا نوں سارے حالات دی خبر دینی چاہیدی اے تاں جے آپ مکہ دے طور تے ہو ر فوج بھیج دین یاں فیر آپ جو وی حکم دین گے، اوس دی تعمیل کر لوں گے۔ سارے لشکرنوں ایہ گل چنگی لگی پر حضرت عبداللہ بن رواحہ، جیہڑے قائم مقام سپہ سالاراں وچ شامل سن، اچن چیت بول پے تے اپنی پرجوش تے مطلب بھری تقریر وچ آکھن لگے کہ ”سبحو! عجیب گل اے کہ شہادت لئی تسیں اتھے ایڈی دور آئے او تے ہن شہادت توں ای دور بھیج رے او۔ اسیں لوکاں نال بندیاں دی کثرت یاں طاقت دے سر تے جنگ نہیں کر دے۔ اسیں تے اوس دین دے بل بوتے تے جنگ کر دے ہاں جیہڑا اللہ نے سانوں عنایت فرمایا اے۔ اللہ دے بندو! اگے ودھو۔ دو نیکیاں وچوں اک تے نصیب وچ لکھی گئی اے۔ فتح نہ ہووے گی تے کیہ شہادت کوئی چھوٹی نعمت اے۔“

ایمان نوں تازہ کر دین والی ایہ تقریر سنن توں بعد ہر مجاہد دی زبان تے بس اک ای کلمہ سی:

﴿قَدْ وَاللّٰهِ صَدَقَ ابْنُ رَوَاحَةَ﴾

”خدا دی قسم اے ابن رواحہ نے سچ آکھیا اے۔“

ہن مسلمان مشارف دی تھاں توں ہٹ کے مؤتہ دے قصبے تے اپڑ گئے سن۔ ابھی مؤتہ جنگ دا اکھاڑا بنیا۔ مسلماناں نے اپنی صف بندی شروع کر لئی۔ قطبہ بن قنادہ جہد تعلق بنی عذرہ قبیلہ نال سی اوہناں نوں میمنہ دی قیادت سونپی گئی۔ میسرہ تے عبایہ بن مالک انصاری نوں افسر بنایا گیا تے تن ہزار مجاہداں دا اک چھوٹا جھیا جتھا اپنے توں ۶۰/۷۰ گنا وڈھے لشکر کفار نال ٹکر لین لئی تیار ہو گیا۔ کیہ منظر ہووے گا تے کیہ حالت ہووے گی دلاں دی اوس ویلے جدوں اک بازاک خونخوار بھگیاڑ دیاں اکھاں وچ اکھاں پائی کھلوتا سی۔ جذبہ جہاد تے شوق شہادت دی ایہ حالت سی کہ جدوں جناب ابو ہریرہ کافراں دا ایڈا وڈا لشکر دیکھ کے پریشان ہو گئے تے حضرت ثابت بن ارقم نے اوہناں نوں ایہ کہہ کے حوصلہ دتا کہ ابو ہریرہ جی! کیہ تسیں جنگ بدر وچ شرکت نہیں سی کیتی؟ ایوں اوہناں نوں یاد کرا دتا کہ صرف تعداد نال ای جنگاں نہیں جتیاں جاندیاں۔

جنگ شروع ہو گئی۔ کمانڈر انچیف حضرت محمدؐ دا عطا کیتا ہو یا علم کمانڈر جناب زید بن حارث دے ہتھاں وچ سی۔ آپ موت داسنہیا بن کے دشمن فوجیاں دیاں لاشاں دے ڈھیر لائی جا رہے سن۔ جناب زید دی تلوار جدر اٹھدی اے، خدا دے دشمنان نوں سبق سکھائی جاندی سی۔ اخیر اک دشمن نے اپنا نیزہ آپ دے سینے وچ گھونپ دتا۔ ایوں رسول خدا دا ایہہ منہ بولیا پتر، جناب رسول خدا نوں تے مدینے دے سارے عاشقان رسول نوں اداس کر دیاں ہوئیاں جنت دیاں سیراں نوں نکل گیا۔

جناب زید بن حارث دے ہتھوں اسلامی پرچم اچے زمین تے نہیں ڈگیا سی کہ جناب جعفر طیار، نائب سپہ سالار بجلی دی تیزی وانگ اگے ودھے تے پرچم اپنے ہتھاں وچ لے لیا۔ گھوڑے توں چھال مار کے تھلے آ گئے تے دشمن تے تاہڑ توڑ حملے شروع کر دتے۔ اوس دور وچ کسے وی فوج دے پرچم دے ہوا وچ لہرا ندے رہن داسد ہا سدا مطلب ایہ ہنداسی کہ

فوج لڑن مرن لئی تیار اے تے اوہناں دے حوصلے جوان نیں۔ ایس لئی دشمن دی نظر علم بردار جعفر طیار تے لگ گئی۔ اک کافر نے آپ دے سبے ہتھ تے وار کر کے ہتھ کٹ دتا۔ آپ نے جھنڈا اوسے ویلے اپنے کھبے ہتھ وچ پھڑ لیا۔ دشمن نے کھبے ہتھ تے وار کیتا تے اوہ ہتھ وی کٹ کے دور جا ڈ گیا۔ پرچم بردار وی ابوطالب دا پتر تے علی المرتضیٰ دا بھراسی۔ پرچم رسول نوں کوں زمین تے ڈگن دیندا۔ آپ چیتے طرحاں اگے ودھے تے بازوواں دے اوہ حصے جیڑے اے جسے پاک دے نال موجود سن، اوہناں وچ پرچم نوں گھٹ کے سینے نال لالیا۔ پر دوواں کٹیاں ہونیاں بازوواں وچوں تیزی نال خون وگ رہیا سی۔ خون ضائع ہو جان پاروں آپ زمین تے ڈگ پے تے اک رومی سپاہی نے تلوار دے وار نال اوس ہاشمی شیر دے جسم پاک دے دو ٹکڑے کر دتے۔ اک روایت موجب آپ دے جسم مبارک تے ۷۰ توں زیادہ زخم لگے تے اوہناں وچ کوئی اک وی پشت تے نہیں سی۔

حضرت جعفر طیار دی شہادت توں بعد، رسول مکرم دے حکم موجب پرچم اسلام جناب عبداللہ بن رواحہ دے ہتھوں وچ آ گیا۔ عبداللہ اک لمحے لئی پریشان ہوئے، اپنے آپ نال کجھ گلاں کیتیاں تے فیرا یہ شعر پڑھ دے ہوئے میدان وچ اتر پے:

اَقْسَمْتُ يَا نَفْسُ لَتَمْلِكَنَّ لَتَمْلِكَنَّ لَتَمْلِكَنَّ لَتَمْلِكَنَّ
اَنْ اَجْلِبَ النَّاسَ وَتُؤَدَّ الرَّحْمَ مَالِي اَرَاكَ تَكْرِهِيَنِ الْجَنَّةَ
قَدْ طَالَمَا قَدْ كُنْتَ سَطْمَتَةً هَلْ اَنْتِ الْاَنْطَفَةُ فِي نَارِهَا

(اے نفس! میں تینوں قسم دیندا ہاں کہ تینوں میدان جنگ وچ اترنا پوے گا۔ خوشی نال تے بھانوس مجبوراً۔ ایہ کوں ہو سکدا اے کہ یار بلی تے جوش نال اگے ودھن تے توں جنت وچ جان توں بچدا پھریں۔ بڑا چیر سکھ چین دی زندگی گزار لئی اے۔ وچوں اوقات کیہ اے تیری، پانی دا اک تہکا (نطفہ)، پرانی مشک وچ)۔ جناب عبداللہ نے تلوار بے نیام کیمتی تے دشمن تے ہلہ بول دتا۔ اوہ دیوانیاں طرحاں کسے دی نتیجے توں بے پرواہ ہو کے تلوار دے جوہر دکھاندے رہے۔ دشمن نے وی اپنے تیراں تے نیزیاں دا رخ اوہناں ول موڑ دتا۔ اخیر ایہ مرد مجاہد وی اسلام دی عظمت لئی اپنی جان قربان کر گیا۔ رسول خدا دے نامزد تان شہید سپہ سالاراں نوں اوتھے ای اکو قبر وچ دفن کر دتا گیا۔

مدینے دے کمانڈر انچیف جناب محمد رسول اللہ دا ارشاد مبارک ایہ سی کہ جے تے سپہ سالار شہید ہو جان تے نواں امیر لشکر اپنی مرضی نال چن لینا۔ بس ہن اوہی نازک تے فیصلہ کن لمحہ سی۔ پرچم اسلام اُچا رکھن لئی بنی عجلان دا اک گھبر و مجاہد ثابت بن قیس بن ارقم اگے ودھیا۔ اوس نے جھنڈا اُچا کر کے واج لائی کہ مجاہدو! اپنے آقا دے حکم موجب نواں سالار چن لوؤ۔ مجاہداں نے جواب دتا کہ تسیں ہی بہتر جے۔

”پر میں اپنے آپ نوں ایس لائق نہیں سمجھدا“ جناب ثابت نے جواب دتا۔

فیہر جناب ثابت دی نظر خالد بن ولید تے پے گئی۔ جناب ثابت نے آواز دتی کہ اے ابوسلیمان! پرچم اسلام تہاں نوں

اڈیک رہیا اے۔ جناب خالد نے جواب دتا:

”ثابت جی! تسلیں ایس شرف دے میرے توں زیادہ حق دار جے، عروج وی میرے توں وڈے جے تے بدری مجاہد وی جے۔“

”خالد! ایس نوں پھڑ وی لے، میں تیرے حوالے کرن لئی ایہ جھنڈا زمین توں چکیا سی۔“ جناب ثابت کچھ غصے وچ

جا پے۔

فیہر حضرت ثابت نے جناب خالد بن ولید دی تسلی لئی مجاہداں کولوں ایس فیصلے دی توثیق کرائی تے ایوں سیف اللہ خالد نے جنگی مہارت دا مظاہرہ کرنا شروع کر دتا۔

جناب عبداللہ دی شہادت دے ویلے شام ہو چکی سی۔ دوویں فوجاں اپنے خیمیاں ول پرت گئیاں سن۔ سویر ہوئی تے جناب خالد بن ولید نے لشکر اسلام دی ساری ترتیب بدل دتی مقدمہ الجیش (Front line) نوں کچھ بھیج دتا تے کچھ والے مجاہداں لے آندے۔ ہن فرنٹ لائن تے مجاہد نویں سن، افسر نویں سن تے کمانڈر نوں سی۔ فیہر کچھ مجاہداں نوں ایہ ہدایت وی کیتی کہ اوہ ذرا دریڈے نکل جان تے سویرے جنگ شروع ہون ویلے ایوں گھوڑے دوڑاندے ہوئے لشکر ول آؤن جو ایں اوہ بڑی دوروں آ رہے نیں۔ سویرے ایوں ای ہو گیا۔ مسلماناں دی ہر گل توں ایہ پتہ لگ رہیا سی کہ اوہناں نوں مدینے توں مکہ مل گئی اے۔ ایوں لشکر کفار نے اگاں دھن دی جرأت نہ کیتی تے اوہناں دے حوصلے پست ہو گئے۔ خالد جے سیانے سپہ سالار نے اوہناں دی ایس حالت خوف نوں سمجھ لیا تے تکبیر دے نعرے لاندے ہوئے شیراں طرحاں کافراں نوں ٹٹ کے پے گئے۔ رومی فوجی اگے لگ کے دوڑ پے۔ مجاہدین اسلام نے اوہناں دے بے شمار فوجیاں نوں موت دی نیندر سوا دتا تے ڈھیر سارا مال غنیمت لے کے مدینے ول پرت گئے۔

موت دے غازی مدینے وچ:

حضرت خالد بن ولید اپنے مجاہداں نال مدینے اپڑے تے کچھ مسلماناں نے غازیانِ موتہ نوں ایہ طعنہ دتا کہ اوہ میدانِ جنگ وچوں دوڑ آئے نیں۔ رسول خدا نوں ایس گل دا پتا لگاتے آپ نے تردید فرمائی کہ ایہ گل ٹھیک نہیں، غازی اپنا کردار ادا کر کے پرتے نیں۔ ایس تسلی دے باوجود کچھ مسلمان غازیانِ موتہ نوں قصور وار سمجھدے رہے۔ مجاہدِ موتہ جناب سلمہ بن ہشام نے تے ایسے مہنے توں مسیت وچ آؤنا بند کر دتا سی۔ پر سچی گل تے ایہ ہے کہ رسول خدا دے حکم موجب غازیانِ موتہ کسے وی طرحاں بگھوڑے نہیں سن۔

موتہ دے سپہ سالار دی موت نال رسول خدا غم وچ ڈب گئے تے آپ دیاں مبارک اکھاں وچوں ساون بھادروں دی جھڑی لگ گئی۔ ایسے دُکھ تے ملال نال آپ جعفر طیار شہید دے گھر تشریف لے گئے۔ شہید دی گھر والی اسماء آٹا گندھ ری سی۔ نینایاں نوں نہا دھوا کے والاں وچ تیل لایا ہونیا سی۔ رسول رحمت نے بالاں نوں سینے نال لایا تے اکھاں فیہر اتھرواں نال بھر گئیاں۔ اسماء نوں سمجھ لگ گئی کہ کوئی خاص گل اے جیہڑا رسول خدا نے بالاں نوں گود وچ لے کے رونا شروع کر دتا اے۔ کچھیا یا رسول اللہ! جعفر ہوراں دی کوئی خبر تے نہیں آئی؟

”ہاں اسماء! اوہ شہید ہو گئے۔“ تے نال ای رسول رحمت دیاں اکھاں وچوں اک وار فیر ٹپ ٹپ اتھرو کر ن لگ پے۔ سیدہ اسماء دی گریہ زاری ویکھی نہیں سی جاندی۔ آل دوال دیاں سوانیاں نوں پتہ لگاتے شہید جعفر دے گھر اکٹھیاں ہو گئیاں تے جناب اسماء نوں تسلی دتی۔ رحمت اللعالمین نبی نے وی سیدہ اسماء نوں تسلی دتی۔ تے فیر دولت خانے تے تشریف لیا کے اُمہات المؤمنین نوں جناب جعفر شہید دے گھرانے لئی روٹی تیار کرن دا حکم دتا۔ اتنے چیر وچ جنگ موّتہ دے پہلے سپہ سالار حضرت زید بن حارث دی صاحبزادی وی رسول خدا کول اپڑ گئی۔ والد دے وچھوڑے دے دکھ تے غم نال اُبلدا دل لے کے رسول خدا دے بازواں تے ہتھ رکھ کے رونا شروع کر دتا۔ آپ دھی رانی نوں تسلی دیندے رے، پر اپنے آپ نوں حوصلہ دینا اوکھا لگ رہیا سی۔ خورے اوس دیہاڑے کیہ گل سی، رسول خدا شہدائے موّتہ دی یاد وچ بڑا ای روئے۔ آقا دی ایہ حالت ویکھ کے دُجے مسلماناں نے وی رونا شروع کر دتا۔

شہید جعفر طیار دے صاحبزادے حضرت عبداللہ بن جعفر فرماؤندے نیں کہ رسول رحمت نے تن دناں تک مینوں اپنے نال نال ای رکھیا تے روٹی پانی ویلے وی سرکار دے نال ای رہیا۔ خیال کیتا جاندا اے کہ کسے مرن والے دے گھر والیاں لئی تن دناں تیکر جیہڑی روٹی گھلی جاندی اے اوہ رسول رحمت دے ایسے حکم مبارک دی پیروی اے۔ ایس روٹی نوں عرب وچ وضیمہ تے پنجاب دے کجھ علاقیاں وچ کوڑاؤنا آکھیا جاندا اے۔ ٹردے ٹردے ایہ ذکر کر دینا دی درست جا پدا اے کہ ویاہ دی روٹی نوں ولیمہ، کسے مسافر دی واپسی تے کھوائی جان والی روٹی نوں نفیقہ تے گھر چھتن یاں تعمیر کرن تے جیہڑی دعوت کیتی جاندی اے، اوس نوں وکیرہ آکھدے نیں۔

شہدائے موّتہ:

تن ہزار تے دولکھ دے مقابلے نوں جنگ دا نہیں سگون کوئی ہو نام دینا چاہیدا اے۔ ایس بے جوڑ مقابلے توں مسلماناں دا بچ کے آجانا ای بہت وڈا کارنامہ سی چہ جائے کہ مسلماناں نے رومی فوج نوں دوڑن تے مجبور کر دتا۔ کافر فوج دا کنا کو نقصان ہو یا ہووے گا ایس دا اندازا ایس گل توں کیتا جاسکدا اے کہ صرف خالد بن ولید دے ہتھوں وچ ۹ تلواریں ٹٹیاں۔ ایس دے مقابلے تے خدائے واحد دے نام لیوا صرف ۱۲ غازی شہادت دے جام پی کے کوئی جنت وچ تختاں دا مالک بنیا تے کوئی طیار اکھوایا۔

موّتہ دے شہیداں دے اسماء گرامی ایہ نیں:

- | | | |
|------------------------------|-------------------------|--------------------------|
| ۱۔ حضرت زید بن حارث | ۲۔ حضرت جعفر بن ابوطالب | ۳۔ حضرت عبداللہ بن رواحہ |
| ۴۔ حضرت مسعود بن اسود | ۵۔ حضرت وہب بن سعد | ۶۔ حضرت عباد بن قیس |
| ۷۔ حضرت حارث بن نعمان | ۸۔ حضرت سراقہ بن عمرو | ۹۔ حضرت ابولکلیب بن عمرو |
| ۱۰۔ حضرت جابر بن عمرو بن زید | ۱۱۔ حضرت عمرو بن سعد | ۱۲۔ حضرت عامر بن سعد |

جست یاں ہار:

سریہ موّتہ مسلماناں ولوں اک انتقامی کاروائی سی۔ نہیں آکھیا جاسکدا کہ مسلمان کس حد تک کامیاب رے پر ایہ ضرور

اے کہ ایس معرکے نال مسلماناں نوں رومیاں دی فوجی طاقت تے اوہناں دے حربی اسلوب دا پورا علم ہو گیا۔ ایہ علم آؤن والے دناں وچ بڑا فائدہ وند ثابت ہو گیا۔ جت یاں ہار دے سوال دا اوویں ای کوئی پکا پیڑا جواب نہیں دتا جاسکدا جو یں جنگ اُحد دا نہیں دتا جاسکدا۔ مورخاں تے سیرت لکھیاں دا کیہ خیال اے، ایہ جانن لئی پٹھ کجھ مستشرقان دی رائے دتی جاندی اے۔

جزل گلب پاشا لکھدا اے:

”مسلماناں نوں موتہ وچ جیہڑی ہزیمت تے ذلت اٹھانی پئی ایس دا ثبوت ایس واقعے توں ملدا اے کہ جدوں مسلماناں دی ایہ شکست خوردہ فوج مدینے پرتی تے مدینے دے لوکاں نے اوہناں تے مٹی سٹی تے اوہناں نوں بھگوڑیاں دا نام دتا گیا۔ لوکاں آکھری سی ”خدا دی راہ توں پرت آئے او، بھگوڑے کسے تھان دے۔“ جے موتہ سچ مچ بہادری تے شجاعت دیاں داستاناں نال رنگین ہوندا تے مدینے پرتن ویلے اوہناں دا استقبال مٹی تے طعنیاں نال نہ ہوندا۔“

جزل سر جان گلب پاشا نے مسلمان سیرت لکھیاں دی ایس گل تے تعجب دا اظہار کیتا اے کہ موتہ وچ صرف بارہاں یا چوداں مسلمان شہید ہوئے سن۔

ڈبلیو ٹنگمری واٹ نے List of expeditions وچ جنگ موتہ دے نتیجے دا ذکر ایوں کیتا اے:

"a successful raid." (اک کامیاب معرکہ)

ڈی۔ ایس مارگولیتھ دی رائے ایہہ ہے:

"If the numbers of the enemy had been one-tenth of the figures given by the historians, no single moslem should have escaped to have come in collision with the great world power and not have been exterminated, if not a victory, was very near one. Moreover the Arab tribes who were now serving under Byzantine commanders were to the Mohammadans as wheat ready for the harvest." □

”مورخاں نے دشمن دی جیہڑی تعداد دی اے جے ایس دا دسواں حصہ وی ہوندی تے فیر اک مسلمان دی بچنا نہیں سی چاہیدا۔ دنیا دی عظیم طاقت نال ٹکر لینا، تے فیر بچ رہنا، جے فتح نہیں وی تے ایس دے نیڑے دی گل ضرور اے۔ فیر دُجی گل ایہہ وے کہ عرب قبائل جیہڑے ہن تیکر بازنطینی سالاراں دی ماتحتی وچ سن، ہن اوہ ایوں مسلماناں ول ہو گئے سن جو یں کنک واڈی لئی تیار ہوندی اے۔“

سریہ موتہ توں فتح مکہ تیکر:

سریہ موتہ توں فتح مکہ تیکر مدینے توں تن حربی جتھے روانہ ہوئے۔ جمادی الثانی ۸ھ وچ سریہ ذات السلاسل، رجب

☞ The life and times of Muhammad page: 389

☞ Muhammad at Madina page: 343

☞ Muhammad and the Rise of Islam page: 381

۸ھ وچ سریہ سیف البحر تے شعبان ۸ھ وچ سریہ محارب لئی مجاہدین اسلام میدان وچ اُترے۔
سریہ ذات سلاسل:

سریہ مؤتہ توں لشکر اسلام نوں واپس آئیاں اے چند ہفتے ای گزرے سن کہ رسول خدا نوں ایہ اطلاع ملی کہ قضاۃ قبیلہ نے اپنے بوہت سارے گھرو مدینہ طیبہ دے آل دوالے لٹ مار لئی اکٹھے کیتے نیں۔ حضورؐ نے تن سو مجاہداں دا اک جتھا جناب عمرو بن عاص دی سربراہی وچ تیار کیتا تاں جے اوہناں نوں پہلوں ای ڈرا دھمکا دتا جاوے۔ جدوں جناب عمرو بن عاص اپنے مجاہداں نال سلاسل نام دے چشمے تے اپڑے تے آپ نے حساب لایا کہ کافراں نے اوہناں دے اندازے توں بوہت وڈا لشکر تیار کیتا ہوئیا اے۔ جناب عمرو نے اک مجاہد رفاعہ بن مکیث نوں حضور دی خدمت وچ بھیجیاں جے اوہ ہور کمک گھلن دی درخواست کرن۔ سرکارؐ نے دو سو مجاہداں دا اک جتھا جناب ابوعبیدہ بن جراح دی قیادت وچ ٹور دتا تاں جے جناب عمرو دے ہتھ مضبوط ہو جان۔ ایس دسے وچ جناب صدیق اکبر تے جناب عمر فاروق وی شامل سن۔ مدینے توں روانگی دے ویلے سرکار دو عالم نے جناب ابوعبیدہ امیر لشکر نوں ہدایت فرمائی کہ پوری طرحاں متحد تے اک مٹھ رہنا تے عمرو نال کسے اختلاف دی شکل وچ تحمل توں کم لینا۔

جناب عمرو بن عاص حضرت خالد بن ولید طرحاں فن حرب دے ماہر تے اک تجربہ کار سالار سن تے سلاسل دے نیڑے اوہناں دے ناکے وی سن۔ دُجے پاسے جناب ابوعبیدہ اوہناں دس خوش بخت صحابہ وچ شامل سن جہناں نوں اوہناں دی زندگی وچ ای جنت دی بشارت مل گئی سی تے اوہ صحابہ عشرہ مبشرہ دے ناں نال یاد کیتے جاندے نیں۔ جناب ابو عبیدہ دی ہی شان سی کہ صدیق اکبر تے عمر فاروق ورگے اُچے قد کاٹھ دے بندے اوہناں دی سربراہی وچ دتے گئے۔

عمرو بن عاص فوجی جرنیل سن تے طبیعت وی جرنیلاں والی سی۔ جدوں جناب ابوعبیدہ دا جتھا جناب عمرو کول اپڑیا تے نماز دا ویلا ہو چکیا سی۔ جناب ابوعبیدہ امامت لئی اگے ودھے تے جناب عمرو نے اوہناں نوں روک دتا تے آکھیا کہ امیر لشکر میں ہاں تے میں ہی امامت کراواں گا۔ رحمت عالم دی تربیت دی جھلک ویکھو کہ حضرت ابوعبیدہ نے اپنی کوئی عظمت نہیں دی تے آکھن لگے کہ ”عمرو جی! میں اک ای گل جاندا ہاں کہ آقا دے حکم موجب تہاڈے نال کوئی اختلاف نہیں کرنا۔“

امیر لشکر دی حیثیت نال جناب عمرو بن عاص نے سخت سردی دے باوجود رات نوں آگ بالن توں منع کر دتا۔ فیر جدوں دشمن اگے لگ کے بھج کھلوتا تے جناب عمرو نے مسلماناں نوں پچھا کرن توں ڈک دتا۔ حضرت عمر فاروق ورگی ہستی نوں وی ایہہ گلاں پسند نہ آئیاں پر اطاعت امیر دے درس دا تقاضا ایہی سی کہ امیر دی ہر گل نوں من لیا جاوے تے اطیعوا اللہ واطیعوا الرسول واولی الامر منکم، دا عملی ثبوت دتا جاوے۔

لشکر اسلام مدینہ طیبہ واپس پریتا تے کجھ مجاہداں دی شکایت تے حضور نے جناب عمرو نوں ویروا کرن دی ہدایت کیتی۔ جناب عمرو بن عاص نے وضاحت کیتی کہ آگ دی روشنی وچ دشمن نے ساڈی تھوڑی تعداد دا درست انداز کر لینا سی۔ اوہ پلٹ کے ساڈے تے حملہ کر سکد اسی۔ جتھوں تیکر تعاقب دی اجازت نہ دین دا تعلق اے، ایس دا جواب ایہ ہے کہ ایس دے نتیجے تے آل دوالے دے مشرک قبیلے دشمن دی مدد لئی اکٹھے ہو کے ساڈے لئی کوئی مشکل پیدا کر سکدے سن۔ سپہ سالار

اعظمؑ نے ایہ جواب سنے تے اپنے جرنیل عمرو بن عاص دے طریق جنگ نوں بوہت سراہیا۔
 بہر حال ایہہ جنگ صرف اک گھنٹہ جاری رہی۔ فیر دشمن دے قدم اکھڑ گئے تے اوہ میدان چھڈ کے دوڑ گئے۔ لشکر
 اسلام نے تن دن او تھے قیام کیتا تے آل دواویوں دشمن دیاں بھید بکریاں پھڑ کے ذبح کر کر کے گوشت نال رَجدے
 رے۔

سریہ سیف البحر:

بحر احمر دے ساحل تے قبیلہ جہینہ آباد سی۔ اوہناں دی اک شاخ نے فتنہ فساد برپا کرن دی تیاری کیتی سی۔ کچھ
 لکھیا راں دا خیال اے کہ قریش نے صلح حدیبیہ دیاں جیہڑیاں خلاف ورزیاں شروع کر دتیاں سن، اوس تے سبق سکھان لئی
 کفار مکہ دے اوس تجارتی کارواں تے حملہ مقصود سی جیہڑا مال لے کے مکے واپس جا رہیا سی۔ کچھ بزرگاں نے اوہناں دوواں
 گلاں نوں ای درست نہیں منیا تے آکھدے نیں کہ جے ایہہ سچ اے تے فیر ایس سریہ دی تیخ کوئی ہووے گی کیوں
 جے رجب دا مہینہ حرمت والے مہینیاں وچ شمار کیتا جاندا اے۔

ایس سریہ دے سالار جناب ابو عبیدہ جراح سن۔ اوہ اپنے ۳۰۰ مجاہداں نال کچھ دیہاڑے ساحل سمندر تے گزار کے
 واپس آ گئے۔

سریہ محارب:

بنو غطفان جیہڑے اسلام دشمنی وچ ہمیش اگے اگے رے، اک وار فیر مقام خضرہ تے اکٹھے ہو رے سن۔ رسول
 خدا ﷺ نے شعبان ۸ھ وچ پندرہ مجاہداں دا اک دستہ جناب ابو قتادہ انصاری دی سالاری وچ حالات دا پتا کرن لئی
 ٹوریا۔ دشمن جنگ خیرتوں بعد پہلوں ای گھاہ بریا ہو گیا سی، ایس لئی لڑائی دی نوبت نہیں آئی تے دشمن دے بندے تتر بتر ہو
 گئے۔

فتح مکہ..... ماڑے زور آور ہو گئے

﴿اللہ اکبر، اللہ اکبر، اللہ اکبر، اللہ اکبر﴾

آج سوموار دا دن اے۔ ۸ھ دا ۲۰واں روزہ اے۔ لوکا ئی آج ۱۱ جنوری ۶۳۰ء دی تاریخ وی دس ری اے۔ ظہر دا ویلا اے۔ کعبہ دی چھت تے چڑھیا اک کالا سیاہ حبشی توارخ وچ پہلی وار فاران دیاں ٹیسیاں نوں دس پارہیا اے۔ ”اشھدان لا الہ الا اللہ، اشھدان محمد الرسول اللہ۔“ پہاڑ خموش نیں؛ گلیاں خموش نیں؛ ہبل، لات تے منات دے پجاریاں نوں چپ لگی اے۔ حارث بن ہشام، ہبار بن اسود، عکرمہ بن ابو جہل تے کعب بن زہیر جے دشمنانِ خدا، تے ہند زوجہ ابو سفیان تے سارہؓ جنیاں سوانیاں نے کناں وچ انگلاں دے لنیاں نیں پر دس ہزار قدسی جیہڑے مدینے توں مکے آئے نیں، اوہ بلال دے نال نال اللہ اکبر، اللہ اکبر دی پکار پا رہے نیں۔ صرف ایہ دس ہزار صحابہ ای نہیں سگوں عرشاں تے ملائکہ دے جتھیاں دے جتھے بلال دے نال نال ایہ گواہی دے رہے نیں کہ ہاں، اللہ دے سوا کوئی معبود نہیں، ہاں، محمد اللہ دے رسول نیں۔ اللہ بڑا اے، اللہ بوہت بڑا اے۔

آج دا دن آدمیت دی توارخ دے چند وڈے دناں وچوں اک دن اے۔ آج اللہ دا اپنا گھر جعلی معبوداں توں پاک ہو گیا اے، بے وسیاں دا وس چلن لگ پیا اے، بے اختیاراں نوں اختیار مل گئے نیں تے ماڑے زور آور ہو گئے نیں۔

ہوئی ایہہ اے کہ حدیبیہ دے معاہدے دے تحت عرب دے سارے قبیلے آزاد سن کہ اوہ دوواں فریقاں وچوں جہدے نال مرضی دوستی دا معاہدہ کر لین۔ ایوں بنو بکر تے بنو کنانہ نے قریش نال یاری لائی پر مکے دے اک دُجے وڈھے قبیلے بنو خزاعہ نے بارگاہ رسالت وچ اک لکھت پیش کیتی جہدے توں حضورؐ دے وڈکے حضرت عبدالمطلب دی بنو خزاعہ نال دوستی دا پتہ لگدا سی۔ جناب عبدالمطلب نے دُجیاں گلاں توں بعد اخیر تے ایہ گل لکھی ہوئی سی کہ ”ساڈے تے تہاڈے (بنو خزاعہ دے) وچکار ایس عہد دا اللہ ضامن اے۔ اسیں اوہدوں تیکر دوست رہواں گے تے اک دُجے دی مدد کردے رہواں گے جدوں تیکر شبیر دے پہاڑ تے سورج چمک دار ہوے گا، کوہ حرا اپنی تھاں تے کھلوتا رہوے گا تے سمندر داپانی اُون گئی کر دار ہوے گا۔ یعنی قیامت آؤن تیکر۔“

سرکار نے ایہ لکھت سنن توں بعد فیصلہ فرمایا کہ اوہناں دے دادا جی نال جیہڑا معاہدہ بنو خزاعہ نے کیتا سی اوہ نہ صرف قائم رہوے گا، سگوں ہووے گا۔ ایوں مکے دے ایہ دو پرانے وسنیک قبیلے پہلوں وانگ اک دُجے دے آمنے سامنے ای رہے۔

عبد بنی مطلب دی لونڈی جیہڑی راگ لالا کے رسول خداؐ دے خلاف شعر پڑھدی ہوندی سی۔

ایس معاہدے پاروں بنو خزاعہ مکے وچ آرام سکون دے دِن کٹ رے سن۔ جدوں جنگ موتہ وچ جناب زید بن حارث، جناب جعفر بن ابوطالب تے جناب عبداللہ بن رواحہ جئے چوٹی دے سپہ سالار شہید ہو گئے تے مکے والیاں نوں ایہ غلط فہمی ہو گئی کہ ہن محمدؐ دے پلے کوئی شے نہیں ری۔ ایوں مدینے وَل منہ کر کے کوئی شرارت کرن توں پہلاں اوہناں مسلماناں دے حلیف قبیلے بنو خزاعہ نوں ہتھ پایا۔ عرب دے رسم و رواج دے مطابق کسے اک حلیف قبیلے تے حملہ سارے حلیف قبیلیاں تے حملہ کجھیا جاندا سی۔ ایوں لڑائی وچ مددوی کرنی پیندی سی، بلکل اوویں جویں بنو کنانہ نے بنو خزاعہ توں پرانی دشمنی وادہ لے لئی اپنے حلیف قبیلیاں بنو بکر تے قریش نوں مدد لئی آکھیا سی۔

قریش نے معاہدہ حدیبیہ دی خلاف ورزی کر دیاں ہوئیاں رسول خدا دے حلیف قبیلے تے حملے لئی نہ صرف بنو کنانہ دی مدد کیتی سگوں صفوان بن اُمیہ، عکرمہ بن ابوجہل حویطب بن عبدالعزیٰ، شیبہ بن عثمان تے مکرز بن حفص جئے اگل ہتھ بندیاں نے مونہاں تے نقاب چڑھا کے بنو خزاعہ دا قتل عام کیتا تے ایوں ایس گل وادہ لالے لیا کہ بنو خزاعہ، جناب رسول خدا دے حلیف کیوں بنے۔ بنو خزاعہ نے دوڑ کے حرم وچ پناہ لئی تے عربی روایت دے مطابق ایہ اُمید لالئی کہ او تھے اوہناں نوں پناہ مل جائے گی۔ حملہ کرن والے کجھ بندیاں نے اپنے نال دیاں نوں خدا توں ڈرن تے حرم دی حرمت دا خیال رکھن دا وی آکھیا پر اوہناں دے سرغنہ نوفل بن معاویہ نے جواب دتا کہ ”آج کوئی خدا نہیں۔ اے بنو بکر! جدوں حرم وچوں لوکائی دا مال چوری کر لیدے او اوہدوں حرم دا خیال نہیں آؤندا، آج دشمن توں انتقام لین دا دن اے تے تہا نوں حرم دا تقدس یاد آ گیا اے۔ خبر دار آج کوئی بندہ انتقام لین وچ سستی نہ کرے۔ دشمن جتھے نظریں پوے، پھڑکاسٹو۔“ ایوں بنو بکر، بنو کنانہ تے قریش نے بنو خزاعہ تے اوہ غارت گری کیتی کہ اوہ وچارے بلبل اُٹھے۔

مظلوم قبیلہ اپنے سبھاں متریں دے کفن دفن توں ویہلا ہوئی تے اپنے اک وڈے سالم دی سربراہی وچ چالی (۴۰) بندیاں دا اک جھٹالے کے مدینے اپڑ گیا۔ اوہناں نبی رحمت نوں اپنے اُتے ڈھائے جان والے ظلم دی ساری داستان سنائی تے آپؐ نوں بڑی تکلیف پہنچی۔ آپؐ نے حضرت ضمیرہ نوں مکے تھور دتا تے اوہناں نوں اصل مجرم دا پتلاں دی ہدایت کیتی۔ نال ای ایہ ہدایت وی فرمائی کہ قریش دے سامنے تن تجویزاں رکھیاں جان تے اوہناں نوں آکھیا جاوے کہ جیہڑی تجویز چنگی لگدی ہے اوں تے عمل کر لوؤ۔ اوہ تجویزاں ایہ سن:

۱۔ بنو خزاعہ دے قتل ہون والے بندیاں دا خون بہا ادا کیتا جاوے۔

۲۔ قریش ظالم قبیلے دی حمایت توں وکھ ہو جان۔

۳۔ حدیبیہ دا معاہدہ توڑن دا بقاعدہ اعلان کر دتا جاوے۔

قاصد رسول ضمیرہ نے رسول خداؐ دا سنہیا قریش تیکر اپڑایا تے اوہناں آپس وچ صلاح مشورے شروع کر دتے۔ اخیر اوہناں دا اک سیانا قرظہ بن عمرو، جیہڑا اکھوں وی انہاسی تے عقلوں وی انہاسی، بولیا تے آکھن لگا کہ پہلیاں دوویں شرطیں تے سانوں منظور نہیں پر تہی گل وار اوچ ہے، چلو آج توں صلح حدیبیہ ختم ہوئی۔ ایہے قرظہ نے جیہڑی گل کیتی اوں تے دُجا کوئی قریشی بلکل نہ بولیا سی جہدے توں پتہ لگدا اے کہ اوہ قریش دی زبان ای بول رہیا سی۔

جناب ضمہ مدینہ واپس پر ت آئے۔ مکے والیاں نوں جدوں ہوش آئی کہ اوہ کیہ کر بیٹھے نیں تے کیہ آکھ بیٹھے نیں اوہوں تیکر ویلا لنگ گیا سی۔ فیروی اوہناں نے ایہ فیصلہ کیتا کہ ابوسفیان مدینہ جئے تے رسول خداؐ داتر لا مارے کہ معاہدہ حدیبیہ نوں موجود تے موثر سمجھیا جائے۔ ایس فیصلے موجب ابوسفیان اپنے اک غلام نال مدینہ طیبہ ول ٹر پیا۔ مدینہ اپڑ کے سب توں پہلوں اپنی دھی ام المومنین حضرت ام حبیبہ دے گھر گیا۔ جناب ام حبیبہ دے گھر اوس ویلے رسول خداؐ داتر بستر وچھیا ہوئی سی۔ ابوسفیان جدوں اوہ تھے پٹھن لگا تے دھی رانی نے چھیتی نال بستر چک دتا۔

ایہ کیہ پتر؟ ابوسفیان نے پچھیا۔

”ایہ بستر رسول خداؐ دا ہے۔ ایس نوں کے مشرک تے ناپاک بندے دا جسم نہیں لگنا چاہیدا۔“ جناب ام حبیبہ نے جواب دتا۔

ابوسفیان نے سوچیا تے ضرور ہووے گا کہ مڈھ کوئی چنگا نہیں بجا۔ حضرت ام حبیبہ نوں آکھن لگا کہ میرے توں دکھ ہو کے توں شر دارستہ اختیار کر لیا اے۔ جواب وچ جناب ام المومنین نے فرمایا کہ نہیں اباجی! اصل گل ایس توں اُلٹ اے۔ میں حیران آں کہ ایڈے سیانے بندے ہو کے تسیں انھے تے بوئے پتھراں توں مراد اں منگدے او۔

ابوسفیان نے بیٹی دی سفارش وی پوانا چاہی پر جناب ام حبیبہ نے ذمہ داری نہ لئی۔ اوہ مایوس ہو کے اُٹھ بیٹھاتے مسجد نبوی وچ رسول خداؐ دی خدمت وچ حاضر ہوئی تے آکھن لگا کہ اے محمد! جدوں حدیبیہ دا معاہدہ ہوئی سی تے میں اوہ تھے موجود نہیں ساں۔ ایہ سمجھو کہ ہن میں اپنے ولوں آیا ہاں کہ معاہدے دی تجدید کر کے ایس دی مدت وچ اضافہ کر دتا جاوے۔

”کیہ تسیں ایس کم لئی ایتھے آئے او؟“

”جی، ایسے کم لئی۔“ ابوسفیان نے جواب دتا۔

”کیہ، تہاڈے کولوں معاہدے دی کوئی خلاف وزی ہوئی اے؟“ رسول خداؐ نے پچھیا۔

”بخدا، اسیں تے صلح تے قائم آں تے اوہدے وچ کسے تبدیلی دے روادار نہیں۔“

رسول خداؐ نے اوس دی کسے گل دا جواب نہیں دتا۔ اوہ مایوس ہو کے اُٹھیا تے واری واری جناب صدیق اکبر، جناب عمر فاروق، جناب عثمان غنی، جناب علی المرتضیٰ تے جناب سعد بن عبادہ کول گیا۔ پرسب نے ابھی جواب دتا کہ آقا دی مرضی توں بغیر کوئی گل قبول نہیں۔ حضرت عمر نے کچھ اوکھیاں گلاں وی کیتیاں پر ابوسفیان مجبور اُسن دارہیا۔

ایس مایوسی توں بعد ابوسفیان نے رسول خداؐ دی لاڈلی دھی فاطمہ الزہرہ نال محبت توں فیدہ چکنا چاہیا تے ایوں اوہ سیدہ بتول دے گھر اپڑ گیا۔ ابوسفیان نے اوہ تھے تر لے پانے شروع کر دتے تے آکھن لگا کہ اے بنت محمد! اپنے صاحبزادیاں (جناب حسن و حسین) نوں حکم دیو کہ اوہ دوواں دھراں وچ صلح دا اعلان کر دیں۔ جناب شیر خداؐ وی اوہ تھے موجود سن۔ ایوں جناب علی تے سیدہ فاطمہ نے ابوسفیان نوں سمجھایا کہ ایہ بالاں دے کرن والے کم نہیں۔ اصل وچ ابوسفیان جئے ہشیار بندے نوں ایس گل دا پکا یقین سی کہ جے اہل بیت وچوں کسے دی زبان مبارک توں کوئی سفارشی کلمہ نکل گیا تے نبی رحمت اگے کسے دُجی سفارش دی لوڑ نہیں رہتی۔ ایس لئی ابوسفیان کھہڑے پیہا رہیا تے فیہر جناب علی نوں آکھن لگا کہ

ابوالحسن! مینوں ایس مصیبت وچوں کڈو۔ خیال کیتا جاندا اے کہ جناب علی نے اپنی تے سیدہ دی جان چھڈان لئی ابوسفیان نوں ایہ آکھ دتا سی کہ ہن ایس توں سوا کیہ چارہ اے کہ تسیں معاہدے دی تجدید دا یک طرفہ اعلان کر کے، رد عمل دا انتظار کیہ بنوا پس مکے پرت جاؤ۔ ابوسفیان نے ایوں ای کیتا پر جدوں مکے جا کے قریش نوں ایگل سنائی تے اوہناں ابوسفیان نوں چکھ دتا تے آکھیا کہ ایہہ نہ تے صلح اے کہ تسلی نال بیٹھ جاویئے تے نہ جنگ کہ لڑائی دی تیاری کریئے۔

دُجے پاسے رسول خدا نے ایس عہد شکنی دا سبق سکھان لئی مکے ول کوچ کرن دی تیاری شروع کر دتی۔ سارے اتحادی قبیلیاں ول وی بندے ٹور دتے کہ اوہ جلدی توں جلدی تیاری کرن پر ایس راز داری نال کہ بلاوجہ کسے نوں پتہ نہ لگے۔ جدوں کچھ مڈھلا کم کر لیا تے عام صحابہ نوں طلب فرمایا۔ اوس ویلے جناب ابوبکر صدیق حضور دے سجے پاسے تے عمر فاروق کھبے پاسے بیٹھے ہوئے سن۔ اہجے ہن ای جیہڑی اوہناں نال مشاورت کیتی سی، رسول خدا ایس تے بڑے راضی سن۔ آپ نے صحابہ نوں مخاطب کر کے فرمایا کہ ”حضرت ابراہیم اللہ تعالیٰ دے معاملے وچ گھی توں وی چوکے نرم سن، ایہی حال ابوبکر دا اے تے حضرت نوح اللہ تعالیٰ دے معاملے وچ پتھر توں وی چوکے سخت سن، ایہی حال عمر فاروق دا اے۔ بس ہن جاؤ تے جنگ دی تیاری کرو۔“ صحابہ نے جناب صدیق تے جناب فاروق کولوں رسول خدا دے ایس تبصرے دی وجہ کچھی تے پتہ چلیا کہ جناب صدیق نے ایہہ مشورہ دتا سی کہ مکے والے حضور دی اپنی ہی قوم نیں، حملہ مناسب نہیں تے جناب عمر فاروق نے آکھیا کہ اوہناں نے ساڈے آقا تے کویں کویں دی بہتان بازی نہیں کیتی، ایس لئی معافی دی گنجائش کوئی نہیں۔

جدوں حکم عام جاری ہو گیا تے مدینے دے اک چوکھے ای معزز صحابی حضرت حاطب بن ابی بلتعہ، جیہڑے بدر دے مجاہد وی سن، نے اک سوانی ہتھ اہل مکہ نوں ایہہ رقعہ گھل دتا کہ رسول خدا مکے تے حملے دی تیاری کر رہے نیں تے اپنا بلہ کر لوؤ۔ اللہ نے جناب حاطب دی ایس حرکت دا رسول خدا نوں دس دتا۔ حضور نے حضرت علی، حضرت زبیر بن عوام تے حضرت مقداد بن اسود نوں حکم دتا کہ جلدی نال مکے ول ٹر پوؤ۔ آپ نے ایہہ وی دس دتا کہ جدوں تسیں روضہ خاخ دی تھاں تے اپڑو گے تے او تھے تہاں اک ناقہ سوار زنائی ملے گی۔ اوس کول اک خط اے، اوہ کھوہ لیاؤ۔

تنوں صحابہ پوری رفتار نال پچھا کر دے ہوئے اوس سوانی تیکر اپڑ گئے تے اوس نوں خط دے دین دا آکھیا۔ اوس دے انکار تے اوس دی تلاشی لئی گئی پر خط فیروی نہ لبھاتے اوہ عورت ایس گل تے پکی ہو گئی کہ اوہ دے کول کوئی خط نہیں۔ صحابہ نوں یقین سی کہ آقادی زبان مبارک توں نکلی ہوئی گل غلط نہیں ہو سکتی۔ ایس لئی حضرت علی نے اوس نوں ڈراوا دتا کہ جے اوس نے اپنے آپ خط نہ دتا تے فیر اوہناں کول ایس توں سوا کوئی چارہ نہیں رہوے گا کہ کپڑیاں وچ لکایا گیا خط زبردستی کڈ لیا جاوے۔ اوس نوں سمجھایا گیا کہ ایویں اوس دی بے عزتی ہووے گی تے اوہ بے لباس وی ہو سکتی اے۔

ایس دھمکی تے اوس نے اپنے والاں دیاں مھیڈیاں وچوں خط کڈ کے جناب علی دے حوالے کر دتا۔ صحابہ کرام نے مدینے آکے اوہ خط سرکار دی خدمت وچ پیش کر دتا۔ آپ نے حضرت حاطب نوں طلب فرما کے باز پرس کیتی تے اوہناں نے جواب دتا کہ ”بخدا اللہ تے اوس دے رسول تے میرا پکا ایمان اے۔ گل ایہہ ہے کہ میرے اہل عیال اہجے تیکر مکے وچ نیں تے او تھے اوہناں دا کوئی پرسان حال نہیں۔ میں مکے والیاں تے ایہہ احسان ایس لئی کرنا

چاہندا ہوں کہ ایوں اوہ میرے گھر والیاں دا خیال رکھن گے۔“ حضرت عمر اپنی طبیعت دے مطابق بڑے تپے تے عرض کیتی کہ یا رسول اللہ! حکم ہووے تے حاطب دی گردن اُڈا دیواں۔ رسول رحمت نے جواب دتا کہ ”عمر! حاطب، بدری اے تے اللہ نے بدر والیاں نوں آکھ دتا اے کہ ہن جو دل بے کرو، میں تہا نوں معاف کر چھڈیا اے۔“

۹ رمضان المبارک ۸ھ دی رات نوں مدینے وچ ایہ اعلان کرا دتا گیا کہ سویرے جہاد دل کرے روزہ رکھے تے جہاد دل کرے، نہ رکھے۔ سویرے ۱۰ رمضان نوں اسلام دی تواریخ دا سب توں وڈا لشکر پوری عظمت تے شان نال مکے ول کوچ کر گیا۔ ۲۰۰ مجاہداں دا اک جتھا حضرت زبیر بن عوام دی قیادت وچ لشکر دے اگے اگے ٹور دتا گیا تے تقریباً ۹۸۰۰ مجاہدین اپنے آقا دے پچھے پچھے ٹر پے۔ عرج دی تھان توں کجھ اگے گئے تے آپ دی نظر مبارک اک کتی تے پئی جنے اے ہنے ای بچے دتے سن تے اوہ اپنے بچیاں نوں دُده پیاری سی۔ حضور نے حضرت جمیل بن سراقہ نوں ہدایت فرمائی کہ اوہ اوس دے کول کھلو جان تاں بے کوئی صحابی کھیڈ کھیڈ وچ اوس نوں تنگ نہ کرے۔

لشکر اسلام تیزی نال مکے ول ودھ رہیا سی۔ جدوں مکے توں ۱۳۰ کلومیٹر پہلوں جحفہ دی تھان تے اپڑے تے اوتھے حضرت عباس نال ٹاکرا ہو گیا، جیہڑے اپنے بال بچے نوں نال لے کے ہجرت دی غرض نال مدینے جا رہے سن۔ تھوڑے ای پنہدے تے بنی العقب دی تھان تے ابوسفیان تے عبداللہ بن ابی اُمیہ وی آ ملے۔ پڑھنہاراں نوں پتہ ہووے گا کہ ابوسفیان بن حارث بن عبدالمطلب رسول خدا دے سکے چاچے دا پترسی تے عبداللہ نہ صرف آپ دا پھوپھی دا پترسی سگوں اُم المؤمنین حضرت سکہ داسکا بھراوی سی۔ ایہ گل اسیں اس طرحاں وی کر سکہے ہاں کہ ابوسفیان حضرت اُم سلمہ دے مامے دا پترسی۔ اتفاق ویکھو کہ ایس سفر وچ رسول اللہ دی ہمسفر بن والی اُم المؤمنین حضرت اُم سلمہ ہی سن۔ اتھے ایہہ گل وی یاد رکھنی پوے گی کہ ابوسفیان اپنے اک پترنوں وی نال لے کے آیا سی، پر ایہہ نہیں کہیا جاسکہا کہ اوہ جناب معاویہ بن یزید کوئی دُجا۔

جدوں ابوسفیان تے عبداللہ نے حضور دی باریابی دی التجا کیتی تے آپ نے انکار فرما دتا۔ جدوں جناب اُم سلمہ نوں ایس انکار دا پتہ لگاتے اوہناں حضور دی خدمت وچ گزارش کیتی کہ یا رسول اللہ! اک تہاڈے چاچے دا پتر اے تے دُجے نال تہاڈا دھرا رشتہ اے، اوہ میرا سکا بھرا اے تے تہاڈا پھپھی زاد بھرا۔ تے چلو مہربانی فرماؤ تے اوہناں دی گل سن لوؤ۔ حضور نے فرمایا کہ ایس عم زاد (چاچے دے پتر ابوسفیان) نے جیہڑی میری ہتک عزت کیتی اے اوہدا کتوں نہیں پتہ تے میری پھپھی دے پتر عبداللہ نے مکے وچ جیہڑی میرے نال کر چھڈی سی، اوس نوں وی چیتے رکھو۔ یاد بے ایہہ آکھدا ہوندا سی کہ میں تہاڈے تے ایمان نہیں لیاواں گا یاں تسیں اسماناں ول اک پوڑی لاؤ، میرے سامنے اوہدے تے چڑھو، فیر اسماناں توں تسیں اک لکھت لے کے آؤ تے جدوں واپس پر تو تے چار فرشتے تہاڈے نال ہون جیہڑے ایس گل دی گواہی دین کہ تہا نوں اللہ نے رسول بنا کے بھیجیلے۔

حکم نبی جدوں نبی نوں اذیت دین والیاں تیکر اپڑیا تے اوہ بڑے مایوس ہوئے۔ یقین نال نہیں آکھیا جاسکہا کہ ابو سفیان تے عبداللہ کس غرض نال آئے سن۔ ہوسکہا اے اوہ انٹیلی جنس واسطے آئے ہون تے لشکر اسلام توں ہیبت زدہ ہو

کے رسول خدا اگے گوڑے ٹیک دیتے ہوں؛ ہوسکدا اے اوہ قبول اسلام دی غرض نال مدینے ول جا رہے ہوں یاں ہوسکدا اے کوئی تہی وجہ ہووے۔ بہر حال ابوسفیان آکھن لگا کہ جے آج حضورؐ نے سانوں ملاقات توں محروم رکھیا تے میں فیر اپنے ایس بال دا ہتھ پھڑ کے صحرا ول نکل جاواں گا تے اوتھے ای بھکا پیاسا مر جاواں گا۔

جہانائے رحمت بن کے آؤن والے نبی دی زبان مبارک توں ایہہ کوں نکلد اکہ اچھا مرنا ایں تے مر، توں کوئی گھٹ تے نہیں ناکیتی ہوئی۔ نہیں، ایوں نہیں ہوئی، سگوں نبی رحمت دا دل نرم ہو گیا۔ اوہناں نوں شرف ملاقات بخشیا؛ اوہناں دے جرماں دیاں لمیاں لمیاں فہرستان تے لیک مار دتی؛ اوہناں نوں معاف فرما دتا تے اوہ دوویں مسلمان ہو گئے۔ کچھ سیرت لکھیاراں دا خیال اے کہ ابوسفیان نے اوس ویلے خدا دی وحدانیت دا تے اقرار کر لیا پر رسالت محمدی تے اوس نوں شبا ای رہیا۔ پر فیر اوہ ہولی ہولی نبوت دے رنگ ویکھدے رہے تے اخیر سچے مسلمان ہو گئے۔

قبول اسلام دے ویلے ابوسفیان نے جدوں رسول خدا نوں مہربان ویکھیا تے آکھن لگے کہ تسیں اوباش قسم دے لوکاں نوں نال لے آئے او۔ اوہناں وچ کچھ لوگ سانوں جان دے نیں تے کچھ جان دے وی نہیں۔ ایہ تے جناب دے خاندان تے رشتے داراں نوں وی تہ تیغ کر دین گے۔ رسول خدا نے جواب دتا کہ ابوسفیان! ظلم تے تعدی دا مذہ تسیں بھنھیا؛ حدیبیہ دا معاہدہ تساں توڑیا، حرم دیاں حد اں اندر قتل و غارت گری تساں کیتی؛ تسیں مینوں چوٹھا آکھیا تے سن لوؤ جہاں لوکاں نوں تسیں اوباش آکھ رہے او، ایہی اوہ لوگ نیں جہاں نے میری تصدیق کیتی۔

”جناب درست فرما رہے نیں پر ایس لشکر دا رخ جے بنو ہوازن ول موڑ دتا جاوے تے چنگی گل نہیں؟“

”ان شاء اللہ دوویں کم ہوں گے۔ مکہ وی فتح ہووے گا تے بنو ہوازن وی سدھے ہو جان گے۔“ رسول خدا نے


ارشاد فرمایا۔

جناب عباس بن عبدالمطلب نے ابوسفیان نال رسول خدا دے رویے تے نظر رکھی ہوئی سی۔ اوہناں دی ایہ وی خاہش سی کہ ایس آخری موقع تے وی بیت اللہ دی دھرتی رتی ہون توں بچ جاوے تے کسے نہ کسے طرحاں حالات امن تے صلح لئی سازگار ہو جان۔ ایس لئی جناب عباس، عم رسول نے رسول خدا نوں ایہ مشورہ دتا کہ ابوسفیان، ناں نمود والا ٹوہری جہیا بندہ اے، کوئی اجہیا حکم صادر فرماؤ کہ ایس دے عزت و قار وچ وادھا ہووے تے ایس نوں کوئی مہنا نہ سننا پوے۔ حضور عالم نے فرمایا:

﴿مَنْ دَخَلَ دَارَ أَبِي سُفْيَانَ فَهُوَ آمِنٌ﴾

”(جنگ دے ویلے) جیہڑا ابوسفیان دے گھر وچ وڑ گیا، اوس لئی امان اے۔“

فیر ارشاد فرمایا کہ جیہڑا حرم وچ داخل ہو گیا تے جس نے اپنے گھر دا دروازہ بند کر لیا اوس نوں وی امان اے۔ ایہ کرم سدھا سدھا عفو عام سی۔ معافی، سب نوں معافی۔ عہد حاضر دی اک معروف مستشرقہ کیرن آرمسٹرانگ نے بڑی سونہی گل کیتی اے۔ لکھدی اے:

He (Muhammad P.B.U.H) had no desire to begin bloody reprisals. No body was made to accept Islam Nor do they seem to have felt under any pressure to do so Muhammad did not want to coerce the people but to effect a reconciliation." 

”اوہناں (جناب محمد) دی اجہی کوئی خاہش نہیں سی کہ اوہ کسے خونی انتقام دا سلسلہ شروع کرن۔ نہ تے کسے بندے نوں زبردستی اسلام قبول کرن دا آکھیا گیتے نہ ای اسلام قبولن لئی اوہناں تے کوئی دبا معلوم ہوندا سی۔ محمدؐ نے لوکاں تے جبر نہیں کرنا چاہیا سگوں مل پٹھن والا تے صلح والا رویہ رکھیا۔“

لشکر اسلام مرالظہر ان دی تھاں تے اپڑیا تے رات نوں رسول خدا نے حکم دتا کہ ہر مجاہد اپنا وکھرا چولھا بنائے۔ فیر کیہ ہونا سی! بس ویکھدیاں ای ویکھدیاں دس ہزار چولھے بلن لگ پے۔ جدوں مکے والیاں رات نوں مرالظہر ان دی تھاں تے بلدیاں اگاں ویکھیاں تے اوہ کنب کے رہ گئے۔ اوہ رات رسول خداؐ نے حکم فرمایا کہ دن چڑھدیاں سارای ہر قبیلے دے جوان اپنیاں سواریاں تیار رکھن تے اپنے اپنے قائد تے جھنڈے دے نال ایوں کھلون کہ اسلحہ تے دُجے سامان جنگ دی پوری طرحاں نمائش ہووے۔ فیر ابوسفیان دے سفارشی حضرت عباسؓ نوں ایہہ ہدایت دی کیتی کہ ابوسفیان نوں اوس تنگ درے تے کھلو تے رہن دا حکم دتا جاوے جتھوں اسلامی لشکر نے گزر کے مکے وچ داخل ہونا سی تاں جے اوہ لشکر دی شان اپنیاں اکھاں نال ویکھ لوے۔ جدوں حضورؐ نے ایہہ حکم دتا اوہدوں ابوسفیان مکے وچ لڑ پے ہوئے سن۔ ایس لئی حضرت عباسؓ نے بڑی تیزی نال اوہناں دا پیچھا کیتا۔ جدوں ابوسفیان نے ویکھیا کہ جناب عباسؓ ایڈی تیزی نال اپنی سواری دوڑائی لیاؤندے نیں تے آکھن لگے کہ اوہا شمیو! تسیں وی وعدے کر کے توڑن لگ پے او؟ جناب عباسؓ، ابوسفیان دی پریشانی نوں سمجھ گئے تے اوہناں نوں آکھیا کہ فکر دی لوڑ کوئی نہیں، خاندان نبوتؐ غدر تے دھوکا نہیں کردا، صرف رسول خدا دا سنہیا تہاڈے تیکر اپڑانا سی۔

اسلامی لشکر، سپہ سالار اعظم دی ہدایت موجب مرالظہر ان توں ٹر پیاسی تے بس تھوڑے ای چیر بعد مسلماناں دا اک اک قبیلہ ابوسفیان دے ساہمنیوں لنگ لنگ کے بیت اللہ وچل ودھدا رہیا۔

سارے قبیلے اللہ دے کرم نال پوری خیریت نال مکے وچ داخل ہو گئے پر ایوں لگدا اے کہ خالد بن ولید دے اک پرانے یار عکرمہ بن ابو جہل نے ایہ ارادہ کیتا ہوئیآسی کہ اسیں خالد نوں دساں گے کہ تیرے مسلمان ہون نال سانوں کوئی فرق نہیں پیتا تے سانوں بھڑناؤندا اے۔ عکرمہ نے صفوان بن اُمیہ تے سہیل بن عمرو دے نال رل کے مکے دے کچھ اوباش اکٹھے کر کے خندق دی تھاں تے ڈیرہ لالیا۔ جدوں خالد بن ولید، بنو سلیم دے اپنے دستے نوں لے کے اگے ودھے تے مشرکاں نے حملہ کر دتا۔ جھڑپ تے تھوڑی دیر ای ہوئی پر اپنی دیروچ وی عکرمہ دے جتھے دے بارہ تیرہ بندے مارے گئے۔ جناب خالد دے فوجی دستے نالوں حضرت کرز بن جابر فہری تے حنیس بن خالد بن ربیعہ وکھ ہو گئے تے فیر اوہ کسے طرحاں مشرکاں دے ہتھے چڑھ کے شہید ہو گئے۔ پر جناب خالد اپنے مجاہداں نال کوہ صفا تے رسول خداؐ کول اپڑ گئے۔

جدوں سپہ سالار اعظم نوں یقین ہو گیا کہ بن اہل مکہ وچ لڑائی دا دم خم نہیں رہیا تے رسول خداؐ نے اللہ تعالیٰ دا شکر ادا کیتا تے اٹھ رکعت نماز ادا کیتی، جنہوں صلوٰۃ الفتح دا نام دتا گیا۔

اسلامی سپہ سالاراں نے محبوب خدا دی ایس سنت نوں اچھیا پلے بنھیا کہ فیر جدوں وی کوئی فتح نصیب ہوئی تے رب کریمؐ دا شکر ادا کرن لئی اٹھ رکعت نماز ضرور پڑھی۔ حضرت سعد بن ابی وقاصؓ نے جدوں مدائن فتح کیتا تے ایوان کسری وچ داخل ہوئے تے اٹھ (۸) رکعت نماز اک سلام نال ادا کیتی سی۔ حضرت امام ابوحنیفہؒ دا قول اے کہ اک سلام نال اٹھ (۸) رکعت توں زیادہ نماز پڑھنا ویسے ای مکروہ اے ﴿

مکے دی فتح نہ صرف اسلامی توارخ دی فتح مبین اے سگوں ساری دنیا دی حربی توارخ دی سب توں وڈی فتح اے۔ بڑے ای افسوس دی گل سی کہ اللہ دی دھرتی اُتے، اللہ دے اپنے گھر وچ، اللہ دے پیدا کیتے بندیاں نے واحدانیت دی علامت دا ایہ حال کر چھڈیا ہو یا سی کہ اوہدے وچ رکھے ۳۶۰ بتاں دی ایوں پوجا کیتی جاندی سی کہ جویں اوہ زمین و آسمان تے کچھ وی کر سکدے ہوں۔ اللہ دے بلند الامین وچوں شرک دی نجاست نوں پاک کرن دے ارادے نال جدوں لشکر اسلام ایس شہر وچ داخل ہوئی تے بڑے بڑے عجیب نظارے ویکھے گئے، جیہڑے دلچسپ وی نیں تے راہنما اصول وی نیں۔ مثال موجب ابوسفیان دے اگوں مہاجرین تے انصار شمشیر زن جوانان دا اک اچھیا جتھہ لنگیا جہدا ہر سپاہی زرہ تے خود وچ لکھا ہوئی سی تے اکھاں توں سوا جسم دا کوئی حصا نظر نہیں سا آندا۔ ابوسفیان نے مسلماناں دی ایہہ دہشت ویکھ کے سیدنا عباس نوں آکھیا ”اے ابوالفضل! اخیر تہاڈے برادر زادے دی بادشاہت قائم ہوا ی گئی!“ ایہہ سن کے جناب عباس نے فرمایا کہ ”ابوسفیان! نہیں ایہ بادشاہی نہیں سگوں نبوت اے۔“ ﴿

جدوں ابوسفیان ایہ اعلان کرے سن کہ فلاں فلاں تھان تے چلے جان والیاں لئی امان اے، اوہدوں اوہناں دی بیوی ہندا اوہناں کول اپڑ گئی تے اوہناں دی مچھ پھڑ کے شرارت دا مڈھ بن والے قبیلے نوں مخاطب کر کے آکھیا کہ اے بنو کنانہ! ایس بڈھے دا دماغ خراب ہو گیا اے، خورے ایہہ کیہ کیہ بکی جا رہیا اے تے نال ای ابوسفیان ہوراں نوں واہوار جھ کے گالاں کڈیاں۔ جدوں پورا زور لا کے ابوسفیان ہوراں لوکاں نوں دسیا کہ لوکو! ایس عورت دے دھوکے وچ نہ آجیے، بس گھراں وچ وڑ جاؤ تے بوہے بند کر لوؤ تے فیر بنو کنانہ تے ہندا اپنے گھراں ول دوڑ پے۔ ﴿

نبی رحمت دی رحمت اللعالمینی دا اک دلچسپ واقعہ پڑھو کہ حضرت ابوطالب دے کڑماں وچوں تے سیدہ اُم ہانی دے سوہریاں وچوں دو بندے بھجے بھجے ایس خیال نال سیدہ اُم ہانی دے گھر وچ وڑ گئے کہ ایہہ محمد رسول اللہ دی عزیزہ دا گھر اے، اتھے اسیں محفوظ رہواں گے۔ جناب علی شیر خدا نے اوہناں نوں ویکھ کے اوہناں نوں قتل کرنا چاہیا کیوں جے وعدے موجب پناہ اوہناں لئی سی جیہڑے اپنے گھراں وچ وڑ کے بوہے بند کر لین۔ حضرت اُم ہانی نوں ایہہ گل چنگی نہ لگی

روح الصف جلد دوم صفحہ: ۲۷۳

زاد المعاد از حافظ ابن القیم تے حیات محمدؐ از محمد حسین بیگل، صفحہ: ۵۲۳

سیرت المصطفیٰ از ادریس کاندھلوی ۳/۲۵

کہ اوہناں دے شوہر دے عزیز اوہناں دے گھر وچ قتل ہو جان، ایس لئی آپ نے رسول خداؐ نوں شکایت کیتی کہ میرا بھرا علی میرے سوہرے ٹہر دے بندیاں نوں قتل کرنا چاہندا اے۔ حضرت علی نے جدوں ایس دا جواز پیش کیتا تے نبی رحمتؐ نے فرمایا کہ چلو فیروز جس نوں اُم ہانی نے پناہ دتی اوس نوں محمد رسول اللہؐ نے پناہ دتی ﴿۱﴾

اک ہور دلچسپ واقعہ دیکھو تے غور فرماؤ کہ ایس فتح والے دن زمین و آسمان کوں حیرت وچ ڈبے ہوئے سن۔ جدوں جناب خالد بن ولید دا چاق و چوبند دستا بوسفیان دے اگوں گزریا تے مجاہداں نے تن واری نعرہ تکبیر ماریا تے آگے لنگ گئے۔ بوسفیان ہوراں نوں ایہ جنگی اعتماد حیران کر گیا تے پچھیا کہ چا چا جی! ایہ اگل ہتھ بندا کیہڑ اسی؟ سیدنا عباس نے جواب دتا کہ ایہ خالد بن ولید سی۔ ایہ سن کے اچن چیت بوسفیان دی زبان توں نکلیا کہ اچھا، اوہ کل دا چھوکر! ﴿۲﴾

فتح مکہ تکبر جیہڑے لوک مسلمان نہیں وی ہوئے سن اوہناں نوں وی رسول خداؐ دے عہد و پیام دا پکا یقین سی۔ حضرت ابو بکر صدیق دے والد ابوقحافہ اے تیکر مسلمان نہیں ہوئے سن۔ فتح مکہ والے دن اوہ اپنی دوہتری نال کوہ ابو شمیمس تے سیر کر رے سن۔ ابوقحافہ بصیرت دے نال نال بصارت توں وی محروم سن تے ایناں کو ای دسداساں کہ بس جھا کا جنیا پیندا سی۔ جدوں اوہناں نوں پتا لگا کہ لشکر سر تے آچڑھیا اے تے دوہتری نوں آکھن لگے کہ اللہ دانائے امی مینوں چھیتی نال گھرا پڑا دے۔ ﴿۳﴾ (تاں جے میں محفوظ ہو جاواں)

رسول خداؐ نے سارے سالاراں نوں ایہ ہدایت کیتی ہوئی سی کہ لڑائی وچ پہل نہیں کرنی، پر ہونیا ایہ کہ لہندے پاسیوں جیہڑا دستہ مکے وچ داخل ہوئیا اوس دے سالار حضرت سعد بن عبادہ دی زبان توں انتقام دے جوش وچ ایہ لفظ نکل گئے کہ آج گھمسان پوے گا کہ کعبہ دی حرمت دی اپنی تھاں۔ جدوں ایہ شکایت امن دے پیغمبر تے سپہ سالار اعظم تیکر اپڑی تے آپؐ نے حکم جاری فرمایا کہ سعد توں علم واپس لے کے اوہناں دے صاحبزادے قیس نوں دے دتا جاوے۔ ذرا غور فرماؤ ایس فیصلے تے کہ اوہ عظیم الشان صحابی جیہڑا جوش و جذبے وچ حکم نبویؐ نوں بھل گیا اوس دی معزولی وی ایس لئی ضروری سمجھی گئی کہ کدرے ناحق خون نہ بہہ جائے۔ فیرا ایس فیصلے دا دُجا خوبصورت پہلو ایہ ہے کہ علم باپ توں لے کے بیٹے نوں دے دتا گیا تاں جے کوئی دُجا مسئلہ وی کھڑا نہ ہووے۔

آرام گاہ رسول رحمت:

رسول رحمت جبل ہندی دے سامنے والے درّے ’علی‘ ولوں شہر وچ داخل ہوئے۔ ایہہ اوہ تھاں اے جتھے حضرت خدیجہ تے محسن رسول جناب ابوطالب دے مزار نیں۔ سید البشرؐ لئی او تھے ای خیمہ لایا گیا۔ پر ایس توں پہلے آپؐ نوں پچھیا گیا کہ یا رسول اللہ! جے اپنے آبائی دولت کدہ تے جا کے آرام فرمانا پسند کرو تے ایس دا بندوبست کیتا جائے۔ ارشاد ہوئیا ”نہ میں اپنے آبائی گھر وچ رہنا چاہنداں تے نہ ای میرے قدر دانوں نے ایس نوں میرے لئی باقی رہن دتا اے۔“ ایس

۱۔ البدایۃ والنہایۃ جلد چہارم صفحہ: ۲۹۹

۲۔ ضیاء النبی از پیر کرم شاہ ازہری ۲/۳۳۳

۳۔ حیات محمدؐ از محمد حسین بیگل صفحہ: ۵۲۳

ارشاد مبارک توں بعد آپ اپنے چھوٹے جے خیمے وچ تشریف لے گئے۔ دل کچھ کچھ اُداس دی سی پر خوشی چوکی سی۔ اُداسی ایس گل دی سی کہ ایہ مکے والے میری ای قوم، میرا ای قبیلہ تے میرا ای خاندان نیں۔ جے ایہ چنگے ہندے تے نہ بدرواُحد دیاں جنگاں وچ قتل و غارت ہوندى تے نہ آج اپنی ای دھرتی تے مینوں لشکر کشی کرنی پیندی۔ خوشی ایس گل دی سی کہ اخیر خدا دی واحدانیت دے سب توں وڈے مرکز نوں شرک دے کوڑھ توں پاک کر کے سچ مچ واحدانیت دی علامت بنان دا موقعہ آ گیا سی۔ اوہ قصویٰ جیہڑی اُٹھ ورھے پہلو مکے ول کنڈ کر کے اپنے سوار دی جان بچاؤن لئی مدینے ول دوڑی جاندی سی، آج اوہ پوری شان نال مکے ول پر تئی آؤندی سی۔ جس شہر وچوں دیس نکالا دتا گیا سی آج اوس شہر دے واسیاں نے اپنے سارے ہی بوہے کھول دتے سن۔ فاتح اعظم نے وادی تے نگاہ پائی۔ فیر آل دوال دے پہاڑاں نوں وی ویکھیا تے نظر مبارک شعب ابی طالب تے رُک گئی۔ قریش ولوں کیتے گئے سوشل بائیکاٹ دا اک اک دن، تے فیر اوس دا اک اک لمحہ اکھاں دے اگے گھمن لگ پیا۔ فیر نظر کوہ ابوقبیس تے پئی۔ ایسے پہاڑ دی اک غار وچ ورھیاں تیکر خالق تے مالک نال گلاں ہوندىاں رہیاں۔ اوسے غار وچ رب نے پہلی واری اِقراء با سَم رَبِّكَ الذی خلق، داسنہیا گھل کے آدمیت تے اپنیاں مہربانیاں دے اک نویں دور دا مڈھ بھیا۔

مکے دیاں پہاڑیاں تے وادیاں دے وچکار توحید دے مرکز تے نظر کئی تے ذات باری دے کرم تے اوس دی رحمت دے تصور نال نبی رحمت تے رقت طاری ہو گئی تے اکھاں وچ اتھرو آ گئے۔ ایہ اتھرو ایس تشکر دے نہیں ہون گے کہ اللہ نے فتح دتی سگوں یقین اے کہ ایہ اتھرو ایس سبب توں کرے ہون گے کہ اللہ! حق ابھی اے کہ تو برحق اے۔ اے اللہ آج تساں میری قوم نوں شرک دے انھے کھوہ وچوں کڈ کے توحید دیاں اُچیاں ٹیسیاں تے اپڑا دتا اے، آج اوہناں نوں جہنم دی ڈونگیاں وچوں کڈ کے اوہناں باغاں وچ واڑ دتا اے جہناں دے تھلے نہراں وگدیاں نیں۔ اللہ! تیرا شکر اے؛ لکھ لکھ واری شکر اے۔

رسول خدا کچھ دیر خیمے وچ آرام فرماندے رہے۔ فیر باہر تشریف لیائے۔ قصویٰ تے سوار ہوئے۔ اپنے پچھے اپنے غلام زید بن حارث دے پتر اسامہ نوں بٹھایا۔ سچے پاسے جناب ابو بکر صدیق دی سواری تے کھبے پاسے جناب اُسید بن حضیر دی سواری لگی۔ باقی غلامانِ محمدؐ پچھے پچھے ہو گئے۔ رسول خدا نے عجز و انکساری نال اپنی گردن مبارک جھکائی ہوئی سی۔ ایسے حالت وچ توحیدی قافلہ مسجد حرام دے اندر اپڑ گیا۔ رسول خدا نے اگے ودھ کے حجر اَسود نوں چمیا تے بیت اللہ دا طواف کیتا۔ دست مبارک وچ پھڑی ہوئی کمان نال بیت اللہ دے دوالے رکھے گئے بتاں نوں ٹھوکر مار دے تے ارشاد فرماندے:

﴿جَاءَ الْحَقُّ وَزَهَقَ الْبَاطِلُ إِنَّ الْبَاطِلَ كَانَ زَهُوقًا﴾

”حق آیا تے باطل چلا گیا، باطل ہے ای جان والی چیز۔“

آپ دی کمان دی ٹھوکر نال بت منہ بھار ڈگدے جان دے سن۔ سارا طواف اپنی اُٹھ تے بیٹھ کے ای فرمایا۔ فیر خانہ کعبہ کھولیا گیا۔ اندر تشریف لے گئے تے دیواراں تے مورتیاں بنیاں نظر آئیاں جہناں وچ حضرت ابراہیم تے اسماعیل g

دیاں مورتیاں وی سن۔ اوہناں دے ہتھاں وچ فال کڈن والے تیروی وکھائے گئے سن۔ حضورؐ دی بڑی دل آزاری ہوئی تے زبان مبارک توں اچن چیت نکلیا ”اللہ ایہناں مشرکاں نوں ہلاک کرے۔ خدا دی قسم اے ایہناں دوواں پیغمبراں نے کدے وی فال دے تیر نہیں ورتے سن۔“ آپ نے خانہ کعبہ دے اندر لکڑی دی بنی ہوئی اک کبوتری وی ویکھی۔ آپ نے اوس نوں اپنے دست مبارک نال توڑ دتا تے مورتاں مٹان دا حکم جاری فرما دتا۔ فیر آپ نے اندروں دروازہ بند کر لیا۔ حضرت بلال تے اسامہ نوں اپنے نال اندر ای رکھیا۔ فیر خانہ کعبہ دے اندر چکر لایا تے نماز پڑھی۔

خانہ کعبہ دے باہر لوکاں نوں کھلون دی تھاں نہیں لہجری سی۔ دس ہزار مجاہدین اسلام تے اوہ سارے اہل مکہ جیہڑے گھراں وچ لک گئے سن، سارے دے سارے اکٹھے ہو گئے تے ایہہ سوچن لگ پے کہ ہن کیہ ہون والا اے۔ رسول رحمت باہر تشریف لیائے۔ بیت اللہ دے دروازے دے دوویں بازو پھڑ لے تے لوکاں نوں مخاطب کر کے فرمایا:

”لوگو! اوس ذات واحد توں سوا کوئی معبود نہیں۔ آج اوس نے اپنا وعدہ پورا کر وکھایا اے جیہڑی اوس نے اپنے بندے دی مدد کیتی تے دُجے سارے جتھیاں نوں شکست دتی۔ سنو لوگو! آج توں پہلے دے سب دیوانی تے فوجداری دعوے میرے پیراں تھلے روندے گئے نیں سوائے بیت اللہ دی کلید برداری تے حاجیاں نوں پانی پیاں دی خدمت توں۔“

ایس توں بعد آپ نے سدھاسدھا قریش نوں مخاطب کیتا تے پچھیا کہ اے معشر قریش! آج میں تہاڈے نال کیہ سلوک کرن والا ہاں، کیہہ تہانوں پتہ اے؟

”تسیں ساڈے مہربان بھراتے مہربان بھرا دے پتر جے، سانوں تہاڈے کولوں بھلیائی دی امی اُمید اے۔“ قریش

نے جواب دتا۔

﴿فَإِذْ هَبُوا وَاَنْتُمْ الطُّلُقَاءُ﴾

”تے فیر جتھے دل کر دا جے جاؤ، میرے ولوں تسیں آزاد جے۔“

عزیز پڑھنہارو! ذرا سوچو کہ ایہ گل کون، کس نوں کہہ رہیا اے تے کس موقع تے کہہ رہیا اے؟ ذرا ویکھو کہ آزادی دا پروانہ دین والا اوہ رحیم و کریم نبی اے جس نوں شاعر، کذاب، جادوگر تے مجنوں آکھیا گیا، جس دے چاچے نوں قتل کر کے اوس دے کن تے تک تیکر وڈ دتے گئے تے اوس دا کلیجہ کڈ کے دندان تھلے چب لیا گیا؛ جس دے خاندان دا سوشل بائیکاٹ کر کے اوس نوں شعب ابی طالب وچ محصور کر دتا گیا؛ جہدے تے کوڑا سٹیا گیا، جہدے راہ، تے بوے اگے غلاظت دے ڈھیر تے کڈے سٹے گئے، جہدے اُتے سجدے دی حالت وچ گندی اوجھڑی سٹی گئی، جہدے گل وچ کپڑا پا کے وٹ دتے گئے تاں جے اوس دا دم گھٹیا جاوے، جہدی حاملہ دھی نوں اُوٹھنی توں سٹ کے مرن دے نیڑے کر دتا گیا، جہدے غلاماں دے کھواب ور گے جسے ساڑ پھوک سٹے تے جس دی واج تے بلیک آکھن والی نیک بخت سوانی نوں نیزہ مار کے قتل کر دتا گیا، اوہ آج آکھ رہیا اے جاؤ، تسیں سب آزاد جے۔

تے جہناں نوں معاف کر رہیا اے، اوہ کون نیں؟ جہناں نے پہلوں مکے وچوں کڈ کے شعب ابی طالب وچ پابند کیتا تے فیر مکہ چھڈن تے امی مجبور کر دتا، جہناں نے اپنے ظلم دا بازو گرم رکھن لئی حبشہ توں غلاماں محمد نوں واپس لیانا چاہیا، جہناں

نے جناب محمدؐ تے اوہناں دے خادماں دے گھراں تے قبضے کر کے اگے وچھ دتے، جہناں اے دو سال پہلوں مکے وچ وڑن تے عمرہ کرن دی وی اجازت نہیں دتی سی تے معاہدے وچ محمدؐ دے نال رسول اللہ ﷺ لکھن توں انکار کر دتاسی۔ بھلا تواریخ کوئی دُجی اجہی مثال پیش کر سکی اے کہ ایڈی وڈی فتح توں بعد اپنے مفتوح دے بندے قیدی نہ بنائے ہون تے اوہناں دیاں جائیداداں تے قبضہ نہ کیتا ہووے۔ قربان جائے عفو و درگزر دی ایہ مثال قائم کرن والے دے کہ کسے دے گھر تے قبضہ تے دردی گل اے، اپنا گھروں واپس نہیں منگیا۔

ایہ سب کچھ اوس موقع تے ہونیا جدوں دس ہزار مجاہداں دالشر جرار مکے دی اٹ نال اٹ و جاسکد اسی تے مشرکاں نوں ایہ سبق دے سکد اسی کہ وعدے تے معاہدے کوں توڑی دے نیں، حرم دی حرمت نوں کوں پامال کری دا اے تے محمد دے حلیف تے تلوار کوں پکلی دی اے۔ پر فیصلہ ہو گیا، اوہی جہیز اہونا سی، معافی۔ سب نوں معافی۔

ایس عام معافی توں بعد رسول خداؐ نے حضرت عثمان بن طلحہ نوں طلب فرمایا تے آکھیا کہ عثمان کعبہ دی ایہ کنجی تیری امانت اے، ایہہ ہمیش تھاڑے کول ای روے گی۔ ایس حکم نبی موجب کعبہ دیاں کنجیاں اے تیکر جناب عثمان بن طلحہ دی اولاد کول ای نیں۔ رحمت اللعالمین فاتح اعظم، شہشاہ دو جہاں دیاں مہربانیاں جاری نیں۔ ہن ظہر دی اذان دا ویلا ہو گیا اے۔ کعبہ دی چھت توں بلال دی آواز گونجی اے:

حی علی الصلوٰۃ، حی علی الصلوٰۃ، حی علی الفلاح، حی علی الفلاح۔

حکم بن ابوالعاص جہیا ضدی مشرک وی مکے دی فضا نوں تکبیر دے نعریاں نال پاک ہوندا ویکھ تے سن رہیا اے۔ اچن چیت اوہدے مونہوں نکلد اے ”کیا ظلم دی گل اے، بنی حجاج دا اک غلام ابوطحہ دے اسارے ہوئے کعبہ تے کھلو کے کوں چیخ رہیا اے۔“ پر ابوالعاص دے پتر دے ایوں آکھن نال کیہ فرق پیندا اے، مکے دی فتح داکم توڑ چڑھ گیا اے۔ الحمد للہ خون رائیگاں:

عرب دے رسم و رواج موجب اچھا قتل جہدا کوئی قصاص یا جہدی کوئی دیت نہیں سی ہوندی اوس نوں خون رائیگاں سمجھیا جانداسی۔ فتح مکہ والے دن رسول خداؐ نے نو ۹ مجرماں نوں خون رائیگاں قرار دیندے ہوئے حکم دتا کہ جے اوہ کعبہ دے پردے تھلے وی نظر آجان تے اوہناں نوں قتل کر دتا جاوے۔ اوہناں وچ عبدالعزیٰ بن خطل، عبداللہ بن سعد بن ابی سرح، عکرمہ بن ابوجہل، حویرث بن نقید، مقیس بن حبابہ، ہبار بن اسود، عبدالعزیٰ بن خطل دیاں دو لونڈیاں جہیزیاں مکے دیاں لگیاں وچ رسول خداؐ دے خلاف ہجو یہ شعر گاؤندیاں سن تے سارہ لونڈی شامل سن۔

آکھن نوں تے ایس عام معافی (General amnesty) دا اطلاق اُپروالے نو مجرماں تے نہیں سی ہوندا پر فیروں وی اوہناں وچوں چار قتل کیے گئے تے پنجواں دی جان بخشی ہوگئی۔ قتل ہون والے بدقسمت لوکاں وچ مقیس بن حبابہ، حویرث بن نقید، عبدالعزیٰ بن خطل تے اوس دی اک لونڈی شامل نیں۔ جدوں کہ پنج اوہ بندے جہناں عفو عام توں فیہدہ چک لیا، اوہناں دی تفصیل ایہ ہے:

سیرت نگاراں وچ ایس تعداد تے چوکھا اختلاف پایا جانداسی۔

عبداللہ بن سعد مسلمان ہو کے مدینہ ہجرت کر گیا سی پر فیر مرتد ہو کے مکے واپس پرت گیا۔ اوتھے جا کے اوس نے بڑی زبان درازی کیتی سی۔ اوس دی خوش بختی کہ اوہ حضرت عثمان ذوالنورین دارضاعی بھراسی۔ اوہناں دی سفارش تے رسول خدا نے اوس نوں معاف فرما دتا۔

عفو عام دے دوران عکرمہ بن ابو جہل دی بیوی نے اسلام قبول کر لیا پر عکرمہ یمن جان لئی مکے توں غائب ہو گیا۔ اوس دی بیوی اُم حکیم نے رسول خدا دی خدمت وچ حاضر ہو کے اپنے گھر والے دی جان بخشی لئی التجا کیتی جیہڑی رسول رحمت نے قبول فرمائی۔

ہبار بن اسود اوہ بند اے جنے مکے توں مدینہ ول ہجرت لئی نکلی بنت رسول سیدہ زینب نوں سواری توں ڈیگ کے سٹ لو اوتی سی تے ایس دے نتیجے تے سیدہ زینب داحمل وی ساقط ہو گیا سی۔ فتح مکہ والے دن ایہ شہروں دوڑ کے کد رے چھپ گیا۔ فیر جدوں کجھ امن امان ہو گیا تے اوس نے نبی رحمت دے سامنے اپنیاں غلطیاں تے بدکاریاں دا اقرار کیتا تے نالے معافی دا طلبگار ہو گیا۔ ہبار نوں معافی بڑے دڈے دل گردے داکم سی، پرسرپا رحمت نبی نے اوس نوں معاف کر دتا۔ سارہ، بنی مطلب بن عبد المناف وچوں کسے دی لوٹدی سی۔ ایسے خاندان دے کسے بندے دی سفارش کم آگئی تے سزائے موت توں بچ گئی۔ فیر مسلمان ہو گئی تے اسلامی تعلیم تے کار بند ہو کے حیاتی دے دن کٹ دی ری۔ ابن حنظل دیاں دو گائیکہ لوٹدیاں وچوں وی اک قتل کیتی گئی پر دوسری نوں امان مل گئی۔

فتح مکہ دا دُجا خطبہ:

مکے ول رسول خدا دی لشکر کشی آپ دے حلیف قبیلے بنو خزاعہ نال زیادتی دا نتیجا سی۔ ہن جدوں بنو خزاعہ نے پیغمبر اسلام نوں فاتح دی حیثیت نال اپنے شہر وچ دیکھ لیا تے اوہناں نوں ہلاشیری ملی۔ ایوں اوہناں نے قبیلہ بدیل دے اک مشرک نوں اپنی پرانی دشمنی پاروں قتل کر دتا۔ رسول خدا نوں ایس قتل دا پتا لگا تے آپ نے فتح دے دُجے دن لوکا کئی نوں ایوں خطاب فرمایا:

”لوکوا! اللہ نے ازل توں ای مکے دی حرمت فرمادی اے جیہڑی قیامت تک رہوے گی۔ جیہڑا بند خدا دی ذات، تے آخرت تے ایمان رکھدا اے اوہ مکے دے اندر کسے نوں قتل نہ کرے، سگوں ایہتھوں دا کوئی رُکھ وی نہ کٹیا جاوے۔ میرے توں پہلے تے میرے بعد کسے لئی وی مکے دی حرمت ختم کرنا حلال نہیں تے میرے لئی وی بس تھوڑے ای چرلئی جائز ہوئی، ایس لئی کہ مکے والیاں نے خدا نوں نراض کر لیا۔ ایس توں بعد ایہ حرمت پہلے وانگ فیر پرت آئی۔ دوستو! جیہڑے لوک ایہتھے موجود نہیں اوہناں نوں وی ایہ گلاں دس دیو۔“

ایس توں بعد رسول خدا نے اہل مکہ نوں اوس گل دا جواب دتا جیہڑی ایہ خطبہ سنن ویلے اوہ سوچ رے سن۔ ارشاد

فرمایا:

﴿فَمَنْ قَالَ لَكُمْ أَنَّ رَسُولَ اللَّهِ قَدْ قَاتَلَ فِيهَا فَقُولُوا إِنَّ اللَّهَ قَدْ أَحْلَاهَا الرَّسُولَةَ وَلَمْ يَحْلَلْهَا لَكُمْ﴾

”(خیال رہوے کہ) بے کوئی بندا تہانوں ایہ گل آکھے کہ رسول اللہ نے حرم کعبہ دے وچ قتال کیتا سی تے

اوس نوں آکھ دینا کہ ایہہ تے اللہ نے بس اپنے رسول لئی حلال کیتا سی پر تہانوں ایس دی اجازت نہیں۔“

فیر آپؐ نے اپنے حلیف قبیلے بنو خزاعہ نوں مخاطب کر دیاں ارشاد فرمایا کہ اے خزاعہ دے سجنو! لڑائی توں ہتھ ڈک لوؤ۔
جے تہانوں کوئی وقتی فیدہ دسد اے، فیروی باز آ جاؤ۔ تہاڈے کولوں جیہڑا بنداقٹل ہو گیا اے اوس دا خون بہا میں اپنے وٹوں
دے دیندا ہاں۔ پرسن لوؤ کہ اگے توں میں مقتول دے وارثاں نوں اختیار دیندا ہاں کہ اوہ اپنے مقتول دا خون بہا لین تے
بھانویں قصاص (خون دے بدلے خون)، اوہناں نوں اختیار اے۔ ایس توں بعد قبیلہ بدیل دے بندے دی بیت (خون
بہا) اپنے کولوں ادا کر کے خزاعہ تے بدیل دے وچکار تنازعہ ختم کرا دتا۔

رسول خداؐ نے اوس دیہاڑے لوکاں نوں زور دے کے آکھیا کہ جس کسے داوی خدا تے آخرت تے ایمان اے جے
اوس دے گھر وچ کوئی بت موجود اے تے اوس نوں توڑ کے سٹ دیوے۔ اوسے دن آپؐ نے اپنے دوست قبیلے بنو خزاعہ
نوں حکم دتا کہ حرم دیاں حدیں دی نشان دہی لئی جیہڑیاں بارہ (۱۲) برجیاں بنیاں ہوئیاں نیں جے اوہناں وچ کوئی وگ
ہوئی اے یاں مرمت طلب اے تے اوس نوں مرمت کر دین۔

نبی رحمتؐ تے مکے دے وحشی:

مکے دے مشرک سردار جیہڑے کل تیکر خونی بھگیاڑاں طرحاں رحمت عالم دے خون دے پیاسے سن تے اوہ وحشی
غنڈے جیہڑے ہر ویلے رسالت دی شمع نوں گل کر دین دے چکر وچ رہندے سن اوہ ہن اوسے ہستی دے تقدس تے
احترام دے وظیفے پڑھدے نظر آؤندے سن۔ اچھے لوکاں دی فہرست تے بڑی لمی اے پراسیں کجھ دا ذکر کردے ہاں:
وحشی بن حرب:

جویں کہ پڑھنہاراں نوں پتہ اے وحشی نام دا وحشی اک غلام سی تے اوس نے ابوسفیان دی سوانی ہند دے لالچ دین
نال جنگ احد وچ شیر خدا، عم رسول حضرت حمزہؓ نوں شہید کیتا سی۔ فتح مکہ والے دن اوہ طائف دوڑ گیا پر جدوں لشکر اسلام
نے طائف دا محاصرہ کر لیا تے اوس نے شام یاں یمن ول دوڑ جان دا فیصلہ کر لیا۔ اچھے اوہ طائف وچ سی تے اوس نوں
کسے دسیا کہ جیہڑا بند اسلام قبول کر لیندا اے، رسول رحمت اوس نوں معاف فرما دیندے نیں۔ وحشی آکھدا اے کہ ایہ سنن
توں بعد میں ہمت کر کے رسول خدا دی خدمت وچ حاضر ہو گیا تے جا کے کلمہ شہادت پڑھ لیا۔ حضور نے میرے ول نگاہ
مبارک فرمائی تے ارشاد فرمایا کہ تو وحشی ایں نا؟“

”جی یا رسول اللہ، میں وحشی ہاں،“ میں جواب دتا۔

”اچھا بیٹھ جاتے مینوں اوہ واقعہ سنا جدوں توں میرے چاچے نوں شہید کیتا سی۔“

میں پوری گل سنا دتی۔ سنن توں بعد حضورؐ نے مینوں معاف فرما دتا پر نال ای ارشاد فرمایا کہ ”میرے سامنے نہ آیا کر۔“

اللہ دا کرنا دیکھو کہ ایسے وحشی دے ہتھوں نبوت دا دعویدار مسیلہ کذاب قتل ہو گیا۔

سہیل بن عمرو:

صلح حدیبیہ دے ویلے جیہڑا بندہ مشرکاں دا نمائندہ بن کے رسول خداؐ نال صلح دیاں شرطاں طے کرن آیا سی، تے جس نے مکے دی نمائندگی کر دیاں ہوئیاں صلح نامے تے دستخط کیتے سن، اوہ سہیل بن عمرو سی۔ سہیل جڈا سیانا بندہ اسی اوڈا ای ضدی وی سی۔ تہانوں یاد ہووے گا کہ جدوں صلح نامے تے اک فریق دے طور تے ”محمد رسول اللہ“ دا نام لکھیا گیا تے اوس نے آکھیا سی کہ ”جے اسیں محمدؐ توں محمد رسول اللہؐ من لوئیے تے فیر تے جھگڑا ای مک جاندا اے۔ ایس لئی اتھے محمد بن عبد اللہ لکھو۔“ معاہدے نوں توڑ چڑھان لئی حضور نے سہیل دی ایہہ گل من لئی سی۔ تہانوں ایہ وی چیتے ہووے گا کہ اوس دا پتر مسلمان ہو چکیا سی۔

فتح مکہ والے دن سہیل کدرے لک گیا تاں جے کوئی مسلمان اوس نوں قتل نہ کر دیوے۔ اوس دا پتر حضور دی خدمت وچ حاضر ہوئی تے اپنے والد لئی امان طلب کیتی۔ آپؐ نے فرمایا کہ سہیل دانش وند تے شریف آدمی اے، اوہ زیادہ دیر اسلام دا انکار نہیں کر سکدا۔ اوس نوں دسو کہ اوہ اللہ دی امان نال امن وچ اے۔ حضور دے سنہیے توں بعد اوہ سامنے تے آ گیا پر اسلام قبول نہ کیتا۔ ایسے حالت وچ ای مسلماناں نال رل کے جنگ صفین وچ شرکت کیتی۔ جدوں رسول خداؐ جعراندہ دی تھاں تے تشریف فرما سن تے اوس نے دل وچوں سارے وسوسے کڈ مارے تے اللہ نے اوس دا سینہ اسلام دے نور نال منور کر دتا۔

جدوں رسول خداؐ دے پردہ فرما جان دی خبر کے اپڑی تے کئی لوکی اندروں ہل گئے۔ جناب سہیل نے اوس ویلے ایمان نال بھری اک زوردار تقریر کیتی جنہوں سن کے اہل مکہ اپنے ایمان تے پکے ہو گئے۔ جناب سہیل بن عمرو جنگ یرموک وچ شہید ہوئے۔

صفوان بن اُمیہ:

صفوان، تے اُس دے والد اُمیہ دے دل رسول خداؐ دی عداوت نال بھرے ہوئے سن۔ اوہ وی فتح مکہ والے دن غیب ہو گیا تے فیر سمندر وچ ڈبن لئی مکہ چھڈ گیا۔ اوس دے چاچے دے پتر عمیر بن وہب دی سفارش تے حضور نے اوس نوں امان دتی تے ایس امان دی نشانی دے طور تے جناب عمیر نوں اپنا نورانی عمامہ وی اُتار کے دتا۔ جناب عمیر نے اوسے ویلے سمندر وچ دوڑ لائی تے صفوان بن اُمیہ نوں سمندر وچ ڈبن توں تے جہنم وچ سڑن توں بچا لیا۔ صفوان نوں رسول خداؐ دا عمامہ ویکھ کے تسلی ہوئی تے مکے واپس پرت آیا پر مسلمان نہ ہوئیا۔ ایسے حالت وچ بنو ہوازن دی لڑائی وچ رسول خداؐ دا ساتھ دتا تے رسول خداؐ دی عطا تے فیاضی ویکھ کے اتھے ای مسلمان ہو گیا۔

فضالہ بن عمیر:

مکے دے فسادیاں وچ اک نام فضالہ بن عمیر داسی۔ فتح مکہ والے دن جدوں رسول خداؐ طواف فرما رہے سن تے خنجر نال حملہ کرن دے ارادے نال حضور دے نیڑے ہوئیا:

”کیہ توں فضالہ ایس؟“ حضور نے پچھیا۔

”ہاں، میں ای فضاہ ہاں“ اوس نے جواب دتا۔

”ایہ اپنے دل وچ کیہ صلاحواں کر رہیا ایں؟

”کچھ نہیں، بس اللہ اللہ کر رہیا ہاں۔“

اوس دا جھوٹ سن کے رسول خدا مسکرا پے تے اوس نوں اپنے نیڑے بلا کے اوس دے سینے تے ہتھ رکھیا تے اوس نوں ہدایت کیٹی کہ اللہ توں مغفرت طلب کرے۔ فضاہ آکھدے نیں کہ ”جدوں حضورؐ نے میرے سینے توں ہتھ چکیا تے میری دنیا بدل چکی سی۔ میں اوسے ویلے مسلمان ہو گیا۔“

ابولہب دے پتر:

رسول خداؐ دے چاچے ابولہب نے نبی رحمت نال جیہڑی کر چھڈی سی اوس نوں مجھن لئی سورہ لہب ای کافی اے پر فیروہی آپؐ اوس دے پتراں نوں دوزخ دا بالن بنن توں بچاؤ نا چاہندے سن۔ مکہ فتح ہون تے بوہت سارے دُجے مشرکاں طرحاں ایہ دوویں بھرا، عتبہ تے معتبہ وی لکے پھر دے سن۔ اک دن سرکار نے چاچے عباس ہوراں نوں پچھیا کہ چاچا جی عتبہ تے معتبہ تے کدے نظر نہیں پئی۔ جناب عباس نے اوہناں دے روپوش ہون دا دسیا تے حضورؐ نے فرمایا کہ جاؤ، اوہناں نوں میرے کول لے کے آؤ۔ جدوں اوہ آگئے تے حضورؐ نے اوہناں نوں اسلام دی دعوت دتی جیہڑی دوواں بھراواں قبول کر لئی۔ اوہناں دے مسلمان ہون نال رسول رحمت بوہت زیادہ خوش ہوئے۔

عتبہ تے معتبہ، حنین تے طائف دے غزویاں وچ حضورؐ دے نال جڑے رے۔ جنگ حنین وچ جناب معتبہ دی اک اکھ شہید ہو گئی سی۔

ابوقحافہ۔ صدیق اکبر دے والد:

ایام فتح وچ اک دن جناب ابوبکر صدیقؓ اپنے نایینا والد ابوقحافہ نوں حضور دی خدمت وچ لے کے حاضر ہوئے۔ یار غار دے بزرگ تے نایینا والد نوں ویکھ کے نبی رحمت نے ارشاد فرمایا کہ ”ابوبکر! ایہ بزرگ آدمی نیں، تساں ایناں نوں زحمت کیوں دتی اے؟ میں آپ ایناں کول ٹر جاندا۔“

”یا رسول اللہ! ایہ ایناں دا ای فرض بن داسی۔“ جناب صدیق نے جواب دتا۔

رسول خداؐ نے جناب ابوقحافہ نوں اپنے سامنے بٹھا کے اوہناں دے سینے تے دست مبارک رکھیا تے فرمایا ”یا شیخ! اسلام قبول کر لوؤ۔“ ایہ سن کے بزرگاں نے فرمایا:

﴿لَا إِلَهَ إِلَّا اللَّهُ مُحَمَّدٌ رَسُولُ اللَّهِ﴾

ہندز وجہ ابوسفیان:

ابوسفیان دی سوانی ہند دے کرتوت کسے وی مسلمان توں لکے چھپے نہیں۔ رسول خدا دی دشمنی نال بھریا سینہ، جناب حمزہ دے خون نال بھریا منہ تے ہتھ، تے شہدائے اُحد دے خون نال لپیڑے ہوئے پیر سب نوں وکھالی دیندے نیں۔ ہند نہ صرف دشمن خدا ابوسفیان دی زنائی سی سگوں اک دُجے دشمن خدا تے دشمن رسول عتبہ دی دھی وی سی۔

جدوں مکے دیاں سوانیاں رسول خدا دی بیعت لئی گھراں وچوں نکلیاں تے ہندوی نقاب کر کے اوہناں دے نال رل گئی۔ جدوں اوہ سوانیاں رحمت عالم دے نیڑے اپڑیاں تے حضورؐ نے فرمایا کہ تسیں ایہناں گلاں تے میری بیعت کرو: ”اللہ دے نال کسے نوں شریک نہ بناؤ گی، چوری تے زنا نہیں کرو گئیاں، اپنے بالاں نوں قتل نہیں کرو گئیاں۔ نالے کسے تے بہتان نہیں لانا تے میری نافرمانی نہیں کرنی۔“

ایس بیعت تے ہند نے بڑے دلچسپ تبصرے کیتے۔ مثال موجب اوس نے اپنے خاوند ابوسفیان دے مال وچوں کچھ نہ کچھ لے لین دا ذکر کیتا۔ جدوں رسول خدا نے زنا کاری توں بچن دی بیعت لئی تے آکھن لگی کہ بھلا کوئی آزاد عورت وی ایہ کم کردی اے؟ ایس توں اوہدا مطلب ایہ سی کہ ایہ کم لوٹدیاں دا اے تے آزاد عورتاں توں ایس طرحاں دے وعدے دی لوڑ نہیں۔ جدوں آپ نے فرمایا کہ اولاد نوں قتل نہیں کرنا، جس توں مراد ایہ سی کہ دھیاں نوں جیوندی جانیں دبن یاں قتل کر دین دی مکروہ رسم دا خاتمہ کیتا جاوے، تے ہند آکھن لگی کہ اسیں تے اپنے بال قتل نہیں کیتے سگوں پال پوس کے وڈے ای کیتے سن پر تساں ساڈے نال گھٹ نہیں کیتی۔ کیہ تساں میدان بدروچ ساڈا کوئی بال جیوند اچھڑاوی ہے سی؟ اوس دیاں ایوں دیاں گلاں توں سب نوں پتہ لگ گیا کہ اوہ ہند اے۔ حضورؐ نے پچھیا کہ توں کدرے عتبہ دی دھی ہند تے نہیں؟ آکھن لگی: ”ہاں میں ای ہند ہاں۔“

جدوں حضورؐ نے ہند دے نال نال دجیاں سوانیاں توں وی تہمت تے بہتان توں باز رہن دی بیعت لئی تے اپنی نافرمانی توں وی ڈکيا، تے آکھن لگی کہ ہن ایہناں گلاں دے تے جناب دی نافرمانی دا گمان وی نہیں کیتا جاسکدا۔ ہند اپنے کاریاں تے پکی ری۔ عہد فاروقی وچ جدوں شام تے لشکر کشی کیتی گئی تے ہند اپنے خاوند ابوسفیان نال ایس جنگ وچ شریک ہوئی۔ جناب عمر فاروق دے دور وچ ای ہند اللہ نوں پیاری ہو گئی۔ آکھیا جاند اے کہ جناب صدیق اکبر دے والد جناب ابوقحافہ تے ہند اکو دیہاڑے فوت ہوئے سن۔

آل دوال دے صنم خانے:

بت پرستاں دا خدائے اعظم ہبل سی جیہڑا کعبے دے اندر نصب سی۔ اوس نوں فتح مکہ والے دن ای توڑ دتا گیا سی پر اہجے مکہ دے آل دوالے بوہت سارے بت موجود سن جیہڑے خدائی دے مزے مان رے سن۔ اوہناں وچ لات، منات، سواع تے عزلی خاص طور تے قابل ذکر نیں۔

عزلی قریش دا تے لات طائف والیاں دا معبود سی۔ عزلی مکے توں عراق دے رستے تے بُتان توں نوں (۹) میل دے پندھ تے راہ دے سچے پاسے نصب سی۔ ایس دیوی دے حضور چڑھاوے چڑھائے جاندے سن تے اوس دی پوجا کیتی جاندی سی۔ رسول خدا نے حضرت خالد بن ولید نوں حکم دتا کہ اوس دیوی دے ٹوٹے کر دین۔ جناب خالد نے حکم دی تعمیل فرمائی تے عزلی نوں اوہدے انجام تک پڑا دتا۔

مشثل دی تھان تے اک بوہت وڈا بت نصب سی جہدا نام مناتہ سی۔ اوس، خزرج، ازد تے غسان دے قبیلے اوس دی پوجا کر دے ہوندے سن۔ حج دے موقع تے منات دے سامنے کئی طرحاں دیاں رسماں ادا کیتیاں جاندیاں سن۔ پیغمبر

توحید نے حضرت سعد بن زید نال اک فوجی جتھا روانہ کیتا تاں جے منات دے ٹکڑے کیجے جان۔ آپ نے اپنے مجاہداں دے نال پتھر دے اوس ٹکڑے نوں پتھراں وچ ملا دتا۔

ہذیل قبیلے دے بت سواع نوں توڑن لئی جناب عمرو بن عاص نوں بھیجیا گیا۔ آپ نے بت توڑ کے معبد کدہ وی گرا دتا تے آقا دے حکم دی تعمیل کردتی (لات دا ذکر اگلے صفحاں تے طائف دے باب وچ ویکھو)
جناب خالد بن ولید دے ہتھوں بنو جزیمہ دا قتل:

مکہ فتح ہو جان توں بعد، تے بنو جزیمہ سنے آل دوالے دے سارے قبیلیاں دے مسلمان ہو جان توں بعد اک مسلم سپہ سالار دے ہتھوں بنو جزیمہ دے بے گناہ مسلماناں دا قتل عہد نبوی دی اسلامی تواریخ دا اک بوہت وڈا معمہ اے۔ بوہت سارے سیرت لکھیاں ایس سوال تے خموش نیں تے جہناں کوئی گل کیتی اے اوہناں وی توڑ نہیں چاڑھی۔ ایس سلسلے وچ میں آج دے دور دے دو عظیم الشان بزرگاں حضرت شبلی نعمانی تے جناب جسٹس محمد کرم شاہ الازہری دے نام لواں گا جہناں ایس واقع دا ذکر نہیں کیتا۔

مصر دے محمد حسین ہیکل لکھدے نیں:

”جناب خالد، عزئی دیوی نوں ختم کرن توں بعد قبیلہ بنو جزیمہ ول ودھ گئے۔ قبیلے والیاں اوہناں نوں اپنے ول آوندیاں ویکھیا تے مسلح ہو کے نکل آئے۔ حضرت خالد نے ہتھیار سٹن دا حکم دیندے ہوئیاں فرمایا کہ دُجے لوگ تے مسلمان ہو گئے نیں۔ قبیلے دے اک بندے نے اوہناں نوں آکھیا ”لے بھئی ایہ خالد جے، جے تسیں ہتھیار سٹ دتے تے ایس نے تہاں نوں قیدی بنا لینا اے تے فیر تہاڈیاں گردناں اڈا دیوے گا“، ایہدے جواب وچ کچھ بندیاں نے اوس صلاح کار نوں آکھیا کہ کیہ تسیں سانوں قتل کرانا چاہندے او؛ دُجے لوکی مسلمان ہو چکے نیں، لڑائی مک گئی اے تے ہر پاسے امن امان دا پھیرا اے۔ اخیر اک اک نے ہتھیار سٹ دتے پر حضرت خالد نے اوہی کیتی جو پہلے بندے نے آکھیا سی۔ اوہناں دیاں مشکاں بندھوا دیتیاں تے قتل گاہ وچ لے جا کے اوہناں نوں قتل کردتا۔ رسول اللہ نے سنیا تے غم تے دُکھ نال بوہت بے قرار ہوئے تے دوویں ہتھ کھلا رکھے خدا دے حضور التجا کیتی کہ ”یا اللہ میں خالد دی ایس کر توت توں بری الذمہ ہاں۔“

”رسول خدا نے حضرت علی نوں بوہت سارا مال و زر دے کے مظلوماں ول بھیجیا تاں جے مقتولاں دی تعداد دے مطابق دیت ادا کیتی جاوے۔ جناب علی نوں ایہ تاکید وی فرمادی کہ قتل تے مال دے معاملے وچ جاہلیت دے ناپ تول نوں اپنے پیراں تلے روند دیو۔“

”حضرت علی تے فراخ دلی ناں دیت (خون بہا) تے تاوان ادا کیتا۔ فیر جو کچھ بچیا اوہ وی اوہناں نوں دے دتا تاں جے کسے ہور قسم دے نقصان دا پتا لگے تے اوس دی وی تلافی ہو جائے۔“

امام ابن کثیر لکھدے نیں:

”حضرت عبداللہ بن عمر آکھدے نیں کہ رسول اللہ نے خالد بن ولید نوں بنی جذیمہ ول روانہ کیتا۔ حضرت خالد نے

اوہناں نوں اسلام دی دعوت دتی تے اوہ ٹھیک لفظاں وچ اسلام دا اظہار نہ کر سکے۔ خالد نے اوہناں دے قتل تے اسیری دا حکم دے دتا۔ ہر مسلمان دے حوالے اک قیدی کر دتا۔ سویرہ ہوئی تے خالد نے حکم دتا کہ ہر مسلمان اپنا اپنا قیدی قتل کر دیوے۔ ایہ سن کے حضرت ابن عمر تے آکھیا کہ واللہ! میں اپنا قیدی قتل نہیں کراں گا۔ تے میرے بچاں وچوں وی کوئی بندہ کسے قیدی نوں قتل نہیں کرے گا۔ فیروکی رسول اللہ کول آئے تے سارا ماجرا سنایا۔ رسول اللہ نے ہتھ چک کے دوواری فرمایا، یا اللہ! میں خالد دے فعل توں بری ہاں۔ ایسے روایت نوں امام بخاری تے نسائی نے عبدالرزاق توں بیان کیتا اے۔ ابن اسحاق دا بیان اے کہ جدم نے حضرت خالد دے تیور وکھ کے آکھیا کہ اے بنی جذیمہ! گیا ویلا فیر ہتھ نہیں آؤندا، میں تہانوں پہلوں ای ایس خطرے دا دس دتاسی۔“

”ابن اسحاق دا بیان اے کہ حضرت خالد بن ولید تے حضرت عبدالرحمان بن عوف دے وچکار ایس گل تے تکراروی ہوئی۔ حضرت عبدالرحمن نے آکھیا کہ خالد! تساں اسلام وچ جاہلی دور دا کم کیتا اے۔ ایہ سن کے حضرت خالد نے آکھیا کہ میں تے تہاڈے والد دے قاتل نوں ماریا اے۔ حضرت عبدالرحمان نے جواب دتا کہ اپنے والد دے قاتل نوں تے میں اپنے ہتھیں مار دتاسی۔ اصل وچ توں اپنے چاچے فاکہ بن مغیرہ دا بدلہ لیا اے۔ بعد وچ دوواں نے بڑی گرم گفتگو کیتی۔ ایس گل دا رسول اللہ نوں پتہ لگاتے آپؐ نے فرمایا، بس خالد! میرے اصحاب نوں چھڈ دیو، واللہ! جے تسیں راہ خدا وچ اُحد پہاڑ دے برابر وی سونا خرچ کر دیو، فیروکی تسیں میرے اک صحابی دے صبح شام دے سفر دے اجر نوں نہیں پاسکدے۔“

”ابن اسحاق دا بیان اے کہ حضرت خالد بن ولید دا چاچا فاکہ بن مغیرہ، عوف بن عبدعوف، عفان بن ابی العاص تے عثمان بن عفان نال یمن ول تجارت دے خیال نال گیا۔ واپسی تے اوہناں کول بنی جزیمہ دے اک تاجر داوی مال سی جیہڑا یمن وچ فوت ہو گیا سی۔ فاکہ اوس دے وارثاں نوں مال دین جا رے سن تے رستے وچ بنو جزیمہ دے علاقے وچ خالد بن ہشام نے مال دا مطالبہ کیتا۔ انکار تے لڑائی ہو پئی تے ایوں فاکہ تے عوف دوویں ای قتل ہو گئے۔ عثمان تے عفان، دوویں پیو پتر جان بچا کے مکے اپڑ گئے۔ حضرت عبدالرحمان نے اپنے والد عوف دے قاتل خالد بن ہشام نوں قتل کر دتا۔ قریش نے بنی جزیمہ نال جنگ دا ارادہ کیتا تے بنی جزیمہ نے معافی منگدیاں آکھیا کہ ایہ لڑائی قبیلے دی مرضی نال نہیں ہوئی سی، ایس لئی مقتولاں دی دیت تے لٹیا ہو یا مال واپس کرن تے صلح ہو گئی۔ ایہ وجہ سی کہ حضرت خالد نے حضرت عبدالرحمان نوں آکھیا کہ میں تیرے باپ دے قتل دا بدلہ لیا اے، تے اوہناں نے جواب وچ آکھیا سی کہ میں اپنا بدلہ لے لیا سی، اصل وچ تساں اپنے چاچے فاکہ دا بدلہ لیا اے۔“

اصل صورت حال کیہ سی؟ خالد بنو جزیمہ ول کیوں گئے؟ لڑائی کیوں شروع ہوئی؟ بنو جزیمہ اپنی پوزیشن کیوں واضح نہ کر سکے؟ اللہ ای بہتر جان دا اے۔ اک پڑھنہار تھلے دسیاں گلیاں گلاں نوں سامنے رکھ کے خورے کسے نتیجے تے اپڑ سکے۔

۱۔ رسول خدا نے جناب خالد نوں ایس گل تے ڈانٹیا سی کہ اوہناں نے جناب عبدالرحمان بن عوف نال تلخ کلامی کیتی سی۔

- ۲۔ آپؐ نے بنو خزیمہ نوں اوس عہد دی دیت (خون بہا) ادا کیتی، سگوں اوس توں چوکھا دتا۔
 ۳۔ خون بہا جناب خالد دے مال وچوں نہیں، سگوں بیت المال وچوں دتا گیا۔
 ۴۔ رسول اللہؐ نے حضرت خالد نوں معزول نہیں کیتا سگوں منصب امارت تے قائم رکھیا۔
 ۵۔ عہد صدیقی وچ وی جناب خالد کولوں ایوں دی اک غلطی ہوئی سی، تے جناب ابو بکر صدیقؓ نے اوہناں نوں معزول نہیں کیتا سی۔

مسلمان مورخاں تے سیرت لکھیاں راں نے ایس موضوع تے کوئی کچی پیڑی گل نہیں کیتی، ایس لئی مستشرقان نے اپنا فیصلہ کیتا اے کہ ایہ خالد نے اپنے چاچے دے قتل دا بدلہ لیا سی۔ ظاہر اے اوویں دے حالات وچ انتقام دا سوچیا وی نہیں جا سکدا اسی پر سوال ایہ وے کہ جے ایہ انتقام نہیں سی تے فیر کیسی؟
 اک مستشرق لکھدا اے:

Khalid, son of Al walid, being sent on a mission of this sort to the Jadhima, took the opportunity of avenging an old wrong the murder of his uncle which had happened years before: he attacked the tribe at Ghumaisa and dealt considerable slaughter. ☞

”خالد بن ولید جس نوں ایسے اسی طرحاں دے اک مشن تے جذیمہ ول بھجیا گیا سی، نے اک پرانی غلطی دا انتقام لیا، جیہڑا کئی سال پہلوں ہون والا اوس دے چاچے دا قتل سی۔ اوس نے غمیصاء دی تھاں تے اوس قبیلے تے حملہ کر دتا تے چوکی قتل و غارت کیتی۔“

* * * *

حنین، اوطاس تے طائف دے معرکہ

حنین مکہ مکرمہ تے طائف دے وچکار ذوالحجاز دے نیڑے اک تھاں دا نام اے۔ ایس دے نیڑے دے صحرائی علاقے وچ بنو ہوازن آباد سی جتھے رسول خدا نے مائی حلیمہ دے نال اپنے بچپن دے دن گزارے سن۔ اوہناں دا اک حلیف قبیلہ بنو ثقیف، جیہڑا امیر کبیر تے خوشحال سی، طائف وچ وسداسی۔ بنو ہوازن دی عددی قوت تے حربی چالاں اپنی تھاں مشہور سن تے بنو ثقیف دی امارت تے ٹور پٹے اپنی تھاں۔ ایہناں دوواں گلاں نے اوہناں نوں حوصلہ دتا کہ محمدؐ دے اگے ہتھیار نہیں سٹئے، تے اوس دا ڈٹ کے مقابلہ کرنا اے۔

رسول خداؐ دی توجہ اچے خورے کدوں اوہناں ول ہوندی پراوہناں نے آپوں ایہ فرض کر لیا کہ مکہ فتح ہون توں بعد لشکر اسلام بن اوہناں ول ودھے گا۔ ایوں بنو ہوازن تے بنو ثقیف نے ککے تے پیشگی حملے دا فیصلہ کر لیا۔ ہوازن داسپہ سالار مالک بن عوف نام دا اک ۳۰ سالہ جوان سی تے ثقیف داسر دارقارب بن اسودسی۔ ایس توں وکھ اوہناں نے بنو نضر، جشم، تے بنو ہلال دے بندیاں نوں وی نال رلا لیا پر بنو ہوازن دیاں اپنیاں دولڑیاں بنو کعب تے بنو کلاب نے جناب رسول خدا دے خلاف جنگ وچ حصہ لین توں انکار کر دتا تے اوہناں دے اک دانش وند رئیس ابن ابی براء نے ایہ گل آکھی کہ ”بخدا! محمد نال جنگ دا کوئی فیہ نہیں، غالب اوہناں نے ای آؤنا اے۔“ ایس لڑائی دا مدھ بن والے بنو ہوازن دے نوجوان سردار مالک بن عوف نوں ای اتحادی فوجاں دا کمانڈر انچیف مقرر کیتا گیا۔

مالک بن عوف زوردار جنگ، تے اوہ وی صرف اوس دی مرضی دی جنگ توں وکھ کوئی گل سنن لئی تیار تے نہیں سی پر فیروی اوس نوں کجھ سیانیاں نے مشورہ دتا کہ جوانی دا جوش جذبہ اپنی تھاں، تجربے تے سیانف نوں سٹ نہیں پاؤنا چاہیدا۔ ایوں قبیلہ جشم دے تجربہ کار ماہر حرب شیخ درید بن صمہ نوں وی لشکر وچ شامل کر لیا گیا۔ درید اوس ویلے گھٹو گھٹ سوا سو سال دا قریب المرگ بڑھاسی۔ اوہ اپنی جوانی دے ویلے شمشیر زنی، شاعری تے اپنیاں محبت دیاں کہانیاں پاروں بڑا مشہور سی۔ اک اونٹ دے اُتے پٹنگ کس کے درید نوں اوہدے تے لمبیاں پالیا گیا تے لشکر کے ول کوچ کر گیا۔

کمانڈر انچیف دے حکم موجب مشرک لشکر اپنا بال بچہ، سوانیاں، مال ڈنگر تے ہر شے اپنے نال لے ٹریا سی۔ اونٹاں دے بلبلاں دی واج تے فوجیاں دے نال ای رہندی اے، اوس دن کھوتیاں دی ہنہناہٹ تے بکریاں دی میاہٹ وی کتھاں دے پردے پھاڑ رہی سی۔ بالاں دے رون دی واج وی پہاڑیاں دیاں ٹیسیاں نال ٹکراں کھا کھا کے واپس آری سی۔ بڑھے درید نے جدوں ایہ سارا کجھ محسوسیا تے مالک بن عوف نوں سدّ کے پچھیا کہ بچیا! ایہ کیہ؟ مال ڈنگر تے جیا جنت نال لیاون وچ کیہ بھیداے؟

”بزرگو! بھیدایہ وے کہ میرے سپاہی لڑائی توں منہ نہیں موڑن گے تے اپنا سب کچھ برباد ہوندا ویکھ کے جی توڑ کے لڑن گے۔“

”نہیں مالک، ایہ چیزاں فوج دے اکھڑے ہوئے قدم نہیں جھاسکدیاں۔ اچھے موقعیاں تے نرے تیر تے تلواراں کم آؤندیاں نیں۔ سن لوؤ جے جنگ شروع ہون توں پہلاں ایہناں نوں واپس نہ کیتا تے پچھتاوے توں سوا کچھ حاصل نہیں ہونا۔“
پر متکبر نو جوان کمانڈر مالک بن عوف نے اوس دی گل منن توں انکار کر دتا تے لشکر نے وی مالک دی گل ای رکھی۔
جدوں درید نے دیکھیا کہ اوس دی گل نہیں سنی جاری تے اوس نے وی غموشی اختیار کر لئی۔

کافراں دا چوی توں اٹھائی ہزار (۲۴۰۰۰ توں ۲۸۰۰۰) دا مجمع حنین دی تھاں تے اپڑ گیا سی۔ دُجے پاسے رسول خداؐ نے وی پوری تیاری فرمائی۔ بارہ توں چوداں ہزار سپاہیاں دا لشکر تیار کیتا جہدے وچ دس ہزار اوہ مجاہد سن جیہڑے جان تلی تے رکھ کے مدینے توں مکے آ کے فتح دا مزہ کچھ چکے سن، تے باقی اوہ لوگ سن جیہڑے مکے یاں آل دوالے دے وستیک سن تے فتح مکہ توں بعد مسلمان ہوئے سن۔ اوہناں نوں مسلماناں وچ اوہ لوک وی سن جہناں دے ایمان کچے تے کمزور سن۔ صفوان بن اُمیہ ورگے وی سن جہناں اے کلمہ وی نہیں پڑھیا سی تے اعلانیہ شرک تے قائم سن۔ اوہناں لوکاں وچ شبیہ بن عثمان تے نصر بن حارث ورگے بندے وی شامل سن جیہڑے ایس ارادے نال لشکر وچ شامل ہوئے سن کہ جدوں وی موقع ملیا اوہ رسالت دی شمع گل کر دیں گے۔

شوال دی ۵ تاریخ نوں نبی مکرمؐ نے حضرت عتاب بن اُسید نوں مکے دا گورنر مقرر کیتا تے حضرت معاذ بن جبل نوں امام تے معلم دیاں ذمہ داریاں دتیاں تے اللہ داناں لے کے حنین ول ٹرپے۔ آپؐ نے جناب عبداللہ بن ابی حدرد اسلمی نوں جاسوس بنا کے گھلیا تاں جے مشرک لشکر دیاں کاروائیاں دا پتا لگے۔ عبداللہ پوری ہمت تے بھرویوں اعتماد نال دشمنان دے وچ جاوڑے۔ او تھے اک دوراتاں وی گزاریاں تے مالک بن عوف دے بالکل نیڑے ہو کے اوہدے ارادے جانن وچ وی کامیاب ہو گئے۔ جناب عبداللہ نے سپہ سالار اعظم محمد رسول اللہؐ نوں جیہڑی رپورٹ دتی اوس موجب لڑائی ٹلن دی کوئی گنجائش باقی نہیں سی۔ اوس لئی آپؐ نے زیادہ توں زیادہ اسلحہ اکٹھا کر لیا۔ ایس سلسلے وچ آپؐ نے مشرکین مکہ توں وی مدد لین توں گریز نہیں کیتا تے صفوان بن اُمیہ توں زرہاں تے دُجا سامان حرب ادھار لے لیا۔

ہوازن و ثقیف دا لشکر مسلماناں توں پہلاں میدان جنگ وچ اپڑ گیا سی تے اوہناں نے ماہر حرب بڑھے درید دی ہدایت موجب ایوں پوزیشن سنبھال لیاں سن کہ مسلماناں لئی وڈی مشکل پیدا کر سکدے سن۔ میدان جنگ وچ وی متکبر سپہ سالار مالک بن عوف نے پہل کر کے اک اللہ دے نام لیوا مسلماناں نوں ہمیش لئی صفحہ ہستی توں مٹا دینا چاہیا تے ایوں اک سویر لشکر اسلام تے اچن چیت حملہ کر دتا۔ مسلمان ایس خوش فہمی وچ سن کہ عربستان دی تواریخ دے سب توں وڈے لشکر نوں کون کوں شکست دے سکد اے۔ اوہ اک دُجے نوں آکھدے وی پھر دے سن کہ بھلا آج کون ساڈے تے غالب آسکد اے؟

مسلمان تے ہمیش اپنے اللہ دے کرم تے اوس دی ذات تے بھروسے نال اگے ودھے سن تے ایوں اوہناں اپنے

توں کئی گنا وڈے لشکراں نال ٹکر لے کے ایوں دیاں مثالاں قائم کیتیاں سن جہناں توں پتا لگدا سی کہ نری عددی قوت کجھ نہیں ہوندی۔ ہن اوہ نرے بارہ چوداں ہزار دے لشکر دے سرتے ہوازن وثقیف جے نیزے بازاں تے ششیر زناں نال لڑائی کرن نکلے سن۔ پیہ نہیں کیہڑی گل رب نوں ناپسند آئی۔ ہو یا ایہ کہ:

When the Hawazin Launched their surprise attack at dawn on 1 February 630, the Muslim army was strung out along the length of the Hunayn valley. ☐

”جدوں بنو ہوازن نے یکم فروری ۶۳۰ء دی سویرے اچن چیت حملہ کیتا تے اسلامی فوج حنین دی پوری وادی وچ تتر بتر ہو گئی۔“

عزیز پڑھنا رو! اتھے ایگل وی چھتے آؤندی اے کہ جیہڑی قوم ایہ پروپیگنڈا کردی اے کہ اسلام، تلوار داندھب اے اوہ قوم دا اک دانش ورا یہ گل لکھ رہیا اے کہ حملہ پہلوں بنو ہوازن نے کیتا سی۔

بہر حال لڑائی شروع ہو گئی تے دریاں (درہ دی جمع) وچ لکے بنو ہوازن نے سچ مچ مسلماناں ول تیر اندازی دے کمال دکھا کے مسلماناں نوں دوڑن تے مجبور کر دتا۔ اتھے اک واری فیر مسلماناں نوں یاد آیا کہ جنگاں نرے وڈے لشکراں تے چوکھیاں تلواراں نال نہیں جتیاں جاندیاں۔

جدوں مسلمان اگے لگ کے بھج کھلوتے تے ابوسفیان رسول خدا دے نال ای جڑیا رہیا تے آکھن لگا کہ ایہ جویں دوڑے جانے نیں، ایس توں تے ایوں لگدا اے کہ ایہہ بن سمندر کول جا کے ای ساہ لین گے۔ پرفیر اوہی کجھ ہو یا کہ جہدا رب نے وعدہ کیتا ہو یا سی۔ کیہ ہو یا؟ مالک دو جہاں دے اپنے لفظاں وچ ای ویکھو:

﴿لَقَدْ نَصَرَكُمُ اللَّهُ فِي مَوَاطِنَ كَثِيرَةٍ وَيَوْمَ حُنَيْنٍ إِذْ أَعْجَبَتْكُمْ كَثْرَتُكُمْ فَلَمْ تُغْنِ عَنْكُمْ شَيْئًا وَضَاقَتْ عَلَيْكُمْ الْأَرْضُ بِمَا رَحُبَتْ ثُمَّ وَلَّيْتُم مُّذَبِّرِينَ ۝ ثُمَّ أَنْزَلَ اللَّهُ سَكِينَتَهُ عَلَى رَسُولِهِ وَعَلَى الْمُؤْمِنِينَ وَأَنْزَلَ جُنُودًا لَّمْ تَرَوْهَا وَعَذَّبَ الَّذِينَ كَفَرُوا وَذَلِكَ جَزَاءُ الْكَافِرِينَ ۝﴾ (التوبة: ۲۵، ۲۶)

”بے شک اللہ نے بڑے موقعیاں تے تہاڑی مدد کیتی اے، تے (جنگ) حنین دے دن وی، جدوں تہاڑی کثرت نے تہانوں مغرور کر دتا سی۔ فیر اوہ تہاڑے کسے کم وی نہ آئی تے (حنین دی) زمین تہاڑے تے تنگ ہوئی باوجود اپنے کھلے گھیر دے۔ فیر تیس کنڈوکھا کے دوڑ کھلوتے۔ فیر اللہ نے اپنے رسول تے، تے ایمان والیاں تے تسکین (دل دا چین) نازل کیتی تے نالے اسماناں توں اچے لشکراں اتارے جہناں نوں تسکین نہیں ویکھیا تے چنگی مار دتی کافراں نوں۔ تے ایہی سزا اے کافراں دی۔“

اصل وچ اللہ دی اوہ فوج نے ای کافراں نوں مار ماری سی جیہڑی اللہ دے اپنے فرمان موجب کسے نوں نظر نہ آئی یاں خورے نری مسلماناں نوں نظر نہ آئی، کیوں جے بعد دے حالات تو پتا لگاسی کہ رسول خدا طرحاں مالک بن عوف نے وی مسلماناں ول اپنے جاسوس بھیجے سن۔ جدوں اوہ واپس پرتے تے اوہناں دے جسم چوکھے زخمی سن تے بعض اعضاء کٹے وی

ہوئے سن۔ مالک نے اوہناں دی حالت تے افسوس کر دیاں پچھیا سی کہ اوہناں نال کیہ ہیتی اے؟ اوہناں نے دسیا کہ اوہناں نوں اسلامی لشکر وچ کچھ گورے رنگ دے بندے ملے جیہڑے چتکبرے گھوڑیاں تے سوار سن۔ بخدا اسیں اپنے آپ نوں ایس حالت توں نہ بچا سکے جیہڑی تسیں ویکھ رے اوسے خیال کیتا جاندا اے کہ مکے وچوں کوئی مجاہد وی کسے چتکبرے گھوڑے تے سوار ہو کے حنین ول نہیں نکلیا تے چتکبرے گھوڑیاں تے سوار اوہی فوج سی جہدا اللہ نے اُپر والی آیت وچ ذکر کیتا اے۔

رسول خداؐ نوں اپنی فتح دے تے نصرت الہی دا پورا یقین سی ایس لئی جدوں اسلامی لشکر دے پیر اکھڑ گئے تے اوہدوں وی رسول خداؐ میدان وچ ڈٹے رے۔ عبداللہ بن محمد بن عبدالوہاب فرماندے نیں:

”حنین دی شام اک آدمی آپؐ دی خدمت وچ حاضر ہو گیا تے آکھن لگا یا رسول اللہ! میں فلاں پہاڑ تے چڑھیا ساں۔ میں ویکھیا اے کہ بنو ہوازن سارے دے سارے، اپنے بال بچے، اونٹ تے بکریاں لے کے میدان وچ جمع نیں۔ آپؐ نے مسکرا کے فرمایا: ”ان شاء اللہ کل ایہ سب کچھ مسلماناں نوں غنیمت وچ ملے گا۔“

ایہی وجہ سی کہ رسول خداؐ نے لشکر اسلام نوں واجاں مارنیاں شروع کیتیاں۔ آپؐ نے سچے پاسے چہرہ مبارک کر کے آواز دیتی یا معشر الانصار! جواب آیا لیک یا رسول اللہ۔ فیر آپؐ نے کھبے پاسے رخ مبارک کیتا تے آواز دیتی۔ مجاہداں دا جواب آیا ”یا رسول اللہ! اسیں حاضر ہاں۔“ فیر آپؐ سواری توں اُتر پے تے چوکھے جلال نال تے اُچی آواز نال فرمایا:

انا النبى لا کذب، انا ابن عبدالمطلب.

”میں نبی آں، جھوٹ نہیں، میں عبدالمطلب دا پتر ہاں۔“

اوس ویلے رسول خداؐ نال ایسے کو بندے رہ گئے سن کہ اوہناں دے نام اُنکلاں تے گئے جاسکدے نیں۔ جناب ابو بکر صدیق، جناب عمر فاروق، شیر خدا علی المرتضیٰ، عم نبی حضرت عباس، ابوسفیان، اوہناں دے بیٹے جعفر، فضل بن عباس تے اوہناں دے اک بھرا، ربیعہ بن حارث، اسامہ بن زید تے ایمن بن عبید جئے ثابت قدم لوکاں دے نام تواریخ نے چیتے رکھے ہوئے نیں۔

اوس اوکھی گھڑی وچ وی چاچے عباس ہوراں حضورؐ دے فخر دی لگام پھڑی ہوئی سی جد کہ رکاب ابوسفیان ہوراں دے ہتھ وچ سی۔ اوہ آپؐ دے نال کہ ہتھ وچ نگئی تلواریں۔ اللہ جان دا اے میں حضورؐ دے قدماں وچ اپنی جان دا ندرا نہ پیش کرن لئی بے چین ساں تے کافراں نال لڑ رہیا ساں تے حضورؐ میرے ول ویکھ رے سن۔ حضرت عباس نے عرض کیتی کہ یا رسول اللہ! ایہ حضورؐ دا بھرا تے حضورؐ دے چاچے حارث دا پتر اے، ایس تے راضی ہو جاؤ۔ حضورؐ نے فرمایا:

﴿غَفَرَ اللَّهُ لَهُ كُلَّ عَدَاوَةٍ عَادَا نِيهَا﴾

”ایس نے جیہڑی دشمنی تے عداوت میرے نال رکھی اے، اللہ اوس نوں معاف فرمائے۔“

مختصر سیرت الرسول اردو ایڈیشن، جامعہ علوم الاثریہ جہلم، صفحہ: ۵۶۰

مختصر سیرۃ الرسول اردو ایڈیشن، جامعہ علوم الاثریہ جہلم، صفحہ: ۵۶۱

فیر آپؐ نے نظر مبارک میرے ولِ کیتی تے فرمایا اُنھی (اے میرے بھرا)۔ ایہہ سن کے میری خوشی دی کوئی حد نہ رَی تے میں خوشی خوشی رکاب وچ آپؐ دا پیڑ جم لیا۔ ایس محبت نوں ویکھدیاں ہوئیاں حضورؐ نے فرمایا:

”ابوسفیان بن حارث اہل جنت دے جواناں وچوں اے ۷۷۷

حضرت عباس دی آواز وی جناب بلال طرحاں بڑی زور داری۔ آپؐ نے اوہناں نوں حکم دتا کہ مہاجرین تے انصار نوں وِاج دیو۔ جناب عباس نے اُچی اُچی وِاجاں لائیاں:

﴿یا معشر الانصار، یا اصحاب الشجرہ﴾

”اے انصاری مسلمانو، اے درخت والے دوستو۔“ ۷۷۸

بس فیر جتھے جتھے تیکر ایہ آواز اپڑی، مجاہدین اسلام میدان جنگ ولِ پرت گئے۔ جہناں مجاہداں دے گھوڑے افرا تفری تے چھیتی وچ مڑ نہ سکے، اوہناں گھوڑیاں توں چھالاں ماردتیاں تے میدان ولِ دوڑ لادتی۔ یکدم لڑائی دارنگ بدل گیا۔ رسول خدا مسلماناں دا جہادی معرکہ دیکھ رے سن۔ ویکھدیاں ای ویکھدیاں مسلماناں نے کافراں دا کچو مرکڑنا شروع کر دتا۔ سپہ سالار اعظم اُچی آواز نال غازیاں دا حوصلہ ودھا رے سن۔ ”مسلمانو! ہمت نہ ہارنا۔ لڑائی نے زور پکڑ لیا اے۔ اللہ نے اپنے رسول نال نصرت دا جیہڑا وعدہ فرمایا اے، اوہ پورا ہو کے روے گا۔“ فیر آپؐ نے حضرت عباس نوں فرمایا ”کنکریاں دی اک مٹھ میرے ہتھ وچ دیو“ حضرت عباس نے کنکریاں پھرائیاں تے آپؐ نے ”شاہت الوجوہ“ آکھ کے دشمنان ولِ سٹ دتیاں۔ مسلمان بے خوف ہو کے پورے جوش نال اللہ دے دشمنان نال دوہتھ کر رے سن۔ اوہناں نوں اپنے آقا دے ایس فرمان تے پورا یقین سی کہ شہید دی موت ای بہترین موت اے۔ دُجے پاسے ہوازن تے ثقیف دے لشکرنو وی ایس گل دا پورا یقین ہو چکیا سی کہ ہن لڑائی جاری رکھن داسد ہاسدھا مطلب موت اے۔ ایوں اوہناں میدان چھڈ کے دوڑ جان وچ ای اپنی بہتری سمجھی۔ دشمن ایس افراتفری تے ایڈے خوف وچ میدان جنگ وچوں دوڑے کہ اوہناں نوں ایس گل دا وی چیتا نہ رہیا کہ اوہ اپنا مال ڈنگر تے بال بچا وی نال لے کے آئے سن۔ ایوں دشمن ایہہ کجھ میدان وچ چھڈ گئے:

قیدی (مرد، عورتاں تے بچے) چھ ہزار (۶۰۰۰)

اونٹ دو ہزار دوسو (۲۲۰۰)

بکریاں چالی ہزار (۴۰۰۰۰)

چاندی چار لکھ وی ہزار تولہ (۴۲۰۰۰۰)

لشکر کفار وچوں کجھ نے تے اوٹاس دی تھاں تے ساہ لیا تے کجھ طائف ولِ دوڑ گئے۔ مسلماناں نے اوپر لکھیا گیا مال غنیمت جعرانہ دی تھاں تے اکٹھا کیتا تے آپؐ دشمن دا پچھا کر دے ہوئے اوٹاس اپڑ گئے۔

اوطاس دا معرکہ:

مسلماناں دا جیہڑا جتھا اوطاس ول گیا اوس دا سالار ابو عامر الاشعری نوں مقرر کیتا گیا۔ اوطاس وچ بڑھے درید دی ہدایت دے مطابق کافراں نے زوردار مقابلہ کیتا تے ابو عامر نے دی اوطاس دی وادی نوں اُنکلاں، دنداں تھلے لین تے مجبور کر دتا۔ ابو عامر نوں مبارزت (One to one Fight) اک دا اک نال جوڑ) دا چیلنج دیندے ہوئے دس سکے بھرا میدان وچ نکلے تے آپ نے واری واری نو (۹) بھرا ٹھکانے لا دتے۔ ۱۰ ویں نے میدان چھڈ کے دوڑن دی بجائے اسلام قبول کر کے دوواں جہاناں دی زندگی لئی امان حاصل کر لئی۔ فیر جدوں گھسمان مچیا تے جناب ابو عامر وی شہید ہو گئے۔ اوہناں دی شہادت توں بعد پرچم اسلام اوہناں دے چاچے دے پتر ابو موسیٰ اشعری دے ہتھ وچ آیا تے اوہناں نے وی بنو ہوازن نال زوردار جنگ کیتی تے اوہناں نوں اک وار فیر ہار دامنہ ویکھنا پیا۔ اوطاس توں حاصل ہون والا مال غنیمت تے جنگی قیدی وی جحرانہ دے کمپ وچ پہنچا دتے گئے تے رسول خدا دے حکم موجب اوہناں دے لباس تے خوراک دا پورا خیال رکھیا گیا۔

بڑھے ماہر حرب دا نقل:

اوطاس ول پچھا کرن والے مجاہداں وچ حضرت ربیعہ بن رافع دی شامل سن۔ ربیعہ نوں اوہناں دی والدہ دے حوالے نال ابن دغنے وی آکھ دے سن کیوں جے دغنے اک مشہور سوانی سن۔ ربیعہ نے اک اُٹھ دے اُتے اک پلنگ بچا ہویا ویکھیا۔ اوہناں نے سمجھیا کہ ایس اُٹھ تے ہودج دی تھاں تے پلنگ دا مطلب ایہ ہے کہ ایہدے تے کسے رئیس دی کوئی سوانی ہووے گی تے ایس دی گرفتاری نال ضرور چوکھا مال غنیمت ہتھ آوے گا۔ آپ نے اگے ودھ کے اُٹھ نوں تھلے بٹھایا تے پلنگ تے ہڈیاں دا ڈھانچہ اک بڑھا نظر آیا۔

”ہاں بئی، کیہ گل اے؟ اُٹھ نوں کیوں بٹھایا ای؟“ بڑھے درید نے پچھیا۔

”تینوں قتل کرن لئی“

”پر تُوں ہیں کون؟“

”میں ربیعہ ہاں، ربیعہ بن رافع، دغنے دا پتر“ ایس دے نال ای آپ نے تلوار دا وار کیتا۔ پراوہ خالی گیا۔

”ربیعہ! دغنے نے تینوں ناکارہ تلوار دے کے بھینچیلے تے نالے اوس نے تینوں سپاہ گری دافن وی نہیں سکھایا۔

ایہ میری تلوار پھڑ کے کجاوے دے پچھوں ہڈیاں ولوں دماغ ول وار کر۔ میں ایسے طرحاں بہادراں نوں قتل کردار ہیاں، تے نالے سن لے کہ گھر جا کے ماں نوں دس دیویں کہ توں اوس درید بن صمد نوں قتل کیتا اے جیہڑا تہاڈیاں عورتاں نوں دشمنان توں بچاندا رہیا اے۔“

ربیعہ نے درید دی تلوار نال ای اوس نوں قتل کر دتا پر درید دے آکھن موجب گھر آ کے سارا واقعہ اپنی والدہ نوں سنا

دتا۔ اوہناں نے ساری گل دھیان نال سنی تے آکھیا کہ ”ربیعہ، بڑا ظلم کیتا ای۔ دُرید دا تہاڈے خاندان تے ایہ احسان کہ اوس نے تیری ماں، دادی تے نانی نوں دشمنان توں بچایا سی تے توں اوس نوں قتل کر دتا اے۔“

طائف دامحاصرہ:

اوطاس دے مجاہد واپس پرت آئے تے آپؐ نے طائف ول دھیان کیتا، کیوں جے جنگ دامدھ بن والا بند مالک بن عوف اوتھے جاکلیا سی۔ طائف اک اچھا شہر سی جہدے چاروں پاسے جنگی پکی فصیل بنی ہوئی سی۔ اوس فصیل دیاں کندھاں دوہریاں سن تے اوہناں دی چنائی ایوں دی سی کہ اوہناں نوں ڈھا دینا کوئی سوکھا کم نہیں سی۔ طائف والیاں نے جدوں دیکھیا کہ اسلامی لشکر طائف تے حملہ کر سکدا اے تے اوہناں شہر دی فصیل دے سارے گیٹ اکا مکا بند کردتے، تے ایوں کسے حملہ آور دا شہر وچ وڑنا ناممکن بنا دتا۔

سپہ سالار اعظمؑ نے حضرت خالد بن ولید دی سالاری وچ اک ہزار مجاہداں دا لشکر طائف ول ٹور دتا سی تاں جے بنو ثقیف نوں گل بات کرن تے مجبور کیتا جاوے۔ جناب خالد نے ایس چیز دی کوشش وی کیتی پر اہل طائف کسے وی طرحاں مذاکرات لئی تیار نہیں سن۔ ایوں جناب خالد، رسول خدا دی اڈیک وچ طائف توں کجھ پندھ تے ڈیرے لا کے بیٹھ گئے۔ رسول خداؐ وی کجھ ضروری کاروائیاں توں بعد طائف اپڑ گئے۔

جدوں خالد بن ولید نوں طائف ول جان دا حکم دتا اوہدوں ای رسول خداؐ نے جناب طفیل بن عمرو دوسی نوں حکم دتا کہ اوہ ذوالکفین دابت توڑن لئی نکل جان تے اوتھوں ویہلے ہو کے سدھے طائف اپڑ جان۔ حضرت طفیل نے رسول اللہ دی ہدایت موجب بت توڑ دتا تے فیر اپنے قبیلے دے چار سو بندیاں نوں نال لے کے طائف اپڑ گئے۔ ایس قبیلے دے بندے اوس دور دے بگڑے جنگی ہتھیار دبابہ تے منجیق نوں ورتن دافن جان دے سن تے طائف دی دفاعی حیثیت توں وی واقف سن، ایس لئی جناب طفیل اپنے نال دبابہ تے منجیق وی لے گئے۔

جناب رسول اللہ دے طائف اپڑن دے نال ای جناب طفیل وی اوتھے اپڑ گئے تے حضورؐ نے طائف دے لیے نام دے قلعے تے حملہ کرن دا حکم دے دتا جتھے مالک بن عوف پناہ لئی بیٹھاسی۔ اے مسلماناں نوں کجھ ای کامیابی ہوئی سی کہ بنو ثقیف نے قلعے دی اک کندھ تے کھلو کے مسلماناں تے تیراں دابینہ پا دتا جہدے نال ۱۸ مسلمان شہید ہو گئے۔ ایس تے رسول خداؐ نے کسے نوں جنگی چال دا سوچنا شروع کر دتا، جہناں وچ اک ایہہ سی کہ بنو قریظہ تے یہود خیبر وانگ ایوں دا محاصرہ کیتا جاوے کہ طائف والے وی رسد دی قلت توں گھبرا کے شہر حوالے کرن تے مجبور ہو جان، یاں جے اوہ مقابلہ کرن لئی شہر توں باہر نکل آؤن تے مسلمان اپنی وڈی فوج نال بنو ثقیف نوں شکست دین وچ کامیاب ہو جان گے۔ ایوں دیاں تجویزاں تے غور شروع ہو گیا تے نال ای اسلامی فوج نے تیراں دی زد توں دور ہو کے نویں تھاں تے ڈیرے لالے۔

ایس تھاں توں منجیق تے دبابہ نوں ورتن دا فیصلہ کیتا گیا۔ جناب طفیل بن عمرو دوسی دے قبیلے توں وکھ حضرت سلمان فارسی نے وی کجھ مشورے دتے۔ جناب سلمان فارسی دے مشورے تے ہی جنگ خندق دے موقع تے مدینہ طیبہ دے آل دوالے خندق کھودی گئی سی۔ ایوں مسلماناں نے منجیق نال فصیل دیاں کندھاں تے سنگ باری کیتی پر اوس وچ کوئی شگاف نہ پے سکیا۔ فیر مسلمان دبابیاں تے بیٹھ کے فصیل دے نیڑے اپڑے تاں جے اندر جان لئی کوئی رستہ بنا سکے پر اہل طائف نے لوہے دیاں سلاخاں اک وچ تیز گرم کر کے دبابیاں تے سٹیاں تے اوہناں دیاں چھتاں ساڑ دتیاں۔

جدوں چھتاں سڑگئیاں تے اوہناں نے تیر مارنے شروع کر دتے۔ مسلمان واپس اپنے کیمپ ول پرت گئے تے ایوں ایہہ حربہ وی ناکام ہو گیا۔

محاصرہ ختم ہوندا اے:

طائف دے محاصرے نوں تقریباً تین ہفتے ہو گئے سن تے اوہناں ۲۰/۲۱ دناں وچ سوائے مجاہداں دے زخماں، تے شہادتیاں توں کچھ حاصل نہ ہوئیا۔ اوس دن رسول خدا نے جناب نوفل بن معاویہ نال مشورا کرنا مناسب سمجھیا تے پچھیا کہ ہن کیہ کرنا چاہیدا اے؟ اوہناں نے جواب دتا کہ یا رسول اللہ! لومڑی بھٹ وچ وڑ گئی اے، جے چاہو تے پھر لوؤ پر جے چھڈ دیو تے گے تے فیروی ایہ ہن وگاڑ کچھ نہیں سکدی۔ رسول خدا نے آپوں دی چوکی سوچ وچا ریکیتی تے اخیر محاصرہ ختم کرن دا فیصلہ کر لیا۔

محاصرہ ختم کرن دے کچھ ہور وی سبب سن، جیہڑے ایہ سن:

- ۱۔ طائف دے قلعے بڑے پکے پیڑے بنے ہوئے سن تے اوہناں وچ کھان پین دا سامان وی وافر موجود سی۔
- ۲۔ لشکر اسلام نوں مدینے توں نکلیاں دو مہینے توں زیادہ دن ہو گئے سن۔ مسلماناں وچ کدے کدے واپسی دی خواہش محسوس کیتی جا رہی سی۔
- ۳۔ ذی قعدہ مہینا سر تے آ گیا سی جیہڑا حرمت دا مہینا سی تے اوس وچ جنگ جائز نہیں سی۔
- ۴۔ بنو ثقیف تیکر اسلام دی روشنی اپڑ گئی سی تے اوہناں دا مسلمان ہو جانا اوہناں دے قتل توں بہتر سی، جو یں کہ بعد دے حالات توں پتہ وی لگ گیا کہ مالک بن عوف آپوں ای مسلمان ہو گیا۔

حنین تے طائف دے شہید:

ایس موضوع تے جنی وی گل کہتی جاوے اخیر اتھے ای مکدی اے کہ ایس معرکے دے شہیداں دی صحیح تعداد دا کچھ پتہ نہیں۔ اک پاسے تے کچھ بزرگاں نے تین یاں چار حنین وچ تے ۱۸/۲۰ طائف وچ دسے نیں تے دُجے پاسے محمد حسین ہیکل جے جید سیرت لکھیا رنے لکھیا اے کہ مسلماناں دے دو قبیلے یاں تے بلکل ختم ہو گئے تے یاں اوہناں وچوں چند حضرات ای باقی رہ گئے۔

مخنث تے مسلمان سوانیاں:

فتح مکہ دے معرکے وچ امہات المؤمنین وچوں جناب اُم سلمہ تے جناب زینب بنت جحش وی شامل سن۔ طائف دے محاصرے دے ویلے دوواں پییاں لئی لال رنگ دے چمڑے دے دو دکھو دکھ خیمے نصب کیتے گئے۔ او تھے اک مخنث خادم داوی آنا جانا سی۔ اک دن رسول خدا نے ویکھیا کہ اوہ عبداللہ بن ابی اُمیہ یاں حضرت خالد بن ولید نوں آکھ رہیا سی کہ جے کل طائف فتح ہو گیا تے بادیہ بنت غیلان تیرے ہتھوں نہ نکل جائے۔ اوہ جدوں سامنے آؤندی اے تے اوس دے پیٹ تے چار سلوٹاں ہوندیاں نیں تے جے کنڈ کر کے ٹرے تے پچھے اٹھ سلوٹاں دکھالی دیندیاں نیں۔ رسول اللہ نے ایہ سن کے فرمایا کہ میں نہیں سمجھدا سی کہ اوس نوں ایہناں گلاں دا پتا اے۔ فیر آپ نے پییاں نوں حکم دتا کہ اوہ مخنث تہاڑے کول نہ

آئے تے اوس مخنٹ نوں وی ازواج مطہرات کول جان توں روک دتا۔

رسول خدا دے ایس فیصلے توں پتا لگدا اے کہ ساڈے اج دے معاشرے وچ ایہ نچی صنف جویں مسلمان سوانیاں دے نال جڑ جڑ کے بیٹھی ہوندی اے، ایہ کسے وی طرحاں قابل معافی فعل نہیں۔ جدوں کسے مخنٹ نوں کسے عورت دے وچ جنسی جاذبیت نظر آؤندی اے، تے فیر اوس کولوں سوانیاں نوں اوویں ای دور رہنا چاہیدا اے، جویں کسے دوسرے غیر محرم مرد توں۔

اموال غنیمت دی ونڈ:

طائف دما حاصرہ ختم کرن توں بعد جبہ اکم رسول خدا دی سب توں زیادہ توجہ منگدا اسی اوہ جعراندہ دے کمپ وچ پیا مال غنیمت تے قیدی سن، ایس لئی رسول خدا سدھے جعراندہ گئے تے او تھے خمس (رسول خدا دا اپنا حصہ) دکھ کر کے باقی مال تے جنگی قیدی اسلامی لشکر وچ ونڈ دتے۔

سورہ توبہ دی آیت نمبر ۶۰ وچ اللہ نے مولفۃ القلوب لئی مال خرچ کرن دی اجازت دتی اے، ایس لئی نویں مسلماناں دے دلاں دی تالیف لئی رسول خدا نے کھلے دل مال ونڈیا، ایوں ونڈیا کہ ابوسفیان، نصیر بن حارث، صفوان بن امیہ تے سہیل بن عمرو ورگے بندے خوش ہو گئے۔ عام تقسیم ایس طرحاں ہوئی کہ ہر پیادہ مجاہد دے حصے چار ۴ اونٹ تے چالی (۴۰) بکریاں تے ہر سوار دے حصے بارہ اونٹ تے ۱۲۰ بکریاں آئیاں۔

اہل مکہ، تے نو مسلماناں تے ایہ عنایت ویکھ کے مدینے توں ٹرن والے مجاہد تے خاص طور تے انصاری مسلماناں پریشان ہو گئے کیوں جے ہزاراں دے حساب نال اونٹ تے بکریاں سکے دے اوہناں چوہدریاں نوں دے دتے گئے، جبہ دے اجے ہن ای مسلمان ہوئے سن۔ اوہناں دے کچھ نوجواناں دی زبان توں ایہ گل وی نکل گئی کہ ”رسول خدا نے اپنے قبیلے دی کوں پاس داری کیتی اے۔“ جدں ایوں دیاں گلاں رسول خدا تیکر اپڑیاں تے آپ نے اک اٹھ دی کوہان توں کچھ وال پٹے تے لشکر اسلام نوں مخاطب کر کے آکھیا کہ ”بخدا مینوں تہاڈے مالاں وچوں اونٹ دے ایہناں والاں جنا دی طمع نہیں۔ رہیا میرے حصے دا خمس تے اخیر ایہ وی تہاڈے لوکاں وچ ای تقسیم کر دتا جاندا اے۔“ فیر آپ نے انصار نوں مخاطب کر کے پچھیا کہ کیہ سچ مچ اوہناں نے شکوہ کیتا اے؟ جدوں انصار نے ایس شکوے دی تصدیق کر دتی تے آپ نے فرمایا: ”اے انصاری سجنو! ایہ تساں کوں دی گل کر دتی اے؟ دلاں وچ کوئی گنڈھ تے نہیں پے گئی؟ کیہ تسیں بھل گئے او کہ تسیں گمراہ سی تے میری وجہ توں اللہ نے تہانوں ہدایت عطا کیتی، میرے ای صدقے اللہ نے تہاڈی مفلسی دور کیتی، تسیں اک دُجے دے لہو دے پیا سے سی، اللہ نے میرے راہیں تہاڈے وچ اتفاق پیدا کیتا تے اک دُجے دا ہمدرد بنا دتا۔“

رسول خدا خطاب فرماندے جا رہے سن تے انصار آکھدے جا رہے سن کہ ہنا شبہ خدا تے اوس دے رسول دا احسان سب توں وڈھا احسان اے۔ ایہ سن کے آپ نے ارشاد فرمایا کہ ”بخدا تسیں ایہ وی آکھ سکدے او کہ اے محمد! جدوں لوکاں تہانوں جھٹلایا تے اسیں تہاڈی تصدیق کیتی، ہو راں تے تہانوں ستایا تے اسیں تہاڈی حمایت کیتی۔ تہاڈے ہم وطنان نے

تہانوں دیس نکالا دتا تے اسیں تہاڈے لئی اپنے بوہے کھول دتے۔ تسیں بے یارو مددگار آئے سی تے اساں اپنیاں اکھاں تہاڈے پیراں تھلے وچھا دتیاں۔“

”انصار دے بیلو! جیہڑی چیزیں دجیاں نوں دے رہیا ہاں، دنیا دی معمولی جی دولت اے، اوہ وی ایس لئی کہ ایہ لوک اسلام تے پکے ہو جان پر جیہڑی دولت تہاڈے کول اے، یعنی اسلام دی دولت، کیہ ایہ دوویں برابر نیں؟ انصار یو! ایہ دسو کہ تہانوں ایہ گل پسند نہیں کہ دُجے لوگ ایتھوں پرتن تے اونٹ تے بکریاں لے کے جان تے تسیں اپنے گھراں ول جاؤ تے نال خدادے رسول نوں لے کے جاؤ؟ قسم اوس ذات دی جہدے تھ وچ محمد دی جان اے جے مہاجر ہوں دا اپنا ثواب نہ ہونداتے میں اپنے آپ نوں انصار ای اکھواندا۔ سن لوؤ، جے باقی ساری دنیا اک پاسے ٹر پوے تے کلے انصار اک پاسے، تے میں انصار نال ٹرنا ای پسند کراں گا۔“

رسول خدادی، دلاں نوں پگھلا دین والی، ایس تقریر دا اثر ایسی کہ انصار، سارے دے سارے، زارو قطار روئے سن تے بچھتا رے سن کہ اوہ کیہ گل مونہوں کڈ بیٹھے سن! بن تے اوہ پکاراں پارے سن کہ یا رسول اللہ! اسیں تہاڈے تے راضی، اسیں تہاڈی ونڈ تے راضی، اسیں اوس دولت تے راضی ہاں جیہڑی محبوب خدادی من ٹھار صورت وچ سانوں ملی اے۔ بنو ہوازن دے قیدی:

چھ ذکر کیتے گئے مال غنیمت وچ بنو ہوازن دے قیدی مرد، عورتاں تے بچے وی شامل سن تے اوہ وی لشکر اسلام وچ تقسیم کر دتے گئے سن۔ ایس تقسیم توں بعد بنو ہوازن دی اک معزز سفارت حضور دی خدمت وچ آئی تے قیدیاں دی رھائی دی درخواست کیتی۔ سفارتی جتھے دے آگوز ہیر بن مرد نے کھڑے ہو کے اک تقریر کیتی تے آکھیا کہ ”رسول خدادی رضاع والدہ حلیمہ ایسے قبیلے وچوں سن۔ فیر حضور نوں مخاطب کر کے آکھن لگا کہ ایہناں چھپراں دے پیٹھاں جیہڑیاں سوانیاں قیدی بن کے پیٹھیاں نیں اوہناں وچ تہاڈیاں پھوپھیاں تے ماسیاں وی نیں۔ خدادی قسم اے جے عرب دے شمشہا ہواں وچوں کسے نے ساڈے خاندان دا دڈھ پیتا ہونداتے فیر اوہ ساڈے اُتے غالب آجاندا، تے اسیں اوہناں نوں اپنیاں سوانیاں پرتان دا آکھدے تے ایہ نہیں ہوسکدا اسی کہ اوہ ساڈی التجا نوں رد کر دیندا، تے تہاڈے کولوں تے سانوں اوہناں توں وی چنگیاں امیداں نیں۔“

ایس کے آپ نے ارشاد فرمایا کہ نفس تے خاندان عبدالمطلب دا حصہ میں آزاد کیتا۔ پر عام رھائی لئی ضروری اے کہ سارے مسلماناں نوں اعتماد وچ لیا جاوے۔ آپ نے زہیر نوں ہدایت کیتی کہ اوہ نماز توں بعد سارے مسلماناں اگے آپوں درخواست کرے۔ اوس نے ایوں ای کیتا تے نماز ظہر توں بعد قیدیاں دی رھائی دی اپیل کیتی۔ اوس دی اپیل دے نال نال رسول خدا نے سفارش وی کر دتی تے ایوں سارے چھ ہزار قیدی ایس گل تے آزاد ہو گئے کہ آقا نے اپنے بچپن دے دن اوہناں وچ گزارے سن تے نالے مائی حلیمہ داتعلق وی اوس قبیلے نال سی۔ سیدہ شیماء:

ہوازن دے قیدیاں وچ مائی حلیمہ دی دھی تے نبی رحمت دی رضاعی بھین سیدہ شیماء وی شامل سن۔ جدوں اوہناں

نوں جنگی قیدی بنا کے لیا یا جا رہی تھی، جس تے حضرت شیما نے آکھیا:

﴿تَعْلَمُو وَاللّٰهُ اَنّٰی لَا خَت صَا حَبْکُمْ مِّن الرِّضَاعَةِ﴾

”(ادب دا خیال رکھو تے) جان لوؤ کہ میں تہاڑے صاحب دی رضاعی بھین ہاں۔“

مجاہداں نوں ایس گل داتے پتہ سی کہ آقائے اپنی رضاعت دے دیہاڑے بنو ہوازن وچ مائی حلیمہ دے گھر گزارے ہوئے نیں پر ایہ یقین نہیں سی کہ جیہڑی بی بی آقادی رضائی بہن ہون دی دعویدار اے اوہ سچ مچ شیما ہی اے، ایس لئی اوہ اوہناں نوں لے کے آپ دی خدمت وچ حاضر ہو گئے۔

”بھرا جی! مینوں پچھاتا ہے؟“ سیدہ شیما نے پچھیا۔

”نہیں! کون جے تسیں؟“

”میں شیما ہاں۔ شیما بنت حلیمہ، حارث بن عبدالعزیٰ دی دھی۔“

”سچ؟“

”آکھو تے اوس دندی دان نشان وکھاواں جیہڑی تساں مینوں نکلے ہونداں وڈی سی؟“

ایہ سن کے رحمت دو جہاں نبیؐ نوں اپنے بچپنے دا اک اک دن یاد آ گیا کہ اوہ کویں ماں جی حلیمہ کول کھڈ دے ہوندے سن، شیما کویں اوہناں دا دھیان رکھدی سی تے کس طرحاں بکریاں دے پچھے نسدے ہوندے سن۔ آپ نے اوسے ویلے اپنی ردائے پاک ہمشیرہ واسطے زمین تے وچھا دتی، اوہناں نال مٹھیاں مٹھیاں گلاں کیتیاں، بچپنے دیاں سونہیاں گھڑیاں یاد کیتیاں تے بہن ہوراں نوں آکھیا کہ باجی! میرا گھروں تہاڑا ای گھراے، دل کر دا جے تے میرے کول رہو تے دل کر دا جے تے اپنے قبیلے نال واپس پرت جاؤ۔ سیدہ شیما نے واپس جان دی اجازت منگی تے رسول رحمت نے ڈھیر سارے تحفے تحائف دے کے چوکی تعظیم نال سیدہ نوں رخصت فرمایا۔ سیدہ شیما اوسے دن مسلمان ہو گئیاں ﴿﴾

بھرانہ وچ مال غنیمت وٹن توں بعد آپؐ عمرہ کرن لئی مکہ ول تشریف لے گئے۔ عمرہ کر کے جناب عتاب بن اُسید نوں مکہ دا گورنر مقرر کیتا۔ جناب معاذ بن جبل نوں معلم دین بنا کے مکہ وچ ٹھہرن دا حکم دتا تے آپ مدینہ منورہ واپس تشریف لے گئے۔ مدینہ تشریف آوری نال انصار مدینہ دا ایہہ وسوسہ مک گیا کہ پتہ نہیں ایس شمع دی لوہن مدینے دیاں گلیاں نوں روشن کرے گی یا نہیں۔ ہن جدوں اوہناں اپنے آقا نوں اپنے شہر وچ فیر ویکھ لیا تے اوہناں نوں یقین ہو گیا کہ فتح مکہ دا مطلب ایہ بالکل نہیں کہ آپؐ نے ہن مکہ وچ ای وٹوں کرنی اے تے شہر ہجرت چھڈ دینا اے۔

* * * *

۸ھ دے کچھ ہو ر واقعات

۸ھ وچ حضرت ماریہ قبطیہ دے بطن وچوں رسول خدا a دا اک بیٹا پیدا ہوئیا۔ رسول خداؐ نے اپنے جدا مجد دے نام تے پتر دا نام ابراہیم رکھیا۔ سیدنا ابراہیم ۱۷/۱۸ مہینے زندہ رے تے فیر اللہ نوں پیارے ہو گئے۔ رسول خداؐ دی صا جزادی سیدہ زینب ہجرت مدینہ دے ویلے زخمی ہو کے بیمار ہوئیاں سن تے فیر اوس توں بعد کدے وی پوری طرحاں صحت و ند نہ ہو سکیاں۔ ایس سال اوہ اللہ نوں پیاری ہو گئیاں۔ سورہ المائدہ دی اوہ آیت جہدے وچ چور تے چورنی دے ہتھ کٹن دی سزا دتی گئی اے، اوہ ایسے سال نازل ہوئی۔ ایوں چوری کرن تے قطعید دی سزا لاگو ہو گئی۔

ایلاء و تخیر:

سیرت النبیؐ دا ایہ موضوع چوکھا اختلافی جیا اے تے بہت سارے سیرت لکھیا راں نے ایس تے قلم چکنا ای مناسب نہیں سمجھیا، تاں جے اوہناں تے کوئی وڈی ذمہ واری نہ آپوے۔ ایس فقیر دی رائے موجب کسے دی کھوج کار دی نیک نیتی تے دیانت دا پتا اچھے موضوعاں توں ای لگدا اے کیوں جے پرکھ پڑچول دیاں جیہڑیاں اوکڑاں نال کسے محقق نوں واسطہ پیندا اے اوہ اتھتھے ٹہسی تے چڑھیاں دسدیاں نیں۔ ایلاء تے تخیر دا واقعہ کیسی، ایہ جانن توں پہلاں ضروری اے کہ اسیں ایلاء تے تخیر دا مطلب سمجھ لوئے۔

ایلاء، فقہ تے حدیث دی اصطلاح وچ خاوند تے بیوی دی اوس علیحدگی نوں آکھدے نیں جیہڑی بغیر طلاق توں ہووے۔ مثال دے طور تے کسے سوانی دا گھر والا ایہ گل قسم کھا کے آکھ دیوے کہ میں اپنی سوانی دے نیڑے نہیں جاواں گا یاں ایہ آکھ دیوے کہ لے نئی گھر والیے! مینوں اللہ دی قسم ای جے میں پورا مہینہ تیرے نیڑے وی لگاں تے! میاں بیوی دے ایوں وکھ ہو جان دے ایس طریقے یاں مسئلے دا اللہ نے قرآن پاک وچ ذکر کر کے اک راہنما اصول دے دتا اے۔ ارشاد اے:

﴿لِّلَّذِينَ يُؤَلُّونَ مِنْ نِّسَائِهِمْ تَرَبُّصُ أَرْبَعَةِ أَشْهُرٍ فَإِنْ فَاءَ فَإِنَّ اللَّهَ غَفُورٌ رَحِيمٌ﴾ (سورۃ بقرہ: ۲۲۶)

”جیہڑے لوکی اپنیاں بیویاں کول نہ جان دی قسم کھا پٹھن، اوہناں لئی چار مہینے دی مہلت اے۔ فیر جے اوہ

(بیویاں ول) پرت آؤن تے اللہ بخشن والا تے مہربان اے۔

اللہ نے بڑے ای نثرے ہوئے لفظاں وچ ایہ گل آکھ دتی اے کہ ایس حرکت وچ چار مہینے دی مہلت اے، جے ایس مہلت وچ بیوی ول پرت جاؤ تے اللہ دی مہربانی تہاڈے نال اے۔ تے سن لوؤ کہ دُجی صورت وچ طلاق جے۔ فقیہ

بزرگاں وچ ایس گل تے اختلاف نظر آؤندا اے کہ چار مہینے توں بعد وی طلاق ہوندی اے کہ نہیں، تے جے ہو جاندی اے تے اوہ طلاق رجعی اے یا طلاق بائنہ اے۔ ایس اختلاف دی کوئی وجہ نظر نہیں آؤندی کیوں جے اللہ نے صرف ایہ آکھیا اے کہ جے تسیں مہلت توں فیدہ نہیں چکدے تے ایس دا مطلب اے کہ تہاڈا ارادہ طلاق دا اے تے بس فیہ طلاق ہو جاوے گی۔ تجی کسے مرضی (Option) دا اللہ نے ذکر ای نہیں کیتا۔ حضرت عمر، حضرت عثمان، حضرت علی، حضرت ابن مسعود، ابن عباس، ابن عمر تے زید بن ثابت وی ایہی خیال رکھدے نیں۔ ایہ گل ایس لئی وی درست تے جائز جا پدی اے کہ اپنی عورت نوں اک اجہی مدت لئی لٹکائی رکھنا جہدی کوئی حد ای نہیں، انصاف تے فطرت دے تقاضیاں دے بلکل خلاف اے، تے اللہ کسے غیر فطری کم دی اجازت نہیں دیندا۔

خاوند تے بیوی دی دوری دی زیادہ توں زیادہ چار مہینے دی مدت والی گل بعد دے اک واقعہ توں وی ثابت ہوندی اے۔ ایس طرحاں کہ جناب عمر فاروق اپنے دور خلافت وچ راتاں نوں مدینے دیاں گلیاں وچ گشت کر دے رہندے سن تاں جے حال حالات دیاں خبراں ملدیاں رہن۔ اک راتیں ایوں ہوئیا کہ اک سوانی سفر تے گئے اپنے خاوند دی یاد وچ شعر پڑھ ری سی کہ ”افسوس ایہناں کالیاں لمیاں راتاں وچ میرا خاوند میرے کول نہیں، جہدے نال میں ہساں کھڈاں۔ خدا دی قسم اے جے مینوں خدا دا ڈرنہ ہوندا تے ایس ویلے ایس پلنگ دے پاوے حرکت وچ ہوندے۔“ ایہ سن کے خلیفہ عمر فاروق اپنی جہی ام المؤمنین حفصہ کول گئے تے آکھیا کہ حفصہ! ایہ دس کہ کوئی سوانی اپنے خاوند دی جدائی تے کئی دیر صبر کر سکدی اے۔ حضرت حفصہ نے جواب دتا کہ چار مہینے یاں چوکھے توں چوکھے چھ مہینے۔ جناب فاروق نے فرمایا کہ بس ہن میں حکم جاری کر رہیا ہاں کہ کوئی مجاہد ایس توں زیادہ دیر سفر وچ نہ رہوے۔

ایلاء تے ایس مڈھلی گل توں بعد اسیں تخییر تے گل کر دے ہاں۔ ایلاء دے اُلٹ تخییر دا تعلق عام مسلماناں نال نہیں سگوں ایس دا تعلق رسول خدا دی پاک حیاتی دے اک خاص واقعے نال اے جہدے نتیجے تے اللہ نے امہات المؤمنین نوں ایہ اختیار دتا سی کہ جے چاہو تے رسول خدا دی زوجیت وچ رہ کے دنیاوی بد حالی دیاں اوکڑاں جردیاں رہو تے چاہو تے رسول خدا تہاں نوں اچھے طریقے نال رخصت کر دین یعنی طلاق دے نال کچھ دے لے کے فارغ کر دین۔

رسول خدا دا اک مہینے لئی بیویاں کول نہ جان دی قسم کھان دا واقعہ، تے بیویاں نوں اُپر دتے گئے اختیار دا واقعہ اکوای دور وچ ہوئیا، ایس لئی اسلامی تواریخ نے ایس نوں ایلاء و تخییر دے اک ای ناں نال چیتے رکھیا ہوئیا اے۔ ہن اسیں ایس واقعہ یاں واقعات دی تفصیل وچ جان دے ہاں۔

ہو یا ایہہ کہ سیدہ زینب بنت رسول اللہ ہبار بن اسود دی حرکت ۱۱ دے نتیجے تے مدینے ول ہجرت کر دیاں زخمی ہو گئیاں تے اخیر او سے صدمے دی وجہ توں آپ ہن چلانا کر گئیاں۔ ایس توں پہلاں سیدہ ام کلثوم تے سیدہ رقیہ وی رحلت فرما چکیاں سن تے ہن سارے دھیاں پتراں وچوں کئے سیدہ فاطمہ ہی حیات سن۔ سیدہ زینب دی موت دے ایس دُکھ نے

۱۱ تفسیر ابن کثیر، سورۃ بقرہ آیت: ۲۲۶

۱۲ جہار نے اُٹھ نوں دوڑا کے سیدہ نوں تھلے ڈگ دتا سی تے اوہ دے نال آپ داخل ضائع ہو گیا سی۔

رسول خداؐ نوں ساری اولاد دے دکھ یاد کرا دے۔ سیدہ زینبؓ نے ہجرت دے سفر وچ جیہڑیاں اوکڑاں برداشت کیتیاں، محبوب خداؐ کدے اوہناں دا ذکر فرماندے، کدے اوہناں دی دینداری تے پرہیزگاری دیاں گلاں چھیڑ دیندے، کدے اوس بیماری دی شدت دا ذکر کر دے جیہڑی اُٹھ توں ڈگن تے حمل ضائع ہون دے نتیجے تے شروع ہوئی تے اخیر اوہناں دی موت دا سبب بنی۔ ایہ گلاں کر دے کر دے رسول خداؐ بڑے دکھی ہو جاندے تے اکھاں وچوں تھرواں دی برسات شروع ہو جاندی۔

سیدنا ابراہیمؑ دی پیدائش:

فیر اللہ نوں ایہ منظور ہوئیا کہ رسول خداؐ نوں جناب ماریہ قبطیہ دے بطن وچوں اللہ نے پتر عطا کیتا۔ آپؐ نے اپنے جد امجد دی نسبت نال اوس دا نام ابراہیم رکھیا۔ ابراہیمؑ اپنی سرخ سپید تے گنگھریالے والاں والی چوکھی خوبصورت قبطیہ ماں طرحاں تے سوہنے کھڑے والے والد طرحاں چوکھا ای سوہنا بال سی۔ اللہ نے دیر بعد اک ذاتی خوشی دتی سی۔ آپؐ اوس نوں چکی پھر دے تے ویکھ ویکھ کے خوش ہوندے رے۔ ایس موقع تے پڑھنہاراں نوں ایہ گل چیتے رکھنی پوے گی کہ اوس ویلے رسول خداؐ دی اولاد وچوں صرف سیدہ فاطمہؓ زندہ سن۔ آپؐ دی حیات مبارکہ ۶۰ تے اپڑ چکی سی تے جناب خدیجہؓ توں بعد آپؐ دی کسے بیوی وچوں کوئی اولاد نہیں سی، جناب عائشہؓ، جناب حفصہؓ تے جناب زینب بنت جحشؓ جیہڑیاں نو جوان بیویاں وچوں وی نہیں۔ اندازا کر لو کہ جناب ماریہ دے بطن وچوں پتر دے جنم تے احترام جوگ امہات المؤمنینؓ دا حسد نال کیہ حال ہو یا ہووے گا۔ اک دیہاڑے تے ایہ توں تیکر گل ٹر گئی کہ رسول خداؐ نے سیدنا ابراہیمؑ نوں لچھڑ چک کے، اوہدے کھڑے ول ویکھ دیاں فرمایا کہ ”عائشہ! ویکھ ساڈے بیو پتر دا مہاندرا کتاں رلدا اے۔؟“ جناب عائشہؓ نے ابراہیمؑ ول ویکھ کے آکھیا کہ ”میںوں تے تہاڑے، تے ابراہیمؑ وچ چوکھا فرق دسدا پیا اے۔“ اُم المؤمنینؓ نے جدوں ایہ ویکھیا کہ آپؐ ابراہیمؑ دیاں تعریفاں کیتی جان دے نیں تے ایہ وی آکھ دتا کہ ”ایڈی کیہڑی گل اے ابراہیمؑ وچ، بالاں ورگا ای بال اے۔“

عزیز پڑھنہارو! ایلاء تے تجھیر دے معاملے نوں چنگی طرحاں سمجھن لئی اوپر دسیاں گئیاں اوہ گلاں اک واری فیر پڑھ لوو جیہڑیاں اُم المؤمنین حضرت عائشہ صدیقہؓ نے اک سوکن دی حیثیت نال کیتیاں۔

شہد تے مغایر دی بو:

واقعات دی ایس پوٹلی دے وچ اک ایہ واقعہ وی لکھدا اے:

رسول خداؐ دی ایہ عادت مبارکہ سی کہ آپؐ ڈیگر پڑھن توں بعد تھوڑی تھوڑی دیر لئی اپنی ازواج کول تشریف رکھ دے سن۔ اوہناں دناں وچ آپؐ حضرت زینب بنت جحشؓ دے حجرے وچ کجھ زیادہ دیر پٹھن لگ پے جہدی وجہ ایہہ سی کہ جناب زینبؓ کول کدھروں چنگی قسم دا کجھ شہد آئیا۔ نبیؐ نوں شہد بڑا پسند سی، ایس لئی جناب زینبؓ روز ڈیگر توں بعد آپؐ نوں شہد پیش کرن لگ پئیاں۔ بس ایہ شہد تناول فرماندیاں آپؐ نوں کجھ دیر ہو جاندی سی۔ جناب عائشہؓ نے ایہ قیاس کیتا کہ

جناب زینب نے رسول خدا دی شہد دی پسند دا فیدہ اٹھایا اے تے آپ نوں زیادہ دیر بٹھان لئی خاص طور تے کدھروں شہد منگوایا اے۔ بس ایس دے توڑ دی کوئی تدبیر کرنی چاہیدی اے۔

اُم المؤمنین عائشہ صدیقہ نے حضرت حفصہ دے نال رل کے ایہ صلاح کیتی کہ جدوں رسول خدا ساڈے ول آؤن گے تے اسیں اوہناں نوں آکھاں گئیاں کہ یا رسول اللہ! تہاڈے مونہہ وچوں مغافیر دی بو آری اے۔ مغافیر عربستان دا اک پھل دار بوٹا اے جہدے توں شہد دیاں کھیاں رس چوس دیاں نیں پر اوس دی بو اچھی نہیں لگدی۔ فیر حضرت حفصہ نے ایوں ای آکھ دتا۔

”پر میں تے مغافیر نہیں کھایا۔“ رسول خدا نے جواب دتا۔

ایس توں بعد آپ جناب عائشہ ول تشریف لے گئے۔ اوہناں وی پروگرام دے مطابق اوہی گل آکھی تے ایوں ای باقی ازواج نے وی آکھ دتا۔ رسول خدا لئی ایگل چوکی تکلیف جوگ سی کہ کوئی بندا کوئی اہیہ کم کرے جہدے توں دُجے نوں کراہت ہوئے، تے منہ دی بوتے کسے وی طرحاں آپ نوں گوارا نہیں سی۔ جدوں سب بیبیاں نے ایس بودا ذکر کیتا تے آپ نے قسم کھائی کہ آئندہ شہد نہیں کھاواں گا۔ ایواں جناب زینب دے خلاف باقی ازواج دی چال کامیاب ہوگئی۔

میں ایگل دہرا رہیا ہاں کہ صرف کراہت توں بچن لئی رسول خدا نے شہد نہ کھان دی قسم کھائی سی۔

جناب ماریہ قبطیہ اُم المؤمنین جناب حفصہ دے گھر:

ایس سلسلے دا اک واقعہ ایہ وی ہے کہ اک دن حضرت حفصہ اپنے والد حضرت عمر نوں ملن لئی گئیاں تے پچھوں اوہناں دے گھر جناب ماریہ آگئیاں۔ اوہنے رحمت عالم دی موجود سن۔ آپ نے تے جناب ماریہ نے اوہنے کچھ وقت خلوت وچ گزرایا۔ اجے جناب ماریہ اوہنے ہی سن تے اُم المؤمنین حفصہ واپس پرت آئیاں۔ حفصہ بہت خفا ہوئیاں تے آکھیا کہ ”میری واری، میرا گھر، میرا بستر تے اوس تے کوئی دُجی بی بی؟ مینوں ایہ بلکل گوارا نہیں۔“ رسول خدا نے جناب حفصہ نوں آکھیا کہ دیکھ حفصہ، جے تسیں رولا نہ پاؤ تے نالے عائشہ نوں ایگل نہ دن دا کارا کرو تے میں قسم کھاندا ہاں کہ آج توں بعد ماریہ نال کوئی تعلق نہیں رکھاں گا۔

ایس واقعہ دا امام طبری نے ذکر کیتا اے تے اوہناں توں دکھ ابن سعد، واقدی، طبرانی تے محمد حسین ہیکل وغیرہ نے وی ایہ روایت نقل کیتی اے پر صحاح ستہ وچ ایس دا کدھرے کوئی ذکر نہیں۔ عزیز پڑھنہارو! ایس موقع تے ایہ سوال ضرور بن دا اے کہ جس گل دا امام بخاری تے مسلم نے ذکر نہیں کیتا اوس دا ذکر سناں کیوں ضروری جاپیا۔ ایس دا جواب ایہ ہے کہ بخاری و مسلم دا دور ہوری تے آج دا دور ہور اے، تے باقی گل بعد وچ کرنے آں۔

نان نفقہ وچ وادھے دی منگ:

رسول خدا دیاں ازواج مطہرات عرب دے چوٹی دے لیڈراں دیاں دھیاں سن۔ کوئی صدیق اکبر دی بیٹی اے تے کوئی عمر فاروق دی، کوئی ابوسفیان جے اُچی کلغی والے بندے دی دھی اُم حبیبہ اے تے کوئی بنو مصطلق دے سردار حارث بن ضار دے جگر دا کلڑا جویریہ اے۔ ایسے حرم وچ زینب بنت جحش وی نیں جہناں دا اپنے حسن تے اپنے ہاشمی ہون دا مان

ڈل ڈل پیندا سی تے اوتھے ای خیبر دے رئیس اعظم دی دھی صفیہ وی سن۔ ہن ایہو جہیاں پیہیاں نوں جدوں دو وقت دی روٹی وی پیٹ بھر کے نہیں لھے گی تے فیرنان نفقے وچ وادھے دی منگ عین فطری تے جائز ہووے گی۔ فیرورتاں دی، تے خاص طور تے اُچے طبقے دیاں عورتاں دی اک وڈی ضرورت تے مرغوب شے زیب زینت تے ناز نکھرا دی ہوندا اے۔ امہات المؤمنین ویکھ رہیاں سن کہ ایہ سب کجھ پورا کرن لئی رسول خدا کول وافر وسائل موجود نہیں۔ بیت المال بھریا ہوئی سی، خمس دے ڈھیر آ رہے سن تے لونڈی غلام وی وادھوں سن پر ایہ سارا کجھ جے اپنے ای خاندان تے خرچ کرنا چنگا لگدا تے رسول خدا اپنی لاڈلی دھی نوں اک غلام دے مطالبے تے ایہ نہ آ کھدے کہ فاطمہ! تقویٰ ای چنگا ای۔

دُجی گل ایہ ہے کہ مدینے دا ماحول کئے توں ذرا دکھ سی۔ قریش اپنیاں عورتاں تے پورا قابو رکھدے سن تے اوہناں نوں عورتاں والے روائتی ہتھکنڈے ورتن دی اجازت نہیں سی ہوندی۔ پر مدینے دا رواج کجھ ہور سی۔ اوتھے سوانیاں انصار اگے آ کر جان دیاں سن تے جی حضور کرن توں انکار وی کر دیندیاں سن۔ حالت ایہ ہو گئی سی کہ اک دن جناب عمر فاروق نے اپنی گھر والی نوں کجھ ڈانٹ ڈپٹ کیتی تے اوہناں وی اگوں رڑا رنگا جواب دتا۔ جناب عمر نے جدوں اپنی بیوی اگے ایس روپے دی شکایت کیتی تے اوہناں آ کھیا کہ تسلیں کیہہ اوجی، رسول اللہ دیاں بیویاں اوہناں نوں اگوں برابر جواب دیندیاں نہیں ایتھوں تیکر کہ سارا سارا دن آپ نال رُسیاں رہندیاں نیں، سنے تہاڈی دھی دے۔

جناب عمر فرماندے نیں کہ ایہ سندیاں سارای میں پرنا موہڈے تے سٹیا تے سدھا حفصہ دے گھر اپڑ گیا، تے پچھیا ”صاحزادی! توں رسول اللہ نال رُس کے آپ نوں پریشان کیتا ہوئی اے؟“
 ”آ ہو کیتا اے، تہا نوں کیہ؟“ (جناب) حفصہ نے جواب دتا۔

”حفصہ! میں تینوں رسول خدا دے غصے تے اللہ توں ڈراؤن آیا ہاں۔ ویکھ لو یں کد رے عائشہ دی ریس نہ کرن لگ پویں۔“

فیرمیں اُم المؤمنین اُم سلمہ دی خدمت وچ حاضر ہوئی جہناں نال میری رشتہ داری وی سی۔ جدوں میں اوہناں نال گل کیتی تے اوہناں دا جواب حفصہ توں وی ودھ کے سی۔ اکھے ”اے ابن خطاب! تسلیں رسول خدا دے ہر معاملے وچ دخل دین لگ پے او، ایتھوں تیکر کہ تسلیں گھر دیاں گلاں وچ وی آوڑے او۔“

اوہناں دیاں گلاں سن کے میرا من بڑا ای میلا ہوئی تے میں اُٹھ کے اُڑ آیا۔
 صحیح مسلم وچ حضرت عمر بن خطاب توں اک دُجی روایت وی اے۔ اکھے:

”میں رسول اللہ دی خدمت وچ حاضر ساں تے اوتھے جناب ابوبکر وی آ گئے۔ رحمت عالم محبوب خدا چوکھے دُکھی تے پریشان لگ رہے سن تے سر جھکا کے خموش بیٹھے ہوئے سن۔ آل دوالے سب ازواج بیٹھیاں سن تے اوہ وی بلکل چپ چاپ جو یں ہونٹھ سیٹے ہوندے نیں۔ ایوں دلیل آئی ہی رسول اللہ نوں ہسایا جائے۔ میں عرض کیتی یا رسول اللہ! جے بنت خاربہ (حضرت عمر دی گھر والی) میرے کولوں ایوں دانان نفقے دا مطالبہ کرے تے میں اوس نوں چک کے سر پر نے دے ماراں۔ رسول خدا انہی ضبط نہ کر سکے تے فرمایا کہ ویکھ لو وافر، مینوں تے ایہ ایوں دے مطالبے لئی گھیری بیٹھیاں نیں۔“

”رسول خدا دی زبان مبارک توں ایہ گل سنن دی دیر سی کہ ابو بکر اچن چیت اٹھے تے جناب عائشہ دی دھون وچ دھول دے ماری تے آکھیا کہ عائشہ! توں رسول خدا توں اوہ شے طلب کرنی ایس جیہڑی اوہناں دے وس وچ نہیں۔ میں اٹھیا تے میں اٹھ کے اپنی دھی حفصہ نوں چپڑ کڈ ماری تے جناب ابو بکر والی گل وی آکھی۔ سانوں دوواں نوں غصے وچ ویکھ کے عائشہ تے حفصہ دوواں نے ایہ وعدہ کیتا کہ آج توں بعد اسیں کسے اجہی چیز دی منگ نہیں کراں گئیاں جیہڑی رسول خدا کول نہ ہووے۔“

عزیز پڑھنہارو! جناب ماریہ قطبیہ دے بطن وچوں سیدنا ابراہیم دی پیدائش تے ازواج واحد، سیدہ زینب دے گھر وچ معمول توں چوکھا چر بیٹھنا تے ایس گل تے باقی ازواج دی مغایر والی پلاننگ، جناب ماریہ دا جناب حفصہ دے بستر تے آؤنا تے رسول خدا توں کھلے ڈھلے خرچے پانی دی منگ دے واقعات اکو گھڑی وچ بنجے دسدے نیں۔

ایہناں گلاں نوں اک وار فیر چیتے کرن توں بعد اسیں اگے ٹر دے ہاں تے ویکھدے ہاں کہ سیدہ حفصہ نے حضور دے حکم دے خلاف اگے نہ دن والی گل اُم المؤمنین جناب عائشہ نوں دس دتی، تے خورے باقی پیماں نوں وی۔ ایہناں ساریاں گلاں دا نتیجہ ایہ ہو گیا کہ اوہ ہستی جس نے ایہ درس دتا سی کہ:

﴿وَعَاشِرُوهُنَّ بِالْمَعْرُوفِ﴾ (النساء: ۱۹)

”تے اوہناں نال چنگا ورتا وار کھو۔“

﴿خَيْرُكُمْ خَيْرُكُمْ لِأَهْلِهِ وَأَنَا خَيْرُكُمْ لِأَهْلِي﴾ (ترمذی تے ابن ماجہ)

”تہاڑے وچوں چنگا اوہ اے جیہڑا اپنے گھر والیاں لئی چنگا اے تے میں اپنے گھر والیاں لئی تہاڑے ساریاں وچوں اچھا آدمی ہاں۔“

تے جس اچی سچی ہستی دی زبان مبارک توں ایہ اکھر نکلے سن کہ ”عورتاں نال بھلیائی کرو کیوں جے اوہ پسلی توں پیدا کیتیاں گئیاں نیں تے پسلی وچ سب توں ڈنگی چیز اوس دے اپر دا حصہ اے۔ جے تسیں ایس نوں سدھا کرن لگو گے تے ایس نوں توڑ دیو گے۔ تے جے ایس نوں ایس دے حال تے چھڈ دیو گے تے ایہ ٹیڑھی ای روے گی، بس عورتاں نال بھلیائی کرنا ای چنگا اے۔“

تے جس مہربان نبی نے قافلے دی رفتار تیز ہون دیاں ویکھ کے ایہ ارشاد فرمایا کہ ساربان! دھیان کریں کدرے آگینے ٹٹ نہ جان۔ یعنی سوریایاں دے تیز ٹرن نال کدرے کسے سوانی نوں کوئی زحمت نہ ہووے اوہی نبی محترم ایہ قسم کھان تے مجبور ہو گئے کہ میں اک مہینے لئی اپنیاں بیویاں دے نیڑے وی نہیں جاواں گا۔ حد تے ایہ ہے کہ جدوں اک مہینے بعد قسم پوری ہون تے رسول خدا نے رجوع فرمالیا تے لاڈلی بیوی حضرت عائشہ صدیقہ نے آکھ دتا کہ یا رسول اللہ! اے مہینہ نہیں ۲۹ دن ہوئے نیں (اللہ ای جان دا اے کیوں آکھ دتا) تے رسول خدا نے جواب دتا کہ مہینہ ۲۹ دن داوی تے ہوندا اے۔ یعنی چھیتی توں چھیتی بیویاں نوں جدائی دے صدمے توں باہر کڈن دی کوشش کیتی۔

بیویاں توں دوری دی ایس قسم تے اللہ نے اک ضابطہ بنا دتا کہ مسلمانو! ویکھ لوؤ جے رسول خدا دی ویکھا ویکھی تسیں

وی ایہ کم کیتا تے حد چار مہینے جے فیہ بیوی تہاڈی بیوی نہیں رہتی۔ بس ایہی ایلاء اے۔

آؤ ہن ویکھدے ہاں کہ ایس واقعے تے قرآن نے رسول خدا تے ازواج مطہرات نوں کیہ سنیہا دتا اے۔ ارشاد ربانی اے:

﴿يَا أَيُّهَا النَّبِيُّ لِمَ تُحَرِّمُ مَا أَحَلَّ اللَّهُ لَكَ تَبْتَغِي مَرْضَاةَ أَزْوَاجِكَ وَاللَّهُ غَفُورٌ رَحِيمٌ ۝ قَدْ فَرَضَ اللَّهُ لَكُمْ تَحِلَّةَ أَيْمَانِكُمْ وَاللَّهُ مَوْلَاكُمْ وَهُوَ الْعَلِيمُ الْحَكِيمُ ۝ وَإِذْ أَسَرَّ النَّبِيُّ إِلَىٰ بَعْضِ أَزْوَاجِهِ حَدِيثًا فَلَمَّا نَبَّأَتْ بِهِ وَأَظْهَرَهُ اللَّهُ عَلَيْهِ عَرَفَ بَعْضُهُ وَأَعْرِضَ عَنْ بَعْضٍ فَلَمَّا نَبَّأَهَا بِهِ قَالَتْ مَنْ أَنْبَاكَ هَذَا قَالَ نَبَّأَنِيَ الْعَلِيمُ الْخَبِيرُ ۝ إِنَّ تَتُوبَا إِلَى اللَّهِ فَقَدْ صَغَتْ قُلُوبُكُمَا وَإِنْ تَظَاهَرَا عَلَيْهِ فَإِنَّ اللَّهَ هُوَ مَوْلَاهُ وَجِبْرِيلُ وَصَالِحُ الْمُؤْمِنِينَ وَالْمَلَائِكَةُ بَعْدَ ذَلِكَ ظَهِيرٌ ۝ عَسَىٰ رَبُّهُ إِنْ طَلَّقَكُنَّ أَنْ يُبْدِلَهُ أَزْوَاجًا خَيْرًا مِنْكُنَّ مُسْلِمَاتٍ مُّؤْمِنَاتٍ قَانِتَاتٍ تَائِبَاتٍ عَابِدَاتٍ سَائِحَاتٍ ثَيِّبَاتٍ وَأَبْكَارًا﴾ (تحریم: ۵۰۱)

”اے نبی جیہوی چیز اللہ نے تہاڈے تے حلال کیتی اے اوہ تسیں اپنیاں عورتاں دی خوشنودی لئی کیوں حرام کر لئی اے تے اللہ بخش والا تے مہربان اے۔ اللہ نے تہاڈے تے قسماں دا کھولنا فرض کر دتا اے۔ تے اللہ ای تہاڈا مددگار اے تے اوہ سب دے حال توں واقف تے حکمت والا اے۔ تے جدوں نبی نے اپنیاں بیویاں وچوں کسے نوں کوئی راز دی گل دی تے فیہ جدوں اوہناں اوہ راز نہ رکھیا تے اللہ نے اپنے نبی تے ایہ گل ظاہر کر دتی تے نبی نے کجھ جتایا تے کجھ گل ٹال دتی۔ تے اوس بی بی نے پچھیا کہ تہانوں ایہ گل کس نے دس دتی اے تے آپ نے جواب دتا کہ مینوں خبر دتی اے علیم خیر اللہ نے۔ سو جے، تسیں دوویں اللہ دی جناب وچ توبہ کرو گئیاں تے تہاڈے حق وچ بہتر اے کیوں جے تہاڈے دلاں وچ کجی آ گئی اے۔ تے جے ایہدے تے اک دُجے دی مدد کرو گئیاں تے یاد رکھو کہ اللہ اپنے نبی دا مددگار اے، نہ صرف اللہ سگوں جبرائیل، میک مسلمان تے فرشتے وی ایس توں بعد مددگار نیں۔ جے پیغمبر تہانوں طلاق دے دین تے کوئی وڈی گل نہیں کہ اللہ اوہناں نوں تہاڈے توں بہتر بیویاں دے دیوے، فرماں بردار، ایمان والیاں، نمازی، توبہ کرن والیاں، عبادت گزار، روزہ رکھن والیاں، خاندیدہ تے کنواریاں۔“

رب دے ایہ ارشاد اوس دے نبی دی زبان مبارک توں سن کے ساڈیاں احترام تے محبت جوگ ماواں دیاں اکھاں کھل گئیاں تے ایہ پتہ لگ گیا کہ جدوں اللہ دے نبی نال کوئی اجہی گل کیتی جاندی اے جس توں اوس نوں اذیت پہنچے تے اللہ نوں وی اوہی ای تکلیف ہوندی اے، بھانویں سامنے نبی دی بیوی ای کیوں نہ ہووے۔

جھوں تیکر نان نفقے وچ اضافے دے مطالبے دا تعلق اے، ایس تے وی اللہ نے اپنی پالیسی جاری فرما دتی۔

﴿يَا أَيُّهَا النَّبِيُّ قُلْ لِأَزْوَاجِكَ إِنْ كُنْتُمْ تُرِيدُونَ الْحَيَاةَ الدُّنْيَا وَزِينَتَهَا فَتَعَالَيْنَ أُمَتِّعْكُنَّ وَأَسَرِّحْكُنَّ سَرَاحًا جَمِيلًا ۝ وَإِنْ كُنْتُمْ تُرِيدُونَ اللَّهَ وَرَسُولَهُ وَالْآخِرَةَ فَإِنَّ اللَّهَ أَعَدَّ

لِلْمَحْسِنَاتِ مِنْكُمْ أَجْرًا عَظِيمًا ﴿۲۸﴾ (احزاب: ۲۹، ۲۸)

”اے نبی! اپنی بیویاں نوں آکھ دیو کہ جے تہا نوں دنیاوی زندگی تے دنیا تے ٹور پٹے چنگے لگدے نیں تے آؤ تہا نوں کجھ تحفے دے کے احسن طریقے نال رخصت کر دیواں تے جے خدا، اوس دار رسول تے آخرت چنگی لگدی اے تے اللہ نے تہاڈے وچوں نیکی تے ثرن والیاں لئی چوکھا ثواب رکھیا ہو یا اے۔“

ایس توں بعد تے کوئی گل باقی ای نہ رہی۔ کھری تے سدھی گل سامنے آ گئی کہ جے اللہ دے نبی نال گزارا کرنا جے تے ایوں دے حالات وچ ای کرنا پوے گا تے جے قیصر و کسری دے حرماں دی ریس کرنی جے تے ایہ وی تہاڈی مرضی اے، ناراضگی غصہ کوئی نہیں اللہ دا نبی چنگے طریقے نال ای گھروں رب راکھا آکھے گا۔ عزیزان من! دنیا دے ٹور پٹے تے آخرت دی بھلیائی وچوں کسے اک نوں اختیار کرن دی، اللہ دی ایہ پیش کش اسلامی تواریح وچ تخییر دے نام نال یا دیکھتی جاندی اے۔

جید مسلمان علماء دا غصہ تے مستشرقین:

واقعات دے ایس سلسلے دی اوہ کڑی جہد تعلق جناب ماریہ قبطیہ نال اے، اوس دے ذکر تے ساڈے عظیم الشان بزرگ تے سیرت لکھیاریڈے خفا ہوندے نیں کہ بوہت سارے لوگاں نے ایلاء و تخییر دے واقعے داسرے توں ذکر کرنا ای مناسب نہیں سمجھیا تے جہاں کہتا اے اوہناں نے ایس گل تے پورا ٹل لایا اے کہ باقی گلاں تے ٹھیک نیں پر وچ ایہ جیہڑی جناب ماریہ والی گل اے ایہ جھوٹ توں کجھ نہیں، مثلاً علامہ شبلی نعمانی لکھدے نیں۔

”یہ امر مسلم ہے کہ ماریہ کی روایت صحاح ستہ کی کتب میں مذکور نہیں ہے، یہ بھی تسلیم ہے کہ سورہ تحریم کا شان نزول جو صحیح بخاری اور مسلم میں مذکور ہے (یعنی شہد کا واقعہ) قطعی طریقہ سے ثابت ہے۔ امام نووی نے جو آئمہ محدثین میں سے ہیں، صاف تصریح کی ہے کہ ماریہ کے باب میں کوئی صحیح روایت موجود نہیں۔ حافظ ابن حجر اور ابن کثیر تے جن روایتوں کو صحیح کہا اُن میں سے ایک منقطع اور دوسرے کا راوی کثیر الخطاء ہے۔ ان واقعات کے بعد کون کہہ سکتا ہے کہ یہ روایت استناد کے قابل ہے۔“

مولانا ابوالکلام آزاد اپنے اک مقالے وچ لکھدے نیں:

”ایسی صریح اور صاف تصریحات کے بعد کون کہہ سکتا ہے کہ ماریہ قبطیہ کا قصہ صحیح ہے، اور کیوں کر جائز ہو سکتا ہے کہ اس کی بناء پر معتزین اسلام اپنی معاندانہ تلمییس اور ابلیسانہ فریب کاری کے ساتھ اس واقعہ کو ہمارے سامنے بطور حجت اور دلیل کے پیش کریں۔“

میں (اصغر علی جاوید) ایہ عرض کرنا چاہتا ہوں کہ آج دا نو جوان مسلم جدوں سیرت النبی دا مطالعہ کر دا اے تے اوہ غیر مسلم مصنفان دیاں کتاباں دا وی مطالعہ کر دا اے۔ فیر انٹرنیٹ تے میڈیا دی ترقی نے جیہڑیاں سہولتاں دے دتیاں نیں، ایس

دے نتیجے میں مطلوبہ مواد تیکر ساڈی پہنچ سوکھی تے تیز ہو گئی اے۔ ہن ایہ ممکن نہیں رہیا کہ اسیں کسے موضوع تے قلم چلے یاں کسے موضوع تے کوئی مطالعہ کرنا چاہیے تے فیر اسیں حقائق تیکر نہ اپڑ سکے۔ ہن ایہ روایت وی اگے سڑدی نظر نہیں آؤندی کہ کسے گل نوں برا ایس لئی غلط تے نامناسب آکھ دتا جاوے کہ ایہ کسے مستشرق دی زبان یاں قلم توں نکلی اے۔ ایس لئی میرے ذہن وچ ایہ سوال آؤندا اے کہ اسیں جناب ماریہ والی روایت دے درست ہون دے امکان تے غور کرن لئی کیوں تیار نہیں؟ تے جے بغیر کھوج کاری توں اسیں ایس نوں سچ من لیندے ہاں تے ایس وچ کیہڑا قابل اعتراض پہلو سامنے آؤندا اے جہدے تے اسیں منہ لکائی پھر دے ہاں؟ ایہ کہ:

- ۱۔ رسول خدا نے اک لونڈی نال بدنی تعلق قائم کیتا۔
 - ۲۔ رسول خدا نے اوس قرآنی حکم دی خلاف ورزی کیتی جہدے وچ بیویاں نال انصاف کرن دا آکھیا گیا اے۔
 - ۳۔ رسول خدا نے ماریہ نال کوئی تعلق نہ رکھن دی قسم کھادی پر فیر اوہدے گھر جان لگ پے تے ایوں اپنی قسم توڑ دتی۔
- ایس روایت نوں درست سمجھن دی وجہ ایہ نظر آؤندی اے کہ جدوں قرآن آکھدا اے کہ جناب رسول خدا نے اپنی اک بیوی نوں کوئی راز دی گل دسی سی تے فیر ایس وچ شبہ کیوں کیتا جاندا اے۔ بزرگاں دا ایہ کہنا کہ اوہ راز دی گل شہد نہ کھان دی قسم سی، کوئی ایڈی پکی پیڈی نہیں جا پدی۔ شہد دا کھانا یاں شہد کھانا چھڈ دینا کوئی اجہی گل نہیں ہوندی کہ ایس نوں قرآن راز دی گل آکھدا۔

جھوٹ تیکر جناب ماریہ نال بدنی تعلق دا معاملہ اے تے ایہ وی کوئی اجہی گل نہیں کہ اسیں ایس واقعے تے پردا پائیے، کیوں جے ایس تعلق دا پہلوں ای سارے حرم سگوں سارے مدینے نوں پتہ سی جہداسب توں وڈا ثبوت جناب ابراہیم دی ولادت سی۔ فیر ایس تعلق دی اجازت قرآن ایس واقعے توں بوہت پہلے ای دے چکیا اے جدوں ارشاد ربانی ہو یا سی کہ:

﴿لَا يَحِلُّ لَكَ النِّسَاءُ مِنْ بَعْدِ وَلَا أَنْ تَبَدَّلَ بِهِنَّ مِنْ أَزْوَاجٍ وَلَوْ أَعْجَبَكَ حُسْنُهُنَّ إِلَّا مَا مَلَكَتْ يَمِينُكَ وَكَانَ اللَّهُ عَلَى كُلِّ شَيْءٍ رَقِيبًا﴾ (احزاب: ۵۲)

”ایس توں بعد تہاڈے تے ہور عورتاں حلال نہیں۔ تے نہ ای ایہ کہ تسیں ایہناں وچوں بیویاں بدل لوؤ بھانویں اوہ تہانوں سوہنیاں لگن، پر اوہ جیہڑیاں تہاڈی ملکیت ہوں۔ اور اللہ ہر چیز تے نگہبان اے۔“

مَا مَلَكَتْ يَمِينُكَ آکھ کے اللہ نے اپنے نبی نوں ایہ حق دے دتا سی، بلکل دُجے مسلماناں وانگ۔ پر دُجے مسلماناں تے ایہ پابندی نہیں کہ ہن کسے نویں سوانی نال ویاہ نہیں کرنا یاں چار دی تعداد پوری رکھن لئی کسے بیوی نوں طلاق دے کے دُجی سوانی نال نکاح نہیں کرنا۔

جے دُجے اعتراض ول آئیے تے ایہ گل وی درست نہیں کیوں جے کسے اک دن تے اک موقع تے، معمول توں ہٹ کے، اپنی ہی کسے بیوی یاں لونڈی نال قرابت کوئی بے انصافی دی گل نہیں۔ جس انصاف دی اللہ نے گل کیتی اے اوہ بدنی تے معاشی ضرورتاں نوں پورا کرن والا انصاف اے۔

ہن اسیں اُتلے تے فرضی اعتراض ول آؤنے ہاں کہ قسم کھا کے توڑ دتی۔ تے ایس دا جواب ایہ ہے کہ نبی اپنے ولوں

کچھ نہیں آکھدایاں کردا۔ اوس دا ہر فعل رب دی مرضی دے تابع ہوندا اے۔ رسول خدا دا قسم کھانا تے فیر قسم دی مدت دا اک مہینہ پورا ہون دے بعد بیویاں ول رجوع کرنا کوئی قابل اعتراض بات نہیں، تے جے ایہ گل اوہدوں قابل اعتراض سمجھی وی جاندی سی تے مالک نے اپنا پالیسی بیان جاری کر کے ایس دی وضاحت کردتی کہ جے قسم کھا لوؤ تے فیر چار مہینے دی مدت دے اندر اندر رجوع کر لوؤ تے اللہ بخشن والا تے مہربان اے۔ ری گل ایہ کہ جے سورہ تحریم دیاں ٹھہلیاں آئیناں دا شان نزول واقعہ ماریہ نوں سمجھ لیا جاوے تے مستشرقین آکھن گے کہ کسے الہامی کتاب وچ ایویں دیاں گلاں مناسب نہیں۔ اتھے میں ایہ عرض کرنا چاہواں گا کہ اللہ نے تے صرف اشارہ کیتا اے کہ اک راز دی گل اک بیوی نوں دسی گئی سی، ایس توں اگے کچھ نہیں۔ پر مستشرقین نوں کوئی ایہ کچھ کہہ کیہ:

i اللہ دے نبی جناب لوط دے اوہناں دو پروہنیاں دی داستان تورات وچ موجود نہیں جیہڑے اصل وچ فرشتے سن پر اوہ بڑے سوہنے جئے منڈے بن کے حضرت لوط کول اجنبی پروہنے بن کے آئے؟

ii تورات وچ جناب لوط دی بیوی دی اوہ کہانی نہیں لکھدی جس دی سزا وچ اوہ اپنی بدچلن قوم نال عذاب وچ پھس گئی؟

iii تورات وچ ایہ قصہ نہیں پڑھیا جانا کہ جناب لوط نوں اوہناں دیاں دھیاں نے شراب پیا دتی تے فیر..... دوویں دھیاں حاملہ ہو گئیاں۔ وڈی ول جیہڑا پتر ہوئیا اُس دا نام موآب رکھیا تے کئی ول جیہڑا پتر ہوئیا اوس دا نام بن عمی رکھیا، جیہڑا بنی عمون دا باپ اے تے اوہ اے تیکر موجود نیں۔

ہن اسیں عہد حاضر دے کچھ مستشرقین دا ذکر کرنے آں جہدے توں پتہ لگدا اے کہ سارے مستشرقین اکو پاسے نہیں جئے تے نہ ای ساریاں نے ایس نوں قابل اعتراض آکھیا اے کہ اسیں اوہناں توں ڈر کے منہ لکاندے پھرے۔

مارٹن فارورڈ، ارورہ (Aurora) یونیورسٹی دے مذہبی علوم دے پروفیسر نیں۔ اوہناں دی کتاب محمدؐ۔ اے شارٹ بائیو گرافی، ۱۹۹۷ وچ چھپی۔ اوہناں نے ایس موضوع تے کوئی رائے قائم نہیں کیتی تے اسلامی ذریعیاں تے ای انحصار کیتا اے۔ لکھدے نیں:

The hadith offer various reasons for what led to this Period of separation
Some say that the wives were jealous of the Prophet's relation with
Mariya the copt.


”حدیثاں توں اوہناں بہت ساریاں گلاں دا پتہ لگدا اے جیہڑیاں ایس علیحدگی دے دناں دا سبب بنیاں۔ اوہناں وچوں کچھ ایہ نیں کہ ازواج، مصر توں آؤن والی ماریہ نال رسول خدا دے تعلقات تے حسد کردیاں سن۔“

برنا بے راجر سن دی کتاب ’دی پرافٹ محمدؐ۔ اے بائیو گرافی، انگلستان وچ ۲۰۰۳ء وچ چھپی۔ اوہناں نے ایس کتاب وچ جناب ماریہ دا ذکر ایویں کیتا اے:

She was pleasing to him, so much so that, his other wives began to

complain that he visited her day and night. His infatuation with her was rewarded when her stomach began to swell with child.

”اوہ (ماریہ) اوہناں (رسول خدا) نوں اچھی لگ رہی سی، ایتھوں تیکر کہ آپؐ دیاں دُجیاں بیویاں نے ایہ شکوہ شروع کر دتا کہ آپؐ ہر ویلے اوہدے دل ای ٹرے رہندے نیں۔ آپؐ دی ماریہ نال حدوں ودھ محبت دا صلہ اوہدوں سامنے آیا جدوں ماریہ دے پیٹ وچ بچے دی خبر ملنی شروع ہوئی۔“
ہن اسیں فرانسیسی مستشرق میکسم روڈنسن دا ذکر کردے ہاں۔ لکھدے نیں:

"One day when Hafsa, the daughter of Umer, had gone on a visit to her father, it happened that the Prophet felt in an amorous mood. He made advances to Mariya and they slept together in Hafsa's hut. She returned unexpectedly and burst into angry tears. In my hut, on my own day and in my own bed! Tiring of this, Muhammad promised to have nothing more to do with mariya and only asked her not to tell the others. But Hafsa could not contain herself. She confided in her fellow wife Aisha, who was her particular friend - a friendship cemented by that of their two fathers, Umar and Abu Bakr." 

”اک دن جدوں حفصہ بنت عمر اپنے والد نوں ملن گئیاں ہوئیاں سن، ایہ ہوئیا کہ رسول خدا دا بڑا دوستانہ موڈ بنیا۔ آپؐ ماریہ ول ودھے تے فیر دوویں او تھے حفصہ دے ای حجرے وچ لیٹ گئے۔ حفصہ اپن چیت واپس پرت آئیاں تے بڑے غصے نال آکھیا کہ میرے حجرے وچ، میری واری والے دن تے میرے ای بستر تے ایہ کجھ! مجبوراً محمدؐ نے ایہ وعدہ کیتا کہ اوہ بن ماریہ نال کوئی تعلق نہیں رکھن گے تے حفصہ نوں آکھیا کہ اوہ کسے ہو رنال گل نہ کرے، پر حفصہ کولوں ضبط نہ ہوئیا۔ اوہناں راز داری نال ایہ گل اپنی سوکن عائشہ نوں دس دتی جیہڑی اوہناں دی خاص سہیلی سی تے جہدے نال دوستی اوہناں دے بیوواں عمر تے ابو بکر دی وجہ توں ڈاہدی پکی سی۔“

اسیں ویکھدے ہاں کہ میکسم روڈنسن ہوراں نے وی اوہی گل کیتی اے جیہڑی طبری نے کیتی اے۔
اوس وچ کوئی رنگ نہیں بھریا تے کوئی رائے قائم نہیں کیتی۔

ہن اسیں ۱۹۹۲ء وچ امریکہ وچ چھپی کتاب ’محمدؐ اے بائوگرافی آف دی پرافٹ‘ ول رجوع کردے ہاں۔ مؤلفہ کیرن آرمسٹرانگ لکھدیاں نیں:

But there was one great personal joy for Muhammad that year. The Muqawqis of Egypt is said to have sent Muhammad a beautiful curlyhaired Egyptian slave girl, a Coptic Christian called Maryam, and Muhammad took her as his concubine. He used to visit her daily, spending more and more time with her,

probably finding it a relief to escape from the jealous atmosphere of the harem. Nobody would have found this odd. The Torah had made provision for concubinage, when the Israelites were at a similar stage of changing from the nomadic to the settled life. Abraham himself, of course, had taken Hagar as his concubine, and Ishmael, the father of the Arabs, had been the child of that union. So it must have seemed propitious when Maryam became pregnant, and, when his son was born the following year, Muhammad called him Ibrahim. ☞

”پراوس سال محمدؐ نوں اک بوہت وڈی ذاتی خوشی وی ملی۔ آکھیا جاندا اے کہ مصر دے والی مقوقس نے محمدؐ ول اک بڑی سوئی گھنگریا لے والی مصری لونڈی بھیجی سی، جہیڑی مسیحی عقیدے تے سی تے اوس دانا مریم سی تے محمدؐ نے اوس نوں اپنی لونڈی دے طور رکھ لیا سی۔ آپؐ اوس ول ہر روز ای جاندا سن، اوہناں نال چوکھے توں چوکھا وقت گزار دے سن، خورے ایس لئی کہ اوس نوں حرم دے حاسدانہ ماحول توں ملن والی اذیت توں کچھ سکون ملے تے ایہ گل کسے نوں وی معیوب نہیں لگی ہوئے گی۔ تورات موجب وی اوس دور وچ لونڈی رکھن دی اجازت سی جدوں بنو اسرائیل ایسے طرحاں خانہ بدوشی توں مقیم زندگی دے مرحلے وچ گزرے سن۔ بناشبہ ابراہیمؑ نے وی حاجرہ نوں لونڈی دے طور تے ای لیا سی تے عرباں دے باپ اسماعیل ایسے ملاپ وچوں پیدا ہوئے سن۔ سواہیہ گل وی چنگی نظر نال دیکھی جانی چاہیدی اے کہ ماریہ حاملہ ہوئیاں تے فیرا گلے سال بیٹا وی پیدا ہوئیا۔ محمدؐ نے اوس دانا مریم رکھیا۔“

بی بی کیرن آرمسٹرانگ نے تے ایہ کہہ کے گل ای مکاوتی اے کہ اخیر جناب ابراہیمؑ دی بیوی حاجرہ وی تے اک لونڈی سن جہدے بطن وچوں عرباں دے جد امجد اسماعیلؑ نے جنم لیا۔ ایہ حقیقت اپنی تھاں تے ہے کہ ایہ گل وی یہودی خرافات وچ ہی لہجہ دی اے ورنہ اسیں مسلمان تے ایہ جان دے تے من دے ہاں کہ سیدہ حاجرہ مصر دے بادشاہ دی بیٹی سن، بھانویں اوس نے اوہناں نوں حضرت ابراہیمؑ تے آپؐ دی زوجہ سارہ دی خدمت لئی وقف کیتا سی۔

ایس توں بعد ایہ مناسب نہیں لگدا کہ ایس واقعے نوں محض ایس لئی غلط ثابت کرن تے زور ماریا جاوے کہ مستشرقین ایس نوں ٹھیک آکھدے نیں۔ جے اسیں وی جناب ماریہؑ والی روایت نوں ٹھیک من لوئے تے ایس فقیر دے خیال موجب کدرے وی رسول خدا دی عظمت تے اوہناں دے اُسوہ حسنہ تے کوئی حرف نہیں آؤندا، ہاں اسیں مسلمان ضرور حقیقت پسند رکھوان لگ پواں گے۔

اہل طائف تے لات دابت

فتح مکہ تے محاصرہ طائف توں بعد اے لشکر اسلام مدینے پر تیا ای سی تے طائف دامتہو سر دار عروہ بن مسعود ثقفی وی مدینے اپڑ گیا تے مسلمان ہون دا اعلان کر دتا۔ فیر رسول خدا کولوں اجازت طلب کیتی کہ اوہ طائف جا کے اپنی قوم نوں اسلام دی دعوت دیوے۔ آپؐ نے فرمایا کہ ”اوہ تہاڈی گل نہیں منن گے تے نالے خطر اے کہ کدرے تہانوں قتل ای نہ کر دین۔“ آپؐ نوں علم سی کہ اہل طائف بڑے مغرور تے متکبر نیں تے اوہناں دی حالت وچ کوئی تبدیلی نظر نہیں آؤندی پر رسول خدا دے فرمان سنن توں بعد جناب عروہ بن مسعود آکھن لگے کہ ”یا رسول اللہ! میں اہل طائف نوں اوہناں دیاں ٹیاریاں توں وی چوکھا محبوب ہاں۔“ گل وی ایوں ای سی پر رسول خدا دا فرمان وی کویں غلط ہو سکدا سی۔ ہو یا اے کہ اوہناں طائف آکے جدوں اپنی قوم نوں اسلام دی دعوت دتی تے اوہناں جناب عروہ تے تیراں دامنہ پا دتا تے ایوں آپؐ شہید ہو گئے۔ تیر لگن نال جدوں جناب عروہ چوکھے زخمی ہو چکے سن تے کسے نے پچھیا کہ عروہ! کیہ خیال اے، ایس موت وچوں کیہ کھٹیا جے؟ جناب عروہ نے جواب دتا کہ ”مینوں اللہ تعالیٰ نے عزت بخشی اے تے شہادت دی اُچی موت توں نوازا اے۔ میرا مرتبہ اوہناں شہیداں دا مرتبہ اے جیہڑے رسول خدا نال طائف دے محاصرہ ویلے شہید ہوئے سن۔ مینوں اوہناں دے نال ای سپرد خاک کیتا جائے۔ رسول خدا نوں اوہناں دی شہادت دی خبر ملی تے آپؐ نے فرمایا کہ عروہ دی مثال اوہی اے جیہڑی صاحب یلین دی مثال اپنی قوم وچ سی۔

اہل طائف جناب عروہ بن مسعود نوں تے شہید کر بیٹھے پر بعد وچ جدوں آل دوال دے سیاسی حالات ول دھیان کیتا تے پتہ لگا کہ سارا عرب مدینے ول ٹھک پیا اے تے اوہ ہن کلم کلم رہ گئے نیں۔ ایس لئی ہن گل صرف ایوں بن دی اے کہ اپنے مسلمان ہون دا اعلان کر دتا جاوے۔ ایس سلسلے وچ سفارت کاری لئی اوہناں نے حکم بن عمرو، شرجیل بن غیلان، عثمان بن بشر، اوس بن عوف، نمیر بن خرشہ تے عبدیالیل بن عمروناں دے چھ بندیاں دا اک جتھا عبدیالیل دی سربراہی وچ مدینے ول ٹور دتا۔

طائفی وفد مدینے اپڑیا تے جناب خالد بن سعید راہیں صلح دیاں شرطیں تے گل بات شروع ہوئی۔ اوہناں نے ہڈھلی گل ای ایہ کیتی کہ رسول خدا اوہناں دابت لات تن سال تک نہیں توڑن گے پر آپؐ نے اوہناں دی شرط نہ منی۔ فیر اہل طائف جس لات کولوں اپنی حیاتی وچ وادھے منگدے سن، اوہ لات دی حیاتی لئی رسول خدا دے ترلے پان لگے پے تے آکھن لگے کہ چلو مہینے دی مہلت ای دے دیو پر آپؐ نے کسے جعلی معبود نوں زندگی بخشن تے سمجھوتہ نہیں کیتا۔ ایوں آپؐ نے حضرت مغیرہ بن شعبہ تے حضرت ابوسفیان بن حرب نوں طائف ول ٹورن دا فیصلہ کر لیا تاں جے اوہ اتھے جا کے لات دے ٹوٹے کر دین۔ طائف دے سفارتی جتھے دیاں دُجیاں شرطیں ایہ سن کہ اوہناں نوں بت اپنے ہتھیں نال توڑن تے مجبور نہ کیتا جاوے تے نماز پڑھن دا وی نہ آکھیا جاوے۔ رسول خدا نے جواب دتا کہ چلو بت تے آسیں آپؐ توڑ لوں

گے پر نماز دی معافی دا سوال ای پیدا نہیں ہوندا کیوں جے جس دین وچ نماز نہیں، اوس دین وچ کوئی خوبی نہیں۔ ایس توں بعد اہل طائف مسلمان ہو گئے تے آپؐ نے جناب عثمان بن بشر نوں اوہناں دا امیر مقرر کر دتا۔ اوہ رمضان دا مہینہ سی۔ اوہناں نے اوتھے ای روزے رکھنے شروع کر دتے، تے رسول خدا دی مہمان نوازی دے مزے لیندے رے۔ سیدنا بلال سرگی تے افطاری دا سامان اوہناں تکرا پڑا مندے رے۔

جدوں طائف دا سفارتی جتھا واپس پرتن لگا تے فیصلے دے مطابق جناب مغیرہ بن شعبہ تے ابوسفیان بن حرب نوں وی لات دابت توڑن لئی اوہناں دے نال ٹور دتا گیا۔ طائف اڑے تے دوواں مجاہداں وچ ایس گل تے کجھ تکرار ہوئی کہ لات دے سرو وچ پہلی سٹ کون لاوے گا۔ فیر مغیرہ کدال لے کے بت خانے تے چڑھ گئے تے اوس نوں ڈھانا شروع کر دتا۔ لات دی ایس رسوا کن موت داسن ویکھ کے بنو ثقیف دیاں سوانیاں ننگے سر تے ننگے پیر گھراں وچوں دوڑ آئیاں تے رونا پٹنا شروع کر دتا۔ پر اللہ تے اوس دے رسول دے فیصلے تے عمل ہو چکیا سی۔

* * * *

تبوک توں پہلاں دے کجھ جنگی معرکے

غزوات، سرایا تے جنگی مہماں دے معاملے وچ سیرت لکھیاراں وچ ہمیش ای اختلاف رہیا اے تے اوہ اختلاف حیات مبارکہ دے ایس دور وچ وی نظر آؤندا اے۔ قاضی سلمان منصور پوری دی تحقیق موجب طائف دے محاصرے توں جنگ تبوک تیکر، پیٹھ دے گئے سرایا سامنے آؤندے نیں۔

سریہ عیینہ بن حصن فزاری:

بنو تمیم نے کجھ دُجے قبیلیاں نوں نال ملا کے جزیہ دی ادائیگی توں انکار کر دتا۔ محرم ۹ھ وچ رسول خداؐ نے ۱۵۰ سواراں نوں جناب عیینہ دی کمان وچ ایس بغاوت دے خاتمے لئی گھلیا۔ آپؐ نے بغاوت نوں کچل دتا تے ۱۱ مرد ۲۱ عورتاں تے ۳۰ بچے قیدی بنا لے گئے۔ جدول اوہناں دے سردار مدینے حاضر ہوئے تے آپؐ نے سارے اسیر آزاد کر دتے۔

سریہ قطبہ بن عامر:

صفر ۹ھ وچ ۲۰ مجاہداں دا جتھا جناب قطبہ بن عامر دی کمان وچ خشم ول ٹوریا گیا۔ جناب قطبہ نے سازشی بندے نوں قتل کر دتے کجھ بندیاں نوں جنگی بنالیا پر رسول خداؐ نے اوہناں نوں چھڈ دتا۔

سریہ ضحاک بن سفیان کلابی:

ربیع الاول ۹ھ وچ جناب ضحاک دی سربراہی وچ کجھ بندے بنو کلاب ول بھیجے گئے۔ بنو کلاب نے لڑائی شروع کر دتی پر مسلماناں نے اوہناں نوں شکست دے دتی۔

سریہ عبداللہ بن حذافہ:

کجھ بحری قزاق جدے دے ساحل تے اکٹھے ہو گئے سن تے ہن اوہ مکہ مکرمہ تے حملہ کرن دی تیاری کر رہے سن۔ رسول اللہؐ نے ۳۰۰ مجاہداں دا اک جتھا جناب عبداللہ بن حذافہ دی کمان وچ اوہناں ول روانہ کیتا تاں جے اوہناں ڈاکواں دا ڈیرہ ختم کیتا جائے۔ لشکر اسلام دے جان نال ڈاکو تیز تر ہو گئے تے اوہ مرکز ختم ہو گیا۔ ڈاکٹر شوقی ابوخلیل تے صفی الرحمان مبارک پوری نے ایس سریہ دے اسلحہ علقمہ بن مجزز مد لہجی دسیا اے تے مہینہ ربیع الاول دی بجائے ربیع الثانی دسیا اے۔

سریہ بنو طے:

عرب دے نام نہاد معبوداں دی توڑ بھن دا سلسلہ چل رہیا سی پر حاتم طائی دے قبیلے دابت الفلس (Al Fuls) اے

اپنی تھاتے کھڑی۔ اوس نوں توڑن لئی رسول خداؐ نے اک اجہی ہستی نوں چلکيا جس نے جاہلیت وچ وی کسے بت دے اگے سر نہیں سی جھکایا، تے اوہ سن صاحب بصیرت عظیم سپہ سالار جناب علی بن ابوطالب۔ آپ نے ڈیڑھ سو مجاہداں دا جھتا جناب علی دی کمان وچ دتا تے بنو طے تے یلغار دا حکم دتا۔ بنو طے دے سردار تے حاتم طائی دے پتر عدی نوں جدوں اسلامی لشکر دے آؤن دا پتہ لگاتے اوہ ملک شام ول دوڑ گیا۔ جناب علی المرتضیٰ نے پیش قدمی جاری رکھی تے اگے ودھ کے فلس دے ٹوٹے کر دتے تے اوس جھوٹی عبادت گاہ نوں ڈھا دتا۔ بنو طے نے مقابلہ کرن دی جرأت تے کیتی پر اخیر کجھ دوڑ گئے تے کجھ جنگی قیدی بن گئے۔

بنو طے قبیلہ دی عرب وچ چوکی عزت کیتی جاندی سی کیوں جے اوس داسردار حاتم طائی اپنی سخاوت تے غریب پروری وچ اوہ نام پیدا کر چکيا سی کہ آج تیکر اوس دی سخاوت ضرب المثل بنی ہوئی اے۔ جنگی قیدیاں وچ ایسے حاتم طائی دی دھی تے سردار قبیلہ عدی بن حاتم دی بھین سفانہ وی سی۔ اوہناں جنگی قیدیاں نوں مسجد نبوی دے سامنے اک چھپر تھلے رکھیا گیا تے سفانہ وی اوسے چھپر تھلے سوانیاں والے پاسے بیٹھی رہندی سی۔ اک دن جناب رسول خداؐ سفانہ دے کولوں گزرے تے اوہ اٹھ کے حضور دے مگر ٹرائی۔ آکھن لگی کہ یا رسول اللہ! میرا باپ فوت ہو گیا اے؛ جنے مگر آؤناسی اوہ شام ول دوڑ گیا اے؛ میں اپنی بڈھی عمر تے صحت پاروں کجھ خدمت سیوا کرن جوگی وی نہیں تے مینوں قیدی بنا کے کیہ کرو گے؟ تسیں میرے تے احسان فرماؤ، اللہ تہاڈے تے احسان فرمائے گا۔ آپؐ نے فرمایا کہ سفانہ! اوس بھرا دے مگر آؤن دی اُمید لائی ہوئی جے جیہڑا اللہ تے اوس دے رسول توں دوڑ گیا اے؟ ایہ گل کہہ کے رسول خداؐ ٹر گئے۔ اگلے دن سفانہ نے فیر کل والی گل کیتی تے رسول خداؐ نے وی اوہی جواب دتا تے تشریف لے گئے۔ تے دن سفانہ نے فیر اوہی گل آکھی۔ جناب علی نوں وی حاتم دی دھی سفانہ تے ترس آیا تے خورے اوہناں نے سفارش وی کیتی تے رسول خداؐ نے اوس نوں آزاد کر دتا۔ پر نال ای پکی کیتی کہ جان وچ جلدی نہ کرے، سگلوں اپنی قوم دے کسے اعتبار جوگ بندے نوں اڈیک لوے۔

سفانہ بنت حاتم طائی رسول خداؐ دی ہدایت موجب مدینے وچ جناب رملہ بنت حارثہ دے گھر وچ گزارا کر دیاں رہیاں۔ ایہتھوں تیکر کہ اک دن قبیلہ بلیہ تے قضاہ دے کجھ بندے آئے جیہڑے سفانہ نوں حاتم دی دھی ہون پاروں جان دے سن۔ سفانہ رسول خداؐ کول حاضر ہوئی تے ایہ آکھ کے رخصتی دی اجازت منگی کہ ایہناں وچ کجھ بندے میرے اعتبار دے نیں۔ آپؐ نے اوس نوں سواری لئی اونٹ تے زادراہ دے طور تے کجھ پیسے وی دتے تے رب راکھا آکھیا۔

سفانہ اوہناں بندیاں نال اپنے بھرا عدی بن حاتم کول شام اپڑ گئی تے اوہتھے جا کے اوہدے کولوں جیہڑی ہوئی اوس نے اوہی کیتی۔ آکھن لگی کہ تینوں شرم نہیں آئی کہ توں اپنے بال بچے نوں تے اٹھان تے سوار کر کے نال لے آئیاں اے پر اپنی موئی مٹی، حاتم دی نشانی تے اوس دی عزت نوں اوہتھے چھڈ دتاسی۔ عدی نے بھین نوں تسلی دتی، اوس توں معافی منگی تے آکھیا کہ ایس گل تے اوہ چوکھا شرمندہ اے۔

عدی آکھدے نیں کہ سفانہ بڑی دانائی بی بی سی۔ جدوں اوس دا غصا ٹھنڈا ہو گیا تے میں اوس نوں پچھیا کہ بھین جی! ایہ دسو کہ محمدؐ کس طرحاں دا بندہ اے؟

”بخدا، وقت ضائع کیجے بغیر اوس دی خدمت وچ حاضر ہو جا“ سفاہ نے جواب دتا۔

اوس نے آکھیا کہ گل سدھی تے صاف اے کہ محمدیاں نبی اے یاں بادشاہ، جے نبی اے تے ایمان لے آؤ تاں جے تہاڈا شمار مدھلے دور دے مسلماناں وچ ہو سکے تے جے اوہ بادشاہ اے تے بادشاہواں نوں تیرے ورگے سیانے بندیاں دی لوڑ ہوندی اے، اوہ جدوں تیریاں خداداد صلاحیتاں نوں دیکھن گے تے تیری ضرورت قدر کرن گے تے تینوں کوئی باوقار منصب وی دین گے۔ میں سفاہ نوں آکھیا کہ بھین جی! تہاڈیاں گلاں مینوں بڑیاں چنگیاں لگیاں نیں۔ فیر میں شام توں کوچ کیتا تے مدینہ منورہ اپڑ گیا۔

حضور اوس ویلے مسجد نبوی وچ تشریف فرما سن۔ میں جا کے سلام عرض کیتا تے حضور نے مینوں اپنا تعارف کران دا آکھیا۔ میں جدوں دسیا کہ میں عدی بن حاتم آں تے رسول رحمت اٹھ کے کھلو گے تے فیر مینوں رحمت تے محبت دے مرکز، اپنے گھر وچ لے گئے۔ جدوں اسیں کاشانہ اقدس ول ٹرے جان دے ساں تے اک مریدی جی مائی نے عرض کیتی کہ حضور! ذرا میری گل سُن دے جاؤ۔ مائی کنا ای چڑاپنی پیتا سناندی ری تے آپ بڑے آرام نال کھلو تے سن دے رے۔ میں جدوں ایہ منظر دیکھیا تے میرے دل نے آکھیا کہ منا! رب دی سونہر ایہ بادشاہ نہیں ہو سکدا، کتھے بادشاہواں داتکبر تے غرور تے کتھے ایہ انکساری کہ مائی بولی جاندی اے تے رسول خدا سُن دے جان دے نیں۔

حجرہ مبارک وچ اپڑے تے حضور نے چڑے دا بنیا ہونیا اک تکیہ میرے ول سرکایا تے فرمایا عدی جی! تشریف رکھو۔
 ”حضور، ایہ تکیہ تیں لے لوؤ، میں ایسے طرحاں ٹھیک آں“ میں عرض کیتی۔
 ”نہیں ایہ تہاڈے لئی اے۔“

میں حضور دے حکم دی تعمیل وچ تیکے تے بیٹھ گیا تے آپ میرے سامنے تھلے ای بیٹھ گئے۔ میرے دل وچ اک واری فیر وچ اٹھی واللہ ماہلذا بِأَمْرِ مَلِکٍ (اللہ دی قسم اے ایہ کسے بادشاہ دا طریقہ نہیں ہو سکدا۔) میں اچے ایوں دیاں دلیلاں وچ ای پیاساں تے رسول خدا اچن چیت فرمان لگے:

”اوہ عدی بن حاتم! کیہ تہاڈا مذہب عیسائیاں دا فرقہ رکوسی نہیں؟“
 ”جی میرا ایسے فرقے نال تعلق اے“ میں جواب دتا۔
 ”کیہ تیں اپنی قوم توں مال غنیمت دا چوتھا حصہ وصول نہیں کردے؟“
 ”جی کر دہاں جی۔“

”تہاڈے دین وچ تے ایہ حلال نہیں“
 ”بخدا، ایوں ای گل اے“

حضور دیاں ایہناں گلاں توں مینوں یقین ہو گیا کہ حضور اللہ دے رسول نیں، ایہ ہر چیز جان دے نیں تے آپ توں کوئی گل راز نہیں۔ ایوں میں مسلمان ہو گیا۔ میں اچے حضور کول ای بیٹھاں کہ اک آدمی نے آکے فاقے دی شکایت کیتی۔ دُجا آیا تے اوس نے ڈاکے دی شکایت کیتی۔ ایہ شکایتاں سنن توں بعد رسول خدا نے مینوں مخاطب کر کے فرمایا کہ

عدی! تسیں حیرہ دی تھاں ویکھی اے؟ جے اللہ تہا نوں ایڈی حیاتی دتی تے تسیں ویکھ لوؤ گے کہ اک عورت اپنے ہودج وچ حیرہ توں چل کے آئے گی تے خانہ کعبہ دا طواف کرے گی پر اوس نوں اللہ توں سوا کسے دا ڈرنہیں ہووے گا تے جے تہاڈی زندگی لمی ہوئی تے ویکھ لینا کہ تسیں کسریٰ دے خزانے فتح کرو گے تے عدی! تسیں ایہ وی ویکھو گے کہ بندامٹھ بھر کے سونایاں چاندی کڈے گا تے اجہیا بندالہیے گا جیہڑا اوس نوں (صدقہ خیرات دے طور تے) قبول کر لوے پر قبول کرن والا نہیں لہے گا۔

فیر بڈھے اسمان نے وی ویکھیا، عدی ہوراں وی ویکھیا تے لوکاں نے وی ویکھیا کہ اک تن تہا عورت حیرہ توں چل کے آؤندی اے تے خانہ کعبہ دا طواف کر دی اے پر راہ وچ اوس نوں اللہ توں سوا کسے دا ڈرنہیں سی۔ عدی آپوں اوہناں مجاہداں وچ شامل سن جہناں کسریٰ دے خزانے فتح کیتے۔ اوہ اوہدوں آکھدے ہوندے سن کہ جناب ابوالقاسم نے جیہڑیاں تن گلاں دسیاں سن، اوہناں وچوں دو میں اپنیاں اکھاں نال ویکھ لیاں نیں۔ تجی وی ضرور پوری ہووے گی۔

عزیز دوستو! آج روح عدی نوں ایس گل تے ڈاہڈا اطمینان ہووے گا کہ اوہناں دی حیاتی توں چھیتی بعد اوہ گل وی پوری ہوگئی سی کہ عرب وچ صدقہ لین والا بندانہیں سی لہذا تے جے آج دے مکہ، مدینہ، حیرہ تے قادسیہ نوں ویکھیے تے پتہ لگدا اے کہ تیل دی دولت نال عربستان دے خزانے نکونک ہوئے پے نیں۔ آکھن والے تے ایتھوں تیکر آکھدے نیں کہ دنیا دے دس امیر ترین بندیاں وچ کئی بندے سعودی عرب دے نیں تے آج دا سعودی ولی عہد پوری دنیا دا چوتھا یاں پنجواں امیر ترین بندہ اے۔

ابن ہشام تے طبری نے ایہ گل دسی اے کہ رسول خداؐ نے جناب عدی بن حاتم نوں ای اوہناں دے علاقے وچ ایڈمنسٹریٹر مقرر کر دتا سی تے ایوں اوہ بنوٹے واپس پرت گئے۔ ڈبلیو۔ ٹنگمری واٹ نے وی ایسے گل نال اتفاق کیتا اے تے اوس نے گورنراں، والیاں یاں حاکماں (administrators) دی فہرست وچ بنوٹے دے ایڈمنسٹریٹر دے طور تے جناب عدی بن حاتم دا ای نام لیا اے ﴿

* * * *

غزوہ تبوک


تبوک:

مدینے توں دمشق ول جائیے تے تقریباً درمیان وچ عرب دا ایہہ مشہور شہر آؤندا اے۔ عہد نبوی وچ ایہ علاقہ قیصر روم دے زیر اثر سی تے ہن اوہ ہولی ہولی اسلام دے نور نال روشن ہونا شروع ہو گیا سی۔ تبوک دے معرکے دے دناں وچ رسول خداؐ اتے لشکر اسلام نے ۲۰ دہیاڑے اتھے ڈیر لائی رکھیا۔ جس تھاں تے رسول خدا نماز پڑھدے ہوندے سن اتھے اک ترک فوجی افسر نے ۱۲۴۵ھ وچ، اپنے خرچے نال، اک مسیت اسار دتی سی۔ پہلوں اتھے لکڑ دی بنی ہوئی اک کئی جی مسیت سی پر اوس دی ہمت نال اتھے اک وڈی تے پکی مسیت بن گئی۔ ہن اتھے ادارہ امر بالمعروف ونہی عن المنکر دا مرکز وی قائم اے۔ اوہدے نال اک پرانا ترکی قلعہ اے جیہڑا ہن جیل دے طور تے استعمال ہوندا اے۔

ایس مسیت دے نیڑے اک چشمہ ہوندا سی جیہڑا ۱۹۵۰ء توں بعد تے ۱۹۵۹ء توں پہلوں دے دناں وچ بند ہو گیا۔ آکھیا جاندا اے کہ ایہی اوہ چشمہ سی جہدے ولوں تبوک جاندیاں رسول خداؐ نے فرمایا سی کہ ”کل تسلیں تبوک دے چشمے تے اپڑو گے، اوہدوں چاشت دا ویلا ہووے گا۔ جے کوئی میرے توں پہلاں اپڑے تے اوس چشمے دا پانی استعمال نہ کرے۔“ جدوں لشکر اسلام اتھے اپڑیا تے دیکھیا کہ دو مجاہد پہلے ای اتھے اپڑے ہوئے نیں تے چشمے توں تبکا تبکا پانی نکل رہیا اے۔ رسول خداؐ دے پچھن تے اوہناں دسیا کہ اوہناں چشمے دا پانی استعمال کر لیا اے۔ آپؐ کجھ خفا ہوئے تے فیر چشمے دا پانی اکٹھا کرن دا حکم دتا۔ صحابہ کرام نے بکاں نال اک پانڈے وچ پانی اکٹھا کیتا تے حضور نوں پیش کیتا۔ آپؐ نے اوس پانی نال اپنا چہرہ مبارک تے ہتھ دھوئے، تے فیر اوہ پانی چشمے تے وگا دتا۔ ایہ پانی چشمے تے ڈگن دی ڈیر سی کہ چشمے دا پانی ایوں چل پیا جیکوں نہر وگدی اے۔ سارے لشکر نے پانی رچھ کے پیتا، پانڈے تے مشکاں وی بھر لئیاں پر پانی وگدا رہیا تے ہن تیکر وگ رہیا اے۔

۱۹۵۰ء دے دھا کے وچ اوس علاقے وچ کوئی ۲۵ دے نیڑے تریڑے ٹیوب ویل لا دتے گئے۔ مولانا مودودی دے شریک سفر محمد عاصم الحداد لکھدے نیں کہ ۱۹۵۹ء وچ سانوں (عاصم الحداد تے مولانا مودودی نوں) تبوک دے محکمہ شرعیہ دے رئیس شیخ صالح اک ٹیوب ویل تے لے گئے جتھے اسیں دیکھیا کہ چار انچ دا پائپ لگا ہویا اے تے اوہدے وچوں پورے زور نال پانی نکل رہیا سی پر اوہدے تے کوئی موٹریاں مشین نہیں لگی ہوئی سی۔ اوہناں دسیا کہ باقی ٹیوب ویلاں دا وی نیڑے تریڑے ایہی حال اے۔ رسول خداؐ دے ایس معجزے موجب تبوک وچ مدینے تے خیبر توں وی ودھ پانی لہھدا اے تے اتھے باغ ای باغ لگ رہے نیں۔

ایس معجزے والے دن رسول خداؐ نے حضرت معاذ نوں مخاطب کر کے فرمایا سی کہ ”اے معاذ! جے تہاڈی حیاتی ری

تے ایس علاقے نوں باغاں نال بھریا ہوئیا دیکھو گے۔“ ساڈے آقا دا فرمان آج ایذا درست ثابت ہوئیا اے کہ مولانا مودودی دے لکھن موجب سعودی عرب دے دُجے سارے شہراں دی نسبت او تھے پھل سستے تے وافر لہجہ دے نیں  جنگ دے اسباب:

پورے عرب دے وچ اسلام بڑی تیزی نال پھیل رہیاسی۔ یہودی، عیسائی تے مشرک سارے دے سارے کسے نہ کسے طرحاں اسلام دے نیڑے ہو گئے سن۔ جیہڑے اے مسلمان نہیں ہوئے سن یاں ہوئے سن پر دلوں نہیں ہوئے سن اوہ وی یاں تے مسلماناں دے مطیع ہو گئے سن یاں دلوں مسلمان ہون دا سوچ رے سن۔ ہن دنیا دیاں دجیاں قوماں تیکر اللہ دا سنہیا اڑانا سی تے اوس دے دواہی طریقے سن، اک خطاں یاں قاصداں دے راہیں دعوت دینا تے دُجا آپوں اوہناں دے گھرا پڑ جانا۔ رومیائے پہلا طریقہ ورتیا جا چکیا سی سگوں جنگ موتہ وچ دُجا طریقہ وی آزمایا گیا پر اوہ معرکہ وی خاص کارگر ثابت نہ ہوئیا۔ ہن کوئی اگلا قدم ضروری جا پدا سی۔

اسلام دا عروج دیکھ کے اوہ بوہت سارے قبیلے جیہڑے رومیائے دے باجگزار تے مطیع سن، اپنی رضا نال اسلام دے حلقے وچ داخل ہو رے سن کیوں جے اوہ سمجھدے سن کہ دنیا دی حیاتی وی کوڑے تے تلوار توں محفوظ ہو جائے گی تے اگلی زندگی وی، جیہڑی ہمیش دی زندگی اے، عذاباں توں بچ جاوے گی۔ رومیائے نوں ایہ گل چنگی لگدی تے کیوں لگدی؟ ایوں اوہناں اندروں اندر وس کھانی شروع کر دتی سی۔ مثال موجب قبیلہ جذام دے علاقے وچ روم دے مقرر رکیتے گورنر جناب فروہ بن عمرو نے اسلام قبول کر لیا تے ہر قل نے اپنے حاکم ابو شمر غسانی نوں حکم دتا کہ اوہ جناب فروہ نوں غداری دے جرم وچ گرفتار کر لوے۔ جدوں اوہناں نوں ہر قل دے سامنے پیش کیتا گیا تے اوس نے فروہ نوں فیر توں عیسائی بنان لئی بڑے جتن کیتے پر اوہ فروہ جے اے کل جنگ موتہ وچ ہر قل دے نال رل کے اسلام دے خاتمے لئی محاربہ کیتا سی ہن کسے وی طرحاں اسلام دا دامن چھڈن لئی تیار نہ ہوئیا۔ ایوں پہلوں اوہناں دا سرتن توں جدا کیتا گیا تے فیر دُجیاں نوں سبق سکھان لئی اوہناں نوں سولی تے چڑھا دتا گیا۔ جناب فروہ دی شہادت مسلماناں لئی بڑی وڈی سٹ سی تے خاص طور تے قلب محمدؐ تے جیہڑی بیتی ہووے گی، اوس دا اندازا کر لوؤ۔ ایویں دے متکبر شہنشاہ نوں راہ راست تے لیاؤن دی کوشش فرض بن گئی سی۔ تے ایس فرض نوں چھیتی توں چھیتی ادا کرنا ضروری سمجھیا گیا۔

ایہ تے سی مسلماناں دی سوچ وچار، پر دُجے پاسے قیصر روم دی پریشانی وی پیروں پیرودھ ری سی۔ اوس نوں فکری کہ:

i روم والیاں دے تجارتی کارواں جیہڑے شمال توں جنوب ول جانندے سن، اوہناں دے رستے عرب دے وچوں لنگدے سن۔ اوہناں نوں پریشانی ایہی سی کہ جے مسلمان سارے جزیرے تے قابض ہو گئے تے اوہناں دے تجارتی قافلے محفوظ نہیں رہن گے۔ ایوں اوہناں نوں اک تگڑی معاشی سٹ وچے گی۔

ii جزیرہ عرب دے شمال وچ روم دے باجگزار تے مطیع قبیلے، مسلماناں دے طاقتور ہون دیاں سارای، ہتھوں نکل جان گے۔ جہدے نال ناں صرف روم نوں سیاسی تے معاشی نقصان ہووے گا سگوں اوہ قبیلے تجارتی قافلیاں دی جیہڑی

سفر نامہ ارض القرآن از مولانا مودودی تے اٹلس سیرت نبی، از شوقی ابوخلیل

حفاظت کر دے میں اوہ وی مک جائے گی۔

iii رومی سلطنت دا سرکاری مذہب عیسائیت سی۔ اسلام دے غالب آؤن نال اوس پورے منطقے وچ عیسائیت دا جنازہ نکل جاوے گا۔

iv رومی تے ایرانی ہمیش حالت جنگ وچ رہندے سن۔ ہر قل نوں ہر ویلے ایہ خطرار ہنداسی کہ کدرے ایرانی اوہناں تے جنوب ولوں حملہ نہ کر دیں۔ ایس لئی اوہ جزیرہ نما عرب تے اپنا تسلط قائم کر کے اپنے ملک دیاں جنوبی سرحدیں توں بے فکر ہونا چاہندے سن۔

مدینے تے روم دیاں ریاستاں ایہناں سوچاں وچ ڈبیاں ہوئیاں سن تے شام دا اک تجارتی جتھا میدہ، تیل تے کچھ دُجیاں چیزاں لے کے مدینے اپڑیا۔ اوہناں نے دسیا کہ ہر قل نے چالی ہزار (۴۰۰۰۰) سپاہیاں دا اک لشکر جرار تیار کر کے روم دے اک تجربہ کار تے ماہر کمانڈر دی کمان وچ دے دتا اے۔ اوہناں ایہ خبر دی دتی کہ لحم، جذام، عاملہ تے غسان دے عربی قبیلے وی رومیاں دے نال رلے ہوئے نیں تے اوہ نہ صرف مدینے تے حملہ دی تیاری کیتی بیٹھے نیں، سگوں اوہناں دا اک جاسوسی جتھا، مقدمتہ الحیش، بلقاء دی تھاں تے اپڑ گیا اے۔

رسول خدا دا اپنا جاسوسی دا شعبہ (انٹیلی جنس ونگ) وی ایس طرحاں دیاں خبراں دے رہیاسی کہ اہل روم نے پوری تیاری کر لئی اے تے ہر قل نے بہت ساری دولت عرب قبیلیاں وچ وی ونڈ دتی اے تاں جے اوہناں نوں رومی فوج دی مدد لئی تیار کیتا جاوے۔ ایس توں کھ ہر قل نے اپنی بقاعدہ تے تنخواہ دار فوج نوں اک سال دی پیشگی تنخواہ وی دے دتی سی تاں جے اوہناں نوں کچھ بال بچے دے روٹی پانی دی فکر نہ لگی رہوے۔

بس جنگ:

رسول خدا دا ہمیش ایہ طریقہ رہیاسی کہ آپ جدوں اپنے اصحاب نوں جنگ دی تیاری دا حکم دیندے سن تے اوہناں نوں بس تیاری کرن دا ہی آکھدے سن، منزل یا میدان جنگ دی نشان دہی نہیں کر دے سن۔ پر ہن سپہ سالار اعظم نے چوکھے ترے ہوئے اکھراں وچ ایہ اعلان کر دتا سی کہ اوہناں دا جوڑ ہر قل روم نال پوے گا جہدے لئی چوکھا سامان حرب، چوکھا توشہ، چوکھا حوصلہ تے چوکھے عطیے دی لوڑ پوے گی۔ اوہ اکتوبر دا مہینا سی؛ درختاں توں ڈگن والے ٹکے دے پھل درختاں دے مالکاں دے اڈکین ہارسن؛ گرمی ابے پورے جو بن تے سی؛ روزیاں وچ زرا مہینا، ڈیڑھ مہینا باقی رہنداسی؛ بوجھے تے پڑو لھے سکھنے ہوئے پے سن؛ پندھ چوکھا لماسی تے دشمن دی طاقت دا پہلوں ای مسلماناں نوں کچھ اندازا ہے سی۔ ایوں دے حالات وچ حکم خداوندی سنایا گیا:

﴿إِنْفِرُوا خِفَافًا وَثِقَالًا وَجَاهِدُوا بِأَمْوَالِكُمْ وَأَنْفُسِكُمْ فِي سَبِيلِ اللَّهِ ذَلِكُمْ خَيْرٌ لَّكُمْ إِنِ

كُنْتُمْ تَعْلَمُونَ﴾ (توبہ: ۴۱)

”نکل پوؤ (جہاد لئی) ہولے اویاں بھارے، تے اپنے مالاں تے اپنیاں جاناں نال اللہ دے رستے تے جہاد کرو۔ ایہ تہاڈے لئی چنگا اے، جے تسین سمجھ سکو تے۔“

رسول خدا نے اہل مدینہ توں ہٹ کے اہل مکہ تے عرب دے دُجے قبیلیاں نوں وی سنبھا گھلیا کہ اوہ لڑائی لئی نکلن وچ دیر نہ کرن۔ آپؐ نے مسلماناں نوں جہاد دی فضیلت یاد کرائی، صدقہ تے خیرات دی ترغیب دتی تے حکم دتا کہ چنگا تے چوکھا مال دفاعی فنڈ وچ دیو، تاں جے رُوم دے رستے وچ کسے طرحاں دا کوئی گھانا محسوس نہ ہووے۔ ایس ہلا شیری تے سنہے پتراں دے نال ای قبیلے تے برادریاں دے ٹھٹھ چارے پاسیوں مدینے وَل نئے آوندے سن۔ نہ رُکھاں تے لمکے پکے ہوئے پھل رستے دی کندھ بنے تے نہ تپاں تے لوواں مجاہداں دے ارادے بدل سکیاں۔ ایوں ویکھدیاں ای ویکھدیاں تیبہ، بتی (۳۰، ۳۲) ہزار مجاہداں دا ٹھاٹھاں ماردا سمندر قیصر رُوم دے غرور تے تکبر نوں روڑھ کے لے جان لئی بے تاب دسن لگ پیا۔ اجے اوہ وفا دار یاران محمدؐ وکھ سن جنہاں دے پلے کوئی شے نہیں سی۔ اوہناں فاقہ مست عاشقاں کول سامان حرب تے سواری تے دریڈی گل سی، اک ویلے دے اُن پانی دا وی بندوبست نہیں سی۔ اوہ رسول خدا کول آئے کہ جے اوہناں لئی سواری دا بندوبست ہو جائے تے اوہ جہاد تے جان لئی تیار نہیں۔ جدوں حضورؐ نے فرمایا کہ دوستو! مجبوری اے، میرے کول تہاڈے لئی سواری دا کوئی انتظام نہیں ہو سکنا تے اوہ جہاد توں کچھ رہ جان پاروں ایڈے غمزدہ ہوئے کہ اوہناں رونا شروع کر دتا۔ اللہ نوں رونا ہمیش ای چنگا لگا اے۔ مجاہدین اسلام دے ایہ اتھرو وی ایڈا مل پانگئے کہ اللہ نے اوہناں دا قرآن پاک وچ ذکر فرمایا اے:

﴿لَا أَحَدٌ مَّا أَحْمَلُكُمْ عَلَيْهِ تَوَلَّوْا وَاعْتَنَاهُمْ تَفِيضٌ مِّنَ الدَّمْعِ حَزَنًا أَلَّا يَجِدُوا مَا يُنْفِقُونَ﴾

(توبہ: ۹۲)

” (نبی فرماندے) میرے کول تے تہاڈی سواری لئی کجھ نہیں تے اوہ ایس حال وچ واپس جاندے کہ اوہناں دیاں اکھاں وچ اتھرو ہوندے کہ اوہناں کول خرچ کرن لئی کجھ نہیں۔“

امام ابن کثیر لکھدے نیں کہ جدوں مجاہداں دا لشکر اکٹھا ہونا شروع ہو گیا تے کجھ بندے آئے جنہاں وچ حضرت عبداللہ بن مغفل وی سن۔ اوہناں عرض کیتی کہ ”حضور ساڈے کول سواریاں نہیں، جناب ساڈے لئی سواریاں دا انتظام کر دین تاں جے اسیں وی راہ خدا وچ جہاد کرن دا تے حضور دا ساتھ دین دا شرف حاصل کریے۔“ آپؐ نے جواب دتا کہ واللہ! میرے کول تے اک وی سواری نہیں۔ اوہ نا اُمید ہو کے روندے ہوئے تے چوکھے غمزدہ ہو کے گئے۔

جنگ تبوک دے حوالے نال اہل مدینہ نوں اسیں چھ طبقیات وچ ونڈ سکدے ہاں، جیہڑے ایہ نیں:

- i اوہ لوگ جیہڑے حکم سن دیاں ساراں جہاد لئی تیار ہو گئے۔
- ii اوہ لوگ جیہڑے کجھ دیر سوچ وچا کر دے رے تے فیر جہاد لئی نکل پے۔
- iii اوہ لوگ جیہڑے جائز عذر دی بناء تے جہاد وچ نہ رل سکے۔
- iv اوہ لوگ جیہڑے بلا عذر زری سستی پاروں کچھ رہ گئے۔
- v اوہ منافقین جنہاں اسلام لئی اوکھا کم کرنا ای نہیں سی، ایس لئی اوہ نال نہ ٹرے۔

vi منافقاں دا اوہ جتھا جیہڑا نال تے ٹر پیا پر اوہناں دا مقصد جہاد نہیں سی سکوں جاسوسی، شرارت تے تماشا ویکھنا سی۔
تے جے تعداد نوں ویکھئے تے کچھ رہ جان والے لوگاں دی تعداد آٹے وچ لون دے برابر سی۔ چیتے رہوے کہ
اسلامی توارخ وچ اوہناں نوں مخلفین دے نام نال یاد کیتا جاندا اے۔ ایہناں وچ کجھ ایہ جے منافق دی سن جہاں جہاد لئی نہ
نکلن دا پکا ارادہ کیتا ہو یا سی۔ اوہ دُجیاں نوں وی ایہ آکھدے سن:

﴿وَقَالُوا لَا تَنْفِرُوا فِي الْحَرِّ قُلْ نَارُ جَهَنَّمَ أَشَدُّ حَرًّا لَوْ كَانُوا يَفْقَهُونَ ۝ فَلْيَضْحَكُوا قَلِيلًا
وَلْيَبْكُوا كَثِيرًا جَزَاءً بِمَا كَانُوا يَكْسِبُونَ﴾ (توبہ: ۸۲، ۸۱)

”تے اوہ لوکاں نوں آکھن لگ پے کہ ایس گرمی وچ گھروں نہ نکلتا۔ (اے محبوب) تسیں آکھو کہ جہنم دی
اگ چوکی تیز اے، پر جے ایہناں نوں سمجھ ہووے تے تاں اے۔ بس فیر اوہ ہسن گے تھوڑا تے رون گے
چوکھا۔ ایہ بدلہ ہووے گا اوس دا جو اوہناں کمایا اے۔“

اوہناں منافقاں وچ اک جد بن قیس وی سی جس نوں رسول خدا نے پچھیا کہ کیہ توں بنوا صغر (روم دا عیسائی قبیلہ) نال
جہاد لئی نہیں جاویں گاتے اوس نے جواب دتا کہ یا رسول اللہ! سب نوں پتہ اے کہ میں عورتاں دے معاملے وچ کوں دا
ہاں۔ بنوا صغردیاں سوانیاں دا حسن و جمال پوری دنیا وچ مشہور اے۔ اوہناں نوں ویکھ کے میں اپنے آپ نوں قابو وچ نہیں
رکھ سکاں گا۔ جد دی ایہ بے ہودگی سن کے رسول خدا نے رُخ انور دُجے پاسے پھیر لیا۔ ایس واقعے دا قرآن نے ایوں ذکر
کیتا اے۔

﴿وَمِنْهُمْ مَّنْ يَقُولُ ائْتِنِي لِي وَلَا تَفْتِنِّي اَلَا فِي الْفِتْنَةِ سَقَطُوا وَإِنَّ جَهَنَّمَ لَمُحِيطَةٌ
بِالْكَافِرِينَ﴾ (توبہ: ۴۹)

”تے اوہناں وچ اوہ (خبیث) وی اے جیہڑا آکھدا اے کہ میں توں کچھ رہ جان دیو تے میں توں کسے مصیبت
وچ نہ پاؤں۔ مصیبت تے آئے گی، تے جہنم کافراں نوں گھیر یا ہو یا اے۔“

انفاق فی سبیل اللہ:

جوں کہ میں کچھ عرض کیتی اے، ایس وڈے سارے معرکے لئی ڈھیر سارے فنڈ تے حربی سامان دی لوڑ سی تے
رسول خدا نے مسلماناں نوں ایہ کم چیتے وی کرا دتا سی۔ مسلماناں نے ایس اکھی گھڑی وچ اسلام دے ہچکولے کھاندے
بیڑے نوں ڈبن توں بچان لئی اک دُجے توں ودھ کے جتن کیتے۔ حضرت طلحہ، حضرت سعد بن عبادہ، حضرت محمد بن مسلمہ
تے حضرت عباس جے اصحاب نے تے مال دے ڈھیر لا دتے۔ حضرت عاصم بن عدی نے زاد راہ دے طور تے تقریباً ۱۳
ٹن کھجور حضور دے قدماں وچ لیا رکھی۔ جوش و جذبے دا حال ایہ سی کہ مسلمان سوانیاں وی مجاہداں دی مدد توں کچھ نہ
رہیاں۔ اوہناں اپنے ہار، بازو بند، پازیاں، کٹاں دیاں والیاں تے مندریاں تیکر جہاد فنڈ وچ جمع کرا دتیاں۔ جہناں
لوکاں کول دین لئی کجھ نہیں سی اوہ کجھ وراں دی لپ ای دین آگئے۔ مدینے دے پرانے منافقاں دا اک ٹولہ ایہ سارا کجھ ویکھ

رہیاسی تے اوہناں دی پالیسی ایسی کہ جے کوئی چوکھا مال لے آؤند اسی تے آکھدے سن کہ ایہ جے ریاکاری تے دکھالا۔
تے جے کوئی دوچار کھجوراں دا عطیہ دیند اسی تے آکھدے سن کہ لوجی، ایہناں کرنی جے قیصر دی حکومت فتح۔

سمیع و بصیر اللہ ایہ سب کجھ سن تے ویکھ رہیاسی۔ اوس دی عادت اے کہ اوہ نتارے کردیند اے۔ حکم ہوند اے:

﴿الَّذِينَ يَلْمِزُونَ الْمُطَّوِّعِينَ مِنَ الْمُؤْمِنِينَ فِي الصَّدَقَاتِ وَالَّذِينَ لَا يَجِدُونَ إِلَّا جُهْدَهُمْ

فَيَسْخَرُونَ مِنْهُمْ سَخِرَ اللَّهُ مِنْهُمْ وَلَهُمْ عَذَابٌ أَلِيمٌ ﴿٧٩﴾ (توبہ: ۷۹)

”اوہ لوگ، جیہڑے اوہناں مسلماناں نوں طعنے دیندے نیں جیہڑے دل کھول کے خیرات کردے نیں تے

اوہناں لوکاں دا مذاق اڈاندے نیں جنہاں کول اپنی محنت مزدوری توں سوا کجھ نہیں، اللہ نے اوہناں

(کافراں) نال ٹھٹھہ تے مذاق (دا بندوبست) کیتا اے۔ تے اوہناں لئی دردناک عذاب اے۔“

اوپر والی آیت مبارکہ وچ جس غریب طبقے دا ذکر کیتا گیا اے تے جہدے ولوں اللہ نے آکھیا اے کہ منافق اوہناں
داخل ہونا بندے نیں، ایس طبقے دے اک نمائندہ حضرت ابو عقیل انصاری نیں۔ اوہناں نے جدوں رسول خدا توں عطیات
جمع کران دا حکم سنیا تے گھر وں ٹر پے۔ جا کے ویکھیا تے گھر کوئی شے نہ نکلی جیہڑی جہاد فنڈ وچ جمع کرائی جاندی۔ اوسے
ویلے اک یہودی کول ٹر گئے تے جا کے ساری رات کھوہ وچ ڈول نال پانی کڈ کڈ کے باغ نوں دین دی مزدوری دو صاع
کھجوراں مکا لئی۔ جناب ابو عقیل انصاری ساری رات کھوہ وچ ڈول کڈ کڈ کے باغ نوں پانی لاندے رے تے سویرے دو
صاع کھجوراں لے کے گھر اپڑ گئے۔ اک صاع کھجوراں گھر والیاں نوں دتیاں تے دُجا صاع اپنے آقادی نذر کر دتا۔ ایوں
دے عطیے تے اللہ دا فرمان تے تسلیں پڑھ لیا اے، ذرا ویکھو کہ اللہ دا محبوب کیہ کرداے۔ ایہ نہیں کیتا کہ ابو عقیل نوں آکھ
دین کہ ایس نال کیہ سورے گا، سگوں اک صحابی نوں حکم دتا کہ ابو عقیل دیاں کھجوراں وچوں دودو کھجوراں توں شے دے ہر ڈھیر
تے سٹ دے جاؤ۔ ایس دے خلوص دی برکت نال اللہ دُجیاں دے صدقات وی قبول فرمائے گا۔ ذرا غور فرماؤ کہ کس کمال
درجے دی حوصلہ افزائی فرمائی گئی جناب ابو عقیل انصاری دی!

حضرت عبدالرحمان بن عوف نے دوسوا قیہ چاندی حضور دی خدمت وچ پیش کیتی تے باقی جتاں مال پلے ہے سی اوس
نوں دو حصیاں وچ ونڈ کے اک حصا جہاد فنڈ وچ دے دتا۔ حضور نے جناب عبدالرحمان بن عوف دا جذبہ ویکھ کے دُعا دتی
کہ ”عبدالرحمن! اللہ تعالیٰ تیرے اوس مال وچ وی برکت دیوے جیہڑا تسیں خرچ کیتا اے تے اوس وچ وی جیہڑا تسیں باقی
رکھیا اے۔“

جناب عبدالرحمان بن عوف نوں ملن والی دُعا دا نتیجہ ایہ نکلیا کہ اوہناں کول مال دولت دے ڈھیر لگ گئے تے اوس
نوں سانہنا مشکل ہو گیا۔ اوہناں نے جدوں وی محسوسیا کہ اللہ دے رستے تے خرچ کرن دی لوڑ اے، اوہناں گھٹ نہیں
کیتی۔ اک وار چار ہزار درہم، اک وار چالی ہزار دینار، اک واری پنج سو گھوڑے تے فیر اک واری پنج سو اٹھ اللہ دی راہ
تے دے دتے۔ اوہناں نوں ہمیش ای خیال رہیا کہ اوہناں کول مال دولت دی ریل پیل رسول رحمت دی دُعا پاروں ای
ہے، ایس لئی اوہناں دا مال اوہناں دی وصیت موجب اوہناں دے چلانا کرن توں بعد وی مسلماناں وچ ونڈیا جاندا رہیا۔

حضرت عثمان غنی دی فیاضی پہلوں ای مشہوری۔ اوہناں نے پورے لشکر دے تے جھے دی ذمہ داری لے لئی تے ایوں اوہناں دیاں سواریاں، تلواراں تے زرخاں غرض ساری تیاری دا خرچہ دے دتا۔ حضرت حذیفہ نے بعد والے دناں وچ اک واری دسیا کہ غزوہ تبوک دے موقع تے جناب عثمان اپنے آقا کول آئے تے دس ہزار دینار اوہناں دی جھولی وچ پلٹ دتے۔ حذیفہ آکھدے نیں کہ میں اوس ویلے حضور کول موجود ساں۔ آپ اوہناں دیناراں نوں محبت نال اُلٹ پلٹ کردے رے تے نالے دُعا فرمادے رے کہ ”اے اللہ! میں عثمان تے راضی ہاں، تسیں وی ایس تے راضی ہو جاؤ۔“ فیر جناب عثمان ذوالنورین نوں مخاطب کر کے فرمایا کہ عثمان! آج توں بعد تسیں جووی کرو، تہانوں کوئی ضرر نہیں۔ ایس دُعا توں بعد جناب عثمان نے ہور صدقہ کیتا تے سامان لیانا شروع کر دتا۔ ایتھوں تیکر کہ نقدی توں وکھ ۹۰۰ اونٹ تے ۱۰۰ گھوڑے خدمت اقدس وچ پیش کر دتے۔ کفر نال جوڑ پیندا تے عمر فاروق جے بندے پچھے رہ جاندا، ایہ کیوں ہو سکدا سی؟ آپ نے اپنا سارا مال اسباب درہم کٹھے کیتے تے اوس وچوں ہر چیز دا ادھ کر کے جناب رسول خدا دی خدمت وچ پیش کر دتا۔

..... خدا دار رسول بس:

جیسی اُچی شان والی ہستی دے صدقات تے قربانی دا ذکر بہن کیتا جا رہیا اے اوہ ہستی جناب ابوبکر صدیق دی اے۔ ایہ اوہ ہستی اے جس نوں کجھ کہن سنن دی ضرورت نہیں سی ہوندی۔ اوہ حالات ویکھدے سن، اپنے آقا دے چہرہ مبارک تے نظر پاؤندے سن، آپ دے ارشاد مبارک دھیان نال سندے سن تے فیر اوہ رفیق نبوت اوہ کجھ کر گزر دے سن جو کجھ سرور عالم چاہ رے ہوندے سن۔ تبوک دی ایس مہم وچ ابھی کجھ ہوئیا۔ صدیق اکبر نے گھر دی ہر شے بھی تے جا کے یار دے قدماں وچ ڈھیر کر دتی۔ نبی رحمت نے جدوں یار غار دے تیور ویکھے تے دلیل آئی کہ پچھاں کہ گھرائی کیہہ چھڈیا ہے؟ ارشاد فرمایا: هَلْ اُبْقِيَتْ لِاهْلِكَ شَيْءٌ؟ (کیہ اہل عیال لئی وی کجھ چھڈ آئے او؟)

﴿اُبْقِيَتْ لَهُمُ اللّٰهُ وَرَسُوْلُهُ﴾

”گھر والیاں لئی اللہ تے اوس دے رسول نوں چھڈ آئیا ہاں۔“

ذرا ویکھو کہ اسلام دے ترجمان، شاعر مشرق ایس واقعے نوں کوں لکھدے نیں:

| | |
|--|--|
| اک دن رسول پاکؐ نے اصحابؓ سے کہا | دیں مال راہِ حق میں جو ہوں تم میں مالدار |
| ارشاد سن کے فرطِ طرب سے عمرؓ اٹھے | اُس روز اُن کے پاس تھے درہم کئی ہزار |
| دل میں یہ کہہ رہے تھے کہ صدیقؓ سے ضرور | بڑھ کے رکھے گا آج قدم میرا راہوار |
| لائے غرض کہ مال رسولؐ امیں کے پاس | ایثار کی ہے دست نگر ابتدائے کار |
| پوچھا حضورؐ سرورِ عالم نے اے عمرؓ! | اے وہ کہ جوشِ حق سے ترے دل کو ہے قرار! |
| رکھا ہے کچھ عیال کی خاطر بھی تو نے! | مسلم ہے اپنے خویش واقارب کا حق گزار |

کی عرض نصف مال ہے فرزندو زن کا حق

باقی جو ہے وہ ملت بیضا پہ ہے نثار

اتنے میں وہ رفیق نبوت بھی آ گیا جس سے بنائے عشق و محبت ہے اُستوار
 لے آیا اپنے ساتھ وہ مرد وفا سرشت ہر چیز، جس سے چشم جہاں میں ہو اعتبار
 ملک یمن و درہم دینار و رخت و جنس اس قمر سم و شتر و قاطر و حمار
 بولے حضور، چاہیے فکر عیال بھی کہنے لگا وہ عشق و محبت کا راز دار
 اے تجھ سے دیدہ مہ و انجم فروغ گیر اے تیری ذات باعث تکوین روزگار
 پروانے کو چراغ ہے بلبل کو پھول بس
 صدیق کے لیے ہے خدا کا رسول بس!

(بانگ درا)

لشکرِ دا کوچ:

لشکرِ اسلام نے تیاری مکمل کر لی تے ریاست دے سربراہ جناب رسولِ خداؐ نے جناب محمد بن مسلمہؓ نوں قائم مقام مقرر
 کیتا، اہل بیت دی حفاظت لئی سیدنا علی المرتضیٰؓ نوں ذمہ داری دتی تے لشکرِ نوں کوچِ دا حکم دتا۔ شیر خدا علیؓ نوں مدینے وچ
 ویکھ کے منافقاں تے یہودیوں نے گلاں بنائیاں شروع کر دتیاں۔ علیؓ نہ بزدل سن تے نہ ای اناڑی، فیرا وہناں لوکاں نے
 کویں دیاں ٹچکراں کیتیاں ہون گئیاں۔ یقیناً ایہ کہ محمد رسول اللہؐ نے اپنے جوانی نوں جنگ دیاں اوکڑاں توں بچا لیا۔
 سیفِ رسول، سیفِ خدا علی المرتضیٰؓ ایویں دے مہنے کویں سن سکدے سن؟ جسم تے ہتھیار نبھے تے لشکر دے کچھے دوڑ پے۔
 اے لشکرِ اسلام جرف دی تھاں تے اپڑیا سی تے جناب علیؓ او تھے اپڑ گئے۔ آپؐ نے رسولِ خداؐ نوں مدینے دیاں رنگ
 برنگیاں بولیاں سنائیاں تے لشکر دے نال جان دی اجازت منگی پر رسولِ خداؐ نے آپؐ نوں اجازت نہ دتی تے واپس مدینے
 پرتن دی ہدایت کر دیاں ہوئیاں فرمایا کہ ”اے علیؓ! کیہ تسیں ایس گل تے راضی نہیں کہ میرے نال تہانوں اوہی نسبت
 ہووے جیہڑی موسیٰؑ نال ہارون نوں سی، پر میرے بعد نبی کوئی نہیں ہووے گا۔“

جناب رسولِ خداؐ دے حکم دی تعمیل وچ شیر خدا علیؓ مدینے پرت گئے تے لشکرِ اسلام اگے ٹر پیا۔ سامانِ حرب دی کمی،
 اناج دی کمی، سواریاں دی کمی تے ہر چیز دی کمی ای کمی سی۔ جے کوئی شے وافر سی تے اوہ ایمانی جذبہ سی جہدے سر تے لشکر
 اگے ودھدا رہیا۔ حالت ایسی کہ اٹھارہ مجاہداں دے حصے وچ اک سواری آؤندی سی تے خوراک دی کمی دا ایہ عالم سی کہ مجاہد
 اک ویلے درختاں دے پتے کھان تے مجبور ہو گئے۔ مجبوراً سواری دے اوٹھاں نوں ذبح کرنا پیا تے ایویں پیٹ دی اگ
 بجھائی۔ اوٹھاں دے معدیاں تے آندراں دے اندروں نکلن والے پانی تے تری نال ہونٹھ گیلے کر کے مجاہداں نے اپنی
 پیاس دور کیتی۔

تبوک وُل جان دیاں لشکرِ اسلام دا گزر قومِ شمود دی تباہ ہوئی وستی وچوں وی ہوئی۔ جدوں رسولِ خداؐ او تھوں لنگھے تے
 آپؐ نے اپنے چہرہ مبارک تے کپڑا پالیا تے اپنی سواری نوں اڈی لائی تاں جے اوہ چھیتی او تھوں لنگھ جاوے۔ حضرت ابن
 عمرؓ نوں روایت اے کہ آپؐ نے ہدایت فرمائی سی کہ ظالماں (قومِ شمود) دے گھراں وچ نہ جانا، کدرے ایہ نہ ہووے کہ

تھاڑے تے وی اوہی مصیبت آپوے جیہڑی اوہناں تے آئی سی، ہاں اللہ دے ڈرتوں روندے ہوئے گزر جانا۔ آپ نے حجر نام دی اوس وتی دا پانی نہ استعمال کرن دا وی حکم دتا تے فرمایا کہ جے ایس پانی نال کوئی آٹا گھنیا جے تے اوہ جنوراں نوں کھواد یو، آپ نہ کھایا جے۔ آپ نے فرمایا کہ پانی صرف اوس کھوہ توں لینا جس توں حضرت صالح دی اوٹنی پانی پیندی ہوندی سی۔

اگے گئے تے پانی فیر مک گیا۔ پیاس نال حال ایہ ہو گیا سی کہ مجاہداں نے مجبوراً رسول خدا اگے التجا کیتی کہ یا رسول اللہ! پانی توں بغیر برا حال اے۔ آپ نے اللہ اگے دعا کیتی تے اوسے ویلے بدل آ گیا۔ چنگی رَجھویں بارش ہوئی۔ مجاہداں نے رَج کے پانی پیتا تے اگلے سفر لئی نال وی لڈ لیا۔ کجھ ہورا اگے گئے تے حضور نے فرمایا کہ کل انشاء اللہ تسیں تبوک دے چشمے تے اپڑ جاؤ گے پر چاشت توں پہلوں نہیں۔ فیر ایوں ای ہوئی، رسول خدا دے ارشاد دے عین مطابق اگلے دن چاشت ویلے لشکر او تھے اپڑ گیا۔ راہ وچ کجھ اجے واقعے وی ہوئے جہناں دا ذکر کرنا ضروری جا پدا اے۔

رسول خدا دی ناقہ قصواء کھڑ تیج گئی:

اک راتیں رسول خدا دی اوٹنی قصواء کدرے گم ہو گئی۔ صحابہ کرام اوس دی تلاش وچ بھج دوڑ کر رہے سن۔ بنو قینقاع دا اک یہودی زید بن لصیت، جیہڑا ویکھن نوں تے مسلمان ہو چکیا سی پر دلوں نہیں سی، آکھن لگا کہ ویکھو محمد دعویٰ کر دے نیں کہ اوہ نبی نیں تے آسماناں دیاں گلاں تہانوں دسدے نیں پر اوہناں نوں ایہ نہیں پتہ کہ اوہناں دی اٹھنی کتھے گئی اے۔ زید اوس خیمے وچ سی جہدے وچ حضرت عمارہ ٹھہرے ہوئے سن پر زید نے ایہہ گل عمارہ دے سامنے نہیں کیتی۔ عمارہ رسول خدا کول اپڑے تے آپ فرمان لگے کہ ویکھو اک منافق میرے ولوں ایہ آکھ رہیا اے کہ میں اللہ دا نبی ہاں، آسمان دیاں گلاں تہانوں دسدیاں ہاں پر اپنی گم ہوئی اوٹنی دا مینوں پتہ نہیں کہ اوہ کتھے ہے۔ فیر فرمایا کہ بخدا، مینوں صرف اوس گل دا پتہ ہوندا اے جیہڑی میرا رب مینوں دسد اے۔ ہن میرے رب نے مینوں دس دتا اے کہ میری اٹھنی فلانی وادی دی فلانی نکر وچ اے تے اوس دی ٹکیل اک رکھ نال اڑی ہوئی اے، جاؤ تے اوتھوں اٹھنی پھڑ لیاؤ۔ صحابہ کرام گئے تے اوس تھاں توں قصواء دی اڑی ہوئی ٹکیل لاہ کے اوس نوں پڑاؤ ول لے آئے۔

جدوں جناب عمارہ اپنے خیمے ول واپس پر تے تے اوہناں حیران ہو کے گل کیتی کہ رسول خدا نے کسے منافق ولوں ایہ ایہ کجھ فرمایا اے۔ اوسے خیمے وچ بیٹھے عمارہ دے بھرا اوسے ویلے بول پے کہ ایہ گلاں تے زید بن لصیت نے کیتیاں نیں۔ حضرت عمارہ غصے نال لال پیلے ہو گئے تے زید نوں دھونوں پھڑ لیا تے آکھیا کہ اللہ دیا دشمن! میرے خیمے وچوں فوراً نکل جا۔

حضرت عبدالرحمن بن عوف دی امامت:

حضرت مغیرہ بن شعبہ دی اک روایت موجب لشکر اسلام نے حجر تے تبوک دے وچکار اک تھاں تے ڈیرہ لا لیا ہوئی سی۔ سویرے رسول خدا قضاے حاجت لئی گئے تے واپسی تے کجھ دیر ہو گئی۔ مجاہداں نے قضا دے ڈرتوں عبدالرحمن بن عوف دی امامت وچ نماز شروع کر دتی۔ جدوں رسول خدا واپس تشریف لیاے تے جناب عبدالرحمن اک رکعت پڑھا چکے سن۔ صحابہ نے اُچی واج نال تسبیح آکھی تاں جے حضرت عبدالرحمن نوں رسول خدا دے آؤن دا پتہ لگ جاوے۔ جناب

عبدالرحمنؓ نے وی پچھے ہون دا ارادہ کیتا پر اوہنے چہ وچ رسول خداؐ نے نماز نیت لئی سی۔ دُجی رکعت آپؐ نے طریقے دے مطابق سلام توں بعد ادا کیتی۔ فیر مسلماناں نوں فرمایا کہ تسبیح درست فیصلہ کیتا سی کہ نماز ویلے نال پڑھ لئی تے سن لوؤ کہ کوئی نبی چلانا نہیں کردا جدوں تیکر اوس دی اُمت دا کوئی صالح مرد اوس دی امامت نہ کرائے۔

رسول خدا تبوک وچ:

جوس پچھے ذکر ہو یا اے لشکر اسلام چاشت ویلے تبوک اپڑ گیا سی۔ او تھے جیہڑی پہلی نماز ادا کیتی گئی اوہ ظہر دی نماز سی۔ رسول خداؐ نے امامت فرمائی۔ جس تھاں تے رسول خداؐ مصلے ہوندا سی، اوس تھاں تے اوہ مسجد بنائی گئی اے جہد الیس باب دے شروع وچ ذکر ہو یا اے۔

لشکر اسلام رومیوں نال ٹکر لین لئی تیار سی۔ ایس توں پہلاں کہ جوڑ پیندا رسول خداؐ نے اک شاندار خطاب فرمایا جہدے وچ دنیا تے آخرت دی بھلیائی دیاں گلاں دسیاں، اللہ دے عذاب توں ڈرایا تے اوس دے انعاماں دی خوشخبری سنائی تے حوصلے اُچے رکھن دی تاکید کیتی۔ آپؐ نے چیتے کرایا کہ سب توں چنگی موت شہادت دی موت اے تے اخیرتساں ساریاں چارہتھاں دے اک ٹوے (قبر) وچ جانا اے تے گل آخرت تے ای جا کے کئی اے۔ رسول خداؐ دی جاندار تقریر نے لشکر اسلام وچ اک نویں جان بھردتی تے جہاد دا جذبہ ڈل ڈل پین لگ پیا۔

رُومی فوج نوں جدوں اسلام دے لشکر جرار دا پتا لگا تے اوہ تبوک توں پچھے ہٹ گئی تے اپنے شہراں وچ کھل پلر گئی۔ ایوں میدان جنگ وچ مسلماناں دا تسلط تے غلبہ ہو گیا۔ ایس تسلط نال مسلماناں دی سیاسی ساکھ ہور بہتر ہو گئی۔ میدان تبوک وچ اپنے قیام دے دناں وچ رسول اللہؐ نے ایلہ دے حاکم یوحنا بن ربیعہ نوں اک رقعہ گھلیا کہ یاں تے مسلماناں دی زیردستی قبول کر لوے یاں جنگ لئی تیار ہو جائے۔ یوحنا خط دا جواب دین دی بجائے آپوں رسول خداؐ دی خدمت وچ حاضر ہو یا تے جزیہ دینا منظور کر لیا۔ شام دے علاقے جرباء تے اذرح دے وسنیکاں نے وی خدمت نبوی وچ حاضر ہو کے اطاعت قبول کر لئی۔

تبوک وچ قیام دے دناں وچ ای رسول خداؐ نے پنج سو (۵۰۰) سواراں دا اک جتھا حضرت خالد بن ولیدؓ دی کمان وچ دو متہ الجندل دے حاکم اُکیدر وُل گھلیا تے فرمایا کہ تسبیح اوس نوں نیل گائے دا شکار کر دے ویکھو گے۔ جدوں قلعہ صاف دُسن لگ پیا تے قلعے دے دروازے تے اک نیل گاں سنگ رگڑ دی نظر آئی۔ اکیدر اوس دے شکار لئی نکلیا۔ جناب خالد نے اُکیدر تے اوس دے بھراستان نوں اچن چیت اوس ویلے جا پھڑیا جدوں اوہ نیل گائے دا شکار کرن لئی قلعے توں باہر آئے سن۔ حسان تے ماریا گیا پر اُکیدر نوں گرفتار کر لیا گیا۔ جناب خالد بن ولیدؓ نے اہل شہر نوں دھمکی دتی کہ جے شہر دے دروازے نہ کھولے گئے تے اُکیدر نوں قتل کر دتا جاوے گا۔ ایوں شہر دے دروازے کھل گئے تے خالد دے فوجی شہر وچ وڑ گئے۔ او تھوں بوہت سارا مال غنیمت ہتھ آیا پر جدوں اُکیدر نوں رسول رحمت دے حضور پیش کیتا گیا تے آپؐ نے اوس دی جان بخشی کر دتی۔ اوس نے جزیہ دین دے اقرار تے صلح نامہ لکھوایا۔

ایہ اوہ حالات سن جہاں توں رُوم دے باجگزار قبیلیاں تے وسنیاں نے ایہ سمجھ لیا کہ ہن ویلے دی گڈی کسے ہور پاسے

ٹرپنی اے تے ہن پرانے چوہد ریاں تے بھروسا کرن دے دیہاڑے مک گئے نیں۔ ایس لئی اوہ مسلماناں دے حمایتی بن گئے تے ایوں ریاست مدینہ دیاں سرحدیں رومی سرحدیں دے نال جا لگیاں۔

جیہڑے حال وچ مسلماناں نے ایس جنگ دی تیاری کیتی تے جو یں تبوک اپڑے ایس داستان دا مڈھلا اکھرو وی تنگی اے تے اخیر لاوی تنگی اے۔ ایہی وجہ اے کہ ایس معرکے نوں مسلماناں دی حربی توارخ وچ جیشِ عشرہ دے ناں نال وی یاد کیتا جاندا اے۔

دو چادران والے عبداللہ:

مزینہ قبیلے دے اک بندے دا نام عبدالعزیٰ سی۔ عبدالعزیٰ بچپن وچ یتیم ہو گیا سی تے اوس دے چاچے نے اوس دی پرورش کیتی سی۔ وڈا ہو گیا تے اوس دے دل وچ اسلام دے نور نے لاٹاں مارنیاں شروع کر دتیاں پر چاچے نے اسلام قبول توں منع کر دتا۔ جدوں عبدالعزیٰ نے ضد کیتی تے چاچے نے اپنی دتی ہوئی ہر شے کھوہ لئی تے آکھیا کہ لے ہن جو جی کر دا ای کر دا پھر۔ اوہ اکوتہ بند وچ مدینے ول ٹریا۔ جدوں مدینے دے نیڑے آیا تے اوس نے ادب دے طور تے اپنی تہبند دے دوٹوٹے کر لے۔ اک ٹوٹے دی لک دی بنائی تے دُجے نال باقی پنڈا ڈھک لیا۔ رات ہوئی تے مسجد نبوی وچ جا کے لمپے گیا۔ سویرے نماز توں بعد رحمت عالم دی نظر پئی تے آپؐ نے پچھیا کہ ”جوانا! توں کون ایس؟“

”میں عبدالعزیٰ ہاں“ اوس نے جواب دتا۔

دونکیاں نکلیاں چادران نال تن لکائے اوس نیک بخت بندے دے اندر دے کرب تے دُکھ نوں مچھن لگیاں رسول a نوں کوئی دیر نہ لگی۔ آپؐ نے فرمایا کہ آج توں بعد تسمیں عبدالعزیٰ نہیں عبداللہ جے تے تہاڈا لقب ذوالجبار دین اے، یعنی دو چادران والا (چیتے رہوے کہ عزیٰ اک بت دا نام سی تے جاہلیت دے زمانے وچ اوس دے حوالے نال نام رکھے جاندا سن۔ عبدالعزیٰ دا مطلب سی عزیٰ دا بندہ۔)

جدوں لشکر اسلام تبوک ول کوچ کرن لگا تے جناب عبداللہ ذوالجبار دین اپنے آقاؐ دی خدمت وچ حاضر ہوئے تے عرض کیتی کہ یا رسول اللہ! دُعا کرو کہ اللہ تعالیٰ مینوں شہادت نصیب کرے۔ حضورؐ نے اوہناں نوں سامنے اُگے پیری دے رُکھ توں چھلکا لاه کے لیاؤن دا حکم دتا۔ فیر اوہ چھلکا آپؐ نے جناب عبداللہ دی بانہہ تے بٹھ دتا تے ارشاد فرمایا کہ ”یا اللہ! میں ایس دا خون کا فراں تے حرام کر دتا اے۔“ ویکھن نوں ایہ گل جناب عبداللہ دی عرض دے بلکل اُلٹ سی، ایس لئی اوہ چوکھا پریشان ہوئے تے آکھن لگے کہ یا رسول اللہ! میں تے ایس دُعا دی درخواست نہیں کیتی۔ جناب عبداللہ دی ایہ پریشانی ویکھ کے رسول رحمت نے ارشاد فرمایا کہ اے عبداللہ! جے تسمیں اللہ دے رستے تے جہاد دی نیت نال نکلو تے فیر سفر وچ تسمیں بخار نال فوت ہو جاؤ تے فیرونی تسمیں شہید ای ہوؤ گے۔

لشکر اسلام اچے تبوک دی تھاں تے سی تے حضرت عبداللہ ذوالجبار دین نوں تاپ چڑھ گیا تے اخیر ایسے تاپ نال آپؐ چلانا کر گئے۔ اوہناں دی تدفین لئی رسول رحمتؐ آپوں قبر وچ اُترے تے حضرت ابو بکرؓ تے عمرؓ جے اچی شان والے صحابہ نے میت قبر وچ اتارن لئی رسول خداؐ دی مدد کیتی۔ جدوں اوہناں نوں قبر وچ اتار دتا گیا تے حضورؐ نے اوہناں دامنہ قبلہ ول

کر کے دُعا فرمائی کہ اے اللہ! میں تیرے ایسے بندے تے راضی ہاں، تسیں وی ایس تے راضی ہو جاؤ۔ رسول خدا دی زبان مبارک توں ایہ دُعا سن کے حضرت عبداللہ بن مسعود دی زبان توں اپن چیت نکلیا کہ ”کاش، ایس لحد وچ میں دُن ہوندا۔“

مدینے وَل واپسی:

تبوک وچ ۲۰ دناں دے قیام توں بعد جدوں لشکر اسلام واپس پریتا تے منافقاں نے رسول خدا دے قتل دی سازش تیار کیتی۔ ہو یا ایہہ کہ مجاہداں نے حضور دے احترام وچ آپ توں کچھ پرے رہ کے سفر کرن دا فیصلہ کیتا۔ آپ دے نال صرف حضرت عمار تے حضرت حذیفہ سن۔ عمار نے اوٹھنی دی ٹکیل پھڑی ہوئی سی تے حذیفہ اوٹھنی دے پچھے اوں نوں ہک رے سن۔ لشکر دے وچ رلے منافقاں نے ایس موقع نوں غنیمت جانیا تے بار ۱۲ بندے رل کے حضور دے قتل لئی اگے ودھے تے اک گھاٹی تے آپ دارستاؤک لیا۔ اوہناں سب نے مونہاں تے نقاب چڑھائے ہوئے سن۔ رسول خدا نے بڑے زور نال اوہناں نوں لکاریا تے پتہ نہیں اوہناں نوں کیہ ہو یا اوہ اگے لگ کے بھج کھلوتے۔ حذیفہ آکھدے نیں کہ حضور نے پچھیا کہ کیہ تسیں ایہناں نوں پچھاندے او؟ اساں جواب دتا کہ ”یا رسول اللہ! اوہناں اپنے سرمہ تے لکائے ہوئے سن، ہاں اسیں اوہناں دیاں سواریاں نوں پچھان لیا اے۔“ سرکارِ دو عالم نے ارشاد فرمایا کہ ”ایہ اوہ لوگ نیں جنہاں قیامت تیکر منافق ای رہنا اے، تہاںوں پتہ اے ایہ کیہ کرنا چاہندے سن؟“

”نہیں یا رسول اللہ۔“ اساں جواب دتا۔

”ایہناں دا ارادہ اسی کہ گھاٹی وچ بھیڑ پا کے اللہ دے رسول نوں ڈونگے کھڈ وچ ڈیگ کے قتل کر دیں۔“ رسول خدا نے ارشاد فرمایا۔

”یا رسول اللہ! جے ایہ گل اے تے حضور اوہناں دے قبیلیاں نوں لکھن کہ ہر قبیلہ اپنے اپنے بندے داسر قلم کر کے آپ کول بھیج دیوے۔“

”نہیں، عرب آکھن گے کہ محمدؐ نے اک قوم نوں نال لے کے دشمن دا مقابلہ کیتا۔ جدوں کامیاب ہو گیا تے اوہناں نوں ای قتل کرنا شروع کر دتا۔“ رسول رحمت نے جواب دتا۔

فیر اللہ دے محبوب نے اوہناں منافقاں دے ناں حضرت حذیفہ نوں دس دتے پر نال ای حکم دتا کہ اوہ اگلاں کسے نوں نہ دس تاں جے کسے فتنے دا اندیشہ نہ رہوے۔ ایہی وجہ اے کہ جناب حذیفہ نوں رازدان نبوت آکھیا جاندا اسی۔ ایسے واقعے تے اللہ نے ارشاد فرمایا کہ:

﴿وَهُمْ بِمَا لَمْ يَنَالُوا﴾

”تے اوہناں نے اچھے کم دا ارادہ کیتا جس نوں اوہ حاصل نہ کر سکے۔“

مدینے دے نیڑے:

جدوں لشکر اسلام مدینے دے نیڑے اپڑیا تے حضور نے ارشاد فرمایا کہ مدینے وچ اچھے لوگ وی نیں جیڑے ایس سفر وچ ساڈے نال نہیں سن پر اوہ ثواب وچ ساڈے نال رل گئے نیں۔ صحابہ کرام نے عرض کیتی کہ یا رسول اللہ! کیہ اوہ

لوگ مدینے وچ نیں؟ ارشاد ہو یا کہ ہاں، اوہ مدینے وچ نیں۔ اوہناں جہاد تے جان لئی بڑے جتن کیتے پر غربی دی وجہ توں اوہ نال نہ ٹر سکے۔ فیر جدوں حضور دی نظر مبارک مدینے تے پئی تے فرمایا کہ لوطانہ (پاک شہر) آ گیا اے تے جدوں کوہ اُحد تے نظر پئی تے فرمایا کہ ایہہ اوہ پہاڑ اے جیہڑا ساڈے نال محبت کرا اے تے اسیں ایہدے نال محبت کر دے ہاں۔ فیر جدوں آپؐ مدینے دے ہو ریڑے اپڑ گئے تے مدینے وچ کچھڑن والے بندے، سوانیاں، کڑیاں تے منڈے سب دے سب شہروں باہر آ گئے تے اپنے آقا و مولاناں جی آئیاں نوں آ کھدے رے۔ اوس دن اُحد دیاں ٹیسیاں تے مدینے دیاں گلیاں اک واری فیر اوسے گیت نال گونج رہیاں سن جس نال ہجرت مدینہ دے ویلے گونجیاں سن، تے ایوں پرانیاں یاداں فیر تازہ ہو گئیاں سن۔ ایس توں دکھ کنیں پئی ہو ر کوئی واج ای نہیں سی سنیدی:

طَلَعَ الْبَدْرُ عَلَيْنَا
وَجَبَّ الشُّكْرُ عَلَيْنَا
أَيُّهَا الْمَبْعُوثُ فِينَا
رَسُولُ خَدَا مَدِينَةِ وَج:

مِنْ ثَنِيَّاتِ الْوَدَاعِ
مَا دَعَا لِلَّهِ دَاعٍ
جَعَلْتَ بِالْأَمْرِ الْمُطَاعِ

مدینے توں پنجواہ ۵۰ دنوں دی جدائی توں بعد خیر خیریت نال واپسی تے اللہ واشکر ادا کرنا واجب سی۔ رسول خداؐ دے معمول وی ایہی کہ جدوں کسے غزوہ توں واپس پر تے سن تے دو رکعت نماز نفل ادا فرماندے سن۔ اوس دیہاڑے وی آپؐ نے آؤندیاں سار دو رکعت نماز نفل پڑھی۔ نماز توں فارغ ہوئے تے آپؐ دے چاچا جی حضرت عباسؓ نے عرض کیتی کہ میں اک نعت لکھی اے، جے اجازت ہووے تے سناواں۔ ارشاد ہو یا کہ سناؤ، اللہ تعالیٰ تہاڈے منہ نوں سلامت رکھے (جہدے وچوں نعت نبیؐ لکھی اے)۔ جناب عباسؓ نے اوس جلسے وچ جیہڑی خوبصورت نعت سنائی اوس دے کجھ شعر و کجھ موجب پڑھ دتے جان دے نیں:

ثَنُّنَا مِنْ صَالِبِ أَلِيٍّ رَحِمَ
حَتَّىٰ اِحتَوَىٰ بَيْتَكَ الْمَهِيمِنَ مِنْ
وَإَنْتَ لَمَّا وَلَدْتَ أَشْرَقَتْ الْأَرْضُ
فَنَحْنُ فِي ذَلِكَ الْضِيَاءِ وَفِي النُّورِ

اِذَا قَضَىٰ عَالَمٌ بَدَأَ طَبَقُ
خَنَدَفٍ عَلِيَاءَ تَحْتَهَا النُّطْقُ
فَضَاءٌ تَبْنُورُكَ الْأَفُقُ
وَسُبُلُ الرِّشَادِ نَحْتَرِقُ

”تسین پشت توں رحم وچ آؤندے رے۔ جدوں اک زمانہ گزر جاندا تے دُجا آ جاندا ایہو تیکر کہ ایس نے خندف دے عالی مقام تے نگہبان گھرنوں محفوظ کر دتا تے ہن اوہناں نوں گل کرنی آؤندی اے۔ تے جدوں تہاڈی ولادت پاک ہوئی تے زمین دا چپہ چپہ روشن ہو گیا تے اسمان وی تہاڈے نور نال جگمگ کرن لگ پیا۔ تے اسیں جناب دے نور تے روشنی وچ ہدایت دے رستے تے ٹرے جان دے ہاں۔

کچھڑ گئے لوکی:

جویں کچھ ذکر ہو یا اے ایس غزوہ وچ بہت سارے لوکاں نے شرکت نہیں کیتی سی جنہاں نوں اسیں چھ طبقیات وچ

سیرت نبیؐ از ابن کثیر، غزوہ تبوک دا باب

ونڈیا اے۔ جدوں لشکر اسلام مدینہ طیبہ واپس پرت آیا، تے اوہ وی ایوں کہ سب توں تگڑی فوج اگے لگ کے نس کھلوتی تے کچھڑ گئے بندے رسول خدا دی خدمت وچ حاضر ہونا شروع ہو گئے۔ کسے نے کوئی عذر پیش کیتا تے کسے نے کوئی۔ کسے اپنے آپ نوں مسجد نبوی دے ستوناں نال بندھ لیا تے کوئی سجدھی گل کر کے معافی دا طب گار ہوئی۔ رسول خدا نے بوہت سارے بندیاں نوں اپنے طور تے معاف فرما دتا۔ اوہناں کولوں نویں سرے توں بیعت لئی تے اوہناں دی مغفرت دی دُعا وی کیتی۔ حضرت ابولبابہ تے اوہناں دے دُجے چھ بجن جنہاں نے اپنے آپ نوں مسجد دے ستوناں نال بندھ لیا سی اوہناں نوں اوس ویلے کھول دتا گیا جدوں اللہ دا حکم نازل ہوئی۔

﴿وَالْآخَرُونَ اعْتَرَفُوا بِذُنُوبِهِمْ خَلَطُوا عَمَلًا صَالِحًا وَآخَرَ سَيِّئًا عَسَى اللَّهُ أَنْ يَتُوبَ عَلَيْهِمْ

إِنَّ اللَّهَ غَفُورٌ رَحِيمٌ﴾ (توبہ: ۱۰۲)

”تے کجھ ہور لوگ نیں کہ اقرار کر دے نیں اپنے گناہواں دا۔ رلا دیندے نیں اک عمل چنگا تے دُجا بھڑا۔

چھیتی اللہ معاف کر دیوے گا اوہناں نوں۔ یقیناً اللہ بخشن والا تے مہربان اے۔“

پراوہ تن سچے مومن جیہڑے کچھ کیتی گئی ونڈ (Grouping) وچ چوتھے نمبر تے آؤندے نیں تے اوہناں سچ دا رستہ نہ چھڈ دیاں ہوئیاں سجدھی سجدھی گل کر دتی سی کہ اوہ بلا عذر تے نری سستی پاروں کچھ رہ گئے سن، اوہناں نوں اللہ نے کجھ دیر لئی امتحان وچ پائیا سی۔ رسول خدا نے تنہا یعنی حضرت کعب بن مالک، مرارہ بن ربیع نے ہلال بن اُمیہ دا مکمل سوشل بائیکاٹ کرن دی ہدایت فرمائی۔ آپ دے حکم موجب مسلماناں نے اوہناں نال سلام دُعا ختم کر دتی۔ جے اوہ کسے نوں السلام علیکم آکھدے تے کوئی اوہناں دے سلام دا جواب ای نہ دیندا۔ ہر بندہ اوہناں کولوں ول کے لنگ جاندا تے ایوں جا پدا سی کہ ہزاراں دے شہر وچ اوہناں دا کوئی وی اپنا نہیں، سب اجنبی تے بیگانے نیں۔ سختی ایستھوں تیکر ودھی کہ چالی ۴۰ دناں بعد حکم دتا گیا کہ اوہ اپنیاں بیویاں دے نیڑے وی نہ جان۔ باہر تے جو حال ہے سی اوہ ہے سی، گھراں دے وچ وی اوہناں تے پابندیاں لگ گئیاں۔ حالت ایہہ سی کہ اوہناں نوں اپنے وجود وی بھارے لگن لگ پے تے زمین اوہناں نوں اپنے وڈے گھیر تے کھلا ر دے باوجود تنگ جاپن لگ پئی۔ اخیر جدوں اوہناں دے بائیکاٹ دے پنجاہ دن ہو گئے تے رب رحیم دا ایہ حکم نازل ہوئی:

﴿وَعَلَى الثَّلَاثَةِ الَّذِينَ خَلَفُوا حَتَّىٰ إِذَا ضَاقَتْ عَلَيْهِمُ الْأَرْضُ بِمَا رَحُبَتْ وَضَاقَتْ عَلَيْهِمْ

أَنْفُسُهُمْ وَظَنُّوا أَنْ لَا مَلْجَأَ مِنَ اللَّهِ إِلَّا إِلَيْهِ ۖ ثُمَّ تَابَ عَلَيْهِمْ لِيَتُوبُوا ۚ إِنَّ اللَّهَ هُوَ التَّوَّابُ

الرَّحِيمُ﴾ (توبہ: ۱۱۸)

”تے اللہ نے اوہناں تنہاں تے وی رحمت فرمائی جنہاں دا فیصلہ اگے پا دتا گیا سی۔ ایستھوں تیکر کہ جدوں زمین چوکھے کھلا ر دے باوجود تنگ ہو گئی۔ تے بوجھ بن گئیاں اوہناں تے اوہناں دیاں جاناں تے اوہناں نوں یقین ہو گیا کہ اللہ توں وکھ کوئی پناہ دی تھان نہیں بس صرف اوہی اے۔ فیر اللہ نے اوہناں ول دھیان فرمایا تاں جے اوہ توبہ کرن، بے شک اللہ توبہ قبول کرن والا تے ہمیش رحم کرن والا اے۔“

اللہ دے ایس فیصلے تے ایہ تے اصحاب نبی بہت زیادہ خوش ہوئے تے دُجے مسلماناں نے وی ڈھیر خوشیاں منائیاں۔ ہر بندا ودھ ودھ کے اوہناں نوں مبارک دے رہیاسی۔ اوہ وی پٹھیاں چھالاں مار دے پھر دے سن۔ رسول خدا دا چہرہ مبارک وی خوشی نال چمک رہیاسی۔ آپؐ نے حضرت کعب نوں مخاطب کر کے فرمایا کہ اے کعب! جدوں دا تیری ماں نے تینوں جنیا اے، تیرے لئی ایس توں چنگا ہو کوئی دن نہیں گزریا۔ تینوں مبارک ہووے۔ حضرت کعب ایس گل تے ہو رپکے ہو گئے کہ حیاتی وچ کدے جھوٹ نہیں بولنا۔

مسجد ضرار:

جویں کہ کچھ ذکر ہو چکیا اے ہجرت مدینہ دے موقع تے قبادی وستی وچ رسول خداؐ نے پہلی مسیت اساری سی جس دا ناں مسجد قبا اے۔ مسجد قبا بنو عمرو بن عوف دے محلے وچ تے اوہناں دی زمین تے بنی سی۔ اوہناں دے شریکے برادری وچ اک خاندان بنو عجم بن عوف وی سی۔ بنو عجم نوں ایس گل دا بڑا ساڑا سی کہ مسجد قبا دی وجہ توں بنو عمرو دی عزت تے وقار وچ چوکھا وادھا ہو گیا اے۔

غسل ملائکہ حضرت حظلہ شہید دا والد ابو عامر جاہلیت دے دناں وچ نصرانی ہو گیا سی تے ہن اوہ ابو عامر راہب دے ناں نال مشہور سی۔ اوہ بڑا خطرناک تے ضدی جیا بند اسی۔ جدوں رسول خداؐ مدینے تشریف لیاے تے ابو عامر نے آکے حضور سرور کائنات نال کجھ بحث مباحثہ وی کیتا تے اخیر تے آکھیا کہ لے فیرجیہڑا ساڈے دوواں وچ جھوٹا اے اوہ مردود ہو کے بھناں متراں توں دور مسافرت وچ مرے۔ جدوں بنو ہوازن نوں شکست ہو گئی تے مکہ فتح ہو گیا تے اوہ نصرانیاں دے وڈھے گڑھ شام ول دوڑ گیا تے فیرو تھے اپنی ای شرط تے بددعا موجب ذلیل ہو کے مر گیا۔ پرجتاں چراوہ جیوند ر ہیا مسلماناں دے خلاف اپنا پورا ٹل لانداریا۔

اُتے مڈھلیاں سطراں وچ بنو عجم بن عوف دے جس منافق قبیلے دا ذکر کیتا گیا اے اوس دی ابو عامر نال بڑی یاری سی۔ جنگ تبوک توں کجھ چر پہلوں اوس نے بنو عجم تے اوویں دے دُجے منافقاں دے ناں اک خط لکھیا کہ میں کوشش کر رہیا ہاں کہ قیصر روم مدینے تے حملہ کر کے اسلام دا مکوٹھپ دیوے پر اوہدے لئی تہاڈا تعاون ضروری اے۔ تسیں ایوں کروئی کوئی ڈیرہ ڈنڈا بناؤ تاں جے تسیں او تھے رل مل کے صلاح مشورے کر سکو۔ تے جے مسیت اساری جاوے تے ہو ر چنگی گل اے، اوہدے نال کسے نوں شک شبہ وی نہ ہووے گا۔ بنو عجم نوں شریکا پٹن لئی اک موقعہ چاہیدا سی۔ اوہناں اوسے ویلے مسجد قبا توں کجھ دریڈی، اپنے محلے وچ اک مسیت اساری تے اپنے ارادیاں تے پردہ پاوون لئی رسول خداؐ نوں دعوت دتی کہ آپؐ او تھے پہلی نماز پڑھا کے بقاعدہ افتتاح کرن۔ اوہناں ایہ آکھ کے شواوش وی لین دی کوشش کیتی کہ نویں مسیت ایس لئی اساری گئی اے کہ مینہ کنی دے دناں وچ جہد ادا کرے اتھے نماز پڑھ لوے، نالے بعض بزرگ یاں مریض چوکھا پیئڈا نہیں وی کر سکہے۔

یاد رہوے کہ حضرت حظلہ ایس حالت وچ شہید ہوئے سن کہ اوہناں نوں غسل دی لوڑ سی۔ شہادت توں بعد اوسے ویلے فرشتیاں نے آپؐ نوں غسل دتا۔ ایس لئی آپؐ نوں غسل ملائکہ آکھیا جاند اے۔

رسول خدا اوس دن تبوک دی تیاری وچ رُجھے ہوئے سن۔ ایس لئی آپؐ نے آؤن والے بندیاں نوں آکھیا کہ ایہ کم تبوک توں واپسی تے رکھیا جاوے۔ جے اللہ سوہنے نے خیر خیریت نال واپس لے آؤندا تے انشاء اللہ میں ای پہلی نماز پڑھاواں گا۔ پر تبوک توں واپسی تے اے رسول خدا مدینہ طیبہ واپس نہیں سن اپڑے تے اللہ دا ایہ حکم نازل ہوئیا:

﴿وَالَّذِينَ اتَّخَذُوا مَسْجِدًا ضِرَارًا وَكُفْرًا وَتَفْرِيقًا بَيْنَ الْمُؤْمِنِينَ وَإِرْصَادًا لِّمَنْ حَارَبَ اللَّهَ وَرَسُولَهُ مِنْ قَبْلُ وَلَيَحْلِفُنَّ إِنْ أَرَدْنَا إِلَّا الْحُسْنَىٰ وَاللَّهُ يَشْهَدُ إِنَّهُمْ لَكَاذِبُونَ ۚ لَا تَقُمْ فِيهِ أَبَدًا لَمَسْجِدٍ أُسُسُ عَلَى التَّقْوَىٰ مِنْ أَوَّلِ يَوْمٍ أَحَقُّ أَنْ تَقُومَ فِيهِ ۚ فِيهِ رِجَالٌ يُحِبُّونَ أَنْ يَتَطَهَّرُوا وَاللَّهُ يُحِبُّ الْمُطَهَّرِينَ﴾ (توبہ: ۱۰۷، ۱۰۸)

”تے اوہ جہاں نے نقصان اپڑان لئی تے کفر کر دیاں تے مسلماناں وچ پھٹ پاؤن لئی مسیت اساری، اوس دی ہلا شیری تے جیہڑا لڑ رہیا اے اللہ دے تے اوس دے رسول نال پہلے توں ای۔ تے اوہ قسماں کھان گے کہ اسیں تے بھلائی دا ای ارادہ کیتا سی تے اللہ گواہ اے کہ اوہ جھوٹے نیں۔ (اے محبوب) تسیں اوہ دے وچ نماز لئی بلکل نہ کھلونا تے اوہ ای مسجد ٹھیک اے جیہڑی پہلے دن ای پرہیزگاری دی عینہ تے اساری گئی سی۔ اوہی تہاڈے کھلون دے لائق اے۔ ایہدے وچ اچھے لوگ نیں جیہڑے پاک رہنا پسند کر دے نیں۔ تے اللہ، پاک رہن والیاں نال محبت کر دے۔“


اللہ دے ایس فتارے توں بعد حضورؐ نے مالک بن دُخشم، معن بن عدی، عامر بن السکن تے وحشہؓ نوں حکم دتا کہ اوہ جا کے اوس مسیت نوں ساڑ دین تے ڈھاسٹن۔ ایوں اوہ مسجد ضرار اپنے انجام نوں اپڑ گئی۔ مسجد ضرار دا وجود ختم ہون دی ڈیسی کہ منافقاں دا جوڑ توڑ دا سلسلہ وی مک گیا۔ ایہتھوں تیکر کہ ریاست دے دار الخلافہ مدینہ طیبہ وچ منافقاں دا سب توں وڈا لیڈر عبداللہ بن اُبی دو مہینیاں توں ودھ زندہ نہ رہ سکيا۔

منافقاں دے سردار، چوہدری عبداللہ بن اُبی دی موت

مسجد ضرار دے ڈیہ جان توں بعد منافقاں لئی دُجی وڈی سٹ رئیس المنافقین عبداللہ بن اُبی دی موت سی۔ ہجرت نبوی توں پہلوں توں شاہی دے خواب ویکھن والا تے سرتے سونے دا تاج رکھن دا خاہش وند ایہ حسرت دل وچ لے کے ای چلانا کر گیا۔ چوہدری عبداللہ دیاں ساریاں التاں دے باوجود رسول خداؐ نے مسلماناں نوں منع کر دتا کہ مرن والے ولوں کوئی مندی چنگی گل نہ کیتی جاوے۔ تے جدوں اوس دے پتر تے پکے پیڑے مسلمان جناب عبداللہ بن عبداللہ نے آپؐ اگے اپنے والد دا جنازہ پڑھن دی درخواست کیتی تے آپؐ نے انکار نہ فرمایا۔ مہربانی دی حد تے ایہی کہ جدوں تیکر عبداللہ بن اُبی نوں دفن نہ کر لیا گیا، آپؐ اوس دی قبر دے سرہانے تشریف فرما رے۔ عبداللہ بن اُبی دے دفن ہون دے نال ای مدینے وچوں منافقت دا جنازہ نکل گیا۔


﴿چیتے رہوئے کہ ایہ اوہی بند اے جس نے حضرت حمزہؓ نوں شہید کیتا سی۔﴾


عبداللہ بن ابی دی نماز جنازہ:


عبداللہ بن ابی دی نماز جنازہ پڑھنا، رسول خدا دا اوس دی قبر تے، دُفن تیکر تشریف فرما رہنا تے حضرت جابرؓ دی اک روایت موجب عبداللہ نوں دفنان توں بعد اوس نوں قبر وچوں کڈ کے رسول خدا دا اوس دے گل وچ اپنی قمیض مبارک پالتا  اچہیا واقعہ اے کہ جے کدے انساناں تے انساناں دے احساناں دی کوئی توارخ لکھی گئی تے اوس دا پہلا باب ایہی واقعہ ہووے گا۔ پر نہ تے مسلماناں نے، تے نہ ای مستشرقین نے ایس دی وجہ تے کھوجکاری کیتی اے۔ یقیناً ایس دی وجہ اوہدے توں کوئی وڈی ہووے گی جیہڑی عام طور تے پڑھن نوں لھدی اے۔


دسیا جاندا اے کہ جدوں عم رسول حضرت عباس نوں جنگ بدر دے موقعے تے گرفتار کر کے رسول خدا دے حضور پیش کیتا گیا تے جناب عباس دے بدن تے کوئی گرتا چگا نہیں سی۔ حضرت عباس داجتایوں داسی کہ اوس تے کسے صحابی دا کوئی گرتا پورا نہ آئیا۔ رسول خدا نے اوویں دے اُچے لمے تے جے بندے عبداللہ بن ابی کولوں کرتا منگوا کے جناب عباس نوں عطا کیتا۔ عبداللہ دی موت تے آپؐ نے اپنی قمیض اوس دے گل پا کے حساب برابر کر دتا۔


آؤ ہن ایس واقعے نوں اک سطر وچ بیان کرینے تے اوہ ایوں کہ جناب عبداللہ بن عبداللہ دی درخواست تے حضور نے ابن ابی دی نماز جنازہ پڑھی تے اوس دے گل وچ اپنی قمیض مبارک وی پادتی۔

میں (اصغر علی جاوید) ایہ عرض کرنا چاہندا ہاں کہ ایس گل تے کھوج دی لوڑ اے کہ سورہ توبہ دی آیت نمبر ۸۰ وچ ایس فیصلے توں بعد کہ اے محبوب! تہاڈی ستر وادی منگ توں بعد وی میں ایہناں نوں نہیں بخشنا، رسول خدا نے جناب عمر فاروق نوں ایہ جواب کیوں دتا کہ میں ستر توں چوکی وارا استغفار کراں گا۔  حالانکہ ایہ قیاس وی کیتا جاسکدا اے کہ ستر بار توں مراد حسابی گنتی ستر (۷۰) نہیں سگوں ایہ عدد کثرت بیان کرن لئی ورتیا گیا اے۔

میرا خیال ایہ ہے کہ رسول خدا نے عبداللہ بن ابی دی حیاتی وچ کسے ویلے اوہدے نال ایہ وعدہ کر لیا سی کہ میں تیری نماز جنازہ پڑھاں گا۔ عبداللہ دی موت تیکر رب دا ایہہ فیصلہ تے سامنے آ چکیا سی کہ اللہ نے اوویں دے منافقاں نوں معاف نہیں کرنا پر نماز جنازہ نہ پڑھن دا کوئی کھلاتے نتریا ہو یا حکم سامنے نہیں آیا سی۔ ایس لئی آپؐ نے اپنا وعدہ پورا کر دیاں ہوئیاں اوس دی نماز جنازہ پڑھی۔ ایس قیاس نوں ایہ روایت پکا کر دی اے کہ اوس نے اپنی بیماری دے دناں وچ رسول رحمتؐ نوں یاد کیتا۔ آپؐ اوس نوں ملن لئی تشریف لے گئے۔ آپؐ نے اوس نوں آکھیا کہ ابن ابی یہودیاں دی محبت نے تہاں تباہ کر دتا اے۔ اوس نے عرض کیتی یا رسول اللہ! ایہ دیلا مینوں مندا چنگا آکھن دا نہیں، تسلیں میری بخشش دی دُعا منگو تے جے ایس بیماری نال میں مر گیا تے تسلیں اپنے لباس مبارک وچ مینوں کفنایا جے۔  قیاس اے کہ اوہدوں رسول خدا نے اپنی رحمت اللعالمینی دی بناء تے اوس نوں ہاں آکھ دتی ہووے گی۔

 مختصر سیرت رسول از شیخ عبداللہ بن محمد بن عبدالوہاب اردو ترجمہ از جامعہ اثریہ جہلم صفحہ: ۶۵۰

 تفسیر ابن کثیر سورہ توبہ، آیت: ۸۴

 تفسیر ابن کثیر سورہ توبہ، آیت: ۸۴

دوسری قیاس ایہ ہے کہ رسول خداؐ نواں ایس گل دا پتہ سی کہ میری قمیض نال یاں میرے نماز پڑھن نال اوس دی مغفرت نہیں ہونی پر مصلحت ایہ سی کہ جدوں خزر ج دے لوگ ابن اُبی نال ایہ معاملہ دیکھن گے تے اوہ اسلام دے نیڑے ہو جان گے۔ ایس قیاس دی گنجائش ایوں بن دی اے کہ اک واری آپؐ نے فرمایا سی کہ میرا کُرتا اوس نواں اللہ دے عذاب توں نہیں بچا سکدا پر میں ایہہ کم ایس لئی کیتا اے کہ ایہدے نال اوس دی قوم دے اک ہزار بندے مسلمان ہو جان گے۔ مغازی تے تفسیراں توں پتہ لگدا اے کہ اوس توں بعد ابن اُبی دے قبیلے خزر ج دے اک ہزار بندے مسلمان ہو گئے۔ ایوں اک عبد اللہ تے عذاب توں نہ بچیا پر رسول رحمت دی دُعا نال اوہدے قبیلے دے اک ہزار بندے عذاب توں بچ گئے۔

عبد اللہ دی موت والے دن اے رسول خدا قبرستان وچ ای موجودن تے اللہ دا ایہ حکم نازل ہو یا:

﴿وَلَا تَصَلِّ عَلَى أَحَدٍ مِنْهُمْ مَاتَ أَبَدًا وَلَا تَقُمْ عَلَى قَبْرِهِ إِنَّهُمْ كَفَرُوا بِاللَّهِ وَرَسُولِهِ وَ

مَاتُوا وَهُمْ فَسِقُونَ﴾ (توبہ: ۸۴)

”جے اوہناں وچوں کدے کوئی مر جائے تے اوس دی نماز نہ پڑھو تے نہ کھڑے ہوؤ اوس دی قبر تے۔ اوہ

منکر ہوئے نیں اللہ توں تے اوس دے رسول توں، تے اوہ نافرمان ای مر گئے۔“

ایس موضوع تے اخیر ی گل ایہ عرض کرنی اے کہ اللہ نے اپنی پالیسی جاری فرما دتی اے کہ اوس نے منافقاں نوں معاف نہیں کرنا۔ فیروز رسول خداؐ نوں اوہناں دی نماز جنازہ پڑھن توں منع کر کے اپنے فیصلے تے پکی پیڈی مہر لا دتی پر اوس قدیر تے رحیم ہستی نوں کون ڈک سکدا اے جے اوہ فیصلہ کر لوے کہ اوس نے اپنی جنرل پالیسی توں ہٹ کے عبد اللہ بن اُبی نوں معاف کر دینا اے، صرف ایس لئی کہ اوس دی سفارش محمدؐ نے کیتی اے۔

لعان دا بیان:

جدوں لشکر اسلام تبوک توں واپس پر تیا تے جناب عویمرؓ جلانی نے محسوس کیتا کہ اوہناں دی بیوی حاملہ اے۔ اوہناں رسول خداؐ کول ایہ مسئلہ بیان کیتا تے آپؐ نے اوہناں دی بیوی نوں طلب فرما لیا۔ فیروز قرآنی فیصلے موجب دوواں وچ لعان کرا دتا۔

لعان دے معنی نیں اک دُجے تے لعنت تے غضب الہی دی بددعا۔ فقہ اسلامی وچ ایس دا مطلب ایہ ہے کہ جدوں کوئی خاوند اپنی بیوی تے زنا دا الزام لاوے یاں اوس دے بچے ولوں آکھے کہ ایہ میرے نطفے وچوں نہیں تے فیروز خاوند لئی ضروری اے کہ اوہ چار گواہ پیش کرے۔ جے اوہ چار گواہیاں دے دیندا اے تے عورت تے حد لاگو ہووے گی تے جے نہ دے سکے تے اوس نوں آکھیا جاوے گا کہ اوہ اللہ دی قسم کھا کے چار وارا ایہہ گواہی دیوے تے پنجویں وار آکھے کہ اللہ دی لعنت اے میرے تے جے میں جھوٹ بولاں تے۔ فیرواں ای عورت نوں وی آکھیا جاوے گا۔ جے اوہ وی ایویں قسماں کھا لوے تے فیروز دوویں سزا توں بچ جان گے پر اوہ ہمیش لئی اک دُجے توں وکھ ہو جان گے۔ ایہ حکم سورہ نوردیاں آیتاں ۶ تا ۹ توں لیا گیا اے۔

زنا دی حد:

ایسے سال اک زانیہ نوں سنگسار کیتا گیا۔ ہونیا ایہ کہ کجھ چر پہلوں غامدیہ رسول خداؐ کول حاضر ہوئی تے عرض کیتی کہ یا رسول اللہ! میرے کولوں زنا دا جرم ہو گیا اے، میں چاہندی ہاں کہ تئیں مینوں پاک کر دیو۔ رسول خداؐ نے اوس نوں واپس چلے جان دی ہدایت کیتی۔ اوس دن اوہ واپس پرت گئی پر اگلے دن فیر آ گئی تے آ کے اوہی گل آکھی پر رسول خداؐ نے اوس نوں فیر واپس چلے جان دا حکم دتا تے اوس دی گل سنی اُن سنی کر دتی۔ تیسرے دن آئی تے اوس نے نال ایہ دی دسیا کہ اوہ زنا دے نتیجے تے حاملہ ہو چکی اے۔ فیر آپؐ نے اوس نوں حکم دتا کہ ہن اوہ واپس چلی جاوے تے بچہ پیدا ہون توں بعد آ کے دے۔ تبوک توں واپسی توں بعد اوہ ایس حالت وچ حضورؐ دی خدمت وچ حاضر ہوئی کہ اوس نے بال داد دھ چھڑا دتا ہو یا سی تے اوس دن بال دے ہتھ وچ روٹی دا ٹکڑا سی۔ رسول خداؐ نے اوہ بچہ کسے مسلمان دے سپرد کر دتا تے فیر اک ٹویا پٹن دا حکم دتا۔ ٹویا پٹیا گیا تے غامدیہ نوں سینے تیکر اوہ دے وچ دب دتا گیا۔ فیر لوکاں نوں حکم دتا کہ اوس نوں رجم کرو۔ سنگساری دے نتیجے تے اوس دی موت واقع ہو گئی۔ فیر اوس نوں ٹوئے وچوں کڈ کے اوس دا جنازہ پڑھیا گیا تے اوس نوں دفن کیتا گیا۔

اپنے جرم دی دنیا تے سزا بھگتن لئی بے چین ہوئی غامدیہ دی توبہ دی رسول رحمت نے چوکی تعریف فرمائی۔ جدوں اوس نوں سنگسار کیتا جا رہیا سی تے اوس دے سرتے جناب خالد بن ولید نے وی اک پتھر ماریا۔ غامدیہ دے سروچوں خون دے کجھ قطرے جناب خالد دے منہ تے جا ڈگے۔ اوہناں نے اوس دے خون نوں پلیت آکھ دیاں ہونیاں غامدیہ نوں مندا چنگا آکھیا۔ ایہ سن کے رسول خداؐ نے جناب خالد نوں ڈانٹ دتا تے فرمایا کہ ایس نے اجہی توبہ کیتی اے کہ کوئی وی کرے، اوس دے گناہ دور ہو جان گے۔

مدنی مسلماناں دا پہلا حج:

۹ھ وچ ۳۰۰ صحابہ حج بیت اللہ لئی مکہ ول تشریف لے گئے۔ رسول خداؐ نے حضرت ابو بکر صدیق نوں اوہناں دا امیر مقرر فرمایا تے اپنے ولوں قربانی لئی ۲۰ اٹھ عطا فرمائے۔ حاجیاں دا جتھا مدیہ منورہ توں جاکھیا سی تے پچھوں سورہ براۃ نازل ہوئی جہدے وچ اللہ تعالیٰ نے مشرکاں نوں مسجد حرام وچ وڑن توں روک دتا تے اوہناں نال جیہڑے معاہدے سن اوہناں نوں ختم کر دتا۔ رسول خداؐ نے حضرت علیؓ نوں حکم دتا کہ اوہ وی مکہ ول کوچ کر جان تے جدوں سارے لوگ میدان عرفات وچ اکٹھے ہون تے اوہناں نوں ایہ سورت پڑھ کے سناوتی جاوے۔ حضرت علیؓ نے حکم دی تعمیل کیتی تے لوکائی نوں دسیا کہ جتھے معاہدیاں دی مدت مقرر کیتی گئی اے اوہ مدت دے ختم ہون تیکر چلن گے تے جتھے مدت نہیں، اوہ چار مہینے بعد کالعدم ہو جان گے۔ مکہ وچ ایہ اعلان بت پرستی تے شرک دے تابوت وچ انخیری کل سی۔

۹ھ دے کجھ ہور واقعات:

ایسے سال سیدنا ابراہیم بن محمد رسول اللہؐ نے چلانا کیتا۔ آپؐ دی صاحبزادی تے جناب عثمان ذوالنورین دی زوجہ

سیدہ اُم کلثوم ایسے سال اللہ نوں پیاری ہوئی۔ ننھے ابراہیم تے سیدہ اُم کلثوم دی وفات تے رسول خدا اوہنے ای دکھی تے غمزدہ ہوئے جتاں کوئی وی باپ اپنی اولاد دی دہری موت تے ہوسکدا اے۔ عثمان! جے میری کوئی تچی دھی وی (کنواری) ہوندی تے میں اوس نوں وی تیرے نکاح وچ دے دیندا۔ چیتے رہوے کہ سیدہ اُم کلثوم دے چلانا کرن ویلے رسول خدا دی ساری اولاد جتناں دی وسنیک سی، سوائے سیدہ فاطمہ بتول توں۔

۹ھ وچ ای حبشہ دابا دشاہ اُصحمہ نجاشی فوت ہوئی۔ آپ نے صحابہ کرام نوں دس دتا کہ آج اک مہربان مر گیا اے۔ فیر آپ نے اوس دی غائبانہ نماز جنازہ پڑھی تے اوس دے حق وچ دُعائیتی۔

عام الوفود (جتھیاں دا سال)

جو یں کہ پچھے ذکر ہوئی اے فتح مکہ، بنو ثقیف تے بنو ہوازن دی شکست نال سارے عرب وچ اسلام دا بول بالا ہو گیا سی۔ رہی سہی کسر سورہ براۃ نال پوری ہو گئی جہدے وچ اللہ نے ایہ فیصلہ سنا دتا سی کہ ہن کوئی مشرک بیت اللہ دا حج نہیں کر سکدا۔ ایس توں بعد پورے عربستان وچوں لوکاں فوج در فوج مدینے اپڑنا شروع ہو گئی۔ اصل وچ بہت سارے عرباں نے جناب محمد رسول اللہ دی سچائی دا معیار ایہ بنایا ہوئی سی کہ اوہ قریش تے غالب آؤن گے۔ اوہناں دا خیال سی کہ جیہڑا نبی اپنی قوم نوں قاتل یاں مغلوب نہیں کر سکیا اوہدے تے ایمان لیاؤن دی اوہناں نوں کوئی لوڑ نہیں۔ ہن ایہ نتارا وی ہو گیا سی تے قرآن دے آکھن موجب یدْ خُلُونْ فِی دِیْنِ اللّٰهِ اَفْوَا جَا (نصر: ۲) دے رنگ نظر آ رہے سن۔

رسول خدا ول لوکاں دے دوڑے آؤن والا کم کئے وچ ای شروع ہو گیا سی تے مدینے آکے ایہ کم تیز ہو گیا سی پر ۸ھ وچ وکھو وکھ قبیلیاں دے نمائندہ جتھیاں وچ ہور وادھا ہو گیا سی۔ ۹ھ وچ وفداں دے آؤن والا کم اپنے کمال نوں اپڑ گیا سی تے کوئی نہ کوئی وفد ہر ویلے مسجد نبوی وچ بیٹھا سداسی۔ ایس لئی ایس سال نوں عام الوفود یعنی جتھیاں دا ورھا آکھدے نیں۔

رسول خدا دی خدمت وچ آؤن والے وفداں وچ عام طورے قبیلیاں دے سردار، رئیس تے دانش ور بندے ہوندے سن۔ ہر وفد دے آؤن دا مقصد وکھرا ہوندا سی۔ کوئی قیدیاں نوں چھڈان لئی حاضر ہوندا سی تے کوئی صرف امان لین لئی۔ کوئی مناظرے یاں مجادلے لئی آؤندا تے کوئی ایہ گزارش کردا کہ اوہناں ول ودھے جان دے اسلامی لشکرنوں واپس سد لیا جاوے۔ کسے آکے جزیرہ دین دا اقرار کیتا تے کوئی اسلامی تعلیم حاصل کرن دا خواہش وند ہوئی۔ رسول رحمت بڑے سوہنے طریقے نال اوہناں نوں جی آیاں نوں آکھدے۔ اوہناں نوں چنگے چو کھے تحفے عنایت فرماندے، جے اوہ مسلمان نہ ہوئے ہوندے تے اوہناں نوں اسلام دی ترغیب دیندے تے اوہناں نوں ایمان تے شریعت دیاں گلاں سکھاندے تاں جے اوہ واپس جا کے اپنے قبیلے نوں وی سکھان۔ اصل وچ اوہ وفد صحرا وچ بدوواں دے اندر دین اسلام پھیلاں دا وڈا ذریعہ سن ﴿

وفد الہر:

عرب وچ اوٹھاں دے قافلے وچ سب توں اگے ٹرن والے اوٹھ نوں الوافد آکھیا جاندا سی۔ فیر ایہ لفظ اگل ہتھ بندیاں لئی وی ورتیا جان لگ پیا۔ بلکل اوویں ہی جویں فقیہ دالفظ علم فقہ دے ماہریاں سیانے بندے لئی ورتیا جان لگ پیا حالانکہ عرب وچ فقیہ اوس نوں آکھدے سن جیہڑا اوٹھنی دے بچہ دین توں پہلاں ایہ دسداسی کہ بچہ نرے یاں مادہ۔

وافد دی جمع وفد اے تے وفد دا مطلب اے دو توں ودھ سیانے یاں اگل ہتھ بندے۔ ”وفود“ دالفظ ایسے لفظ وفد دی جمع اے۔ وفد دالفظ اُچیائی، ٹیسی تے بلندی دے معنیاں وچ وی ورتیا جاندا اے۔ ریتلے پئے دی ٹیسی نوں تے آکھیا ہی وفد جاندا سی۔ اوفاد دالفظ وی وفد دی جمع دے طور تے بولیا جاندا اے۔

طبقات ابن سعد تے سیرت ابن ہشام وچ اوہناں جتھیاں دی تفصیل پڑھن نوں لہجہ دی اے جیہڑے اعلان نبوت توں اٹھ تیکر کسے نہ کسے ویلے رسول رحمت دے حضور حاضر ہوندے رے۔ اوہناں جتھیاں دی تعداد اے دسی جان دی اے۔

یہٹھ کجھ وفداں داتفصیلی ذکر کیتا جاندا اے:

وفد صداء:

ایہ وفد ۸ھ وچ رسول خدا دی خدمت وچ حاضر ہوئیا۔ پہلوں اوس قوم دا اک بندا زیاد بن حارث صدائی حاضر ہوئیا۔ فیر اوہ اپنی قوم دے پندرہ (۱۵) اگل ہتھ بندیاں دے نال مدینے آیا۔ حضرت سعد بن عبادہ نوں اوہناں دی ٹہل سیوا دا حکم دتا گیا۔ اوہناں دے واپس پرتن تے اوہناں دے قبیلے وچ اسلام پھیل گیا۔ جان لگیاں وفد دے سربراہ زیاد بن حارث نے عرض کیتی یا رسول اللہ! ساڈے علاقے وچ اکو کھوہ اے، گرمیاں وچ اسیں پانی نوں ترس جاندا ہاں۔ دُعا فرماؤ کھوہ دا پانی وافر ہو جائے۔ رسول رحمت نے فرمایا کہ ست کنکریاں پھڑلایا۔ زیاد کنکریاں لے کے آئے تے رسول رحمت نے کجھ دیر اپنے ہتھ وچ رکھ کے اوس نوں واپس دے دتیاں تے حکم دتا کہ اک کر کے ایہ کنکریاں اوس کھوہ وچ سٹ دینا تے سٹن ویلے ہر اک دے اُتے اللہ اللہ پڑھدے جانا۔ زیاد نے واپس جا کے اوویں ای کیتی۔ اوس توں بعد اوس کھوہ دا پانی کدے نہیں اٹھا۔

وفد عبدالقیس:

قبیلہ عبدالقیس دا وفد رسول خدا دی خدمت وچ حاضر ہوئیا تے عرض کیتی کہ یا رسول اللہ! اسیں بار بار اتھتھے حاضر نہیں ہو سکدے بس کجھ اجہی گل سمجھا دیو کہ اسیں وی اوس تے عمل کر دے ریئے تے ساڈی قوم وی۔ حضور نے فرمایا کہ میں تہانوں چار چیزاں تے عمل کرن دا تے چار چیزاں ترک کرن دا حکم دیندا ہاں۔ جیہڑیاں چار چیزاں تے عمل دا حکم دتا اوہ ایہ سن:

۱۔ لا اِلٰهَ اِلَّا اللہ محمد رسول اللہ دی گواہی۔ ۲۔ نماز قائم کرنا۔ ۳۔ زکوٰۃ دینا۔ ۴۔ رمضان دے روزے رکھنا۔

تے جیہڑیاں چار چیزاں چھڈن دا حکم دتا اوہ ایہ سن:

۱۔ دُبا ۲۔ حتم ۳۔ نقیر ۴۔ مزفت

ایہ چارے اوہناں پانڈیاں دے نام نیں جہناں وچ شراب کڈی، پیتی تے رکھی جاندی سی۔ چیتے رہوئے کہ بنو عبد القیس وچ شراب نوشی بڑی عام سی۔

ایس وفد وچ شامل جارود بن علاء، جیہڑا عیسائی سی، نے رسول خدا نوں بچھیا کہ جے اسیں اپنا دین چھڈ کے تہاڈے دین وچ شامل ہو جاندا ہاں تے کیہ تسیں ساڈے ضامن بن دے او۔ فرمایا: ہاں، میں تہاڈی بھلیائی دی ضمانت دیدا ہاں کیوں جے جس دین دی میں دعوت دے رہیا ہاں اوہ اوس توں بہتر اے جہدے تے تسیں ایس ویلے چل رے او۔ ایہ سن کے جارود مسلمان ہو گیا تے اوس دے نال باقی عیسائی وی مسلمان ہو گئے۔

وفد بنی حنیفہ تے مسیلمہ کذاب:

۹ھ وچ بنو حنیفہ دے ستاراں (۱۷) بندیاں دا اک جتھہ مدینے حاضر ہو یا جہاں وچ اک مسیلمہ بن حبیب وی سی، اوہی مسیلمہ جس نے بعد وچ نبی ہون دا دعویٰ کیتا تے توارخ وچ مسیلمہ کذاب دے نام نال مشہور ہو یا۔ بنو حنیفہ دے وفد دے سارے بندے مسلمان ہو گئے پر مسیلمہ بن حبیب آکھن لگا کہ جے رسول خدا مینوں اپنا جانشین من لین تے میں وی بیعت کرن لئی تیار ہاں۔ سرور عالم دے ہتھ وچ اوس ویلے کجھوردی اک کئی جی سوئی سی۔ آپؐ نے اوس سوئی ول اشارہ فرما کے آکھیا کہ جے توں بیعت دے بدلے ایہ سوئی وی طلب کریں تے میں ایہ سوئی وی مینوں نہ دیواں گا۔ رسول خداؐ نوں اللہ نے خواب وچ ایہ دکھا دتا سی کہ آپؐ دے ہتھ وچ دو کنگن نیں جیہڑے آپؐ نوں چوکھے ناگوار لگے۔ اللہ نے اوہناں نوں پھوک مار کے اڈا دین دا حکم دتا سی۔ حضورؐ نے پھوک ماری تے اوہ اڈ گئے۔ حضورؐ سمجھ گئے کہ اوہ دوویں اذیت دین والے کڑے مسیلمہ تے اسود غنسی نیں۔ یاد رہوئے کہ غنسی نے وی نبوت دا دعویٰ کیتا سی۔

جدوں بنو حنیفہ دا وفد واپس یمامہ اپڑیا تے مسیلمہ نے نبوت دا دعویٰ کر دتا تے لوکاں نوں آکھن لگ پیا کہ جناب محمد رسول اللہؐ نے اپنی نبوت وچ مینوں وی شریک کر لیا اے۔ اوہ اپنے کولوں آئناں وی تیار کر داتے آکھدا کہ ویکھ لوؤ ایہ قرآن پاک ورگا کلام اے۔ اوس کذاب دا کلام ویکھو:

لَقَدْ أَنْعَمَ اللَّهُ عَلَى الْحُبْلَى أَخْرَجَ مِنْهَا نِسْمَةً تَسْعَى مِنْ بَيْنِ صِفَاكِ وَحَشَا وَاهْلَ لَهُمُ الْخَمَرُ
وَالزَّنا وَوَضَعَ عَنْهُمْ الصَّلَاةَ

”اللہ تعالیٰ نے حاملہ تے انعام فرمایا۔ اوس دیاں انتڑیاں تے پیٹ دی جھلی دے وچکاروں اجہی روح کڈی جیہڑی دوڑ دی پھر دی اے۔ تے اللہ نے بندیاں لئی شراب تے زنا حلال کر دتے، تے نماز معاف کر دتی اے۔“

۱۰ھ وچ کذاب نے رسول خداؐ نوں اک خط وی لکھیا جہدے وچ اوس نے حضورؐ نوں محمد رسول اللہؐ ہی لکھیا پر عرب دی ادھی زمین دا مالک بن بیٹھا۔ رسول خداؐ نے اوس نوں جواب وچ مسیلمہ کذاب لکھیا تے وضاحت فرمائی کہ ساری زمین خدا دی اے، اوہ جس نوں چاہندا اے وارث بنا دیندا اے۔

مسيلمہ کذاب ول عہد صدیقی وچ جناب خالد بن ولید نے فوج کشی کیتی۔ لشکر اسلام وچ حضرت حمزہ دا قاتل وحشی وی سی۔ اوس دے ہتھوں مسيلمہ جہنم اپڑیا۔ اوس دے قتل توں بعد جناب وحشی آکھدے ہوندے سن کہ جے کفر دی حالت وچ میں اک عظیم الشان ہستی نوں شہید کیتا سی تے ہن اک بہت وڈے کافرتے کذاب نوں وی میں ای ماریا اے۔ ایوں خدا نے میرے گناہ دی تلافی کر دتی اے۔

بنو عامر بن صعصعہ دا وفد:

بنو عامر دے ایس تن رکنی وفد وچ عامر بن طفیل، اربد بن قیس تے جبار بن اسلم شامل سن۔ ایہ تنے اپنی قوم دے سردار تے وڈھے شیطان سن۔ چیتے رہوے کہ ایہ اوہی عامر بن طفیل سی جس نے اصحاب بر معونہ نال دھوکا کیتا سی۔ اوس دن مدینے آیا تے آکھن لگا کہ اے محمد! میں تہا نوں تن گلاں دا اختیار دیندا ہاں:

۱۔ تہا وڈے لئی وادی دے باشندے تے میرے لئی بادیہ دے۔

۲۔ تہا وڈے بعد خلیفہ میں بنائ گا۔

۳۔ میں غطفان دے اک ہزار گھڑ سواراں نال مدینے تے حملہ کر دیواں گا۔

گل کرو تہاں وچوں کیہڑی گل وارا کھاندی ہے؟ رسول خدا نے اوہناں دی ہدایت لئی دُعا منگی تے خموش ہو گئے۔ جدوں عامر گلاں کر رہیا سی، تے پروگرام موجب اربد اُٹھ کے رسول اللہ دے کچھے گیا تے تلوار نیام وچوں کڈن دی کوشش کیتی تاں جے رسول خدا تے وار کرے۔ پر اللہ نے اوس دا ہتھ پھڑ لیا تے اوہ کچھ کرن دے قابل ای نہ رہیا۔

جدوں عامر واپس پریتا تے رستے وچ بنو سلول دی اک سوانی دے گھر آ رام لئی رُکيا۔ اوہنے ای اللہ نے اوس دے حلق وچ طاعون دی گلٹی کڈی۔ سویرے اُٹھ کے گھوڑے تے سوار ہو کے ٹر پیا تے گھوڑے تے ای مر گیا۔ اوہر تلوار دا وار کرن دی کوشش کرن والے اربد تے اسمانی بجلی ڈگی تے اوہ دے نال سڑ کے مر گیا۔

وفد ہمدان:

ہمدان یمن دا اک مشہور قبیلہ سی۔ اوس دا وفد ۹ھ وچ تبوک توں واپسی دے ویلے حاضر ہویا۔ اوہناں وچوں جیہڑے لوکی مسلمان ہو گئے سن، رسول خدا نے اوہناں وچوں ای اک بندے نوں، جیہڑا شاعر وی سی تے اوس دا نام مالک بن نمط سی، امیر مقرر فرما دتا۔ رسول خدا نے وفد نوں ہر اوہ چیز عطا کر دتی جیہڑی اوہناں منگی سی۔ فیر باقی لوکاں نوں اسلام دی دعوت دین لئی حضرت خالد بن ولید نوں بھیج دیا۔ پر ایس دا چھ مہینے وچ وی کوئی نتیجہ سامنے نہ آئیا۔ فیر رسول خدا نے حضرت علی نوں اک خط دے کے اوہناں دے علاقے ول گھلیا۔ جناب علی المرتضیٰ نے حضور دے حکم موجب حضرت خالد نوں واپس بھیج دتا تے بنو ہمدان نوں رسول خدا دا نامہ مبارک پڑھ کے سنایا۔ ایس تے اوہ سارے دے سارے مسلمان ہو گئے۔ رسول رحمت نوں بنو ہمدان دے اسلام دی خبر ملی تے آپ سجدہ ریز ہو گئے۔ سر مبارک چکیا تے فرمایا ”ہمدان تے سلام، ہمدان نوں سلام“

نجران دا وفد:

نجران یمن دی سرحد تے اک کھلا ڈھلا علاقہ سی۔ اوہدے وچ تہتر (۷۳) وستیاں سن تے او تھے اک لکھ ویہہ (۲۰) ہزار جنگی جوان سن جیہڑے سارے دے سارے عیسائی سن۔ رسول خدا نے اوہناں ول اک دعوتی خط لکھیا جہدے جواب وچ اوہناں نے سٹھ (۶۰) بندیاں دا اک وفد رسول اللہ دی خدمت وچ بھیجیا جدوں اوہ وفد مدینے اپڑیا تے حالت ایہ سی کہ اوہناں دھاری دار یمنی کپڑے دے سوہنے سوہنے جوڑے پائے ہوئے سن تے اوہناں نوں گھیسٹ رے سن۔ اُتے ریشمی چادران لیاں سن تے انگلاں تے سونے دیاں مندریاں سن۔ رسول خدا نے اوہناں متکبر بندیاں نال گل کرنا پسند نہ کیتی۔ کجھ دانش وند صحابہ نے مشورہ دتا کہ کپڑے بدل کے تے مندریاں لاہ کے اپنا حلیہ سنوار لوؤ۔ فیر جدوں اوہ رسول خدا دے حضور گل بات لئی حاضر ہوئے تے آپؐ نے فرمایا کہ تہانوں تن گلاں اسلام توں دور لے جانیاں نیں: صلیب دی عبادت، سورکھان دی عادت تے تہاڈا ایہ خیال کہ عیسیٰ اللہ دے بیٹے نیں۔

ایہ سن کے اوہ آکھن لگے کہ فیر عیسیٰ ورگا کون اے جیہڑا بغیر باپ توں پیدا کیتا گیا ہووے؟ ایس تے اللہ نے ایہ آیتاں نازل فرمائیاں:

﴿إِنَّ مَثَلَ عِيسَىٰ عِنْدَ اللَّهِ كَمَثَلِ آدَمَ خَلَقَهُ مِنْ تُرَابٍ ثُمَّ قَالَ لَهُ كُنْ فَيَكُونُ ۝ الْحَقُّ مِنْ رَبِّكَ فَلَا تَكُنْ مِنَ الْمُمْتَرِينَ ۝ فَمَنْ حَاجَّكَ فِيهِ مِنْ بَعْدِ مَا جَاءَكَ مِنَ الْعِلْمِ فَقُلْ تَعَالَوْا نَدْعُ أَبْنَاءَنَا وَابْنَاءَكُمْ وَنِسَاءَنَا وَنِسَاءَكُمْ وَأَنفُسَنَا وَأَنفُسَكُمْ ثُمَّ نَبْتَهِلْ فَنَجْعَلْ لَعْنَتَ اللَّهِ عَلَى الْكَاذِبِينَ﴾ (آل عمران: ۵۹-۶۱)

”رسول خدا نے ایہ آیتاں اوہناں نوں پڑھ کے سنائیاں تے اوہناں نوں مباہلے دی دعوت دتی۔ اوہناں آپس وچ مشورہ کیتا۔ مشورے توں بعد مسلمان تے نہ ہوئے پر جزیہ دین تے تیار ہو گئے۔ رحمت عالم نے اوہناں لئی امان تے دین دی آزادی منظور فرمائی۔ رسول خدا نے جزیہ دی وصولی لئی اوہناں نال حضرت ابو عبیدہ عامر بن جراح نوں روانہ فرمایا۔ اوتھوں ای جناب ابو عبیدہ، امین الامت دے لقب نال مشہور ہوئے۔ نجران واپسی دے ویلے دو بندے مسلمان ہو گئے سن۔ اوہناں توں اسلام اگے نجران ول پھیلدا گیا تے اخیر اوہ سارے مسلمان ہو گئے۔ تے سیاسی ٹیکس جزیہ دی تھاں دنیا تے آخرت دے کم آؤن والے صدقات و خیرات دین لگ پے۔“

بنو فزارہ دا وفد:

تبوک توں واپسی توں بعد جیہڑے وفد آئے اوہناں وچ بنو فزارہ دا وفد وی سی۔ وفد وچ ویہہ (۲۰) بندے سن جیہڑے قحط دے مارے ہوئے سن پر اسلام دا اقرار کر رے سن۔ اوہناں رسول خدا کول قحط سالی دی شکایت کیتی تے عرض کیتی کہ ”یا رسول اللہ! اللہ اگے دُعا کرو کہ اوہ ساڈے علاقے وچ مینہ ورسائے۔ تسیں ساڈے لئی اپنے رب اگے سفارش کر دیو تے تہاڈا رب ساڈے لئی تہاڈے اگے سفارش کر دیوے۔“ آپؐ نے فرمایا ”سبحان اللہ، تہاڈے تے افسوس اے، ایہہ

کیہ آکھ رے او؟ میں تے اپنے رب اگے سفارش کراں گا پر اجیہا کون اے جہدے اگے میرا رب سفارش کرے؟ اوس توں
سوا کوئی معبود نہیں، اوہ اعلیٰ تے عظیم اے۔ اوس دی کرسی نے آسماناں تے زمین نوں گھیر رکھیا اے تے اوہ اوس دی عظمت
تے جلال نال ایوں چرچراندے نیں جو یں نواں کجا وہ چرچراند اے۔“ فیر رسول رحمت نے منبر تے چڑھ کے اوہناں لئی
بارش دی دُعا فرمائی۔ اللہ نے اوہناں نوں رجھویں مینہ تے بھرویں رحمت نال نوازیا۔
نبوٹے دا وفد:

نبوٹے دا اک وفد اپنے اک سردار زید النخیل دی سربراہی وچ رسول اللہ دی خدمت وچ حاضر ہوئیا۔ گل بات کر دیاں
حضورؐ نے اوہناں نوں اسلام دی دعوت دتی جیہڑی اوہناں قبول کر لئی۔ زید النخیل ولوں اللہ دے نبی نے ارشاد فرمایا ”عرب
دے جس بندے دی وی میرے سامنے فضیلت بیان کیتی گئی اے، جدوں اوہدے نال ملاقات ہوئی تے اوہ اوس توں گھٹ
ای نکلیا اے پر زید النخیل ولوں جو کجھ سنیا سی ایہ اوس توں ڈھیرا گے دے۔ آپؐ نے اوہناں نوں زید النخیل دی بجائے زید
النخیر آکھیا تے فیدے آل دوال دا علاقہ اوہناں نوں دے دتا تے ایس دی لکھت پڑھت وی کر لئی۔
بنو کنندہ دا جتھا:

اشعث بن قیس بنو کنندہ دے اسی (۸۰) بندیاں دا اک جتھا لے کے حضورؐ دی خدمت وچ حاضر ہوئیا۔ اوہناں سوہنی
طرحاں کنگھی کیتی ہوئی سی، اکھاں وچ سرمہ پایا ہوئیا سی تے ریشمی جے پائے ہوئے سن۔ جدوں رسول خدا نے اوہناں نوں
دیکھیا تے پچھیا کہ تسیں اسلام قبول نہیں کیتا؟

”کیوں نہیں یا رسول اللہ۔“ اوہناں نے جواب دتا۔

”تے فیر ایہ جے کیوں پائے ہوئے جے؟“ حضورؐ نے سوال کیتا۔

ایہ سن کے اوہناں نے جے اتار دتے۔

یمن دے وسنیک تے اسود غنسی کذاب:

یمن وچ اسلام دی روشنی اپڑ تے گئی سی پر اے اوس علاقے دے وسنیک کجھ قبیلے شرارتاں وچ رُجھے ہوئے سن۔
اوہناں یمنی قبیلیاں وچ اک بنو مذحج وی سی۔ رمضان ۱۰ھ وچ رسول اللہ نے حضرت علی المرتضیٰ دی کمان وچ تن سو
سواراں دا اک جتھا بنو مذحج ول ٹوریا تاں جے اوہناں نوں اسلام دی دعوت دتی جاوے تے جے اوہ کوئی شرارت کرن تے
ایہ حربی دستہ اوہناں دا مقابلہ کرے گا۔ اوہناں نے جناب علی دی دعوت قبول نہ کیتی تے کفر تے قائم رے تے نالے
مسلماناں ول تیر اندازی شروع کر دتی۔ حضرت علی نے تک کے اوہناں دا مقابلہ کیتا تے اخیر اوہناں تے غالب آ گئے۔ کجھ
دیر توں بعد اوہناں نوں فیر اسلام دی دعوت دتی گئی۔ ایس واری اوہ مسلمان ہو گئے۔

حضرت ابو موسیٰ اشعری تے معاذ بن جبل یمن ول:

رسول خداؐ نے حضرت ابو موسیٰ عبد اللہ بن قیس اشعری نوں زبید تے عدن دا والی مقرر کر کے بھیجیا اوہناں ای
دناں وچ حضرت معاذ بن جبل نوں وی یمن دے کجھ علاقے دا حاکم مقرر کیتا۔ جناب معاذ بڑی سوہنی شخصیت دے مالک

سن۔ آپ سارے ای غزویاں وچ رسول خدا دے نال رے۔ سخی ایڈے سن کہ ہر شے فی سبیل اللہ دے دیندے تے آپ مقروض ہوئے رہندے سن۔ علم و فضل وچ جناب معاذ دا ایہ مقام سی کہ حضورؐ دا ارشاد مبارک اے کہ چار بندیاں توں قرآن سکھو..... ابن مسعود، ابی بن کعب، معاذ بن جبل تے سالم مولیٰ ابی حذیفہ توں۔

سرور دو عالم دے حکم موجب جدوں معاذ یمن وُل جان لگے تے حضورؐ اوہناں نوں رب راکھا آکھن لئی آپوں مدینے توں باہر تشریف لیائے۔ معاذ سواری تے سن تے نبی رحمت پیدل ٹر دے جا رے سن تے اوہناں نوں نصیحتاں کر رے سن۔ جس ویلے معاذ رخصت ہون لگے تے حضورؐ نے فرمایا: ”اے معاذ! شاید ہن تیری میری ملاقات نہ ہو سکے تے تیرا گزر میری مسجد تے قبر دے نیڑیوں ہووے۔ اوس ویلے معاذ تے کیہ بیتی ہووے گی جدوں اوس نوں یقین ہو گیا سی کہ اوہ اپنے محبوب آقا دی اخیر واری زیارت کر رہیا اے، پر حضورؐ دے حکم دی تعمیل وی ضروری سی۔ معاذ یمن وُل چلے گئے تے رسول خداؐ اوہناں نوں ودھیا کر کے شہر واپس آ گئے۔ معاذ جدوں مدینے واپس آئے تے خلافت دی مسند تے جناب صدیق اکبر تشریف فرما سن۔ آپ تھوڑا چرای سرکار دے شہر وچ ٹھہرے تے فیرواہس شام چلے گئے تے حیاتی دے اخیر ساہ تیکر اوتھے ای رے۔

کذاب عنسی دا ظہور تے قتل:

یمن دی لوکائی مسلمان ہو چکی سی تے ہر پاسے رسول خداؐ دے مقرر کیے ہوئے حاکم موجود سن کہ کھف حنان ناں دے شہر وچ ست سو (۷۰۰) جنگجوواں نال اچن چیت اسود عنسی ظاہر ہوئیا۔ اوس نے نبوت تے حکومت دی ملکیت دا دعویٰ کیتا تے ہولی ہولی اپنی طاقت وچ اضافہ کر دارہیا۔ مسلمان عمال سارے دے سارے اشعریین دے علاقے وچ کٹھے ہو گئے تے اوہدے نال کھلم کھلا کفر نہ لے سکے۔ فیروز دیلمی تے اوہناں دے فارسی بھناں نے، جیہڑے سارے دے سارے مسلمان ہو چکے سن، کوئی چال چلی۔ جناب فیروز نے اوس جھوٹے نبی داسر لاہ کے قلعے توں باہر وگاڈتا۔ اوس دا ایہہ حال ویکھ کے اوس دے ساتھی گھاہر گئے تے فیرویکھدیاں ای ویکھدیاں تتر بتر ہو گئے۔ اسلام تے اہل اسلام غالب آ گئے تے اپنے کماناں تے واپس پرت آئے۔

رسول خداؐ نے اپنے وصال توں اک دن پہلے صحابہ نوں دسیا کہ اج اسود عنسی کذاب قتل ہو گیا اے، فیرواہد صدیقی وچ یمن توں ایس امر دا خط وی وصول ہو گیا۔

جناب علی المرتضیٰ یمن وُل:

حجۃ الوداع لئی رواگئی توں پہلاں رسول خداؐ نے حضرت علی دی امارت وچ تن سو مجاہداں دا اک جتھا یمن وُل ٹوریا۔ آپ جدوں یمن اپڑے تے اپنے مجاہداں نوں نکلے نکلے ٹولیاں وچ ونڈ ڈتا۔ مجاہداں نے اوس علاقے دے وسنیکاں نوں اسلام دی دعوت دی پر اوہناں قبول نہ کیتی۔ مدح قبیلے دے کجھ جوان تے لڑن مرلے تیار ہو گئے تے ایوں اپنے ۲۰ بندے مروا بیٹھے۔ فیرواہد اگے لگ کے بھج کھلو تے۔ جناب علی المرتضیٰ نے کمال سیانف دا مظاہرہ کیتا تے اوہناں دا چچا کر کے

اوہناں نوں قتل کرن دی بجائے، اک وار فیر اوہناں نوں اسلام دی دعوت دتی۔ ایہ دعوت اوہناں نے قبول کر لئی۔ ایس توں پہلاں بوہت سارا مال غنیمت مجاہداں دے ہتھ لگ چکیا سی، جیہڑا جناب علی المرتضیٰ نے مجاہداں وچ تقسیم کر دتا سی، ہاں شمس سنبھال لیا سی۔

ایس حربی جتھے دے واپس پرتن تیکر جناب رسول خدا حج لئی روانہ ہو چکے سن، ایس لئی جناب علی وی مکے وچ آقا کول اپڑ گئے۔ حدیث ابو ذر:

اک دن دی گل اے سرور کوئین ”مسیت وچ تشریف فرما سن۔ اوہ تھے حضرت ابو ذر غفاری وی اپڑ گئے تے حضور دے کول جا کے ادب نال بیٹھ گئے۔ رحمت عالم نے ارشاد فرمایا کہ اے ابو ذر! مسیت وچ حاضری دے آداب نیں۔“

”دور کعت نماز“ رسول رحمت نے ارشاد فرمایا۔

جناب ابو ذر اُٹھے، دور کعت نفل ادا کیتے تے فیر آقا دے سامنے دوزانو ہو گئے۔ آپ نے ویکھیا کہ اوہ تھے ہور کوئی بندانہیں، سرکار دی پوری توجہ اوہناں ول ای ہووے گی تے ایس موقع نوں غنیمت جان دیاں ہوئیاں سرکار دو عالم نال گل بات شروع کر دتی۔ اوہ گل بات اسلامی تواریخ وچ بڑا مل پائی تے اے تیکر اوس نوں راہنما اصولاں دے طور تے یاد رکھیا گیا اے۔ جناب ابو ذر نے عرض کیتی:

اللہ دے نیڑے کیہڑے عمل چوکھے چنگے نیں؟

ارشاد ہوئیا: اللہ تعالیٰ تے ایمان تے اوہدے رستے تے جہاد۔

عرض کیتی: کس مومن دا ایمان چوکھا ٹھیک اے؟

ارشاد ہوئیا: چنگے اخلاق نال جیا ہو یا ایمان زیادہ کامل اے۔

عرض کیتی: مسلماناں وچ افضل کون اے؟

ارشاد ہوئیا: جہدی زبان تے ہتھیاں توں دُجے مسلمان محفوظ رہن۔

عرض کیتی: کیہڑی ہجرت افضل اے؟

ارشاد ہوئیا: جس نے بدی نوں ترک کر دتا۔

عرض کیتی: اللہ نے جیہڑی کتاب حضور تے نازل فرمائی، اوہدے وچ سب توں افضل آیت کیہڑی اے؟

ارشاد ہوئیا: آیت الکری

عرض کیتی: یا رسول اللہ! انبیاء دی تعداد کئی اے؟

ارشاد ہوئیا: اک لکھ چوی ہزار۔

عرض کیتی: ایہناں وچ رسولاں دی تعداد کئی اے؟

ارشاد ہوئیا: تین سو تیراں۔

عرض کیتی: یا رسول اللہ! کچھ وصیت فرماؤ۔

ارشاد ہونیا: میں تمہاںوں اللہ توں ڈرن دی وصیت کردا ہاں۔ ایہ تقویٰ تہاڈے حالات نوں سنوار دے گا۔

عرض کیتی: یا رسول اللہ! کچھ ہور ارشاد فرماؤ۔

ارشاد ہونیا: خموشی اختیار کریا کرو۔ چوکھا ہسن توں پرہیز کرو، ایہ دلاں نوں مردہ کردیندا اے تے چہرے دی نورانیت مکا

دیندا اے۔

عرض کیتی: یا رسول اللہ! ہور وصیت فرماؤ۔

ارشاد ہونیا: مسکیناں نال محبت کرو تے اوہناں دے نیڑے رہن نوں چنگا جانو۔

عرض کیتی: یا رسول اللہ! ہور۔

ارشاد ہونیا: سچ بولیا کرو بھانویں کوڑا ہووے۔

عرض کیتی: یا رسول اللہ! کچھ ہور؟

ارشاد ہونیا: اللہ دے معاملے وچ کسے ملامت کرن والے دی ملامت دا اندیشہ نہ کرو۔

جبرائیل اجنبی دے روپ وچ:

ایسے سال دی گل اے کہ اک دن رسول رحمت اپنے اصحاب نال مسجد وچ تشریف فرما سن تے او تھے اک صاحب آئے۔ اوہناں دے کپڑے چوکھے صاف ستھرے تے چٹے سفید سن، چہرہ خوبصورت سی تے بدن وچوں خوشبودے بلھے آ رہے سن۔ اوہ ہر کسے لئی اجنبی سن پر سفر دے کوئی آثار وی نظر نہیں آ رہے سن۔ اوہ رسول خدا دے سامنے دوزانو ہو کے بیٹھ گئے تے اپنے ہتھ گوڈیاں تے رکھ لے۔ فیر اوہناں رسول خدا اگے اسلام، ایمان، احسان تے قیامت دے متعلق سوال کیتے تے رسول خدا دے ہر جواب دی تصدیق کردے گئے۔ جدوں اوہناں قیامت ولوں پچھیا تے حضور نے جواب دتا کہ جس نوں پچھیا جا رہیا اے اوں نوں وی اوہناں ای پتہ اے جتّاں پچھن والے نوں۔ جدوں اوہ تشریف لے گئے تے رسول خدا نے سوال کیتا کہ کسے نوں پتہ اے اوہ کون سی۔ سب نے جواب دتا کہ اللہ تے اوں دار رسول ای جان دے نیں کہ اوہ کون سن۔ آپؐ نے فرمایا اوہ جبرائیل سن تے تمہاںوں دین سکھان آئے سن۔

* * * *

حجۃ الوداع

جدوں رسول خداؑ نوں خدا تعالیٰ ولوں نصرت تے فتح دے تھے ملے تے لوکائی فوج در فوج اللہ دے دین وچ داخل ہون لگ پئی تے اللہ دے محبوب نوں تسلی ہو گئی کہ اوہناں نوں جس گوچرا ایس دھرتی تے گھلیا گیا سی، اوہ مقصد پورا ہو گیا اے پر اک واری پوری قوم نوں بھرویں اعتماد وچ لین والا کم اے باقی سی۔ آج دے حکمراناں کول ابلاغ عامہ دیاں نت نویاں ایجاداں تے نشری تقریراں دیاں سہولتاں ہون بھاروں اپنے ہم وطنان نوں اعتماد وچ لین وچ، تے اپنی گل اوہناں تیکر اپڑان وچ کسے اوکڑ دا سامنا نہیں کرنا پیندا۔ پراوس دور وچ نریاں اوکڑاں ای اوکڑاں سن۔ بند اہیہ سوچ کے حیران رہ جاندا اے کہ اوس عظیم دانش ور تے شہر علم نے ایس کم نوں کڈی سیانف نال سوکڑاں وچ بدل دتا۔ آپؐ نے دین دے تھماں وچوں اک تھم اجتماعیت دی اک شاندار مثال قائم کر دتی تے ایس گل دا عملی ثبوت حاصل کر لیا کہ ہن میری واج تے لیک آکھن والے نرے صدیق اکبر تے علی المرتضیٰ ای نہیں سگوں لکھاں دی لوکائی اے۔ دین ابراہیمی دے گڑھ وچ تے بیت اللہ دیاں کندھاں دے سائے تھلے حیاتی گزارن دے، تے حقوق انسانی دے احترام دے اوہ راہنما اصول دتے کہ دنیا دنناں تھلے انگلیاں دب کے رہ گئی اے۔ ایس ویکھ دے ہاں کہ انگلستان دا جون ۱۴۱۵ دا انسانی حقوق دا منشور اعظم میکانا کارٹا، فرانس دا ۱۷۸۹ء دا اعلان حقوق انسانی، امریکہ دا دسمبر ۱۷۹۱ء دا نوشتہ حقوق امریکہ (Bill of Rights) تے اقوام متحدہ دا دسمبر ۱۹۴۸ء دا عالمی منشور حقوق انسانی، ایہناں سبھناں دا باپ مکے دا خطبہ حجۃ الوداع ای ہے تے ایہہ سب دے سب محمد الرسول اللہ دی اوس تقریر دا چر بہ نیں۔ سو عدل اجتماعی تے حقوق انسانی دے سلسلے وچ اولاد آدم نوں جو کجھ اللہ دے محبوب نے عطا فرما دتا اے، اوس توں ودھ کسے گل دا تصور وی نہیں کیتا جاسکدا۔ اصل وچ اوویں دا خطیب تے قانون ساز فیر پیدا ای نہیں ہو سکيا تے نہ قیامت تیکر کسے ماں نے ایہ دعویٰ کرنا اے کہ ایہ میرا لال، آمنہ دے لال توں اگے نکل گیا اے۔ عزیز پڑھنہارو! چیتے رہوے کہ ایس فقیر نے ایہ گل لکھی اے کہ کسے ماں نے دعویٰ ای نہیں کرنا۔

مکے توں روانگی دی تاریخ:

ایس گل تے تقریباً اتفاق اے کہ رسول رحمت ۲۵ ذی قعدہ ۱۰ھ (مطابق ۲۲ فروری ۶۳۲ء) ہفتہ والے دن مدینہ طیبہ توں روانہ ہوئے۔ بقول ابن ہشام ”خرج رسول الله ﷺ الى الحج لخمس ليال بقين من ذي القعدة“ (جلد ۴ صفحہ: ۲۴۸) واقدی نے وی نیڑے تر یڑے ایہی گل لکھی اے (کتاب المغازی، آکسفورڈ یونیورسٹی پریس، لندن ۱۹۶۶ جلد ۳ صفحہ: ۱۰۸۹) ابن سعد (الطبقات الکبریٰ، دار صادر، بیروت ۱۹۵۷ء، جلد ۲ صفحہ: ۱۷۳) تے ابی الفداء (کتاب المختصر فی اخبار البشر، المطبعة اطسینیہ، مصر، پہلا ایڈیشن، جلد ۱ صفحہ: ۱۵۰) وغیرہ نے وی ایہی گل لکھی اے۔

مولانا عبدالقدوس ہاشمی (م ۱۹۸۹ء) دی کتاب تقویم تاریخی، توں وی ایسے ترخ تے دن دا پتا لگدا اے۔ جدوں کہ مولوی اسحق النبی علوی دی تحقیق موجب و سٹیفیلڈ نے ذی قعدہ ۱۰ھ دی پہلی ترخ نوں چہار شنبہ قرار دتا اے جہدی روناں ۲۵ نوں ہفتہ ای آؤندا اے جیہڑا روایتاں دے عین مطابق اے۔ (نقوش، رسول نمبر جلد ۲، ص ۱۹۸) اسحق النبی علوی اگے لکھدے نیں کہ ”روایتاں توں ثابت ہندا اے کہ اوس سال حج جمعہ نوں ہونیاسی یعنی جمعے والے دن ۹ ترخ سی۔ مکہ مکرمہ وچ ذوالحجہ دا چن ۲۹ نوں من کے پہلی ترخ پنج شنبہ نوں قرار دتی گئی سی تے حج ایسے حساب نال رکھیا گیا سی۔ مولانا احمد رضا خان صاحب بریلوی نے، جہاں نوں علم نجوم تے کافی دسترس سی، ایگل آکھی اے کہ نجومی حساب نال ۹ نوں جمعہ نہیں آؤندا پر اوہناں دا خیال اے کہ اوس سال، اللہ دی قدرت کا ملہ نال ہوسکدا اے کہ بقاعدہ روایت ہوئی ہووے تاں جے پیغمبر اسلام دا ایہ حج جمعہ دے مقدس دن وچ ہو سکے۔ پتہ نہیں مولانا غلام رسول مہر نے اپنے مضمون ”حجۃ الوداع“ وچ حضور دی مدینہ منورہ توں روانگی ۲۶ ذی قعدہ ۱۰ھ (۲۳ اپریل ۶۳۲ء) ہفتے دے دیہاڑے کس حساب نال درج کیتی اے۔ سیرت پاک (ماہ نوکی خصوصی اشاعتوں کا انتخاب) ادارہ مطبوعات پاکستان، کراچی ۱۹۶۶ء ص ۱۶۷

تیاریاں:

رسول خدا دے حج دے ارادے دا پتہ لگدیاں ای لوکائی نے تیاریاں چھوہ دتیاں۔ صحرا دے وسنیک، پہاڑاں دیاں گھاٹیاں وچ ڈیرے لان والے، پنڈاں تے شہراں دے باشندے، سارے دے سارے، دوروں نیڑیوں مدینے ول ٹرے آؤندے سن۔ ویکھدیاں ای ویکھدیاں مدینہ طیبہ دے نال اک مدینہ الحجاج آباد ہو گیا۔ ہر پاسے خیمے ای خیمے نظر آ رہے سن تے اوہناں خیمیاں وچ نبی رحمت دے پروہنیاں دی تعداد اک لکھ توں ٹپ گئی سی۔ ایہ اوہ لوک سن جیہڑے اے اے کل تیکر اک دُجے دے خون دے پیاسے سن پر اوس دن سب اک دُجے دے سیری تے مددگار بنے ہوئے سن۔ سب اک دُجے دے بچن تے سارے اک دُجے دے بھرا۔ بڑا سوہنا نظارہ سی۔ مدینے دیاں گلیاں تے بازار رسول خدا دے پروہنیاں تے ڈل ڈل پیندے سن۔ ہمدے مسکراندے چہرے لے کے چانواں نال رھدے، اک اللہ دی رستی پھڑی کھلو تے مسلمان ”حاضر آں رہا حاضر آں“ دیاں پکاراں پاؤن دیاں تیاریاں کیتی بیٹھے سن۔

ہفتے والے دن تاجدار مدینہ نے مدینہ طیبہ تے مدینہ الحجاج وچ کوچ دی تیاری کرن دا اعلان فرمایا۔ موئے مبارک وچ تیل لایا، کنگھی کیتی، تہ بند نہیا، چادر دی بکل ماری، قربانی دے جنوراں نوں قلاوہ پایا تے پیشی دی نماز پڑھ کے کوچ فرما دتا۔ عصر توں اگدیں ذوالحلیفہ اپڑ گئے۔ اوتھے عصر دیاں دو رکعتاں پڑھیاں تے اگلی ظہر تیکر باقی نمازاں دیاں دو رکعتاں وی اوتھے ای پڑھیاں۔ ظہر پڑھدیاں ای احرام نہیا تے لبیک دی صدا بلند کیتی۔ اپنی اٹھنی قضاوتے سوار ہو کے لبیک دی صدا اک وار فیر بلند کیتی۔ فیر آپ اپنی سواری نوں کھلے میدان ول لے گئے تے اوتھے جا کے دی لبیک پکاریا۔

رسول رحمت دے مہمان ہن اللہ دے مہمان سن۔ اک لکھ توں چوکھے، اللہ دے مہماناں نے اللہ دے محبوب دی امارت وچ، اللہ دے گھر ول اپنا سفر جاری رکھیا۔ راہ وچوں حاجیاں دے ہوو جتھے نال رلدے گئے تے حاجیاں دی تعداد

ڈیڑھ لکھ دے نیڑے تریڑے اڑ گئی۔ اک ہفتے دے سفر توں بعد شام ویلے آپ مکے دے نیڑے اڑ گئے تے ذی طوی دی تھان تے ڈیرے لالے۔ رات اوتھے ای گزاری۔ سویرے فجر دی نماز توں بعد آپؐ نے غسل فرمایا۔ غسل فرمان توں بعد اللہ دا محبوب اللہ دے مہماناں دے قافلے نوں مکے دے اندر لے گیا۔ مسجد حرام اڑ کے آپؐ نے خانہ کعبہ دا طواف فرمایا۔ فیہ صفا و مروہ دے وچکار سعی کیتی پر احرام نہیں کھولیا۔ اوس دن اتوار ۴ ذی الحجہ ۱۰ھ تے ۲ مارچ ۶۳۲ء سی۔ مکہ معظمہ وچ چار دن قیام کرن توں بعد جمعرات ۸ ذی الحجہ نوں آپؐ منیٰ تشریف لے گئے۔ اوتھے ظہر، عصر، مغرب تے عشاء دیاں نمازاں ادا فرمایاں۔ رات منیٰ وچ ای گزری۔ سویرے ۹ تریخ نوں پہلوں نمرہ ول تشریف لے گئے فیہ عرفات ول چہرہ مبارک موڑ لیا۔ فیہ اوس دن یعنی یوم عرفہ سورج ڈھلن توں بعد سرکار نے قصواء تے سوار ہو کے اوہ توار بنجی خطبہ ارشاد فرمایا جس دے چرے آج تیکر یورپ تے امریکہ وچ دکھالی دیندے نیں۔ ظہر تے عصر دیاں نمازاں اوتھے ای پڑھیاں گئیاں۔ سورج غروب ہون دے ویلے خدائے واحد دا نام پکارن والیاں دا ایہ قافلہ مزدلفہ ول روانہ ہونیا جتھے مغرب تے عشاء دیاں نمازاں ادا کیتیاں گئیاں۔ سویرے فجر پڑھدیاں سارای مزدلفہ توں کوچ فرمایا تے مشعر الحرام تے وادی الحسرتوں لنگدیاں ہوئیاں ۱۰ ذی الحجہ نوں منیٰ تشریف لیائے۔ اوس دن (یوم نحر نوں) اوتھے فیہ خطاب فرمایا۔ خیال کیتا جاندا اے کہ اوس خطیب اعظمؐ نے ایام تشریق یعنی ۱۱، ۱۲ ذی الحجہ (۹-۱۰ مارچ) بروز اتوار، بیروی خطاب فرمایا۔

رسول رحمت نکریاں مار کے قربان گاہ ول تشریف لے گئے۔ اوتھے اپنے دست مبارک نال ۶۳ اونٹ ذبح کیتے۔ فیہ ایہ کم جناب علی المرتضیٰ دے ذمے لایا گیا۔ اوہناں نے باقی دے ۳۷ اونٹ ذبح کر کے سودی تعداد پوری کردتی۔ آپؐ نے قربانی دے اوہناں اوٹھاں دا گوشت اوتھے تناول وی فرمایا۔ فیہ رسول خدا مکہ تشریف لے گئے تے بیت اللہ دا طواف فرمایا۔ بیت اللہ وچ ای ظہر دی نماز ادا فرمائی۔ فیہ چاہ زمزم تے بنو عبدالمطلب کول تشریف لے گئے۔ اوہ حجاج کرام نوں زمزم دا پانی پیارے سن۔ اوتھے آپؐ نے بنو عبدالمطلب نوں مخاطب کر دیاں فرمایا کہ ”بنو عبدالمطلب! تسیں زمزم دا پانی کچھو۔ جے ایہ اندیشہ نہ ہوندا کہ پانی پیان دے ایس کم وچ لوکائی تہاڑے تے غالب آجاوے گی تے میں وی تہاڑے نال لگ جاندا۔“ سرکار رحمت دا مطلب ایہ سی کہ جے مینوں میرے صحابیاں نے پانی کھچدیاں ویکھ لیا تے فیہ اوہ سارے میری بیروی وچ ایسے کم تے لگ جان گے۔ ایوں حجاج نوں پانی پیان دا جیہڑا شرف بنو عبدالمطلب نوں حاصل اے، اوہدے تے حرف آئے گا۔

۱۲ ذی الحجہ ۱۰ھ مطابق ۱۲ مارچ ۶۳۲ء بروز بدھ رسول اللہ نے اپنے بچپنے دیاں یاداں ول وچ سجا کے قصواء دی مہار مدینہ منورہ ول موڑ دتی۔ رسول خدا دے ایس حج مبارک نوں حجۃ الوداع، حجۃ البلاغ تے حجۃ الاسلام دے نانواں نال یاد کیتا جاندا اے۔

مقام مرتضیٰ:

جویں کچھ ذکر ہوئیا اے، حجۃ الوداع لئی روانگی توں پہلاں، رسول خدا نے اک حربی جتھا جناب علی المرتضیٰ دی کمان وچ یمن ول ٹوریا سی۔ قبیلہ مذحج نال جوڑ پان توں بعد تے بہت سارے قبائلی سرداراں نوں مسلمان کرن توں بعد جناب علی

کے اڑ گئے۔ ایسے مقابلے وچ مجاہداں نوں اپنے امیر تے کمانڈر حضرت علی المرتضیٰ نال کجھ شکائتاں پیدا ہوئیاں۔ سکے آکے مجاہداں نے جناب رسول اللہ دی خدمت وچ جناب علی المرتضیٰ دے خلاف شکائتاں پیش کردتیاں۔ حضور نے جناب علی نوں یاد فرمایا تے اصحاب دی بے چینی دی وجہ دریافت فرمائی۔ جدوں آپ نوں یقین ہو گیا کہ حضرت علی کولوں کدرے کوئی غلطی نہیں ہوئی تے آپ دی تسلی ہو گئی۔

ایوں جا پدا اے کہ جدوں جناب بریدہ اسلمی دی قیادت وچ کجھ مجاہداں نے شکوے شکائتاں کیتے، اوہدوں حاجیاں دا قافلہ مدینے دے رستے وچ جھگڑے نیڑے سی۔ جھگڑے توں کوئی دو میلاں دے پندھ تے غدیر خم ناں دی اک ہور مشہور تھاں سی۔ غدیر خم ایس پاروں اہم تھاں سی کہ اوتھوں عرب دے چارے پاسیاں نوں راہواں نکل دیاں سن۔ ایس توں پہلوں کہ حاجی غدیر خم توں کھلر پلر جان دے، رحمت اللعالمین نے ایہہ ضروری سمجھیا کہ جناب علی المرتضیٰ دے مجاہداں نوں جیہڑی غلط فہمی ہوئی اے، اوس دا ازالہ کردتا جاوے۔

اوس دن ذوالحجہ دی ۱۸ تاریخ تے اتوار دا دن سی۔ رسول رحمت نے اک شاندار خطبہ ارشاد فرماندیاں اہل بیت دی شان بیان فرمائی تے سیدنا علی المرتضیٰ دے فضل و کمال، امانت تے دیانت، تے عدل انصاف بارے اپنی مبارک زبان توں شہادت دتی۔ اوس موقع تے جناب علی المرتضیٰ بابت اپنی امت نوں ایہہ راہنما اصول وی دتا کہ

مَنْ كُنْتُ مَوْلَاهُ فَإِنَّ عَلِيًّا مَوْلَاهُ. اَللّٰهُمَّ وَالِ مَنْ وَالَاهُ وَعَادِ مَنْ عَادَاهُ.

”جس دا میں مولا ہاں فیر علی وی اوس دا مولا اے۔ اے اللہ! جیہڑا ایس (جناب علی) نوں دوست بنانا اے،

اوس نوں تسیں وی اپنا دوست بناؤ تے جیہڑا ایس نال عداوت رکھدا اے، تسیں وی اوہدے نال عداوت رکھو۔“

ایس خطبے توں بعد جناب عمر فاروقؓ نے جناب علی المرتضیٰ نوں مبارک وی دتی۔ ایس توں بعد جناب بریدہ نے پوری

حیاتی جناب علی شیر خدا دی محبت وچ گزاردتی۔

حجۃ الوداع دے خطبے:

جویں کچھ ذکر ہو گیا اے نبی رحمت تے خطیب اعظمؐ نے حج دے دنوں وچ چار خطبے فرمائے۔ جنہاں بزرگاں نوں ایہناں چار خطبیاں والی گل تے اتفاق نہیں وی اوہ وی ایہ گل من دے نیں کہ ایہ خطبے اک توں زیادہ سن۔ اُمہات کتب وچوں کوئی اک کتاب وی اجہی نہیں ملدی جہدے وچ اوہناں خطبیاں دا پورا متن مل سکے۔ پروفیسر ڈاکٹر نثار احمد (جامعہ کراچی) نے دکھو دکھو روایتاں دی پرکھ پڑچول کر کے پورے متن نوں اک تھاں تے اکٹھا کرن دا اعزاز حاصل کیتا اے۔ عربی تے اردو زبانوں وچ ایہ متن اوہناں دی کتاب خطبہ حجۃ الوداع، وچ لکھدا اے۔ ایہ فقیر ایس تواریخی خطبے (یاں خطبیاں) دا پنجابی ترجمہ کرن دی جسارت کر رہیا اے تاں جے پنجابی دے پڑھنہاراں تیکر وی اوس اُچے خطیب دیاں گلاں اڑ جان، پنجابی زبان مالا مال ہو جاوے تے حضورؐ دے ایس حکم دی وی تعمیل ہو جائے کہ میریاں گلاں اوہناں تیکر وی اڑا دیو جیہڑے اتھے موجود نہیں۔

رحمت اللعالمین از قاضی سلمان منصور پوری، جلد ۱، ص ۲۳۹،

خطبے دا متن:

تعریفِ داحق دار صرف اللہ اے۔ اسیں اوس ذات دی ہی حمد و ثناء بیان کرنے آں تے اوہدے توں ای مدد تے معافی منگدے ہاں، اوسے ذات ول رجوع کر دے ہاں تے اپنے نفس دیاں شرارتاں تے بھیڑے عملاں کولوں اوسے اللہ دی پناہ منگدے ہاں۔ جس نوں اللہ ہدایت عطا فرمائے، اوس نوں کوئی گمراہ نہیں کر سکدا اتے جس نوں اوہ گمراہ کر دیوے، اوس نوں کوئی ہدایت نہیں دے سکدا۔ میں گواہی دیندا ہاں کہ اوہدے سوا کوئی معبود نہیں، اوہ کلا اے تے اوس دا کوئی شریک نہیں تے نالے گواہی دیندا ہاں کہ محمدؐ اوس دے بندے تے رسول نیں۔

امّا بعد!

لوکو! میری گل چنگی طرحاں سن لوؤ تے سمجھ لوؤ۔ کیہ پتہ ایس سال توں بعد ایس تھاں تے میری تہاڈی کدے ملاقات نہ ہو سکے۔

لوکو! ربّ دی سونہ، مینوں نہیں پتہ، میں ایس تھاں تے تہانوں کدے مل سکاں گایاں نہیں۔
اللہ دے بندو! خاموشی نال گل سنو۔ تسیں خورے ایس سال توں بعد مینوں نہ ویکھ سکوں۔ سنو! میں ویروا کر کر کے تہانوں ہر گل دسنا چاہندا ہاں، کیوں جے خورے فیر میں تہانوں کدے نہ مل سکاں۔
لوکو! میرے کولوں جج دے مسئلے مسائل سکھ لوؤ۔ کوئی پتہ نہیں ایس توں بعد کسے ہور جج دی نوبت نہ آئے۔
اللہ اوہدی خیر کرے تے اوس نوں راضی رکھے، جس نے میریاں گلاں سنیاں تے اوہناں نوں دُجیاں تیکرا پڑایا۔
کدے ایوں وی ہندا اے کہ سنن والا کوئی ایڈا سیانا نہیں ہوندا پر اگے جہدے تیکر گل اپڑائی جاندی اے اوہ عقل وند ہوندا اے۔ لوکو! تسیں خورے اگلے ورھے میرے نال ایوں نہ مل سکوں جو میں ہن مل رہا ہوں۔
دفعات:

دفعہ ۱: لوکو! سنو، تہاڈا رب اک اے تے تہاڈا باپ اک اے۔ تسیں سب آدم دی اولاد جے تے آدم مٹی توں بنے سن۔ تہاڈے وچوں اللہ دے نیڑے، عزت والا اوہ اے جیہڑا چوکھے تقوے والا اے۔ بے شک اللہ علیم وخبیر اے۔ ویکھو، کسے عربی نوں کسے عجمی اُتے، کسے عجمی نوں کسے عربی اُتے، کسے کالے نوں کسے لال اُتے، کسے لال نوں کسے کالے اُتے، کوئی فضیلت، لحاظ تے وڈیائی نہیں پر ہاں تقویٰ پاروں ہو سکدی اے۔

دفعہ ۲: اللہ دے بندو! میں تہانوں پر ہیزگاری دی وصیت کردا ہاں تے تہانوں اک اللہ دی اطاعت دا حکم دیندا ہاں تے اپنے خطبے دا مڈھ چنگی گل نال ای بٹھاں گا۔

دفعہ ۳: سن لوؤ، جاہلیت دی ہر شے میرے پیراں تھلے مڈی گئی اے۔ خبردار، اہل جاہلیت دی ہر چیز میرے پیراں دے تھلے ہے۔ سن لوؤ جاہلیت دا ہر خون (انتقام) مال تے دُجیاں رسماں میرے قدماں پٹھ نہیں تے ایہ قیامت تیکر لئی ختم کیتے جاندے نیں۔ جاہلیت دے سارے ٹور پٹے جہاں پاروں تکتے غرور پیدا ہوندا سی، سب ختم کیتے جاندے نیں۔ صرف سدا نہ (کعبہ دی نگہبانی) تے سقایہ (حاجیاں نوں پانی پینا دا اعزاز) دے عہدے باقی رہن گے۔ قتل عمد اقصا

(بدلہ) لیا جاوے گا۔ قتل عمد نال اوہ قتل رے گا جیہڑا لاٹھی یاں پتھر نال ہووے تے ایس دی دیت سواوٹھ متھی گئی اے، تے جیہڑا ایس توں ودھ منگے گا اوہ اہل جاہلیت وچوں ہووے گا۔ تے آج توں ہر طرحاں دا سود ختم اے، ہاں اصل زردا تہاں توں حق اے جہدے وچ نہ دُجیاں دا نقصان اے نہ تہاڈا۔ اللہ نے ایگل طے کر دتی اے کہ سود دی کوئی گنجائش نہیں۔ تے زمانہ جاہلیت دے سارے سود ہن باطل نہیں تے جتھے تیکر عباس بن عبدالمطلب دے سود دا تعلق اے، اوہ سارے دا سارا ختم سمجھو۔

زمانہ جاہلیت دے سارے خون آج توں صاف تے معاف نیں۔ اپنے خاندان وچوں پہلا انتقام جٹوں میں معاف کر دا ہاں اوہ ربیعہ بن حارث بن عبدالمطلب دے پتر دا اے جہدی رضاعت بنولیت وچ ہووے سی تے بنو ہذیل نے اوس نوں قتل کر دتا سی۔ بس میں پہل کر دیاں ہونیاں جاہلیت دے انتقاماں وچوں خون دا بدلہ معاف کر دا ہاں۔ لوگو! بنا شک نسی (حرام مہینیاں نوں اگے پچھے کرنا) کفر وچ وادھے دا سبب اے۔ ایہدے نال کافر گمراہی وچ پے جان دے نیں کہ اک ورہا تے (اپنی نفسانی غرض نال) اس نوں حلال آکھدے نیں تے دُجے ورھے (جدوں کوئی ذاتی غرض نہ ہووے) ایس نوں حرام کر دیندے نیں، تاں جے اللہ نے جیہڑی گنتی مقرر رکیتی ہوئی اے، اوس نوں پورا کر لین۔ ایوں اوہ اللہ دے حرام کیتے مہینے نوں حلال تے اوس دے حلال دسے ہوئے مہینے نوں حرام کر لیندے نیں۔

دیکھو۔ زمانہ گھم پھر کے اوسے تھاں تے آ گیا اے جتھوں کائنات دی تخلیق دے دیہاڑے شروع ہوئی سی۔ اللہ دے نیڑے تے سال وچ بارہاں ای مہینے نیں، اوہناں وچ چار محترم نیں تے حرام نیں جہاں وچ تن (ذی قعدہ، ذی الحجہ تے محرم) تے اکٹھے نیں تے اک وکھرا اے جیہڑا کہ رجب اے، جیہڑا شہر مضر اکھواندا اے تے جمادی الثانی تے شعبان دے وچکار ہوندا اے۔ تے چیتے رکھو کہ مہینہ ۲۹ دن داوی ہوندا اے تے ۳۰ دن داوی۔

دسو، میں اپنی گل تہاڈے تیکر اپڑا دتی اے نا؟

”(بے شک، بے شک، یا رسول اللہ“..... حاجیاں نے جواب دتا)

اے اللہ! گواہ رہنا

سن لوو، حج قیامت تیکر ہن ذی الحجہ دے مہینے دے نال خاص رہوے گا

دفعہ ۴: لوکو! کیہ تہاں نوں پچہ اے تسیں کیہڑے مہینے وچ حیاتی دے ساہ لے رہے او؟ تسیں کس دن وچ اتھے جمع او؟

کس شہر وچ موجود ہے؟

(لوکاں نوں شبہ ہوئی کہ خورے ایس مہینے، ایس دن تے ایس شہر (مکہ مکرمہ) دے نام بدل دتے گئے نیں۔ ایس لئی

اوہناں آکھیا کہ اللہ تے اوس دار رسول ای بہتر جان دے نیں) فیر آپؐ نے فرمایا:

بے شک تہاڈا خون اک دُجے تے حرام اے۔

دفعہ ۵: تے تہاڈا مال وی

دفعہ ۶: تہاڈی عزت و آبروی

دفعہ ۷: تے تہاڈے جسم دی اک دُجے واسطے محترم نیں۔

دفعہ ۸: میری گل دھیان نال سنو، تہاڈی حیاتی سنور جاوے گی:

خبردار، اک دُجے تے ظلم نہ کریا جے۔

دیکھو، ظلم و زیادتی بلکل نہ کرنا،

کن کھول کے سن لوؤ، اک دُجے نال زیادتی تے جبر نہ کریا جے۔

دفعہ ۹: اللہ دے بندو! میریاں گلاں سنو تے سمجھو۔ بناشبہ ہر مسلمان دُجے مسلمان دا بھرا اے تے سارے مسلمان آپس وچ بھائی بھائی نیں۔

دفعہ ۱۰: خبردار ہر مسلمان دُجے مسلمان لئی حرام تے عزت جوگ اے۔

دفعہ ۱۱: ہر مومن دُجے مومن لئی محترم اے، جویں کہ آج دے دن دی حرمت اے۔ اوہدا گوشت مسلمان تے حرام اے کہ اوس نوں کھائے، اوہدی کنڈ پچھے اوہدی چغلی کر کے۔ تے اوس دی عزت و آبرو حرام اے کہ اوہدی عزت دی چادر لیر لیر کر دیوے۔

اوہدا چہرہ حرام اے کہ اوس تے تھپڑ مارے جان،

اوس نوں تکلیف تے دُکھ دینا ای حرام اے،

تے ایہ وی حرام اے کہ اوس نوں تکلیف دین لئی اوس نوں دھکا وی دتا جاوے، تے کسے مسلمان لئی ایہ وی جائز نہیں کہ دُجے مسلمان بھرا دا خون حلال سمجھے۔

مسلمان دامال وی حلال تے جائز نہیں سوائے ایس توں جیہڑا اوہ اپنی خوشی نال دے دیوے۔

دفعہ ۱۲: تے آؤ میں تہانوں دساں کہ مسلمان آکھدے کتوں نیں۔ مسلمان اوہ اے جیہڑا اپنی زبان تے ہتھ توں دُجے مسلماناں نوں محفوظ رکھے۔

دفعہ ۱۳: تے مومن اصل وچ اوہ اے جہدے کولوں لوکاں دامال تے جان امن وچ رہوے،

دفعہ ۱۴: تے مہاجر اصل وچ اوہ اے جیہڑا اپنے گناہواں تے خطاواں توں کنارہ کر لوے،

دفعہ ۱۵: مجاہد اصل وچ اوہ اے جیہڑا اللہ دی اطاعت لئی اپنے نفس دا مقابلہ کرے۔

دفعہ ۱۶: خبردار! جے کسے کول کوئی امانت رکھوائی جائے تے اوہ ایس گل دا پابند اے کہ امانت رکھوان والے نوں امانت ٹھیک ٹھیک پرتا دیوے۔

دفعہ ۱۷: قرض دا حق ایہہ وے کہ اوہ واپس پرتا یا جاوے۔

دفعہ ۱۸: ادھار لئی ہوئی چیز واپس کرنی چاہیدی اے۔

دفعہ ۱۹: جے آپوں کوئی تہاڈے وقتی فیدے لئی کوئی چیز دینا اے تے اوہ موڑنی چاہیدی اے۔

دفعہ ۲۰: ضامن، ضمانت دا ذمہ وار اے۔

دفعہ ۲۱: دیکھو، ہن مجرم اپنے جرم دا آپ ای ذمہ وار ہویا کرے گا۔

دفعہ ۲۲: جان لوؤ، بہن نہ پیو دے جرم دے بدلے پتر پٹڑیا جاوے گا تے نہ پتر دا بدلہ پیو کولوں لیا جاوے گا۔
دفعہ ۲۳: سوانیاں دے معاملے وچ اللہ توں ڈرو، کیوں جے تئساں ایہ اللہ کولوں امانت لئی اے، تے اللہ دے ای حکم نال اوہناں دے ستر تہاڈے تے حلال ہوئے نیں۔

دفعہ ۲۴: خبردار، تہانوں عورتاں نال چنگے سلوک دی وصیت کیتی جاندی اے کیوں جے اوہ تہاڈیاں پابند نیں تے ایس توں دکھ تئیں کسے معاملے وچ ملکیت دا حق نہیں رکھدے۔

دفعہ ۲۵: لوکو! جو عورتاں دے کجھ حقوق تہاڈے ذمے نیں، ایوں اوہناں تے وی تہاڈے کجھ حقوق نیں۔ سنو، تہاڈیاں عورتاں تے جو عورتاں دے کجھ حقوق نیں، ایوں تہاڈیاں عورتاں دا وی تہاڈے تے کجھ حق اے۔ عورتاں تے تہاڈے حق ایہ نیں کہ:

اوہ کھلی بے حیائی دا کوئی کم نہ کرن،

اوہ تہاڈے بسترونوں کسے مرد نال گند نہ کرن کہ ایہ گل وارا نہیں کھاندی، تے اوہ تہاڈے گھر وچ کسے اچھے بندے نوں نہ وڑن دین، جیہڑا تہانوں چنگا نہیں لگدا، پر ایہ کہ تہاڈی اجازت نال،
تے جے سوانیاں ایہناں گلاں دے اُلٹ ٹرن تے تہاڈے لئی اجازت اے کہ:

تئیں اوہناں نوں اوہناں دے بستراں تے کلیاں چھڈ دیو،

اوہناں تے سختی کرو پر کوئی چوکی ڈاہڈی سٹ نہ مارنا۔

دیکھو، اوہناں دے وی کجھ حقوق تہاڈے اُتے ہے نیں۔ جو نیں کہ:

اوہناں نال کھان پین تے پہنن پچرن وچ چنگا ورتنا وارکھو۔ جدوں اوہ تہاڈی نافرمانی توں باز آ جاوے تے آکھے لگ پین تے فیہمیش طرحاں اوہناں دا نان نفقہ تے لیڑا لپا تہاڈے ای ذمے ہے۔

تے عورتاں تے ایہ وی واجب اے کہ اوہ روز دے ورتاوے وچ تہاڈی نافرمانی نہ کرن تے جے اوہ فرمانبرداری کرن تے اوہناں اُتے کسے قسم دی زیادتی دا تہانوں کوئی حق نہیں۔ کوئی سوانی اپنے گھر وچ، گھر والے دی مرضی منشا توں بغیر کجھ خرچ نہ کرے۔

جان لوؤ، پتر دا پیو اوہی مٹھیا جاوے گا جہدے بستر تے اوہ پیدا ہووے گا۔ تے جس (شادی شدہ) تے حرام کاری ثابت ہو جاوے، اوہدی سزا سنگساری اے تے اوہناں دا باقی حساب اللہ تے چھڈ دیو۔ دیکھو، کسے عورت لئی ایہ جائز نہیں کہ اوہ اپنے خاوند دا مال اُس دی اجازت بنا کسے ہوری نوں دیوے۔

خبردار، جے کسے نے اپنے آپ نوں اپنے بیوتوں دکھ کسے دُجے نال جوڑیا، یاں کسے غلام نے بدوبدی اپنے آقا توں ھاڈا کڑنار احمد نے خطبہ جتہ الوداع، وچ مسلم شریف دے حوالے نال دفعہ (۲) ۲۵ تے جس حدیث دا ذکر کیا اے، اوس دا اردو ترجمہ آپ نے ایہ کیا اے کہ ”وہ تمہارا بستر کسی ایسے شخص سے پامال نہ کرانیں جسے تم پسند نہیں کرتے۔“ ایہ روایت تے ترجمہ بوہت سارے سوالاں نوں جنم دیندے نیں۔ خورے ایس گل نوں ابوبکی امام خان ہوراں نے وی محسوسیا اے۔ اوہ اپنے ترجمہ (حیات محمد از محمد حسین بیگل) وچ لکھدے نیں ”کسی عورت کے لیے غیر مرد کو اپنے قریب کرنے کا حق نہیں ورنہ شوہر کے تن بدن میں آگ لگ جائے گی۔“

ہٹ کے کسے ہو اور آقا نال نسبت قائم کیٹی تے فیر اوس اُتے اللہ دی، اوس دے فرشتیاں دی تے سارے انساناں دی لعنت ہووے گی تے قیامت والے دن اوس کولوں کوئی بدلہ یاں معاوضہ نہیں قبولیا جاوے گا۔

دفعہ ۲۶: تے ہاں غلام تہاڈے غلام، (اوہناں نال چنگا ورتنا جے)

جو آپوں کھاندے او، اوہدے وچوں اوہناں نوں وی کھواؤ۔

جو آپوں پہن دے او، اوہدے وچوں اوہناں نوں وی پواؤ۔

اوہ جے کوئی اجہی خطا کرن جنوں تسین سمجھو کہ معاف نہیں کر سکدے تے اللہ دے بند یو!

اوہناں نوں اگے وچ دیو، پر

اوہناں نوں خوفناک سزا نہ دیو۔

تے اوہ لونڈیاں جیہڑیاں تہاڈے تصرف (ورتن) وچ نیں، اوہناں لئی میں تہانوں وصیت کردا ہاں کہ اوہناں نوں

اوہی کھواؤ تے اوویں دے لیڑے پواؤ جوویں دا آپ کھاندے او تے جوویں دا آپ پاؤندے او۔

دفعہ ۲۷: لوکو، بنا شک مینوں حکم دتا گیا اے کہ لوکاں نال لڑاں، ایٹھوں تیکر کہ اوہ لا الہ الا اللہ نوں من لین تے جدوں اوہ

ایس کلمے دا اقرار کر لین تے فیر سمجھ لو کہ اوہناں نے اپنیاں جاناں تے اپنے مالاں نوں بچا لیا تے باقی حساب اللہ

دے دے ہے۔

دفعہ ۲۸: اللہ دے نال کسے نوں شریک نہ ٹھہراو،

دفعہ ۲۹: تے کسے دی ناحق جان نہ لوؤ،

دفعہ ۳۰: نہ زنا کرو،

دفعہ ۳۱: تے نہ ای چوری کرو۔

دفعہ ۳۲: لوکو! چنگی طرحاں سمجھ لوؤ، میرے بعد نہ کوئی پیغمبر آنا اے تے نہ ای تہاڈے بعد کوئی اُمت۔ (سن لوؤ) کوئی نبی ایہیا

نہیں گزریا جس نے اپنی اُمت نوں دجال توں نہ ڈرایا ہووے۔ بس میں وی، بنا شبہ، تہانوں اوس توں ڈراند ہاں۔

بنا شبہ میری سب توں افضل دُعا سگوں سارے نبیاں دی دُعا ایہی اے:

﴿لَا إِلَهَ إِلَّا اللَّهُ وَحْدَهُ لَا شَرِيكَ لَهُ لَهُ الْمُلْكُ وَلَهُ الْحَمْدُ بِيَدِهِ الْخَيْرُ، يَحْيَى وَيُمِيتُ وَهُوَ عَلَى

كُلِّ شَيْءٍ قَدِيرٌ﴾

دفعہ ۳۳: چنگی طرحاں سن لوؤ، اپنے پروردگار دی عبادت کرو، نما نہ چھوگا نہ ادا کرو، رمضان دے روزے رکھو۔ اپنے رب

دے گھر (خانہ کعبہ) دا حج کرو، اپنی زکوٰۃ خوشی خوشی دیو یا کرو، اپنے حاکماں دی اطاعت کرو تے (بس) فیر اپنے رب

عز وجل دی جنت وچ داخل ہو جاؤ۔

دفعہ ۳۴: اللہ توں ڈرو تے لوکاں نوں چیزاں (تول وچ) گھٹ نہ دیو یا کرو تے اللہ دی زمین تے فساد نہ کریا کرو۔

دفعہ ۳۵: خبردار، دین وچ وادھے گھائے کرن توں بچو، ایس لئی کہ تہاڈے توں پہلیاں توماں (وچوں کجھ) ایسے گلاں

ہلاک کردیتیاں گئیاں۔

دفعہ ۳۶: لوکو! دیکھو، شیطان ایس گل توں تے بلکل مایوس ہو چکیا اے کہ تہاڈی ایس دھرتی اُتے کدرے اوس دی عبادت کیتی جاوے گی۔ پردھیان کریا جے، اوہ ایس گل تے دی راضی ہووے گا کہ ایس توں دکھ لکیاں نکلیاں گلاں تے

اودے اشاریاں تے ٹریا جاوے۔ ایس لئی اپنے دین ایمان دی خاطر اوس توں بچے رہنا۔

دفعہ ۳۷: لوکو! اللہ نے میراث (وارث جو کجھ چھڈ مرے) وچ ہر وارث دا دکھو دکھ حصہ مقرر کردتا اے۔ ایس لئی وارث نوں ایہ جائز نہیں کہ اوہ سارے مال دی وصیت کرے۔ ایوں کسے نوں سارے مال دے تے حصے توں ددھ مال دی وصیت دا حق نہیں۔

دفعہ ۳۸: صدقہ دیویا کرو مینوں پتہ تے نہیں پر خورے اُج توں بعد تسیں مینوں (ایس تھان تے) نہ دیکھ سکوں۔

دفعہ ۳۹: اللہ دے ناں دیاں (جھوٹیاں) قسماں نہ کھایا کرو۔ کیوں جے جیہڑا اللہ دے نام دی (جھوٹی) قسم کھائے گا، اللہ اوس دا جھوٹ ظاہر کر دیوے گا۔

دفعہ ۴۰: لوکو! علم وچوں جو کجھ حاصل کر سکدے او، کر لوؤ، ایس توں پہلوں کہ ایہ سمیٹ (سانجھ) لیا جاوے یاں ایہ چک لیا جاوے۔ خبردار، علم دے اُٹھائے جان دی اک شکل ایہ وی اے کہ ایہدے جانن والے مک جان (حضور نے ایہ گل تن وار فرمائی)

دفعہ ۴۱: تے سن لوؤ، (مومنناں دے) دل تن چیزاں تے کینے دا شکار نہیں ہوندے:

۱۔ عمل وچ اخلاص کہ ایہ نرا اللہ واسطے ہے۔

۲۔ اللہ تے رسول دی اطاعت کرن والے حاکماں دی خیر خواہی وچ۔

۳۔ مسلماناں دی جماعت نال جڑت وچ، کیوں جے مسلماناں دیاں دُعاواں اوہناں تے چھاں کیتی رکھ دیاں نیں (تے سنو) اللہ نے کوئی اجہی بیماری پیدا نہیں کیتی جس دی دوا نہ اتاری گئی ہووے، سوائے بڑھاپے توں۔

دفعہ ۴۲: لوکو! میریاں گلاں تے دھیان کرو، کیوں جے میں ہر گل تہاڈے تیکر اپڑا دتی اے۔ میں تہاڈے وچ اک اجہی چیز چھڈ دتی اے کہ تسیں کدے گمراہ نہیں ہووے گے، جے تسیں اوس نوں پکے ہتھیں پھڑی رکھو۔ تے اوہ چیز اے اللہ تبارک و تعالیٰ دی کتاب۔ تے میں تہانوں اچھیاں شیواں دے چلیا ہاں کہ جے تسیں اوہناں نوں پھڑی رکھو گے تے کدے گمراہ نہ ہووے گے۔ صاف تے نثری ہوئی اللہ دی کتاب تے نبی دی سنت۔

دفعہ ۴۳: لوکو! سنو تے اطاعت کرو، بھانویں تہاڈے اُتے کوئی تک کٹا جیسی غلام ای امیر بنا دتا جاوے، جیہڑا تہاڈے اُتے کتاب اللہ دے حکم لاگو کرے۔

دفعہ ۴۴: جان لوؤ، ہر نبی دی دعوت گزر چکی اے سوائے میری دعوت دے۔ میں ایس نوں اپنے رب کول قیامت تیکر لئی اکٹھا کر دتا اے۔

امابعد، انبیاء R (قیامت والے دن) چوکی تعداد تے فخر کرن گے۔ دیکھنا، کدے تہاڈے عملاں پاروں مینوں

گھاٹ نہ آؤندی رُوے۔ میں حوض کوثر تے تہانوں اڈیکاں گا۔
خبردار، میں حوض کوثر تے تہاڑے توں اگدیں اپڑاں گا تے دُجیاں اُمتاں نالوں تہاڑے چوکھے ہون تے فخر کراں گا،
تے کدھرے میری رسوائی داسبب نہ بن جایا جے۔

سنو، میں بعض لوکاں نوں (شفاعت کر کے) چھڈالواں گا پر بعض لوگ میرے کولوں چھڈالے جان گے۔ فیر میں
آکھاں گا، ربا! ایہ تے میرے اُمتی سن۔ اللہ فرمائے گا کہ (میرے محبوب) پتہ اے ایہ لوک تہاڑے پچھوں کیہ آکھدے
تے کیہ کردے رے نیں!

دفعہ ۴۵: خبردار، میرے پچھوں کدھرے کافر نہ بن جایا جے کہ آپس وچ اک دُجے دیاں گردناں مارن لگ پوؤ۔
دفعہ ۴۶: تے ہاں، سنو، تسیں اپنے رب نوں ملو گے تے اللہ تہاڑے کولوں، تہاڑے عملاں ولوں ضرور پچھ گچھ کرے گا، بس
جیہڑا اپنی آخرت نوں اپنے سامنے رکھے گا، اللہ اوس دی دل جوئی کرے گا تے اوس نوں اوہدیاں اکھاں دے
سامنے (دنیا تے ای) بے نیاز تے توگنر بنا دیوے گا تے دنیا آپوں اوہدے پیراں وچ ڈگے گی پر جیہڑا دنیا دا ای بندہ
بن کے بیٹھ جاوے گا تے فیر اللہ اوہدے نال اوویں دا ای ورتاوا کرے گا تے اوہ بند اپنیاں اکھاں دے سامنے (دنیا
تے ای) بھک تے تنگی وکھ لوے گا، تے دنیا توں تے اوہناں ای حصہ ملنا اے، چٹاں اوہدے لئی لکھیا جاکھیا اے۔
دفعہ ۴۷: ویکھو، تساں، ہن مینوں دھیان نال وکھ وی لیا اے تے میریاں ساریاں گلاں وی سن لیاں نیں، تہاڑے کولوں
چھیتی ای، میرے ولوں پچھیا جانا اے۔ بس جس نے میرے تے جھوٹ بھیا تے فیر اوہ اپنا ٹھکانہ جہنم سمجھ لوے۔

دفعہ ۴۸: ویکھو، جیہڑا اتھے موجود اے، اوہ اوس تیکر میریاں گلاں ضرور اپڑا دیوے جیہڑا اتھے حاضر نہیں۔ خورے اوہناں
وچ کجھ اچھے لوک ہون جیہڑے اتھے گلاں سنن والیاں نالوں چوکھے سیانے ہون۔
سن لوؤ، تسیں جیہڑے اتھے نیڑے جے، اپنے دور والیاں تیکر، ایہ ساریاں گلاں اپڑا دیوے۔
اخیر تے آپ نے فرمایا:

اے اللہ! ویکھ لوؤ! میں تہاڑا سنہیا چنگی طرحاں اپڑا دتا اے کہ نہیں؟ فیر حاجیاں نوں فرمایا:

کیہ میں اللہ دا سنہیا تہاڑے تیکر، پوری تے چنگی طرح اپڑا نہیں دتا؟

سنو، کیہ میں تبلیغِ داحق ادا نہیں کر دتا؟

ویکھو، میں دین دی تعلیم والا کم چنگی طرحاں نہیں کر چھڈیا؟

(ساری لوکائی نے آکھیا، بے شک، بے شک)

فیر رسول خدا نے فرمایا اے اللہ! گواہ رہنا، اے اللہ! گواہ رہنا (دسو میرے اصحاب! روز محشر) تہانوں جدوں میرے
ولوں پچھیا جاوے گا تے کیہ آکھو گے؟ حاجیاں نے جواب دتا ”اسیں گواہی دیندے ہاں کہ بناشبہ تساں اللہ دی امانت
ساڈے تیکر اپڑا دتی اے، رسالت داحق ادا کر دتا اے تے اُمت نوں نصیحت کرن دی انتہا فرما دتی اے۔“
فیر رسول رحمت نے اپنی شہادت دی انگل آسمان ول کیتی، فیر لوکائی ول کیتی تے فرمایا: اے اللہ! گواہ رہنا، اے اللہ

گواہ رہنا، اے اللہ گواہ رہنا،

والسلام علیکم ورحمۃ اللہ وبرکاتہ

اخیری فوجی کا رروائی:

حجۃ الوداع دے سفر توں بعد اتوار ۲۵ ذی الحجہ نوں رسول خدا مدینہ طیبہ واپس تشریف لے آئے تے آکے اوس دور دے متکبر رومن حکمراناں نال جوڑ پاؤن دی تیاری چھوہ دتی۔ آخر صفر ۱ھ وچ رسول خداؐ نے جناب اسامہ بن زید دی سپہ سالاری وچ اک لشکر روم دے علاقے بلقاء ول روانہ فرمایا تے حکم دتا کہ اپنے والد حضرت زید بن حارثہ، حضرت جعفر بن ابوطالب تے حضرت عبداللہ بن رواحہ دے قتل دا بدلہ لین۔ ایس لشکر کشی دا اک مقصد ایہ وی سی کہ رومیوں تے ڈراوا پایا جاوے تاں جے اوہ اپنیاں حداں دے نیڑے وِسوں کیتی بیٹھے مسلمان قبیلیاں تے جبر کرنا چھڈ دین تے ایوں مسلماناں دا اعتماد وی پرت آوے۔

جناب اسامہ بن زید دا لشکر رسول خداؐ دے حکم موجب اے مدینہ طیبہ توں باہر تن میل دے پندھ تے سی کہ او تھے رسول اللہ دی بیماری دی خبر پڑ گئی۔ ایوں اوہ لشکر جرف دے تھان توں اگے نہ جاسکیا۔ فیر ایہ کا رروائی خلیفہ اول جناب ابوبکر صدیق دے دور وچ توڑ چڑھی۔

* * * *

اَكْمَلْتُ لَكُمْ دِينَكُمْ

حجۃ الوداع دے سفر توں پہلاں اللہ دا ایہہ حکم نازل ہو چکیا سی:

﴿إِذَا جَاءَ نَصْرُ اللَّهِ وَالْفَتْحُ ۖ وَرَأَيْتَ النَّاسَ يَدْخُلُونَ فِي دِينِ اللَّهِ أَفْوَاجًا ۖ فَسَبِّحْ بِحَمْدِ رَبِّكَ وَاسْتَغْفِرْهُ إِنَّهُ كَانَ تَوَّابًا﴾

”(اے محبوب) جدوں اللہ دی مدد تے فتح آ پڑے، تے تسیں لوکاں نوں فوج در فوج اللہ دے دین وچ داخل ہوندا دیکھو تے فیر اپنے رب دی تسبیح تے حمد بیان کرو تے اوس توں بخشش منگو۔ بنا شبہ اوہ معاف کرن والا اے۔“

ایس سورت توں پتہ لگدا سی کہ رسول خدا دے وصال مبارک دا ویلا نیڑے آ گیا اے تے رب نے آپ نوں دنیا تے بھیج کے جیہڑا ٹیچا متھیا سی اوہ کم پورا ہو گیا اے۔ اک روایت موجب جدوں رسول اللہ نے ایس سورت دی تلاوت فرمائی تے صحابہ ایس نوں سن کے چوکھے راضی ہوئے پر حضرت عباس رون لگ پئے۔ جدوں رسول خدا نے جناب عباس نوں وجہ کچھی تے اوہناں نے عرض کیتی کہ یا رسول اللہ! ایس وچ تے جناب دی دنیا توں والیسی دی خبر اے۔ ایس نے آپ نے ایس گل دی تصدیق فرمادی۔

ایس توں بعد حجۃ الوداع دے موقع تے سورہ مائدہ دی ایہ آیت نازل ہوئی:

﴿الْيَوْمَ اكْمَلْتُ لَكُمْ دِينَكُمْ وَاتَّمَمْتُ عَلَيْكُمْ نِعْمَتِي وَرَضِيْتُ لَكُمُ الْإِسْلَامَ دِينًا﴾

(المائدہ: ۳)

”آج میں تمہارے لئے تمہارا دین مکمل کر دیتا اے تے تمہارے تے اپنی نعمت پوری کر دیتی، تے تمہارے لئے دین اسلام پسند کر لیا۔“

ایہ گل کوئی راز نہیں کہ نبی دے دنیا تے آؤن داتے بعثت دا مقصد رب داسنہیا، رب دے بندیاں تیکر اپڑانا ہوندا اے۔ فیر جدوں رب ایہ گل آکھ دیوے کہ ایہ کم توڑ چڑھ گیا اے تے ایہ ایس گل ول اشارا ہوندا اے کہ اللہ اپنے بندے نوں واپس اپنے کول بلا لوے گا۔

ماہ صفر دی گل اے کہ اک دیہاڑے رسول رحمت اپنے پیاریاں نوں ملن لئی تے اوہناں واسطے رحمت طلب فرمان لئی اُحد دے دامن وچ تشریف لے گئے۔ اوہ تھے اُحد دے شہیداں لئی ایوں دُعا فرمائی کہ پتہ لگدا سی کہ ہن حضور فیر کدے اتھے تشریف نہیں لیاؤن گے۔ اُحد توں واپس تشریف لیائے تے مسجد نبوی وچ ایہہ عظیم خطبہ ارشاد فرمایا:

”میں تہاڑا پیشرو ہاں یعنی تہاڑے توں اگے جان والا ہاں۔ میں تہاڑے تے گواہی دیواں گا۔ تہاڑی تے میری ملاقات حوض کوثر تے ہووے گی۔ میں اتھے بیٹھا ہوؤیا اپنا حوض ویکھرہیا ہاں۔ مینوں زمین دے خزانیاں دیاں کنجیاں عطا فرما دیتیاں گئیاں نیں۔ مینوں تہاڑے ولوں ایہ اندیشہ نہیں کہ تسیں میرے بعد شرک کرو گے پر مینوں ایہ خوف ضرور اے کہ تسیں دنیا لکھن لئی اک دُجے دے مقابلے تے آؤ گے۔“

”رفیق اعلیٰ“، ول سفر دیاں تیاریاں دا ایس گل توں وی پتہ لگدا سی کہ اک راتیں حضورؐ نے اپنے غلام جناب ابو موسیٰہ نوں طلب فرمایا تے ارشاد فرمایا کہ اے ابو موسیٰہ! مینوں ایہ حکم دتا گیا اے کہ میں جنت البقیع وچ مدفون لوکاں لئی مغفرت دی دُعا کراں، چل اوٹھے چلے۔ فیر آپؐ اپنے غلام نال جنت البقیع وچ تشریف لے گئے تے قبریں دے وچکار کھڑے ہو کے فرمایا کہ ”اے قبریں والیو! تہاڑے تے سلام۔ جس حال وچ تسیں جے تہانوں مبارک ہووے کیوں جے تہاڑی حالت اوس حالت توں چنگی اے جہدے وچ آج کل دے لوک نیں۔ فتنے ہنیری رات وانگوں ٹرے آؤندے نیں، اگر کچھ۔ اک دے بعد دُجا، دُجے دے پچھے تجا۔ تے بعد والا فتنہ پہلے توں چوکھا سخت تے شدید اے۔ ایس توں بعد ایہ فرما کے اہل قبور نوں بشارت دتی کہ اسیں وی تہاڑے نال رن والے ہاں۔“

ابو موسیٰہ آکھدے نیں کہ فیر حضورؐ نے میرے ول دھیان کیتا تے ارشاد فرمایا کہ اے ابو موسیٰہ! میرے سامنے دنیا دے خزانیاں دیاں کنجیاں پیش کیتاں گئیاں نیں فیر لمی حیاتی تے فیر جنت۔ مینوں ایہ لے ٹھاٹھ باٹھ تے وڈے اختیار چنگے نہیں لگے۔ میں اللہ نال ملاقات تے جنت دیاں ابدی بہاراں نوں اپنے واسطے پسند کر لیا اے۔ میں عرض کیتی، یا رسول اللہ! میرے ماں پیو حضورؐ تے قربان ہو جان، حضورؐ دنیا دے خزانیاں دیاں کنجیاں تے لمی حیاتی توں بعد جنت قبول فرماؤندے (تے کیہ سی؟) حضورؐ نے جواب دتا:

﴿لَا وَاللّٰهِ يَا اَبَا مُؤِيْهَةَ لَقَدْ اخْتَرْتُ لِقَاءَ رَبِّيْ وَالْجَنَّةَ﴾

”ابو موسیٰہ! رب دی سونہ، ایوں نہیں ہونا۔ (بس) میں اپنے لئی اپنے رب نال ملاقات تے جنت اختیار کر لئی اے۔“

دنیا دے وسنیکاں نوں الوداع آکھن دی، رسول خدا دی تیاری دا ایس گل توں وی پتہ لگدا سی کہ رمضانؐ وچ آپؐ نے ۲۰ دن دا اعتکاف فرمایا جدوں کہ ہمیش آپؐ ۳۰ دن دا اعتکاف فرماؤندے ہندے سن۔ اک ہووے وڈا اشارہ ایہ سی کہ جناب جبرائیلؑ حضورؐ نوں، ہر سال اک وار قرآن دا دور کرواندے ہوندے سن۔ پر ۳۰ وچ دوواری قرآن پاک دا دور کر لیا گیا۔ فیر حجۃ الوداع دے خطبیاں وچ تے آپؐ نے ایٹھوں تیکر ارشاد فرمادتا کہ لوکو! شاید میں ایس سال توں بعد، ایس تھان تے، فیر تہانوں کدے نہ مل سکاں۔

متفق علیہ تے الرقیق المختوم از مولانا صفی الرحمن مبارک پوری (باب رفیق اعلیٰ کی جانب)

السیرۃ النبویہ از ابن کثیر جلد ۴، صفحہ ۴۴۳

الرحیق المختوم از مولانا صفی الرحمن مبارک پوری، صفحہ ۶۲۴

رفیق اعلیٰ ول سفر:

سن ۱۱ ہجری شروع ہو چکیا سی۔ صفر دے مہینے دی ۲۹ ترخ تے پیر دا دن سی کہ مدینہ طیبہ وچ اک صحابی چلانا کر گئے۔ رسول خدا اوہناں دی نماز جنازہ لئی جنت البقیع تشریف لے گئے۔ جدوں آپؐ واپس تشریف لیا رے سن تے راہ وچ سردرد شروع ہو گئی۔ دیکھدیاں ای دیکھدیاں سر دی پیڑ وچ وادھا ہو گیا تے نال ای تاپ وی چڑھ گیا۔ بخار کدے تیز تے کدے ہولا ہوندا رہیا پر طبیعت پوری طرحان ٹھیک نہ ہوئی۔ ایسے حالات وچ آپؐ نے یارہ ۱۱ دن نماز پڑھائی ﴿تیز بخار دی حالت وچ مسجد وچ جا کے نماز پڑھانا تے فیر پہلوں توں مٹھیاں گنیاں واریاں موجب ازواج مطہرات دے گھراں وچ جانا بنا شبہ اک اوکھا نہیں، چوکھا اوکھا کم سی۔ ایس لئی پیغمبر خدا نے ایہ خاش غاہر کیتی کہ آپؐ a کے اک گھر وچ ڈیرالا لین تے اوس لئی آپؐ a نے جناب عائشہ صدیقہ دا گھر مناسب سمجھیا۔ ایوں بیماری دے ۶ ویں ۷ ویں دیہاڑے توں آپؐ a پکے پکے اُم المؤمنین حضرت عائشہ دے حجرہ مبارک وچ آرام فرماؤندے رے۔ حضرت عائشہ معوذات تے رسول اللہ توں سکھیاں ہوئیاں دعاواں پڑھ پڑھ کر دم کردیاں رہندیاں سن تے برکت دی اُمید نال آپؐ دا ہتھ مبارک آپؐ دے جسم پاک اُتے پھیر دیاں رہندیاں سن۔

بیماری دے دنوں وچ اک واری ایوں ہوئیا کہ جناب عائشہ نوں سر پیڑ لگ گئی، پیڑ ودھ گئی تے اُم المؤمنین دی زبان توں ”ہائے میرا سر، ہائے میرا سر“ دے لفظ نکلن لگ پے۔ سوانیاں دے حقاں دارا کھاتے اوہناں نال چنگا ورتاوا کرن دا سبق دین والا نبی رحمت a آپوں نہ جری جان والی تکلیف وچ سی۔ یقیناً سوچیا ہووے گا کہ ہن کیہہ کراں۔ اوس ویلے رسول رحمتؐ نے پاک بی بی دی دل جوئی لئی گل مذاق وچ پاندیاں ارشاد فرمایا کہ ”عائشہ! رب دی سونہہ، میرے سر وچ چوکھی پیڑاے“۔ جدوں اوہناں نے شدید تکلیف دا اظہار کیتا تے حضورؐ نے مذاق وچ آکھیا کہ ”عائشہ جے ایوں ہو جائے تے کیہہ گھانا اے کہ توں میرے توں پہلاں چلانا کر جاویں۔ میں اپنی ہتھیں تینوں کفن پاواں۔ آپوں تیرا جنازہ پڑھاں تے آپ ای تینوں دفن کراں۔“ عائشہ وی بڑی حاضر جواب سن۔ اوہناں وی سوچیا کہ چلو مذاق تے مذاق ای سہی۔ اکھے ”آہو، تساں تے آکھنا ای اے کہ ہووے نہ ہووے ایس نوں مٹی تھلے دباں، تاں جے گھر آ کے میری واری کے دُجی بی بی نوں ہبہ فرما دیو۔“

رسول رحمت اپنی لاڈلی بیوی دے جواب وچ مسکرا ندے رے۔ ﴿

ربیع الاول دی ست ترخ بدھ دی گل اے کہ بخار وچ چوکھی شدت آ گئی۔ آپؐ a نے حکم فرمایا کہ ”مدینے دے ست کھو ہواں دا پانی منگوا کے میرے اُتے پاؤ۔“ آپؐ a دے حکم دی تعمیل وچ اوس دیہاڑے آپؐ a دے پاک تے مبارک جسے تے ایناں پانی وگایا گیا کہ آپؐ a ”بس، بس“ فرمان لگ پے۔ ایوں کرن نال بخار وادھا گھٹ گیا تے آپؐ a مسجد وچ تشریف لے گئے۔ مسجد وچ آپؐ a دا آؤناسی کہ او تھے صحابہ دیاں رونقاں لگ گئیاں۔ او تھے

✓ الرقیق المختوم از مولانا صفی الرحمن مبارک پوری، صفحہ: ۶۲۳

✍ حیات محمدؐ از محمد حسین ہیکل، صفحہ: ۶۳۲

آپ a نے اک خطبہ ارشاد فرمایا جہدے وچ شرک توں اپنی نفرت دا اظہار فرمایا تے آکھیا کہ یہود و نصاریٰ تے اللہ دی لعنت جہاں نے اپنے نبیاں دیاں قبریں نوں سجدہ گاہ بنالیا۔ آپ a دے ارشاد مبارک توں پتہ لگداسی کہ کسے نبی یا ولی دی قبر نوں سجدہ کرنا تے دور دی گل اے، اوس دی قبر وُل منہ کر کے نماز پڑھنا وی حرام عمل اے۔ ایس توں بعد آپ نے لوکائی نوں مخاطب کر کے کجھ ہور ارشاد فرمائے۔ اندازا کرنا کہ اوس منصف اعظم a نے عدل تے انصاف دا کوں عملی مظاہرہ کیتا۔ ارشاد فرمایا:

”لوکو! جے میں کدے کسے دی کنڈ تے کوئی دُرہ ماریا اے تے میری کنڈ حاضر اے، اوہ میرے توں بدلہ لے سکدا اے۔ جے میں کسے نال مندہ چنگا بولیا ہاں تے تاں وی میں بدلے لئی حاضر آں۔ جے میں کسے کولوں کوئی شے کھوئی اے، یاں کسے دا کوئی پیسہ لگا دینا اے، تے میرے کولوں لے لوؤ۔ ویکھنا، کدرے سوچیں نہ پئے جاویا جے کہ جے کسے نے میرے کولوں کوئی انتقام لیا تے میں اوہ دے نال نراض ہو جاواں گا۔ سن لوؤ کہ ایگل ای میری شان دے خلاف اے۔“

ایہ سن کے اک بند اٹھ کے کھلو گیا تے آکھن لگا کہ ”یا رسول اللہ! میرے تن درہم حضور دے ذمے نیں۔ یاد جے نا کہ اک واری اک سائل حضور کول حاضر ہوئیا سی تے حضور نے مینوں حکم دتا سی کہ ایس نوں تن درہم دے دے۔“ ایہ سن کے حضور نے جناب فضل بن عباس نوں حکم دتا کہ اوس شخص نوں تن درہم ادا کر دتے جان۔

فیر حضور نے انصار نال بھلیائی دی وصیت فرمائی تے ارشاد فرمایا کہ اوہ میرا قلب تے جگر نیں۔ اوہناں نے اپنی ذمہ داری پوری کر دتی اے۔ پر اوہناں دے حقوق باقی رہ گئے نیں۔ یاد رکھنا کہ اوہناں دے نیکوکاراں توں اوہناں دیاں نیکیاں قبول کرنا تے اوہناں دے خطا کاراں توں درگزر کرنا۔

ایس توں بعد آپ a نے فرمایا کہ ”اللہ نے اپنے اک بندے نوں اختیار دتا اے کہ اوہ چاہوے تے دنیا دی چمک دمک تے ٹورے پئے مل لوے تے چاہوے تے اپنے اللہ نال ملاقات نوں پسند کر لوے۔ اللہ دے اوس بندے نے اللہ نال ملاقات نوں ای چنگا جانیا اے۔“ ایہ ارشاد مبارک سن کے جناب ابوبکر صدیق نے رونا شروع کر دتا تے عرض کیتی کہ یا رسول اللہ! ”اسیں اپنے ماں پیو سنے حضور a تے قربان حضور a سانوں کیہ سناؤنی سنارے نیں“ جناب صدیق اکبر دی ایس حالت تے لوکائی نوں بڑی حیرت ہوئی کہ اوہناں نو کیہ ہوئیا اے۔ پر کجھ ای دناں پچھوں جدوں رسول خدا وصال مبارک ہوئیا تے لوکائی نوں پتہ لگ گیا کہ ابوبکر کیوں روپے سن تے حضور a نے جس بندے دا ذکر فرمایا سی، ابوبکر نے ٹھیک ای اندازا کیتا سی کہ اوہ آپوں پیغمبر آخرا سی سن۔

فیر حضور a نے حکم فرمایا کہ مسجد وُل جس کسے دے گھر دا دروازہ اے، اوہ بند کر دیوے، سوائے ابوبکر توں۔ جناب ابوبکر صدیق دی شان بیان کر دیاں ایہ وی فرمایا کہ اپنی یاری وچ تے مال قربان کرن وچ ابوبکر دا احسان سب توں وڈا اے۔ جے میں اپنے رب توں دکھ کسے ہو رہوں خلیل بناندا تے ابوبکر نوں بناندا۔

۸ ربیع الاول جمعرات نوں حضور a نے مغرب تکبیر دیاں نمازاں آپوں پڑھائیاں۔ نماز مغرب وچ سورہ والمرسلات دی تلاوت فرمائی تے بس ایہ اخیر سورت سی جیہڑی مدینے وچ اوس امام اعظم دی زبان مبارک توں سنی گئی۔

عشاء دی نماز پڑھان لئی پیغمبر آخر a نے تن واری ارادے تے جتن کیجے پر جدوں وی وضو لئی اٹھے، بے ہوشی طاری ہو جاندی ری۔ اخیر حکم دتا کہ ابو بکر نماز پڑھان گے۔ ایس حکم موجب جناب صدیق اکبر نے حضور دی حیاتی وچ ستاراں (۱۷) نمازاں دی امامت فرمائی۔ تے جیہڑی پہلی نماز پڑھائی اوہ ۸ ربیع الاول جمعرات دی عشاء دی نماز سی۔ عزیز پڑھنہارو! رسول خدا دے مصلے تے کسے دُجے بندے دے کھلون دا ایہ اوکھاتے لگ توڑ کے رکھ دین والا حکم لے جان والا بندا بلال سی۔ ذرا تصور کرو کہ ایہ سنبھلا بلال نوں کڈا بھارا لگا ہووے گا۔ جدوں اوس مہربان تے رحمت اللعالمین آقا نے ایہ فرمایا ہووے گا کہ جاؤ بلال، ابو بکروں آکھو کہ نماز پڑھائے تے سیدنا بلال تے کیہ یتنی ہووے گی۔ فیر جدوں اوس بلال نوں اپنے آقا دے مصلے تے آقا نظر نہیں آئے ہون گے تے اوس دیاں اکھاں وچوں اتھرو نہیں اہودے تیکے ڈگے ہون گے۔

ہن بلال مسجد وچ اپڑ گئے نیں۔

”ابو بکر جی، ابو بکر جی! آقا دا حکم اے کہ..... (بلال دے مونہوں گل نہیں نکل ری)

”بولو بلال، بولو..... گل تے کرو، کیہ حکم فرمایا اے سوہنے نے؟“ جناب صدیق اکبر چوکی پریشانی وچ پچھ رہے نیں۔

”جی..... جی..... حضور نے حکم دتا اے کہ اگے کھلو جاؤ۔“

کیہ کیہ بلال کیہ؟..... میں نماز پڑھاواں گا؟ حضور دے مصلے تے؟ حضور دی حیاتی وچ؟ نہیں نہیں، میرے کولوں ایہ نہیں ہونا!“

مسلماناں دیاں چیخاں نکل گئیاں نیں، صدیق اکبر غش کھا کے مسیت دے ویڑے وچ ڈگے پے نیں۔ چن دے نے نے چانن وچ صحابہ اک دُجے نوں لبھدے پھر رہے نیں۔ کوئی اتھرو کیر رہیا اے تے کوئی دُجے دے اتھرو پونجھ رہیا اے۔ غم دا ماریا ہر بند اک سوال بنیا کھلوتا اے۔ بلال تے ایوں ہے کہ جویں جیوندا جاگدا تے ساہ لیڈا بندانہیں سگوں پتھر دا اک بت اے۔ جے مونہوں کوئی اکھر نکلا دی اے تے ایہ کہ ”ہائے میں کہدے اگے فریاد کراں۔ ہائے میریاں آساں اُمیداں دارشتہ ٹٹ گیا۔ ہائے میرا لک ٹٹ گیا۔ ہائے قسمت، میری ماں نے مینوں نہ ای جمیا ہوندا۔“

سیدہ فاطمہ توں مسلماناں دی ایس حالت دا پتہ لگدا اے تے حضور a، سیدنا علی المرتضیٰ تے جناب فضل بن عباس دے سہارے نال مسیتے اپڑ جاندے نیں۔ سخت تکلیف دی حالت وچ نماز پڑھی تے مسلماناں نوں حوصلہ دیندیاں ارشاد فرمایا کہ میں تہانوں اللہ دی پناہ وچ دیندا ہاں۔

اوس دیہاڑے، خیال کیتا جاندا اے کہ کد رہے، عشاء ویلے یاں عشاء توں بعد حضور a نے حکم فرمایا کہ ”کوئی کاغذ قلم لیاؤ، میں تہانوں اک لکھت لکھ دیاں تاں جے تسیں کدے گمراہ نہ ہوؤ۔“ رسول خدا چوکی تکلیف وچ سن، ایس لئی صحابہ نے حضور a نوں ایس ہسچل وچ نہ پاؤن دا فیصلہ کیتا۔ اوس توں بعد آپ a نے اپنے صحابہ نوں ایہ وصیت فرمائی کہ عرب دی ایس دھرتی نوں یہودیوں توں پاک کر دینا تے آؤن والے وفداں نوں تے سفارت کاراں نوں اوویں

ای جی آیائوں آکھنا جو میں آکھدار ہیا ہاں۔

جمعہ ۹ ربیع الاول ۱۱ھ

حدیث، سیرت تے توارخ دیاں کتاباں ایس سوال تے نموش نیں کہ اگلے دن جمعہ ۹ ربیع الاول نوں مسجد نبوی تے مدینے دیاں گلیاں تے بازاراں دا کیہ حال سی۔ بس اسیں سوچ سکدے ہاں تے قیاس کر سکدے ہاں کہ اوہ نماز جمعہ جیہڑی، اسلام دی توارخ وچ پہلی واری محمد رسول اللہ توں بغیر پڑھی گئی سی، اوس دا خطبہ کویں دا ہووے گا، اوس دے خطیب دی کیہ حالت ہووے گی تے اوس دن مدینے دے نمازیاں تے کیہ بیٹی ہووے گی۔ کئی گل اے او تھے اتھرواں دا ہڑھ آ گیا ہونا اے۔ جمعے توں بعد لوکائی چوکھا چڑ مسجد نبوی وچ دلاں نوں پھڑکے بیٹھی ری ہووے گی۔ کجھ منبر نبی نال تے کجھ مسجد دے ستو نال گلّاں کر دے ہون گے۔ کجھ صحابہ جناب صدیقہ دے حجرے دے باہر سوہنے کھڑے دی زیارت لئی بے تاب بیٹھے ہون گے، کجھ اندر جان دی اجازت منگ رے ہون گے تے کجھ اذن ملن توں بعد آقا دے قدماں ول کھلوتے ہون گے۔ اُمہات کتاباں وچوں اوس اخیر جے دی کوئی گل نہ لہن توں بعد اسیں قیاس کر سکدے ہاں کہ رسول رحمت دا اوہ دیہاڑا چوکی تکلیف تے بے ہوشی دی حالت وچ گزریا ہووے گا۔

ہفتے یاں اتوار دی گل اے کہ جناب ابوبکر صدیق نے ظہر دی نماز پڑھانی شروع کیتی تے رسول اللہ، جناب عباس تے جناب علی المرتضیٰ داسہار الیندیاں ہوئیاں جناب عائشہ دے حجرے توں مسجد وچ تشریف لے آئے۔ جدوں جناب صدیق اکبر نے ایہہ محسوسیا کہ آقا گے تشریف لیا رے نیں تے اوہناں امام دے مصلے توں پراں ہٹناں چاہیا پر رسول خدا نے اوہناں نوں پچھے ہٹن توں ڈک دتا تے آپوں اوہناں دے کجھے ہتھ بیٹھ کے نماز پڑھی۔

اتوار والے دن رسول رحمت a نے اپنے سارے غلاماں نوں آزاد فرما دتا۔ اپنے ہتھیار مسلماناں نوں ہبہ فرما دتے تے گھر دی اخیر پونجی، جیہڑے ست اٹھ (۷/۸) دینار پے سن، وی صدقہ کر دتی۔ دینار صدقہ کر دیاں فرمایا کہ عائشہ! جے میں ایہ دینار اپنے گھر وچ چھڈ کے اپنے پالنہار نال ملاقات کراں گاتے اوہ کیہ آکھے گا کہ میرے بندے نوں میرے تے اعتماد نہیں سی۔ قربان جائیے اوس اُچی تے سچی ہستی دے کہ آپوں فرما رے نیں کہ اللہ نے کائنات دے سارے خزانیاں دیاں کنجیاں میرے آگے رکھیاں نیں تے بے نیازی ایوں دی اے کہ حیاتی دی اخیر رات اے پر گھر دے دیوے وچ تیل کوئی نہیں۔ جناب عائشہ دے آکھن موجب اوہناں اپنا چراغ اک گوانڈن ول گھلیا تے ترلا ماریا کہ اوہدے وچ کجھ تیل پادیوے تاں جے اک رات لگھ جاوے۔

رات تیز بخار تے چوکی تکلیف دی حالت وچ گزری۔ فجر دی نماز شروع ہوئی تے بچناں متراں تے جھاتی پاؤن تے دل کیتا۔ حجرہ مبارک تے مسجد دے وچکار جیہڑا پردہ سی اوس نوں ہٹا دتا تے کنا ای چر اُمت دے اوہناں سرداراں نوں ویکھ ویکھ کے خوش ہوندے رے۔ صحابہ نوں وی پتہ لگ گیا کہ آقا اوہناں ول ویکھ رے نیں۔ زیارت لئی ترس دیاں اکھاں دی منگ ایہی سی کہ نماز ای توڑ وتی جاوے پر محبوب لیڈر نے مسکرا ندیاں ہوئیاں ارشاد فرمایا کہ دھیان نال نماز پوری کرو۔ اوس ویلے بوہت سارے صحابہ کرام نے اپنے آقا دی آخری وار زیارت کیتی۔

چلانا..... پر لو کائی وانگ نہیں:

ہن سوموار دا دن چڑھ گیا ہو یاسی۔ رحمت اللعالمین نے اپنی صاحبزادی سیدہ فاطمہ نوں بلایا تے اوہناں دے کن وچ کوئی گل کیتی۔ گل سن کے سیدہ بتول رون لگ پئیاں۔ مہربان باپ نے لاڈلی نوں روندیاں ویکھیا تے فیر اپنے کول بلایا تے ہولی جی کوئی گل کیتی۔ ایس واری سیدہ نے مسکرانا شروع کر دتا۔ پیو دھی دی ایس راز داری دی کسے کھوجکاری نہ کیتی تے جے کسے پچھیا وی تے سیدہ نے نہ دسیا۔ فیر جدوں رسول رحمت a دا وصال مبارک ہو گیا تے آپ نے دس دتا کہ پہلی واری بو نے ایفرمایا سی کہ میں ایس بیماری نال دنیا توں پردا کر جاواں گا تے فیر دجی واری جیہڑی گل سن کے میں ہسن لگ پئی ساں اوہ ایسی کہ حضور دے اہل و عیال وچوں سب توں پہلاں میں حضور کول اپڑاں گی۔

اوس دن رسول اللہ دی تکلیف ویکھی نہیں سی جاندی۔ بیماری بٹی نے جدوں بو نوں بے چین ویکھیا تے مونہوں نکل گیا ”وَ اَكْرَبَ اَبَاهُ (ہائے، بو کئی تکلیف وچ نیں) حضور a نے سیدہ دی ایہ گل سن کے فرمایا کہ ”تیرے ابو تے آج توں بعد کوئی تکلیف نہیں۔“ فیر آپ a نے جناب حسن تے جناب حسین نوں کول سدھیا، اوہناں دا منہ سر چھیا تے اوہناں لئی خیر دی وصیت فرمائی۔ فیر آپ a نے ساریاں ازواج مطہرات نوں بلایا تے کچھ نصیحتاں کیتیاں۔ اخیر تے سیدنا علی المرتضیٰ نوں بلایا۔ اوہناں دا سر اپنی گود وچ کر کے پیار کیتا تے کچھ نصیحت فرمائی۔

رحمت اللعالمین دا کوئی پل چین نال نہیں گزر رہیا سی۔ خیر دے موقع تے آپ نوں جیہڑا زہر بھریا گوشت کھوایا گیا سی، اوس دا اثر وی ظاہر ہو چکیا سی۔ اوس ویلے آپ a نے جناب عائشہ اگے اپنے کرب دا ذکر ایوں کیتا کہ ”عائشہ! خیر وچ جیہڑا گوشت میں کھالیا سی، اوس دی تکلیف اے تیکر محسوس کر رہیا ہاں، مینوں ایوں لگ رہیا اے کہ میری رگ جان وڈی جاندی پئی اے۔“ فیر آپ a نے سو جھی لین والے صحابہ کرام نوں وی وصیت فرمائی۔ ارشاد فرمایا:

﴿ اَلصَّلٰوةُ الصَّلٰوةُ وَمَا مَلَكَتْ اَیْمَانُكُمْ ﴾

”نماز، نماز تے تہاڈے لونڈی غلام۔“

رحمت اللعالمین نے ایہہ اکھر کئی وارد ہرائے۔ ایسے چیر وچ جناب عائشہ دے بھرا جناب عبدالرحمن حجرے وچ آئے۔ عبدالرحمن دے ہتھ وچ پھڑی مسواک تے رسول خدا دی نظر پے گئی تے آپ مسواک ول ویکھدے رے۔ جناب عائشہ نے محسوس کیتا کہ آپ a نوں مسواک دی طلب ہو رہی اے۔ اوہناں نے پچھیا کہ یا رسول اللہ! عبدالرحمن کولوں مسواک لے کے پیش کراں؟ حضور a نے اشارے نال فرمایا کہ ہاں لے لوؤ۔ رسول خدا نوں مسواک پیش کیتی گئی تے آپ a کولوں چٹھی نہ گئی۔ جناب صدیقہ نے اپنے دندان تھلے چٹھ کے مسواک نرم کر دتی تے فیر حضور نوں پیش کیتی۔ حضور نے چنگی طرحاں مسواک کیتی۔ آپ a دے سامنے اک کٹورے وچ پانی پٹیا ہو یاسی۔ آپ a اپنے دوویں ہتھ پانی وچ ڈبو کے چہرہ مبارک تے پھیر دے جاندے سن تے فرماندے سن کہ اللہ توں سو کوئی معبود نہیں تے موت وچ سختی تے ہوندی اے۔

کوئی یاراں بارہ وجے دن دا ویلا سی کہ آپ a نے اپنا ہتھ (یاں انگلی) اسمان ول بلند کیتی؛ ہونٹھاں تے کچھ حرکت ہوئی؛ جناب صدیقہ نے چھیتی نال کن چہرہ مبارک دے نال لایا۔ حضور فرما رہے سن:

﴿اللَّهُمَّ الرَّفِيقَ الْأَعْلَى﴾

”اے اللہ! سوہنے دوست۔“

رحمت عالم دا ہتھ لٹک گیا تے پتی اُتار چڑھ گئی۔ ایوں انسانی توارخ وچ سب توں وڈا انقلاب لیاؤن والا اللہ دا بندہ، جیہڑا ہمیشہ ای اللہ نوں ساری مخلوقات توں ودھ کے پیار سی، چلانا کر گیا۔ پراویں نہیں جویں دنیا کر دی اے، سگوں ایوں کہ اوہ اپنی اُمت دے وچکار نہ ہو کے وی اُمت دے وچ موجود اے۔ اوہ زندہ اے تے اپنے محبوب بندیاں دی آج وی راہنمائی کردار ہندا اے۔ کوں زندہ اے؟ ایس دا جواب لبھن دی چتا تے جتن کرن دی لوڑ کوئی نہیں کیوں جے اک حیاتی اجہی وی ہوندی اے کہ اللہ آکھدا اے ہی تہاں ایس دا شعور نہیں۔

اوس دن ۱۲ ربیع الاول ۱۱ھ، ۸ جون ۶۳۲ء تے سوموار دا دن سی۔

مسلماناں دی حالت:

وصال مبارک دی خبر سن کے مسلماناں دا حوصلہ جواب دے گیا۔ چو کھے مسلمان تے اجے سن جیہڑے ایہ گل سنن لئی تیار ای نہیں سن کہ محبوب خدا اپنے رب کول جاتے نیں۔ اوہناں عاشقاں وچ اگل ہتھ بندے جناب عمر فاروق سن۔ جناب عمر نے ایہ خبر سن کے جناب عائشہ دے گھر وں دوڑ لا دتی۔ جسد مبارک کول اپڑے تے سوہنے کھڑے توں چادر ہٹا کے رکنا چر ویکھدے ای رے۔ ساہ دی کوئی رمت باقی نہ ہون دے باوجود آکھن لگ پے کہ حضور غشی دی حالت وچ نیں، بس تھوڑے چیر پچھوں آپ نوں ہوش آ جانا اے۔ حضرت مغیرہ نے ہتھیرا سمجھایا کہ ”عمر! تسیں کس خیال وچ جے، ہونی نے تے ہو کے رہنا سی“ پر اوس عظیم الشان مسلمان نوں آقا دی وفات دا یقین نہ آیا تے حضرت مغیرہ نوں جھڑکدیاں ہوئیاں آکھن لگے کہ ”مغیرہ! جھوٹ نہ بولو کہ رسول خدا دا انتقال ہو گیا اے۔“

ایس حالت وچ کہ حضرت مغیرہ نوں رسول اللہ دے چلانا کر جان دا پک سی تے جناب عمر بن خطاب نوں حضرت موسیٰ طرحاں پرت آؤن دا یقین سی، دوویں یار مسجد وچ جا پڑے۔ مسجد وچ آؤندیاں ساری جناب عمر فاروق نے اُچی واج نال تقریر شروع کر دتی۔ آکھن لگے ”منافع افواہ اڈارے نیں کہ رسول خدا a دا انتقال ہو گیا اے۔ نہیں اوہ تے موسیٰ بن عمران وانگ خدا دے حضور تشریف لے گئے نیں۔ موسیٰ بن اسرائیل توں چالی ۴۰ دن او جھل رہن توں بعد واپس پرت آئے سن تے اوہناں دے پچھوں وی بنی اسرائیل نے آکھیا سی کہ موسیٰ دی وفات ہو گئی اے۔ رسول اللہ وی جناب موسیٰ طرحاں واپس تشریف لے آؤن گے۔ تے سن لوؤ کہ جس جس نے میرے آقا دی وفات دی خبر پھیلائی اے، حضور a واپسی تے اوس دے ہتھ پیر قلم کرا دیں گے۔“

مسلمان، جیہڑے اپنے تے غم دا پہاڑ ٹھاپے محسوس دے سن، جناب عمر فاروق دی تقریر سن کے حیران رہ گئے کہ ایوں وی ہو سکدا اے۔ نبی a دے پیارے تے نبی نال پیار کرن والے سارے دے سارے اک دُجے دامنہ ویکھدے رہ گئے کہ عمر کیہ آکھ رے نیں! کیہ سچ مچ رسول خدا فوت نہیں ہوئے؟ کیہ آپ a دے واپس پرت آؤن والی گل ٹھیک اے؟ دُکھ سی، حیرانی سی تے صحابہ رسول سن!

ایسے افراد تفری دے عالم وچ صدیق اکبر وی مسیتے اپڑ گئے تے یاردی رحلت دی سناؤنی تے کلیجہ پھڑ کے بیٹھ گئے۔ اوہناں ویکھیا کہ عمر فاروق تقریر فرما رہے نیں تے مسلمان پوری توجہ تے یقین نال تقریر سن رہے نیں۔ ابو بکر دوڑ دے دوڑ دے جناب عائشہ دے حجرے ول جاندے نیں تے ویکھدے نیں کہ دالان وچ پلنگ تے رسول رحمت دا جسد مبارک پینا اے۔ جناب ابو بکر نے چادر چہرہ مبارک توں ہٹائی، آپ a دامتھا چمیا تے زبان توں اچن چیت نکلیا کہ ”حضور تہاڈا جسم مبارک حیاتی وچ وی پاک تے خوشبودار رہیا تے وصال توں بعد وی او سہ طرحاں پاک تے خوشبودار اے۔ میرے ماں باپ واری جان، اللہ ولوں جیہڑی موت تہاڈے لئی مقرر سی، اوہ آگئی اے، ہن کدے فیرتے موت نہیں آؤنی۔“ آقا تے یاردی زیارت توں بعد صدیق اکبر واپس مسجد وچ تشریف لے گئے جتھے عمر فاروق دی تقریر ابجے جاری سی۔ اوہ مسلماناں نوں یقین دووا رہے سن کہ رسول اللہ فوت نہیں ہوئے۔ مجمع نے جناب ابو بکر لئی رستہ چھڈ ڈتا۔ اوہناں نے عمر فاروق دے نیڑے جا کے اوہناں نوں آکھیا کہ اوہ وی کوئی گل کرنا چاہندے نیں پر جناب عمر b بس ایس گل تے پکے سن کہ نہیں، محمد رسول اللہ سانوں چھڈ کے نہیں جاسکدے۔ ایس توں دکھ اوہ کوئی گل سنن لئی تیار نہیں سن۔

ایس صورت حال وچ جناب صدیق اکبر نے صحابہ نوں مخاطب کر دیاں اپنی گل شروع کر دتی۔ جدوں آپ نے تقریر شروع کر دتی تے جناب عمر فاروق نے وی کن لا کے آپ دی گل سنی۔ آپ فرما رہے سن:

”لوکو! جے کوئی محمد دی عبادت کردا اے تے سن لوؤ کہ محمد a چلانا کر گئے نیں تے جیہڑا اللہ دا عبادت گزار اے (اوہ خبردار رہوے کہ) اللہ زندہ اے تے اوس نوں موت نہیں“ اوس توں بعد قرآن پاک دی ایہ آیت تلاوت فرمائی:

﴿وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَإِنْ مَاتَ أَوْ قُتِلَ انْقَلَبْتُمْ عَلَىٰ أَعْقَابِكُمْ وَمَنْ يَنْقَلِبْ عَلَىٰ عَقْبَيْهِ فَلَنْ يَضُرَّ اللَّهَ شَيْئًا وَسَيَجْزِي اللَّهُ الشَّاكِرِينَ﴾

(آل عمران: ۱۴۴)

”تے محمد اللہ دے رسول ای تے نیں۔ آپ توں پہلاں وی بوہت سارے رسول گزرے نیں۔ فیر جے ایوں ہووے کہ آپ وفات پا جان یاں آپ شہید ای ہو جان تے کیہ تسیں اوہناں پیراں تے ای پھر جاو گے۔ تے جیہڑا حق دے رستے توں الٹا پھروی جاوے گا (اوہ اپنا ای نقصان کرے گا) تے خدا تعالیٰ دا کوئی نقصان نہیں کرے گا۔ تے خدا تعالیٰ شکر کرن والیاں نوں چھیتی ای جزا دیوے گا۔“

جناب صدیق اکبر دی زبان توں ایہ آیت سنن توں بعد مدینے دے ہر مسلمان دی زبان تے ایہی آیت سی تے اوہ اک دُجے نوں آکھدے پھر دے سن کہ: انْقَلَبْتُمْ عَلَىٰ أَعْقَابِكُمْ۔ جناب عمر دی اپنی حالت ایہی سی کہ اوہ جناب ابو بکر دی زبان توں اللہ ولوں کیتا گیا ایہ سوال سن کے، نمونہ جھانے جئے ہو گئے۔ اوہناں دیاں لتاں کنبن لگ پیناں تے اخیر تلاوت سُن دے سُن دے ایہ مسیت دے ویڑے وچ ڈگ پے، کیوں جے اوہناں نوں پتہ لگ گیا سی کہ رسول خدا سچ مچ فوت ہو گئے نیں۔ تے ایہ حالت کئے عمر فاروق دی ای نہیں سی سگوں سارے مسلماناں دے دل ڈبی جاندے سن تے اکھاں وچوں سون بھادروں والی جھڑی سدھی سی۔ حضرت انس دے آکھن موجب ”اوس دن توں سوہنا تے چنگا دن میں نہیں ویکھیا جس دن رسول رحمت

مدینہ تشریف لیاے سن۔ تے جس دن حضورؐ نے وصال فرمایا اوس توں بھیڑا تے ہنیرا دن وی کدے نہیں ویکھیا ۷؎
سقیفہ بنی ساعدہ تے بنوا شہل دامحلہ:

جناب ابوبکر صدیق دی تقریر توں بعد ہر صحابی ایہ سوچن لگ پیا کہ ہن کیہ بنے گا۔ انسانی تواریخ دی سب توں وڈی
اُخوت دے آؤن والے دیہاڑے کوں دے ہون گے۔ مہاجر تے انصار اپنیاں یاریاں تے بھائی چارے ٹردے رکھ سکے
گے یاں نہیں۔ مدینے دی نویں ریاست دا صدر کون ہووے گا تے کیہڑا بندہ اے جیہڑا رسول خدا دی خلافت دا چنگا تے سچا
حق داراے؟

دلاں وچ ایہ سوال تے اکھاں وچ اتھر ولے کے اصحاب نبی، مسجد نبوی وچوں باہر نکلن لگ پے۔ غماں دے مارے
مدینے دے مسلمان کجھ تے اگل ہتھ بندیاں دے اگلے اعلان دی اڈیک وچ گھراں نوں ٹر گئے تے کجھ جناب عائشہ دے
گھر دے اگے اکٹھے ہو گئے پر کجھ انصاری مسلمان بنی ساعدہ دے ڈیرے تے حضرت سعد بن عبادہ انصاری کول جا بیٹھے
تاں جے کوئی صلاح مشورہ کیتا جاوے۔ دُجے پاسے مہاجر مسلماناں دا اک جتھہ حضرت اُسید بن حنیر نوں نال لے کے،
جناب ابوبکر صدیق نال گل بات کرن لئی بنوا شہل دے محلے وچ جا بجیا۔

جناب صدیق اکبر ول اکٹھے ہون والے صحابہ نے اے گل بات چھوئی وی نہیں سی کہ اچن چیت اک بندے نے ایہ
خبر دتی کہ سعد بن عبادہ نے سقیفہ وچ انصار دا مجمع لایا ہو یا اے تے اوہ خلافت دے مسئلے تے صلاح مشورے کر دے پے
نیں۔ جناب عمر فاروق نے حضرت ابوبکر صدیق نوں صلاح دتی کہ سقیفہ ول جا کے حال حالات دی خبر لینی چاہیدی اے۔
دوویں عظیم الشان راہنما اے راہ وچ ای سن کہ دو انصاری مسلماناں نے حضرت سعد بن عبادہ انصاری دی قیادت وچ اکٹھے
ہون والے مسلماناں ولوں کجھ حقیقت بیان کیتی تے نال صلاح دتی بنی اوتھے جان دی لوڑ کوئی نہیں۔ بس اللہ داناں لوؤ تے
مہاجر اں دے مستقبل دا خیال کرو۔ سقیفہ دے حالات جان توں بعد جناب عمر فاروق نے فیصلہ کر لیا کہ ”واللہ، ہن اسیں
سقیفہ ضرور جاواں گے۔“

دوویں یار سقیفہ پڑے تے ویکھیا کہ جناب سعد بن عبادہ چادر تان کے زمین تے لے پے نیں تے اک انصاری
مسلمان تقریر کر رہے نیں کہ ”لے بنی سجنو، سب نوں پتہ اے کہ اسیں انصار اللہ ہاں تے مسلماناں وچوں جنگاں وچ آزمائے
ہوئے بہادر۔ مہاجر بھراؤ! تہاڈی حیثیت انصار دی فوج دے اک جتھے دی اے۔“ تقریر ختم ہون توں بعد جناب ابوبکر
صدیق نے جمل تے سیانف نال مسئلے نوں سلجھایا تے انصاری مسلماناں نوں ایس گل تے راضی کر لیا کہ اوہ مہاجر مسلماناں
وچوں جناب عمر فاروق یاں ابوعبیدہ جراح نوں خلیفہ بنالین۔ ایس موقع تے حضرت عمر نے اُچی واج نال آکھیا کہ ”ابوبکر
جی! ہتھ اگے ودھاؤ۔“ آپ نے ہتھ اگے کیتا تے جناب عمر نے بیعت کر دیاں آکھیا:

”کیہ رسول اللہ نے ایہ نہیں سی آکھیا کہ اے ابوبکر! مسلماناں نوں نماز پڑھاؤ۔ ایس فرمان موجب اے ابوبکر!

تسین ای خلیفہ جے۔ اسیں تہاڈی بیعت کر دے ہاں۔ یقین اے کہ جس بندے دی بیعت کیتی جا رہی اے،

اوه ساڈے ساریاں وچوں رسول اللہ دی نظر وچ چوکھا پیارا تے حضورؐ دا محبوب اے۔“
ایوں جناب ابوبکر صدیق دی بیعت داکم چھوہ دتا گیا تے اگلے دن مسجد نبوی وچ ایہ کم توڑ چڑھ گیا۔
خلیفہ رسول دی مڈھلی تقریر:

بیعت داکم توڑ چڑھ گیا تے خلیفہ رسول جناب ابوبکر صدیق نے منبر رسول تے جا کے فنِ حکمرانی دا اک راہنما اصول دسیا۔ آپ نے فرمایا:

”سجنو! مینوں تہاڈا امیر بنایا گیا اے جد کہ میں تہاڈے توں چوکھا لائق نہیں۔ بس بھلیائی دے کم وچ میرے نال موہڈا لایا جے تے برائی دے موقع تے مینوں ٹوک دینا۔ چیتے رکھنا کہ سچائی امانت داری اے تے جھوٹھ خیانت اے۔ جے تہاڈے وچ کوئی ماڑا اے تے میرے لئی اوه طاقتور اے۔ جے کسے گنڈے نے کسے ماڑے دا حق تلف کیتا تے انشاء اللہ اوس دا حق دووا کے رہواں گا۔ تے جابر میرے نیڑے کمزور اے کیوں جے میں اوہدے کولوں مظلوم دا حق دووا کے رہنا اے، انشاء اللہ..... خیال رہوے کہ جے میں اللہ تے اوس دے رسول دی نافرمانی کراں تے فیر تہاڈے تے میری اطاعت واجب نہیں۔“

اخیری زیارت:

رسول خدا دی قبر مبارک کتھے بنائی جاوے، ایہدے تے تن صلاحواں سامنے آئیاں۔ پہلی صلاح ایہی کہ جسد مبارک مکہ منورہ لے جایا جاوے کیوں جے مکہ وچ بیت اللہ وی اے تے حضور دی جمن بھوں وی اے پر ایس تے سارے صحابہ تے اہل بیت دا ایکانہ ہو سکیا۔

دُجی صلاح موجب بیت المقدس دی دھرتی دفن لئی بہتر تھاں سی، کیوں جے اوه بوہت سارے انبیاء دی اخیری آرام گاہ اے۔ ایہ صلاح وی توڑ نہ چڑھی کیوں جے بیت المقدس تے اوہدوں تیکر نصرانی رومی حکومت دا قبضہ سی۔
تجے مشورے موجب اوه شہر (مدینہ منورہ) ای رسول رحمت دی اخیری آرام گاہ لئی مناسب تھاں سی کیوں جے اوس شہر نے اسلام دا علم بلند کرن لئی سر دھڑ دی بازی لا دتی سی تے نالے اوسے شہر وچ اہل بیت دسوں کیتی بیٹھن۔ ایس رائے تے سارے مسلماناں نے اتفاق کر لیا۔

ہن سوال ایہی کہ اوس پاک شہر دی کیہدی تھاں حضور a دی مرقد دی چوکھی حق دار اے۔ کسے منبر دی تھاں نوں مناسب جانیاتے کسے مصلے دی تھاں نوں پر ایہ گل ایس لئی منن جوگ نہیں سی کہ قبر تے عبادت گاہ نوں اکٹھا کرنا حضور دی اپنی تعلیم دے خلاف سی۔ اے صلاحواں کرن والے صحابہ تے اہل بیت کسے نتیجے تے نہیں اپڑے کہ جناب ابوبکر صدیق تشریف لے آئے۔ آکھن لگے کہ میں رسول اللہ دی زبان مبارک توں ایہ گل سنی ہوئی اے کہ جس تھاں تے اللہ دانی، اللہ نوں پیارا ہوندا اے، اوسے تھاں نوں اللہ دے نبی دی مرقد بنن دا شرف حاصل ہوندا اے۔ ایوں جس تھاں تے پلنگ پیا سی، او تھے ای قبر کھودن دا فیصلہ کر لیا گیا۔

مرقد مبارک دی تھاں دا فیصلہ ہو جان توں بعد ایہ سوال سامنے آیا کہ کیہ لحد مدنی طریقے موجب بغلی بنائی جاوے یاں کئی طریقے موجب ہودہ طرز دی؟ حضرت ابو عبیدہ الجراح مکی طریقے، تے جناب ابو طلحہ زید بن سہیل مدنی طریقے دی قبر

بناؤن دے سیانے متھے جان دے سن۔ حضرت عباس نے دوواں صحابہ نوں سدّ گھلیا کہ چلو جیہڑا وی اگدیں اپڑ گیا، اوہدے طریقے موجب قبر بنا لواں گے۔ ابو طلحہ پہلوں اپڑ گئے تے ایہ سمجھدیاں ہوئیاں کہ اللہ نوں ایہی طریقہ منظور اے، بغلی قبر تیار کرن دافصلہ کیتا گیا۔ ایہدے نال ای غنسل دی تیاری وی چھوہ دتی گئی۔

رسول اللہ دے جسد مبارک دے غنسل وچ صرف نیڑے دے رشتے دار ای شریک ہوئے۔ قبائے نیڑیوں غرس دے کھوہ توں پانی لیاندا گیا۔ فضل بن عباس، قثم بن عباس تے حضور دے آزاد کیتے غلام جناب شقران نے جسد مبارک ول پردے دا کپڑا پھڑی رکھیا۔ اسامہ بن زید پانی پاؤندے رے تے جسد پاک نوں ملن دی سعادت جناب علی المرتضیٰ نوں حاصل ہوئی۔ جویں جویں علی المرتضیٰ جسد مبارک تے ہتھ ملدے جان دے سن، آل دوالا خوشبو دیاں لپٹاں نال مہکد اجانداسی ﴿﴾

عزیز پڑھنہارو! نبی آخر دے پاک جسے وچوں اوس ویلے جیہڑی خوشبو اٹھی سی، اوس نوں مستشرقین نے وی منیا اے پر اگلی گل بڑی بے عقلی دی کیتی نیں۔ اوہ آکھدے نیں کہ حضور a دی حیاتی وچ حضور نوں جیہڑیاں چیزاں دا اشتیاق سی، اوہناں وچ خوشبودا نمبر پہلا سی۔ ایوں بوہت زیادہ استعمال دی وجہ توں خوشبو آپ دے بدن دا جز بن گئی سی۔

رسول اللہ نوں کفن تن چادران وچ دتا گیا جنہاں وچ دو سفید چادران یکن دیاں بنیاں ہوئیاں سن تے اک مقامی دھاری دار چادری۔ کفن توں بعد عام مسلماناں دی زیارت لئی پردہ ہٹا دتا گیا۔ صحابہ کرام فوج در فوج آؤندے گئے تے اپنے محبوب راہنما تے انسانیت دے وڈھے محسن دا اخیر دیکر دے تے درود سلام پڑھدے، بھیجاں اکھاں نال واپس پرتدے رے۔ فیر نماز جنازہ دی واری آئی۔ اصحاب نبی واری واری بغیر امام توں نماز پڑھدے رے۔ جناب ابو بکر صدیق تے جناب عمر فاروق نے اکٹھے نماز جنازہ پڑھی۔ نماز پڑھن توں بعد خلیفہ راشد جناب ابو بکر صدیق نے مسلماناں دے سامنے تقریر دے انداز وچ ایہ گفتگو فرمائی:

”السلام علیک یا رسول اللہ ورحمۃ اللہ وبرکاتہ! اسیں گواہی دیندے ہاں کہ اللہ دے نبی تے رسول نے اپنے پروردگار دی رسالت اپڑا دتی۔ اوہدے رستے تے اوہدوں تیکر جہاد جاری رکھیا جدوں تیکر اللہ نے اپنے دین دی نصرت نہ فرما دتی۔ اسیں ایس تے وی گواہ ہاں کہ اللہ دے رسول نے اللہ نال جیہڑا وعدہ کیتا سی اوہ حقی سچی پورا کر دتا تے لوکاں نوں فرما دتا کہ خدائے وحدہ لا شریک توں بنا کسے دی عبادت جائز نہیں۔“ ﴿﴾

اصحاب نبی جناب ابو بکر صدیق دی ہر گل دی تائید کر دے رے تے آکھدے رے کہ ہاں ابو بکر جی! تسیں ٹھیک فرما رے او۔ جناب ابو بکر توں بعد حضرت عمر فاروق نے وی تقریر فرمائی۔ اوس توں بعد قبر وچ لال رنگ دا اک کمبل وچھایا گیا۔ فیر سیدنا علی المرتضیٰ، حضرت فضل بن عباس، حضرت قثم بن عباس تے جناب شقران قبر وچ اترے تے انسانیت دے سب توں وڈھے محسن تے بشریت دے شاہکار نوں اللہ دے حوالے کر دتا۔

عزیز پڑھنہارو! ایہی سی ”حیاتی حضور دی“

اُمہات المؤمنین

ہتھلی کتاب وچ جدوں وی کدرے کسے اُم المؤمنین دا ذکر آئیا اے تے ایہ گل دی گئی اے کہ تفصیل جان لئی اُمہات المؤمنین دا باب ویکھنا پوے گا۔ ایہ تفصیلاں ایس لئی اک تھان تے اکٹھیاں کر دتیاں گئیاں نیں کہ جے کوئی پڑھنہار صرف مومنناں دیاں ماواں تے کوئی جانکاری کرنا چاہندا اے تے اوس نوں آسانی رہوے۔

اک توں ودھ سوانیاں:

اک توں ودھ بیویاں، کثرت ازواج، تعدد ازواج یاں پولی گانی (Poly gyny) اک اچھا مقدمہ اے جس نوں جتن لئی امریکہ تے یورپ دے مستشرقان نے پوراٹل لایا اے۔ اوہناں نوں جدوں جناب رسول خدا دی ذات مبارک وچ اُسوہ حسنہ توں وکھ ہو کوئی چیز نہیں لہدی تے فیرواہ اپنے ناپاک تے مکروہ مقصد نوں حاصل کرن لئی پیکر خلق عظیم دے عفت و عصمت دے دامن تے شہوت پرستی دے گھٹیا الزام عائد کرن توں وی باز نہیں آؤندے۔ ایوں دے بدباطن لوکاں وچ ہلدی برٹ، آندرے ڈینڈلو، فرانسس بیکن، یولو جیس، جان لڈگیٹ، پیٹر تے رسوائے زمانہ سلمان رشدی دے ناں سر کدھویں نظر آؤندے نیں۔ ایس توں پہلاں کہ رسول خدا دے اُمہات المؤمنین نال نکاحواں دا ذکر کیتا جاوے، ضروری جا پدا اے کہ اسلام توں پہلاں دیاں تہذیبیاں تے مذہباں اُتے اک جھاتی پائی جاوے۔

اسلام توں پہلاں دا رواج:

چوکھیاں بیویاں (کثرت ازواج) دا مسئلہ نہ تے اسلام دی سوغات اے تے نہ ای کجھ بد بخت بندیاں دے آکھن موجب محبوب خدا نے ایس نوں اسلام وچ وادھے دا ذریعہ بنایا۔ سگوں ایہ رسم اسلام توں وکھ تے اسلام دے ظہور توں پہلاں دی موجود اے۔ معروف فرانسیسی محقق ڈاکٹر گستاوی بان نے کثرت ازواج تے بحث کر دیاں لکھیاں اے کہ ”ایہ رسم حضرت محمد توں اگدیں مشرق دیاں ساریاں قوماں مثلاً یہودیوں، ایرانیوں تے عرباں وغیرہ وچ موجود سی، تے جہیڑیاں قوماں نے اسلام قبول کیتا اوہناں نوں خاص ایس مسئلے وچ کوئی فیذا نہیں ہونیا۔“ مشہور ماہر انسانیات جارج مرڈاک دی اک رپورٹ موجب دنیا دیاں ۵۵۴ قوماں وچوں ۴۱۵ وچ آج وی اک توں چوکھیاں سوانیاں نال ویاہ دا رواج پایا جاندا اے، تے جے دنیا نوں تمدن یاں معاشرے دی تکرری تے تولیے تے فیر ۲۵۰ معاشریاں وچوں ۱۹۳ وچ آج وی ایہ رواج لہندا اے۔

جارج مرڈاک نے ٹھیک گل دی اے پر آؤ ایس نوں تواریخ دے شیشے وچ ویکھئے۔

ایشیا دے غیر الہامی مذہبوں وچ سب توں وڈھے کھلار والا مذہب ہندومت اے۔ ہندومت دے اک سو جھوان ڈاکٹر اے۔ ایس الٹیکار اپنی کتاب 'The Position of women in Hindu Civilization' وچ ایہ اعتراف کیتا اے کہ ویدک لٹریچر وچ کثرت ازواج (Poly gyny) دے بوہت سارے حوالے لکھدے نیں۔ پٹھ ہندومت دے کجھ بزرگاں دا ذکر کیتا جاندا اے جہدے توں ڈاکٹر الٹیکار دی گل دی تصدیق ہوندی اے:

رام چندر جی، ہندو دھرم موجب، اوہناں دے بھگوان نیں۔ رام چندر جی دے والد راہ دسرتھ دیاں گھٹو گھٹ تن بیویاں دے ناں اے تیکر توارنجن نوں یاد نیں:

- ۱۔ پٹ رانی کوشلیا رام چندر جی دی ماں
- ۲۔ رانی سمتر کچھن جی دی ماں
- ۳۔ رانی کیکنی بھرت جی دی ماں

راجا پانڈو مشہور پانڈواں دا جد اعلیٰ اے، اوس دیاں دو بیویاں سن جنہاں دے نام کنکی تے مادری سن۔ راجہ شتھن دیاں وی دو بیویاں گنگا تے سیہہ وتی سن۔ کچھتر ایرج داتن سوانیاں نال تعلق ثابت ہوندا اے جنہاں وچ دو بیویاں امیکا تے امبانکا سن تے اک لونڈی وی سی۔ ایوں ای پردرمنو دیاں دس (۱۰) بیویاں، راجہ ہر چندر دیاں سو (۱۰۰) بیویاں تے سری کرشن جی دیاں کئی سو بیویاں دیاں جانندیاں نیں۔

الہامی مذہبوں وچ وی کثرت ازواج تے کدرے کوئی پابندی نظر نہیں آؤندی۔ وکھو وکھ مذہبوں دی قانونی سند تے اخلاقی جواز ایہدے نال رہیا اے۔ جوہن کہ ویسٹرے مارک لکھدا اے کہ ”بہت سارے موقعیاں تے (جرمن مذہبی ریفارمر مارٹن) لوتھر نے کثرت ازواج تے کافی نرم رویہ اپنایا اے۔ خدا نے ایس توں منع نہیں کیتا، ایستھوں تیکر کہ حضرت ابراہیم جیہڑے اک کامل انسان سن، دیاں وی دو بیویاں سن۔ خدا نے عہد نامہ قدیم دے بعض لوکاں نوں خاص حالات وچ اجہیاں شادیاں دی اجازت دے رکھی سی۔ کجھ عیسائی فرقے کثرت ازواج دی چوکھی شدت نال وکالت کردے رے نیں۔ ۱۵۳۱ء وچ عیسائیاں دے اک فرقے نے ایس گل دی تبلیغ کیتی کہ جیہڑا سچا عیسائی بننا چاہندا اے، اوس دیاں بہت ساریاں بیویاں ہونیاں چاہیدیاں نیں۔ اک دوسرے فرقے وچ، معاشی حالات دے اجازت دین دی صورت وچ کثرت ازواج فرض سی تاں جے اوہ آخرت تے دنیا وچ بھلیائی پاسکے۔“

ہارپر دی بائبل ڈکشنری وچ لکھیا اے کہ عہد نامہ قدیم دے زمانے وچ زیادہ شادیاں دی اجازت سی تے توراتی قانون نے وی ایس توں نہیں ڈکیا۔ رکھیل زنانیاں، کنیراں تے دُجیاں بیویاں دی کثرت اک معمول سی۔ حضرت ابراہیم، یعقوب تے یوسف جے بزرگاں دیاں اک توں ودھ بیویاں سن۔ بادشاہواں دیاں بہت ساریاں بیویاں ہوندیاں سن جوہن جناب داؤد تے جناب سلمان نے سیاسی اتحاداں لئی کیتیاں سن۔

یہودی مصنف ابراہیم لیون 'تاریخ یہود' وچ لکھدا اے کہ کثرت ازواج دی کوئی قانونی روک ٹوک نہیں سی۔ ایہتھوں تیکر کہ قرون وسطیٰ وچ یہودی مذہبی راہنما جرشم نے فتویٰ جاری کر دتا کہ کوئی بندہ اونیاں سوانیاں رکھ سکدا اے، جنیاں کہ اوس دے وٹن وچ ہون۔ سانوں دسیا گیا اے کہ اسرائیلی ہیر و گیدی اون دیاں ستر بیویاں سن۔ تے اسیں جناب داؤد دیاں بیویاں وچوں گھٹو گھٹ ست دے ناں جان دے ہاں۔ یہودی تواریخ وچ سب توں وڈا حرم غالباً سلمان ہی داسی۔ حضرت موسیٰ (g) دیاں وی چار بیویاں سن، جنہاں دے ناں سفورہ خاتون، جشیر، قینی تے حباب سن۔ اوہناں دیاں تعلیمات وچوں چوکھیاں بیویاں دے جواز داپتا لگدا اے، جو یوں کہ کتاب استثناء وچ اے کہ:

”جدوں توں لڑائی لئی اپنے دشمنان تے خروج کریں تے خداوند تیرا خدا اوہناں نوں تیرے ہتھوں گرفتار کرے تے اوہناں نوں اسیر کر کے لیاویں تے فیر توں اوہناں وچ کوئی سوخی سوانی ویکھیں تے تیرا دل کرے کہ توں اوس نوں اپنی جورو بنائیں تے توں اوس نوں اپنے گھر وچ لے آ۔ اوس داسر منڈھ دے تے نوہہ (ناخن) کٹ دے۔ فیر اوہ اسیری دے لیڑے بدل دیوے تے اک مہینہ اپنے باپ تے اپنی ماں دے سوگ وچ بوے۔ اوس توں بعد توں اوہ دے نال خلوت کر۔ توں اوس دا خصم بن کے، تے اوہ تیری جورو بن کے رہوے۔“

عیسائیت وچ ایس گل دی گواہی ملدی اے کہ دس کنواریاں اپنے ہون والے لاہڑے نوں ملن لئی گئیاں تے بائبل دیاں چوکھیاں تفسیراں وچ ہون والے دولہے توں مراد یسوع مسیح ای لئی گئی اے۔ ”مذہب وچ جنسیت“ دے مصنف نے ایس موضوع تے ایوں روشنی پائی اے:

”حضرت عیسیٰ دی حیاتی وچ جنس دے عنصر نال جڑ دے، کجھ واقعات واضح کر دے نیں کہ اوہناں سوانیاں ولوں خالص منفی نقطہ نظر توں گریز کیتا۔ حضرت عیسیٰ دا سوانیاں نال رویہ چڑگا، سلاہن جوگ، میانہ روتے حق سچ والا سی۔ اوہناں کدے وی عورتاں نوں حقیر نہیں جانیا، سگوں اوہناں نوں مرداں دے برابر لیونا چاہیا تے ایہدے نال اسیں اوس دور وچ عورت دی حیثیت دا اندازا کر سکدے ہاں کہ مسیح دا رویہ عورتاں نال کڈا جرأت بھریا تے انقلابی سی۔ ہاں کجھ عیسائی فرقیوں وچ چوکھیاں سوانیاں تے دور دی گل اے، اک سوانی نوں وی پسند نہیں کیتا جاندا اسی سگوں عیسائیت دا وادھا ای اک راہبانہ مذہب دی حیثیت نال ہوئی۔“ اتھتھے دیندار بندے لئی اک بیوی دی وی مجبوری دی حالت وچ ای اجازت سی۔ مغرب اپنی بے دینی تے الحاد دے دعوے دے باوجود عیسائیت دے اثر توں آزاد نہیں ہوئی۔ اوس نے اک سوانی (یک زوجگی یاں Monogamy) دے تصور نوں تے گوارا کر لیا پر کثرت ازواج دا تصور اوس دے حلق توں تھلے نہیں اُتر سکیا۔ جیہڑیاں قوماں دی گردن وچ مغرب دی غلامی دا طوق سی، اوہناں نے ایس دی تائید ایوں کرنی شروع کر دتی جو یں پہلی وار اوہناں دیاں اکھاں کھلیاں ہون تے عورت دی عظمت دا احساس ہوئی ہووے۔“

کثرت ازواج تے اسلام:

اوہ ایہ گل بھل گئے کہ اسلام وچ تعدد ازواج دا تصور جویں نا جائز نہیں اوویں ناگزیری وی نہیں۔ صرف ضروری حالات وچ تے انصاف کر سکن وی شرط نال ایس دی صرف اجازت دتی گئی اے، حکم نہیں۔ ایس ویکھدے ہاں کہ سورۃ النساء وچ جتھے ایس گل دا ذکر لکھدا اے ”إِنْ“ دا لفظ دو واری ورتیا گیا اے، **وَإِنْ تَعْلَمَنَّ** یعنی صورت وچ۔ تے گل بات وچ لفظ ”اگر“ دی تکرار ایس گل دی پکی پیڈی دلیل اے کہ قرآنی درس وچ چوکی احتیاط توں کم لیا گیا اے۔

اللہ تعالیٰ دا ارشاد مبارک اے کہ جے تسمیں دو یاں چوکیاں بیویاں وچ عدل و انصاف کر سکن دا خوف رکھدے او تے فیر اک نال ای گزرا کرو۔ بس چیتے رہوے کہ جس بندے نوں تن یا چار سوانیاں دی اجازت دتی گئی اے، (لفظ اجازت دھیان وچ رہوے) ایہ بند اوہ اے جس نوں اپنے عدل و انصاف تے بھروسا ہووے تے ایس گل تے اوہ کسے شک وچ نہ پوے۔ ایس ضمن وچ اخیری رائے تے بندے دی اپنی ای ہوسکدی اے کہ اوہ آپوں اپنے اندر جھاتی پا کے فیصلہ کرے کہ صحیح گل کیہڑی اے پر عدل بہر حال شرط اے، تے عدل و انصاف لئی کوشش کرنا واجب اے۔ ہاں ایہ ضرور اے کہ پورا پورا عدل نہیں ہوسکدا مثلاً دل دا میلان کسے دے وس وچ نہیں ہوندا۔ بس اپنے ولوں بنداپوری کوشش کرے پر دلی رغبت تے اوہ معذوراے۔ اوس دی وجہ ایہ ہے کہ عدل دا تعلق اوہناں چیزاں نال ای ہوندا اے جیہڑیاں انسان دے وس وچ ہون، مثلاً لباس، مکان، روٹی پانی تے کچھ اچھے ہووے۔ قلبی میلان یعنی دل دی گل بندے دے وس وچ نہیں ہوندی، ایس لئی بندے توں ایس دی پچھ پر تیت وی نہیں۔ جناب رسول خدا دی مبارک حیاتی توں وی ایہ گل ثابت اے کہ آپ دا میلان دُجیاں ازواج مطہرات دی نسبت حضرت عائشہ ؓ ول کچھ زیادہ سی، پر فیروی دُجیاں بیویاں دی اجازت تے رضا توں بغیر جناب عائشہ ؓ نوں کسے طرحاں وی نہ نواز دے، تے فیر ایہ دُعا وی فرمایا کردے سن کہ اے اللہ! جیہڑی چیز میرے وس وچ نہیں اوہدے تے میری پکڑ نہ کرنا۔ اخیر انسان نوں کمزوری تے بنایا گیا اے۔

اصل وچ کثرت ازواج دی اصل حیثیت ایہی اے کہ ایہ حلال و مباح اے۔ نہ تے فرض یاں واجب اے تے نہ ای حرام یا مکروہ۔ تے جے ایس حقیقت نوں سامنے رکھیا جاوے تے بوہت ساریاں الجھناں توں آپوں چھٹکارا مل جاند اے۔ مولانا مودودی فرماندے نیں کہ ایس گل تے اُمت دا اجماع اے کہ ایس آیت (النساء: ۳) دی رُو نال تعدد ازواج نوں محدود کیتا گیا اے تے چار توں چوکیاں بیویاں رکھن توں ڈک دتا گیا اے۔ روایتاں توں وی ایسے گل دی تصدیق ہوندی اے۔ مثال موجب طائف دارنیکس غیلان جدوں مسلمان ہوئیا تے اوس دیاں نوں (۹) بیویاں سن۔ نبی اکرمؐ نے اوس نوں حکم دتا کہ چار بیویاں رکھ کے باقی چھڈ دیوے۔ ایوں ای نوفل بن معاویہ دیاں پنج (۵) بیویاں سن۔ آپؐ نے اوس نوں اوہناں وچوں اک نوں چھڈن دی ہدایت فرمائی۔ ایس گل بات توں نتیجا ایہ نکلد اے کہ کثرت ازواج تے قرآن دا نظریہ ایہ ہے کہ:

- ۱۔ کثرت ازواج نوں محدود کر کے اک کھلی تے بے قید آزادی تے بند ماریا اے۔
- ۲۔ کثرت ازواج نوں حلال قرار دتا گیا اے، فرض یا واجب نہیں۔

۳۔ عدل قائم نہ رکھ سکن دی صورت وچ ایہ جائز نہیں۔

ہن جدوں ساڈے سامنے اک واضح گل موجود اے، تے اسیں اک پیرا گے پندے ہاں تے ایس اعتراض دا وریوا کردے ہاں کہ اسلام نے چار تیکر دی وی اجازت کیوں دتی؟ ایس داسدھاسدھا جواب ایہ ہے کہ اسلام اک فطری دین اے تے ایہ انسانی حاجتاں تے لوڑاں دا خیال رکھدا اے۔ ایس نے بندے دیاں لوڑاں دکھو دکھ زامانیاں، ماکاں تے موسماں نوں سامنے رکھ کے پوریاں کیتیاں نیں۔ ایہ فرضی صورتاں نوں سامنے نہیں رکھدا سگوں انسانی زندگی دی ”اصل“ نوں سامنے رکھ کے پالیسی بناند اے۔ ایس دے حکم نرے نظریاتی تے اٹکل پچھ نہیں ہن تے نہ ای ایہ کوئی مہین فلسفیانہ نظام زندگی پیش کردا اے، جہدے تے لوکاں عمل ای نہ کر سکے تے نرا دوروں ویکھ کے ای ایس نوں اک مثالی نظام آکھ دیوے۔ اسلام نرا خواہشاں تے خواہاں دی دنیا تے یقین نہیں رکھدا سگوں بندے دی عملی حیاتی لئی کجھ کرن جوگ، چکلیے تے متوازن احکام دیندا اے۔ ایس نظام وچ انسانی فطرت دے نال نال عفت و عصمت تے طہارت و پاکی دا وی بڑا لحاظ کیتا گیا اے۔ اسلام ایوں دے حکم نہیں دیندا جیہڑے نرے کتاباں وچ لکھے رہن تے بند خفیہ یاں اعلانیہ ایس توں دکھ تے دریڈے حیاتی گزار دا پھرے۔ اسلام تے نرا وہی کجھ کرن دا حکم دیندا اے جیہڑا قابل عمل ہووے۔ تے ایہ کجھ صرف اسلام وچ ای ہے۔

کثرت ازواج تے غیر مسلم:

دُجے مذہب یاں معاشرے ایس پالیسی توں ڈھیر دریڈے نیں۔ مثلاً برطانوی معاشرے تے لی کو مردے ایہناں اکھراں تے غور فرماؤ:

”ساڈے سامنے ایس توں دکھ کوئی دُجا رستا نہیں کہ اسیں اک بندے دی اکو سوانی یعنی یک زوجگی (Monogamy) دی پالیسی تے ایمان رکھیے بھانویں اسیں ایس تے عمل نہیں کر دے یاں کر ہی نہیں

سکدے۔“

دین اسلام وچ ایوں بلکل نہیں۔ ایہ فطرت دا دین اے تے فطرت دا خالق ایس نوں چنگی طرحاں سمجھدا اے۔ جیہڑی لوکاں اپنی جہالت پاروں یاں کسے دُجی غرض لئی ایس تے کوئی ہور رائے رکھدی اے، دُجے اکھراں وچ اوہ ایہ گل آکھدی اے کہ لوگ انسان دی فطرت نوں، انسان دے خالق توں وی ودھ سمجھدے نیں۔ اصل وچ اوہ ایہ گل بھل جان دے نیں کہ کجھ مخصوص حالات وچ بند دُجی عورت دی ضرورت محسوس کردا اے۔ فیر جدوں مذہب یاں معاشرہ اوس دے جائز طریقے اگے روڈے کھلا ردا اے تے نتیجہ اوہی نکلد اے، جیہڑا ساناں مغرب دیاں شاہراہواں تے نظر آؤندا اے۔ ایوں معاشرے وچ نہ صرف صنفی بد امنی کھلر دی اے سگوں عورت آپوں ذلت تے رسوائی دے ڈونکھے، مدھیاں وچ جا ڈگدی اے۔ مغرب دے اوہ بندے جہاں معاملے نوں تعصب دی عینک توں بغیر ویکھیا اے، اوہ تسلیم کر دے نیں کہ سچ اوہی اے جیہڑا اسلام نے دسیا اے۔ مثلاً کلیر میکفارلین نے بڑے وثوق نال آکھیا اے کہ ”مسئلے دا سماجی، اخلاقی یاں مذہبی، کسے وی نقطہ نظر نال جائزہ لیا جاوے، ایہ ثابت کیتا جا سکدا اے کہ کثرت ازواج، تہذیب دے اُچے توں اُچے معیار دی

وی نفی نہیں کردا۔ ایہ اصول ماڑیاں، محروم تے اُن چاہیاں سوانیاں دے مغربی مسلماناں دا عملی علاج پیش کر دے، ایس توں وکھ تے فیروہی ہر دیہاڑے ودھی جاندی عصمت فروشی ناجائز تعلقات تے دُکھاں ماریاں ادھیڑ عمر دیاں بن ویاہیاں سوانیاں ای دین گئیاں

ڈاکٹر اپنی بسانت نے ایوں اتھرو کیرے نیں۔

”جدوں اسیں رات نوں مغرب دے شہراں دیاں گئیاں وچ ہزاراں رحم جوگ عورتاں نوں ویکھدے ہاں تے اسیں اسلام دے کثرت ازواج دے اصول دے خلاف مغرب دی ریا کاری توں متاثر نہیں ہو سکدے۔ ایہ گل عورت واسطے چوکی چنگی، خوشیاں بھری، عزت بخشن والی تے احترام جوگ اے کہ اوہ کسے اک مرد دی ہو کے اپنیاں بانواں وچ حلال زادہ بال چکے تے عزت نال رہوے نہ کہ ایہ کہ اوہ حرامی بال چھو چک کے گئیاں وچ زلدی پھرے۔“

بعض ویلے ایوں وی ہوندا اے کہ کسے مذہب، معاشرے قوم یا ملک وچ کجھ خاص حالات پاروں عورتاں دی کثرت ہو جاندی اے، جویں کہ آج کل ناں نہاد دہشت گردی دے چکر وچ مسلماناں دا قتل عام کیتا جا رہیا اے۔ ایس دے نتیجے تے عراق تے افغانستان ورگے ماکاں وچ لکھاں سوانیاں بے سہارا ہو چکیاں نیں۔ کجھ چر پہلوں تیکر امریکہ وچ عورتاں دی تعداد مرداں دے مقابلے تے اے لکھ زیادہ سی۔ ایس دا مطلب ایہ ہونیا کہ جے سارے دی سارے (جیہڑا کہ کدے نہیں ہونا) امریکی مردان تہذیب نکاح کرنا پسند فرمالین تے فیروی اوہناں دیاں اے لکھ سوانیاں ناں نہاد یک زوجی معاشرے وچ بے نکاحیاں رہ جان گئیاں۔ تے ایس ویلے ایہی صورت حال ہے جیہڑی نہ صرف امریکا وچ سگوں پورے مغرب وچ دسویں اے۔ آج وی جے اوہ معاشرے اپنے مرداں نوں تعداد ازواج دی اجازت دے دین تے اوہناں دیاں لکھاں آوارہ تے بے راہرو کڑیاں نوں گھریلو زندگی دی راحت نصیب ہو سکدی اے۔

کثرت ازواج تے رسول رحمت a:

محمد بن سعد لکھدے نیں کہ نبوت دے اعلان توں پہلاں جس بی بی نال سب توں اگدیں رسول رحمت نے نکاح فرمایا اوہ حضرت خدیجہ نیں۔ حضرت خدیجہ دی وفات توں بعد آپ نے حضرت سودہ نال نکاح فرمایا۔ سودہ توں بعد چھیتی ای جناب عائشہ نال نکاح ہو گیا۔ فیر آپ نے حضرت حفصہ نال نکاح کیتا۔ ایہ ۳ ہجری دی گل اے۔ ایس توں بعد آپ a نے اُم سلمہ نال نکاح فرمایا۔ شعبان ۵ھ وچ اک جنگ وچ جویریہ مال فی وچ آپ a کول اسیر ہو کے آئیاں۔ آپ نے اوہناں نوں آزاد کر کے اوہناں نال نکاح کر لیا۔ فیر ۵ھ وچ ای آپ نے زید بن حارث دی مطلقہ جناب زینب بنت جحش نال عقد نکاح فرمایا۔ اوس توں بعد اُم المساکین زینب بنت خزیمہ نوں ایہ شرف حاصل ہو گیا۔ کجھ ای دیر بعد زینب بنت خزیمہ فوت ہو گئیاں۔ فیر آپ نے حکم نضری دی بیوہ ریحانہ نال نکاح فرمایا۔ ریحانہ توں بعد اُم حبیبہ آپ دی زوجیت وچ

آئیاں۔ ایس توں بعد حضرت صفیہ تے فیر حضرت میمونہ نال نکاح کیتے گئے۔

ایہ بار ۱۲ احترام جوگ سوانیاں نیں جنہاں دا ذکر ازواج مطہرات دے طور تے طبقات ابن سعد وچ لکھدا اے۔ ابن سعد نے دو ہور سوانیاں دا وی ذکر کیتا اے جنہاں وچ اک فاطمہ بنت ضحاک بن سفیان کلابیہ اے تے دُجی اسماء بنت نعمان اے۔ ایہ نکاح ایسے ترتیب نال ۸ھ تے ۹ھ وچ ہوئے۔ اوہناں دے خیال موجب ایہناں دوواں بیبیاں نال خلوت دی نوبت نہیں آئی۔ ابن سعد نے جو کجھ لکھیا اے اوس دا نچوڑ ایہ ہے کہ:

۱۔ جیہڑیاں ازواج مطہرات نال آپ a نے نکاح تے خلوت فرمائی اوہناں دے نام ایہ نیں:

حضرت خدیجہ، حضرت سودہ، حضرت عائشہ، حضرت حفصہ، حضرت اُم سلمہ، حضرت جویریہ، حضرت زینب بنت جحش، حضرت زینب بنت خزیمہ، حضرت ریحانہ، حضرت اُم حبیبہ، حضرت صفیہ تے حضرت میمونہ۔
۲۔ اوہ بیبیاں جنہاں نال نکاح فرمایا پر خلوت دی نوبت نہیں آئی اوہ حضرت فاطمہ بنت ضحاک کلابیہ تے حضرت اسماء بنت نعمان نیں۔

۳۔ اوہ بی بی جس نال بطور لونڈی خلوت فرمائی اوہناں دا نام ماریہ قبطیہ اے۔

۴۔ کجھ مورخاں نے پیٹھ دتے ناواں دیاں بیبیاں دے آپ نال نکاح ثابت کرن دی ناکام کوشش کیتی اے:

قتیلہ بنت قیس، ملیکہ بنت کعب، بنت جندب بن ضمرہ کنانیہ تے سہاب بنت صلت
ابن ہشام لکھدے نیں کہ:

”بس ازواج مطہرات جنہاں نال آپ a نے خلوت فرمائی گیارہ (۱۱) نیں“

حضرت ماریہ تے خیر لونڈی دی حیثیت نال آپ کول رہیاں، ابن ہشام نے حضرت ریحانہ دا وی ذکر نہیں کیتا۔ گویا اوہ حضرت ریحانہ نال حضور دے نکاح نال اتفاق نہیں کردے۔

علامہ شبلی نعمانی وی ازواج مطہرات دے ضمن وچ گیارہ (۱۱) احترام جوگ بیبیاں دا ذکر کر دے نیں۔ اوہناں نے وی حضرت ریحانہ دا ذکر نہیں کیتا۔ ایس توں پتہ لگدا اے کہ اُمت وچ ایس گل تے اختلاف لکھدا اے پر ایہ اختلاف امہات المؤمنین دی تعداد وچ چوکے توں چوکھا اک دا ہے، تے اوہ نیں جناب ریحانہ۔ اگلے صفحیاں تے اسیں جیہڑا ہرام المؤمنین دا وکھرا، وکھرا ذکر کراں گے، اوہناں وچ حضرت ریحانہ دا ذکر خیر شامل اے پر اوہ دو متکوحہ بیبیاں جنہاں نال آپ نے خاوندی حیثیت نال وقت نہیں گزاریا، اوہناں دا ذکر ضروری نہیں سمجھیا گیا۔

انسانیت دے محسن دی ازدواجی زندگی دے ذکر توں پہلاں جے اوس دور دی یاد تازہ نہ کییتی جاوے جہدے وچ آپ نے کوئی نکاح نہیں فرمایا تے گل ادھوری رہ جاوے گی۔ ایہدے لئی اسیں حضور دی پاک حیاتی نوں چارھیاں وچ وٹدے ہاں۔

۱۔ ۲۵ ورھیاں تیکر دی عمر ۲۔ ۲۵ توں ۵۰ تیکر دی عمر

۳۔ ۵۱ توں ۵۴ تیکر دی عمر ۴۔ ۵۵ توں ۶۳ تیکر دی عمر

تے سب توں پہلاں اسیں پہلے حصے ول رجوع کر دے ہاں۔

پیغمبر اسلام اک اچھے معاشرے وچ پیدا ہوئے جتوں آزاد معاشرہ آکھیا جاسکدا اے۔ جتھے کسے وی طرحاں دے جنسی تعلقات تے کوئی روک ٹوک نہیں سی۔ آپ دی ذات سوہنی تے من موہنی وی سی پر آپ دی ۲۵ ورہیاں تیکر دی حیاتی، جہدے وچ صنفی خواہشاں زور اور ہوندیاں نیں، اک پارسا، پاک دامن تے بے داغ حیاتی دا اک وڈا نمونہ پیش کر دی اے۔ مشرق یاں مغرب دا کوئی وی بندہ حیاتی دے ایس حصے وچ اوہناں ول انگل چکن دی جرأت نہیں کر سکیا۔ ولیم میور اپنیاں ساریاں اتناں دے باوجود ایہ گل من دا اے کہ ”ساری لوکاں دا ایس گل تے اتفاق اے کہ محمد دی جوانی وچ طور طریقیاں دی پارسائی تے رہتل دی پاکبازی اہیاں چیزاں نیں جیہڑیاں ککے دی لوکاں وچ گھٹ ای لہدیاں سن ۱۱؎

لیکی جاسٹن لکھدا اے کہ ”اپنے لوکاں وچ اوہ (جناب رسول خدا) اُچے کردار د مالک سی تے اوس تے کوئی انگل نہیں چکی جاسکدی۔“ ۱۲؎

امیل درمنگھم لکھدا اے کہ ”محمد (a) دی جوانی پاک تے صاف سی۔“ ۱۳؎

ہن اسیں دُجے دور وچ داخل ہوندے ہاں جہدے وچ آپ نے پہلا نکاح فرمایا تے فیر اک ای بیوی دے شوہر رے۔ ایہ دور آپ دی حیات مبارکہ نوں ۵۰ ورہیاں تیکر لے جاندا اے۔ گویا آپ بڑھاپے دی دہلیز تے پیر پالیندے نیں۔ ایس ساری مدت وچ نبی اکرم نہ صرف اک بیوی نال گزارا کر دے رے سگوں چوکی راضی خوشی زندگی دے دن گزار دے رے۔ تے اوہ بیوی بھلا کون سی؟ عرب دے کسے جنگجو قبیلے دے سردار دی دھی؟ مصر دی کوئی حسینہ؟ کوئی خوبصورت کم سن کنواری کڑی؟..... بلکل نہیں، سگوں ڈھلی ہوئی جوانی والی چالی ۴۰ ورہیاں دی اک اجہی عورت جیہڑی پہلے تن یاں کم از کم دوشوہراں دی بیوی رہ چکی سی..... خدیجہ..... ہاں خدیجہ، جس نے آپوں پیش کش کیتی کہ اوہ جے کسے دے نکاح وچ آؤنا چاہندی اے تے اوہ قریشی نو جوان محمد اے، حالانکہ قوم دے سارے گٹڑے بندے اوہناں نال نکاح دے خواہش وندن۔ کئی سینہ گھل چکے سن تے ساریاں نے مال و زروی پیش کیتا سی۔ پر خدیجہ نوں محمد جیہڑا پارسا تے امین کوئی نظر تے آؤندا۔

اندازاً فرماؤ کہ ۲۵ ورہیاں دی عمر تیکر اک آزاد تے جنس پرست معاشرے وچ جنم لین والا نو جوان کسے عورت دے نیڑے وی نہیں گلداتے جدوں کسے عورت ولوں نکاح دی پیش کش ہندی اے تے اوہ ایس گل دی پرواہ نہیں کردا کہ اوہ اک ادھیڑ عمر دی عورت اے تے دو تن خاوندان نال زندگی گزار چکی اے۔

تے آؤ ہن تجھے دور تے جھاتی پائیے جیہڑا آپ دی حیات پاک دے سال ۵۱ توں ۵۴ دا احاطہ کردا اے تے جس دا مڈھ حضرت خدیجہ دی وفات نال سجھا۔ جدوں حضرت خدیجہ جی با وفا بیوی اللہ نوں پیاری ہوئی تے رسول رحمت نے اس

۱۱؎ The Life of mahomet, vol ii, page:14

۱۲؎ Muhammad and his power, Page: 51

۱۳؎ The Life of Muhammad, Page:52

جدائی نوں شدت نال محسوسیا۔ اوس موقعے تے حضرت خولہ بنت حکیم نے آپ نوں نکاح ثانی دا مشورہ دیتا تے آپ راضی ہو گئے۔ سودہ ناں دی اک وڈھیری بیوہ عورت اسلام دے مڈھلے دور وچ ای مسلمان ہو گئی سی۔ آپ نے اوہناں نال نکاح فرمالیا۔ حضرت سودہ اک وڈھیری سوانی ہون دے باوجود چار ورہیاں تیکر رسول خدا دی کئی بیوی دے طور تے آپ دی زوجیت وچ رہیاں۔ بس ایہ گل ثابت اے کہ ۵۴ ورہیاں دی عمر تیکر رسول خدا اک بیوی نال راضی خوشی گزارا کر دے رے، تے ایہ وی ثابت اے کہ اوس دور دیاں دوواں سوانیاں نال نکاح وچ کسے شہوانی جذبے دا شائبہ تیکر وی نہیں ہوسکدا۔

خانگی زندگی دے حوالے نال چوتھے دور وچ جھاتی پائیے تے ایہ گل سامنے آؤندی اے کہ حیات پاک دے ۵۴ ویں سال وچ آپ دی گھر والی اکو سودہ سن جیہڑے چوکھے وڈھیرے ہو چکے سن۔ ایس توں بعد جیہڑی وی زوجہ مطہرہ نال آپ نے نکاح فرمایا، اوس دے پچھے کوئی نہ کوئی مصلحت نظر آؤندی اے۔ مثال دے طور تے ولیم میور لکھدا اے کہ رسول خدا نے اک شادی ”عائشہ، ابوبکر دی تھوڑی عمر دی دھی، نال کیتی۔ ایہ اک اہلیا کم سی جہدا مقصد اپنے یار غار نال تعلق نوں ہور پکا کرنا سی۔ اوس ویلے تیکر عائشہ دی عدم جاذبیت نے شاید ای محمد a دے دل تے کوئی اثر کیتا ہووے۔“

باقی سوانیاں نال نکاح کدوں، کیوں، تے کیہڑے حالات وچ ہوئیا، ایس دا ذکر آگے ملے گا۔

* * * *

اُم المؤمنین جناب خدیجہ بنت خویلد

سیدۃ النساء العالمین خدیجہ الکبریٰ بنت خویلد بن اسد بن عبد العزیٰ بن قصی بن کلاب، قریش دے اک اُچے خنواد سے بنوا سدی اک مالدار خاتون سن۔ آپ دی والدہ داناں فاطمہ بنت زائدہ سی تے اوہناں دا سلسلہ نسب لکڑ دا دے قصی بن کلاب نال جا کے رسول خدا دی جد نال جاردا اے۔ چیتے رہوے کہ رسول خدا دے وڈکیاں دا سلسلہ جناب عبد اللہ بن عبد المطلب بن ہاشم بن عبد مناف بن قصی راہیں او تھے جامدا اے۔ آپ دی کنیت اُم ہند تے لقب طاہرہ اے۔

چوکھا چہ پہلوں حضرت خدیجہ داناں کے دے مشہور عیسائی عالم ورقہ بن نوفل نال لیا گیا جیہڑا اک رشتے نال جناب خدیجہ دے چاچے دا پترسی۔ ورقہ نال کسے وجہ توں ویاہ نہ ہو سکیا تے ایوں آپ دا نکاح ابو ہالہ ہند بن نباش بن زرارہ تمیمی نال ہو گیا۔ ایس نکاح دے نتیجے تے آپ دی اولاد ہالہ تے ہند دا ذکر کیتا جاندا اے ﴿

ابو ہالہ چلانا کر گئے تے جناب خدیجہ، عتیق بن عائد مخزومی دے عقد نکاح وچ آئیاں۔ ایس نکاح دے نتیجے تے کوئی اولاد پیدا نہیں ہوئی۔ بعض بزرگاں دا خیال اے کہ جناب خدیجہ دے اک تھے خاوند صفی بن اُمیہ وی سن جہاں نال عتیق بن عائد دی وفات توں بعد نکاح ہو گیا۔ ایہناں وچ ابن سعد تے دور حاضر وچ طالب ہاشمی تے نیاز فتح پوری دے ناں لکھن جوگ نیں۔ ابن سعد لکھدے نیں کہ مدینے وچ بنو طاہرہ ناں دا جیہڑا قبیلہ سی اوہ صفی تے جناب خدیجہ دے بیٹے محمد دی اولاد ای سی ﴿ مدینے وچ ایہ نسل ہولی ہولی مک گئی۔

جناب خدیجہ عام الفیل توں کوئی پندرہاں ورھے پہلوں ۵۵۵ء وچ پیدا ہوئیاں۔ آپ دی پارسائی بچپن وچ ای مشہور ہو گئی تے ہولے ہولے طاہرہ دے لقب نال بچھائیاں جان لگ پئیاں۔ آپ دے والد خویلد کے دے مشہور تے مالدار تاجر سن۔ جدوں خویلد کجھ بڑھے ہو گئے تے اوہناں گوشہ نشینی اختیار کر لئی تے کاروبار اپنی سچی دھی خدیجہ دے حوالے کر دتا۔ اوہناں دناں وچ قریش نے شام نال تجارتی تعلقات قائم کیتے ہوئے سن تے تجاز دے علاقے وچوں چوکھا تجارتی سامان یمن تے شام ول ای جاندا سی۔ جناب خدیجہ نے بوہت سارے بندے ملازم رکھے ہوئے سن جہاں دی ذمہ داری تجارتی سامان دی خرید و فروخت سی۔ سیانف تے دیانت داری، تجارت دے کھلار دے وڈے رچھ ہوندے نیں۔ ایہ دوویں چیزاں جناب خدیجہ دی ذات وچ ڈل ڈل پندیاں سن۔ ایسے پاروں اوہناں دا کاروبار روز بروز ترقی کر رہیا سی تے ہن اوہناں دیاں اکھیاں اک اچے بندے لئی اڈیکن ہارسن جیہڑا رجھ کے سیانا تے دیانت دار ہوندا، تاں جے اوہ اپنے ملازماں نوں اوس دی سرکردگی وچ دے دین تے مال دی درآمد وچ چوکھا نفع ہووے۔

عہد نساء حول الرسول از محمود مہدی، دار ابن کثیر دمشق، صفحہ: ۳۷۔ طبقات ابن سعد تے سیرت النبی از شبلی نعمانی۔ کجھ سیرت نگاراں دا خیال اے کہ پہلا نکاح عتیق بن عائد نال ہو یا سی، جہاں وچ سلمان منصور پوری وی شامل نیں۔

﴿ طبقات ابن سعد جلد ۸، صفحہ: ۳۳۱

وایہ اوہ زمانہ سی جدوں سرور کائنات دے پاکیزہ اخلاق، سیانف تے امانت داری دا چرچا کئے دے گھر گھر وچ ہو رہیا سی۔ طاہر اے جناب خدیجہ وی نوجوان قریشی دیاں صفتاں سن رہیاں سن۔ اوہناں نے جناب محمد رسول اللہ نوں سنبھیا گھلیا کہ جے آپ میرا مال تجارت برآمد واسطے شام ول لے جاؤ تے میں تہانوں عام لوکاں نالوں دُگنا معاوضہ دیواں گی تے نالے اپنا غلام میسرہ وی مدلیٰ نال ٹوراں گی۔ حضورؐ نے ایہ گل من لئی تے تجارتی قافلے دی سربراہی دا فریضہ ادا کر دے ہوئے مال لے کے بصرہ اپڑ گئے۔ اللہ دا کرنا ایہ ہو یا کہ بھاء چنگا لگ گیا تے حضورؐ چوکھے منافعے نال مکے پرت آئے۔ جناب خدیجہ بہت خوش ہوئیاں تے اپنے متھے گئے معاوضے توں کجھ ودھ ای رسول خدای خدمت وچ پیش کر دتا۔

جناب خدیجہ نے پہلوں ای کئے دے ہر گھر طرحاں آپؐ دی تعریف سنی ہوئی سی۔ مال تجارت وچ چوکھا نفع تے میسرہ دی زبائیں اوس دے ہم سفر دیاں من موہیاں گلاں سن کے جناب خدیجہ دے دل وچ رسول خدا ول رغبت پیدا ہو گئی تے اپنی خادمہ (یاں بعض سیرت نگاراں موجب اپنی سہیلی) نفیسہ راہیں حضورؐ نوں نکاح داسنبھیا گھل دتا۔ ایس توں جناب خدیجہ دے چاچے عمرو بن اسد تے رسول خدا دے چاچے ابوطالب دے وچکار گل بات چھوئی گئی تے اخیر جے جناب خدیجہ دے گھر اپڑ گئی۔ جناب ابوطالب نے نکاح دا خطبہ پڑھیا تے ایوں طاہرہ تے امین اک ہو گئے۔ نکاح دے ویلے جناب خدیجہ دی عمر چالی ورھے تے رسول خدای ۲۵ ورھے سی ۱۱

جناب خدیجہ دے بطن وچوں اللہ نے حضورؐ نوں دو پتر تے چار دھیاں دتیاں جہاں دے ناں قاسم، زینب، عبداللہ، رقیہ، اُم کلثوم تے فاطمہ رکھے گئے۔ رسول خدای ساری اولاد سوائے ابراہیم توں، جیہڑے کہ جناب ماریہ دے بطن وچوں پیدا ہوئے، جناب خدیجہ دے بطن وچوں پیدا ہوئی۔ جناب خدیجہ نے رسول خدا نال محبت نوں کمال تیکر اپڑایا۔ خاص طور تے اعلان نبوت توں بعد مکے والیاں نے آپؐ a تے ظلم تے تعدی دے جیہڑے پہاڑ توڑے، اوس ویلے جناب خدیجہ نے آپؐ نوں جویں حوصلہ دتا اوہ زبردست سیانف تے بے پناہ محبت بنا ممکن نہیں ہوسکدا سی۔

اولاد آدم وچوں جس نے سب توں پہلاں نبوت محمدی دی تصدیق کیتی اوہ جناب خدیجہ سن۔ حضورؐ غار حرا وچ رے یاں خدیجہ دے گھر وچ، دار ارقم وچ رے یاں خانہ کعبہ وچ، وفا دی دیوی خدیجہ نے کدے وی متھے تے وٹ نہ پایا۔ جے پہلی وحی دے ویلے حضور جلال خدا وندی پاروں کنبدے کنبدے گھر آئے، تے خدیجہ آپؐ دے نال جڑیاں رہیاں۔ طبیعت تھوڑی سنبھلی تے آپؐ a نوں مکے دے مشہور عالم ورقہ بن نوفل کول لے گئیاں۔ ایوں اپنے عظیم الشان شوہر دا حوصلہ ودھایا۔ نبوت دے اعلان توں بعد کافراں نے بے ہودہ گلاں تے حرکتاں شروع کیتیاں تے خدیجہ عرض کر دیاں رہیاں ”یا رسول اللہ! تسلیں دل سوڑا نہ کرو، بھلا کوئی اچھا رسول وی آیا اے، جہدے نال لوکاں نے ایہ سب کجھ نہ کیتا ہووے“ جناب خدیجہ دے ایوں آکھن نال حضورؐ دارنچ دور ہو جاندا تے آپؐ فیراوسے جذبے نال رب داسنبھیا اوہدی مخلوق تیکر اپڑاں ٹر پیندے۔ اعلان نبوت توں بعد توارنخ نے کعبہ وچ جس پہلی جماعت نوں نماز پڑھدیاں ویکھیا اوہ جماعت محمد رسول اللہ، جناب خدیجہ تے نوجوان علی دی سی۔

کجھ سیرت نگاراں نے جناب خدیجہ دی عمر چالی توں گھٹ لکھی اے۔

جدوں قریش دے مشرکاں نے بنو ہاشم تے بنو مطلب نوں شعب ابی طالب وچ محصور کیتا تے حضرت خدیجہ وی اس مصیبت دی گھڑی وچ حضورؐ دے نال ای سن۔ مکے دی مشہور بزنس ویمین تے سرمایہ دار سوانی اپنے کاروبار، مال دولت تے نوکر چاکر قربان کر کے اپنے خاوند دی محبت وچ اک گھاٹی وچ قید ہو کے رکھاں دے سکے پتر کھان تے مجبور ہو گئی تے اخیر ایسے اذیت پاروں، ۱۰ نبوی وچ قریش دا ظالمانہ محاصرہ ختم ہون توں تھوڑا ای چر بعد، او سے سال ۱۱ رمضان نوں چلانا کر گئیاں۔

وفات دے ویلے جناب خدیجہ دی عمر ۶۴ سال تے ۶ مہینے سی۔ آپ دی اخیری آرام گاہ مکے دے قبرستان جون وچ اے۔

جدوں ربع صدی دی رفیقہ، چوکی محبت کرن والی بیوی، تے فاطمہ ورگی پیاری دھی دی ماں دنیا توں کوچ کر گئی تے جناب رسول خداؐ دا صدمے نال کیہ حال ہو یا ہووے گا، ایس دا انداز کرنا اوکھا نہیں۔ جناب خدیجہ نال رسول خداؐ دی محبت وی خدیجہ توں گھٹ نہیں سی۔ اوہناں دے چلانا کرن توں بعد وی ایس محبت وچ کوئی کمی نہ آئی۔ جدوں کوئی قربانی کر دے یاں کوئی جنور ذبح کر دے تے سب توں پہلاں جناب خدیجہ دیاں سہیلیاں ول گوشت گھلدے سن۔ جدوں اوہناں دا کوئی رشتہ دار رسول خداؐ کوں آؤندا تے اوس دی ڈھیر خاطر تواضع کر دے۔ حضرت عائشہؓ فرماندیاں نیں کہ اک واری حضورؐ نے، روز طر حاں جناب خدیجہ دی تعریف چھوئی تے مینوں بڑا رشک آیا۔ میں آکھیا یا رسول اللہ! اوہ اک وڈھیری بیوہ عورت سی۔ خدا نے اوس توں بعد تہانوں بہتر بیوی عنایت کیتی اے۔ ایہ سن کے حضورؐ دا چہرہ مبارک غصے نال لال ہو گیا تے فرمایا ”خدا دی قسم اے مینوں خدیجہ توں چنگی بیوی نہیں ملی۔ اوہ ایمان لیائی جدوں سب لوگ کافرن۔ اوس نے میری تصدیق کیتی جدوں سب نے مینوں جھٹلایا۔ اوس نے اپنا مال وزر میرے تے اوہدوں قربان کیتا جدوں دُجیاں نے مینوں محروم رکھیا تے خدیجہ ای اوہ بیوی اے جہدے بطن وچوں اللہ نے مینوں اولاد دتی۔“

حضرت عائشہؓ فرماندیاں نیں کہ میں ڈر گئی تے اوس دن ایہ عہد کر لیا کہ آج توں بعد کدے خدیجہ نوں ایسا ویسا نہیں آکھاں گی۔

اُم المؤمنین حضرت سودہ بنت زمعہ

جناب سودہ بنت زمعہ بن قیس بن عبد الشمس بن عبد ود، قریش دے قبیلے عامر بن لوئی وچوں سن۔ آپ دی ماں داناں الشمس بنت قیس بن زید بن عمرو سی تے اوہ خاندان بنو نجار وچوں سن۔ آپ دوسری سوانی سن جہاں نال رسول خداؐ نے نکاح فرمایا۔

جناب سودہ مکے دے مشہور سردار سہیل بن عمرو دے بھرا سکران بن عمرو دے نکاح وچ سن۔ اعلان نبوت توں کچھ چراں بعد دوواں نے اسلام قبول کر لیا۔ حبشہ دی دُجی ہجرت ویلے قریش دے ستائے ہوئے ایس جوڑے نے دی حبشہ ول ہجرت کر لئی۔ کئی ورہیاں دا پردیس کٹن توں بعد مکے واپس پرتے تے جناب سکران دی وگڑی ہوئی طبیعت بس وگڑ دی ای گئی۔ کچھ ای دناں بعد سکران فوت ہو گئے تے سودہ بیوہ ہو گئیاں۔

جدوں عدت دے دن پورے ہو گئے تے رسول خداؐ نے حضرت سودہ ول نکاح داسنہیا گھلیا۔ اوہناں نے رسول اللہ دی زوجیت وچ آؤنا پسند کیتا پر آکھیا کہ میرے والد زمعہ نال وی گل بات کر لوؤ۔ ایوں زمعہ جی نال معاملہ کرن توں بعد شوال ۱۰ نبوی وچ ایہ نکاح توڑ چڑھیا۔ جناب سودہ نال نکاح دا اک مقصد اسلام دے سرفروشاں دی دل جوئی وی سی کہ جے مسلماناں وچوں کوئی اللہ دی راہ تے شہید ہو جاوے تے اوس نوں اپنے کچھلیاں ولوں ایہ ڈر نہیں ہونا چاہیدا کہ اوہ فاقیاں نال مرجان گے۔

ابن سعد لکھدے نیں کہ جس زمانے وچ سودہ اپنے پہلے گھر والے حضرت سکران دے نکاح وچ سن، اوہناں نے خواب ویکھیا کہ رسول اللہ تشریف لیائے نیں تے اوہناں نے اپنے پیر مبارک جناب سودہ دی گردن تے رکھ دتے نیں۔ سودہ نے ایہ خواب اپنے شوہر نال بیان کیتا تے اوہناں نے آکھیا کہ سودہ! جے تسیں سچ مچ ایہ خواب ویکھیا اے تے بخدا میں مرجاواں گا تے رسول اللہ تہاڈے نال نکاح کرن گے۔ سودہ آکھیاں نیں کہ اک ہور خواب موجب میں تیکے دے سہارے لیٹی ہوئی ساں تے اچن چیت آسمان توں چن میری جھولی وچ آڈگا۔ میں ایہ خواب وی جناب سکران نوں سناتا۔ خواب سن کے سکران نے آکھیا کہ ہن میں چھیتی ای مرجاواں گا تے تسیں عرب دے چن محمد رسول اللہ a دے نکاح وچ چلے جاؤ گے۔ فیر ایوں ای ہوئی تے ایس خواب دی تعبیر تھوڑے ای چر بعد پوری ہو گئی۔

حضرت سودہ اُچے قد کاٹھ تے تیز طبیعت دی سوانی سن۔ پاکیزہ اخلاق تے سخاوت آپ دی پہچان سن۔ کدے کدار اپنے عظیم خاوند نال چھیڑ چھاڑ وی کر لیندے سن۔ اک راتیں رسول خداؐ نال نماز پڑھی تے حضورؐ چوکی دیر تیکر رکوع وچ

۴۹: نساء، قول الرسول، صفحہ:

۴۰۰: حیات محمدؐ از محمد حسین بیگل، صفحہ:

رے۔ سویر ہوئی تے آکھن لگے کہ ”یا رسول اللہ! راتیں نماز وچ تسیں ایڈا لما رکوع کیتا کہ مینوں شباہون لگ پیاسی کہ کدرے نکسیر ای نہ پھٹ پوے، ایس لئی میں بڑی دیر تیکر اپنا نک پھڑی رکھیا“ حضورؐ اوہناں دی گل سن کے تہسم فرماؤندے رے۔

جناب سودہ اپنے اخلاق وچ بڑے نگھے تے سخاوت وچ اگے ہوندے سن۔ اک داری حضرت عمر بن خطاب نے اک تھیلی وچ کچھ درہم گھلے۔ سیدہ سودہ نے پچھیا کہ ایہہ کیا ہے؟ جواب ملیا کہ درہم نیں، عمر نے بھیجے نیں۔ ”مینوں تے کھجوراں لگیاں سن“ ایہ کہہ کے اوسے ویلے سارے ونڈ دتے۔ حضرت عائشہؓ فرماندیاں نیں کہ میں کسے سوانی نوں حسد توں خالی نہیں دیکھیا، سوائے سودہ توں۔ تے سودہ توں وکھ کسے عورت نوں وکھ کے کدے مینوں ایہ خیال نہیں آیا کہ اوس دے قالب وچ میری روح ہوندی۔

سیدہ سودہ کچھ وڈھیری عمر دے سن تے جناب عائشہؓ کی عمر دے۔ سیدہ سودہ دی قربانی دی اجہی مثال کدرے ہو نہیں ملنی کہ آپؐ نے، جناب رسول خداؐ دی اپنے گھر آؤن دی داری، صرف ایس لئی جناب عائشہؓ نوں بخش دتی کہ شوہر دی رغبت اوہد کچھ زیادہ جانی۔ جتہ الوداع دے موقع تے رسول خداؐ نے ازواج مطہرات نوں مخاطب کر کے فرمایا سی کہ ”ایس جج توں بعد اپنے گھراں وچ رہنا۔“ آپؐ دے وصال مبارک توں بعد حضرت سودہ (تے حضرت زینب بنت جحش) نے ایس حکم تے سختی نال عمل کیتا، جد کہ باقی ازواج دے خیال موجب سرکار دا ایہ حکم جج تے لاگو نہیں ہوندا سی۔ حضرت سودہ فرمایا کر دیاں سن کہ ”میں جج تے عمرہ دوویں کر چکی ہاں، ہن رسول خداؐ دے حکم موجب گھروں باہر نہیں نکلاں گی۔“

حضرت سودہ تے حضرات سکران دے اک بیٹے عبدالرحمان مشہور مجاہد سن جیہڑے سیدنا عمر فاروق دے عہد وچ اک جنگ وچ لڑ دے ہوئے شہید ہوئے۔ سیدہ سودہ نے وی ۲۲ھ وچ عہد فاروقی وچ ای چلانا کیتا۔

اُم المؤمنین حضرت عائشہ صدیقہ

معلمۃ الرجال صدیقہ بنت صدیق، ابوبکر عبداللہ بن ابوقحافہ عثمان بن عامر عالم اسلام دی عظیم الشان عالمہ تے رسول خدا دی تچی زوجہ مطہرہ سن۔ آپ دی والدہ دانام اُم رومان بنت عامر بن مویر بن عبدالشمس سی۔ عرب دی لوکائی اپنے آپ نوں کنیت نال سداننا پسند کردی سی۔ جناب عائشہ دی کوئی اولاد نہیں سی، ایس لئی آپ دی کوئی کنیت وی نہیں سی۔ اک دن جناب عائشہ نے رسول خدا اگے عرض کیتی کہ عرب دیاں عورتاں تے اپنی اپنی کنیت نال مشہور نیں، آپ میری کنیت وی تجویز فرمادیو۔ آپ نے ارشاد فرمایا کہ عائشہ! تسیں اپنی کنیت اپنے بھانجے عبداللہ دی نسبت نال اُم عبداللہ رکھ لوؤ۔ ایوں حضرت عائشہ صدیقہ نوں اُم عبداللہ وی آکھیا جان لگ پیا۔

جناب عائشہ صدیقہ بعثت توں چاریاں بیچ ورھے پہلوں پیدا ہوئیاں سن۔ اننبوی وچ، حضرت خدیجہ دی وفات توں کچھ چر بعد، جدوں صدیقہ دی عمر کوئی ۱۶/۱۵ ورھے سی، رسول خدا نے اوہناں نال نکاح فرمایا پر مکے دے حالات تے کچھ وجہاں گلاں رخصتی دے رستے وچ رکاوٹ بنیاں رہیاں۔ ہجرت توں کچھ چراں بعد جدوں مسجد نبوی اساری جا چکی سی، بیشاق مدینہ تے دستخط ہو چکے سن تے مدینہ دے حالات کافی نارمل ہو چکے سن، جناب عائشہ صدیقہ دی رخصتی ہوئی۔ اوہدوں جناب صدیقہ دی عمر ۱۹ ورھے سی آپ واحد کواری عورت سن جہناں نال رسول رحمت نے نکاح فرمایا۔ حضرت عائشہ دی حیاتی وچ واقعہ تحریم (رسول خدا دا اپنے اُتے شہدنوں حرام کر لینا) تے واقعہ افک چوکی اہمیت رکھدے نیں، جہناں دی تفصیل کچھ گزر چکی اے۔

رسول خدا نوں جناب عائشہ نال بہت زیادہ محبت سی۔ آپ دُعا فرماندے ہندے سن کہ اے اللہ! ایس گل تے میری باز پرس نہ کرنا کہ میں اپنے دل وچ عائشہ دی محبت نوں کچھ چوکی ای تھاں دتی ہوئی اے، کیوں جے ایہ میرے وس وچ نہیں۔ سیدہ صدیقہ دی عظمت دا ایس گل توں وی پتہ لگدا اے کہ مسلمان اپنے آقا نوں خفے تحائف اُس دن پیش کردے سن جس دن جناب عائشہ دی واری ہوندی سی۔ ایہ گل کچھ ازواج مطہرات نوں ناگوار گزر دی سی۔ اوہناں نے سیدہ اُم سلمہ نوں اگے لایا تاں جے اوہ حضور نوں ایس گل دا الہامہ دین۔ حضرت اُم سلمہ نے جدوں حضور اگے ایہ مسئلہ رکھیا تے آپ نے فرمایا کہ تسیں عائشہ ولوں کوئی ایہو جی گل نہ کرو کیوں جے سوائے عائشہ دے لیف (بستر) دے کسے دُجی بیوی دے لیف تے میرے تے وحی نازل نہیں ہوندی۔ سیدہ اُم سلمہ نے استغفار کیتی تے واپس پرت آئیاں۔ فیر ازواج مطہرات نے حضور دی لاڈلی دھی سیدہ فاطمہ الزہرا نوں گھلایا۔ حضور نے سیدہ فاطمہ نوں فرمایا کہ اے صاحبزادی! کیہ تہانوں اوہ گل پسند نہیں جیہڑی میں پسند کردا ہاں۔ سیدہ نے جواب دتا کہ بلکل اوہی گل پسند اے۔ حضور نے فرمایا ”تے فیر عائشہ نال محبت کرو۔“

تفصیل لئی کچھ عنوان دیکھو ”اُم المؤمنین حضرت عائشہ صدیقہ دی عمر“

اوہناں توں بعد اُم المؤمنین سیدہ زینب حاضر ہوئیاں۔ اوہناں نے اپنا غصہ سیدہ عائشہ تے کڈیا پر سیدہ عائشہ نے حضورؐ دی اجازت توں بغیر کچھ آکھنا چنگا نہ جانا۔ اخیر اوہناں نے محسوس کیتا کہ حضورؐ میرے جواب نال ناراض نہیں ہون گے تے اوہناں سیدہ زینب نال بحث مباحثے توں بعد اوہناں نوں چپ کرادتا۔ پر حضورؐ دی قلبی رغبت وچ کوئی کمی نہ آئی۔

اخیری بیماری دے دن وچ حضورؐ کچھ دن تے واری واری ازواج مطہرات ول جاندے رے پر فیر جناب عائشہ ول ای پکا ٹھکانہ کر لیا۔ اوہناں دے گھر نوں ای ایہ شرف حاصل ہو گیا کہ اوہ تھے روضہ رسول موجود اے جسدی زیارت قیامت تیکر انساناں دے دلاں نوں چین تے سرور بخشدی روے گی۔

سیدہ عائشہ بوہت سخی، غریب پرور تے مہمان نواز سوانی سن۔ اک واری حضرت عبداللہ بن زبیر نے آپؐ نوں اک لکھ درہم دا تحفہ دتا۔ سیدہ نے اوسے ویلے ساری رقم غریباں مسکیناں نوں ونڈ دتی۔ ایہ توں تیکر کہ افطاری لئی وی کچھ نہ رکھیا۔ حضرت عروہ بن زبیر فرماندے نیں کہ اک واری سیدہ کول کدھروں ستر ہزار درہم دی رقم آئی۔ اوہناں نے حضرت عروہ دے سامنے ای اوسے پیریں کھلویتیاں ساری رقم راہ خدا وچ دتی تے پلا جھاڑ کے دکھا دتا۔

امام مالک نے اک روایت کہتی اے کہ اک دن سیدہ عائشہ نے روزہ رکھیا ہو یا سی تے گھر وچ روٹی وی اک ای سی۔ افطاری توں کچھ چیر پہلاں اک سائلہ نے کچھ کھان نوں منگیا۔ سیدہ نے لونڈی نوں حکم دتا کہ ایہ روٹی سائلہ نوں دے دے۔ لونڈی نے پچھیا کہ روزہ کاہدے نال کھولو گے؟ سیدہ نے جواب دتا کہ ”ایہ اوس نوں دے نا، جدوں روزہ کھلن دا ویلا ہووے گا، فیر ویکھی جاوے گی۔“ شام ہوئی تے کسے نے بکری دا گوشت ہدیہ بھیج دتا۔ گوشت ویکھ کے لونڈی نوں فرمایا کہ ویکھیا ای، اللہ نے اوس توں بہتر کھانا بھیج دتا اے۔

حضرت عبداللہ بن زبیر سیدہ عائشہ دے بھانجے تے منہ بولے پترن۔ جویں کچھ ذکر ہو یا اے اوہ خالہ دی چوکی خدمت کر دے ہوندے سن۔ پر اوہ جووی تحفہ نذرانہ پیش کر دے، جناب عائشہ اللہ دے رستے وچ ونڈ دیندے سن۔ اک واری ابن زبیر نے خیال کیتا کہ ہن خالہ جی نوں ڈکنا چاہیدا اے تاں جے کچھ نہ کچھ اوہناں کول اپنے جوگا دی بچ رہوے۔ جناب عائشہ نوں ایس گل دا پتا لگا تے آپؐ بوہت ناراض ہوئیاں تے جناب عبداللہ نال بول چال وی بند کر دتی۔ عبداللہ نے چوکی منت سماجت کر کے تے سفارشاں پوا کے خالہ نوں راضی کیتا۔

جناب عائشہ نوں نہ صرف سخاوت وچ کمال حاصل سی سگوں درگزر تے معاف کرن وچ وی اوہناں دا جواب نہیں سی۔ آپؐ نے حضرت حسان بن ثابت، جیہڑے کہ واقعہ اُفک وچ الزام لان والیاں وچ شامل سن، نوں ایس وجہ توں معاف کر دتا کہ اوہ رسول خدا ولوں مشرک شاعران نوں جواب دیندے ہوندے سن۔ معاویہ بن خدیج حضرت عائشہ دے بھرا جناب محمد بن ابوبکر دا قاتل سی۔ جدوں سیدہ نوں پتا لگا کہ جہاد دے میدان وچ معاویہ داسلوک اپنے سنگی ساتھیاں نال چوکھا سلاہن جوگ ہوندا اے تے آپؐ نے اوس نوں معاف کر دتا۔ سیدہ نے فرمایا کہ اوہ کسے مہربان تے چنگیاں صفتاں والے بندے نال ایس گل توں ناراض نہیں رہ سکدی کہ اوہ میرے بھرا دا قاتل اے، کیوں جے میں رسول خداؐ نوں ایہ دُعا منگدیاں ویکھیا اے کہ ”اے اللہ! جیہڑا میری اُمت نال چنگا سلوک کرے تئیں وی اوس نال چنگا سلوک کرو تے جیہڑا ایس

نال تختی کرے تے تُو وی اوہدے تے تختی کر۔“

سیدہ دے دل وچ ہر ویلے خدا دا خوف بھریا رہندا سی۔ جدوں کوئی اچھی گل یاد آ جاندی جہدے توں خدا دی نراضی دا پتا لگداتے بے اختیار روں لگ پیندے۔ اک واری فرمایا کہ کدے وی ایوں نہیں ہوئیا کہ میں رجھ کے روٹی کھا دی ہووے پر میں روٹی نہ ہوواں۔ سیدہ دے اک شاگرد نے پچھیا کہ اُم المؤمنین! ایس دی کیہ وجہ اے؟ ارشاد فرمایا ”میںوں رسول خداؐ دی اوہ حالت یاد آ جاندی اے جدوں آپؐ نے دنیا نوں چھڈیا۔ خدا دی قسم اے آپؐ نے کدے وی دن وچ دوواری رجھ کے روٹی تے گوشت نہیں کھا داسی۔“

آپؐ نوں عبادت دا ایسا شوق ہندا سی کہ ساری عمر تہجد تے چاشت دا ناغہ نہیں ہون دتا۔ اکثر روزے دی حالت وچ رہندیاں سن۔ شاید ای کوئی اچھا سال گزریا ہووے جدوں سیدہ عائشہؓ نے حج نہ کیتا ہووے۔ آپؐ دا خیال سی کہ رسول خداؐ دا ایہ فرمان کہ ہن اپنے گھراں توں باہر نہ نکلنا، حج دے سفر تے لاگو نہیں ہوندا۔

سیدہ عائشہؓ اکثر لال رنگ دا کرتہ تے کالی چادر لیندیاں سن۔ زعفرانی رنگ دا لباس وی اوہناں نوں پسند سی۔ آپؐ کول اک بوہت قیمتی تے سوہنا جیہا کرتہ وی سی جیہہ الوکی ووثیاں لئی منگ کے لے جاندے سن۔ لباس وچ شریعت دے حکماں دا ایڈا خیال سی کہ اک واری اپنی بھتیجی حفصہ بنت عبد الرحمان دے سرتوں دوپٹہ کھچ کے پھاڑ دتا تے فرمایا کہ کیہ تینوں پتا نہیں کہ سورہ نور وچ اللہؐ نے کیہ حکم دتا اے۔ فیر اک موٹی چادر حفصہؓ نوں دتی تے فرمایا کہ ایوں دی چادر دی بکل ماریا کر۔

آپؐ وچ ہر اوہ صفت گٹ گٹ کے بھری گئی سی جہدے تے اوس دور دے عرب فخر کردے سن۔ آپؐ دی بہادری دا ایس گل توں اندازا ہوندا اے کہ جنگ دا میدان آپؐ نوں بہت عزیز سی۔ جنگ اُحد وچ آپؐ نے جویں مجاہداں دا ساتھ دتا اوہ اسلام دی حربی توارخ دا اک زبردست باب اے۔

اسلام دی ایس عظیم الشان عالمہ تے معلمہ نے قرآنی آیتاں دی ہمیشہ ایوں تفسیر تے تشریح کیتی کہ سنن والے حیران رہ جاندے سن۔ حضرت عائشہؓ کولوں ۲۲۱۰ حدیثاں روایت کیتیاں گئیاں نیں۔ ایس لحاظ نال سوانیاں وچ آپؐ دا درجہ سب توں اُچا اے۔ ادویں وی حدیث دی روایت وچ آپؐ دا نام تہجے نمبر تے آؤندا اے۔

سیدہ عائشہؓ تے سیدنا علی المرتضیٰؓ دے وچکار اک جنگ وی ہوئی جتوں جنگ جمل آکھدے نیں۔ آپؐ نوں جدوں وی اوہ جنگ یاد آؤندی، آپؐ روں لگ پیندے سن تے آکھدے ہوندے سن کہ کاش میں اوس دن لئی زندہ نہ رہندی۔

سیدنا عمر فاروقؓ نے اپنے مرض الموت وچ اپنے پتر حضرت عبداللہ بن عمرؓ نوں سیدہ عائشہؓ دی خدمت وچ بھیجا تے آکھیا کہ اوہناں نوں رسول خداؐ دے پہلو وچ دفن ہون دی اجازت دتی جاوے۔ حضرت عائشہؓ نے جواب دتا کہ ایہ تھاں تے میں اپنی قبر لئی رکھی ہوئی سی پر عمر لئی میں آج دست بردار ہوندی ہاں۔ ایسے ایثار دے نتیجے تے آج فاروق اعظمؓ حضرت عائشہؓ دے گھر وچ تے اپنے آقا دے پہلو وچ استراحت فرما رہے نیں۔

۱۷ رمضان المبارک ۵۸ھ (۱۳ جون ۶۷۸ء) نوں عالم اسلام دی ایہ عظیم محسنہ چلانا کر گئی۔ نماز جنازہ حضرت ابو ہریرہؓ نے پڑھائی۔ آپؐ نوں آپؐ دی وصیت دے مطابق جنت البقیع وچ دفن کیتا گیا۔

اُم المؤمنین حضرت حفصہ بنت عمر

سیدہ حفصہ بنت عمر بن خطاب بن نفیل بن عبد العزیٰ بن رباح بن عبد اللہ بن قرط بن زراح بن عدی بن کعب بن لوی، چوتھی اُم المؤمنین تھیں۔ آپ دی والدہ داناں زینب بنت مظعون سی جیہڑی اُچی شان والی صحابیہ سن۔ صحابہ کرام وچوں اک وڈا ناں حضرت عثمان بن مظعون دا اے، اوہ حضرت حفصہ دے ماما جی تے اسلام دے عظیم الشان عالم جناب عبد اللہ بن عمر آپ دے سکے بھرا سن۔

سیدہ حفصہ بعثت توں کئی ورھے پہلاں پیدا ہوئیاں۔ جناب عمر بن خطاب مسلمان ہوئے تے اوہناں دا سارا خاندان وی مسلمان ہو گیا۔ اوہناں وچ حفصہ وی شامل سن۔ ایوں سیدہ حفصہ دا ذکر اسلام دے مڈھلے دور دیاں سوانیاں وچ کیتا جاندا اے۔ آپ دا پہلا نکاح نوجوان جلیل القدر صحابی حضرت حنیس بن حذافہ بن قیس سہمی قرشی نال ہوئیا جیہڑے صاحب البحر تین وی سن۔ یعنی اوہناں نے پہلے عارضی دارالہجرت حبشہ ول وی ہجرت کیتی تے دُجے تے اصل دارالہجرت مدینہ منورہ ول وی ہجرت کیتی۔ حضرت حنیس اک شیر دل مجاہد سن۔ جنگ بدر وچ پورے جذبے تے جوش نال کافراں نال جنگ کیتی۔ اُحد وچ وی اپنی شجاعت تے بہادری دے جوہر دکھائے پر جدوں کجھ چراں لئی جنگ دا پاسا پلٹیا تے نوجوان حنیس نوں چوکھے پھٹ لگے۔ آپ ایڈے پھڑ ہو گئے سن پئی اپنے پیراں تے ٹر کے مدینہ وی نہ پرت سکے۔ آپ نوں چک کے مدینہ لیاؤندا گیا، بڑا علاج معالجہ کیتا تے زخماں نوں ٹھیک کرن لئی ہر جتن کیتا گیا پر رب نے حنیس دی قسمت وچ شہادت دی موت لکھی سی تے حنیس نوں اوہ دولت مل گئی۔ ایوں رسول خدا دا اک جان نثار سپاہی، سیدنا عمر بن خطاب دا جوا تر اتے سیدہ حفصہ بنت عمر دا گھر والا چلانا کر گیا۔

حضرت عمر بن خطاب نوں بیوہ دھی دے غم نے پریشان کیتا ہوئیا سی۔ ایوں عدت دے دن پورے ہون دیاں سارا ی حضرت عمر نے جناب ابو بکر صدیق نوں حفصہ نال نکاح کرن دی پیش کش کیتی۔ اوہناں نے معذرت کیتی تے جناب عمر نے حضرت عثمان اگے ذکر کیتا کیوں جے اوہناں دی گھر والی سیدہ رقیہ بنت رسول فوت ہو چکے سن تے اوہناں دے گھر وچ ہن کوئی سوانی نہیں سی۔ جناب عثمان نے آکھیا کہ اوہ اے کوئی نکاح نہیں کرنا چاہندے۔ حضرت عمر نوں ایہ گل کھا گئی کہ اوہ تے اوہناں دوواں نوں سب توں پیارے بھن بھندے سن پر اوہناں نے کیہ کیتی۔ جناب عمر چوکھے پریشان ہوئے کیوں جے اوہناں دے علم اندر اوہدوں تیکر ایہ گل نہیں سی کہ رسول خدا حفصہ نوں اپنے حرم وچ لیاؤن دا اشارہ دے چکے سن۔

جناب عمر بن خطاب نے جدوں اپنے دوواں بھناں دی شکایت دربار رسالت وچ کیتی تے رسول خدا نے ایہ کہہ کے جناب عمر فاروق دے اتھر و پونجے کہ ”عمر! جے حفصہ نوں عثمان توں بہتر خاوند مل جائے تے عثمان نوں حفصہ توں بہتر بیوی، تے کیسا رہوے؟“ عمر فاروق سمجھ تے گئے ہون گے کہ مدینہ وچ اوس عثمان توں بہتر کہیڑا بندہ ہو سکدا اے، جس نوں

رسول خدا دا جوانی بن دا شرف حاصل ہو یا پر چتا لگی رہی۔ فیہ رسول خدا نے جناب حفصہ نوں اپنے نکاح وچ لے کے تے اپنی دھی سیدہ اُم کلثوم دا نکاح جناب عثمان نال کر کے ایہ گل سچ کر دکھائی۔

عرب دیاں بوہت ساریاں سوانیاں وانگ جناب حفصہ دے مزاج وچ وی کجھ تیزی سی۔ اُتوں دھی وی جناب عمر فاروق دی ہووے تے طبیعت وچ سختی دا ہونا کجھ اچھے دی گل نہیں۔ ایسے وجہ توں کدے کدے اپنے سرتاج نال وی غصے راضی ہو لیندے سن۔ اک واری ایس گل دی خبر جناب زینب بنت مظعون، والدہ سیدہ حفصہ، نے حضرت عمر نوں کر دتی۔ جناب عمر ایہ گل سن کے سخت غصے وچ آئے، اوہ ویلے پرنا موہڈے تے سٹیا تے جناب حفصہ دے گھر پڑ گئے۔

”میں سنیا اے کہ توں رسول خدا نوں اگوں برابر دے جواب دینی ایں۔ کیہ ایہ گل ٹھیک اے؟“ جناب عمر فاروق نے جان دیاں ای سوال کیتا۔

”آہو کدے ایوں وی ہوا ای جاندا اے“ جناب حفصہ نے جواب دتا۔

”تے دیکھ حفصہ فیہ میں تینوں اللہ دے عذاب تے رسول اللہ دی ناراضی توں خبردار کر داہاں۔ ایویں کسے دی رلیں وچ اپنی عاقبت نہ خراب کر لوں۔“

فیہ والد دی ہدایت نوں پلے پنھ کے حیاتی دے دن گزارن والی سیدہ حفصہ نوں ایہ اعزاز وی حاصل ہو یا کہ اک واری جبرائیل امین نے حضرت حفصہ دے بارے رسول خدا اگے عرض کیتی کہ ”یا رسول اللہ! ایہ بوہت عبادت گزار تے روزے رکھن والی سوانی نیں۔ ایہ جنت وچ وی تہا ڈی زوجہ نیں۔“

حضرت صفیہ نوں لکھنا پڑھنا نہیں آؤند اسی۔ رسول خدا نے حضرت شفاء بنت عبد اللہ نوں حکم دتا کہ اوہ سیدہ حفصہ نوں لکھنا پڑھنا سکھا دیں۔ بعض روایتاں موجب رسول خدا نے قرآن پاک دے کتابت شدہ اجزاء حضرت حفصہ کول سنبھالے ہوئے سن جیہڑے حضور دے وصال مبارک توں بعد وی اوہناں کول ای رہے۔ آپ دی حیاتی دی اک خاص گل ایہ ہے کہ آپ دجال دے شرتوں بوہت ڈردیاں ہوندیاں سن۔

سیدہ حفصہ نے عہد معاویہ وچ ۴۵ھ دے نیڑے تیڑے چلانا کیتا۔ گورنر مدینہ مروان نے نماز جنازہ پڑھائی تے آپ نوں جنت البقیع وچ دفن کیتا گیا۔ سیدہ دے بھرا حضرت عبد اللہ بن عمر تے بھتیجیاں نے آپ نوں قبر وچ اتاریا۔ آپ توں ۶۰ حدیثاں مروی نیں، جنہاں وچ چار بخاری تے مسلم دوواں وچ موجود نیں تے چھ صحیح مسلم وچ نیں۔ باقی دو جیاں کتاباں وچ لکھ دیاں نیں۔

* * * *

اُم المؤمنین حضرت زینب بنت خزیمہ

اُم المؤمنین حضرت زینب بنت خزیمہ بن حارث بن عبداللہ بن عمرو بن عبدالمناف بن ہلال بن عامر بن صعصعہ دا لقب اُم المساکین سی۔ طبقات ابن سعد وچ اے کہ آپ خزیمہ بن حارث دی صاحبزادی سن تے طفیل بن حارث بن مطلب دے نکاح وچ سن۔ طفیل نے آپ نوں طلاق دے دتی تے آپ دے دیور عبیدہ بن حارث نے آپ نال نکاح کر لیا۔ عبیدہ جنگ بدر وچ شہید ہو گئے تے جناب زینب بیوہ ہو گئیاں ﴿﴾

ابن ہشام لکھدے نیں کہ زینب پہلوں عبیدہ بن حارث دے نکاح وچ سن تے عبیدہ توں پہلاں جہم بن عمرو بن حارث دی بیوی سن جیہڑا آپ دا چاچا زاد سی۔ ﴿﴾

علامہ شبلی نعمانی نے حضرت زینب نوں جنگ اُحد دے شہید عبداللہ بن جحش دی بیوہ قرار دتا اے۔ ﴿﴾

گل جویں وی ہووے ایس تے سب دا اتفاق اے کہ سیدہ زینب اک شہید دی بیوہ سن۔

اک شہید دی بیوہ نوں عزت، وقار تے تحفظ دین دی خاطر رسول رحمتؐ نے سیدہ زینب ول نکاح داسنہیا گھلیا، جیہڑا اوہناں قبول کر لیا۔ ایوں ۳ھ وچ سیدہ زینب رسول خداؐ دے نکاح وچ آ گئیاں۔

اُم المؤمنین جناب زینب بڑی دریا دل سوانی سن۔ فقیراں، مسکیناں تے غریباں دے ٹکڑ پانی دا بڑا خیال رکھدیاں سن۔ اپنی ایسے صفت پاروں رسول خدا دی زوجیت وچ آؤن توں پہلاں ای اُم المساکین دے لقب نال مشہور سن۔ نبی رحمتؐ دے گھر وچ آئیاں اے دوقن مہینے ای ہوئے سن کہ آپ بیمار پے گئیاں تے فیرو سے بیماری نال چلانا کر گئیاں۔

نبی اکرمؐ نے آپوں نماز جنازہ پڑھائی تے اوہناں نوں جنت البقیع وچ دفن فرمایا۔ سیدہ خدیجہ توں بعد سیدہ زینب دی قسمت وچ ایہ اعزاز لکھیا گیا کہ آپ اپنے مہربان خاوند دے دستِ اقدس وچوں رخصت ہو کے آپ دے دستِ اقدس نال ای دفن ہوئیاں۔ چلانا کرن دے ویلے سیدہ زینب دی عمر صرف ۳۰ ورھے سی۔

* * * *

﴿﴾ طبقات ابن سعد جلد ۸، صفحہ: ۱۵۵

﴿﴾ سیرت ابن ہشام جلد ۲ صفحہ: ۴۲۳

﴿﴾ سیرت النبی از شبلی نعمانی جلد ۲ صفحہ: ۲۴۹

اُمّ المؤمنین حضرت اُمّ سلمہ

اُمّ المؤمنین اُمّ سلمہ ہند بنت ابوامیہ بن مغیرہ، مخزومیہ، قرشیہ دی والدہ داناں عاتکہ بنت عامر بن ربیعہ کنانیہ سی۔ آپ عبد اللہ بن عبد الاسد دے نکاح وچ سن جیہڑے ابوسلمہ دے نام نال مشہور سن، اک جلیل القدر صحابی سن تے صاحب الجہر تین وی سن۔

جدوں مکے وچ مشرکاں دے روز و دھے چاندے ظلم پاروں مسلماناں لئی مکہ چھڈنا ضروری ہو گیا تے پاک فطرت اُمّ سلمہ تے ابوسلمہ وی حبشہ ول ہجرت کر گئے پر تھوڑے ای چراں بعد جدوں مکے دے حالات وچ بہتری دی خبر سنی تے مکے واپس پرت آئے۔ مکے آ کے پتہ لگا کہ مشرکاں دے ظلم تے جبر وچ بھورا وی فرق نہیں آیا۔ ایوں ایس کرماں والی جوڑی نے بال بچے نال لے کے اصل دارالہجرت مدینہ ول جان دی تیاری چھوہ دتی۔ مدینہ ول ایہ ہجرت وی دکھاں دی اک لمی کہانی اپنے نال لے کے ٹری۔ اک واری اُمّ سلمہ نے آپوں دسیا کہ ”جدوں ابوسلمہ نے مدینہ جان دا فیصلہ کیتا تے اوہناں کول اک ای اوٹھ سی۔ اوس تے مینوں تے میرے پتر سلمہ نوں سوار کر دتا تے اوٹھ دی نکیل پھڑ کے ٹر پے۔ میرے پیکے خنوادے بنو مغیرہ نے سانوں ویکھ لیا تے ابوسلمہ نوں آکھن لگے کہ اسیں ایس خستہ حالی وچ اپنی دھی نوں سفر وچ نہیں پین دینا۔ اوہناں ابوسلمہ دے ہتھوں نکیل کھوہ لئی تے مینوں اپنے نال لے ٹرے۔ ایسے چر وچ او تھے بنو عبد الاسد وی اپڑ گئے، جہاں نال ابوسلمہ دا تعلق سی۔ اوہناں نے میرے پیکیاں نوں آکھیا کہ بنو مغیرہ دے بند بوا! جے تساں اپنی دھی نوں ساڈے پتر ابوسلمہ نال نہیں جان دینا تے سن لوؤ کہ فیر اسیں وی اپنا بال (سلمہ) تہا دی کڑی کول نہیں رہن دینا۔ ایہ آکھ کے اوہناں نے میرے کولوں سلمہ نوں کھوہ لیا۔ ایس حال وچ وی ابوسلمہ نے ہجرت دے حکم دی تعمیل کیتی تے مدینہ منورہ اپڑ گئے، پر میں تے سلمہ مکے ای رہ گئے۔ ہن اسیں تے وکھو وکھ تھاواں تے ساں۔ ابوسلمہ مدینہ، میں اپنے پیکیاں کول تے سلمہ اپنے دادا کے بنو عبد الاسد کول۔ صدے نال میرا برا حال سی۔ میں روز سویرے گھروں نکلی دی تے اک بے تے بیٹھ کے کلی روندی رہندی۔ ایس حال وچ پورا اک ورہا بیت گیا سی۔“

”اک دن ساڈے اپنے خاندان دے ای اک بندے نے بنو مغیرہ دے باقی بندیاں نوں اکٹھا کر کے آکھیا کہ اسیں اپنی ای دھی تے ظلم پے کر دے ہاں کہ اوس نوں اوہدے خاوند تے پتر توں دور کر چھڈ یا اے، تسیں ایس مسکین نوں چھڈ کیوں نہیں دیندے تاں جے اوہ اپنے گھر والے کول ٹر جائے؟ اوس نے ایہ گل بات ایوں سوہنے ڈھب نال کیتی ہی پیکے والیاں نوں رحم آ گیا تے آکھن لگے کہ اُمّ سلمہ! ساڈے وٹوں تینوں اجازت اے۔ جدوں ایس گل دا بنو مغیرہ نوں پتہ لگا تے اوہ میرے پتر سلمہ نوں لے کے میرے کول آ گئے تے ایوں میں سلمہ نوں چھڑ لے کے مکی کہانی نے مدینہ ول اوٹھ ٹور لیا۔ جدوں میں تعغم دی تھاں تے اپڑی تے او تھے مینوں عثمان بن طلحہ بن ابی طلحہ مل پے۔ اوہناں دے دل وچ دلیل آئی ہی قریش دی سوانی تے

کلم کئی سفر وچ، ایہ تے بڑی گھاٹ دی گل اے۔ اوہناں نے میرا ارادہ معلوم کیتا تے میرے اونٹھ دی ٹکیل پھڑ کے اگے اگے ٹرپے۔ اللہ جان دا اے عثمان بن طلحہ توں چوکھا شریف آدی عرب وچ نہیں لیج سکدا۔ جدوں منزل آؤندی تے سانوں کھلونا پیندا تے اوہ اونٹھ نوں بٹھا کے دریڈے نکل جاندے۔ جدوں ٹرن دا ویلا آؤندا تے سواری تیار کر کے لے آؤندے تے آپ پراں ٹر جاندے۔ جدوں میں سوار ہو جاندی تے مہار پھڑ کے اگے اگے ٹر پیندے۔ مدینے دے نیڑے قبا وچ، بنو عمرو بن عوف دی آبادی وچ اپڑے تے عثمان بن طلحہ نے مینوں دسیا کہ ابوسلمہ ایسے پنڈ وچ وِسوں کیتی بیٹھے نیں۔ میں اللہ دے بھروسے تے اوس پنڈ وچ جاوڑی۔ خدا خدا کر کے ابوسلمہ نال ٹاکرا ہوئی تے اک نوں حیاتی داندھ بچیا۔“

سیدہ اُم سلمہ نے عثمان بن طلحہ دا ذکر ہمیش ای عزت تے احترام نال کیتا۔ جدوں کدرے ہجرت مدینہ دی گل بات چھڑدی تے آپ فرماندیاں سن کہ اہل بیت وچوں کسے نے وی اسلام لئی اوہ مصیبتاں نہیں اٹھایاں ہونیاں جیہڑیاں خاندان ابوسلمہ نے نہ بھیلیاں۔

حضرت ابوسلمہ نوں جنگ اُحد وچ اک ڈونگا پھٹ لگا پر علاج معالجے نال اوہ زخم پوری طرحاں ٹھیک ہو گیا۔ کجھ چراں بعد رسول خداؐ نے حضرت ابوسلمہ نوں اک جہادی دستے دا امیر بنا کے قطن وُل ٹوریا تے اُحد دے زخم فیر ہرے ہو گئے۔ ایسے تکلیف نال ۹ جمادی الثانی ۳ھ نوں ابوسلمہ اپنے خالق نال جا رے۔ رسول خداؐ نے آپوں ابوسلمہ دی نماز جنازہ پڑھائی تے نماز وچ ۹ تکبیراں آکھیاں۔ بعد وچ صحابہ نے پچھیا کہ یا رسول اللہ! کدرے غلطی تے نہیں لگی؟ رسول رحمت نے ارشاد فرمایا کہ نہیں کوئی سہو نہیں ہویا ”ابوسلمہ تے سگوں ہزار تکبیراں دے مستحق سن۔“

جدوں ابوسلمہ فوت ہوئے تے اُم سلمہ حاملہ سن۔ بچے دی پیدائش ہو گئی تے رسول خداؐ نے اُم سلمہ نوں نکاح داسنہیا گھلیا پر اوہناں نے معذرت کر لئی تے آکھیا کہ ایس عمر وچ تے ایس عیال داری وچ ہن نکاح کیہہ کرنا اے! پر فیر اوہناں نے رضا مندی ظاہر کر دتی تے ایوں آپ رسول خداؐ دے نکاح وچ آ گئیاں۔ رسول رحمت نے سیدہ اُم سلمہ دے بالاں دا بڑا خیال رکھیا تے اوہناں دی ہر ضرورت پوری کیتی تے اوہناں نوں باپ بن کے دکھایا۔

روایت اے کہ اک واری اُم سلمہ نے ابوسلمہ نوں آکھیا کہ ”میں ایہ گل سنی اے بنی کسے سوانی دا گھر والا چلانا کر جائے تے اوس توں بعد سوانی کسے دُجے دے نکاح وچ نہ جاوے، تے ہون وی دوویں جنتی، تے اللہ اوہناں نوں جنت وچ فیر اکٹھیاں کر دیوے گا۔ تے آؤ ابوسلمہ جی! اک دُجے نال ایہ کارا کرینے کہ اسیں دُجا نکاح نہیں کراں گے۔“

ایہ سن کے حضرت ابوسلمہ نے پچھیا ”اُم سلمہ! میری اک گل منیں گیں؟“

”آہو۔ تہاڈی نہیں تے فیر کس دی متاں گی؟“

”فیر گل ایہ ہے کہ جے میں تیرے توں پہلاں مر گیا تے فیر توں نکاح ضرور کر لوں۔“

ایہ آکھ کے جناب ابوسلمہ نے دُعا مانگی کہ یا اللہ! میرے پچھوں اُم سلمہ نوں بہتر شوہر عطا فرمانا۔ اُم سلمہ آکھدیاں نیں کہ میں سوچدی ہندی سی کہ مدینے وچ کیہڑا بندہ اے جیہڑا میرے حق وچ ابوسلمہ توں چنگا ہووے گا۔ پر جدوں رسول خداؐ نے میرے نال نکاح فرمالیا تے گل دی سمجھ آ گئی۔

اُم المؤمنین حضرت جویریہ

برہ بنت حارث بن ابی ضرار بن حبیب بن عائد بن مالک، بنی مصطلق دے سردار حارث بن ابی ضرار دی دھی سی جیہڑی مسافع بن صفوان مصطلقی دے نال ویاہی ہوئی سی۔ برہ دے والد حارث بن ابی ضرار بنو مصطلق دے سردار سن۔ حارث نے قریش دے اشارے تے مدینہ منورہ تے حملے دیاں تیاریاں چھوہ دتیاں۔ رسول خداؐ نوں جدوں ایہ خبر ملی تے آپؐ نے جناب بریدہ سلمیٰ نوں جاسوسی لئی گھلیا۔ واپس آ کے جدوں بریدہ نے خبر دی تصدیق کیتی تے نبی اکرمؐ نے لشکر اسلام نوں بنو مصطلق ول کوچ کرن دا حکم دتا۔

مدنی لشکر نے مرسیع دی تھاں تے ڈیرے لا دتے جتھے بنو مصطلق نال ٹاکرا ہوئیا۔ ایس مقابلے وچ برہ دا خاوند مسافع بن صفوان ماریا گیا تے حارث میدان چھڈ کے دوڑ گیا۔ ایس لڑائی وچ کثرت نال لونڈی غلام مسلماناں دے تھہ آئے۔ برہ وی اوہناں قیدیاں وچ شامل سی جیہڑی مال غنیمت دی تقسیم وچ حضرت ثابت بن قیس انصاری دے حصے وچ آئی۔ اسلام وچ جے آقا راضی ہووے تے لونڈی غلام کچھ رقم دے کے آزاد ہو سکدے نیں۔ ایس طریقے نوں فقہ دی اصطلاح وچ مکاتبت آکھدے نیں۔ برہ نے جناب ثابت نال ۹ اوقیہ سونے یاں اوہدے مل تے مکاتبت کر لئی۔ اپنے عہد دی رقم پوری کرن لئی برہ بہت سارے اصحاب نبی کول تے رسول رحمت کول وی گئی کہ آپؐ اوس دی مدد کرن۔ جدوں اوہ حضورؐ کول اپڑی تے آپؐ نے فرمایا کہ برہ! تینوں ایس توں بہتر چیز دی خاہش نہیں؟ برہ نے پچھیا کہ اوہ بہتر چیز کیہ اے؟۔ رسول رحمت نے ارشاد فرمایا کہ میں ثابت دی رقم ادا کر کے تیرے نال نکاح کر لیندا ہاں۔ ایس گل تے برہ وی راضی ہو گئی تے ثابت وی۔

رسول خداؐ نے برہ نال نکاح فرمایا تے اوہناں دا نام جویریہ رکھیا..... اُم المؤمنین سیدہ جویریہؓ۔ ایس نکاح دا چرچا جدوں اسلامی لشکر وچ ہوئیا تے مجاہداں نے بنو مصطلق دے سارے لونڈی غلام ایس پاروں آزاد کر دتے کہ ایہ نبی اکرمؐ دا سرسالی قبیلہ اے۔ آزاد ہون والے قیدیاں دی تعداد ۷۰۰ دے نیڑے دسی جاندی اے۔ بعض روایتاں توں پتہ لگدا اے کہ قیدیاں نوں آزاد کرن دی فرمائش خود حضرت جویریہؓ نے کیتی سی جیہڑی حضورؐ نے من لئی۔ ۷۰۰ قیدیاں دی آزادی توں وکھ حضرت جویریہؓ دے والد، بنو مصطلق دے سردار حارث دا قبول اسلام وی ایسے نکاح دی برکت دا نتیجہ اے۔

سیدہ جویریہؓ وچ اک خوبصورت شخصیت والیاں ساریاں گلاں موجود سن۔ آپؐ نے وی دُجیاں ازواج مطہرات طرحاں بہت ساریاں حدیثاں روایت کیتیاں نیں۔ آپؐ نے ۵۰ ہجری وچ ۶۵ ورھیاں دی عمر وچ وفات پائی تے جنت البقیع وچ دفن ہوئیاں۔ مروان نے آپؐ دی نماز جنازہ پڑھائی۔

اُم المؤمنین حضرت زینب بنت جحش

سیدہ زینب دے والدہ دانا نام جحش بن رباب بن یحمر تے والدہ دانا نام اُمیمہ بنت عبدالمطلب اے۔ آپ رسول خدا دی سکتی پھیں دی دھی سن۔ نبوت دے مڈھلے دناں وچ ای مسلمان ہو گئیاں سن۔ رسول خدا نے جناب زینب دا نکاح اپنے آزاد کیتے غلام تے منہ بولے پتر زید بن حارثہ نال کر دتا۔ اسلام نے دنیا نوں آدم دی اولاد وچ برابری دا جیہڑا درس دتا اے اے اے محمود تے ایاز نوں اک صف وچ کھلا ہر دتا اے، تواریخ وچ ایس دیاں ہزاراں مثالیں لکھدیاں نیں پر سیدہ زینب تے زید دا نکاح ساریاں مثالیں توں وکھرا سد اے۔ ایس توں ای عملی تعلیم دا مڈھ بچا۔ قریش تے خاص طور تے خاندان ہاشم نوں کعبہ دی سانجھ پاروں عرب وچ جیہڑا درجہ ملدا سی، اوس لحاظ نال یمن دے بادشاہ وی اوہناں دی برابری دا دعویٰ نہیں سن کر سکدے۔ پر اسلام نے صرف تقویٰ تے بزرگی نوں معیار بنایا تے ایس توں وکھ کسے وی گل نوں یاں گھمنڈ نوں نرا جاہلیت دے سانویں رکھیا۔ زید بھانویں آزاد کیتے غلام سن پر کچے پیڑے مسلمان تے نیک مرد سن۔ ایس لئی آنحضرتؐ نوں اوہناں نال حضرت زینب دا عقد کرن وچ کوئی گھاٹ نظر نہ آئی۔ رسول خداؐ نے جدوں اپنے ارادے دا ذکر جناب زینب نال کیتا تے اوہناں نے عرض کیتی لَا اَرْضَاهُ لِنَفْسِي (میں اوہناں نوں اپنے لئی پسند تے نہیں کردی) ایس جواب تے اللہ دالہ حکم نازل ہو گیا۔

﴿وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَى اللَّهُ وَرَسُولُهُ أَمْرًا أَنْ يَكُونَ لَهُمُ الْخِيَرَةُ مِنْ

أَمْرِهِمْ وَمَنْ يَعْصِ اللَّهَ وَرَسُولَهُ فَقَدْ ضَلَّ ضَلَالًا مُّبِينًا﴾ (احزاب: ۳۶)

”کسے مؤمن مرد یاں عورت لئی ایہ مناسب نہیں کہ جدوں اللہ اور اس دا رسول کوئی حکم دین تے فیراوہ اوہدے وچ کوئی اپنا اختیار ورتن۔ تے جیہڑا اللہ تے اوس دے رسول دے حکم ول کنڈ کرے گا فیراوہ کھلم کھلا گمراہی وچ اے۔“

ایوں نکاح ہون نوں تے ہو گیا پر جناب زینب دی طبیعت نے کدے وی جناب زید نال محبت تے پیار نال رہن دی اجازت نہ دتی۔ گھر دے حالات وگڑ دے گئے تے اخیر زید ہوراں اپنی سوانی نوں طلاق دے دتی، جس توں بعد سیدہ زینب رسول رحمت دی زوجیت وچ آ گئیاں۔ آپ بوہت محنتی، سخی، ہمدرد تے غریباں مسکیناں دی سرپرستی کرن والی سوانی سن۔ اپنے ہتھ نال چھڑا پکانا تے رنگنا، تے فیراوس محنت مزدوری دی ساری آمدن اللہ دی راہ تے ونڈ دینا سیدہ زینب داروز داکم سی۔ سیدہ عائشہ صدیقہ فرماندیاں نیں کہ مدینے وچ زینب توں بہتر تقویٰ، صداقت تے سخاوت والی تے دین نوں سمجھن

سیر الصحابیات، مولانا سعید انصاری، صفحہ: ۶۲

نساء حول الرسول، صفحہ: ۸۷

والی کوئی سوانی ہو نہیں سی۔ اک دُجی تھاں تے اُم المومنین حضرت عائشہ نے فرمایا کہ دینی اعتبار وچ سیدہ زینب توں اگتے کوئی عورت نہیں، اللہ اوہناں تے رحم کرے۔ اوہناں نوں سچ مچ دینا تے بے نظیر رتبہ حاصل ہوئیا۔ اللہ نے اپنے نبی نال اوہناں دا نکاح آپ کیتا تے اوہناں دے سبب نال قرآن پاک دیاں کئی آیتاں نازل ہوئیاں۔

اک واری رسول خداؐ نے اپنی ازواج مطہرات نوں فرمایا سی کہ میرے دنیا توں چلانا کرن توں بعد میرے نال پہلوں اوہ ملے گی جہدے ہتھ ملے ہون گے۔ ایس لئی مومنناں دیاں ماواں اپنے ہتھ ناپدیاں ہوندیاں سن۔ فیر جدوں سیدہ زینب سب توں پہلاں رخصت ہو گئیاں تے سمجھ لگی کہ لمے ہتھ توں مراد چوکھی سخاوت تے فیاضی سی۔

سیدہ زینب نے ۲۰ھ وچ ۵۳ سال دی عمر وچ چلانا کیتا۔ امیر المومنین عمر بن خطاب نے نماز جنازہ پڑھائی۔ آپ نوں جنت البقیع وچ دفن کیتا گیا۔ آپ دی وفات دے دیہاڑے مدینے دیاں گلیاں وچ ایہ گل تھاں تھاں سنی گئی کہ آج مدینے دے مسکیناں دی ماں مر گئی اے۔

اک ضروری ویروا:

سیدہ زینب بنت جحش نال رسول خداؐ دے عقد مبارک نوں عرب تے غرب، دوواں دے جاہلاں نے چوکھی تنقید دی نظر نال دیکھیا اے۔ آج دے مستشرقان نے تے نبی آخری الزمان نال اپنی دشمنی پاروں دلاں دا غبار کڈن وچ کوئی کسر نہیں چھڈی۔ اوہناں دی بے ہودہ سوچ ایہ ہے کہ:

i سیدہ زینب نال آپ دی محبت پاروں آپ دے آزاد کیتے غلام زید نے اپنی بیوی (سیدہ زینب) نوں طلاق دے دتی۔

ii منہ بولے پتر دی بیوی تے نونہہ دے برابر ہوندی اے۔ ایہ کیہ گل ہوئی کہ نبی ہو کے اپنے پتر دی سوانی نال نکاح کر لیا؟

آؤ ذرا ویروا کریئے۔

سچ ایہ ہے یی نہ تے سیدہ زینب نوں طلاق رسول اکرمؐ دی وجہ توں ہوئی تے نہ ای سیدہ زینب دی محبت نبی آخری الزماں a دے دل وچ سی۔ ایس الزام نوں جھوٹ ثابت کرن لئی بس ایہ گل ای ہتھیری اے کہ زینبؓ رسول اللہ دی پھوپھی زاد بھین سن۔ اوہناں دا پورا بچپنا رسول خداؐ دیاں اکھاں دے سامنے گزریا سی۔ اوہ آپ دے سامنے کھینڈ دیاں ملدیاں رہیاں، آپ نال ملدیاں ورتدیاں رہیاں، آپ دے سامنے جوان ہوئیاں تے آپ دی ہی دلچسپی نال سیدہ داویاہ جناب زید نال ہوئیا۔ پردے دار وچ تے پابندی بلکل نہیں سی۔ ایس لئی اوس دور دیاں سوانیاں دیاں ذاتی خوبیاں خامیاں وی لوکاں دے سامنے آجان دیاں سن۔ فیر کسے اعتراض کرن والے دا ایہ آکھنا کہ ”اک دیہاڑے رسول اللہ زید دے گھر گئے۔ زید گھر وچ موجود نہیں سن۔ زینب نے باریک جئے لیڑے پائے ہوئے سن۔ آپ زینب دے حسن و جمال نوں دیکھدے ہوئے سبحان اللہ مقلب القلوب آکھدے ہوئے واپس پرت آئے۔“ ایہ چوکھی بے عقلی دی گل اے۔

سوچن دی گل اے کہ کیہ اوس ویلے رسول اللہ اپنیاں چھ بیویاں نوں بھل گئے سن تے فیر جدوں اپنے ہتھیں زینب دا

تھ زید دے ہتھ وچ دتا تے کیہ اوہدوں آپؐ زینب دے حسن و جمال توں بے خبر سن۔ سیدہ زینب دی حیاتی دا اک اک ورہا، ورہے دا ہر مہینا تے مہینے دا ہر دن رسول خدا دے سامنے گزریا سی۔ اوہدوں تے کدے وی آپؐ نے زینب نال نکاح دی خواہش نہ کیتی تے جدوں اوہناں نوں اپنے ای منہ بولے پتر دی سوانی بنا دتا، اوہدوں اوہناں دی محبت دل وچ جاگ پئی، ایہ گل کسے وی طرحاں من جوگ نہیں۔

ہن سوال ایہ پیدا ہندا اے کہ جے چاہت تے محبت دا ایہ الزام غلط اے، جیہڑا کہ سراسر غلط اے تے فیر ایس نکاح وچ کیہڑا راز لکیا سی۔ جواب لئی رجوع کر دے ہاں اس کتاب ول جہدے وچ کوئی شک نہیں۔ ارشاد ربانی اے:

﴿ فَلَمَّا قَضَىٰ زَيْدٌ مِنْهَا وَطَرًا زَوَّجْنَاهَا لِكَيَّ لَا يَكُونَ عَلَى الْمُؤْمِنِينَ حَرَجٌ فِيَّ زَوَاجِ

أَدْعِيَائِهِمْ إِذَا قَضَوْا مِنْهُنَّ وَطَرًا وَكَانَ أَمْرُ اللَّهِ مَفْعُولًا ۗ ﴾ (الاحزاب: ۳۷)

”فیر جدوں زید نے اوس توں اپنی حاجت پوری کر لئی تے ایسں اوہدا تہاڈے نال نکاح کر دتا تاں جے مومنناں تے اپنے منہ بولے پتراں دیاں بیویاں ولوں کوئی تنگی نہ رہوے، جدوں کہ اوہ اوہناں توں اپنی حاجت پوری کر چکے ہوں۔ تے اللہ دا حکم تے پورا ہو کے ای رہنا سی۔“

ایہ اکھرا یہ گل دسدے نیں کہ اللہ تعالیٰ نے ایہ کم نبی اکرمؐ کولوں اک اجہی لوڑ تے اجہی مصلحت لئی کرایا سی جیہڑی ایسں تدبیر توں وکھ کسے ہووے طرحاں پوری نہیں سی ہو سکدی۔ عرب وچ منہ بولے رشتیاں ولوں جیہڑیاں غلط ملط رسماں بن گئیاں سن، اوہناں نوں توڑن دی کوئی صورت ایسں توں سوانی نہیں سی بنی اللہ دا رسول آپوں اگے ودھ کے اوہناں نوں توڑ دیوے۔ سو گل ایہ ہے کہ ایہ نکاح اللہ تعالیٰ نے نبی دے گھر وچ نری اک سوانی دا وادھا کرن لئی نہیں کیتا سگوں اک وڈھی لوڑ دی خاطر کروایا۔

ابن ابی حاتم وچ اے کہ اللہ تعالیٰ نے پہلوں ای اپنے نبی نوں خبر دے دتی سی کہ زینب تہاڈے نکاح وچ آئے گی۔ ایہی گل سی جس نوں آپؐ نے ظاہر نہ کیتا تے حضرت زید نوں سمجھایا کہ اوہ اپنی سوانی نوں وکھ نہ کرن۔ حضرت عائشہ فرمادیاں نیں کہ حضور جے خدا دی وحی کتاب اللہ وچوں اک آیت وی لکاون والے ہوندے تے ایسں آیت نوں لکا لیندے۔ مطلب ایہ ہے کہ جدوں سمجھان بجھان دے باوجود رشتہ قائم نہ رہ سکیا سگوں طلاق ہو گئی تے اللہ تعالیٰ نے حضرت زینب نوں اپنے نبی دے نکاح وچ دے دتا۔ ایسں لئی ولی دی، ایجاب و قبول دی تے گواہاں دی لوڑ نہ رہی۔ جدوں حضرت زید نبی اکرمؐ داسنہیا لے کے گئے تے بی بی نے فرمایا کہ ٹھہرو میں خدا تعالیٰ نال استخارہ کر لواں۔ سیدہ زینب تے کھلو کے نماز پڑھن لگ پئیاں تے اوہ رسول اللہ تے وحی دا نزول ہو گیا جس وچ اللہ نے خبر دتی کہ اے محبوب! ایسں اوہناں دا نکاح تہاڈے نال کر دتا اے۔ فیر اوسے ویلے رسول خدا سیدہ زینب ول ٹر آئے۔

ابن جریر وچ اے نبی اک واری سیدہ زینب نے رسول اللہ نوں آکھیا کہ میرے وچ اللہ تعالیٰ نے تن گلاں اجہیاں رکھیاں نیں جیہڑیاں ہووے وچ نہیں۔ اک ایہ کہ میرا تے تہاڈا داد اک اے۔ وُجی ایہ کہ اللہ تعالیٰ نے آسمان توں مینوں

تہاڑے نکاح وچ دتاتے تھی ایہ کہ ساڈے درمیان سفیر جبرائیل سن۔

اللہ تعالیٰ فرماندے نیں کہ اسیں اوہناں نال نکاح کرنا جائز کر دتاتاں جے مسلماناں تے اوہناں دے لے پالک پتراں دیاں بیویاں بارے، جدوں اوہناں نوں طلاق دے دتی جاوے، کوئی حرج نہ رہوے۔ یعنی اگر اوہ چاہن تے اوہناں نال نکاح کر لین۔ حضور نے نبوت دے اعلان توں پہلاں حضرت زید نوں اپنا پتر بنایا ہونیاسی۔ لوکاں اوہناں نوں زید بن محمد آکھدی سی۔ قرآن نے اتھے وی ڈک دتاتے حکم دتاکہ اوہناں نوں اصل باپ دی نسبت نال پکاریا کرو ﴿ اصل وچ عرباں دے رسم رواج دے مطابق منہ بولیا پتر بلکل صلبی پتر دا مرتبہ تے حق حقوق حاصل کر لیندا سی، حتیٰ کہ رہن سہن، وراثت تے قرابت داری دے تعلقات وچ اوہ سکے پتر دی حیثیت اختیار کر لیندا سی۔ رسول اللہ حضرت زینب نال نکاح نہیں کرنا چاہندے سن کیوں جے کافراں موجب ایہ گل اپنے پتر دی بیوی نال نکاح کرن دے برابر سی۔ پر اللہ نے ایس نکاح نال جاہلیت دے سارے وہاں دی جڑ وڈ دتی تے قرآن دی ایہ آیت نازل فرمائی:

﴿مَا كَانَ مُحَمَّدٌ أَبَا أَحَدٍ مِّن رِّجَالِكُمْ وَلَكِن رَّسُولَ اللَّهِ وَخَاتَمَ النَّبِيِّينَ وَكَانَ اللَّهُ بِكُلِّ شَيْءٍ عَلِيمًا﴾ (الاحزاب: ۴۰)

”محمد تہاڑے مرداں وچوں کسے دے باپ نہیں سگوں اللہ دے رسول تے اخیر نبی نیں تے اللہ نوں ہر گل دا علم ہوندا اے۔“

ہن جدوں ایہ ثابت ہو گیا کہ ایہ قرآنی تے آسمانی نکاح سی، تے ایہ وی کہ حضرت زینب نوں ویکھ کے اوہناں دی اُلفت تے محبت نوں دل وچ تھان دین والی گل کسے طرحاں درست نہیں تے ایہ سوال ذہن وچ آؤندا اے کہ فیراہیں نکاح نوں عشقیہ رنگ دین دا سامان مستشرقین تے کجھ ناں دے مسلماناں دے تھ کتھوں لگا؟ تے جواب ایہ ہے کہ ایہ من گھڑت داستان لکھن لئی تے ساری دروغ گوئی لئی اوہناں سیاہی ساڈے کولوں ای ادھار منگی اے تے ایس دی بنیاد یہ روایت ہے:

”باخبار محمد بن عمر، بحديث عبد الله بن عامر اسلمی از محمد بن یحییٰ بن حبان: نبی اکرم زید نوں لہدے ہوئے اوہناں دے گھر تشریف لیائے۔ زید نوں لوکاں زید بن محمد آکھدی سی۔ جدوں کدرے رسول اللہ زید نوں نہ ویکھدے تے فرماندے کہ زید کتھے وے؟ ایس واری زید نوں ملن لئی اوس دے گھر آؤندے نیں پر گھروں ٹا کرانہ ہونیا۔ زینب اپنے کم کار والے لیڈیاں وچ آپ ول ودھیاں۔ آپ a اوہناں توں منہ پھیر لیندے نیں۔ زینب آکھدیاں نیں، یا رسول اللہ! زید تے گھر نہیں پر تیں تشریف رکھو۔ رسول خدا اندر آؤن توں انکار کر دیندے نیں۔ فیراہیں زینب نوں دسیا گیا نبی رسول اللہ دروازے تے ای کھلوتے نیں تے اوہناں نے چھیتی نال کپڑے بدن دا ارادہ کیتا۔ فیرتیزی نال آئیاں تے رسول اللہ نوں چنگیاں لنگیاں۔ آپ a نے چہرہ مبارک دُجے پاسے کر لیا تے ہولی جی کوئی کلمہ آکھیا جیہڑا آسانی نال سمجھ وچ نہیں آؤندا سی۔ آپ آکھ رے سن۔ سبحان اللہ العظیم۔ سبحان مصرف القلوب۔ تھوڑے چیر پچھوں زید گھر آئے تے

نہیب نے دسیا ہی رسول اللہ تشریف لیائے سن۔ زید نے آکھیا کہ تسیں آپ a نوں اندر کیوں نہ بلایا؟
 نہیب فرماؤندیاں نیں ہی میں تے بلایا سی پر آپ نے انکار کر دتا سی۔ زید بولے کہ تسیں آپ a دی
 زبان توں کوئی گل سنی؟ نہیب نے جواب دتا ہی پچھاں پرندیاں آپ a نے کوئی کلمہ تے فرمایا سی پر
 پہلوں تے کجھ سمجھ ای نہ لگی۔ غور کیتا تے سمجھ لگی کہ آپ فرما رہے سن ”سبحان اللہ العظیم۔ سبحان مصرف
 القلوب“ اخیر زید سرکار a دی خدمت وچ اپڑ کے عرض کر دے نیں۔ یا رسول اللہ! مینوں پتہ لگا اے کہ
 آپ میرے گھر تشریف لے گئے سن، آپ اندر کیوں تشریف نہ لے گئے۔ میرے ماں باپ
 آپ a اُتے قربان، شاید نہیب تہانوں چنگی لگی اے۔ جے ایہ گل اے تے میں اوس نوں دکھ کر دیندا
 ہاں۔ رسول اللہ نے فرمایا ہی اپنی سوانی نوں اپنے توں جدا نہ کرتے اوہ دے نال ای رو۔ پرائس واقعہ توں
 بعد زید کدے نہیب ول نہ ودھے۔

ایہ فقیر جتھے ایہ عرض کردا اے کہ میں ایہ روایت کنبدے قلم نال، تے دل اُتے جبر کر کے نقل کیتی اے، او تھے میں ایہ
 وی آکھاں گا ہی ایس روایت نوں اک واری فیر پڑھ کے غور فرماؤ۔ تہانوں پیر پیر اُتے جھوٹ لھے گاتے ایہ سوال ذہن وچ
 اُبھر دے نیں:

- ۱۔ کیہ سچ مچ زید دی بیوی نہیب ایڈی مالدار سن ہی اوہناں کول کپڑیاں دی اک ورائی موجوسی؟
- ۲۔ جے ایس دا جواب ہاں وچ اے تے سوال ایہ ہے کہ کپڑے بدلن دی اوس ویلے لوڑ کیہ سی؟
- ۳۔ آکھیا گیا اے کہ ”نہیب اپنے کم کار والے لیڑیاں وچ سن۔“ تے کیہ عرب دیاں سوانیاں دے کم کار والے لیڑے
 عریانی دامظاہرہ کر دے سن؟
- ۴۔ کس نے جناب نہیب نوں آکھیا ہی رسول اللہ دروازے وچ ای کھلوتے نیں۔ دسٹن والے دا کوئی ناں پتہ نہیں
 لہدا۔ فیر رحمت عالم او تھے کیوں کھلوتے رے، کجھ پتہ نہیں۔
- ۵۔ زید نے نہیب نوں پچھیا ”کیہ تسیں آپ a دی زبان توں کوئی گل سنی؟“ ایس گل دی سمجھ نہیں آؤندی۔ آؤن
 والے وٹوں تے ایہ پچھیا جاندا اے ہی کوئی سنیہا تے نہیں دے گئے۔
- ۶۔ منیا کہ رسول خدا a نوں زید نال بہت پیاری پراوہ کیہڑی خاص گل سی ہی سرور کائنات زید نوں طلب فرمان دی
 بجائے یاں اوس دا پتہ کران دی بجائے آپوں اوہناں دے گھر تشریف لے گئے۔ ایس دا کجھ پتہ نہیں۔
 ہن ذرا ایہناں سوالاں نوں دیکھو ہی ایہ کئے گھوہ گوچرے نیں۔ تسیں بنا شبا ایس نتیجے تے ای اپڑو گے ہی ایہ کسے
 سازشی ذہن دی سوچ اے۔ جس تے کجھ مستشرقان تے کجھ بد بخت، ناں دے مسلماناں نے ہور رنگ چڑھایا اے۔
 غور فرماؤ ہی پیغمبر خدا ولوں تے ایہ سوچیا وی نہیں جاسکدا ہی اوہ بے اجازت کسے دے گھر دے وچ جھاتی پاؤن۔ ایہ
 عظیم ہستی تے دھرتی اُتے ایس پالیسی دی سب توں وڈھی علم بردار اے ہی:

﴿يَا أَيُّهَا الَّذِينَ آمَنُوا لَا تَدْخُلُوا بُيُوتًا غَيْرَ بُيُوتِكُمْ حَتَّى تَسْتَأْذِنُوا﴾ (النور: ۲۷)

”اے ایمان والو! اپنے گھراں توں سوا ہور کسے گھر وچ داخل نہ ہوؤ جدوں تک کہ اجازت نہ لے لوؤ۔“

تے احتیاط ایہہ ہے نئی جے بوئے اگے کھلو کے اجازت لین وچ بے پردگی دا اندیشہ ہووے تے بچے یاں کھے کھلون دی تاکید فرماؤندے۔ تن واری اجازت چاہن دے باوجود جواب نہ ملن دی صورت وچ پچھاں پرتن دی ہدایت فرماؤندے۔ حد تے ایہ ہے کہ نصیحت فرمائی نئی گھر وچ ماں وی ہووے تے فیروی اجازت طلب کرو۔ (موطا امام مالک)

ہن فیصلہ فرماؤ کہ ایہ روایت کس حد تک ٹھیک اے؟

اک اجہی نیک بخت سوانی جیہڑی پیغمبر خدا دی سگی پھچی دی دھی اے؛ جس نے بچپن توں لے کے ۳۸ ورھیاں دی عمر تک داک اک دیکھاڑا رسول خدا دے سامنے گزاریا ہووے، اوس دی محبت نے آپ a دے دل وچ اوس ویلے جوش ماریا جدوں اوہ جوانی دیاں حدال پار کر چکیاں سن تے محبوب خدا آپوں وی بڑھے ہو چکے سن۔ ایہ کسے ناپاک تے گندے ذہن دی ای سوچ ہو سکدی اے۔ جے جناب زینب رسول رحمت لئی ایڈی ای کھچ (کشش) رکھ دیاں سن تے اوہ آپ دی خواہش وی سن، تے آپ آپوں اوہناں نوں زید دے نکاح وچ کیوں دیندے؟ آپ اوہدوں ای اوہناں نال ویاہ کر لیندے جدوں زینب کنواری وی سن، جوان وی سن تے ایس اعتراض دا وی ڈرنہیں سی نئی اپنے منہ بولے پتر دی سوانی نال نکاح کر لیا۔

تواریخ دے ایس بے ہودہ تے گھٹیا جوٹھ دا پول کھولن لئی اے کجھ ہور وی آکھنا درکار اے تے ایس نوں ٹھن لئی اک واری فیر پچھے لکھی گئی روایت دی پہلی سطر دا مطالعہ فرماؤ۔

باخبار محمد بن عمر، بحديث عبد الله بن عامر اسلمی از محمد بن یحییٰ بن حبان، “آؤ درایت دے فن نوں سامنے رکھ کے ایس دا جائزہ لوئے۔ تے سب توں پہلاں پہلے بندے محمد بن عمر دا مقدمہ سامنے رکھ دے ہاں۔ ایس سلسلے وچ اسیں کجھ مشہور بزرگاں دیاں صلاحواں توں فیہد چکدے ہاں پر ایس توں پہلاں ایہ گل دسی ضروری جا پدی اے نئی ایہ اوہی محمد بن عمر اے جیہڑا تواریخ وچ واقدی دے ناں نال مشہور اے۔

اُچی شان والے قانون دان امام شافعی فرماؤندے نیں:

”واقدی دیاں ساریاں کتاباں جھوٹھ دا پلندہ نیں“

اک دُجی تھاں تے فرماندے نیں:

”مدینے وچ ست اچھے بندے سن جیہڑے راویاں دے سلسلے وچ دروغ گوئی توں کم لیندے سن، واقدی اوہناں وچوں اک سی۔“

امام بخاری فرماندے نیں: ”حدیث دی روایت وچ اوس دی کوئی تھاں نہیں۔ امام احمد بن حنبل، ابن مبارک، ابن

نمیر تے اسماعیل بن ذکریا وی اوس نوں خارج قرار دیندے نیں۔“

ابو حاتم آکھدے نیں:

”اوہ روایت نوں توڑ موڑ دیندا ہوندا سی“

ابن خلکان دا خیال اے:

”واقدی توں مروی روایات کمزور دا درجہ رکھدیاں نیں۔ اوس دی راست گوئی تے اعتقاد اُتے شک دا اظہار کیتا گیا

اے۔“

علامہ شبلی نعمانی فرماندے نیں:

”واقدی مشہور کذاب تے دروغ گو اے تے اوس دا مقصد، ایوں دیاں بے ہودہ روایات توں، ایہ سی بی عباسیاں

دی عیش پرستی واسطے سند ہتھ آئے۔“

جے ہور ووز نے انسائیکلو پیڈیا آف اسلام وچ ایس گل نوں منیا اے بی مسلمان عالم حدیث دے معاملے وچ واقدی

نوں رد کر چکے نیں۔

ہن اسیں راویاں دے سلسلے دے دُجے بندے یعنی عبداللہ بن عامر اسلمی تے گل بات کر دے ہاں۔

امام احمد بن حنبل تے نسائی نے حدیث دی روایت وچ عبداللہ بن عامر نوں کمزور دا درجہ دتا اے۔ ابی حاتم آکھدے

نیں بی اوہ حدیث دی روایت وچوں خارج اے۔ امام بخاری فرماندے نیں بی لوکاں نوں اوس دی یادداشت تے اعتراض

رہیا اے۔ ابن حبان آکھدے نیں بی اوہ سندیں تے متن نوں بدل کر دیندا سی۔ جدوں اوس نے وڈیاں وڈیاں

غلطیاں کرنیاں شروع کر دیتاں تے اوس نوں روایت وچوں خارج کر دتا گیا۔ (بحوالہ مدرز آف دی بیلپورز)

ہن اسیں تھے بندے محمد بن یحییٰ بن حبان تے بحث کر دے ہاں۔ اصل وچ اوہی بندہ اے جس نے ایہ حدیث بیان

کیتی۔ اسمائے رجال دیاں کتاباں وچ محمد بن یحییٰ نوں اعتبار والا بندہ منیا گیا اے پر کجھ نہیں آکھیا جاسکدا بی عبداللہ بن

عامر تے واقدی نے محمد بن یحییٰ دی روایت نوں کس حد تک بدل کے رکھ دتا اے۔ ایہ وی ہوسکدا اے بی ایس سلسلے وچ ابن

یحییٰ دانان کسے خاص مقصدی ورتیا گیا ہووے۔

اک ہور زلدی گل ایہ ہے بی محمد بن یحییٰ دی وفات ۱۲۰ھ وچ ہوئی۔ پتہ نہیں بی رسول خدا دے وصال مبارک توں

اک صدی بعد ایہ روایت کس طرح محمد بن یحییٰ تیکر اپڑی۔ ایہ سلسلہ صحابہ کرام تیکر اپڑدا نہیں و سدا۔ ایوں ساڈے سامنے ایس

گل توں دکھ کوئی چارہ نہیں بی اسیں علامہ شبلی نعمانی دے ایس خیال نال اتفاق کرے بی ایس قسم دیاں بے ہودہ روایات دا

مقصد ایہ سی بی عباسیاں دی عیش پرستی لئی سند تے جواز ہتھ آئے۔

مشہور مستشرق ڈبلیو ٹنگمری واٹ ایس نکاح دی حکمت بیان کردا ہو یا لکھدا اے:

" The criticism of Muhammad, then was based on a pre-islamic idea that was rejected by Islam, and one aim of Muhammad in contracting the marriage was to break the hold of the old idea over men's conduct. How important was this aim compared with others which he might have had."

”جناب محمد تے، ایس شادی پاروں، جیہڑی تنقید کیتی گئی، اُس دی بنیاد دور جاہلیت دی اک سوچ سی، جس نوں اسلام نے ختم کر دتا سی۔ ایس شادی دا اک ٹچا ایہ وی سی ہی لوکاں نوں ایس فرسودہ رسم توں آزاد کیتا جاوے (نئی منہ بولیا پتر وی سکے پتر وانگوں ہوندا اے) (غور کروئی) کسے وی دُجے مقصد نالوں ایہ مقصد کڈاؤ اسی!“

* * * *

اُم المؤمنین حضرت اُم حبیبہ رملہ بنت ابوسفیان

سیدہ اُم حبیبہ قریش دے مشہور سردار تے رسول خدا دے جانی دشمن ابوسفیان دی دھی، جناب امیر معاویہ دی سگی بھین، حضرت عثمان غنی دی پھپھی زاد بھین تے عبید اللہ بن جحش دی بیوی سن۔ آپ دی والدہ داناں صفیہ بنت ابی العاص سی۔ آپ اعلان نبوت توں کوئی ۷ اور ۷۷ پہلوں کے وچ پیدا ہوئیاں۔

جوان ہوئیاں تے ابوسفیان نے اوہناں دا نکاح رسول خدا دی پھوپھی دے پتر عبید اللہ بن جحش نال کر دتا جیہڑا اُم المؤمنین حضرت زینب بنت جحش دا سکا بھرا سی۔ اسلام دے مڈھلے دناں وچ ای رملہ تے عبید اللہ، دوویں میاں بیوی، مسلمان ہو گئے۔ اسلام قبولن دی دیر سی کہ رملہ دے والد ابوسفیان صحر بن حرب تے دُجے قریشی سرداراں نے رملہ ہوراں دا تے دُجے مسلماناں دا جینا حرام کر دتا۔ رسول اللہ نے مشرکاں توں تنگ آ کے جدوں مسلماناں نوں حبشہ ول ہجرت کرن دی اجازت دتی تے عبید اللہ تے رملہ وی حبشہ ول جان والے جتھے وچ رل گئے، تے ایوں پہلی ہجرت حبشہ دے ویلے ہی بے وطن ہو گئے۔ حبشہ اپڑن توں کجھ چر بعد رملہ نے اک دھی نوں جنم دتا جہداناں اوہناں نے حبیبہ رکھیا۔ اوہی دھی نسبت نال آپ دی کنیت اُم حبیبہ مشہور ہوئی۔

دوویں میاں بیوی اپنی لاڈلی دھی حبیبہ نال کئی ورہیاں توں پردلیں ہی کٹ رے سن کہ اک راتیں جناب اُم حبیبہ نے خواب وچ عبید اللہ نوں چوکی بھڑی تے مکروہ شکل وچ دیکھیا۔ سویرے اچے عبید اللہ نال گل وی نہیں سی کیتی تے اوہ آپوں بول پیا:

”اُم حبیبہ! تیرے نال اک گل کرنی اے۔“

”کرو جی۔ گلاں کرن لئی ہوندیاں نیں۔“ (اُم حبیبہ نوں رات والا سفاوی چیتے آ گیا)

”میں مذہب دے معاملے وچ بڑا غور کیتا اے۔ گل ایہ وے کہ مینوں نصرانیت توں چنگی گل ہو رکدرے نہیں لہی۔

ایس پاروں میں عیسائی ہون دا فیصلہ کر لیا اے۔“

”ایہ تیں کیہ پے آ کھدے او؟“..... اُم حبیبہ نے اچن چیت سوال کیتا۔

”آہو میں ٹھیک آ کھدا ہاں۔ ہن ایوں ای ہونا اے۔“ اوس نے جواب دتا۔

ایوں عبید اللہ مرتد ہو گیا۔ اُم حبیبہ دا آکھیا سنیا کسے کم نہ آیا۔ اوہ گھر وٹوں لا پرواہ جہیا ہو گیا تے شراب پین لگ پیا۔

اخیر حیاتی دے رنگ بدلے طور طریقیاں، تے شراب دی کثرت پاروں کفر دی حالت وچ ای عبید اللہ چلانا کر گیا۔

رسول خدا مدینے ول ہجرت توں بعد راضی خوشی اللہ دے دین دی سیوا وچ لگے ہوئے سن کہ آپ نوں عبید اللہ دے

مرن دی خبر ملی۔ حبیبہ یتیمی دے تے اُم حبیبہ بیوگی دے دن حبشہ وچ ای گزار رہیاں سن۔ ابوسفیان کے وچ اسلام دشمنی وچ

رُجھیا ہو یا سی پر رسول رحمتِ نوں اک مسلمان پر دیسی بیوہ یاد رہندی اے۔ جو ای اُم حبیبہ دی عدت پوری ہوئی آپؐ نے عمرو بن اُمیہ ضمری نوں حبشہ دے بادشاہ نجاشی ول لور دتا تاں جے اوہ نجاشی دے راہیں اُم حبیبہ نوں رسول رحمتِ نال نکاح دی پیش کش کرے۔ حضور دا خط ویکھ کے نجاشی نے اپنی اک لونڈی ابرہہ نوں اُم حبیبہ ول گھلیا کہ جے اوس نوں ایہ نکاح منظور اے تے اوہ اپنا وکیل مقرر کر دیوے تاں جے حضور نال اوہناں دا نکاح کیتا جاسکے۔ اُم حبیبہ نے جناب خالد بن سعید نوں اپنا وکیل بنایا تے نہ صرف نکاح لئی ہاں کر دتی سگوں خوش ہو کے نجاشی دی لونڈی ابرہہ نوں چاندی دے دو کنگن، انگوٹھیاں تے کچھ ہور ٹوہاں وی دتیاں۔

اوسے شام نوں نجاشی نے جناب جعفر بن ابوطالب دی سربراہی وچ مسلمانان نوں دعوت دتی، آپوں نکاح پڑھیا تے اپنے کولوں رسول خدا ولوں حق مہر خالد بن سعید نوں ادا کر دتا۔ نکاح دی رسم توں فارغ ہوئے تے جناب خالد بن سعید نے پروہنیاں نوں روٹی لکڑ کھوایا۔ ایوں اُم حبیبہ، اُم المومنین بن گئیاں۔ ایہ ۵ ہجری دی گل اے۔ اوہدوں سیدہ اُم حبیبہ دی عمر کوئی ۳۶/۳۷ ورھے ہوئی اے۔

کچھ دنوں بعد نجاشی نے شرجیل بن حسنہ نوں ایہ ذمہ داری دتی کہ اوہ سیدہ اُم حبیبہ نوں بذریعہ بحری جہاز مدینے پہنچا دیوے۔ شرجیل نے اوہناں دی بیٹی حبیبہ تے بیٹے عبداللہ نوں نال لیا تے مدینے دے جہاز وچ بہہ گئے۔ مدینے اپڑ کے آپ رسول رحمت دے حرم وچ شامل ہو گئیاں۔

سیدہ اُم حبیبہ نال رسول خدا دے نکاح دا مقصد صرف ایس گل توں ای سامنے آ جاندا اے کہ سیدہ آپ دے جانی دشمن ابوسفیان دی دھی سن۔ اصل وچ ایہ نکاح مرتد ہو جان والیاں دے خلاف اک اعلان سی، تے اک حوصلہ سی اوہناں عظیم صحابیات لئی جیہڑیاں خاوندان دے مرتد ہو جان توں بعد دی اپنے ایمان تے پکیاں رہیاں۔ اک سنبھیا سی بے وسے لوکاں لئی کہ گھبراؤ نہ، اللہ وسیلیاں تے پوری طرحاں قادر اے۔ واشنگٹن ارونگ لکھدا اے کہ:

”ایہ بیوہ محمدؐ دے جانی دشمن ابوسفیان دی دھی سی تے پیغمبر خدا دا خیال ایسی کہ ایہ شادی اوس دے باپ دے ویرنوں مٹھا کر دیوے گی۔ بس سمجھ لوؤ کہ ایہ اک سیاسی سوچ سی۔“

امیل درمنگھم لکھدا اے کہ ”ایہ شادی اک جانے پچھانے بندے دی بیوہ نوں احترام جوگ تھاں دین توں وکھ پیغمبر خدا تے اُم حبیبہ دے باپ نوں نیڑے کرن دا سبب بنی۔“

سیدہ اُم حبیبہ چوکھے سوہنے وصفان والی سوانی سن۔ فنِ حدیث وچ سیدہ دے کئی شاگرد سن۔ آپ کولوں ٹردیاں حدیثاں دی تعداد ۶۵ دسی جاندی اے جیہڑیاں آپ نے رسول خداؐ تے اُم المومنین زینب بنت جحش کولوں روایت کیتیاں۔ آپ ۴۲ھ وچ اپنے بھرا امیر معاویہ دے عہد خلافت وچ چلانا کر گئیاں۔

* * * *

اُم المؤمنین حضرت صفیہ بنت حی

سیدہ صفیہ بنت حی بن اخطب اسرائیلیہ و تعلق بنو نضیر نال سی۔ آپ دی ماں دانان برہ بنت سموان سی۔ برہ دے نسب دا سلسلہ یہودیوں دے مشہور خنوادے بنو قریظہ نال رلدا اے۔ ایوں آپ دو دھڑلے دے یہودی قبیلیاں دی اولاد سن۔ آپ دے والد حی بن اخطب بنو نضیر دے سردار ہون پاروں علاقے دے سرکڈھویں بندے سن۔ آپ دے نانا سموان بنو قریظہ دے اوہناں شجاع تے دلیر بندیاں وچوں سن، جیہڑے اپنی بہادری پاروں پورے عرب وچ مشہور سن۔ سیدہ صفیہ نوں اوہناں دے خاندانی حسب نسب تے سیانف پاروں عاقلہ تے شریفہ آکھیا جانداسی۔

سیدہ دا پہلا نکاح بنو قریظہ دے مشہور شاعر تے سردار سلام بن مشکم نال ہوئیا۔ تھوڑا کوچرا ہی نباہ ہوئی تے طلاق ہو گئی۔ فیر اوہناں نال کنانہ بن ابی الحقیق نے نکاح کر لیا۔ تے سلام بن مشکم نے مشہور یہودی زور اور مرحب دی بھین زینب نال نکاح کر لیا۔

خیبر دی تھان تے جدوں مسلماناں نوں توار بنجی فتح حاصل ہوئی تے سیدہ صفیہ دا خاوند کنانہ قلعے دے اندر ای ماریا گیا۔ صفیہ بوہت ساریاں یہودی سوانیاں دے نال قیدی بن گئیاں۔ جدوں مال غنیمت وٹیا جان لگاتے اک مجاہد دجیہ کلبی نے لشکر دے سالار جناب رسول خدا اگے عرض کیتی ہی اوہناں نوں اک لونڈی لوڑی دی اے۔ حضور a نے دجیہ نوں اجازت دے دتی ہی اوہ قیدی سوانیاں وچوں کوئی اک مل لوے۔ دجیہ نے جناب صفیہ نوں پسند کیتا پر کچھ اصحاب نبی نے ایس گل نوں نامناسب جانا، کیوں جے اوہ بنو نضیر تے بنو قریظہ دی رئیس زادی تے اک وڈے یہودی سردار دی بیوی سن۔ صحابہ نے صلاح دتی ہی صفیہ رسول رحمت دے گھر وچ ای چنگی لگے گی۔ ایوں آپ نے دجیہ نوں اک دجی لونڈی عنایت کر کے جناب صفیہ نوں آزاد کر دتا تے اوہناں نوں نکاح دی پیش کش کیتی۔ جناب صفیہ دا باپ، بھراتے گھر والا، سب مارے جا چکے سن۔ ہن نبی رحمت ولوں اوہناں دے اُچیاں شاناں والے گھرانے دا حصہ بن دی پیش کش ٹھکران دا سوال ای پیدا نہیں سی ہوندا۔ ایوں یہودی رئیس زادی تے رئیسہ اُم المؤمنین بن گئیاں۔ (کچھ تفصیل کچھ غزوہ خیبر دے باب وچ آچکی اے)

اسلامی لشکر مدینے واپس پر تیا تے سیدہ صفیہ نوں حضرت حارث بن نعمان دے گھر ٹھہرایا گیا۔ حضرت حارث دے گھر ای امہات المؤمنین سیدہ زینب بنت جحش، سیدہ حفصہ، سیدہ عائشہ تے سیدہ جویریہ، اُم المؤمنین حضرت صفیہ نوں ملن آئیاں۔ جدوں ویکھ کے واپس پر تیاں تے رسول خدا وی کسے کم لئی کچھ کچھ ٹر پے۔ آپ a نوں ویکھ کے سیدہ عائشہ نے عرض کیتی ہی ”یہودیہ اے“، رسول خدا a نے حضرت عائشہ نوں ایس طرحاں آکھن توں منع فرما دتا تے ارشاد فرمایا ہی اوہ تے مسلمان ہو چکی اے۔

سیدہ صفیہ دے خاندان دے ناواں تے سیرت نگاراں وچ اختلاف اے، پر ایس گل تے کوئی اختلاف نہیں ہی نبی رحمت توں پہلاں اوہناں دے دوشوہرن۔

سیدہ صفیہ اپنی طبیعت پاروں اپنے یہودی قرابت داراں نال تعلق ختم نہ کر سکیاں۔ ایس تعلق پاروں کئی واری آپ نوں طعنہ مہنے سننے پے۔ اک واری سفر وچ جناب صفیہ دا اونٹ بیمار پے گیا۔ ایس پریشانی وچ آپ دیاں اکھاں وچ اتھر و آ گئے۔ رسول رحمت نے اپنے ہتھان نالے جناب صفیہ دے اتھر و صاف کیتے تے سیدہ زینب نوں حکم دتا کہ اوہ اپنا اونٹ صفیہ نوں دے دین۔ سیدہ زینب نوں ایہ گل چنگی نہ لگی تے جواب دتا عی کیہ میں ایس یہودیہ نوں اپنا اونٹ دے دیواں؟ رسول خدا نوں جناب زینب دے جواب تے بڑی تکلیف ہوئی تے آپ اوہناں نال نراض ہو گئے۔ اخیر تن مہینیاں بعد سیدہ عائشہ نے معاملہ رفع دفع کرایا۔

سیدہ صفیہ وچ وی باقی ازواج طرحاں بوہت اعلیٰ صفتاں پائیاں جاندیاں سن۔ آپ عاقلہ، فاضلہ تے حلیمہ سن۔ حضرت صفیہ توں کچھ حدیثاں وی روایت کیتیاں گئیاں نیں جنہاں نوں امام زین العابدین، عبداللہ بن حارث، مسلم بن صفوان تے کنانہ وغیرہ نے بیان کیتا اے۔

آپ دی وفات ۵۰ھ وچ ہوئی، جدوں آپ نے حیاتی دیاں (۶۰) بہاراں ویکھ لئیاں سن۔ آپ نوں جنت البقیع وچ دفن کیتا گیا۔

* * * *

اُم المؤمنین حضرت میمونہ بنت حارث

سیدہ میمونہ بنت حارث بن حزن دی ماں داناں ہندسی جیہڑی عوف بن زہیر دی بیٹی سی۔ جناب میمونہ دا پہلا نکاح مسعود بن عمرو بن عمیر ثقفی نال ہوئیا۔ مسعود نے طلاق دے دتی تے ابورہم بن عبدالعزیٰ نے آپ نال نکاح کر لیا۔ سبھ وچ ابورہم چلانا کر گیا تے سیدہ میمونہ اک واری فیرا کلاپے دا شکار ہو گئیاں۔ نبی اکرم a نال آپ دے نکاح دے حوالے نال کئی روایتاں ساڈے تیکر اپڑیاں نیں۔ اک روایت ایہ ہے کہ سیدہ میمونہ نے اپنے آپ نوں ہبہ کر دتا۔ دُجی روایت ایہ ہے کہ رسول اللہ نے اپنے اک غلام ابورافع نوں وکیل بنا کے اوس بن خولہ دے نال کئے ٹوریا سی جہاں راہیں ایجاب و قبول ہوئیا۔ چوکھی معتبر روایت ایہ ہے بی حضرت عباس نے رسول اللہ نوں ایس نکاح دا مشورہ دتا تے اوہناں نے ای نکاح پڑھایا۔

حضرت میمونہ نال نبی اکرم a دے ایس نکاح دلوں جو وہ آکھیا جائے اوہ ایس گل جتاں بھار نہیں رکھدا ہووے گا کہ ایس نکاح نال حضرت خالد بن ولید دے اسلام ول جھکاؤ دا سامان پیدا ہوئیا تے ایوں ایہ نکاح مسلماناں اُتے نبی اکرم a دے اک وڈے احسان دا سبب بنیا۔ اصل وچ میمونہ جناب خالد بن ولید دی سگلی ماسی سن تے جناب خالد نال بہت پیار کر دیاں سن۔

آکھیا جاندا اے بی جدوں جناب میمونہ رسول خدا a دے نکاح وچ آ گئیاں تے خالد نے اپنے بھناں متراں نوں اکٹھا کیتا۔ اکھے محمد a نہ جوتی تے نجومی اے تے نہ ای جادوگر۔ اوہ جووی آکھدا اے خدا دلوں ای آکھدا اے۔ تے گل ایہ ہے بی جے چنگے بنیے تے محمد a تے ایمان لے آویئے۔ اکٹھ دے وچ ابو جہل دا پتر عکرمہ وی سی۔ اوس نے خالد نال کجھ تلخی کہتی تے آکھن لگا کہ خالد! کیہ توں بدرونوں بھل گئیاں ایں؟ کیہ محمد a تیرے چاچے دا قاتل نہیں؟ کیہ توں ساڈے نال رل کے اوس دا انتقام نہیں لینا چاہندا؟

جدوں ربّ نوں اپنے بندیاں دی بھلیائی منظور ہوندی اے، اوہدوں اچیاں دلیلاں بے کار ہو جاندیاں نیں۔ خالد دے دل دے اندر ربّ جیہڑی گل بھردتی سی، اوہ ہن ہو کے رہی سی۔ اوس نے عثمان بن طلحہ نوں نال لیا تے مدینے جا کے سر محمد رسول اللہ دے پیراں اُتے رکھ دتا۔

مدینے وچ خالد دا آؤنا اک وڈھی خوشخبری سی۔ اوہ نہ صرف آپ اک مشہور جنگجو تے کمانڈر سی سگوں اوس دے دُجے رشتے دار وی فنِ حرب دے ماہر منے جاندا سن۔ ایس لئی خالد دے مسلمان ہون نال مسلماناں وچ خوشی دی لہر دوڑ گئی۔ ایوں جا پدا اے کہ رسول خدا دی ایس اخیر شادی دا مقصد وی ایہی سی۔ ولیم میورا اپنی کتاب لائف آف محمد وچ لکھدا اے:

”میمونہ دی اک بھین خالد بن ولید، دی ماں سی۔ نبی اکرم نال خالد دے نکاح توں تھوڑی جیر پچھوں خالد مدینے اپڑ

گئے تے فیر اپنا سب کچھ بس اسلام واسطے ای وقف کر دتا۔“
امیل در منگھم لکھدا اے:

”ایس ویاہ نے نبی اکرم a تے میمونہ دے بھانجے خالد بن ولید جیہڑا اک ممتاز جرنیل سی، دے وچکار چنگے ملن ورتن دا مڈھ بٹھیا۔“

سیدہ میمونہ داسن وفات ۱۵ھ اے۔ آپ سب توں اخیر تے رسول رحمت دے نکاح وچ آئیاں، تے امہات المؤمنین وچوں سب توں اخیر تے ای دنیا توں چلانا کیتا۔ جناب عبداللہ بن عباس نے نماز جنازہ پڑھائی تے سرف دے اوس تھاں تے ای دفن ہوئیاں جتھے رسم عروسی ادا ہوئی سی۔

صلی اللہ تعالیٰ علی النبی الہامی

* * * *

کچھ ہور سوانیاں

ایہ ۱۱ بھاگاں والیاں سوانیاں نیں جہاں نوں اللہ نے مومنناں دیاں ماواں بنا دتا۔ ایس توں وکھ وی کچھ سوانیاں نیں جہاں داناں رسول خدا دے نال لیا جاندا اے۔ پیٹھ اوہناں دا ذکر کیتا جاندا اے:

حضرت ریحانہ بنت شمعون:

حضرت ریحانہ دے متعلق سیرت دیاں کتاباں وچ ایہ تین قسم دیاں روایتاں لکھدیاں نیں:

- i آپ یہودی سن تے قریظہ دے قیدیاں وچوں سن۔ نبی اکرم a نے اوہناں نوں آزاد کر دتا تے اوہ اپنے خاندان ول پرت گئیاں۔ ایہ روایت ابن مندہ دی اتے تے ایس دی تائید وچ کوئی دُجی روایت نہیں مل دی۔
 - ii آپ a ریحانہ نوں آزاد کر کے دُجیاں ازواج طرحاں رکھنا چاہیا۔ پر اوہناں نے ایہ وڈی ذمہ داری محسوس کر کے باندی بن کے حضور دی خدمت وچ رہنا پسند کیتا۔ ایہ روایت ابن اسحاق دی اے۔
 - iii نبی اکرم نے ریحانہ نوں اختیار دے دتا تے اوہناں نے اسلام قبول کر لیا۔ آپ نے اوہناں نوں آزاد کر کے اوہناں نال نکاح کر لیا۔ ایہ روایت واقدی دی اے۔ ابن سعد نے ایسے روایت دا ذکر کیتا اے۔
- علامہ شبلی نعمانی دا خیال اے بئی ریحانہ نوں آزاد کر دین والی تے اوہناں دے اپنے خاندان وچ جا کے رہن والی گل چوکی ٹھیک اے۔

حضرت ماریہ قبطیہ:

حضرت ماریہ قبطیہ نبی اکرم a دی خدمت وچ لونڈی دی حیثیت نال آئیاں تے لونڈی بن کے ای آپ دی خدمت وچ رہیاں۔ اللہ نے لونڈی نال بدنی تعلق دی جیہڑی اجازت دتی سی اوس دے نتیجے تے جناب ماریہ دے بطن وچوں حضور دے فرزند سیدنا ابراہیم پیدا ہوئے جیہڑے کئی عمر وچ ای چلانا کر گئے۔

اوہ سوانیاں جہاں نال حضور نے نکاح فرمایا پر خلوت توں پہلاں ای علیحدگی ہو گئی:

i۔ حضرت فاطمہ بنت ضحاک کلابیہ ii۔ حضرت اسماء بنت نعمان

اوہ سوانیاں جہاں دا کچھ مورخاں یاں سیرت نگاراں نے ذکر کیتا اے بئی اوہناں نال نکاح ہوئیا پر کوئی پکی پیڑی گل نہیں کیتی:

i۔ قتیلہ بنت قیس ii۔ ملیکہ بنت کعب iii۔ بنت جندب کنانیہ iv۔ سہابت صلت

صلی اللہ تعالیٰ علی النبی و آلہ

کتابیات

- ابن حجر عسقلانی، شہاب الدین، علامہ۔ تہذیب التہذیب۔ دائرۃ المعارف حیدرآباد دکن۔ ۱۳۲۶ھ
- ابن حجر عسقلانی، علامہ۔ فتح الباری۔ البیہ، مصر۔ ۱۳۲۸ھ
- ابن سعد، ابو عبد اللہ محمد البصری۔ طبقات ابن سعد۔ دار الاشاعت، کراچی۔ ۲۰۰۳ء
- ابن قیم، ابی عبد اللہ محمد۔ زاد المعاد۔ نفیس الکیڈمی، کراچی۔ ۱۹۹۰ء
- ابن کثیر، عماد الدین، علامہ۔ تفسیر قرآن۔ مکتبہ تعمیر انسانیت، لاہور۔ ۱۹۸۸ء
- ابن ہشام، عبد الملک، ابو محمد۔ سیرت النبی۔ ادارہ اسلامیات، لاہور۔ ۱۹۸۹ء
- احمد بن ابی یعقوب، علامہ۔ تاریخ یعقوبی۔ نجف۔ ۱۳۵۸ھ
- احمد بن زینی دحلان۔ سیرت النبویہ۔ للنشر، بیروت۔ ۱۹۸۳ء
- احمد بن علی بن محمد، امام۔ الاصبہ فی تمیز الصحابہ۔ مکتبہ تجارت الکبریٰ، بیروت۔ ۱۹۳۹ء
- ادریس کاندھلوی۔ سیرت المصطفیٰ۔ مکتبہ عثمانیہ، جامعہ اشرفیہ، لاہور۔ ۱۹۸۵ء
- ازہری، پیر محمد کرم شاہ۔ ضیاء النبی۔ ضیاء القرآن پبلی کیشنز، لاہور۔ ۱۴۲۰ھ
- الزرقانی، محمد بن عبد الباقی، علامہ۔ شرح علی المواہب اللدنیہ۔ مصر۔ ۱۳۲۵ھ
- امیر علی، سید۔ روح اسلام۔ ادارہ ثقافت اسلامیہ، لاہور۔ ۱۹۹۲ء
- آزاد، ابوالکلام، مولانا۔ رسول رحمت۔ شیخ غلام علی اینڈ سنز، لاہور۔ ۱۹۸۱ء
- بخاری، عبد اللہ، امام۔ صحیح بخاری
- پنجاب یونیورسٹی، دائرہ معارف اسلامیہ۔ سیرت خیر الانام۔ پنجاب یونیورسٹی لاہور۔ ۲۰۰۳ء
- جزری، مبارک بن محمد بن اشیر، علامہ۔ اسد الغابہ فی معرفۃ الصحابہ۔ مکتبہ اسلامیہ، تہران۔ ۱۳۷۷ھ
- حلبی، علی ابن برہان الدین، علامہ۔ سیرت حلبیہ۔ دار الاشاعت، کراچی۔ ۱۹۹۹ء
- حمید اللہ، ڈاکٹر۔ رسول اکرم کی سیاسی زندگی۔ دار الاشاعت، کراچی۔ ۱۹۸۷ء
- حمید اللہ، ڈاکٹر۔ خطبات بہاولپور۔ ادارہ تحقیقات اسلامی، اسلام آباد۔ ۱۹۹۹ء
- خالد مسعود، علامہ۔ حیات رسول امی۔ دار التذکیر، اردو بازار، لاہور۔ ۲۰۰۳ء
- ستار طاہر۔ دنیا کی سو عظیم کتابیں۔ کاروان ادب، ملتان۔ ۱۹۸۹ء

سہیلی، عبدالرحمن، امام۔ الروض الالنف۔ دارالفکر، بیروت۔ سن
 شبلی نعمانی۔ سیرت النبی۔ دارالاشاعت، کراچی۔ ۱۹۸۴ء
 شوقی، ابوخلیل۔ اٹلس سیرت نبوی۔ دارالسلام، لاہور۔ ۱۴۲۵ھ
 صفی الرحمان، مبارک پوری۔ الرحیق المختوم۔ المکتبۃ السلفیہ، لاہور۔ ۱۹۹۶ء
 صفی الرحمان، مبارک پوری۔ تجلیات نبوت۔ دارالسلام، لاہور۔ ۱۹۹۷ء
 عبداللہ بن محمد بن عبدالوہاب۔ مختصر سیرت رسول۔ نعمانی کتب خانہ، اردو بازار لاہور۔ ۱۹۹۵ء
 عروہ بن زبیر۔ مغازی رسول اللہ۔ ادارہ ثقافت اسلامیہ، لاہور۔ ۲۰۰۰ء
 فضل الرحمان، سید۔ فرہنگ سیرت۔ زوارا کیڈمی پبلی کیشنز، کراچی۔ ۲۰۰۳ء
 محمود خطاب شیت (مترجم رئیس احمد جعفری)۔ آں حضرتؐ بحیثیت سپہ سالار۔ شیخ غلام علی اینڈ سنز، لاہور۔ سن
 محمود مہدی۔ نساء حول الرسول۔ دار ابن کثیر، دمشق۔ ۲۰۰۵ء
 منصور پوری، قاضی محمد سلیمان، سلمان۔ رحمت للعالمین۔ الفیصل، اردو بازار لاہور۔ ۱۹۹۱ء
 مودودی، مولانا ابوالاعلیٰ۔ تفہیم القرآن۔
 مودودی، مولانا ابوالاعلیٰ، عاصم الحداد۔ سفرنامہ ارض القرآن۔ الفیصل، اردو بازار لاہور۔ ۱۹۹۶ء
 مودودی، مولانا ابوالاعلیٰ۔ پردہ۔ اسلامک پبلی کیشنز لاہور۔ ۱۹۸۹ء
 مودودی، مولانا ابوالاعلیٰ۔ سیرت سرور عالم۔ ادارہ ترجمان القرآن، لاہور۔ ۱۹۹۹ء
 نثار احمد، ڈاکٹر۔ خطبہ حجۃ الوداع۔ بیت الحکمت، لاہور۔ ۲۰۰۵ء
 ندوی، سید سلیمان۔ تاریخ ارض القرآن۔ دارالاشاعت، کراچی۔ ۱۹۵۵ء
 ندوی، ابوالجلال۔ فخر موجودات
 نووی، امام۔ شرح نووی بر صحیح مسلم
 ہیکل، محمد حسین (ترجمہ ابوبیکر امام خاں)۔ حیات محمدؐ۔ ادارہ ثقافت اسلامیہ، لاہور۔ ۱۹۸۸ء
 یوسف الصالحی، امام۔ سبل الہدیٰ والرشاد۔ قاہرہ۔ ۱۹۷۵ء
 نقوش، سیرت نمبر کی تمام جلدیں
 سیارہ ڈائجسٹ رسول نمبر

Abdul Hakim, khalifa, Dr. The prophet and His Message. Intitute of Islamic culture, Lahore 1987.

Altekar, Anant Sadashiv. The Position of women in Hindu cuvilization. Motilal Banarridass Delhi India 1962.

Barnaby Rogerson. The Prophet Mohsammad. Abacus, London 2004.

Bosworth Smith. Mohammad and Mohammadanism. London 1874.

Buttler` A.J. Arbs' Conquest of Egypt. Clarendon Press, Oxford 1978.

Elisabeth Whitelegg. The changing Experience of Women. Oxford, London 1982.

Emil Dermenghem. Life of Mahomet (Muhammad). Longman & Todd, London 1984.

Fethullah Gulen. Prophet Muhammad as Commander, Kaymark, Turkey 1998.

Fida Husaain, Wives of the prophet. Sh.Muhammad Ashraf, New Anarkali, Lahore 1983.

G. Simpson Marr. Sex in Religion. Allen and Unwin, London 1936.

Ghandhi, M.K. The Story of My Experiments with Truth. Beacon Press, Boston 1957.

Gustave Le Bon. The Civilizan of Arabs. Firmin- Dedat, Paris 1884.

Hartpole Lecky. Histoty of European Morals. Varguard Press, New York 1926.

Henry Williams. The Historians` History of the World. Hooper & Jackson, London 1907.

Jameelah Jones and Bilal philips. Polygamy in Islam. IIPH, Riyadh, Saudi Arabia2005.

J. E Calre McFarlane. The case of polygamy. Search Pub co.London 1934.

John Glubb, Sir. Life and Times of Muhammad. Hodder & Stoughtan, London 1970.

Karen Armstrong. Muhammad_ A Biograpgy of the Prophet. Harper SanFrancisco, N.Y 1993.

Margoliouth, D.S. Muhammad and the Rise of Islam. Putnam, New York 1905.

Majad Ali Khan, Dr. Mohammad the Final Messenger. Sh.Muhammad Ashraf, Lahore 1983.

Maxime Rodinson. Mohammad. Pantheon Books, New York 1971.

Nadvi, Abul Hasan Ali. Islam and The World. Sh.Muhammad Ashraf. Lahore 1982.

Peters, F.E. Mohammad and the Origins of Islam. State university of New York Press 1994.

Shiv Sharma. Philosophy of Islam. Motilal Banarsidoss, Delhi, India 1999.

Watt, W. Montgomery. Mohammad at Madina. Oxford, Karachi 1981.

Wester March, E.A The Future of Marriage in Western Civilization. Mc Millan, London 1936.

William Mure. The Life of Mohammed. J. Grant, Edinburgh 1912.

Encyclopaedia of Islam by J. Horowitz 1904.

Encyclopaedia Britannica.

اپنی ماں
فاطمہ بیگم دے ناں
جسہاں پنجابی دا پہلا اکھر بولنا سکھایا
تے

اپنے محسن
الیاں گھمن دے ناں
جسہاں پنجابی دا پہلا اکھر لکھنا سکھایا